

*MASTER
NEGATIVE
NO. 93-81393-2*

MICROFILMED 1993

COLUMBIA UNIVERSITY LIBRARIES/NEW YORK

as part of the
"Foundations of Western Civilization Preservation Project"

Funded by the
NATIONAL ENDOWMENT FOR THE HUMANITIES

Reproductions may not be made without permission from
Columbia University Library

COPYRIGHT STATEMENT

The copyright law of the United States - Title 17, United States Code - concerns the making of photocopies or other reproductions of copyrighted material.

Under certain conditions specified in the law, libraries and archives are authorized to furnish a photocopy or other reproduction. One of these specified conditions is that the photocopy or other reproduction is not to be "used for any purpose other than private study, scholarship, or research." If a user makes a request for, or later uses, a photocopy or reproduction for purposes in excess of "fair use," that user may be liable for copyright infringement.

This institution reserves the right to refuse to accept a copy order if, in its judgement, fulfillment of the order would involve violation of the copyright law.

AUTHOR:

TONGIORGI, SALVATOR

TITLE:

INSTITUTIONES
PHILOSOPHOCAE.

PLACE:

BRUXEILES

DATE:

1873

Master Negative #

93-81393-2

COLUMBIA UNIVERSITY LIBRARIES
PRESERVATION DEPARTMENT

BIBLIOGRAPHIC MICROFORM TARGET

Original Material as Filmed - Existing Bibliographic Record

140 Tongiorgi, Salvator.
T61 Institutiones philosophicae. 5th ed.
Bruxelles 1873. D. 3 v.

401978 Contents

v.1 Logica.

v.2 Ontologia; cosmologia.

v.3 Psychologia; theologia.

Restrictions on Use:

TECHNICAL MICROFORM DATA

FILM SIZE: 35


REDUCTION RATIO: 11x

IMAGE PLACEMENT: IA (IIA) IB IIB

DATE FILMED: 5.10.63 INITIALS CS

FILMED BY: RESEARCH PUBLICATIONS, INC. WOODBRIDGE, CT


VOLUME 1




AIIM

Association for Information and Image Management


1100 Wayne Avenue, Suite 1100
Silver Spring, Maryland 20910
301/587-8202




Centimeter




Inches



MANUFACTURED TO AIIM STANDARDS
BY APPLIED IMAGE, INC.





Columbia University
in the City of New York

LIBRARY





INSTITUTIONES PHILOSOPHICÆ.



Volumen I.

—
PROPRIÉTÉ. DÉPOSÉ AU VŒU DE LA LOI.
—

INSTITUTIONES
PHILOSOPHICÆ

SALVATORIS TONGIORGI

ET SOCIETATIS JESU

PHILOSOPHIÆ PROFESSORIS

IN COLLEGIO ROMANO EJUSDEM SOCIETATIS

—
Editio quinta.
—

VOLUMEN I.

—
LOGICA
—



BRUXELLIS
EXCUDEBAT H. GOEMAERE
SUMMI PONTIFICIS TYPOGRAPHUS.

—
1873

[illegible]

PRÆPOSITUS GENERALIS SOCIETATIS JESU.

Cum opus, cui titulus : *Institutiones philosophicæ. Volumen I. Logica*, a P. Salvatore Tongiorgi nostræ Societatis sacerdote lingua latina conscriptum, aliquot ejusdem Societatis Theologi, quibus id commisimus, recognoverint, ac in lucem edi posse probaverint ; facultatem damus ut typis mandetur, si iis, ad quos pertinet, ideo videbitur. In cuius rei fidem has litteras manu nostra subscriptas et sigillo nostro munitas dedimus.

Romæ, die 25 aprilis 1861.

L. † S.

PETRUS BECKX.

IMPRIMATUR.

Fr. Hieron. Gigli O. P. S. P. A. Magister.

IMPRIMATUR.

Fr. A. Ligi O. M. C. Archiep. Icon. Vicesg.



APPROBATIO ILL^{ISS.} AC REV^{ISS.} DOMINI EPISCOPI BRUGENSIS.

Institutiones Philosophicæ quas R. P. Tongiorgi S. J. P. et in collegio romano philosophiæ professor, alumnis suis dictavit et typis romanis nuper descripsit, tanto pondere doctrinæ, tanta rationis vi et perspicuitate sermonis eminent, quinimo tam eximio opinionum delectu præstant, ut eas, præ cæteris, in usum scholæ philosophicæ Minoris nostri Seminarii Rollariensis adoptaverimus.

Brugis, 8 septembris 1862.

† J.-B., EPISCOPUS BRUGENSIS.

Illust. ac Rev. Dominus Episcopus Leodiensis has *Institutiones* pariter adoptavit pro schola philosophica Minoris sui Seminarii Sancti Trudonis.

121432



APPROBATIO ILL^l AC REV^l DOMINI EPISCOPI LEODIENSIS.

Eximie Domine,

Jampridem nobis significaveras, te valde cupere, ut in manus discipulorum tuorum liber de disciplinis philosophicis ratione scholastica digestis traderetur, qui his dotibus excelleret, quibus ejus generis tractatus præcipue commendantur. Ut his tuis votis respondeamus, Institutiones R. P. Tongiorgi in Collegio Romano professoris, cujus ipse lectiones non sine emolumento ac laude per tres annos hausisti, præ cæteris optavimus, quia præclari hujus auctoris scripta philosophica eas omnes dotes, quas nobis enumerasti, exhibent, eruditorum quidem virorum et nominatim doctissimi DD. Malou, episcopi Brugensis, sententia, quorum consilio usi sumus. Præstant enim illæ Institutiones facilitate sermonis, ratiocinii perspicuitate et firmitate, sana atque eximia doctrina; eas opiniones psychologicas et ontologicas exhibent, non quæ vanam novitatem redolent, sed quas docta scholæ catholicæ corona tradit, tacente vel approbante Ecclesia. Clarissimus auctor, ut qui in nulla re philosophica peregrinus, quæstiones cosmologicas erudite enodat; et eos, quos movet incredulitas hodierna, errores præcipuos summa perspicuitate reteggit, summa rationis vi insectatur ac perstringit.

Itaque spero fore ut discipuli tui, his Institutionibus imbuti, te duce veram solidamque philosophiam adipiscantur.

Datum Leodii hac 10 Mali 1862.

† THEODORUS, EPISC. LEODIEN.

Reverendo admodum Domino J. SAAL, S. Theologiæ ac Philosophiæ doctori, in Seminario minori Trudonopolensi disciplinarum philosophicarum professori.

Lectori benevolo.

Cur ad novam hanc institutionum philosophicarum editionem animum adjecerim, paucis accipito. Cum prima editio anni superioris jam pene exhausta esset, pluriumque collegiorum ac seminariorum postulationibus satisfieri oporteret, quæ, romanæ, ut existimo, amore doctrinæ, iis jam uti cœperant, vel uti se velle significaverant, alterius editionis adornandæ consilium jam ante susceperam, occasionem opperiens qua id efficere commode possem. Nuperrime vero acceptis litteris, quibus nuntiabatur aliquot tum in Germania tum in Belgio seminaria meas institutiones præoptasse sibi, ac petere ut in suorum commodum alumnorum denuo typis mandarentur, non potui quin adeo propensæ in opus illud qualecunque meum voluntati non prompte facerem satis.

Cæterum, id quod efficere meum erat, priorem editio-

nem sedulo recognovi, ac nullam prætermisi curam, ut sphalmata quæ in eam irrepserant, emendarem. Plura perpolivi, illustravi, clarius expressi, accuratius exposui: nonnulla quodque adjeci, alia in meliorem formam redegi. Ac quemadmodum nullam a me officii mei partem præteritam neglectamque esse sum conscius, ita confido fore ut vicissim tu hanc studii mei diligentiam æqui bonique pro humanitate tua consulas. Deum optimum maximum tibi studiisque tuis propitium ex animo adprecor. Vale.

Præfatio primæ editioni præfixa.

Institutiones philosophicas, quas in auditorum meorum commoditatem prelo lithographico jam edidi, nunc et moderatorum hortatu, et quia a quibusdam illas desiderari scio, typis cudendas existimavi. Etsi enim pauci fortasse erunt qui labore hoc meo uti velint, tamen in ea re in qua nemini noceas, vel perpaucis nonnihil prodesse, pulchrum mihi videtur indolisque non pœnitendæ. Quod si quis forte primo oculorum incursu miretur operis prolixitatem, hic mirari desinet simul ac noverit, apud nostrum hoc collegium integrum philosophicæ disciplinæ orbem, quemadmodum et olim apud veteres, in solidum triennium circumduci; primoque anno duas quotidie horas logicæ et metaphysicæ generali destinari, duobus vero insequentibus annis unam horam quotidie in speciali metaphysica impendi, ut omittam interim cum nobilissimam illam philosophiæ partem, quæ de moribus disputat, tum disciplinas cæteras, physicam experimentalem, et mathesim, quibus singulis in ordinata studiorum partitione suus est locus prorei dignitate constitutus. Porro laxiora hæc metaphysicæ spatia haud facile, opinor, reprehendet is, qui cum sapientibus viris

quamplurimis summorum principiorum momenta in bonam malamque partem cogitatione attigerit, et abditam fundamentalium veritatum sedem habeat cognitam et exploratam. Quamvis nec illud profecto est omitendum, logicam et metaphysicam ætate nostra multo patere latius, quam anteactis sæculis. Etenim super ea quæ veteres his nominibus arcte designabant, recepto deinde usu, accreverunt primo cuncta prorsus quæ de Anima et de Deo inscribi, tractarique seorsum solebant; tum magna pars earum disputationum, quæ in physica id temporis agitabantur: quibus veterum studiis magnam deinde accessionem partim ipsius scientiæ processus, partim nonnullarum mentium deliramenta contulerunt. Hæc igitur qui cogitet apud se, is de mole voluminis, ut spero, haud severe judicet: præsertim si noverit, me ne illud quidem inficiari, esse in hoc opere nonnulla quæ privatæ discipulorum lectioni commode relinqui possunt, ut et adolescentulis studiosioribus pabulum, et publicis lectionibus modus adhibeatur. Attamen non id mihi arrogo, non id spero, neque laboro, ut ab omnibus approber. Est multa ingeniorum cunctis in rebus varietas; est in his quoque studiis justa quædam et probabilis libertas. Unusquisque laudabiliter graditur, dummodo via et ratione, dummodo constanter ad veritatem, dummodo quantum in ipso est, cum delectu rerum, cum perspicuitate ordinis, cum soliditate doctrinæ, cum utilitate et profectu discentium. Novitatem vero nec aspernamur severius, nec aucupamur avidius: sed veritati, comitique veritatis utilitati unice inserviendum duximus. Consilium hoc certe non improbabunt sapientes; quemadmodum ne illud quidem, ut arbitror, quod in abstractionibus metaphysicæ principiiis illustrandis, et in supremis theorematis constabiliendis aliquanto longiorem operam collocarim. Cœperunt enim plerique

omnes volitantibus per amœna tantummodo placita philosophiis diffidere, graviioresque tractationes desiderare; sentiunt principiiis humanam regi mentem, factaque principiorum vicem supplere non posse. Jam vero nulla humanæ menti proposita est investigatio gravior, abstractior, et implicatior, quam quæ in summis metaphysicæ principiiis, in quibus omnium disciplinarum fundamenta latitant, expendendis seligendisque versatur: vix enim unquam impune, vix sine multiplici consequentium deinceps errorum peste humanum ingenium in iis deerare a veritate consuevit.

Erunt fortasse qui me nimis antiquum, antiquisque philosophis plus æquo tribuentem criminantur. Quibus ego respondeo, me veritatis tantummodo studiosum semper exstitisse, veritatem vero nulli sæculo se addixisse, nec antiquam esse nec novam, sed omnibus ætatibus benigne affulgere: itaque in deligendis viæ comitibus aut ducibus, nunquam me subduxisse rationem temporis quo floruerunt, sed eos semper habuisse potiores, qui meo iudicio propius ad veritatem accessissent. Erunt etiam qui contra sentiant, et me idcirco reprehendant, quod cum animum ad doctam antiquitatem appulisse videar, identidem tamen, velut recentiorum studiorum illecebris captus, recidam in nostra hæc tempora. Quibus rursus respondebo, me veritatis unice diligentem, eo semper deflexisse cursum, ubi præluce mihi veritas videbatur; et in rebus præsertim physicis existimasse ab exploratissimis naturalium scientiarum placitis, in quæ jam pridem omnes illarum cultores magno consensu concessere, mihi nullo modo esse discedendum, maxime cum nulla id evidens ratio exigere videatur. Neque tamen in hac tota philosophandi methodo, qua vitatis utrinque excessibus medium quemdam cursum tenere constitui, sic meus unquam fui, ut nullos

habeam duces quos sequar, nullos comites quorum societate confirmer; et ut cætera omittam, ipsa me sustentat hujus almæ Urbis auctoritas quæ bonorum studiorum christianæque veritatis altrix et custos, sicut veterem sapientiam nunquam deseruit, ita probata recentiorum inventa nunquam repudiavit. Verum hæc hactenus.

Tu interim, lector, si quid bonæ frugis in hoc opere invenies, id bonorum omnium auctori acceptum referas, et in tua commoda transferas opto; quæcunque vero minus bona minusve accurate dicta offendes, ea mihi libens condonabis, et pro tua sapientia in melius vertes. Vale.

*Rogatus sum ut, quæ minus necessaria ducerem, asterisco * prænotarem, in usum præsertim eorum qui breviori tempore philosophiæ studium absolvunt. Id, quoniam placuit, suis in locis factum reperies.*

PROLEGOMENA.

I. Philosophia, si etymon attendas, est *amor* seu *studiosa inquisitio sapientiæ*; sed usurpatur vox hæc pro ipsa *sapientia* quam inquit philosophus (1). Res vero quæ philosophiæ nomine ex perpetuo communique usu significatur, est quædam scientiarum complexio, quæ nobilissimam hanc appellationem sibi mereri visa est. Ad quam appellationem illustrandam et vindicandam duo quærenda sunt: 1° quid sit sapientia; 2° cur complexio illa scientiarum sapientiæ nomine cohonestetur.

II. Quoad primum adverte, rerum cognitionem, qua intellectus humani perfectio ac vita constat, duplicem esse. Primo enim vel propria experientia vel aliena auctoritate, quæ sunt, quæ fiunt, quæ fieri possunt aut debent apprehendimus: secundo autem ad horum omnium causas assurgere possumus, earumque natura, viribus, ordine deprehensis, intelligere cur et quomodo aliquid sit, cur hoc potius quam alio modo sit. Prima illa cognoscendi ratio *historica* vocari solet; hæc autem altera, quæ multo nobilior est, *scientifica*.

III. Si quis autem in quopiam rerum genere perscrutando ad ultimas in eodem genere causas rationesque pervenerit, is in eodem genere *sapiens* appellatur (2). Sic dicitur sapiens medicus, sapiens politicus, sapiens historicus, qui de iis quæ hujusmodi scientiis subsunt, non ex immediatis tantum causis, sed ex ultimis novit decernere. Qui vero rerum generatim omnium rationes ultimas cognitione assecutus, ab iis principia desumit, unde de rebus judicet ac disponat, et intelligat cur sint, cur tales sint, cur sic operentur, cur talem ordinem ad invicem servant, is absolute et impliciter sapiens dicitur. Sapientia igitur in genere est *rerum cognitio per rationes ultimas*.

IV. Quod ad alterum attinet, hic quoque animadverten-

(1) Hujus vocis originem vide apud Tullium. *Tusc.* lib. V, c. III.

(2) Cf. Arist. I, *Met.* et VI, *Eth.*

dum est, sapientiam hanc universalem duobus modis intelligi posse. Primo quidem ut in infimis rerum speciebus singillatim versata cognitio, a propriis uniuscujusque rationibus per medias ascendens, ad supremas usque et rebus omnibus communes provehatur: secundo vero ut rerum omnium solummodo in universum rationes illas altissimas ac maxime universales perscrutetur, quin ad medias infimasque singillatim descendat. Jam si primo illo modo sapientiam accipias, ea profecto non est peculiaris quædam complexio scientiarum, sed scientiarum prorsus omnium collectio, imo aliquid humanis omnibus scientiis longe majus. Scientiæ enim omnes aliquam rerum speciem ejusque rationes sive infimas sive medias sive altissimas considerant. Hinc Plato, ac post eum Tullius (1) immensam hanc humanoque ingenio majorem rerum sciendarum amplitudinem sapientiæ nomine complectentes, philosophiam, i. e. sapientiam definierunt: *rerum divinarum et humanarum, causarumque quibus hæ res continentur, scientiam*. At si sapientiæ notionem iis quos diximus limitibus constringas, sapientia est peculiaris quædam disciplina a cæteris distincta, omniumque veluti corona scientiarum. Hoc sensu intellecta sapientiæ appellatio collectioni illi scientiarum, quam vulgo philosophiæ nomine significamus (1), jure meritoque tribuitur. Etenim hujusmodi scientiæ, hoc revera sibi proprium habent, ut rerum omnium rationes, quæ sub diversis respectibus ultimæ sunt, considerandas suscipiant.

V. Sane objecta omnia quorum potest humana mens rationes inquirere, ad hæc revocantur: 1^o ad ea quæ sunt, vel esse possunt: 2^o ad ea quæ fiunt, vel fieri possunt tum in rebus inanimis, tum in animatis, cujusmodi est homo: 3^o ad ea quæ ab homine ipso fieri debent, aut ut fiant conveniunt.

Jamvero quum 1^o eorum quæ sunt rationes ultimas quæris, vel quæris ultima principia *intrinseca*, vel ultima principia *extrinseca*. Si in intrinsecorum ordine principiorum ultimum quæris, ipsum est *entis ratio*, cum iis omnibus quæ enti universim spectato conveniunt. Si quæris ultimum in

(1) De offic. lib. II, c. II. Cf. Suarez, Met. disp. I, sect. V, § VII.

principiis extrinsecis hoc est ens independens et necessarium, quod est *Deus*.

2^o Eorum quæ in rebus inanimis fiunt, ratio ultima continetur *generalibus naturæ corporeæ viribus ac legibus*: quæ in rebus animatis accidunt, a *natura ac facultatibus* earumdem ultimo pendent.

Postremo 3^o eorum quæ facere homo debet duplex est genus: alia enim operatur intellectu quo tendit ad veritatem, alia voluntate qua tendit ad bonum. Jam operationum intellectus normæ supremæ, ac veluti exemplares causæ, sunt *regulæ recte judicandi*, operationum voluntatis *lex suprema honestatis*.

Igitur rationes rerum ultimæ ad sex istas revocari possunt; quæ sunt *entis ratio, Deus, leges physicæ, natura animi, regulæ recte judicandi, lex honestatis*.

VI. Atqui scientiæ illæ, quas vulgo philosophiæ nomine comprehendimus, hæc ipsa sex capita singillatim expendenda sibi assumunt.

Etenim ens et omnia, quæ enti universim spectato conveniunt, objectum est *Ontologiæ*. De Deo omnium auctore atque ordinatore pertractat *Theologia*. Vires legesque generales naturæ corporeæ inquirunt partim *Cosmologia*, partim *Physica experimentalis* cui *Mathesis*, tanquam auxiliaris accedit. Res animatas considerat *Psychologia*. Recte judicandi normas tradit *Logica*. Honestatis demum supremam legem *Scientia moralis* expendit. Ergo concludere licet, illud scientiarum systema quod philosophiæ nomine communiter designamus, sapientiæ nomine jure cohonestari (1).

VII. Ex his colligitur.

1^o Philosophiam recte definiri: *scientiam quæ de ultimis rerum omnium rationibus universim disceptat* (2).

(1) Simili fere argumento hoc ipsum demonstrat S. Thomas in *Proem. Eth. Arist.*

(2) Quæres, quomodo de ultimis rerum rationibus scientia possit haberi: siquidem scientia est cognitio per causas (II), ultimæ autem rerum rationes nullam causam habent: Respondeo, in primis rerum rationes quas philosophia persequitur, esse quidem ultimas, at quemadmodum supra diximus, sub diversis respectibus (IV): adeoque id quod in certo quodam ordine ultima causa est, posse

2° Quid significant illa quæ frequenter recentiores in ore habent: *philosophia historiae*, *philosophia grammaticæ*, vel *artium*, et alia hujusmodi? Nihil aliud profecto significant, nisi scientiam talium rerum quæ ad sapientiam usque devenit, videlicet earum rerum cognitionem per ultimas causas (III).

3° Reliquas omnes naturales scientias philosophiæ tanquam omnium fundamento aliquo modo subordinari, quatenus reliquarum scientiarum objecta philosophiæ objecto i. e. ultimis causis subordinantur.

VIII. Quanta sit philosophiæ dignitas, utilitas, pulchritudo atque suavitas, quam sit illa humanæ societati ac reipublicæ necessaria, imo sanctissimæ quoque religioni ac christianæ fidei quam utiliter subserviat, non est in præsentī cur longa oratione prosequar. Illud unum animadvertam, quæcunque mala sive in Christi ecclesia sive in humana civili-que societate hominum vitio grassata sunt, ea fere omnia proxime vel remote a philosophico aliquo errore dimanasse. Quemadmodum enim vis procellarum ac moles in summis montibus originem habet, ita religiosæ omnes ac politicæ perturbationes ex editis philosophiæ regionibus erumpunt. Ut vere dicere liceat binas illas facultates quæ a rerum humanarum usu videntur maxime remotæ, philosophiam inquam et poesim, arctissimo tamen cum his ipsis vinculo nexuque conjungi. Ut enim philosophia opinionum, legum ac morum humanorum prima formatrix est, ita poesis fidelissima horum omnium expressio est.

IX. Si de philosophiæ laudibus impune silere possumus, de philosophiæ historia silere hoc loco plane debemus. Philosophiæ enim historia continetur doctrinarum, quæ penes philosophos aliquando invaluerunt, expositione et judicio; quæ duo vel ad ipsam philosophiæ tractationem pertinent,

in alio ordine sui causas habere. Sic v. gr. leges physicæ sui causam habent in Dei sapientia et voluntate. Respondeo secundo, cum unaquæque scientia objectum sibi proprium habeat, in essentia ipsa seu natura hujus objecti rationem esse cæterorum quæ in objecto sunt, quamque scientia ejus objecti persequitur. Sic ex Dei essentia omnia ejus attributa deducimus. V. Suarez. *Met. disp.* I, Sect. V, § 37.

vel eam supponunt expletam. Ut aliquid brevissime dicam, tota philosophiæ historia huc redit: ante christianam revelationem nunquam fere defuisse qui partim ex insitis humano ingenio viribus, partim primitivæ revelationis reliquiis utentes, ad supremas veritates se attollerent. In his non paucos sive subtilitate disputationis, sive doctrinarum nobilitate excelluisse, multo plures gravissime errasse, præsertim in iis quæ ad mundi originem, quæ ad Dei naturam et ad hominis finem, officia, jura pertinent; neminem vero exstitisse, qui de his gravissimis quæstionibus plene ac pro dignitate ante obortam per Christum lucem disputaret. Post christianam vero revelationem quicumque ejus dogmata impugnarunt, aut ab ejus magisterio ac tutela desciverunt, eos in obsoletos sophistarum errores recidisce, ac pro novis inventis abjecta jam indorum et græcorum deliramenta venditase. Unde colliges quantas naturali scientiæ, ac philosophiæ præsertim, revelationis divinæ splendor attulerit utilitates, quantumque intersit et humano ingenio religioni esse obnoxium, et philosophiæ universæ esse christianam.

X. Christianæ porro philosophiæ officium triplex est: 1° ut nihil doceat quod revelatis doctrinis, iis etiam quæ rationis vires exsuperant, utcunque oppositum sit; 2° ut in illis de quibus divina revelatio conticescit, ita opinetur, ut nunquam a sentiis quas amplectitur, ad conclusiones revelatis veritatibus oppositas ratiocinando deveniri possit: imo 3° ut quæ revelatio statuit quæque ratio humana suis quoque viribus assequi potest, diligenter explanet atque demonstret, iis vero quæ rationis captum superant, quantum fieri potest, viam sternat ut hominum animis suavius illabantur ac firmiter inhæreant. Quæ quidem omnia rationi maxime consona esse, nemo non videt. Veritas enim veritati non potest opponi; sed quidquid veritati opponitur falsitas est. Cum igitur ea quæ divinæ auctoritati credimus, certissimam habeant apud christianum veritatem, quæcunque his opponuntur, æquissimo profecto falsitatis præjudicio damnentur necesse est.

XI. Cæterum, si hæc excipias, nulli peculiari philosophorum scholæ mancipata, nulli doctrinæ mordicus inhærens christiana philosophia est, sed libera plane ut id amplectatur quod sibi verius videtur. Revera primis ecclesiæ sæculis patres nostri eclecticum quemdam profitebantur (1), quam eorum plerique ad platonicas theorias inclinarent: media ætate scholastici multo impensius Aristotelem sectati sunt, imo, demptis quæ Aristoteles christianæ fidei contraria docuit, fuere penitus aristotelici: a sæculo XVII et deinceps, christianorum scholæ in varias abiere sectas: in præsentem vero ad veteres scholasticos quoad multa doctrinæ capita redire videntur. In hac tamen libertate hoc sibi præ primis ante oculos christianus philosophus habere debet, quod a christiana institutione sponte dimanat, ut a tumore illo ac fastu quo propria solum æstimantur, aliena omnia despiciuntur, quam maxime potest sit alienus; dumque veritatem colligit ubicunque eam sibi reperisse videatur, dum eam pro viribus tuetur, omnes tamen revereatur, omnium labores in pretio habeat, paratus semper rationibus cedere, si quæ meliores afferantur.

XII. Si quæras, quorumnam cæteris præferenda placita nos existimemus, quosve duces sequamur, aperta et facilis erit responsio: in his omnibus quæ ad physicas res pertinent vel cum physicis connectuntur, recentiorum theorias, ut par est, nos sequi; in cæteris ad veteres scholasticos esse propensos. Quemadmodum enim in physicis disciplinis ab observationis et experientiæ recta via schola vetus aberravit, in quam schola recentior tanto cum successu sese recepit, ex quo hæc illi absolute superior est; ita vicissim in cæteris, quæ ab experientia non pendent, illa huic soliditate doctrinæ, acumine disputandi, analysis profunditate ac logicæ severitate longe antecellit. Faxit Deus O. M. ut ex veterum

(1) « Philosophiam autem non dico stoicam nec platoniam aut epicuream et aristotelicam, sed quæcunque ab his sectis recte dicta sunt, quæ docent justitiam cum pia sententia, hoc totum selectam ἐκλεκτικὴν dico philosophiam. » Clemens Alexandrinus, *Strom.* lib. I, c. VII. Non est cur addam hunc christianorum patrum eclecticum a quorundam recentiorum eclecticismo longe esse diversum: id quod vel ex adductis verbis aperte innotescit.

thesauris, et ex opibus, quas nostra ætas congegit, aliquid in usum nostrum atque in auditorum nostrorum commoda deducere non inscite possumus.

XIII. Restat ut usitatas philosophiæ partitiones innuamus. Nativa philosophiæ partitio, in ea conditione quam nunc obtinet, ea est quam supra (IV) tradidimus. Porro ex enumeratis ibi disciplinis, eæ quæ res a sensibus et vulgari cognitione maxime abstractas considerant, solent complexivo nomine vocari. *Metaphysica*. Ex quo receptissima philosophiæ divisio in *Logicam*, *Metaphysicam*, *Physicam*, *Scientiamque moralem*.

Veteres autem cum Platone omnes philosophiam universam in tres tantum partes dividebant, videlicet in philosophiam *rationalem*, *naturalem*, *moralem*. Rationalis logicam, naturalis physicam cum metaphysica, moralis eadem fere quæ apud nos, complectebatur. Quare partitio hæc a superiori revera non differt.

Juniores nonnulli philosophiam dividere solent in *theoreticam* et *practicam*; ita ut illa physicam cum metaphysica, hæc logicam cum morali scientia complectatur.

At divisio quæ nostra ætate facto ipso constituta est, et a philosophiæ præsentem statu inducta, a diversitate instrumentorum quibus in diversis scientiis utimur, originem ducit. Quædam enim idearum consideratione et analysi continentur, quædam experimentis, ac mathesi peraguntur. Hinc binæ philosophiæ partes, altera *rationalis*, altera *experimentalis* et *mathematica*. Nostri muneris est, ut philosophiam rationalem tradamus.

XIV. In qua tradenda unde incipiendum sit minime nobis dubium est. Inde nimirum incipiendum ducimus, unde veteres omnes et magna juniorum pars exordium sumit, videlicet a logica. Nam, ut opportune notat s. Augustinus (1): « Quando (ratio) transiret ad alia fabricanda, nisi ipsa sua prius quasi quædam machinamenta et instrumenta distingueret, notaret, digereret, proderetque ipsam disciplinam disciplinarum, quam dialecticam vocant? »

(1) *De Ordine*, lib. II, c. XXXVIII.

INSTITUTIONES LOGICÆ.

PRÆNOTIONES.

1. Logica, a λογος ratio, est *disciplina rationalis*, seu institutio quædam rationis, qua ipsa dirigitur ut in suis operationibus recte procedat. Tota autem mentis rectitudo rectitudine judiciorum continetur, quemadmodum erratum omne iudiciis abnormibus. Ad hoc ergo institutione et disciplina eget ratio, ut recte semper judicare queat. Quare logica definiri potest: *institutio rationis ad recte judicandum*. Quæ quidem institutio duplex est, *naturalis* et *artificialis*. Naturalis, quatenus a natura magistra procedit, artificialis, quatenus arte perficitur.

2. Facultas recte judicandi nulli hominum deest. Hæc enim facultas est ipsa ratio, cujus essenziale constitutum est, ut recte judicandi normas et principia cognoscat. Quicunque igitur ratione utuntur, hasce normas cognoscunt et adhibent, ipsa duce natura, usuque tali naturalem ad recte judicandum aptitudinem plus minusve perficiunt, et consuetudine firmant. Itaque naturalis hæc regularum, quæ ad recte judicandum necessariae sunt, cognitio, et hic recte judicandi habitus spontaneo exercitio comparatus *logica* dicitur *naturalis*.

3. Quæ quidem ad communes tum privatæ, tum socialis vitæ necessitates plerumque hominibus sufficit: cæterum non ita, ut quum naturali solum logica utuntur, vel in errorem nunquam ipsi labantur, vel ab aliis nunquam in fraudem pertrahantur. Quum vero a sensilibus mentem avocare coguntur, vel quum aliquid quod subtilius sit, aut multiplex, aut implexum sese offert excutiendum, frequentissime, imo communiter contingit, ut ratiocinando a veritate deflectant, aut saltem fallaciis propriæ mentis circumventi, dubii ancipitesque hæreant, ac si forte errorem detexerint, ne tum

quidem extricare se ab adversis ratiocinationibus possint. Hic igitur erroribus hisque dubitationibus commoti philosophi in seipso accuratius inspicere cœperunt, ac normas omnes, quas mens sponte sequitur, totamque ratiocinatio naturam subtilius investigare, tum motiva quæ ad recte judicandum rerum natura postulat, singillatim notare, causas errorum inquirere, fraudesque quibus fuerant decepti retexere. Sic iis quæ incomplete et confuse cognita naturæ magisterio debemus, complete cognitæ et distincte explicatis, systema quoddam regularum tradi cœptum est, quæ rationi veritatem investiganti tutam ac facilem viam aperirent. Et hæc est *logica artificialis*, quam tradendam in præsentis suscipimus. Eadem *dialectica* quoque vulgo appellari solet, i. e. *ars disserendi* a græco verbo διαλέγεσθαι *disserere*; quanquam ea vox a Platone (1) multo latius, ab Aristotele (2) arctiori significatione usurpata sit.

*4. Sane hoc hominis proprium est, qui præ cæteris animalibus ratione pollet, ut in seipsum reflectens, actus facultatum suarum rationis iudicio regere possit, ut ii facile et ordinate perficiantur. Hac reflexione omnes artes genitæ sunt. Ars enim juxta s. Thomæ definitionem (3) est *ordinatio rationis, qua per determinatam media ad debitum finem actus humani perveniunt*. Quemadmodum igitur ratio naturales facultates loquendi v. g. persuadendi, canendi, bellandi aliasque ordinans, artes invenit grammaticæ, rhetoricæ, musices, rei militaris, cæteras; ita reflectens in se ipsam, ac suosque ipsos actus in hunc finem dirigens, ut vitatis erroribus ad recta iudicia facile ac tuto devenire posset, logicæ artem constituit. In hoc igitur logica a cæteris artibus differt, quod illæ circa actus facultatum rationi subditarum, hæc circa ipsos rationis actus versatur.

*5. Ut ars omnis in *docentem* et *utentem* distingui solet, ita et logica. Ars docens est complexio dictaminum ac præceptorum, quæ recte perficiendi operis modum determinant. Ars

(1) De Rep. VII.

(2) Top. C. 1.

(3) In I Post. sect. 1.

utens est habitus rationis, quo normas adhibemus acceptas, videlicet acquisita facilitas operis dirigendi juxta normas præscriptas. Logica quam tradimus, docens est, ut patet; utens ad discentem pertinet, et in scientiarum omnium studio potissimum habet locum.

6. Ex dictis manifestum est :

1^o *Finem* hujus disciplinæ, seu munus ejus proprium esse, ut mentem expeditam faciat ac promptam ad recte in omnibus judicandum.

2^o *Objectum* circa quod versatur, esse rationis operationes, quatenus hæ certis regulis in eum finem dirigi possunt. Quia in re logica differt ab ea psychologię parte, in qua operationum mentis intimam naturam perscrutamur.

3^o *Medium* quo utitur ad finem suum assequendum, esse præcepta quædam, quibus distincta completaque notio traditur regularum, quas ratio sequi debet, ut ad recta judicia perveniat.

4^o *Perfectionem* quam logicæ naturali affert artificialis, in hoc contineri, quod cum per logicam naturalem hasce regulas incomplete et confuse cognoscamus, eas ipsas per logicam artificialem complete et distincte cognoscimus.

7. Logica, quemadmodum hucusque diximus, est proprie ars. At philosophus logicæ præcepta considerata assumit, eaque ordinat, et ad principia revocat, ostendens evidentibus demonstrationibus, viam quam illa docent, tutissimam ac certissimam esse. Huc logica quum fuerit perducta, dignissima est quæ inter scientias assideat. Igitur logica et ars est, et scientia. Ars quidem quatenus recte judicandi normas præcipit; scientia vero quatenus recte judicandi normas demonstrat.

8. Normæ porro recte judicandi in duplici differentia sunt; aliæ enim necessariae sunt ut rationis operationes rectæ sint in se ipsis, aliæ ut rationis cognitiones sint veræ. Illæ ab ipsa operationum intellectualium natura, istæ ab objectis exsurgunt. Sic logicæ tractatio in duas partes dispesci jam solet, quarum prima logica *formalis*, vel simpliciter *Dialectica*, altera logica *materialis*, seu melius *Critica* vo-

cari potest. Logicam formalem Aristoteles omnium primus methodice tradidit, et scientiæ dignitate donavit, eamque adeo perfecit, ut ei ulterius perficiendæ vix aut ne vix quidem locum posteris reliquerit. Logica materialis recentioribus debetur, quanquam doctrinas quas in eam hi digesserunt, veteres quoque magna ex parte traderent, sparsim tamen et in multis obiter; quia plenior tractationem eorum temporum necessitates non postulabant. Vicissim recentiores multa ex his, de quibus in logica veteres disputabant, ad ontologiam rejecerunt.

9. Non pluribus opus est, ut intelligamus quam sit logicæ studium, iis præsertim, qui ad scientias accedunt, utile, imo veronecessarium. Maxima logicæ utilitas illa est, quam supra innuimus, quod hominem doceat ipsa ratione recte uti, eamque muniat perficiatque facultatem, qua cunctis animantibus præcellimus, qua verum et bonum æstimamus, quæ veluti instrumentum est quo cognitiones omnes comparamus in usumque nostrum convertimus. Artes enim omnes ac scientiæ a ratione procedunt. Igitur ad omnes artes ac scientias utilis est summopere logica, et præ omnibus sapienti optabilis. Hinc summis semper laudibus a sapientibus celebrata est quam et *organum* i. e. instrumentum universale, et *mentis medicinam* ac *magistram*, et *scientiarum clavem*, denique *artem artium* et *scientiam scientiarum* appellarunt.

10. Quare nemo logicæ severitatem fastidio habuit unquam, nisi qui aut alios decipere quæreretur, aut decipi se non curaret. Quot errores, quot calamitates ab hominum genere logica una poterat avertere! Sophismata enim persæpe non speculativa solum, sed et practica sunt. Nec raro accidit, ut unum sophisma multos mortales, imo et integros populos in perniciem adduceret.

PARS PRIMA
QUÆ EST DIALECTICA.

11. Operationes quibus ad veritatem tendit intellectus plures sunt; omnes tamen ad quatuor præcipuas reducuntur, vel iis subserviunt: hæ sunt *apprehensio, iudicium, ratiocinium, ratiociniorum apta coordinatio*. De his logica pura agere debet, ut recte iudicandi intrinsecas normas explanet. Et quoniam ars recte iudicandi vix constare potest sine recte disserendi præceptis, necessario consequitur, simul cum mentis operationibus signa quoque quibus hæ exprimuntur, esse logico considerata; imo hæc potissimum, quia facilius in iis et attentio defigitur, et artis præcepta intelliguntur. Exinde vides, logicam puram in quatuor sectiones sponte dividi, quam partitionem et nos sequemur. Primo apprehensionem ejusque signa, deinde iudicia eorumque expressiones expendemus; tertio loco de ratiocinio et argumentatione disputabimus; ultimo demum de ratiocinii directione ad intentum finem, hoc est de methodo.

LIBER PRIMUS.

CAPUT I.

DE APPREHENSIONE ET IDEIS.

ARTICULUS I.

De apprehensionis notione.

12. Non est nobis in præsentī animus, ut implexam illam et salebrosam de idearum natura et origine quæstionem inquirendo ac disputando dirimamus, sed ut ea solum afferamus, quæ ad logicam usui esse possunt (6, 2^o), hæc ipsa quæ nunc assumimus, suo loco in posterum demonstraturi.

Apprehensio seu perceptio intellectualis, de qua hic loqui-

mur, est *actus quo mens alicujus objecti notitiam accipit*. Hæc objecti notitia continetur ipsius expressione, et quadam quasi similitudine, quæ in ipsa mente gignitur, quæque rei *idea, conceptus, notio* indiscriminatim appellatur. Igitur *idea est similitudo objecti expressa in mente percipiente*. Sic per ideam res transfertur propemodum in mentem, in eaque existere incipit: atque inde factum est, ut mens quum ideam acquirat, *apprehendere, capere, percipere, tenere* objectum dicatur.

Cave autem ne intellectualem hanc objecti similitudinem, quam ideam vocamus, cum sensitiva repræsentatione confundas, aut cum phantasmatibus, quæ mentis humanæ ideis phantasia substernit. Sensatio enim et phantasma externa solum accidentia corporum exhibent. At idea opus est intellectus eas percipientis in objecto notas, quas sensus attingere plane non possunt, nec phantasia referre. Sensationes ac phantasmata sunt nobis communia cum brutis; ideæ solum entis intelligentis propriæ, ex quibus tota hominis nobilitas ultimato dimanat.

13. Id quod percipiendi actus in mente reproducit, quodque idea repræsentat, dicitur perceptionis seu ideæ *objectum*. Distinguendum porro est objectum ideæ *materiale* a *formali*. Etenim res omnis attributiones aliquas affectionesque sibi proprias habet, quæ sunt illius quasi quædam intelligibilia lineamenta, quibus cognoscibilis est ac se manifestare potest. Hæ dicuntur a logicis objecti *notæ*, vel etiam *determinationes*. Quum vero res cognoscitur, id fit quia aliquæ saltem ex his notis menti manifestantur. Res igitur quam perceptio attingit, ut illa est in se, videlicet cum notis omnibus quascunque habet, *objectum materiale* perceptionis est; et res eadem, secundum quod habet notas quibus hic et nunc menti manifestatur, *objectum formale*. Et hoc est proprium ideæ objectum.

14. Cum omnis ideæ constet quibusdam objecti notis intellectis, hæ notæ intellectæ quasi ut quædam ideæ elementa considerantur, earumque complexio ideæ *comprehensio* nuncupatur. Est igitur ideæ comprehensio: *complexio notarum, quæ ideam constituunt*.

Ad hæc: quædam ideæ unum tantummodo individuum exhibent, ut est ideæ *Socratis*, quædam pluribus singillatim individuis repræsentandis pares sunt, ut est ideæ *hominis*. *Amplitudo hæc ideæ in pluribus vel paucioribus individuis repræsentandis ideæ extensio vocatur.*

ARTICULUS II.

De quibusdam mentis operationibus circa ideas earumve objecta.

15. Eas tantum breviter recensebimus, quarum cognitio ad sequentia intelligenda necessaria accidit. Sunt autem

1^o *Attentio*. Ea est *actus*, quo mens se convertit ad rem unam præ cæteris, quas simul percipit, considerandam, ut quum inter multos homines quos video, in eum qui statura vel ornatu excellit, obtutum defigo.

2^o *Abstractio*, quæ attentionis species est. Definitur: *attentio, qua ex duobus vel pluribus natura sua conjunctis, unum sine altero cogitamus*. Hanc operationem abstractionem appellamus, quia dum eam exercemus, unum conjunctorum ab altero cogitatione propemodum divellimus ac separamus. Fit abstractio dupliciter:

a) Quum pars una objecti consideratur, cæteris non attentis. Sic possum de hominis capite aut oculo aut cerebro cogitare, quin de reliquo corpore cogitem.

b) Quum in rei proprietate aut qualitate aut determinatione qualibet mentem sisto, re cui inest neglecta. Sic possum pomi colorem aut figuram attendere, pomo ipso non attento.

*16. Rem, quæ determinatione afficitur, determinationis *subjectum* appellamus, determinationem autem ipsam *subjecti formam*. Quæ appellationes, ut patet, metaphoricæ sunt. Ex eo enim quod res omnes per aliquas suas affectiones se manifestent, per easque solum a nobis cognoscantur, fit ut res concipiamus quasi latentes sub his proprietatibus easque sustinentes. Et ideo rem ipsam vocamus *subjectum*. Has autem proprietates *formas* dicimus, quia quemadmodum materia liquens et amorpha, quum typo constringitur, determinatam ac stabilem formam ab illo recipit; ita res quasi in

se primo indeterminata, accedentibus proprietatibus seu qualitatibus, determinatur, ut talis sit qualis est et non alia. Sic justitia, sapientia, albedo accedentes subjecto homini, faciunt ut sit justus, sapiens, albus.

At cavendum est, ne quod in ordine ideali facit abstractio mentis, id in rerum natura reapse fieri putemus, scilicet ne, quum formas concipimus a subjecto distinctas eique supervenientes et inhærentes, id revera extra mentem habere locum existimemus, aut ita de rerum natura statuamus, quasi reipsa hæc locum haberent. Ex hoc enim errores nonnulli et obscuritas plurima in philosophiam dimanarunt.

17. 3^o *Reflexio*. Quum mens per attentionem ad proprios actus considerandos se convertit, reflectere dicitur, quia in se ipsa reddit, ac se in se flectit. Reflexio igitur est *attentio mentis in proprios actus*. Quæ *psychologica* dicitur, quum mens in proprium actum rediens, eam respicit ut est subjecti modificatio; et *ontologica*, quum in actum reddit respiciens objectum quod per ipsum exprimitur. Ontologica hæc reflexio præstat circa ideas idipsum quod attentio (15) circa idearum objecta. Ille autem attentionis actus qui abstractio nuncupatur (15, 2^o), quum de ideis agitur commodius dicitur *analysis*, quia videlicet unam ideam in sua elementa resolvit.

*18. Animadvertite hoc loco, intellectum, quum in suas ideas reddit, quædam illis attribuere, quæ non conveniunt rebus ut sunt in se, sed solummodo quatenus subsunt mentis apprehensioni, ut quum hominem dicit esse speciem, vel esse subjectum propositionis. Ex quo colliges, quid veteres intelligerent nomine *intentionum primarum et secundarum*.

Intentio hic significat actum cognoscendi, quia per hunc actum intellectus se in objectum quodammodo intendit.

Prima intentio est cognitio directa, qua cognoscimus ea quæ conveniunt rebus secundum se, etiamsi a nemine concipiantur, quod veteres vocant *convenire a parte rei*.

Secunda intentio est quædam cognitio reflexa, qua cognoscimus quæ rebus conveniunt solummodo ob aliquam earum apprehensionem, quod dicunt *convenire per operatio-*

nem intellectus. Et merito *secunda* vocatur, quia intellectus primo in res cogitationem intendit, ac deinde in suas cognitiones.

19. 4^o *Synthesis* est mentis operatio, quæ plures ideas acquiritas in unum componit conceptum. Synthesin hanc pluribus modis exsequimur, de quibus suis locis.

5^o *Comparatio* est operatio mentis, qua ad plures sive res sive ideas attentionem dirigens, modo hanc modo illam considerat, earum inter se relationes inquirens, puta similitudinem, diversitatem, dependentiam, et similes.

Sunt porro relationes quædam inter res quas ideæ expriment, non inter ideas ipsarum, ut est operis dependentia ab artifice: quædam vero inter res et ideas existunt, ut est ideæ cum certo objecto similitudo vel dissimilitudo: quædam demum sunt inter ideas non inter res, ut est binorum conceptuum in ordine mearum cogitationum coexistentia.

Has et similes relationes quum deprehendimus, apprehensionis actum exercemus, quem superiori articulo descripsimus. Nota igitur et ratum habere, apprehensionem bifariam dispesci. Alia est qua rerum notiones absolutas acquirimus, alia qua relationes inter res vel ideas percipimus. Illam veteres *incomplexam*, hanc *complexam* appellabant; nos primam cum recentioribus vocabimus *simplicem*, alteram *comparativam*, ut quæ duorum comparisonem subsequitur. Quum v. gr. unum hominem et dein alterum intueor, binos actus exero simplicis apprehensionis; quum eorum inter se similitudines aut diversitates intelligo, apprehensionem exerceo comparativam.

20. Humani intellectus ideæ triplici ratione considerari possunt. 1^o secundum suam *originem*, spectato modo quo ad eas primo concipiendas intellectus adducitur: 2^o secundum *objectum* quod repræsentant: 3^o secundum *perfectionem* quam assecutæ sunt in objecto repræsentando. Exinde triplex idearum partitio.

ARTICULUS III.

De partitione idearum secundum originem.

21. Si rationem habeas originis, ideæ dividuntur in *intuitivas* et *factitias*. Cartesiani aliique philosophi tertium in hac partitione membrum adjiciendum censent, ideas videlicet *innatas*, quæ vel ab ipsa facultate cogitandi sponte erumpant, vel a Deo immediate fuerint impressæ. Nos suo loco probabimus propositam partitionem adæquatam esse.

Idea intuitiva ea est, ad quam mens determinatur ab ipsa objecti præsentia (1). Intuitio enim est objecti præsentis perceptio. Præsens porro objectum est, quum actu animum afficit. Afficitur vero animus ab objecto, mediante sensu externo vel interno. Hinc idea intuitiva duplex est, alia *directa*, alia *reflexa*.

Directa est illa, cujus objectum fit animo præsens per sensum externum: talis est idea solis, mellis, soni, ect.

Reflexa, cujus objectum fit præsens per sensum internum; quam reflexam vocamus, quia reflexione (18) comparatur: talis est idea doloris, sitis, cogitationis etc.

22. Idea factitia ea est quam mens ipsa sibi format, plures intuitivas ideas simul conjungendo ad aliquod objectum, cujus intuitionem nunquam habuit, sibi repræsentandum. Estque pariter duplex:

Arbitraria, quum ad arbitrium ideæ elementa componuntur, ut idea *rami aurei*.

Discursiva, quum ope discursus seu ratiocinii formatur. Sit exemplo idea *Dei*.

Consideranti facile patet, quantum ideæ factitiæ cognitionum nostrarum limites protendant, quantæque ex iis utilitates ad vitæ usum et ad omnem humanitatem deriventur (2). Opera enim omnia tum liberalium artium tum mechanicarum in ideis factitiis suum habent exemplar suamque originem. Cæterum notandum est, quod supra insinuavimus, ideas

(1) « Illa videri dicuntur, quæ per se ipsa movent intellectum vel sensum ad sui cognitionem. » S. Thomas in *Summa Theol.*, 2^a 2^a q. I, art. IV.

(2) Cf. Galluppi, *Lezioni di Log. e Metaf.* Lez. 84.

omnes factitias elementis tandem aliquando constare intuitivis. Non potest humana mens ullam ideam omnino novam creare, at solum elementa idearum, quas a natura haurit, variis modis componere.

23. Notandum, quasdam ideas partim intuitivas esse, partim factitias, ut idea *amici morbo dolentis* : insuper quasdam ideas intuitivas partim esse directas, partim reflexas, ut idea *proprii corporis* : ac demum nonnullas ideas factitias partim esse arbitrarias, partim deductas, ut sunt ideæ *heroum*, quas in veri similitudinem poetæ carminibus exprimunt.

ARTICULUS IV.

* De normis ideæ factitiæ.

24. Nulla idearum compositio fieri potest, nisi ideæ partiales, quæ in unum conceptum jungendæ sunt, sint ad invicem sociabiles. Consociabilitas porro notarum in hoc est, ut altera alteram non destruat, nec ab eodem subjecto se mutuo excludant : *Dimidius homo* v. gr. *dimidius equus* non habent absolutam hanc repugnantiam, ut nequeant concipi simul conjuncti, utut ea conjunctio naturæ institutis repugnet ; possumus igitur *centaurum* concipere. At *figura circularis* et *figura quadrata* nullo modo possunt in eodem subjecto simul consistere ; quare *circuli quadrati* idea nullo pacto formari potest. Hujusmodi ideæ, quæ, si formari possent, elementis constarent mutuo repugnantibus, vocari solent ideæ *chimariæ* seu *deceptrices*.

25. At enim quandoque quibusdam utimur vocabulis, quibus significare videmur ideam elementis constantem impassibilibus, ut sunt *circulus quadratus*, *Deus corporeus*, aliaque hujusmodi.

Respondeo, in his casibus unum aut alterum accidere : 1º quod talis ideæ elementa non sunt ea quæ voce promissus, sed alia quæ sibi non repugnant. Id contingere potest in allato conceptu Dei corporei. Si enim quis de Deo non cogitat, ut de ente infinito ac simplicissimo, ille sane de Deo non cogitat, sed de ente finito et imperfecto, quod potest utique concipi corporeum : 2º quod si clare distincteque

concipimus res quasdam quæ simul consistere non possunt, certe quantumvis conemur, eas in unum conceptum componere, non valebimus ; possumus tamen de utraque cogitare, et voces, quibus significantur, conjungere.

26. Consociabilitas igitur notarum omnis ideæ factitiæ norma communis est, eamque omnes necessario sequimur. Speciatim vero tum idea arbitraria, tum discursiva proprias sibi habent normas, ad quas exigendæ sunt, ut recte formentur.

Ideæ quidem arbitrariæ norma est notarum quæ conjunguntur, harmonia, ex qua pendet ideæ *pulchritudo*. In hac porra harmonia quærenda ingenium artificum et poetarum maxime exercetur ; in dijudicanda autem facultas illa, quam *gustum* vocant seu *pulchri sensum*, tota versatur. Ideæ vero discursivæ regula ratiocinii legibus continetur. In ea enim formanda, amotis omnibus quæ phantasia suggerit, vel præjudicatæ opiniones obtrudunt, vel ipse pulchri amor desiderat, ea tantum elementa adhibenda sunt, quæ certa aut saltem probabilia principia per rectam ratiocinationem supeditant.

ARTICULUS V.

De idearum partitionibus ratione objecti.

27. Si spectes idearum objecta (1), ideæ dispescuntur :

1º In *geometricas* et *puras*. Voco ideam geometricam omnem ideam, quæ *extensionis representationem continet*, sive explicite, ut est idea *trianguli*, *arboris*, *candoris*, sive implicite, ut est idea *soni*, *saporis* etc. Voco ideam puram eam, quæ *extensionis representationem nullam implicat*. Tales sunt ideæ *substantiæ*, *numeri*, *spiritus*, etc. (2).

28. 2º In *simplices* et *compositas*.

(1) Sermo nobis est, ut patet, de objecto *formali* (15).

(2) Ideæ geometricæ solent a quibusdam auctoribus vocari *sensiles*, puræ autem *intellectuales* : a quibus appellationibus libenter abstinemus, quia totam idearum theoriam non mediocriter perturbant. Omnes ideæ, uti suo loco videbimus, de quocunque sint objecto, sunt intellectuales, ut quæ ad solum intellectum pertinent ; et omnes pariter ideæ sunt aliquo modo sensiles, quia a sensationibus vel proxime vel remote dependent, ut jam aliquo modo indicavimus (21).

Simplex est, quæ pluribus notis (13) non constat, nec in plures dissolvi potest. Talis est idea existentiae. Composita est, quæ pluribus constat notis, et in plures resolvi potest; ut est idea representans hominem, domum, etc.

Notanda. a) Objecta ipsa simplicissima representari possunt ideis compositis, imo communiter non possunt aliter representari. Sint exemplo ideae animæ humanæ, Dei.

b) Idea composita non est confundenda cum factitia. Nam in primis idea dicitur composita ratione suæ comprehensionis (14), et factitia ratione originis; deinde quanquam omnis idea factitia sit composita, non tamen omnis composita est factitia.

c) Idearum compositio aperta est vel occulta, prouti notarum pluralitas distincte vel confuse cognoscitur.

29. 3^o In concretas et abstractas.

Concreta dicitur, quæ rem exhibet prouti determinatione aliqua afficitur.

Abstracta, quæ exhibet determinationem veluti separatam, ab omni subjecto. Aliis verbis: idea concreta representat rem forma determinatam, abstracta ipsam formam (16).

Concreta sunt hæc: homo, rotundum, dulce, rationale, sapiens. Abstracta, humanitas, rotunditas, dulcedo, rationalitas, sapientia.

Concreti denominatio translata ex eodem fonte desumitur unde qualitatibus formarum denominatio tribuitur (16): nimirum a materia liquenti, quæ cum per se formam determinatam non habeat, tunc formam stabilem recipit, quum intra typum concrevit ac solidatur.

*30. Concretum triplex distingui solet, metaphysicum, physicum, logicum. Metaphysicum dicitur, quum determinatio a qua concretum denominatur, est subjecto et intrinseca et essentialis. Hujusmodi est concretum homo; nam qui est homo, intrinsece et essentialiter est habens humanitatem. Physicum dicitur, quum forma est quidem subjecto intrinseca, at non essentialis, veluti doctus, currens: nam qui est doctus, vel currens, non habet sibi essentialem doctrinam vel currendi actum. Logicum denique, quum determinatio est ali-

quid subjecto extrinsecum; ut est cognitum, laudatum, desideratum. Horum abstractæ formæ sunt esse cognitum, esse laudatum, etc.

ARTICULUS VI.

Alia idearum partitio secundum objectum.

51. Nobilissima idearum divisio secundum objectum ea est, quæ ab idearum extensione seu amplitudine (14) petitur. Hinc ideae singulares, universales, particulares.

1^o Idea singularis est ea, quæ certum individuum exprimit, videlicet objectum ita determinatum, ut omnes simul ejus determinationes pluribus convenire non possint. Talis est idea Romuli, illius arboris, hujus equi. Determinationes quarum ope individua ab invicem discernere solemus, sunt notæ quædam sensibiles, quæ individuantes vocantur, non quia individua constituunt, sed quia potius constituunt eorum ideas, et individua nobis manifestant. Hæ notæ vulgato continentur versiculo:

Forma, figura, locus, tempus, stirps, patria, nomen:

Hæc eæ sunt septem, quæ non habet unus et alter.

52. Ad ideam singularem revocatur collectiva, i. e. idea plurium singularium quæ ad modum unius considerantur. Hujusmodi est idea mundi, seu collectionis omnium corporum, idea Romæ, seu collectionis horum ædificiorum, idea hujus vel illius exercitus.

53. Idea universalis ea est, quæ exhibet unum aliquid, quod in pluribus individuis multiplicatum inesse, ac de pluribus dici singillatim potest. Sane quidquid in rerum natura existit, singulare et individuum est. Nihilominus, uti suo loco explicabitur, ubi objectum singulare intellectui offertur, essentielles notas in illo percipimus, conceptumque talem formamus, qui cum a conditionibus individuantibus sit liber, jam exhibet aliquid, quod in multis reperiri potest; et hic conceptus est idea universalis directa. Quum vero quasdam ex his ideis inter se comparo, invenio illas plane identicas, quæque in unam eandemque ideam confunduntur: plane ut apud geometras duo triangula æqualia et si-

milia, si unum alteri superimponatur, non sunt amplius duo triangula, sed unum. Sic igitur hujus ideæ universalitatem agnosco, cum videam eam ita esse unam, ut nihilominus rem exhibeat quæ pluribus inest. Et hæc est idea universalis *reflexa*, quæ simpliciter universalis vocari solet. In hunc modum v. gr. ex humanorum consideratione individuorum efflorescit idea hominis, et ex harum comparatione idearum idea hominis in genere, quæ una cum sit, et ad Petrum, et ad Paulum, et ad cæteros æque refertur.

Objecta quibus universalis idea convenit et applicari potest, ejusdem ideæ *inferiora* sive *subjecta* a philosophis appellantur.

34. Ex his manifestum est, ideam universalem a collectiva (32) longe differre. Una quidem et altera ad plura pertinet, ac de pluribus dicitur, sed illa *distributive* unicuique tribuitur ac tota applicatur, hæc omnibus simul sumptis, quia omnia simul sumpta collectivæ ideæ sunt objectum, singula autem individua sunt tantum hujus objecti pars. Hinc dicimus: *hic miles est homo*, quia essentia humana tota est in illo, quemadmodum tota est in cæteris illi similibus; at non dicimus: *hi milites sunt homo*. Pariter dici nequit: *hic miles est exercitus*, sed solum dicere possumus: *hi omnes milites sunt exercitus*, vel: *hic miles est pars exercitus*.

Cæterum ipsa quoque idea collectiva potest universalitatem assumere; nam sicut in multorum comparatione individuorum, id solum quod in illis commune est, attendere possumus, ita quoque quum plures inter se collectiones comparamus. Sic universales ideæ prodeunt *exercitus*, *urbis*, *familiæ*, quarum inferiora non sunt individua, sed collectiones singulares, quæ exercitus, urbs, familia vocari possunt.

35. Demum idea *particularis* est *idea universalis ad unam partem extensionis suæ, eamque indeterminatam coarctata*: ex. gr. *aliquis homo, quidam philosophus*. Dicitur quoque idea vaga individui.

Notandum et hoc: quemadmodum idea collectiva fieri

potest universalis, ita eadem universalis facta ad particularem restringi potest. Tales sunt ideæ: *aliqua urbs, quædam familia*, etc. Huc quoque pertinent illæ: *aliqui homines, decem urbes* et similes; ideæ enim hujusmodi collectionem indeterminatam exprimunt.

ARTICULUS VII.

De universalibus.

36. Penitiolem aliquam considerationem a logico postulante ideæ universales, seu potius ipsarum objecta.

Præmittendum est, quasdam ideas exprimere certas rationes seu notas, quæ ad plura pertinent ac de pluribus dicuntur, sed non de omnibus quæcunque sunt aut excogitari possunt; quasdam vero ad omnia plane sese porrigere, ut quæ aliquid exhibent, quod de omnibus dicitur. Id quod illæ repræsentant est proprie quod *universale* dicitur; id quod istæ exprimunt *transcendentale* cum veteribus appellabimus.

Transcendentalia sex enumerantur:

Ens, res, aliquid, unum, verum, bonum.

Ens est id quod primo intellectus in omnibus cognoscit, estque elementum quod in omnibus ideis reperitur. Cæteræ notiones transcendentes ens exhibent sub certis quibusdam respectibus, unde quanquam nihil dicant quod non sit ens, tamen aliquid dicunt, quod hæc sola notio *ens* non dicit (1). Transcendentalium notiones, et quæ ex ipsis coalescunt, appellantur etiam *indeterminatæ*; suntque in humano intellectu primitivæ omnibusque communes.

De his ac de reliquis quæ ex his coalescunt, in ontologia. Nunc de universalibus.

37. Quæ communia pluribus inveniri, ac de pluribus dici possunt ad quinque capita revocantur, quæ sunt *species*, *genus*, *differentia*, *proprium*, et *accidens*.

1^o Species est *totum id quod communem plurium individuorum essentiam constituit*. Est porro essentia, si logicam ejus

(1) Cf. S. Th. Opusculum XLII. De natura generis, C. II.

definitionem quæras, id quod cogitamus, quum respondemus interroganti: quid sit aliquod individuum. Cogita quid intelligas quum interroganti respondes: est *homo*, est *circulus* etc., et hoc est talium rerum essentia.

Oritur idea speciei ex immediata idearum singularium resolutione de qua supra (33).

2° Genus est id quod pluribus speciebus invenitur commune. Oritur idea generis ex nova abstractione, qua duas ideas específicas comparantes, id solum quod præ se ferunt identicum contemplamur, cæteris omissis. Sic ex ideis specificis *quercus*, *pinus*, *ilicis*, etc. ideam *arboris* genericam efformamus.

3° Differentia est id per quod unaquæque species discriminatur ab aliis speciebus quæ sub eodem genere continentur. Cum enim idea generis exhibeat id quod in pluribus speciebus invenitur identicum, profecto specierum diversitas non aliunde exurgere potest, quam ab aliquibus notis quæ in generis idea non contineantur. Hæc cujusque speciei nota essentialis, quæ in generis idea non continetur, est differentia speciei constitutiva. Sic *hominis* et *bruti* species sub eodem genere animalis continentur, differunt autem inter se eo quod ille *rationalis* est, hoc vero *irrationalis*.

COROLLARIUM. Ex his apparet, cum species sit tota rei essentia, genus et differentiam essentiae partes esse: genus quidem partem communioris et determinabilem, differentiam vero partem minus communem et determinantem.

4° Proprium, quod et attributum, est id quod cum essentia connectitur, et ab illa necessario dimanat; unde fit ut *omni*, *soli* ac *semper* accidat speciei. *Omni* inquam i. e. omni individuo quod in specie continetur: *soli*, nimirum, primario saltem, uni illi speciei de qua dicitur, non vero aliis speciebus: *semper*, ita ut nullo unquam tempore possint individua illa nota carere. *Facultas ridendi* et *facultas loquendi* sunt v. gr. hominis proprietates: proprium item est numeri non ut sit par, neque ut sit impar, sed disjunctim ut sit par vel impar.

5° Accidens est id, quod esse potest in re, vel ab ea abesse, salva natura, videlicet quin res desinat esse quod est. Doctrina

v. gr. vel motus est accidens in homine, *rotunditas* accidens in marmore.

38. Hæ sunt quinque universalium classes. Plures autem non esse sic ostenditur. Quidquid est pluribus commune, vel est aliquid pertinens ad ipsorum essentiam, vel non pertinens. Si est aliquid pertinens ad essentiam, vel totam complectitur essentiam, vel partem tantummodo. Si totam complectitur essentiam, est *species*: si partem, hæc pars vel est communis pluribus essentiis, vel non. Si primum, est *genus*; si alterum, est *differentia*. Quod si est aliquid ad essentiam non pertinens, hoc potest esse cum essentia connexum et est id quod dicitur proprium; et potest esse cum essentia non connexum, et est id quod *accidens* vocamus.

39. Quinque hæc universalia *prædicabilia* (κατηγορούμενα) a veteribus appellabantur. *Prædicare* enim idem valet ac enuntiare seu dicere de aliquo. Quidquid autem de pluribus dici potest, vel ut species dicitur, vel ut genus, vel ut differentia, vel ut proprium, vel ut accidens, uti supra docuimus. Unde quinque hæc sunt modi diversi secundum quos universale prædicatur seu enuntiatur de pluribus. Species et genus enuntiantur in quæstione: *Quid sit res*; at species complete hoc enuntiat, ut quum dicis: *Petrus est homo*; genus incomplete, ut quum dicis: *Petrus est animal*. Differentia vero, proprium et accidens enuntiantur in quæstione: *Qualis sit res*: sed differentia dicit qualis sit res essentialiter; proprium qualis sit non quidem essentialiter, sed necessario; accidens qualis sit necessarialiter nec necessario (38).

ARTICULUS VIII.

De specierum et generum subordinatione.

40. Quemadmodum, ut supra (37, 2°) diximus, si species cum specie conferatur, generis idea efficitur, quum binæ species in aliquo essentiali conveniunt; ita si genus comparatur cum genere, et aliquid in utroque invenitur commune, generis altioris idea efformatur. Ex. gr. *animal* genus quoddam est homines et bruta complectens; si compareretur cum *planta*, quæ aliud genus est, invenimus et *animal* et

plantam hoc habere commune, ut sit utrumque *corpus organicum*, seu *vivens*; quare *vivens* est genus, sub quo tum *animal* tum *planta* tanquam species continentur.

41. Genus item altius inventum cum alio genere sibi parallelo (1) comparari potest, neglectisque differentiis, superius adhuc genus eruetur: quod iterum ad aliud reduci poterit, et ita porro, donec ad genus aliquod supremum perveniatur. Hoc pacto scala quædam specierum et generum constitui potest; quæ a specie aliqua infima initium sumens ad genus usque supremum ascendat. Sic *vivens* (37. 2º) cum *inorganico corpore* seu *minerali* comparatum, ideam supplet magis genericam *corporis*: et *corpus* cum *spiritu* collatum, ideam præbet *substantiæ*, quæ horum omnium genus est supremum.

Hæc omnia sequens tabella complectitur, quam *arborem porphyrianam* appellant, quia Porphyrius, in Isagoge de his disserens, hoc præ cæteris utitur exemplo.

	Substantia	
corporea		incorporea
	Corpus	
organicum		inorganicum
	Vivens	
animatum		inanimatum
	Animal	
rationale		irrationale
	Homo	
	hic homo, ille homo etc.	

Idem in cæteris exsequi licet; ita ut nulla sit idea quæ rebus individuis applicari possit, quæ per species et genera ascendendo ad genus aliquod supremum non reducatur.

Hæc porro distributio præterquam quod mentem instituit ad reflectendum et comparandum, mirifice juvat 1º conceptibus coordinandis, ut inter cætera *historia naturalis* demonstrat; 2º memoriæ; 3º ad recte definiendum, dividen-

(1) Voco genus alteri parallelum illud, quod nec est ejus species, nec genus, sed in communi genere cum illo continetur.

dum ac enuntiandum, uti in posterum apparebit. Quapropter exercitatio hæc tirocinium quoddam philosophicum merito appellari posset.

42. Hæc nunc omnino facile intelliguntur:

1º Extensionem ideæ universalis ejusque comprehensionem se habere in ratione inversa. Etenim cum altiora genera concipiantur per successivas abstractiones notarum essentialium, quæ genera inferiora constituunt, manifestum est, quo altiora sunt genera, eo paucioribus constare notis, videlicet quo altiora sunt genera, eo minorem esse ideæ comprehensionem (14). Sed quo altius est genus, eo majorem habet ideam extensionem (14): ergo quo minor est ideæ universalis comprehensio, eo major est extensio, et viceversa.

2º Quid sit *genus proximum* dati individui, quid *genus subalternum*, et *supremum*.

Genus proximum est illud, sub quo species de qua quaeritur, immediate continetur. Hujusmodi est *animal* respectu Petri, *color* respectu cærulei, *numerus* respectu quinarum.

Genus subalternum est omne genus quod generis altioris sit species. Hujusmodi est *vivens* et *corpus* respectu Petri.

Genus supremum est illud quod sub nullo alio genere continetur. Talis est *substantiæ* notio vel *quantitatis*.

3º *Differentia ultima*, seu *specifica* est ea quæ cum genere proximo (2º) speciem constituit. Respectu hominum *differentia ultima* est *rationalis*.

Differentiæ genericæ sunt quæ cum generibus altioribus species constituunt subalternas. Vide exempla in tabula.

4º *Species infima* ea est sub qua non collocatur alia species: *subalternæ*, sub qua est alia species.

5º Deduces quoque ex dictis, quid intelligamus quum dicimus, duo *differre toto genere*, vel *specie*, vel *solo numero*.

Differunt toto genere, quæ sub eodem genere proximo non continentur, ut *Judas* et *arbor* a qua *pependit*.

Differunt specie, quæ sub eodem genere proximo constituta, discrepant tamen in aliquo quod essenziale sit, ut *Alexander* et *Bucephalus*.

Differunt denique solo numero, quæ individua sunt ejusdem speciei, ut *Petrus et Paulus*.

ARTICULUS IX.

* *De Categoriis.*

43. Diximus paulo ante (41) nullam esse ideam individuis applicabilem, quæ ad genus aliquod supremum non reducat. Suprema hæc genera, cum iis omnibus quæ continent, κατηγορίας ab Aristotele, a latinis vero, duce Boetio, *prædicamenta* vocantur. Quia videlicet, quemadmodum ideæ omnes, ita etiam quæcunque de aliquo enuntiari possunt, ad hæc summa genera revocantur. Unde patet, quæ in re prædicamenta a prædicabilibus differant. Universalia enim, ut subsunt primis intentionibus, in prædicamenta dividuntur; ut subsunt secundis, in prædicabilia.

44. Hanc idearum omnium ad summa capita reductionem, cum ea opus sit maxime philosophicum, jam a vetustissimis temporibus philosophi aggressi sunt. Alii plures, alii pauciores categorias assignarunt. Sufficiat nobis in præsens Aristotelis categorias recensere, ut quæ magis vulgatæ sunt usuque tritæ scholasticorum, intimiore de his disputatione ad ontologiam rejecta. Eæ sunt: *substantia, quantitas, relatio, qualitas, actio, passio, ubi, quando, situs, habitus* (1).

45. 1^o *Substantia* est *ens per se existens*, quod videlicet non est in alio tanquam subjecto (16). Vocat Aristoteles *substantias primas* substantias omnes individuas et *substantias secundas* genera et species, sub quibus primæ substantiæ collocantur. Substantiarum genera et species vide supra (41).

Quæ sequuntur categoriæ ea continent quæ substantiæ adjacent, quæ nempe in substantia sunt in hærentque illi tanquam subjecto. Unde abstractis ideis exhibentur (29).

2^o *Quantitas* est ipsa extensio, seu partium extra partes

(1) Aristotelicas categorias his versibus veteres comprehenderunt:

Arbor	sex	servos	ardore	refrigerat	ustos.
subst.	quant.	relat.	qualit.	actio	passio.
Ruri	cras	stabo	sed	tunicatus	ero.
ubi	quando	situs		habitus.	

positio. Quæ est *continua*, quum partes sunt conjunctæ, et *discreta*, quum conjunctæ non sunt.

Quantitas discreta est numerus, qui quantitas per analogiam appellatur, quia omnis numerus alicujus ideæ universalis aliquam *extensionem* exhibet (14), partibus ejus subjectivis contentam (33).

Continuum *permanens* est extensio corporum; continuum *fluens* est tempus. De his omnibus alibi.

3^o *Relatio* est respectus unius ad aliud, ut *æqualitas, paternitas* etc.

4^o *Qualitas* est qua res quales dicuntur, nempe quiddid substantiæ adjectum est ad qualecunque ejus complementum. Proximæ hujus species sunt:

a) *Habitus* i. e. qualitas disponens subjectum ad facile operandum, ut *virtus et vitium*.

b) *Potentia naturalis* seu aptitudo aliquid agendi vel patiendi: ut est *vis currendi vel videnti*. Potentiæ opponitur *impotentia* seu ineptitudo aliquid agendi vel patiendi, ut est *imbecillitas memoriæ vel surditas*.

c) *Qualitas sensibilis*, quæ nempe in sensus nostros agere potest, ut *sonus, frigus* etc.

d) *Figura et forma* i. e. modus resultans ex terminatione quantitatis; qui modus *figura* dicitur si consideretur in se et abstracte a corporibus, more geometrarum; *forma* vero si in corpore, ut ex ejus lineamentis resultans, et externis qualitatibus ornata.

5^o *Actio* est mutatio quævis, quatenus procedit a causa activitatem suam exercente, ut est *calefacere, movere*, etc.

6^o *Passio* est mutatio, quatenus in aliquo recipitur, ut est *califeri, moveri, irra affici vel gaudio*.

7^o *Ubi* est locatio seu determinatio ad locum, ut *esse supra, infra* etc.

8^o *Quando* est determinatio ad tempus, ut *esse præteritum, præsens, futurum*.

9^o *Situs* est dispositio partium corporis, resultans ex earum positione in loco, ut *sedere, cubare*, etc.

10° *Habitus* est omne indumentum ac tegumentum corporum, ut *vestis, annulus, aurum* vel *pigmentum tabulæ illitum*.

46. Hæc rerum genera suprema sunt, quæ merito suprema dicuntur, quia non habent genus altius ad quod tanquam species reducantur. Licet enim omnia sub latissimo entis conceptu contineantur, entis tamen notio generica dici non potest. Nam, ut disserit s. Thomas (1), « omne genus habet « differentias, quæ sunt extra essentiam ipsius generis: nulla « autem differentia potest inveniri extra ens; quia non-ens « non potest esse differentia. » Ens igitur rationem generis non habet, sed rationem omnem generis transcendit, atque idcirco notio dicitur transcendentalis (36).

ARTICULUS X.

De idearum partitione secundum perfectionem representationis.

47. Quæcunque sit ideæ origo, quodcunque objectum quod repræsentat, potest hoc majori vel minori cum perfectione ab ea repræsentari. Hinc aliæ idearum partitiones, quas Cartesius ac maxime Leibnitzius illustrarunt (2). Igitur secundum perfectionem quam in repræsentando habent, possunt ideæ esse:

1° *Claræ vel obscuræ.*

Idea clara tot ac talibus constat notis, quot sufficientes sint menti, ut objectum repræsentatum ab omni alio discernere possit. Idea obscura e contrario notis constat insufficientibus ad objectum sic discernendum. Habes ex. gr. ideam claram *solis, hominis, auri, logicæ*, at obscuram fortasse *banani, bismuti, physiologiæ, individui quod multis abhinc annis semel vidisti*.

2° Idea clara potest esse *distincta, indistincta, confusa*.

Distincta erit, si notas saltem aliquas, quibus objectum ab aliis discernitur, distinguas ab invicem et enumerare possis.

Si vero has notas distinguere nequeas, vel idea est simplex, adeoque distinctionis incapax, vel ex pluribus notis compo-

(1) Sum. p. 1, q. 3, art. 5.

(2) Cf. Leibnitzii *Meditationes de cognitione, veritate et ideis*. Opp. t. II, p. 14. seq.

sita. In primo casu dici debet indistincta, in altero confusa. Ex. gr. idea quam habes *hominis* distincta est (41): idea *existentiæ* vel *affirmationis* est indistincta, quia simplex: *justitiæ* vero ideam habebis confusam, si elementa, quibus constat, inter se discernere non possis.

Vides ideam distinctam constare ideis claris (1°) singularum notarum, quibus objectum discernitur; ideam vero confusam ideis harum notarum obscuris contineri.

3° Ideam distinctam vocabis *completam*, si omnes notas, quibus unum objectum ab aliis discernitur, distinguas; *incompletam*, si non omnes: hinc patet ideam incompletam ex parte distinctam esse, et ex parte confusam. *Animalis* ideam completam habes, *magnetis* fortasse incompletam.

4° Demum idea *adæquata* definiri solet: idea completa cujus notæ omnes, et singulæ distincte percipiuntur, tamdiu continuata analysi (17), donec ad notas primitivas ac simplices ventum sit. Quod si subsistat analysis antequam ad ultima hæc elementa deveniat, ideam dicemus *inadæquatam*. Ideæ adæquata exemplum perfectum, notat Leibnitzius (1), nescio an homines dare possint. Revera tamen hujus dubii solutio ab ideæ simplicis definitione pendet. Si enim ideas simplices vocas eas, quas intellectus humanus non componit ex pluribus, neque in plures potest resolvere, nemo vetat quominus v. g. ideam hominis secundum analysim supra (41) exhibitam, aliasque permultas, quas philosophia resolvit, adæquatas dicamus, saltem juxta definitionem ideæ adæquatæ superius traditam, quæ communis est, et ipsius Leibnitzii.

48. Cæterum cum vera idea adæquata prorsus adæquare debeat objecto, ea solum idea videtur hoc nomine digna, quam veteres *comprehensivam* vocabant.

Est enim idea comprehensiva illa, quæ totam exhaustit objecti intelligibilitatem, ita ut tantum in illo intelligat quantum intelligi potest. Unde cognitio tali idea contenta, non modo notas quæ essentiam objecti constituunt, ad ultimas usque radices pervadit, sed etiam quæcunque cum essentia

(1) Loco cit. pag. 13.

vel necessario vel non necessario connectuntur, clara intuitione complectitur : videlicet proprietates omnes et diversos perfectionis gradus, et qualitates omnes possibles, et relationes omnes quas ad cætera entia vel habet, vel habere potest, et quæcunque ab illo fieri, illive accidere possunt. Qui v. gr. talem *extensionis* ideam haberet, ille totam possibilem geometriam comprehenderet, et qui *humanam naturam* tali modo cognosceret, ille omnes homines possibles, totamque singulorum omniumque simul possibilem historiam mente complecteretur. Hujusmodi idearum exempla profecto intellectus finitus dare non potest : ea sunt solummodo in divino intellectu.

ARTICULUS XI.

De mediis ad ideas perficiendas accommodatis.

49. Quanti intersit ad omnes, sed ad philosophos præsertim, ut rerum de quibus agunt, claras saltem distinctasque ideas adipiscantur, nemo est qui non videat. Profecto nisi claræ distinctæque sint ideæ, nec definire fas est, nec dividere, nec species ac genera dignoscere, nec quid de rebus affirmari conveniat, quid negari, absque erroris periculo decernere. Ei autem qui hisce præsidiis destitutus sit, nulla scientia possibilis est, imo nullum tutum iudicium. Aliunde vero multa obstant, quominus ad hanc idearum perfectionem deveniamus. Ejusmodi sunt nativa mentis limitatio, animi inconstantia, sensuum imperfectio, memoriæ debilitas atque imaginationis levitas, imo et sæcunditas ; quum enim imaginatio alia super alia obtrudit phantasmata, facile fit ut alterum cum altero commisceatur, atque adeo ideis quoque obscuritas offundatur. Accedit vocum quibus utimur, indeterminata persæpe nobis, aut non attenta significatio, aut apud diversos homines diversa : ac demum rei intelligendæ amplitudo, subtilitas, subtilitas, similitudines quas cum aliis habet ; quæ omnes difficultates maximopere excrescunt, quum objectum a sensibus et experientia est magis minusve remotum.

Ex his omnibus liquet, idearum claritatem ac distinctio-

nem sine industria aliqua et conatu, ut plurimum, acquiri non posse. Hunc in finem sequentia documenta utilia sunt.

50. 1^o Fugienda in primis est ea in rebus considerandis præcipitantia, quæ ex ingenii sive levitate sive confidentia procedit. Non possumus primo obtutu omnia quæ in objecto cognoscere refert, complecti, sed tempus et diligentia et repetita sæpius consideratio ad id requiritur.

2^o Attentioni e converso assuescendum ac reflexioni (15, 17) ; ita ut nec plura simul objecta consideratione complectamur, et objectum quod seligimus, sive res sit, sive idea, per suas partes seu notas successive et accurate investigemus.

3^o Accedat comparatio cum rebus jam distincte cognitis, præsertim cum similibus, ut quid commune sit omnibus, quid unicuique proprium possit deprehendi. Eodem modo conceptus obscuri aut confusi cum claris distinctisque conceptibus conferri debent.

4^o Adjumenta magna invenies, et non modicum laboris compendium facies :

a) Si ordinem ac methodum in rebus expendendis secteris. Sæpe enim cognitio unius cognitionem alterius faciliorem pleniorumque reddit.

b) Si quæ mente tibi videris recte percepisse, voce exprimere aut scripto notare tentes. Sic enim non raro contingit, ut quæ clare distincteque percepta videntur, confusa esse atque adeo obscura deprehendantur.

c) Si signis quibusdam aut figuris sensilibus, pro rerum diversitate, utaris. Ex hac industria algebra tota ac geometria creata est.

Criterion, seu indicium, quo deprehenditur utrum quis completam rei ideam sit assecutus, hoc est, si sciat rem definire ac dividere. De definitione ac divisione postea.

ARTICULUS XII.

De ideis inter se comparatis.

51. Restat ut denominationes quasdam explicemus, quæ ideis inter se comparatis tribuuntur.

1^o Quædam ideæ dicuntur *sociabiles* seu *consentientes*, quædam *insociabiles* seu *repugnantes*.

Sociabiles sunt, quæ possunt uni eidemque rei simul convenire, et in unam ideam compositam conjungi (24); insociabiles, quæ non possunt. Doctrina v. gr. et prudentia, color et motus sunt ideæ sociabiles; doctrina et irrationalitas, color et cogitatio, insociabiles.

Objecta quæ insociabilibus ideis exprimuntur, opposita vocamus. Sunt vero opposita, ea omnia quæ in una eademque re singulari sub eodemque respectu simul esse non possunt.

Oppositorum autem quædam sunt *improprie* opposita, quædam *proprie*.

Proprie alteri opponitur, quod uni tantum termino sub certa habitudine repugnat. Improprie, quod multis et absque certa lege repugnat. Ita rubrum flavo, viridi, cæruleo etc., circulus triangulo, quadrato, cæterisque figuris opponitur. Quæ improprie opposita sunt, *disparata* dicuntur.

52. Proprie opposita, quæ absolute opposita appellantur, in quatuor genera dividuntur; *contradictoria*, *privativa*, *contraria*, *relativa*.

1^o Contradictoria sunt *forma quævis* (16) seu *nota realis ac positiva et ejus negatio*, ut homo et non homo, lux et negatio lucis.

Contradictoria secundum se medium non habent. Etenim eorum alterum de re quacunque quæ cogitari possit, sive substantia sit sive accidens, sive concretum sive abstractum, sive ens reale sive fictum, atque adeo non ens, necessario dicendum est. Exempli gratia, quidquid concipis vel est homo vel non homo, vel lux vel non lux, etc.

2^o Privativa sunt *forma quævis et ejus negatio*, quatenus in subjecto ad illam habendam apto reperitur. In hoc, ut vides, a simplici negatione differt privatio, quod illa præscindit a determinati subjecti connotatione, hæc subjecti apti connotationem includit. Cæcitas v. gr. aut surditas, quæ sunt privationes, non dicuntur de lapide, quanquam lapis et visu et auditu careat, sed de homine, de equo, deque cæteris

animantibus, quos videndi audiendique facultate natura instruxit.

Ex hoc intelligis, privativa medium habere. Quamvis alterutrum illorum proprio subjecto necessario insit, datur tamen aliquod aliud subjectum, cui nec forma nec privatio competit.

3^o Contraria definiuntur, quæ sub eodem genere posita maxime differunt, et eidem subjecto vicissim insunt, nisi alterum eorum insit a natura. Ita sub genere qualitatis sensibilis candor et nigredo, sub genere habitus virtus et vitium opponuntur.

Contrariorum quædam respectu proprii subjecti sine medio sunt, quædam medium habent. Sine medio sunt, quum alterutrum proprio subjecto necessario inest. Sic numerus necessario vel par est vel impar, et actus liberi vel honesti vel inhonesti. Medium habent, quum neutrum proprio subjecto necessario inest, nisi alterum alicui naturale sit. Sic corpora non sunt necessario alba vel nigra, sed possunt varios præferre colores: quamvis nix naturaliter alba sit, corvus niger.

Hæc autem media, quibus contrariorum subjecta affici possunt, partim nomen habent, ut colores diversi qui medii sunt inter album et nigrum, et virtutes morales quæ inter vitia contraria medium tenent; partim nomine carent, et extremi utriusque negatione significantur. Sic imbecilles et amentes dicimus esse nec bonos nec malos, et corpora quæ æqualem cum nostro corpore temperiem habent, nec calida nec frigida.

4^o Relativa denique sunt, quæ per respectum ad aliud (45, 3^o) denominantur, ut pater et filius, similia, æqualia etc. Relativa se mutuo includunt, ponunt ac tollunt: non potest enim alterum relatorum sine altero esse aut concipi.

53. Ex his omnibus concludere pronum est 1^o contradictoriam oppositionem esse omnium maximam. Nam contradictoria ex suo conceptu medium nunquam habent, neque in ullo genere aut subjecto conveniunt, nec se mutuo includunt. Cætera vero opposita vel medium habent, vel in eodem

genere aut in eodem subjecto conveniunt, vel se mutuo includunt (1).

2° Cætera opposita eatenus esse talia, quatenus de contradictione sub aliquo respectu participant. Idcirco enim sunt opposita, nec possunt in eadem re simul esse, quia alterum alterius negationem importat.

54. II° Ideæ comparari possunt secundum notas quibus constant, vel secundum rem quam exprimunt; seu brevius secundum earum comprehensionem vel extensionem (14).

Si primo modo comparentur, vel iisdem reperiuntur constare notis, vel diversis. Si iisdem constant notis, eas *identicas* appellamus, si diversis *diversas*. Quæ identitas et diversitas cum ipsas ideas afficiat, merito *intrinseca* dicitur. *Homo*, v. gr. et *animal rationale* sunt conceptus intrinsece identici; *homo* et *candor* sunt intrinsece diversi.

Si quoad objectum comparentur, exsurget idearum identitas vel diversitas *objectiva*. Sunt nempe ideæ objective identicæ, *quum unam eandemque rem, sub diversis licet formis exprimunt*. Objective diversæ, *quum de rebus sunt inter se distinctis*. Sic idea *lapidis*, et idea *viventis* sunt objective diversæ: at idea *candidi* et *frigidi*, quanquam intrinsece sint diversæ, quoad aliquam tamen rem, puta *nivem*, sunt objective identicæ. Vides identitatem hanc vel diversitatem esse ideis extrinsecam, et ad objecta potius quam ad ideas pertinere: idcirco eam objectivam appellavimus. In ideis est potius *convergentia* ad idem objectum, vel *divergentia* ad objecta distincta.

* 55. Notanda. 1° Intrinseca idearum identitas est *totalis* vel *partialis*, prouti in omnibus notis vel in aliquibus solum ideæ conveniunt. Idem de intrinseca diversitate dicendum. Unde patet posse dari conceptus, qui ex parte sint intrinsece identici, et ex parte intrinsece diversi, ut *homo* et *animal*; *tabula marmorea* et *tabula quadrata*; *animal rationale* et *animal irrationale*.

2° Eodem modo sunt ideæ objective identicæ ex toto, quum ambæ exprimunt rem unam et neutra se extendit ad aliam,

(1) Cf. S. Thomæ Opusculum XXXVII, c. I, seq.

ut *Jesus* et *filius Mariæ*: ex parte, quum altera præter alterius ideæ objectum, ad alia insuper objecta se extendit, ut *corpus* et *lucens*. Omne enim lucens est corpus, sed non omne corpus est lucens. Dantur ergo ideæ, quæ secundum aliquam suæ extensionis partem sunt objective identicæ, secundum aliam partem sunt diversæ.

3° Omnes ideæ objective identicæ sunt sociabiles (51), et omnes insociabiles sunt objective diversæ. Sed neutrum dici potest e converso.

4° Idearum sociabilitas ad ordinem possibilitatis pertinet; identitas objectiva ad ordinem actualitatis saltem idealis. Igitur illa latius patet.

5° Ideæ quæ intrinsecam identitatem tantummodo partialem habent (1°), possunt esse sociabiles, et insociabiles, ut patet in contrariis et relativis (52, 3°, 4°).

6° Identitas omnis et diversitas idearum apprehensione comparativa (19, 5°) percipitur.

56. III° Postremo memorandæ veniunt ideæ quæ *associatæ* dicuntur. Sunt autem illæ quæ *ratione alicujus nexus inter ipsas constituti, se mutuo revocant, ita ut redeunte una, exciletur et altera*.

Hic porro nexus potest esse *objectivus* et *subjectivus*. Objectivus continetur relatione aliqua quæ sit *inter idearum objecta*, ut est similitudo, causalitas, oppositio, etc. Subjectivus relatione aliqua, quæ sit *inter objectorum perceptiones*, ut si fuerint simultaneæ, vel in similibus aut etiam oppositis circumstantiis habitæ, vel similes aut etiam oppositas impressiones in subjectum exeruerint.

CAPUT II.

DE IDEARUM SIGNIS.

ARTICULUS I.

De signis notione.

57. *Signum*, si presse accipiatur, est *id omne quod, quum seipsum cognoscenti potentie representat, facit ut præter ipsum aliquid aliud cognoscatur*. Ita signum causa est ut animus ad

rei absentis, vel quæ nullo modo ipsum afficit, nec se illi per se manifestat, cognitionem provehatur. Hoc pacto vestigium signum est animalis a quo fuit impressum, respiratio signum est vitæ, insignia quædam dignitatis ac potestatis magistratuum signa sunt. Vis hæc qua signum in alterius rei cognitionem perducit, *vis significandi* audit. Quæ quidem tota est in connexionem aliqua cognoscenti perspecta, quam cum re significata signum habet, vi cuius idea signi cum idea significati associatur (56). Connexio autem hæc vel ex rerum naturis oritur, vel hominum arbitrio atque instituto inducta est. Hinc duplex signi genus: *naturale* et *arbitrarium*. Gemitus ex. gr. naturale signum doloris est, laurus arbitrarium signum victoriæ.

58. Pluribus aliis signorum partitionibus omissis, unam memorare præstat, quia hoc loco opportuna et necessaria accidit. Quæ partitio desumitur ex modo diverso, quo signa possunt rem significatam menti offerre, et illius ideam excitare. Igitur signa præsertim arbitraria, dividuntur in *manifestativa* et *suppositiva*.

1° Manifestativa vocamus, quæ manifestant rei alterius existentiam vel præsentiam in loco, sive præterito tempore, sive præsentem, sive futuro: ita inscriptio vel arcus præteritam victoriam, tubæ clangor futuram pugnam, crucis venerabile signum christianum annuntiant.

2° Suppositiva dicimus, quæ loco rei significatæ substituuntur et intelligentiæ supponuntur, ut illius vices agant. In hunc modum icones vel statuæ Christi, b. Virginis aut beatorum Cœlitum eorum signa sunt, et claves urbis victori delatæ deditionem urbis significant.

ARTICULUS II.

De vocabulis.

59. Affectiones nostras internas nemo unquam mortalium, præter nos cognosceret, nisi ope signorum quorundam sensibilium possent illæ manifestari et propemodum exterius depromi. Huiusmodi signa sunt pallor oris vel rubor, aspectus oculorum, risus, fletus, tremitus, corporis nutus ac

gestus diversissimi, sed in primis vox. Voces enim inter signa sive naturalia sive artificialia principatum obtinent: per eas quippe et affectiones omnes animi, et ideas, et iudicia, et cogitationum nostrarum objecta, etiam insensibilia, abstracta, universalia perspicue, distincte, facillime significamus. Est porro vox: *sonus animalis ore prolatus*. Qui quidem sonus est *inarticulatus* si sonis tantum simplicibus continueatur, quos vocales appellamus, ut sunt gemitus v. gr. vel clamor; *articulatus* si actione varia linguæ, labiorum, palati, dentium aut etiam gutturis diversimode modificetur, aut distinguatur. Actiones huiusmodi quum sonos modificant, constituunt litteras, quas dicimus consonas; complexio autem vocalis et consonæ, vel etiam unica vocalis distincte prolata, articulationem distinctam seu syllabam. Voces vero omnes quæ ex vocalibus et consonis coalescunt, sunt soni articulati. Articulati nuncupantur, quia syllabis quasi articulis quibusdam distinguuntur.

60. Voces articulatae intelligentiæ opificia exprimunt, non quidem naturaliter, sed ex hominum conventionem. Quamquam enim loquendi facultas sit naturalis, non est tamen naturalis relatio huius vel illius vocis ad certam ideam, ut signi ad rem significatam; quod quidem vel ipsa idiomatum diversitas demonstrat. Relatio igitur hæc ex hominum tantummodo voluntate institutoque consurgit (57). Voces, quæ hoc pacto significandi vim acceperunt *vocabula* nuncupantur. Unde vocabulum definitur: *vox hominis articulata ex hominum conventionem significans*.

61. Vocabulorum alia sunt *per se significantia*, alia *non per se significantia*.

Sunt per se significantia, quæ sine ullo addito completam habent significationem; ut *Cæsar*, *loquor*, *locutus*, *loqui*, *candor*, *candidus*, etc. Vocabula hæc vocabantur a veteribus *categoremata*.

Sunt per se non significantia, quæ completam significationem non habent, sed solummodo aliorum vocabulorum significationem modificant, ut sunt voces *omnis*, *nullus*, *aliquis*, *his* etc. casus item obliqui, pleraque adverbia, præpositiones

omnes et conjunctiones. Hæc vocabula veteres appellabant *syncategoremata*.

62. Vocabula sunt *orationis* partes. Oratio enim est *vocabulorum complexio ad aliquid significandum ordinata*. Ex orationis vero partibus, quas grammatici assignant, logici *nomen* in primis et *verbum* considerant.

Nomen duo significat, et rem quæ est intellectus objectum, et ideam rei in intellectu existentem; sed diverso modo utrumque significat. Est enim nomen signum *suppositivum* rerum, *manifestativum* idearum (58). Unde nominis definitio: *vocabulum rem cogitatam significans*.

Verbum secundum omnes suos modos acceptum, semper significat, et quidem suppositive, duarum idearum identitatem objectivam vel diversitatem (54), ut est objectum alicujus animi actus, cujusmodi est affirmatio, imperium, desiderium, permissio, deprecatio, etc. adjecta relatione ad tempus. De hoc suo loco.

63. Nomina et verba, prouti sunt propositionis partes, *termini* a logicis vocari solent; quia in ipsis terminatur ac desinit propositionis logica resolutio. Hac igitur communi appellatione nomina et verba complectentes, terminorum partitiones secundum tria capita instituemus: 1° secundum vim significandi: 2° secundum objecta significata: 3° secundum significationis extensionem.

ARTICULUS III.

De terminorum partitione secundum vim significandi.

64. Vi significandi spectata, dividuntur termini in *univocos* et *æquivocos*. Notandum 1° divisionem hanc cadere solum in eos terminos, qui de pluribus singillatim dicuntur; 2° univoca et æquivoca primario dici de rebus significatis, secundario de vocabulis significantibus.

Sunt res univocæ eæ, *quarum et nomen idem est, et eadem ratio per nomen significata*. Æquivocæ sunt, *quarum nomen idem est, sed diversa ratio per nomen significata*.

Hinc terminus univocus est, *qui eandem constanter rationem et essentiam significat, quum de suis significatis dicitur*. Talis

est vox *animal*, quæ sive dicitur de homine, sive de pecude, corpus animatum et sentiens semper significat.

Terminus æquivocus est *qui diversas rationes et essentias significat, quum de suis significatis dicitur*; ut *Tartarus*, prouti de homine in Tartaria nato, et de inferno usurpatur; *investigabile*, qua voce significamus et id quod investigari potest, et quod investigari non potest; *sanum* quæ vox quum de animali dicitur, significat habens sanitatem, quum vero de aere, significat conducens ad sanitatem.

65. Omnis porro æquivocatio vel *casu* inducta est, vel *consilio*.

Casu, quum idem nomen impositum est rebus diversis significandis, quin ulla relatio inter eas vigen, ad id homines adduceret. Talis est æquivocatio in vocibus *Tartarus*, *investigabilis*, *Gallus*, *malum*, *os*, *liber*, etc.

Consilio, quum rebus diversis significandis idem nomen impositum est, propter aliquam relationem inter res significatas animadversam. Sic *pes* de animante dicitur et de mensa ac monte; et *doctus* de scriptore et de libro.

Termini qui consilio æquivoci sunt, *analogi* generatim, non quidem a græcis sed latinæ scholæ usu vocari solent, propter analogiam, quæ in rebus significatis deprehenditur (1).

* 66. Hæc porro analogia alia est *attributionis*, alia *proportionis*, quæ proprie analogia nuncupatur (2).

Analogia attributionis est in iis rebus, *quæ eodem nomine significantur, quia relationem habent ad rem eandem, sed diversimode*. Sic *sanum* dicitur de cibo, de medicina, de vultus colore, per respectum ad sanitatem animalis; sed de cibo, quia conservat illam ut causa, de medicina, quia respicit illam ut finem, de vultus colore, quia manifestat illam ut signum.

Res illa ad quam cætera analogia referuntur, et a qua derivatam habent appellationem, *analogum princeps* nominatur.

(1) De appellationum varietate, quæ in analogis significandis reperitur, tum penes græcos auctores, tum penes latinos Cf. Ferrariensem in lib. I, c. 34, *Summæ contra gent.*, et Fonseca *Metaphys.*, lib. IV, c. II, sect. VI.

(2) *ἀναλογία* proportio.

Quæ res si eodem nomine significetur ac minus principalia, quæ ad illud referuntur, nomen hoc analogum dicitur analogia *unius ad alterum*. Ita vox sanum, quia de animali dicitur, quod est analogum principale, et de cæteris, quæ ad ejus sanitatem referuntur, analogiam exprimit unius ad alterum.

Si vero principale illud non eodem nomine significetur quo cætera ad ipsum relata, hæc dicuntur analogia analogia *ad tertium*. Hanc analogiam habet vox *christianus*. Appellatur enim a Christo homo christianus, lex christiana, mores christiani etc.

* 67. COROLLARIA. 1° In analogia unius ad alterum, ratio quæ per nomen significatur, invenitur formaliter et proprie solummodo in principali analogo.

2° Vox analogia absolute et simpliciter adhibita, de eodem principali analogo intelligitur.

3° Analogum principale ponitur in definitione cæterorum. Non enim potes v. gr. definire sanitatem medicinæ, nisi per ordinem ad sanitatem animalis.

* 68. Analogia proportionis est in iis *quæ eodem nomine significantur, quia sunt secundum aliquam proportionem similia*. Est autem proportio generatim: *identitas habitudinis quam duo habent ad alia duo*; ut patet ex proportionibus numerorum. Dicuntur enim proportionem inter se habere senarium comparatum cum ternario, et denarium comparatum cum quinario, quia ratio unius ad alterum utrobique est identica, videlicet ratio dupla. Eodem modo hæc analogia non sunt talia, quatenus similia sunt; nam quatenus similia, univoca sunt (64), non analogia: sed quatenus similes habent ad aliqua habitudines; quia v. gr. quemadmodum se habet risus in hominis vultu, ita viror herbarum et florum amœnitas in prato.

Jam ea, quæ talem habent relationum similitudinem, eodem nomine designantur. Nomen vero hoc non est illud quod exprimit rationem utrique analogo communem: hoc enim nomen univoce significat utrumque, non analogice, ut v. gr. *animal* in quo conveniunt homo et brutum, vel *crude-*

lis in quo conveniunt tigris et tyrannus, utrique univoce applicatur; sed est nomen significans essentiam aut notam aliquam, quæ proprie est unius et non alterius; quæ tamen secundum aliquam proportionem essentiæ aut notæ propriæ alterius similis est. Ita hominem qui ratione non utitur, vocamus brutum, et tyrannum appellamus tigridem; quia quemadmodum brutum se habet ad rationem qua caret, ita homo ad rationem qua non utitur, et quemadmodum tigris omnimode caret humanitate, ita tyrannus omnimode illam abjecit. Hunc pertinent omnes metaphoræ.

Hæc de analogia attributionis generatim. De analogia *entis* aliquid peculiare dicendum superest: de qua opportunius alibi.

* 69. Ex his apparet 1° discrimen quod separat voces analogas secundam attributionem, et analogas secundum proportionem. Illæ enim respiciunt unam eandemque rationem quanquam diversimode; non enim est alia sanitas qua denominatur animal, ab ea qua denominatur cibus. Istæ autem significant rationes plures et diversas, quanquam proportionem similes: aliud enim significat tigris quum de fera dicitur, aliud quum dicitur de homine.

2° Quum terminum secundum analogiam proportionis usurpamus, tacitam quamdam comparisonem institui, in qua quatuor ad minus termini considerantur (68).

* 70. Ex iis porro omnibus quæ hucusque dicta sunt, hæc consequuntur:

1° Eundem terminum respectu aliquorum esse posse univocum, respectu aliorum æquivocum, sive casu sive consilio. Sic terminus *homo* est univocus respectu individuorum humanæ speciei, et æquivocus respectu hominis veri, picti, sculpti.

2° Terminum analogum medium propemodum esse inter univocum et pure æquivocum. Non enim exprimit unam eandemque in omnibus rationem, at diversas exprimit rationes, quæ tamen uno alterove modo (60) unitatem quamdam habent.

3° In eadem voce reperiri posse sub diversis respectibus

Quæ res si eodem nomine significetur ac minus principalia, quæ ad illud referuntur, nomen hoc analogum dicitur analogia *unius ad alterum*. Ita vox sanum, quia de animali dicitur, quod est analogum principale, et de cæteris, quæ ad ejus sanitatem referuntur, analogiam exprimit unius ad alterum.

Si vero principale illud non eodem nomine significetur quo cætera ad ipsum relata, hæc dicuntur analogia analogia *ad tertium*. Hanc analogiam habet vox *christianus*. Appellatur enim a Christo homo christianus, lex christiana, mores christiani etc.

* 67. COROLLARIA. 1º In analogia unius ad alterum, ratio quæ per nomen significatur, invenitur formaliter et proprie solummodo in principali analogo.

2º Vox analogia absolute et simpliciter adhibita, de eodem principali analogo intelligitur.

3º Analogum principale ponitur in definitione cæterorum. Non enim potes v. gr. definire sanitatem medicinæ, nisi per ordinem ad sanitatem animalis.

* 68. Analogia proportionis est in iis quæ eodem nomine significantur, quia sunt secundum aliquam proportionem similia. Est autem proportio generatim: *identitas habitudinis quam duo habent ad alia duo*; ut patet ex proportionibus numerorum. Dicuntur enim proportionem inter se habere senarium comparatum cum ternario, et denarium comparatum cum quinario, quia ratio unius ad alterum utrobique est identica, videlicet ratio dupla. Eodem modo hæc analogia non sunt talia, quatenus similia sunt; nam quatenus similia, univoca sunt (64), non analogia: sed quatenus similes habent ad aliqua habitudines; quia v. gr. quemadmodum se habet risus in hominis vultu, ita viror herbarum et florum amenitas in prato.

Jam ea, quæ talem habent relationum similitudinem, eodem nomine designantur. Nomen vero hoc non est illud quod exprimit rationem utrique analogo communem: hoc enim nomen univoce significat utrumque, non analogice, ut v. gr. *animal* in quo conveniunt homo et brutum, vel *crude-*

lis in quo conveniunt tigris et tyrannus, utrique univoce applicatur; sed est nomen significans essentiam aut notam aliquam, quæ proprie est unius et non alterius; quæ tamen secundum aliquam proportionem essentiae aut notæ propriæ alterius similis est. Ita hominem qui ratione non utitur, vocamus brutum, et tyrannum appellamus tigridem; quia quemadmodum brutum se habet ad rationem qua caret, ita homo ad rationem qua non utitur, et quemadmodum tigris omnimode caret humanitate, ita tyrannus omnimode illam abiecit. Hunc pertinent omnes metaphoræ.

Hæc de analogia attributionis generatim. De analogia *entis* aliquid peculiare dicendum superest: de qua opportunius alibi.

* 69. Ex his apparet 1º discrimen quod separat voces analogas secundam attributionem, et analogas secundum proportionem. Illæ enim respiciunt unam eandemque rationem quanquam diversimode; non enim est alia sanitas qua denominatur animal, ab ea qua denominatur cibus. Istæ autem significant rationes plures et diversas, quanquam proportionem similes: aliud enim significat tigris quum de fera dicitur, aliud quum dicitur de homine.

2º Quum terminum secundum analogiam proportionis usurpamus, tacitam quamdam comparisonem institui, in qua quatuor ad minus termini considerantur (68).

* 70. Ex iis porro omnibus quæ hucusque dicta sunt, hæc consequuntur:

1º Eundem terminum respectu aliquorum esse posse univocum, respectu aliorum æquivocum, sive casu sive consilio. Sic terminus *homo* est univocus respectu individuorum humanæ speciei, et æquivocus respectu hominis veri, picti, sculpti.

2º Terminum analogum medium propemodum esse inter univocum et pure æquivocum. Non enim exprimit unam eandemque in omnibus rationem, at diversas exprimit rationes, quæ tamen uno alterove modo (60) unitatem quamdam habent.

3º In eadem voce reperiri posse sub diversis respectibus

analogiam tum attributionis, tum proportionis; ut v. gr. reperitur in voce *homo*, prout homini vero et picto fit communis.

ARTICULUS IV.

De terminorum partitionibus secundum objecta significata.

* 71. Huc revocantur termini *concreti* et *abstracti*; tum etiam *sociabiles* et *repugnantes*: qui quid sint, ex iis quæ de ideis (29, 54) dicta sunt, nullo negotio intelligitur.

Ex dictis pariter (18) prout est intelligere, qui sint termini *primæ intentionis* ac *secundæ*.

Termini primæ intentionis dicuntur *qui impositi sunt rebus cogitatis ut sunt in se significandis*. Tales sunt *homo*, *album*, *motus*, etc.

Termini secundæ intentionis, *qui impositi sunt rebus cogitatis significandis, ut subsunt cogitationi intellectus*. Tales sunt *genus*, *species*, *cognitum*, *prædicabile*, *universale*, etc.

72. Propria terminorum partitio, eaque vulgatissima est in *connotativos* et *absolutos*.

Terminus connotavius est ille, *qui significat aliquid ut inhærens seu adjacens alicui, uti candidum, sapiens, cæcum, amabile*.

Absolutus est, *qui significat aliquid, non ut inhærens alicui, sed ut per se subsistens*. Tales sunt termini qui *substantias* significant, ut *lapis*, *animal*, *homo*, *Alexander*, *Roma*; vel qui significant formas affectionesque substantiarum, non ut inhærentes, sed abstracte et sine relatione ad ullum subjectum (29), ut *candor*, *cæcitas*, *amabilitas*.

* 73. Hinc 1º Multa nomina quæ a grammaticis pro substantivis habentur, sunt logicis adjectiva, nempe connotativa; ut *philosophus*, *pater*, *dominus*, etc.

2º Nomina quæ substantias significant, si substantiæ concipiuntur ad modum formæ subjecto inhærentis, sunt connotativa. Talia sunt nomina *ligneum*, *humanum*, *vestitum*, *animatum*.

3º Omne connotativum est terminus concretus, sed non

vicissim. *Homo* v. gr. *Petrus* etc. sunt termini concreti, non tamen connotativi.

4º Nomen connotativum aliud significat, et de alio dicitur. Significat enim modum seu formam substantiæ, et dicitur de substantia, cui modus inest. Et ex hoc vocatur, *connotativum* quia præter id quod significat, notat etiam subjectum de quo dicitur; nisi quod modum clare exprimit, subjectum obscure (47); et nihilominus illum indirecte, hoc directe; seu, ut veteres loquebantur, illum *in obliquo*, hoc *in recto*.

5º Unde intelliges, quid sit in connotativis nominibus *materiale* et *formale* significatum. Materiale est subjectum cui inest forma nomine significata: formale est subjectum idem, prout tali forma determinatur. In his vocibus: *grammaticus*, *dux*, *pictor*, etc. significatum materiale est *aliquis homo*, formale *homo ut grammaticus, ut dux*, etc.

Hoc duplex significatum aliquo modo assignatur in ipsis absolutis, si concreta sint. In his enim materiale significatum sunt individua, formale eadem, ut talem naturam habentia. Imo in ipsis abstractis, si ut concreta considerentur, veluti quum dicimus: *fortitudo est virtus*.

74. Altera partitio, quæ in terminos cadit, et non in ideas, continet terminos *simplices* et *complexos*.

Terminus simplex est *unicum vocabulum ideam aliquam sive simplicem sive compositam* (28) *exprimens*, ut *ens*, *domus*.

Terminus complexus est, *qui pluribus vocabulis unam ideam compositam effert, significando distincte rem ejusque affectiones vel attributiones*; ut *Plato philosophus*, *homo prudens*. Terminus qui rem significat, dicitur *principalis*; qui rei affectionem, *incidens*.

75. Terminus incidens, si principali convenit secundum totam ejus extensionem (28), appellatur *explicativus*, quia explicat aliquid, quod ad ideam principali termino protatam pertinet. Exempla: *Plato Philosophus*, *Deus bonus*, *homo mortalis*.

Si vero incidens principali non convenit secundum totam ejus extensionem, at tantummodo secundum partem, dicitur *restrictivus* vel etiam *determinativus*, quia coarctat et determi-

nat principalis significationem ad partem tantum illius extensionis quam per se haberet. Exempla: *homo prudens, Apostolus Petrus, liber Platonis, timens mortem, disputans acute, homo qui dormit*. His fere modis fit restrictio.

ARTICULUS V.

De terminorum partitione secundum extensionem.

76. Secundum extensionem considerati termini, dividuntur immediate in *proprios* et *communes*. Proprius est, qui certum individuum significat, videlicet objectum ideæ singularis (51); unde dicitur quoque terminus *singularis*. Hujusmodi sunt *Socrates, Neapolis, Bucephalus*.

Communis est, qui de pluribus singillatim, et secundum eamdem significationem dicitur; ut *substantia, mobile, pater, justus*. Ponitur in definitione vox illa: *singillatim*, ut excludantur termini collectivi (52); adduntur illæ: *secundum eandem significationem*, ut univoci solum termini designentur, et æquivoci excludantur (64). Quare si presse loquamur, a definitione excluduntur quoque vocabula quibus *transcendentalia* (56) significantur: hæc enim univoca non sunt, ut alibi demonstrabimus; tamen lato quodam sensu communia dici possunt, imo communissima dici solent; quia revera sunt multipliciter communia.

77. Id quod per se et immediate terminus communis significat, est comprehensio ideæ universalis (14), seu id quod in individuis abstractione mentis inventum est identicum, et apprehenditur ut unum (53).

Mediate vero ea quoque individua, quæ extensionem ideæ universalis constituunt (14), significat. Unde potest ad extensionem hanc vel ex toto, vel ex parte significandam determinari, et sic fieri *singularis, particularis, universalis* et *collectivus*. Quod si nullo modo quoad extensionem determinetur, dicetur *indefinitus*.

78. 1° Fit singularis duobus modis.

a) Præfigendo illi pronomen demonstrativum, ut fit quum dicimus: *hic homo, illa urbs*. Dicitur tunc *singularis ex demonstratione*.

b) Adjecto termino incidente (74, 75), qui ad unum tantum individuum terminum communem restringat, in quo casu dicitur *singularis ex hypothesi*, ut si dicam: *filius Pelei, proditor Christi, liber quem lego, maximus philosophorum*.

2° Fit particularis, si coarctetur ad significandum unum e suis inferioribus, sed indeterminatum (55). Ad hoc autem coarctatur:

a) Signo quopiam particularitatis illi præfixo, ut in his: *aliquis homo, quidam cives, plerique doctores, pars militum, decem juvenes, alter fratrum*, et similibus.

b) Ex ipso contextu orationis, ut quum dico: *Cræsus est dives*, nempe *aliquis dives*. De hoc ubi de propositionibus.

3° Fit universalis, si ad omnia et singula sua inferiora singillatim significanda trahatur. Quod fit

a) Usurpando pluralem numerum nominis communis; *homines, philosophi*, etc.

b) Præponendo terminis communibus signa universalis, quæ sint vel universalis omnino, ut *omnis, nullus*, etc., vel usque ad certum numerum, ut *uterque, neuter*.

4° Fit denique collectivus, quum omnia et singula sua inferiora simul ac per modum unius accipienda significat, ut in hac propositione: *Omnes partes æquant totum*. De hoc infra.

CAPUT III.

DE USU TERMINORUM.

ARTICULUS I.

De terminorum suppositione.

79. Sequitur ut quasdam terminorum affectiones seu proprietates exponamus, quarum notio tum ad rectum vocabulorum usum, tum ad genuinum eorum sensum in humani sermonis contextu definiendum et interpretandum non modice juvat. Quemadmodum enim qui nummorum quibus utitur valorem ignorat, facile circumvenitur, ita qui nescit ea omnia quæ significationem verborum mutant, augent, restringunt, decipiatur in multis, aut saltem hæreat necesse

est. Omissis igitur inutilibus et ab usu remotis, septem terminorum affectiones, quantum necesse fuerit, explicabimus. Hæ sunt: *suppositio, status, ampliatio, distractio, restrictio, diminutio, appellatio*. Ac primo de suppositione dicendum.

80. *Suppositio* generatim est *usus termini pro re aliqua*. Quæ denominatione ex eo orta est, quod voces, ut diximus (62, 58), rebus quasi substituuntur, et pro rebus ipsis, quæ nequeunt oculis supponi, audienti supponuntur. Differt a significatione. Hæc enim est vis existens in termino, obijciendi intellectui aliquid a se distinctum; suppositio autem est usurpatio termini, ut vim significandi exerat. Ejusdem porro vocis diversa potest esse suppositio, utquæ ex loquentis intentione et sermonis circumstantiis sæpe dependet.

Unde 1^o suppositio dispescitur in *materialem* et *formalem*.

Materialis est *usurpatio vocis pro seipsa*. Sic usurpas has voces *Cicero, Philosophia*, quum dicis, *Cicero est vox trium syllabarum*, et: *Philosophia significat studium sapientiæ*.

Formalis est *usurpatio vocis pro re aliqua quam significat*; hujusmodi est suppositio earumden vocum, si dicas: *Cicero fuit orator, Philosophia est scientia*. Et hæc proprie loquendo suppositio dicitur.

81. 2^o Formalis suppositio alia *realis* est, alia *logica*, quam veteres *simplicem* appellabant.

Realis est *usus termini pro re significata, secundum modum existendi quem habet extra mentem*. Quum dicis: *Plato est homo: homo est animal*, suppositio vocum *Plato* et *homo* est realis.

Logica est *usus termini pro re significata, secundum modum existendi quem habet in intellectu cognoscente*. Quum dicis: *Plato est idea singularis*, vel *est unum ex inferioribus hominis*; et *homo est species*; usurpas voces *Plato* et *homo* suppositione logica.

Hinc colliges, terminos qui realiter supponuntur, supponi pro rebus ut subsunt primis intentionibus; qui vero logice, supponi pro rebus ut subsunt intentionibus secundis (18).

82. 3^o Quoniam termini alii sunt singulares, alii communes (76), ita suppositio formalis sub hoc quoque respectu duplex est, *singularis* nempe et *communis*.

Singularis est *acceptio nominis pro individuo determinato*; quo pacto accipiuntur hæc nomina: *Socrates, hic homo, filius Pelei* (76, 78).

Communis est *acceptio nominis communis pro suo significato immediato, vel pro suis significatis mediatis* (77).

4^o Ex quo vides suppositionem communem in duas species subdividi; quarum altera est *acceptio nominis communis pro natura, quæ in pluribus individuis abstractione mentis reperitur identica*: altera est *acceptio nominis communis pro individuis quæ extensionem ideæ universalis constituunt*. Si suppositio sit insuper realis (81), prima vocatur *absoluta*, secunda *personalis*. Exemplum utriusque habes in his propositionibus: *homo est nobilissimum animal; omnis homo moritur*.

Quoniam vero termini communis extensio potest vel ex toto, vel ex parte considerari, jam vides, posse terminum communem tum pro tota sua extensione, tum pro parte supponi. Ad hæc, verba vel nomina, quibuscum terminus communis in oratione conjungitur, alias suppositionis personalis inducunt differentias. Quæ omnia ut explicentur, quædam præmittenda sunt.

ARTICULUS II.

De quadruplici descensu a termino communi ad individua.

83. Suppositio personalis termini communis explicatur per descensum ad individua. Est autem generatim descensus: successiva substitutio individuorum, quæ termini communis extensione continentur, in eo orationis contextu, in quo terminus communis invenitur. Dicitur descensus, quia individua censentur inferiora termini communis, et ita vocantur (33). Jam descensus iste quadruplex est, nimirum *copulativus* et *copulatus, disjunctivus* et *disjunctus*.

1^o Copulativus descensus fit multiplicando pro numero individuorum orationem, multiplicataque membra conjun-

gendo particula *et*: ut si orationem hanc: *Omnis homicida pereat*, ita explices: homicida A pereat, et homicida B pereat, et homicida C pereat, et ita de cæteris.

Descensus iste dicitur copulativus seu copulans, quia fit collando membra orationis multiplicata.

2° Copulatus fit substituendo communi termino inferiora ejus copulata per particulam *et*, ita ut oratio non multiplicetur. Ita explicabis inhumanum illud Neronis votum: *Utinam omnes cives unum caput haberent*, nimirum: Utinam civis A, et civis B, et civis C, et civis X unum caput haberent.

Ex hoc patet, quare descensus iste copulatus nuncupetur.

3° Disjunctivus fit multiplicando pro numero individuum orationem, ejusque membra conjungendo particula disjunctive *vel*. Hoc pacto expones propositionem hanc: *Aliquis apostolus fuit proditor*, nempe: vel Petrus fuit proditor, vel Andræas fuit proditor. . . . vel Judas fuit proditor.

4° Disjunctus, qui et *confusus* nominatur, fit substituendo communi termino inferiora ejus, connexa per particulam disjunctivam *vel*, ita ut oratio non multiplicetur. Si hæc proponatur enuntiatio: *Aliquis oculus est necessarius ad videndum*, non tibi licebit eam exponere descensu disjunctivo hoc pacto: vel dexter oculus est necessarius ad videndum, vel sinister oculus est necessarius ad videndum; hæc enim expositio esset plane falsa; sed recte expones illam descensu disjuncto: vel dexter oculus vel sinister est necessarius ad videndum.

84. Notanda 1° Quæ diximus de descensu a specie ad individua, dicito etiam de descensu a genere ad species.

2° Individuorum multitudo quæ in his descensibus enumerata censentur, modo ad existentia hoc vel illo tempore solum pertingit, modo etiam ad possibilia, uti ex dicendis patebit.

3° In suppositione materiali (80), logica (81), et singulari nullus potest fieri descensus, ut manifestum est. In suppositione absoluta (82) potest fieri ratione mediati significati.

Suppositio autem personalis quomodo sit modo hoc, modo illo descensu explicanda, mox aperiemus.

ARTICULUS III.

De partitionibus suppositionis personalis.

85. Terminus qui personaliter supponitur, potest, ut diximus (85), supponi pro tota sua extensione, vel pro parte tantum. Quum pro tota supponitur, suppositio est vel *distributiva* vel *collectiva*; quum pro parte, *disjunctiva* vel *disjuncta*.

Suppositio *distributiva* est *usus termini communis pro suis inferioribus enumerandis descensu copulativo* (83, 1°). Quando vero terminus communis distributive supponatur, exemplis in præsens declarare juverit. In his enuntiationibus: *Homines sunt mortales* — *Omne corpus est grave* — *Nullus philosophus est infallibilis* — *Cræsus non est felix* — *Leo est bestiarum fortissimus, pulchrior urso* — *Planeta differt a stella* — *Nullum animal, excepto homine, potest erubescere* — voces *homines corpus, philosophus, felix, bestiarum, urso, stella, homine* distributive supponuntur.

86. Distributiva suppositio 1° potest esse *complete* et *incomplete* distributiva.

a) Complete distributiva est, quæ explicatur descensu copulativo enumerante omnia individua, quæ termino communi subjacent. In exemplis superioribus, termini communes complete distribuuntur. Dicitur hæc suppositio pro *singulis generum*.

b) Incomplete distributiva est, quæ explicatur descensu copulativo enumerante omnes species, quæ subsunt termino communi. In his propositionibus ex. gr. *Omne animal terrestre fuit conditum die sexto*; *Historia naturalis describit omnia mineralia*; *Tullius omnes reipublicæ honores assecutus est*, termini *animal terrestre, mineralia, honores* incomplete distribuuntur: quæ dicitur suppositio *pro generibus singulorum*. Vides porro, non posse hoc pacto supponi, nisi ea nomina quæ genus proprie dictum (37) significant, aut quæ tanquam genera considerantur.

2° Distributiva suppositio, sive completa-sit, sive incom-

pleta, potest insuper esse vel simpliciter distributiva, vel cum exceptione.

a) Simpliciter distributiva est, quum in descensu exsequendo nulla exceptio facta intelligitur, ut in his: *Omnis homo est animal: omne animal est mortale.*

b) Distributiva cum exceptione, quæ etiam accommoda vocatur, est, quum in descensu exsequendo exceptio aliqua intelligitur facta. Quum v. gr. dictum legis: *In Adam omnes peccaverunt*, utique intelligitur excipi Christus et immaculata ejus mater. Item in hac propositione: *Omne animal fuit in arca Noe*, unusquisque intelligit excipi aquatilia.

Notandum probe est, non posse nec debere in distributiva suppositione explicanda, exceptionem a quoquam intelligi, nisi ratione probetur, vel idonea auctoritate.

87. Suppositio collectiva est usus termini communis pro suis inferioribus enumerandis descensu copulato (83, 2º). En tibi exempla: *Omnes partes æquant totum — Sacramenta sunt septem — Utinam boni cives sint multi.*

Hoc suppositionis genus ex cæteris orationis adjunctis, partibus ac toto contextu facile dignoscitur. Hoc unum animadvertit, non posse nomen commune supponi collective, nisi plurali numero efferatur, ut liquet ex ipsa rei natura. Cæterum collectiva suppositio quam differat a distributiva, nemo non videt.

88. Suppositio disjunctiva est usus termini communis pro suis inferioribus enumerandis descensu disjunctivo (83, 3º): seu aliis verbis: est usus termini communis pro uno e suis inferioribus eoque indeterminato, ita tamen ut de uno aliquo seorsum sumpto possit oratio verificari. Res patet in exemplo supra allato (83, 3º).

Suppositio disjuncta seu confusa est usus termini communis pro suis inferioribus enumerandis descensu disjuncto (83, 4º), seu usus termini communis pro uno e suis inferioribus, eoque indeterminato, et quidem ita ut de nullo seorsum sumpto possit oratio verificari, sed solum de uno aliquo sumpto disjunctim cum aliis. Hoc pacto supponitur vox *oculus* in propositione supra expensa: *Aliquis oculus est necessarius ad*

videndum. Item in his quæ sequuntur: *Requiritur navis ad navigandum — Debeo tibi nummum aureum — Polliceor tibi, vel desidero equum — Voces navis, nummum aureum, equum* supponuntur disjuncte. Et generatim quotiescunque utimur verbo quod fertur ac tendit ad aliquam rerum speciem, et non determinate ad individua, casus obliqui a verbo dependentes ita supponuntur.

89. Ex his omnibus colliges 1º terminos qui afficiuntur syncategorematis *omnis, nullus, etc.*, posse habere pro varietate orationis suppositionem tum distributivam, tum collectivam: eos item qui afficiuntur syncategoremate *aliquis* et similibus, posse supponi tum disjunctive, tum disjuncte.

2º Terminum universalem (78, 3º) esse terminum communem distributive suppositum, terminum item particularem esse terminum communem disjunctive suppositum, vel disjuncte.

ARTICULUS IV.

* De terminorum statu, ampliacione, distractione.

90. Affectiones istæ tres conveniunt nominibus, seu potius eorum suppositioni, quatenus nomina cum verbis conjunguntur. Quum enim verbum adsignificet tempus (62), modo contingit, ut nomen illi conjunctum supponatur pro iis tantum individuis, quæ tempore per verbum adsignificato existunt, modo pro iis quæ alio tempore exstiterunt vel exstitura sunt, modo pro his simul et illis. Veniamus ad singula.

Status est acceptio termini pro iis rebus, quæ sunt in tempore adsignificato per verbum ipsi conjunctum, ut videre est in his exemplis: *Mutus tacet; Pueri multi senuerunt; Calamitas veniet*; in quibus terminus *mutus* accipitur pro iis qui in præsentia sunt tales, *pueri* pro iis qui fuerunt *pueri*, *calamitas* pro iis quæ futuræ sunt.

91. Ampliatio est acceptio termini pro pluribus rebus quam quæ existunt tempore per verbum adsignificato. Hoc pacto accipitur terminus *senex* in hac propositione: *Omnis senex fuit puer*; nempe: *omnis qui fuit aut est senex.*

Animadvertite 1^o cum tres sint generatim temporum differentiæ, *esse, fuisse, fore*, posse ampliationem se extendere ad duas tantum, v. gr. ad præteritum simul et ad præsens; vel etiam omnes complecti; imo omne tempus excedere, et ad ea quoque pertingere quæ possibilia sunt. Quum dicis ex. gr. *Lugentes consolabuntur*, terminus *lugentes* ampliatur a futuro ad præsens, ut sensus sit: *qui erunt aut sunt lugentes, consolabuntur*. Quum vero dicis: *Omnis homo est morti addictus*, ampliatio fit a præsentem ad præteritum simul et futurum. Tandem si dicas: *Omnis homo est animal*, eos quoque complecteris homines qui esse possunt, licet nunquam futuri sint.

2^o Quum nomen ampliationem subit, non accipi pro iis quæ sunt copulativum (83, 2^o) in diversis temporibus, sed disjunctim in uno aut altero. Sic in ultimo exemplo non hoc intelligis, quod omnis homo qui fuit, et est, et erit et potest esse, sit animal; sic enim homo qui fuit v. gr. et non est, animal non esset; sed quod omnis homo qui fuit, aut est, aut erit, aut potest esse, sit animal.

92. *Distractio est acceptio termini pro iis tantum quæ sunt alio quodam tempore diverso a tempore verbi*, ut contingit in his enuntiationibus: *Cæci vident, claudi ambulant, mortui resurgunt, vivens morietur*. Explica: *qui fuerunt cæci, claudi, mortui, et qui est vivens*.

93. Ad rite explicandas tres istas hominum affectiones, notandum, aliter eas explicandas esse in nominibus absolutis, aliter in connotativis. Nomen enim absolutum præponendum est relativo pronomini, verbum *est* aut *fuit* etc. regenti: nomen vero connotativum postponendum. Oblatis tibi his duabus enuntiationibus: *Omnis homo morti est addictus*, et *Lugentes consolabuntur*, sic explicabis primam: *Omnis homo qui est, aut fuit, aut erit, morti est addictus*; alteram vero: *Qui sunt, aut erunt lugentes consolabuntur*. Ratio est, quod relativum refertur ad subjectum, cui inest forma; hoc vero subjectum diserte significatur a nomine absoluto et a connotativo confuse connotatur (73, 4^o).

ARTICULUS V.

* De restrictione, diminutione, appellatione.

94. *Restrictio est coarctatio significationis termini ad partem tantummodo extensionis quam per se haberet*. Fit per voces incidentes restrictivas, de quibus in capite præcedenti diximus (75).

Hic nota 1^o voces incidentes istas restringere personalem termini suppositionem, unaque sive statum, sive ampliationem, sive distractionem, quam terminus principalis per se haberet.

2^o Nullam fieri restrictionem, quum vocabulum incidens transfert principale a propria significatione ad metaphoricam, ut quum dicis: *equus marmoreus, milites depicti*. In his non restringis principalis suppositionem, sed a propria mutas in impropriam; quam mutationem veteres *alienationem* vocabant.

95. *Diminutio est coarctatio termini ad significandam solummodo partem ejus rei, quam ex se totam significat*. V. gr. quum dico *ruber*, significo subjectum rubrum: si addo *crine*, coarcto significationem ad hujus subjecti partem. Idem dicito de aliis.

96. *Appellatio est applicatio notionis significatæ per unum terminum ad id quod per aliquem alium terminum significatur*; ut quum dico: *bonus philosophus*, applico homini, ut est *philosophus*, notionem significatam per vocem *bonus*, ut significem eum esse bene versatum in philosophiæ scientia. In hoc exemplo vox *bonus* dicitur appellans, vox *philosophus* appellata, et ita in cæteris.

De appellatione hæc accipe documenta.

1^o Vox appellans semper accipitur secundum formale significatum (73, 3^o), videlicet pro forma, quam significat, ut adjacentem subjecto. Si enim quandoque acciperetur secundum materiale significatum, nimirum pro subjecto, in quo invenitur forma nomine expressa, nulla esset appellatio, sed ridicula tautologia. Fac enim, quum dico *homo sapiens*,

me accipere vocem *sapiens* pro materiali significato, quid aliud dicerem, nisi *homo homo*?

2^o Appellatio ipsa modo cadit super formale significatum vocis appellatæ, ut si dicas *magnus dux*, vel *malus musicus*; modo vero super materiale, ut quum dicimus: *poeta dormiens*.

3^o Generatim quum occurrit terminus complexus ex voce appellante et appellata, ita ut appellans appellatam præcedat, appellatio cadit in formale significatum vocis appellatæ. Idcirco hæc propositio: *Christus est factus homo* concedi debet ut vera, quia appellatio *facti* non fertur in personam habentem humanam naturam, quæ est significatio materialis vocis *homo*, sed in personam quatenus humanam possidet naturam, quæ est significatio formalis (75, 5^o).

4^o Quum vero vox appellans applicatur per propositionem vocis appellatæ, si hæc est terminus concretus, appellatio cadit in materiale ejus significatum. Idcirco hæc propositio: *Christus est æternus*, est vera, quia appellatio *æterni* fertur in Verbum divinum, quod est quasi materiale significatum vocis *Christus*, non in Verbum incarnatum, quod est significatum formale.

5^o Cæterum quum diversitas appellationis a mente loquentis potissimum pendeat, si quando dubium occurrat, appellatio ipsa explicanda est, antequam recipiatur. Explicatur porro appellatio, adhibitis particulis reduplicantibus, *quatenus, qua, secundum quod, etc.* Hanc propositionem v. gr. *Deus est mortuus*, ita explicabis: Deus, quatenus dicit unam ex personis divinis, mortuus est, verum: quatenus dicit naturam divinam, falsum.

97. Minuta sunt hæc, et non paucis fortasse redundantia, quibusdam etiam despectui habenda videbuntur. Sed ex his minimis ars omnis constat; e quibus etiam, ut exempla adducta demonstrant, non raro maxima pendent. Cæterum nonne minutiora sunt, quæ historiæ naturalis scriptores, chimici, physiologi de corporibus perscrutantur? Qui vero hæc, uti decet, magni facit, quomodo secum ipse cohærebit, si quum de mentis humanæ operationibus deque recte cogi-

tandi arte agitur, quidquid ultra superficiem penetrat, quidquid analysim aliquam diligentemque inquisitionem sapit, fastidiat et damnet? Si quis plura desiderat, adeat Petrum Fonseca in *Institutionibus Dialecticis* (1).

ARTICULUS VI.

* *Notanda quædam circa usum vocabulorum.*

98. Cum in hunc finem vocabula adhibeamus, ut res a nobis cogitatas cæteri intelligant (62), illud maxime in vocabulorum usu, præsertim philosophico, curandum est, ut qui audiunt, vocabula ipsa quæ usurpamus, intelligant, iisque intellectis, mentem quoque loquentis quam proxime assequantur. Is porro vocabulum intelligere censetur, qui ita novit quid vocabulum significet, ut rei significatæ ideam saltem claram habeat. Mentem vero loquentis intelligit, qui non modo novit res quæ vocabula a loquente usurpata significant, sed etiam cum his vocabulis easdem conjungit notiones, quas ipse loquens conjungit.

99. Ad hunc finem ut ab aliis intelligatur, hæc præsertim documenta loquenti attendenda sunt:

1^o Ut a vocabulis obscuris absteineat, quando clara adhiberi possunt, vel debent. Sunt porro vocabula obscura ea quorum anceps est significatio, ita ut diversas in diversis ideas excitare possint. Hujusmodi sunt.

a) Termini indeterminati et transcendentes *ens, res* etc., quum de rebus determinatis sermo est.

b) Voces genericæ, quum de speciebus loquendum est.

c) Voces vagæ significationis, quæ videlicet vel significationem habent multiplicem, ut est vox *natura*, vel a variis hominum opinionibus dependentem, ut sunt *honor, homo politicus, libertas civilis, libertas conscientiæ, tolerantia opinionum* et aliæ sexcentæ, quibus recentiores præsertim sophistæ liberaliter utuntur. Quum hujusmodi vocabula, imo generatim quum voces adhibemus quæ multiplicem utunque significationem habent, declarandum est, quæ significa-

(1) Lib. VIII, c. 19, seq.

tio a nobis intendatur; et cavendum, ne ad alteram significationem deflectamus, auditore seu lectore non præmonito, nisi res per se pateat.

2º Multo magis cavendum a verbis inanibus, quæ propriam quidem significationem habent, sed ad rem aliam significandam transferuntur, cujus notionem nullam vel solum obscuram habemus. Hujusmodi sunt officiosa illa vocabula ad ignorantiam dissimulandam simulandamque scientiam excogitata, quæ adhiberi solent non modo ab iis qui vulgo imponere avent, sed ab iis quoque, qui subtilis inquisitionis impatientes, tum demum omnibus quæstionibus satisfacisse sibi videntur, quum verba sibi aliisque danda ipsis non desunt.

3º Abstinendum quoque ab inutilibus metaphoris, quando voces propriæ clarius rem explicant, et erroneis interpretationibus minus patent. Non raro metaphoræ istæ inter inania verba rejiciendæ sunt, de quibus mox egimus. Huc spectant illa *horror vacui, sympathiæ rerum, antiperistasis*, etc.

4º Attendatur in primis ad usum loquendi, ita ut a receptis vocabulis receptaque vocabulorum significatione non recedatur, vitentur obsoleta, nova non obtrudantur absque necessitate, nec sine prævia declaratione; usitata insuper vocabula non ita conjungantur, ut ambigua oratio et ænigmati similis prodeat.

100. Notanda tamen duo:

a) Non recedere ab usu loquendi, qui vocabula vulgo imperitorum inexplorata, at philosophis familiaria, et ad mentis abstractiones scientiarumque subtilitates significandas inducta, usurpet. Omnis enim artis ac disciplinæ proprium est, ut, cum eas res pertractare debeat quas vulgus non curat, terminos quoque sibi proprios ac technicos habeat, qui in vulgi sermone non versantur.

b) Non esse in præsentī censendas in philosophico sermone obsoletas eas voces, quas veterum scholasticorum subtilitas sapienter excogitavit, nisi vel clariores fuerint suffectæ, vel earum inutilitas demonstrata. Quamvis enim, elapso præsertim sæculo, a leviori illa philosophia voces istæ neglectæ

ac derisui habitæ fuerint, si tamen eæ necessariae putentur, contemptorum judicium contemnendum est. Nam contra veritatis et scientiæ jura nunquam præscribitur. Experientia certe non raro probat, ex earum neglectu ingentes oriri obscuritates, confusiones, ambiguitates.

101. 5º Cæterum consideranda semper est audientis conditio, et communiter, nisi aliud adjuncta suadeant, non aliæ in illo supponi debent notiones, quam quæ omnibus sunt communes. Si quæ igitur voces adhibentur, quæ res extra communis cognitionis ambitum positas significant, eæ sedulo declarandæ.

ARTICULUS VII.

* *Notanda circa vocabulorum interpretationem.*

102. Aliqua hoc loco de vocabulorum interpretatione subijcere visum est, quæ prima artis hermeneuticæ principia dabunt. Est porro ars hermeneutica, *ars aliorum verba juxta loquentis mentum intelligendi*. In hunc finem sequentes regulæ generales communiter traduntur, quæ verbis tum ore prolati, tum maxime scripto traditi applicantur.

1º Ea interpretatio vocibus alterius tribuenda, quam suadet loquendi usus eo loco ac tempore vicens, quo ipse loquebatur, vel scribebat. Loquendi usus est: *verborum cum notionibus et locutionum cum animi sentiis connexio consuetudine probata*: eaque non uno ex capite determinatur, sed ex pluribus, ut sunt regio, ætas, religio ac secta, reipublicæ forma, mores, ritusque gentis et alia hujusmodi.

Ratio præcepti est manifesta. Qui enim loquitur, vult intelligi: non posset autem intelligi, nisi loquendi morem sequeretur. Ergo hunc secutus esse existimandus est.

Ex his patet a), qui librum aliquem interpretari cupit, linguam in qua scriptus est, quam perfectissime potest, calere debere.

b) Necesse quoque esse, ut scriptoris ætas, patria, religio; gentis item historia, mores, adjuncta cætera cognoscantur.

c) Errorem quandoque esse magnum, intolerandamque licentiam, si quis notiones vocabulis veterum subijciendas

ex recentiorum opinionibus, aut ex propriis desumat. Non raro enim iisdem vocibus notiones diversis temporibus subiunguntur omnino diversæ. In hoc peccant frequenter novorum systematum auctores, qui, ut veterum philosophorum auctoritate se communiant, loquendi formulis ab iis adhibitis suas efferrî opiniones autumant ac mirifice expressas exhiberi, cum tamen illis longe alia significari deprehendamus. Quam multa v. gr. hæretici e sacris litteris, janseniani e s. Augustino, et nostri ævi philosophi e s. Thoma, hoc pacto in rem suam detorquent!

103. 2º Interpretanda verba sensu proprio, non translato; nisi id vetet aliqua evidens ratio, aut sensus proprii absurditas manifesta sit.

3º Attendenda est interpreti tum occasio scribendi, tum materia de qua scribitur, tum scriptoris consilium, stylus, adjuncta cætera. Ex his enim sæpe æquivocarum vocum significatio, aut ambiguae sententiæ vis determinari debet; quandoque ex his solis potest; præsertim quum loquendi usus vel dubius est, vel multiplici interpretationi se accommodat.

4º Quum obscuræ sententiæ occurrunt explicandæ, adjuvmenta conquiri debent:

a) Ex locis ejusdem auctoris clarioribus, quia auctor a se ipso minime dissentire putandus est, nisi quid obstet.

b) Ex contextu orationis. Contextus autem est *nexus vocum et sententiarum cum antecedentibus et consequentibus vocibus et sententiis*.

c) Ex aliis locis similibus, vel interpretationibus eorum qui cœvi auctoris fuerunt, vel amici, vel discipuli.

CAPUT IV.

DE DIVISIONE.

ARTICULUS I.

De divisionis notione.

104. *Divisio est totius in suas partes distributio*. Partes in quas totum dividitur, *membra dividendi*, seu *membra divisionis* a logicis appellantur.

Divisionis utilitas magna est ac multiplex. Primo enim necessaria est ad ideas distinctas (47, 2º) acquirendas, et ad terminorum æquivocationes orationisque ambiguitates dissipandas. Intelligentiam insuper humanæ mentis mirifice promovet: objecta enim cognoscenda ut plurimum complexa sunt, nec uno mentis intuitu comprehendi possunt; ut ergo ex integro intelligantur, resolvenda sunt in partes, et per partes consideranda. Quod si absque divisione res non possunt intelligi, multo minus declarari poterunt; unde sine divisionis adjumento nulla doctrina tradi, nulla scientia communicari potest. Tandem divisio sobria et prudens memoriam non modicum juvat, ut quæ confusionem tollit ordinemque constituit.

105. Divisio alia est *vocis*, alia *rei*. Illa *distinctio*, hæc proprio nomine *divisio* appellatur. *Distinctio* porro est *vocis æquivocæ*, i. e. *significatione multiplicis, secundum suas significationes distributio*; ut si dicas: Hujus vocis *principium* alia significatio est, qua primum in aliqua serie terminum designamus, alia, qua id ex quo aliud procedit.

Quæmadmodum porro sunt voces quibus inest multiplex significandi vis, ita sunt quoque orationes multa significantes, uti hæc: *Audire Pompeium Cæsarem superasse*, et similes; quæ dicuntur orationes *ambiguae*. Hæ quoque distingui possunt, imo frequenter debent. Distinguuntur autem vel per adjectionem alicujus vocis, vel per diminutionem, vel per distinctionem vocis, vel per aliquam immutationem, ut si dicas in proposito exemplo: *Audire Pompeium Cæsarem vicisse*: i. e. quod Cæsar Pompeium vicit.

Divisio rei est *rei per vocem significatæ in suas partes distributio*. De qua ut rite agamus, considerandum primo est, quid totum sit et quotuplex; ex qua consideratione varias divisionis species eruemus.

ARTICULUS II.

De toto et partibus.

106. Totum dicimus *omne id quod unum est, et in plura*

resolvi potest. Plura hæc in quæ totum resolvitur, *partes* ipsius sunt.

Apud dialecticos totum aliud est *actuale*, aliud *logicum*, quod per oppositionem ad primum vocare possumus *potentiale*.

Totum *actuale* est *id quod habet essentiam compositam*, sive re, ut *homo*, sive solum secundum considerationem mentis, ut *anima humana*. Dicitur *actuale*, quia partibus *actu* conjunctis componitur, vel concipitur, ad modum compositi ex partibus *actu* conjunctis.

107. Si partes ex quibus totum *actuale* constat, sunt ab invicem realiter distinctæ ac separabiles, vereque ipsum componunt, dicuntur partes *physicæ*, et ipsum totum dicitur *totum physicum*. Hominis v. gr. *physicæ* partes sunt corpus organicum et anima rationalis.

Si vero partes non sunt realiter distinctæ, sed solum secundum considerationem mentis, dicuntur partes *metaphysicæ*, et totum quod ita concipitur compositum, totum *metaphysicum*. Tales partes sunt genus et differentia (37, Coroll.), quibus essentiam omnem componi concipimus.

108. *Physicæ* porro partes vel sunt *essentiales*, vel *integrales*. Partes *essentiales* sunt eæ, quæ toti ita sunt necessariae, ut vel una ipsarum sublata, illius conceptus pereat; cujusmodi sunt anima et corpus in animali. *Integrales* sunt eæ, quæ totius quantitatem constituunt, et requiruntur ut totum dicatur integrum, non tamen sunt illi adeo necessariae, ut vel una, vel pluribus sublatis, ejus patura mutetur. Hujusmodi sunt v. g. in homine pedes, manus etc.

Tandem partes *integrales* sunt *homogeneæ*, vel *heterogeneæ*. *Homogeneæ*, si sunt ejusdem naturæ et appellationis cum toto, ut in massa aquea singulæ ejus partes. *Heterogeneæ*, si sunt diversæ naturæ ac appellationis; ut sunt membra singula corporis humani.

109. Ad totum *actuale* pertinet quoque totum *morale*, quod est *multitudo entium rationalium*, quæ inter se relatione aliqua connectuntur; cujusmodi sunt *familia*, *civitas*, *respublica*, *exercitus* etc. Et in hoc distinguuntur partes tum *essentiales*, tum *integrales*, eæque *homogeneæ*, vel *heterogeneæ*. Dux

et milites v. gr. sunt partes *essentiales* in exercitu: legiones et cohortes, vel singuli milites, partes *integrales*.

110. Nunc de toto *potentiale*. Totum *potentiale* vocamus *omnem ideam universalem* (33) *respectu eorum, quæ sub ejus extensione continentur*; quæ partes *subjectivæ* dicuntur. Sic genus est totum, species sunt ejus partes *subjectivæ*.

Totum hoc vocatur *logicum*, quia universale qua tale, ad ordinem logicum, nempe idealem pertinet: vocatur quoque *potentiale*, quia idea universalis non constat suis inferioribus tanquam componentibus, sed potest unicuique singillatim applicari; unde *potentia* omnia complectitur.

Hæc autem inferiora dicuntur partes *subjectivæ* totius universalis, quia ipsum universale de singulis dicitur tanquam de subjectis, ut *Petrus est homo*, *Paulus est homo*, etc.

111. Juerit animadvertere ad hæc discrimina, quæ inter totum *actuale* et *potentiale* intercedunt.

1º Totum *actuale* partes habet in sua comprehensione; *potentiale* partes habet in sua extensione.

2º Illud propriè dicitur *totum*, hoc vero *omne*. Revera quum dicimus: *totum animal*, consideramus cuncta animalis constitutiva; quum dicimus: *omne animal*, consideramus cuncta animalis inferiora.

3º Totum *actuale* potest affirmari de omnibus partibus simul conjunctis (anima conjuncta corpori est homo); sed non de singulis (anima est homo).

Totum *potentiale* e contrario potest affirmari de singulis partibus (homo est animal; brutum est animal); sed non de omnibus simul conjunctis (homo cum bruto sunt animal).

4º De quocunque dicitur totum *actuale*, dicuntur quoque ejus partes copulatæ: de quocunque dicitur totum *potentiale*, dicuntur ejus partes disjunctæ. Quod dialectici sic efferunt: totum recipiatur cum suis partibus vel copulatim vel disjunctim.

ARTICULUS III.

De variis divisionis speciebus.

112. In primis totum *actuale* dupliciter dividi potest, pro

partium quæ spectantur diversitate. Si divisio fiat per partes physicas, divisio *physica* dicitur; si per partes metaphysicas, *metaphysica*.

Quemadmodum autem ens physice simplex capax est solum divisionis metaphysicæ, ita ens vere compositum utriusque divisionis capax est. Potest enim fieri hujus compositi divisio physica, ut patet: et potest fieri divisio metaphysica si considerentur non partes quæ realiter compositum constituunt, sed quæ per abstractionem mentis in illo fiunt et distinguuntur. Sic in homine distinguimus tanquam partes, genus *animal*, et differentiam *rationale*, et in tabula quadrata *subjectum* et *figuram*.

Quoniam vero partes physicæ sunt vel essentielles vel integrales, divisio quoque physica fieri potest vel secundum partes essentielles vel secundum integrales. Quum dicis: hominis altera pars est animus, altera corpus; aquæ altera pars est oxigenium, altera hydrogenium; divisiones instituis per partes essentielles; si vero dividis rectangulum in duo rectangula, aut vinum in tres mensuras, totum dividis in partes integrales homogeneas; quod si versum in pedes partiris, et arborem in radices, truncum et ramos, totum dividis in partes integrales heterogeneas.

* 113. Hæ omnes divisiones, si in iis exsequendis enumerentur partes quas ratione sui totum continet, dicuntur divisiones *per se*. Quod si non partes enumerentur, sed loco partium proprietates ipsarum vel accidentia, divisio dicitur *per accidens*. Rem abunde declarabunt exempla.

Divisio metaphysica per accidens: *Hominis altera pars est communis pecudi, altera illi propria*.

Divisio physica essentialis; *Hominis altera pars est corruptibilis, altera incorruptibilis*.

Divisio per partes integrales: *Hujus panni altera portio est purpurea, altera flava*.

114. Jam de divisione totius logici: hujus divisionis duo modi sunt *per se*, tres *secundum accidens*.

Prima divisio per se est divisio generis in suas species, ut si dividas vivens in animal et plantam. Huc reducitur divisio

generis in differentias, ut est divisio viventis in animal et inanimatum; et divisio differentie genericæ in species, ut est divisio organicorum in animal et plantam.

Altera divisio per se est divisio speciei in individua, ad quam revocatur divisio differentie specificæ in individua.

115. Sequuntur tres divisiones secundum accidens; in quibus nempe membra dividentia non sunt per se partes rei divisæ.

Prima est divisio *subjecti in accidentia*. Subjectum intellige omnem partem subjectam (110) generi vel speciei; accidens quidquid ad essentiam non pertinet. Fit igitur hæc divisio, quum diversa accidentia insunt inferioribus alicujus generis vel speciei. En exempla: *Corporum alia moventur, alia quiescunt. Hominum alii sunt albi coloris, alii nigri, alii flavi, alii cuprei*.

Altera divisio est *accidentis in subjecta*: quæ fit cum inferiora accidentis universalis inhærent diversis inferioribus alicujus generis vel speciei; ut quum dicis: *Passiones aliæ sunt hominis, aliæ bruti. Idæ aliæ sunt hominis, aliæ angeli*.

Tertia demum divisio est *accidentis in accidentia*, quæ locum habet, quum accidentia dividentia cadunt in diversa inferiora ejus generis vel speciei cui inhæret accidens divisum. Exempla: *Eorum quæ amara sunt, alia salubria sunt, alia insalubria. Eorum quæ candida sunt, quædam sunt dura ut marmor, quædam mollia ut nix, quædam liquentia ut lac*.

ARTICULUS IV.

Præcepta ad bene dividendum.

116. Quæcunque divisionis ratio adhibeatur, hæc semper præcepta servanda erunt.

1^o Divisio sit adæquata, i. e. talis ut omnia membra dividentia simul sumpta totum adæquent. Ratio est manifesta. Hac in re peccari potest et excessu et defectu. Excessu peccaret ex. gr. qui corpus animatum cum veteribus divideret in hominem, brutum et plantam. Peccaret defectu, qui motiva quibus homines ad agendum moventur, esse diceret vel gloriæ cupiditatem, vel lucri desiderium.

2° *Nullum divisionis membrum debet esse per se toti divisio æquale, multo minus totum divisum excedere*: non enim potest pars adæquare totum aut superare. Ex hoc capite vitiosa est hæc divisio: *Animalium alia sunt sensu prædita, alia ratione*. Animalia enim omnia sensu prædita sunt.

Objicies: quum partes hominis metaphysicas hasce duas pono: *animal et rationale*, primum membrum latius patet quam divisum, quod est *homo*. Respondeo animal latius patere secundum rationem totius logici, sed non secundum rationem totius actualis quod dividitur.

3° *Unum divisionis membrum alterum non includat*. Hoc est quod dialectici dicunt: membra divisionis aliquo modo opposita esse debere. Ratio est, quod secus una pars bis repeteretur, ut si quis terrestrem globum divideret in *Europam, Asiam, Africam, Americam, Oceaniam et Italiam*.

Hinc a) in totius logici divisione nullum membrum debet esse alterius pars subjectiva; ut si divideres corpus in *luminosum, obscurum et pellucidum*.

b) Ex quo sequitur membra logicæ divisionis, debere esse sibi repugnantia, scilicet quæ de eodem subjecto simul affirmari non possint. Secus falso affirmares, inferiorum divisi aliud esse hoc, aliud illud.

Quod si objiciant, viciū hoc reperiri in probatissimis quibusdam divisionibus, ut in hac: *bonorum quædam honesta sunt, quædam delectabilia, quædam utilia*; respondebis, in hac divisione ipsam rationem boni dividi in rationes subjectas, ita ut alia sit ratio bonitatis quæ honestum facit, alia quæ delectationem affert, alia quæ utilitatem; quod quidem est omnino verum, quanquam in rebus quæ bonæ sunt, et una et altera ex his boni rationibus simul inveniri possint.

4° *Divisio fiat primo in proxima et immediata membra; deinde, si opus fuerit, singula membra in suas partes subdividantur*. Membra proxima et immediata sunt quæ immediate constituunt totum, non vero partem ipsius; quemadmodum quæ immediate constituunt partem non totum, sunt totius membra mediata. Ratio regulæ est, quod secus agendo, non distinctio et ordo idearum, sed confusio oriretur. Six ex gr.

bene dividis substantiam in *spiritualem et corpoream*, quia hæ species immediate subsunt generi substantiæ: inepta autem foret divisio substantiæ in *spiritualem, organicam et animatam*.

Diximus, singulorum subdivisionem posse institui, si tamen opus fuerit; nimirum si ad scopum quo tendimus, utile videatur. Cavendum est autem, ne in subdivisionibus iterandis ad minimas usque partes sine causa descendamus. *Simile enim confuso est, quidquid usque ad pulverem sectum est*; ait Seneca (1).

CAPUT V.

* DE DEFINITIONE.

ARTICULUS 1.

Quid sit et quotuplex definitio.

117. *Definitio a finibus* nomen accepit. Quemadmodum enim agrorum fines unum agrum ab alio distinguunt, et jura possidentium circumscribunt; ita definitio rerum essentias ab invicem distinguere docet, verborumque potestatem intra suos limites continet. Ex hoc patet doctrinæ quæ recte definiendi artem tradat, summa utilitas, imo vero necessitas. Sane de re nulla disputatio iniri potest, nisi definitione aliqua præstituta, nec recte disputatio progredi, nisi recta definitio præcesserit (2).

118. Si definitio spectetur prouti est in mente, idem est ac *notio objecti completa* (47, 3°): si consideretur prouti verbis effertur, est *oratio quæ rei notionem completam exprimit*, seu, ut communiter dicitur, *oratio quæ rei naturam breviter explicat*. Quæ binæ definitionis definitiones non differunt inter se, nisi ex eo quod prima clarior est, remque in omnibus explicat. Definitio enim dicitur *oratio*, quia *notio completa* significari non potest, nisi pluribus vocibus: *quæ rei naturam explicat*; hoc fit enumerando eas notas, quæ objecti

(1) Ep. 89.

(2) « Omnis quæ ratione suscipitur, de aliqua re institutio, debet a definitione proficisci, ut intelligatur quid sit id de quo disputatur. » Cic., lib. 1 de Officiis.

naturam constituunt, seu notas quibus objectum ab aliis discernitur, quæ notæ clare cognitæ ideam completam efficiunt; additur *breviter*, quia harum notarum enumeratio diffusam orationem non requirit.

119. Id quod definitione explicatur, *definitum* dicitur. Omne definitum duobus modis significari potest, videlicet per nomen ad illud significandum destinatum, et per definitionem. Nomen porro definiti ita se habet ad definitionem, ut ideâ confusa vel etiam obscura ad completam.

Quoniam omnis definitio aliquo modo sit certæ rei explicatio, tamen logici res significatas a rebus significantibus (i. e. vocabulis) distinguentes, definitionem rei a definitione vocis distinguere solent. Est igitur duplex definitio; altera *nominalis*, altera *realis*. De utraque agendum.

ARTICULUS II.

De definitione nominali.

120. Definitio nominalis adhibetur ad vocem interpretandam, quod est ad ejus significationem explicandam. Est igitur *oratio qua res per vocem significata determinatur*. Ideo enim incerta quandoque est et obscura vocabulorum significatio, quia ignoramus cui rei significandæ ex instituto seu nationis seu sectæ, vocabula sint destinata. Hæc igitur res notis certisque vocabulis in alterius mente determinanda est, ut vocabuli significatio explicetur. Determinatur autem res significata, quum ejus rei ideâ saltem clara excitatur.

121. Definitio nominalis fit his potissimum modis.

1^o Adhibita voce alterius idiomatis, ut si dicas: *ανθρωπος est homo*, vel voce clariori in eodem idiomate, ut si dicas: *framea est quoddam telum*. Hoc munus exercent lexicographi, iique omnes qui scriptores interpretantur et declarant.

2^o Describendo utcumque vocibus notis rem ignoto vocabulo significatam; in quo nullâ certa regula statui potest, nisi eorum quibus res explicanda est, conditio et necessitas. Sæpe vocabulum ipsa rei definitione explicatur, ut si petenti quid significet hæc vox *parabola*, reponat mathematicus: *esse curvam a gravibus oblique projectis descriptam*.

3^o Eruendo vocis significationem ex ejus origine grammatica; ut si quis dicat: *consul est qui reipublicæ consulit; rex est qui populum regit*; vel ex elementis quibus componitur, ut: *philosophia est amor sapientiæ*. Hujusmodi definitiones *etymologicæ* vocantur.

122. Definitio vocum, quemadmodum innuimus (120), fit communiter explicando quid vox significet juxta usum intelligentiamque communem. Et in hoc nulla ex parte arbitraria est definitio. Sed quandoque licet interpretari vocem juxta usum intelligentiamque propriam, ac tum maxime quum vocis significatio æquivoca est, indeterminata et controversa, ita ut diversæ illi significationes a diversis subjiciantur. In his licet vocis definitionem juxta propriam intelligentiam statuere, declarando videlicet determinatam illam significationem, quam ejusmodi voci nos ipsi tribuimus. Ex. gr. si quæstio mihi sit cum materialista de animæ humanæ natura, cum significatio ipsa hujus vocis sit inter illum et me controversa, dicam ante omnia: *animam appello principium, quod in me sentit, cogitat, vult*. Hujusmodi definitiones sunt valde utiles ad verborum pugnas vitandas, et ad faciendum disputationis compendium.

123. Dicuntur illæ arbitrariæ, et ex parte sunt, non tamen ita ut arbitrio cujusque relictum intelligatur, definitionibus quibuscunque et in omnibus rebus uti. Nam 1^o quum vocis significatio clara est omnibus et omnibus eadem, absurdum esset aliam significationem illi imponere ad libitum. Quis enim ferat v. gr. ita statuentem: hoc nomine *homo* intelligo astrum cœli maximum?

2^o In vocibus significationis controversæ, definitio quæ affertur ex proprio sensu, talis esse debet, ut a nemine rejici, nec ab adversario possit. Quod obtinebitur, si in assignanda vocis significatione, relictis opinionibus diversis, elementum aliquod omniibus illis commune et non controversum eligamus, et in hoc solo sistamus. Quod si quis aliter se gereret, huic ante omnia definitio, quam tradidit, probanda esset.

ARTICULUS III.

De definitione reali.

124. Definitio realis non vocum significationem, sed rerum quæ per voces significantur, naturam explicat. Est enim *oratio ejusmodi notarum complexionem exhibens, quæ par sit ad distinctam et completam objecti ideam excitandam*. Quare in hoc differt a nominali definitione, quod illa solum determinat objectum voci respondens, objecti autem ipsius cognitionem non perficit: hæc autem vocis significationem supponit cognitam, ac solummodo objectum significatum illustrat.

125. Triplex est definitio realis.

1° *Essentialis*, quæ vere ac proprie definitionis nomen meretur. Hæc rem explicat, distincte enumerando notas quæ rei essentiam constituunt; quæ nempe faciunt ut rei species sit talis et non alia. Partes vero essentiæ sunt vel physicae vel metaphysicae (107). Hinc definitio essentialis confici potest, vel adhibendo notas quæ sunt partes essentiæ physicae, ut si definias hominem: *compositum ex anima rationali et corpore organico*, vel notas quæ sunt partes essentiæ metaphysicae, ut quum hominem definis: *animal rationale*.

2° *Descriptiva*, quæ fit ponendo primo genus rei, vel aliquid quod generis locum obtineat; ac deinde unam aut plures ex ejus proprietatibus, vel etiam collectionem aliquam accidentium; quæ illi solummodo rei conveniat. Hoc definiendi genus dicitur *descriptio*, quia rei naturam non scrutatur intimius, nec propria ejus constitutiva producit, sed primis quasi lineamentis adumbrat. Est nihilominus ejus usus frequentissimus, nec a poetis solum et oratoribus, sed et a rerum naturalium scriptoribus perpetuo celebratur. Individua vera non aliter definiuntur, quam ex accidentibus sive animi sive corporis.

Ad descriptionem revocatur definitio *causalis*, quæ fit ex genere et causa aliqua rei externa, cujusmodi sunt causa efficiens, rei exemplar, et finis propter quem res efficitur; ita tamen ut complexio ex genere et causa tantummodo rei de-

finitæ conveniat. Hinc bona erit descriptio hæc, qua vocem definimus: *sonum animalis ore prolatum*, et hæc altera horologii: *machina ad horas indicandas constructa*. Hæc autem vitiosa: horologium est *machina quæ fit ab homine*.

Revocantur item ad descriptionem definitiones notionum transcendentalium, et summorum generum (43), quæ vero genere non constant:

3° *Genetica*: hæc conficitur explicando modum ac rationem qua res gignitur. Hoc pacto definimus eclypsim lunarem: *defectum lucis quem luna patitur ex interpositione telluris inter ipsam et solem*. Hujusmodi definitio vulgaris est apud geometras, qui lineas, superficies, figuras et solida describunt, ex modo quo hæc gigni concipiuntur.

Patet definitionem hanc geneticam a causali, quam supra memoravimus, differre. Hæc enim causam solummodo rei memorat, genetica vero modum declarat, quo res a sua causa gignitur.

ARTICULUS IV.

Præcepta ad bene definiendum.

126. 1° *Omnis definitio sit definito clarior*. Definitionis quippe munus hoc est, ut definitum explicet; nimirum confusam, vel etiam obscuram definiti notionem declaret et illustret. Igitur quum vocabulum definitur, notiora vocabula, ut diximus (120, 121), sunt adhibenda; quum res, ideæ et voces, quæ res definito notiores repræsentent. Contra hoc præceptum multimodis peccatur.

a) Quum voces adhibentur, quibus obscura notio respondet, aut inusitata, aut nova et non satis declarata;

b) vel voces æquivocæ, vagæ, indeterminatæ; ut si quis gladium definiret: *rem quæ manibus gestatur*;

c) item quum metaphoræ oggeruntur inopportuna, ut si gravitatem definires *appetitum centri*. V. dicta de usu vocabulorum (99, seq.):

d) pariter quum idem per idem explicatur; ut si dicam *logicam esse artem, quæ tradit regulas logicas*. Quod quidem tam aperte, et in eadem voce non fit infrequenter; at implicite, et

in voce ad alteram vocem declarandam accersita, multo frequentius; quum nempe in definitione ponitur aliqua vox, quæ iterum definiri debet, et definitur per rem primo definitam: quod dicitur incidere in *circulum vitiosum*. Ut si quis definiat diem: *tempus constans horis vigintiquatuor*; horam autem: *vigesimam quartam partem diei*. Hoc pacto scio relationem inter unum et alterum, at nescio plane quid sit unum aut alterum.

e) Idem incommodum reperitur in iis definitionibus, quæ explicant rem positivam per ejus negationem seu privationem, ut esset illa, si serio afferretur: *virtus est vitium fugere*.

127. 2^o *Nec latior sit nec angustior definito*. Erit latior, si conveniat non solum definito, sed etiam rebus aliis a definito diversis. Hujusmodi foret definitio illa consulis, si ea tanquam reali uteremur: *consul est qui patriæ consulit*. Item hæc definitio vocis: *signum internarum affectionum*.

Erit angustior, si non conveniat omnibus et singulis, quæ sub definito continentur, ut hæc ideæ definitio: *representatio distincta objecti*.

128. Hinc intelliges:

a) Veram definitionem reciprocari cum definito, et cum illo convertibilem esse, ita ut possit illa definito ubicunque substitui, et illi vicissim definitum.

b) Quum ad definitionem essentialiam (125, 1^o) adhibentur partes metaphysicæ, genus et differentia, assumendum esse *genus proximum et differentiam ultimam* (42, 2^o, 3^o); aut saltem si genus remotum assumitur, adjungendas illi esse omnes intermedias differentias usque ad ultimam.

129. 5^o *Definitio non sit negativa*. Nam definitio negativa non declarat quid sit res, sed solum dicit quid non sit. Quare necessario latior est definito. Si v. gr. definires hominem: *quod non est brutum*; et mathesim: *scientiam quæ de moribus non disserit*, quam multa his definitionibus complectereris!

Tamen quum definiri debent duo ita opposita, ut medium non habeant (32), si alterum positive definieris, poteris

alterum per primi negationem definire. Sic definita substantia composita: *quæ partibus essentialibus constat*, simplicem definire poteris: *quæ partibus essentialibus non constat*.

ARTICULUS V.

* *Utrum omnia definiri debeant vel possint.*

130. In primis certissimum est, et vel obiter consideranti evidens, non omnes conceptus esse per definitionem essentialiam perficiendos et illustrandos. Omnia enim quæ definiuntur, per alias ideas, easque clariores definiuntur. Si igitur hæc ideæ sunt iterum per alias definiendæ, et hæc aliæ per alias, et ita semper, quin unquam ad ideas quæ definiri non debeant, perveniamus, nullus jam erit definiendi finis, nulla possibilis definitio. Quemadmodum si omne corpus, quod illuminat, illuminari ab alio deberet, nullum corpus esset illuminans, nullum illuminatum. Igitur si definiri quidpiam potest, debet aliquid admitti definitione non egens. Et re quidem vera, quis dicat, definitionem exigere conceptus existentiae, affirmationis, visionis, saporis, doloris, et alios hujusmodi? Qui sane sunt per se adeo manifesti, ut si quis conceptus eos illustrari debere contenderet, ipsum jam intelligentiæ lumen in nobis obscuratum putare videretur.

131. Altera quæstio est, utrum si quis velit, definire omnia possit. Quæstio hæc, si de descriptiva aut genetica definitione sermo sit, dubium non habet; possunt enim omnia vel uno vel altero modo illustrari; si vero quæstio fiat de essentiali definitione, negative resolvenda. Obstat enim ex una parte idearum quarundam conditio, ex altera ignorantia nostra. Ex primo capite definiri proprie non possunt

132. 1^o Sensationes, factorumque internorum maxima pars, quæ possumus utique variis modis describere, et per has descriptiones mentem alterius adducere ad unum aut alterum præ cæteris attendendum; sed cum eorum cognitio ideis simplicissimis contineatur, non possumus has ideas in elementa dividere; adeoque nec res iis expressas proprie definire.

2^o Notiones transcendentales, multæque aliæ, quæ ex his

derivantur, ut ideæ identitatis et distinctionis, necessitatis et contingentiae, possibilitatis et impossibilitatis, et aliae huiusmodi; quæ quamvis pluribus verbis efferantur, simplices revera sunt, nulloque insuper genere, per quod definiri possint, continentur.

3^o Genera item summa (42) et differentiae ultimæ; quia et illa et istæ nullius generis sunt species.

133. Ex altero capite definiri non possunt

1^o Individua, quia ignoramus quid sit per quod unum individuum ab aliis per se differat.

2^o Eæ omnes species, quarum differentias essentielles ignoramus.

Ex his concludimus, sola universalia definiri proprie posse, imo vero solas species (134, 3^o), si cognoscantur earum constitutiva.

ARTICULUS VI.

* De methodo definiendi.

134. In primis hæc animadvertenda :

1^o Nomen æquivocum definiendum non est, nisi prius secundum varias suas significationes distinguatur. Ratio est, quod nomen æquivocum non unam tantum essentiam, sed plures significat, quæ diversimode definiri postulant.

2^o Substantiæ definiuntur per se, quia per se cohærent; accidentia autem (quo nomine hic venit quidquid non est substantia) definiuntur aliquo modo per substantiam, in qua cohærent; sic motus definitur *translatio corporis* de loco ad locum.

Qua in re nota, quod quando accidens significatur nomine abstracto, ut in exemplo adducto, substantia ponitur in casu obliquo; quando vero significatur nomine concreto, substantia ponitur in recto. Sic res mota definitur: *corpus translatum de loco ad locum*.

3^o *Habitus et potentiæ* (45, 4^o) definiuntur per suos actus, aut per objecta ad quæ actus terminantur. Sic Logica definitur: *ars recte iudicandi*, et vis visiva: *facultas naturalis percipiendi colores*.

Relata item definiuntur per ea ad quæ respectum dicunt (45, 3^o), ut causæ ratio per effectum, dominus per servum etc.

135. Ad definitionem investigandam duplex methodus ab Aristotele (1) proponitur, *divisiva* nempe et *collectiva*.

Divisione definitio est investiganda hoc modo: Assumi primo debet id quod re definienda est certo communius; tum hoc in suas partes subjectivas dividendum. Si una ex his speciebus cum re definienda reciprocatur, erit inventa definitio: si nulla reciprocatur, aliqua nihilominus illi conveniet; huius igitur fiat iterum divisio, et si opus fuerit subdivisio, donec successive aucta differentialium notarum complexio, rei propositæ solum nullique alteri conveniat. Hæc erit rei definitio.

Sit ex.gr. invenienda definitio virtutis moralis. Virtus moralis, dicam, categoria habitus (48, 4^o) continetur, et quidem habitus quo homo perficitur (134, 3^o). Sed multi sunt habitus humani, alii enim intellectum perficiunt, alii appetitum, alii cæteras hominis potentias ac vires. Virtus moralis est sine dubio habitus vim appetitivam perficiens. Sed vis appetitiva perfici potest tum secundum quod requirit ratio, tum secus. Adde igitur præcedentibus differentiis hanc: *secundum rationem*, et definitio quæsitæ hæc existet: *habitus perficiens vim hominis appetitivam secundum rationem*. Hæc enim notarum complexio cum virtute morali reciprocatur.

136. Collectione hoc pacto procedes. Considera individua quibus nomen rei definiendæ tribuitur, et neglectis particularibus determinationibus, erue rationem communem omnibus eo nomine significatam. Si ex tali individuorum consideratione unam tantum rationem communem omnibus eduxeris, ratio inventa erit species infima, et definitio quam quæris. Si non unam inveneris, sed plures, quarum singulæ sint communes pluribus, nulla omnibus; considera ulterius, utrum rationes illæ multiplices aliquid habeant commune, an non. Si habent aliquid commune, erunt species totidem infimæ generis unius, et illud commune omnibus erit genus

(1) II Post. 14.

et definitio quæsitæ. Si vero non habent aliquid commune, erunt notiones analogæ, quarum unaquæque sua efferri debet definitione.

137. Quæro v. gr. definitionem *justitiæ*, ut est virtus particularis. Audio justos vocari mercatores quosdam et emptores, eos item qui damna illata compensant, ac demum principes, judices, parentes. Si hos singillatim considero, deprehendo mercatores, emptores eosque qui damna compensant, vocari et esse justos, quia solent constanti ac perpetua voluntate, tantum reddere, quantum requiritur ad servandam *æqualitatem* cum eo quod debent; principes autem, judices et parentes vocari justos, quia præmia et pœnas ita distribuunt, ut servant cum meritis personarum vel demeritis *proportionem*. Hinc concludo duas esse justitiæ species, quarum altera servat æqualitatem rei cum re, et vocatur justitia *commutativa*, altera proportionem rei ad personas, et vocatur *distributiva*. Sed utriusque conceptu expenso, hoc invenio uni et alteri commune, ut et qui primo modo et qui altero justii dicuntur, *jus suum unicuique tribuant*. Igitur justitia commutativa et distributiva ad hoc reducuntur genus, quod erit definitio quæsitæ; nempe: *habitus secundum quem aliquis constanti et perpetua voluntate jus suum unicuique tribuit*.

138. Hæ sunt binæ definitiones investigandæ rationes: prima videlicet a magis universalibus descendit ad minus universale, altera ab individuis ad universale, et a minus universali ad magis universale ascendit; unde illa dicitur quoque *via descensus*, hæc *ascensus*. Prima via est faciliior et ad docendum accommodatior, altera difficiliior, et eo ordine quo res inveniuntur, procedens: hac Socrates plurimum usus fuisse traditur. Cæterum et prima et altera accuratæ investigationis, experientiæ, meditationis ac ratiocinii adjumenta postulant.

LIBER SECUNDUS.

CAPUT I.

DE JUDICIO EJUSQUE SIGNO.

ARTICULUS I.

De oratione et verbo.

139. Oratio, ut jam innuimus (62), est vocabulorum complexio ad aliquid significandum ordinata. Est autem *imperfecta et perfecta*. Imperfecta est, quæ aliquem animi sensum non integrum prodit, sed incompletum. Ad hanc pertinent primo omnes termini complexi, ut *homo ferox, anima belluarum*, et similes nominum complexiones: deinde omnes orationes quæ nomine constant et verbo, sed ita ut audientis animum suspensum, et aliquid aliud expectantem relinquant, ut *legere Platonem; Petrus solet, incipiet, potest; si veneris*; et his similes.

Perfecta oratio est, quæ integram significat sententiam, neque audientis animum suspendit. Ea verbo semper constat et nomine, sive expresso sive subaudito, et varias in species dividitur. Alia enim est *enuntiativa*, ut: *veritas odium parit*; alia *admirativa*, ut: *quam terribilis est locus iste!* alia *interrogativa*, ut: *quis es tu?* alia *imperativa*, ut: *discede a me*; alia *deprecativa*, ut: *parce miseri*; alia *permissiva*, ut: *esto quem admodum dicis*; alia *optativa*, ut: *o si daretur hora?*

140. In his omnibus, verbum significat suppositive aliquem animi actum, qui vel ratione fit, vel prælucente ratione; videlicet, ut alibi diximus (62), actum aliquem circa duarum idearum identitatem objectivam, vel diversitatem, quam ratio concipit vel contuetur. Sic v. gr. quum imperando dicis: *discede a me*, is quocum loqueris non est discedens, sed tu imperas ut sit, nimirum ut fiat unum ex objectis, quæ idea *discedentis* exhibentur. Igitur oratio illa significat motum animi tendentis imperio ad objectivam identitatem idearum istarum, *tu*, et *discedens*. Et ita in reliquis. Quæ melius intelligentur ex iis quæ de enuntiativa oratione,

et de judicio, cujus illa signum est, pro instituti nostri ratione mox dicemus.

ARTICULUS II.

De judicii notione.

141. Quum duas ideas inter se, sive data opera, sive fortuito comparamus (19, 3^o), tria hæc deprehendere possumus: 1^o eas unam eandemque rem exprimere, quod est objectivam inter se habere identitatem (54); 2^o exprimere res diversas, quod est objectivam inter se habere diversitatem; 3^o possumus quoque neutrum percipere. Si neutrum percipimus, nullus a mente ponitur novus actus: at si binas ideas objectivam inter se identitatem vel diversitatem habere apprehendimus, novus in mente gignitur actus, quem *judicium* nuncupamus. Mens enim perceptæ identitatis vel diversitatis veritatem sentiens, eam annutu confirmat suo ratamque habet, affirmatione conjungens ideas, quas in objecto convenire vidit, vel separans negatione, quas vidit secundum objecta disjunctas. Est igitur judicium: *actus quo mens binas ideas aut affirmando componit, aut negando separat.*

142. Hinc judicium *affirmativum* et *negativum*: affirmativum, quum ideas affirmatione conjungimus; negativum, quum ideas negatione separamus. Nihilominus omne judicium negativum ad affirmandi actum reducitur. Quum enim objectivam idearum identitatem negas, hoc ipso affirmas, iis res diversas exprimi, videlicet objectivam earundem discrepantiam affirmas. Perinde enim est si dicas: *lapis non est vivens*, ac: *lapis est aliquid a vivente diversum*. Igitur omne judicium affirmatio quædam est identitatis objectivæ vel diversitatis. Ex quo potest iterum definiri judicium: *actus quo mens rem eandem vel res diversas duabus ideis exprimi affirmat.*

* 143. Cæterum quod judicandi actus versetur totus circa objectivam idearum identitatem et diversitatem, demonstratione vix indiget. In primis quod aliqua idearum identitas vel diversitas in judicio affirmetur, patet ex formulis ad quas omne judicium reducitur; quæ sunt: *A est B; A non est B.*

Unum enim esse aliud, hoc ipsum identitas est; et unum non esse aliud, diversitas, seu si placet magis, distinctio.

Quod vero identitas hæc et diversitas sit objectiva, non est minus manifestum. Si enim identitas et diversitas in judicio affirmata hæc non esset, jam ea foret, quam alias (54) vocavimus *intrinsicam*; quo semel posito, nullum fere judicium affirmativum suam veritatem obtineret. Si enim in hoc judicio ex. gr. *homo est animal*, intrinsicam identitatem affirmari intelligas, hunc habebis sensum: *conceptus hominis idem est ac conceptus animalis*; quod est manifeste falsum. Hinc vero factum est, ut quidam negarent, in judicio affirmari identitatem idearum, quia identitatis rationem obscure concipientes, vel identitatem solum intrinsicam attendentes, de objectiva non cogitarunt.

144. Ex dictis in comperto est 1^o unumquemque judicii actum tria de se præsupponere. Etenim

- a) duæ saltem ideæ in mente versentur oportet;
- b) hujusmodi ideæ inter se comparari debent, ut ipsarum identitas vel diversitas cognosci possit;
- c) debet a mente apprehendi hæc identitas vel diversitas; quæ quidem apprehensio necessaria conditio est, ut intellectus per se ad judicium deveniat, ac recte judicet, sed cum ipso judicandi actu confundi nullo pacto debet.

2^o *Objectum* in quod tendit affirmatio, esse identitatem vel diversitatem idearum; *materiam* propemodum *remotam* esse ideas, quæ identicæ, vel diversæ affirmantur.

3^o Judicium transferre in ideas per compositionem et divisionem unitatem illam vel distinctionem, quam habent secundum rem.

* 145. *Judicii* vocabulum est, uti vides, metaphoricum, sed huic mentis operationi significandæ in primis aptum. Quemadmodum enim judex de re sibi subjecta pro auctoritate fert sententiam, ita mens de idearum identitate vel diversitate decernit. Cæteræ appellationes, quibus judicandi actus significatur, ex præmissis declarationibus facile intelliguntur. Appellatur enim præsertim a veteribus 1^o *compositio* et *divisio*, ratione idearum, quæ sunt judicii materia, quæ-

que per judicandi actum conjunguntur, vel separantur. Dicitur etiam 2^o *affirmatio* et *negatio*, respectu identitatis vel diversitatis idearum, quæ judicii objectum est. Dicitur demum 3^o *adhæsiō* sive *assensus mentis*, respectu habito motivi, quo mens natura sua trahitur ad affirmandum, quod est veritas apprehensa.

Igitur hæ appellationes omnes unum eundemque significant actum sub diversis respectibus; ac simul ejusmodi sunt, ut una alteram explicet. In judicio enim fit idearum compositio et divisio: sed quomodo? non fit compositio hæc, uti in ideis arbitrariis (22), nec divisio simplici abstractione, sed afirmando, vel negando unam ideam de altera. Quid est autem in intellectu affirmatio isthæc? Est assensus a mente præstitus idearum identitati, vel diversitati objectivæ tanquam veræ.

Et hæc de judicio satis in præsentī sint; quæ suo loco fusius declarabimus, et ubi opus fuerit, vindicabimus.

ARTICULUS III.

De quibusdam judiciorum differentiis.

146. Si modum spectes, quo idearum identitas, vel differentia objectiva fit menti manifesta, judicia sunt

1^o Alia a priori alia a posteriori.

a) Sunt a priori, quum *sola idearum consideratio nos docet eas unum idemque objectum repræsentare, vel non*. Id quod contingit, quum unam ideam in alterius propria ratione includi, et ab altera veluti erumpere contuemur. Hoc judicium v. gr. *totum est majus sua parte*, est a priori; nam considerantes ideam *totius*, deprehendimus ideam *excedentis partem* in illa necessario contineri.

Hujusmodi judicia vocantur quoque *necessaria* et de *materia necessaria*, quia res non potest aliter se habere; *absoluta*, quia a nulla dependent hypothesi; *pura, rationalia, metaphysica*, quia ab experientia non pendent; ac demum *analytica* quia idearum quas continent, altera ab alterius analysi efflorescit.

b) Sunt judicia a posteriori, quum *experientia sola nos do-*

cet, unum idemque objectum binis ideis repræsentari, vel secus. Quum v. gr. manum admovens nivī, sentiēsq̃ ex contactu frigus, judicas: *nix est frigida*; judicium a posteriori effers.

Ejusmodi judicia dicuntur *contingentia* et de *materia contingenti*, quia absolute loquendo res posset aliter se habere; et hinc *hypothetica*, quia eorum oppositum repugnat solum hypothetice; nimirum, posito solum quod res ita se habeat, non potest aliter se habere; *empirica* quoque seu *experimentalia* et *physica*, quia in experientia fundantur; ac tandem *synthetica*, quia altera idearum non est de ratione alterius; quare non inveniuntur conjunctæ, sed experientia suadente copulantur.

Hinc vides, duplicem esse cognitionum nostrarum ordinem, quorum alter omnino necessarius ab idearum intrinseca cognatione, alter vero qui contingens est, ab experientia ortum habet.

2^o Judicium sive a priori, sive a posteriori dicitur *immediatum*, quando facta binarum idearum comparatione, illico patet earum identitas vel discrepantia: *mediatum*, quando hæc non cognoscitur, nisi ope ratiocinii.

147. Si æquitatem ac rectitudinem assensus spectes, judicium potest esse *prudens* et *temerarium*. Quæ duo tunc judicio conveniunt, quum hoc voluntatis imperio subjicitur. Subjicitur autem judicium voluntatis imperio, quum idearum identitas vel discrepantia menti clare non affulget, sed incerta ac nutans apparet; quibus in adjunctis non potest intellectus per se assensum præbere; sic enim natura comparatus est, ut sibi relictus, nisi perspectæ veritati cedere non possit. Si igitur sufficientia veritatis indicia voluntatem moveant ad imperandum judicium, erit prudens judicium; si insufficientia, aut non ut par est expensa, temerarium.

Reliquæ judicii divisiones, postquam de judicii signo dixerimus, opportunius exponentur.

ARTICULUS IV.

De iudicii signo.

148. Iudicii signum vocale *enuntiatio* seu *propositio* nuncupatur, ac definitur: *oratio quæ aliquid de aliquo affirmat aut negat*. Ut *Homo est mortalis*; *Deus non est mendax*.

Tria sunt elementa, quibus quævis propositio constat: *subjectum, prædicatum, copula*.

Subjectum est terminus significans id, de quo aliquid enuntiatur.

Prædicatum, quod et *attributum*, est terminus significans id, quod de aliquo enuntiatur.

Copula est verbum affirmans aut negans, quod grammatici *indicativum* nominant. Subjectum et prædicatum exprimunt iudicii materiam, nempe binas ideas, quæ ut identicæ per iudicandi actum compositæ sunt, vel ut diversæ disjunctæ: copula vero ipsam identitatis seu diversitatis affirmationem exhibet: quare ipsa est propositionis forma.

149. Supra (143) diximus, omne iudicium reduci ad has formulas: *A est B*; *A non est B*. Hinc omnis quoque propositio iis formulis contineatur oportet. Sane quæcunque verba verbum substantivum includunt, nec ab eo differunt, nisi quod una cum ipso aliquod exprimunt prædicatum. Quid enim aliud significatur hisce verbis: *loquitur, currit, occiditur, nisi est loquens, est currens, est nunc occisus*? Quod et de cæteris dicendum.

Ipsam verbum substantivum, quotiescunque in propositione ponitur præterito tempore, vel futuro, ad copulam præsentis temporis revocatur. Quamvis enim in utrolibet identitatem exhibeat præteritam vel futuram, affirmationem tamen exhibet præsentem. Itaque relatio quævis ad præteritum vel futurum, tanquam prædicati pars habenda est. Hæc propositio ex. gr. *Iusti erunt felices*, hoc pacto est resolvenda: *Iusti sunt felices futuri*. Et hæc alia: *Martyres fuerunt invicti*, resolvi non aliter potest quam ita: *Martyres sunt aliqui qui fuerunt invicti*.

150 Pronum nunc erit hæc intelligere:

1^o Potest integra propositio duabus constare vocibus, ut hæc: *Cæsar currit*.

2^o Imo potest unica voce concludi, ut in his: *veni, vidisti, pluit*.

3^o Potest e contrario pluribus vocibus quam tribus contineri, si vel subjectum, vel prædicatum, vel utrumque sint termini complexi. Ex. gr. *Initium sapientiæ timor Domini*.

4^o In hac propositione: *Homines timent mortem*, prædicatum non est vox *mortem*, sed hæc vox complexa: *timentes mortem*. Item de cæteris dicatur.

* 151. Subjectum et prædicatum eandem rem in propositione significant (143); ita tamen ut subjectum accipiat secundum materiale significatum, prædicatum autem secundum formale (96, 1^o; 73, 5^o): videlicet subjectum ponitur pro re cui inest forma expressa per prædicatum; et prædicatum pro re, ut talem præ se fert formam.

Hinc intelliges, naturalem terminorum dispositionem hanc esse, ut illa prædicati loco ponantur, quæ sunt formæ aut veluti formæ eorum, de quibus prædicantur. Quare adjectivum nomen præ substantivo (72), et inter substantiva illud quod magis universale est, præ minus universali, prædicati locum naturaliter occupat; ut in his exemplis: *Homo est animal*; *Petrus est homo*; *Fortitudo est virtus*; *Plato est doctus*. Hujusmodi propositiones, in quibus termini eam dispositionem obtinent quam natura postulat, *naturales* dicuntur et *directæ*.

Quod si contraria dispositio fiat, propositiones *innaturales* et *indirectæ* vocantur; ut si dicas: *Aliquod animal est homo*; *Aliquis homo est Petrus*; *Aliquis virtus est fortitudo*; *Aliquis doctus est Plato*.

Postremo si ex duobus, quorum unum de altero prædicatur, neutrum sit forma aut quasi forma alterius, sed ambo unius tertii, hæc prædicandi ratio dicitur *præter naturam* et *per accidens*; ut si dicas: *Aliquid candidum est frigidum*, vel *aliquid frigidum est candidum*.

ARTICULUS V.

De copulæ significatione.

* 152. Notandum in primis, omne verbum significare aliquam formam, seu affectionem alicujus subjecti, quemadmodum et nomina adjectiva (72); nihilominus eam aliter a nomine, aliter a verbo significari. Quod discrimen in hoc potissimum consistit, quod nomen hanc formam significat per modum qualitatis; verbum autem per modum actionis, *in fieri*, ut veteres minus quidem latine, sed nervose et philosophice dicebant, non *in facto esse*. Hæ voces ex. g. *intelligens* et *intelligit*, significant subjectum determinatum affectione illa, quam abstracte *intelligentiam* dicimus: sed quanta in modo significandi diversitas! Vox *intelligens* repræsentat tibi subjectum, hac forma, hac affectione determinatum. Vox vero *intelligit* repræsentat hanc formam, hanc affectionem, ut actu erumpentem e subjecto; ac, si tali licet uti similitudine, nomen agentem repræsentat ut pictor, verbum ut mimus.

* 153. Omne verbum ad verbum *est* reducitur (149). Verbum autem *est* actum essendi significat. Sed actus essendi cogitari potest, vel ut determinato aliquo genere continetur, vel a quacunque prorsus determinatione præcisus et abstractus. Si primum, verbum *est* dicitur *copulativum* seu *relativum* illique additur nomen quo determinatum illud genus exprimitur (149); et sic dicimus: *est bonus, est dulce, est mortale* etc. Si alterum, dicitur *absolutum*, et sine addito effertur, ut quum dicimus: *Deus est*. In hac postrema acceptione verbum *est* ipsum existendi actum significat. Neque aliud significare potest. Ignoratis enim, vel mente præcisus omnibus rei determinationibus, nihil aliud cogitandum superest præter existentiam. Primo vero modo acceptum non existendi actum, sed essentialis significat; non enim dicit quod res est, sed quid sit. Hinc concludendum, verbum substantivum significare semper actum, qui vel est existentis, vel essentialis (1).

(1) Cf. S. Th. in 1. *Periherm*, lect. V et VI.

* 154. Hæc verbi significatio, quæ formalis est, nullo modo differt ab ea, quam alibi (62) determinavimus, quum diximus, verbum idearum identitatem objectivam significare. Identitas enim objectiva in hoc continetur, quod unius ideæ objectum sit objectum alterius, habeat nempe actum essendi quem significat altera (153). Sed verbum, ut ibidem (62) diximus, identitatem idearum non significat simpliciter, sed ut alicujus interni actus objectum est. Quemadmodum igitur in diversis orationibus, præter suam formalem significationem, connotat etiam, quasi significatione materiali, imperium, desiderium, permissionem etc., ita in propositione compositionem prædicati cum subjecto a mente factam, i. e. affirmandi actum connotat. Copula (148) igitur duo importat: primo quidem et per se actualitatem aliquam subjecti, modo explicato; secundo vero et consequenter affirmationem; et nihilominus hanc directe, illam indirecte (73, 4°).

* 155. Ex his colliges 1°. Propositionem censendam esse signum suppositivum *identitatis affirmatæ*.

2° Minus recte quosdam docuisse, verbum *est* in propositionibus contingentibus (146) existentiam, in necessariis solum compositionem significare.

3° Nihilominus hoc utique verum esse, quod quum verbo *est* additur prædicatum, actualitas essentialis quam hoc significat, modo ad sola existentia refertur, ut quum dicis: *omnis homo est moriturus*; modo etiam ad possibilia protenditur (91), ut quum dicis: *omnis homo est animal*. Quatenus autem de possibilibus dicitur, imo et de non existentibus in præsentis, actualitas quam significat, est mere idealis.

156. Ut propositionum proprietates exponantur, de illarum partitionibus agendum est. Triplici ratione dividi possunt propositiones, spectata nimirum earum *forma, materia, extensione*. De his singillatim.

CAPUT II.

DE PROPOSITIONUM PARTITIONIBUS.

ARTICULUS I.

De propositionum partitione ratione formæ.

157. *Forma* propositionum est copula (148); quæ affirmativa esse potest vel negativa. Hinc ratione formæ propositiones dispescuntur in *affirmativas* et *negativas*. Propositio affirmativa præstantior negativa dicitur; illa enim docet quid res sit, vel qualis sit; hæc vero solum quid non sit, vel qualis non sit. Affirmationem et negationem vocant Logici propositionis *qualitatem essentialem*.

Propositio est affirmativa, quum copula continetur verbo *est*, vel explicito, vel implicito (149): negativa, quum copula constat verbo et particula negante *non* ipsi præposita, ut in his: *Deus non est mendax*; *Socrates non errat*.

Si particula *non* subjectum afficit, propositio dicitur *infiniti subjecti*; ut hæc: *Non amare sapientiam est magna stultitia*. Si afficit prædicatum, propositio dicitur *infiniti prædicati*, ut hæc alia: *Socrates est non dives*. Patet propositiones infiniti subjecti esse affirmantes: propositiones vero infiniti prædicati ad negativas facile reduci posse (142) (1).

158. De propositione affirmativa hæc duo diligenter animadvertenda:

1° *In propositione affirmativa prædicatum tribuitur subjecto juxta omnes et singulas notas comprehensionis suæ* (14).

Ratio est, quia quum asseris, prædicatum identicum esse cum subjecto, hoc ipso asseris, subjectum habere omnes et singulas notas, quæ constituunt ideam prædicato prolatam. Ex. gr. quum dicis *aerem esse corpus*, jam dicis aerem esse substantiam, esse aliquid extensum, compositum, impenetrabile, ponderosum etc.; quia hæc omnia simul idea corporis comprehendit.

2° *In propositione affirmativa prædicatum generatim habet suppositionem disjunctivam vel disjunctam* (83, 88): adeoque

(1) De his V. Arist. II. *Periherm.*, c. I.

(89, 2°) est terminus *particularis*. Etenim quum affirmamus prædicatum convenire subjecto, nolumus sane affirmare subjectum esse omne id cui convenit prædicatum, sed solum esse unum, aut alterum ex iis, quibus convenit; sic quum dico: *Cæsar est homo*, non dico Cæsarem esse omnem hominem, sed aliquem.

Excipe ab hac regula prædicata, quæ sunt termini singulares (76), vel singularibus æquivalentes (52); cujusmodi sunt ii omnes, qui collective supponuntur. Ex. gr. *Christus est unigenitus Dei*; *Hæc urbs est Roma*; *Hi sunt omnes amici mei*. Prædicata enim quibus signum apponitur universalitatis, collective supponuntur, atque adeo singularibus æquivalent.

159. COROLLARIA. 1° Si subjectum vocetur S, prædicatum P, propositio affirmativa his generatim formulis exprimi potest:

S est P—*S idem est ac aliquod P*—*S est unum ex inferioribus ideæ P*—*S continetur in P*.

2° Hinc facile quæstio illa resolvitur, quæ nonnullos habuit sollicitos, utrum in propositione affirmante statuatur subjectum esse identicum cum prædicato, an vero in illo contineri. Quæstio non habet locum, si termini rite intelligantur. Statuitur utrumque: videlicet subjectum esse quoad rem identicum cum una re ex iis, quæ continentur in extensione ideæ prædicati.

160. De propositione quoque negativa duo sunt pronuntiata.

1° *In propositione negativa prædicatum removetur a subjecto juxta totam prædicati comprehensionem collective sumptam, non vero secundum singulas ejus notas*. Etenim ut unum non sit aliud, necesse non est, ut nullam omnino notam cum illo communem habeat, sed satis est, si non habeat omnia quæ illud constituunt. Sic ut *lapis* non sit *animal*, non est necesse, ut nihil habeat eorum quæ habet animal, sed tantum ut non habeat collectionem illam notarum, ex quibus animalis essentia constat.

2° *In propositione negativa prædicatum ordinarie suppositionem habet distributivam* (85); adeoque est terminus *universalis*.

Ratio est, quia in propositione negativa statuimus, subjectum esse rem diversam a prædicato; adeoque non esse sive hoc sive illud sive aliud quidquam, quod talis prædicati extensione contineatur. Si enim esset unum aliquod ex his, jam illi tribuendum esset prædicatum (158, 2°). Si ex. gr. *spiritus* esset aliquod *corpus*, non posset amplius hæc propositio statui: *spiritus non est corpus*; sed affirmandum imo esset: *spiritus est corpus*.

Ab hac quoque regula excipienda sunt prædicata singularia, vel singularibus æquivalentia, in quibus nullus descensus fieri potest. Exempla: *Homo non est Deus. Deus non est omne id quod existit*.

161. COROLLARIUM. Omnis generatim propositio negativa his modis exhiberi potest:

S non est P—S non est ulla pars subjectiva ideæ P—S non continetur in P—S excluditur a P.

ARTICULUS II.

De propositionum partitione ratione extensionis.

162. *Extensio* propositionis, quæ et quantitas dicitur, determinatur ab extensione, quam in ipsa propositione subjectum obtinet. Tantum enim se porrigit affirmatio, quantum patet subjectum de quo aliquid affirmatur.

Quoniam igitur subjectum, considerata ejus extensione, potest esse terminus *singularis, particularis, universalis et indefinitus*, totidem quoque propositionum species habentur: singularis, ut: *Luna est corpus opacum*; particularis, ut: *Quidam philosophi scientia abutuntur* (89, 2°); universalis, ut: *Omnis homo est mortalis*; indefinita, ut: *Homo est beatitudinis capax*.

163. De propositione universali hæc notanda sunt.

1° Propositio non est universalis, nisi quum subjectum, quod particula universalitatis afficitur, suppositionem habet distributivam (85). Quum enim subjectum idem suppositionem habet collectivam, propositio non est universalis, sed potius singularis (32), uti hæc: *Omnia sacramenta sunt septem*. Quænam porro sit subjecti suppositio, ex prædicati natura facile dignoscitur. Si enim prædicatum subjecti inferioribus

singillatim tribui possit, subjecti suppositio erit distributiva; si vero non singulis singillatim, sed solum collective conveniat, suppositio erit collectiva.

2° Suppositio prædicati in propositione universali affirmante non est disjunctiva, sed disjuncta (158, 2°, 88). Hæc propositio v. gr.: *Omnis homo est animal*, ita debet exponi: *Omnis homo est animal A, aut animal B, aut.... animal X*; et hoc pacto vera est; sed falsa et inepta foret, si hoc pacto exponeretur: *Omnis homo est animal A, vel omnis homo est animal B, vel omnis homo.... est animal X*.

3° Tres distinguendi sunt universalitatis gradus.

a) Universalitas *metaphysica* et perfecta, quæ locum habet quum prædicatum omnibus et singulis subjecti inferioribus necessitate absoluta convenit, ita ut nulla sit unquam possibilis exceptio. Hæc universalitas reperitur in propositionibus a priori (146).

b) *Physica* est quando prædicatum singulis subjecti inferioribus convenit quidem secundum ordinarium naturæ cursum, ita tamen ut non sit absolute impossibilis exceptio. Exempla: *Nullus homo potest ambulare super aquas. Nullus mortuus redit ad vitam mortalem*.

c) *Moralis* sive imperfecta est, quando prædicatum ut plurimum convenit subjecti inferioribus, ita tamen ut multæ occurrant exceptiones. Exempla: *Omnis juvenis est inconstans. Omnis senex est querulus*.

4° Hinc in propositionibus physice universalibus hæc semper est subaudienda restrictio: *ex ordinario naturæ cursu*; in propositionibus moraliter universalibus hæc altera: *secundum quod communiter contingit*.

5° Propositiones universales ut veræ habentur, si saltem moraliter sint universales. Sed in hoc casu non potest ex illis circa singularia aliquid stricte concludi.

* 164. Quod ad propositiones indefinitas attinet, veterum plerique docuerunt, eas in materia necessaria (146, a) eamdem vim habere ac universales, in contingenti æque ac particulares valere. Quid hac in re sentiendum videatur, paucis exponam.

1° Quum in hujusmodi propositionibus terminus communis numero plurali effertur, inferiora ideæ universalis designat absque ulla limitatione, adeoque est per se terminus universalis (78, 3° a). Ita quum dicis: *Senes sunt queruli*, intelligis omnes, universalitate morali.

2° In descriptionum vel narrationum contextu, propositiones indefinitæ sunt sæpe particulares, imo non raro singulares ob aliquam restrictionem subjecti, quæ ex contextu necessario prodit. Quum enim legis v. gr. *Dux milites hortatur*, intelligis sermonem esse de duce illo, quem scriptor superius nominaverat; atque hæc restrictio propositionem efficit singularem.

3° Si subjecti suppositio sit materialis (80), vel logica (81), vel realis absoluta (82), propositio indefinita est singularis. Quum enim dicis: *Homo est nomen. Homo est species. Homo est animal nobilissimum*, perinde est ac si diceres: *Hæc vox homo est nomen. Hæc idea homo est species. Hæc natura, quam dico hominem, est animal nobilissimum*.

4° Quod si subjecti communis suppositio sit personalis (82), propositiones indefinitæ semper tanquam universales habendæ videntur; veræ quidem, si prædicatum inferioribus subjecti conveniat universalitate saltem morali, falsæ autem, si quibusdam tantum et paucis. Quanquam igitur, quum prædicatum contingens est, et quibusdam tantum convenit, propositio vera formari non possit, nisi formetur particularis; tamen si formetur propositio indefinita, non idcirco erit habenda ut particularis, quia sic postulat veritas, sed erit habenda ut universalis et falsa. Ratio est, quia ita omnes æstimant; et hæc ratio, quum de sermonis interpretatione agitur, suprema est. Sane quis ferat dicentem: *Sinensis est Christianus; Homo est niger*; quia aliquis sinensis Christianus est, aliquis homo niger? Nemo est qui has propositiones non neget tanquam falsas: ergo omnes illas habent ut universales, ac nemo putat eas tanquam particulares haberi posse (1).

(1) V. *Artem cogitandi*, parte II, c. XIII.

ARTICULUS III.

De propositionibus aperte compositis.

165. *Materia* ex qua propositiones coalescunt, sunt termini ipsius, i. e. prædicatum et subjectum. Igitur propositionum partitio ratione materiæ, ex unitate vel pluralitate subjecti ac prædicati derivatur. Quæ propositio unum habet subjectum unumque prædicatum, dicitur *simplex*, ut hæc: *Homo constans est impavidus*. Quæ plura subjecta vel prædicata continet, seu quod idem est, quæ plura enuntiabilia simplicia aliqua ratione simul connectit, propositio dicitur *composita*.

Propositionum compositarum aliæ sunt *aperte*, aliæ *occulte* compositæ. Aperte compositarum species in primis recensimus: quæ sunt *copulativa*, *adversativa*, *relativa*, *causalis*, et omnes *hypotheticæ*.

166. Propositio *copulativa* ea est, quæ plura subjecta vel prædicata connectit particulis conjunctivis *et*, *nec*, et similibus. Videlicet quia vel plura prædicata de uno subjecto, vel unum de pluribus, vel de pluribus plura enuntiat. En exempla:

Homo probus est simplex, et prudens.

Petrus et Paulus Romæ mortui sunt.

Nec honores, nec voluptates mortem arcent animique ægritudines.

Unusquisque facile percipit, quomodo copulativa in simplicibus propositiones resolvatur. Ejus porro veritas pendet ex omnium simplicium, quas continet, veritate. Quare hæc propositio: *Fides et philosophia sunt necessariae ad salutem*, est falsa, cum philosophia ad salutem necessaria minime sit. Hujusmodi copulativæ partim veræ ac partim falsæ negari absolute possunt; distingui tamen solent, partem veram concedendo, falsam negando.

167. Ad copulativam revocatur *adversativa* seu *discretiva*, quæ plura sive subjecta sive prædicata conjungit particulis adversantibus *sed*, *tamen*, *non*, *etc.* Ut: *Vos mundi estis, sed non omnes. Plato non est bonus miles, sed sublimis philosophus.*

Differt a copulativa non solum ratione dialecticæ structuræ, sed etiam quod inter partes quas continet, aliqua saltem latissima habeatur oppositio: quæ si desit, adversativa propositio evadit ridicula, ut si dicam: *Plato est bonus philosophus sed præclare scribit.*

168. *Relativa* propositio est ea, quæ partes suas connectit particulis relativis *ubi, ibi; quum, tunc; tantum, quantum;* et aliis hujusmodi. Quia nempe partes ejus ita sunt ad invicem comparatæ, ut altera ab altera determinationem aliquam nanciscatur. Unde revera in relativis affirmatur semper identitas penes duo, vel qualitatum, vel quantitatis, vel loci, vel temporis, vel graduum, etc. E. gr: *Qualis est vita, talis est mors.*

Hujus componentes remotæ ac mentales sunt binæ istæ:

Vita est alicujus qualitatis.

Mors est alicujus qualitatis.

Inter quas qualitates apprehensa identitatis relatione, ponitur judicium, in quo hæc identitas affirmatur:

Qualitas vitæ est qualitas mortis.

In hunc modum cæteras hujusmodi propositiones fas erit resolvere.

Relativæ veritas pendet a relationis statutæ veritate. Quare falsa est hæc:

Tanti homo valet, quantum habet.

169. Propositio *causalis* est, quæ duas propositiones continet simul connexas particulis causalibus *quia, nam, etc.* Ex quo vides, hanc propositionem duo affirmare, et ex his unum statuere tanquam causam alterius. En exemplum: *Beati mundo corde, quoniam ipsi Deum videbunt.*

Ad ejus veritatem requiritur 1º ut utraque pars vera sit, quia utraque affirmatur: 2º ut quod in altera parte dicitur, sit causa alterius. Potest enim utraque componens esse vera, quin tamen inter unam et alteram nexus adsit, ut in hoc exemplo: *Tranquillus est, quia dives est.*

Quod si vere adsit inter unam et alteram partem ea connexio, quæ est causam inter et effectum, utraque pars vera

sit oportet. Nam quod falsum est nec causam habet, nec causa esse potest.

ARTICULUS IV.

De propositionibus hypotheticis.

170. Propositiones, quæ prædicatum tribuunt vel negant subjecto, *categoricæ* dicuntur, quia in illis aliquid de aliquo vere prædicatur (39); quæ vero nihil absolute affirmant aut negant, sed solum *exprimunt affirmationis unius, vel negationis ab altera dependentiam*, nuncupantur *hypotheticæ*, ex præcipua ipsarum specie, ad quam omnes reduci possunt. Patet ex his hypotheticæ propositionis definitio. Tres sunt ejus species; *conditionalis*, seu hypothetica proprie dicta, *disjunctiva* et *conjunctiva*.

171. Propositio *conditionalis* duabus constat partibus, seu categoricis enuntiabilibus, quorum prius ponitur tanquam *conditio*, ex qua alterum pendet. Exemplum: *Si bene egisti, præmium recipies.* Conditio porro logica, de qua hic sermo, est omnis propositio, qua posita, altera ponatur necesse est. Facile dignoscitur conditionalis propositio ex particula *si* primæ parti præfixa.

Prima pars dicitur *conditio* vel etiam *antecedens*, altera *conditionatum* vel *consequens*.

Notanda hæc. 1º Altera ex duabus conditionalis partibus potest esse affirmativa, altera negativa; potest etiam utraque esse affirmativa, utraque negativa. Quomodocunque tamen se habeat qualitas partium, conditionalis erit semper affirmativa, si affirmetur nexus inter unam partem et alteram. Quare hæc v. gr. propositio: *Si non moveris non ambulas*, est affirmativa, licet utraque pars negativa sit.

2º Negativa est conditionalis, quum inter duas propositiones categoricas, conditionis et conditionati nexum adesse negamus, ut quum ille dicit: *Non si miserum fortuna Simonem finxit, vanum etiam mendacemque improba finget*: id quod significari quoque solet particulis *etsi, non tamen* sibi respondentibus, ut: *Etsi sum miser, non tamen sum mendax.*

3º Cum hæc propositio, si sit affirmans, nec veritatem an-

tecedentis affirmet, nec consequentis, sed solummodo consecutionis nexum inter unum et alterum; manifestum est ab hujus solummodo nexus veritate veritatem pendere conditionalis. Quare potest conditionalis esse vera, licet et antecedens et consequens per se falsa sint, quemadmodum hæc: *si tu volas, potest mare trajicere sine navi.*

4^o Negativæ conditionales e contrario veræ sunt, si nexus inter binas partes nullus est; falsæ, si nexus adest.

5^o Ad conditionalem potiusquam ad causalem accedunt propositiones *rationales* seu *illativæ*, ut: *Plato est homo; ergo est animal. Socrates currit; ergo movetur.* Differunt a causali, quia in his antecedens non est semper causa consequentis; non enim v. gr. ideo movetur Socrates quia currit, quamvis motus in cursu sit. Differunt etiam a conditionali, quia ut sint veræ, præter veritatem consecutionis requiritur etiam, quemadmodum in causali, ut utraque pars vera sit, quia utraque affirmatur. Tamen in conditionalem semper converti possunt, non semper vero in causalem.

172. Propositio *disjunctiva* est, quæ plures terminos vel etiam enuntiationes connectit particula disjunctiva *vel* et similibus, ut hæc: *Corpus aut movetur aut quiescit.*

Hæc quoque propositio nullum membrum singillatim affirmat; ut autem cognoscas quid statuat, adverte disjunctivam aliam esse *proprie* disjunctivam, aliam *improprie*, prouti particula *vel* sumitur *exclusive*, aut *præcisive*.

1^o Jam in ea quæ *proprie* disjunctiva est, partes ita sibi adversantur, ut si altera vera sit, alteram falsam esse oporteat, prouti in allato exemplo perspicitur.

Hinc ut disjunctivæ veritas constet, necesse est a) ut divisio sit adæquata (116, 1^o), nempe ut nihil aliud ea in re, de qua agitur, affirmandum supersit; b) ut duo vel plura membra non possint simul vera esse; c) ut duo vel plura membra non possint simul esse falsa.

Ex primo capite falsa est hæc: *Aut sedes aut ambulas.*

Ex altero hæc: *Tullius aut sedet aut legit aut dormit;* quia duo simul membra vera esse possunt.

Ex tertio hæc: *Spiritus aut est substantia solida aut liquida aut aerea;* quia nullum ex his membris verum est.

2^o In ea vero disjunctiva, quæ *impropria* est, subintelligitur particula *saltem*, ita ut sensus sit: sin minus omnes ejus partus, at certe unam ex iis veram esse. Hinc ad hujus propositionis veritatem hoc unum requiritur, ut una saltem ex enuntiationibus categoricis, quas continet, vera sit. Proinde hæc disjunctiva: *Vel Paulus, vel Petrus Romæ occubuit;* vero est, licet uterque fuerit Romæ mortuus.

173. Propositio *conjunctiva* est, quæ negat, duas enuntiationes posse simul esse veras. En tibi in uno exemplo diversas formas quibus effertur:

Non et corpus movetur et quiescit.

Corpus non movetur simul et quiescit.

Corpus non potest simul moveri et quiescere.

Ex definitione conjunctivæ per se patet, 1^o ex iis, quæ disjunctiva statuit (172), unum tantum statui a conjunctiva, videlicet eorum quæ recensentur, non posse duo vel plura simul affirmari.

2^o Patet hinc quoque, quid requiratur, ut conjunctiva vera sit; nimirum ut membra sint impossibilia. Unde falsa est hæc: *Nullus homo est doctus simul et humilis.*

3^o Conjunctivam merito reponi inter hypotheticas propositiones; quanquam copulativa (166) inter categoricas recensatur.

Quomodo disjunctiva et conjunctiva ad conditionalem revocetur, alibi opportunius videbimus.

ARTICULUS V.

De propositionibus occulte compositis.

174. Vocantur *occulte compositæ* propositiones illæ, quarum compositio est prope latens: unde dicuntur etiam *exponibiles*, quia expositione indigent. Propositiones autem simplices, in quas resolvuntur, vocantur earum *exponentes*. Venio ad singulas:

Exclusiva propositio est ea, cujus subjectum vel prædicatum afficitur aliqua exclusiva particula, *solum, tantum, etc.*

Quum particula hæc subjectum afficit, omnia alia subjecta a prædicati participatione excludit; ut si dicas : *Solus Deus est æternus* : sensus est, Deum, ac nihil præterea, æternum esse. Dicitur in hoc casu exclusiva *exclusi subjecti*. Quum vero particula afficit prædicatum, excludit a subjecto omne aliud prædicatum in eodem genere. Ut quum dicis : *Personæ divinæ sunt tantummodo tres*, perinde est ac si diceres : ita sunt tres, ut nullo alio numero contineantur. Hoc genus exclusivarum vocatur *exclusi prædicati*.

*175. Exclusiva si sit affirmans, exponitur per copulativam duabus constantem exponentibus, quarum altera affirmativa est, altera negativa. Ex. gr. prima propositio allata hoc pacto exponitur : *Deus est æternus ; et quod non est Deus non est æternum*. Et altera : *Personæ divinæ sunt tres ; et non sunt alio quocunque numero contentæ*.

Quamobrem, ut vera sit exclusiva, utraque exponens [vera sit oportet. Hæc propositio : *Sola fides est necessaria ad salutem*, falsa est, quia negativa componens hæc est : *cætera, quæ fides non sunt, necessaria non sunt ad salutem*; quæ ut falsa rejici debet.

*176. Potest negatio in exclusivis vel afficere ipsam particulam excludentem, vel copulam, vel utramque.

En exempla in exclusivis exclusi subjecti :

1° *Non solus homo est intelligens*,
est propositio affirmativa, et exponitur *disjunctive* :
Vel aliquis homo non est intelligens ; vel aliquid quod non est homo, est intelligens.

2° *Solus Deus non habet initium*,
est propositio negativa, et exponitur *copulative* :
Deus non habet initium ; et omne quod non est Deus, initium habet.

3° *Non solum animal non est sensus capax*,
est negativa : exponitur *disjunctive* :
Vel aliquod animal est sensus capax ; vel aliquid quod non est animal, non est sensus capax.

*177. En exempla in exclusivis exclusi prædicati :

1° Negatio afficiens copulam :
Homo non est purus spiritus,

est negativa, et exponitur *disjunctive* :

Vel homo non est spiritus ; vel homo est aliquid aliud præter spiritum.

2° Negatio afficiens particulam :

Homo est non purus spiritus,

est propositio indefiniti prædicati ; adeoque cum negativa superiori est identica, cæteris paribus.

3° Negatio afficiens et copulam et particulam :

Personæ divinæ non sunt non tantum tres,

convertitur cum affirmante (174) :

Personæ divinæ sunt tantum tres.

De his omnibus in sequenti capite iterum occurret sermo.

178. Propositio *exceptiva* est, quæ a participatione prædicati excludit unum vel plura, quæ in extensione subjecti continentur ; quod facit per particulam *præter*, et similes. En exempla :

Quidquid est initium habuit, præter Deum.

Omnia, præter Deum, non sunt æterna.

Distinguitur exceptiva ab exclusiva solo formæ discrimine, et in illam facile convertitur (176, 2°, 174) : quare eodem modo ac illa exponitur.

Affines quoque sunt exclusivis *inceptivæ* propositiones, ac *desitivæ*, ut v. gr. :

Titius tali die cepit ægrotare,

nempe eo die transiit a statu bonæ valetudinis in ægritudinem, non antea, nec postea ; et

Bellum tali anno cessavit,

nempe bello finis impositus est eo anno, non in ullo ex annis superioribus, aut subsequentibus.

179. *Comparativa* ea est, quæ non solum asserit vel negat, prædicatum subjecto convenire, sed etiam æque, aut magis, aut minus convenire, quam alteri. Facile dignoscitur ex gradu grammaticali prædicati, vel ex vocibus denotantibus æqualitatem. Ecce tibi exempla :

Mens est corpore præstantior.

Omnium difficillimum est nosse seipsum.

Paulus non est princeps apostolorum æque ac Petrus.

Hujusmodi propositiones tria supponunt judicia, in quorum primo et altero prædicatum idem duobus subjectis absolute tribuitur : deinde apprehensa majori intensitate quam prædicatum habet in alterutro, vel æquali quam habet, vel non habet peres utrumque, tertium succedit iudicium, hanc ipsam intensitatem comparativam affirmans. In altero v. gr. ex allatis exemplis hæc tria continentur judicia :

Seipsum nosse difficile est.

Multa alia nosse difficile est.

Difficultas cognoscendi seipsum superat cæterarum cognitionum difficultatem.

Inepta est comparativa, si prædicatum utrique termino comparationis aliquo modo non conveniat, ut hæc : *Columba est candidior corvo*. Falsa est, si prædicatum utrique termino comparationis non conveniat in eo præcise gradu, qui in propositione enuntiatur ; ut hæc : *Industria est maximum bonum societatis civilis*.

180. *Reduplicativa et specificativa* in eo conveniunt, quod continent particulam aliquam geminantem, ut est ; *quatenus, secundum quod* etc., quæ particulæ geminantes dicuntur, quia subjectum propositionis replicant, ut in hoc exemplo : *Homo quatenus intelligens est liber*.

Hoc autem inter se differunt, quod reduplicativa notat in subjecto id quod est causa prædicati, ut in allato exemplo videre est. Specificativa autem notat solum illud subjecti constitutivum, secundum quod illi convenit prædicatum ; ut si dicas : *Homo quia est homo, legit* ; non enim dicis causam cur homo legit esse, quia est homo, sed solum quod legere illi convenit quatenus est homo, nimirum animal rationis particeps.

* Ex his patet 1^o reduplicativam exponi per causalem, hoc pacto : *Homo est liber, quia est intelligens*.

2^o Specificativam exponi per copulativam in hunc modum : *Homo legit, et ratio secundum quam illi convenit legere, est ratio ipsa hominis*.

3^o Quæ igitur requiruntur ad veritatem causalis et copulativæ, ea ad veritatem quoque reduplicativæ et specificativæ necessaria sunt (169 ; 166).

ARTICULUS VI.

De propositionibus complexis.

181. Ultimum locum servavimus complexis propositionibus, quia hæ propositiones simplices quidem sunt, at compositarum nihilominus speciem habent, et ad compositas aliquatenus accedunt. Cum porro complexio tum in propositionis materiam cadere possit, tum in formam, prius aliquid dicemus de complexis secundum materiam, quæ proprio nomine complexæ dici solent ; deinde de complexis secundum formam, quæ modales nuncupantur.

182. Propositiones secundum materiam complexæ, quas veteres appellabant propositiones *de extremo conjuncto*, sunt quædam *simplices propositiones, quarum subjectum vel prædicatum est terminus complexus* (74, 75), in quo incidens propositio vel explicite vel implicite continetur, uti ex subjectis patet exemplis :

Deus omnipotens, omnia creavit ; nimirum : *Deus qui est omnipotens, omnia creavit*.

Item :

Plato est philosophus sublimis ; videlicet : *Plato est philosophus, qui est sublimis*.

Duæ sunt igitur partes in propositione complexa, nimirum propositio *incidens* et propositio *principalis*. Incidens est, quæ alicui termino connectitur per pronomen relativum *qui, quæ, quod* ; et hoc ipsum pronomen locum in illa tenet subjecti. Id quod superest de propositione complexa, si incidentem detraxeris, est propositio principalis. Non opus est ut moneamus, propositiones incidentes alias esse *explicativas*, alias *restrictivas* ; quod ex alibi dictis manifestum est (75).

* 183. Animadvertendum porro hic est 1^o Omnes propositiones, quæ copulam habent præteriti vel futuri temporis, esse aliquo modo complexas (149). Quum enim dicis v. g. : *Martyres fuerunt invicti*, perinde est ac si dicas : *Martyres sunt aliqui, qui fuerunt invicti*. Multo clarius apparet com-

plexio in iis propositionibus, in quibus reperitur verbum activum cum suis casibus, ut in hac: *Homo probus aversatur omnem simulationem*, quæ in hanc recidit: *Homo probus aversatur aliquid, quod est omnis simulatio*.

2^o Dari propositiones, quæ habent unum eundemque terminum multipliciter complexum. Ut si dicas: *Milo interfecit aggressorem*, tantumdem est ac: *Milo est aliquis, qui interfecit aliquem, qui erat aggressor*.

* 184. De propositionibus complexis hæc tenenda:

1^o Propositiones complexæ, ut supra indicavimus, sunt simplices. Uno enim constant subjecto unoque prædicato. Quod quidem vel ex eo inferri potest, quod propositionis incidentis subjectum idem est ac terminus cui adjicitur; relativum enim pro suo ponitur antecedente: et hinc est, quod omnis propositio incidens possit semper in adjectivum nomen converti. Idem enim est si dicas: *Deus qui est omnipotens*, et *homo qui est probus*, ac: *Deus omnipotens*; *homo probus*.

Idem confirmatur inspecto iudicio, quod his propositionibus effertur. Effertur enim his propositionibus unum tantum iudicium, non plura simul. Propositio enim incidens vel est restrictiva, vel explicativa. Si restrictiva est, nullum exprimit profecto iudicium, sed solummodo subjectum vel prædicatum iudicii ponendi determinat ac coarctat, ut iudicium poni possit. Ex gr. quum dicis: *Omnes homines qui sunt mortui...*, non significas profecto te hoc posuisse iudicium: *Omnes homines sunt mortui*: quod iudicium esset omnino falsum, sed solum significas te loqui velle de illa humanæ speciei parte, quæ vivere desiit, et hanc esse subjectum propositionis, quam profers.

Si vero propositio incidens fuerit explicativa, est illa quidem fructus iudicii alias positi, sed nunc non est nisi elementum ideæ compositæ, quæ in iudicio præsentis subjecti locum obtinet vel prædicati. Si quum dicis: *Deus, qui est omnipotens*, manifestas te alias ita iudicasse: *Deus est omnipotens*; nunc vero loqui de Deo, ut de subjecto inter cuius constitutiva omnipotentia notionem præsertim spectas (1).

(1) Cf. *Artem cogitandi*, parte II, c. VI.

2^o Hinc propositiones incidentes explicativæ, sunt per se falsitatis capaces, sive sint incidentes subjecti, sivi prædicati. Quatenus enim per se et absolute considerantur, iudicium continent. Sic quum dico: *Alexander, qui sobrius maxime fuit*, etc.; illa incidens: *qui sobrius maxime fuit*, hoc falsum iudicium continet: *Alexander fuit maxime sobrius*. Incidentes vero restrictivæ per se non sunt falsitatis capaces, quia iudicium non continent: possunt tamen falsitatem continere, si falsum aliquod iudicium supponant. Si enim v. gr. dicerem: *Animæ quæ igneæ sunt, nobiliores sunt animabus quæ aere constant*, supponerem, aliquas animas esse igneas, aliquas aereas, quæ duo falsa sunt.

3^o Hinc sequitur, omnem propositionem complexam ad duas reduci posse, quarum altera iudicium exprimat præsens, altera iudicium præteritum vel suppositum. Sume v. gr. hanc propositionem: *anima rationalis est forma humani corporis*: si in ea consideres complexionem subjecti, ea reducitur ad has duas: *anima aliqua est forma humani corporis*: et *hæc anima est rationalis*. Quod si in ea consideres complexionem prædicati, habebis hasce duas: *anima rationalis est forma alicujus corporis*, et *hoc corpus est humanum*.

4^o Propositio incidens, si subjectum afficiat, influit in principalis veritatem, quando est restrictiva; secus, si explicativa sit. Nam in primo casu prædicatum principalis subjecto non convenit, nisi subjectum sit ita, uti effertur, coarctatum ac determinatum: quod in altero casu non accidit.

ARTICULUS VII.

De propositionibus modalibus

185. Propositio modalis non secundum materiam qua constat, sed in ipsa forma complexionem habet, non solum enim enuntiat prædicatum inesse, vel non inesse subjecto, sed etiam modum quo inest vel non inest; qua potissimum re ab absolutis distinguitur. Ex. gr. hæc propositio: *Deus est justus*, est absoluta propositio; hæc vero: *Deus necessario est justus*; vel: *Deum justum esse necessarium est*, modalis. Cum igitur propositionis forma sit affirmatio identitatis vel diver-

sitatis inter prædicatum et subjectum, merito modales dicuntur in ipsa forma compositæ.

Duplici formula propositiones hujusmodi efferuntur, quemadmodum jam indicavimus. In prima modus est adverbium, quod absolutæ propositionis copulæ adjacet: in altera modus est nomen, quod enuntiatur de absoluta propositione, copula ipsius in verbum infinitivum conversa.

Propositio absoluta sic jacens, vocatur *dictum* propositionis modalis.

186. Quatuor sunt modi, secundum quos unum potest esse alteri identicum vel diversum, videlicet *necessarium*, *contingens*, *possibile* et *impossibile*.

1^o Necessarium est, quod *non potest non esse*, ut *Deum esse justum*.

2^o Contingens, quod *potest esse et potest non esse*, ut *Platonem esse doctum*.

3^o Possibile, quod *potest esse*; et complectitur tum necessarium, tum contingens; necessarium, quia quod est et non potest non esse, multo magis potest esse: quare dici potest et debet: *possibile est Deum esse justum*; videlicet hoc prædicatum tali subjecto non repugnat; contingens vero quia et ipsum potest esse; unde dicimus: *possibile est Petrum esse doctum*. Cum autem hæc duo complectatur, non dicit tamen determinatum neque unum neque alterum.

4^o Impossibile quod *non potest esse*, ut *spiritum esse compositum*.

Quapropter quatuor sunt genera modalium; quæ dicuntur modales *ex necessario*, *ex contingenti*, *ex possibili*, *ex impossibili*. Potest autem et dictum (185) esse tum affirmativum, tum negativum, et modus quilibet tum affirmari de dicto, tum negari.

* 187. Objicies fortasse, præter quatuor hos modos quos recensuimus, infinitos alios adjiciendos videri; omne enim adverbium est modus quidam seu determinatio verbi. Unde nihil impedit, quominus hæc propositio v. gr.: *Cervus currit velociter*, et alia similes inter modales recenseantur. Insuper, multa sunt adverbia, quæ mutari in nomen possunt, et de

dicto enuntiari hoc pacto: *Cæsarem rediisse est verum, falsum, certum, incertum, probabile, desiderabile*, etc.

Respondeo ad primum quod objicitur, modos qui propositionem modalem efficiunt, esse eos tantum qui formam ipsam propositionis afficiunt, i. e. qui determinant quomodo subjectum et prædicatum identica sint, vel diversa. Hæc autem sunt tantum illa quatuor: necessario, contingenter, possibiliter, impossibiliter; cum adverbia, quæ ad hæc non reducuntur, determinant solum prædicati rationem, adeoque ipsius prædicati partes sint habenda. Hinc est quod adverbia hæc prædicari de dicto non possunt: non enim licet dicere: *Cervum currere est velox*, quemadmodum dicimus: *Cervum currere est possibile*.

Ad alterum dico, si *verum* et *falsum* excipias, illa nomina, quæ objiciuntur, ad unum aliquem ex quatuor illis modis reduci ut alio loco melius explicabitur. *Certum* enim perinde est ac necessarium; *incertum* idem ac contingens; *probabile*, *desiderabile* et similia idem sunt ac possibile secundum quid, nimirum *quod potest esse objectum approbationis, desiderii*, etc. Quare propositiones, in quibus hæc voces de dicto aliquo enuntiantur, sunt revera modales, sed extra quatuor illa genera non vagantur.

Verum autem et *falsum* inter modos qui formam ipsam afficiunt, a veteribus numerabantur; sed cum nihil de ipsis peculiare dicendum occurreret, negligebantur (1). Cæterum dici quoque posset, verum et falsum non tam modos esse identitatis et diversitatis, quam ipsam identitatis vel diversitatis rationem exprimere, ut suo loco patebit.

* 188. Ex his quæ diximus colliges, in propositione modalis (185) modum qui enuntiatur de dicto, prædicati principalis locum tenere, dictum vero, seu potius dicti verbum, locum tenere principalis subjecti: et idcirco verbum hoc in infinitivum convertitur, quia infinitivum verborum nomen est potius quam verbum. Subjectum et prædicatum dicti minus principalia nuncupantur.

(1) V. Opusc. XLVIII inter Opuscula S. Thomæ: Tract. De Enunc., c. XI et Opuscul. XL.

Unde deduces 1^o Propositiones modales, etiamsi dictum universale sit aut particulare, esse omnes singulares (162). Omnes enim reducuntur ad hanc formulam: *Hæc identitas vel diversitas est necessaria, est contingens, etc.*

2^o Nihilominus et ipsæ aliquam habent quantitatis diversitatem; quod patet ex parte subjecti minus principalis. In subjecto autem principali, non reperitur utique illa quantitas, quæ propria est nominum, nempe extensio, sed ea quantitas quæ propria est verborum, nempe *tempus*. Secundum hanc quantitatem, illud esse quod *necessarium* vel *impossibile* enuntiatur, habetur tanquam universale affirmativum vel negativum; quod enim necessario est, omni tempore est; quod impossibile, nullo. Illud autem quod *possibile* dicitur, habetur tanquam particulare affirmativum; possibile enim dicit rem aliquando esse posse, quin determinet utrum possit etiam, vel non possit non esse (186). Tandem quod *contingens* est, æstimatur tanquam particulare negativum, quia qui dicit contingens, is nimirum dicit rem aliquando posse non esse.

3^o Nullo negotio intelligitur, propositionem modalem esse affirmativam vel negativam, prouti modus de dicto affirmatur vel negatur. Quare hæc propositio: *Necesse est animum hominis materiam non esse*, est affirmativa, licet dictum negativum sit.

4^o Manifestum perinde est, propositionem modalem esse veram vel falsam, prouti cum veritate vel falsitate modus de dicto affirmatur aut negatur. Idcirco hæc modalis: *Deus necessario mundum creavit*, falsa est.

5^o Addam et hoc: formam illam conjunctivæ propositionis, quæ sic se habet: *Corpus non potest simil moveri et quiescere* (175), modalem revera esse, et vocari posse *conjunctivam modalem*, vel modalem *de impossibili*. Harum typus est principium contradictionis: *Impossibile est idem simul esse et non esse*.

CAPUT III.

DE PROPOSITIONUM OPPOSITIONE.

ARTICULUS I.

De propositionum simplicium differentiis quoad qualitatem vel quantitatem.

189. Binæ propositiones, idem subjectum et prædicatum habentes, tum quantitate, tum qualitate, tum utraque simul differre possunt.

1^o Si quantitate sola differunt, vocantur *subalternæ*, ut:

Omnis homo est felix.

Aliquis homo est felix.

2^o Si differunt sola qualitate,

a) vel sunt ambæ universales, et vocantur *contrariæ*, ut:

Omnis anima est substantia.

Nulla anima est substantia.

b) vel sunt ambæ particulares, et vocantur *subcontrariæ*, ut:

Aliquis homo est miser.


Aliquis homo non est miser.

3^o Demum si et quantitate differunt et qualitate, vocantur *contradictoriæ*, ut:

Omne corpus est grave.

Aliquod corpus non est grave.

Hæc omnia sequenti schemate comprehenduntur.



Designant logici universalem affirmantem littera A: universalem negantem littera E: particularem affirmantem littera I: particularum negantem littera O.

Asserit A, negat E, veram generaliter ambo;

Asserit I, negat O, sed particulariter ambo.

190. De mutuis ipsarum relationibus quoad veritatem et falsitatem hæc statuuntur :

1^o Propositiones contradictoriæ

a) Non possunt simul esse veræ. Nam si prædicatum v. gr. convenit omnibus inferioribus subjecti, hoc ipso falsum erit alicui illorum non convenire. Unde propositiones A et O non possunt simul esse veræ. Idem dicas de E et I.

b) Non possunt simul esse falsæ. Nam si falsum est v. gr. omnibus subjecti inferioribus prædicatum convenire, hoc ipso verum erit alicui illorum non convenire. Ergo propositiones A et O non possunt simul esse falsæ. Idem dicas de E et I.

c) Hinc ex veritate unius contradictoriæ infertur falsitas alterius, et viceversa.

2^o Propositiones contrariæ

a) Non possunt simul esse veræ. Nam si verum est prædicatum esse omnibus tribuendum, non potest simul verum esse, quod omnibus sit negandum.

b) Possunt simul esse falsæ. Potest enim contingere, ut prædicatum, nec omnibus sit tribuendum, nec omnibus sit negandum, sed quibusdam tribuendum sit, quibusdam negandum.

c) Hinc ex veritate unius alterius falsitas infertur.

d) Ex falsitate tamen unius non infertur alterius veritas.

3^o Propositiones subalternæ

a) Possunt simul esse veræ, possunt esse simul falsæ : una enim in altera includitur.

b) Non tamen semper ex alterutrius veritate vel falsitate alterutrius veritas vel falsitas inferri potest. Nam

Ex veritate universalis infertur veritas particularis.

Ex falsitate particularis infertur falsitas universalis.

Sed

Ex veritate particularis non infertur veritas universalis.

Ex falsitate universalis non infertur falsitas particularis.

* 4^o Propositiones subcontrariæ

a) Possunt simul esse veræ in materia contingenti, non tamen in materia necessaria (146).

b) Non possunt simul esse falsæ. Nam fac esse falsam

propositionem I. Ex modo dictis (1^o, c) vera erit contradictoria E, adeoque a fortiori (3^o, b) vera erit O. Ergo si est falsa I, vera est O. Eodem modo si falsa est O, vera erit A, et per consequens I. Ergo si falsa est O, vera est I.

c) Hinc si una e subcontrariis est vera, altera potest esse vera, et potest esse falsa.

d) At si una est falsa, altera vera sit oportet.

ARTICULUS II.

De propositionum simplicium oppositione.

191. Oppositio, quod ad propositiones spectat, est *duarum propositionum mutua repugnantia, quæ ex ejusdem de eodem affirmatione et negatione procedit*; ut *Petrus currit: Petrus non currit*. Ex hoc sequitur character oppositionis proprius: quod quemadmodum binæ determinationes oppositæ in eodem subjecto simul esse nequeunt (51); ita binæ propositiones oppositæ verificari simul non possint: *idem enim nequit simul esse et non esse*.

Conditiones, quæ ad propositionum oppositionem requiruntur, ex definitione immediate colliges: 1^o debet in utraque propositione idem esse subjectum; 3^o idem prædicatum; 3^o una debet negando destruere, quod altera ponit affirmando.

192. Ex his consequitur, 1^o non esse oppositas propositiones *subalternas*.

2^o *Subcontrarias* (189 2^o b) voce tantum esse oppositas, non re. Voces enim quibus subjectum constat, sunt in utraque eadem, v. gr. *Aliquis homo est miser; aliquis homo non est miser*; sed res significata non necessario est utrobique eadem, quia harum propositionum subjectum est individuum indeterminatum.

3^o Veram oppositionem reperiri inter propositiones *contrarias* (189, 2^o).

2^o Veram quoque oppositionem esse inter *contradictorias* (189, 3^o). Subjectum enim propositionis particularis disjunctione facta enumerat omnia, quæcunque subjectum propositionis universalis enumerat distributive. Quare, quodcun-

que sit id de quo verificatur particularis, invenitur certe in subiecto universalis.

Revera oppositionis tessera (191) deficit in subalternis et subcontrariis; et illæ enim et istæ possunt simul esse veræ (190, 3°, 4°): habetur autem in contradictoriis et contrariis (190, 1°, 2°), quæ simul veræ esse non possunt.

193. Non est tamen eadem in contradictoriis, et contrariis enuntiationibus oppositionis ratio. Quemadmodum enim duæ ideæ contradictoriæ sunt, si altera sit negatio alterius, contrariæ vero, si in eodem genere maxime a se distent (52, 1° 3°); ita et propositiones. Contradictoriæ ita sunt comparatæ, ut una simpliciter removeat alteram; *tantum videlicet affirmando vel negando, quantum sufficit, ut altera falsa fiat*. Contrariæ vero in extremis consistunt, ita ut *altera tantum neget de eo quod altera affirmat, vel tantum affirmet de eo quod altera negat, quantum negari vel affirmari potest*. Sit ex. gr. propositio universalis: *Omnis anima est substantia*. Ut hæc falsa fiat, sufficit ut aliqua anima non sit substantia. Si enim universalitas affirmationis concidit, jam propositio universalis falsa est. Universalis igitur affirmantis contradictoria erit particularis negans: *Aliqua anima non est substantia*. Quod si illi opponas universalem negantem: *Nulla anima est substantia*, negatione hac in altero consistis extremo. Universalis igitur negans, et universalis affirmans merito contrariæ dicuntur (189, 2°). Solent tamen haberi ut contrariæ propositiones omnes, quarum altera *plus neget, quam ad alterius falsitatem requiratur*; ut v. gr. binæ istæ: *Omnis anima est substantia. Quædam animæ non sunt substantiæ*. Nihilominus hæc oppositio, si accurate loqui velimus, potius disparata (51) et exlex, quam contraria dici meretur.

194. Notanda. 1° hæc quæ de contradictoria diximus oppositione, tunc solum sine ulla restrictione habere locum, quum propositio profertur metaphysice universalis (163, 3°). Quod si opponi debeat contradictoria propositioni physice tantum vel moraliter universali, inepte oppones illi particularem; hujus enim data veritate, illius falsitas non sequitur. Cum igitur in propositionibus physice universalibus hæc

subaudiatur restrictio: *ex ordinario naturæ cursu*; et in moraliter universalibus hæc: *uti communiter contingit* (163, 4°); contradictoria primæ erit: *non ex ordinario naturæ cursu omne A est B*; et alterius: *non ut communiter contingit omne A est B*.

2° De oppositione propositionis singularis.

a) Hæc nullo modo particulari opponitur. Subjectum enim non est in utraque identicum, unde possunt simul esse veræ, ut patet in his:

Aliquis homo est justus;

Simon non est justus.

b) Opponitur universali; nam singulare subjectum in universali continetur. Hæc autem oppositio non est contradictoria; nam v. g. hæ duæ propositiones:

Omnis homo est justus;

Antonius non est justus,

possunt simul esse falsæ. Est igitur hæc oppositio contraria laxiori sensu, cum altera plus neget, altera plus affirmet quam necesse sit. Ut enim falsa reddatur universalis, non est necesse ut prædicatum illi præcise individuo non conveniat.

Hinc logici, quod ad oppositionem spectat, propositionem singularem eodem in numero habent ac universalem.

c) Contradictoria propositionis singularis fit mutando illius qualitatem:

Antonius est justus;

Antonius non est justus.

Hæc enim oppositio omnes characteres habet veræ contradictionis.

3° Quando subjectum propositionis suppositionem habet vel materiale vel logicam vel realem absolutam, propositio æquiparatur singulari (164, 3°); adeoque de ejus contradictoria, ut de contradictoria singularis decernendum est. Idem dicendum quum suppositio est collectiva (87), ex eadem ratione. Hujus propositionis v. gr. *Omnes Apostoli sunt duodecim*, contradictoria hæc est: *Omnes Apostoli non sunt duodecim*. Contraria nulla, si rem subtilius æstimemus, assignari potest. Quidam tamen auctores hanc statuunt illi contrariam: *Omnes Apostoli non possunt esse duodecim* (1).

(1) Card. Ptolemæus, *Phil. Elem.* lib. II,

4° Quum vero subjecti suppositio est disjuncta, seu confusa (88), difficilius est invenire contradictoriam. Nam huic propositioni:

Aliqua navis necessaria est ad navigandum;

si hanc opponas:

Nulla navis necessaria est ad navigandum, habes binas propositiones veras. Hæc enim altera, quoniam subjectum distributive supponitur, et copulativo descensu exponitur (86), negat de unaquaque navi determinata prædicatum, et hæc negatio vera est.

Si vero opponas hanc aliam:

Aliqua navis non est necessaria ad navigandum, habes pariter propositionem veram, quia disjunctiva est suppositio (88).

Nulla igitur alia erit contradictoria propositæ enuntiatio-
nis, nisi hæc:

Non aliqua navis necessaria est ad navigandum,

quæ ita explicabitur:

Falsum est aliquam navim, etiam indeterminate acceptam, necessariam ad navigandum esse:

Et hæc est propositio falsa.

ARTICULUS III.

De oppositione propositionum compositarum.

195. Ut contradictoria fiat propositionis compositæ, negari debet vel affirmari id, quod ad ejus veritatem labefactandam satis est: si aliquid ultra negetur, oppositio ad contrariam verget; ac si id totum negetur quod negari potest, oppositio erit vere contraria. Ad habendam autem contradictoriam, vulgo præcipitur, ut toti propositioni præfigatur negativa particula, quemadmodum in ultimo exemplo (194, 4°) factum est. Recte quidem hoc præcipitur. Verum oppositio quæ ita enuntietur, expositione indigeat.

Satius igitur fuerit in singulis compositarum speciebus oppositionis, præsertim contradictoriæ, rationem enucleate exhibere.

* 196. 1° Contradictoria copulativæ est disjunctiva impropria (172). Ut enim falsa ostendatur copulativa, satis est

si propositionum partialium quas continet, simultaneam veritatem neges; id quod fit opponendo disjunctivam impropriam.

Duo porro hæc servanda sunt, quum copulativæ opponitur disjunctiva:

a) Debet mutari qualitas singularum partium.

b) Earum insuper quantitas mutanda, ubi opus fuerit juxta leges oppositionis in propositionibus simplicibus.

En exemplum. Sit hæc propositio copulativa:

Petrus et Paulus Romæ mortui sunt.

Contradictoria erit: *Vel Petrus vel Paulus non est Romæ mortuus.*

Contraria foret: *Nec Petrus nec Paulus Romæ est mortuus.*

2° Hinc sequitur, contradictoriam disjunctivæ improprie esse copulativam cum modo dictis mutationibus quoad partes. Contraria vero ejus nulla est; quia disjunctiva impropria æquivalet huic particulari propositioni: *aliquid horum verum est.* Particularis autem propositio contrariam non habet (189. 2°).

Quum autem disjunctivæ propria est, huic æquivalet copulativæ: *Hæc non sunt simul vera et non sunt simul falsa.* Illi igitur contradices per disjunctivam impropriam: *vel hæc sunt simul vera, vel certe sunt simul falsa.* Igitur disjunctivæ propriæ contradictoria est disjunctiva altera, primo affirmans, deinde negans copulativam primæ membra. Ita huic:

Omne corpus aut movetur aut quiescit,
contradictoria existet: *Vel aliquod corpus movetur simul et quiescit, vel aliquod corpus nec movetur, nec quiescit.*

Contraria nulla, nisi illa evidenter absurda: *Hæc sunt simul vera, et sunt simul falsa:* videlicet in allato exemplo:

Omne corpus movetur et quiescit, et non movetur, et non quiescit.

3° Adverte, quando disjunctivæ partes sunt plures quam duæ, in contradictoria affirmandum esse, vel duas ex illis aut tres aut plures aut denique omnes esse simul veras; vel duas aut tres aut omnes esse simul falsas.

4° Adverte demum, juxta ea quæ nuper dicta sunt (194, 4°), si quando in disjunctiva subjecti suppositio confusa exstiterit, contradictoriam fieri non posse, nisi ipsam disjunctivam negando: v. gr. *Non vel dexter oculus, vel sinister necessarius est ad videndum.*

* 197. Quoniam *adversativa*, *causalitas*, *reduplicativa* ad copulativam reducuntur (167, 169, 180); *exclusiva* autem et *exceptiva* modo ad copulativam, modo ad disjunctivam (174-178); quidquid ad earum oppositionem pertinet, ex modo dictis facile colligitur. En exempla:

1° *Adversativa*: *Plato non est bonus miles, sed sublimis philosophus.*

Contradictoria: *Plato vel est bonus miles, vel non est sublimis philosophus.*

Contraria: *Plato est bonus miles, et non est sublimis philosophus.*


2° *Causalis*: *Beatus est, quia dives est.*

Contradictoria: *Vel non est beatus, vel non est dives, vel non ideo beatus est, quia dives est.*

Contraria: *Nec beatus est, nec dives, nec si dives esset, beatus esset* (171, 3°).

3° De reduplicativa res patet per se (180, 1°, 2°).

4° *Exclusivarum* exclusi subjecti oppositio in sequenti schemate exhibetur:



Ad exclusivam exclusi prædicati quod attinet, ejus contradictoria facile assignatur.

Omnis homo est tantum animal; i. e.

Omnis homo est animal; et nullus homo est aliud quid præter animal.

Contradictoria erit: *Aliquis homo est non tantum animal; i. e.*

Vel aliquis homo non est animal; vel aliquis homo est aliud quid præter animal.

Contraria, saltem propria, non habetur.

5° De exceptivis nihil est quod addamus (178).

* 198. Restat ut de *relativa*, *conditionali*, *conjunctiva*, *comparativa* dicamus; quod breviter expediemus.

1° Sit *relativa*: *Tanti homo valet quantum habet.* Huic ita contradices: *Non tanti homo valet quantum habet*; quæ propositio expositione non indiget. Contraria hæc erit: *Tanti homo non valet quantum habet.*

2° *Conditionalis* contradictoriam jam exposuimus (171, 2°).

Huic propositioni: *Si anima est simplex, est immortalis.*

Contradices nexum negando, hoc pacto:

Non si anima est simplex, est immortalis.

Vel: *Etiam si anima sit simplex, non tamen est immortalis.*

Contraria foret hæc: *Si anima est simplex non est immortalis.*

Notandum, propositionem conditionalem æquiparari semper singulari (171, 3°).

3° *Conjunctiva*: *Nullum corpus movetur simul et quiescit.*

Contradictoria: *Aliquod corpus movetur simul et quiescit.*

Contraria: *Omne corpus movetur simul et quiescit.*

4° *Comparativa*: *Omnis scientia est artibus difficilior.*

Contradictoria est: *Aliqua scientia non est artibus difficilior.*

Contraria: *Nulla scientia est artibus difficilior.*

ARTICULUS IV.

De oppositione propositionum complexarum.

199. Prius de complexis secundum materiam (181). Hæc generatim tractantur ut simplicis (184). Cum tamen aliud judicium sibi implicitum habeant, potest et hoc impugnari,

et quandoque debet. Unde duobus modis potest complexæ contradici, vel impugnando principalem cum incidente quæ vera supponitur, vel incidentem tantummodo; quod tunc maxime fieri debet, quum in ea cardo quæstionis vertitur, ut non raro contingit. Rem declarabunt exempla.

Hæc propositio: *Anima rationalis est forma humani corporis* (184,3°), potest primo impugnari hanc illi objiciendo contradictoriam: *Anima rationalis non est forma humani corporis*; potest perinde impugnari contradicendo incidenti sic: *Anima quæ est forma humani corporis, non est rationalis*. Falsa propositio, sed propositioni datæ vere contradictoria.

Eodem modo hæc alia propositio: *Milo occidit aggressorem*, impugnabitur primo modo sic: *Milo non occidit aggressorem*; altero sic: *Ille quem Milo occidit non erat aggressor*.

200. Sunt quædam complexæ in quarum oppositione quantitas quoque incidentis mutanda est; quædam in quibus hæc mutatio fieri non debet. En exempla:

1° *Omnis demonstratio in omni scientia principiis certis innititur*.

Huic ita contradices: *Aliqua demonstratio in aliqua scientia principiis certis non innititur*; si enim diceret: *Aliqua demonstratio in omni scientia etc.* plus negares quam opus est, et posset utraque propositio esse falsa.

2° *Omnis homo servans omnia mandata Dei salvatur*. Contradictoria erit: *Aliquis homo servans omnia mandata Dei non salvatur*. Quod si dicas: *Aliquis homo servans aliqua mandata Dei non salvatur*, vera erit propositio, et primæ nullo modo opposita.

3° *Petrus aliquando ambulat*. Contradictoria non erit: *Petrus aliquando non ambulat*; utraque enim vero est; sed præfigenda negatio est ipsi abverbio in hunc modum: *Petrus non aliquando ambulat*; seu *Petrus nunquam ambulat*.

4° Eodem modo hujus propositionis: *Omnis homo semper cogitat*, contradictoria erit: *Aliquis homo non semper cogitat*, seu, *aliquando non cogitat*.

5° Eadem dicenda in adverbii localibus. Contradicetur affirmativis, ipsi adverbio negationem præfigendo. *Christus*

est ubique, contradictoria: *Christus est non ubique*, nempe: *alicubi non est*.

201. De oppositione modalium illud in primis statui potest: quicumque sit modus, et quacunque formula efferatur modalis, contradictoriam haberi si ipsi modo negativa particula præfigatur. *Necessario* enim v. gr. et *non necessario* sunt certe contradictoria. Quare propositionum istarum:

Deus necessario mundum creavit.

Possibiliter mundus est immensus.

Contradictoriæ erunt:

Deus non necessario mundum creavit

Non possibiliter mundus est immensus.

*202. Sed ut intimius aliquid de his oppositionibus dicamus, ecce tibi dialecticorum hac de re dogmata, his duobus documentis contenta:


1° Contrariæ modales eundem modum habent, sed universalem: Contradictoriæ modos habent contradicentes. Sunt autem modi universales, ut ex jam dictis (188,2°) erui potest: *necesse*, et *impossibile*, seu *non possibile*. Particulares sunt: *possibile*, quod idem hic valet ac *contingens*, *non necesse*, *non impossibile*. Modi vero contradicentes sunt universalis et particularis.

2° Contrariæ, si ex necessario fuerint, dicta habent contradictoria vel contraria: si ex possibili aut impossibili, contradictoria vel subcontraria.


Contradictoriæ idem dictum habent.

Hæc inde probantur, quod tantummodo his servatis, oppositionis tum contrariæ tum contradictoriæ proprietates servantur; iisque neglectis deficiant; ut exempla monstrabunt.

Afferimus primo exemplum, in quo modus est ex possibili et dictum singulare, quod minorem habet difficultatem.




Alterum exemplum continebit modum ex necessario, et dictum commune.



*203. Si quæres quomodo modi diversæ appellationis inter se opponantur, id deduces ex dictis (188, 2°).

Ecce schema hujusmodi oppositionis:



Quomodo hæc oppositio cum prima omnino cohæreat, id ex æquipollentia modalium, de qua mox dicturi sumus, illico aperiatur.

204. Nemo, miretur si in his quæ ad propositionum oppositionem spectant, prolixiores fuimus quam nostri temporis consuetudo ferat, aut morès nostri ferre posse videantur. Etenim præter ea quæ ad hanc querimoniam sedandam alibi diximus (97), est hic etiam animadvertendum, eum qui in oppositionum doctrina non sit bene versatus, facile errare, tum in aliorum doctrinis interpretandis, tum in sententiarum pondere ac vi æstimanda, tum etiam in deducendo verum a falso et falsum a vero: in disputando insuper a scopo frequenter deflectere, et andabatarum more pugnare. Non raro contingit, ut ex duobus contenditibus, alter mutata materia, contendat possibile esse Petrum ambulare, alter possibile esse Petrum non ambulare; quin vel unus vel alter animadvertat possibile esse, ut ex æquo verum sit quod et unus dicit et alter!

CAPUT IV.

DE TRANSITU AB UNA PROPOSITIONE AD ALIAM.

ARTICULUS I.

De æquipollentia propositionum simplicium.

205. Dialecticorum circa propositionum æquipollentiam et conversionem, quæ subdimus documenta, non minus quam oppositionis theoria, sunt ad recte judicandum sane necessaria. Magna enim errorum nostrorum pars, id quod paululum consideranti erit manifestum, ex eo gignitur quod vel putemus æquipollere sibi propositiones quæ æquipollentes non sunt, vel a propositione vera ad falsam per pravam conversionem gradum faciamus.

Non igitur hæc eruditionis tantum gratia, quemadmodum humo effossa vetustatis monumenta, sed plane necessario sunt dialectico cognoscenda, eique familiaria esse debent. Prius de æquipollentia.

206. *Æquipollentia* propositionum est eadem in utraque significatio cum eadem significationis amplitudine. Sic universalis propositio æquipollet copulativæ ex omnibus singularibus sibi subjectis; et particularis disjunctivæ ex iisdem (162, 89, 2°). At logici, quum de æquipollentia loquuntur, eas in primis spectant propositiones, quæ eodem subjecto et prædicato constantes, una aut altera negatione differunt, et tamen idem valent; ut istæ:

Nullus homo non est mortalis;

Omnis homo est mortalis.

De æquipollentia propositionum simplicium, tria hæc sunt solemnia dialecticorum effata:

1° Negatio præposita subjecto propositionis, quæcunque sit ejus quantitas, facit eam suæ contradictoriæ æquipollentem.

a) Sume primo universalem affirmantem A (189):

Omne corpus est grave;

Præposita negatione habes;

Non omne corpus est grave; nempe; *omne corpus excepto*

aliquo est grave; seu: aliquod corpus inter omnia non est grave; ac tandem:

Aliquod corpus non est grave;

quæ est contradictoria datæ propositionis.

b) Sume hanc ipsam particularem negantem, ac præpone negationem; habebis:

Non aliquod corpus non est grave; nimirum: Nullum corpus non est grave; seu: Omne corpus est grave.

c) Eodem modo, assumpta universali negante, erit:

Non nullum corpus est grave; videlicet:

Aliquod corpus est grave.

d) Ita: *Non aliquod corpus est grave, idem valet ac:*

Nullum corpus est grave.

2° Negatio subjecto enuntiationis universalis postposita, eam suæ contrariæ æquipollentem facit. Revera si dicas:

a) *Omne corpus non est grave; idem dicis ac:*

Nullum corpus est grave.

b) Item: *Nullum corpus non est grave; æquatur huic:*

Omne corpus est grave.

Eodem modo fiunt æquipollentes subcontrariæ, ut per se patet.

* 3° Negatio præposita et postposita subjecto enuntiationis universalis, aut particularis, facit eam suæ subalternæ æquipollentem.

Nam negatione præposita subjecto v. gr. propositionis I, (189) hac fit æquipollens suæ contradictoriæ E (1°); et huius subjecto negatione postposita, hæc fit æquipollens suæ contrariæ A (2°). Ergo propositio I per hanc duplicem negationem fit æquipollens subalternæ A.

Simili artificio regulæ veritas patebit in cæteris.

* 207. Hæc quæ diximus de subjectis enuntiationis tum particularis, tum universalis, applicari quoque debent iis adverbis, sive loci sive temporis, quæ discrimen quantitatis habent; ut sunt *aliquando, semper, nunquam*; item *alicubi, ubique, nullibi*, et similia. Inter adverbia temporis v. gr. ex præstitutis regulis has habebis æquipollentias:

<i>non aliquando est</i>	<i>= nunquam est</i>
<i>non semper est</i>	<i>= aliquando non est</i>
<i>non nunquam est</i>	<i>= aliquando est</i>
<i>non aliquando non est</i>	<i>= semper est</i>
<i>semper non est</i>	<i>= nunquam est</i>
<i>nunquam non est</i>	<i>= semper est</i>

ARTICULUS II.

* *De æquipollentia propositionum modalium.*

208. Modales iisdem regulis ac simplices propositiones, redduntur æquipollentes. Negatio præposita modo, facit modalem suæ contradictoriæ æquipollentem; postposita modo facit æquipollentem contrariæ; proposita modo et postposita, æquipollentem subalternæ.

Sumptis modalibus diversæ appellationis (203), ex harum applicatione regularum has habebis æquipollentias.

1°	2°
<i>Necesse est esse</i>	<i>Impossibile est esse</i>
<i>Impossibile est non esse</i>	<i>Necesse est non esse</i>
<i>Non impossibile est non esse</i>	<i>Non possibile est esse</i>
3°	4°
<i>Possibile est esse</i>	<i>Possibile est non esse</i>
<i>Non impossibile est esse</i>	<i>Non impossibile est non esse</i>
<i>Non necesse est non esse</i>	<i>Non necesse est esse</i>

Ex hac serie perspicis, modos omnes qui sunt æquipollentes, ejusdem esse quantitatis, nimirum vel omnes universales vel omnes particulares (202, 1°).

209. Si dictum sit singulare, facilis est traditarum formularum applicatio. Si vero fuerit commune, hoc servandum est documentum ad habendam æquipollentiam, ut si in modali de necessario dictum sit universale, in æquipollentibus de possibili et impossibili sit particulare; et viceversa. Etenim hæc propositio: *Necesse est omnem hominem esse ægrum*: æquivalet huic: *Impossibile est aliquem hominem non esse ægrum*: non vero huic: *Impossibile est nullum hominem esse*

ægrum, ut patet: quod etiam dicendum de reliquis; ut videre potes in subjectis tabellis:

1°	2°
<i>Necesse est omnem hominem esse ægrum.</i>	<i>Impossibile est aliquem hominem esse ægrum.</i>
<i>Impossibile est aliquem hominem non esse ægrum.</i>	<i>Non possibile est aliquem hominem esse ægrum.</i>
<i>Non possibile est aliquem hominem non esse ægrum.</i>	<i>Necesse est nullum hominem esse ægrum.</i>
3°	4°
<i>Possibile est aliquem hominem esse ægrum.</i>	<i>Possibile est aliquem hominem non esse ægrum.</i>
<i>Non impossibile est aliquem hominem esse ægrum.</i>	<i>Non impossibile est aliquem hominem non esse ægrum.</i>
<i>Non necesse est nullum hominem esse ægrum.</i>	<i>Non necesse est omnem hominem esse ægrum.</i>

In his, modalium diversæ denominationis et cum dicto communi, non solum æquipollentias habes, sed etiam oppositiones. Omnes enim quæ sunt in 1^a tabella, sunt contradictoriæ omnibus quæ sunt in 4^a, contrariæ omnibus quæ sunt in 2^a, subalternantes omnium quæ sunt in 3^a.

ARTICULUS III.

* De conversione propositionum.

210. Conversio propositionis est *commutatio terminorum ejus, ita ut prædicatum fiat subjectum, et subjectum fiat prædicatum, incolumi tamen veritate*. Ut si dicas: *Scientia non est summum bonum*; igitur: *Summum bonum non est scientia*.

Posse conversionem hujusmodi fieri, manifestum est. Ex duobus enim quæ sunt objective identica (54), alterum potest de altero indifferenter affirmari: ex duobus item quæ sunt objective diversa, alterum de altero indifferenter negari potest. Si licet v. gr. mihi dicere: res expressa per ideam A, est res expressa per ideam B, licebit sine dubio dicere et hoc: res expressa per ideam B, est res expressa per ideam A. Jam prædicatum et subjectum in propositione affirmativa

sunt objective identica; in negativa sunt objective diversa. Ergo.

211. Illud in hoc est unice curandum, ut terminorum identitas vel diversitas servetur, quod fiet si prædicatum transiens in subjectum, et subjectum transiens in prædicatum, extensionem ac suppositionem quam habebant, non augeant.

Nam quum duò termini non sunt identici objective vel diversi, nisi intra limites certæ cujusdam extensionis ac suppositionis assumantur, profecto eos limites si transgrediaris, terminorum identitas vel diversitas non amplius subsistit.

Augetur autem extensio termini, quum hic a disjunctiva vel disjuncta suppositione transit ad distributivam. Quod si a distributiva transeat ad disjunctivam vel disjunctam, extensio minuitur: per hoc tamen terminorum identitas vel diversitas, si prius existerat, non tollitur. Si enim quodlibet A et aliquod B sunt identica, erunt quoque identica aliquod A et aliquod B. Pariter si quodlibet A et quodlibet B sunt diversa, erunt quoque diversa aliquod A et quodlibet B.

212. Conversio proprie dicta est duplex: *simplex* nempe et *per accidens*: alia est insuper conversio, *per contrapositionem*.

Conversio simplex, quæ et in *terminis* dicitur, ea est in qua propositionis quantitas servatur: conversio per accidens, quæ appellatur quoque *in parte*, est in qua propositionis quantitas mutatur ab universali in particularem.

1° Conversione simplici convertitur:

a) Particularis affirmativa. Prædicatum enim in propositione affirmativa est particulare (158, 2°). Igitur quum transit in subjecti locum, assumere debet particularitatis notam; quapropter propositio iterum exurgit particularis.

Aliquis homo est felix:

Ergo:

Aliquis felix est homo.

b) Propositio universalis negans. Nam prædicatum ejus est universale (160, 2°); dices ergo:

Nullum corpus cogitat:

Ergo:

Nihil quod cogitat est corpus.

2° Conversione per accidens convertitur:

a) Propositio universalis affirmans. Cum enim prædicatum ejus sit particulare, non potest illi apponi signum universalitatis, quod est in subjecto (211). Adeoque quum prædicatum transit in subjecti locum, opponitur illi particularitatis signum.

Omnis homo est vivens:

Ergo;

Aliquis vivens est homo.

Subjectum prioris, *homo*, transit, ut vides, ab extensione universali ad particularem; sed hoc identitatem non tollit (211).

b) Potest etiam conversione per accidens converti universalis negans.

Nullum corpus cogitat:

Ergo:

Aliquid quod cogitat non est corpus.

3° Propositio particularis negans non potest converti nec simpliciter, nec per accidens: subjectum enim particulare transiens in prædicatum propositionis negativæ, sive uno modo sive altero convertiatur propositio, fit semper universale ex ipsa negantis propositionis natura. Revera ex eo quod recte dicas:

Aliquis homo non est grammaticus,
inepte prorsus inferres:

Aliquis grammaticus non est homo:

ineptius:

Omnis grammaticus non est homo.

Excogitarunt itaque logici alium conversionis modum, qui huic propositioni aptari posset. Et est conversio *per contrapositionem*: quæ fit præfigendo particulam *non* utrique termino transposito. Hoc pacto ex hac:

Aliquis homo non est grammaticus,

inferes legitime:

Aliquis non grammaticus non est non homo.

Nempe ut magis hominum more loquaris:

Aliquis qui non est grammaticus, est homo.

Hoc conversionis genere converti potest etiam universalis affirmans, quæ sic mutando qualitatem, quantitatem suam servat.

ARTICULUS IV.

* *Animadversiones quædam.*

213. 1° Quum prædicatum sive affirmativæ sive negativæ propositionis, vel singulare est vel singulari æquivalens propter suppositionem, propositio per conversionem fit singularis, vel æquivalens singulari, si prius talis non erat, ut in hoc exemplo:

Aliquis homo est Petrus—Ergo Petrus est homo.

2° Quando prædicatum propositionis universalis affirmativæ est definitio subjecti, vel significat aliquam ei soli convenientem proprietatem, potest non ex natura propositionis, sed ex rei natura, fieri conversio simplex; ut in his:

Omnis homo est animal rationale — Et: omne animal rationale est homo.

Omne extensum permanens est figurabile — Et: omne figurabile est extensum permanens.

Omne triangulum æquilaterum est æquiangulum — Et: omni triangulum æquiangulum est æquilaterum.

3° Ut recte fiat conversio, præsertim ubi copula est futuri temporis vel præteriti, vel ubi prædicato adnectuntur aliqui casus obliqui, hæc duo attendenda sunt quæ supra docuimus. Primo in omni propositione veram copulam esse verbum substantivum, et quidem præsentis tempore, cætera autem quæ verbum includit ad prædicatum pertinere (149); secundo in propositione affirmativa prædicatum esse terminum particularem (158, 2°).

Hinc intelliges sequentes conversiones.

Hic puer erit senex — Converte: *Aliquis futurus senex est hic puer.*

Omnis mortuus fuit vivens — Conv. *Aliquis qui fuit vivens est mortuus.*

Nullus senex potest fieri juvenis — Conv. *Nullus potens fieri juvenis est senex.*

Equus est sub homine — Conv. *Aliquid quod est sub homine est equus.*

Christianus amat malevolum — Conv. *Aliquis amans malevolum est Christianus.*

4^o Quandoque ut propositio post conversionem vera maneat, exprimendus est status vel distractio vel ampliatio (90-92) subjecti transeuntis in prædicatum; vel etiam restrictio (94) sive subjecti, sive prædicati, prius subintellecta. Ræ declarabunt exempla.

Si vera esset hæc propositio: *Nullum corpus est album*, non esset profecto sic convertenda: *Nullum album est corpus*, quæ est propositio absurda; sed hoc pacto, exprimendo videlicet statum subjecti: *Nullum album est corpus quod modo sit.*

Item quum dicis: *Omnia quiescunt*; et: *Nulla perstrepat aura*, hæc ita sunt convertenda: *Aliqua quæ quiescunt, sunt omnia quæ circa me modo sunt*; et: *Nihil quod modo perstrepat, est aura.*

Huc pertinet difficultas illa, quam proposuit Leibnitzius, quamque magno solvit exquisitarum instrumento formularum (1). Propositio hæc: *Omnis ridens est homo*, juxta datas regulas ita convertitur: *Aliquis homo est ridens*. Jam prima necessaria est et vera, etiamsi nullus homo unquam rideret; altera contingens, et vera non est, nisi inveniat qui actu rideat; unde potest esse aliquando falsa. Facile hanc solves difficultatem, si ad ea quæ modo diximus attendas. In data propositione, quoniam ea necessaria est, subjectum *omnis ridens* ad omnia tempora, et ad ipsa quoque possibilia ampliatur; quapropter sic est exponenda: *Omnis qui fuit*

(1) Difficultates quædam logicæ in collectione cui titulus: *OEuvres philosophiques de feu M. de Leibnitz publiées par Rud. Enr. Raspe. Amsterdam. MDCCLXV. pag. 515, seq.*

aut est, aut erit, aut potest esse ridens, est homo (91). Converte nunc juxta regulas, sed ampliacione diserte expressa: habebis propositionem hanc: *Aliquis homo est aliquis qui aut fuit, aut est, aut erit, aut potest esse ridens*. Quæ propositio est omnino vera, imo et necessaria.

ARTICULUS V.

* *De duplici transitu ab una propositione ad aliam.*

214. Transit mens ab una propositione immediate ad aliam, ut sapienter adnotavit Galluppius (1), modo duplici, videlicet per modum *immediatæ illationis* vel per modum *questionis*. Uterque modus usitatissimus est, et in vulgari et in scientifico rationis exercitio, sed potissimum primus; quo adeo frequenter ac tanta cum celeritate utimur, ut hic transitus reflexionem quandoque lateat vel maxime vigilantem. Nec raro fit, ut hac via ad errorem deflectamus, ut jam supra indicavimus (205). Unde et de hoc breviter agendum; ac primo de illationibus immediatis.

215. Illatio immediata est artificium, quo ex una propositione educimus aliam, ex eo quod videamus alteram in altera includi, vel alteram cum altera utcumque connecti. Possunt quidem illationes istæ omnes reduci scientifice ad ratiocinium, sed nec solet id fieri, nec opus est, quia in his illationibus, ut scribit Wolfius (2), *consequentia ob rationes generales patet*.

Illationes immediatæ ad tres classes, vere non minus quam eleganter, a Cardinali Ptolemæo (3) reducuntur. In prima illationum classe, utraque propositio idem significat, sed diversis aliquomodo vocibus. In altera, utraque propositio diversa significat, sed iisdem vocabulis. In tertia, propositiones diversa significant et diversis vocabulis.

216. Prima classis continet omnes consequentias, quæ ex doctrina æquipollentiæ (206 seq.) dimanant; ut: *Necesse est*

(1) *Lezioni di Log. e Met.*, vol. II, lez. LIX.

(2) *Log.* § 46.

(3) *Elem. Phil.*, lib. III.

omnem hominem mori: ergo impossibile est aliquem hominem non mori (209).

De his nil superest addendum, nisi generalis canon per se manifestus: *quæcunque propositiones sunt æquipollentes, earum una posita, ponitur etiam altera.*

Altera classis continet consequentias immediatas, quas suppeditant legitimæ conversiones (210, seq.) ut: *Corpus non cogitat: ergo quod cogitat non est corpus.*

De his quoque satis diximus.

Tertia classis plures continet illationum modos, quorum plerique explicatione aut restrictione indigent. Præcipuos tantum indicabimus.

217. Huc primo spectant illationes, quæ in propositionum oppositione innituntur, quarum leges jam exposuimus, ubi de propositionibus oppositis actum est (190). Potissima est hæc: *Ex veritate unius contradictoriæ infertur falsitas alterius, et viceversa.*

Deinde illationes ab uno prædicato ad aliud.

a) Valet illatio affirmativa ab inferiori termino ad superiorem (33); negativa non valet. Sermo est de terminis primæ, ut aiunt, intentionis (74). Hæc v. gr. sunt legitimæ: *Petrus est homo: ergo est animal. Planta est corpus: ergo est substantia.* Non vero ista: *Leo non est homo: ergo non est animal.*

b) E converso, a superiori ad inferiorem negativa illatio valet: *Non est animal: ergo non est homo;* affirmativa: *Est animal: ergo homo,* non valet.

c) A prædicato complexo seu conjuncto (182), ad ejus partes divisas valet illatio, quando una pars de subjecto dici potest, etiam præcisione facta a determinatione per aliam partem significata; ut: *flumen est aqua fluens: ergo flumen est aqua, et est fluens.*

Non valet autem, quando una pars non dicitur de subjecto per se, sed solum secundum formam quam altera pars significat; ut: *Petrus non est bonus miles: ergo non est miles, nec bonus;* vel: *Homerus est poeta: ergo est* (183).

d) A prædicato diviso ad conjunctum valet illatio, quando

una pars potest dici de subjecto, etiam secundum quod habet primam; ut: *Alexander est rex, et est juvenis: ergo Alexander est rex juvenis.*

E contrario non valet quando una pars non potest dici de subjecto secundum quod habet primam; ut: *Alexander est parvus, et est rex: ergo Alexander est parvus rex.* Vide alias dicta de appellatione (96).

e) A prædicato privativo ad negativum illatio bona est, sed non viceversa. Vide dicta de oppositis (52, 1^o, 2^o).

218. Insuper illationes ab una suppositione ad aliam.

1^o A suppositione distributiva ad disjunctivam et singularem, valet illatio tum affirmativa, tum negativa: *Omnis homo est mortalis: ergo aliquis homo est mortalis: ergo Petrus est mortalis.* Recolendo sunt tamen quæ diximus de variis universalitatis gradibus (163, 3^o).

2^o A suppositione distributiva ad collectivam, et vicissim, bona est vel mala illatio, pro prædicati diversitate.

In hoc triplex casus datur.

a) Sunt quædam prædicata, quæ unicuique individuo seu parti collectionis conveniunt, quatenus pars est; et a cæterarum partium sejuncta consortio. Et hæc de singulis affirmari possunt, non vero de omnibus simul. Ideo ex. gr. pessima est hæc consecutio: *Quisque miles est insufficiens ad hostem profligandum: ergo omnes milites simul sunt ad hoc insufficientes;* vel: *Omnis pars est quid incompletum: ergo omnes simul sunt quid incompletum.*

b) Quædam attributa conveniunt singulis partibus ex ipsarum essentia et natura, sine ullo respectu ad partis rationem. Et hæc tum de singulis, tum de omnibus simul affirmantur. Quare legitimæ sunt consecutiones: *Singuli homines uno die tantum itineris conficiunt: ergo et omnes simul. Et: Omnes mundi partis sunt contingentes: ergo et totus mundus.*

c) Sunt demum prædicata quædam, quæ collectionis unice propria sunt, quia a partium multitudine pendent. Hæc solum de collectione, non vero de partibus dici possunt distributive. Ex quo fit ut non possis ita concludere: *Centum anni sunt sæculum: ergo singuli anni sunt sæculum.*

219. Illationes demum huc revocantur a possibilitate ad actum, et vicissim.

1^o Ab esse ad posse valet illatio. Est manifestum. Nihil enim est quod esse non possit.

2^o A posse ad esse non valet illatio. Etenim non omnia sunt, quæ esse possunt.

3^o A non esse ad non posse illatio non datur. Nam multa non sunt, quæ nihilominus esse possunt.

4^o A non posse ad non esse datur illatio. Etenim nihil existit quod non possit existere.

5^o A potentia agendi ad actum datur illatio in causis necessariis, si ad agendum sint proxime expeditæ; non item in causis liberis, quia positis omnibus requisitis, hæc possunt agere et non agere.

6^o A simultanea possibilitate, non sequitur possibilitas simultaneitatis. Nimirum ex eo quod duo sint æque ac simul possible, per se non sequitur, posse simul existere. Revera absurda est hæc consequentia: *Petrus cras potest esse vivus et potest esse mortuus: ergo potest esse simul vivus et mortuus.*

220. Transitus alter ab una propositione ad aliam est qui fit per modum quæstionis; ac locum habet præsertim in exercitio rationis reflexo, et in iis qui scientificam cognitionem persequuntur, seque menti offert quotiescunque una propositio ex alia non potest logice inferri. Tunc enim incipit mens quærere, an forte altera propositio quæ inferri nequit, sit nihilominus in se vera; ex quo se confert ad investigandum, ad observandum, ad experiendum, ad varia tentanda ratiocinia, quibus propositum problema resolvi possit. Unum afferam aut alterum exemplum.

Propositio universalis affirmans: *Omnis spiritus est simplex*, convertitur in hanc particularem: *Aliquod simplex est spiritus*; non enim sequitur universalis: *Omne simplex est spiritus*. Pulsat nihilominus animum quæstio, utrum hæc propositio ex rei natura vera sit, an non; an videlicet aliquid quod non sit spiritus, sit simplex; et habes subtile problema metaphysicum.

Pariter, cum ex veritate particularis non inferatur veritas

universalis subalternæ; ex eo quod aliquis planeta, in sua circa solem orbita describenda, constantem legem sequatur, non illico concludi potest, ab omnibus planetis eam legem servari. Tamen hoc ipsum excitabit animum ad inquirendum, num verum sit ex rei natura, omnes planetas hanc legem sequi. Fructus inquisitionum erit planetarii systematis cognitio. Item ex eo quod triangulum rectangulum habet summam angulorum æqualem gradibus 180, non sequitur logice, id de omnibus verum esse. Sed quærît ulterius geometra, et invenit id de omnibus verum esse.

Hæc est historia omnium fere theorematum, quibus humanæ scientiæ constant.

LIBER TERTIUS.

CAPUT I.

DE RATIOCINIO EJUSQUE EXPRESSIONE.

ARTICULUS I.

De ratiocinii notione.

221. Quum binas ideas inter se comparantes, objectivam earum identitatem aut diversitatem illico deprehendimus, iudicium inde consequitur immediatum. Verum haud semper hoc evenit; imo frequenter mens hæret, anceps de idearum quæ sese illi offerunt, convenientia aut discrepantia. A qua suspensione et cunctatione ut sese liberet, non alia illi suppetit via, nisi ut comparationem inter illas mediatam instituat, ope tertiæ cujuscumque ideæ, quam vel quærendo nanciscatur vel ultro sibi oblatam arripiat. In hac autem binarum idearum comparatione cum tertiâ, si qua relatio inter eas deprehenditur, tria hæc contingere possunt:

1^o Ut una et altera idea de quarum relatione inquiritur, a tertiâ assumpta objective differat. Quo in casu, nec utrum convenient inter se priores illæ, nec utrum discrepent, deprehendi poterit. Licet enim a tertiâ utraque differat, possunt tamen convenire inter se, possunt et differre; sed neutrum exinde colligitur. Sint ex. gr. binæ ideæ: *anima hominis et immortalis*. Sit tertiâ idea, *ens materiale*. Anima hominis non est ens materiale: ens materiale non est immortale. Quid inde?

2^o At si fiat ut idea tertiâ se prodât hinc identicam cum una ex prioribus, inde identicam cum altera, tunc enimvero mens intelligit, priores ideas identitatem habere inter se, iudiciumque ponit affirmativum. Sit v. gr. mens dubia, utrum *mundus sit necne effectus causæ intelligentis*. Binæ ideæ de quarum relatione quæritur, sunt istæ: *mundus, et effectus causæ intelligentis*. Accedat tertiâ ideæ loco hæc: *opus ordinatum*. Apprehendet mens ex una parte: *mundum esse opus*

ordinatum; ex altera: *omne opus ordinatum esse effectum causæ intelligentis*. Quare deprehendet quoque id quod quæribat: *mundum esse effectum causæ intelligentis*.

Hoc autem deprehendit ejus principii vi, quod dicunt *identitatis*, quod sic effertur: *Duo quæ sunt identica cum uno tertio, sunt identica inter se*. Cujus axiomatis, quum sermo est de identitate idearum, eaque objectiva, sensus est iste: Datis tribus ideis, si res quam exprimit 3^a invenitur eadem et cum re quam exprimit 1^a, et cum re quam exprimit 2^a, sane res quam exprimit 1^a, eadem est ac res quam exprimit 2^a. Ratio autem est in promptu. Si enim objectum 3^o ideæ, est objectum ipsum 1^o, jam ubicunque est objectum 3^o, intelligere possum objectum 1^o. Sed ex altera parte invenio objectum 3^o, esse objectum 2^o. Ergo substitutione facta, habebo objectum 1^o esse objectum 2^o.

3^o Demum potest contingere ut idea tertiâ appareat quidem identica cum una ex ideis propositis, sed discrepans ab altera. Tunc autem mens intelligit, propositas ideas discrepare inter se, iudiciumque ponit negativum. Fac te quærere, utrum *homo potens sit independens*. Occurrit tertiâ idea: *Deo subjectus*. Statim vides, hinc quidem *hominem* vel *potentem esse Deo subjectum*; inde vero, *omnem qui Deo subjectus sit, independentem non esse*. Unde clare intelligis: *hominem potentem non esse independentem*.

Hoc autem perspicitur ope principii, quod dicunt *discrepantiæ*, videlicet: *Si ex duobus unum sit identicum cum tertio, alterum non sit, illa duo non sunt identica inter se*. Nimirum respectu idearum: si res de qua est 3^a idea, invenitur eadem cum re quam exprimit 1^a, non autem cum ea quam exprimit 2^a, sane res quam exprimit 1^a, non est illa quam exprimit 2^a.

222. Operatio mentis hucusque descripta dicitur *ratiocinatio*. Quæ si dicta resumas, ita se habet. Quum menti affulget tertiâ idea, oritur in illa *apprehensio comparativa composita*, nimirum apprehensio relationis sive identitatis, sive discrepantiæ inter tertiâ ideam, et primam ex una parte secundam ex altera. In hac duplici relatione tertiæ

ideæ cum reliquis duabus, mens percipit inclusam, et ex ea quasi erumpentem relationem inter ideas propositas, quam quærebat. Unde fit, ut si priores illas relationes judicando ratas habeat, eam quoque quæ illis implicita est, ratam habere necessario debeat. Ex his manifestum est, ratiocinium sic definiri posse: *ea mentis operatio per quam, instituta duarum idearum comparatione cum tertia, illarum inter se identitatem vel discrepantiam cognoscit.*

223. Hæc modo animadvertite: 1^o Idea illa tertia dicitur *media*, quia inter duas priores quasi mediam se collocat, easque veluti contactu suo conjungit, aut separat.

2^o Actus apprehensivus in ratiocinio duplex est, alter tamen ab altero dependens, ut effectus a causa. Primus est apprehensio relationum, sive identitatis sive discrepantiæ, ideæ mediæ cum duabus primo propositis: alter est apprehensio identitatis vel discrepantiæ inter binas hasce ideas, quatenus in primis illis relationibus includitur, ab iisque mente inspectante descendit. Hujus identitatis vel discrepantiæ ex iis relationibus descensus dicitur ratiocinii *consequentia*: ejusque perceptio ratiocinii mentalis *forma* est; quare per hanc ipsam perceptionem ratiocinium definitur (222).

3^o Tribus judiciis ratiocinium absolvitur. Quorum duo apprehensionem comparativam compositam consequuntur, tertium a consequentiæ apprehensione determinatur: hoc dicitur *judicium mediatum, deductum, consequens, seu conclusio*. Vides tertium hoc judicium potius necessarium ratiocinationis effectum, quam partem esse.

4^o Patet jam quantopere tria hæc inter se differant: *consequentia, apprehensio consequentiæ, et conclusio*. Prima est objectiva, est enim idearum relatio dimanans ex aliis relationibus; altera est subjectiva, actus nempe apprehensionis comparativæ; tertia pariter subjectiva est, sed effectus utriusque; est enim judicium quod apprehensionem comparativam subsequitur.

224. Si bina illa judicia (224, 3^o), quæ conclusionem antecedunt sint *analytica* (136, 1^o), ratiocinium vocatur *purum*:

si sint *synthetica*, dicitur *empiricum*: si vero alterum illorum sit *analyticum*, alterum *syntheticum*, ratiocinium *mixtum* nuncupatur.

ARTICULUS II.

De ratiocinii expressione.

225. Ratiocinii expressio dicitur *argumentatio*, ac potest definiri: *oratio quæ unam enuntiationem ex aliis deducit*. Enuntiatio quæ deducitur, ante ratiocinium dicitur *quæstio*: est enim ea de cujus veritate inquiritur: in ipso ratiocinio dicitur *consequens* seu *conclusio* (223, 3^o); illæ vero enuntiationes, ex quibus conclusio deducitur, vocantur *collective antecedens*.

Argumentatio simplex et completa, quæ videlicet ratiocinationem unam integre exprimit, appellatur *sylogismus*. Cæteræ argumentationes ad syllogismum reducuntur. Syllogismus autem definitur: *argumentatio quæ tribus constat enuntiationibus, ita inter se connexis, ut duabus positis, tertiam ponere necesse sit*. Patet definitio ex instituta superius ratiocinationis analysi: ex qua pariter habes exempla (221, 2, 3^o).

Si omnes syllogismi propositiones sint categoricæ (170), syllogismi dicitur *categoricus* et *simplex*; si qua ex illis sit hypothetica, syllogismus quoque appellatur *hypotheticus* et *compositus*. Nunc de simplici primum.

226. In syllogismo simplici locum habent tres propositiones, quæ ex tribus terminis bis repetitis conflantur. Propositiones sunt materia syllogismi proxima, termini materia remota.

Duo illi termini, qui in conclusionem conjunguntur vel separantur dicuntur *duo extrema*: subjectum quidem conclusionis *extremum minus*, prædicatum autem *extremum majus*.

Terminus qui ideam mediam (223, 1^o) significat, dicitur *terminus medius*: qui si fuerit singularis, syllogismus vocari solet *expositorius*, cujusmodi est iste:

*Unus ethnicorum fuit Socrates;
Sed Socrates deos inanes non coluit;
Ergo unus ethnicorum deos inanes non coluit.*

227. Binæ propositiones quibus constat syllogismi antecedens, vocantur syllogismi *præmissæ*. Illa in qua medius terminus comparatur cum majori extremo, appellatur *major*; illa in qua comparatur cum minori extremo, dicitur *minor*.

Consequentia est syllogismi forma, quandoquidem ea sit *consecutionis nexus conclusionem inter et præmissas* (223, 2^o). Exprimitur ope particulæ illativæ, *ergo*, quæ conclusioni præponitur.

Syllogismi *qualitas* ex qualitate conclusionis desumitur. Si conclusio affirmativa sit, syllogismus est ac dicitur affirmativus; si conclusio sit negativa, negativus.

ARTICULUS III.

De conclusionis rectitudine et veritate.

228. Rectitudo conclusionis consequentia continetur: recta enim est conclusio, si ex præmissis consequatur. Veritas autem ipsi convenit, quatenus in se spectatur et independentem a præmissis; est enim vera conclusio, ut quæcunque alia propositio, si subjecto tribuat vel neget prædicatum quod illi tribuendum vel negandum rei natura postulat.

Fieri potest, ut conclusio recta sit et simul falsa, ac vicissim ut sit vitiosa et nihilominus vera.

In hoc syllogismo:

Omne vitium est probrosum;

Patientia est vitium;

Ergo patientia est probrosa,

habetur rectitudo conclusionis, sed exsulat veritas. In hoc altero:

Omnis virtus est bona habenti;

Sanitas non est virtus;

Ergo sanitas est bona habenti,

habetur veritas, abest plane consequentia. In hoc postremo casu conclusio dicitur vera *per accidens*.

Potest etiam conclusio varios sensus habere (105), ita ut altero sensu accepta sit vera, altero falsa. Hinc potest conclusio distingui, et ex parte concedi, ex parte negari. At consequentia nunquam distinguitur; sed respectu illius

sensus secundum quem conclusio fluit a concessis, conceditur; secundum alterum negatur, quia ex concessis non fluit.

229. Quando in ratiocinio habetur consequentia, quod attinet ad propositionum quibus constat, veritatem vel falsitatem, sequentes canones statuuntur:

1^o *Ex vero antecedente non potest unquam colligi falsum consequens*. Nam si verum est antecedens syllogismi v. gr. affirmativi, verum est duo extrema convenire cum tertio; hoc enim in præmissis affirmatur; ergo non potest esse falsum, illa eadem extrema convenire inter se: quod affirmatur in conclusione. Simili modo concludes de syllogismo negante.

2^o *Si consequens sit falsum, præmissarum saltem unam falsam esse oportet*. Nam secus falsum sequeretur ex antecedente undequaque vero (1^o).

3^o *Ex falso antecedente tum falsum tum verum consequens erui potest*. Etenim si falsum est, v. gr. binas ideas cum tertia habere identitatem, potest esse falsum binas illas esse inter se identicas, et potest esse aliunde verum. In hoc postremo casu id quod dicitur in antecedente, non erit profecto ratio cur vera sit conclusio; erit tamen ejusmodi, ut si verum esset, rationis locum obtinere posset. En utriusque exemplum:

Omne animal est sensu præditum;

Arbor est animal;

Ergo arbor est sensu prædita.

Ex antecedente falso habes conclusionem falsam.

Omne animal est organis instructum;

Arbor est animal;

Ergo arbor est organis instructa.

Ex antecedente falso conclusio vera consequitur.

4^o *Igitur si consequens verum sit, non idcirco sequitur, esse quoque verum antecedens*. Potest enim esse verum, quia ex vero sequitur verum (1^o); et potest esse falsum, quia verum etiam ex falso consequi potest (3^o).

* 5^o *Quidquid stat cum antecedente, stat etiam cum consequente; non tamen e converso*. Prioris partis hic est sensus:

Si posito quod aliquid sit verum, manet verum antecedens, sub eadem suppositione consequens etiam verum maneat oportet, secus dicendum esset, posse aliquando reddi falsum consequens, servata antecedentis veritate; id quod quum consequentia recta est, in nulla unquam hypothese contingere potest; fieri enim nequit, ut ex antecedente vero recta deductione consequens falsum unquam colligatur (1°). Ex. gr. in hoc syllogismo:

Quod hominem perficit bonum est illi;

Virtus hominem perficit:

Ergo virtus bona est homini;

ex eo quod verum sit virtutem esse habitum, aut esse difficilem, nec majoris veritas destruitur, nec minoris; sed neque consequentis: virtus enim non cessat esse bona homini, licet sit habitus, vel sit difficilis.

Non tamen vera est hæc regula e converso; etenim si posito quod aliquid sit verum, manet verum consequens, non idcirco sequitur, quod verum manere debeat etiam antecedens; potest siquidem ex falso antecedente consequens verum educi (4°). In hac consequentia (3°):

Arbor est animal:

Ergo est organis instructa;

quoniam verum est plantam sensu carere, non idcirco monstratur falsum, eam organis instructam esse, quod dicitur in consequente: nihilominus falsum monstratur, eam esse animal, quod dicitur in antecedente.

* 6° *Quidquid repugnat consequenti, repugnat quoque antecedenti, non tamen e converso.* Nimirum: si posito quod aliquid sit verum, hoc destruit veritatem consequentis, destruit etiam veritatem antecedentis; non tamen e contrario ita statuere licet: si posito quod aliquid sit verum, hoc veritatem destruit antecedentis, destruit etiam consequentis veritatem. Ratio primæ partis est, quia secus in aliqua hypothese posset ex vero antecedente falsum consequens contrahi: ratio secundæ est, quia consequens verum potest quandoque haberi ex falso antecedente.

In hac ratiocinatione:

Omne vivens est mortale;

Spiritus est vivens:

Ergo spiritus est mortalis:

si spiritus est incorruptibilis, falsum est esse mortalem, adeoque falsa est major, qua assertitur omne vivens esse mortale.

Et in hac altera:

Omne corpus movetur;

Terra est corpus:

Ergo terra movetur;

quoniam verum est, quædam corpora quiescere, falsa est major, sed non idcirco sequitur falsam esse conclusionem.

* 7° Hinc sequitur effatum illud apud logicos celebre: *Ex contradictorio consequentis infertur contradictorium antecedentis quum bona est consequentia.* Etenim si contradictorium consequentis ponatur ut verum, consequens ipsum falsum esse debet (190, 1° c); quod si nihilominus antecedens maneret verum, jam aliquid repugnaret consequenti, quin repugnaret antecedenti, quod est impossibile (6°). Patet ex dictis effatum hoc e converso non valere.

ARTICULUS IV.

* *Regula generalis ad dignoscendam syllogismi simplicis rectitudinem.*

250. Ad dignoscendum utrum in syllogismo simplici consequentia habeatur, nec ne, regulæ quædam proponi solent, quas mox exponemus.

Prius tamen generalis quædam regula exponenda est, quam tradit auctor Artis cogitandi (1); præterquamquod enim est ad finem utilis, et sæpe partialibus illis utilior, exhibet etiam theorema pulcherrimum et scitu dignum.

Regula hæc est: *in syllogismo simplici habetur consequentia si altera præmissarum conclusionem contineat, altera declaret conclusionem in ea contineri.* Quæ regula ex ipsa ratiocinii na-

(1) Parte III, c. X.

tura ac syllogismi constructione facile deducitur et probatur.

231. Consideremus primo syllogismum affirmativum. In propositione majore (227) asserimus, medium terminum cum extremo majori identicum esse. Age nunc; si medius hic terminus cum extremo quoque minori esset identicus, jam in majori implicite assertum foret, extremum majus cum minori identicum esse; videlicet in majori contineretur conclusio. Restat igitur ut manifestum facias, medium terminum cum minori extremo identicum esse. Atqui hoc asseris in minori (227). Ergo revera in legitimo syllogismo affirmativo altera præmissarum conclusionem continet, altera hoc ipsum declarat. Si ergo in dato quovis syllogismo hoc sibi proprium munus præmissæ assequantur, syllogismus erit legitimus; quod si non præstent, syllogismus forma carebit.

Præmissa quæ conclusionem continet, appellatur *continens*; quæ declarat, *declarans* vel *applicans*. Non est autem necessarium, ut semper major consideretur ut continens et minor ut applicans; nam potest ex æquo minor ut continens haberi, et major ut applicans, quemadmodum patet ex præcedenti declaratione, quæ nullatenus efficacia sua destituitur, si loco majoris ponas minorem et vicissim. Tamen commodioris opportunitatis gratia, major plerumque consideratur ut continens, minor ut applicans.

Eadem methodo regulam demonstrabis quoad syllogismum negativum, si hæc duo animadverteris. Primo in omni syllogismo negativo alteram præmissarum esse negantem, quod deinceps probabitur: dein præmissam negantem, sive hæc major sit sive minor, spectari semper ut continentem, et alteram quæ affirmativa est, ut declarantem.

En exempla.

Quærat an legitima sit conclusio hujus syllogismi:

Aliquis pius christianus odio habetur;

Omnis pius christianus est bonus civis:

Ergo aliquis bonus civis odio habetur.

Conclusionem considerans, eamque conferens cum majori,

video conclusionem contineri in majori, si aliquis bonus civis inter pios christianos contineatur. Hoc autem asserit minor quum dicit: omnem pium christianum bonum civem esse (212, 1^o a). Ergo major continet conclusionem, et minor hoc declarat. Igitur legitima est argumentatio.

Idipsum quærat de hoc alio:

Tu non es quod ego sum;

Ego sum homo:

Ergo tu non es homo.

Conclusio contineretur in majori negante, si ego essem omnis homo (160, 2^o): hoc autem non affirmat minor, sed affirmat solum me esse aliquem hominem (158, 2^o). Ergo major conclusionem non continet: adeoque nulla consequentia est.

Sed jam ad partiales regulas veniamus.

ARTICULUS V.

Regulæ partiales syllogismi simplicis.

232. Hæ pariter regulæ ex ipsa syllogismi natura ortum habent. Octo sunt, et ex his, quatuor syllogismi terminos respiciunt, reliquæ propositiones. Omnes hisce versiculis, memoriæ juvandæ causa, consignatæ sunt:

- I. Tum re, tum sensu, triplex modo terminus esto.
- II. Æque ac præmissæ extendat conclusio voces.
- III. Nunquam contineat medium conclusio oportet.
- IV. Aut semel aut iterum medius generaliter esto.
- V. Ambæ affirmantes nequeunt generare negantem.
- VI. Utraque si præmissa neget, nihil inde sequetur.
- VII. Pejorem sequitur semper conclusio partem.
- VIII. Nil sequitur geminis ex particularibus unquam.

Aliquid breviter de singulis.

233. I^a regula post ea quæ diximus (222, 226), nulla eget declaratione. Si sunt termini plures quam tres, vel non fiet comparatio duorum extremorum cum eodem medio, vel non erit in conclusione id quod ex ejusmodi comparatione deduci debuit.

Possunt autem esse in syllogismo plures termini quam tres, tum aperte, tum latenter.

Aperte, ut in hoc:

Hispania est contigua Galliæ;

Gallia est contigua Sabaudia;

Ergo Hispania est contigua Sabaudia.

Etenim *Gallia* et *contigua Galliæ* sunt duo termini inter se diversi.

Latenter hoc vitium irrepere potest syllogismo pluribus modis. En præcipuos:

1° Quum terminus æquivocus usurpatur secundum diversas significationes quas habet; ut si quis dicat:

Omnis leo est animal;

Sed hæc statua est leo;

Ergo hæc statua est animal.

2° Quum idem terminus primo sumitur secundum suppositionem materialem, deinde secundum formalem (80), ut:

Cicero est vox trium syllabarum;

Cicero est orator eloquentissimus;

Ergo vox trium syllabarum est orator eloquentissimus.

3° Quum a suppositione logica fit transitus ad realem (81), ut si dicas:

Genus humanum est idea universalis;

Adam fuit parens generis humani;

Ergo Adam fuit parens ideæ universalis.

4° Quum idem terminus bis usurpatur disjunctive; nimirum secundum binas particulares partes extensionis suæ; hoc modo peccat sequens argumentatio:

Lupus est animal;

Agnus est animal;

Ergo agnus est lupus.

Missa facio cætera.

254. II^a regula vetat, ne extrema sibi vindicent in conclusione extensionem majorem ea quam in præmissis habuerint: quod accidit, quum terminus qui in præmissis non fuit distributive acceptus (85), distributive accipitur in conclusione. Ratio regulæ hæc est: si in præmissis unum extre-

morum particulare est, una tantum pars extensionis ejus cum medio termino inventa est identica; ergo concludas oportet, non secundum totam extensionem, sed secundum unam partem, extremum hoc cum altero identicum esse: secus conclusio plus continebit quam ex præmissis consequatur.

Duplex peccatum contra legem hanc vide in sequentibus exemplis.

Omnis latro est homo;

Omnis latro noctu ambulat:

Ergo omnis homo noctu ambulat.

Item:

Animal est sensitivum;

Lapis non est animal:

Ergo lapis non est sensitivus.

Secunda hæc conclusio est vera per accidens; sed quam sit absona consequentia, melius videbis mutata materia; v. gr. si loco termini, *sensitivum*, posueris *substantiam*, *corpus*, *ens*, etc.

255. III^a per se patet. In conclusione affirmari debet identitas vel discrepantia extremorum inter se, non autem medii termini cum uno alterove extremo: hoc enim fit in præmissis. Non potest igitur in conclusione medius terminus habere locum.

256. IV^a præcipit, ut medius terminus in præmissis sit saltem semel universalis, nempe distributive supponatur, et quidem distributione completa; nimirum pro omni re pro qua accipi potest (86, 1°). Secus esset terminus ille æquivalenter duplex: posset enim duas easque diversas extensionis suæ partes exhibere; quod si contingeret, jam extrema cum uno eodemque tertio non compararentur.

In hoc exemplo:

Aliquis homo ambulat;

Aliquis homo est mortuus:

Ergo aliquis mortuus ambulat,

medius terminus, *homo*, sumitur bis particulariter; in hoc autem:

Omne animal terrestre fuit conditum die sexto;

Canis meus est animal terrestre:

Ergo fuit conditus die sexto,

medius terminus, *animal terrestre*, sumitur quidem distributive in majori, sed non complete.

Postremo in hoc:

Omnes partes mundi æquant totum mundum;

Sed Europa est pars mundi:

Ergo æquat totum mundum,

medius terminus in majori sumitur collective, non distributive.

237. V, et VI, ex dictis initio hujus capitis (221, 2^o 1^o), sunt plane evidentes. Si ambæ præmissæ sunt affirmantes, bina extrema cum medio termino identica sunt; ergo in conclusione non diversitas extremorum inter se, sed identitas est affirmanda.

Si vero utraque præmissa fuerit negans, nec affirmativa nec negativa conclusio potest inde deduci: licet enim duo extrema a tertio discrepent, possunt inter se identica esse, possunt esse diversa, sed neutrum exinde probatur.

238. VII^a Pars pejor seu debilior in syllogismo vocatur a logicis præmissa negativa respectu affirmativæ, et particularis respectu universalis. Duo itaque hæc lex præcipit:

1^o Si altera præmissa fuerit affirmativa, altera negativa, conclusio negativa erit; cujus præcepti necessitas nemini ambigua esse potest. Si enim altera præmissa affirmans est, altera negans, unum extremum cum medio termino identicum est, alterum non. Ergo in conclusione extremorum inter se identitas neganda est (221, 3^o).

2^o Si altera præmissa fuerit particularis, altera universalis conclusio particularis existet.

Quod ut facilius intelligatur, fac paulisper, conclusionem non esse particularem, ut lex ista postulat, sed universalem; ac videamus quid inde sequatur.

Sint primo ambæ præmissæ affirmantes. Unus erit in iis terminus universalis, nempe subjectum propositionis universalis. Subjectum enim alterius præmissæ est particulare

(162); et prædicatum utriusque est pariter particulare ex natura affirmativæ propositionis (158 2^o). Conclusio affirmativa esse debet (237); et quoniam supponitur universalis, extremum minus erit terminus universalis. His præstitutis, locus ille unicus in præmissis, in quo est terminus universalis, vel occupatur a minori extremo vel secus. Si occupatur a minori extremo, medius terminus sumetur bis particulariter, contra id quod postulat lex IV^a. Si non occupatur a minori extremo, hoc latius patebit in conclusione universali quam in præmissis, adversus præceptum legis II^æ. Ergo consequentia in hac hypothesi erit semper vitiosa.

Sit nunc præmissarum altera affirmativa, altera negativa. Duo erunt in præmissis termini universales, nimirum subjectum præmissæ universalis, et prædicatum illius præmissæ quæ negativa ponitur. Conclusio ex dictis (1^o) erit negativa: extremum itaque majus erit terminus universalis. Ad hæc: si conclusionem esse universalem ponis, extremum quoque minus erit universale. Habes igitur in hac suppositione duos terminos universales, tum in conclusione, tum in præmissis. Hinc si bina extrema in præmissis locum sortiantur terminorum universalium, medius terminus bis erit particularis; si alterutrum ex iis locis occupet medius terminus, extremorum alterum erit particulare; adeoque latius in conclusione quam in præmissis patebit. Ergo in hac quoque hypothesi consequentia nulla erit.

In hac demonstratione supposuimus, prædicatum propositionis affirmativæ esse particulare, quemadmodum plerumque contingit. Quod si fuerit singulare aut æquivalens singulari (158), exceptio non repugnabit.

239. VIII^a Si ambæ præmissæ fuerint particulares, consequentia nulla erit. Nam istiusmodi præmissæ vel erunt ambæ affirmantes, vel altera affirmans, altera negans. Nequeunt enim esse ambæ negantes ex lege VI^a.

Sint 1^o ambæ affirmantes. Medius terminus non poterit universaliter accipi in harum propositionum subjecto, quia utriusque subjectum est particulare: non in prædicato, quia in propositionibus affirmativis prædicatum est particulare.

Ergo medius terminus in hujusmodi præmissis bis particulariter usurpabitur contra legem VI^m. Nulla ergo consequentia, ut in hoc syllogismo:

Quædam virtutes sunt gratæ hominibus;
Quædam grata hominibus displicent Deo:
Ergo quædam virtutes displicent Deo.

Sit 2^o altera præmissa affirmans, altera negans. In his unus tantum terminus erit universalis; nimirum is qui prædicati locum tenet in propositione negante: cæteri erunt particulares (1^o). Conclusio autem negativa erit, ut patet ex lege VII^a. Igitur in conclusione extremum majus universale erit.

Jam universalis prædicati locus in præmissa negante vel occupatur a medio termino vel non. Si occupatur a medio termino, bina extrema sumuntur in præmissis particulariter. Sed majus extremum in conclusione universim sumitur. Ergo si locus ille a medio termino occupatur, extremum majus in conclusione patebit latius quam in præmissis. Si vero prædicati locus in præmissa negante non occupatur a medio termino, medius terminus bis particulariter usurpabitur. In utroque casu nulla est consequentia. Ergo. Vide regulam in exemplo:

Aliquis homo non est rapax;
Aliquis latro est homo:
Ergo aliquis latro non est rapax.

Exceptiones suo loco considerabuntur.

ARTICULUS VI.

Difficultates quædam enodantur.

240. 1^o Hic syllogismus:

Omne animal rationale est homo;
Aliquis homo agit irrationabiliter:

Ergo aliquod animal rationale agit irrationabiliter,
 rite videtur concludere, et tamen medius terminus *homo* sumitur bis particulariter contra legem IV^m.

Respondeo, concludit per accidens (228); nimirum non vi formæ, sed materiæ; quia nullum aliud animal rationale

est præter hominem. Quod non concludat vi formæ patebit, si materiâ mutaveris, v. gr. in hunc modum:

Omne animal rationale est substantia;
Aliqua substantia caret ratione:
Ergo aliquod animal rationale caret ratione.

2^o In sequenti syllogismo evidenter concludente, binæ præmissæ sunt negativæ:

Quod non est compositum non est divisibile;
Anima humana non est composita:
Ergo anima humana non est divisibilis.

Resp. Medius terminus in hoc syllogismo hic est: *quod non est compositum*, qui, ut vides, negationem continet. Debet autem idem medius terminus in utraque inveniri præmissa. Sed hic medius terminus negativus non invenietur in minori allati argumenti, nisi ea sic exponatur:

Anima humana est aliquid quod non est compositum.
 Quare minor allati argumenti est affirmativa.

3^o In sequenti ratiocinio majus extremum latius patet in conclusione quam in præmissis, et nihilominus consequentia negari nequit.

Solus Deus est æternus;
Mundus non est Deus:
Ergo mundus non est æternus.

Resp. Propositio major est exclusiva: æquivalet ergo duabus (175), quarum altera affirmans est, altera negans. Sed argumenti allati vis in negante propositione constituitur. Sic ergo sunt exponendæ præmissæ:

Omne quod non est Deus, non est æternum;
Mundus est aliquid quod non est Deus:
Ergo mundus non est æternus.

Major itaque etsi affirmans videatur, re tamen est negativa ut conclusio, adeoque extremum majus non latius in hac, quam in illa accipitur. Minor vero, quæ videbatur negans, est revera affirmans (2^o).

4^o Sit iste syllogismus:

Tullius patriam servavit;
Tullius mittitur in exilium:
Ergo qui patriam servavit mittitur in exilium.

Estne recta conclusio isthæc?

Resp. Est recta, quia medius terminus, *Tullius*, cum sit singularis, sumitur semper secundum totam extensionem, adeoque æquivalet universali.

5º In hoc qui sequitur, habes binas præmissas particulares; non tamen videtur abesse consequentia.

Aliquis homo est medicus;

Aliquis medicus est Galenus;

Ergo aliquis homo est Galenus.

Resp. Concludit per accidens, ut liquet mutata materia sic:

Aliquis homo est animal;

Aliquod animal est Bucephalus;

Ergo aliquis homo est Bucephalus.

6º Idem dicendum de hoc alio:

Quædam animantes sunt quadrupedes;

Quædam quadrupedes sunt ruminantes;

Ergo quædam animantes sunt ruminantes,

qui vi formæ non magis concludit quam iste:

Quædam animantes sunt pulchræ;

Quædam pulchra sunt palatia;

Ergo quædam animantes sunt palatia.

Sed primus concludit ratione materiæ: nam quemadmodum dicis: *quædam animantes sunt quadrupedes*, ita dicere potest: *omnes quadrupedes sunt animantes*. Hujusmodi syllogismi, qui conversione aliqua egent aut aliquo alio artificio, ut ad legitimam formam revocentur, *cryptici* a Wolfio nuncupantur (1).

7º De sequenti quid dicendum?

Aliquis apostolus est Judas;

Aliquis proditor est Judas;

Ergo aliquis apostolus est proditor.

Resp. Est syllogismus expositivus, in quo legitima quandoque est conclusio ex duabus particularibus, ut infra dicetur.

8º Ratiocinandi modus qui sequitur, alique multi huic

(1) *Log.*, part. I, § 385.

similes, frequentissimi sunt apud mathematicos, et tamen ex duabus præmissis particularibus constari videntur.

Quidam numeri simul additi æquant numerum 16:

Quidam numeri simul multiplicati æquant numerum 16;

Ergo quidam numeri simul additi æquant quosdam numeros simul multiplicatos.

Resp. In hoc et similibus deest major, quæ hoc principio continetur: *quæ sunt æqualia uni tertio, sunt æqualia inter se.*

Quare syllogismus integer sic construitur:

Quæ sunt æqualia uni tertio, sunt æqualia inter se;

Sed quidam numeri simul additi, et quidam numeri simul multiplicati sunt æquales uni tertio, nempe numero 16:

Ergo quidam numeri simul additi, et quidam numeri simul multiplicati sunt æquales inter se.

Quæ supersunt difficultates, suis locis.

CAPUT II.

DE FORMULIS GENERALIBUS SYLLOGISMI SIMPLICIS.

ARTICULUS I.

De figuris syllogismi.

241. Tractatio quæ sequitur, ratiocinii analysim absolvit; qua de re merito a Galluppi (1) *ratiocinii algebra* appellata est. Exponit enim brevibus formulis modos omnes, secundum quos legitima ratiocinatio variari potest. Debentur hæc Aristoteli (2), eaque semper magni fecit veterum omnium sapientia. Sed post Lockium, et postremo præsertim labente sæculo, a multis despectui habita sunt, qui nescio quomodo geometriam universamque mathesim, imo quidquid in scientiis humanis accuratum ac minutum est, non despexerint. Certe non ex eo solum, quod quis figuras modosque omnes syllogisticæ formæ memoria teneat, polliceri sibi poterit, se ab errore semper immunem fore. Nihilominus et illud verum est, quod asserere non dubitavit Leibnitzius, in hac

(1) *Lezione di Log. e Met.*, lez. LI.

(2) *Prior Analyt.*, lib. I, cap. IV, seq.

quasi universali quadam mathesi *artem quamdam infallibilitatis contineri, si tamen quis et sciat, et possit illa recte uti, quod utique non semper licet* (1). Quantum præterea syllogisticae artis ampla cognitio et pertinax exercitatio, et ad mentis rectitudinem juvat, et criticae sagacitatem exacuit, et in expendendis sive propriis ratiocinationibus sive alienis attentum animum atque acrem facit ! Sed his omissis, « si ei qui » in rebus philosophicis non vulgariter sapiat, ita præclare » Galluppius, hoc proponatur problema: determinare a » priori ex natura ipsa ratiocinii diversas formas cogitationis, quotquot possibiles sunt in eo intellectuali actu, qui » facit ut homo sit ens rationale ; si hoc inquam problema » illi proponatur, fieri ne poterit, ut non in hoc sublimem » quamdam inquisitionem ipse sentiat adesse ?... Nonne » veritas, ut et pulchritudo, intrinsecum suum habet pretium, quod non potest ratio non maximi facere (2) ? » Hæc ille sapienter ; et hæc impugnatoribus, si qui adhuc existant, puto, satisfaciunt. Cæterum æquiora sunt nostra tempora: lockiana doctrinæ jam consenuerunt, frigescent nobis sensistarum dicteria et sales, reidianæ scholæ facilitas non sapit amplius, ac mirum jam videtur exstitisse olim hominēs, qui se philosophos jactarent, et nihilominus in syllogismum inveharentur. Profecto ii omnes, qui nostra hac ætate studiosius de logica pertractarunt, ea omnia quæ veteres de figuris modisque syllogismorum tradere consueverant, diligentissime persecuti sunt (3).

242. Generale syllogismi artificium, ut supra docuimus, continetur comparatione extremorum cum tertio, ut extremorum inter se identitas vel diversitas deducatur. Unde fit, ut in quovis syllogismo binæ sint præmissæ, in quibus medius terminus cum uno extremo conjungitur, cum altero conjungitur vel separatur. Ex natura porro syllogismi non determinatur, quem locum in utraque præmissa occupare

(1) *Nouveaux essais sur l'entendement humain*, livre IV, chap. XVII.

(2) *Lez. LXI.*

(3) Vide inter cæteros Galluppi, *lez. L, seq.* — Rosmini, *Log.*, lib. II, sez. II, cap. VI, c. VII. — Balmès, *Corso di Filosofia elementare*: Logica, lib. II, cap. V, sez. IV. — Gratry, *Logique*, tom. I, liv. III, ch. III.

debeat medius terminus, subjectine an prædicati ; potest enim, integra manente forma, utrumlibet occupare. Jam ex diversa hac medii termini collocatione figuræ syllogismi oriuntur. Id enim quod syllogismi figura dicitur, est *medii termini cum extremis apta ad concludendum dispositio*.

Potest autem medius terminus cum extremis quatuor modis apte ad concludendum disponi ; et exinde quatuor syllogismi figuræ.

1º Potest medius terminus esse subjectum in majori, prædicatum in minori. Hæc est prima figura, cujus en exemplum :

Fratres sunt diligendi ;

Inimici sunt fratres :

Ergo inimici sunt diligendi.

2º Potest esse tum in majori tum in minori prædicatum. Hæc est secunda figura.

Corpus non cogitat ;

Mens cogitat :

Ergo mens non est corpus.

3º Potest in utraque præmissa esse subjectum. Hæc est figura tertia.

Omnes impii sunt miseri ;

Quidam impii sunt potentes :

Ergo quidam potentes sunt miseri.

4º Postremo potest esse prædicatum in majori, subjectum in minori. Hæc est figura quarta, quæ *galenica* nuncupatur ; quia a Galeno, ut fertur, tribus præcedentibus addita fuit. Hanc tamen veterum plerique non distinguebant a prima, sed hujus figuræ syllogismos considerabant tanquam primæ figuræ syllogismos conclusionē conversā. Quæstionem hanc dirimere non vacat, nec ut dirimamus, est necessarium. Vide si libet *Artem cogitandi* (1). En exemplum :

Aliqua propositio quæ non demonstratur, est evidens veritas ;

Omnis evidens veritas est admittenda :

(1) Parte III, c. IV.

Ergo aliqua admittenda est propositio quæ non demonstratur.

* 243. Sequuntur regulæ quædam cujusque figuræ propriæ, quæ ex communibus syllogismi legibus, et ex cujusque figuræ indole facile deducuntur.

1^o In prima figura

a) Minor debet esse affirmativa. Si enim negativa fuerit, etiam conclusio negativa erit ex lege VII^a. : ergo majus extremum erit in conclusione universale (160), 2^o : ergo vel major quoque negativa esse debet, vel majus extremum latius patebit in conclusione quam in majori. In utroque casu nulla consequentia. Ergo.

b) Major debet esse universalis. Nam cum minor sit affirmativa, medius terminus, qui in minori prædicati locum sortitur, est terminus particularis. Debet ergo sumi universaliter in majori ex lege IV^a. Sed cum in majori medius terminus sit subjectum, si universaliter sumatur, propositionem faciet universalem. Ergo.

2^o In secunda figura

a) Alterutra præmissa negativa esse debet. Nam medius terminus, qui est in utraque prædicatum, erit bis particularis, si utraque fuerit affirmativa.

b) Major debet esse universalis. Nam conclusio est negativa (a; lex VII^a.), ergo majus extremum universale: hoc idem est in majori subjectum. Ergo.

3^o In tertia figura

a) Minor debet esse affirmativa. Eadem est demonstratio ac in prima figura (1^o a).

b) Conclusio debet esse particularis. Nam in minori affirmativa minus extremum, quod in ea prædicatur, est particulare. Ergo et in conclusione particulare sit oportet; adeoque ipsa conclusio erit particularis.

4^o In quarta figura

a) Quando major est affirmativa, minor nunquam non erit universalis.

b) Quando minor est affirmativa, conclusio erit semper particularis.

c) In modis negativis major erit semper universalis.

Hæc tria præcepta simili fere ratione demonstrantur ac in superioribus figuris.

ARTICULUS II.

De singularum figurarum modis.

244. Ut conclusio recta sit, terminorum dispositio opportuna, seu figura apta non sufficit; at necesse quoque est, quemadmodum ex syllogismi regulis apparet, ut et quantitatis et qualitatis propositionum ratio habeatur. Hinc diversarum figurarum modi existunt. Dicitur enim in syllogismo modus: *præmissarum ad conclusionem colligendam apta secundum quantitatem et qualitatem complicatio.*

Quantitas simul et qualitas propositionum exhibetur a logicis (189) per litteras:

A, E, I, O.

Igitur tot erunt syllogismi in universum possibiles modi, quot ternariæ combinationes ex quatuor elementis oriri possunt. Hæ autem sunt *quatuor et sexaginta*. Totidem igitur sunt possibiles syllogismi modi. Sed syllogismi regulæ respiciunt ex his modis *tres et quinquaginta*, ut singulos percurrenti patebit: unus insuper (AEO) est inutilis. Restant igitur modi *decem*, quorum quatuor sunt affirmantes,

AAA, AII, AAI, IAI;

sex negantes,

EAE, AEE, EAO, AOO, OAO, EIO.

Quapropter si omnes hi modi in singulis figuris locum obtinere possent, exurgerent genera syllogismorum *quadraginta*. At leges cujusque figuræ propriæ prohibent, quominus illi omnes modi in singulis figuris locum habeant; aliquos duntaxat admittunt, quos recensemus.

* 245. 1^o Prima figura quatuor tantum modos recipit, saltem directos: qui per has formulas exhibentur:

AAA, EAE, AII, EIO;

iique memoriæ juvandæ gratia his vocibus alligati sunt,

Barbara, Celarent, Darii, Ferio (1).

(1) Si quis hujusmodi artificium spernat fastidiatque, audiat quæ scribit auctor

His modis qui proprie ad primam figuram pertinent, alios quinque vulgo veteres addebant, qui quartam figuram non agnoscebant, eosque modos primæ indirectos appellabant (151, 242, 4°); sunt autem:

AAI, EAE, AII, AEO, IEO (1),

hisque vocibus comprehenduntur,

Baralippton, Celantes, Dabitis, Fapesmo, Frisesomorum.

2° Secunda figura quatuor modos admittit, omnesque negativos:

EAE, AEE, EIO, AOO,

Cesare, Camestres, Festino, Baroco.

3° Tertia ad sex usque modos habet, omnesque conclusionem particulari:

AAI, AII, IAI, EAO, EIO, OAO,

Darapti, Datisi, Disamis, Felapton, Ferison, Bocardo.

4° Quarta figura, ut a prima distinguitur, quinque modos continet:

AAI, IAI, EAO, AEE, EIO,

Baralippton, Dimatis, Fesapo, Camentes, Frisesonorum.

Qui tamen adeo dure contortequē concludunt, ut negligi impune possint (2).

Artis cogitandi (Dissertat. I, proœmiali). « Insuper habendam duximus illorum » nauseam, qui auditis illis terminis, quos ars efformavit ad argumentationum » modos altius memorie infigendos, non aliter inhorrescunt quam ad magorum » incantationes: quique de Baroco et Baralippton satis frigide jocantur, tanquam » horum usus apud illos tantum sciolos vigeret, quos Galli pedantes dicunt. Nos » tamen plus offendimus in ineptis illis jocis quam in technicis istis terminis. Vera » enim ratio ac sana mens nequaquam sinunt, ut id pro ridiculo habeamus, quod » ridiculum non est. Ridiculi autem in his terminis nihil est, modo nulla in illis » arcana esse fateamur, et cum ad memoriam tantum sublevandam sint excogita- » ti, ab illis in communi sermone abstinemus; risu enim dignus esset, qui ar- » gumentaturus argumentaturum se in *Bocardo* vel *Felapton* pronuntiaret. »

(1) Hic modus ex se non concluderet, quia peccat contra legem syllogismorum II. Eatenus ergo a veteribus admittebatur inter modos indirectos, quatenus in hisce modis conclusio naturalis censebatur conversa. Qua conversione posita, jam E est vera major, et I minor: proinde hic modus recidit in EIO.

(2) Omnes enumerati modi his versibus comprehensi sunt:

1. Barbara, Celarent, Darii, Ferio, Baralippton, Celantes, Dabitis, Fapesmo, Frisesomorum,
2. Cesare, Camestres, Festino, Baroco, 3 Darapti, Felapton, Disamis, Datisi, Bocardo, Ferison.

* 246. Notanda. 1° Syllogismus expositivus (229) in secunda figura præter communes modos, alios quatuor habet eosque affirmantes, quorum primus ex utraque præmissa universali conclusionem universalem colligit; secundus ex majori universali et minori particulari concludit particularem; tertius ex majori particulari et minori universali concludit universalem; quartus, qui magis notandus est, ex utraque particulari concludit particularem (240, 7°).

2° Prima figura merito dicitur omnium perfectissima, id quod ex dictis fit manifestum. Etenim a) consequentia in ea est plane evidens, nec opus est ut ullo modo demonstretur aut declaretur necessitas ponendæ conclusionis positæ præmissis; immediate enim patet: b) medius terminus naturalem sibi locum occupat inter extrema; subjicitur enim uni, et prædicatur de altero, videlicet in uno continetur, et continet alterum: c) omnis conclusio potest per aliquem primæ figuræ syllogismum probari, cum per secundam solæ negativæ per tertiam solæ particulares demonstrantur.

3° Syllogismi primæ figuræ, ac præterea omnes expositivii syllogismi *perfecti* ac per se evidentes a veteribus appellabantur; cæterarum vero figurarum syllogismi, *imperfecti* et demonstrabiles.

ARTICULUS III.

* De principiis cujusque figuræ propriis.

247. Medius syllogismi terminus vel consideratur quatenus est res, et secundum extensionem qua sumitur in propositione, vel quatenus est idea quæ inferiora sua sub se continet, secundum extensionem quam per se habet. Si primo modo consideretur, est semper objective identicus cum extremis, vel identicus cum uno et diversus ab altero. Si vero consideretur altero modo, potest extensio ideæ mediæ major esse vel minor extensione idearum quibuscum conjungitur; ita ut vel contineat objectum illarum, vel aliquid ab illis contentum exhibeat: potest item respici, ut excludens extremum a quo separatur, vel ut exclusum ab illo.

Et hinc fit, ut in syllogismi præmissis aliquando medius terminus locum obtineat prædicati, aliquando subjecti : quando enim continet unum extremum vel respicitur ut excludens, prædicatur ; quando vero continetur ab uno extremorum vel respicitur ut exclusus, subjicitur (159, 161). Varia igitur medii termini in præmissis collocatio pendet a varia habitudine continentis vel contenti, excludentis vel exclusi, qua medius terminus ad extrema refertur. Quare varietas etiam figurarum ab hac habitudine pendet. Ex quo sequitur alia ratio deducendi immediate omnes omnium figurarum modos, enumerando videlicet relationes omnes possibiles continentis et contenti, excludentis et exclusi, quas medius terminus ad extrema habere potest. Sed hoc omisso, alium ex facta animadversione fructum colligere intendimus, ut nempe facile inveniamus principia, quæ figuras singulas earumque modos determinant.

248. 1^o Si vocetur S extremum minus, P extremum majus, M medius terminus, syllogismi affirmativi primæ figuræ hac formula exhiberi possunt.

M est in P ;

S est in M ;

Ergo S est in P.

Nimirum P includit S, quia includit M, in quo est S. Ex quo erues statim principium simplicissimum, quod hanc terminorum dispositionem determinat, videlicet :

Id quod includit continens, includit et contentum in eo.

Negativi ejusdem figuræ modi hac formula continentur :

M non est in P ;

S est in M ;

Ergo S non est in P.

Nimirum P excludit S, quia excludit M, in quo est S. Ubi statim deprehendis hoc aliud principium :

Id quod excludit continens, excludit et contentum in eo.

Hæc duo principia sunt plane evidentiæ : et ex hoc intelligitur, cur in prima figura adeo evidens sit consequentia. Intelligitur quoque, cur prima figura sit omnium maxime naturalis. Ut enim probes unum in altero contineri, nullum

magis obvium artificium est, quam si invenias tertium, quod contineat primum et contineatur ab altero : item ut probetur unum excludi ab altero, sponte adducis ad quærendum tertium, quod contineat primum et ab altero excludatur.

249. Aristoteles (1), et qui eum secuti sunt veteres, syllogismis primæ figuræ duo illa vulgatissima assignabant principia : *dictum de omni*, et *dictum de nullo*. Nimirum pro syllogismis affirmantibus : *Quidquid universe affirmatur de aliquo subjecto, affirmatur de quovis contento sub ejusmodi subjecto* ; et pro negantibus : *quidquid universe negatur de subjecto, negatur de quovis contento sub ejusmodi subjecto*. Hæc porro principia ab iis quæ sunt nuper allata, vocibus quidem quadantenus discrepant, at re nequaquam : quod statim intelliges, si animadverteris, *affirmari de subjecto* perinde esse ac *includere illud* : et *affirmari de subjecto universe*, idem esse ac *includere continens aliud* : *negari item de aliquo*, idem ac *excludere illud* (247). Nos autem primam formam alteri præoptavimus, quia congener est aliarum figurarum principiis, quæ mox exponentur (2).

250. 2^o Modi secundæ figuræ, qui majorem habent nega-

(1) Prior Analyt., lib. I, c. I.

(2) Ex his et sequentibus patet, principia illa, *dictum de omni*, et *dictum de nullo*, ad primam solum syllogismorum figuram pertinere : cæteris enim figuris aptari non possunt. Nihilominus ab Aristotele et veteribus tanquam omnium syllogismorum regula habebantur, sed ideo solum quod cæteræ figuræ ad primam variis artificiis reduci possunt, ut infra exponemus. Certum est igitur, ea non esse principia fundamentalia syllogismi in genere, in quibus omnia ratiocinia immediate fundentur. Principia universalis syllogismi, quæ ipsa ratiocinii essentia et natura suppediat nullo ad figurarum discrimen habito respectu, ea sunt quæ supra (221, 2^o 3^o) statuimus, principia nempe identitatis et discrepantie ; quorum ope communes syllogismi regulæ demonstrantur. Hoc et veteribus notissimum erat, quemadmodum testis est v. g. Suarez (Met. Disp. I, sect. IV, § 28), qui inter principia in quibus omnis recta forma argumentandi nititur, ponit hoc : *quæ sunt eadem uni tertio, sunt eadem inter se*, et Goudin (Log. min., p. III, art. III), qui vocat principia hæc, *universalis principia artis syllogisticæ*. Cf. quoque S. Thomæ Opusc. XLVII, in quo his principiis passim utitur ad probandas syllogismi regulas. Sed certe sunt recte intelligenda hæc principia, et recte applicanda ; quod quia difficilius est, et analysim subtiliorem postulat, idcirco fortasse a veteribus plerisque, qui in summis suis de expressione solummodo ratiocinii, non de ratiocinio disputabant, non adhibebantur.

tivam (designantur vocibus *Cesare* et *Festino*), hac formula exhibentur :

P non est in M ;
S est in M ;
Ergo S non est in P.

Ex hac habebis principium sequens :

Id quod non continetur in alio, nec continet illud, non continet inclusum in illo.

Cæteri duo modi, qui majorem habent affirmantem (*Camestres* et *Baroco*), sunt hujusmodi :

P est in M ;
S non est in M ;
Ergo S non est in P.

Unde principium hoc erues :

Quod continetur in alio, non continet exclusum ab illo, neque in eo continetur.

Quæ duo principia, quemadmodum et ea quæ sequuntur, sunt quidem evidentia ; indigent tamen aliqua reflexione, ut eorum evidentia animum attingat.

251. 3^o In tertia figura modi affirmativi (*Darapti*, *Disamis*, *Datisi*) sic exhibentur :

M est in P ;
M est in S ;
Ergo aliquod S est in P.

En tibi principium :

Quod includit in alio contentum, includit aliquam continentis partem (eam nempe quæ continet illud).

Ejusdem figuræ modi negativi huc redeunt :

M non est in P ;
M est in S ;
Ergo aliquod S non est in P.

Exinde educes principium :

Quod excludit in alio contentum, excludit aliquam continentis partem (eam nempe quæ continet illud).

Idem fieri posset de quartæ figuræ modis ; sed in re implexa, ac nullius fere frugis non vacat immorari.

252. Hæc igitur sunt principia, quæ eruimus :

1 ^a	}	Quod includit continens, includit et contentum in eo.
fig ^a .		Quod excludit continens, excludit et contentum in eo.
2 ^a	}	Quod non continetur in alio, nec continet illud, non continet inclusum in illo.
fig ^a .		Quod continetur in alio, non continet exclusum ab illo, neque in eo continetur.
3 ^a	}	Quod includit in alio contentum, includit aliquam continentis partem.
fig ^a .		Quod excludit in alio contentum, excludit aliquam continentis partem.

Quæ et simplicitate sua, et oppositionum elegantia placent, et, ideo etiam quod ab uno hoc principio omnia derivantur :

Contentum in alio est in ipso, ubicunque sit contentum vel continens.

Ad hæc porro quæ de his principiis diximus, reducitur quidquid utile est in iis, quæ de ratione inveniendi medii veteres tradere solebant.

ARTICULUS IV.

* *De imperfectorum syllogismorum demonstratione juxta veteres.*

253. Cum omnes syllogismi, cujuscunque sint figuræ ac modi, evidentibus principiis innitantur, uti modo ostendimus, pressiori demonstratione revera non egent: non enim potest non recte concludi, quod vi talium principiorum concluditur. Nihilominus Aristoteles, qui primæ solum figuræ principia assignavit, cæterarum consequentiam figurarum non per principia propria, sed per reductionem ad perfectos syllogismos ac per se evidentes probandam putavit. Et in hunc finem triplicem methodum proposuit; nempe probationem *directam*, probationem *indirectam*, et per *expositionem*, de quibus aliquid dicere non piget, saltem ex eo quod pulchra continent theoremata, et uberem logicæ studio-sis exercitationum materiam suppeditant, quemadmodum iis qui algebræ navant operam, formularum reductiones, et æquationum transformationes.

254. Probatio *directa* quæ et *ostensiva* dicitur, fit quum

conversione et transpositione propositionum syllogismus imperfectus ad syllogismum primæ figuræ reducitur.

Ut porro hæc reductio rite fiat, tria innotescere debent: 1° ad quem modum primæ figuræ datus syllogismus reducendus sit: 2° quæ propositiones sint convertendæ: 3° quæ transponendæ. Hæc autem omnia aperiunt voces illæ technicæ, quibus varii syllogismorum repræsentantur modi (245); quemadmodum enim vocales litteræ quæ in iis sunt, propositionum quantitatem et qualitatem significant, ita consonæ ostendunt quid præstandum sit, ut syllogismus ad primam figuram reducat.

1° Litteræ B, C, D, F, a quibus vocabula hæc incipiunt, ostendunt ad quem modum primæ figuræ sit reducendus syllogismus. Sic v. gr. syllogismus in *Cesare* reducitur ad *Celarent*; syllogismi in *Darapti* vel *Datisti* ad *Darii* etc.

2° Quænam propositiones sint convertendæ, ostenditur litteris S et P. Littera S significat, enuntiationem quam repræsentat vocalis antecedens, esse convertendam simpliciter, P convertendam esse per accidens (242): v. gr. ut reducatur syllogismus in *Festino*, debet converti simpliciter major: ut reducatur syllogismus in *Darapti*, debet converti minor per accidens.

3° Littera M ostendit, ubicunque sit, præmissas esse loco mutandas, ita ut quæ est major, ponatur loco minoris, et minor loco majoris. Hæc transpositio obtinet v. gr. in modis *Camestres* et *Disamis*.

4° Littera C in medio vocabuli posita, indicio est, syllogismum non posse reduci directe, sed solum indirecte. Tales sunt syllogismi in *Baroco* et *Bocardo*.

255. Dato igitur syllogismo, ut hic reducat, quærendum primo ad quam figuram pertineat; quod monstrabit medii termini collocatio; deinde ad quem modum; quod innotescet ex propositionum quantitate et qualitate. Sic invenietur vocabulum quo datus syllogismus repræsentatur, et ex eo discemus quæ agenda sint, ut reductio fiat. Rem satis illustrabit unum exemplum aut alterum. Syllogismus iste:

Corpus non cogitat;

Mens cogitat:

Ergo mens non est corpus,

est secundæ figuræ in *Cesare*; reducitur igitur ad *Celarent*, simplici conversione majoris, in hunc modum:

Quod cogitat non est corpus;

Mens cogitat:

Ergo mens non est corpus.

Hic alter:

Quidam scelesti sunt potentes;

Omnes scelesti sunt miserrimi:

Ergo quidam miserrimi sunt potentes,

est syllogismus tertiæ figuræ in *Disamis*; reducendus igitur ad *Darii* quod fiet convertendo simpliciter majorem et consequens, et commutando præmissas:

Omnes scelesti sunt miserrimi;

Quidam potentes sunt scelesti:

Ergo quidam potentes sunt miserrimi.

256. Probatio *indirecta*, videlicet *par deductionem ad impossibile*, fit cogendo adversarium ad admittendum absurdum, nimirum duas contradictorias esse simul veras, si nolit admittere syllogismi dati consequentiam.

Quum quis negat consequentiam, is statuit posse concedi majorem et minorem, ac negari conclusionem (229, 1°); seu, quod idem est, conclusionis contradictoriam tanquam veram assumi posse.

Igitur ad eum revincendum, assumitur conclusionis contradictoria, et simul una ex præmissis ab adversario concessis. Ex his duabus enuntiationibus consequitur, et quidem per syllogismum primæ figuræ, contradictoria præmissæ alterius, quam pariter adversarius concessit; sequitur autem vi ejus principii: *Ex contradictorio consequentis sequitur contradictorium antecedentis, si bona fuerit illatio* (229, 7°). Hoc pacto fit, ut adversarius, si negat dati syllogismi consequentiam, cogatur admittere duo simul contradictoria esse vera.

Omnes imperfecti syllogismi hoc modo probari possunt, sed hæc probatio non fit cum utilitate, nisi in modis desi-

gnatis per voces *Baroco* et *Bocardo*, in quibus probatio directa adhiberi non potest. Advertendum porro est, quod quum tali modo probatur syllogismus in *Baroco*, retinetur major præmissa suo loco, contradictoria conclusionis ponitur loco minoris, et in conclusione deducitur contradictoria minoris; quum vero probatur in *Bocardo*, contradictoria conclusionis ponitur loco majoris, servatur minor, et sequitur in conclusione contradictoria majoris. En exempla:

Omnis virtus est juxta rationem;

Quædam æmulatio non est juxta rationem:

Ergo quædam æmulatio non est virtus.

Est in *Baroco*. Contradictoria conclusionis est hæc:

Omnis æmulatio est virtus.

Retine majorem, et hanc contradictoriam pone loco minoris, habebis:

Omnis virtus est juxta rationem;

Omnis æmulatio est virtus:

Ergo omnis æmulatio est juxta rationem,
quæ est contradictoria minoris concessæ:

Quædam æmulatio non est juxta rationem.

Aliud exemplum in *Bocardo*.

Quædam ira non est reprehensibilis;

Omnis ira est passio:

Ergo quædam passio non est reprehensibilis.

Contradictoria conclusionis:

Omnis passio est reprehensibilis,

ponatur loco majoris, servetur minor, et sequetur in conclusione contradictoria majoris:

Omnis passio est reprehensibilis;

Omnis ira est passio:

Ergo omnis ira est reprehensibilis.

257. Aliquid et de probatione *per expositionem*. Hoc probationis genere confirmantur syllogismi tertiæ figuræ, qui conclusionem habent particularem. Fit autem convertendo syllogismum in expository (226); videlicet sumendo intra medii termini extensionem aliquid singulare, cujus ratione vera sit præmissa particularis. Hæc probandi ratio et vulgo

adhibetur, natura duce, et in docendo sæpe utilis est. Ut plene intelligatur satis est exemplum subdere:

Aliquis, qui malam mortem obiit, miracula fecit;

Omnis qui malam mortem obiit perditus est:

Ergo aliquis, qui miracula fecit, perditus est.

Ut necessitatem hujus consecutionis expositione demonstrarem, sumo intra medium terminum: *qui malam mortem obiit*, v. gr. *Judam*, cujus ratione vere dicitur: *aliquem qui malam mortem obiit miracula fecisse*; et expository syllogismum in hunc modum construo:

Judas miracula fecit;

Judas perditus est:

Ergo aliquis, qui miracula fecit, perditus est.

Et hæc sufficiant.

CAPUT III.

DE SYLLOGISMIS PROPOSITIONEM COMPOSITAM CONTINENTIBUS.

ARTICULUS I.

Notanda quædam.

258. Potest in syllogismo inveniri propositio composita tum categorica, tum hypothetica (170). Si propositio sit categorica, syllogismus nec peculiare nomen, nec præcepta sibi propria vindicat, sed in simplicem recidit artificio et regulis. Tantum aliquid de quibusdam animadvertendum est.

1º Quandoque per unum medium terminum, unum de pluribus infertur vel plura de uno: quandoque per medium terminum multiplicem unum infertur de altero: quandoque etiam et medius terminus est multiplex, et multiplex illatio. In his casibus, aliquando erunt in syllogismo tres copulativæ, aliquando binæ, ut in hoc:

Omnis homo probus horret fraudem et injustitiam;

Sed defensor injustæ causæ fraudem et injustitiam non horret:

Ergo defensor injustæ causæ non est homo probus.

Aliquando una tantum, ut in sequenti, in quo sola minor est copulativa:

*Qui dives est et pecunia non utitur, est similis pauperi ;
Avarus dives est et pecunia non utitur :
Ergo avarus est similis pauperi.*

In hoc postremo casu non potest syllogismus resolvi in duos, quemadmodum resolvi potest syllogismus antecedens.

Hæc quæ diximus de propositione copulativa, dici quoque debent de adversativa.

2º Syllogismus qui relativa propositione (168) constet, a simplicis syllogismi regulis discordare videtur; adeoque aliqua eget reductione: v. gr. si dicas :

Ubi est thesaurus tuus, ibi est et cor tuum;

Sed thesaurus tuus est in cælo :

Ergo cor tuum est in cælo,

videntur esse plus quam tres termini; sed cessabit omnis difficultas, si syllogismus ita exponatur :

Locus in quo est thesaurus tuus, est locus in quo est cor tuum;

Sed locus in quo est thesaurus tuus, est cælum :

Ergo locus in quo est cor tuum, est cælum.

3º Causalis propositio semper syllogismum continet. In hac v. gr.

Egenus est miser, quia necessaria non habet, quisque videt hunc syllogismum includi :

Qui necessaria non habet est miser ;

Egenus necessaria non habet :

Ergo egenus est miser.

Potest quoque syllogismus propositionem causalem continere in hunc modum, v. gr.

Egenus est miser, quia necessaria non habet ;

Avarus necessaria non habet :

Ergo avarus est miser.

De cujus reductione ad simplicem non amplius dubitabis, si animadvertas majorem in hoc syllogismo hanc esse :

Qui necessaria non habet est miser.

Quod enim additur de egeno, aditur ad modum exempli, vel comparisonis; et ita in reliquis hujusmodi.

4º Syllogismi qui exclusivam propositionem unam vel plures continent, aliquas præ se ferunt anomalias, quarum specimen jam dedimus (240, 3º). Regula generalis ad recte

æstimandum in his de rectitudine conclusionis est, ut resoluta exclusiva, ejus loco ponatur componens illa, in qua vis argumenti innititur, quæ quum exclusiva exponitur copulative (176, 177), fere semper est componens negativa: ac tum juxta communes syllogismi regulas judicium feratur. Hic qui sequitur ex. gr. recte concludit :

Solus Deus est immutabilis;

Solus immutabilis est æternus :

Ergo solus Deus est æternus.

Non vero hic alter :

Quod est æternum semper vivet;

Solus Deus est æternus :

Ergo solus Deus semper vivet.

5º Ubi est exclusiva exclusi prædicati, aliquando videntur esse in syllogismo quatuor termini, cum tamen sit regularis; difficultas hæc eodem modo resolvitur ac præcedens; v. gr. in hoc:

Triangulum habet solum tria latera;

Parallelogrammum habet quatuor latera :

Ergo parallelogrammum non est triangulum ;

major est hæc exclusiva componens:

Triangulum non habet quatuor latera.

6º Postremo ubi est propositio reduplicativa, seu specificativa (180), cavendum ne reduplicatio a suo termino separetur, ut in hoc exemplo :

Homo quatenus est intelligens, est liber ;

Sed homo est animal :

Ergo homo quatenus est animal, est liber.

259. Hæc satis demonstrant quod diximus, syllogismos in quibus propositio composita eaque categorica continetur, nihil sibi proprium habere quo a simplici differant. Unde nec nomen habent proprium. Ast illi qui propositionem continent hypotheticam, vocantur proprio nomine *hypothetici, conjuncti, compositi*; quædam etiam sibi peculiariora habent, regulisque propriis diriguntur; quanquam, ut infra videbimus, hi quoque tandem aliquando ad syllogismos simplices reducuntur.

Syllogismus hypotheticus definiri potest: *syllogismus, qui*

ex præmissa hypothetica conclusionem categoricam deducit. In hujusmodi syllogismo hypothetica propositio majoris loco ponitur, ejusque partes ita distribuuntur, ut una vel plures assumantur loco minoris, et quæ remanent, in conclusione deducantur affirmative vel negative. Unde ea pars quæ minoris loco ponitur, medii termini munus obtinet. In hoc exemplo:

Mundus aut est a se, aut ab aliqua causa;

Sed non est a se :

Ergo est ab aliqua causa,

illa pars, *mundus est a se*, medii termini vices agit. Hoc porro concludendi artificium ex ipsa hypotheticæ enuntiationis natura sponte promanat, et ex illa jam intelligitur (170); sed in particularibus melius intelligetur.

Quoniam tres sunt species hypotheticarum propositionum, triplex quoque est syllogismus hypotheticus, videlicet *conditionalis, disjunctivus, conjunctivus*.

ARTICULUS II.

De Syllogismo conditionali.

260. *Conditionalis syllogismus est syllogismus hypotheticus, qui ex propositione conditionali conclusionem categoricam infert.*

Duplex ejus figura est:

1^a quæ a veritate conditionis arguit ad veritatem conditionati, ut:

Si Deus est justus, punietur impius;

Sed Deus est justus:

Ergo punietur impius.

Quæ concludendi ratio evidenter legitima est. Si enim adest nexus inter conditionalis membra, profecto conditionis veritate posita, conditionati quoque veritas constet necesse est (171).

2^a Quæ a falsitate conditionati ad falsitatem arguit conditionis, ut:

Si Ecclesia errat, Deus mentitur;

Sed Deus non mentitur:

Ergo Ecclesia non errat.

Hæc quoque conclusio rectam se cuique probat: nam si

verum est, posita conditione illico poni conditionatum, proculdubio si conditionatum non verificatur, inferri debet, conditionem positam non esse.

* 261. Modi in utraque figura a qualitate (157) partium desumuntur. Potest enim utraque pars esse affirmans, potest esse utraque negans; potest quoque esse conditio negans, conditionatum affirmans, et viceversa. Quare hi modi sunt quatuor. Circa hoc duo adnotanda:

1^o In prima figura partium qualitas semper servatur, tum in minore, tum in conclusione, ex. gr.:

Si materia non est improducta, non habet motum a se;

Sed materia non est improducta:

Ergo non habet motum a se.

In secunda autem figura partium qualitas semper mutatur, v. gr.:

Si non dormis, vigilas;

Atqui non vigilas:

Ergo dormis.

2^o Quæcunque sit qualitas partium, in prima figura argumentatio semper est affirmativa; semper enim in conclusione conditionati veritas affirmatur: in secunda vero figura est semper negativa; quia semper in conclusione negatur conditionis veritas.

262. Quænammodum in syllogismo conditionali duæ sunt legitimæ figuræ, ita duæ sunt fallaces et sophisticæ:

1^a quum a veritate conditionati infertur veritas conditionis, ut:

Si Pompeius occidit Cæsarem, Cæsar mortuus est;

Sed Cæsar mortuus est:

Ergo Pompeius occidit Cæsarem;

2^a quum a falsitate conditionis infertur falsitas conditionati, ut:

Si Cæsar loquitur, vivus est;

Atqui non loquitur:

Ergo vivus non est.

Ratio cur utraque concludendi ratio sit fallax, una est:

INSTITUTIONES, ETC. I.

quia videlicet dari possunt aliæ conditiones, quibus positis, idem conditionatum verificetur.

263. Hinc quando conditio quæ enuntiatur, est unica sub qua conditionatum verificari possit, licet utraque hac uti figura; quanquam, ut verius loquar, neque in hoc casu a legitimis figuris discedimus, esto quod in speciem id fieri videatur. Etenim quando conditio unica est, conditionalis propositio est insuper exclusiva, et æquivalet his duabus:

1^a Si est A, est B;

2^a Si non est A, non est B.

Quare quum ita arguis:

Est B:

Ergo est A,

vel

Non est A:

Ergo non est B,

non sunt istæ argumentationes ex 1^a propositione secundum figuras illegitimas, sed sunt secundum legitimas ex 2^a propositione (261).

264. Tria adhuc restant animadvertenda:

1^o Occurrunt quandoque syllogismi, in quibus omnes propositiones conditionales existunt. Ex. gr.:

Si bruta dolorem fugiunt, dolorem sentiunt;

Sed si dolorem sentiunt, non sunt pura materia:

Ergo si bruta dolorem fugiunt, non sunt pura materia.

Hujusmodi argumentationes, quæ maxime videntur hypotheticæ, sunt revera categoricæ et simplices, ac generatim reducuntur ad hanc formulam:

Primum est conditio secundi; et secundum est conditio tertii:

Ergo primum est conditio tertii;

quæ concludit ex supposito hoc principio: *conditio conditionis est conditio conditionati.*

2^o Interdum ipsa syllogismi conclusio conditionalis est; ut in hoc:

Pura materia sensum non habet:

Ergo si bruta sensum habent, non sunt pura materia.

In quo, ut vides, sunt omnia elementa syllogismi simplicis, nisi quod altera præmissarum conditionis loco ponitur in conclusione; quod fit ut adversarius præscindens a veritate propositionum, consequentiæ rectitudinem facilius agnoscat.

3^o Quandoque conditionales compositæ ad arguendum assumuntur; ut si dicas:

Si Deus existit, cum sit improductus, est independens;

Sed Deus existit:

Ergo cum sit improductus, est independens.

Conditionales illæ compositæ vocari possunt *conditionales causales*, quia quod additur conditionali, rationem continet qua consequentia probatur.

ARTICULUS III.

De syllogismo disjunctivo.

265. Disjunctivus syllogismus est *syllogismus hypotheticus, qui in antecedente disjunctivam propositionem* (172) habet.

Duplex est ejus-figura, quando disjunctiva propria est, ac partes habet duas:

1^a quæ negat unam partem in minori, ut alteram in conclusione affirmet. Ex. gr.:

Aut Christus fallitur aut mundus errat;

Sed Christus non fallitur:

Ergo mundus errat.

2^a quæ affirmat unam partem in minori, ut alteram in conclusione neget. Ex. gr.:

Aut movetur terra aut movetur sol;

Sed terra movetur:

Ergo non movetur sol.

Utramque argumentandi rationem rectam esse, plane liquet ex natura disjunctivæ propositionis, cujus partes nec simul veræ esse possunt, nec simul falsæ (172). Quod si disjunctivæ partes non sint hoc modo inter se comparatæ, disjunctiva falsa erit, et neganda.

Quod si disjunctiva sit impropria (172, 2^o), primus tantummodo arguendi modus vigeat. Si enim saltem una pars

vera sit oportet, profecto negata una, alteram affirmari necesse est. Opposita vero deductio fieri non poterit.

* 266. Tum prima tum altera figura tres modos habet. Vel enim utraque disjunctivæ pars affirmativa est, vel utraque negativa, vel altera affirmativa, altera negativa.

Quæcunque vero sit partium qualitas ad vitandos errores adnotare sufficit :

1^o In prima figura mutari qualitatem ejus partis, quæ assumitur in minori, servari ejus, quæ in conclusione deducitur. In secunda autem e converso servari qualitatem in minori, mutari in conclusione.

2^o Argumentationem in prima figura esse semper affirmativam ; in hac enim affirmatur veritas illius partis quæ deducitur : in secunda vero figura semper esse negativam.

Hinc intelliges unde oriatur fallacia hujus argumentationis :

Aut es doctus aut non es doctus ;

Sed es doctus :

Ergo non es doctus.

Cum enim affirmetur in minori primum disjunctivæ membrum, negandum est alterum in conclusione, mutata ejus qualitate a negativa in affirmativam : *Ergo non non es doctus ; nempe : Ergo es doctus.*

267. Si disjunctionis membra plura sint quam duo, tres erunt hujus argumentationis figuræ : duæ affirmantes, ac tertia negans.

1^a negat unum membrum, ut cætera in conclusione disjunctivæ affirmet, v. gr. :

Quantitas A vel est æqualis B, vel major illa, vel minor ;

Sed non est æqualis :

Ergo vel est major vel minor.

2^a negatis copulative omnibus præter unum, hoc in conclusione affirmat ; v. gr. ex eadem disjunctiva super posita sic potes arguere :

A non est nec major, nec minor B :

Ergo est æqualis illi.

3^a affirmato uno, concludit negando cætera copulative, sic :

A est æqualis B :

Ergo nec est major illa, nec minor.

Et hæc pariter omnia ex disjunctivæ propositionis natura satis manifesta sunt.

ARTICULUS IV.

De syllogismo conjunctivo.

268. Syllogismus conjunctivus est *syllogismus hypotheticus, in cujus antecedente propositio conjunctiva* (173) *ponitur.*

Una tantum est hujus syllogismi figura, videlicet quæ affirmat unum membrum, ut alterum negando concludat. Modi vero sunt tres, ut in syllogismo disjunctivo. En exemplum :

Cajus non poterat tali die esse Romæ et Neapoli ;

Sed tali die Romæ erat :

Ergo non erat Neapoli.

Quæ argumentatio ex ipsa conjunctivæ propositionis natura exoritur. In ea enim statuimus, duo non posse simul ut vera affirmari ; affirmato ergo uno tanquam vero, restat, ut alterum negetur ut falsum. At non possumus, quemadmodum in disjunctivo syllogismo, a falsitate unius ad veritatem alterius concludere. Nam quanquam in conjunctiva propositione statuamus, duo non posse simul esse vera, non tamen ex æquo statuimus, non posse esse simul falsa (173). Revera quisque videt, quam inepta esset ex data conjunctiva argumentatio hæc :

Cajus tali die Romæ non erat :

Ergo erat Neapoli.

Poterat enim, cum Romæ non esset, in infinitis aliis esse locis.

269. Quum tamen membra quæ in conjunctiva enumerantur, sunt ea omnia quæ locum illa in re habent, ita ut propositio conjunctiva in disjunctivam converti cum veritate possit ; tunc, ut patet, etiam secundum hanc alteram figuram concludere licet, ut in disjunctivo syllogismo ; non quidem ex indole conjunctivæ enuntiationis, sed ex natura disjun-

ctivæ, cui illa æquivalet. Sit in exemplum hæc propositio :

Terra non potest simul moveri et quiescere.

Potest hæc cum veritate in disjunctivam converti :

Terra aut movetur aut quiescit.

Proinde concludere potero :

1^o *Terra movetur :*

Ergo non quiescit.

2^o *Terra non quiescit :*

Ergo movetur.

ARTICULUS V.

De reductione syllogismi disjunctivi et conjunctivi ad conditionalem, et conditionalis ad simplicem.

270. Fiet reductio syllogismi disjunctivi ad conditionalem, si manentibus reliquis partibus, propositio disjunctiva in conditionalem converti possit. Perspicias autem, hanc conversionem fieri posse, si attendas, disjunctivæ partes ita esse comparatas, ut posita affirmatione unius, negationem alterius inferre necesse sit. Hinc (171) affirmatio unius est conditio logica negationis alterius, et negatio affirmationis. Ex una igitur disjunctiva bimembri educes conditionales quatuor.

Sit disjunctiva :

Aut est A, aut est B.

Convertetur in conditionales istas :

Si est A, non est B.

Si non est A, est B.

Si est B, non est A.

Si non est B, est A.

Si vero disjunctivæ tria sint membra, ut v. gr. in hac formula :

Aut est A, aut est B, aut est C;

habebis conditionales novem (267) :

Si est A, non est B nec C. | Si non est A, vel est B vel est C.

Si est B, non est A nec C. | Si non est B, vel est A vel est C.

Si est C, non est A nec B. | Si non est C, vel est A vel est B.

Si non est A nec B, est C.

Si non est A nec C, est B.

Si non est B nec C, est A.

Et generatim numerus conditionalium, in quas potest

disjunctiva converti, est triplus numeri partium, quas disjunctiva continet.

271. Conjunctivus quoque syllogismus reducitur ad conditionalem, propositione conjunctiva in conditionalem mutata. Mutatur autem conjunctiva per se in duas conditionales (268) :

Non potest simul esse A et esse B.

Ergo :

Si est A, non est B.

Si est B, non est A.

Si vero conjunctiva converti quoque possit in disjunctivam (269), hæc insuper duæ prodibunt conditionales :

Si non est A, est B.

Si non est B, est A.

272. Restat ut videamus, utrum syllogismus conditionalis ad simplicem reducatur, et quomodo. Reductio hæc fieri potest, vel considerata materia determinata ex qua est syllogismus conditionalis, vel generali ejus forma.

Si consideratur materia, facilis est reductio, quum subjectum conditionis idem est ac subjectum conditionati, ut v. gr. in hoc :

Si mundus deceptor est, fidem non meretur;

Sed mundus deceptor est:

Ergo mundus fidem non meretur.

Vides enim, conditionalem nullo negotio in hanc simplicem converti :

Omnis deceptor fidem non meretur;

qua suffecta loco conditionalis, syllogismus in simplicem commutatur.

Quum vero subjectum conditionis diversum est a subjecto conditionati, reductio est difficilior, nec generali formula comprehendi potest: semper tamen invenire dabitur aliquam viam, qua hujusmodi propositio ad simplicem traducatur; v. gr. hæc propositio :

Si Ecclesia errat, Deus mentitur,

in hanc migrabit :

Error Ecclesiæ est mendacium Dei.

273. At si ipsa forma conditionalis syllogismi præ oculis habeatur, sponte prodibit generalis reductionis formula, quæ omnibus syllogismis hujusmodi, quomodocunque se eorum materia habeat, aptari possit. Sufficit porro ad hanc reductionem conficiendam, ut id quod re et facto ipso in conditionali syllogismo affirmamus, disertis explicitisque vocibus affirmemus. In propositione enim conditionali quid dicimus? Hoc sane dicimus: eum qui conditionem affirmat, conditionatum quoque affirmare debere (171); item: eum qui conditionatum negat, conditionem quoque negare debere (260, 2^o). Pariter in minori, quæ propositio categorica est, quum affirmamus conditionem vel conditionatum negamus, facto ipso dicimus, idem affirmandum esse vel negandum, et quidem ab omnibus, quia id poscit veritas.

Repræsentet igitur X conditionem, et Y conditionatum; hæc erit generalis reductionis formula in affirmativis:

Qui affirmare debet propositionem X, affirmare debet propositionem Y;

Sed omnes affirmare debent propositionem X:

Ergo omnes affirmare debent propositionem Y.

Et in negativis:

Qui negare debet propositionem Y, negare debet propositionem X;

Sed omnes negare debent propositionem Y:

Ergo omnes negare debent propositionem X.

Quæ duæ formulæ sunt syllogismi simplices primæ figuræ.

ARTICULUS VI.

De syllogismis complexis.

274. Superest ut de complexis syllogismis aliquid dicamus. Hoc nomine comprehendimus, non quoscunque syllogismos qui propositiones complexas (181, 182) continent, multi enim ex his nihil habent peculiari nota dignum; sed eos tantum qui propter complexas propositiones difficultatem aliquam offerunt.

Huc spectant in primis ii syllogismi, in quibus extremum complexum dividitur in præmissis, ita ut pars una copuletur

cum medio termino in majori, pars altera in minori; ut in hoc exemplo:

Christus est Deus;

Maria est mater Christi:

Ergo Maria est mater Dei.

Hi videntur a legitima simplicis syllogismi forma aberrare; utque ad eam formam revocentur expositione aliqua indigent, aut integratione. Sic datus syllogismus ad consuetam formam facile reducitur:

Mater Christi est Mater Dei;

Maria est mater Christi:

Ergo Maria est mater Dei.

275. Quandoque etiam exinde oritur difficultas, quod in conclusione, ut jacet, propositio quæ principalis videtur, sit revera incidens, et quæ videtur incidens, sit revera in rationatione principalis.

Quum dico v. gr.:

Evangelium præcipit, ut inimicos tuos diligas;

Sed Antonius est inimicus tuus:

Ergo evangelium præcipit, ut Antonium diligas,

conclusio est propositio complexa sic exponenda:

Evangelium præcipit, quod Antonius sit a te diligendus.

Argumentum autem quod propono, his revera propositionibus continetur:

Inimici tui sunt a te diligendi;

Antonius est inimicus tuus;

Ergo Antonius est a te diligendus.

Quare propositio incidens: *Antonius est a te diligendus*, in hoc argumento est principalis; et: *evangelium præcipit*, quæ principalis erat, est incidens. Sic igitur syllogismus propositus ad regularem formam traducitur:

Inimici tui sunt a te diligendi, secundum quod evangelium præcipit;

Sed Antonius est inimicus tuus:

Ergo Antonius est a te diligendus, secundum quod evangelium præcipit (ex evangelii præscripto) (1).

(1) Cf. *Artis cogitandi*, parte III, c. IX.

276. Difficultatem quoquo aliquam præ se ferunt syllogismi, qui terminis constant *obliquis*; ut iste:

Omnium corporum est attrahere et attrahi;

Luna est corpus:

Ergo lunæ est attrahere et attrahi;

qui syllogismus bene concludit: non item hic alter:

Principis est leges ferre;

Principis est bellum indicare:

Ergo leges ferre est bellum indicare.

Traduntur quidem de his peculiaria præcepta (1): sed omnium optimum est hoc generale præceptum, ut propositiones ex obliquis convertantur in propositiones ex rectis, sententia non immutata; quo facto, de syllogismi rectitudine facile erit iudicium.

Fit autem hæc conversio duobus fere modis: 1º ponendo rectum ejusdem nominis pro obliquo, immutata aliquantulum oratione: ita reduces propositionem hanc: *Omnium corporum est attrahere et attrahi*, ad hanc: *Omnia corpora attrahunt et attrahuntur*: 2º eruendo ex propositionis sensu rectum, ad quod obliquum pertinet, ut si enuntiationes istas: *Principes est leges ferre. Principis est bellum indicare*, ita reformes: *Leges ferre est jus principis. Bellum indicare est jus principis.*

277. Locus hic esset ut de syllogismis modalibus sermo fieret. Sunt porro syllogismi modales, qui propositiones continent inodales (185), vel omnes modales, vel modales simul et absolutas. Modales autem quæ in uno eodemque syllogismo conjunguntur, possunt esse ejusdem denominationis vel diversæ. Sed cum hæc satis longa expositione indigeant, neque admodum necessaria videantur, impune prætermitti possunt. Qui hæc nosse cupit, adeat Aristotelem ejusque interpretes (2).

(1) Cf. Fonseca *Instit. Dial.*, lib. VI, c. 30.

(2) Arist. *Prior. Analyt.*, lib. I, c. VIII, seq.—Vide inter cæteros Opusc. XLVIII inter opusc. S. Thomæ. Tract. de Syllog., c. XIII, seq.

CAPUT IV.

DE CÆTERIS ARGUMENTATIONIBUS.

ARTICULUS I.

De enthymemate, epicheremate, polysyllogismo.

278. Nunc de cæteris argumentationibus, quæ quidem externa, ut ita dicam, specie a syllogismo differunt, at secundum intrinsecam suam formam ad syllogismum omnes reducuntur.

Occurrit primo *enthymema*. Est *enthymema syllogismus mutilus*, cujus videlicet alterutra reticetur præmissa; ut si dicam:

Pauperes sunt homines:

Ergo non sunt contemnendi.

Frequens est ejus usus, præsertim quum id quod deest, per se intelligitur, et facile potest ab audientibus suppleri: Aliquando etiam ob hunc enuntiationum claritatem ipsum *enthymema* una propositione constringitur, nempe conclusionem, inserta illi obiter ratione, quæ ipsam demonstrat; veluti si dicam:

Justus Deus ulciscetur.

Hæc propositiones dicuntur *enthymematicæ*.

279. Præmissa quæ in *enthymemate* reticetur, potest esse tum major, tum minor: quænam autem sit, facile deprehenditur, si notetur utrum extremorum in *enthymematis* antecedente reperiatur. Si enim in antecedente est extremum majus, propositio suppressa erit minor; si in antecedente est extremum minus, omissa erit major. In allato exemplo deest major:

Nulli homines sunt contemnendi.

Si notetur insuper locus, quem extremum occupat in antecedente, cognoscetur quoque figura, ad quam *enthymema* completum revocari debet. V. gr. in hoc:

Nullus avarus est felix:

Ergo aliquis dives non est felix,

reticetur minor, quæ duplici modo suppleri potest, vel hoc pacto:

Aliquis dives est avarus,
et sic syllogismus eruitur primæ figuræ; vel etiam:

Aliquis avarus est dives,
et sic syllogismus habetur figuræ tertiæ.

Quod si neutrum extremorum in antecedente reperiatur, syllogismus integer erit hypotheticus, ut iste:

Sol quiescit:

Ergo terra movetur.

280. *Epicherema* est syllogismus, cujus alteri præmissæ vel etiam utrique sua ratio subnectitur. Ut in hoc exemplo:

Omne ens simplex est incorruptibile; non enim habet partes, in quas resolvi possit;

Sed humanus animus est simplex: impossibile est enim ut compositum cogitet:

Ergo anima humana est incorruptibilis;

quæ argumentatio, uti patet, in tres syllogismos resolvitur.

Polysyllogismus est argumentatio, in qua conclusio unius syllogismi assumitur tanquam præmissa alterius; ut si ita arguam:

Quod est simplex, non habet partes;

Sed anima est simplex:

Ergo anima non habet partes;

Sed quod non habet partes, est indivisibile:

Ergo anima est indivisibilis.

ARTICULUS II.

De Sorite.

281. *Sorites*, hoc est *acervalis*, ut Tullius interpretatur (1), est series propositionum ita connexarum, ut attributum primæ fiat subjectum secundæ, attributum secundæ fiat subjectum tertiæ, et sic deinceps, donec tandem conclusio fiat, conjungendo subjectum primæ propositionis cum ultimæ prædicato. En exemplum:

Qui cupiditates suas non coercet, multa desiderat;
Qui multa desiderat, multis eget;
Qui multis eget, inquietus vivit;

(1) II, De Divinat.

Qui inquietus vivit, est miser:

Ergo qui cupiditates suas non coercet, est miser.

Hæc argumentandi ratio evidenter concludit: quod enim continetur in alio (252), continetur quoque in iis omnibus, in quibus hoc aliud includitur, seu, ut ait Aristoteles (1): *quum alterum alteri tribuitur tanquam subjecto, quot sunt ea quæ de attributo dicuntur, totidem etiam de subjecto dicuntur.*

282. Facile intelligis, soritem esse reipsa syllogismorum acervum, propositionibus quibusdam detractis. Revera potest sorites resolvi in tot syllogismos primæ figuræ, quot sunt præmissæ, una dempta. En tibi resolutionis formulam:

Sorites	Resolutio
1. A est B;	B est C;
	A est E;
2. B est C;	Ergo A est C.
	C est D;
3. C est D;	A est C;
	Ergo A est D.
	D est X;
4. D est X;	A est D;
	Ergo A est X.
Ergo A est X.	

Potest etiam sorites propositiones omnes habere conditionales. Si tales habeat, resolvetur in syllogismos, quorum omnes propositiones erunt conditionales.

Ex instituta soritis analysi hæc clara sunt:

1º In sorite reticere omnes minores syllogismorum quos continet; excepta minori primi syllogismi; omnes item conclusiones, excepta ultimi conclusionem.

2º Primo loco poni in sorite minorem primi syllogismi, secundo majorem ejusdem, tertio deinde loco, quarto, etc. majores insequentium syllogismorum ordine collocari.

3º Singula præmissarum subjecta, excepto subjecto primæ, esse medios terminos syllogismorum, in quos sorites resolvitur.

(1) De Categor., c. III.

4^o Tracyum qui contendit (1), non soritem ad syllogismum, sed syllogismum omnemque ratiocinationem ad soritem tanquam ad primitivam formam reduci, hunc, inquam, qui hæc contendit, neque syllogismi, neque soritis, neque ratiocinii analysim serio unquam instituisse (2).

283. Ut sorites recte concludat, duo hæc sunt potissimum cavenda, quorum primum ad qualitatem pertinet propositionum, alterum ad quantitatem:

1^o *Cavendum ne inter propositiones affirmantes negans ulla subrepat.* Si enim una esset propositio negans, resolutio sorite, erumperet syllogismus vel habens præmissam unam negantem et conclusionem affirmantem, vel conclusionem latius patentem quam præmissæ; si vero binæ essent negantes, syllogismum haberes cum binis præmissis negantibus.

Multo magis cavendum est, ne omnes præmissæ negantes existant. Secus acervantur syllogismi, quorum omnes propositiones negativæ sunt.

Exceptiones tamen sunt duæ:

a) Præmissa illa, quæ proxime conclusionem antecedit, negativa esse potest, dummodo ipsa quoque conclusio sit negans. Ratio est manifesta ex formula resolutionis (282).

b) Si negatio in aliquo medio termino vel in omnibus contineatur (240, 2^o), una soritis præmissa, vel omnes erunt in speciem negativæ, quin hoc rectitudinem conclusionis pervertat; v. gr.:

Mundus non est immutabilis;

Quod non est immutabile, non est æternum;

Quod non est æternum, initium habuit;

Ergo mundus initium habuit.

2^o *Nulla propositio sit particularis, nisi forte prima.* Quod si prima fuerit particularis, etiam conclusio particularis esse debet.

Ratio est quia secus resolutio soritis aliquem præberet syllogismum, in quo medius terminus bis particulariter assumeretur (282, 3^o). Prima tamen soritis præmissa particu-

(1) *Logique*, c. 1 et 8.

(2) Cf. Gallupi, lez. LVII.

laris esse potest, quia primæ præmissæ subjectum medi termini locum nullibi tenet; ipsa autem est minor propositio (282, 2^o), quæ potest in prima figura esse particularis.

* 284. A sorite de quo nunc locuti sumus, differt undequaque captiosa illa veterum sophistarum argumentatio, quam soritem vocant chrysippeum. Primus enim sorites ita vocatur, quia propositionum simul connexarum quidam quasi acervus est, hic autem eodem nomine designatur, non a propositionum acervo, sed ab acervo tritici, quo tanquam exemplo sophista utebatur. Assumpto enim acervo ex viginti v. gr. tritici granis, interrogabat, num grana illa pauca essent, an vero multa. Si pauca respondisses; subiciebat, pauca fore etiam uno addito: quæ enim pauca sunt, unius duntaxat augmento fieri multa non possunt; tum addito tertio, quarto etc. eo perveniebat, quod cum multum reapse foret, te tamen fallaci illo conducto circumventum fateri cogebat, multa esse pauca. Quod si interroganti respondisses, viginti grana esse multa, ex eo principio quod multa, uno subtracto, multa esse pergunt, successivis subtractionibus te fateri cogebat, unum granum esse multa.

Cavillatio hæc tota innititur in eo, quod multa et pauca sunt indeterminatæ notiones: non enim certum quemdam numerum homines sanxere, qui postremus esset paucorum et primus multorum. At certe quæ pauca dicuntur, si unum addatur, non eodem modo pauca esse pergunt atque antea; multis vero additis, nullo modo pauca dicuntur; ita quæ multa. Quare pauca et multa semper diverso sensu in hoc sophismate accipiuntur (1).

ARTICULUS III.

De Dilemmate.

285. Argumentatio quæ dicitur *dilemma* a disjunctiva propositione derivatur. Est autem *dilemma argumentatio composita, in qua duobus disjunctive propositis adversario, ostenditur ex unoquoque membro aliquid contra ipsum concludi: unde infertur, hoc ipsum absolute concludendum esse.* Sic ex. gr. ar-

(1) Cf. Facciolati, *Log. Acroasi*, II.

guere licet contra scepticos, qui veritatem ullam ab humana mente cognosci posse negant:

Aut vestra ista propositio vera est, aut falsa.

Si vera est, jam falsum est veritatem inveniri ab homine non posse; quia aliqua veritas est a vobis inventa.

Si falsa est, iterum falsum est veritatem inveniri non posse; quia propositio quæ hoc affirmat, fatentibus vobis, est falsa.

Ergo quidquid dicatis, falsum est veritatem inveniri ab homine nunquam posse.

In hoc exemplo perspicis, integrum dilemma quatuor constare enuntiationibus, quamvis non semper omnes ex primi necesse sit.

Prima *disjunctiva* est.

Secunda est *conditionata-causalis*: assumit hæc primam disjunctionis partem; ex eaque concludit contra adversarium, rationem conclusionis afferendo.

Tertia idem exsequitur quoad alteram disjunctionis partem: quare est et ipsa *conditionata-causalis*.

Quarta demum id quod ex partibus hypotheticæ conclusionis est, universim et categorice affirmat.

Quoniam disjunctio in hac argumentatione, duobus, ut plurimum, membris constat, idcirco hæc argumentatio dilemma nuncupatur. Quod si disjunctivæ membra plusquam duo exstiterint, argumentatio vocabitur *trilemma*, *quadrilemma* etc., et propositiones conditionatæ-causales erunt totidem ac disjunctivæ membra.

286. Tribus modis dilemma vitiosum esse potest.

1° Si divisio quæ fit in disjunctiva, non sit completa. Tunc enim adversarius habebit effugium.

2° Si quod infertur ex unoquoque membro, vitiose inferatur, aut solum cum probabilitate: in utroque enim casu elabatur adversarius, vel negando consequentiam vel deducendo oppositum probabile.

3° Si possit retorqueri. Fit autem retorsio dilemmatis, quum arrepta eadem disjunctiva, infertur e singulis membrorum conclusio opposita arguentis conclusioni, quod facile fit

quum talia membra proponuntur, ex quibus deduci potest ex parte utrumque simul oppositum, vel unum æque ac alterum probabile ostendi.

Exemplis afferendis supersedeo; suppetunt enim omnibus exempla vulgatissima.

* 287. Dicam potius quomodo dilemma ad syllogismum revocetur. Sit C conclusio adversarii, tum A es B membra propositionis disjunctivæ: hæc erit reductionis formula:

Si C vera est, verificaretur vel stante A, vel stante B;

Atqui nec stante A, nec stante B, C verificatur:

Ergo C vera non est.

Quæ formula, ut vides, est syllogismus conditionalis secundum figuram negantem (260, 2°). Nisi quod prima propositio non conditionalis solum est, sed *conditionalis-disjunctiva*, minor autem est *copulativa*. Quoniam vero utrique parti minoris sua probatio adjicitur, idcirco dilemma vocari posset syllogismus *hypothetico-epichierematicus*.

LIBER QUARTUS.

CAPUT I.

DE METHODI NOTIONE.

288. Methodus est *via*, seu *ratio aliquid faciendi*; nimirum: *ordo servandus in operationum nostrarum serie disponenda, ut finem nobis præstitutum assequamur*. Pertinet ad logicam, ut agat de methodo, quæ servari debet, ut et ipsi veritatem assequi, et eam cum claritate et soliditate cæteris communicare possimus. Huc enim tandem redit tota recte iudicandi disciplina, ut rationem tradat, viamque sternat, qua ad recta iudicia pervenire dabitur. Quod si in omnibus quæ aliquantulum complexa sunt, necessaria methodus est, multo magis quum de veritate ac de scientia agitur. Pauca enim sunt quæ immediato obtutu, vel una eaque obvia ratiocinatione, in re scientifica deprehendimus; multo sunt plura, quæ longam observationum, comparisonum, ac ratiociniorum seriem expostulant. In his autem, quæ mentis nostræ infirmitas est, facile contingit, ut a recto tramite deflectamus, ut hæreamus ancipites, ut iter jam emensum retexamus, aut saltem ut ipsa rerum multitudine ac varietate obruamur, nisi suo quæque loco disponere, ac tempestive advertere, expendere, in ususque nostros deducere noverimus.

Non hæc igitur supervacanea disputatio est, sed apprime utilis.

289. Scopus ad quem operationes suas ordinare potest intellectus, quum de veritate sive invenienda, sive proponenda agitur, duplex est: 1^o ut quæstionem aliquam singularem circa datum objectum resolvat, resolutamve tueatur: 2^o ut quæstiones omnes; quæ circa datum objectum occurrunt, expendens, systema quoddam cognitionum de eodem objecto constituat. Quæstio autem singularis circa datum objectum ita resolvi potest, ut vel ad certam conclusionem deveniatur, vel ad probabilem tantum. Argumentatio qua priore modo resolvitur quæstio, dicitur demonstrativa, altera

probabilis. De his omnibus aliisque, quæ cum his connectuntur, breviter et intra necessitatis fines agendum.

CAPUT II.

DE ARGUMENTATIONE DEMONSTRATIVA.

ARTICULUS I.

Quid sit demonstratio.

290. Argumentatio demonstrativa, seu demonstratio est *argumentatio legitima, quæ ex evidentibus præmissis veritatem aliquam evidentem facit*. Atque ex hoc demonstratio dicitur, quia conclusionis veritatem perspiciendam propemodum exponit: a cæteris autem argumentationibus non differt quoad formam, sed solummodo quoad materiam; eatenus nimirum, quatenus præmissas certas habet et evidentes. Sunt autem præmissæ evidentes, vel immediate, quum per se patent, vel mediate, quum per alias propositiones immediate evidentes jam demonstratæ sunt.

Ex quo vides, demonstrationem quandoque non una tantum argumentatione contineri, sed multiplici; quum nempe præmissæ ad demonstrandum assumptæ, per alias demonstrandæ sunt. Quævistamen demonstratio ad aliquam propositionem immediate evidentem, quæque demonstrari non egeat, reducenda semper est.

291. Ex his facile intelliges, præmissas demonstrationis esse causas, quæ veram ac certam cognitionem conclusionis ex rei natura gignunt. Unde sequitur eas esse:

1^o priores conclusioni, quatenus veræ cognosci debent antequam conclusionis veritas cognoscatur; quod enim in alterius cognitionem adducit, prius illo cognosci debet.

2^o notiores conclusioni, quatenus menti se suadeant promptius ac facilius quam conclusio: secus verum non esset, eas evidentiam affundere conclusioni, certamque illam facere.

292. In demonstrationibus, præsertim mathematicorum, nonnulla usurpantur vocabula, quæ aliqua declaratione indigent. Sunt autem

Definitio. De hac suo loco diximus.

Propositio theoretica : hæc est quæ affirmat quid sit vel fiat, ut : *Triangulum est figura*. *Propositio practica*, quæ affirmat quid fieri possit, aut debeat, ut *Deus est colendus*.

Axioma est propositio theoretica indemonstrabilis, cujus veritas patet sola definitione terminorum. De hoc postea:

Postulatum est propositio practica immediate evidens ex sola terminorum definitione : v. gr. *potest ex puncto dato ad aliud punctum duci linea*.

Theorema est propositio theoretica demonstrabilis.

Problema est propositio practica demonstrabilis : v. gr. *Invenienda est summa seriei geometricæ*.

Lemma vel *porisma* est propositio, quæ assumitur ex alia scientia, a qua supponitur demonstrata. Assumitur autem, quia supponenda est tanquam vera, ut demonstratio proposita fieri possit.

Corollarium est omnis propositio, quæ a definitione, ab axiomate, ab alia propositione demonstrata ita fluit, ut ulteriori demonstratione non egeat.

Scholion dicit id omne quod propositioni subjungitur, ut ea illustretur historia, auctoritate, exemplo, ut usus doctrinæ tradatur, ut difficultates enodentur, etc.

ARTICULUS II.

Quotuplex sit demonstratio.

293. Nunc ad varias demonstrationis species. Duplici modo procedere potest demonstratio, directo nempe et indirecto; unde demonstratio *directa* et *indirecta*.

Demonstratio *directa* est, quum ostendimus prædicatum quæstionis convenire subjecto vel secus, per notas aliquas quæ sive subjecto sive prædicato certo insunt. Sic demonstratio : *Deum non esse dependentem ab alio*, per hanc notam : *Causa prima*, quæ est de ratione subjecti :

Causa prima non est ab alio dependens;

Sed Deus est causa prima :

Ergo Deus non est ab alio dependens.

Demonstratio *indirecta* est, quum ex contradictoria propositionis probandæ conclusionem directe deducimus evi-

denter absurdam : qua re ostendimus contradictoriam assumptam esse falsam (229, 2^a); adeoque propositionem a nobis probandam esse veram (190, 1^o c). Sic v. gr. negantem : *Deum esse æternum* ita aggredior :

Quod non est æternum, ab aliqua causa productum est;

Sed per te Deus non est æternus :

Ergo Deus ab aliqua causa productus est; nempe :

Causa prima producta est ab alia causa priore : quod est absurdum.

Utraque hac via ad certitudinem de conclusione obtinendam devenimus, ut patet, et assensum extorquemus. Sed inter unam et alteram, hoc est discrimen, quod demonstratio directa ostendit quare conclusio sit admittenda, indirecta ostendit simpliciter esse admittendam : illa suadet affirmare, hæc absterret a negando ; illa docet, hæc cogit.

294. Si medium spectes, quo demonstratio directa utitur, ea dispescitur in duas, quarum altera dicitur *a priori*, altera *a posteriori*.

Quam divisionem ut intelligas, animadverte, *prius* et *posterius* dici posse dupliciter, vel secundum cognitionum notarum ordinem, vel secundum ordinem rerum earumque objectivam dependentiam. Primum vocant ordinem *logicum* alterum *ontologicum*. Jam hoc loco *prius* et *posterius* non ad logicum ordinem, sed ad ontologicum referuntur. Nam in omni quidem demonstratione conclusio secundum ordinem logicum posterior est præmissis, ab iisque dependet; at non semper in ordine ontologico, veritas quæ in conclusione enuntiatur, ab eorum, quæ in præmissis continentur, veritate dependet.

Igitur quando veritas quæ est in conclusione, dependet secundum ontologicum ordinem a veritate eorum quæ sunt in præmissis, demonstratio dicitur *a priori*.

Quando autem in eodem ordine ontologico veritas quæ est in præmissis, dependet a veritate quæ est in conclusione, demonstratio dicitur *a posteriori*.

In illa subjectum conclusionis habet attributionem seu affectionem significatam per prædicatum, quia habet realita-

tem significatam per medium terminum : in hac e converso subjectum conclusionis habet quod significatur per medium terminum, quia habet quod exprimitur per prædicatum. Brevius : in illa medius terminus est ratio ontologica prædicati ; in hac prædicatum est ratio ontologica medii termini.

V. gr. si demonstro : *mundum sapienti consilio administrari*, per hunc medium terminum, quod a *sapientissimo providore regitur* ; demonstrationem instituo a priori : ideo enim mundus sapienter administratur, quia a sapientissimo providore regitur. Quum vero demonstro *terre rotunditatem* ex umbra quam terra projicit in discum lunarem, quando fit eclipsis, demonstratio est a posteriori : non enim terra est rotunda, quia umbram projicit rotundam, sed e contrario ideo umbram projicit rotundam, quia ipsa rotunda est.

* 295. Hinc intelliges, 1^o quare Aristoteles (1) demonstrationem quæ a priori est, appellaverit *propter quid* (διότι), et eam quæ a posteriori est, *quia* (ὅτι). Nam in demonstratione a priori non solum manifestatur prædicatum conclusionis inesse subjecto ; sed etiam ratio ontologica propter quam inest ; in demonstratione vero a posteriori manifestatur solum, quod subjectum tale sit. Adverte tamen, Aristotelem demonstrationem *propter quid* appellasse eam solum, quæ fit per causam proximam ; eam vero, quæ fit per causam remotam, rejecisse ad demonstrationem *quia* ; ex eo quod cognita causa remota, nescimus proprie cur res sit, nisi per alias demonstrationes ad causam usque proximam immediatamque deveniamus. Sic v. gr. nescimus, cur sint phases lunares, si novimus lunam a sole illuminari, nisi etiam noverimus lunam esse corpus sphæricum, et respectivas positiones inter lunam, terram, ac solem variari.

2^o Intelliges quoque, quando fieri possit demonstratio a priori, quando illa solum, quæ est a posteriori. Nempe quando ratio ontologica cur res sit, prior est etiam in ordine logico, et notior rationato quod ab ea dependet, demonstratio a priori locum habet. Quando vero, prout sæpe contin-

(1) I Post, c. X.

git, rationatum prius cognoscitur quam ratio ejus, necesse est demonstrationem ab illo ad hanc procedere.

3^o Patet autem, utramque demonstrationem in iis solum esse possibilem, quæ necessario nexu in ontologico ordine copulantur, et ex ea solum parte, ex qua necessaria ad alterum connexio habetur. Sic v. gr. a mundi existentia demonstramus Dei existentiam, quia mundus non potest aliunde procedere quam a Deo : at non e converso, ex Dei existentia mundi existentia demonstrari potest, quia non necessario Deus mundum condidit.

* 296. Ratio porro ontologica in duplici et ipsa ordine sedem habet ; videlicet in ordine *physico* seu *existentiæ*, et in ordine *metaphysico* seu *intelligibilitatis*.

Ratio ontologica in ordine physico, est omnis causa proprie dicta relate ad suum effectum. Est autem causa hujusmodi quadruplex, videlicet *efficiens* quæ rem producit, *finis* cujus gratia res fit, *materia* ex qua fit, et *forma* qua determinatum esse res accipit.

Ratio vero ontologica in ordine metaphysico est essentia, seu definitio (125, 1^o), relate ad attributa, et attributa quædam relate ad alia ; quia intellecta essentia rei, intelligibile fit cur attributa quædam ad illam pertineant (57, 4^o) ; et quibusdam intellectis attributis, alia attributa ex illis dimanant. Sic v. gr. ex eo quod homo est rationalis, patet esse liberum, et ex eo quod est liber, consequitur esse meriti demeritique capacem.

* 297. Restat ut et de demonstratione *regressiva* seu *circulari* mentionem faciamus. Hæc duplicem demonstrationem simul complectitur, *a posteriori* et *a priori*, quatenus per illam ascendimus ad cognoscendam causam, et causa cognita, ab hac ad effectum regredimur. Quæ quidem regressio non modo vitiosa non est, sed imo maxime perfecta. Etenim per demonstrationem a posteriori, causæ solum cognoscimus existentiam : qua cognita, causæ ipsius essentiam ac naturam speculamur, ac deinde per illam plenius ac distinctius, et cognitione vere scientifica, effectus naturam amplitudinemque cognoscimus. Sic v. gr. postquam ex mundi ordine

divinam providentiam demonstravimus, ex hac multo perfectius ipsum mundi ordinem cognoscimus, etiam, in iis quæ experientia non attingit, et rationis nostræ capacitatem excedunt.

ARTICULUS III.

De principiis demonstrationis.

298. Dicitur demonstrationis principium *omnis enuntiatio, quæ fundamenti loco assumitur ad demonstrandum*; quod nomen exinde habet, quod ab his enuntiationibus veluti ex fonte conclusionis scientia promanat. Sciendum est autem, principia quædam actu influere in demonstrationem, quædam virtute. Actu influunt principia, quæ ad demonstrandum diserte assumuntur, et hæc principia sunt demonstrationis præmissæ. Virtute vero, quæ ex natura ratiocinii, vel certitudinis, vel materiæ supponuntur; ut sunt principia identitatis et discrepantiæ (221), quibus omne ratiocinium innititur, principia item unicuique figuræ propria (252), principium contradictionis: *idem non potest simul esse et non esse*, et cæteræ primitivæ veritates, ex quibus omnis certitudo pendet. Et hæc quidem in omnem influunt demonstrationem: quædam vero influunt in demonstrationes tantum peculiarium scientiarum, ut v. gr. in totam mechanicam hoc fundamentale principium: *vires possunt exprimi per lineas*.

299. Principia demonstrationis quæ actu demonstrationem efficiunt, nam de his nunc loquimur, alia sunt immediata, alia mediata, nempe per alia principia jam demonstrata (290). Item alia sunt analytica, alia synthetica (146). De analyticis prius aliqua veniunt notanda, deinde aliqua de syntheticis.

1° In principiis analyticis prædicatum vel pertinet ad essentiam definitionemque subjecti, vel ab ea derivatur (146, 1.º a).

2° Principia analytica sunt universalialia natura sua, et, quidem universalitate metaphysica (163, 5º).

3° Sunt absolute necessaria, quatenus eorum oppositum

ubique, semper, in quavis hypothesis repugnat (146, 1º a).

300. Si principia analytica mediata sint; ab aliis principiis evidentiam suam ope demonstrationis mutuuntur. Et quoniam infinitus processus non datur, ad aliqua tandem principia deveniendum est, quæ sint nota per se, nec medio indigeant quo demonstrantur. Hæc principia nota per se sunt ea, ex quibus ultimato omnis demonstratio procedit.

Illa porro principia sunt nota per se, quæ statim ac termini quibus constant intelliguntur, assensum mentis indeclinabiliter extorquent. Ejusmodi sunt illa, quorum prædicatum vel pertinet ad essentiam subjecti, vel ab ea immediate consequitur; ut hoc: *totum est majus sua parte*, id quod intelligendum est de essentiis, quæ nobis sunt cognitæ. Si enim essentia subjecti sit nobis incognita, ea quæ pertinent ad illam, experientia solum mediante innotescere possunt, ut in rebus naturalibus contingit.

301. Principia analytica ac nota per se, alia sunt *communia* omnibus scientiis, alia *singulis propria*. Communia sunt quæ non a docentibus accipiuntur, sed institutionem omnem doctrinamque prævertunt, ut quæ omnibus sponte affulgent, omnemque ad se intellectum rapiunt. Hujusmodi v. gr. sunt hæc: *Idem non potest simul esse et non esse. Quodlibet est aut non est. Quæ sunt identica cum uno tertio, sunt identica inter se*, etc. Talia potissimum pronuntiata vocantur *axiomata* h. e. *dignitates*; quia principem locum inter principia obtinent.

Alia vero sunt peculiarium scientiarum propria, quæ quidem immediate patent intelligenti subjecti definitionem; sed quia hæc non est omnibus naturaliter nota, idcirco et illa non omnibus nota sunt, sed a docentibus accipiuntur. Tale est illud geometrarum: *Omnes anguli recti sunt æquales*, et illud logicorum: *Duæ contradictoriæ non possunt simul verificari*. Principia hæc vocantur ab Aristotele (1) *positiones*.

302. Principia quoque synthetica seu experimentalia, alia sunt *immediata*, alia *mediata*. Immediata sunt illa, quæ absque

(1) I Post, c. II.

nullo ratiocinio, experimentum sponte consequuntur. Quæ omnia sunt singularia, quia experimentum fit per sensus, hi autem nonnisi singularia attingunt.

Mediata illa sunt, quæ præter experientiam ratiocinii adjuvamento formantur, quæ et singularia, et particularia, et universalia esse possunt. Omissis singularibus et particularibus, in quibus nulla est difficultas, videndum quomodo per experientiam ad universalia principia assurgere possimus. Hoc fit per *inductionem*, de qua nunc est aliquid dicendum.

ARTICULUS IV.

De inductione.

303. *Inductio* (παράγωγη), si hanc vocem pro amplissima sua significatione definire velimus, est *transitus omnis a singularibus ad universale*. Quoniam autem et universales ideæ sunt, et universalia judicia, alia est inductio qua a singularibus ideis ad ideam ascendimus universalem, alia qua a singularibus judiciis ad iudicium universale provenimus. De prima non est nobis in præsentī sermo; de qua aliquid jam dictum est, quum de ideis universalibus ageretur (33), et de investiganda definitione methodo collectionis (136, 137).

Altera, quæ est transitus a propositione singulari ad universalem, in duplici differentia est. Vel enim fit transitus iste *per modum abstractionis* vel *per modum argumentationis*. Transitus per abstractionem locum habet in principiis analyticis, saltem in iis, quæ non sunt naturaliter omnibus nota (304): quatenus primo in aliquo singulari apprehendimus terminos, et terminorum identitatem, ac deinde universalitatem principii absolutam agnoscimus; ut v. gr. prius cognosco domum esse totum, et conclave partem, ac domum esse conclavi majorem, ac deinde in hoc, et per hoc, omne totum esse majus sua parte. Hac in re singularia sunt occasionēs, atque adeo requisita, ut intelligantur termini, et fiat illa reflexio, quæ ad formandum principium necessaria est, sed non sunt necessaria ad demonstrandam principii veritatem, quæ intellectis terminis patet per se. Inductione quoque

hac nunc ommissa, venio ad eam quæ fit per modum argumentationis, quæque in principiis syntheticis locum habet.

304. Hæc igitur, quæ proprium sibi jam fecit inductionis nomen, est *argumentatio, per quam concludimus de subjecto universali id, quod de inferioribus ejus singillatim affirmavimus vel negavimus, experientia docente*. Est autem experientia externa, de qua sermo nobis est: *cognitio quævis ope sensuum comparata*. Quæ vel ultro se offert, vel consilio quæritur atque arte. Postrema hæc *observatio* dicitur, quum ad factum sensibile a nostra industria independens attendimus; *experimentum*, quum factum industria nostra producitur.

Jam inductio nunc definita duplex est *completa* et *incompleta*.

Inductio completa est, quum de toto universali concludimus id, quod *de omnibus* inferioribus ejus singillatim affirmavimus vel negavimus; ut si dicas: visus aliquando nobis est erroris occasio, auditus item et tactus, nec non gustus et odoratus. Ergo omnes sensus sunt aliquando nobis erroris occasio.

Manifestum est, inductionem completam argumentationem invictam esse et per se evidentem. Manifestum est item eam enthymemate contineri, cujus antecedens est enumeratio copulativa (85, 1^o) propositionum, in quibus singulis inferioribus prædicatum tribuitur.

Si igitur subjectum universale vocetur U, inferioraejus A, B, C... X, et prædicatum illis conveniens P, inductio completa per hanc formulam ad syllogismum reducetur:

Et A, et B, et C... et X sunt P;

Sed omne U, vel est A, vel est B, vel est C... vel est X:

Ergo omne U est P;

in qua medius terminus sunt enumerata inferiora; quæ quidem enumerantur distributive in majori, disjuncte in minori, ut proprium est modi *Barbara* in prima figura.

305. Animadvertite 1^o inductionem hujusmodi non esse argumentationem sui generis, spectata forma; est enim secundum formam purum putumque enthymema; sed solum spectata materia.

* 2^o Quum argumentatio dividitur in syllogismum et inductionem (1), divisionem hanc fieri ratione materiæ, non ratione formæ. Syllogismus enim opponitur inductioni, ut docet Aristoteles (2), in eo quod syllogismus adhibetur ad eas probandas conclusiones, *quarum est medium*, inductio autem ad eas, *quarum non est medium*: quia nempe in argumentatione inductiva extremum minus, et medius terminus sunt revera unus idemque conceptus, qui nihilominus diversimode exprimitur, ut patet ex dictis. Bis enim in sua forma universalitatis exprimitur, ac bis per subjectivarum partium enumerationem; id quod sufficit ad habendam syllogismi formam.

306. Inductio incompleta fit, quum concludimus de universali subjecto id, quod de *multis* inferioribus ejus singillatim affirmandum vel negandum esse cognovimus.

Est argumentatio hæc non solum in omnibus physicis disciplinis usitatissima, sed etiam communium cognitionum vulgare instrumentum. Hoc enim argumento discimus illa, quæ nemo mortalium ignorat: *omne corpus sibi dimissum deorsum agi, omnes homines esse mortales, omnem ignem adurere*, et cætera hujusmodi, quæ certissima nobis sunt, quamquam inductione completa nemo in his uti possit; non enim de omnibus ac singulis individuis quæ his principiis complectimur, experimentum sumere possibile est, sed solum de quibusdam.

Quomodo vero hæc sit legitima argumentatio, quamvis a quibusdam particularibus universe concludat, paucis accipe.

Primo experientia præcedat oportet, eaque habita circa plura individua, ex qua deprehendamus, variatis licet omnibus adjunctis, eandem illis proprietatem, actionem, passionem, aut aliquid hujusmodi constanter et uniformiter convenire. Si hoc noverimus, concludere necesse erit, non fortuito, nec sine ratione constantem hunc et uniformem effectum haberi; tum etiam non ab adjunctis individualibus,

(1) Arist. II, Prior, c. 29, et I Post, c. 1.

(2) II, Prior, c. 29.

et variabilibus loci, temporis, rerumque circumstantium, effectum talem produci, sed a causa quæ in omnibus individuis observatis eadem viget, et constanter atque uniformiter operatur. Quæ causa cum alia esse nequeat, nisi ipsa individuorum natura, iterum concludemus, factum a nobis observatum ab ipsa individuorum illorum natura prodire. Et exinde dimanat conclusio universalis: id enim quod a quarundam rerum natura procedit, omnibus universim quæ eandem naturam habent, debet esse commune.

* 307. Hinc liquet, 1^o inductionem incompletam non esse argumentationem a syllogismo diversam; nisi quod non uno tantum, sed multiplici syllogismo continetur. Per tres enim syllogismos, quasi per quosdam gradus, a singularibus notatis ad universalem conclusionem attollimur. Sunt autem:

a) *Effectus qui, variatis licet adjunctis, sit constans et uniformis, a causa provenit constanti et uniformi;*

Sed effectus quem animadverti in his individuis, de quibus experientiam habui, variatis licet adjunctis, constans fuit et uniformis:

Ergo effectus iste provenit a causa constanti et uniformi.

b) *Quod constanter inest pluribus et uniformiter, id ad eorum naturam reducitur;*

Sed causa constans et uniformis effectus notati, debet esse aliquid, quod individuis constanter insit et uniformiter:

Ergo causa constans et uniformis effectus notati ad individuorum naturam reducitur.

c) *Quod a natura quorundam individuorum procedit, commune esse debet omnibus omnino individuis, quæ eandem naturam habent;*

Sed effectus notatus in individuis istis, ab illorum natura procedit:

Ergo communis esse debet omnibus omnino individuis, quæ eandem naturam habent.

2^o Manifestum est, inductionem incompletam non posse dici syllogismum sine medio (1, 305, 2^o).

3^o Ut inductio incompleta certam conclusionem suppediet, certum esse debet, factum in pluribus notatum constans

fuisse et uniforme; tum etiam non aliunde quam a natura provenire posse. Si unum aut alterum certum non sit, inductio incompleta probabilitatem solummodo gignit, maiorem, vel minorem, prouti magis vel minus verisimile est, effectum observatum esse rerum naturæ adscribendum.

4^o Quapropter quum agitur de actionibus liberis, quæ non a natura hominis determinantur ad unum, sed ab ipsius electione pendent, hanc unam conclusionem inductio supeditat: homines in quibusdam adjunctis hoc modo potius quam alio, *ut plurimum*, agere solere. De cuius conclusionis certitudine alibi erit sermo.

308. Id quod propositio universalis per inductionem experimentalem formata exprimit, vocari solet *lex physica*, si ad entia irrationalia pertineat; *lex moralis*, si ad rationalia. In quibus appellationibus, *lex* idem sonat ac *modus constans et uniformis, quem agens in agendo servat*. In entibus irrationalibus, quæ ex necessitate agunt, modus iste dicitur *lex* per analogiam, quatenus effectus nomine causæ denominatur: causa enim cuius vi constantia et uniformitas effectuum in unaquaque entium specie servatur, est *lex* omnium auctoris et gubernatoris Dei. In entibus vero rationalibus, modus constans et uniformis quem in agendo sequuntur, dicitur *lex* per similitudinem cum legibus physicis; sed additur *moralis*, ut ostendatur, non a natura talem modum necessario procedere, sed more, i. e. consuetudine, contineri.

* 309. Inductiva igitur argumentatio propositiones syntheticas universales facit. Notandum est autem, propositiones quoque analyticas posse, ac non raro solere inductione probari sive completa sive incompleta: nisi quod in his singulæ partes tum observatione et experientia, tum demonstratione a priori (294) probari possunt. Inductionis in hoc genere completæ suppetunt passim exempla apud geometras, imo in quibusvis scientiis. Incompletæ per observationem algebra præsertim exempla præbet, quum vel formulas generales, vel formularum indefinitarum leges constituit.

ARTICULUS V.

De scientia.

310. Quoniam per demonstrationem scientia conclusionis acquiritur, admonet nos ipse locus, ut de scientia aliquid dicamus. Scientiæ vocabulum modo ampliorem, modo arctiorem significationem habet. Modo enim quaecunque cognitionem, modo cognitionem solummodo veram, quandoque veram et certam cognitionem ac demonstratione comparatam significat. Et hæc videtur esse communior hujus vocis acceptio: tunc enim aliquid scire dicimur, quum eorum quæ tenemus aut enuntiamus, rationem reddere possumus, quod quidem demonstratione fit (291, 294). Nihilominus apud philosophos pressiore adhuc significatione scientiæ vocabulo cohonestatur: 1^o conclusio quævis, quæ per demonstrationem a priori, nempe per rationem ontologicam deducitur; 2^o omne systema conclusionum demonstratarum, quæ circa unum objectum versantur. Prima scientia *partialis* dicitur, altera *totalis*. De hac postea. Scientia partialis definiri potest: *certa cognitio rei necessariæ per propriam causam*.

311. In qua definitione tria notanda sunt: 1^o quid sit et qualis actus ipse sciendi; 2^o cujusmodi sit objectum illius; 3^o quænam ratio, per quam objectum cognoscit.

1^o Actus est *cognitio* certa, nimirum firmo stabiliq; assensu rata. Per quod excluditur a scientiæ notione omnis apprehensio simplex, et omnis opinio, quæ incertum ac nutans iudicium est. Hic porro actus habitum inducit, facilitatem nimirum, quæ ad actum reproducendum inclinat.

2^o Objectum est *propositio, objective*, ut aiunt, *spectata*: nempe ut est connexio subjecti cum prædicato; quam veteres *enuntiabile* appellabant. Enuntiabile insuper *necessarium*, constans nimirum tali subjecto et tali prædicato, ut prædicatum subjecto ex necessitate conveniat. Quæ necessitas vel absolute ex rerum essentiis (299, 1^o), vel ex suppositione sive physicarum legum sive moralium (308) exsurgere potest, ut alibi opportunius docebimus.

3^o Ratio per quam hoc objectum cognoscitur, est *causa* ipsius *propria*, nempe ratio ontologica (296), eaque proxima et immediata (295, 1^o). Qua definitionis particula excluditur omnis cognitio historica (Prol. II), experientia nempe et *fides*, omnis propositio immediata, et omnis conclusio deducta per demonstrationem, qua docemur solum quod res sit (295, 10).

* 312. Duo supersunt declaranda. Primum est, quid sit cognoscere per causam. Cognitio per causam hæc tria importat, quemadmodum docet Aristoteles (1); videlicet 1^o ut cognoscamus causam proximam, ob quam res est; v. gr. si sermo sit de lunæ phasibus, diversas esse positiones respectivas solis, terræ ac lunæ; 2^o ut cognoscamus id vere esse rei causam, nimirum rem ab hac causa in ontologico ordine dependere; si enim cognoscis id quod causa rei est, sed non deprehendis id esse rei causam, rem profecto per causam non cognoscis; ut si quis cognosceret variabilitatem positionum solis, terræ ac lunæ, sed nondum cognosceret hinc oriri stas lunæ vices; 3^o ut cognoscamus, quod res propter talem causam aliter se habere non potest; videlicet ut necessitas enuntiabilis (311, 2^o), quæcunque illa sit, per eam causam nobis explicetur.

* 313. Alterum, quod declarandum restat, est: perfectam scientiam non haberi nisi per causam, modo videlicet explicato.

Quod quidem suadetur 1^o ex humanæ mentis natura. Mens enim humana non satis habet, si historicam cognitionem adeptæ fuerit, aut eam quæ ab effectuum observatione progreditur, sed insito quodam studio nosse desiderat, cur res ita sit; ita ut nativæ hæc sciendi cupiditas quiescere non possit, nisi ubi rei causam mens detexerit. Illa autem perfecta scientia merito dicitur, in qua sciendi desiderium conquiescit; ergo cognitio per causam perfecta scientia jure nuncupatur.

2^o Idipsum deduces ex rei natura. Perfectæ enim scientiæ

(1) I Post, c. II.

est, ut rem cognoscat secundum quod illa est. Sed res non est nec potest esse, nisi dependenter a suis causis.

3^o Perfectæ quoque cognitionis est, ut non solum apprehendat prædicatum inhærere subjecto, sed etiam quomodo inhæreat, num mutabiliter, an vero immutabiliter. Sed hoc, si principia per se nota excipias, cognosci nequit nisi per causam, quæ radix est et origo, ob quam inhæreat.

Illud porro necesse ut præ oculis habeatur, cognitionem hanc per causam non semper posse haberi: in physicis autem disciplinis cognitionem rei per causam haberi non posse, nisi antea per experientiam et inductionem naturarum, ejusque leges compertæ fuerint. Qui secus egerunt, quique experiendi artem dedignati, physicam a priori construxerunt, illi ingeniosa mentis propriæ figmenta, non rerum naturam explicarunt.

ARTICULUS VI.

De scientiis totalibus.

314. Scientia totalis est, ut jam diximus (310), *systema conclusionum demonstratarum, quæ circa unum objectum versantur*. Ex quo patet, unitatem scientiæ ab objecti unitate determinari. Est autem unum generatim objectum, quod conceptu aliquo modo uno, vel una definitione continetur, habetque affectiones proprias, quæ per talem conceptum vel definitionem demonstrari possint. Sic omnes morbi unum constituunt objectum medicinæ, quia unica definitione generatim construngi possunt; et omne ens est unum objectum ontologiæ, quia unus est conceptus, quanquam sit analogicus.

315. Notandum porro, scientiæ unitatem non ab unitate materialis objecti, sed ab unitate objecti formalis (15) desumi; ab unitate videlicet rationis, sub qua objectum materiale cognoscitur, et affectiones demonstrabiles exhibet. Et hoc formale objectum dicitur respectu scientiæ, *objectum*, seu *subjectum attributionis*. Hinc quoniam unum idemque objectum materiale per plures suas affectiones potest cognosci, consequitur unum idemque objectum materiale plurium scientiarum objectum esse posse: sic corpora sunt objectum

geometriæ et mechanicæ, sed geometriæ ut extensionem habent, mechanicæ, ut quibusdam viribus prædita sunt. E contrario, quum diversa objecta materialia una idea specifica vel generica complectimur, ea omnia sub eadem ratione formali sciri possunt, unamque scientiam constituere, sicuti, v. gr. voces humanæ et rerum inanimatarum soni, sub una musica comprehenduntur, quia una idea soni continentur, ex qua pro utrisque leges consonantiæ et dissonantiæ eadem dependent.

316. Omnis scientia, cum sit demonstrationum complexio, prima quædam principia assumat oportet, quæ insequentium demonstrationum sint fundamentum, quæque ipsa non demonstret. Ex quo commune adagium: nullam scientiam sua probare principia. Desumit autem hæc prima principia ex objecti consideratione. Quæ quidem quandoque sunt nota per se, ut illud mathematicorum: *si ab æqualibus demas æqualia, residua sunt æqualia*, et his similia: quandoque vero demonstrabilia sunt, et ab alia scientia demonstrantur, quia ad proprium illius objectum pertinent. Sic v. gr. astronomiæ principia a mechanica demonstrantur, et principia musicæ ab arithmetica.

* 317. Ex his quæ dicta sunt, facile intelligere poteris, quid sit scientiarum subalternatio.

Dicitur generatim una scientia alteri subalternari, quatenus aliquo modo ab illa dependet, ad illamque refertur. Quæ subalternatio potest esse 1^o *ratione finis*, quum objectum unius refertur ad objectum alterius, aliquo saltem modo, tanquam medium ad finem; ut scientia militaris subordinatur politicæ, et pharmaceutica medicinæ: 2^o *ratione principiorum*, quum principia unius scientiæ sunt conclusiones in altera demonstratæ: 3^o *ratione subordinationis logicæ*, quum nempe objectum materiale unius continetur sub objecto formali alterius, quo modo scientiæ omnes naturales ontologiæ subordinantur.

Quodvis porro objectum ad diversarum scientiarum objecta formalia contrahitur, vel per differentiam essentialem,

ut corpus ad corpus organicum, vel per differentiam accidentalem, ut numerus ad numerum sonorum.

Nota demum, subalternationem hanc logicam importare subalternationem etiam quoad principia, saltem pleraque, quum principia exoriantur ex objecti consideratione: non tamen e converso hanc illam inferre.

* 318. Superest adhuc explicandum, receptissimum illud apud philosophos post Platonem principium: *scientiam omnem de universalibus tantum esse, non vero de singularibus*. In quo recipiendo nullam reperiesset difficultatem, si animadvertas, excepto Deo Optimo Maximo, cujus natura est essentialiter unica et nulla ratione multiplicabilis, singularia quæcunque non habere proprietates ullas a speciei proprietate diversas; et quæcunque illis accidunt, aliis pluribus in eadem specie accidere posse. Hinc quodcunque sit scientiæ objectum, hoc semper est ratio aliqua quæ pluribus communis est, vel esse saltem potest, uti sunt rationes quas consideramus, quum de sole v. gr. aut luna aut mundo disserimus. Quod si dicas singularia habere nihilominus differentias individuantes, quæ singularitatem cujusque constituunt, reponam in primis, singularitatem cujusque, nempe id per quod unum differt intrinsece ab alio, non cognosci a nobis intrinsecus, sed solum per externas affectiones aut relationes (31); deinde etiamsi cognosceretur in se singulare, nihilominus scientiam quæ ex ea cognitione deduceretur, non fore rei singularis, sed communis; quæcunque enim ab ea singularitate necessario procedunt, non singularia, sed communia de se sunt, ut supra diximus.

CAPUT III.

DE ARGUMENTATIONE PROBABILI.

ARTICULUS I.

Prævia quædam.

319. Argumentatio probabilis est ea, quæ ex utraque vel alterutra præmissa probabili concludit. Est autem propositio

probabilis juxta Aristotelis definitionem (1), ea quæ vera videtur omnibus, aut plurimis, aut sapientibus, atque his vel omnibus, vel plurimis, vel spectatissimis; ut v. gr. : *Obsequium amicos conciliat*; quæ ab omnibus habetur vera; vel : *Veritas odium parit*; quæ omnibus sapientibus probatur. Hæc quoad externam, ut ita dicam, probabilis speciem; intrinsecus autem, in hoc differt propositio probabilis a certa et evidenti, quod cum non omnem abigat oppositi formidinem, non potest mentis assensum indeclinabiliter sibi vindicare, id quod propositionis certæ et evidenti proprium est. Tamen cum momenta pro se habeat minime spernenda, demereri sibi potest viri prudentis assensum, præsertim quum ita veritati similis est, ut vel omnibus, vel plurimis, vel saltem sapientibus se suaserit. Sed de hoc alias. Nunc satis est animadvertere, argumentationem probabilem a demonstrativa ex ipsa præmissarum natura in hoc differre, quod cum demonstrativa scientiam pariat conclusionis (310), probabilis conclusionem solummodo probabilem facit.

* 320. Vocatur argumentatio hæc ab Aristotele (2) *sylogismus dialecticus*, quia conclusio ad quam adducit, in utramque partem plus minus disputabilis est, id quod proprie significat verbum *διαλέγεσθαι*. Neque idcirco spernendæ cognitiones istæ, aut minori in pretio habendæ; in primis quia cognitiones probabiles aditum sæpe parant certitudini: deinde vero quia in multis, atque adeo plurimis rebus, tum ad humanum commercium, tum etiam ad nobilissimas disciplinas spectantibus, nulla suppetit demonstratio ex qua evidentes conclusiones procedant; in his ergo probabili argumento, si datur, contentos nos esse oportet.

* 321. Quemadmodum propositiones omnes evidentes ac certæ ad principia per se nota reducuntur (300), ita propositiones omnes probabiles ad principia per se probabiliâ reducuntur necesse est. Est autem propositio per se probabilis, quæcunque propositio, quæ statim ac terminis cognoscuntur, absque ulteriori inquisitione aut confirmatione probatur; ut : *Quod in uno similitum valet, valet in cæteris*; vel :

(1) 1 *Top.* 1. — (2) *Ibid.*

Quod maxima pars eorum, qui in quavis arte periti sunt, dicit, id verum est; quæ sententiæ dicuntur *maximæ*, quasi *plusquam majores*, quia quælibet earum continet plurimas sententias magis particulares, quæ ad arguendum assumi possunt.

* 322. Item quemadmodum argumentatio demonstrativa alia est a priori, alia a posteriori, ita et probabilis. Omnis enim argumentatio probabilis, vel ad analogiam, vel ad hypothesin revocatur. Illa autem a priori procedit, hæc a posteriori. Quare loca omnia dialectica ad bina hæc reducuntur. De utroque aliquid.

ARTICULUS II.

De analogia.

323. Analogia i. e. proportio, ut supra diximus (68), est identitas rationum, quas duo habent ad alia duo. Hoc autem loco non de analogia simpliciter sermo nobis est, sed de argumentatione, quæ ab analogia ducitur. Quæ definiri ita potest : *argumentatio per quam ab una proportionem nobis comperta, aliam proportionem non compertam inferimus*. Ex quo patet, analogiæ argumentum inductionem imperfectam merito vocari. Inductio enim a partibus ad totum genus procedit; analogia a parte procedit ad partem, quæ sub eodem genere utique contineatur. V. gr. video brutum cum homine quoad plura convenire in actibus ac motibus ad quorundam objectorum præsentiam; concludo bruta convenire nobiscum, etiam quoad sensationes ab ejusmodi objectis excitatas. Hoc argumentandi genere passim utimur, ejusque ope cognitiones pene innumeras adipiscimur. Eloquentia, poesis, ceteræque artes quæ imitatione continentur, quo fundamento nituntur, quibus subsidiis juvantur, quibus normis reguntur, nisi analogiæ? Hinc physicorum systematum prima semina, ac celeberrima nostræ ætatis inventa eruperunt. Hinc scientiæ præsertim experimentales et practicæ, uti astronomia, medicina, politica, critica, philologia, primo addiscunt quæ observationes instituendæ sint, quæ tentanda experimenta, quæ hypotheses stabiliendæ. Neque aliud fere est sagacitas illa, qua experrectæ mentes veritatem pro-

probabilis juxta Aristotelis definitionem (1), ea quæ vera videtur omnibus, aut plurimis, aut sapientibus, atque his vel omnibus, vel plurimis, vel spectatissimis; ut v. gr. : *Obsequium amicos conciliat*; quæ ab omnibus habetur vera; vel : *Veritas odium parit*; quæ omnibus sapientibus probatur. Hæc quoad externam, ut ita dicam, probabilis speciem; intrinsecus autem, in hoc differt propositio probabilis a certa et evidenti, quod cum non omnem abigat oppositi formidinem, non potest mentis assensum indeclinabiliter sibi vindicare, id quod propositionis certæ et evidentiæ proprium est. Tamen cum momenta pro se habeat minime spernenda, demereri sibi potest viri prudentis assensum, præsertim quum ita veritati similis est, ut vel omnibus, vel plurimis, vel saltem sapientibus se suaserit. Sed de hoc alias. Nunc satis est animadvertere, argumentationem probabilem a demonstrativa ex ipsa præmissarum natura in hoc differre, quod cum demonstrativa scientiam pariat conclusionis (310), probabilis conclusionem solummodo probabilem facit.

* 320. Vocatur argumentatio hæc ab Aristotele (2) *sylogismus dialecticus*, quia conclusio ad quam adducit, in utramque partem plus minus disputabilis est, id quod proprie significat verbum *διαιρέσις*. Neque idcirco spernendæ cognitiones istæ, aut minori in pretio habendæ; in primis quia cognitiones probabiles aditum sæpe parant certitudini: deinde vero quia in multis, atque adeo plurimis rebus, tum ad humanum commercium, tum etiam ad nobilissimas disciplinas spectantibus, nulla suppetit demonstratio ex qua evidentes conclusiones procedant; in his ergo probabili argumento, si datur, contentos nos esse oportet.

* 321. Quemadmodum propositiones omnes evidentes ac certæ ad principia per se nota reducuntur (300), ita propositiones omnes probabiles ad principia per se probabiliâ reducuntur necesse est. Est autem propositio per se probabilis, quæcunque propositio, quæ statim ac terminis cognoscuntur, absque ulteriori inquisitione aut confirmatione probatur; ut : *Quod in uno similium valet, valet in cæteris*; vel :

(1) 1 *Top.* I. — (2) *Ibid.*

Quod maxima pars eorum, qui in quavis arte periti sunt, dicit, id verum est; quæ sententiæ dicuntur *maximæ*, quasi *plusquam majores*, quia quælibet earum continet plurimas sententias magis particulares, quæ ad arguendum assumi possunt.

* 322. Item quemadmodum argumentatio demonstrativa alia est a priori, alia a posteriori, ita et probabilis. Omnis enim argumentatio probabilis, vel ad analogiam, vel ad hypothesein revocatur. Illa autem a priori procedit, hæc a posteriori. Quare loca omnia dialectica ad bina hæc reducuntur. De utroque aliquid.

ARTICULUS II.

De analogia.

323. Analogia i. e. proportio, ut supra diximus (68), est identitas rationum, quas duo habent ad alia duo. Hoc autem loco non de analogia simpliciter sermo nobis est, sed de argumentatione, quæ ab analogia ducitur. Quæ definiri ita potest : *argumentatio per quam ab una proportionem nobis comperta, aliam proportionem non compertam inferimus*. Ex quo patet, analogiæ argumentum inductionem imperfectam merito vocari. Inductio enim a partibus ad totum genus procedit; analogia a parte procedit ad partem, quæ sub eodem genere utcumque contineatur. V. gr. video brutum cum homine quoad plura convenire in actibus ac motibus ad quorundam objectorum præsentiam; concludo bruta convenire nobiscum, etiam quoad sensationes ab ejusmodi objectis excitatas. Hoc argumentandi genere passim utimur, ejusque ope cognitiones pene innumeras adipiscimur. Eloquentia, poesis, ceteræque artes quæ imitatione continentur, quo fundamento nituntur, quibus subsidiis juvantur, quibus normis reguntur, nisi analogiæ? Hinc physicorum systematum prima semina, ac celeberrima nostræ ætatis inventa eruperunt. Hinc scientiæ præsertim experimentales et practica, uti astronomia, medicina, politica, critica, philologia, primo addiscunt quæ observationes instituendæ sint, quæ tentanda experimenta, quæ hypotheses stabiliendæ. Neque aliud fere est sagacitas illa, qua expectatæ mentes veritatem pro-

pemodum odorantur, venatuque studioso prosequuntur, quam facilitas quædam et promptitudo analogias in analogiis detegendi, detectasque applicandi, ampliandi, confirmandi.

324. Principia quibus analogiæ argumentatio innititur, hæc fere sunt :

Quod in uno similium valet, valet in cæteris.

Quod non valet in uno similium, nec in cæteris valet.

Res similes effectus similes produciunt.

Res similes proprietatibus similibus instructæ sunt,

Secundum similes typos conditæ sunt,

Similes fines habent,

Similibus legibus gubernantur, etc.

Dissimilibus dissimilia conveniunt.

Contrariorum contrariæ sunt causæ, etc.

Hinc deduces 1^o Analogiam, si argumenti formam spectes, enthymema esse, atque ad syllogismum reduci; id quod hoc pacto fit, v. gr.

Similes causæ similes gignunt effectus;

Sed hæ causæ similes sunt:

Ergo similes gignunt effectus;

Sed effectus causæ A, quem cognosco, talis est;

Ergo et effectus causæ B, mihi ignotus, talis est.

2^o Conclusiones e sola analogia deductas, intra probabilitatis limites ex se coerceri. In inductione siquidem, antequam concludamus de toto id, quod in singulis animadvertimus, certi sumus (306), eam proprietatem de qua agimus, ad naturam singulorum pertinere; at dum analogiæ argumento insistimus, minime nobis constat, eam proprietatem quam deducimus, ad naturam utriusque analogi se extendere, et e notis utrique communibus consequi; sed hoc solummodo suadet nobis ex convenientia quadam, quæ a supra positis principiis efflorescit. Jam duæ rerum classes, quantumvis similes, cum tamen in quibusdam inter se discrepent, possunt et in ea proprietate, quam nos conjicimus utrique communem, et in aliis reipsa differre: præsertim cum naturæ ordo sit nobis magna ex parte inexploratus.

Cæterum quo plura sunt et notatu digniora ea in quibus duo conveniunt, eo major est probabilitas quam analogiæ argumentum suppeditat.

3^o Hæc valent de analogiæ argumento per se spectato. Potest enim conclusio inde deducta, aliunde certa esse, vel per inductionem vel per alia argumenta demonstrativa.

4^o Vix est cur moneamus, analogiæ argumentum quod modo describimus, a proportionibus arithmetico et geometrarum longe differre. Hi enim vel simpliciter notant proportionem duorum ad alia duo quæ per se evidens sit, vel demonstrant eam haberi; argumentatio vero hæc, a proportionem cognita, aliam ex probabilibus principiis infert.

5^o Ex quo postremo intelliges, quandonam proportionem a majori ad minus, a minori ad majus, a pari a contrario certas conclusiones præbeant, aut probabiles tantum.

325. In analogiæ usu hæc maxime vitia cavenda.

1^o Contemptus, quo vitio laborant homines angustæ mentis, qui naturæ harmoniam et proportionum convenientiam non sentiunt.

2^o Æstimatio nimia, qua quis analogiæ vim ac pondus pluris faciat, quam par est, ac contrarias demonstrationes illi posthabeat.

3^o Nimia coarctatio, ut si quis animam sentientem brutis denegaret, quia bruta cum homine non undequaque conveniunt.

4^o Nimia extensio, ut si quis e converso brutis intelligendi vim tribueret, vel Deo humanum corpus humanasve passionem.

326. Ad analogiam pertinent, quasi duæ species, *similitudo* et *exemplum*. Quæ duo in hoc differunt, quod similitudine utimur ad colligenda attributa vel effectus vel causas unius analogi, ex iis quæ sunt alterius; ut quum ex conditionibus quæ ad recte gubernandam navim in navarcho requiruntur, conditiones ad rempublicam administrandam necessarias colligimus: exemplo autem progredimur ab una re gesta ad aliam similem, quam fieri debere vel posse contendimus.

Quod si res non sit gesta, sed ficta, quæ tamen ut gesta narretur, exemplum dicitur *parabola* vel *apologus*.

Inductio quæ dicitur *socratica*, nihil est aliud nisi exemplorum congeries.

ARTICULUS III.

De hypothesi.

527. Hypothesis, seu suppositio, est *propositio, cujus veritas nondum demonstrata est, quæ tamen assumitur tanquam vera, quia aliqua facta commode explicat.*

Sic v. gr. physici existentiam ætheris subtilissimi quaquaversus diffusi, ejusque motus undulatorios assumunt, tanquam hypothesin, ad lucis phænomena explicanda. Hypothesium porro maximus est usus, in scientiis præsertim experimentalibus, imo quandoque ejus usus est plane necessarius, sive ut observationes experimentaque instituere possimus, sive ut ad factorum causas, quæ nondum evidentiæ luce claruerunt, aliquo modo accedamus.

Patet hinc hypothesin citra probabilitatis fines consistere. Argumenta enim omnia, quibus hypotheses probamus, his præmissis constant:

Si existeret hæc causa, talia facta nobis exhiberentur;

Sed talia facta nobis exhibentur;

Ergo? An deduces abrupte causam quam assignas, existere? At id vetat conditionalis syllogismi natura (262). Quid igitur inde concludere licebit? Hoc profecto, et nihil aliud, videlicet: *feri potest, ut hæc causa existat.* Si tamen hypotheses omnes possibles collectas habeas, ac demonstres esse omnes excludendas præter unam, quia hanc unam facta confirmant; tunc profecto absolute concludes (263): *hæc causa certe existit, et hypothesis in thesim mutabitur.*

* 528. Pro varia factorum natura, triplex est hypothesium classis: *physica, moralis, logica* seu *hermeneutica*.

Physica assumitur ad explicanda naturæ phænomena, quæ cum necessariis legibus regantur, ad irracionales causas immediate referenda sunt, mediate vero ad divinæ sapientiæ omnia ordinantis ac temperantis consilium: nisi factum

tale sit, ut immediate vel ad agens præternaturale, vel ad divinam omnipotentiam quæ prodigialiter intersit, referri debeat; in quo et nimia facilitas et nimia repugnantia philosopho cavendæ sunt.

Moralis locum habet in iis, quæ a libertate pendunt entium intelligentium. Sic a signis actibusque externis ad propensiones hominum internosque sensus; a factis ad auctores facti, eorumque consilia, fines ac motiva agendi; a regnorum ac nationum historia ad causas fœderum, bellorum, civilium motuum, prosperitatis populorum ac ruinæ assurgimus.

Logica tandem sive hermeneutica in verborum ac sententiarum obscuriorum interpretatione versatur, et continetur auctoris sententia, quæ cum verborum significatione, usu loquendi, cæterisque scriptoris adjunctis sive internis, sive (101) externis conspiret.

529. Quæcunque vero sit hypothesis, ut ea probabilis evadat, hæ conditiones necessario requiruntur:

1^a *ut sit possibilis*; id quod exigit primo quidem, ut repugnantiam intrinsecam non includat; cujusmodi est hypothesis epicuræa materiæ improductæ, et casu in varia corpora digestæ: deinde vero, ut exploratis legibus, sive physicis sive moralibus sive hermeneuticis, aperte non opponatur (308).

Adverta tamen duo:

a) Hypothesim interventus divini immediati in explicandis iis, quæ contra naturæ ordinem fiunt, nulli legi physicæ opponi. Quamquam enim factum explicandum his opponatur, nulla tamen est lex physica, quæ vetet, Deum aliquando in rerum natura immediate et extra ordinem operari.

b) Hypothesim impossibilem quandoque usum habere, non ad explicanda facta, sed ad erroneas sententias evitandas (293).

2^a conditio est, *ut et hypothesis, et quæcunque ex ea deducuntur, nulli sive observationi sive experimento certo repugnent.* Ratio in promptu est.

3^a *ut omnia facta, ad quæ explicanda assumitur, commode explicet, aut saltem ut plura ex iis explicet, ac cæteris, sive*

per se sive per aliud, aliquando explicandis, inepta existimari non possit.

Hæc omnia physica præsertim scientia abunde declarabit, et conformabit exemplis.

CAPUT IV.

DE DISPUTATIONE.

ARTICULUS I.

* *De disputationis notione ac speciebus.*

330. Disputare dicimur, non quando nobiscum ipsi veritatem inquirentes taciti ratiocinamur, sed quando cum alio quopiam conferimus quod cogitamus, et ratiocinatione nostra aliquid illi suadere contendimus. Est itaque disputatio: *argumentatio unius ad alterum alicujus propositi ostendendi gratia*. Pro finis autem, quem nobis in disputando proponimus, diversitate, quadruplex est disputationis species.

1° *Apodictica* seu probans, cujus finis est, ut alicujus propositionis veritatem confirmet ac suadeat. De qua nihil est quod in præsentia addamus ad ea, quæ de argumentatione demonstrativa ac probabili dicta sunt. Illud unum commendare impensius hic juvat, quod est maxime necessarium, ut qui aliquid confirmare intendit, ante omnia idipsum quod probandum est, et ipse distincte intelligat, et verbis apte declaret, singulis terminis, quantum opus est, definitione illustratis, limitibus intra quos assertio continetur, clare constitutis, iis quæ supponi debent, in memoriam reductis. Quod si thesis probanda pluribus partibus constet, divisio fiat, et singulæ partes singillatim probentur.

2° *Elenctica* seu confutans, quæ adversam propositionem impugnat, nimirum ostendendo ejus falsitatem, vel contradictoriæ veritatem. In quo agendo pariter curandum in primis est, ut sententia refutanda bene intelligatur, et fideliter referatur. Idem dicatur de argumentis ab adversario allatis, quæ sunt singillatim subruenda. Subruuntur autem argumenta opposita, vel ostendendo in iis consequentiam desiderari, vel præmissas argumentorum refutando, vel earum

sensum distinguendo, ac simul probando quinam verus earum sensus sit, quinam falsus, tum etiam ex vero adversarii propositum non effici. Ex quo vides, elencticam disputationem apodicticam continere.

3° *Apologetica* seu defendens, quæ propositionem impugnata tuetur, refutationem allatam disjiciens. In quem finem adversarii argumenta ad trutinam revocat, eorumque pondus elevare conatur.

Disputatio duorum, elenctica ex una parte, ex altera apologetica, *concertationem scientificam* constituit, quæ speciali nomine disputatio audit. De hac aliquid mox dicemus.

4° *Sophistica* demum seu litigiosa disputatio ea est, quæ hunc tantum finem sibi proponit, ut simulatæ sapientiæ gloriam aucupetur, ac simplices et imperitos perturbet, impediat, atque adeo in errorem pertrahat. De hac etiam inferius.

ARTICULUS II.

* *De quibusdam argumentationibus indirectis.*

331. Tam in refutando, quam in defendendo, argumentationes quædam seu responsiones indirectæ adhiberi solent, de quibus utile erit aliquid dicere. Porro quemadmodum argumentum *directum* vocamus illud, quod aptum et ordinatum est ad thesim inferendam, independentem ab alio medio; ita *indirectum* dicimus, quod nec ordinatum est, nec aptum ad thesim per se colligendam, sed infert aliud, ex quo vel thesis probanda colligitur, vel saltem ejusdem refutatio obtunditur.

Inter indirecta argumenta recensendum est 1° argumentum *ab absurdo*, quo indirecta demonstratio continetur, ut supra explicavimus (293).

2° Argumentum *negativum*. Hoc utimur, quum nullum pro nostra sententia probanda medium adhibemus, at negamus contradictoriam pro se rationem ullam habere; quo adversarium provocamus ad proponendum si quid habet, atque onus probandi in ipsum rejicimus. Huc spectant argumentationes illæ usu vulgatissimæ: *Omnibus perpensis nulla*

apparet in hoc contradictio. Hoc ergo est possibile.—Nulla causa potest assignari hujus effectus. *Ergo hic effectus non datur.*—*Hoc gratis asseritur. Ergo impune negatur.*—Nulla est hujus rei necessitas. *Ergo non est admittenda.*—Auctores qui de hoc facto potuissent ac debuissent mentionem facere, plane silent. *Ergo factum non est credibile.* Quæ tamen omnia caute, ac solerter adhibenda sunt, præsertim quum agitur de veritate communiter recepta, aut de re non satis explorata.

3^o *Instantiam* afferre dicitur, qui propositionis objectæ universalitatem destruit, allata experientia contraria, vel particulari casu, in quo propositio vera non est. Huc referri quoque potest ea respondendi ratio, qua ostendimus, argumentandi formam ab adversario adhibitam rectam non esse, eadem forma ad aliam materiam translata, in qua videlicet appareat manifesto, in adversarii argumento consequentiam desiderari.

4^o Argumentum *ad hominem* struitur, quum ad nostram sententiam probandam, assumimus principia dubia aut falsa, quæ tamen ab adversario ut vera recipiuntur. Quæ argumentatio non quidem utilis est ad veritatem stabiliendam (229, 3^o), sed in hunc solum finem adhibetur, ut adversarius secum ipse committatur, et vel ad sua principia neganda, vel ad nostram conclusionem recipiendam adigatur (229, 1^o 2^o). Sic ex. gr. contra mahumetanum vel lutheranum pugnare possumus auctoritate Mahumetis vel Lutheri.

5^o *Retorsio argumenti* in hoc consistit, quod adversarius suum ipse argumentum solvere cogatur, quatenus vel ex principiis ab ipso adhibitis, vel ex conclusione quam ipse statuit deducimus aut falsum esse quod ipse verum putat, aut verum quod putat falsum, aut aliquid aliud colligimus, quod ipsi utcunque molestum sit. Ex. gr. sic arguimus contra eos, qui corpora esse negant: *Si corpora putas non existere, cur irruentem taurum, aut impendentem tibi declinas fustem?*

6^o *Inversio argumenti* fit, quum ex ipso medio, quod adversarius ad arguendum assumpsit, thesim nostram, quam ille impugnat, colligimus. Inversionem a chananæa muliere

Christus dominus benigne acceptavit, seu potius occasionem illi obtulit inversione utendi, aspera illa in speciem ac dura negatione: *non est bonum sumere panem filiorum et millere canibus*; cui mulier submisit reposuit: *etiam Domine*; nam et catelli edunt de micis, quæ cadunt de mensa dominorum suorum (1).

7^o Argumentatio *per distractionem* fit, quando prætermissa responsione ad adversarii argumentum vel interrogationem, eum avertimus ad aliud, quod ipse explicare non potest aut non vult: ex quo tacite concludimus, mirum non esse, si et nos objectum nodum solvere recusemus. Ita dominus Jesus judæis perverso animo interrogantibus: *in qua potestate hæc facis?* et ipse interrogando respondit: *interrogabo vos et ego unum sermonem...* Baptismus Joannis erat e celo, an ex hominibus (2)? qua re protervos ad silentium redegit. Hoc argumento præterquamquod cum utilitate utimur adversus præfractos exploratæ veritatis impugnatores, juvamus etiam contra eos, qui difficilium rerum explicationi, licet probabili ac receptæ, non acquiescunt, vel ejus intelligendæ sunt incapaces, aut qui nimis sibi suæque scientiæ præfidunt, ac cæteros spernunt.

8^o Argumentum *ad ignorantiam* est, quando adversarium lacesimus ad nostra dissolvenda argumenta, aut ad proferenda meliora. Quæ arguendi ratio, ut vides, nihil probat: ex eo enim quod alter ignorantia laboret, non sequitur opinionem meam veram esse. Idcirco hæc arma adhibere non expedit, nisi forte aliquando contra importunos et cavillatores.

9^o Argumentum *ad verecundiam* adhibere dicimur, quum auctoritatis pondere adversarium opprimere aggredimur, ita extollentes nostræ sententiæ auctores, ut qui iis repugnet, tanquam stultus et arrogans traducendus videatur. Huic quoque argumento vix locus est in gravium virorum disputatione: nisi tamen auctoritas quam objicimus, omnino magna sit, et adversarius irrationabiliter refragetur.

(1) Matth. XV, 25. 27.

(2) Matth. XXI, 24. 25.

10^o Multo magis cavendum ab argumento, quod dicunt *ad invidiam*, quo adversarius risui aut odio exponitur, variis deductis ex ejus sententia consecrariis, quæ vulgaria præjudicia offendant, aut hominum cupiditates exstimulent. Hanc pugnandi viam impostores omnes, ac perversi homines contra bonos viros, ut plurimum ineunt; sapiens autem, et qui causæ suæ fudit, nihil horret magis, quam ut a sedato rationis judicio ad cupiditatum tumultus provocet. Nihil tamen vetat, quominus perniciose ac periculosa alicujus doctrinæ consecraria pacate ac fideliter, ubi opus sit, exponamus.

ARTICULUS III.

De sophismatibus.

332. Non quæcunque argumentatio, quæ recta non sit aut falso concludat, sophisma dicitur, sed *ea solum, quæ veri quamdam speciem habet, ac sub veri specie, ad falsum et absurdum adducit*. Ex quo sophismata fallaciæ quoque captionesque nuncupantur. Sophisma nomen a sophistis traxit; sophista vero longo jam usu idem valet ac homo simulatam sapientiam ostentans. Qui quidem homines, ubicunque intellectualis cultura vigit, nunquam defuerunt, neque adeo nostro hoc tempore desunt; in hoc tamen sophistæ nostri a veteribus differunt, quod olim ad hanc artem permovebantur homines, vel vana quadam disputandi libidine, vel ejus cupiditate gloriolæ quæ in rudibus confundendis facile comparatur; nostri vero ad majora tendunt, illudque sibi propositum habent, ut populorum mentes erroribus gravissimis imbuant, ac divinæ religionis, humanæque societatis fundamenta penitus labefactent. Tamen iisdem fere armis utrique iisdemque insidiis utuntur.

333. Sophismata quædam ex propria alicujus scientiæ materia desumuntur, in eoque fallaciam continent, quod propria alicujus scientiæ pronuntiata, quibus aliqua subest obscuritas, latius sumant quam accipi debeant, ex quo fit ut talia argumenta veris ac necessariis præmissis consistere videantur, quæ tamen, eo quo usurpantur modo, sunt plane falsæ. Hujusmodi est v. gr. principium illud: *Ex nihilo ni-*

hil fit, quo abutuntur qui rerum creationem negant: vel illud: *Ens infinitum omnem continet realitatem*, quo pantheistæ pugnant, et alia non pauca. Genus hoc fallaciæ vocat Aristoteles *syllogismum pseudographum*; quasi mendacis descriptionis et falsarium. Pertinet autem ad diversas scientias hujusmodi fallacias dissolvere, non ad logicam.

334. Ad logicam pertinet sophismata proprie dicta denu- dare, quæ nempe ex communibus quibusdam fontibus hau- riuntur, et per omnem materiam serpere possunt. Fontes igitur horum sophismatum tredecim a veteribus numeran- tur; sex in vocibus, septem in rebus. Fallaciæ in vocibus hæ sunt: *æquivocatio, ambiguitas, compositio, divisio, accen- tus, figura dictionis*. In rebus: *fallacia accidentis, dicti simpli- citer et secundum quid, ignorationis elenchi, petitionis principii, consequentis, non causæ ut causæ, plurium interrogationum*.

Fatendum est, non paucas ex his fallaciis adeo ineptas esse, ut nostro hoc tempore vix joci causa permitti posse vi- deantur; quasdam vero adeo inficetas, ut ne in joco quidem sapiant.

ARTICULUS IV.

De sophismatibus in voce.

335. *Æquivocatio* est fallacia ex eo proveniens, quod unum nomen plura significet (64).

Æquivocatione usi sunt Romani contra Antiochum regem, qui cum dimidiam partem navium se cessurum spopondisset; naves omnes in duas dissecare partes coactus est. Vide alia exempla in 1^a syllogismi regula (233).

336. *Ambiguitas* est deceptio inde orta, quod una eadem- que oratio, diversas significat sententias (105). Ut si dicas; *Quod est Virgilii possidetur a Virgilio; Hic liber est Virgilii; Ergo hic liber possidetur a Virgilio*. Ubi illa oratio: *Est Virgi- lii*, primo significat habitudinem rei possessæ ad possiden- tem, ac deinde habitudinem effectus ad causam.

Diversas tum æquivocationis, tum ambiguitatis species invenies apud veteres (1).

(1) Cf. v. gr. S. Th. Opusc. XXXIX, quod est de Fallaciis.

337. Sophismata *sensus compositi et divisi* locum habent 1° in enuntiationibus modalibus; 2° in iis propositionibus, in quibus aliquis terminus pluribus constat partibus, per conjunctiones, *et, vel* ac similibus connexis; 3° in iis, in quibus aliqua vox cum diversis potest vocibus conjungi.

1° In modalibus *sensus compositus* est, quum prædicatum dicti (185) refertur ad formale significatum subjecti (75, 5°); *sensus divisus*, quum refertur ad materiale significatum ejusdem. In his *sensus compositus* potest quandoque ita veritatem habere, ut *divisus* habeat falsitatem, et viceversa: v. gr. quum dico: *impossibile est sedentem ambulare*, *sensus compositus* verus est; nimirum *sedentem*, quatenus sedet, *ambulare* non posse; *sensus autem divisus* est falsus; nempe eum, qui sedet, non posse aliquando surgere et ambulare. E contrario si dicam: *possibile est sedentem ambulare*, *sensus compositus* falsus est, *divisus* omnino verus.

2° *Propositio*, cujus unum extremorum pluribus constat partibus conjunctione *et* connexis, potest vel descensu copulato vel copulativo explicari (85). Item quum partes connectuntur conjunctione *vel* potest *propositio* explicari descensu disjuncto vel disjunctivo. Quando igitur hujusmodi propositiones descensu copulato vel disjuncto explicantur, sumuntur secundum *sensus compositum*; quum vero copulativo vel disjunctivo, assumuntur *sensu diviso*.

In his quoque propositionibus fieri potest, ut quædam veræ sint in *sensu composito*, falsæ in *diviso*, vel contra: v. gr. hæc: *Quinque sunt duo et tria*, vera est in *sensu composito*, nimirum: *Quinque sunt duo additis tribus*; falsa in *diviso* nimirum: *Quinque sunt duo, et quinque sunt tria*; ista autem: *Non omnis numerus est par vel impar*, vera est in *sensu diviso*: *non omnis numerus est par, nec omnis numerus est impar*; falsa in *composito*: *non omni numero prædicatum disjunctum convenit: par vel impar*.

3° In propositionibus, in quibus una aliqua vox cum diversis vocibus conjungi potest, si hæc intelligitur conjuncta cum ea voce, qui conjuncta apparet, vel magis apta est conjungi, oratio dicitur *composita*; secus *divisa*: v. gr. quum

dicis: *Qui nunc est mortuus, heri vivebat*, potest intelligere adverbium, *nunc*, connexum cum participio, *mortuus*, et *sensum* habebis *compositum* ac verum, vel cum verbo, *est*, et sic habebis *sensum divisum*; qui falsus est.

338. Ex triplici hac propositionum specie, eruitur fallacia *sensus compositi*, quum *sensui diviso* vero subrogatur *compositus falsus*: et viceversa fallacia *sensus divisi*, quum *sensui composito* vero subrogatur *divisus falsus*: v. gr. si quis dicat:

Possibile est prædestinatum esse peccatorem; Sed peccator salvari non potest: Ergo possibile est prædestinatum esse eum qui salvari non potest. Vel: *Duo et tria sunt minora numero quatuor; Sed duo et tria æquant quinque: Ergo quinque est minor numero quatuor*, in his sophisma erit *sensus compositi*. In his autem: *Impossibile est sedentem ambulare; Sed judex sedet: Ergo impossibile est judicem ambulare. Qui nunc est mortuus, heri vivebat; Sed nunc magnus Alexander est mortuus: Ergo heri vivebat*, fallacia erit *sensus divisi*.

339. Fallacia *accentus* oritur ex eo, quod eadem dictio diversimode pronuntiata, diversa significat: ut sunt v. gr. voces *pendere* (solvere), et *pendere* (suspensum esse); *edit* (manducat), et *edit* (in lucem emittit); *ara et hara*; *qui es*, et *quies*; item quæ serio vel ironice, interrogative vel assertorie pronuntiantur. Quæ omnia possunt quidem negotium facessere pueris audientibus, aut lectitare incipientibus; possunt etiam leporis gratia quandoque adhiberi; sed si quis vellet ita verbis ludere, ad irretiendum eos qui linguæ utcumque assueverunt, ac legere jam didicerunt, nonne se exhiberet egregie ridiculum?

340. Fallacia *figuræ dictionis* existit ex similitudine unius dictionis cum altera. Quæ incurritur primo, quum duo vocabula, quia similia sunt, easdem affectiones grammaticas habere censentur, quas tamen non habent; ut quum puer qui latinitatem addiscit, putat nomen *frons* esse generis masculini, quia *pons* hujus generis est.

Pariter quum unum nomen quod significat ad modum unius categoriæ, puta substantiæ, ita accipitur ac si signifi-

caret per modum alterius, v. gr. qualitatis; quia unum nomen et alterum objectivam quandoque identitatem habent, ut in trita illa argutiola: *Quæcunque emisti commedisti; Sed carnes crudas emisti: Ergo carnes crudas commedisti*; in qua illud, *quæcunque*, quo substantiam significamus, ita accipitur ac si dictum esset *qualiacunque* ad qualitatem significandam.

Huc denique recidit omne sophisma, quod a mutata termini ejusdem suppositione desumitur.

ARTICULUS V.

De sophismatibus in re.

341. Sequitur ut de sophismatibus quæ ex rebus ipsis originem habent, aliquid adjiciamus.

1º dicendum de fallacia *accidentis*. Hæc oritur ex non attempta diversitate eorum quæ rei insunt per se, et eorum quæ insunt per accidens. Incurritur autem, quum quis existimat, omne id quod convenit aut non convenit rei alicujus accidenti, ipsi rei convenire aut non convenire, et viceversa: id quod non semper necessario verum est. Nota autem, accidentis nomine hoc loco venire id omne, quod aliquo modo a rei definitione atque essentia diversum est. Quare tribus modis hac fallacia peccari potest.

a) Quum ab eo quod contingenter plane ac variabiliter subjecto inest, ad subjectum ipsum procedimus, concludentes id quod est verum de uno, verum quoque esse de altero; ut si quis dicat: *Eum qui latet sub velo, non cognoscis; Sub velo est mater tua: Ergo matrem tuam non cognoscis*. Nota bene, hoc sophisma admitti ab iis omnibus, qui damna ex rerum abusu provenientia, rebus ipsis imputant; ex quo videbis, ipsum esse satis frequens apud homines malos, neque adeo rarum apud probos.

b) Idem sophisma admitti potest, quum id quod convenit proprietati, tribuitur speciei, et viceversa.

c) Et quum id quod convenit conceptui superiori (33), tribuitur inferiori et vicissim.

342. 2º Succedit captio dicti *simpliciter* et *secundum quid*.

Dictum *simpliciter* intellige id omne, quod dicitur sine ullo addito coarctante aut minuente (75); ut: *Plato est doctus*: dictum *secundum quid*, quod cum tali addito effertur; ut: *Petrus est doctus in arte pulsandi citharam*. Admittitur sophisma, quum a dicto simpliciter colligitur dictum secundum quid, vel viceversa. Ut si quis dicat: *Carnes manducare non nocet. Ergo non nocet ægroto*. Cui simile est argumentum illud carnalium quorundam: *Licet christiano vesci carnibus: Ergo licet ei carnibus vesci feria sexta*. Sophismata hujusmodi mirum quam multorum vitam actusque regant.

343. 3º *Ignorantia elenchi* est sophisma, in quod impingere possunt, qui alterius sententiam refutant. Elenchus enim (ἐλεγχος), seu redargutio, est syllogismus certæ alicujus enuntiationis contradictorium colligens (330, 2º). Si quis igitur in redarguendo prætermittit aliquam ex conditionibus, quæ ad veram contradictionem requiruntur (193), ignorare dicitur elenchum. Ita v. gr. aberrant protestantes, quum catholicos accusant idololatriæ, eo quod sanctorum imagines ac reliquias venerentur; non enim docent catholici eum cultum esse sanctistribuendum, qui divinitatis est proprius.

Hoc fallaciæ genus provenire potest

- a) ex vera ignorantia status quæstionis;
- b) ex astutia minime bona arguentis, qui cum probare non possit id quod illi probandum est, ad alia se confert probanda quæ adversarius non negat, et in his triumphat. Hæc dicitur *simulata probatio*;
- c) ex fraude multo turpiore; quum nempe adversarii sententia mala fide profertur, ac dolosa interpretatione in aliam omnino commutatur, quæ falsa sit, inepta, absurda.

344. 4º *Petitio principii*. Principii nomine hoc loco intelligitur conclusio demonstranda, qui hæc ante omnia in disputationis initio proponitur. Tunc autem quis principium petere dicitur, quum id ipsum quod probandum est, aliis verbis proponens, id sibi concedi postulat; ut si quis probaturus aerem esse gravem, assumeret tanquam concessum,

aerem esse ponderosum, ut hinc propositum confirmaret. Vitium sane turpe, non tamen infrequens; præsertim ubi non stricta argumentatione, sed diducta oratione res agitur.

Nota autem, fallaciam hanc non peccare contra syllogismi formam, sed contra demonstrationis, seu probationis naturam. Nam in hoc sophismate, si cætera non desint, conclusio ex datis præmissis legitime sequitur, sed ex talibus sequitur præmissis, quæ non sunt conclusionem notiores, imo quæ eodem modo ac conclusio ab adversario rejiciuntur, hoc ipso quod hæc in illis aperte contineatur. Et idcirco si quis has præmissas non aliunde demonstret, sed assumat et sibi vindicet, ipsam in his conclusionem petere dicitur. At quando præmissæ sunt immediate notæ, vel alias probatæ, vel ab adversario concessæ, etiamsi conclusionem neget, tunc certe principium non petitur, sed legitime imponitur.

345. Huc pertinet *circulus vitiosus*, in quem incidit qui duo quæ probanda illi sunt, ita demonstrat, ut primum demonstret assumpto secundo, et secundum assumpto primo. Ut si quis dicat: *Tellus non movetur*. Cur? *Quia movetur sol*. Optime: at cur sol movetur? *Quia non movetur tellus*.

346. 5^o *Fallacia consequentis* est in eo, quod antecedens putetur concludi posse ex consequente, vel consequentis oppositum ex opposito antecedentis. Habet locum in syllogismis conditionalibus, ut jam suo loco notavimus (262).

347. 6^o *Fallacia non causæ ut causæ* est sophisma decipiens in hoc, quod absurda et falsa conclusio adscribitur alicui propositioni, quasi ex ea deducatur, ex qua tamen vere non deducitur. Ita nugabantur olim veteres sophistæ, et nugari nunc possunt logicæ tirones. Multo magis cavendum est hoc sophisma, et multo est perniciosius, quum factum quodpiam alicui, sive rei sive homini adscribitur tanquam causæ, cum revera ejus causa non sit; et hoc supposito varia exinde deducuntur. Ut si quis imperii romani ruinam christianæ tribuat religioni, ea quod imperium romanum eversum est, postquam fuerat christianum effectum.

Generatim hoc sophisma admittitur, quum assumitur tanquam causa

a) id quod simpliciter præcedit vel comitatur effectum (*hoc post hoc, ergo ex hoc*). Huc pertinent nuntiæ mortis cometæ, et similia vulgi præjudicia:

b) id quod est mera occasio cur effectus ponatur. Ita quandoque homines virtutem justorum damnant, quia odia et insectationes excitat:

c) id quod est solum conditio, quæ ad effectus positionem requiritur, cujusmodi est fenestra, ad hoc ut cubiculum a sole illuminetur:

d) aliqua causa commentitia et sine ulla ratione excogitata. Huc reducuntur multæ veterum physicorum demonstrationes:

e) aliqua vox quæ nihil explicat, ut sunt *fatum, fortuna, qualitates occultæ, sympathiæ rerum*, etc.

Aberrationis hujus, qua nulla fortasse in humano intellectu frequentior, quadruplex radix est; videlicet ex una parte causarum ignoratio, earumque investigandi desiderium, ex altera mentis debilitas, quæ investigationis difficultate vincitur vel absterretur, et inanis quædam ambitio, qua impedimur quominus ignorantiam nostram fateamur: quibus omnibus non raro accedit pravum animi studium, et maligna mentis perversitas, vel circulatorum fraus.

348. 7^o *Sophisma plurium interrogationum* exstruitur, quum plures interrogationes, quibus diversæ responsiones reddendæ sunt, ad modum unius proponuntur; unde fit ut qui unam responsionem reddit, erroris semper convinci possit. Ut si quis interroget: *Estne homo Cæsar et Pompeius?* Si reponis esse, sic arguet sophista: *Ergo non sunt duo, sed unus*. Si neges, ille colliget: *Ergo Cæsar non est homo; vel: Pompeius non est homo*. Profecto hæc sunt revera puerilia crepundia, quæque inter graves viros memoratu minime digna videntur. Nihilominus non raro contingit, ut in æstu disputationis et pueri et viri hac deceptione capiantur; quia videlicet pacate ac tranquille respondere nesciunt.

ARTICULUS VI.

De scientifica concertatione.

349. Scientifica concertatio, quæ et disputationis nomen sibi proprium fecit, est disputatio duorum, quorum alter propositionis statutæ veritatem impugnat, alter tuetur (350). Initur autem, vel ut veritas investigetur vel ut error refutetur, vel ut de alicujus ingenio aut doctrina experimentum sumatur, vel ut mentis vires agone et lucta roborentur. Hujus utilitas semper magna est, si recto animo disputatio ineatur, ac recta methodo exigatur. In opinionum enim conflictu non raro deprehendimus quædam a nobis ignorari, quædam confuse cognosci aut non satis clare; assertiones quasdam esse limitibus circumscribendas, quasdam accuratius proponendas; notiones præterea multæ expenduntur et illustrantur; rationes quibus innititur, vel vim suam produnt manifestiorem, vel si quid habent non satis firmum aperiunt; multæ interdum suboriuntur quæstiones, quæ dein privatæ meditationi materiam præbent ac scientiæ suppellectilem augent. Ad hæc et ordinate cogitare discimus disputando, et judicare cum maturitate, et loqui cum proprietate. Ingenium fit subtilius, reflexio celerior, intelligentia promptior, industria oculata magis. Est ergo scientifica disceptatio unum ex mediis, quæ ad profectum in scientiis quam maxime conducunt.

350. Disputationis forma triplex est.

1^o *Communis*, quæ liberum sequitur disserendi modum, quemadmodum in communi sermocinatione congressuque hominum, et in quotidianis colloquiis fieri assolet.

2^o *Socratica*, quæ interrogationibus artificiose excogitatis, et apte sibi succedentibus adversarium quasi consulens expugnat: quatenus paulatim ac per gradus nec opinantem eo adducit, ut fateri cogatur assertionis, quam negabat, veritatem, aut ut secum ipse pugnans deprehendatur, atque ita suæ opinionis falsitatem agnoscat. Breve simul et efficax hujusmodi disputationis exemplum habes in evangelio (1),

(1) Matth. XXII, 42-46.

ubi dominus Jesus pharisæos convincit Christum ita esse hominem, ut sit etiam plusquam homo, et dominus hominis. « Quid vobis videtur de Christo? cujus filius est? Dicunt ei « David. Ait illis: quomodo ergo David in Spiritu vocat eum dominum, dicens: dixit Dominus Domino meo: sede a dextris meis..... si ergo David vocat eum dominum quomodo filius ejus est? Et nemo poterat ei respondere verbum. » Hæc disputandi methodus dicitur socratica, quia Socrates ea potissimum usus esse fertur.

3^o *Syllogistica* disputationis forma dicitur, quæ argumentationem omnem severa syllogismi aut enthymematis forma perpetuo constringit; quin tamen excludat, ubi opus sit, prævias interrogationes, quibus via atque aditus ad argumenta sternatur, aut propositionum quarundam seu argumentationum expolitionem oratione liberiori. Hæc disputandi methodus etiam *scholastica* nuncupatur, et quia a philosophis mediæ ætatis, qui scholastici nuncupabantur, constanter usurpata est, et quia in scholis usurpatur adhuc, et usurpari debet. Nihil enim hac methodo accommodatius ad disputationis finem, nihil opportunius ad colligendos disputationis fructus, et ad vitia præcavenda quæ in disputationem obrepere possunt, nihil necessarium magis. Crede mihi: multi qui et voce et scripto et editis voluminibus putant se aliquam opinionem defendisse, aut aliquem adversarium confutasse, si adduci possent, ut quæcunque disputarunt ad syllogisticam formam exigerent, statim animadverterent, se forte eloquenter declamasse, erudite scripsisse, eleganter descripsisse, at simul a scopo aberrasse, nihil demonstrasse, nihil refutasse; imo forte nec quid demonstrandum aut refutandum sibi esset, clare percepisse. Crede iterum mihi: si hæc disceptandi ratio in rebus præsertim subtilioribus et implexis, aut in iis, quæ humanarum cupiditatum igniculos excitant, universim adhiberetur, multæ quæstiones quæ hinc inde agitantur, non agitarentur; multæ nullo negotio solverentur; multæ quæ solutæ putantur, insolutæ atque adeo insolubiles agnoscerentur; multi errores statim ac orti sunt extabuissent; præfidentia, clamores, iræ concertantium

vix locum haberent. Hæc omnia jam a suo tempore Leibnitius perspexerat, et aperte profitebatur (1).

ARTICULUS VII.

De syllogistica disputationis forma.

351. Quia syllogistica disputatio frequentissime in scholis usurpatur, necesse est, ut quæ ad ejus praxim pertinent, breviter notemus, quæ tamen ex propria quisque experientia plenius addiscent. Prius igitur de munere defendentis, deinde de partibus arguentis.

352. Qui thesim defendit, audito opponentis argumento, totum semel repetat quam fidelissime, nullis additis animadversionibus : regrediatur deinde ad argumenti initium, et de toto argumento ac de singulis propositionibus judicet. Si in argumento consequentia desideretur, omittat judicare de præmissis, et consequentiam neget. Si vero argumenti recta sit forma, de singulis judicet propositionibus; *concedat* veram, *falsam neget* simpliciter, nec rationem addat negationis; onus enim probandi incumbit adversario; quæ ad rem non facit, *transmittat* vel *permittat*, ut assumatur tanquam concessa; si qua demum propositio ambigua sit, eam *distinguat* (105), concedens sensum propositionis verum, ac negans falsum. Quod si unum aut alterum distinctionis membrum aliquam adhuc offerat ambiguitatem adhibeat *subdistinctionem*. Datam distinctionem, nisi clarissima sit, declarabit et confirmabit. Si eum adversarius de quopiam interrogabit, repetat interrogationem semel atque iterum, ac respondeat sive affirmando, sive negando, sive permitiendo, sive distinguendo.

353. Quoad distinctionem nota 1^o ambiguitatem propositionis tum in medio termino, tum in extremorum altero latere posse. Si ambiguitas latet in medio termino, distin-

(1) « On trouvera plus souvent qu'on ne pense (en examinant les paralogismes des auteurs), qu'ils ont péché contre les règles de la logique, et j'ai moi-même expérimenté quelquefois, en disputant même par écrit avec des personnes de bonne foi, qu'on n'a commencé à s'entendre que lorsqu'on a argumenté en forme pour débrouiller un chaos de raisonnements. » *Nouveaux Essais sur l'Entendement humain*, liv. IV, ch. XVII.

guenda erit tum major, tum minor præmissa, atque ita distinguenda, ut quæ pars in majori conceditur, negetur in minori, et viceversa quæ in majori negatur, in minori concedatur : v. gr. huic argumento :

Quæcunque idea exhibet aliquid quod dicitur de multis, est universalis ;

Sed idea collectiva exhibet aliquid quod dicitur de multis :

Ergo idea collectiva est universalis,

in hunc modum distinctionem oppones : *Dist. Maj.* : Quæcunque idea exhibet aliquid, quod dicitur de multis *distributive*, est idea universalis, *Conc. maj.* ; quæcunque idea exhibet aliquid, quod dicitur de multis *simul sumptis*, *Neg. maj.*

Idea collectiva exhibet aliquid quod dicitur de multis ; *Contradistinguo min.* : quod dicitur de multis *simul sumptis*, *Conc. min.* ; *distributive*, *Nego min.*

Ergo etc. Neg. consequentiam.

Si vero ambiguitas hæret alteri extremorum, distincta præmissa in qua illud sedem habet, distinguenda erit eodem modo conclusio ; consequentia vero distinguenda non est, sed concedenda secundum eum conclusionis sensum qui conceditur, neganda secundum eum qui negatur. Ex. gr. arguens sic opponat :

Actus quem voluntas impedire potest, non est necessarius ;

Sed assensus legitimæ conclusioni est actus, quem voluntas impedire potest :

Ergo assensus legitimæ conclusioni non est necessarius.

Respondebis : *Concedo maj.* ; *Dist. min.* : quando veritas præmissarum est dubia, *Conc. min.* ; quando est manifesta, *Neg. min.*

Dist. consequens eodem modo.

Nota 2^o subdistinctionem modo cadere in illum ipsum terminum in quem cadit distinctio, modo in alium. Hoc postremum si contingat, distinctio prima erit applicanda ubi redit primus terminus, secunda ubi redit alter. En exemplum :

Quod constat ex pluribus, potest dividi in partes ;

Sed anima humana constat ex pluribus facultatibus :

Ergo potest dividi in partes.

Respondebis : *Dist. maj.* : Quod constat ex pluribus reipsa distinctis, potest dividi in partes, *Conc. maj.* ; quod constat ex pluribus mente solum distinctis, potest dividi in partes, *Subdist. maj.* : in partes metaphysicas, *Conc. maj.* ; in partes physicas, *Neg. maj.*

Contradistinguo min. : Anima humana constat ex pluribus mente solum distinctis, *Conc. min.* ; reipsa distinctis, *Neg. min.*

Dist. conseq. : Anima humana potest dividi in partes metaphysicas. *Conc. cons.* ; in partes physicas, *Neg. conseq.* et *consequentiam.*

354. Quandoque negandum occurrit in aliqua propositione *suppositum*, i. e. aliquid quod aperte vel occulte assumitur tanquam subjecto conveniens. Si quis dicat ex. gr. : *Deus, quum esse cœpit, fuit infinitus*, supponit aperte Deum aliquando cœpisse. Si quis vero dicat : *Circulus quadratus est maximum miraculorum*, supponit occulte circulum quadratum esse possibilem.

355. Nunc ad eum, qui thesim impugnat. Is probe apud se determinato quæstionis statu, argumentum ita proponat, ut conclusio ejus sit propositæ thesios contradictoria; quod in primis necessarium est, ne uterque disputans operam ludat, atque ictus temere jaciatur andabatarum more. Si tamen veritas id postulet, nihil obstat quominus arguens contrariam opponat. Attendat post hæc ad defendentis responsionem; si consequentiam ille aut aliquam propositionem neget, ea erit probanda; si vero distinctionem adhibeat, instaurandum erit argumentum, et in hoc maxime patet arguentis perspicacitas. Argumenti porro instauratio fieri potest tripliciter :

1^o Impugnando ipsam distinctionem, i. e. negando illatæ distinctioni locum esse, vel quod nulla sit sensus ambiguitas, vel quod conclusio sequatur, quocunque sensu accipiat propositio distincta; v. gr. in distinctionem supra positam secundo loco (353, 1^o) sic insurgere poteris :

Atqui sive veritas præmissarum sit dubia, sive sit manifesta,

assensus legitimæ conclusioni impediri potest a voluntate. — Ergo nulla distinctio.

Antecedens hujus argumenti et sequentium similium dicitur *minor subsumpta* : subsumpta quidem, quia argumentum resumit, minor autem, quia majorem conditionalem supponit.

2^o Impugnando distinctionis applicationem, videlicet ostendendo partem negatam veram esse; v. gr. ut insistamus in eodem exemplo :

Atqui assensus legitimæ conclusioni potest impediri a voluntate, quando veritas præmissarum est manifesta. — Ergo stat difficultas.

3^o Probando consequentiam, id quod fit ostendendo conclusionem fluere ex ea parte, quam adversarius concessit; in hunc modum :

Atqui si assensus potest impediri, quando veritas præmissarum est dubia, nunquam est necessarius. — Ergo stat consequentia.

Vel melius ita :

Probo consequentiam. Assensus per te non est necessarius, quando veritas præmissarum est dubia.

Atqui veritas præmissarum semper est dubia. — Ergo nunquam assensus est necessarius.

356. Notet insuper arguens 1^o Si quando disjunctiva negetur, licere sibi ab adversario medium petere, nimirum ut assignet membrum disjunctivæ addendum, ut sit completa enumeratio.

2^o Si adversarius neget universalem conclusionem, quæ inductionis ope collecta fuerit, petendum ab eo est, ut afferat aliquid, ad quod conclusio illa se non extendat : hoc vocant *petere instantiam* (351, 3^o).

3^o Animadvertat arguens, ne temere medium terminum mutet, sed illum retineat, quamdiu negata cum concessis eam connexionem habent, ut, his positis, illa quoque cum verisimilitudine inferri possint. Mutatur medius terminus, vel non probando quod negatum est, vel non instaurando argumentum distinctione disjectum.

4° Quum difficultas soluta est, ne urgeat cavillando, sed vel alium assumat medium, vel quæ illi supersunt argumenta extra formam exponat.

Et hæc ad disputantium institutionem dicta sufficiant, quæ ipsa exercitatio multo magis perficiet.

CAPUT V.

DE METHODI DIVISIONE.

ARTICULUS I.

De methodo analytica et synthetica.

* 357. Superest extremo loco, ut de ipsa methodi varietate dicamus, generatim tamen; minuta enim illa documenta, ex quibus ars sive discendi sive docendi constat, melius pro re nata, et ubi opportunitas se offert, traduntur, et exercitatione ipsa addiscuntur.

In objectis cognitionum nostrarum non possumus uno mentis obtutu quidquid cognoscibile habent, distincte et complete deprehendere: sed hausta per primum obtutum cognitione objecti confusa, necesse est ut iteratis actibus ad singulas partes accedamus, quibus successive consideratis, cognitionem distinctam assequimur. Hinc sequitur, in dati objecti consideratione alterutra nobis esse insistendum via.

Primo enim incipere possumus a totius consideratione, prouti hoc confusa cognitione primo attingitur, ut deinde per gradus illud resolvamus, partesque singulas inspiciamus, easque iterum resolvamus, donec ad ultima ac simplicissima elementa deveniatur. Secundo incipere possumus a simplicissimis objecti elementis, gradum successive facientes ad elementa magis composita, donec totum complectamur.

Utraque porro methodus, tam circa totum actuale (106), quam circa totum logicum (110) versari potest. Postrema methodus, si circa totum actuale versetur, vocatur juxta veteres *compositio* (*σύνθεσις*); si circa totum logicum, *divisio* (*διαίρεσις*); quia præcipua divisionis species est, qua superiores conceptus in inferiores distribuimus (114).

Methodus item altera respectu totius actualis, *resolutio* (*ἀνάλυσις*); respectu totius logici, *collectio* (*συναγωγή*) ab iisdem appellabatur.

Qui pariter ad compositionis methodum generatim revocabant transitum omnem a causis ad effecta; et viceversa progressum omnem ab effectis ad causas ad methodum resolutionis: quia nempe esse causatum et a tali causa procedere, una est ex notis seu partibus ideæ effectus.

358. Hæc veteres ex Aristotelis sententia (1). Sed recentiores compositionis ordinem et divisionis una voce compositionis complectuntur; quod mirum videri non debet: divisio enim totius logici verius compositio est quam divisio: fit enim additione differentiarum, quibus una cum genere species componuntur (37, 5°, 41). Pariter resolutionis methodum et collectionis, resolutionis methodum simpliciter appellant, idque ex ratione simili; quum enim ex inferioribus colligimus universale superius, revera inferiorum conceptum resolvimus, et neglectis iis in quibus differunt, communem solum notam attendimus.

Duplex igitur ex cognitionis methodus, *analytica* et *synthetica*. Illa a compositis ad magis simplicia, et a minus universalibus ad magis universalia progreditur; hæc a simplicibus ad composita, et a magis universalibus ad minus universalia vel singularia descendit. Quomodo duplex hæc methodus adhiberi possit in ideis per definitionem perficiendis, jam exposuimus (135, 136). Nunc dicendum est, quomodo utraque applicetur ad veritatem, quæ judicio continetur, inveniendam et explicandam (2).

359. Averte in primis, objectum quod considerandum suscipimus, tenere in judicio subjecti locum; prædicatum enim nihil est aliud, quam objecti illius nota, sive elementum. Subjectum igitur propositionis est totum actuale, cujus pars metaphysica (107) est prædicatum; est item unum ex

(1) V. Fonseca, *Institut. dialect.*, lib. VII, c. XXXIX.

(2) Cf. opus R. P. Ios. Romano S. J., cui titulus: *Elementi di Filosofia*, tom. I, part. II, c. VIII. Quæ sequuntur, ab eo magna ex parte deprompsimus. De methodo enim adeo feliciter disserit, ut nemo, quantum noverim, melius.

inferioribus prædicati, quia continetur in illius extensione.

Quibus animadversis, jam vides, quod si in propositionis veritate expendenda a *subjecti* consideratione exordimur, ut ad prædicatum ratiocinando deveniamus, a toto, a minus universali gradimur ad partem, et ad magis universale, adeoque methodo utimur *analytica*: quod si a consideratione *prædicati* initium ducimus, ut prædicatum reducamus ad subjectum, ordine inverso procedimus, ac proinde methodum amplectimur *syntheticam*.

360. Quando ratiocinatio, per quam a subjecto ad prædicatum, vel a prædicato ad subjectum devenimus, simplex est, unoque exprimitur syllogismo, utriusque methodi discrimen in verbali expressione vix apparet; nihilominus in ipso mentis opificio, et in mentalis ratiocinationis genesi, satis altera ab altera distinguitur. Possumus enim medium terminum tum a subjecti, tum a prædicati consideratione erueri, adeoque tum analyticæ, tum synthetice in ratiocinando procedere. In externa tamen expressione, quanquam via usi simus per hoc ad summum significari poterit, quod præmissa minor majori, vel major minori præponatur. Quia vero regulariter et ut plurimum major minori præmittitur, idcirco syllogismus inter syntheticos mentis processus referri consuevit.

361. At quando inter quo ad conclusionem fit gradus, non unico ratiocinio sed plurium serie ratiociniorum continetur, utriusque methodi discrimen fit plane manifestum. Id quod in sorite, qui catena ratiociniorum est, facile demonstratur. Soritis enim quem supra (281) descripsimus, processus est evidenter analyticus.

In hoc enim exemplo v. gr.:

Qui cupiditates suas non coercet, multa desiderat;

Qui multa desiderat, multis eget;

Qui multis eget, inquietus vivit;

Qui inquietus vivit, miser est:

Ergo qui cupiditates suas non coercet, miser est,
subjectum conclusionis (*qui cupiditates suas non coercet*) sup-
peditat nobis medium (*multa desiderat*), per quod tandem

aliquando devenimus ad conclusionis prædicatum (*miser*).

Quod si processu synthetico eandem conclusionem colligere velles, incipiendum tibi esset a prædicato (*miser*), sub quo, invento medio (*qui inquietus vivit*), devenires tandem ad conclusionis subjectum sub hoc medio constitutum (*qui cupiditates suas non coercet*). Unde sorites prodiret hujusmodi:

Qui inquietus vivit, miser est;

Qui multis eget, inquietus vivit;

Qui multa desiderat, multis eget;

Qui cupiditates suas non coercet, multa desiderat:

Ergo qui cupiditates suas non coercet, miser est,

qui sorites, ut vides, est omnino præcedentis inversio; atque ideo vocatur *regressivus*.

ARTICULUS II.

*De methodo quæ servari debet tum in quæstionibus
solvendis tum in propositionibus probandis.*

362. Quum aliqua proponitur quæstio, quæ determinatæ solutionis sit capax, datur subjectum, et quæritur prædicatum; nimirum vel quæritur *an subjectum sit*, vel *quid sit*, vel *quale sit*. In his omnibus tuta ac naturalis via est, ut datum subjectum, ejusque cognitæ proprietates attente consideremus, ut sic incognitas inveniamus. In quæstionibus igitur solvendis, methodum analyticam (359) natura ipsa suadet, eamque sequentes aberrare a proposito non possumus. Quod si quis syntheticam methodum sequi vellet, is raro et casu potius, quam certa ratione et via ad veritatem adduceretur. Cum enim prædicatum sit incognitum, is tentando solum et quasi conjectando procederet. Hinc methodus analytica methodus *inventionis* jure merito nuncupatur.

363. Quum vero quæstio jam resoluta est, et id unum agitur, ut inventa veritas aliis communicetur et suadeatur, tunc et subjectum propositionis probandæ cognoscitur et prædicatum; ac solummodo ostendendum est, unum de altero affirmandum aut negandum esse. Ad hunc autem finem tum analytica methodus, tum synthetica opportuna accidit. Cum

enim uterque terminus sit cognitus, cognita quoque sit via quæ unus ad alterum reducitur; tam ab uno quam ab altero incipere tuto possumus. Duplex igitur dari potest demonstratio ac probatio, analytica et synthetica. Illa eandem viam sequitur et eodem ordine, quam in inveniendâ veritate mens perlustravit; ista etiam eadem graditur via, sed ordine retrogrado; incipit enim inde ubi analysis desiit, et ibi consistit unde analysis incepit.

364. Utriusque processus discrimina in duplici sorite supra allato (361) clare perspiciuntur. Analytica enim demonstratio subjectum conclusionis comparat cum tertio, quod illo superius est; synthetica comparat conclusionis prædicatum cum tertio, quod illo est inferius. Analytica ostendit medium sub prædicato conclusionis contineri; synthetica ostendit sub medio contineri subjectum conclusionis. Illa a subjecti consideratione ascendit ad enuntiata semper universaliora, donec menti occurrat principium aliquod, quod suppeditet prædicatum subjecto quæstionis coniungendum; hæc a prædicati consideratione descendit ad enuntiata semper minus universalia, per quæ ratiocinatio ad propositam materiam semper accedit proprius, donec deveniat ad aliquod principium, ex quo eruat quæstionis subjectum. Hæc sunt genuina methodi utriusque discrimina. Cæterum utraque methodus definitiones adhibet, utraque axiomata pro opportunitate proponit, utraque ad syllogismi formam reducitur. Una pariter et altera a notioribus exordium sumit, nisi quod ea a quibus exorditur analysis, notiora sunt conclusionem, quia clarius pertinent ad notionem subjecti; ea vero a quibus exorditur synthesis, notiora sunt conclusionem, quia clarius pertinent ad notionem prædicati. Huc igitur semper redeundum est, utriusque methodi discrimen in eo esse positum, quod altera a subjecto incipiat, altera a prædicato.

365. Utraque methodus, ut diximus, ad demonstrandum utilis est; synthetica nihilominus, ut plurimum, opportunior. Etenim et expeditius et lucidius exhibetur, et facilius suadet, ac memoriæ magis inservit, ut quæ totam deductio-

num suarum seriem uno veluti obtutu, jam ab ipsis initiis contemplandam offert. Hinc quemadmodum analysis methodus *inventionis*, ita synthesis methodus *doctrinæ* communiter audit.

ARTICULUS III.

* De methodo in scientiis adhibenda.

366. Duplex hac in re, ut in præcedenti articulo, sese offert quæstio: 1^o quænam methodus adhibenda sit ad scientiam totalem (314) inventionem comparandam: 2^o quænam in ea tradenda sit opportunior.

Ad primam quod attinet, nosti scientiam totalem contineri cognitionum systemate, quæ circa unum aliquod objectum versentur. Ad hoc autem primo necessaria est analysis. Ut enim de uno objecto cognitionum multiplicitas habeatur, resolvendum est veluti in partes ipsum objectum, partesque sunt successive investigandæ. Sed quemadmodum disiectæ objecti partes non sunt ipsum objectum, ita partium earumdem sejunctæ cognitiones, objecti cognitionem non constituunt. Necesse est ergo, ut per partitionem acquisita cognitionum multiplicitas, in unius systematis aptam accommodatamque compagem coalescat et componatur. Hoc autem exsequitur synthesis, quæ iter ab analysi emensum relegens, ac partem cum parte componens, mutuas partium et inter se et cum toto relationes deprehendit, supremumque principium quo omnia connectuntur, elicit, atque hoc pacto objecti cognitionem perficit. Igitur in scientiarum inventionem analysis præcedere, synthesis succedere debet.

367. In tradendis autem scientiis vel eadem hac via progredi possumus, vel etiam methodum amplecti omnino syntheticam. Hanc nos in his logicæ elementis tradendis secutisumus.

Animadvertendum tamen est, hanc ipsam tradendæ scientiæ methodum differre a methodo singularum propria demonstrationum, quæ in scientia continentur. Methodus enim tradendæ scientiæ analytica est vel synthetica, ratione ordi-

nis quo in objecti consideratione procedimus; methodus autem peculiaris demonstrationis, ratione ordinis quem in peculiari veritate suadenda tenemus. Potest igitur tota scientia synthetice tractari, ac demonstrationes continere tum analyticas tum syntheticas; id quod et in his elementis nostris facile deprehendes.

368. Sed jam de hac prima logicæ parte satis. Equidem hæc ipsa minutiora fortasse ac plus æquo longa non paucis visum iri scio. Sed, ut ingenue fatear quod sentio, felicem oppido me reputarem, si nullam præterea accusationem hæc qualiscunque lucubratio mereretur. Nam et accusatio isthæc mihi communis erit cum viris doctissimis, quibuscum ego nullo modo sum comparandus; nec vero abhinc multum arbitror fore, ut quæ huc congeffi, in logica institutione nimia nemini, deinceps forte pluribus pauca et jejuna videantur. Hæc enim via modo itur. Satis nimium erravimus; jam licenter vagatos esse diu piget; et ut certam possint viam rursus inire, regredi homines malunt aliquantulum, quam temere progredi.

LOGICÆ

PARS ALTERA

QUÆ EST CRITICA.

369. Gradum nunc facimus ad considerandas extrinsecas rationis normas, quæ ab objectis exsurgunt. Rectitudo autem mentis comparate ad objecta *veritas* dicitur. Itaque agendum primo nobis erit de veritate ejusque assecutione: tum de mediis quæ ad veritatem assequendam menti suppetunt; ac demum de criterio, seu indicio, cujus ope veritas a falsitate distinguitur.

LIBER PRIMUS.

CAPUT I.

DE VERITATE AC FALSITATE.

ARTICULUS 1.

De veritatis ac falsitatis notione.

370. Veritas est *adæquatio intellectus et rei*. Hæc veteribus receptissima veritatis descriptio, qua nulla melior, omnem comprehendit veritatem, sive sit rerum, sive cognitionis, sive sermonis. De veritate rerum alias acturi, hic de veritate cognitionum agemus, quæ et *veritas intellectus*, et *veritas logica* dici solet. Qua in tractatione etiam de veritate sermonis, quantum ad logicam pertinet, aliquid erit innuendum.

371. Veritas igitur est in intellectu, secundum quod intellectus rem intellectam adæquat, nempe secundum quod habet conceptus objectis conformes. Quamobrem ratione veri-

tatis logicæ, ut ait ex Aristotele s. Thomas (1), intellectus se habet ad objectum *sicut mensuratum ad mensuram*. Non enim intellectus veritatem habet, quia res ipsi conformantur, sed quia ipse rebus conformatur. Quare veritas logica in specie definitur: *conformitas mentis cum objecto*.

372. Veritatis oppositum est falsitas, videlicet *difformitas intellectus ab objecto*. Sed, ut intelligas quænam difformitatis ratio falsitatem constituat, animadvertendum est, inter intellectum et rem duplicem difformitatem esse posse; *negativam* scilicet ac *positivam*.

Negativa difformitas in eo est, quod intellectus totam rei intelligibilitatem conceptu suo non exhaurit, sed tantum ex aliqua parte; ut quum de auro cogitas tanquam de metallo fulvi coloris. Positiva autem difformitas tunc datur, quum intellectus objecto non conformatur ex ea parte, secundum quam illud exprimit, nempe quum objecto detrahit id quod habet, vel tribuit quod non habet; ut si quis cogitaret Deum esse corpus. Difformitas igitur negativa est inadæquatio cognitionis cum objecto *materiali* (13), in quod tendit cognitio; positiva est inadæquatio cognitionis cum objecto *formali*. Objectum autem formale est proprium cognitionis objectum. Itaque negativa difformitas cognitionem a proprio ejus objecto difformem non facit; adeoque non est dicenda falsitas, sed potius ignorantia quædam, quæ privative, non contrarie (31, 2º, 3º) cognitioni opponitur. Ut speculum planum etiamsi totius corporis non referat imaginem, sed capitis tantum et summi pectoris, non idcirco dicitur falsam exprimere imaginem, sed solum objectum non totum exprimere. E contrario speculum concavum vel convexum, quia id ipsum quod de objecto repræsentat, deformat vel augendo, vel minuendo, idcirco falsam dicitur offerre imaginem. Sic igitur *falsitas est solum in difformitate positiva*, per quam inter cognitionem et proprium ejus objectum vere discordia constituitur. Et hæc difformitas opponitur cognitioni contrarie.

(1) In 1^a Periherm., l. 3.

ARTICULUS II.

De veritate idearum ac judiciorum.

373. PROPOSITIO I. *Veras dicimus ideas, vera judicia. Sed non eodem modo utrique operationi veritas adscribitur.*

In primis certum est non modo judicio, sed etiam ideæ suam competere veritatem. Si enim idea suo objecto conformis est, hoc ipso vera est. Potest autem idea suo objecto conformis esse: nam est objecti repræsentatio et similitudo, qua objectum in mente percipientis exprimitur. Ut igitur imago potest esse suo prototypo conformis, ita quoque idea suo objecto; quod et loquendi usus confirmat. Ex hoc patet etiam quo sensu ideæ dicantur veræ; nempe quatenus proprium objectum ita exprimunt, ut hæc expressio sit illi conformis.

374. Judicium spectari potest ac debet 1º *objective*, ut est enuntiabile aliquod, seu connexio prædicati cum subjecto: 2º *subjective*, ut est actus mentis affirmantis.

Judicium objective spectatum verum dicitur, si res quam subjectum repræsentat, se habeat ut enuntiatur affirmative vel negative: falsum e contrario, si res quam subjectum repræsentat, non se habeat ut enuntiatur. Animadvertere enim debes, subjectum in judicio locum tenere rei prouti est in se; prædicatum autem poni ut mentis conceptum, quo res illa exprimitur (131); unum autem reduci ad alterum per copulam, quæ est identitatis seu diversitatis signum (1). Unde fit, ut relatio inter prædicatum et subjectum exhibeat relationem inter intellectum et rem; adeoque si v. gr. in judicio affirmante prædicatum relatum ad subjectum, illique applicatum, est ei conforme, jam inter judicii terminos sit relatio adæquationis, seu veritatis, si secus, relatio inadæquationis, seu falsitatis.

In judicio igitur est veritas vel falsitas tanquam relatio inter subjectum et prædicatum.

* 375. Hinc colliges: 1º veritatem esse in judiciis affirmantibus eodem modo, ac identitas objectiva; et in negan-

(1) V. S. Th. Summæ, I, p. XVI, a. II.

tibus eodem modo, ac objectiva diversitas: nam et hæc et illa est in enuntiabili, tanquam relatio inter subjectum et prædicatum.

2^o Imo iudicii affirmantis veritatem idem plane esse, ac objectivam subjecti et prædicati identitatem; et veritatem iudicii negantis idem esse, ac objectivam utriusque diversitatem.

3^o Patet quoque, quid sit discriminis inter idearum ac iudiciorum veritatem. Veritas enim ideæ est, ejusdem affectio relativa ad proprium objectum; veritas iudicii est relatio inter ideam et objectum cum quo componitur, per compositionem expressa. In ideis veritas est. propemodum latens, quia non advertitur; in iudicio est tanquam objectum cognitum et affirmatum. Idecirco enim fit, aut certe fieri debet, subjecti cum prædicato compositio, quia hujus præ illo veritas advertitur (145, 3^o).

4^o Ex his item intelligitur cur propositiones veræ, non item ideæ veritates dicantur; nempe eodem sensu, quo una quantitas relata ad alteram per signum æqualitatis, dicitur a mathematicis æquatio.

5^o Postremo et illud colligere licebit: veritatem ubique et apud omnes eandem esse; nec quod in una mente verum est, falsum in altera esse posse. Etenim idea quæ ad aliquod objectum refertur, vel est conformis illi, vel ab illo difformis. Si conformis est, quæcunque sit mens quæ iudicat, erit in ea veritas; si difformis est, erit in ea falsitas.

376. Iudicium subjective spectatum non dicitur logice verum aut falsum, sed *rectum* aut *erroneum*. Si enim dicas verum affirmandi actum, id intelligi solum poterit de veritate quæ rerum propria est, nempe quod actus ille habeat omnia quæ ad affirmationis naturam requiruntur. Assertio igitur nec vera est logice nec falsa, sed ad veritatem vel falsitatem logicam, quæ in enuntiabili continetur, tendit, et alterutram amplectitur; et in hoc dicitur *rectum* vel *erroneum*. Rectum, quum enuntiabile verum format; quia per hoc ideam refert ac reducit ad proprium ejus objectum; et sic agens recta propemodum incedit via, quia juxta suam

regulam agit. Erroneum, quum enuntiabile falsum format: quia sic ideam a proprio objecto detorquet, et alteri applicat objecto, cum quo conformitatem non habet; atque in hoc a scopo deflectit, et a sua regula aberrat.

Hinc *erroris* definitio, videlicet: *mentis assensus, quo vel negamus conformitatem eorum, quæ sunt conformia, vel affirmamus conformitatem eorum, quæ sunt difformia.*

* 377. PROPOSITIO II. *Falsitas est graduum capax; veritas autem et ipsa gradus habere potest, non quidem respectu objecti formalis, sed respectu objecti materialis.*

Potest nunc illa solvi quæstio: utrum veritas et falsitas sint graduum capaces, ita ut una idea vel propositio vera magis quam altera, aut magis falsa dici queat, an non. Et de falsitate quidem responsio in promptu est. Cum enim falsitas sit quædam inæqualitas, facile intelligitur in uno conceptu majorem difformitatem ab aliquo objecto, quam in altero posse haberi. Ita v. gr. æstimatur errare magis qui dicat, *solem esse minorem terra*, quam qui dicat, *esse illi æqualem*.

Aliter videri posset dicendum de veritate. Veritas enim æqualitas quædam est, in qua nec magis, nec minus locum habet. Nihilominus usus communis fert, ut unum altero verius existimetur. Quæ duo ut concilientur, adverte, ideam posse considerari tum respectu sui proprii objecti, quod est formale, tum respectu objecti materialis. Respectu objecti formalis, non potest esse illi magis aut minus conformis; nam illud ex toto semper repræsentat. Respectu autem objecti materialis potest una idea plus aliquid de illo exprimere quam altera; sic illa erit verior quam ista; ut v. gr. idea quæ *Petrum* exhibet ut *hominem*, verior est ea quæ exhibet *illum* ut *animal*. Ita quoque iudicium hoc: *Petrus est homo*, verius erit illo: *Petrus est animal*. Et hi dici possunt veritatis gradus *secundum extensionem*. Alio insuper modo unum iudicium altero verius esse potest, si nempe major sit in uno necessitas, quam in altero. Ita verius dici potest hoc iudicium: *Deus est sapiens*, quam illud: *Plato est sapiens*; quia magis repugnat prædicatum primæ propositionis non esse.

conforme suo subjecto, quam prædicatum secundæ. Sic veritas gradus habet etiam *secundum firmitatem*.

ARTICULUS III.

Utrum in intellectuali apprehensione falsitas esse possit.

378. PROPOSITIO III. *Omnis intellectualis apprehensio, per se spectata, falsitatem in intellectum inducere nequit.*

Ut hoc demonstretur, prænotandum, 1^o rectam esse apprehensionem, si mentem informet conceptu, qui proprio apprehensionis objecto sit conformis. Apprehensionis autem objectum proprium est id omne quod menti se sistit, et prouti menti se sistit.

2^o Loquimur de apprehensione per se spectata; i. e. remoto quocunque influxu antecedentis iudicii, de quo postea.

379. Probatur propositio.

1^o Mens percipiens vel exprimit in se objecti, quod percipit, similitudinem, vel non. Si primum, conceptus erit verus, et apprehensio recta; si alterum, jam falso dicis mentem objectum illud percipere: percipere enim objectum perinde est, ac illud in mente exprimere.

Ergo omnis conceptus mentis percipientis aut verus est, aut nullus.

Neque dicas posse mentem, dum unum objectum percipit, alterius similitudinem in se concipere. Si enim hoc dicis, ea dicis quæ se mutuo destruunt. Nam id tantum percipitur, cuius idea in mente exprimitur: Ergo non potest mens unum percipere, et in hoc alterius ideam concipere. Secus non perciperet quod percipit, et perciperet quod non percipit.

2^o Mentis apprehendentis conceptus a proprio perceptionis objecto non potest esse difformis, si mens apprehendens nihil tribuit objecto, quod non sittribuendum, ac nihil detrahit, quod non sit detrahendum (372).

Atqui sic plane se res habet. Mens enim nihil omnino rei tribuit, nihil omnino detrahit, nisi ad iudicandum pertranseat. Dum ergo mens apprehendit, nihil immutat de iis notis, per quas objectum fit ipsi cognoscibile, sed eas hauriens, ut

ita dicam, ab objecto, per eas omnes ac per eas duntaxat objectum in se exprimit. Huc facit allata jam speculorum similitudo (372).

380. Notanda. 1^o Ex dictis immediate consequitur, ideas omnes intuitivas veras ex se esse. Hæ enim ideæ objecti perceptione comparantur (21).

2^o Ideæ quoque factitiæ si deductæ non sint (22), quo in casu iudicii influxum persensere, falsitati subesse de se nequeunt. Cum enim ideæ partium, quæ intuitivæ sunt, per se sint veræ, hoc ipso idea totius vera est respectu objecti possibili, quod partibus ejusmodi constare posset.

3^o Ideæ ipsæ quæ deductæ sunt, quanquam si deductio recta non fuerit, ab objecto cui applicantur, possint esse difformes, tamen respectu saltem alterius objecti, sin minus existentis, at certe possibili, veræ dicendæ sunt: constant enim et ipsæ elementis intuitivis.

4^o Hinc patet nullam esse ideam, quæ per se spectata et ab influxu iudicii soluta, vera non sit. Et sane nulla est idea, quæ alicujus veræ propositionis elementum esse non possit.

5^o Nota demum, ea quæ de apprehensionis rectitudine diximus, de omni apprehensione valere, non modo simplici sed etiam comparativa. Quum enim binæ ideæ percipiuntur objective identicæ vel diversæ, hæc identitas vel diversitas aut ab ipsis præ se fertur ideis, aut a mente de suo ponitur. Sed ante iudicium mens nihil addit objecto. Ergo ante iudicium non potest apprehendi inter ideas identitas vel diversitas, nisi eam ipsæ ideæ præ se ferant.

ARTICULUS IV.

Quomodo falsitas in mentem subeat.

381. Quanquam omnes ideæ per se veræ sint, falsæ tamen fieri per iudicium possunt, potest enim mens quum iudicat, ideam aliquam, quæ comparata ad suum objectum vera est ad aliud detorquere objectum, cum quo illa conformitatem non habeat. Quod si accadat, idea sic relata et applicata

evadit falsa; plane ut imago vera Petri, si ut Pauli imago statuatur, falsa imago esse incipit. Hinc

382. PROPOSITIO IV. *Falsitas in mentem subire potest per judicium, ac solummodo per judicium.*

Subit autem 1° per judicium, quod simplicem apprehensionem consequitur; id quod triplici hoc modo potissimum contingit:

a) quum mens rei a se perceptæ tribuit aliquam notam, ultra eas quas percepit; ut si quis oblato sibi stamno, quod metallum est et argenti colorem habet, argenti quoque naturam illi tribueret. In hoc casu idea argenti, quæ de se vera est, falsa evaderet, quatenus ad objectum non suum referretur.

b) quum proprietates quæ pertinent ad objectum uti apparet, refert ad objectum uti est in se. In hoc casu perceptionis objectum est res uti apparet, et secundum hoc recta est perceptio, et idea vera; at non semper aut quoad omnia, objectum est in se cujusmodi apparet. Quare idea objecti apparentis, respectu objecti uti in se est, falsa esse potest. Sic erraret, qui judicaret *solem circum esse bipedalis diametri*.

Ut id quod de objecto apparente perceptum est, ad objectum reale referri tuto possit, ratio aliqua adsit necesse est, quæ doceat objectum reale ita esse, uti apparet. De hoc in sequenti libro.

c) demum errare mens poterit, si rei neget id quod in illa non percepit, ex eo solum quod hoc non percepit; ut si quis negaret *fumum gravem esse*, quia non percepit illum deorsum tendere: non enim semper objecta manifestantur nobis secundum omnia quæ in iis sunt.

383. 2° Potest esse falsitas etiam in mente simpliciter apprehendente, non quidem per se, sed *per accidens*, ratione nempe *antecedentis judicii*, quod apprehensioni admixtum in illam influit. Fit autem hoc, quum intellectus per judicium erroneum, certæ cujuspiam rei notam vel definitionem alteri apposuit; unde quotiescunque de re illa cogitat, definitionem alterius sibi repræsentat, aut saltem ideam compo-

sitam quæ rei non convenit. Sic cæcus ille, qui putabat colores esse sonos quosdam tenuissimos, quos ipse excipere auribus non posset. Sic etiam illi, qui parcimoniam sub avaritiæ specie concipere assueverunt, vel prudentiam sub larva pusillanimitatis.

384. Hæc eadem de apprehensione comparativa dici debent. Nam 1° post apprehensionem identitatis vel diversitatis inter ideas errat intellectus, si non eam ipsam identitatem aut diversitatem affirmet, quam percepit. De hoc iterum in tertio libro.

1° Apprehensio ipsa comparativa, non secus ac simplex, erronea esse potest per accidens, ratione nempe judiciorum antecedentium, quæ in illam influunt; uti accidit in apprehendenda conclusione falsa ratiocinii recti: v. gr. ex eo quod quis judicavit stamnum sibi oblatum esse argentum, apprehendit ratiocinando, argenti pretium illi inesse.

385. Ex hucusque dictis colligere licet, quare ideæ quædam vulgo falsæ dicantur.

Dicuntur falsæ 1° *occasionaliter*, qui nempe judicii falsi quandoque sunt occasio (382, a, c).

2° *Relative*, nimirum respectu alicujus objecti, quod non est proprium earum objectum, ad quod tamen referri per judicium falsum solent (382, b).

3° *Præsuppositive*, quatenus ideæ quædam per judicium falsum formatae sunt (383).

4° Tandem *abusive*, quatenus cum falso aliquo judicio confunduntur.

ARTICULUS V.

Difficultates enodantur.

386. Adversus ea, quæ hactenus disputata sunt, hæc opponi possunt.

Obj. 1° Perceptio inducit non raro falsitatem in intellectum. Constat enim multas ideas, hominum præsertim rudium, vel eorum qui cupiditate vehementi affecti sunt, esse a suis objectis diffformes.

Resp. *Nego ant.* Ad rationem additam, *dist.*: constat multas

ideas..... esse diffformes a suis objectis difformitate negativa, *conc.*; difformitate positiva, *subdist.*: post iudicium, *conc.*; ante iudicium, *nego*. Hæc omnia ex dictis facile intelliguntur.

Obj. 2^o Aliqua idea dicenda est falsa ante iudicium, si objectum quandoque appareat aliter ac est. Atqui objectum quandoque apparet aliter ac est. Ergo.

Resp. *Dist. maj.*: si insuper objectum quandoque non percipiatur ut apparet, *conc. maj.*; si semper percipitur ut apparet, *neg. maj.*

Contradist. min.: et semper objectum percipitur ut apparet, *conc. min.*; et quandoque objectum non percipitur uti apparet, *neg. min.*

Ei v. gr. qui percipit solem bipedalis diametri, sol apparet aliter ac est. Sed hoc ipso objectum perceptionis hujus non est sol in sua reali magnitudine, sed sol uti apparet. Si ergo solem hunc apparentem mens percipiat, recta erit perceptio, et idea objecto suo conformis. Aliter vero de iudicio loquendum (382, b).

Obj. 3^o Sæpe contingit ut loco rei objectæ alia percipiatur.

Resp. *Nego*. Sed hoc aliquando contingit, ut objecto quod percipimus, ideam rei alterius per iudicium applicemus, eo quod notæ in objecto perceptæ huic quoque rei sunt communes: sic error est in iudicio, non in perceptione (382, a).

Obj. 4^o Sunt quædam ideæ, quibus nullum respondet objectum. Tales sunt ideæ factitiæ arbitrariæ.

Resp. *Dist.*: nullum objectum possibile, *nego*; reale, *subdist.*: si sermo sit de tota idea, *conc.*; si de ejus elementis *nego* (380, 2^o).

Obj. 5^o Atqui quarundam idearum objectum est omnino impossibile. Exemplo sit idea Dei injusti vel corporei.

Resp. *Dist.*: si recte concipis ea ipsa quæ voce exprimis, *nego suppositum*; si alia concipis ab iis quæ termini significant, *subd.*: objectum est impossibile, secundum quod mente conceptum, *nego*; secundum quod verbis expressum, *conc.*

Ut alibi diximus (28), si duo contradictoria, ita ut sunt in

seipsis concipis, ea in unam ideam componere nunquam poteris: idcirco si in hoc casu dicas, te habere ideas impossibilium, *negatur suppositum*. Si vero, ut frequenter contingit, res concipis plane diversas ab iis quas termini significant, quæque nulla inter se contradictione adversantur, poterit certe ex iis fieri idea composita, cujus objectum possibile erit, quanquam voces impossibile exprimant. V. gr. si Deum concipis, ut ens nulli imperfectioni obnoxium, nunquam poteris ideam Dei injusti efformare. At si idea quam dicis Dei, ens aliquod imperfectum tibi repræsentat, in hoc non repugnat injustitia. Nihilominus vox hæc, *Deus injustus*, impossibile semper significat, quia voces pro rebus supponuntur.

Obj. 6^o Si nullæ essent ideæ falsæ, neque judicia falsa dari possent. Nam iudicium fit componendo elementa, quæ apprehensio primum exhibuit conjuncta, quæque deinde analysis discevit.

Resp. *Neg. ant.* Ad rat. additam, *dist.*: ita res se habet in judiciis veris, *trans.*; in falsis *nego*.

Quum judicia falsa fiunt, ea componuntur elementa, quæ apprehensio objecti non suppediavit. Percipis enim v. gr. vitri figuram et qualitates, ac tū judicas esse adamantem, id quod sane non percepisti. Neque in omni iudicio vero, objecti ejusque proprietatis præcedet apprehensio, sed solum in immediatis.

Obj. 7^o Saltem apprehensio comparativa quæ falsum iudicium præcedit, falsa dicenda est.

Resp. *Dist.*: falsa per se, *neg.*; falsa ad summum per accidens, *conc.* Judicia falsa vel nulla præcessit apprehensio comparativa (147), vel præcessit, sed vera et inter terminos diversos ab iis, qui iudicio componuntur (384, 1^o); vel si falsa præcessit, id fuit ex antecedentium influxu iudiciorum (384, 2^o).

ARTICULUS VI.

De veritate sermonis.

387. Logica veritas, quæ in mentis operationibus inveni-

tur, signis quoque illarum tribuitur, non quod signa existimentur rebus conformia, sed quatenus id quod rerum significatarum proprium est, ad earundem signa per analogiam transfertur.

Igitur ut ideis, ita et terminis veritas convenit; et quemadmodum ideæ de se suam semper veritatem habent, ita et termini falsitatis nunquam notantur.

Orationes illæ, quæ affirmationem vel negationem non continent, logicæ veritatis vel falsitatis compotes minime sunt: significant enim non animi conceptus, sed affectus, vel alios actus, in quibus conformitas vel difformitas ad objecta locum non habet.

Propositio autem quoniam iudicii signum est, veritatem quoque vel falsitatem, quæ in iudicio reperitur, continet expressam, nimirum objectivam; veritatem quidem, si subjectum se habeat ita ut effertur; falsitatem, si secus. Et in hoc manifestat rectitudinem mentis iudicantis, vel errorem, tum etiam veritatem, vel falsitatem subjectivam, quæ est in conceptu mentis per iudicium et post iudicium, quatenus mens post iudicium rem jam concipit sub ea forma, quæ per prædicatum exprimitur. Propositio igitur in eo quod est signum iudicii suppositivum (155), est etiam signum manifestativum veritatis vel falsitatis, quæ est in mente iudicantis.

388. Hæc de logica sermonis veritate vel falsitate. Nunc de veritate morali, quæ pariter ad sermonem pertinet, magisque per se pertinet quam logica.

Oratio omnis quæ perfecta sit, ut alias notavimus, alicujus interni facti, actus, affectionis signum est suppositivum (140). Subiacet autem, ut plurimum, humanæ libertati, hæc aut illa supponere affectionum suarum signa; ac potest ea supponere, quæ internum statum animi referant, et ea quæ ad statum pertineant oppositum vel diversum. Si igitur ejusmodi signum supponatur, quod interno statui sit conforme, hoc signum dicitur moraliter verum; si signum supponatur difforme, hoc dicitur moraliter falsum. Si quis v. gr. admirationis vel doloris signum proferat, quum tamen nullo

interioris admirationis, dolorisve sensu percellitur, signum illud moraliter falsum est. Hæc porro veritas et falsitas *moralis* appellatur, quia honestati vel malitiæ, quæ ex libertate proficiscitur, consociatur.

* 389. Hinc 1º termini per se spectati nec veritatis, nec falsitatis moralis sunt capaces; quia, ut suo loco (62) diximus, non pro ideis, sed pro rebus supponuntur, quanquam in hoc ideas quas de rebus habemus, manifestant.

2º Quæcunque externa signa quæ pro internis affectionibus supponantur, inter quæ omnis oratio perfecta adnumeratur, veritatis vel falsitatis moralis sunt capacia; suntque vera semper, quum ex ipsa natura erumpunt; vera vel falsa, quum ex libertate procedunt.

3º In his propositio, quæ affirmationis signum est suppositivum, moralem veritatem vel falsitatem induit, prouti mentis iudicio conformis est vel difformis.

* 390. Propositio moraliter vera *veriloquium*, moraliter falsa *mendacium* dicitur; qui vera loquitur *verax*, qui falsa *mendax* appellatur, Propositionis autem veritas, vel falsitas moralis a logica differt in pluribus.

1º Logica veritas, vel falsitas continetur a propositione, prouti hæc significat iudicium *objective* spectatum (387), i. e. applicationem talis prædicati ad tale subjectum: moralis autem afficit propositionem, prouti hæc ad iudicium *subjective* spectatum refertur, prouti nempe adhibetur ut signum affirmationis internæ vel negationis.

2º Logica veritas vel falsitas enuntiabilium propria est, et ab iis in enuntiationes derivatur; moralis ad enuntiationem pertinet, in eaque ponitur ex intentione loquentis: illius mensura est res, hujus intellectus.

3º Propositio vera logice palam facit nos recte iudicasse, falsa iudicasse perperam: propositio autem moraliter vera eo spectat, ut alii recte iudicent, falsa ut iudicent perperam.

4º Propositio falsa logice potest esse vera moraliter, si interno iudicio respondeat, et propositio logice vera potest esse falsa moraliter, si interno iudicio non respondeat.

CAPUT II.

DE ASSECUTIONE VERITATIS.

ARTICULUS I.

Quid sit assequi veritatem.

391. Quum dicimus mentem assequi veritatem, id prima sic intelligi potest, quod assequatur ideas objectis conformes: in hoc enim est mentis veritas (371). Quum igitur mens tales ideas acquirit, veritate potitur; at nondum veritatem cognoscit, cognoscit potius rem. Quare secundo modo intelligi potest assecutio veritatis, quatenus ea sit veritatis cognitio.

392. Veritas autem dupliciter cognosci potest, *actu nempe signato*, ut veteres loquebantur, et *actu exercito*.

Actu exercito veritatem cognoscere dicimur, quum inter rem et conceptum, qui rei conformis est, apprehendimus esse conformitatem; seu simplicius quum apprehendimus rem ita esse ut est, vel non esse ut non est; v. gr. *fulgur esse scintillam electricam*, aut *sidera non illuminari a sole*. Hæc veritatis cognitio unum idemque est ac apprehensio identitatis vel diversitatis, quæ verum iudicium præcedit (375, 2^o, 3^o).

Actu signato veritas cognoscitur, quum cognitio terminatur ad ipsum veritatis conceptum, sive apprehensione simplici sive comparativa; v. gr. *quum cognoscis definitionem veritatis*, vel *quum cognoscis aliquam sententiam æstimandam esse veram*.

* 393. Quæres an hæc eadem dici de falsitate possint. Respondeo in primis inusitatam esse hanc locutionem: *mens falsitatem assequitur*, et merito. Assequi enim dicimur ea quæ bona sunt, quibusque aliqua nostra facultas perficitur. Jam perficitur utique intellectus veritate, at falsitate non perficitur, sed potius perfectione sibi conveniente privatur.

Infitur autem intellectus falsitate solummodo per iudicium, ut supra explicatum est (381).

* 394. At dici ne potest intellectum *cognoscere falsitatem*? Quoniam hæc locutio intelligi potest et de actu exercito, et de actu signato (392), respondendum 1^o de actu exercito neque dici generatim posse, neque solere. Ratio est, quia cognitio exercita falsitatis contineretur apprehensione comparativa erronea. Comparativa autem apprehensio ex se erronea esse non potest (380, 5^o). Quum vero ob antecedentium iudiciorum influxum erronea est (384, 2^o), tunc *falli* dicimur, aut falsam haurire cognitionem, at non fert usus, ut falsitatem cognoscere dicamur.

2^o Quum vero de actu signato sermo est, dici potest et communiter dicimus, nos falsitatem cognoscere, v. gr. quum cognoscimus aliquod iudicium nostrum falsum fuisse.

395. Jam ut redeamus ad veritatis cognitionem, in præsententi capite non de assecutione veritatis per conceptus, neque de cognitione veritatis quæ actu signato continetur, sed de cognitione exercita loquimur. Cujus respectu cognitionis potest humanus intellectus diversimode se habere: unde status diversi mentis quoad veritatis assecutionem.

ARTICULUS II.

De variis mentis statibus respectu veritatis assequendæ.

396. Ab assequenda veritate remotissima mens est, quum in statu detinetur ignorantie. Si enim objecti ideam non habes, patet te cognoscere non posse idearum tuarum cum tali objecto conformitatem. Est autem ignorantia: *status in quo est mens quum objecti cognitione caret*. Estque totalis, vel partialis. Totalis, quum nullam omnino objecti ideam habemus; sic v. gr. ignoramus vegetalia quæ sunt in orbe maris: partialis, quum aliquid ad objectum pertinens nos latet; sic v. gr. ignoramus an stellarum numerus sit par vel impar.

397. Status dubii est *suspensio intellectus inter utramque contradictionis partem*; quum videlicet intellectus, inter binas propositiones oppositas constitutus, in neutram partem inclinari per assensum potest.

Dubium dicitur *positivum*, quum oritur propterea quod

ex utraque parte rationes quædam adsunt, quæ rem aliquo modo suadere videntur, sed quæ vim non habent assensui per se extorquendo parem, quatenus erroris formidinem excludere non possunt. In hoc statu, intellectus modo in unam partem trahitur, modo ab illa retrahitur et ad alteram fertur, hæsitans incertus inter utramque.

Dicitur dubium *negativum*, quum ex neutra parte rationes ad judicandum occurrunt, vel solum levissimæ atque attentione minime dignæ. Sed hoc dubii genus vix ac ne vix quidem differt ab ignorantia, quam diximus partialem.

398. *Opinio est assensus intellectus in alteram contradictionis partem, cum formidine tamen de alterius veritate.* Quum videlicet mens in dubio est, neutri parti per se adhærere potest; potest tamen a voluntate inclinari ad unam partem, potius quam ad alteram, et imperante voluntate assensum præbere. Si tamen altera quoque pars sua habeat momenta, nec respui possit, aut debeat tanquam certe falsa, non potest impedire voluntas, quin intellectus plus vel minus hoc percipiat. Hæc autem perceptio reagens in voluntatem facit, ut dum in unam partem intellectum inducit, formidinem de alterius veritate penitus abicere non possit. Est igitur opinio assensus infirmus et vacillans, et iudicium aliquatenus dubio permixtum.

399. Ab opinione differt *suspicio*, quæ est *propensio quædam ad judicandum, consequens motivorum apprehensionem et aliquam attentionem ad illa.* Differt, inquam, ab opinione, quia opinio, uti diximus, est iudicium, ut ut firmum non sit; suspicio autem non est iudicium, sed mera inclinatio ad judicandum, quæ potest excitari, sive quia motivum aliquam vim habet suadendi, sive etiam quia voluntas disposita est ac prona ad imperandum iudicium.

400. Motiva quæ opinionem gignere possunt, quatenus menti innotescunt, sententiæ *probabilitatem* constituunt. Nequit autem dici vere probabile, nisi quod gravi motivo suadet. Etenim quum certitudo haberi nequit, id solum dici meretur approbatione dignum, quod viri prudentis assen-

sum sibi vindicare potest. At vir prudens non levi quocunque momento trahi se sinit ad assensum, sed grave requirit. Grave autem motivum illud censeri debet, quod, etiamsi errandi periculum non omnino excludat, nihilominus et in se vim habet sufficientem ad rem confirmandam, et oppositas rationes apte solvit.

Ex quo deduces, quænam sit opinio *prudens*, quænam *imprudens*. Prudens est, quæ motivo et in se et relative gravi innititur, et non ultra excurrit assensu quam motiva patiantur. Imprudens, quæ vel in uno, vel in altero peccat. Ex primo capite imprudens erit opinio, si 1º consideratio motivorum illam non præcedat, sed impetu alicujus cupiditatis assensus extorqueatur; 2º si non considerentur motiva utriusque partis; 3º si facta comparatione, motivum judicandi et in se et relative grave non sit deprehensum. Ex altero capite opinio imprudens erit, si errandi formido, quam motiva non tollunt, despiciatur aut abjiciatur, ita assensum obfirmando, ac si definitivum iudicium ponere liceret.

401. Ex comparata sententiarum probabilitate, alia dicitur *probabilior* sententia, alia *minus probabilis*, alia *probabilissima*, alia *vix probabilis*. Quæ sententia gravi destituitur motivo, et contra se habet probabilitatem omnino maximam, dicitur *improbabilis*.

* 402. Cæterum in æstimanda sententiarum probabilitate, hæc attendi debent:

1º Non idem esse probabile ac possibile. Aliud enim est quod res esse possit, aliud quod actu sit. Multa sunt certo possible, quæ tamen improbabilia sunt, imo certo falsa.

2º Probabilitas alia *absoluta* est, alia *relativa*. Probabilitas absoluta continetur vi motivorum tali, quæ humanæ mentis ac voluntatis natura generatim considerata, possit ad assensum prudentem movere: probabilitas relativa est vis motivorum, prouti individuum magis vel minus afficit. Motiva autem eadem unum individuum magis afficiunt quam alterum, et idem individuum diversimode afficiunt pro circumstantiarum varietate, ut pet experientia.

3^o Hinc, quando discrimen opinionum est, eademque sententia huic probabilior est, alteri minus probabilis, nemo potest asserere sententiam suam esse absolute et in se probabiliorem, sed solum probabiliorē sibi videri. Absolute probabile id solum æstimari poterit, quod vel omnibus, vel pluribus, vel sapientissimis probabile videtur (319).

4^o Judicium de opinionum controversarum probabilitate natura sua mutabile est. Hoc quoque experientia demonstrat.

5^o Omnis propositio probabilis, etiamsi probabilissima sit, falsa esse potest. Secus non probabilis esset, sed certa. Hinc ex eo quod unam sententiam amplecteris ut probabilem, aut etiam probabiliorē, vel probabilissimam, non potes oppositam ut plane falsam rejicere.

6^o Hinc patet et opinionem prudentem posse esse erroneam, et opinionem imprudentem posse esse cum veritate conjunctam,

7^o Quum binæ propositiones oppositæ sunt vere probabiles, si alterutra ex iis, seu relative seu etiam absolute, probabilior sit, non idcirco oppositæ probabilitatem destruit.

8^o Cessat omnis propositionis probabilitas, quum oppositi veritas fit certis argumentis evidens. Hinc effatum illud : *præsumptio cedit veritati*.

ARTICULUS III.

De certitudine.

403. Quum mens ab omni erroris formidine liberata judicat et in judicio immobilis ac firma perstat, tunc certa esse dicitur. Est igitur certitudo *firmitas judicii*, seu *firmitas adhesionis convenientiæ vel discrepantiæ idearum perceptæ*.

404. Certitudo, cum sit mentis affectio, proprie loquendo *subjectiva* est : tribuitur tamen translate etiam objecto, i. e. enuntiabili, de quo mens certitudinem habet vel habere potest : et hæc est certitudo *objectiva*. Quæ quidem non est solummodo propositionis enuntiabilis veritas, sed veritas suis quasi stipata motivis, ac motivis ejusmodi, quæ ostendant rem aliter esse non posse; quæ proinde si intelligantur,

satis sint ad omnem oppositi formidinem excludendam. Quare objectiva certitudo nihil est aliud, quam *enuntiabilium necessitas*.

405. Hæc porro necessitas non in omnibus propositionibus est eadem. Sed in quibusdam *absoluta* est, in quibusdam *hypothetica*. Absolute necessaria ea propositio est, cujus subjectum ante omnem hypothesim, et quacunque facta hypothesi, aliter ac enuntiatur se habere nequit : illa vero est hypothetice solum necessaria, cujus subjectum, supposito aliquo facto contingenti, aliter se habere nequit, quamvis eo non supposito habere se aliter possit. V. gr. hæc propositio : *Qui currit movetur*, est absolute necessaria ; hæc vero : *Petrus currit*, est necessaria hypothetice ; videlicet : *si currit, non potest non currere*. Formula primam necessitatem exprimens hæc est : *S non potest non esse P*. Formula exprimens alteram, hæc : *Posito C, S non potest non esse P*.

406. Quum propositionis necessitas menti innotescit, propositio fit vel intrinsece vel extrinsece evidens. Sed de evidentia suo loco. Interim tanquam certum assumi potest, certitudinem subjectivam, quoad veritates naturaliter cognitās, in objectivæ cognitione fundari. Non enim excluditur formido oppositi, nisi perspectum sit rem aliter ac perspicitur esse non posse. Quare sine certitudine objectiva, saltem apparente, certitudo subjectiva constare nequit. Patebit autem ex alias dicendis, objectivam certitudinem apparentem ac fictitiam esse non posse, nullamque propositionem falsam posse esse evidentem.

ARTICULUS IV.

De speciebus certitudinis.

407. Certitudo, præsertim objectiva, pro diversitate fontis unde dimanat, dividitur in *metaphysicam*, *physicam*, et *moralem*. Omnis quidem certitudo propositionis necessitate, videlicet oppositæ enuntiationis impossibilitate continetur (404). Sed hæc impossibilitas ex triplici capite oriri potest : •

1^o ex eo quod enuntiatio terminis constet contradictoriis.

Contradictoria enim simul consistere intrinsece repugnat. Hæc est impossibilitas metaphysica.

2^o ex eo quod enuntiatio naturæ legibus (308) contraria sit; quæ proinde, his positis, vera esse nequeat. Hæc est impossibilitas physica.

3^o ex eo quod enuntiatio universalibus atque constantibus hominum moribus (308) adversetur, adeoque impossibilis sit, posita morum humanorum firmitate. Hæc est impossibilitas moralis.

Propositio igitur certa est vel metaphysice, vel physice, vel moraliter, prouti ejus oppositum metaphysice, physice, vel moraliter repugnat. V. gr. ex his enuntiationibus: *Quæ sunt æqualia uni tertio, sunt æqualia inter se*; *Lapis in aqua demergitur*; *Homines nolunt mendaces haberi*; prima est metaphysice, altera physice, tertia moraliter certa.

408. Ex his porro fluit:

1^o Certitudinem metaphysicam, physicam, et moralem specie inter se differre. Certitudinis enim species distingui debent secundum motivi diversitatem. Motivum autem metaphysicæ certitudinis est intrinseca idearum connexio, certitudinis physicæ naturæ leges, ac moralis leges morales.

2^o Certitudinem physicam et moralem esse hypotheticam (405). Etenim formido de oppositi veritate excluditur, positis legibus sive physicis sive moralibus, quæ quidem sunt contingentes. Certitudo autem metaphysica, tum absoluta, tum hypothetica esse potest.

3^o Certitudinis metaphysicæ necessitatem esse maximam, ut quæ exceptionem nullam pati potest: minorem esse necessitatem certitudinis physicæ; leges enim naturæ, quibus ipsa nititur, virtute Creatoris interveniente, suspendi quandoque possunt, quia nulla in hoc est contradictio: minorem adhuc esse necessitatem certitudinis moralis, cum leges morales ab hominis libertate in singulis casibus dependeant.

4^o Propositiones sive physice sive moraliter certæ ad metaphysicam certitudinem reducuntur demonstratione indirecta, quotiescunque, posita earum falsitate, jam de aliquo principio metaphysice certo dubitandum esset: v. gr. ignis

effectus fore in posterum constanter eosdem qui modo sunt, est physice certum. Ast ita hoc est physice certum, ut si oppositum admittas, unum aut alterum tibi dicendum sit, videlicet vel causam necessariam non determinari ad unum, vel Deum naturæ auctorem sapienter non agere. Quæ duo cum metaphysice repugnent, dicendum est propositionem metaphysice certam esse. Quæ metaphysica certitudo, ut patet, est hypothetica.

5^o Leges sive physicæ sive morales exceptionibus quibusdam obnoxie sunt (163, 5^o), illæ per Dei potentiam, istæ ex hominum libertate. Hinc quum de singularibus agitur, ipsa physica vel moralis certitudo hypothetica est; nempe certa res est physice vel moraliter, dummodo lex sive physica sive moralis in eo casu exceptionem non patiatur.

6^o Moralis certitudo proprie dicta probe distinguenda est a maxima illa probabilitate ac verisimilitudine, quæ improprie et æquivoce certitudinis moralis appellationem sibi vindicat. Hæc enim certitudo vere non est, sed certitudinis proprie dictæ quasi supplementum quoddam, quo inniti solemus, ubi illa deficit, suadente necessitate, annuente prudentia. Datur autem, quum res certo quodammodo communiter se habere solet, ita tamen ut exceptiones non desint: quare in casibus peculiaribus oppositi impossibilitas nec metaphysica, nec physica, nec moralis cernitur, sed nihilominus ratio nulla suppetit suspicandi de opposito: v. gr. quum in diversorio dapes nobis apponuntur, non est impossibile eas fuisse veneno infectas; quum amplectimur sententiam quam doctores fere omnes tradunt, non est impossibile illi errorem subesse, nihilominus nisi ratio peculiaris occurrat, de neutro suspicamur, quia communiter neutrum contingere solet. Idem dicatur de sexcentis aliis, quæ in humanæ vitæ cursu frequentissima sunt. His igitur in casibus, pronis animis judicamus rem se habere uti communiter se habere solet, nec formido de opposito nos sollicitos habet, quia oppositum licet possibile, non est probabile; quare licet formido omnis non sit penitus exclusa, manet tamen propemodum sopita, opinionemque animi sinit esse securam.

Igitur certitudo hæc moralis improprie *certitudo* dicitur. Si enim objective spectetur, est maxima quædam probabilitas; si subjective, est opinio imperturbata. Dicitur quoque *moralis* æquivoce. Certitudo enim moralis proprie dicta hanc appellationem recipit, ea quod a *moribus* hominum desumitur; hæc autem quia moribus seu consuetudinibus generatim rerum et eventuum innititur, vel potius quia mores hominum, eorumque agendi modum dirigit. In agendo enim hanc, ut plurimum, regulam sequimur. Unde rectius vocari posset certitudo *directiva*, seu *prudentialis*.

ARTICULUS V.

* *Utrum dentur in certitudine gradus.*

409. PROPOSITIO. *Gradus in certitudine habentur spectata solum assensus intensitate.*

Ut quæstio hæc resolvatur, animadvertite statum certitudinis firmitate assensus contineri. Duo autem sunt quæ firmitatem hanc assensus in naturali certitudine, de qua sermo est, constituunt; videlicet exclusio formidinis errandi, et ipsius assensus intensitas. Jam si spectes formidinis exclusionem, nulli possunt in ipsa dari gradus. Si enim omnem errandi formidinem semel exclusam ponis, nulla est amplius formido quæ excludi possit: si non omnem ponis exclusam, certitudo nullatenus habetur. Non potest igitur ex hac parte firmitas assensus major esse vel minor.

410. At si intensitatem spectes assensus, seu propensionem qua mens, exclusa errandi formidine, veritatem amplectitur, hæc sane, ut quivis alius actus positivus facultatum nostrarum, major vel minor esse potest. Sequitur enim vim, quam certitudinis motiva in intellectum exercent, estque proportionalis intensitati evidentiae. Hoc tamen per se non inducit in certitudinem essentielles differentias; quemadmodum v. gr. odii actus intensior a minus intenso, quoad essentialiam, non differt; quia magis et minus non mutant speciem, ut dici solet.

411. Quæres ulterius, quænam veritates majorem præ aliis vim in intellectum exercent, assensumque sibi vindi-

cent intensiorem. Respondeo in primis maximam præ omnibus vim exerceri a veritatibus immediate evidentibus, ut patet. Generatim autem ac cæteris paribus, vim qua assensum extorquent, majorem esse in veritatibus metaphysice certis, quam in iis quæ physice certæ sunt, et in his majorem, quam in moraliter certis: id quod provenit ex necessitate et immutabilitate majori, quam prima habet præ secunda, et secunda præ tertia (408, 3^o). Dixi tamen cæteris paribus; nam sæpenumero contrarium experimur: sic v. gr. firmior est in nobis persuasio de gravitate corporum, aut de Venetiarum existentia, quam de aliqua veritate metaphysice certa, quæ tamen proluxa solum demonstratione evidens fieri possit.

412. Hæc de certitudine naturali. Certitudo autem fidei divinæ, quæ supernaturalis est, omni naturali certitudine est firmior. Fides enim divina est *assensus præstitus revelatis a Deo veritatibus, propter Dei testantis auctoritatem*. Ejus autem principium est humanus intellectus, secundum quod a voluntate inclinatur ad assentiendum. Ad quem actum elicendum intellectus supernaturali lumine collustratur, ad eumque imperandum voluntas divini adjutorii viribus elevatur. Si igitur spectatur formale fidei objectum, hoc majorem ac firmiorem habet necessitatem, quam omnis veritas quæ rationis usu cognosci possit. Nam in se repugnat magis, falsum esse id quod testimonio divino confirmatur, quam id omne quod intellectus humani lumine collustratur. Etenim Deus est essentialiter infallibilis et verax; intellectus autem humanus ex participatione quadam, et in quibusdam solum infallibilis est. Si vero consideretur fidei principium, assensus fidei intensior est omni naturali assensui. Assensus enim naturalis, etiam quum firmus est, determinatur, ut diximus, per vim evidentiae: assensus vero fidei procedit a voluntate gratiæ viribus operante. Gratia autem et intellectum illustrat lumine excellentiori, quam sit lux evidentiae, et voluntati dat, ut efficacius et intensius intellectum admoveat ad assensum, quam ipsa evidentia. Sed de his ad theologos.

ARTICULUS VI.

De supputatione graduum probabilitatis.

413. Quod de certitudine cum limitatione solum asseri potest, eam gradus habere, id de probabilitate absolute dicendum. Habet enim illa gradus in eo ipso, quod magis vel minus errandi formidinem ac periculum excludit (401). Atque horum æstimatione graduum, humanæ mentis conjecturæ in casuum contingentium expectatione reguntur. Ex quo factum est, ut recentiores philosophi subsidia mathe-
seos accenserent, ad probabilitatis momenta accuratius æstimanda, et tutius inter se comparanda. Ex quorum theoriis excerpta nonnulla subjicimus.

414. Animadvertendum in primis, non omnem probabilitatem posse numeris exhiberi. Motiva enim quæ probabilitatem efficiunt, quandoque ab ipsa natura rerum, sive eæ causæ sint, sive effectus, depromuntur; quandoque ab aliqua sive eventuum, sive indiciorum multitudine. Jam vero hæc solummodo numeris exhiberi possunt, illa autem nequaquam; at meditatione solum ponderari, rectoque mentis iudicio æstimari queunt.

Desumitur autem a multitudine eventuum probabilitas, quum positis quibusdam, plura eaque diversa possunt contingere, unumquodque autem eorum modo contingit, modo non contingit. Si enim multiplicatis utcumque eventibus, semper idem accidit, hoc non est probabile, sed certum sive physice sive moraliter, non quidem per se, sed vi inductionis, ut supra ostensum est (306, 407).

415. Quum igitur plura contingere possunt, et unumquodque ex his quandoque contingit, quandoque non, duas habes quantitates, quarum altera est summa omnium eventuum qui attendendi sunt, altera numerus casuum, in quibus unus aut alter eventus obtigit, aut obtingere potest. Patet autem determinati eventus probabilitatem, cæteris paribus, eo fore majorem, quo major est numerus casuum huic eventui faventium; et vicissim eo fore minorem, quo major est eventuum possibilium numerus. Probabilitas igitur dati

eventus est in ratione directa quantitatis primæ, et inversa secundæ. Ex quo hæc regulæ deducuntur:

1^a Probabilitas dati eventus repræsentari potest per fractionem numericam, cujus *numerator* exhibeat numerum casuum eventui faventium, *denominator* vero numerum eventuum possibilium: v. gr. si in urna sint decem globuli, septem autem ex iis sint extrahendi, probabilitas pro unoquoque erit ut $\frac{7}{10}$; si sint extrahendi tantum tres, probabilitas erit ut $\frac{3}{10}$.

2^a Certitudo exhiberi potest per unitatem. Certitudo enim eventus habetur, quum numerus casuum eventui faventium æquatur numero casuum possibilium.

3^a Gradus varii probabilitatis serie fractionum crescentium et decrescentium exprimuntur, v. gr. si decem sint casus possibiles, hæc erit series:

10	9	8	7	6	5	4	3	2	1	0
—	—	—	—	—	—	—	—	—	—	—
10	10	10	10	10	10	10	10	10	10	10

in qua prima fractio $\frac{10}{10}$ designat, ut modo diximus, certitudinem; ultima impossibilitatem: quæ primam sequuntur, quæque numeratorem habent dimidio denominatore majorem, probabilitatem primo maximam, deinde semper decrescentem: quæ medium occupat locum $\frac{5}{10}$, probabilitatem utriusque contradictorii æqualem exprimit, adeoque utrumque in dubio relinquit: cæteræ in quibus numerator ad denominatoris dimidium non pertingit, probabilitatem item denotant semper minorem.

4^a Quando causa necessaria ad plures effectus æque disposita est, probabilitas absoluta pro effectu determinato, est ut unitas ad numerum omnium effectuum possibilium. Sic, quoniam lusoria tessera sex in jactu latera tibi potest obvertere, probabilitas pro unoquoque jactu erit $\frac{1}{6}$.

5^a Quando eadem causa pluries operata est, et diversimode operatio successit, probabilitas pro successu determinato erit ut summa eventuum illi similium, ad summam totalem eventuum. Ex. gr. si ex centum hominibus qui chirurgicam aliquam curam periculosam et ancipitem su-

bierunt, 60 periere, 40 incolumes evasere, probabilitas absoluta felicitis eventus erit ut $\frac{40}{100}$.

6^a Quando plures causæ unum eundemque effectum singillatim producere possunt, probabile erit, effectum a determinata causa proventurum, secundum rationem quam habet unitas ad causarum numerum. V. gr. si in urna sint decem globuli, et unica fieri debeat sortitio, probabilitas pro unoquoque erit ut $\frac{1}{10}$.

Quod si essent in urna 7 globuli albi, 5 nigri, probabilitas pro albo esset $\frac{1}{10} \times 7$, pro nigro $\frac{1}{10} \times 5$.

7^a Hæc omnia rei lusoriæ, mercatoriæ, medicæ, ac physicis universim eventibus recte applicantur, et conjecturas non aspernandas suppeditant: quum vero ad liberos hominum actus conjiciendos transferuntur, multo minus habent firmitatis ac fidei. Illud in hac re nominatim notandum, certitudinem de futuris hominum actibus, utcumque multiplicatis eventibus, haberi nullam si de individuis agatur; v. gr. si quis millies locutus est, et millies verax fuit, non idcirco certum est eum mox vera locuturum, nisi certitudine improprie dicta (408). Si vero agatur de hominum multitudine, poterit haberi certitudo moralis proprie dicta de iis, quæ pars maxima actura est, si notæ sint leges quæ humanos morès temperant (407, 3^o).

Et hæc in tali materia sufficiant (1).

416. Ex his autem minime inferre licebit, certitudinem a nobis ut probabilitatum cumulum existimari, probabilitatemque ut certitudinis fragmen quoddam haberi: quod quidem absonum esse nemo non videt. Hoc tamen non sequitur ex probabilitatis supputatione, si intra limites a principio (414) præstitutos, contineatur. Quum enim certitudinis conditiones numero quodam continentur, quis non videat tunc haberi certitudinem, quum omnes certitudinis conditiones implentur? Tunc enim omnis oppositi possibilitas destruitur. Omnes autem certitudinis conditionis implentur, quum

(1) V. si vacat. opus. cui titulus: *Histoire des Mathématiques*, par J.F. Montucla, tome III, achevé et publié par De La Lande. Ve part., liv. I, § 33 seq.

numerus casuum, qui eventui certo favent, casuum possibilitatum numerum adæquat. Atqui hoc ipsum est, quod exprimitur per unitatem, seu per fractionem $\frac{n}{n}$, quæ est inductionis completæ brevissima formula. In his igitur supputationibus certitudo dependet ex iisdem principiis, quibus certitudo parta per inductionem completam innititur; non ex cumulo probabilitatum, sed ex cumulo certitudinum.

Fractiones vero, quæ sunt inter impossibilitatem et certitudinem, non exprimunt certitudinis partes, sed rationem inter eventus certo faventes, et casus posibles. Quare non certitudo, sed intervallum inter certitudinem et impossibilitatem per eas dividitur.

CAPUT III.

DE CERTITUDINE PHILOSOPHICA.

ARTICULUS I.

De scepticismo.

417. Quicumque ratione pollet, spontaneo facultatum suarum exercitio certitudinem de factis, de principiis, de conclusionibus omnino plurimis firmissimam acquirit. Ante omnem enim philosophorum disputationem, certitudinem, humanæ vitæ adeo necessariam, in tuto collocavit natura, quum et media suppeditavit illius acquirendæ, et usum mediorum per se ipsa docuit, ac tantopere mentem nostram veritati astrinxit, ut dubitare de pluribus rebus, etiamsi conemur, nequeamus. Non est igitur philosopho laborandum, ut certitudinem assequatur, vel ut genus humanum doceat, utrum possit ad illam, aut quomodo pertingere. Sed in illud unice animum intendere debet, ut naturalis certitudinis fundamenta expendat, explicet, tueatur; erroresque qui in usu mediorum, quibus certitudo comparatur, irrepere possunt, notet, doceatque quomodo hi vitari possint. Atqui hoc agunt philosophi, qui *dogmatici* vocantur, et per hoc certitudinem quam dicunt philosophicam, obtineri posse tuentur. Est enim certitudo philosophica certitudo reflexa, orta ex di-

stincta cognitione motivorum quæ naturalem certitudinem gignunt, ac rationi consentaneam faciunt.

418. Ast alii non ita. Exstiterunt enim inter philosophos, qui contenderent certitudinem naturalem omnem, si accurate a sapiente expendatur, omnino evanescere, ut quæ nullo fundamento innixa detegitur, aut plane infirmo. Hi fuerunt inter veteres *academici* e *platonica* schola egressi, duce *Arcesila*, ac postea *Carneade*, et *pyrrhonic* e castris *Aristotelis* et *Epicuri*, e quorum familia exstitit *Pyrrho* omnium maxime famosus, a quo secta nomen accepit. *Academici* porro a *pyrrhonicis* in hoc differebant, si *Sextum Empiricum* audias (1), quod *academici* ipsam veritatis inveniendæ possibilitatem negabant, unde nec eam quærendam arbitrabantur: *pyrrhonic* vero nec affirmabant, nec negabant veritatem inveniri posse, sed hoc ipsum ignorare se profitebantur, nihilominus eam quærebant, ex quo *sceptici* nuncupati sunt, i. e. quæsitores, qua jam appellatione dubitantes omnes comprehendimus; sive veteres sive recentiores. Non enim defuerunt inter recentiores, qui plus minusve diserte aut æquivalenter, humani intellectus jura proderent, et ad dubitantium signa transfugerent. In his præcipui *Baymus*, *Humius*, *Kant*, *Lamennais*.

419. Cæterum, qui se de omnibus dubitare profitebantur, vere de omnibus dubitasse, nullo pacto putandum est. Hinc.

PROPOSITIO 1. *Universalis dubitatio physice repugnat.*

Etenim 1º quicumque mente ac ratione instructus est, naturaliter ac necessario multa habere certissima cogitur, nisi rationem ac naturam exuat. At naturam exuere, nec si quam maxime connitatur, nemo potest. Quemadmodum igitur fieri nequit, ut qui sensu pollet, frigus et calorem suis temporibus non sentiat, et ut qui oculos habet et aures, non videat aliquando aut non audiat, ita nemo assequi potest, ut homo cum sit, certitudinem omnem abjiciat.

2º Id quod perpetua pugna inter doctrinam *scepticorum*, ipsorumque agendi rationem luculenter semper ostendit. Hi

(1) *Pyrrhon*, *Hypotypos*, lib. I, c. 1.

enim in omni vitæ ordine et consuetudine, eodem plane modo gerere se solebant, ac nos indocti, qui præjudiciis tememur *dogmaticorum*.

ARTICULUS II.

De universalis dubitationis absurditate.

420. PROPOSITIO II. *Cum eo, qui scepticum se in omnibus esse profiteatur, nulla potest institui disputatio.*

Omnis enim disputatio ab aliquo principio, quod tanquam certum utrimque admittatur, procedat necesse est. *Scepticus* autem omne respuit principium, omnem ratiocinio vim negat, de sua ipsa existentia dubitat: simulat saltem hæc omnia. Igitur cum illo nulla est possibilis disputatio.

Neque idcirco *scepticus* triumphos agere potest. Non enim impotem esse cum quo disputetur, perinde est, ac disputationis palmam referre. Quis enim putet se ab arboribus, aut a lapidibus, aut a delirantibus superari, quia disputationem cum his inire non potest? Præterea neque *scepticus* disputare cum adversario potest, aut conari ut suam doctrinam suadeat; imo nec suam doctrinam proponere, quin se ipse conficiat, uti mox videbimus. Postremo cum et ipse homo sit, ac sanæ mentis, ut supponimus, nequit non sentire certitudinem et vim argumentorum, quibus *scepticismi* absurditas fit manifesta; adeoque nequit intra mentem se victum non agnoscere, quanquam verbis contradicere pertinaciter possit, et quæcunque afferantur negando eludere.

421. Omni igitur disputatione cum hujusmodi adversariis seposita, de doctrinæ quam ipsi præ se ferunt, absurditate facile inter cæteros conveniet, ut alia omittam, ex apertis contradictionibus, quas illa continet.

PROPOSITIO III. *Universalis dubitatio intrinsecam contradictionem includit.*

Revera 1º *scepticus* docet rationem in omnibus esse fallacem: adeoque de omnibus mentis cognitionibus dubitat. At quo pacto in hanc persuasionem devenit? Sane rationis usu, rationis argumentis, rationis judicio. Ergo in eo ipso quod

rationem esse in omnibus fallacem decernit, rationi suæ fidem adhibet, ejusque sententiæ subscribit.

2º Negat scepticus posse a nobis veritatem ullo modo cognosci; saltem utrum cognosci possit, ignorare se affirmat. Hanc ergo propositionem ipse ratam habet ac veram putat: *Non potest a me cognosci veritas*; aut hanc: *Nescio an aliquid scire possim*. At si alterutra ex hisce propositionibus vera est, ac vera ab ipso censetur, jam aliqua est veritas, quæ ab ipso cognoscatur. Dum ergo negat veritatem a se cognosci, hoc ipso statuit se veritatem aliquam compertam habere. Apposite Lactantius: « Ut nihil sciri posse sciendum sit, » aliquid sciri necesse est. Nam si omnino nihil scias idipsum nihil sciri posse tollitur. Itaque qui velut sententiæ loco pronuntiat, nihil sciri, tanquam præceptum profitetur et cognitum: ergo aliquid sciri potest. » Huic simile est illud, quod in scholis proponi solet: » *Somniasse quemdam ne somniis crederet*. Si enim crediderit, » tum sequitur ut credendum non sit. Ita si nihil sciri potest, necesse est idipsum sciri quod nihil sciatur (1). »

3º Dubitare se dicit scepticus, eo quod veretur ne in errorem incidat, si assensum præbeat. Vide ergo quam multa certo cognoscat. Certo cognoscit quid sit dubium, quid certitudo, quid veritas, quid error, et qua in re hæc inter se discrepent; nescit se posse errare, se timere, se dubitare; nescit rationem propter quam dubitat; nescit sibi dubitandum esse; atque ante omnia existere se cognoscit. Quicumque ergo dubitat, multa certa habet: qui igitur dubitare se de omnibus dicit, pugnantia dicit.

422. Ex hic colliges, scepticismum universalem metaphysice esse impossibilem. Qui enim de aliqua re dubitat, hoc ipso quod dubitat, quædam certa ac rata habet: hoc enim in ipsa dubii essentia continetur. Ergo et qui de omnibus dubitat de quibusdam habeat certitudinem oportet. Sed dubitare de omnibus, et de quibusdam habere certitudinem contradictoria sunt. Ergo dubitatio universalis contradictionem includit.

(1) *Divin. Instit.*, lib. III, c. VI.

ARTICULUS III.

Utrum omnia demonstrari a philosopho possint, vel debeant.

423. Cum intrinsece repugnet universalis dubitatio, consequitur manifeste non posse philosophiam ab universali dubitatione sumere initium. Secus philosophia inter ea quæ possibilis non sunt, rejicienda esset. Quod si dubitando incipere nequit, profecto incipere debet affirmando. Ab aliqua igitur affirmatione, eaque extra omnem dubitationem collocata, philosophia omnis exordiat necesse est.

Hoc tamen quod primo affirmari debet, quodque omnis certitudinis fundamentum est, sine demonstratione affirmetur oportet.

PROPOSITIO IV. *Qui nihil affirmandum sibi putaret, nisi demonstratum, ille opus aggredieretur scepticum et impossibile.*

Dixi 1º *Opus aggredieretur scepticum*. Sceptici enim personam indueret, ut qui universalem dubitationem simularet. Cum autem universalis dubitatio intrinsece repugnet, ipsamet ejus fictio absurda est.

Dixi 2º *Opus aggredieretur impossibile*. Demonstratio enim est deductio quædam ex aliquibus principiis. Si hæc quoque principia demonstratione egent, per alia principia demonstrari debent. Hæc autem demonstrabis per alia: hæc alia iterum, per alia, et ita porro. Nemo non videt, vel esse necessario sistendum in aliquo principio, quod demonstrari non debeat, vel seriem demonstrationum infinitam aggrediendam, quin unquam ad primum aliquid principium deveniatur, a quo tota demonstrationum series firmitatem suam desumat. Si hoc tibi exsequendum putas, fateris nullam unquam demonstrationem confici a te posse. Ergo qui omnia demonstrata vellet, is nihil demonstrare posset. Recole, quæ alibi diximus, quum de definitione disserebamus (130).

424. Igitur 1º Ante omnem demonstrationem quædam sunt affirmanda philosopho absque demonstratione, eaque non modo ut certa, sed etiam ut omnis certitudinis fundamen-

tum. Hæc est ad omnem certitudinem omnemque scientiam necessaria conditio.

2° Qui putat in omnibus ad certitudinem philosophicam ope solum demonstrationis perveniri posse, ipsam philosophandi destruit possibilitatem.

Neque inferat scepticus, primam hanc affirmationem, si demonstrationis effectus non sit, arbitriam et sine motivo, ac suppositionem potius quam certam affirmationem fore. Aliud est enim aliquid affirmari sine motivo, aliud affirmari sine demonstratione. Si qua veritas sit evidens per se, ita ut in se ipsa vim habeat se suadendi assensumque extorquendi, quin eam ab aliis veritatibus mutuetur; jam veritas hæc certa erit, et a philosopho admitti poterit absque demonstratione. Si nulla est ejusmodi veritas fateor, nulla esset certitudo, saltem rationabilis et philosophica. Atqui sunt veritates istæ, quæ rationem sui in se habent, non in aliis veritatibus positam. Ex his porro veritatibus esse debent, ut patet, fundamentales illæ, quibus certitudo omnis ac scientia innitur. Philosophi igitur munus est 1° ut inquireat quænam sint hæc primitivæ ac fundamentales veritates: 2° ut ostendat eas a philosopho admitti sine demonstratione non modo posse, sed plane debere.

ARTICULUS IV.

De veritatibus primitivis.

425. PROPOSITIO V. *Cum multa sint, quæ demonstrari nec possunt nec debent, primitivæ tamen veritates, quas ante omnem philosophicam inquisitionem fundamenti loco supponere necesse est, sunt tantummodo tres; videlicet*

1° *Factum primum*, quod est existentia propria.

2° *Principium primum*, quod est contradictionis principium: idem non potest simul esse et non esse.

3° *Conditio prima*, nempe rationis aptitudo ad veritatem assequendam.

Sane 1° et æquum, et necessarium est, ut ante philosophiam philosophi existentia, ante demonstrationes demon-

strationum omnium principium, et ante scientiam scientiæ possibilitas in tuto sit, posita.

Præterea 2° cum duplex sit cognitionum nostrarum ordo, idealis et realis (146), in utroque primum aliquod inveniri debet: in ordine ideali *principium primum*, in ordine reali *primum factum*. Utrumque simul ad constituendam scientiam necessarium est, sed unumquodque per se insufficiens. Nam principium abstractum non potest parere scientiam nisi hypotheticam, factum autem solum infecundum per se est, et ad quidpiam concludendum ineptum. Sed præter hæc tertium aliquod insuper requiritur, quod utrumque inter se ordinem componat, per quod et facta ad ordinem idealem transvehi, et ideæ rebus applicari possint: hoc autem non habebis, nisi ponas mentem posse habere ideæ objectis conformes. Patet igitur fundamentales veritates esse omnino tres, ita ut, vel una vel altera sublata, totum humanæ certitudinis ædificium necessario corruat (1).

426. Quod autem veritates istæ a philosopho admitti absque demonstratione et possint et debeant, ex eo manifestum est, quod 1° nulla egent demonstratione; 2° omnem demonstrationem refugiunt; 3° ipsa negatione vel dubitatione affirmantur.

1° Hæ veritates *nulla egent demonstratione*. Sunt enim humanæ menti immediate evidentes, atque in lucis similitudinem se ipsas per se demonstrant: mutuata igitur lucis illustratione non egent. Quemadmodum autem se veras necessario cuique probant, ita quoque necessario assensum mentis ad se rapiunt, eumque adeo firmum, ut nemo de illis dubitare vel ad momentum possit. Humana igitur mens eas sibi demonstrari per alias veritates nullatenus postulat.

427. 2° *Demonstrationem omnem respuunt*. Quicumque enim veritates istas demonstrare aggreditur, necessario petit principium, supponendo quod in quæstione versatur (344). Nam

a) Factum existentie propriæ non aliter demonstrari posset, nisi aliquam animi proprii affectionem in præmissis affirmando: *Cogito; ergo sum*. Atqui in omni judicio hujus-

(1) Balmes. *Filosofia fundamentale*, lib. I, c. IV, se 1.

modi affirmatur propria existentia, et quidem diserte. *Cogito* enim idem est ac: *sum cogitans* (149). Ergo qui sic argueret, aperte principium postularet. Facilis propterea foret retorsio: Si dubium est an quis existat, dubium est an cogitet. Sed dubium est an existas: hoc enim vis demonstrare. Ergo dubium est an cogites.

b) Principium contradictionis in omni demonstratione supponitur. Omne enim principium, omne ratiocinium quidquid habent necessitatis ab eo desumunt. Si enim hoc principium nutaret, si idem posset simul esse et non esse, quodnam principium necessarium, quænam ratiocinatio legitima superesset?

c) Rationis aptitudinem ad veritatem assequendam si quis demonstrare velit, is profecto supponeret posse demonstrationis ope particularem hanc agnosci veritatem. Demonstratio autem est opus rationis. Ergo supponeret, posse a ratione veritatem cognosci.

428. 3^o Hæ veritates ipsa negatione vel dubitatione affirmantur.

a) Si enim falli times, jam te existere fateris. Si fallor, sum, nam qui non est, utique nec falli potest (1).

b) Qui negat aliquid, id negat, quia putat falsum esse, et verum non esse: qui dubitat de aliquo, ideo dubitat, quia timet ne falsum pro vero amplectatur. Ergo quicumque negat vel dubitat, supponit falsum non posse verum esse. Certus est igitur de contradictionis principio.

c) Denique qui aliquid in dubium adducit vel negat, hoc saltem certo cognovit verum: esse dubitandum vel negandum (421, 2^o). Fatetur igitur aliquam veritatem compertam rationi esse posse.

Ex his omnibus manifestum fit quod proposuimus.

ARTICULUS V.

Refutantur quædam scepticorum objecta.

429. Opponent 1^o Vera philosophandi methodus ea est,

(1) S. Aug. De Civitate Dei, lib. XI, c. 26.

quæ ab omni errore maxime immunis est ac securæ. Talis autem est methodus sceptica, quæ nihil certo affirmat.

Resp. *Trans. major.*; *neg. min.* Etenim universalis dubitatio unum aliquid affirmat, in quo decumanus est error, errorumque pessimus. Cæterum vera philosophandi methodus non de hoc solum sollicita esse debet, ut errorem caveat, sed de eo in primis ut veritatem assequatur. Secus stipites et trunci, qui nunquam errant, essent philosophorum maximi.

430. Opp. 2^o. Ratio humana, ut quæ finita est, fallibilis est, et quia semper finita, semper fallibilis. Ergo nulla fides ipsi adhibenda.

Resp. 1^o. Quis hoc scepticis revelavit? Si ratio semper errat, nonne et in hoc, quod ipsi asserunt, errare putanda est? Hæc una responsio, ut supra (421, 1^o) indicavimus, sufficit ad omnes scepticorum cavillos retundendos: neque enim hiscere possunt, quin in se ipsi arma vertant.

Resp. 2^o *Dist. 1^{am} partem*: Est fallibilis per se, *nego*; per accidens, *conc.*

Per se ratio non errat, uti ex dictis jam liquet (381, seq. 147), et suo loco fusius demonstrabitur. Est tamen fallibilis, non quod falli semper debeat, sed quia falli interdum potest. Quod illi obtingit, non ideo tantum quia finita est, ex hoc enim cognitionum limitatio duntaxat consequitur, minime vero falsitas; sed quia finita cum sit, et non omnia cognoscat, in iis quæ incomperta habet, potest a labili voluntate ad imprudentia judicia pertrahi (147). In iis autem judiciis quæ ratio ex se profert, error obrepere nequit; ad hæc enim judicia determinatur ab evidentia, quæ quidem cum falsitate sociari non potest (406).

Dist. 2^{am} partem: Ratio est semper fallibilis, i. e. semper est illa ratio, quæ interdum fallibilis est, *conc.*; semper actu potest falli, *nego*. Hoc enim ex modo dictis plane falsum est.

431. Inst. 1^o. Ratio est essentialiter fallibilis. Ergo per se fallibilis.

Resp. *Dist. eodem modo*: per se, *nego*; per accidens, *conc.* Nempe per se essentialiter est infallibilis, quia per se

nec falsas ideas haurire, nec falsa judicia statuere potest. At essentialiter finita est, et essentialiter obnoxia voluntati, in iis quæ non sunt evidentia : adeoque in his essentialiter est fallibilis.

Inst. 2°. Sola divina mens per se infallibilis est, non vero ratio humana, quæ infinite ab ea distat.

Resp. *Dist.* : per se infallibilis est, i. e. a nullo alio habet ut sit infallibilis, *conc.* ; natura sua et per se spectata est infallibilis sola divina mens, *nego.*

Infallibilitas humanæ mentis ab infallibilitate divina infinite differt ex triplici capite : 1° quia divina infallibilitas est imparticipata ; humana vero est participata : 2° quia illa est illimitata quoad objectum ; hæc vero angustis limitibus circumscripta : 3° demum quia divina mens nunquam errat, et in nulla hypothesi errare potest ; humana vero mens per se quidem non errat, sed per accidens errare potest, et errat sæpissime.

Inst. 3°. Non repugnat voluntatem humanam propendere ad malum. Ergo a pari non repugnat intellectum perse ferri ad falsitatem.

Resp. 1°. *Nego ant.* ; voluntas enim tendit in bonum, nec potest nisi ad bonum tendere. Bonum autem aliud est secundum sensum, aliud secundum rationem : quæ duo bona frequenter opponuntur, ita ut quod bonum est sensui, sit malum rationi, et viceversa. Hoc in casu quum voluntas inclinatur ad bonum sensibile, hoc ipso fertur in malum secundum rationem, non tamen qua malum est, sed solum qua bonum est.

2° *Nego paritatem* ; quæ ex duplici capite concidit : 1° quia verum non opponitur vero, ut bonum bono, adeo ut unum verum comparatum ad alterum sit falsum : 2° quia intellectus non est facultas appetitiva, quæ moveatur in objectum, sed facultas perceptiva, quæ recipit objectum, in quo electionem non habet.

432. Opp. 3°. Quoniam ratio quandoque fallitur, vel cognoscit quando fallitur, vel non. Si primum dicas, tollitur, omnis error ; error enim est in hoc, quod falsitas recipiatur

loco veritatis : quum igitur mens falsitatem cognoscit, non errat.

Est ergo dicendum, mentem non cognoscere quando ipsa fallitur. Si hoc, semper suspicari poterit, atque adeo debet, utrum in præsentī fallatur, nec ne.

Resp. supponere adversarios rationem semper, et in omnibus esse fallibilem. Atqui ratio in quibusdam non est fallibilis. Addatur ergo argumento pars altera quæ omittitur, nempe : cum ratio in quibusdam sit infallibilis, vel cognoscit quando non fallitur vel non. Si hoc postremum contingat, esto, suspicari de errore poterit. At quum mens cognoscit, se nec falli nec falli posse, tum suspicari nullo pacto debet. Atqui hoc contingit in veritatibus evidentibus. In his ergo cognitionibus legitima est certitudo.

Ad id vero quod objicitur, respondeo, mentem, quum fallitur, obscure cognoscere se falli, aut saltem se falli posse : omnis enim error judicium est sine sufficienti fundamento. Nihilominus ratio fallibilis est, quia trahi potest a voluntate ad judicandum, etiam sine sufficienti fundamento. In his igitur in quibus mens fallibilis est, et cognoscit se fallibilem, verum omnino est, dubitationem ac formidinem errandi esse prudentem.

433. Opp. 4°. Si quid dogmatici confirmare volunt, in unum ex his tribus incommodis incidunt. Nam vel in confirmationem rei propositæ afferunt aliquid quod confirmatione eget, usque in infinitum ; vel sistere coguntur in aliqua propositione, quam non probant, sed supponunt, et assument tanquam veram ; vel inveniunt, id quo res de qua quæritur, confirmanda esset, hac ipsa vicissim indigere ut confirmetur. Sed in primo casu offendunt in progressum infinitum, qui est impossibilis ; in altero gratuito supponunt verum quod alter supponere falsum potest, in tertio circum vitiosum vitare nequeunt. Semper ergo, si sapiunt, assensum retinere, et cum scepticis dubitare cogentur. Ita fere Sextus (1).

Resp. *Nego disjunctivam.* Superest enim quod præsto sint

(1) Pyrrhon. *Hypotypos.*, lib. I, c. XV.

veritates quædam, quæ demonstratione non egeant, quæque non supponantur, sed veræ necessario agnoscantur. His innixi dogmatici, omne incommodum vitant (424). Incommoda vero majora urgent scepticos: qui cum suam doctrinam nobis persuadere adnituntur, velint nolint, oppositam admittunt (421).

Cætera quæ in specie, contra cognitionum nostrarum media ac certitudinis motiva, a scepticis opponuntur, suis quæque locis refellemus.

ARTICULUS VI.

* De dubitatione methodica.

434. Vix jam esset cur in his questionibus de Cartesio multis loqueremur, nisi recentiores ejus sive adversarii sive laudatores omnia Cartesii nomine replerent, jure ne an injuria, ipsi viderint. Quoniam igitur omnes de Cartesio disserunt, breviter innuamus quid sit sentiendum de ea philosophandi methodo, quam ipse sibi adoptandam putavit; ut exaggerationes erroresque contrarii, qui sub Cartesii tum laudibus, tum accusationibus delitescere solent, vitari possint.

435. Existimavit igitur Cartesius, ei qui veritatem inquirat, esse semel in vita de omnibus, quantum fieri potest, dubitandum, ita ut quæcunque vel minima erroris suspicione obnubilari visa fuerint, pro falsis habeantur. Cujus dubitationis is finis est, ut præjudiciis quibus imbuti sumus, nos exuamus, et a primis scientiæ fundamentis inchoantes, firmum ac mansurum ædificium stabiliamus. Idcirco dubitatio hæc methodica appellatur.

In hanc igitur dubitationem se conjiciens Cartesius rejicit certitudinem omnem de rebus existentibus, imo de ipsis mathematicis demonstrationibus, ac de principiis notis per se, fingens omnia falsa esse. Sed quum ad propriam cogitationem et existentiam devenit, sentit se de ea dubitare non posse; repugnat enim ut putemus, id quod cogitat, eo ipso tempore quo cogitat, non existere. Quo invento principio, hæc ex ordine deducit:

1º Cognitionem hanc: *ego cogito: ergo sum*, esse omnium

primam et certissimam, quæ cuilibet ordine philosophanti occurrit.

2º Statui ut legem universalem posse: *illud omne esse verum, quod valde clare et distincte percipimus*.

3º Exinde demonstrat existentiam Dei.

4º Ex veracitate divina, facultatum nostrarum veracitatem infert, atque hoc pacto certitudinem iterum nanciscitur.

436. Hic est Cartesii processus in certitudinis philosophicæ theoria statuenda. Quæ methodus, ut primum vulgari cœpit, et prolixos, ut assolet, laudatores nacta est, et adversarios acerrimos. Quorum omnium sive præconia sive criminationes, ut ut a commotione animorum non essent immunes, verum nihilominus spectabant Cartesium, non fictitium ac phantasticum. Nunc autem revirescere vidimus erga Cartesium amores, et odia, duasque præsertim scholas inter se maxime oppositas ejus nomine ac methodo abuti; alteram *rationalistarum*, quæ rationis humanæ vires nimis extollens, absolutam illi tribuit a revelatione ac fide independentiam; *traditionalium* alteram, quæ rationis vires nimis deprimens, revelationem unice ac fidem prædicat. Illi igitur Cartesium summis laudibus extollunt, quasi vero philosophiam a religionis ac fidei magisterio exemerit, eamque, cum theologiæ, ut aiunt, pedissequa esset et ancilla, æqualem illius imo et judicem fecerit. Hi vero Cartesii phantasma a rationalistis excitatum cum vero Cartesio, Cartesiumque cum iis qui rationis legitima jura defendunt, commiscentes, dum seu Cartesium seu rationalistas impugnare videntur, rationem revera humanam aggrediuntur (1). Seditis igitur iis omnibus, quæ in utriusque scholæ declamationibus sive falsa sunt, sive exaggerata, non negaverim aliquam laudem esse Cartesio tribuendam, eo quod viderit, quantum in quæstionibus de certitudine et gravitatis sit et difficultatis, quantum

(1) « Partim falsa, partim exaggerata sunt, quæ passim nunc temporis in Cartesium congeri solent. ... Cartesii nomine impetitur realis ipsa ac essentialis distinctio inter scientiam philosophicam mere naturalem, et scientiam theologicam revelatam. » Ita R. P. Perrone, *Tract. de Locis theol.*, parte III. sect. I, c. 1, § 59.

que psychologica reflexio ad has et similes quæstiones solvendas, utilitatis afferat: quæ quidem laus ejus priva ac singularis non est. Præcipua autem cartesiani processus vitia, eaque gravissima, quantum ad certitudinis theoriam pertinent, modo innuemus.

437. PROPOSITIO VI. *Multa sunt in methodica Cartesii dubitatione vitia, eaque gravissima.*

Nam 1° reprehendenda est ratio loquendi, qua Cartesius utitur. Cum enim ipsi sermo sit de certitudine philosophica, non de naturali, deque scientifica, non de vera dubitatione, non satis hoc explicat.

2° Reprehendus quoque est, quod sibi concessum aut possibile putet, de primis principiis, nullo excepto, saltem simulate dubitare, ac de ratione ipsa humana diffidere. Primum enim principium, ut supra ostendimus, et rationis aptitudo ad veritatem assequendam, ipsa dubitatione affirmantur (428, b, c): adeo ut in his ipsum dubitationis simulacrum absurdum sit (425).

3° Præsertim quod et quum dubitat, et quum ad fundamentum certitudinis devenit, et quum de rationis veracitate cessat esse sollicitus, ratione perpetuo utatur. In quo et inconsequenter agit, dum ratione fidenter utitur, antequam de ejus veracitate sit certus; in eamque incurrit scepticorum contradictionem, quod rationis judicem rationem facit (421, 1°).

4° Errat insuper in hoc, quod fundamentum cognitionum nostrarum unicum statuit, nempe certitudinem de propria cogitatione et existentia. Fundamentum enim hujusmodi, ut supra probavimus, necessario triplex est (425). Neque dicas alterum insuper fundamentum ab ipso poni, principium, inquam, perceptionis claræ et distinctæ. Nam hoc principium illi fundamentale non est, cum non recipiatur ab ipso ut omnino certum, nisi post cognitam Dei existentiam.

5° Quum principium illud: *cogito; ergo sum*, tanquam primum statuit, vel statuit simpliciter factum cogitationis, vel factum propositione expressum. Si factum propositione

expressum, supponit jam intelligentiæ veracitatem; hæc enim est, quæ super interna facta reflectit, quæ subjectum ab affectione distinguit, quæ judicat, et ab uno judicio alterum illi implexum educit; supponit insuper contradictionis principium; nam propositionum omnium certitudo ab hujus principii firmitate pendet. Si vero principii loco statuit solummodo factum, ut factum est, nempe sensum purum cogitationis propriæ, nihil unquam construet super hoc fundamento; neque enim dicere poterit: *ego sum*, nisi factum intelligentia exprimat per propositionem: *ego cogito*, et hanc propositionem conjungat cum principio: *quod cogitat existit*.

6° Postremo incidit aperte Cartesius in circulum vitiösus. Etenim ex illa generali regula: id verum est, quod clare et distincte percipio, Dei existentiam demonstrat; et vicissim firmitatem illius principii a Dei veracitate repetit.

Et hæc sufficiant; quod enim spectat ad singulas hujus systematis partes in se spectatas, eas suis locis, si opus fuerit, expendemus.

LIBER SECUNDUS.

CAPUT I.

DE MEDIIS QUÆ MENTI HUMANÆ SUPPETUNT
AD ASSEQUENDAM VERITATEM.

ARTICULUS I.

De principiis certitudinis.

438. Philosophi munus est, quemadmodum supra diximus (417), ut naturalis certitudinis fundamenta accurate exploret, eorumque reflexam ac distinctam cognitionem acquirat. Huic porro investigationi et nos in hoc altero libro operam dabimus: eas vero tractabimus quæstiones, quæ neque jure a quoquam parvipendi, neque attingi perfunctorie possint; sunt enim et in se apprime philosophicæ, et nostris præsertim temporibus necessariae. Sane scepticorum lues extincta non est, imo veluti ad insaniam ac temeritatis maturitatem quamdam perducta, terriculamentis suis philosophiam sensumque communem misere perturbavit, ipsasque radices cognitionum nostrarum agressa, universum, si ita loqui fas est, humani intellectus patrimonium populari ac vastare contendit.

Præmittendum, tria esse principia, quæ ad veritatem assequendam et ad certitudinem gignendam concurrunt; quæ *criteria* (judicandi principia) veteres appellabant.

1º Principium, seu criterium *a quo*. Nempe a quo veritas cognoscitur, judiciumque fertur de cognitionum veritate, quodque certitudinis subjectum est. Hoc principium est ipse intellectus.

2º Principium *per quod*. Nempe instrumentum ad judicandum, seu medium per quod veritas cognoscitur. Hoc quoque est multiplex pro varietate fontium, unde veræ rerum notiones promanant.

3º Principium *secundum quod* veritas a falsitate distinguitur, et de veritate cognitionum judicium fertur. Principium

hoc motiva omnia complectitur quæ certitudinem gignunt, quæ tamen ad unum reducuntur, nempe ad evidentiam; de qua suo loco.

439. De primo vix debet a nobis iniri in præsens disputatio. Etenim de natura intellectus, ejusque operationum disputat psychologia; de ejus tamen aptitudine ad veritatem assequendam, et aliquid jam dictum est (423), et nonnulla etiam inferius dicentur. De altero igitur ac tertio agendum in primis est; de altero in præsentī libro, de tertio in sequenti agimus.

ARTICULUS II.

De fontibus veritatis.

440. Omne id quod nobis medium est acquirendi ideas rebus conformes, fons veritatis dicitur. Omnes quidem ideæ, ut dictum est (380, 4º), proprio suo objecto sunt per se conformes: non omnes tamen veræ manent, si ad res per judicium referantur (381, 382, b). Hic de iis sermo est ideis, quæ ad res, ut sunt in se, referri per judicium cum veritate possint. Nimirum fontes veri dicimus eos cognitionum fontes, e quibus tales objectorum cognitiones haurimus quæ objecta repræsentent, ut revera sunt, hisque conformes reflexe intelligantur.

441. Plures veri fontes in ipsa hominis natura ac facultatibus sapientissimus rerum auctor constituit, ac menti reseravit humanæ, ut eam cognitionum suppellectilem sibi compararet, quæ tantam naturæ nobilitatem deceret. Sunt autem:

1º *Sensus intimus*, in quem advertens intellectus interna proprii subjecti facta cognoscit.

2º *Sensus externi*, qui rerum corporearum variis impressionibus excitati, in earum notitiam mentem adducunt. Sic homo extra se propemodum egreditur, et cum tota natura conjungitur.

3º *Ideæ ipsæ*, quas ex utroque hoc fonte mens hausit, novarum fontem cognitionum constituunt. Mens enim in ideas acquisitas reflectens, ex relationibus quas inter illas detegit,

relationes quoque cognoscit objectorum quæ per illas repræsentantur; et hoc duplici modo :

a) *Comparatione* illarum *immediata*, per quam principia universalia immediata colligit :

b) *Comparatione mediata*, seu ratiocinio, quo plurima cognoscit, quæ immediate haurire ex aliis fontibus non potest.

4^o His demum accedit aliorum hominum *testimonium*, cui fidem adhibens, de multis quæ vel sensibus usurpare suis, vel ratiocinio attingere quisque non potuit, et cognitionem et certitudinem adipiscitur.

Habes igitur fontes quatuor : sensum intimum, sensus externos, ideas, testimonium. His fontibus ratio utitur, sed actibus diversis pro fontium diversitate. Sensu intimo utitur intuitionem reflexa, sensibus externis intuitionem directa, ideis comparatione mediata vel immediata, testimonio fide.

442. Nunc singulos veritatis fontes perlustrantes, 1^o assignabimus normas, quæ in eorum usu haberi ob oculos debent, ut errores qui subrepere possunt, vitentur : 2^o motiva certitudinis cuique fonti peculiaria expendemus : 3^o cognitionum quæ ex iis hauriuntur veritatem, contra scepticorum cavillationes tuebimur. Quæ dum exsequimur, quanta possumus diligentia cavebimus, ne in psychologię quæstiones, ut quibusdam accidit, ita excurramus, ut certitudo quam per naturalia media comparamus, a philosophico aliquo systemate pendere videatur. Quod nisi caveatur, præter auctam magnopere difficultatem (sunt enim quæstiones illæ impeditiæ maxime), et illud incommodi consequitur, quod cognitionumstrarum certissima veritas, communique sensu notissima, systematum tenebris obvolvitur, unde fiunt illæ propemodum problematicæ, earumque defensio difficillima redditur.

CAPUT II.

DE SENSU INTIMO.

ARTICULUS I.

Notiones præviæ.

443. Sensus intimus est *nativa quædam animi dispositio, qua fit ut animus quidquid in seipso accidit, intime sibi præsens habeat, et experiatur ut suum*. Quæ in animo accidunt, *facta interna* nuncupari solent. Eorumque duplex est ordo : *superior* alter, qui actus complectitur solius animi proprios, actus nempe intellectus et voluntatis ; alter *inferior*, quo affectiones totius humani compositi propriæ continentur, ut infra dicetur. Cæterum allata sensus intimi descriptio satis est ut quisque intelligat, qua de re sit sermo ; definitio enim propriè dicta hac in re quærenda non est, nec si quæreretur, inveniri posset (130, 131, 1^o). Si enim interna facta animique facultates propriè definiri nequeunt, quanto minus id quod omnibus illis simplicius est, quodque facultatum omnium quibus homo pollet, fundamentum est atque conditio ?

444. Humanus animus non modo intimo hoc sensu instructus est, sed præterea, cum sit intelligens, potest id quod intime sentit, reflexo in se mentis intuitu apprehendere, et de eo judicare. Quum autem intelligentia super interna facta se convertit reflexione quam alibi (17) vocavimus psychologiam, tunc fieri dicitur *conscia sui*. Est igitur *conscientia* : *Cognitio intellectualis reflexa internorum factorum, prouti sunt subjecti affectiones, quæ per sensum intimum fiunt animo præsentibus*. Si enim in interna facta se convertens intellectus, non suam affectionem in illis, sed objecta quæ intra se repræsentantur, respiciat, reflexio hæc non dicitur conscientia, sed simpliciter reflexio, vel etiam reflexio ontologica, ut jam notatum est.

445. Quum in proprias affectiones animus intelligens intendit sese, eundem servat cognoscendi ordinem, quem tenet semper, quum aliquid in activitatis suæ objectum

assumit: primo nempe concretum percipit; h. e. advertit se tali modo affectum; mox concretum hoc decompōnit in ideam subjecti *ego*, in ideam affectionis propriæ; quas ideas iterum componit judicando, ac dicit. ex. gr. *ego sum dolens*.

* 446. Notare juverit multiplex illud, quod inter sensum intimum et conscientiam discrimen existit.

1° Sensus intimus est, ut diximus, primitiva quædam animi dispositio, vi cujus animus passive potius quam active se habens, ea quæ in seipso fiunt simpliciter experitur, actibusque suis propemodum tangitur; conscientia autem activitatis intellectualis exercitium est, et actus intelligentiæ.

2° Sensus intimus purum factum, uti factum est, experitur, illudque quasi materiam informem conscientiæ offert. Conscientia vero hoc factum assumens sibi in objectum, elevat illud ad ordinem idealem, formamque intellectualem propositionis ipsi tribuit.

3° Sensus est *perpetuo in actu*; comitatur enim omnia interna facta; *necessarius*, et qui a voluntate non pendet; *essentialis* animæ: at conscientia nec perpetua est, nec necessaria, nec essentialis omni animæ, sed tantum animæ intelligenti, et quidem potentia essentialis est, non vero semper in actu.

4° Expressiones interni sensus sunt suspiria, ejulatus, admirationes, risus, rudes omnes et inarticulatæ voces, actus multi gestusque corporis. Expressio autem conscientiæ propositio est, quæ supponit ideas universales, idearum analysim, earumque comparisonem et iudicium.

5° Denique sensus intimus est instrumentum seu medium, quo internorum factorum cognitionem animus acquirit, nempe est unus ex veritatis fontibus. Conscientia vero est intellectus, quatenus hoc utitur instrumento, eoque mediante veritatem assequitur (1).

Nota denique sensum intimum nominari, a quibusdam auctoribus conscientiam directam, actum vero, quem nos vocavimus simpliciter conscientiam, conscientiam reflexam.

(1) Cl. Balmes. *Filos. fundam.*, lib. I, c. 151, 180.

ARTICULUS II.

Notanda quædam.

447. Licet sensus intimus nunquam decipiat, potest tamen in ejus usu errare ratio. Ad errores autem cavendos, hæc præmonuisse opportunum.

1° Judicia, quæ intimi sensus testimonio innituntur, sunt ea solum, quæ affirmant de subjecto idipsum quod subjectum experitur in se. Hæc sunt judicia conscientiæ *immediata*, quæ falsa esse nunquam possunt. Quæ ex his ratiocinii ope derivantur, dicuntur judicia conscientiæ *mediata*. Hæc autem, cum non unice intimi sensus testimonio nitantur, falsa esse possunt, si altera quæ accedit præmissa, sit falsa, vel si ratiocinium vitiosum sit.

2° Sensus intimi relationes ad puram facti interni præsentiam coarctantur: ad facti naturam aut causas non pertinent. Hæc omnia per alios veritatis fontes sunt investiganda.

3° Cavendum est, ne affectionis jam habitæ memoria ita assumatur, ac si esset actualis ejus experientia. Memoria quidem ipsa, aut memoriæ defectus, quia interna facta sunt, eaque præsentia, sensus intimi testimonio certa sunt; sed factum quod recordamur aut non recordamur, non amplius de sua existentia aut non existentia intimum sensum sponsorem, ita ut dicam, aut vadem habet. Quare de ea re est aliunde judicandum.

4° Animus semetipsum sentit eo in statu in quo est, nimirum intime corpori conjunctum. Sentit ergo permanentem corpus quod informat, quatenus suam existentiam in corpore tanquam in re sua præsentem sibi habet. Hunc sensum, quem animus habet, proprii corporis, recentiores post Condillachium vocant *fundamentalem*, ut qui basis est sensationum omnium: ex eo enim fit, ut impressiones quas diversæ corporis nostri partes recipiunt, sint nobis præsentēs.

5° Sensationes quas ex suo conjunctionis statu anima experitur, aliæ interna afficiunt corporis organa, aliæ externa.

Quæ interna organa afficiunt, ut sunt sitis, dolor, etc., ad sentiendi vim internam referri solent: quæ vero externa, quatenus sunt subjecti affectiones, ad internam sentiendi vim pertinent.

6° Affectiones superioris ordinis (443) quæ per se solum animum afficiunt, animus certe sentit; eas vero, quæ compositi ex anima et corpore propriæ sunt (5°), magnam partem sine dubio sentit; utrum omnes, quæstio est alibi resolvenda.

7° Ex affectionibus compositi tum internis, tum externis, quibus subjectum tangitur et modificatur, si quæ sint constantes et uniformes, distinctum sui sensum non generant, nec possunt distincta attentione animadverti; nam cum permanenti subjecti sentientis statu confunduntur. Unde illud: *ab assuetis non fit passio*. V. gr. si quis ingreditur cubiculum odore suffutum vel igne calefactum, primo statim introitu novam odoris vel caloris impressionem ad tempus aliquod distincte sentit, animumque advertere ad illam potest; mox paulatim non amplius; quia videlicet jam non amplius mutantur organa, sed uniformiter afficiuntur. Quanquam si forte permanentes istæ et uniformes impressiones notabiliter varientur, tum et distinctum generant sensum, et attentionis partialis objectum esse possunt; ut quum sanguinis circulatio ex iræ motu acceleratur.

8° Ex postremis hisce animadversionibus concludimus, non esse negandum accidere aliquid in nobis, ex eo solum, quod illud distincte non sentiamus, nisi de hujusmodi facto agatur, quod quisque sentiat oportet, quum in ipso contingit.

ARTICULUS III.

Qua ratione omnis certitudo intimo sensui innitatur.

448. PROPOSITIO I. *Omnis certitudo subjectiva in intimo sensu aliquod fundamentum habet.*

Omnis certitudo, ex quocunque demum fonte hauriatur, certam de aliquo interno facto conscientiam supponit. Ut enim mens certitudinem acquirat, saltem conscia sibi esse

debet, et se percepisse motivum aliquod veritatem propositionis suadens, et omnem errandi formidinem a se esse exclusam. Sed si de sensus intimi veracitate dubitare liceret, nunquam de internis hujusmodi factis certam conscientiam habere mens posset. Ergo.

449. Neque ex hoc inferas sensum intimum aut omnium cognitionum fontem esse, aut omnis certitudinis motivum immediatum. Nam sensus intimus est quidem *principium manifestativum*, ut cæterorum quæ in subjecto fiunt, ita et cognitionum omnium quas haurit intellectus; at non est *medium* quo cognitiones omnes comparamus, sed est medium solummodo ad internas affectiones cognoscendas. Pariter sensus intimi veracitas, quanquam sit *conditio* ad omnem subjectivam certitudinem, non est tamen *ratio* quæ omnis propositionis veritatem manifestet; adeoque non est omnis objectivæ certitudinis motivum, sed judiciorum solummodo conscientiæ veritatem facit indubiam.

* 450. Quæres an etiam certitudo primi principii (425, 2°) in intimo sensu fundamentum habeat. Respondeo, juxta modo dicta, certitudinem subjectivam, etiam quod ad primum principium spectat, in intimo sensu fundari. Si enim de suis perceptionibus et de affectionibus quas sentit, dubitare quis posset, jam de iis quoque dubitaret perceptionibus, quibus hujus principii necessitatem cognovit. Si vero sermo sit de certitudine objectiva, ea ab intimo sensu est plane independens, ut quæ ab ipsa entis ratione dimanat. Quemadmodum igitur factum primum sub uno aspectu est a primo principio independens, sub altero non (457, 5°), ita vicissim primum principium se habet ad primum factum. Quænam vero sint habitudines conditionis primæ (425, 3°) ad primum factum primumque principium, in tertio libro explicabitur.

ARTICULUS IV.

De certitudine judiciorum conscientiæ.

451. PROPOSITIO II. *Judicia immediata conscientiæ erroris obnoxia esse non possunt.*

Hæc propositio demonstrationem non patitur. Fac enim afferri demonstrationem. Ut hæc demonstratio me suadeat, quædam percipiam necesse est, nempe quæcunque demonstrationem constituunt, et certum mihi esse debet me ea percepisse. At quo tandem modo hoc mihi certo constabit? Profecto non aliter, quam ex intimi sensus testimonio (448). Ut igitur demonstratio hæc vim suam in me exerceat, intimi sensus testimonium tanquam infallibile admittere debeo; nimirum debeo necessario supponere id quod in quæstionem adducitur. Hæc igitur veritas indemonstrabilis est. Nec vero demonstratione eget; tanta enim fulget evidentia, ut plane impossibile cuique sit dubitare, utrum in se sint affectiones quas experitur.

452. Cæterum hujus propositionis evidentia per contradictionis principium distincte explicari potest. Sane, si in immediatis conscientiæ judiciis error esse posset, ideo foret, quia affectionem, quam sensus intimus mihi renuntiat, eo ipso tempore, quo eam sentio, possem non habere (447, 1°). Sed hoc apertam contradictionem implicat. Sentire enim aliquam affectionem, et illam habere identica plane sunt. Non potest igitur hac in re, ut in aliis cognoscendi modis quandoque accidit (382, b; 440), apparentia a realitate esse difformis. In hac materia realitas tota ipsa apparentia est. Subjectum enim sentiens, et objectum quod sentitur, sola ratione distinguuntur; at revera sunt unum et idem. Non potest ergo affectio aliqua esse in sensu subjecti, quin hoc ipso sit in objecto, quod sentitur.

Ex his manifestum est, certitudinem quam de factis internis sensus intimus producit, metaphysicam hypotheticam esse (405, 408, 2°).

ARTICULUS V.

Difficultates.

453. Opp. I. Sensus intimus non suppeditat certitudinis motivum omnino indubium.

Nam non renuntiat multa facta interna; ex. gr. impressiones, quas recipiunt sensitivæ corporis partes ex circula-

tionem sanguinis, ex aeris pressione, ex telluris attractione, etc.

Resp. *Neg. ant.*

Ad probat. Resp. 1° *Trans. ant., nego consequentiam.*

Demus scilicet quasdam affectiones a sensu intimo non referri, non ideo sensus intimus falsitatis coargui posset. Falsus enim foret, si renuntiaret quod non est in subjecto; si autem non renuntiat aliquid, quod in illo est, erit ad summum dicendus limitatus, et deficiens, non vero falsus aut mendax. Igitur nulla ratio est cur suspicemur de veritate eorum, quæ ipse renuntiat (147, 8°).

Resp. 2° *Dist. ant.* Sensus intimus non renuntiat multa facta interna: nempe quæ pertinent ad solam animæ substantiam, *neg.*; quæ sunt propriæ conjuncti, *trans.* Ratio petatur ex iis, quæ præmisimus (447, 6°).

Resp. 3° *Dist. ant.* quoad exempla. Non renuntiat has affectiones saltem confuse, *nego*; non renuntiat distincte, *subd.*; quum permanent uniformes, *conc.*; si mutationes admittant, *nego*.

Affectiones memoratæ, quæ compositi propriæ sunt, constanter et uniformiter sensum tangunt. His ergo applicari debent, quæ supra notavimus (447, 7°).

454. Instant: Sæpe affectiones, quæ sensibilem mutationem inducunt, distincte non refert. Nam

1° Quum v. gr. multas voces simul audimus, aut multis odoribus percellimur, unam impressionem ab altera non distinguimus.

2° Sæpe dubitamus utrum affectio habita sit ista, vel illa; v. gr. an actus intellectus, an vero voluntatis; an moveamur ad agendum odio aliquo, aut præjudicio, an vero amore justitiæ ac veritatis.

3° Imo dubitamus aliquando, de ipsa existentia quarumdam affectionum in nobis.

Resp. *Neg. min. subs.*

Ad 1^m *Dist.*: Quia impressio producta confusa est, *conc.*; secus, *nego*. Sensus intimus impressiones renuntiat, cujusmodi sunt receptæ; quum autem soni multi, vel odores simul confusi subjectum afficiunt, confusa est quoque impressio

producta. Nota vero, aliud esse quod sensus referat impressionem ex multis confusam, aliud quod hanc referat confuse. In casibus objectis, sensus refert *distincte* impressionem confusam.

Ad 2^m *Dist.* : Dubitamus de natura affectionis habitæ, aut de denominatione illi tribuenda, *conc.*; de ipsius præsentia, *nego* (447, 2^o).

Ad 3^m *Dist.* : Dubitamus de existentia præterita, *conc.*; de præsentia, *nego*.

Hæc dubitatio provenit ex eo, quod certum præteritæ affectionis vestigium memoria non servat. Hanc porro memoriam dubiam testatur sensus intimus, et hoc ipso veracem se probat (447, 3^o).

455. Opp. II. 1^o Amentes multas sentiunt affectiones, quas non habent.

2^o Imo sibi videntur esse quod non sunt, reges, angeli vitrei, mortui, etc.

3^o Somniantes quoque sibi videntur vigilare, sibi videntur multa agere et pati, quæ nec agunt, nec patiuntur.

Resp. ad 1^m *Dist.* : Amentes sentiunt affectiones quas non habent, i. e. quas non habent ita ut sentiunt, *neg.*; quas non habent ita ut judicant aut dicunt se habere, *conc.* Judicant enim de seipsis, non juxta intimum sensum, sed juxta perturbatæ imaginationis phantasmata.

Ad 2^m *Dist.* : Sibi videntur esse quod non sunt, i. e. sentiunt quod non sunt, *neg.*; male interpretantur quod sentiunt, *conc.*

Ad 3^m *Dist.* : Sibi videntur etc. i. e. imaginantur, *conc.*; sentiunt, *subd.*; sentiunt hæc omnia in imaginatione expressa, *conc.*; fieri a se realiter, *nego*. Horum quoque error est totus in judicio, quo phantasmata cum objectis realibus permiscunt, propter impotentiam reflectendi, et phantasmata, cum sensationibus comparandi.

456. Opp. III. Sensus intimus refert affectiones quasdam esse ubi non sunt. Nam

1^o Dolor v. gr. non est in corpore, sed in anima; atqui sensus intimus testatur esse in corpore.

2^o Ii quibus brachium vel crus amputatum est, non infrequenter in brachio vel crure dolent.

Resp. *Neg. ant.* Ad 1^m *Dist. maj.*: Quatenus corpus non est per se doloris capax, *conc.*; quatenus dolor non pertineat ad compositum ex anima et corpore, *nego*.

Et *contradist. min.*: Sensus intimus testatur dolorem esse in corpore per se spectato, *neg.*; in composito, *conc.* Testatur sensus intimus dolorem esse in ea corporis parte, ubi corpus animatum læsum est. Anima autem, quatenus est huic corpori conjuncta, in ea ipsa parte dolorem experitur.

Ad 2^m *Dist.* : Dolent in brachio vel crure, i. e. sentiunt dolorem confusum in ea ramificatione nervorum, quæ antea protendebatur in brachium, et hunc dolorem judicant esse in brachio vi habitudinis et phantasie, *conc.*; vere sentiunt dolorem in brachio vel crure quo carent, *nego*.

Ad hæc facta explicanda, hæc duo attendere sufficit: 1^o doloris interni sensum esse confusum, ita ut locus in quo præcise residet, aut certi ejus limites determinari sæpe non possint; id quod multo magis in mutilis membris contingere debet, in quorum extremitate nervi, ossa, cutis minime naturalem et insuetum statum obtinent; 2^o sensationi indefinitæ doloris quam in mutilo membro nervi experiuntur, accedere phantasiam, quæ cruris vel brachii integri sensum et imaginem ex habitudine illi associat.

CAPUT III.

DE SENSIBUS EXTERNIS.

ARTICULUS I.

Notiones præmittendæ.

457. Cognitiones omnes, quas de rebus externis habemus, sensu intimo teste, mediantibus quibusdam corporis nostri partibus hausimus, quas *sensoria*, sive *sensus organa* nuncupamus.

Organum autem in genere, est pars viventis ad aliquam vitæ functionem naturaliter destinata: *sensoria* sunt animalis organa ad sensationes recipiendas destinata.

Sensatio, quantum ad rem nostram modo attinet; describi potest: *agentis externi in corpus animatum impressio quædam animæ præsens*.

Facultas experiendi sensationes, qua animal gaudet, dicitur *facultas sentiendi*, vel simpliciter *sensus*.

Sensationes in quinque classes dividuntur; unde quinque enumerantur *sensus*: *tactus, gustus, odoratus, auditus, visus*. Tactus organum est cutis toto prætexta et diffusa corpore, cæteri *sensus organa* sibi propria habent; quæ omnia cum cerebro per nervos communicant.

458. Neque organa *sensus*, neque nervi qui in illis diffunduntur, nec quidquid corporeum est, *sensum* per se habere posset: at omnis *sensus* est ab anima, quæ corpus informat, et in organis, perque illa sentit (447, 4^o). In *sensatione* igitur duo distinguenda sunt: 1^o organi materialis modificatio ex agentis externi actione: 2^o hujus impressionis experientia; quæ proprie ac formaliter *sensatio* est. Anima igitur principium est *sensus*; organum vero animatum est ejus subiectum.

459. Omnis *sensatio* experientia quædam est præsentis objecti, et perceptio ejus dici potest: non omnis tamen discretiva est objecti afficientis a subiecto affecto, saltem per se. Eæ *sensationes*, quæ ita objectum experiuntur præsens, ut illud a subiecto distinctum exhibeant, dicuntur proprie *sensitivæ perceptiones*, itemque *sensiles intuitiones*, vel *repræsentationes*. Visus ac tactus sunt *sensus repræsentativi* per se: cæteri *sensus*, his mediantibus atque usu accedente, tales evadunt.

460. Ut modificatio organica a sensitiva perceptione, ita sensitiva perceptio a perceptione intellectuali, et ab intellectus judicio distinguenda est. Intellectus enim, quum mediante *sensatione* fit animæ præsens objectum, percipit illud secundum intelligibiles notas, ac de illo judicat. Vide dicta de sensu intimo (445).

461. Proprietates illæ seu vires corporum, quæ *sensus* afficere et *sensationem* determinare possunt, *sensibiles corporum qualitates* dicuntur.

Proprium cujusque *sensus objectum* est aliqua sensibilis qualitas; illa nempe, quæ eum *sensum* per se ac primario afficit.

Proprium visus objectum est lux cum suis diversis coloribus; *auditus*, sunt motus vibratorii corporum per medium fluidum propagati: *gustus*, actio quædam corporum, qua excitatur *sensatio saporum*; *olfactus*, tenuissimarum actio particularum, quæ a corpore odore efflantur et quaquaversus disperguntur; *tactus* demum objectum resistantia in primis est quam corpora exercent, ejusque diversæ modificationes, ut sunt mollities et durities, asperitas et levitas; deinde calorigi sive communicatio sive subtractio, actionesque aliæ corporum quibus variæ in nostro corpore affectiones, sive gratæ sive ingratae, excitantur.

Determinatio quam a proprio objecto in organum agente, sensitiva facultas recipit, vocabatur a veteribus *species sensibilis impressa*; qui tamen de his speciebus, pro physica temporum suorum scientia, aliter ac recentiores disserebant. Cognitio ipsa sensibilis vocabatur ab iisdem *species sensibilis expressa*.

Una cum proprio objecto, ac ratione illius, alias quoque corporum affectiones *sensus* exhibent, quæ ad quantitatem reducuntur. Eæ sunt *figura, magnitudo, distantia, numerus, motus, quies*; quæ *sensibilia communia* cum veteribus appellare possumus.

Cætera, quæ ad corpora pertinent, dicuntur *sensibilia per accidens*: « sicut in visu est similitudo hominis, non in » quantum est homo, sed in quantum huic colorato accidit » esse hominem (1). »

462. Nullo igitur modo ad *sensus* pertinet, ut ad nos referant de corporum essentia, natura, intimaque constitutione, nec quid sint in se sensibiles illæ qualitates, quæ ipsos afficiunt. Horum omnium investigatio ad rationem pertinet, quanquam ad hæc investiganda, adminicula necessaria rationi *sensus* suppeditent. Itaque per *sensus* non cognoscimus, nec cognoscere possumus omnia quæ corpus habet,

(1) S. Th. Summ., p. 1, q. XVII, art. II.

sed solum aliqua; nempe qualitates sensibiles, easque non absolute sed relative, nimirum quatenus nos afficiunt.

Et hoc unum ut referrent immediatus sensuum finis requirebat. Finis enim immediatus propter quem homini sensus tributi sunt, hic est, ut illi manifestent corporum præsentiam, eorumque proprietates, quatenus ad compositi conservationem vitæque usus eas nosse convenit.

463. Sensatio relata ad intellectum considerari dupliciter potest: 1^o ut est subjecti affectio: 2^o ut est objecti externi repræsentativa. Secundum hosce duos respectus dici potest vera, sed diversimode. Nam prouti subjectiva est, vera dicitur, quemadmodum dicitur verum aurum, vel verus amicus: quia nempe veram de se existimationem in intellectu gignere potest; falsa que diceretur, si falsam de se gigneret existimationem. Prouti vero sensatio repræsentativa est, vera dicitur per analogiam cum idea, nempe propter conformitatem cum objecto (373); falsa, si ab illo sit difformis.

ARTICULUS II.

De sensationibus subjective spectatis.

464. PROPOSITIO I. *In sensationibus, prouti subjecti affectiones sunt, nulla potest esse falsitas.*

Hujus propositionis evidentia ex dictis de sensu intimo (451) immediate dimanat. Quidquid enim sint affectiones istæ in se, et quomodocunque in subjecto excitentur, non potest subjectum non habere affectionem quam sentit, nec diversam habere ab ea quam sentit. Sensus igitur affectionem quæ in subjecto non sit, aut aliter sit, offerre intellectui nequit. Nequit ergo esse unquam falsus.

465. Neque dicas, quandoque ex organi vitio receptas ab objecto impressiones immutari, ut quum v. gr. ægroto dapes videntur insipidæ, vel iis, qui rheumate laborant aromata sine odore. Etenim verum quidem est organa sensus, secundum dispositionem in qua sunt, ab iisdem objectis diversimode affici; unde actio eadem ex parte objecti, quæ in sani palato sensum grati saporis excitat, in palato ægroti vel nullum saporem, vel ingratum ciet; at verum ex æquo est,

organa, cum non simpliciter objecti actionem, sed actionem hanc, ut organa afficit, referre debeant, quomodocunque afficiantur, affectionem receptam non mutare, sed fidelissime renuntiare.

ARTICULUS III.

De Idealismo.

466. Venio nunc ad sensationes, prouti objectorum externorum repræsentationem offerunt, et ad certitudinem, quam repræsentationes istæ producant. In primis per sensationes certi sumus existere corpora. Judicamus enim et invincibili persuasionem ratum habemus, objecta quæ per sensationes nobis exhibentur, vere extra nos esse, eaque nos habere præsentia, quum sensationes experimur. Ast hanc certitudinem idealistæ præjudicium esse putant rationi minime consonum, quodque philosophia possit evertere. Hi concedunt corporum species menti obversari; corpora autem ulla esse negant, aut saltem utrum sint dubitandum censent.

467. Idealismus alius est *scepticus*, quem sectati sunt Pyrrho et Humius; alius *dogmaticus*, et hic duplex est; quorum alterum *subjectivum* dicunt, alterum *objectivum*. Idealismus subjectivus ponit corporum repræsentationes ab ipsa mente produci. Huc pertinent idealistæ veteres, iisque peiores egoistæ transcendentales, qui Fichte sequuntur ducem. Idealismus objectivus statuit ab ipso Deo, in ipsaque mente produci corporum phænomena. Hunc idealismum docuit in primis Berkeleyus. Malebranchius vero quanquam idealistis non sit accensendus, argumentis tamen usus est idealistarum propriis. Singularem enim iniens sententiam, putavit corporum existentiam per sensationes non posse demonstrari: quod si de illa certo nobis constat, eam certitudinem divinæ solum revelationis auctoritate inniti (1).

468. Contra has omnes demonstrandum nobis est, apparitiones corporum sensationibus contentas, realium corporum manifestationes esse. In primis tamen hæc notata volumus.

(1) *Recherche de la vérité*, Eclairciss. VI sur le 1^{er} livre.

1° Corporum nomine in præsentī quæstione intelligimus objecta illa, quæcunque sint, quæ in sensili intuitione repræsentantur a subjecto cogitante distincta.

2° Quæstio hæc ab his aliis prorsus est independens: quæ sit corporis natura: quomodo corpora nobis manifestentur; quomodo de corporum existentia naturalem certitudinem homines adipiscantur. Hæ lites omnes, quum idealistas agredimur, vitandæ sunt (442), et vitari non difficulter possunt.

3° Agimus de corporibus in genere, non vero de ullo corpore in particulari. Cæterum corporis proprii existentiam intimo mediante sensu cognosci, ac per ipsum demonstrari posse, facile eruitur ex dictis (447, 4°, 5°).

ARTICULUS IV.

Idealismi confutatio.

469. PROPOSITIO II. *Certitudo de corporum existentia, quam sensationes gignunt aluntque, ab idealistis everti non potest.*

Apparitiones corporum, intimo teste sensu, perpetuo menti obversantur. Genus humanum existimat apparitiones istas corporum realium manifestationes esse. Idealistæ pronuntiant, (quis enim dicat eos ita existimare?) pronuntiant, inquam, esse vanas imagines mentisque ludibria. Si ita est, quoniam in ordine quoque ideali nihil fit sine causa, aliqua certe causa esse debet, quæ inanes huiusmodi apparitiones excitet ac menti obtrudat. Quod quum Idealistæ diffiteri non possint, eam causam assignant. Si eos audias qui subjectivum idealismum sectantur, hæc causa est subjecti cogitantis actio; si eos, qui objectivum idealismum propugnant, est ipse Deus. Hisce præstitutis, sic argumentari licet:

Si apparitiones corporum non sunt corporum realium manifestationes, unum ex his duobus cum adversariis dicere oporteret; vel ipsum subjectum cogitans apparentias illas in se producere, vel in subjecto illas a Deo excitari.

Atqui 1° subjectum cogitans non potest esse earum causa; 2° Deus non potest illas excitare corporibus non existentibus.

Ergo apparitiones corporum sunt realium manifestationes.

470. Probatur 1^a pars.

1° Si apparitiones corporum prodeunt unice ab activitate subjecti cogitantis, nihil aliud essent in se, quam internæ simplicis subjecti modificationes, ut sunt actus intelligendi, iudicandi, eligendi, etc. Dicant igitur idealistæ

a) cur corpora appareant, non ut cæteræ modificationes internæ, intra subjectum et in subjecto, sed tanquam objecta extra animum constituta, ab eoque plane distincta; cur saltem non appareant tanquam subjecti partes; brevi, explacent cur sensilis repræsentatio sit essentialiter discretiva subjecti a re repræsentata.

b) Dicant insuper cur modificationes istæ extensum aliquid ac divisibile constanter exhibeant. Si enim subjectum cui insunt, est undequaque simplex et indivisibile, illius quoque modificationes simplices et indivisibiles sint oportet.

c) Dicant denique cur subjectum hoc simplex in se ipso inveniat, imo sentiat extensionem, partesque distinguat superiores et inferiores, internas et externas et dextrorsum, sinistrorsum, atque ante retroque positas, ita ut modo in una, modo in altera afficiatur, suamque exerceat activitatem.

Hæc omnia explicare idealistæ non possunt, quia in ipsorum hypothesi absurda sunt. Ergo.

471. 2° Sensus intimus talia testatur, ex quibus luculenter ostenditur, repræsentationes de quibus loquimur, non in mente, sed extra mentem habere causam.

Sane in internis factis probe distinguimus, quæ in ipsa spiritus activitate rationem determinantem habent, et quæ non habent. Si ergo sensiles repræsentationes ab animi provenirent activitate, animus in his agentem se experiretur, non vero patientem et ab alio determinatum. Atqui non hoc sensus intimus renuntiat, sed plane contrarium. Nam

a) Sentio me non excitare illas, sed recipere, non efformare mihi objecta, sed cum omnibus conditionibus suis accipere.

b) Sæpe non possum eas repræsentationes coram habere, quas maxime vellem.

c) Imo eas experiri cogor, quas maxime nollem, easque nullatenus declinare possum.

Ergo non in animo, sed extra animum hæ causam habent.

Reponet fortasse quispiam: etiam phantasmata quædam, quæ nos quandoque perturbant atque discruciant, nolentes invitique patimur. Optime: quia nempe phantasia facultas organica est; ex quo fit, ut quædam affectiones in ipsa excitentur aut reproducantur ex ipsis organismi legibus et a causis in interna organa agentibus.

472. 3^o Verum quoque est posse nos, quotiescunque voverimus, repræsentationes olim habitas, plerasque saltem, in mentem, ac verius in phantasiam revocare. Sed hoc tantum abest, ut argumentum præcedens infirmet, ut imo novum suppeditet.

Si enim corporum apparitiones a sola mentis activitate producerentur, nullum sane discrimen esset inter apparitiones, sive primo habitas sive dein revocatas. Atqui multiplex est hujusmodi discrimen.

a) Incredibiliter differunt intensitate impressionis et evidentia repræsentationis. An non toto cælo differunt ea solis apparitio quam voco visionem, et ea qua noctu de eodem sole cogito?

b) Differunt ratione successionis ac dependentiæ. Nam si certi cujuspiam objecti visum experiri volo, non raro necesse est ut determinatarum series visionum certo ordine illam præcedat; v. gr. quum volo visionem habere Vaticani. Phænomenon autem revocatum excitatur a me, quin hæc omnia præcedant.

c) Differunt variabilitate: revocata enim repræsentationum phantasmata possunt ad libitum immutari; at quum de phænomeno visionis agitur, mutationes istæ sunt impossibiles.

473. 4^o Si sensationes sola vi subjecti cogitantis determinarentur, a conditionibus pure internis penderent; proindeque positis actibus, quos semel certæ quædam apparitio-

nes subsecutæ sunt, hæc toties infallibiliter iterari deberent.

Atqui sæpe contrarium accidit: positis enim omnibus conditionibus quæ a subjecto pendent, nullatenus sequitur sensatio quam expectamus, uti obvia probant exempla. Ergo sensationum productio non pendet a conditionibus pure internis, sed etiam ab aliqua vi et conditione externa. Ergo non pendet a sola vi principii cogitantis.

474. 5^o Idipsum postremo phænomenorum mira varietas, pulchritudo, nexus demonstrant. Si enim animus hæc omnia de suo producit, ipse solus tanti ordinis ac pulchritudinis auctor est. Habet ergo in se mirabilem quamdam vim tum inveniendi, tum disponendi conceptus, quam perpetuo exercet, et quod mirabilius est, labore nullo. Sed

a) Sensus intimus testatur nullam a nobis poni actionem ordinatricem, quum phænomena ordinatissima contemplamur.

b) Si mens tam facile vim hanc inveniendi ordinandique exercet nullo labore, conatu nullo, imo inscia manens actionis suæ, qui fit ut quum vere vult, quum serio conatur hanc facultatem exercere, et aliquos conceptus vel phantasmata ordinare aggreditur, difficillime id præstet, ac sæpissime sine successu? Plane similis esset poetæ, qui stans pede in uno poemata pulcherrima nihil tale cogitans dictaret; qui contra ex animo cupiens aliquid pangere carminum, vix paucos versiculos magno cum conatu extundere posset, et quidem tales, qui semper spontaneis illis carminibus longe inferiores essent.

Patet ergo, quod primo proposuimus, repræsentationes corporum non habere sui causam in subjecto cogitante.

475. Probatur 2^a pars: *Deus non potest apparitiones corporum in nobis excitare, corporibus non existentibus.* Repugnat enim Deum, qui ipsa veritas et bonitas est, in errorem invincibilem inducere rationalem naturam, quæ ad veritatem facta est, et veritatis possessione maxime perficitur. Atqui si Deus, non existentibus corporibus, excitaret in nostris mentibus corporum repræsentationes, uti eæ nunc nobis

exhibentur, induceret nos in errorem, eumque invincibilem. Ergo.

476. Dixi I. *Induceret nos in errorem*, i. e. in falsam persuasionem de corporum existentia, et in perpetua judicia falsa. Nam

1° Cum corpora menti repræsententur tanquam objecta, Deus oggeret perpetuo nobis objectum quod non est objectum, realitatem fictitiam, res quæ non sunt tanquam essent; ac proinde pertraheret nos ad judicandum, vere esse ea quæ non sunt.

2° Insuper exhiberet nobis perpetuo tanquam multarum affectionum nostrarum causas, aut saltem occasiones (nolo enim cum Malebranchio de hoc disputare), vanas quasdam imagines, quæ nullo modo nos afficiunt.

3° Crescere videbis errorem, si conclusiones consideres, ad quas corporum apparitiones sponte nos adducunt. Ex his enim inducimur ad judicandum, res hujusmodi exquirendas esse vel fugiendas, timendas, custodiendas, etc. Hæc judicia totam mortalium afficiunt ac dominantur vitam. Quænam vera illusio hac crudelior excogitari possit? Quænam hæc intuentes puri spiritus sensa concipiant? Nonne illos humanam naturam, adeo misere a Creatore suo ludibrio habitam, vehementer commiserari deberet?

Igitur si has corporum quæ non sunt, repræsentationes Deus in nobis excitat, perpetuo nos ludibrio habet, et miseranda tenet illusionem deceptos.

477. Dixi II. *Hic error foret invincibilis*. Revera

1° Illa persuasio omnino invincibilis est,

a) quæ non potest vel ad instans deponi;

b) quæ est quædam naturæ necessitas;

c) qua majorem ipsa veritatis experientia gignere non posset:

Atqui talis est in humanis mentibus persuasio de corporum existentia.

Quod neque ad instans deponi possit, neque dubitatione seria concuti, hoc experientia cuique compertum est. De-

ponant enimvero hanc persuasionem idealistæ, aut saltem semel dubitent de proprii capitis existentia.

Insuper hæc persuasio est quædam naturæ necessitas. Non enim ab educatione inducta dici potest, neque studio aut ratiocinio comparata; ejus originem non invenimus; nobiscum orta, nobiscum adolevit, et cum ipsa ratione confirmata est. Quomodo id factum fuerit, nunc non quæro; factum esse negare nemo potest.

Tandem ipsa veritas non posset se nobis meliori modo suadere, quam nunc error iste. Si enim revera corpora existerent, an posset nobis eorum existentia manifestari evidentius? Imo quomodo posset illa nobis aliter, quam per adeo luculentas repræsentationes, manifestari? Quod si vere corpora nobis manifestarentur, an certitudinem firmiorem experiremur? At quænam firmior certitudo esse potest ea, quæ non modo formidinem omnem erroris excludit, sed ipsam formidandi possibilitatem?

478. 2° Si hæc persuasio error est, Deus ipse omnem veritatis speciem illi indidit, adeo ut et artificium suum et deceptionem nostram callidissime occultasse dicendus esset. Nam

a) Si sensationes quas apparitiones corporum produciunt, essent variabiles, et legibus necessariis minime subjectæ, ita ut suspicari possemus eas ab activitate liberi agentis immediate excitari, forte ab errore nostro recedere nobis liceret; sed cum sint adeo constantes et uniformes, non datur nobis unde suspicemur, eas ab agente libero, non a causis necessario agentibus immediate provenire.

b) Præterea sentimus nos habere organa quædam corporea, quæ sensus appellamus, quæque pro lubitu adhibemus vel non adhibemus, ita ut, iis adhibitis, certæ in nobis sensationes oriantur, iisque non adhibitis, sensationibus iisdem careamus. Unde concludimus, hæc organa nobis esse tributa, ut iis utamur tanquam rerum externarum internuntiis. At si corpora nulla sunt ac phænomena rerum externarum Deus immediate producit, sane hunc quoque organorum

sensum ipse producit. Cur autem, nisi ut deceptionem nostram magis occultet?

479. Igitur 1^o si corpora non existunt, et ipsorum repræsentationes Deus nobis obtrudit, plane consequitur, humanam naturam ab ipso artificiose impelli in errorem naturalem, necessarium, perpetuum, invincibilem. Quæ cogitare cum absurdum sit, profecto ruit altera idealistarum hypothesis.

2^o Certitudo reflexa ac philosophica de corporum existentia sola ratione acquiritur, quin ad fidem et scripturas confugiamus, uti Malebranchius contendit. Etiam si enim ipsi largiamur, Deum immediate excitare in animo sensationes, et corpora quæ intuemur, esse corpora intelligibilia ac possibilia, in divina essentia contenta (quæ quidem duo diserte neganda sunt, uti suo loco demonstrabimus); nihilominus semper verum manet, si corpora non sunt, non posse Deum illa nobis repræsentare ut objecta realia, nec nos inducere per sensationes in falsam opinionem de ipsorum existentia.

480. Animadvertite, argumenta in hac secunda parte allata primam quoque confirmare. Deum enim humanæ naturæ deceptorem æque facis, si dicas ipsum immediate repræsentare nobis corpora quæ non sunt, ac si contendas repræsentationum excitandarum vim animo contulisse, quin ullum ei sensum aut cognitionem hujus arcanae vis tribueret.

481. Ex dictis consequitur: 1^o certitudinem de corporum in genere existentia esse *metaphysicam hypotheticam* (407, 408, 2^o).

2^o Si certum aliquod objectum corporeum constantibus et concordibus sensationibus nobis repræsentetur, certitudinem de ejus existentia esse et ipsam metaphysicam hypotheticam. Hæc duo ex hucusque dictis manifesta sunt.

3^o Cæterum certitudo de alicujus corporis determinati existentia, per se *physica* est, et quidem *hypothetica* (408, 5): nempe si lex physica, quod sensationibus respondeant objecta a quibus producuntur et quæ repræsentant, in eo casu exceptionem non patitur per Dei omnipotentiam. Non enim repugnat, Deum propter fines sua sapientia dignos, in aliquo

casu legi universali per miraculum derogare: certum tamen est, miraculum a Deo non patrari, nisi aliquo modo illud patefaciat: secus inutile evaderet.

ARTICULUS V.

Difficultates.

482. Obijciunt idealistæ. Repræsentationes sensiles non possunt nos reddere certos de corporum existentia. Nam

I. Sensationes seu repræsentationes corporum sunt formæ et modificationes animi. Ergo ex illis cognoscere possumus, quid accidat intra nos, non vero quid sit extra nos.

Resp. 1^o *Dist. 1^{am} partem ant.*: Sensationes sunt formæ et modificationes animi; i. e. modificationes repræsentativæ, seu discretivæ subjecti ab objecto, *conc.*; meræ modificationes animi, *subd.*: animi ut est conjunctus corpori, *conc.*; animi tantum, *nego*.

Dist. 2^{am} partem.: Repræsentationes corporum sunt modificationes animi, si objective spectentur, *nego*; si subjective, *subd.*; ut supra. Hæc vox repræsentatio sumi potest *active*, pro actu quo aliquid alteri repræsentatur, et *passive*, pro passionē in altero respondente. Si primo modo sumatur, repræsentatio corporum objectiva est, ut patet ex dictis (470 seq.).

Resp. 2^o simplicius: *Omitto ant.*; *Dist. cons.*: Immediate, iterum *omitto*; mediate, *nego*. Hæc responsio præscindens a quæstionibus, revocat adversarios ad argumenta reflexa, quæ supra attulimus: ac propterea præferenda; in hac quæstione videtur (468, 2^o).

483. Obj. II. Inter sensationes et corpora nulla est relatio, vel proportio.

Resp. *Dist.*: Dependentiæ saltem logicæ, *nego*; similitudinis quoad naturam, *subd.*: si sensatio formaliter consideretur, *conc.*; si materialiter, *nego* (458). Inter sensationes et corpora est relatio dependentiæ physicae, ejus nempe dependentiæ, quæ est inter effectum et causam. Sed necesse non est, ut huic insistamus; sufficit enim dependentia logica, nempe quod corporum existentia a sensationibus deduca-

tur: potest autem relatio dependentiæ, sive physicæ sive logicæ, esse inter res naturæ diversæ.

484. Obj. III. 1^o Non cognoscimus quomodo corpora possint agere in nos.

2^o Imo impossibile videtur corpora in spiritum agere.

Resp. 1^o *Transeat utrumque* (422). Etiam si enim daremus, sensationes actione corporum non excitari, certum tamen est non excitari a nobis. Certum est item excitari non posse a Deo, corporibus non existentibus. Ergo.

* Resp. 2^o ad 2^{um} *Dist.*: Non percipimus, qua ratione agant, *trans.*; concipimus, quod non possint agere, *nego*.

Ad 2^{um} in spiritum separatum, *trans.*; in spiritum corporatum, *nego*. Sed de his alibi.

485. Obj. IV. Delirantes et somniantes 1^o habent repræsentationes sensiles maxime evidentes; 2^o invincibili persuasione putant existere objecta quæ ipsis repræsentantur.

Resp. ad 1^{um} habent phantasmata repræsentationum maxime evidentiæ, *conc.*; repræsentationes sensibiles, *nego*.

Ad 2^{um} *Dist.*: Persuasio invincibili per accidens, *conc.*; natura sua, *nego*. Si enim reflectere possent, intelligerent ea esse mera phantasmata, et contrariam persuasionem deponerent.

486. Obj. V. Philosophi docent, qualitates sensibiles non esse in corporibus, sed in percipiente. Atqui 1^o non cognoscimus de corporibus, nisi qualitates sensibiles. Ergo id omne quod cognoscimus de corporibus, non est in corporibus, sed in percipiente.

Iterum 2^o nos invincibili persuasionem putamus, qualitates sensibiles esse in corporibus: Ergo potest dari persuasio invincibilis falsa.

Resp. *Dist. maj.* Philosophi docent, non esse in corporibus qualitates sensibiles secundum formalem ac subjectivam sensationem, quam causant, *conc.*; secundum aliquid quod sensationem provocet, *nego*.

Ad 1^{um} *Conc. min.* et *dist. consequens* eodem modo.

Ad 2^{um} *Dist. min.*: Putamus invincibili persuasionem qualitates sensibiles esse in corporibus secundum id quod causat

sensationes, *conc.*; secundum sensationem quam causant, *nego*. Et omitto *consequens*. Certe putant omnes esse in corporibus id quod excitat sensationes, et ab hac persuasionem nunquam homines retrahentur. Hoc quod sensationes excitat, pro sensationum varietate vocant corporis *calorem, saporem, odorem*, etc. Quid vero sint in se qualitates istæ, et quomodo sensationes in nobis excitent, hoc ad philosophiam investigare pertinet. Quod si vulgus in hoc erret, mirandum non est. Nescio vero, an sint qui ita errent, ut putent ignem calorem suum aut mel suam dulcedinem sentire, perinde ac nos. Quod si qui fuerint tales, facile dedocentur. Mirandum enimvero, quomodo tantas moles super hoc fundamento excitare potuerit Malebranchius.

Omissi consequens: nam, utrum dari possit persuasio invincibilis falsa, alibi inquiremus. Cæterum, etsi aliqua hujusmodi persuasio daretur, certe persuasio de corporum existentia falsa non est, quia vera demonstratur.

487. Obj. VI. Deus certe potest omnes sensiles repræsentationes quibus afficimur, in humana mente producere, corporibus non existentibus. Nam pluries id fecit, tum in Veteri, tum in Novo Fœdere.

Resp. *Dist. ant.*: Potentia absoluta, *trans.*; potentia comparata cum veracitate et bonitate, *nego*.

Ad rat. additam, *dist.*: Id fecit in aliquo peculiari casu, ex fine se digno,isque in adjunctis ut error vitari vel detegi posset, *conc.*; secus, *nego* (481, 5^o).

488. Inst. 1^o Deus permittere potest errorem necessarium, constantem et invincibilem; hunc enim errorem in amentibus v. gr. permittit. Ergo a pari.

Resp. *Transeat totum; nego consequentiam et paritatem*. Aliud enim est, Deum in aliquo individuo errorem ejusmodi *permittere*, quod nempe non impediat organicas lesiones easque accidentales, quibus rationis ac reflexionis usus perturbatur, aliud vero errorem hunc ipsum *intendere*, tanquam naturale medium ad suos fines assequendos, in eumque humanum genus universum positive ac directe propellere.

489. Inst. 2^o Error iste invincibilis non est. Ratio enim potest ipsum corrigere.

Resp. *Nego utrumque*. Nullius enim ratio potuit adhuc hunc errorem expellere, neque ipsa ratio idealistarum: et ipsi enim in hoc errore defixi hærent. Deinde quomodo ipsum, aut qua via corrigat ratio? Hoc enim docet ratio: Deum posse utique excitare in hominis phantasia (non in mente) quasdam corporum representationes, corporibus non existentibus, si aliquo modo hoc faciat manifestum. Atqui Deus non manifestavit se constanter ita agere, neque ex rerum adjunctis hoc colligi utcumque potest.

490. Inst. 3^o Ratio docet, Deum non facere per plura, quod potest fieri per pauciora. Sed Deus poterat corporum representationes per se nobis exhibere, quin ad hoc corpora crearet: Ergo ratio docet, Deum per se representationes corporum exhibere, quin ad hoc corpora crearet.

Resp. *Dist. maj.*: Si nullum finem habeat adhibendi plura, *conc.*; secus, *nego*. Videlicet si res, perpensis rite omnibus, æque utiliter, congruenter, apteque possit per pauciora ac per plura fieri, certe Deus plura non adhibet; secus esset aliquid in ejus operibus omni fine carens.

Ad min. Resp. 1^o *Trans. min. et dist. consequens.*: Si nullum præterea finem habere potuit creandi corpora, *trans.*; secus *nego*. Jam quomodo probari poterit, corpora ad nullum alium finem creari potuisse, nisi ut sensationes in homine excitarentur?

Resp. 2^o *Dist. min.*: Potentia absoluta, *conc.*; potentia ordinata (487), *subd.*: aliquando, et iis in adjunctis, ut error vitari vel detegi possit, *trans.*; secus, *nego*, et *nego consequentiam*.

Resp. 3^o *retorquendo argumentum*. Si enim corpora non existunt, multa Deus frustra operari dicendus esset. Cur enim tantum mihi indidit amorem corporis quod habere mihi videor, et tamen non habeo? Cur sensum excitat organorum, per quæ objecta externa mihi videor percipere (487, 6)? Imo cur in me tot corporum ac talium ideas ac species excitat?

491. Obj. VII. At forte genius malignus, nescio quis, nobis illudit. Non repugnat autem genium hunc deceptorem esse.

Resp. *Neg. maj.* Non enim potest humanæ naturæ auctor Deus permittere, ut ludibrio perpetuo habeamur a quoquam; præsertim cum nulla media nobis præsto sint, ad errorem cavendum vel detegendum. Patet hoc quoque argumentum retorqueri posse.

492. Obj. VIII. Demonstratio existentiae corporum, quæ a Dei veracitate petitur, duo habet incommoda:

1^{um} quod quæstionem hanc, cujus solutionem perviam cuique esse oporteret, ad theologiam reducat:

2^{um} cum demonstratio existentiae Dei ab existentia corporum deducatur, in circulum vitiosum incidimus.

Resp. ad 1^{um} *Dist.*: Si absolute hæc una afferretur demonstratio, aut si ea necessaria existimaretur ad corporum existentiam cognoscendam, *omitto*: si affertur ad eos revincendos, qui idealismum objectivum sectantur, *subd.*: quæstio reducitur ad theologiam, ita ut solvatur ex iis de divinitate notionibus, quæ sunt omnibus communes, *conc.*; ita ut ex reconditiore scientiæ theologicæ doctrinis solutio peti debeat, *nego*.

Resp. ad 2^{um} *Dist.*: Si omnis demonstratio existentiae Dei corporum existentiam supponeret, *trans.*; si aliqua tantum demonstratio eam supponit, *nego*. Ad Dei existentiam demonstrandam sufficit vel unius ideæ in mente existentia: non ergo necessario desumitur a corporum existentia. Cæterum ii contra quos affertur demonstratio existentiae corporum dependens ab existentia Dei, non sunt athei, sed ipsi primo Dei operationem in medium afferunt ad phænomena explicanda. Athei vero vel non sunt idealistæ, vel si sunt, apparitiones corporum per Dei operationem certe non explicant.

ARTICULUS VI.

De peculiaribus judiciis, quæ sensationibus, ut sunt representativæ, innituntur.

493. Non modo corpora esse, sensibus edocti judicamus, sed etiam eorum qualitates ac relationes ope sensuum co-

gnoscere nos arbitramur. Ut de altero hoc genere judiciorum accurate disputemus, judicia *immediata* a *mediatis*, ut alibi (447, 1°), distinguenda sunt. Immediata versantur circa illud ipsum quod sensationes repræsentant, videlicet circa sensibiles qualitates sive cujusque sensus proprias, sive communes (461): v. gr. *Hoc corpus est calidum, illud movetur*, etc. Quæ judicia omnia, ut patet, sunt singularia; solum enim res singulares sensibus subjiciuntur. Mediata ex his immediatis, aliisque deducuntur; et hæc tam singularia quam universalia esse possunt; ex. gr. *Luna illuminatur a sole*. — *Aqua est composita ex duobus elementis*.

494. Non modo in judiciis mediatis, sed etiam in immediatis potest error obrepere, quia objectum quandoque non est in se cujusmodi per sensationem se exhibuit.

Hinc sensationes errandi occasionem præbere possunt, quum de rebus ut sunt in se judicandum est. Sensus quidem receptas ab objectis impressiones constanter referunt, et in hoc nuntii sunt fidissimi ac nunquam fallaces (464); at, quod in quovis instrumento evenire videmus, si non sint rite dispositi, vel non uti par est adhibeantur, non eas ab objecto impressiones recipient, quæ ad recte de illo judicandum necessariae forent. Hinc si juxta hujusmodi sensationes judicium feratur, facile erit in errorem incidere. Rationis itaque munus est, ut diligenter et circumspecte pro objecti diversitate sensuum utatur instrumento; videatque, an sensus in eo statu, in iis adjunctis inveniantur, ut objectum in se tale censendum sit, quale se sensibus obtulit. Si hæc ratione præstare negligamus, sæpe errabimus; at omnis error non sensuum infidelitati, sed vel oscitantiae nostræ vel temeritati erit adscribendus. Ad hosce vitandos errores, hæc quæ sequuntur, rationi attendenda sunt, quæ et rei natura et ipsa errorum experientia attendenda esse monstravit.

ARTICULUS VII.

Regulæ in usu sensuum attendendæ.

495. 1° Necessarium est, ut sensus sint *sani*, i. e. ut organa sensoria nullo vitio laborent, sed naturalem statum

ac temperationem servent. Aliter enim ab eodem objecto organum sanum, atque organum vitiatum impressionem recipit. Sic ex. gr. myopes et presbytæ objecta vident confusa, et oculis præ ebrietate micantibus lucerna duplicatur.

Facile de sensuum recta dispositione constare potest,

a) si nullam in organis molestam affectionem experiamur:
b) si præsentis sensationes nostræ sensationibus antea habitis sint conformes:

c) si ab aliorum judiciis circa eadem objecta non discrepent.

496. 2° Debent esse sensus *apte dispositi* ad sensationem recipiendam. Nonnunquam enim quædam adjuncta, vel etiam sensationum præcedentium vestigia, impressiones in organo ab objectis receptas immutant, aut hebetant: v. gr. manus sordidæ aut nimis frigidæ palandis tenuibus objectis sunt ineptæ; ita palatum acri sapore adhuc perfusum, alteri sapor gustando; ita quoque oculi postquam in flavo colore, eoque intensiori defixi fuerint, si ad alia objecta convertantur, ea cæruleo colore obducta conspiciunt. Ejusdem quoque sensationis repetita frequenter aut continuata productio facit, ut sensationis vis sensim minuat, donec amplius a permanenti statu subjecti distingui non possit. Vide dicta de sensu intimo (447, 7°).

497. Sint sensus objecto *apte applicati*. Hinc

a) Non est facile judicandum quum objectum nimis tenue est; non enim potest ut par est sensus percipere. Hinc est v. gr. quod sub luce maligna color purpureus atratus apparet.

b) Item quum magna est objecti, aut nimis parva distantia. In utroque enim casu objecti etiam proprii repræsentatio quandoque confusa exhibetur. Hinc v. gr. fit, ut sol ad instar circuli appareat, cum sit corpus sphaericum, et spatia cælestia sphaerica figura concludantur. Ex eadem causa colores corporum quandoque ad nos perveniunt ab aere refracti, imo nullo modo ad nos perveniunt, quia ab aere absorbentur: hinc v. gr. montes cærulei apparent; non suum videlicet colorem, sed aeris interjecti præferunt.

c) Pariter quum variæ ab eodem objecto provenientes sen-

sationes, celerrime se excipiunt vel lentissime. Hac de causa in rapidissimis corporum motibus, successivæ eorum positiones distinguî ab invicem nequeunt; et e contrario motus indicis in horologio non deprehenditur.

d) Quum sensus sui objecti actioni præter modum vehementi exponitur, hebetatur, læditur et ad sentiendum fit ineptus. Ita tactus magno frigore exstinguitur, oculi in sole defixi caligant, et ferventissimus liquor nullum saporis sensum ciet.

e) Habenda quoque est ratio medii, quod inter objectum et organum interjacet. Etenim ex medii natura, statu, uniformitate vel difformitate, quiete vel perturbatione, potest multimodis variari sensatio. Sic v. gr. si per vitrum viridis coloris objecta respicias, omnia viridi colore perfusa videntur, si aer sit vento commotus, soni directio et intensitas mutatur: si baculus sit ex parte in aqua demersus, fractus vel curvatus apparet.

Ex his colliges, quum insueta est phænomenorum ratio, aut quum præteritis sensationibus seu certis veritatibus contraria prodit, multiplicandas esse observationes, experimentaque diligenter instauranda, variatis, quantum res postulat, adjunctis positionis respectivæ inter oculum et objectum, distantia, medii, lucis, aliisque quæ sensationem modificare possunt et pervertere.

498. Cautiones istæ etiam quum agitur de propriis sensuum objectis, necessariae sunt. Quum vero judicandum est de sensibilibus communibus (461), notandum nos de his solere, ut plurimum, juxta oculorum nuntios judicare. Sed hæc judicia erronea esse possunt. Non enim semper hæc oculis apparent ut sunt. V. gr. corpus a nobis remotum apparet oculis sub dimensionibus vero minoribus, et cubus figuram cylindricam præfert. Hinc illusiones opticæ, de quibus non est hic disserendi locus. Has porro illusiones mens satis exercita facile corrigit, ab iisque ad vera judicia devenit. Nihilominus, quum illusio multis experimentis et perpetuis judiciis correctæ non est, sensationes plures, imo et actus quidam et motus accedant necesse est, ut illa cor-

rigatur. Nec aliter primo hasce illusiones corrigi putandum est.

499. Igitur 1^o De corporum *figura* referre non ad oculos utcumque pertinet, sed ad oculos motu mediante ad diversas objecti superficies circumductos, et cum tactus sensationibus conjunctos. Si temetipsum consulis, ita te agere reperiēs quotiescunque de his dubitas.

2^o De corporum item *magnitudine* legitimus nuntius est tactus, motu mediante et oculis dirigentibus successive applicitus. Cum enim omnis magnitudo relativa sit, non aliter magnitudines nobis extraneas explorare possumus, quam assumpta corporis nostri vel partis ejus extensione tanquam mensura; id quod demonstrant primitiva mensurarum et communissima vocabula, quæ ab aliqua humani corporis parte desumpta sunt, ut pollices, digiti, palmi, cubiti, brachia, pedes, passus. Cæteræ quidem mensuræ adhibentur, sed earum varietates ad corpus humanum tandem aliquando referuntur.

3^o Quæ de magnitudine diximus, de *distantia* quoque dicenda sunt. Distantia enim unius objecti ab alio est magnitudo spatii quod illis interjacet.

4^o Quoad *motum* adverte, nos visu solo mediante, motum percipere, non absolutum sed relativum: i. e. mutationem successivam respectivæ positionis inter oculum et objectum. Hæc autem positionis mutatio eodem modo contingit, sive oculus absolute moveatur, sive objectum. Quare de objecti motu non ex solo visu judicandum revera est, sed insuper ex tali complexu internarum externarumque sensationum, per quas certo nobis constet, nos non moveri. Quum provehimur portu, si motum navis non deprehendimus, inclinamur ad judicandum terras urbesque recedere: sed aliud est non deprehendere navis motum, aliud certo scire eam non moveri.

5^o Quod si magnitudini seu distantia æstimandæ, tactus et mensuræ adhiberi non possint, vel ad judicandum de motu nobis non constet per sensationes nos non moveri, ratio supplere sensibus debet, adjumenta conquirens, seu

scientiæ seu auctoritatis. Aliter iudicium deceptioni obnoxium est. Sic v. gr. de coelestium corporum magnitudine, distantia, motibus iudicandum est.

ARTICULUS VIII.

De peculiarium iudiciorum, quæ sensationibus innituntur, veritate.

500. PROPOSITIO III. *Sensiles repræsentationes, quantum ad propria sensuum objecta pertinet, a falsitate sunt immunes, si tamen sensus recte fuerint dispositi et convenienter adhibiti.*

Nam 1^o repræsentationes propriorum sensibilibum sunt essentialiter relativæ ad nos, videlicet sunt repræsentationes corporum, prouti hæc nos afficiunt ex naturæ instituto. In hoc enim differunt qualitates per se sensibiles a corporum affectionibus quæ sensibilia communia dicuntur, quod illæ sunt vires quædam corporum quæ sensus percellunt, istæ autem determinationes eorumdem absolutæ.

Igitur repræsentationes qualitatum per se sensibilibum veræ habendæ sunt, si per illas corporis ad nos relationes tales exhibeantur, quales natura instituit. Atqui quum sensus recte dispositi sunt ac rite adhibiti, repræsentationes huiusmodi necessario tales esse debent. Sensus enim receptam impressionem mutare non possunt; objectum pariter necessariis legibus subijcitur. Ergo.

2^o Sensus a naturæ auctore Deo hominibus tributum sunt, ut per ipsos cognoscant quæcunque de exterioribus objectis scire ipsorum refert. Patet ex eo, quod non aliter notitiam corporum acquiramus, quam per sensus.

Jam si sensus, ut ut rite dispositi recteque adhibiti, etiam circa propria objecta in erronea iudicia nos passim adducerent, essent profecto media ad præstitutum sibi finem omnino insufficientia. Repugnat autem sapientissimum ac maxime bonum naturæ auctorem media dedisse ad finem inepta. Ergo.

3^o Si sensus nobis perpetuo imponerent, ut sceptici calumpniantur, jam nullam illis fidem homines adhiberent. Errores enim inde prodeuntes, essent valde frequentes, et in

rebus magni momenti; ideoque non possent occulti manere, sed se unicuique proderent, saltem per teterrimos illos effectus, qui necessario inde consequerentur.

Atqui e contrario homines nihil videntur habere certius, quam quod sensibus suis usurpaverint. Id quod communis ac perpetua loquendi ratio manifestat: *Ego vidi, ego tetigi*; hæc sunt peremptoria certitudinis argumenta, quæ afferimus quum de his agitur. Imo tunc etiam, quum de rebus abstractis sermo est, ut maximam quæ haberi possit, certitudinis firmitatem significemus, non aliunde significandi formulas mutuamur, quam a certitudine quam sensus præbent. Hinc veritatem dicimus *evidentem, palpabilem, intuitivam* esse, *luce sua fulgere, incidere in oculos*, etc. Ergo.

501. PROPOSITIO IV. *Sensationes item nequeunt esse erroris occasio, quum debitis sub conditionibus exceptæ, corporum figuram, magnitudinem, distantiam, motum vel quietem referunt.*

Conditiones requisitæ sunt eæ, quas in præcedenti articulo exposuimus (495, seq.), quasque naturæ ipsa docente addiscimus. His autem positis conditionibus, tam certus esse debeo de figura, v. gr. vel motu corporum externorum, quam certus sum de meis sensationibus, de corporum existentia, deque existentia qualitatum per se sensibilibum. Nam quemadmodum oculi colorem referunt, ita ipsum referunt limitibus circumscriptum, qui limites et coloris, et superficiæ coloratæ figuram constituunt. Si insuper ea accedant adjuncta, quæ illusionem omnem avertant, quis dubitet apparentem figuram reali conformem esse? Idem dicatur de cæteris. Vide, an dubitare possis de figura libri quem manibus contrectas, aut de motu currus quem prætervolare tuis oculis vides.

502. PROPOSITIO V. *Certum quoque est, ex legitimo sensuum testimonio, esse in rerum natura facta quædam constantia et uniformia, quæ naturæ leges vocamus.*

Etenim eæ ipsæ sensationes, quæ corporum existentiam qualitatesque, sive immediate sive mediate sensibiles, nobis aperiunt, hæc quoque facta nobis commonstrant, v. gr. tem-

pestatum vicissitudinem, gravitatis phænomena, leges motus, etc.

505. In his omnibus notandum est, quod supra notavimus, agentes de corporum existentia (481), nimirum 1^o metaphysice certum esse, quod corpora generatim certis quibusdam qualitatibus immediate sensibilibus, affectionibusque mediate sensibilibus prædita sint. 2^o Idem dicatur de corpore quovis individuo, si constantibus atque concordibus sensationibus quædam in illo qualitates aut affectiones legitimo sensuum usu deprehendantur. At 3^o quævis peculiaris sensatio certitudinem per se gignit physicam hypotheticam. Quæ omnia ex dictis manifesta sunt.

ARTICULUS IX.

Difficultates.

504. Obj. I. Testimonio sensuum nulla fides adhibenda. Etenim

1^o Omnes ideæ, quæ juxta sensuum relationes efformantur, falsæ sunt, uti docet astronomia, physica, metaphysica.

2^o Innumeri errores a sensibus proveniunt circa figuram, magnitudinem, distantiam, motumque corporum.

3^o Sensus sæpe rem unam pro alia, quæ ipsis obversatur, percipiunt.

Resp. *Neg. ant.* Ad 1^{am} *Dist.*: Docent hæ scientiæ falsas esse ideas, quæ cum sensibili perceptione efformantur, *neg.* (380); falsa esse judicia quæ fiunt juxta sensationes, *subd.*: quum sensus ad propria objecta, ut par est, adhibentur, *neg.*; secus, *conc.*

Ad 2^{am} *Dist.*: Versantur hi errores circa propria sensuum objecta, *neg.*; circa objecta mediata, *subd.*: et proveniunt a sensibus, positis debitis conditionibus, *neg.*; iis non positis *conc.* (498, 501).

Ut jam innuimus (500), hoc est discrimen inter judicia de qualitatibus per se sensibilibus, et de cæteris affectionibus corporum, quod illæ dicuntur de objecto in se, sed relative ad nos; hæ autem de objecto in se, sed absque ulla ad nos relatione. Idcirco ad hæc judicia ponenda, plures cautiones

adhibendæ sunt, quam quum agitur de sensibilibus qualitatibus.

Ad 3^{am} *Nego* (494). Confer quæ de ideis dicta sunt in primo libro, ubi similis objecta est difficultas (386, 3^o), et applica.

505. Obj. II. Sensus, etiamsi cum debitis conditionibus adhibeantur, res non percipiunt, ut in se sunt.

Revera ipsæ sensibiles qualitates non sunt in corporibus eodem modo, ac a nobis percipiuntur.

Resp. *Dist.*: Non percipiunt essentiam intimamque naturam corporum, *conc.*; non percipiunt eorum proprietates reales, *subd.*: ut hæ proprietates sunt in illis *absolute, trans.*; ut sunt in illis *respectu nostri, nego.*

Ad probat. *dist.*: Non sunt in corporibus absolute uti a nobis percipiuntur, *trans.*; non sunt in corporibus respectu nostri, ut a nobis percipiuntur, *neg.*

Ad sensus non pertinet, quemadmodum supra dictum est (462), ut nos doceant intimam corporum constitutionem, nec quid sint in se corporum qualitates sensibiles; sed tantum quid sint relate ad nos, videlicet quam affectionem excitare in nobis ex naturæ instituto valeant. Jamvero quando de corporibus sensibiles qualitates affirmamus, nihil aliud affirmamus nisi hoc: talia corpora tali modo nos afficere; quod quidem judicium, si sensus fuerint rite dispositi et adhibiti, omnino verum est. Quid autem sint in se absolute qualitates sensibiles, id investigare ad naturalem philosophiam spectat.

506. Obj. III. De objectiva realitate nihil potest per sensationes cum certitudine decerni. Etenim

1^o Idem objectum diversa animalia diversimode afficit. Quædam enim animalia fugiunt ea quæ homines appetunt, et viceversa.

2^o Hominum quoque judicia circa corporum qualitates sunt omnino diversa: ex. gr. hoc quod uni sapit, alteri displicet, hoc delicias uni, alteri nauseam creat. Ergo etiam in hominibus diversis sensationes ab eodem objecto diversæ excitantur.

Resp. *Neg. ant.* Ad 1^m. *Trans. ant.*; *nego consequentem*. Unaquæque animantium species a sensibilibus qualitatibus, quibus afficitur, ita afficitur ut natura fert et objecti et subjecti. Hoc ratum proculdubio est: sed anne idcirco dubitandum, utrum sint in corporibus eæ qualitates quæ nos homines afficiunt, aut utrum illæ qualitates talem nobiscum relationem habeant, qualem sensationes nostræ commonstrant? Anne de figura corporum dubitandum, ac de cæteris eorum affectionibus, quæ in ipsis sunt independenter plane a modo quo nos corpora afficiunt?

Ad 2^m. *Dist. ant.* Ea diversitate, quam potest inducere varietas inclinationum, assuetudinum, præjudiciorum, *conc.*; ea diversitate, quæ repeti debeat a diversitate sensationum, *subd.*: a diversitate accidentali, *conc.*; ab essentiali, *nego*. Et juxta hanc postremam distinctionem, *dist. cons.*

Revera nunquam disputant homines, utrum saxa sint dura vel mollia, utrum ignis sit calidus necne, et de aliis hujusmodi; de quibus si judiciorum diversitas haberetur, sensationum quoque miranda profecto diversitas foret supponenda. Pariter sunt quædam quæ omnes averantur, quædam quæ omnes appetunt. Differentiæ igitur omnes judiciorum circa sensibilia eo reducuntur, ut quædam ab hoc appetenda magis existimentur, ab illo minus. Hæc autem diversitas gignitur, ut plurimum, ab indicatis causis, quæ faciunt, ut quædam sensationes alteri gratæ sint, alteri ingratae: sed præterea denotare quoque potest accidentalem quamdam organorum perfectionem in his, potius quam in illis, ac magis vel minus intensam sensibilitatem. Cæterum organorum structuram, quoad essentialia, in omnibus esse uniformem, adeoque sensationes, cæteris paribus, esse easdem, inductio et analogia, anatomicæ observationes et ipsa errorum qui in sensibus occasionem habent, uniformitas demonstrant; quod et divinæ providentiæ ratio postulabat.

507. Inst. Qui *dallionismo*, ut aiunt, obnoxii sunt, naturali quadam in coloribus percipiendis imperfectione laborant, ita ut quosdam colores distinguere non possint, ac viridem v. gr. colorem cum flavo, cæruleum cum rubeo confundant;

et nihilominus ex consuetudine cum cæteris eadem nomina usurpent. Qui igitur in hoc statu versatur, errat in judicando de corporum qualitatibus, et hic error est invincibilis.

Resp. 1^o ad factum quod opponitur. Animadverto eos, qui in tali statu versantur, naturali quodam sensuum vitio laborare, ut in confesso est; ex quo sequitur factum ipsum a disputationis hujus ambitu excludi (495, 500).

Resp. 2^o ad id quod ex facto colligitur.

Dist. 1^m partem.: Qui in hoc statu versatur, errat in judicando de corporum qualitatibus, ut sunt respectu sui, *nego*; ut sunt respectu cæterorum, *subd.*: ex prava sensuum dispositione, *conc.*; secus, *nego*.

Dist. 2^m partem.: Hic error est invincibilis attendenti ad proprias sensationes et ad aliorum dicta, *nego*; secus *trans.* (1).

CAPUT IV.

DE IDEARUM OBJECTIVA REALITATE.

ARTICULUS I.

* *Objectiva idearum realitas asseritur.*

508. Intellectus in ideas quas interno externoque sensu mediante hausit, sive ipse sibi ex his efformavit, reflexione revertens novas ex iis veritates elicit, tum immediate, tum mediate (441, 3^o). De his in præsentī agendum est. Ante tamen quam de his agamus, duæ quæstiones occurrunt, eæque gravissimæ: prima est de idearum objectiva realitate: secunda de idearum universalium objecto; quarum prima a transcendentali præsertim criticismo excitata est, altera ab antiquissimis usque temporibus copiosam philosophis disputandi segetem semper præbuit; utraque vero ad hanc logicæ partem spectat; utraque enim circa ipsa cognitionum fundamenta versatur.

509. Vix est cur moneamus, quæstionem hanc longe differre ab ea, quam de idearum veritate in superiori libro

(1) Quæcunque de dallionismo, quem alii *chromato pseudopsiam* (colorum falsam visionem) vocant, digniora scitu sunt, invenies in opere CL. D. Moigno, quod ita inscribitur: *Répertoire d'Optique moderne*. Paris, 1818. Deuxième partie, sect. VII. pag. 625 seq.

Resp. *Neg. ant.* Ad 1^m. *Trans. ant.*; *nego consequentiam*. Unaquæque animantium species a sensibilibus qualitatibus, quibus afficitur, ita afficitur ut natura fert et objecti et subjecti. Hoc raturum proculdubio est: sed anne idcirco dubitandum, utrum sint in corporibus eæ qualitates quæ nos homines afficiunt, aut utrum illæ qualitates talem nobiscum relationem habeant, qualem sensationes nostræ commonstrant? Anne de figura corporum dubitandum, ac de cæteris eorum affectionibus, quæ in ipsis sunt independentem plane a modo quo nos corpora afficiunt?

Ad 2^m. *Dist. ant.* Ea diversitate, quam potest inducere varietas inclinationum, assuetudinum, præjudiciorum, *conc.*; ea diversitate, quæ repeti debeat a diversitate sensationum, *subd.*: a diversitate accidentali, *conc.*; ab essentiali, *nego*. Et juxta hanc postremam distinctionem, *dist. cons.*

Revera nunquam disputant homines, utrum saxa sint dura vel mollia, utrum ignis sit calidus necne, et de aliis hujusmodi; de quibus si judiciorum diversitas haberetur, sensationum quoque miranda profecto diversitas foret supponenda. Pariter sunt quædam quæ omnes averantur, quædam circa sensibilia eo reducuntur, ut quædam ab hoc appetenda magis existimentur, ab illo minus. Hæc autem diversitas gignitur, ut plurimum, ab indicatis causis, quæ faciunt, ut quædam sensationes alteri gratæ sint, alteri ingratae: sed præterea denotare quoque potest accidentalem quandam organorum perfectionem in his, potius quam in illis, ac magis vel minus intensam sensibilitatem. Cæterum organorum structuram, quoad essentialia, in omnibus esse uniformem, adeoque sensationes, cæteris paribus, esse easdem, inductio et analogia, anatomicae observationes et ipsa errorum qui in sensibus occasionem habent, uniformitas demonstrant; quod et divinæ providentiæ ratio postulabat.

507. Inst. Qui *daltonismo*, ut aiunt, obnoxii sunt, naturali quadam in coloribus percipiendis imperfectione laborant, ita ut quosdam colores distinguere non possint, ac viridem v. gr. colorem cum flavo, caeruleum cum rubeo confundant;

et nihilominus ex consuetudine cum cæteris eadem nomina usurpent. Qui igitur in hoc statu versatur, errat in judicando de corporum qualitatibus, et hic error est invincibilis.

✓ Resp. 1^o ad factum quod opponitur. Animadverto eos, qui in tali statu versantur, naturali quodam sensuum vitio laborare, ut in confesso est; ex quo sequitur factum ipsum a disputationis hujus ambitu excludi (495, 500).

Resp. 2^o ad id quod ex facto colligitur.

Dist. 1^m partem.: Qui in hoc statu versatur, errat in judicando de corporum qualitatibus, ut sunt respectu sui, *nego*; ut sunt respectu cæterorum, *subd.*: ex prava sensuum dispositione, *conc.*; secus, *nego*.

Dist. 2^m partem.: Hic error est invincibilis attendenti ad proprias sensationes et ad aliorum dicta, *nego*; secus *trans.* (1).

CAPUT IV.

DE IDEARUM OBJECTIVA REALITATE.

ARTICULUS I.

* *Objectiva idearum realitas asseritur.*

508. Intellectus in ideas quas interno externoque sensu mediante hausit, sive ipse sibi ex his efformavit, reflexione revertens novas ex iis veritates elicit, tum immediate, tum mediate (441, 5^o). De his in præsentī agendum est. Ante tamen quam de his agamus, duæ quæstiones occurrunt, eæque gravissimæ: prima est de idearum objectiva realitate: secunda de idearum universalium objecto; quarum prima a transcendentali præsertim criticismo excitata est, altera ab antiquissimis usque temporibus copiosam philosophis disputandi segetem semper præbuit; utraque vero ad hanc logicæ partem spectat; utraque enim circa ipsa cognitionum fundamenta versatur.

509. Vix est cur moneamus, quæstionem hanc longe differre ab ea, quam de idearum veritate in superiori libro

(1) Quæcunque de daltonismo, quem alii *chromato pseudopsiam* (colorum falsam visionem) vocant, digniora scitu sunt, invenies in opere CL. D. Moigno, quod ita inscribitur: *Répertoire d'Optique moderne*. Paris, 1848. Deuxième partie, sect. VII. pag. 623 seq.

instituiamus (378). Ibi enim suppositis iis de quibus communis sensus dubitare nefas ducit, videlicet hominis mentem aptam esse veritati assequendæ, cognitiones autem nostras modo veras esse modo falsas, negavimus ideis ex se inesse falsitatem posse. Nunc autem ipsa illa suppositio, utrum mens sit apta veris ideis assequendis, quæ a scepticis vere transcendentalibus impetitur, tuenda est.

Quærunt itaque illi, num constet ideas esse objectorum realium repræsentativas; nec de ideis modo generum et specierum hoc quærunt: sed et de aliis maxime communibus *ens, unum, plura, totum, pars, possibile, impossibile, substantia, accidens, causa, effectus, etc.* imo de his maxime. Habentne ideæ istæ objectivum valorem, an vero subjectivæ tantum conceptiones sunt, ac typi quidam in intellectu existentes, intra quos ipse format ac fingit objecta? Quæstio est igitur, utrum id omne quod in ideis, præsertim in hisce primitivis et communioribus, continetur expressum, sit extra mentem in iis rebus ad quas huiusmodi ideæ referendæ sunt: v. gr. an illa res quam necesse mihi est existimare ac dicere substantiam, habeat revera in seipsa id quod in hac idea mens exprimit, an secus.

510. PROPOSITIO I. *Veritas est indemonstrabilis, eademque demonstratione non egens, ideis objectivam realitatem exhiberi.*

Huc faciunt quæcunque dicta sunt in primo libro (425, seq.) de rationis aptitudine ad veritatem assequendam. Si enim ideis quibus humana mens res in seipsa exprimit, objectivas earum rationes nullatenus sibi repræsentat, profecto mens assequendæ veritati est prorsus inepta. In nulla enim re ipsa erit objectis conformis. Quemadmodum itaque mentis aptitudo ad veritatem assequendam indemonstrabilis est, ac demonstratione non egens, ita quoque objectivus idearum valor.

Prob. 1^a pars. Quodcunque medium assumas ad hanc veritatem demonstrandam, hoc erit aliqua idea. Vel ergo huic ideæ objectivum valorem tribuis, vel detrahis. Si primum, supponis quod probare contendis; si alterum, nihil profecto concludes.

Prob. 2^a pars. Animadverte totam hanc quæstionem reduci ad realitatem primæ ideæ, quæ idea *entis* est. Nam ex idea entis formantur prima principia: ex primis autem principiis, accedente experientia, idearum quæ deinde seu acquiruntur, seu efformantur, objectiva realitas vel immediate consequitur, vel saltem demonstrari potest; ut ex. gr. jam factum est de corporum ideis (469, seq.).

Hoc posito, assertio hæc: *ideis respondet objectiva realitas* redit ad hanc: *ideæ entis respondet objectiva realitas*. Nempe aliis verbis: *in rebus quæ sunt mentis objectum, est ratio entis*, seu brevius: *res quæ est mentis objectum est aliquod ens*. Duram sane enuntiationem, et quam humana mens sine exquisitarum demonstrationum adminiculis concoquere non possit! Quid est enim ratio entis, nisi esse rem et objectum?

311. PROPOSITIO II. *Qui de objectivo idearum valore dubitare posset, is de primis principiis, deque ipsis internis factis dubitare consequenter deberet, imo nec iudicium ullum ponere, nec ratiocinari posset.*

1^o *Dubitare deberet de primis principiis*. Etenim prima principia, ut quæ analytica sunt (146, a), ex quarumdam idearum consideratione efflorescunt. Si ergo ideæ objectivo valore destitutæ sunt, hæc quoque principia inania sunt, nec per ea possumus quidquam de objectis decernere.

2^o *De internis factis*. Nam certitudo de internis factis est in intellectu ea percipiente per reflexionem, qua ideam ipsorum acquirit. Igitur si dubium est, an ideæ objectivam realitatem offerant, dubium quoque erit, an facta interna se habeant ut percipiuntur. Ipsa idea proprii subjecti (non ego) erit fortasse inanis fictio; adeoque et de propria existentia erit dubitandum.

3^o *Non posset ullum iudicium ponere*. Etenim in omni iudicio affirmatur, objectum aliquod ita se habere, ut idea prædicati exprimitur (374). Hoc autem affirmare nequit, qui de idearum veritate dubitat.

4^o *Neque posset ratiocinari*. Ratiocinium enim iudiciis quibusdam continetur et primis principiis innititur.

§12. PROPOSITIO III. *Objectivus idearum valor negatione ipsa vel dubitatione affirmatur.*

Affirmatur negatione. Qui enim negat idearum naturam hanc esse, ut sint repræsentativæ objectorum, affirmat hanc ideam quam habet de idea, ut nimirum sit mera forma subjectiva et non repræsentativa objecti, ipsi ideæ esse conformem.

Affirmatur dubitatione. Qui enim sic dubitat, supponit saltem ideis *ideæ, objecti, conformitatis, diversitatis, dubitationis, subjecti dubitantis*, respondere reale objectum. Quæ nisi supponat, de quo tandem dubitat?

§13. Ex his omnibus concludendum est

1° Primitivæ veritatis loco habendum, quod ideæ sint objectorum realium repræsentativæ.

2° Dubium universale de hæc veritate non physice modo, sed etiam metaphysice esse impossibile (§12).

3° Si quis in hanc dubitationem sibi concedendum putaret, eum neque posse judicare quod sit dubitandum, neque dubitationem suam suadere ratiocinando posse. Sub hac enim dubitatione, iudicium omne ac ratiocinium ineptum est ac ridiculum.

§14. At enim, ita opponunt sceptici veteres, non potest cognosci, an ideæ sint objectis similes, nisi objecta in seipsis cognoscantur; atqui objecta in seipsis non percipimus, sed tantum ipsorum ideas.

Respondeo falsum esse quod in minori assumitur. Intellectus enim, quum percipiendi actum exercet, non objecti ideam, sed ipsum objectum percipit. Ad actum namque perceptionis determinatur ab ipso objecto, quum per sensum fit illi præsens (21). Idea vero non est id quod intelligit mens percipiens, sed id quod in se exprimit, quum intelligit. In eo enim quod objectum mens intelligit ejus in se similitudinem exprimit; et hæc similitudo est idea.

Ad cognoscendam autem idearum cum objectis similitudinem hoc sufficit, ut diximus (§10), ut ponas entis rationem quam in objecto percipis, esse in objecto, nimirum objectum menti oblatum esse aliquod ens.

ARTICULUS II.

* *Kantii systema exponitur.*

§15. Emmanuel Kantius Regiomontii (Kœnigsberg) in Borussia superiori sæculo natus, ut cognitionum nostrarum fundamenta in apertum produceret, universam cognoscendi facultatem ad examen, ut ipse dicit *transcendentale* sibi revocandam putavit; id quod præstitit in opere cui titulus: *Critica rationis puræ*. Hujus criticæ hic est processus.

1° Non omnia judicia synthetica sunt a posteriori, videlicet ab experientia; sed quædam judicia sunt simul *synthetica* et *a priori*; synthetica, quia in his prædicatum non educitur ex notione subjecti, sed extra ipsum assumitur; a priori, quia necessario, independenter a quacunque experientia, ac per anticipationem quamdam prædicatum subjecto conjungitur. Affirmat consequenter, problema universale quo continetur critica rationis puræ, hoc esse: *quomodo sint possible judicia synthetica a priori*.

2° Horum iudiciorum elementa non omnino ab objecto dantur, i. e. ab experientia: necessitas enim et universalitas absoluta, quæ illis inest, ab experientia provenire non potest. Ergo saltem ex parte a subjecto proveniunt. Itaque cognitiones nostræ duplici constant elemento, *objectivo* et *subjectivo, materia* et *forma*. Critica rationis puræ in hoc tota versari debet, ut elementa subjectiva cognitionum determinet. In hunc finem Kantius hoc principium constituit: Quidquid in nostris cognitionibus necessarium est, invariabile et universale, id totum est a priori et subjectivum; quidquid vero accidentale, variabile, contingens est, ab experientia est et objectivum.

3° Cum tota cognoscendi facultas contineatur sentiendi facultate, intellectu, ratione, in sentiendi facultate duplex hoc elementum est primo quærendum.

Repræsentationes quas sentiendi vis exhibet, vocantur a Kantio *intuitiones* seu *visiones empiricæ* quoad subjectum, et *phænomena* i. e. *apparentiæ* quoad objectum.

In his elementum objectivum et materiale est impressio.

ab objecto proveniens, elementum subjectivum et formale sunt duæ formæ nativæ ipsius facultatis (*visiones puræ*), secundum quas ipsa recipit quicquid recipit, *spatium* nempe et *tempus*. His formis impressiones receptas subjectum convolvit et convestit, ac visionem empiricam format; plane ut sigillum ceram format cui imprimitur. Spatium purum et indefinitum forma est sensibilitatis externæ, tempus purum et indefinitum forma sensibilitatis internæ, eaque mediante etiam externæ.

4° Sentiendi facultas ad hanc unam functionem idonea est, ut impressiones receptas in visionem puram spatii indefiniti conjiciat, ac successione notet. At phænomena ita formata, dispersa cum sint ac successiva, unum conceptum nondum constituunt. Ad hoc intellectus activitas accedat necesse est. Intellectus enim est facultas, quæ visiones empiricas ad spatium ac tempus definitum determinans, in unum conceptum conjungit, atque hoc pacto diversa format objecta. Hæc porro conjunctio fit per judicium.

5° Conceptus quoque quos format intellectus, sua constant materia suaque forma. Materia sunt intuitiones empiricæ, forma sunt *conceptus* quidam *puri* planeque subjectivi, ut qui universalitatis ac necessitatis characteribus distinguuntur. Vocantur a Kantio *categoriæ*, ac sunt modi diversi unitatis syntheticæ, ad quam visiones empiricæ per judicium revocantur.

6° Quæcunque sit judiciorum materia, omne judicium, juxta necessarias nostræ intelligentiæ leges, secundum quatuor modos exigitur, qui sunt *quantitatis*, *qualitatis*, *relationis*, *modalitatis*.

Quoad quantitatem, omne judicium vel est *singulare* vel *particulare* vel *universale*.

Quoad qualitatem, vel est *affirmans* vel *negans*, vel *indefinitum*.

Quoad relationem, vel est *categoricum* vel *conditionale* vel *disjunctivum*.

Quoad modalitatem, vel est *problematicum* vel simpliciter *assertorium* vel *necessarium*.

Ex diversis hisce judicandi formis duodecim existunt categoriæ.

Quantitatis : *unitas*, *pluralitas*, *totalitas*.

Qualitatis : *realitas*, *negatio*, *limitatio*.

Relationis : *substantia* et *accidens*, *causa* et *effectus*, *actio* *mutua*.

Modalitatis : *possibilitas* et *impossibilitas*, *existentia* et *non existentia*, *necessitas* et *contingentia*.

Hæ sunt ideæ puræ ac primitivæ intellectus, quæ nullum per se valorem objectivum habent, non enim exhibent objectorum conditiones, sed sunt leges intelligentiæ, ac subjectivæ formæ, quibus nos ipsi objecta formamus.

7° Duo supersunt determinanda : primo quodnam sit centrum synthesis intellectualis, et nucleus ille ad quem visionum empiricarum multiplicitas confluit, et in quo visiones istiusmodi per categorias ad unitatem syntheticam revocantur : secundo quo ordine hæc synthesis fiat, construanturque conceptus.

a) Centrum intellectualis synthesis est *apperceptio* hæc *pura* et *originaria* : *ego cogito*, quæ una cum sit, omnem empiricam intuitionem comitatur.

Ex hac ergo multiplicitas intuitionum unitatis exordia mutuatur; quæ unitas vocatur a Kantio *transcendentalis unitas conscientiæ* : eaque fundamentum est unitatis syntheticæ, quæ per categorias inducitur.

b) Hoc autem ordine fit synthesis ista, si Kantium audias. Ante omnia mens conjungit formas puras sensibilitatis, visiones videlicet puras spatii et temporis, cum categoriis intellectus, et sic efformat *schemata* seu typos quosdam primitivos, in quibus categoriæ figuram sensibilem adipiscuntur. V. gr. *numerus* est schema ex visione pura temporis et categoriis quantitatis. Quum schema majorem aliquam determinationem accipit, transit in *imaginem*; v. gr. *duo* est imago, quæ fit e schemate numeri, Tandem quum his accedunt sensationes, conjungit eas intellectus cum imaginibus, atque hoc pacto *conceptus* format.

8° Denique *ratio*, quæ suprema facultas est, ope ratiocinii

categorici, hypothetici et disjunctivi ad tres ideas supremas atque absolutas pervenit, quæ sunt idea *psychologica* absoluti subjecti (*ego*); idea *cosmologica* absolutæ totalitatis (*mundus*); idea *theologica* absolutæ causæ (*Deus*). Quæ ideæ proveniunt ex necessitate quadam ac lege rationis, et cum ex elementis mere subjectivis educantur, nihil exhibent quod sit objectivum.

9^o Ex his sequitur, non posse nos nisi objecta sensibilia cognoscere. Hæc autem nullo pacto cognoscimus ut sunt in se, sed solum intuemur eorum phænomena, quæ nos ipsi formis subjectivis sensibilitatis et intellectus ad modulum nostrum effingimus. Objecta ut sunt in se, vocantur a Kantio *noumena*, suntque penitus incognita.

10^o Judicia synthetica a priori valorem objectivum non habent; adeoque metaphysica et mathesis pura, quæ his judiciis constant, non sunt scientiæ objective reales: physica vero circa rerum apparentias tota versatur, et quidem ita, ut natura visibilis a sensibilitate et intellectu construatur.

Hæc est kantiana de ideis theoria, quæ fere omnes, quæ circa humanam cognitionem retro fuerunt, erroneas doctrinas, licet oppositas, in unum colligit, ac monstruosa quadam harmonia componit. Eminent nihilominus idealismus et scepticismus, sub quo latent nullismus et pantheismus, quæ duo portenta Kantii discipuli, Fichte, Schelling, Hegel alique brevi in apertum protulere.

ARTICULUS III.

* Kantii systema refutatur.

§16. Necessarium in præsentī non est, ut quæcunque in hoc systemate falsa sunt, singillatim persequamur. Post ea quæ nuper dicta sunt (§10, seq.), sufficiet absurditates ejus proprias breviter enumerare. Itaque

1^o Absurdum plane est ipsum criticæ rationis instituendæ consilium. Quo enim medio, qua facultate se supra rationem elevabit, atque hoc negotium expediet criticus iste? Sane ratione. Nempe dum dubitat, imo dum negat rationem aptam esse veritati assequendæ, non aliter quam rationis testimonio

probare intendit eorum quæ dicit veritatem; ipsamque cognitionis possibilitatem exterminare se putat, quia *cognovit* cognitionem esse impossibilem. Incidit ergo in apertam illam contradictionem, quæ omni scepticismo intima est atque essentialis (421, 1^o).

2^o Contradictio hæc ulterius apparebit, si scopum, quem Kantius attigisse se arbitratur, cum ultima ejus conclusione simul committas. Kantii scopus hic est, ut determinet quomodo humanæ mentis cognitio constituatur; cognoscere nimirum vult cujusmodi sit in seipsa cognoscendi facultas. Et hanc putat se cognovisse: cognitionum enim nostrarum fontes, elementa, limites ac seriem totam demonstrat. Ergo cognoscit aliquid ut est in se, cognoscit facultatem cognoscendi *noumenon*.

Sed hinc deducit nihil nos, ut est in se, cognoscere posse, et a cognitione ad *noumena* nullum esse legitimum transitum. Quis non videat in processu isto alteram illam scepticorum contradictionem: certum est nihil certe cognosci (421, 2^o; §12)?

Nec dicant Kantiani cognoscendi facultatem, quam Kantius describit, esse facultatem pure phænomenicam, non vero noumenon. Si enim hoc dicunt, confutabuntur eodem modo ac pyrrhonistæ (428); ac præterea si ipsi criticismi fautores non alio modo possunt hanc doctrinam tueri, nisi confessione falsitatis quæ illi inest, dabunt, opinor, nobis ut illam impune rejiciamus.

3^o Tollit Kantius omnem objectivam realitatem, non modo eorum quæ sensibilem ordinem excedunt, sed eorum quoque quæ in sensibili ordine continentur. Quid enim de his percipimus? Phænomena; nempe objectorum impressiones. Ipsum *ego* est ego phænomenicum. Cæterum num his phænomenis aliqua realitas respondeat, quis definiat? Admittit quidem Kantius realitatem objectivam quæ in nos agit; et hæc objecta realia vocat *noumena*. Sed quum noumena isthæc admittit, iterum sibi contradicit; si enim suis stet principiis, ea nullo pacto potest admittere. Etenim

a) Ea non cognoscit a priori, quia juxta ipsum nulla reali-

tas a priori cognoscitur: non a *posteriori*, quia noumenasunt plane extra definitos experientiæ limites.

b) Præterea noumeni generalis notio quam Kantius habet, vel categoriis intellectus constat, vel secus. Si primum, est notio mere subjectiva, nec jus præbet ut objectum ipsi respondens extra mentem esse putemus; si alterum, quomodo poterit noumeni conceptum Kantius habere? Siquidem categoriis exclusis, noumenon non est aliquid *reale*, non est *existens*, non est *possibile*, non est *necessarium* nec *contingens*, non est *unum* nec *plura*, non est *substantia* nec *accidens*, non est *causa* nec *effectus*, hæc enim omnia ad categorias pertinent. Edisserant igitur Kantiani quid concipiunt quum noumenon concipiunt. Profecto, quum Kantius dixit noumenon esse incognitam quamdam X, melius dixisset, si dixisset noumeni conceptum juxta sua principia esse conceptum=0, id est nullum conceptum.

4^o Admissis etiam omnibus quæ Kantius assumit, cognitio humana non explicatur, imo evadit inexplicabilis. Copulatio enim illa empiricarum visionum, quæ fit per categorias intellectus, est subjectiva, et a priori. Ergo juxta Kantii doctrinam necessaria; omne enim quod a subjecto est, auctore Kantio necessarium est. Imo fatetur ipse, phænomena perse accidentaliter conjuncta esse, et non repræsentari ut necessario connexa, nisi per formas subjectivas (1). Omitto id quod hæc audienti sponte occurrit, videlicet cognitiones omnes, si ita se habeant, falsas esse: quod enim accidentale est, ut necessarium exhibent. Sed certe restat Kantio explicandum, quare hæc connexio necessaria, quæ a subjecto prodit, non eodem semper modo prodeat. Quare conceptus effingimus modo his; modo illis formis? Quare v. gr. eorum quæ me modificant alterum ut unum, alterum ut plura, alterum ut causam, alterum ut effectum concipio? Quid est quod hanc diversitatem in rebus concipiendis inducit? Profecto, si hujus diversitatis ratio in objecto non ponitur, nulla.

(1) *Critica rationis puræ*. Analyt. transcend., lib. II, c. II. Analogiæ experientie.

ratione explicari illa potest. At, si ratio hæc in objecto ponitur, kantianæ omnes theoriæ evanescent.

5^o Postremo fundamentum illud, cui omnes hæ theoriæ superstruuntur, esse nempe judicia *synthetica a priori*, est plane commentitium, ac facile evertitur. Etenim omnia judicia synthetica sunt a posteriori, et omnia judicia a priori analytica sunt. Mens enim per se non judicat, nec judicare potest, nisi subjecti ac prædicati identitatem vel diversitatem objectivam percipiat (147). At in judiciis syntheticis a priori mens nullo modo identitatem hanc vel diversitatem percipit. Non enim potest aliunde mens illam assequi, quam vel ex ipsarum consideratione idearum, qua intelligat eas idem objectum repræsentare, vel ex consideratione objecti, qua intelligat illud binis ideis repræsentari (146, 1^o). Sed primo modo judicium ponitur a priori et analyticum, altero modo syntheticum et a posteriori. Ergo repugnat humanæ mentis indoli, ut per se ad judicia synthetica simul et a priori deveniat. Dico per se; potest enim temeritate voluntatis induci mens ad judicandum sine ratione. Solum ergo in judiciis temerariis judicia synthetica a priori Kantius poteritprehendere.

547. Exempla vero quæ ipsa affert, propositum non demonstrant.

Affert enim 1^o principium causalitatis: *quidquid fit, sui causam habet*. Sed hoc esse analyticum alias probabitur.

2^o *In mutationibus corporeis nulla perit materiæ quantitas*. Et hoc analyticum est; educitur enim ex mutationis conceptu. Mutatio enim non est annihilatio, quia cum a viribus finitis procedat, effectum qui potentiam infinitam requirit, includere nequit.

3^o *In motus communicatione semper actioni æqualis est reactio*. Hoc est syntheticum et a posteriori, nempe ab experientia et inductione, quamvis nonnulli contendunt esse quoque analyticum. De hoc quoque alio in loco.

4^o *Mundus initium habuit*. Analyticum est, uti suo loco demonstrabitur.

5^o Additiones omnes arithmeticarum, v. gr. $7 + 5 = 12$:

quo in exemplo maxime insistit. Aitque hoc iudicium necessarium esse, adeoque a priori; at simul syntheticum, non analyticum; quia in conceptu $7 + 5$ non est conceptus numeri 12, sed numerando digitis, nimirum per visionem quamdam, deprehenditur.

At in primis petimus a Kantio, an propositio hæc: $12 = 7 + 5$, sit analytica, nec ne. Certe in hac prædicatum ex resolutione subjecti eruitur. Est ergo propositio analytica. Ergo conceptus 12 identicus est cum conceptu $7 + 5$; adeoque propositio inversa $7 + 5 = 12$ et ipsa analytica est.

Animadvertimus deinde propositionem banc analyticam esse, quia obtinetur per successivas substitutiones definiti loco definitionis.

Etenim $7 + 5 = 7 + 1 + 1 + 1 + 1 + 1$.

Jam $7 + 1$ est definitio numeri 8. Igitur in æquatione præcedenti definitum definitioni substituo: dein iterum adverto: $8 + 1 = 9$, iterumque definitioni substituens definitum prosequor dicens $7 + 5 = 9 + 1 + 1 + 1 = 10 + 1 + 1 = 11 + 1 = 12$. Hæc porro iudicia omnia analytica manifeste sunt. Ergo iudicium: $7 + 5 = 12$, quod ex his deducitur, analyticum est.

Quod vero digitorum adjumento utimur, id primo non fit quando numeri satis magni supputandi sunt; deinde adjumento hoc utimur, non ut iudicii veritatem percipiamus, sed ut memoriæ consulamus, ideamque clariores e sensili intuitionem evocemus.

6^a Affert postremo loco exemplum hoc a geometria: *linea recta est omnium brevissima, quæ inter duo data puncta duci possit*; quod dicit analyticum non esse, quia in rectæ notionis notio brevissimæ non continetur. Sed animadvertere poterat vir subtilis, iudicium hoc esse comparativum, adeoque prædicatum non tribui rectæ simpliciter, sed rectæ comparatæ cum curvæ. Utique in conceptu rectæ absolute consideratæ, nec brevioris, nec longioris notio locum habet; sed quum primum recta curvæ comparatur, illico curvæ supra rectam excessus in ipso curvæ ac rectæ conceptu de-

prehenditur. Ergo iudicium allatum est prorsus analyticum.

CAPUT V.

DE IDEARUM UNIVERSALIUM OBJECTO.

ARTICULUS I.

* *Quæstionis status proponitur.*

§18. Hæc quoque quæstio, quum de cognitionum nostrarum fundamentis agitur, præcipua est et momenti maximi. Scientiæ enim omnes propria objecta in universalibus suis rationibus tantummodo persequuntur, ut alibi diximus (§18). Si igitur universales rerum rationes nullæ sunt, si universalibus vocibus nulla idea, aut arbitrarius tantum conceptus respondet, jam scientiæ omnes inania mentis commenta aut verborum lusus existimandæ forent. Si vero universalia dicuntur esse realia, non minori premimur difficultate, in explicando quomodo possit unum in pluribus realiter esse. Universale siquidem est unum in pluribus. Hinc mirandum non est, quæstionem hanc philosophorum semper animos pulsasse, eosque solvendæ quæstionis sollicitos, in varias sententias, atque adeo in errores oppositos distraxisse.

§19. Et veterum quidem græcorum tres hac in re inveniuntur sententiæ. 1^a Heracliti Ephesii ejusque discipuli Cratyli, qui teste Platone (1) et Aristotele (2), nihil esse in rebus universale statuerunt; quibus deinde accesserunt Epicurus cum suis, negantes ex hoc ullam de rebus scientiam haberi.

2^a Zenonis et stoicorum, qui ideas admittebant universales, quibus singularia multa confuse repræsentarentur, at esse extra mentem aliquid universale negabant.

3^a Quæ ponit universalis esse, sed per se ac separata ab individuis. Sententia hæc ab Aristotele Platoni tribuitur, sed tribuenda potius est Xenocrati, aliisque ejus ætatis philosophis, qui nobilem illam Platonis de ideis Dei exemplaribus theoriam perperam intellexerunt.

(1) In Theæteto.

(2) Met. IV, c. 5.

4^o Est Aristotelis, quæ docet universale ipsis rebus inesse. Opiniones omnes veterum de universalibus his verbis colligit Porphyrius. « Genera et species an in rerum natura sint, an » in solis nudisque conceptibus collocentur; et utrum corporea sint, an corporis expertia; et utrum separata sint, » an in ipsis sensibilibus et circa hæc consistentia, dicere » nunc omittam (1). »

520. In media ætate, statim ac instaurari scientiæ ac reviviscere cœperunt, quæstio hæc iterum exarsit, eademque fere opinionum varietas, quibus antiquitas divisa fuit, duas inter se factiones opposuit, *nominales* et *reales*. Nominalium alii, duce Joanne Roscellino, (A. C. 1089) contendebant, universalis nec esse ullo modo in rebus, nec concipi; genera ac species conceptus esse collectivos, universalis vero vocabula individuorum collectiones indefinite et confuse significare, ac si quid præterea dicere viderentur, in eo meras voces esse (*flatum vocis*). Alii vero nominalium, Abaelardi sententiam secuti, existimabant non voces solum univarsales, sed et conceptus haberi; qui tamen conceptus mere subjectivi essent ac mentis fœtus, exhibentes *convenientiam* quamdam rerum secundum idem, ita tamen ut et *convenientia* hæc, et hoc ipsum idem in quo conveniunt, non sit *res*, sed solum mentis consideratio (2). Hujus sententiæ sectatores nuncupati sunt *conceptuales*.

Nominalium sectam iterum suscitavit sæc. XIV Guillelmus Ockam, qui conceptualium sententiam acriter defendit; eaque nunquam posthac penitus extincta est, donec sæc. XVIII Hobbes, Humius, nec non Smith en Dugald Stewart cum schola scotica prope universa, Condillac item et sensiti omnes ad Roscellini fere opinionem regressi sunt. Ex kantiani porro systematis expositione facile comperies, illud nihil esse aliud, quam conceptualismum exaggeratum.

521. *Reales* hoc nomine distincti fuerunt, quod universalis realia constituerent. Horum alii *orthodoxi*, alii *heterodoxi*

(1) In Præfat. ad Chrysoar.

(2) V. opus cui titulus: *Aristotele esposto ed esaminato da Antonio Rosmini-Serbatì*. § XV, in notis.

fuere. Heterodoxi docebant, genera et species esse extra individua, atque in divina natura realiter contineri; ex quo concludebant, divinam naturam esse omnium rerum essentiam realem. Hic error, qui vix est aliud quam purus putusque pantheismus, auctorem habuit sæc. IX Joannem Scotum Erigenam (Hibernum), quem sæc. XII-XIII sectati sunt Almaricus de Bène (Amaury de Chartres), et David de Dinant, ecclesiastica sententia damnati.

Orthodoxi quoque in diversas abiere sententias, quarum hæ duæ præcipuæ. Altera auctore Guillelmo Campellensi (de Champeaux), contendebat genera et species esse ipsam essentiam individuorum realiter ipsis communem, atque adeo individua solis accidentibus distingui. Ab hac vix differt Joannis Duns scoti, seu potius scotistarum quorundam doctrina statuentium, universalem essentiam in individuis existentem, suam in ipsis universalitatem vere ac realiter retinere.

Altera sententia, in quam ss. Thomas et Bonaventura, et doctorum pars maxima concessere, docet esse quidem in rebus naturam quæ in idea universali concipitur, sed non eodem modo ac concipitur, id quod infra explicabitur.

522. Nos in his sententiis expendendis, omissis quæ alterius sunt loci, hunc ordinem tenebimus: 1^o nominales puros refutabimus; 2^o conceptuales; 3^o pseudo platonicos; 4^o realistarum excessus; ac demum 5^o veram sententiam exponemus.

ARTICULUS II.

Nominales puri confutantur.

523. Roscellini error, ac recentiorum nominalium omnium, huc redit: vocabula quidem esse communia, ideas autem universales nullas esse (520). Sit igitur

PROPOSITIO I. *Habet humana mens ideas universales.*

Etenim 1^o Si nullæ essent ideæ universales, termini communes nullas significarent ideas. Sed hoc est contra conscientiae testimonium. Ergo.

Prob. maj. Termini communes non significant unum aut

alterum individuum cogitatum, ut patet. Sed neque ideam collectionis exprimunt. Nam

a) Nomina, quæ ideam collectionis significant, v. gr. *familia, populus, mille*, cum de singulis dici non possint, de pluribus copulativim dicuntur. At nomina communia, ut *homo, animal, planta*, dicuntur e contrario de singulis, non vero de pluribus copulativim (34).

b) Idea collectiva pendet a multitudinis cognitione, et mutatur aucta vel imminuta collectione, quemadmodum idea numeri, quibusdam unitatibus auctis vel demptis. Sed idea subjecta termino communi eadem est, sive uni tantum applicetur individuo, sive pluribus applicari posse intelligatur. Restat ergo, ut termini communes exprimant conceptum exhibentem aliquid pluribus individuis commune. Si hunc non exprimunt, nulla plane est idea, quam significare possint.

Prob. min. Terminus communis, quum voce profertur, plane ut quivis alius terminus, duos in mente excitat conceptus, quarum alter est soni materialis, alter est significationis illi subjectæ, rei nimirum a loquente cogitatæ. Patet ex intimo sensu, ac præterea ex eo quod, quum quis audientibus nobis terminos communes lingua profert ignota, sonum quidem materialem excipimus, at aliquid aliud percipere desideramus quod nos latet. Quid est autem hoc aliud, nisi id quod alter cogitat ac significare vult?

324. Animadvertite porro, omnia fere vocabula, quibus homines utuntur, si nomina individuorum propria excipias, omnia, inquam, tum nomina, tum verba, tum cætera orationis elementa vocabula esse communia. Quin ipsa individuorum nomina sæpenumero ab initio communia fuisse; v. gr. *Cicero, Lentulus, Piso, Augustus, Dominicus, Franciscus*, et alia innumera. Adde ipsa nomina collectiva communia fieri (34). Si ergo nullæ sunt ideæ universales, omnia fere vocabula soni inanes essent (status vocis), atque omni prorsus significatione destituti. Qua re quid magis incredibile aut absonum dici possit, equidem non video.

325. 2^o Hinc argumentum urgens dico: si nullæ essent

ideæ universales, nulla essent vocabula communia. Etenim vocabula in hunc solummodo finem usurpantur, ut res cogitatæ significentur; sunt enim conceptuum signa. Igitur, si homines nullum conceptum haberent, quo exhiberetur aliquid unum atque in pluribus identicum, nullum sane invexissent vocabulum, quod unum in se esset, ac pluribus identice applicaretur, cujusmodi sunt vocabula communia. Quemadmodum igitur nullam quærimus neque adhibemus vocem, ut herbas et animantia quæ forte sunt in orbe Saturni, significemus, quia nullam de talibus ideam habemus; ita si nulli essent in humana mente conceptus universales, nulli quoque essent in hominum sermone termini communes.

326. 3^o Qui individuorum similitudines percipit, ideam habet universales. Atqui humana mens percipit individuorum similitudines. Ergo.

Prob. maj. Similitudo omnis apprehenditur, quatenus eadem proprietas in pluribus individuis apprehenditur. Perceptio itaque similitudinis est perceptio alicujus rei communis pluribus, perceptio videlicet quæ idea universali continetur.

327. 4^o Non denegant nominales esse in humana mente ideam collectivam. Atqui collectionum ideam habere non posset mens, nisi in ipsa ideæ universales præexisterent. Collectionis enim idea numerationem supponit. Numeratio autem individuorum sine idea aliqua universali plane impossibilis est. Nemo enim posset dicere v. gr. centum homines, decem libros, tres gladios, nisi deprehenderet in singulis aliquid identicum recurrens, aliquam communem rationem sub qua hæ res multiplicari et numerari possent; quæ communis ratio est id quod vocibus, *homo, liber, gladius*, significamus.

Igitur, ut alia plura omittamus, esse in humana mente ideam universalem est adeo manifestum, ut vehementer mirandum sit, et quasi incredibile videatur, fuisse homines philosophos qui id in dubium vocaverint.

ARTICULUS III.

* *Refutantur conceptuales.*

528. Sententia conceptualium est, existere in humano intellectu ideas universales, sed nihil esse extra mentem, quod universalibus ideis respondeat (520). Quod si cum restrictione affirmarent, intelligerentque nihil esse in rebus realiter universale, sed universitatem iis convenire solum per intellectus operationem, cui tamen res ipsæ fundamentum suppedient, reprehendendi sane non essent, nec a communi philosophorum sententia dissiderent. Sed certe auctores isti loquendi modum reprehensione dignum usurpant, et fortasse conceptuum confusione laborant. Ut igitur impugnentur, satis est ostendere, universales conceptus habere in rebus fundamentum. Ejusmodi autem fundamentum hoc est, quod res repræsentata per conceptum universalem, æque in pluribus invenitur.

529. PROPOSITIO II. *Universales conceptus habent in rebus fundamentum.*

1° Concedunt conceptuales percipi a nobis rerum similitudines, et ex hac similitudine percepta fieri, ut uno conceptu plura nobis repræsentemus. Licet ergo sic argumentari:

Si individuorum similitudines percipimus, profecto percipimus in individuis aliquid, secundum quod similia sunt. Hoc autem secundum quod individua similia sunt, est aliquid in quo illa conveniunt, aliquid identicum in illis. Ergo.

2° Universales conceptus apti sunt ut univoce applicentur pluribus, universalique nomina, ut univoce de pluribus dicantur. Hæc adversarii recipiunt. Jam quod univoce tribuitur pluribus ac dicitur de pluribus, non est profecto ipsum nomen; quum enim dico v. gr. Platonem esse hominem, non dico Platonem esse hoc nomen, *homo*: neque est ipse conceptus subjectivus; non enim dico Platonem esse ideam hominis. Ergo est aliquid reale quod est in Platone et in cæteris. Et revera nomina pro rebus supponuntur (62).

Hæc autem res non est Platonis aut cæterorum esse individuale; nam esse individuale est diversum in singulis, et nomine cujusque proprio significatur. Neque est omnium singularium collectio; nam collectio omnium non est unumquodque eorum. Restat ergo ut sit aliqua res quæ in singulis æque inveniatur. Hæc solummodo res est, quæ eodem nomine in singulis appellari mereatur. Hæc autem est fundamentum ideæ universalis. Ergo.

3° Eadem argumentatio instituitur circa definitiones, ac scientificas demonstrationes.

Quum enim hominem v. gr. definis animal rationale, aut quum demonstras hominis proprietates, quid definis, aut cujus proprietates demonstras? Nec definitio, nec demonstratio cadit in vocem, *homo*, aut in conceptum mentis. Neque cadit in unum solummodo individuum, neque in totam hominum collectionem, sed solum in naturam quæ in omnibus ex æquo est. Colliges ex his, conceptualium opinionem, si confusio idearum quam continet, ultra promoveatur, scientias omnes reddere inanes, Kantique systema nihil esse aliud, ut supra innuimus, quam conceptualismum exaggeratione inflatum, et ad doctrinæ normam digestum.

ARTICULUS IV.

* *Rejiciuntur universalialia separata.*

530. Cum plane necessarium sit fateri, ut consequitur ex dictis, et esse universales conceptus, et universales naturas quas illi repræsentant, reales esse, superest ut definiatur, quomodo intelligi debeat universalium realitas. Ac primo refutanda est sententia platoniorum illorum, qui posuerunt communes naturas ita esse reales, ut per se subsisterent æternæ, incorruptibiles, a singularibus realiter sejunctæ, propria entitate atque unitate reali præditæ; utque earum participatione, tanquam ex veris principiis, singularia constituerentur.

531. PROPOSITIO III. *Universalialia separata ac per se subsistentia plane absurda sunt.*

1^o Si v. gr. homo universalis existeret separatus a singularibus, vel esset etiam in Socrate et Platone et cæteris, vel non esset.

Si hoc postremum dicas, jam 1^o homo iste universalis non esset amplius natura universalis, sed homo plane singularis; 2^o nec Socrates, nec Plato, nec cæteri essent homines; nam quomodo posset constituere eorum essentiam id, quod extra illos est et separatum ab illis?

Si vero dicas hominem universalem esse etiam in Socrate et Platone, vel dicis naturam realiter eandem et indivisam esse in utroque, vel divisam in duas.

Si dicis naturam realiter indivisam esse in utroque, jam Socrates et Plato non sunt duo homines sed unus homo.

Si dicis esse divisam in duas, jam homo universalis prouti est in Socrate, divideretur a seipso prouti est in Platone; essetque secundum eandem determinatam entitatem realiter plures; quæ manifestam pugnam includunt.

532. 2^o Vel solæ substantiæ universales existere dicendæ sunt separatæ ab individuïs, vel etiam accidentia universalis. Si hoc alterum eligant platonici, multa recipient extra modum ridicula; v. gr. esse naturaliter albedinem, quæ non sit ulla albedo determinata, et quæ nulli unquam inhæserit substantiæ; esse motum, qui non sit ullus motus determinatus, ac proinde nullam certam directionem ac velocitatem habeat, et qui nullius rei sit motus. Et ita de cæteris. Si eligunt primum, non intelligitur cur solas substantias universales existiment esse separatæ ab individuïs, non vero accidentia quoque universalis.

Si enim substantiarum essentia potest ab individuïs existere separatæ, cur non etiam essentia modorum? Insuper albedo, motus, etc. nonne sunt universalis realia? Dantur igitur universalis quæ realia sunt, et nihilominus non per hoc subsistunt separatæ. Ergo potest universalium realitas defendi, quin ea separatæ esse ab individuïs statuat.

Denique an solæ species sunt ab individuïs separatæ, an

vero etiam genera? Si primum, ergo dantur universalis realia, quæ per se non subsistunt. Si alterum, admittendum erit animal universale, vivens universale, corpus universale, substantia universalis, inutilia omnia et ridicula.

533. Hujus igitur opinionis absurditas est adeo manifesta, ut facilius crediderim nunquam exstitisse Platonem, quam ejusmodi somniis fuisse deceptum. Certe multo libentius credam Aristotelem, cum idearum Dei exemplarium theoriam minime probaret, aliquid ridiculi ei aspergere voluisse, ac Platonis mentem perperam interpretatum esse, ut facilius eam impugnaret; id quod multi quoque peripateticorum, iique sane nobiles, facile largiuntur (1). Possumus tamen cum s. Augustino (2) opinari, quemadmodum supra innuimus (519), sententiam, quam Aristoteles derisui habet, esse Platonis sententiam, ut a quibusdam platonici exponeretur. Cæterum universalis Platonis non sunt essentia physice universales, sed exemplaria (παράδειγματα) rerum quæ in summi opificis mente fulgent, ad quorum normam inferiora hæc condita sunt. Igitur cum quæstione præsentis nihil habent commune.

ARTICULUS V.

* *Rejiciuntur universalis a parte rei.*

534. Impugnamus nunc eos omnes philosophos, qui quamquam universalis separatæ non ponant, tamen longius et ipsi quam par sit progressi, ita tumentur universalium realitatem, ut contendunt esse in rebus non solum naturam quæ est universalis, sed etiam universalitatem ejus; ita quod natura v. gr. humana, quæ universalis denominatur, quæque in singulis est hominibus, habeat ex se realiter et ante omnem intellectus operationem unitatem illam propter quam universalis denominatur. Hoc est universale, ut aiunt, *a parte rei*.

In hoc conveniunt realistæ omnes exaggerati, quanquam dissideant in modo illud explicandi. Sit ergo

(1) Hos videsis ap. Suarez *Met. Disp. VI, sect. II, § III* et Conimbricenses in *Præf. Porphyrii. quæst. I, art. III.*

(2) *De Civit., lib. VII, c. 28.*

555. PROPOSITIO IV. *Nihil est de se et ante omnem intellectus operationem universale.*

1° Si qua natura de se universalis esset, nullo modo posset fieri singularis. Etenim si qua res est, cui per se unum ex duobus oppositis conveniat, huic alterum oppositum convenire non potest. Universale autem et singulare opposita sunt, quemadmodum opposita sunt unum et plura, indeterminatum et determinatum, communicabile et incommunicabile.

Jam natura v. gr. humana in Socrate aut Platone certe singularis est. Ergo nequit huic naturæ secundum se convenire ut sit universalis.

2° Quidquid per se ac realiter convenit naturæ, convenit quoque individuis eam habentibus: adeoque de his prædicari potest. Si ergo natura hominis per se universalis est, Socrates, cui convenit natura hominis, erit quoque universalis, et universalis dici poterit; id quod absonum plane est.

3° Repugnat rem eandem esse per se ac realiter unam simul, et multiplicatam in pluribus secundum propriam rationem. Quod enim unum est, in plura indivisum est; quod in plura multiplicatum est, in plura divisum est. Quemadmodum ergo repugnat ut homines v. gr. realiter plures, sint realiter unus homo, ita repugnat ut res eadem sit per se una, et in pluribus multiplicata.

Sed res quæ per se universalis esset, una esset, et in plura multiplicaretur, ex ipsa universalis definitione. Repugnat ergo esse aliquid per se universale.

4° Demum an solæ naturæ specificæ sunt secundum rem universales, an vero etiam genericæ?

Si 1^{um}, ergo sunt universalia quædam, quæ non sunt universalia a parte rei. Quod si quædam talia sunt, ergo possunt universalia esse realia, quin in rebus universalitatem habeant. Ergo ad universalium realitatem tuendam, necesse non est ut universalia a parte rei confingamus.

Si 2^{um}, profecto non genera solum proxima secundum rem universalia esse dicent, sed etiam superiora, ac genera ipsa suprema; secus redibit superius argumentum. Igitur su-

prema genera sunt secundum rem universalia. Sane et qualitas, et quantitas, et alia hujusmodi, secundum rem universalia videntur satis absurda. Sed, his non attentis, attendamus solum substantiam. Habebimus igitur substantiam realiter universalem, substantiam in rebus omnibus singularibus realiter unam, ac diversis solum accidentibus in hoc et in illo diversimode contractam. A qua theoria ad pantheismum quanta demum distantia est? Nempe ut hanc unam, quæ in mundo est, substantiam cum substantia divina dicas identicam. Negari igitur nequit, opinionem hanc iter ad pantheismum complanare; id quod vel ipse Baylius animadvertit (1).

556. Ex hoc colligas velim, quantam quæstiones quædam abstractæ, ut aiunt, et scholasticæ, quæque minus perspicacibus otiosæ ac futes visæ sunt, quantam, inquam, cum gravissimis quæstionibus, in quibus error omnis perniciosissimus est, cognationem habeant. Error ille Averrois de intellectu universali, qui etiam quibusdam Italiæ scholis longo tempore inhæsit, et theoria rationis impersonalis, quam nostris temporibus Victor Cousin ex Germaniæ philosophis expressit, nonne ad hanc ipsam, quam modo refutavimus, realistarum exaggerationem revocantur?

ARTICULUS VI.

Statuitur universale per intellectum.

557. PROPOSITIO V. *Universalitas omnis constituitur per intellectum cum fundamento in re.*

Ut universale constituatur duo necessaria sunt; 1° ut quod universale dicitur, sit aliquid *unum*; 2° ut sit pluribus *communicabile*; videlicet ut in pluribus individuis realiter multiplicetur, et ita multiplicatum numerari possit, sicut ipsa illa individua numerantur. His duobus universalium definitio continetur. Et re quidem vera, si natura non sit una, non erit aliquid universale, sed rerum diversarum collectio. Si vere non sit eo modo communicabilis pluribus, non erit universalis, sed singularis. Huc igitur redit quæstio tota de

(1) In *Dictionario*: artic. *Spinoza*.

universalium realitate, quomodo scilicet cum veritate cognosci ac dici possit, esse in rebus aliquid unum et multis communicabile. Jam hæc duo, quæ, ut modo demonstratum est, non sunt in ulla natura ut est in se (a parte rei), et ante omnem intellectus operationem, naturis conveniunt, prouti intellectus operationi subsunt.

538. Operatio autem intellectus qua hoc perficitur, est cognitio individuorum *præcisiva* et *comparativa*, de qua aliquid in primo libro dictum est (35). Quum enim intellectui per sensationes objectum individuum offertur, intellectus individui essentiam e sensibili representatione educit et abstrahit, conceptumque format, quo illa exhibeatur a conditionibus omnibus individuantiis præcisa et abstracta. Hæc est cognitio præcisiva, quæ intellectus humani propria est, quæque idearum universalium comprehensionem (14) supplet, et immediatum communium terminorum significatum constituit (77). Essentia porro cognitione tali concepta dicitur *ratio specifica*, et *universale directum*; quia cognitione directa (18) apprehenditur; et, ita apprehensa, quanquam ex se nec singularitatem dicat nec universalitatem, tamen revera universalitatem jam induit, ut quæ nihil retinet jam, quo ad unum potius quam ad alterum individuum determinetur, potesque tam de illo a quo abstracta est, quam de aliis similibus prædicari. Sed nihilominus non cognoscitur adhuc ejus universalitas, quia non cognoscitur respectus iste, quem dicit ad sua inferiora, ut res una sit, et multis inesse possit. Hic autem respectus comparatione cognoscitur. Quum enim ex plurium individuorum cognitione conceptus præcisivi exsurgunt intrinsece in omnibus identici (54), eos inter se comparans intellectus deprehendit, non plures esse conceptus, sed vere unum.

Sic igitur 1^o erumpit ex individuis menti oblati naturæ unitas; non quidem realis, sed logica; nam una natura est, quæ ab omnibus abstracta est, unoque conceptu exhibetur: 2^o hæc natura, una cum sit, potest tamen pluribus uniformiter attribui, et cum multis reipsa identificata deprehendi. Natura sic cognita est id, quod dicitur *species* vel *genus*, et

universale reflexum. Hoc igitur pacto ex individuis, per mentis operationem, naturæ universalitas constituitur.

539. Patet autem hanc universalis denominationem in rebus habere fundamentum. Hoc enim fundamentum sunt individua ipsa, realiter inter se quoad essentiam similia: quæ quum apprehendit intellectus cognitione præcisiva, essentias singulorum apprehensas et inter se comparatas unico exprimit conceptu; quia in unum revera conceptum sic abstractæ ex se confunduntur. Idcirco individua hæc in quibus invenitur natura, quæ post abstractionem accipit in intellectu formam universalitatis, dicuntur *universale fundamentale*: eorumque natura, prouti cognitione præcisiva et comparativa formam universalitatis accipit, *universale formale*. Animadvertendum porro est, non requiri per se plurium individuorum similitudinem cognitionem ad conceptum universalem efformandum; sufficit enim ad hoc vel unius individui cognitio præcisiva, si mens advertat, alia illi similia posse existere.

540. Ex his inferitur 1^o universale consurgere tum ex parte rerum, tum ex parte intellectus. Res offerunt intellectui *materiam*, quæ universalis denominatur, nempe naturam atque essentiam quam habent. Intellectus huic tribuit *formam* universalitatis cognitione præcisiva et comparativa. Id ergo quod naturam universalem denominat, ipsi naturæ extrinsecum est.

2^o Universalium idearum objectum reale est, spectata materia, non vero forma. Nempe id, quod iis ideis representatur, (ratio specifica vel generica, essentia, universale directum) vere est in pluribus individuis et totum est in singulis, sed non eodem modo quo in mente representatur. Representatur enim in mente abstractum a notis individuantiis, atque uti commune pluribus. Non est autem in rebus tali modo. Non enim essentia cujusque individui a principiis individuantiis realiter distinguitur, nec una natura realiter communis est pluribus; sed abstrahitur ab individuis per intellectum, et in hoc statu abstractionis communitatem acquirit, non realem, sed logicam.

3° Diverso igitur modo universale est in ordine reali, et in ordine ideali. Universale in ordine reali est *plura in actu, unum in potentia*; in ordine vero ideali, *unum in actu, plura in potentia*.

* 4° Ex suppositione contrarii principii, nempe quod obiectum intellectum eundem essendi modum in intellectu habeat et in re, errores omnes circa universalia exorti sunt. Nam

a) In re sunt individua inter se distincta, et nihil est omnibus realiter commune. Ergo etiam in ordine ideali individua solum eorumque collectio percipi potest, aliquid omnibus commune percipi non potest. Hinc termini universales vel sunt meræ voces ac nomina, vel, si conceptum aliquem exprimunt, hic conceptus nihil quod reale sit, repræsentat. Hi sunt nominalium errores, et conceptualium.

b) In mente sunt conceptus exhibentes rem unam in pluribus. Ergo est extra mentem aliquid unum in pluribus. Exinde universale separatum, universale a parte rei, imo et pantheismus (1).

* 541. Dices fortasse, hæc omnia supponere solutam quæstionem de idearum origine. Si enim ideæ universales non eo modo formentur quem assumpsimus, omnia quæ modo disputata sunt, nulli innituntur fundamento. Respondeo in primis, cum quæstio hæc ad psychologiam pertineat, ibi demonstrabitur quod modo assumptum est. Secundo, potest hæc idearum origo accipi ut hypothesis, quæ ad quæstionem solvendam opportune adhibeatur. Postremo, quanquam variae sint opiniones de idearum origine, omnes tamen, qui nec nominales sunt, nec realium portenta amplectuntur, in hoc conveniunt, quod alio modo res sunt in ordine reali, alio in ordine ideali (2). Hoc autem est principium quod quæstionem solvit, quæcunque tandem sit idearum origo. Hoc vero principium ex hucusque dictis plane demonstratur.

(1) Cf. S. Th. In I Met. Lect. X; et opus R. P. Matthæi Liberatore S. J. cui titulus: *Della Conoscenza intellettuale*, vol. II, c. IV, art. VII, quo in loco doctrinam hanc ex S. Thoma accurate ac solide explicat.

(2) Cf. CL. Rosmini opusc. cit. § XVII.

Si enim sunt conceptus universales, si nihil est in rebus universale, si conceptus universales non sunt mentis fragmenta, sane dicendum, alium esse modum quo res existunt, alium modum quo in universalibus conceptibus exhibentur.

ARTICULUS VII.

Difficultates nominalium.

542. Obj. I. Universale nullum reale est. Nam

1° Quidquid existit in rerum natura, vel existere potest, singulare est. Universale autem non est singulare.

2° Quidquid existit, certo loco ac tempore existit. Sed universale non existit certo loco aut tempore.

Resp. *Dist. ant.*: Secundum materiam, nempe spectatis rationibus specificis vel genericis, *nego*; secundum formam ipsam universalitatis, *conc.* (540, 2°).

Ad 1^m *Conc. maj.* et *dist. min.*: universale fundamentale, *nego*; universale formale, *conc.*; et eodem modo *dist. cons.* (539).

Ad 2^m *Trans. maj.* Ubi enim est mundus, aut quo tempore est Deus? Sed hoc in præsentī quæstione parum refert. Permissa igitur majori, *dist. min.* ut in responsione præcedenti.

543. Obj. II. Universale est unum idemque in pluribus. Sed nihil potest existere, quod sit unum idemque in pluribus. Nam secus hæc tria consequerentur absurda.

1° Illud non distingueretur a singularibus.

2° Singularia non distinguerentur inter se.

3° Una eademque res subiret affectiones contradictorias; v. gr. eadem humanitas in hoc moveretur, in illo staret, etc.

Resp. *Dist. maj.*: Unum idemque unitate et identitate reali, *nego*; unitate et identitate logica, *conc.*

Contradist. min.: Quod sit unum idemque unitate et identitate logica, *nego*; unitate et identitate reali, *subdist.*: in naturis finitis, *conc.*; in natura infinita, *nego*. Natura enim infinita una eademque est in pluribus, non autem in pluribus naturis individuís, quod est absurdum, sed in pluribus personis.

Ad 1^m *Dist.*: Si universale est aliquid commune secun-

dum mentis conceptum, *nego*; si esset aliquid commune realiter, *conc.*; et *nego suppositum*. Nam quod realiter commune est, non universale est, sed singulare, quemadmodum divina natura.

Ad 2^m *Dist.* eodem modo: Si universale est aliquid logice commune, *nego*; si esset realiter commune, *nego suppositum* (non enim esset amplius universale); et *subd.*: singularia non distinguerentur inter se quoad naturam, *conc.*; quoad singulorum subsistentiam in eadem natura, *nego*. Hoc quoque additur respectu divinæ naturæ, cujus personæ realiter distinguuntur inter se, quanquam unam numero naturam habeant.

Ad 3^m *Dist.*: Una eademque realiter, *nego*; una eademque logice, *conc.* Et *contradist. min.*

544. Instat Humius. Si universale qua tale existere non potest, neque potest concipi. Nam quod impossibile est in ordine reali, impossibile quoque est in ordine ideali.

Resp. *Dist. ant.*: Non potest concipi ut existens, *conc.*, non potest concipi per se, ac mente exprimi, *nego*.

Ad probat. *Dist.*: Nempe impossibile est in ordine ideali, ut concipiatur tanquam positum in ordine reali, id quod impossibile est in ordine reali, *conc.*; impossibile est, ut res in ordine ideali concipiantur eo modo, quo in ordine reali existere non possunt, *nego*; secus enim rejiciendæ forent Humio omnes ideæ abstractæ.

545. Obj. III. Robinetus. Idea quam dicimus universalem, fit ex comparatione plurium similium inter se, sive existentium sive possibilium; non vero ex comparatione omnium. Ergo non repræsentat omnia similia.

Resp. *Trans. maj. neg. consequens et consequentiam.*

Quum conceptu præcisivo ratio specifica vel ab uno individuo abstracta est, jam de se idonea est ad omnia possibilia ejusdem rationis repræsentanda. Instituta vero comparatione, hæc abstracti elementi universalitas cognoscitur, et concipitur cujusmodi vere est, nempe non ad ea tantum pertinens individua, inter quæ comparatio instituta fuit, sed ut illimitatam prorsus extensionem habens. Falsum ergo

quod omnia similia non repræsentet, quia quorundam tantum comparatio præcessit.

Quoniam vero adversarius, quemadmodum sensistæ omnes, ideam universalem cum collectiva permiscet, resp. 2^o *Dist. cons.*: Non repræsentat omnia similia ad modum collectionis, *conc.*; secundum naturam, quæ est in omnibus et singulis, *nego*.

ARTICULUS VIII.

* *Difficultates ultra-realistarum.*

546. Qui tuentur universalialia a parte rei objiciunt. I. Natura hoc habet secundum se et ante omnem intellectus operationem, ut sit communicabilis pluribus. Nam

1^o Natura v. gr. humana secundum se est indifferens ad plura, nec magis postulat ut sit Petrus quam Paulus. Ergo.

2^o Imo non potest adæquate contrahi in uno solo individuo, adeo ut alia individua non sint amplius possibilia. Ergo.

Resp. *Neg. ant.*

Ad 1^m *Dist. ant.*: i. e. naturæ cuicunque individua secundum se non repugnat, ut sint alia individua illi similia, *conc.*; i. e. naturæ in individuis secundum se inest aptitudo realis ad plures individuationes, *nego*. Primum est universale fundamentale (539), alterum foret universale a parte rei.

Ad 2^o *Dist.* eodem modo: quia naturæ individua secundum se non repugnat, ut sint alia individua illi similia, *conc.*; quia naturæ in individuis existenti inest aptitudo realis ad plura, *nego*.

547. Obj. II. Natura secundum se dici debet communis.

1^o Etenim secundum se considerata est ens. Ergo est una; nam ens et unum reciprocantur. Sed non est una numero, quia natura secundum se non est individua; ergo una specie, nempe una in pluribus, seu communis.

2^o Antecedenter ad omnem intellectus operationem Petrus et Paulus non differunt specie. Ergo natura in Petro et Paulo una est specie secundum se.

3^a Revera omnes homines eadem definitione continentur: ergo una est in omnibus essentia.

Resp. *Neg. ant.*

Ad 1^m *Dist. ant.*: In uno individuo est unum ens, et in altero alterum ens, *conc.*; est unum ens in omnibus individuis, *subd.*: unitate fundamentali seu similitudinis, *conc.*; unitate actuali, *nego* (540. 3^o).

Dist. 1^m cons. secundum hanc postremam distinctionem.

Sed natura non est una numero, *dist.*: non est unica, i. e. determinata ad unum tantum individuum, *conc.*; non est una numero in unoquoque individuo, *nego*. Etenim natura secundum se est individua in unoquoque individuo, nec una specie fit, nisi per intellectum, ut supra declaratum est.

Ad 2^m *Dist. ant.*: i. e. sunt similis naturæ, *conc.*; i. e. unam eandemque realiter naturam habent, *nego*. Et *neg. cons.*

Ad 3^m *Conc. ant.*; *dist. cons.*: una unitate fundamentali, *conc.*; unitate actuali, *subd.*: præsupposita ante intellectus operationem, *nego*; posita per operationem intellectus, *conc.*

548. Obj. III. Hæ propositiones: *Petrus est homo*; *Paulus est homo*, etc. sunt veræ quia subjectum est identicum cum prædicato Sed prædicatum quod naturam significat est unum in omnibus. Ergo et natura una est in omnibus.

Resp. Omitto *maj.* et *rationem additam* (158, 2^o).

Dist. min. prædicatum est unum in omnibus unitate extrinseca per operationem intellectus, *conc.*; unitate intrinseca et reali, *nego*. Eodem modo *dist. cons.*

549. Obj. IV. Universalia, qua talia, dicuntur esse propria scientiarum objecta, immutabilia, perpetua, ingenerabilia, incorruptibilia, immediata significata vocabulorum communium.

Sed hæc omnia de natura reali vere dicuntur, et de naturis individuis dici non possunt.

Ergo sunt naturæ realiter universales.

Resp. *Conc. maj.*; *dist. min. quoad 1^m partem* hæc omnia vere dicuntur de natura reali, ut est elementum objectivum abstractum ab individuo, *conc.*; de natura reali ut reali, *nego*.

Dist. ad 2^m partem: hæc de naturis individuis dici non possunt, si considerentur ut sunt individua, *conc.*; si fiat præcisio a conditionibus individuuantibus, *nego*.

Ut proprietates illæ omnes de naturis realibus vere dicantur, non est necesse ut supponamus esse naturas reipsa universales; sed satis est ut essentiæ abstractæ et intelligibiles, de quibus illa dicuntur, cum individuis existentibus identificentur. Ut autem illa omnia de essentia individuorum dicantur, non vero de ipsis individuis, satis est essentiam ab individuis ratione distingui.

550. Obj. V. Natura divina, ex fidei christianæ dogmatibus, est realiter una, et a tribus distinctis personis possidetur. Ergo a pari, natura v. gr. humana potest esse in se realiter una, et a multis participari.

Respondeo nullam esse paritatem. Nam natura divina, licet et Patris sit et Filii et Spiritus Sancti, tamen in singulis personis non multiplicatur, sed una numero est ac plane singularis, et in hac sua singularitate est *Pater, Filius et Spiritus Sanctus, tres simul personæ, ac singulatim quælibet earumdem* (1). » Unde tres divinæ personæ, licet realiter inter se distinctæ, non tres Dii sunt, sed unicus Deus. At vero natura humana ita est singulorum, ut in singulis multiplicetur, possidente unoquoque suam propriam individuatque naturam, ab aliorum naturis realiter distinctam: unde dici nequit omnes homines esse unicum hominem. Distinguenda igitur est naturæ unitas et communitas *realis* ab unitate et communitate *logica* (540, 2^o). Natura quæ realiter una est, et realiter communis, nec est universales, nec esse potest (535); sed necessario est singularis. Quare si natura quoque hominis realiter esset singulis individuis communis, jam non esset amplius universalis, sed singularis. Ex quo vides paritatem adductam contra adversarios retorqueri posse. Illa solum natura universalis dici potest, quæ logice una et communis est, ut supra explicavimus.

551. Obj. VI. Universale per intellectum rejici plane debet. Etenim

(1) *Conc. Lat. IV. Act. IV.*

1^o Objectum præcedit actum facultatis, quæ ad ipsum tendit. Sed universale est objectum intellectus, ut communis veterum doctrina eaque probatissima statuit. Ergo universale præcedit operationem intellectus.

2^o Universale non potest dici unum per cognitionem præcisivam. Nam unitas debet inesse ipsi universali naturæ. Sed unitas quæ est a cognitione præcisiva, non inest ipsi universali naturæ.

3^o Cognitio hæc præcisiva esset falsa; nam intellectus perciperet rerum naturam aliter ac est.

4^o Denique qua in re differt hæc opinio a nominalismo conceptualium?

Resp. *Neg. ant.*

Ad 1^m *Dist. maj.*: Materia circa quam versatur actio, *conc.*; objectum quod fit per actionem, *nego. Dist. min.*: i. e. essentia realis quam conceptus universalis repræsentat, *conc.*; ipsa universalitatis forma est objectum intellectus, *subd.*: est objectum, quod fit per actionem intellectus, *conc.*; materia circa quam versatur actio intellectus, *nego. Dist. demum cons.*: Essentia realis quam conceptus universalis repræsentat, præcedit operationem intellectus, *conc.*; ipsa universalitatis forma, *nego.*

Distinctiones has omnes facile intelliges, si quæ in sexto hujus capitis articulo dicta sunt, attentius recolās (338-340).

Ad 2^m *Neg. ant.* Ad probationem *Dist. ant.*: Unitas debet inesse ipsi universali naturæ, i. e. naturæ universali formaliter, *conc.*; naturæ universali fundamentaliter, *nego.* Et *contradistinguo min.* (339).

Ad 3^m *Neg. ant.* Ad rat. additam. *Dist.*: Intellectus perciperet rerum naturam aliter ac est; nempe perciperet rem esse aliter quam sit, *nego*; nempe ita perciperet, ut res alium essendi modum haberet in se, et alium in intellectu, *conc.* Certe falsa esset perceptio, si per cognitionem præcisivam intellectus perciperet essentiam esse separatam a singularibus: id autem non percipitur ab intellectu abstrahente, sed solum ab eo percipitur essentia, non consideratis principiis individuantibus, quæ non sunt de ratione speciei. Et in hoc

non est ulla falsitas, sed solum præcisio, aut etiam, si placet, diffinitas negativa (372) (1).

Ad 4^m Sententia quam tuemur a conceptualium opinione hoc differt, quod illi existiment, nihil esse extra mentem quod universali conceptui respondeat, nos autem putemus universales conceptus habere in rebus fundamentum. V. dicta in tertio hujus capitis articulo (328).

CAPUT VI.

DE IDEIS UT FONTEM COGNITIONUM CONSTITUUNT.

ARTICULUS I.

De judiciis analyticis immediatis.

332. Objectivo idearum valore constituto, agendum de cognitionibus quas reflexionem in ideas acquisitas adhibens, sibi comparat intellectus. Ac primo de veritatibus quæ immediate ex idearum consideratione eruuntur.

Has colligit intellectus, quum, facta essentiae resolutione in eas notas, quas ratione sui continet, statim harum cum illa identitatem apprehendit.

Etenim hæc partiales ideæ quæ ex analysi essentiae efflorescunt, eadem revera rationem repræsentant ac idea principalis, nihilominus ex parte solum consideratam, et sub aliquo particulari respectu; nempe vel secundum unum aut alterum ejus constitutivum, vel secundum aliquam proprietatem quæ ab ipsa essentia necessario et immediate dimanat. Atque hinc est quod notiones istæ omnes cum primitivo conceptu objective identicæ sunt. Tales autem esse immediate cognoscimus, quia primitivi conceptus consideratio prædicata hæc sine medii (226) adjumento suppeditat. Sic ideam totius considerans, hæc immediate judicia efformo: *totum est æquale omnibus partibus: est majus una quavis parte: est divisibile in partes, etc.*

Omnia prima principia, quæ per se nota sunt (300), hoc pacto eliciuntur.

333. Fiunt quidem, tum circa internum sensum, tum

(1) V. S. Th. Sum. I, p. q. LXXXV, art. 1 ad 1.

circa externum iudicia immediata (447, 1° 493), sed hæc a iudiciis immediatis, de quibus nunc sermo est, triplici ex capite differunt.

1° Quia illa experientiæ ope efformantur; quæ et prædicati notionem supeditat, et ejus aperit cum subjecto identitatem; sunt nempe iudicia synthetica et a posteriori (446, b). Hæc autem sunt analytica et a priori (446, a), et eliciuntur sola consideratione ideæ quæ rei alicujus essentiam exhibet.

2° Illa singularia semper, hæc ex se universalis sunt. Illa enim emergunt ex consideratione rerum existentium, quæ singulares sunt; hæc ex consideratione idearum, quibus objectivæ rationes, ab omni individuante conditione præcisæ, exhibentur.

3° Illa veritatem habent contingentem, et hypotheticam certitudinem (405), hæc absoluta necessitate vera sunt, absolutequæ certa; quod in sequenti articulo adhuc magis declarabitur.

554. Virtus illa mentis, qua, intellectis terminis, eorum convenientiam vel discrepantiam immediate contuemur, vocatur proprio nomine *intellectus* seu *intelligentia*; quia non ratiocinando cognitiones istas mens acquirit, sed simpliciter intelligendo. Intellectus hoc sensu est habitus naturalis. Habitus quidem, quatenus est dispositio ad actum hujusmodi cognitionum, naturalis vero quia hæc dispositio non præviis gignitur actibus; sed ex ipsa mentis natura illi convenit. Hic porro habitus, quanquam valde limitatus in homine sit, nobilissima tamen mentis humanæ proprietas est, omnisque rationalis operationis radix atque principium. Omnis enim ratiocinatio principiis per se notis innititur (298).

ARTICULUS II.

De certitudine hujusmodi iudiciorum.

555. PROPOSITIO I. *Veritates analyticæ immediatæ metaphysicæ atque absoluta certitudine gaudent.*

In his enim, ut dictum est (552), prædicatum de ratione subjecti est. Hinc quotiescunque hoc subjectum cogito,

cogito *aliquid quod tale prædicatum habet*. Non possum igitur a tali subjecto tale prædicatum ullo in casu remove. Si enim aliquando possem, vera esset in eo casu hæc propositio: *Hoc subjectum, nempe, aliquid quod habet tale prædicatum, non habet tale prædicatum*. Quo iudicio contradictionis principium recta impetitur ac diserte negatur.

556. Vides igitur veritatum istarum necessitatem in contradictionis principio immediate fundari. Atqui hinc fit ut immediate illæ pateant, immediate assensum extorqueant.

Hinc colliges quomodo resolvenda sit questio illa: an unaquæque harum veritatum in specie demonstrari possit. Respondendum est, posse omnes indirecta demonstratione (295) confirmari, ut manifestum est (555). Directa autem demonstratio in his tunc solum habere locum potest, quum quis terminorum, quæ principium aliquid constat, significationem non cognoscit, saltem ita, ut advertere possit prædicatum in subjecti essentia contineri. Tunc enim, declaratis terminis, illico evidens fit principium. Demonstrantur igitur principia hæc terminorum definitione aut declaratione. Sic usuvenit aliquando in primis scientiarum principiis. Cæterum principia omnia per se nota possunt ulterioribus declarationibus illustrari magis, etiam apud eos quibus termini noti sunt, efficiendo ut evidentia qua fulgent, splendidius elucescat.

557. Animadvertite postremo in his principiis, ut et in omnibus iudiciis a priori, objectivam subjecti et prædicati identitatem affirmari independentem ab objectorum reali existentia; ita ut etiamsi nullum v. gr. existeret triangulum, affirmandum nihilominus esset quidquid de triangulo geometria docet. Si quid autem existit, quod in subjecti extensione contineatur, huic prædicati quoque notio necessario conveniet; non enim potest aliquid esse id quod subjecto exprimitur, quin habeat quidquid ad ipsam subjecti rationem pertinet. Ita repugnat existere triangulum quod tria latera non habeat, cum hoc sit de trianguli essentia.

ARTICULUS III.

Difficultates.

558. Obj. I. Non possumus idearum relationes cognoscere, si naturam idearum ignoramus. Atqui sic est. Ergo.

Resp. *Dist. maj.*: Posita hac ignorantia, cognoscere non possumus idearum relationes, quæ ab ideis *subjective* spectatis dependent, *trans.*; quæ sunt inter ideas *objective* spectatas, *nego*.

Transeat min. et eodem modo *dist. cons.* Ut ut concedamus ignorare nos idearum naturam, probe tamen cognoscimus quid idea repræsentet, et cognoscere possumus quid hæc repræsentatio contineat. Et hoc sufficit ut analysim ideæ exsequi possimus, et idearum partialium cum primitiva identitatem necessariam deprehendere.

559. Obj. II. Rerum veritas ab ideis nostris non pendet. Ergo ex eo quod de ideis nostris quædam vere affirmantur, non sequitur ea vere affirmari etiam de rebus.

Resp. *Dist. ant.*: Non pendet quoad originem, *conc.*; quoad sui manifestationem, *nego*.

Nego cons. Et animadverto, id quod ibi dictum est; in his principiis *quædam de ideis nostris affirmari*, et non esse accurate dictum, et male prorsus ab adversariis intelligi. Non enim in his principiis statuimus de iis quæ ideis nostris conveniunt, sed de iis quæ pertinent ad objecta, quæ per ideas repræsentantur: id quod non in his solum, sed in omni prorsus iudicio fit (143).

Quod si quis dubitet, utrum res habeant eas notas quæ in ideis ipsarum necessario continentur, is de objectivo idearum valore dubitat; de qua dubitatione quid sit sentiendum, supra vidimus (512).

560. Obj. III. Hæc principia immediata

1^o Nullam novam cognitionem important.

2^o Imo tautologiam continent, et verborum lusum: reducuntur enim ad hanc formulam: *A est A*.

Resp. Ad 1^m *Nego* (552).

Ad 2^m *Nego*; et *dist. rat. additam*: ita ut *A* efferatur sub

duobus conceptibus in se diversis, *conc.*; sub iisdem plane conceptibus, *nego*.

Non principia solum a priori, sed omnia omnino iudicia reducuntur ad formulam: *A est A*. In omnibus enim iudiciis affirmatur duorum conceptuum identitas objectiva vel diversitas. Nec sequitur inde profecto, omnia iudicia esse tautologica. Talia enim forent si conceptus objective identici, essent identici etiam intrinsece, et quidem spectatis omnibus (55, 1^o). Hoc autem in his principiis non contingit; prædicatum enim est utique eadem res ac subjectum, sed secundum aliquam rationem peculiarem certumque respectum considerata. Verum quidem est, hoc prædicatum esse de ratione atque essentia subjecti. Sed quid inde? Nonne subjecti notio potest absolute loquendo haberi, quin distincte percipitur, hoc aut illud in ea necessario includi? Et quum hoc percipitur, nonne vera cognitio acquiritur?

561. Obj. IV. Hæc principia nihil sibi peculiare habent. Etenim

1^o In omnibus plane propositionibus prædicatum pertinet ad notionem subjecti, non in his solummodo.

2^o Hæc quoque principia ab experientia dependent. Omnes namque ideæ sensu mediante acquiruntur.

3^o Unde non sunt absolute certa, sed solum hypothetice.

Resp. *Neg. ant.* Etenim hoc habent sibi proprium, ut sint a priori, et immediate evidentia.

Ad 1^m *Dist.*: Diverso modo, nempe vel quia prædicatum ex ipsa subjecti essentia dimanare cognoscitur, vel quia per experientiam cognoscitur ad ipsum pertinere, *conc.*; eodem modo, *nego*.

Quoniam nonnulli philosophi, quum de terminorum in iudicio habitudine disserunt, hæc duo videantur non satis distinguere, nihil tamen philosopho solemnus esse debet, quam distinctio cognitionum a priori, et a posteriori. Igitur quædam prædicata in notione subjecti inveniuntur sola ideæ consideratione, et idcirco dicuntur esse *de ratione* subjecti, quia nempe vel ejus essentiam constituunt, vel ab ipsa necessario fluunt; quædam vero sunt in notione subjecti

post experientiam, quia nempe experientia nobis talia prædicata suppeditavit, eaque nos cum notione subjecti composuimus.

Ad 2^m *Dist. ant.*: Quoad materiam circa quam versentur, *trans.*; quoad motivum quo veritatem ac necessitatem suam probant, *nego*.

Et omissa ratione quæ additur, *nego cons.*

Non agimus hoc loco de ideis, sed de idearum relationibus; et quæritur quomodo, cognoscantur eæ relationes, quæ in principiis immediatis continentur. Jam licet idearum acquisitio a sensuum experientia pendeat, non tamen relationum illarum cognitio experientia comparatur.

Ad 3^m *Nego*. Cur autem, patet ex modo dictis.

ARTICULUS IV.

De ratiocinio.

562. Veritates quæ nec sensu, nec idearum consideratione immediate nobis patent, non aliter deprehendi a nobis possunt, quam ratiocinio, incognitam nempe veritatem a notis deducendo. Hic autem primo animadvertite, quanquam ratiocinio inveniatur veritas prius incognita, non tamen semper ejus ope veritatem inveniri quæsitam. Aliquando enim inveniuntur ratiocinio veritates etiam non quæsitæ. Quod sit, quum representato menti objecto cum aliqua sua proprietate, simul menti occurrit principium, quod proprietatem hanc cum alia quadam offert conjunctam; unde et hanc alteram objecto illi convenire cognoscimus. Ita v. gr. ex hominis vel equi vestigiis, eorum transitum deduco, et alia sexcenta passim.

563. Quum autem veritatem aliquam inquirimus, vel inquirimus quodnam prædicatum sit tribuendum dato subjecto, vel rationem, cur datum prædicatum dato subjecto conveniat. In utroque casu id quod directe et immediate inquirimus, est medius terminus, cujus ope deductio fiat. Hunc enim quum invenimus, et ut talem agnoscimus, jam ratiocinamur (222), et quod quærebat assequimur. Invenitur

autem medius terminus in quæstionis subjecto, vel etiam in prædicato, si fuerit datum (359).

564. Quocunque modo ad ratiocinandum deveniamus, facile intelligis, quædam esse, quæ omnino nobis comperta sint oportet, antequam medium invenire possimus, et ratiocinii actum ponamus. Omnis enim ratiocinatio transitus quidam est a noto ad ignotum. Prænoscenda porro sunt tria: *subjectum* et *prædicatum* conclusionis, et *principia*, quæ locum in præmissis sunt habitura. Tria hæc vocantur ratiocinii *præcognita*, nempe res quæ prænoscentur. Cognitiones autem diversæ rerum earundem dicuntur *prænotiones*.

* 565. 1^o Prænosci debet *subjectum* et quidem actu. Nulla enim quæstio possibilis est, nisi aliquid actu cogitemus, de quo quæstio occurrere possit. Id autem de quo quæstio occurrit, est quæstionis subjectum. De subjecto autem duplex est prænotio.

1^o *Quid sit*; i. e. quænam sit ejus essentia, aut saltem quid significet vocabulum quo effertur (*quid rei, quid nominis*).

2^o *Quid sit*; i. e. quod existat in rerum natura, vel quod possit existere.

* 566. Quænam autem ex his subjecti prænotionibus sit ad ratiocinandum necessaria, id pendet a quæstionis natura. De re enim qualibet quæri potest 1^o existentia, i. e. *an sit*; 2^o essentia, i. e. *quid sit*; 3^o aliqua affectio, i. e. *qualis sit*. Jam si de existentia fiat quæstio, prænosci debet nomen (*quid nominis*), ut per se patet: si de essentia, prænosci debet *an sit*, vel rem ipsam percipiendo præsentem, vel saltem habendo præsentem rei ideam ut possibilis; quia sine aliqua rei idea non potest animum pulsare quæstio de rei essentia: si demum de affectione quæretur, prænosci insuper debet *quid sit*, nempe rei essentia, quia ab essentia affectiones deducuntur.

* 567. 2^o Prænoscendum est prædicatum, videlicet *quid sit* saltem *nomine*. Prænosci potest prædicatum *actuali* cognitione, vel *habituali*. Actualis cognitio habetur, quum viget præsens in mente illius conceptus; habitualis, quum conceptus ejus alias comparatus, latet in mente, ita tamen

ut, quum primum rei mentio incidat, ipse reviviscere possit. Habitualement saltem prædicati notionem ad ratiocinandum prærequiri, non difficulter intelligitur. Si enim prædicatum sit prorsus ignotum, etiamsi menti affulgeat deinde mediis terminis, dilabatur inutilis: non enim poterit (quod ejus munus est) prædicatum evocare et menti sistere.

Prænotio autem prædicati, quæ ex necessitate requiritur, est solum illa: *quid sit*, saltem nomine; nec est necesse ut sciamus quoque *quod sit*. Esse enim prædicati est inesse subjecto. Si ergo necesse foret prænoscere quod prædicatum est, prænoscendum foret quod est in subjecto; videlicet prænoscenda foret conclusio.

* 568. 3^o De principiis prænoscendum est, *an sint vera*, habituali saltem cognitione, quæ actualis fiat, quum medium invenis terminum. Si enim hac cognitione careas, occurrente tibi medio termino, cujus relationibus cum extremis principia tuæ conclusionis continentur, vel non attendes ad ipsa, vel tanquam falsa aut dubia rejicies.

ARTICULUS V.

De cognitionibus quæ ratiocinio comparantur.

569. PROPOSITIO II. *Ratiocinium, cujus ope cognitiones nostras et ordinamus et amplificamus, nobilissimum instrumentum est detegendæ veritatis.*

Quod ratiocinii ope multa in dies atque adeo plurima cognoscamus, res est tam manifesta, ut illustrari ulterius nec debere, nec posse videatur. Ut tamen miram ratiocinii fecunditatem uno veluti obtutu comprehendamus, hæc duo animadvertere sufficiet.

1^o Si veritates per ratiocinium deductas paulisper seponas, tota cognitionum nostrarum supellex hisce ad summum capitibus contineretur; nimirum judiciis illis singularibus, quæ in obviis sensuum relationibus immediate fundantur: judiciis conscientiæ immediatis: immediatis principiis a priori. Jamvero quis est inter homines tam rudis atque hebes, cui tam curta sit cognitionum supellex?

Atqui quidquid præter illa novimus, id omne ratiocinio debemus.

2^o Recole cognitionum divitias, quæ scientiis omnibus continentur. Thesaurus iste propemodum infinitus, quique in dies adeo excrescit, ratiocinii fructus est. Non enim immediato intuitu scientiæ comparantur, sed deductione ex veritatibus primitivis, quæ quasi in semine omnia continent, quæcunque naturaliter cognoscere possumus.

* 570. Illud potius declarare præstat, cujusmodi cognitiones nobis, et quo pacto ratiocinium comparet. Ratiocinium ratione materiæ ex qua constat, dividitur in purum, empiricum, mixtum (224). Unaquæque ex his speciebus peculiares suos fructus affert.

I. Ratiocinium purum 1^o reducit veritates a priori per se notas ad principia altiora, a quibus dependent, sin minus in ordine subjectivo cognitionis, at certe in ordine objectivo et quoad suam objectivam necessitatem. Quæ quidem reductio veram parit cognitionem: facit enim ut intimam rationem, ex qua quarundam veritatum evidentia dimanat, determinate et explicite cognoscamus. Ex. gr. quum ego ita ratiocinor:

Omnis figura plana habet numerum angulorum æqualem numero laterum;

Triangulum est figura plana:

Ergo triangulum habet numerum angulorum æqualem numero laterum;

sane ante omne ratiocinium, conclusionem hanc ego noveram; attributum enim immediate perspiciebam dimanans ex ipsa subjecti essentia. Sed nihilominus ratiocinio isto mediante, cognosco attributum illud non inesse triangulo, quia triangulum est, sed ex ratione magis universali, nimirum quia figura plana est.

2^o Facit insuper ratiocinium purum, id quod multo utilius est, ut innumeras relationes detegamus inter conceptus nostros, quæ quanquam necessariae sint, immediate tamen non patent, adeoque sine illo deprehendi nunquam possent.

Hujusmodi sunt ex. gr. omnes conclusiones, quas mathesis pura, vel naturalis theologia demonstrat.

* 571. II. Ratiocinium mixtum in primis exsequitur circa objectorum cognitiones experimentales id ipsum, quod circa judicia analytica ratiocinium purum.

Ac 1^o experimentales cognitiones immediatas subordinat analyticis principiis, ex quibus illæ hypotheticam necessitatem acquirunt. Exemplo sit illa ratiocinatio : *Quod cogitat existit; ego cogito; ergo existo*. Quæ quidem non sane in meæ existentiae cognitionem me adducit, sed assignat motivum, quare sit mihi evidens illa propositio : *ego sum*; nimirum non quia *ego sum ego*, sed quia sentio et cognosco me cogitantem; in cogitatione autem existentia includitur.

2^o Detegit præterea inter experientiae objecta eas relationes, quas experientia sola detegere non posset; quod exsequitur applicando objectis eas relationes, quas inter ideas adesse cognoscimus. Sic cognosco v. gr. latera mensæ esse æqualia inter se, quia æquantur uni eidemque mensuræ quam singulis applico. Huc pertinent conclusiones omnes matheseos applicatæ.

3^o Postremo adducit nos in cognitionem plurium rerum, quas vel experientia non attingit, vel attingere nequit;

a) quum ex observationibus singularium, et experimentis circa singularia habitis, colligit universalia judicia per inductionem (307) :

b) quum ab effectu vel signo quod experientiae subjicitur, deducit existere causam, quam experientia non manifestat. Exempla sunt obvia. In his porro deductionibus innitimur principio quod vocant causalitatis : *non datur effectus sine causa* :

c) quum ex natura et conditionibus effectus, deducit causæ naturam conditionesque, per hypothesim (327).

* 572. Ratiocinium denique empiricum applicat sive individuis, sive speciebus, principia experimentalia, quæ per inductionem efformata sunt. Sic cognita objecti cujuscumque naturæ, deduco qualitates illius, vel effectus qui ab ipso pro-

venient, etiamsi eorum in eodem individuo experientiam adhuc non habuerim.

ARTICULUS VI.

Difficultates.

573. Obj. I. Per ratiocinium nihil novi cognoscitur. Nam veritas, quam ratiocinii conclusio continet,

1^o est æterna;

2^o ante nos cognoscebatur;

3^o in principiis erat jam cognita.

Resp. *Neg. ant.*

Ad 1^m *Dist.* : In sua intelligibilitate, *trans.*; in cognitione nostra, *neg.*

Ad 2^m *Dist.* : Et non cognoscebatur a nobis, *conc.*; cognoscebatur, *neg.* Præterea multæ cognoscuntur veritates, quæ antea erant hominibus absolute ignotæ, uti v. gr. quotidianus physicarum scientiarum progressus demonstrat.

Ad 3^m Implicite, *conc.*; explicite, *subd.* : quum bina principia per ratiocinii actum combinata sunt, *conc.*; secus, *neg.* Ut enim cognosceretur explicite conclusio, necesse erat ut cognosceremus eam in aliquo principio nobis certo contineri. Hoc autem manifestat altera præmissa principio huic conjuncta (250, 222).

574. Obj. II. Qui ratiocinium instituit jam conclusionem cognoscit. Nam

1^o Quod est ignotum quæri non potest : qui autem ratiocinatur, conclusionem quærit.

2^o Quod est ignotum, etiamsi in illud incidamus, cognosci non potest.

3^o Finis ante media cognosci debet. Sed conclusio habet rationem finis, ratiocinium medii. Ergo.

Resp. *Dist. ant.* : Antequam actum ratiocinandi ponat, *neg.*; quum actu ratiocinatur, *subd.* : cognoscit conclusionem vi ratiocinii ipsius, *conc.*; independentem ab eo, *neg.* (563). Antequam medium terminum inveniamus, conclusionem profecto non cognoscimus; quum autem medium terminum nacti sumus, ejusque relationes cum extremis intuemur,

tunc jam actu ratiocinamur, et simul conclusionem cognoscimus.

575. Ad 1^m *Dist. maj.* : Si neque explicite, neque implicite sit notum, *conc.*; si saltem implicite sit notum, *nego*.

Dist. min. : Semper, *nego*; (562) sæpe, *subd.* : quum quærit ratiocinari, *conc.*; quum actu ratiocinatur, *nego*. Nam quum actu ratiocinatur, conclusionem jam tenet (222),

Consequenti applicetur distinctio majoris.

Ante ratiocinii actum, quum ratiocinari quærimus, semper elementa conclusionis explicite prænoscamus (564, seq.); quædam nihilominus actu, quædam actu vel habitu: conclusionem autem ipsam cognoscimus implicite in principiis, et hanc quærimus expromere ac facere explicitam per ratiocinii actum. Sed quomodo? Quærendo hæc ipsa principia, quæ conjuncta conclusionem gignunt; quod est, medium inquirere terminum. Cæterum memorandum est semper, quod supra diximus (562), inveniri crebo conclusionem etiam non quæsitam.

576. Ad 2^m *Dist.* Quod est omnino ignotum, *conc.*; quod est ignotum explicite, et implicite notum, *nego*.

Quum v. gr. hominem quæro mihi cæteroqui ignotum, de quo tamen scio, quod in tali domo sit, et tali nomine vocetur, profecto in his quæ scio, implicite ipsum cognosco; nam per hæc indicia ipsum inveniam, et quum invenero, cognoscam. Item dic de conclusione. Scio ipsam inveniri per quædam principia mihi nota, etsi ea mihi actu nota non sint. Quæro actu cognoscere hæc principia, et sic conclusionem invenio.

577. Hinc patet quomodo solvatur celebre illud Menonis apud Platonem dilemma (1), quod Aristoteles commemorat (2), atque ex his principiis refutat. Dilemma est hujusmodi :

Quod quæris ad cognoscendum, vel scis vel nescis. Si scis, frustra quæris; si nescis, etiam quum inveneris, non agnoscas. Solvitur autem distinctione supra posita, cognitionis

(1) In *Menone*.

(2) I *Post.* c. 1.

explicitæ seu actualis, et implicitæ seu virtualis, ut patet.

578. Ad 3^m *Dist. maj.* : Quantum sufficit ad eligenda et adhibenda media, *conc.*; ultra hoc, *nego*.

Et concessa minori, *distinguo consequens* eodem modo.

Ante ratiocinium videlicet cognoscitur conclusio sub ratione generica conclusionis de tali subjecto, cui dubium est quodnam prædicatum conveniat. Et hæc cognitio sufficit, ut quærere conclusionem determinatam possis.

579. Inst. I. Explicite plane conclusionem cognoscit, qui cognoscit subjectum ac prædicatum ipsius, et medium terminum. Sed qui accedit ad ratiocinandum, cognoscit hæc omnia.

Resp. *Dist. maj.* : Qui omnia hæc cognoscit actu, ac simul mutuas eorum relationes, *conc.*; qui quædam eorum actu, quædam habitu cognoscit, et mutuas eorum relationes non cognoscit, *nego*.

Et *contrad. minori, nego cons.* V. dicta in IV art. (564, seq.).

* 580. Inst. II. Impossibile est ponere præmissas, si conclusio diserte non cognoscitur. Nam ideo ponuntur tales præmissæ, ut talis et non alia conclusio sequatur.

Resp. *Dist.* : Impossibile est affirmare præmissas si, etc. *trans.*; invenire medium, quod præmissarum apprehensionem determinet, *nego*.

Quando præmissas judicando ratas habemus, multoque magis quum voce illas promimus, profecto jam conclusionem cognovimus. Etenim statim ac medium terminum nacti sumus, ejusque relationes cum extremis perspeximus, extremorum quoque inter se relationem illico deprehendimus. Hic est actus cognoscitivus ratiocinii proprius (223, 2^o).

Affirmatio autem præmissarum hoc unum supperaddit, quod nos determinet ad conclusionem affirmandam.

581. Inst. III. Singularia cognoscimus ante universalialia, et minus universalialia ante magis universalialia. Sed conclusio est minus universalis quam præmissæ, nam in illis continetur. Ergo.

Resp. *Dist. maj.* : Si sermo sit de universalibus ideis, et

quidem reflexis (538) efformandis, *conc.*; si sermo sit de deductione judiciorum ex aliis judiciis, *nego*. Nam quod immediate non cognoscitur, et ex alio deducitur, in illo includatur oportet. Judicium autem quod aliud judicium includit, profecto magis universale est. Est autem purum sophisma, si ex judicio minus universali magis universale deducas.

582. Inst. IV. Veritas judiciorum universalium a singularium veritate pendet. Ergo. Ita Tracy (1).

Resp. *Dist. ant.*: Si sermo sit de judiciis analyticis, *nego* (554); si de experimentalibus, *subd.*; quando utimur inductionis argumento, *trans.*; secus, *nego* (572).

Notetur 1^o quanquam cognitio quæ continetur judiciis experimentalibus, pendeat a singularium cognitione, quia acquiritur per inductionem, negari tamen posse atque adeo debere, quod in se veritas illorum ab his pendeat. Non enim a judicio aliquo dependet naturalium rerum constitutio, sed a sapientia ac decreto creatoris.

Notetur 2^o in ipsa argumentatione inductiva singularium judiciorum veritatem esse solummodo materiale illius fundamentum, non vero formalem rationem, quæ universalem propositionem certam faciat. V. alibi dicta (305).

583. Obj. III. Ratiocinium ab immediata intuitionem non differt. Nam

1^o Impossibile est majoris præmissæ et minoris veritatem percipere, quin conclusionis quoque veritas cognoscatur: hæc enim in illa præsupponitur.

2^o Revera omnis syllogismus est petitio principii. Ita Dugald-Stewart (2).

Resp. *Dist.* assertum: quatenus est intuitus consequentiæ, *conc.*; quatenus est cognitio consequentis, *nego*.

Intuitus consequentiæ est intuitus identitatis inter præmissas est conclusionem. Est ergo intuitus immediatus. Sed cognitio conclusionis est mediata, quia comparatur vi hujus

(1) *Idéologie*, vol. III, ch. I.

(2) *Elements of the Philosophy of the human mind*. T. III, ch. 2, sect. 1, in fine.

intuitus, post inventum medium terminum, et positas præmissas.

Ad 1^m *Conc.* et *Dist. rationem additam*: Conclusio præsupponitur in præmissis, i. e. includitur in illis, *conc.*; cognoscitur in illis, *subd.*: ut ex eis dimanans. *conc.*; secus, *nego*.

Ad 2^m *Nego*. Petitur enim principium a disputante, quum alterius præmissæ loco aliquam usurpat propositionem et tanquam certam assumit, quæ et conclusionem notior non est, et cum aperte conclusionem contineat, eodem modo ac ipsa dubia est ac rejicitur (344). Ratio igitur hujus sophismatis non est in hoc, quod conclusio in præmissis contineatur, sed quod in talibus contineatur præmissis, quæ æque ac conclusio dubiæ sunt, et nihilominus ut certæ assumantur. Quod quidem, ut patet, ex syllogismi natura nullatenus oritur.

ARTICULUS VII.

De certitudine conclusionis.

584. PROPOSITIO III. *Cognitiones per ratiocinium comparatæ falsæ esse non possunt, si tamen ratiocinium et præmissis constet veris, et ad legitimam formam sit exactum: quibus de rebus cum certitudine decernere possumus.*

Theorema hoc, quoad primam partem, est veritas indemonstrabilis. Demonstraretur enim per ratiocinium, adeoque cum petitione principii. Sed demonstratione non eget, cum sit immediate evidens, plane ut principia illa, quibus innititur syllogismi artificium (229, 1^o). Si enim ratiocinium sit formaliter rectum, conclusio in illis continetur. Si ergo præmissæ sunt veræ, etiam conclusio vera sit oportet.

585. Hæc conclusionis identitas cum præmissis est includibile illud motivum, quod mentem cogit, ut si veras judicet præmissas, assentiri conclusioni necessario debeat. Sibi enim contradiceret, si postquam conclusionem in præmissis implicite affirmavit, affirmare detrectaret explicite, quum ipsa e præmissis enucleata prodit.

586. Ut autem mens hanc experiatur necessitatem, duo,

ut patet, certo tenere debet : 1^o præmissas esse veras ; quod quidem ex aliis veritatis fontibus innoscitur : 2^o ratiocinii deductionem esse legitimam ; id quod attentio ad ratiocinii formam adhibita manifestat. Quod si unum aut alterum dubium sit, id ipsum attentio diligens certo manifestabit.

Potest igitur constare nobis, utrum impletæ sint conditiones, quæ requiruntur, ut ratiocinii conclusio tanquam vera haberi possit.

ARTICULUS VIII.

Difficultates.

587. Obj. I. Ratiocinium in errorem plurimos adduxit ; imo omnium errorum patrociniū ratiocinio suscipi potest, omnis veritas impugnari : eodem ratiocinii telo defendunt philosophi contradictorias sententias, etc.

Resp. *Dist.* : Hæc omnia, et his similia provenerunt a ratiocinio legitimo et veris præmissis innixo, *nego* ; a ratiocinio, cui saltem alterutra ex his conditionibus deesset, *conc.*

588. Obj. II. Saltem fatendum est, non posse nos unquam esse certos, an duplex illa conditio adsit. Etenim

1^o Multi ex iis qui in errores inciderunt, putabant se recte ratiocinatos esse, et tamen errarunt.

2^o Deinde certitudo isthæc acquireretur per ratiocinium, adeoque per circulum vitiosum.

3^o Nihil certo ac perfecte cognoscimus. Ergo omne ratiocinium de incertitudine atque imperfectione cognitionum nostrarum participet necesse est (1).

Resp. *Neg. ant.*

Ad 1^{am} *Dist.* : Ita existimabant non posita debita attentione, *conc.* ; ea posita, *nego*.

Ad 2^{am} *Nego*. Nam rectitudo consequentiæ immediate patet intuitu. Præmissarum autem veritas vel ex aliis veritatis fontibus immediate manifestatur, vel si ope ratiocinii colligitur, dependet tandem aliquando a veritatibus immediate evidentibus (423).

(1) Has et superiores difficultates urget Felicitas De la Mennais in opere cui titulum fecit : *Essai sur l'indifférence en matière de Religion*. Vol. II, ch. XIII.

Ad 3^{am} *Nego ant. quoad 1^{am} partem* : nihil enim certo cognosci, ipsum scepticorum dogma est.

Quoad 2^{am} partem dist. : Nihil perfecte cognoscimus, i. e. comprehensive (48), *conc.* ; clare, distincte, certo, *nego*.

589. Obj. III. Ratiocinii materiam suppeditat memoria. Sed de memoriæ testimonio semper dubitare possumus. Nam memoria sæpe fallax invenitur.

Resp. *Dist. maj.* : Aliquando, *conc.* ; semper, *nego*. Et *nego min.*

Quando ratiocinii præmissæ sunt propositiones immediate evidentes, nullum habet memoria locum ; quia si eæ sunt a posteriori, habetur præsens experientia ; si sunt a priori, earum veritas actu semper deprehenditur, quotiescunque illæ menti occurrunt. Habet solummodo locum memoria, quando una vel altera præmissa utimur alias cognita, vel per experientiam vel per ratiocinium vel per aliorum testimonium.

Ad rationem additam antequam respondeamus, quædam de memoria intellectiva, quantum ad rem nostram pertinet, præmittere opportunum erit.

ARTICULUS IX.

De memoria ut est ratiocinii auxiliaris.

590. Ad rem præsentem satis est memoriam definire : *vim reproducendi conceptus olim habitos, eosque recognoscendi*. Fit porro reproductio conceptus, quum occasione perceptionis præsentis, reviviscunt iterum ac se menti sistunt aliæ ideæ, cum conceptu illo jam associatæ. Recognitio vero, quum animus ad reproductarum idearum series attendens, in iisque conceptum præsentem contuens, conscius fit se alias ipsum habuisse.

591. PROPOSITIO IV. *Memoria, quamvis debilitari aut etiam deficere possit, nunquam tamen per se sanam rationem in errorem adducit.*

Facultatis hujus fidelitatem, quam proprie demonstrari non posse facile intelliges, clare perspicies

1^o in ipsa hujus facultatis natura. Nam cum reproductione

et recognitione ejus actus constet, nec in illa nec in ista potest esse falsitas ante judicium.

Non in reproductione, ut patet. Nam reproductio ideæ non potest aliam habere falsitatem, quam quæ omnibus ideis per se conveniat. Sed ideis per se nulla falsitas convenit (380, 4^a). Ergo.

Non in recognitione. Recognitio enim est mera apprehensio comparativa, qua percipimus identitatem præsentis ideæ cum ea quæ in reproducta serie continetur. Apprehensio autem comparativa falsitatem inducere per se non potest (380, 5^a).

2^o Perpetua experientia. Nam perpetuo contingit, ut ideam quam memoria suggerit, cum præsentis rerum experientia comparantes, utramque omnino convenire deprehendamus; ad quod illustrandum duo hæc sufficient exempla:

a) Memoria mihi repræsentat templum v. gr., forum, villam, amici domum, certa quadam forma composita, certum partium ordinem habentia, his atque illis ornamentis decorata, etc.; viæ datæ longitudinem et tempus ad eam percurrendam necessarium; libri ejuspiam materiam, et rerum quæ in eo pertractantur, ordinem; et similia. Adeo loco hæc, viam relego, librum aspicio; et percipio omnia se habere ut memoria suggerit. Et si quando ex errore unum locum subeo pro alio, aut in unam viam pro alia me trado, ipsa discordantia cum memoria me erroris monet, ac deprehendo me vere errasse.

b) Quum loqui volo, et res quasdam significare cupio, certas mihi memoria suggerit voces, tanquam signa apud homines, quibuscum versor, ad illas res significandas instituta. Eas profero voces, et quicumque me audiunt, id quod volebam intelligunt. Ergo et mihi loquenti, et iis qui me audierunt, memoria fidelis fuit (1).

392. Nihilominus memoria fallax dici solet et labilis, ut in opposita difficultate inculcatur (389). At nequit profecto dici fallax, quia aliquando affectionem nunquam habitam

(1) Cf. doctum æque ac festivum opus R. P. J. Bapt. Pianciani: *Saggi filosofici*. Roma 1855. Saggio I, Dialogo VI.

tanquam habitam recognoscat (391, 1^o), sed solum quia reproductendi vis, vel ex parte vel ex toto, circa aliquid deficere solet. Unde de quibusdam omnino silet memoria, quædam alia refert ex parte, nonnullis circumstantiis notisque oblitteratis, quædam denique obscure aut confuse restaurat. Jamvero hi omnes defectus negativi sunt, et efficere quidem possunt ut ex metaphora quadam memoria infidelis dicatur, non tamen jus præbent, ut fallax ac mendax ejus testimonium aliquando æstimetur. Cæterum memoriæ defectus, attentione aliqua adhibita, facile advertuntur; quod si fiat, in errorem per se inducere non possunt.

Ex his patet, quid ad objectam difficultatem responderi debeat. Memoria sæpe fallax invenitur: i. e. quatenus deficit in reproductendo, *trans*.; quatenus fallatur in recognoscendo, *nego*.

393. Ex his item animadversionibus sequentia documenta eliciuntur.

1^o Generatim nunquam aliquid negandum est ex eo præcise, quod de illo memoria conticescit; nisi forte suppetant motiva illud negandi, vel memoria positive suggerat aliquid quod illud excludit.

2^o Quum reproductio obscura, vel dubia recognitio est, suspendendus assensus, et res aliunde indaganda v. gr. ratiocinando vel alios interrogando.

3^o Attendendum, ut a memoriæ relationibus discernamus supplementa illa, quæ paulatim iis, ut solet, inseruimus ubi reproductio deficiebat, vel imaginationis fœtibus utendo, vel ratione divinando. De his, si attendamus, nunquam repetimus recognitionem nos habere.

4^o Attendendum quoque, ne cum circumstantiis facto quod memoria refert associatis, confundamus circumstantias, quæ associatæ sunt memoriæ facti alias habitæ, ex eo quod in iis versaremur quum facti memoria instaurata fuit.

5^o Omnia complecti hoc uno præcepto possumus. Nunquam memoria erit tibi erroris occasio, si affirmaveris id ipsum ac solum quod memoria recognoscit, eoque modo quo recognoscit.

CAPUT VII.

DE AUCTORITATE.

ARTICULUS I.

Prænotiones.

594. Qui propriam cognitionem alteri, sive affirmando sive negando significat, *testis* dicitur; et ipsa cognitionis significatio, *testimonium*. Assensus quem alterius testimonio præstamus, *fides*, id autem, quod testi fidem conciliat, *testis auctoritas* nuncupatur. Quum testanti fidem adhibemus, *credere* illi dicimur; quia veritatem non aliunde cognoscentes, nosmet nos illi committimus, et in ipsius dicto conquiescimus.

595. Testimonium, si personam spectes testantis, aliud est *divinum*, aliud *humanum*. Deus enim et homines docere nos possunt quæ ignoramus. Si vero materiam consideres circa quam testimonium versari potest, aliud est *dogmaticum*, seu doctrinale, aliud *historicum*.

Testimonii dogmatici materia est *doctrina*, i. e. cognitio quæ idearum comparatione sive immediata sive mediata, ab homine acquiritur. Historici vero *factum*, i. e. aliquid quod testis sensu cognovit. Facta porro alia sunt *transeuntia*, ut eclipsis vel prælium; alia *permanentia*, ut existentia neapolitanæ urbis vel Ponti Euxini, alia *periodica*, ut fluxus maris. Facta *universalia*, i. e. leges physicae, quoniam eorum cognitio inductione perficitur (308), ad doctrinam revocantur.

596. Cæterum omne testimonium, sive divinum sive humanum, sive dogmaticum sive historicum, cognitionem affert non scientificam, sed historicam (Prol. II). Non enim nos docet cur res sit, sed solummodo rem esse significat. Unde *fides* opponitur *scientiæ*. Opponitur quoque *experientiæ*. Experientia enim, quamvis et ipsa non eo usque pertingat, ut indicet cur res sit, cognitionemque per se producat mere historicam; rem tamen ipsam in se cognoscit, adeoque est intrinsecum veritatis indicium. Fides autem nullo modo rem attingit, sed extrinseco illius signo tota innititur, quod est testantis auctoritas.

597. Auctoritas generatim est *jus aliquid imponendi*. Testis auctoritas est jus imponendi fidem. Habet autem testis auctoritatem exinde, quod dignus esse cognoscitur cui fides habeatur. Dignus est porro cui fides habeatur, qui jus habet, ut et veritatem assecutus esse, et vera loqui existimetur. Igitur et *scientia* et *veracitas* testis *cognita* auctoritatem illius constituunt. Si hæc duo certa nobis sint, auctoritas sufficiens est, et certitudinem gignere potest. Si alterutrum probabile tantum sit aut ignotum, insufficiens per se est auctoritas ad assensus firmitatem obtinendam.

ARTICULUS II.

De fidei divinæ utilitate et necessitate.

598. Quoniam non omnia sensibus usurpare nostris aut ratiocinio assequi possumus, opportunissimum habemus utrique defectui in testimonio, tum dogmatico, tum historico supplementum. Per fidem enim quam testimonio adhibemus, aliorum cognitiones nostras facimus, easque in nostrum usum commodumque convertimus. Quam vero sit hoc supplementum utile omnibus, imo necessarium, sequentes propositiones ostendent.

599. PROPOSITIO I. *Veritates quæ humanæ rationis captum superant, cognosci aliter non possunt, quam fide adhibita divinæ revelationis testimonio.*

Hujusmodi enim veritates neque experientia, neque immediata aut mediata idearum comparatione cognosci possunt, neque ex aliorum hominum doctrina primitus accipi. Si enim possent aliquo hujusmodi medio addisci, jam humanæ rationis vires non excederent. Esse autem tales veritates alio in loco probabitur; quanquam revera vix hoc probatione egeat, apud eum cui compertum sit, et Deum infinitum, et humanam mentem finitam esse. Interea hoc unum erat evincendum: si sunt veritates hujusmodi, ad eas ediscendas divinum testimonium docens esse absolute necessarium.

600. PROPOSITIO II. *Utile est humano generi ac summo opere conveniens, ut veritates quoque naturalis ordinis, quæ ad cogni-*

tionem sive Dei sive moralium officiorum pertinent, fide divina accipiat.

Attende in primis quid asseramus, quid non.

1° Veritates quæ ad cognitionem sive Dei sive naturalium officiorum pertinent, spectari possunt vel collective vel seunctim; et in his considerare possumus eas quæ fundamentales sunt, easque quæ ex his fundamentalibus, tanquam ex principiis, deductione plus minusve complexa colliguntur. Nos dicimus conveniens fuisse, ut a Deo revelarentur eæ præsertim veritates, tum theologi ordinis, tum moralis, quæ deductione cuique non obvia cognoscuntur.

2° Homines quoque et collective et singillatim considerari possunt. Nostra assertio est de hominibus collective consideratis, attenta nihilominus ea ingeniorum ac conditionum diversitate, quæ in humano genere semper deprehenditur.

3° Contendere possemus ad complexionem veritatum de qua loquimur, assequendam, divinam revelationem esse humano generi, sub diversis hypothesibus, seu physice, seu moraliter necessariam. Sed quoniam ad oppositos errores, qui in hac re apud recentiores invaluerunt, vitandos, plura essent distinguenda, plura declaranda, neque hæc disputatio ad institutum nostram necessaria est, a controversia hac consulto abstinemus.

4° Illud tamen in tuto collocatum interim volumus, longissime nos abesse a sententia illorum, qui ad omnem prorsus veritatem assequendam, divinæ revelationis opem esse homini necessariam putant. Quin imo indubitatum esse existimamus, neque ad omnem veritatem ordinis theologi ac moralis cognoscendam, divinam revelationem homini necessariam esse; ad easque nominatim assequendas veritates, quæ primitivæ sunt in hoc ordine ac fundamentales, individualement rationem per se sufficere.

601. Assertio demonstratur a s. Thoma in Summa theologica (1), et in Summa contra gentes (2).

In Summa theologica ita disserit:

(1) 2. 2. q. II, art. IV.

(2) Lib. I, c. IV.

« Necessarium est homini accipere per modum fidei, non solum ea quæ sunt supra rationem, sed etiam ea quæ per rationem cognosci possunt. Et hoc propter tria.

« Primo quidem, ut *citius* homo ad veritatis divinæ cognitionem perveniat. Scientia enim, ad quam pertinet probare Deum esse et alia huiusmodi de Deo, ultimo hominibus addiscenda proponitur, præsuppositis multis aliis scientiis; et sic nonnisi post multum tempus vitæ suæ homo ad Dei cognitionem perveniret.

« Secundo, ut cognitio Dei sit *communior*. Multi enim in studio scientiæ proficere non possunt, vel propter hebetudinem ingenii, vel propter alias occupationes, et necessitates temporalis vitæ, vel etiam propter torporem addiscendi; qui omnino a Dei cognitione fraudarentur, nisi proponerentur eis divina per modum fidei.

« Tertio propter *certitudinem*. Ratio enim humana in rebus divinis est multum deficiens. Cujus signum est, quia philosophi de rebus humanis naturali investigatione perscrutantes, in multis erraverunt, et sibi ipsis contraria senserunt. Ut ergo esset indubitata et certa cognitio apud homines de Deo, oportuit quod divina eis per modum fidei traderentur, quasi a Deo dicta, qui mentiri non potest. »

Jam quod S. Thomas ex his rationibus necessarium esse concludit, quocunque tandem sensu hæc necessitas intelligenda sit, hoc certe utile ac summopere conveniens dicere licebit. Ergo.

* 602. Opponi posset I. Si ad has veritates, quæ homini adeo necessariae sunt, cito, communiter ac certo addiscendas, magisterium divinum requiritur, facile colligi poterit 1° naturam deficere in mediis necessariis suppeditandis; est enim necessaria humanæ naturæ ejusmodi veritatum cognitio:

2° inde etiam concludere possemus, Deum, qui sibi debet ut media ad finem utilia cuique elargiatur, teneri ad eas veritates revelandas; cum tamen revelatio divina sit prorsus gratuita.

Resp. ad 1^m *Nego*. Si enim sermo sit de statu puræ naturæ, potest homo ea quæ necessaria sunt ad naturalem finem assequendum, cognoscere, præcipuas nempe veritates theologicas et morales (600). Complexio vero omnium hujusmodi veritatum non est simpliciter illi necessaria, sed necessaria tantummodo ad finem suum perfectius assequendum. Si qui vero ad eas omnes cognoscendas physica impotentia laborarent, earum ignorantia ipsis imputanda non foret.

* 603. Si vero sermo sit de statu supernaturali, in quo homo realiter constitutus est, extra controversiam esse debet cognitionem tum supernaturalis finis, tum mediiorum quibus illi obtineri potest, esse homini per se, non physice solum, sed metaphysice impossibilem: repugnat enim rationem humanam ad cognitionem hanc per se assurgere posse. Sed non idcirco natura deficit in necessariis sibi, at deficit solum in necessariis ad id quod est supra se.

* 604. Ad 2^m *Nego*. Deus enim tenetur, i. e. debet sapientiæ suæ, bonitati ac justitiæ, ut ea homini præstet, quæ ad naturalem finem assequendum sunt illi physice necessaria, quæ sane unicuique largitur Deus (600). Si vero ea insuper non largiatur, quibus homines hunc finem perfectius assequi possint, non requirit profecto, ut ipsi eam perfectionem assequantur, quam physice assequi per se nequeunt.

* 605. Addendum et illud: providentissimum Deum, quin ipse per se revelatione humanum genus doceat, conferre posse singulis hominibus alia subsidia interna et externa ordinis naturalis, quibus illi adjuti atque directi, ad cognitionem et executionem eorum, quæ ad finem naturalem etiam perfecte consequendum forent necessaria, pertingere possint. Igitur etiam ex hoc capite Deus non tenetur ad hasce veritates revelandas. Quæ autem supra naturam sunt, nullo modo sunt naturæ debita.

* 606. Opp. II. Humanum genus potest has veritates addiscere a philosophis. Ergo non est illi necessaria revelatio, neque ad hoc, ut eas cito, communiter et cum certitudine assequatur.

Resp. *Nego*. Primo quidem, quia moraliter impossibile est ipsis philosophis, ut per se has veritates complete ac sine erroris admixtione teneant.

Secundo vero, quia moraliter impossibile est, ut philosophi universum genus humanum in his erudiant, ex defectu potissimum *consensionis* in opinando, et *autoritatis* in docendo. Quod etiam re factoque comprobatur.

ARTICULUS III.

De fidei humanæ utilitate et necessitate.

607. PROPOSITIO III. *Utile est omnibus, imo plane necessarium, ut testimonio humano, sive dogmatico sive historico, fidem in pluribus adhibeant.*

Perspicuum est ante omnia, in primis rationalis vitæ initiis esse fidem homini plane necessariam. Nascimur enim sine experientia, nec ratione recte uti possumus, dum in infantia versamur. Eas igitur veritates, quæ in iis quoque initiis necessariae scitu sunt, quasque nec experientia nec ratiocinio tunc assequi datur, non aliter quam majorum auctoritate confisi, addiscere possumus. Sunt autem sane plurimæ hujusmodi veritates, tum speculativæ, tum practicæ, tum doctrinales, tum experimentales. In his igitur omnibus fides præcedat oportet, quæ rationi hominem præparet (1).

608. Probatur conclusio generatim, ac primo quod spectat ad *fidem dogmaticam*.

1^o Multæ sunt veritates eæque ad vitæ tum physicæ, tum moralis usus necessariae, vel saltem apprime utiles, quarum scientificam cognitionem maxima hominum pars sibi comparare nullatenus potest, sive ob ingenii limitationem, sive ex mediiorum defectu, sive quia aliis occupationibus distinentur. His igitur omnibus nullum medium superest, ad illas cognitiones acquirendas, nisi fides.

Illi ipsi qui docti dicuntur, multis in rebus rudes sunt et indocti. Quis enim est qui omnium scientiarum latebras inspexerit, aut qui omnium quæcunque assumere tanquam

(1) « Divina providentia et ineffabili beneficentia geritur animæ medicina, cum auctoritas præcedit, et rationi præparat hominem. » S. Aug. *De vera Religione*.

certa debet, rationes intimas perscrutari valeat? In multis ergo et ipsi docti fidem peritis adhibere debent; mathematicus v. gr. medico, medicus legisperito, legisperitus theologo, etc. Eoque magis hoc necessarium est, quod cum scientiæ omnes agnatione quadam sint ad invicem connexæ, nulla est scientia, quæ aliarum scientiarum auxilia quandoque non requirat.

609. 2º In iis quoque cognitionibus, quas ratione ipsi nostra assecuti sumus, non raro aliorum testimonium utiliter accedit investigationi nostræ, imo sponte requiritur a nobis, ut certitudinem adipiscamur. Experientia enim novimus, errori nos esse obnoxios, tum quoad ratiocinii materiam, tum quoad formam; præsertim ubi materia difficilis est et implexa, ac proluxa deductionum series. Atque inde est, quod crebro formido aliqua nos habeat sollicitos de conclusionum collectarum veritate. Timemus enim, ne forte in sophismata inciderimus, aut ne aliquid quod falsum aut dubium sit, tanquam certum assumpserimus, sive ex defectu diligentiae, sive ex aliquo præiudicio aut cupiditate. Nec cessat formido, donec peritorum ac prudentium accedente testimonio, eos inveniamus nobiscum convenire.

610. Probatur secundo conclusio, quoad *fidem historicam*.

Cum hominis cujusque præsentia ad certa quædam temporum locorumque spatia determinata sit, quæcunque extra breves hosce limites contingunt, experientia ipsi nostra attingere non possumus. Ea igitur ignota semper nobis forent, nisi alienæ experientiæ subsidiis uti possemus. Hinc

1º Ignota essent nobis quæcunque præteritis temporibus acciderunt, ipsaque coæva facta, maximam partem.

2º Veritates multæ experimentales, nisi fidei adjumenta quæreremus, non possent universaliter affirmari. Fiunt enim universales per inductionem (304), quæ multa supponit cognita facta: horum autem maximam partem non experientia propria sed testimonio cognoscimus.

3º Pleræque scientiæ, præsertim physica, puta chimia, historia naturalis, physiologia, geographia, astronomia et cæteræ hujusmodi, suis fundamentis, aut saltem præsidiiis maximis carerent. Multas enim supponunt observationes, multa experimenta, quæ iterari, saltem ab unoquoque, non possunt. Hæc ergo non aliunde quam ab aliorum testimonio accipiantur necesse est.

4º Ipsa sæpe physica certitudo nulli usui esset sine fide. Certus es v. gr. te Romæ esse. Cur inquam? Repones: quia Romam video. Sane; at si a te ipso inquiras, unde tibi certum sit, urbem hanc quam conspicias, Romam esse, tandem aliquando reperies, id te credere auctoritati testantium.

5º Denique eorum certitudo factorum, quibus omnis societas, tum domestica, tum civilis, tum religiosa innititur, undenam nisi ab hominum testimonio derivatur?

Ex his omnibus liquet, humanum testimonium esse cognitionum uberrimum fontem, eumque non modo utilem omnibus, sed apprime necessarium.

ARTICULUS IV.

De testimonii dogmatici auctoritate.

611. Imprimis quæcunque docentis Dei testimonio nituntur, sive dogmata sint sive facta, infinitam habent auctoritatem, et omni mentis obsequio infinite dignam. Deus enim ex essentia sua absolute infallibilis est, et ipsa veritas: repugnat ergo, quam quod maxime, ut vel decipi possit, vel decipere. Quæcunque igitur Deus revelet, metaphysicam habent certitudinem (407). Idem de Ecclesiæ docentis testimonio sentiendum est; quæ divinæ revelationis custos et magistra a Deo constituta, propter jugem ipsius assistentiam, in his quæ ad fidem moresque pertinent, nulli errori potest esse obnoxia, nec quod falsum sit docere. Si enim Ecclesia in docendo aliquando falleretur, non homines tantummodo errarent, sed Deus ipse deceptor esset, id quod æque repugnat ac Deum non esse.

Sed homo per se spectatus, et falli potest, et fallere: ex quo ejus testimonium auctoritate ad fidem faciendam idonea

non semper pollet: Pauca nunc de testimonii humani dogmatici auctoritate, deinde uberius de auctoritate historici.

* 612. 1^o Cujusvis hominis assertio dogmatica, *per se spectata*, nunquam aut fere nunquam firmam potest a nobis fidem exigere. Quamvis enim de alicujus hominis veracitate certi esse aliquando possimus, nunquam certi esse possumus ipsum non errare. Tamen si quis in aliqua disciplina valde versatus cognoscatur, et de ejus probitate non dubitemus, hujus auctoritas potest esse motivum sufficiens, quo ad assensum adhibendum prudenter moveamur. Atque hoc dictum volo de testimonio per se spectato: nam secus dicendum esset, si ad testimonium alterius accedat in me cognitio rei de qua agitur, ut mox videbimus.

* 613. 2^o Quæ de unius testimonio, eadem de plurium quoque in eandem sententiam consensu generatim dicenda sunt. Nisi quod quando plures sunt qui eadem docent, multo facilius constare nobis potest de eorum veracitate. Sententiæ autem veritas erit tanto probabilior, a) quanto plures sunt auctores qui eam tradunt; b) quanto magis ad invicem independentes; c) quanto aptiores cognoscuntur ad iudicium in materia de qua agitur, ferendum; d) quanto materia de qua agitur, est minus erroris obnoxia, minoremque præbet præiudicii locum.

* 614. 3^o Minus est erroris periculum in scientiis directis quam in reflexis, quia reflexa cognitio difficilior est majoremque conatum postulat, quam cognitio directa; item in scientiis quæ experientia innituntur, uti sunt scientiæ physicae, aut quæ signis juvantur, ut est mathesis, quam in abstractis et idealibus, ut est metaphysica. Ratio est primo, quia in illis rebus considerandis attentio facilius adhibetur; secundo quia difficilior potest in illis habere locum idearum confusio; tertio quia minus in illas influit imperfectio idiomatum; quarto demum quia illæ præiudiciis et cupiditatibus vix locum præbere possunt, non item aliæ.

* 615. 4^o Si in aliquam sententiam doctores omnes uniformiter conveniant, sententiæ auctoritas est profecto maxima. Quocirca prudenti assensui fundamentum sufficiens semper

præbet: imo rejicienda nunquam est, nisi evidens ratio aut experientia contrarium ejus, quod ipsi docuerunt, demonstret, aut saltem ostendat, cognitiones ad rem de qua agitur definiendam necessarias, iis defuisse. Hinc adagium: *peritis in arte credendum est*. Fatendum tamen neque universalem hunc doctorum consensum esse, saltem in quacunque materia (614), omnino infallibilem, ut quandoque experientia monstravit (1).

* 616. 5^o Hæc de auctoritate per se spectata. Quod si quis materiam de qua agitur, aliquo modo calleat, crebro poterit ex aliorum auctoritate dogmatica certitudinem perfectam assequi.

a) Quum quis solum generatim scientiæ alicujus objectum cognoscit, et methodum quæ in solvendis quæstionibus ad eandem pertinentibus adhiberi solet, cum ex hoc recte æstimare valeat, quantum in ea sit vel non sit erroris periculum (614), poterit nonnunquam ex plurium doctorum auctoritate omni erroris formidine depulsa, quod illi asserunt, habere certissimum. Ita v. gr. quicumque mathesim vel summis labiis degustavit, nunquam dubitare poterit de veritate theorematis algebrici, in quo asserendo aliquot experti mathematici conveniant, licet ipse demonstrationem ignoret.

b) Multo frequentius valet auctoritas ad dubium omne expellendum, ut in præcedenti articulo animadvertimus (609), quum de investigationum ac ratiocinationumstrarum rectitudine, aut de conclusionum veritate formido illa nos habet sollicitos, quæ et ex rei difficultate, et ex fallibilitatis nostræ conscientia exoritur. Facilius tamen aliorum auctoritas nos reddet certos de ratiocinationum rectitudine, quam de conclusionum veritate. Est enim difficilior in ratiocinationi forma uniformiter multos errare, quam quod aliquod falsum principium ex uno eodemque præiudicio, vel etiam ex præiudiciis diversis, multi peræque amplectantur. Inde est

(1) Cave ne hæc quæ de doctorum consensu generatim statuimus, applicari posses putes consensui SS. Patrum vel christianorum doctorum, in iis quæ ad fidem moresque pertinent. Illic enim consensus non est solum testimonium dogmaticum, sed simul est testimonium historicum, quo certi reddimur quid sentiat et doceat ipsa Ecclesia (611).

quod si in supputatione aliqua arithmetica vel unus nobiscum conveniat, ab omni dubio liberamur, cum e contrario etiamsi multi auctores in aliqua quæstione metaphysica aut morali idem nobiscum sentiant, non tamen idcirco statim dubium omne deponimus.

617. Ex dictis elici possunt sequentes regulæ :

1° Non est temere cuiquam docenti credendum, sed videndum prius quam auctoritate polleat.

2° Auctoritati sapientum, quum præsertim consentiunt, plurimus semper habendus est honor, nec negligendum unquam aut despiciendum quidpiam, quod ad scientificæ traditionis thesaurum pertineat.

3° Non ita tamen, ut pluris valeat auctoritas quam ratio.

4° Si ratio nobis occurrat, quæ sapientum consensio opponatur, antequam, auctoritate rejecta, quod nostra nobis ratio suggerit sequamur, ratiocinia nostra erunt accuratius expendenda, et fundamenta quibus ipsa innituntur, animo, quantum fieri potest, a præjudiciis omnibus remoto, ad examen semel atque iterum revocanda, conferendaque omnia cum uno aut pluribus quibus merito fidere possimus.

5° Generatim quum scientificam cognitionem quaerimus, tanti valere debet auctoritas, quanti valent rationes quæ ab auctoribus afferuntur.

6° Illæ quoque celebriorum auctorum sententiæ, quas aut falsas aut minus veras alii deinceps esse ostenderunt, si rite expendantur, magnam afferre solent utilitatem. Sapientum enim cogitatis mens ditescit, atque aliquid intellectui semper accedit fœcunditatis, et novarum quæstionum uberior materia suppeditatur.

7° Postremo quæ de auctoritate sapientum in quæstionibus scientificis diximus, dicenda ex æquo de auctoritate prudentum et experientium, ubi de rebus agendis consulitur. Imo in his maxime plurimum auctoritati concedendum est.

ARTICULUS V.

De sensu communi.

618. Quæstio nunc occurrit tractanda : utrum si omnes homines in unam conveniant sententiam, hæc consensio infallibilem sibi vindicet auctoritatem. Nemo non videt, communes hasce humani generis uniformesque sententias magna eminere auctoritate, præsertim si et in singulis constanter vigeant hominibus, et in omnibus retro ætatibus perpetuo vigerint. Non est igitur ab illis recedendum, nisi rationes evidentes matureque perpensæ nos cogant. At fatendum quoque est, neque hunc universalem, constantem, perpetuumque consensum, in genere loquendo, tanquam infallibile certitudinis motivum semper et indiscriminatum assumi posse.

619. Quod in primis experientia demonstrat. Etenim opinioniones de motu solis, de influxu siderum, de malis ominibus eclipsium et cometarum, de cœlis solidis, de antipodum impossibilitate, et aliæ hujusmodi, communi quodam constantique præjudicio mentes hominum occuparunt. Deinde, si quæ sunt causæ, quæ singularium judicium perturbare possunt et in errorem adducere, cur non possint et omnium simul mentes in transversum agere, si non repugnet eas in omnium mentes constantem aliquem influxum exercere? Atqui ex una parte animi cupiditates, et ex altera veritatis investigandæ difficultas, vel etiam sensuum illusiones, quæ homines singulos in errorem adducere solent, eodem modo in omnes influere possunt. Ergo quemadmodum possibilis est harum causarum universalis influxus, ita possibilis quoque est error universalis. Eodem plane modo, ac per se non repugnat omnes homines eodem tempore agrotos esse, quia non repugnat, morborum causas quæ in singulos agunt, in omnes eodem tempore agere. Non potest ergo sine restrictione dici, communes sententias, hoc ipso quod communes sunt, cum veritate sociari.

620. PROPOSITIO. IV. *Sunt quedam communia judicia, quibus falsitas subesse nequit.*

Si qua sunt communia judicia, eaque constantia atque perpetua, ut ostendi possit non aliunde illa quam a puro rationis fonte defluxisse, neque ullam vel causam vel occasionem, ex iis quæ rectam æstimationem perturbare solent, locum in iis progignendis habuisse, sane judicia illa in certissimarum numero veritatum habenda erunt. Secus dicendum foret, esse ipsi rationi intrinsecam erroris causam, nimirum rationem necessitate quadam sibi congenita ac pondere suo ad errorem deferri: quod si quis dicat, ille universali scepticismo latissimam aperit viam. In his igitur adjunctis, communis persuasio est certissimum veritatis argumentum.

621. Atqui sunt revera persuasiones hujusmodi: illæ videlicet quæ vel circa prima et immediata principia versantur, vel circa immediatas ac faciles eorum consecutiones. Quæ persuasiones in omnium animis alte defixæ, primitivas normas suppeditant, quibus vitæ ratio, tum intellectualis, tum moralis ac religiosa, tum etiam socialis, instituitur et conservatur, regitur et promovetur. Harum complexio sententiarum *sensus communis* dicitur, quia ita esse omnes sentiunt, ipsa propemodum percussi veritatis evidentia.

622. Cæterum minime egemus communis testimonii magisterio, ut veritates istas addiscamus, neque communis consensus auctoritate, ut ratas illas certasque habeamus. Sunt enim unicuique certissima propter eam, qua omnibus affulgent, evidentiam, ac possunt, si opus sit, excepto primo principio, ratiocinio illustrari vel demonstrari. Tamen negari nequit, communem persuasionem, ejusque auctoritatem valde conferre, ut veritates adeo necessariae facilius ac promptius addiscantur, mentique validius inhæreant.

In usu quoque philosophico, communis persuasio non modicam utilitatem habet: suppeditat enim motivum indirectum et externum, quo hæ veritates suaderi aliquando repugnantibus, aut saltem defendi possint. Quod quidem usuvenit, non circa prima et immediata principia, sed circa quasdam eorum applicationes, quarum evidentiam ægra dubitatione mens et pravis cupiditatibus irretita, vel quæsitâ

quædem obscuritate sibi ipsi obduxit, vel mala fide negat. Ad remedium igitur huic malo afferendum, aut saltem ad pudorem hujusmodi hominibus injiciendum (331, 9°), universalis consensionis auctoritas opportunissime adhibetur.

ARTICULUS VI.

De testimonii historici auctoritate.

623. Qui factorum alteri notitiam communicant, si propriis ipsi sensibus facti experientiam ceperunt, testes *immediati* sive *oculati* dicuntur; si vero ex aliorum testimonio, *mediati* sive *auriti*. *Coævi* nominantur, si eodem tempore vixere quo factum contigit; *suppares*, si proximo; *remoti*, si tardiori.

Si factum verbis significetur, testimonium appellatur *narratio*. Si illud plures testes, iisque mediati sermone celebrent, incerto tamen teste immediato, hoc testimonium *fama* dicitur seu *rumor*.

624. Narratio vel etiam fama transmissa ad posteros factorum præteritorum notitiam iis communicat. Transmittitur autem *orali traditione*, *documentis* et *monumentis*.

Oralis traditio, est facti narratio per testium continuatam seriem ad nos usque voce transmissa.

Documentum, est facti testimonium scripto consignatum. Ad documenta pertinet *historia*, quæ est *facti memoria scripto consignata*.

Monumentum, est facti testimonium aliquo artis opere, ex materia quæ longius duratura sit, significatum et expressum.

625. Auctoritatem testium in factis non paucis firmissimam in nobis sæpe produxisse, atque adeo in dies producere certitudinem, unusquisque in se ipso experitur. Quis est qui dubitet v. gr. de Macedonis Alexandri, aut de Julii Cæsaris victoriis? aut utrum fuerit Tyrus, aut sit Pekinum? Hæc aliaque sexcenta adeo nobis certa sunt, ut nulla cavillatio possit ejusmodi persuasionis firmitatem labefactare. Imo, quoniam quædam facta constantia sunt (595), si quando ea, de quibus jam nobis per auctoritatem constabat, sensibus nostris usurpamus, nullo modo in nobis certitudo fit

firmitior. Quia videlicet solius vi auctoritatis omnem errandi formidinem jam animus deposuerat.

626. Hanc igitur fidei certitudinem rationabilem fuisse, experientia ipsa sensuum crebro confirmat. Sed ex altera parte, eadem magistra experientia, non raro didicimus, humanum nos testimonium decesse. Cur tamen his non obstantibus deceptionibus, firmam adhuc plurimis testimoniis fidem adhibemus? Videlicet quia sunt indicia quædam, quæ quando adsunt, nos certos reddunt, aut saltem probabile nobis faciunt, testibus nec scientiam facti deesse, nec veracitatem. Quænam sint hæc indicia, critica ars notat ac docet. Est porro ars critica, si in tota sua amplitudine spectetur: *ars expendendi vim motivorum, quæ ad judicandum impellunt*; adeoque tam late patet, quam materialis hæc logicæ pars in qua versamur; nihilominus sensu restrictiori et secundum communioris acceptionem definitur: *ars quæ normas tradit, ut de pondere usuque testimoniorum, quæcunque illa sint, rectum iudicium feratur*. Quæ et infinita propemodum res est, et subsidiarias artes multas scientiasque exposcit. Sed nobis satis erit, si quæ præcipua in illa sunt et fundamentalia, breviter exposuerimus.

ARTICULUS VII.

Prænotanda.

627. Tria in antecessum notanda :

1^o Facta quæ per historicam auctoritatem fieri certa possunt, sunt facta sensibilia et individua, quæ sensibus percipiuntur. Nam facta universalia (308), factorum causæ, fines, internique aliorum affectus, non historico hominum testimonio, sed rationis argumentis aut conjecturis, vel etiam harum loco, testimonio dogmatico cognosci possunt.

2^o Supponendum est, posse unumquemque, sensibus, ut natura fert, dispositis, et convenienter adhibitis, sensibilibus factorum certam notitiam capere (500, seq.).

3^o Supponendum quoque est, homines, quanquam libere agentes, modum tamen constantem et uniformem agendi in

quibusdam adjunctis communiter tenere. Exinde *leges* quas dicunt *morales* (308).

Quarum legum constantia nobis certa est; primo quidem quia, cum experientia deprehendamus eas vere ab hominibus servari, concludendum est homines ad ita agendum a natura disponi, quanquam salva libertate: dispositio autem quæ a natura promanat, constans est et uniformis. Deinde vero quia divinam sapientiam maxime decet, ut legum istarum constantia provideat: sunt enim illæ societatis humanæ ac civilis convictus omnino necessarium fundamentum, sine quibus nullum jam commercium inter homines possibile foret. Ex his legibus, hæ quæ in rem nostram faciunt attendendæ sunt.

628. 1^a Cum homo natura sua ad cognoscendam veritatem feratur, et suum bonum inquirat, *non omittit attentionem necessariam ad verum deprehendendum, quum ex eo aliquid sibi speret vel timeat eventurum: præsertim quum nec laborem nec studium hæc inquisitio affert; mulloque magis quum inquisitio ipsa affert voluptatem*.

2^a Ex eodem veritatis amore procedit, ut mendacium per se naturaliter turpe putetur, nullamque afferat delectationem; contra veracitas per se æstimetur ac per se placeat. Hoc est in homine naturale ac necessarium. Ex hoc autem et ex boni amore consequitur, *omnes homines amare ac querere veracitatis laudem, et nihil magis ægre ferre, quam mendaces haberi*. Atque hæc est lex moralis.

3^a Hinc homo, quemadmodum potest veritatem diligere et profiteri, etiamsi ea nullum emolumentum ipsi afferat, ita naturalem difficultatem experitur ad mentiendum. Quam difficultatem ut superet, physice necessarium est, ut aliquam boni vel utilis vel delectabilis rationem in mendacio apprehendat, ac sibi proponat. Non enim aliunde movetur homo ad agendum, nisi amore boni, aut, quod in idem recidit, timore mali. Moraliter autem necessarium est, ut *bonum quod in mendacio apprehendit, in ejus saltem æstimatione, difficultatis quam in mentiendo experitur, sit compensatio sufficiens*. Hinc adagium: *Nemo gratis mendax*. Revera non mentitur homo,

nisi timore inductus, aut vindicta, aut studio partium, aut lucri, honoris, joci cupiditate.

ARTICULUS VIII.

De certitudine parta per testimonium historicum.

629. PROPOSITIO V. *Testimonium historicum, certis quibusdam adjunctis septum et communitum, plenam jure fidem sibi vindicat.*

Si enim certo constare potest, testibus nec facti scientiam, nec veracitatem deesse, eorum testimonium plenam jure fidem sibi vindicat (597).

Atqui per adjuncta tum facti, tum testium, de utroque constare nobis certo potest. Ergo.

630. Probatur minor quoad primam partem: certo constare nobis potest de scientia testium. Hæc porro quæstio, cum agamus de facto sensibili, reducitur ad hanc: utrum constare possit, testium sensus in facto percipiendo recte fuisse dispositos et convenienter adhibitos. Jamvero ad rectam dispositionem quod spectat,

1° Supponi debet hominum sensus recte esse dispositos, nisi motivum suppetat dubitandi de opposito: nam recta sensuum dispositio naturalis est, vitium autem est accidentale, et deprehenditur.

2° Si testes sunt multi, inepta prorsus esset omnis dubitatio.

3° Sunt quædam facta, quæ etiam sensibus aliquo vitio laborantibus recte percipi possunt, ex. gr. urbis existentia aut ruina. Inde illud: *notum lippis*.

631. Sensus autem fuisse attente ac diligenter adhibitos constare potest

1° ex generali desiderio veritatem investigandi (638, 1°): præsertim quod factum sensibile, de quo nobis sermo est, et acueri solet cognoscendi desiderium, et maxime ab astantibus cognosci absque nimia inquisitione potest.

2° Multo magis constabit, si factum fuerit ex iis, quæ sine ulla diligentia percipi possunt, et nullum obijciunt errandi periculum.

5° Aut si fuerit factum publicum et illustre, i. e. tale quod omnium attentionem ad se converterit, ut magna victoria vel solaris eclipsis.

4° Quod si testes nonnulli fuerint inter cæteros, qui vel prudentia ac solertia præstarent, vel ad rem inquirendam peculiaribus motivis incitarentur; si diligentiolem attentionem facti cognitio postulabat, certum nobis esse poterit eam fuisse adhibitam.

5° Postremo si testes asserant se rem diligenter observasse, hoc erit certum, si de ipsorum veracitate constet: de qua jam est agendum.

632. Probatur igitur altera pars: certo constare nobis potest de testium veracitate,

1° quum testes multi sunt, iique ætate, natione, religione, studiis, ingenio, educatione, moribus diversi, et tamen in re testanda consentiunt. Etenim in ea adjunctorum diversitate,

a) ipsa in mentiendi uniformitas est moraliter impossibilis. Nam alii in ea multitudine invenirentur, qui artem simulandi callerent et impudenter mentiri didicissent, sed alii quoque qui vel simulare dedignarentur vel saltem constanter mentiri nescirent, multi insuper qui vel in ipso mendacio proferendo, aut pudore, aut hæsitazione, aut contradictionibus et secum ipsis et cum aliis, se ac cæteros mendaces proderent.

b) Testandi præterea concordia in iis adjunctis non potest aliam causam habere, quam facti veritatem omnibus exploratam. Secus existimandum foret, alicujus boni cupiditate omnes adductos fuisse ad mentiendum; etenim sine causa homines non mentiuntur (628, 3°). Atqui hoc nemo sanus existimaverit. Nam in ea adjunctorum diversitate, diversæ, imo et contrariæ sunt singulorum utilitates et necessitates, propensiones et cupiditates, quarum aliis mendacio satisfieri utique posset, aliis non posset. Si enim mendacium quibusdam utile esset, eisque vel gloriam vel lucra compararet, aliis inutile accideret, quibus nihil afferret commodi, aliis imo periculosum et noxium, ac dedecoris causa vel detrimenti. Insuper si his jucundum et delectabile, illis insipidum, aliis grave, aliis exosum atque abominabile foret. Igi-

tur magna certe istorum pars nullum habuit mentiendi motivum, magna quoque pars motivum habuit non mentiendi. Ergo non potuerunt omnes in commune mendacium convenire alicujus boni illecti cupiditate. Igitur sola veritas illos fecit concordēs.

Adverte tamen necessarium non esse, ut testes omnibus iis adjunctis quæ enumeravimus, differant; sed sufficere, ut differant in quibusdam. Quando vero de factis peculiaribus agitur, statim dignoscitur ex testimonii conditione, quænam cupiditates in conflictum venerint.

633. 2^o Etiam si testes pauci sint, si tamen rem enarrent coram iis; qui ex tali facto aliquid sibi sperent vel timeant, quique mendacium et deprehendere et redarguere facile possint, certa omnino est testimonii veracitas.

Nam a) in his adjunctis nemo quantumvis malus mentitur. Cum enim quisque mentiatur, ut alios decipiat, hi testes certi sunt se non posse quemquam decipere. Norunt præterea se non posse tuto mentiri, sed mendacii notam atque infamiam certo incursuros si mentiantur (628, 2^a).

b) Præterea illi quorum facti veritas interest, si norunt falsum esse quod dicitur, mentienti reclamabunt, contradicent, dictorum falsitatem demonstrabunt: si autem veritatem ignorant, veritatem investigabunt, mendacium detegent, atque in lucem extrahent (628, 1^a). Si igitur isti tacent, si consentiunt, si in medio eorum facti certitudo asseritur, stabilitur, et ad posterum usque inconsussa pervenit, quis unquam de facti talis veritate dubitare poterit?

634. 3^o Pone factum quod quidam testantur, contrarium esse opinionibus quibus ipsi imbuti sunt, parti cui favent, sectæ cui sunt addicti; insuper testimonium quod reddunt, neque gloriam, neque commodum, neque voluptatem ipsis parere, sed infamiam: bonorum jacturam, vexationes, cruciatus, mortem. Poteritne quidquam suspicari num forte hujusmodi testes cupiditate aliqua ad mentiendum adducantur? Tales testes fuerunt apostoli et martyres; illi testes immediati, iste mediati et ex auditu.

635. Ex dictis deducere potes, certitudinem hominum

testimonio partem, esse moralem (407), ut quæ in universalibus et constantibus hominum moribus nititur. Repugnat enim, posita morum humanorum (628) firmitate, testes in quibusdam adjunctis fuisse mendaces. Possent quidem homines absolute loquendo, imo et physica possibilitate, saltem ut plurimum, etiam in iis adjunctis aliter agere: moraliter tamen certum est aliter non agere: quia si in iis adjunctis mentirentur, verum amplius non esset homines non mentiri sine causa et in propriam perniciem: idcirco si quis supponat eos mentiri, isthæc suppositio est moraliter absurda. Posset etiam quandoque physicam includere repugnantiam, si nullum plane bonum mendacio obtinendum testis sibi proponere posset, et magna mala ex illo sibi proventura cognosceret. In hoc enim casu mendacium ipsi voluntatis naturæ repugnaret (628, 2^a).

636. Quandoque tandem quædam occurrunt adjuncta, in quibus si quis mendacium supponat, suppositio esset metaphysice absurda: v. g. suppose paulisper mendacium esse, quod mihi asserunt omnes: *existere Constantinopolim*. Sequeretur inde magnam humani generis partem me unum velle decipere sine ulla causa: quæ suppositio est moraliter absurda (635). Sed præterea cum hic consensus, absque prævia conspiratione, locum habere non potuerit, cumque conspiratio ista fuerit impossibilis, jam mendacium, quod supponimus, esset effectus proportionata causa destitutus. Repugnat autem metaphysice, existere effectum, sine proportionata causa. Ergo et mendacii hujus suppositio metaphysica repugnantia laborat. Idem dicendum quando mendacii suppositio divinam providentiam tolleretur, et generatim quotiescunque aliquam veritatem metaphysice certam imperetur (408, 4^o).

ARTICULUS IX.

* De probabilitate testimonii historici.

637. Non semper historicum testimonium certitudinem gignit, sed ut plurimum duntaxat probabilitatem, majorem minoremve, prout magis vel minus verisimile est, testes

nec deceptos fuisse nec voluisse decipere. Porra motiva quæ ad hanc probabilitatem æstimandam ponderari debent, alia sunt *positiva*, quæ fidem conciliant, alia *negativa*, quæ a fide absterrent. Alia item *ex parte facti* desumuntur, alia *ex parte testium*, alia *ex parte narrationis*.

638. I. *Ex parte facti*.

1° Quod est metaphysice impossibile, nulla auctoritate probabile fieri potest, ac sine ulla cunctatione rejiciendum est. Idem dicendum de iis factis, in quibus partes quædam seu circumstantiæ incohærentes et contradictoriæ deprehendantur. Nihilominus illud præ oculis habendum est, contingere quandoque, ut homines rudes improprie loquantur, et ex hoc impossibilia narrare videantur, itemque ut qui ex impetu loquuntur, aliquid omittant, quod si proferretur, apparentem facti repugnantiam tolleret. Idcirco in his casibus antequam narratio repudietur, explicationes par est quærere.

2° Quod est physice impossibile i. e. exploratis naturæ legibus contrarium, nisi auctoritas plena sit, difficilius creditur, quam quod est juxta consuetum naturæ cursum. Non tamen indiscriminatim omne factum hujusmodi rejiciendum est, sed majore solertia expendendum. Qua in re duo advertenda sunt: primo quidem, non omne id quod novum est, aut insolitum, aut incomprehensibile, naturæ legibus opponi; multi enim effectus naturales novi sunt, quia nunquam antea positæ fuerant conditiones, quas ad talem effectum natura requirebat; et multi sunt incomprehensibiles, quia eorum causa præternaturalis est, imo vero naturalis, sed occulta. Secundo, posse divinam potentiam naturæ legibus derogare: idcirco ubi ex adjunctis constat potuisse miraculum habere locum, factum non erit habendum incredibile.

3° Quod est contra exploratas morales leges, si de multitudine aliqua narretur, est plane rejiciendum, quia est moraliter impossibile: si vero de uno vel paucis individuis, non sine examine recipiendum, nam licet non sit moraliter impossibile haberi aliquas in moralibus legibus exceptiones,

tamen stat præsumptio pro earumdem legum constantia in quolibet casu, nisi oppositum probetur (408, 5°).

4° Si factum sit contrarium aliis factis certis, erit reprobandum, si facto probabili, erit utrumque accurate expendendum, eorumque probabilitates comparandæ; si adversetur cognitis alicujus gentis dato tempore moribus et opinionibus, præsumptio stat contra facti veritatem.

5° Cavendum tamen ne factum illico rejiciamus, quia cum præsentibus moribus et opinionibus non cohæret. Etenim mores populorum opinionesque temporum lapsu mutantur.

6° Facta demum quæ sunt observatu difficilia, vel quæ illusionibus esse possunt obnoxia, cum majori circumspectione sunt admittenda. Quæ publica sunt et illustria, multo facilius admitti possunt, quam quæ secreto dicta vel facta traduntur. Tutius item fides habetur facti substantiæ, quam peculiaribus et minutis circumstantiis, quas popularis rumor aut phantasia narrantis potest adjicere.

639. II. *Ex parte testium*.

1° Quod spectat ad scientiam:

a) Quanquam multa sint facta, ad quæ testanda homines sagaces, prudentes, ingeniosi, rerumque periti requirendi non sunt, quotiescunque tamen hujusmodi testes suppetunt, sive immediati ii sint sive mediati, præsumendum semper est, eos facti veritatem cognoscere potuisse. Hi enim et accurate res observant, et vulgi rumoribus non moventur; nec facile decipiuntur aut fraude aliena dum observant, aut credulitate propria dum audiunt.

b) E contrario qui imaginatione potius quam ratione præstant, vel qui simplices nimium et creduli alias reperti sunt, magna cum cautione audiendi sunt, ubi accurata observatio requirebatur, aut deceptio locum habere poterat. Illi enim rei veritati explorandæ sunt impares, his autem facile imponitur.

c) In quibusdam scientificis observationibus et experimentis parum fidei merentur, qui vel negligentes sunt et præci-

pites, vel præjudiciis imbuti, vel necessariis cognitionibus carent.

d) Testis coævus, oculatus, domesticus, quique in adjunctis ad observandum idoneis exstitisse probetur, maximam, cæteris paribus, meretur fidem.

e) Plurimi testes quos ab uno rem accepisse constat, non plus habent ponderis, quam ille solus a quo rem acceperunt.

640. 2º Quod spectat ad veracitatem :

a) Præsumptio generatim stat pro testis veracitate, nisi ratio occurrat suspicandi de opposito. Quia homo naturaliter fertur ad veracitatem, nec ab ea deficit sine motivo (628, 3º).

b) Nullam communiter fidem meretur, qui alias deprehensus est mendax. E contrario vir probus, quique semper verax repertus est, magna pollere debet auctoritate.

c) Qui partium studiosus agnoscitur aut præsumitur, in iis quæ favent parti cui est addictus, vel quæ parti adversantur alteri, merito dubium ingerit, ne saltem quædam exaggeret aut imminuat. E contrario inimici laus magno in pretio est habenda.

d) Universim qui spe vel metu adduci potuerunt ad testandum, digni vix sunt quibus fides habeatur, præsertim si venales sint, indigentes aut pusillanimes. Ast ex opposito magnam sibi vindicant fidem, qui spe vel metu retrahi potius a testando debuerant.

641. III. *Ex parte narrationis.*

1º Suspectus est testis, in quo nimia stili cura et elegantiae studium apparet; hic enim, si opus sit, certe non verebitur aliquid addere vel demere veritati, ut periodum faciat rotundam.

2º Facta quæ ad propositum aliquod probandum studiose a scriptoribus aptantur, accuratius expendenda; præsertim si longa et varia sit historia, et propositio non evidens. Qui ita agunt facile historiam a priori construunt; quod vitium in nonnullis recentioribus merito notatur.

3º Qui novitate percellere, et ad scenæ dramaticæ modum

lum narrationem aptare affectat, eum diffidentia excipiendus est.

4º Item qui affectu se duci, sive amoris sive odii, eosdemque affectus in aliis ciere se velle, palam facit.

5º Ei qui turpi adulationis vitio apparet infectus, nulla habenda fides.

6º Universim quæ *historice* narrantur stilo simplici et ingenuo, magnam habent probabilitatem, quæ *oratorie* minorem, quæ *poetice* minimam.

7º Magnum accedit testimonio robur, si testis facti circumstantias, sive temporis sive loci sive personarum, diligenter recenseat. Per hæc enim testis et accuratum se observatorem esse probat, et mendacis accusationem non timere.

8º Item si declaret quomodo in facti cognitionem venerit; et vel testes a quibus id accepit, designet, vel probet se eo tempore ac loco fuisse, ut testis oculatus esse posset, multoque magis si adfuisse affirmet viros probitate et amplitudine insignes, qui ea de re interrogari facile possint.

642. Quum testimoniorum conflictus deprehenditur, ac diversi diversa testantur, 1º accurate expendenda sunt eorum quæ narrantur, adjuncta omnia, ac videndum num discordia sit solum apparens, narrationesque diversæ conciliari possint.

2º Si nulla appareat possibilis conciliatio, æstimanda hinc inde, juxta principia supra posita (638-641), testantium auctoritas; iique præferendi, qui librat omnibus majorem sibi fidem mereri videntur; nisi forte utrumque testimonium propter auctoritatis defectum rejiciendum existimetur.

3º Notandum postremo, hæc valere de testimoniorum conflictu circa essentialia facti; si enim discordia sit solummodo circa quædam accidentalialia, id quandoque potius facti veritatem quoad substantiam confirmat: ostendit enim, nullam inter testes conspiracy fuisse. Ex opposito, quando suspicio est conspiracy ad mentiendum, diversitas circa aliquid accidentale, de quo testes interrogentur, omnem eis fidem adimit.

ARTICULUS X.

De traditione.

643. Hucusque generatim de testimonio historico. Superest ut generalia hæc principia iis speciatim mediis, quibus ad posteros hujusmodi testimonium dimanat, applicemus. Media hæc sunt *traditio, documenta, monumenta* (624). Primo de traditione.

644. Traditio, ut certam gignere possit fidem, debet esse 1° *perpetua*, i. e. talis ut traditionalis seriei annulos relegendo, ipsius caput ac principium in testibus immediatis factoque coævis reperiamus; 2° *ampla*, nimirum ut singulæ traditionalis seriei lineæ plures testes contineant; 3° versari debet circa *factum publicum et illustre*, quodque a multis cognosci debuerit.

Accedet adhuc majus traditioni robur,

a) si integra natio ejusque sapientes facti memoriam sancte custodiant;

b) multo magis si apud plures nationes, ac diversis in locis, eadem vigeat uniformiter traditio, saltem quoad facti substantiam;

c) si solemnibus cæremoniis ac ritibus, ludis publicis, festorumque dierum celebritate facti memoria recolatur;

d) si traditio oralis cum documentis ac monumentis ætatum præteritarum concordet;

e) si in proprio gentis idiomate, nomina quædam urbium fluminum, aut alia quæcunque, facti memoriam et quasi vestigium præferant.

645. PROPOSITIO VI. *Legitimæ traditioni falsitas subesse nequit.*

Si enim traditio supra positis ornetur dotibus, certum in primis est, testes facti coævus ejusdem facti notitiam sine erroris periculo acquirere potuisse.

Certum ex æquo est eos fuisse veraces, quum insequentis generationis hominibus facti notitiam communicarunt. Fuit enim impossibilis omnium conspiratio in mendacium, eaque ita constans et uniformis, ut mendacium a nullo audientium

detegi posset, aut a nullo eorum qui veritatem noverant, redargui. Quod facile probare poteris ex dictis superius de testium multitudine et varietate (632). Nec te fugiat illud: in traditionalibus lineis non solos esse viros, sed et matres, et amitas, et mariteras, ex quibus veritas facilius erumpit.

646. Hinc sequitur, generationem quæ primæ successit, nec fuisse deceptam, nec potuisse decipere insequentem tertiam.

Non fuit decepta: prima enim generatio, a qua facti notitiam accepit, fuit verax (645).

Non potuit decipere: quia conspiratio ad decipiendum in iis adjunctis supponi nequit, primo quidem ratione multitudinis (632); deinde vero quia prima generatio obstitisset. Etenim generationes hominum non ita sibi succedunt, ut altera penitus sublata, altera in ejus locum subintret, sed altera alteri sensim interseritur, seseque ita excipiunt, ut homines primæ, secundæ, ac tertiæ generationis aliquo tempore coævi sint. Succrescentes igitur tertiæ generationis juvenes non a patribus modo, sed et ab avis edocentur: adeoque decipi amplius a patribus non possunt. Quod si quis processu temporis aliquid a se confictum evulgaret tanquam a senibus acceptum, hic illico præter æquales suos, contradictores haberet et senes primæ generationis, et eos omnes adolescentes, qui ab hominibus primæ generationis edocti sunt.

Eodem pacto demonstrabis, nullam insequentium generationum aut deceptam esse, aut decipere potuisse, saltem quoad facti substantiam, si eadem perseveraverint, quæ supra posuimus adjuncta.

Quod si in aliqua traditione hæc adjuncta desint, certam illa fidem non faciet; ejusque major vel minor probabilitas ex generalibus principiis supra præstitutis (638, seq.) erit æstimanda.

ARTICULUS XI.

De documentis et monumentis.

647. Ut documenta idonea sint ad probandum, ante omnia ostendi debent 1° *authentica*, i. e. ad eum auctorem, ad

eamque ætatem pertinentia, cui adscribuntur; si secus sit, dicuntur *supposita* ac *spuria*: 2° *integra*, ita ut nec mutilata, nec depravata, nec mendis corrupta fuerint: 3° *non interpolata*, videlicet ut nihil illis additum aut insertum sit, quod auctor non posuit.

648. Indicia secundum quæ authentica documenta a spuriis, et integra a corruptis, mutilatis, interpolatis discerni possunt, alia *interna* sunt, alia *externa*. Interna ex ipsius documenti consideratione eliciuntur; externa e scriptorum veterum, aliorumque documentorum auctoritate. Præcipua ex utrisque his regulis continentur:

* 649. Indicia interna.

1° Vocabula ac modi loquendi, de quibus certo constat, quod sequiori ævo in usu esse cœperint, quam sit ætas ad quam documentum refertur, aut scriptorem ea ætate recentiorum, aut documentum interpolatum fuisse ostendunt.

2° Si stylus sit diversus a noto scriptoris cui tribuitur, aut sæculi in quo ille vixit, suspicio merito oboritur de libri authenticia; suspicio, inquam, non iudicium certum. Ac suspicio quoque cessabit, si ratione materiæ aut finis aut aliorum adjunctorum, legitima mutationis causa afferri possit.

3° Liber in quo memorantur personæ, nomina, facta, mores, artes, controversiæ, quæ auctore cui tribuitur, certo posteriores sint, aut spurius est aut interpolatus. Idem dicendum de libro, in quo recentioris scriptoris non dubia imitatio deprehendatur.

4° Liber imperitia refertus ac fabellis scatens, viro gravi, prudenti, erudito, aut ex toto aut saltem ex parte, abjudicandus est, etsi ejus nomen in codicibus præferat. Ita liber impius viro quem pium semper fuisse constet.

5° Liber qui sententias alicujus momenti continet, iis certo oppositas, quas scriptorem ejus nomen præfert, docuisse constat, valde suspectus esse debet; nisi aliunde sciatur aut saltem supponi possit, auctorem data opera sententiam mutasse, aut nisi talis sit auctor, quem in contradictionem inconsulto incidisse non mirum videatur.

* 650. Indicia externa.

1° Si codex aliquis probetur esse *autographus* (ab ipso auctore conscriptus), quæstio omnis de ejus authenticia erit dirempta; si vero codices sint *apographi* (exemplaria ab autographo transcripta), adhuc ex iis inter se comparatis multa criticus deducere poterit.

a) Si in omnibus exemplaribus, etiam in iis quæ auctori vicinissima sunt, uni eidemque auctori opus tribuitur, huic tribuendum est; habet enim pro se antiquitatis testimonium.

b) Si in vetustis codicibus nomen unius auctoris opus præfert, in recentioribus alterius, vetustis fides habenda, nisi quid obstet.

c) Si in recentioribus codicibus aliquid reperitur, quod in antiquioribus deest, hoc interpolati documenti indicium est; si contrarium deprehenditur, mutilati.

2° Si scriptores, auctoris ejus nomen liber præfert, cœvi vel suppres, aut etiam traditio constans, eidem auctori librum adjudicent, non erit de auctore dubitandum. Traditionis autem testimonium eo magis habebit ponderis si nationem universam vadem habeat, multoque magis, si liber aut annales aut leges aut religiosa dogmata nationis contineat.

3° E contrario, liber qui antiqui auctoris nomine inscribitur, si alicujus momenti sit, ac nulla ejus mentio apud veteres occurrat, suspectus habendus est, nisi potiora argumenta probent esse genuinum.

4° Documenta quæ ab antiquioribus rejecta sunt ut spuria, aut in dubium revocata, vix fieri potest, ut propter recentiorum auctoritatem admitti debeant, nisi rationes hi afferant omnino gravissimas.

5° Si ex aliquo libro loca quædam a veteribus citata sint, eaque modo in libro ejusdem auctoris et tituli reperiantur, hoc argumento esse poterit ad librum existimandum genuinum et integrum: si non reperiantur, aut liber est suppositus pro veteri deperdito, aut mutilus est; si immutata legantur, liber est corruptus.

6° Si alicujus libri multa jam a principio exemplaria ex-

scripta, et variis in locis vulgata, lecta, in pretio habita fuisse constat, hic liber adulterari non potuit. Nam et impossibilis fuit omnium conspiratio, et si qua fraus fuisset deprehensa, omnes reclamassent.

651. Hæc sunt fundamentalia criticæ artis, in documentis præsertim vetustioribus ad trutinam exigendis, præcepta. Quæ tamen nullum emolumentum comparare possunt, imo vero detrimenta non modica afferre solent, si qui ad hæc studia accedunt, naturalem quamdam iudicii rectitudinem, animumque maturum, sagacem, temperatum, et a præiudiciis liberum ad ipsa non afferunt. Qui his dotibus careat (quæ profecto non sunt communes) is criticæ præceptis utetur, plane ut indoctus lanio chirurgi scalpellis. Atque hæc de critica præsertim, quam dicunt internam (649), dicta volumus: hæc enim, maxime nostris hisce temporibus, plurimi abutuntur. De quibus sapienter Cæsar Baldinotti: « Nonnullos, inquit, quasi morbus quidam, corripuit consuetudo, qua obscura prætereunt et difficiliora; in per- » spicuis ad nauseam immorantur: quod non intelligunt, » vitiatum blaterant, expungunt; sua substituunt, et diligenter » indocta pleraque depravant. Verendum scilicet est, ne » exemplaria quæ multas criticorum manus subierint, minus casta evaserint, minusque sincera (1). »

652. Monumenta vim probandi habebunt, si fuerint 1^o authentica: 2^o factis contemporanea: 3^o traditioni legitimæ certisque documentis minime adversantia. De quibus omnibus ut rectum iudicium feratur, varium ac multiplex eruditionis instrumentum requiritur; historia civilis, politica, et artium, chronologia, numismatica, palæographia, philologia, quibus fere disciplinis archæologia constat. Sed hic quoque animadvertendum est, apparatus hunc omnem parum profuturum, si quis naturali quadam sagacitate ac recte ratiocinandi usu destituatur, aut si ingenio prævaleat imaginatio,

(1) De recta humanæ mentis institutione, lib. IV, c. XI, § 564.

ARTICULUS XII.

De auctoritate historiæ.

653. PROPOSITIO VII. *Documenta historica, quibusdam adjunctis munita, certam fidem facere possunt.*

Authentia, integritate, incorruptione historici documenti in tuto collocata, non ob hoc solum certa factorum quæ in eo continentur, erit fides. In hunc finem constet insuper necesse est, scriptorem, et ea recte agnovisse quæ narrat, et veraciter narrare. Primum certe constabit, si factum fuerit sensibile, publicum, illustre; scriptor autem vel testis coævus et domesticus, vel traditionis legitimæ organum, vel si ex publicis ac certis documentis aut monumentis facti notitiam depromperit.

654. Ad hæc, veracitas certa fiet, 1^o si documenta historica sint plura et concordia, saltem quoad facti substantiam, licet historicorum diversa natio, secta; studia fuerint (632).

2^o Etiam si unus sit historicus, certam faciet fidem,

a) si facta narret, quorum veritatem corrumpi aut vitari, aut quorum falsitatem ad posteros promanare, ii inter quos scribebat, passuri non fuissent (633): si tamen constat et scriptum fuisse illis notum, et neminem contradixisse;

b) si scriptor, publico nomine historiam suorum temporum exaraverit;

c) si scriptor etiam post vulgatam, quam scripsit, historiam, viri probi, integri, morumque sanctimonia præstantis opinione, apud coævos et posteros floruerit;

d) si documenti veracitatem legitima traditio testetur, ipsumque documentum fuerit sedulo semper asservatum, magnoque in pretio apud aliquam gentem habitum.

655. Adjuncta hæc plenam historiæ fidem vindicant; quæ ubi non suppetunt, probabilitate, si detur, contentos nos esse oportet. Hæc autem probabilitas ex dotibus adjunctisque scriptorum, cum facti qualitate comparatis, juxta superius præstitutos canones (638, seq.), æstimari poterit. Si vero auctor affirmet, se ex antiquioribus documentis aut monumentis excerptis quæ narrat, aut ab aliis scriptori-

bus, a traditione, a fama, ac populari rumore accepisse, et hoc quod affirmat, verum haberi possit, tantum meretur fidei, quantum fontes ex quibus factorum notitiam hausit. Quod si scriptor cœvus non sit, et nullum narrationis suæ fundamentum alleget, vix poterit huic aliquando fides præstari.

* 656. Quæ attendi debeant ubi historicorum deprehenditur discordia, deduces ex iis, quæ generatim de testium conflictu dicta sunt (642). Restat, ut hoc loco aliquid innuamus de vi ac pondere argumenti negativi (331, 2^o), quod ab historicorum silentio deducitur.

Duo in primis casus distinguendi: 1^o quod ex historicis facto cœvis aliqui ejus mentionem faciant, aliqui de illo sileant; 2^o quod omnes cœvi sileant, et solummodo posteriores factum narrent.

* 657. In primo casu notandum est, non perinde esse, factum tacere ac factum negare, nisi adjuncta accedant, quæ silentium negationi æquivalens faciant. Itaque considerandum

1^o an qui tacent, facti notitiam habuerint aut habere potuerint;

2^o an factum sit alicujus momenti et quod memoria dignum omnibus videri debuerit;

3^o an oblivioni aut negligentiae silentium adscribi possit;

4^o an habuerint omnes occasionem ac motivum ea de re scribendi; videlicet an eorum scopo et consiliis narratio congrueret, an materiæ junctura atque orationis ductus eam requireret, an seu privatis seu publicis commodis opportuna accideret;

5^o denique an verisimile sit rationem iis aliquam silendi fuisse, sive metum, sive odium, sive gentis amorem, sive adulationem, sive præjudicium, et similes.

* 658. Si nulla ex his hypothesibus admitti possit, multoque magis si contraria omnia obtineant, tunc sane silentium negationis instar erit habendum. Comparandæ igitur erunt auctoritates, ut fit in conflictu testium, atque hinc judicii normæ desumendæ.

Cæterum si utrinque gravis est auctoritas, multo erit æquius, saltem ut plurimum, eos qui siluerunt, oblivionis aut etiam negligentiae insimulare, quam eos qui factum narrant, mendacii; cum in gravi viro difficilius hoc, quam oblivio aut negligentia supponatur.

* 659. In altero casu magnum certe contra narrantes insurgit præjudicium. Unde enim cognovere recentiores id de quo veteres omnes nihil tradiderunt? Nisi aliunde ostendi possit, testes orati traditione legitima usos esse, præsumendum erit non aliunde id cognovisse recentiores, quam ex populari fama, cui fides caute parceque admodum adjungenda.

Nihilominus ut in hoc quoque casu argumentum concludat, duo innotescere debent:

1^o scriptores illius ætatis omnes, saltem nobilissimos et accuratissimos, ad nos usque pervenisse, eorumque scripta integra esse.

2^o nullam solidam rationem reddi posse silentii, quod apud veteres obtinuit. Si enim hæc ratio reddi potest horum silentium nec scientiam posteriorum scriptorum, nec veracitatem oppugnat.

ARTICULUS XIII.

Difficultates.

660. Opp. I. Unius testimonium non potest certam sibi vindicare fidem. Ergo nec testimonium plurium. Nam singulorum testimoniorum natura per collectionem non mutatur.

Resp. 1^o *Dist. ant.* : Generatim, *conc.* ; semper *nego*. (633; 654, 2^o).

Resp. 2^o *Omitte ant., nego consequentiam*. Etenim quum testis unus est, communiter indicia non suppetunt, quæ certum faciant ipsum non mentiri. Posset enim impelli ad mentiendum motivo aliquo nobis occulto. Sed quum testes plures sunt et intra quædam adjuncta, certum est eos non mentiri, quia manifestum evadit, eos nullam mentiendi causam habuisse.

Hinc ad rationem additam resp. *distinguendo*: non muta-

tur in seipsa. *conc.*; in suo effectu, *nego*. Quia numerus supeditat adjuncta, ex quibus certum veracitatis indicium resultat.

661. Inst. I. Testium quoque collectio non est certum veritatis argumentum. Nam quod singuli possunt, possunt et omnes. Atque singuli possunt 1^o errare, 2^o mentiri. Ergo.

Resp. *Dist. min. subs.*: Quæcumque collectio, *trans.*; collectio sub quibusdam conditionibus, *nego*.

Ad probat. *Trans. major.* et *dist. 1^m partem min.*: Singuli possunt errare, si eam attentionem quam res postulat, non adhibeant, *conc.*; si adhibeant, *nego*.

Dist. 2^m partem min.: Possunt mentiri possibilitate absoluta vel physica, *trans.* (635); possibilitate morali, *subd.*: sub quibusdam positi conditionibus, *conc.*; sub quibusdam aliis, *nego*.

Inst. II. Semper incertum manet, saltem utrum singuli mentiantur. Nam liberi fuerunt ad mentiendum.

Resp. *Dist. ant.*: Quum agitur de singulis seorsum consideratis, *trans.*; quum de singulis agitur collective, et sub certis conditionibus, *nego*.

Ad rat. add. *Dist.*: Liberi fuerunt ad mentiendum, et tamen constat eos non esse mentitos, *conc.*; non constat, *nego*. Unde constet jam satis expositum est.

Inst. III. Certitudo moralis non est sapiente digna. Nam auctoritas non potest demonstrationis locum tenere.

Resp. *Neg. ant.* Ad prob. *dist.*: Demonstrationis a priori, *conc.*; a posteriori, *nego*. Est plane indignum sapiente, ut demonstrationes a priori exigat, quum eas materia de qua agitur, non patitur. Qui in rebus, ut aiunt, facti, demonstrationes alias quærit, quam quæ a testibus procedunt, similis est stulto qui negat sonos esse, quia ipsos non videt.

662. Obj. II. Certitudo historica, eaque præsertim quæ per traditionem habetur, labente tempore necesse est semper magis infirmetur atque adeo evanescat.

Nam. 1^o testes mediati sunt minus fide digni, quam immediati, et eo minus digni, quo sunt remotiores.

2^o Facta, dum per hominum ora transvolant, deformantur et perpetuo mutantur.

3^o Plura facta, quæ prius habebantur certissima, deinde inter fabellas rejecta sunt.

Resp. *Dist. ant.*: Si facta non sint idoneis documentis aut legitimæ traditioni commendata, *conc.*; secus *nego*.

Ad 1^m *Dist.*: Si certum sit, testes mediatos non fuisse deceptos et non mentiri, *nego*; secus, *trans.* Quum documenta idonea sunt, et traditio est legitima, constat utrumque (644, 655, seq.).

Ad 2^m *Dist.*: Facta levis momenti, *trans.*; facta publica et illustria, *subd.*: quoad facti substantiam, et adjuncta essentialia, *nego*; quoad cætera, *trans.*

Ad 3^m *Dist.*: Hæc facta certissima habebantur vi legitimi testimonii, *nego*; secus, *trans.*

665. Obj. III. Quæcumque humana auctoritas certe nihil valet, quum agitur de miraculis.

Nam 1^o infirmior probatio validiori cedat oportet. Jam vero miraculum quodvis, licet pro se auctoritatem habeat testimonii, habet tamen contra se constantem experientiam: auctoritas autem est probatio infirmior. Ergo. Ita Humius, qui in hoc argumento mirifice sibi gratulatur, eo quod, ut ipse dicit, hoc erit contra omnem superstitionis illusionem munimentum æternum.

2^o Homines errare aut mentiri non est miraculum. Ergo illud potius credendum est, quam miraculum quod narrant. Ita Diderot.

664. Resp. *Neg. ant.*: Nam facta miraculosa, si sensibilia sint, eodem modo percipiuntur ac facta quæcumque. Si igitur ii qui factum tale se vidisse asserunt, veraces haberi debent, cur erit iis fides deneganda?

Ad 1^m prob. *Trans. maj.* et *neg. 1^m part. min.* i. e. miraculum quodvis constantem contrā se experientiam habere. Nam experientia hoc solummodo docet, miracula communiter non fieri; at nulla experientia docet *miracula fieri non posse*: imo oppositum docet ratio, et hoc quod ratio docet, est metaphysice certum (529, a; 638, 2^o).

Nego quoque 2^m partem min., i. e. auctoritatem, si plena sit, esse probationem infirmiore ea, quæ ab experientia est : utraque enim probatio omne errandi periculum æque excludit.

Ita munimentum hoc æternum, quod contra miracula excis-
tasse se Humius arroganter gloriatur, nihil revera est aliud
quam nebula levis, quæ halitu uno dissolvitur.

665. Ad 2^m *Neg. maj.* quæ in argumento allato reticetur,
et est hæc : *Ex duobus, illud est potius credendum, quod non est*
miraculum. Si enim pro credendo miraculo sint aliquæ ra-
tiones, et pro alia quavis re nullæ sint, miraculum potius
credendum est.

Dist. min. : Homines errare aut mentiri non est miraculum;
si homines non habeant conditiones legitimorum testium,
canc.; si habeant, *subd.* : non est miraculum in ordine phy-
sico, *trans.*; in ordine morali, *nego.*

Homines errare in re sensibili percipienda, licet sensus
bene valentes habeant, et rem diligenter observent, esset re-
vera miraculum in ipso ordine physico. Mentiri autem ho-
mines in certis quibusdam adjunctis constitutos, esset mira-
culum supra et contra leges ordinis moralis. Igitur quando
legitimi testes miraculum referunt, unum aut alterum ad-
mittendum est, aut miraculum in ordine morali, aut mira-
culum de quo testantur. Sed nulla est ratio, qua miraculum
in ordine morali admittere possimus : datur vero ratio suffi-
ciens miraculi in ordine physico, divina nempe potentia,
quæ potest constitutis a se legibus derogare, et divina sa-
pientia, quæ potest tali signo homines edocere. Ergo hoc
potius admittendum miraculum quam illud. Hinc falsum
consequens.

LIBER TERTIUS.

CAPUT I.

DE VERITATIS CRITERIO.

ARTICULUS I.

Status quæstionis.

666. Veritatis criterium est *indiciu seu norma secundum*
quam veritatem a falsitate distinguimus : quæ proinde de veri-
tatis possessione certos nos reddit (438, 5^o). Ex hoc patet
veritatis criterium esse simul certitudinis motivum. Tunc
enim certi reddimur de propositionis veritate, quum veri-
tatis notam ac tesseram in illa deprehendimus.

De criterio duplex potest institui quæstio : 1^a an detur :
2^a si datur, quodnam sit. Jam prima quæstio absurda est ;
qui enim eam proponit, is in dubio collocat, utrum mens
humana apta sit cognoscendæ veritati. Non enim potest mens
veritatem cognoscere, nisi criterium ipsi suppetat, quo illam
discernat. Sed altera quæstio perutilis est, et ad certitudinis
theoriam absolvendam plane necessaria.

667. Cum plures sint iique inter se diversi cognitionum
fontes (441), plura quoque sunt et diversa inter se motiva,
quibus cognitionum nostrarum veritas suadet, et in certi-
tudine animus obfirmatur. Quæ suis singillatim locis in
superiore libro expendimus. Et hæc nuncupari possunt, imo
et debent, veritatis criteria : tantummodo cavendum est, ne,
uti quibusdam contigit, criteria *per quæ*, cum criteriis
secundum quæ, nimirum cognitionum fontes, cum motivis
quæ cognitionum veritatem suadent, confundantur.

Hæc tamen quæstionem modo propositam minime sol-
vunt. Restat enim ut ex his partialibus criteriis eruamus
illud, quod iis omnibus implicitum est, omnibusque vim
tribuit quam habent, et signandæ veritatis, et gignendæ cer-
titudinis : quod jure merito veritatis criterium appellabitur.
Quoniam vero in hoc criterio assignando dissident philoso-

phi, primo sententias quasdam breviter refellentes, ostendimus quid illud non sit; deinde quid hac in re verius videatur, aperiemus.

ARTICULUS II.

De falsis criteriis.

668. PROPOSITIO I. *Nec cæcus naturæ instinctus, nec sensus quidam et affectio animi, neque conscientiæ testimonium tanquam ultimum atque universale veritatis criterium constitui potest.*

1^o *Non cæcus naturæ instinctus.* Hæc est doctrina Reidii ac scholæ scotiæ quæ ipsum sequitur ducem, quæque schola sensus communis nuncupari solet. Hi statuunt, suggestionem quamdam inspirationemque naturæ mentem impellere, atque adeo cogere ad quædam affirmanda ac pro certis habenda, quorum ratio nulla reddi possit. Veritates autem ita assertas, fundamentales esse in humana cognitione, ac sensus communis patrimonium constituere. Unde conficiunt, rationem ultimam nostræ certitudinis in hoc instinctu sitam esse. Non est hujus loci ut hanc doctrinam in omnibus refutemus: sufficiet in præsens si hujusmodi instinctui supremi criterii dignitatem denegemus. Hoc autem brevi expeditur. Etenim

a) Antequam huic criterio fidam, certum mihi esse debet, et esse in me hunc instinctum, et instinctu hoc me duci ad veritatem. At unde certum? Non aliunde profecto quam primum illud ex intimo sensu, alterum ratiocinio, consequenter aliquorum vi principiorum. Hæc igitur erunt ultima veritatis criteria. Quod si non ratiocinio, sed duntaxat necessitate naturæ adducimur ad ea credenda ad quæ nos urget instinctus, idcirco ne consequetur ea vera esse? Necessarium mihi est ita credere, sed an res vere ita sit, prorsus nescio. Ecce tibi præformatum kantianum systema, phænomena, noumena, judicia synthetica a priori. Igitur instinctus iste qui veritatem non manifestat, quamvis motivum certitudinis esse dicatur, nullo tamen pacto criterium veritatis esse potest.

b) Hinc perspicis, systema hujusmodi concedere scepticis totum illud quod ipsi volunt. Volunt enim sceptici certitudinem omnem irrationabilem esse, eo quod nullius judicii veritatem humana mens cognoscere, nec naturalis certitudinis rationem sibi reddere possit. Atqui hoc ipsum concedit Reidius. Ergo.

c) Juxta hanc doctrinam intellectus quid est? Est facultas cæca, iners, quæ ad modum corporum propelli debet, ut suum objectum assequatur; quod qui dicit, is profecto dicit, intellectum esse facultatem non intelligendi.

669. 2^o *Non sensus et affectus animi.* Theoria hæc a recentioribus quibusdam invecta, fructus est scepticismi et desperationis cujusdam, qua ii rationi diffidentes, in iis præsertim quæ sensuum vim et facultatem excedunt, ad interiorem quemdam animi sensum affectionemque, tanquam ad anchoram confugiunt, illudque tanquam verum tenendum esse dicunt, quod interior affectus approbat ac propensione quadam amplectitur. Idcirco *sentimentales* dicuntur. Huc pertinent Rousseau, Ben. Constant, Jacobi, alique.

Sed a) theoria hæc iis omnibus evertitur, quæ contra Reidium faciunt (668). Omnia enim supra allata argumenta adversus eam intorqueri possunt.

b) Præterea quod mere subjectivum est, variabile, indefinitum, et a subjecti physica constitutione, phantasia, præjudiciis, cupiditatibus maximopere dependens, quomodo veritatis objectivæ, absolutæ, immutabilis tutum indicium esse poterit?

c) Si hoc semel statuatur criterium, omnibus illusionibus ac pessimo fanatismo aperitur via.

670. 3^o *Non conscientia,* quemadmodum sentire videtur Galluppius (1). Quanquam enim, ut supra vidimus (448), et infra quoque videbimus, ad omnem certitudinem tanquam conditio suas sibi partes conscientia vindicet, non tamen ipsa est ratio quæ omnis propositionis veritatem manifestet (449); adeoque tanquam ultimum ac generale veritatis criterium haberi non potest.

(1) *Lez. di Log. e Met. Lez. XXXVIII et alibi.*

671. PROPOSITIO II. *Neque humana neque divina auctoritas unicum veritatis criterium est.*

Primum asseruit Felicitas Lamennais (1), qui ad hominum arrogantiam in re præsertim religiosa castigandam, rationem ipsam sibi deprimendam putavit. Statuit igitur rationem individualement ad dubitandum solum idoneam esse, minime vero posse per se cum certitudine quidpiam cognoscere, cum et sensus intimus, et sensus externi, et ratiocinium media sint ad cognoscendum fallacia, et erroris solum ac dubii fontes. Unam porro, eamque infallibilem veritatis regulam esse sensum communem, seu consensum humani generis, cujus testimonium ipsius Dei testimonium est; quatenus ratio universalis verbo manifestata, ipsius Dei verbum est, primitiva quadam revelatione, una cum sermone, homini communicatum.

672. Quanta sit hujus doctrinæ levitas simul et absurditas, unicuique facile constare potest.

Nam 1^o falsum est fundamentum cui doctrina hæc inititur; nimirum omnia cognitionum nostrarum media esse per se fallacia. Vide dicta de singulis in secundo libro.

2^o Quoniam adversarii communem sensum adeo suspiciunt ac deprædicant, videant quæso quid existimet hominum genus de iis cognitionum mediis, quæ tantopere ipsi despiciunt. Profecto putant homines, rationem individualement certissimas per ea media cognitiones acquirere posse; neque alias reddunt frequentius suarum assertionum rationes, quam illas: *ego vidi, ego sentio, hoc est mihi evidens, huic consequentiæ refragari nefas*. Nonne amens putaretur qui, ut certitudinem acquireret de propria existentia, humani generis suffragia sibi roganda putaret; quique juxta incredibilem adversarii sententiam non auderet asserere: *ego sum, antequam dixisset: ego credo?* Ergo doctrina hæc est contra sensum communem, adeoque falsa ex iis ipsis quæ statuit principiiis.

3^o Credendum est communi consensui. Ita inquam. At vero qui unquam hoc aut unde certum? Quia quæ sensus

(1) In opere cui titulus: *Essai sur l'Indifférence en matière de Religion*.

communis tradit, a Deo revelata sunt. At quo pacto hujus assertionis, cæterarumque omnium quas ea supponit, certitudinem assequar? Quo fundamento certitudo hæc ipsa fulciatur? An consensu communi? Ecce tibi petitionem principii. An ratione individuali? Ergo ratio individualis potest aliquid certo cognoscere? Vide quomodo intrinseca illa contradictio, quæ sceptica systemata omnia in ipsa radice vitiat (421, 2^o; 516, 2^o), huic quoque inhæreat.

4^o Hanc quoque alteram scepticorum contradictionem in eo reperies, quod rationi fidem dicant habendam, dum fidem omnem illi denegant (241, 1^o; 516, 1^o). Ponuntur enim homines universi et scire, et discere, et docere posse, sublata interim singulis, qui vicissim et discentes sunt et docentes, facultate sciendi, discendi, docendi; cumque rationes individuales singillatim dicantur essentialiter fallibiles, collectæ plane infallibiles habentur. Nempe collectio cæcorum videt, collectio errorum veritatem suppeditat.

5^o Hinc non difficulter perspicies, systema hoc, dum auctoritatem extollere videtur, ipsa revera fundamenta quibus auctoritas innititur, funditus evertere. Etenim antequam testibus, quicunque illi sint, fidem adhibere possimus, hæc duo explorata esse debent: 1^o testes aliquid dicere: 2^o eos sibi fidem mereri.

Jam ut cognoscamus testes aliquid dicere, sciendum est, et quidem certo, a) esse alios homines, b) eos quædam verba proferre, c) his verbis hanc potius quam aliam sententiam ab iis supponi, etc.

Ut vero cognoscamus homines sibi fidem mereri, certum nobis esse debet, eos nec deceptos esse, dum id quod edocent didicerunt; nec velle decipere, dum id quod didicisse se dicunt edocent.

Sed hæc omnia cognitione assequi non possumus, nisi conscientia, sensibus, ratiocinio, memoria pluries utamur. Quamobrem, si cognitiones ex his fontibus haustæ, erroneæ sunt vel incertæ, nulla fides est amplius possibilis.

6^o Denique christianæ quoque religioni, in cujus gratiam excogitatum videtur, hoc systema est plane infensum. Ete-

nim cum omnis fidei fundamenta evertat, fidem quoque christianam impossibilem facit. Præterea auctoritas Ecclesiæ, quæ christianæ fidei regula est, non est auctoritas humani generis, nec necessario est auctoritas numero maxima; imo minima numero initio fuit, maximamque sibi oppositam habuit auctoritatem. Quisque videt quid consequatur, si urgeantur adversarii principia. Mirandum ergo non est, systema hujusmodi a Gregorio XVI P. M. fuisse proscriptum (1). Mirum enimvero est, sectatores invenisse inter pios viros et veteri doctrinæ addictos.

673. Hæc quæ diximus, ostendunt quoque falsa esse opimenta illa omnia, quæ a divina revelatione supernaturali, uno modo vel altero, certitudinem omnem repetunt. Ita sensit Huetius, ita sentiunt modo traditionales philosophi. Certum est enim, revelationem divinam neque unicum veritatis criterium esse, neque ordine primum. Nam antequam Deo revelanti aut humanæ traditioni Dei revelationem communicanti fidem quis adhibeat, certum illi sit oportet: 1° Deum esse; 2° Deo revelanti esse credendum; 3° Deum aliquid credendum proponere. Jam hæc omnia certa esse nequeunt, nisi per rationem individualement, sensu intimo, sensibus externis, idearum comparatione ac memoria utentem. Ergo.

Utrum vero, quæ doctrina traditionalium est, ad omnes veritates saltem altioris ordinis assequendas, necessarium plane sit divinæ revelationis, mediante loquela ac traditione, magisterium, alibi expendemus. Hoc interim ratum certumque est, etiamsi hoc pacto solum cognosceremus quæ vera sunt, non tamen hæc vera esse cognosci posse, nisi præter divinam auctoritatem alia quoque veritatis criteria homini suppetant.

ARTICULUS III.

De evidentia.

674. Quoniam in evidentia criterium veritatis collocandum est, ante omnia sedulo declarare oportet evidentie conceptum;

(1) *Ep. Encycl. die 25 Junii anno 1854.*

hujus enim solutio quæstionis magna ex parte hinc pendet.

Evidentia, si primitivam vocis vim attendas, est *objecti perspicuitas* (1), nempe eminens quædam ac prominens visibilitas, qua objectum quasi ultro se porrigat intuendum; verbo: *necessaria objecti visibilitas*. Hæc porro necessaria visibilitas ex tribus consurgit: 1° ex realitate objecti; 2° ex opportuna lucis copia, quæ objectum illustret; 3° ex eo quod objectum luce sua vim visivam actu percellat. Quare evidentia in objecto est et intuentem afficit; et a visione distinguitur, uti causa ab effectu. Hæc de evidentia *sensibili* apud omnes certa sunt.

675. Sed objectis quoque intellectus, ac veritati maxime enuntiabilium evidentia tribuitur significatione translata: et recte omnino. Ut enim inter intuitionem sensus et intellectus cognitionem magna est similitudo, ita quoque inter ea quæ utramque determinant, affinitas manifesta intercedit. Hanc affinitatem perpendenti, quid de evidentia *intelligibili*, h. e. de enuntiabilium evidentia statuendum sit, sponte occurrit.

676. In primis evidentia non ad intellectum, sed ad objectum pertinet intellectus; videlicet ad enuntiabilem veritatem. Sed ut enuntiabile sit evidens, non sufficit ejus veritas, nisi præterea veritas vel per se ipsam, quasi lumine proprio se manifestet, vel per aliam veritatem, quasi lumine collustretur alieno; semper tamen ita ut necessario percipi debeat. Lumen autem manifestans veritatem est omne motivum quod veritatem demonstrat, ac facit indubiam (2). Demum requiritur, ut veritas luce hac fulgens, menti fiat præsens, eamque ita percellat, ut ab ipsa necessario debeat intelligi: fit vero præsens menti veritas, cum menti manifestantur in eamque vim exercent motiva quibus illa suadet. Hoc pacto tria illa elementa quæ evidentiam sensibilem constituunt (674), in evidentia quoque intelligibili proportionem reperiunt.

(1) « Nihil clarius *ἐνέργεια* ut Græci. perspicuitatem aut evidentiam nos, si placeat, nominemus. » Cicero VI, *Acad.*
 (2) « Nomen lucis primo quidem institutum est ad significandum id, quod facit manifestationem in sensu visus; postmodum autem extensum ad significandum omne illud, quod facit manifestationem secundum quamcunque cognitionem. » S. Thom. *Sum. th.*, p. I, q. 67, art. 1.

tur; nempe *veritas*, quæ respondet realitati; *motiva manifestantia veritatem*, quæ respondent luci; ac *manifestatio motivorum*, quæ respondet actioni præsentis lucis in visus organum. Quare sicut evidentia sensibilis definitur necessaria objecti visibilitas, ita evidentia intelligibilis definienda erit: *necessaria veritatis intelligibilitas*.

677. Hæc omnia loquendi usus luculenter confirmat. Confirmat 1^o evidentiam esse in objecto, non in subjecto. Revera dicimus veritatem, falsitatem, propositionem, demonstrationem, imo vero meritum, periculum, innocentiam, crimen, injuriam, esse evidentem, videlicet evidentes esse propositiones, in quibus hæc asseruntur; nemo autem dicit: *ego sum evidens*, quemadmodum dicimus: *ego sum percipiens*, *certus*, *dubius*, quia istæ sunt affectiones subjectivæ. Huc quoque pertinent illa: sentire vim evidentiam, evidentiam percipere, evidentiam resistere, et alia hujusmodi.

Confirmat 2^o evidentia fieri veritatem necessario intelligibilem. Hinc dicimus: nos cogi ab evidentia, evidentiam insilire in oculos, vel nolentem convincere, etc. Hinc fit, ut homines reprehendant atque objurgent eos quibuscum loquuntur aut disputant, si videant eos non intelligere quod est evidens, quia nempe impossibile est id non intelligi. Hinc quoque accidit, ut homines declinare se putent onus demonstrandi, quum dicunt: hoc est evidens.

Cæterum nemo miretur, si hac in re tantum pondus humano sermoni tribuamus. Etenim ratum nobis certumque est, eorum, quæ omnes homines experiuntur, philosophicæ explicationi maximam lucem affundere quasdam loquendi formulas ab hominibus sponte inventas et perpetuo usurpatas, ut quæ non a præjudicatis opinionibus originem habent, sed ab ipsa natura quæ in se accidunt, depromente. Idcirco philosophicas theorias quæ cum humano sermone componi non possunt, valde suspectas esse oportet, et falsitatis præjudicio teneri.

678. Ad explendam evidentiam analysim, quærendum superest, quandonam veritas necessario sit intelligibilis. Cui quæstioni respondeo, tunc veritatem necessario intelligibi-

lem fieri, quum non tantum fit menti manifestum, rem certo quodam modo se habere, sed etiam aliter se habere non posse; seu quod in idem recidit; quum non modo nulla ratio occurrit dubitandi de opposito, sed insuper elucet, *rem necessario ita esse*, necessitate sive absoluta sive hypothetica (405). Quum enim hoc menti innotescit, tunc profecto non potest non intelligi propositionis veritas: quum hoc non innotescit, vel nullo modo est intelligibilis propositionis veritas, vel non est necessario intelligibilis: remanet enim suspicio de oppositi possibilitate. Igitur huc tandem redit evidentiam notio, quod prædicati cum subjecto identitas vel diversitas necessitate aliqua constitutam se offerat. Quare licebit tandem evidentiam sic definire, quemadmodum in primo libro (406) jam subindicavimus: *enuntiabilem necessitatem menti innotescens*.

679. Quum rei evidentia menti affulget, contuetur illam mens, ejusque vim sentit. Sed tum intuitus ac sensus evidentiam, tum rei evidenter perceptio cum ipsa evidentia permisceri non debent, neque ut ipsius evidentiam elementum haberi. Evidentia enim objecti affectio est, intuitus subjecti; illa visibilitati, hic visioni comparatur.

Multo minus confundenda erit evidentia cum necessitate illa, quam post evidentiam veritatis perspectam mens experitur, quaque ad assensum pertrahitur, et in assensus firmitate constituitur. Hæc enim subjectiva necessitas effectus est quem evidentia in intellectu producit, quia sic ille est natura comparatus, ut veritatem aperte perspectam repudiare nullo pacto possit.

680. Ex hucusque dictis deduces:

1^o Cur ideæ non dicantur evidentes, sed solummodo judicia. Quia videlicet ideæ non sunt objectum quod percipimus. Judicium vero dicitur evidens, quatenus objective spectatur. Idearum tamen existentia in mente dicitur evidens, quatenus ideæ in mente existentes sunt ipsius mentis in se reflectentis objectum.

2^o Non recte definiri evidentiam a compluribus auctoribus, quum eam collocant in clara et distincta perceptione

identitatis vel discrepantiæ subjectum inter et prædicatum.

3^o Non posse pariter, ut quibusdam in more est, evidentiam tribui in objectivam et subjectivam. Evidentia enim tantummodo objectiva est, subjectiva nulla. In evidentia tamen objectiva veritas et motiva quæ necessitatem illi tribuunt, absoluta sunt; horum autem manifestatio relativa est ad subjectum (676, 679).

4^o Evidentiam non pertinere solum ad veritates a priori, sed etiam ad experimentales, quanquam diverso modo; illarum enim necessitas absoluta est, harum hypothetica.

ARTICULUS IV.

De partitionibus evidentiae.

681. Si genericam evidentiae notionem spectes, ea unica est, ut ex dictis constat: pro ratione tamen motivi partialis ex quo consurgit, seu modi quo menti affulget, multiplex est ac multiformis.

682. 1^o Evidentia vel *immediata est* vel *mediata*. Immediatè evidentes sunt illæ propositiones, quarum veritas et necessitas per se ipsa innotescit. Mediatè vero illæ, quæ ex evidentibus principiis evidenti consequentia deducuntur. Plane ut in evidentia sensibili contingit. Quædam enim corpora sunt evidentia, quia lucem habent ex se, quædam, quia illuminantur ab aliis. Ita quædam veritates habent in seipsis motivum quo suadentur; quædam aliæ illud habent extra se in aliis veritatibus positum (676).

2^o Iterum alia est *absoluta* evidentia, alia *hypothetica*. Quædam enim res extra omnem hypothesim tales sunt, ut in propositione affertur, et aliter se habere in nulla hypothesi possunt. Quædam vero absolute loquendo aliter se habere possunt, sed facta aliqua hypothesi, non possunt. Vide dicta de certitudine (405.)

3^o Pariter pro diversitate fontis unde promanat, evidentia, ut et certitudo, tribuitur in *metaphysicam*, *physicam* et *mora-lem* (407).

4^o Dividitur postremo evidentia in *intrinsecam* et *extrinsecam*. Evidentia intrinseca habetur, quum necessarius nexus

subjectum inter et prædicatum per ipsam rei manifestationem aperitur: nempe quum res ipsa manifestat intuenti suum prædicatum, aut aliquid ex quo prædicatum inferitur. Hæc autem prædicati manifestatio vel est pure mentalis, ut in iudiciis quæ ab ideis rerum eliciuntur, vel experimentalis, ut in iudiciis quæ experientiam de rebus habitam consequuntur (446).

Evidentia autem extrinseca non prodit ex manifestatione objecti de quo fit enuntiatio, sed a manifestatione signi, quod ipsi objecto extraneum est, et nihilominus cum propositionis veritate necessario connexum. Huiusmodi est evidentia iudiciorum quæ in auctoritate, sive divina sive humana, fundantur. In quibus, si solum spectes auctoritatis motivum, nulla de ipsa propositionis veritate evidentia habetur, sed ejus loco de his duobus: 1^o de testimonii existentia; 2^o de testimonii connexion cum propositionis veritate (597). Quare propositiones quæ extrinsecam hanc evidentiam præ se ferunt, revera non possunt evidentes dici, sed solum *evidenter credibiles*; quia videlicet non proprie earum necessitas manifesta fit, sed tantummodo indicium externum, ex quo objectiva propositionis necessitas inferatur, aut saltem inferri possit. Idcirco hæc credibilitatis evidentia non semper ex se sufficiens est, ut ad subjectivam certitudinem intellectum adigat; sed requiritur quandoque voluntatis motio; quemadmodum in supernaturali fide contingit, ut infra dicetur.

ARTICULUS V.

De evidentia ut est criterium veritatis.

683. PROPOSITIO III. *Evidentia est universale veritatis criterium, atque ultimum certitudinis motivum.*

Intellige in primis propositionis sensum.

1^o Factum solummodo asserimus, videlicet humanam mentem hoc indicio distinguere verum a falso, et hoc tandem motivo certa habere quæcunque certa habet. Quod autem criterium hoc infallibile sit, et hoc motivum extra omnem dubitationem sit tutissimum, postea declarabitur.

2° Hic loquimur de certitudine naturali, quæ solius evidentiae effectus est. Supernaturalis enim fidei certitudo, quanquam et ipsa evidentiam aliquam credibilitatis, tanquam conditionem, supponat, non est tamen hujus evidentiae necessarius effectus, ut modo innuimus. Probatur nunc statuta propositio.

684. 1° Si quis inquirat quid nos verum existimemus, quid falsum, deprehendet profecto, nos verum tenere quidquid per cognitionumstrarum (441) media legitime adhibita apprehendimus; falsum autem quidquid his opponitur. Sed si inquiras ulterius, cur verum æstimemus id quod per ejusmodi media apprehendimus, quid tandem reperies? Reperies proculdubio nos ita æstimare, quia media illa manifestum nobis faciunt, rem saltem in iis adjunctis, aliter esse non posse. Ergo quæcunque enuntiabilia vera putamus, ideo vera putamus, quia necessaria se nobis manifestant; videlicet quia sunt evidentia.

Partialia motiva quæ diversos veritatis fontes communiunt, hoc unum præstant, nempe ut hanc enuntiabilium necessitatem creent, illamque intellectui manifestent (676). Cur ex gr. certus sum me cogitare? Si motivum proximum spectes, illud est: quia sensus intimus me mihi cogitantem renuntiat. Video autem me, hoc sensu posito, non posse non esse cogitantem. Certus sum igitur me cogitare, quia video necessitatem hujus enuntiabilis: *ego cogito*, posita quod cogitare me sentiam. En tibi hujus enuntiabilis necessitatem, quæ ex motivo sibi proprio pro subjecta materia consurgit, ac fit manifesta. Idem de cæteris dicito.

685. 2° Idipsum ex certitudinis natura sponte consequitur. Certitudo enim ex eo gignitur, quod formido omnis errandi sit penitus exclusa (403). Atqui formido errandi non cessat, donec suspicio aliqua maneat, an forte res aliter se habere queat ac apparet. Ut autem hæc suspicio arceatur, necesse est, ut manifestum fiat, rem aliter esse non posse, saltem pro ea temporis differentia in qua apprehenditur. Ergo ut inducatur in animum certitudo, propositionis necessitas aliquo modo comperta fiat necesse est. Ergo proposi-

tionis necessitas, quatenus se manifestat, est omnis certitudinis generale motivum. Recolantur quæ scripsimus in primo libro de certitudine tum objectiva, tum subjectiva (404, 406).

686. Ex his liquido consequitur: *dubitationem omnem de evidentiae infallibilitate esse prorsum absurdam*; huc enim redit dubitatio ista, nempe ut ipsa rationis aptitudo ad veritatem assequendam in dubio collocetur. Revera si ratio veritatem assequi potest, indicium habet ad veritatem a falsitate discernendam (666). Hoc autem indicium, si infallibile non sit, veritatis indicium non est. Non enim dici potest veritatis indicium, quod modo cum veritate, modo cum falsitate conjungitur. Indicium igitur, quo ratio naturaliter utitur ad veritatem discernendam, infallibile sit oportet, si ratio cognoscendæ veritati est idonea. Atqui indicium hujusmodi est evidentia, ut ex supra dictis patet. Ergo si evidentia infallibile veritatis indicium non est, ratio humana veritati cognoscendæ est plane inepta. Principium igitur hoc: *quod evidens est, verum est*, primitivæ veritatis dignitatem sibi vindicat: imo non differt reipsa a primitiva illa veritate: *ratio potest veritatem cognoscere* (425), quam conditionem primam appellavimus.

Hinc 1° nulla propositio evidens potest esse falsa.

2° E converso nulla propositio falsa potest unquam fieri evidens.

3° Qui de his duobus dubitat, scepticismo det victas manus necesse est.

ARTICULUS VI.

De evidentia primitiva.

687. PROPOSITIO IV. *Evidentia omnis dimanatio quædam est evidentiae primitivæ duplicis, qua gaudent primum factum, primumque principium.*

Etenim ad evidentiam gignendam duo concurrunt, videlicet enuntiationis necessitas, et hujus necessitatis manifestatio (679).

Jam enuntiationis necessitas, quæcunque sit, et quocunque constituatur motivo, hac continetur formula: *Si verum*

est principium contradictionis, id quod per media, quibus hoc pacto utor, mihi tale apparet, non potest aliter esse. Patet ex analysi motivorum certitudinis, quam in secundo libro exegimus. Tota igitur enuntiationis necessitas a principio contradictionis ultimato derivatur, in illudque refunditur.

Manifestatio vero hujus necessitatis semper ab alicujus interni facti sensu procedit. Tota enim consistit in hoc, quod aliquid experimur vel mente percipimus, quodque sentimus nos attendere et reflectere, et certas quasdam ponere conditiones, et quasdam normas servare: brevi, quia ut par est, utimur facultatibus nostris quæ cognitionum instrumenta sunt, iisque nos hoc pacto uti, sensus intimus indubitanter manifestat. Omnia autem interna facta ad primum reducuntur. Sensio enim me esse, non utcunque, sed in eo statu in quo sum. Ita ergo ratum mihi est propositionis necessitatem mihi manifestari, ut ratum mihi certumque est me esse.

688. Igitur omnis evidentia duplicis primitivæ veritatis evidentiae nititur, primi nempe principii primique facti: aliunde vero, ut modo diximus, propositionem evidentem veram esse, tertia est ex primitivis veritatibus (686). Patet ergo quænam sit vis, quæ mentem impellit atque adeo cogit, ut veritatem evidentem amplectatur (679). Est nempe vis conjuncta primitivarum veritatum. Nequit enim mens aut esse conjungere cum non esse, aut factum quod experitur, non experiri, aut quod necessarium ipsi apparet, ut falsum respuere. Unum autem ex his tribus necessario contingeret, si evidens veritas respuì posset.

689. At primitivæ veritates undenam habent evidentiam, eamque nanciscuntur vim, ut mentem subjungent et ad firmissimam adhæSIONem trahant? Manifestum est, hanc vim eas habere non posse aliunde quam a seipsis: secus in infinitum procederemus. Nihilominus hoc distinctius explicandum est.

Igitur 1º principium contradictionis, ut alio in loco notatum est (450), quoad objectivam necessitatem qua gaudet, ab omnia alia veritate est independens; sed quoad hujus manifestationem a sensu intimo dependet: quod autem manifestata

necessitate, habeatur verum, et certum subjective fiat, hoc debetur certitudini principii evidentiae seu conditionis primæ.

2º Factum primum, ut factum est, et quoad sui manifestationem, a nullo ideali principio, a nulla conditione pendet. Hæc enim manifestatio est ipse sensus atque experientia, cujus firmitas et necessaria præsentia non cessaret, etiamsi de principio contradictionis et de cæteris omnibus dubitare quis posset. Si vero spectetur ut propositio, suam necessitatem habet a principio contradictionis, et quoad certitudinem subjectivam, a prima conditione dependet, ut in primo libro contra Cartesium animadvertimus (437, 5º).

3º Prima conditio spectari et ipsa potest dupliciter, nempe ut propositionibus his effertur: *Ratio apta est cognoscendæ veritati. Quod est evidens est verum. Nefas de omnibus dubitare*; et similibus; et hoc pacto quoad sui necessitatem a contradictionis principio pendet; quoad necessitatis manifestationem a sensu intimo. Potest deinde spectari simpliciter ut dispositio, quæ intellectum astringit ad adhærendum propositionibus evidentibus, et ad aliquid habendum ut verum; et hæc vis a nullo alio principio gignitur, sed ex ipsa mentis ac veritatis natura profluit; tantus est enim ac tam necessarius nexus veritatem inter et intellectus cognitionem, ut ille ipse qui nexum hunc dissolvere tentet, arctius illum obstringat; qui enim negat ullam a se veritatem cognosci posse, aut de hoc dubitat, implicite affirmat se veritatem cognoscere, se veritates primas recipere (421, 2º, 428), imo vero se cedere evidentiae; ideo enim negat vel dubitat, quia dicit non innotescere sibi motivum, quo ostendatur non esse negandum vel dubitandum.

Cum igitur tria sint, quæ ad omnem certitudinem evidentiae ope gignendam, simul concurrunt, singula tamen in eo, quod in hunc effectum conferunt, sunt plane a cæteris omnibus, et ab invicem independentia. Principium enim primum objectivam necessitatem constituit, ejusque necessitas a nullo alio principio dependet. Factum primum hanc necessitatem manifestat, et ipsum nulla eget manifestatione. Conditio prima me evidentiae mancipat, et hanc vim ex se habet.

690. Ex his omnibus intelligitur quantum evidentiae principium : *quod est evidens verum est*, differat a cartesiano illo: *quod clare et distincte percipio, id verum est*. Quod quidem rejici plane meretur vel ex eo, quod vagum prorsus et indefinitum est. Quomodo enim clara hæc et distincta perceptio intelligi debet? Estne perceptio simplex an comparativa? Et si comparativa est, an illa solum qua prædicatum esse cernitur de ratione subjecti (*quod cogitat existit*), an vero ea quoque quam experientia gignit (*ego cogito*)? At si prima solum enuntiabilia hoc effato comprehenduntur, hoc jam non exprimit generale veritatis criterium; si etiam alia, anne id omne quod clare et distincte per experientiam percipimus, verum est? (494). Præterea super sunt adhuc veritates notæ per auctoritatem, atque in primis veritates revelatæ, in quibus profecto prædicati cum subjecto convenientiam neque distincte, neque clare in se ipsa perspicimus. Omitto abusus, quibus doctrina hæc aperire viam potest. Certe enuntiatio adeo parum firma, atque adeo perfunctorie constituta, principii fundamentalis appellationem nullatenus meretur; præsertim si ejus firmitas a Dei veracitate cum Cartesio repetenda sit (457, 6°).

ARTICULUS VII.

* *Utrum ab evidenti veritate intellectus resilire possit.*

691. Duplici modo quæstio proposita intelligi potest, 1° an intellectus per se consideratus, veritati quæ ipsi sit facta evidens, assensum negare valeat; 2° an saltem possit per voluntatis influxum ab assensu retrahi. Si quæstio primo modo intelligatur, facile solvitur, et soluta jam est (679, 688). Intellectus est potentia necessario agens, quæ nimirum, si debitæ conditiones non desint, a suo objecto determinatur ad actum. Si ergo veritas fiat illi evidens, quemadmodum non potest illam non percipere, ita illi non potest non adhærere, saltem si veritas intrinseca gaudeat evidentia. Quid enim dicendum sit quum veritas est extrinsece duntaxat evidens, infra statuemus.

Si altero modo quæstio proponatur, non exiguum in ea momentum est. Ut autem apte resolvi possit, revocandæ di-

stinctiones evidentiae supra traditæ (682), in immediatam et mediatam, in intrinsecam et extrinsecam.

Quoad veritates immediatas, sive in ordine ideali sive in experimentalis, minime dubium est, intellectum non posse per voluntatem retrahi ab assensu, quum earum evidentia illi affluget. Imo neque potest voluntas impedire, quominus evidentia hac intellectus percipatur, quotiescunque nulla ad id requiritur peculiaris attentio. Tunc enim veritas est cuique prorsus, et absolute necessario intelligibilis, ut est v. gr. principium contradictionis, vel existentia proprii corporis. Si autem veritas non sit immediate evidens, nisi attendenti aliquo modo, sive ad ideas sive ad objecta, uti sunt v. gr. prima moralitatis principia; potest voluntas, saltem quandoque, intellectum ab hac attentione divertere, et ad sophismata quoque contraria convertere, conarique, ut ipsum pertrahat ad dubitandum, quanquam sine successu. Possunt enim hæc veritates ore negari, possunt impugnari; sed interna animi dubitatione expugnari eas posse non puto; quia nunquam earum oppositum verisimile apparere potest.

692. De veritatibus mediatis, si intrinseca gaudeant evidentia, hæc certa sunt:

1° Si intellectui sunt evidentes præmissæ, atque insuper consequentiæ rectitudo, jam conclusio quoque illi fit evidens; voluntas autem non potest, dum hæc affluget evidentia, intellectum inclinare ad dissensum; nec potest assensum impedire, saltem directe, videlicet solo imperio. At potest indirecte impedire assensum, nempe divertendo intellectum ab objecto, eumque alteri cogitationi affigendo, quod si fiat, evidentia illum amplius non afficit, quemadmodum lux clausos oculos non perstringit.

2° Quando demonstratio valde complexa aut prolixa, necessaria est ad conclusionis evidentiam percipiendam, assensus in causa semper est liber, quatenus in voluntatis arbitrio est, ut intellectum applicet vel non, ad plura illa, eoque, ut par est, ordine consideranda, ex quibus deductio colligenda est.

3° Potest quoque voluntas, postquam a veritate evidenti

intellectum distraxit, ad apparentes rationes, quæ oppositæ partis falsitati fucatam aliquam veritatis larvam obducunt, eundem adigere, ut eas solummodo consideret, ac veritatem hoc pacto obnubilatam in dubium adducat, aut etiam temere neget, imo et oppositum affirmet.

693. Quum evidentia solum extrinseca est, intellectus visionem veritatis non habet, sed duntaxat credibilitatis ejus. Hæc namque solum conclusio est illi evidens: *hoc est credibile*; seu: *hoc est credendum*. De hac igitur conclusione valent quæ modo de conclusionibus evidentibus generatim dicta sunt.

Postquam autem huic conclusioni assensus adhibitus est, sequiturne necessario assensus veritati quoque, quæ credibilis atque adeo credenda ostensa est ac iudicata? In hac quæstione aliter loquendum est de iis quæ auctoritate humana credibilia fiunt, aliter de iis quæ credibilia sunt auctoritate divina.

694. In iis quæ auctoritate humana credibilia fiunt, 1^o evidens intrinsece est testificatio; evidens item est scientia et veracitas testium: 2^o objectum, licet intrinsece non evidens, nihilominus evidenti possibilitate et intelligibilitate gaudet. Unde potest intellectus per ideas quas habet, visionem sibi quamdam facti quod non videt, ex iis quæ audit efficere.

Ex his sequitur, intellectum ex se trahi ad assensum. Et nihilominus voluntas potest assensum indirecte impedire, præsertim si in facti ratione ac modo concipiendo, aliqua difficultas occurrat. Excipe, quum tantus est numerus testium, tantum auctoritatis pondus, tam late patens, tamque obviæ evidentiae externæ fulgor, ut nequeat intellectus ad oppositum adeo diverti, ut evidentia credibilitatis undequeque non percellatur. Tunc enim erit physice aut saltem moraliter impossibile non assentiri.

695. In iis vero quæ credimus propter auctoritatem divinam, 1^o quanquam sit intrinsece evidens Dei sapientia et veracitas, tamen testificatio ejus seu revelatio, saltem quoad nos, non est intrinsece evidens, sed solum evidenter credibilis et credenda; constat enim nobis de revelatione divina

per testes humanos ac mediatos; et quidem demonstratione satis complexa, quæque a multarum rerum consideratione consurgit: 2^o objectum, si loquimur de mysteriis, quæ primario ad fidem pertinent, humanæ mentis captum superat, et quanquam non appareat impossibile, neque tamen evidentur possibile cernitur; unde non est secundum se intelligibile per ideam factitiam, sed solum per proportionem quasdam concipi potest, id quod a visione remotissimum est.

696. Hinc sequitur, intellectum, si credibilitatis motiva consideret, et ab his considerandis per voluntatem non avertatur (693), ad hunc solum assensum cogi: *prudens est et debitum*, hæc quæ mihi proponuntur, credere tanquam divinitus revelata; hæc enim duntaxat propositio, etiam post omnia motiva considerata, evidens est. Ad assensum vero, quo iudicet, ea, quæ sic proponuntur, vera esse et divinitus revelata nullatenus cogitur, intellectus; sed ut hunc assensum adhibeat, accedat necesse est pia voluntatis motio (1). Voluntas autem, licet post primum illud intellectus iudicium, officio credendi astringatur, in sua tamen manet libertate, potestque non movere intellectum ad assentiendum, imo movere quoque potest ad assensum oppositum; etiamsi evidens sit intellectui, dubium ipsum imprudentissimum atque inhonestum esse. Nihilominus, ut notat Suarez (2), intellectus ad assensum oppositum moraliter non inflectitur, nisi avertatur ab actuali iudicio credibilitatis; id quod potest facile fieri, quia evidentia credibilitatis, ut supra diximus, pendet a multarum rerum consideratione, quam facile potest homo dimittere, præsertim si affectum non recte ordinatum habeat. Sic patet certitudinem fidei non esse evidentiae credibilitatis necessarium effectum, sed a voluntatis electione dependere.

(1) Cf. Card. De Lugo: *De virtute fidei divinæ*, disp. X, sect. I.

(2) *De triplici virtute theologica*, disp. IV, sect. V, § 6.

ARTICULUS VIII.

Difficultates.

697. Obj. 1. Evidentia constitui nequit tanquam veritatis criterium. Nam :

1^o Hoc criterium reducitur ad istud : res ita est, quia sic mihi videtur. Quod quidem et audacter dictum est et ridicule ;

2^o et instaurat falsam Protagoræ opinionem, quod omnium rerum mensura sit homo, et scientia sit sensus.

Resp. *neg. ant.* Ad 1^m prob. *Dist. ant.* : Reducitur ad istud : res ita est, quia sic mihi videtur ; i. e. res ita est in se, quia sic a me cognoscitur, *nego* ; affirmatur a me ita esse, quia sic mihi videtur, *subd.* : nempe quia sic mihi arridet, vel sic obscure apprehendo, *nego* ; quia ita rem esse, et aliter esse non posse, necessario mihi intelligibile est, *conc.* Et *contra distincta min.*, *nego cons.* -

Ad 2^m *Nego.* Opinabatur enim Protagoras, nihil certum nobis esse posse, nisi hoc : *nos ita sentire aut percipere* ; neque posse nos judicare quid sint res, sed solum *quid in congressu sentientis et sensibilis fiant* (1). Hæc autem sententia non modo cum evidentia principio non coincidit, sed potius ab ipso destruitur. Per hoc enim principium statuitur, quod evidens est ita esse, non modo mihi ita esse, sed ita plane esse in se.

698. Obj. II. Si evidentia veritatis criterium esset,

1^o Veritas rerum ab evidentia penderet ;

2^o Quidquid verum est evidens esset ;

3^o Aut saltem quidquid certum est, propter evidentiam certum esset. Atqui multa sunt certa, quæ evidentia non sunt, ut ex. gr. revelata mysteria.

Resp. *Neg. ant.* Ad 1^m *Dist.* : Veritas rerum, veritas enuntiabilem, imo et veritas cognitionum, *nego* ; certitudo de veritate cognitionum, *conc.* Recole quæ in primo libro de veritate ejusque assecutione, et quæ de criterio veritatis in hoc tertio dicta sunt.

Ad 2^m *Nego.* Etenim ex eo quod quidquid est evidens,

(1) V. Platonem in *Theæteto*. — In hac Protagoræ opinione facile deprehendes Kantiani systematis semina.

verum sit, vetat logica ne inferatur : omne id quod est verum evidens esse (212, 2^o).

Ad 3^m *Dist. maj.* : Propter evidentiam intrinsecam veritatis, aut propter evidentiam credibilitatis, *trans.* ; semper propter evidentiam intrinsecam veritatis, *nego*. Et *contradist. min.* (682, 4^o ; 695).

699. Obj. III. Multi errarunt et errant, et nihilominus evidentiam jactant.

Resp. *Dist.* Evidentiam jactant mala fide vel inconsiderate, *conc.* ; jure et veraciter, *subd.* : circa idipsum quod affirmant, *nego* ; circa aliquid aliud ipsi affine, *conc.*

Primo igitur sunt qui evidentiam jactant, probe sentientes se ad affirmandum quod affirmant, evidentia non moveri. Et hi quidem sibi aliisque mentiuntur.

Sed multo facilius contingit, ut quidam dum ex affectu judicant, et præcipitanter aliquid affirmant, per exaggerationem quamdam evidens dicant esse quod asserunt, cum id solummodo probabile sit, nec se necessarium ullo modo manifestet. Hi assumunt igniculos cupiditatis pro luce veritatis.

700. Hic error vitabitur, si attendamus :

1^o Evidentiam semper ex claris ideis consurgere, et pacatæ menti affulgere eo puriorem ac splendidiorem, quo magis illa attendit, reflectit, ac motiva assentiendi recolit : eas vero propositiones quæ immerito evidentes appellantur, confusis semper conceptibus imo et obscuris contineri, et cum aliquo semper mentis animique tumultu veritatis lucem simulare, fulgurantes potius quam splendentes.

2^o Evidentiam liberum animum facere ab omni errandi formidine : larvatam autem veritatem nunquam ita se suadere, ut aliquam erroris suspicionem non relinquat.

3^o Veritatem evidentem in tali conditione mentem collocare, ut si dubitare deberet, esset illi prius vel de contradictionis principio, vel de intimi sensus testimonio, vel de ratione ipsa dubitandum ; falsitatem autem, ut ut veritatem simulet, non ita. Unde illa trahit ex se mentem, et idcirco mens illi adhæret, quia trahitur ab illa ; huic autem mens adhæret, quia propellitur in illam.

701. Aliquando tamen qui errant aliquid perceperunt omnino evidens, et nihilominus errant, quia non affirmant illud ipsum enuntiabile, quod evidens ipsis factum est. Hoc autem his præsertim modis accidit.

1^o Quia subjectum aut prædicatum in aliud commutant, quum judicant. Ita v. gr. Humius hoc percipiebat evidens, quod nemo non percipit, nempe: miracula non esse secundum physicas leges; sed non hoc affirmavit, at illud: miracula absolute possibilia non esse (664).

2^o Quia iudicium extendunt ultra eos limites, intra quos objectivam necessitatem propositionis perspexere; ut quum id quod est evidens de subjecto particulariter accepto, universim quis affirmat.

3^o Quia absolute judicant verum id, quod in aliqua tantum suppositione verum foret. Est evidens v. gr. solem moveri si terra stat, non vero absolute solem moveri.

4^o Postremo quia quandoque evidentia consequentiæ, quæ vere adest, ita accipitur ac si esset evidentia consequentis, cum tamen hoc evidens non sit.

702. Inst. Sequitur ex dictis (699, 700) dari veram evidentiam et dari falsam. Ergo suppetat necesse est criterium, quo vera evidentia a falsa distinguatur. At

1^o huiusmodi criterium non assignatur:

2^o si assignaretur, jam evidentia non esset ultimum certitudinis fundamentum:

3^o contra illud rediret idem argumentum in infinitum.

Resp. *Dist.* Sequitur ex dictis, homines nomine evidentie cohonestare quandoque id quod evidentia non est, *conc.*; sequitur dari evidentiam veram et falsam, quæ convenient in aliquo ita ut confundi possint, *nego.*

Dist. cons. i. e. debet cognosci quid sit evidentia, *conc.*; necesse est ut suppetat criterium ab ea diversum, *nego.*

Scilicet si cognoscis quid sit evidentia, quando tibi innotescat propositionis necessitas, dices: *hoc evidens est*; quando non, nihil est quod possit tibi imponere, et evidentiam simulare. Ut si cognoscis v. gr. quid sit hominem esse tibi

necessario visibilem, impossibile est ut quidquam aliud cum necessaria hominis visibilitate confundas.

Ex his patet responsio ad rationes additas. Criterium enim quo evidentia dignoscitur, est ipsa evidentia.

* 703. Objicit IV Lamennais. Si criterium veritatis evidentia est, ratio cujusque fit veritatis iudex infallibilis. Atqui hoc plane est absonum. Etenim

1^o Quum duo homines in paribus adjunctis dissentiant, neuter potest amplius rationi privatæ fidere: deferenda ergo causa ad consensum plurium. Ergo consensus iste duntaxat est iudex infallibilis.

2^o Si privata evidentia quisque redditur infallibilis, quid fiet in collisione iudicii privati cum universali sententia? Homo unus jus haberet ad iudicium proprium iudicio communi præferendum. At qui a communibus sententiis discedit, stultus palam habetur.

3^o Hic est ipse protestantium error, imo protestantismi virus, *spiritus privatus*; qui a Luthero in religionis negotium, a Cartesio in philosophiam inductus est.

* 704. Resp. *Dist. maj.*: In iis veritatibus quæ cuicque sunt evidentes, *conc.*; in cæteris, *nego.* Et *contradist. min.*

Ad 1^m *Dist.*: Si ponatur utriusque sententia evidens *nego suppositum*: duo enim contradictoria nequeunt esse simul evidentia; si ponatur utriusque sententia mere probabilis, *omitto ant.*; nam hæc suppositio ad præsentem quæstionem non facit. Cæterum neque in hoc casu verum est, non posse absolute quemquam suæ rationi fidere. Si denique ponatur uni esse suam sententiam plane evidentem, alteri suam probabilem, *nego* non posse primum suæ rationi fidere.

Nego autem prorsus *utrumque consequens et consequentiam utramque*. Quis enim dicat omni contentione opinionum, ad consensum plurium esse appellandum, aut plurium consensum semper esse veritatis indicium? Si autem ratio individualis est plane imbecillis, ratio quoque universalis imbecillis erit (672, 4^o), et nullum amplius habebit auctoritas fundamentum (672, 5^o).

* 705. Ad 2^m Applicetur superior distinctio, et nota quæ

in alio loco diximus de auctoritatis utilitate (617, 4^o). Quod autem ii qui a communibus sentiis discedunt, ut stulti habeantur, esto; at non semper merito, imo quandoque per maximam injuriam, ut vel ipsa christianæ religionis docet historia. Tunc solum merito habentur ut stulti qui a communibus sentiis discedunt, quum veritatem impugnant omnibus evidentem; neque tamen ideo stulti habentur, quia aliter sentiunt ac reliqui; sed quia evidentia non tanguntur; id quod maximæ hebetudinis est. Non enim ideo aliquid verum est et singulis certum, quia ab omnibus admittitur, sed ideo ab omnibus admittitur, quia singulis evidens est.

* 706. Ad 3^m *Neg. parit.* Protestantes errant, quia in re religionis revelatæ, in qua ex institutione divina, Ecclesia iudex et magistra constituta est, Ecclesiæ iudicio contempto, rationem consulunt. Philosophi autem dum ratione privata de veritate judicant, sane non errant, quia in re philosophica ratio iudex est, quanquam christiani philosophi ratio Ecclesiæ subdita esse debeat (Prol: X): Ecclesiæ, inquam, non auctoritati generis humani. Ex quo inferes, adversarium potius in errorem protestantium incidere; error enim iste in eo est, quod legitimo iudice spreto, ad alienum eumque incompetentem se conferant.

Quod vero subditur de Cartesio, rejicito inter exaggerationes, de quibus alibi mentionem fecimus (456). Quanquam enim verum sit, Cartesium nimis despexisse sapientum auctoritatem, et traditionis scientificæ præsidiiis, nullo habito delectu, imprudenter se privasse, nihilominus quis dixerit, solummodo post Cartesium cœpisse homines propriam rationem consulere, et juxta evidentiam individualement de veritate decernere?

* 707. Obj. V. Natura ipsa nos docet veritatis criterium unicum esse auctoritatem.

1^o Ex hoc pueri non alium sequuntur ducem, quam auctoritatem.

2^o Adulti non differunt a pueris, nisi quod hi auctoritatem quamcunque sequuntur, illi majorem.

3^o Quum homines aliqua in re non conveniunt, arbitrum sibi eligunt.

4^o Quisque nostrum, quum communem contra se sententiam stare perspicit, de seipso diffidere incipit.

Resp. Neg. ant. Ad 1^m *Dist.*: Ex instinctu quodam et affectu provide a natura ipsorum animis impresso, *conc.*; ut criterium veritatis, *subd.*; postquam aliis criteriis usi sunt, *conc.* secus *nego.*

Ad 2^m *Nego.* Non enim semper homines, imo nec pueri, statim ac ratione uti incipiunt, sola auctoritate ducuntur in omnibus. Quomodo vero aut qua via discernunt adulti majorem auctoritatem a minori? certe per individualement rationem.

Ad 3^m *Dist.*: In dubiis, *conc.*; in certis et evidentibus, *subd.*: ut qui de re certa dubitat convincatur, *conc.*; quasi vero qui evidentem sententiam tuetur, evidentiae minime fidat, *nego.* Quem vero querunt arbitrum? An genus humanum? Minime sane; at individuum unum aut alterum. Ergo et illi qui arbitrum sibi præoptant, rationis individuae jura agnoscunt.

Ad 4^m *Dist.*: I. e. timet ne præjudicio aut affectu, non vero evidentia ad judicandum feratur, *conc.*; dubitat de ipsa evidentia, *nego* (617, 4^o).

* 708. Obj. VI. Principium evidentiae individualis 1^o omnium errorum clypeus esse potest, et ad omnem veritatem impugnandam converti. Potest enim quisque dicere: hoc mihi est evidens; ergo verum: hoc mihi non est evidens; ergo falsum.

2^o Imo potest per hoc stultus quicumque suas insanias invincibiliter defendere.

Resp. ad 1^m *Nego.* Ad rat. add. ad 1^m partem. Si sermo sit de erroribus, *dist.*: vel mentiendo vel certe appellando evidens, quod evidens non est, *conc.*; secus, *nego* (699).

Ad 2^m partem. *Dist.* Pessime ratiocinando, *conc.*; recte ratiocinando, *nego.* Non enim omne quod evidens non est, falsum est (698, ad 2^m).

Ad 2^m Invincibiliter quia stultus est, *conc.*; quasi vero argumento uteretur insolubili, *nego*; si enim stultus non

esset stultus, refutari posset, responsione modo adhibita ad 1^m.

CAPUT II.

DE ERRORE.

ARTICULUS I.

* *De erroris natura.*

709. Quid sit error intellectus, jam in primo libro definitum est (376). Ex dictis item manifestum est, eum non in intellectuali apprehensione situm esse (378), sed duntaxat in iudicio. Nunc quæ intimius ad erroris naturam et causas spectant, quæque in præcedentibus vel supposuimus, vel solum raptim indicavimus, exponenda sunt. Quæ ad naturam erroris pertinent, sequentes assertiones aperient.

710. PROPOSITIO I. *Erroris objectum est falsitas, sed sub aliqua veritatis specie proposita.*

Objectum erroris dico enuntiabile quod erroneo assensu amplectimur. Quod objectum huiusmodi sit falsitas, apertum est. Quod sit falsitas sub specie veri, ex natura intellectus consequitur. Formale enim intellectus objectum, nempe ratio propter quam in enuntiabile assensu fertur, veritas est. Non potest autem potentia ulla actu moveri, nisi tendendo ad proprium objectum. Quemadmodum igitur voluntas cuius objectum est bonum non potest rem ullam appetere, nisi boni speciem præ se ferat, ita intellectus non potest assensu complecti ullum enuntiabile, quod nec verum sit, nec veri saltem speciem habeat.

Neque dicas posse saltem voluntatis imperio ad assensum trahi. Nequit enim voluntas facultatum sibi subditarum mutare naturam, quanquam possit pro lubitu eas ad propria objecta convertere, vel ab iis divertere. Ita v. gr. potest convertere oculos ad lucem, et oculos contra lucem obstruere, sed efficere nequit, ut oculus videat, ubi nulla lux est. Eodem pacto, ut supra notavimus (692, seq.), voluntati subest ut intellectum applicet ad ea, quæ veritatem manifestant, vel ab iis avertat; subest item ipsi ut in inanibus rationibus, quæ

falsitatem suadent, intellectum defigat, earumque vim variis modis augeat; at in ejus potestate non est, ut intellectum inclinet ad assensum, ubi assensus objectum nullo modo adest.

Nota tamen, hæc intelligenda esse de errore qui ipso intellectus assensu contineatur. Nemo enim dubitat posse ore proferri errores, quos nulla veritatis species suaserit. Sed assertiones istæ mendacia potius quam errores dici merentur (691).

711. PROPOSITIO II. *Nullus error est physice necessarius.*

Nam ut sapienter scripsit Suarez, « Intellectus non determinatur ex necessitate ad iudicium, nisi media evidentia rei cognitæ... Evidentia autem non potest falsum iudicium parere (1). »

Profecto hæc una ratio rein plane evincit. Perspicias enim quid consequatur, si quis semel admittat errorem aliquem necessarium esse posse.

Consequitur 1^o propositionem evidentem posse esse falsam, adeoque nullum esse veritatis criterium (686).

Consequitur 2^o intellectum per se ac natura sua aliquando in errorem ferri.

Ex quibus consequitur 3^o dubitationem universalem legitimam esse.

712. PROPOSITIO III. *Omnis error a libera voluntatis motione originem habet.*

Deducitur ex modo dictis. Etenim, ut supra laudatus auctor disserit, « seclusa necessitate, non potest determinari intellectus ad iudicium, nisi per voluntatem, cum ipse liber non sit (2). » Scilicet intellectus ad assensum determinatur dupliciter: vel ab objecto, vel a voluntate, nam se per se ipsum determinare nequit. Porro objectum quod intellectum ad assensum determinat, non est qualiscunque veritatis species, sed duntaxat veritas evidens. Ab hoc autem objecto non potest intellectus ad assensum erroneum determinari. Restat ergo, ut ad assensum erroneum determinetur duntaxat per voluntatem.

(1) *Metaphys.*, disp. IX, sect. II, § VI. — (2) *Ibid.*

Colliges 1^o errorem omnem quamdam opinionem esse (398); atque adeo nunquam cum certitudine conjungi.

2^o Posse quandoque errorem *moraliter* esse necessarium; nempe quum tanta est difficultas errorem vitandi, ut humana voluntas communiter illam non superet. Idcirco supra solummodo diximus errorem *physice* necessarium non esse.

713. Animadverte postremo, non omnem errorem opinionem imprudentem esse. Quenam sit opinio imprudens in primo libro declaratum est (400). At solet frequenter odiosum erroris nomen strictius applicari ad opinionem falsam simul et imprudentem significandam. Et hoc modo accipi debet erroris significatio, quotiescunque in errore culpæ ratio esse dicitur, ut v. gr. in his s. Thomæ verbis: « Error manifeste habet rationem peccati. Non enim est » absque præsumptione quod aliquis de ignoratis sententiam ferat, et maxime in quibus periculum existit (1). » Quæ quidem strictior acceptio sua ratione non caret. Etenim opinio prudens revera huc redit, actu saltem exercito (392, 398), quod judicem posse a me, expensis motivis, aliquam sententiam assumi ut veram, donec veritas magis pateat. Hoc autem iudicium rectum est, et id quod affirmat verum, imo et evidens. Igitur formaliter non est erroneum, quamquam materia circa quam versatur, falsitatem continere possit: idcirco si hoc contingat, licebit iudicium hoc dicere errorem, sed solummodo *materialem*. In opinione autem imprudenti, assensum adhibemus firmiorem, quam motiva considerata postulent, spretoque omni erroris periculo, atque eodem pacto ac si res evidens esset, affirmamus rem aliter esse non posse: et in hoc a norma nobis ad iudicandum proposita vere aberramus (376). Et idcirco hic est error *formalis*.

ARTICULUS II.

* De errorum causis.

714. Causa quæ ad errorem intellectum determinat, sem-

(1) *Quæst. disp.* De Malo, q. 3, art. 7.

per, ut modo diximus, voluntas est. Non de hac causa in præsentī quærimus, sed de iis quibus vel intellectus disponitur ut ad errorem moveatur, vel voluntas impellitur ut intellectum in transversum agat. Ad errorem enim, ut ex disputatis in superiori articulo colligitur, duo requiruntur: 1^o ut falsitas speciem aliquam veritatis intellectui offerat; 2^o ut intellectum voluntas moveat. Dispositiones igitur ad errorem ex parte intellectus, sunt ea omnia quæ falsitati speciem veritatis obducunt, et ex parte voluntatis, ea omnia quæ iudicium inconsideratum illi appetibile faciunt.

715. Ut de iis quæ falsitati speciem veritatis obducunt primo loco dicam, ea sunt:

1^o *Errorēs a mente jam recepti*, quibus tanquam principiis utimur, vel ad conclusiones deducendas, vel ad analogias stabiliendas in casibus similibus.

Huc pertinent *præjudicia*. Est præjudicium opinio erronea ante animo defixa, qua utimur tanquam principio certo. Omnium pessima præjudicia sunt illa quæ primis vitæ annis fuerunt excepta: quia et teneris animis altius inhæserē, et longa consuetudine obfirmata maxime sunt; ex quo difficile admodum est ea radicitus unquam evellere.

Sunt porro diversa præjudicia pro indolis, temporis, nationis, patriæ, familiæ, educationis, sectæ, professionis varietate; ut facile quisque sin minus in seipso, at certe in aliis poterit animadvertere.

2^o *Auctoritas* sive historica sive dogmatica testium, qui vel in errore sunt, vel ad errorem pertrahere conantur. Quemadmodum autem se habet in speculativis testimoniis auctoritas, ita in practicis auctoritas exempli. Maxime autem aptæ ad illudendum sunt opiniones communes, tum quæ vere sunt communes, tum quæ tanquam communes proclamantur. Magna item communium consuetudinum contagio est.

3^o *Confusio* plurium simul idearum, relationum, factorum, propositionum, illationum similium inter se, quarum tamen altera ad verum iudicium adducat, altera ad falsum. Ex quo confusione fit, ut comperta unius partis veritate, altera alteri in iudicando subrogetur, vel utraque simul assu-

Colliges 1^o errorem omnem quamdam opinionem esse (398); atque adeo nunquam cum certitudine conjungi.

2^o Posse quandoque errorem *moraliter* esse necessarium; nempe quum tanta est difficultas errorem vitandi, ut humana voluntas communiter illam non superet. Idcirco supra solummodo diximus errorem *physice* necessarium non esse.

713. Animadvertite postremo, non omnem errorem opinionem imprudentem esse. Quænam sit opinio imprudens in primo libro declaratum est (400). At solet frequenter odiosum erroris nomen strictius applicari ad opinionem falsam simul et imprudentem significandam. Et hoc modo accipi debet erroris significatio, quotiescunque in errore culpæ ratio esse dicitur, ut v. gr. in his s. Thomæ verbis: « Error manifeste habet rationem peccati. Non enim est » absque præsumptione quod aliquis de ignoratis sententiam ferat, et maxime in quibus periculum existit (1). » Quæ quidem strictior acceptio sua ratione non caret. Etenim opinio prudens revera huc redit, actu saltem exercito (392, 398), quod judicem posse a me, expensis motivis, aliquam sententiam assumi ut veram, donec veritas magis pateat. Hoc autem iudicium rectum est, et id quod affirmat verum, imo et evidens. Igitur formaliter non est erroneum, quamquam materia circa quam versatur, falsitatem continere possit: idcirco si hoc contingat, licebit iudicium hoc dicere errorem, sed solummodo *materialem*. In opinione autem imprudenti, assensum adhibemus firmiorem, quam motiva considerata postulent, spretoque omni erroris periculo, atque eodem pacto ac si res evidens esset, affirmamus rem aliter esse non posse: et in hoc a norma nobis ad iudicandum proposita vere aberramus (376). Et idcirco hic est error *formalis*.

ARTICULUS II.

* De errorum causis.

714. Causa quæ ad errorem intellectum determinat, sem-

(1) *Quæst. disp.* De Malo, q. 3, art. 7.

per, ut modo diximus, voluntas est. Non de hac causa in præsentī quærimus, sed de iis quibus vel intellectus disponitur ut ad errorem moveatur, vel voluntas impellitur ut intellectum in transversum agat. Ad errorem enim, ut ex disputatis in superiori articulo colligitur, duo requiruntur: 1^o *ut falsitas speciem aliquam veritatis intellectui offerat*; 2^o *ut intellectum voluntas moveat*. Dispositiones igitur ad errorem ex parte intellectus, sunt ea omnia quæ falsitati speciem veritatis obducunt, et ex parte voluntatis, ea omnia quæ iudicium inconsideratum illi appetibile faciunt.

715. Ut de iis quæ falsitati speciem veritatis obducunt primo loco dicam, ea sunt:

1^o *Errorēs a mente jam recepti*, quibus tanquam principiis utimur, vel ad conclusiones deducendas, vel ad analogias stabiliendas in casibus similibus.

Huc pertinent *præjudicia*. Est præjudicium *opinio erronea ante animo defixa, qua utimur tanquam principio certo*. Omnium pessima præjudicia sunt illa quæ primis vitæ annis fuerunt excepta: quia et teneris animis altius inhæserē, et longa consuetudine obfirmata maxime sunt; ex quo difficile admodum est ea radicitus unquam evellere.

Sunt porro diversa præjudicia pro indolis, temporis, nationis, patriæ, familiæ, educationis, sectæ, professionis varietate; ut facile quisque sin minus in seipso, at certe in aliis poterit animadvertere.

2^o *Auctoritas* sive historica sive dogmatica testium, qui vel in errore sunt, vel ad errorem pertrahere conantur. Quem admodum autem se habet in speculativis testimonii auctoritas, ita in practicis auctoritas exempli. Maxime autem aptæ ad illudendum sunt opiniones communes, tum quæ vere sunt communes, tum quæ tanquam communes proclamantur. Magna item communium consuetudinum contagio est.

3^o *Confusio* plurium simul idearum, relationum, factorum, propositionum, illationum similium inter se, quarum tamen altera ad verum iudicium adducat, altera ad falsum. Ex quo confusione fit, ut comperta unius partis veritate, altera alteri in iudicando subrogetur, vel utraque simul assu-

matur (701). Exempla colliges ex iis omnibus, quæ tum in hac altera logicæ parte, tum in prima exposita sunt. Hæc porro confusio, primitiva radix est errorum omnium. Nam ii quoque errores qui in auctoritate fundantur, prævium aliquem errorem supponunt, videlicet falsam de auctoritatis pondere æstimationem, quæ falsa æstimatio a confusione aliqua tandem procedat necesse est.

716. Quæres hoc loco duo. Primo, *quid sit quod hoc pacto unum alteri substituit*: secundo, *quomodo fieri possit substitutio ista*.

Quoad primum respondeo: causas quæ unum alteri subrogare in mente possunt ad tres commode revocari, quæ sunt:

1^o *Imaginatio*, quæ uno ex associatis phantasmatibus excitato, alterum statim oggerit, primoque relicto, in hoc defigitur, si ab hoc magis ipsa percellatur, aut si hoc affectibus animi sit magis conforme. Hæc porro facta mutatione phantasmatum, ideæ quoque mentis cogitationesque mutantur. Quis potuit unquam vehementis imaginationis hominem in prolixiore aliquo ratiocinio detinere?

2^o *Oblivio* alicujus adjuncti seu conditionis, sine qua id quod memoria reproducit, nec veritatem habet amplius, nec evidentiam (592).

3^o *Vocabulorum indeterminata vel æquivoca significatio* (99, 1^o): ex qua fit, ut uni eidemque vocabulo modo una, modo altera significatio tribuatur, vel a loquente secundum unam significationem, ab audiente secundum alteram accipiat.

717. Conditiō autem quæ facit, ut per hanc substitutionem extranei elementi, in locum veritatis succedat falsitas, semper est *attentionis seu reflexionis defectus*, aut saltem *interruptio*. Quare causæ omnes quæ attentionem reflexionemque impedire, perturbare, abrumperè possunt, huic deceptioni viam parant. Causæ vero, quæ attentioni nocent, sunt

a) *ex parte subjecti*: mentis limitatio; virium quæ attentioni subserviunt defatigatio; sensatio aut affectus vehementior, quæ ad se, suumque objectum animum trahit; perturbatio,

batio, sollicitudo, tumultus animi variis seu curis seu passionibus excitatus; liberum voluntatis arbitrium;

b) *ex parte objecti*: multiplicitas rerum quæ considerandæ sunt; ratiocinii prolixitas; objecti subtilitas, amplitudo, sublimitas; quæcunque omnia difficilem attentionem reddunt.

Quæ his omnibus remedia sint adhibenda in prima parte dictum est (50).

718. Venio ad ea quæ voluntatem movere possunt ad erroneum judicium imperandum. Quantacunque sit mentis confusio, nunquam posset mens per se falsum judicium assensu firmare; quia nunquam ex idearum confusione consurgere potest evidentia. Idcirco voluntatis motio accedat necesse est, quæ hæsitantem intellectum ad assensum festinandum imprudenter urgeat et cogat. Sed cum ipsa voluntas, licet libera, movere se nisi alicujus boni amore non possit, oportet ut bono aliquo ad assensum urgendum inclinetur. Potest autem ad hoc inclinari dupliciter; vel *amore enuntiabilis*, vel *amore assensus*; nempe vel quia bonum illi est, rem ita esse ut enuntiabili non evidenti continetur, vel quia malum illi est assensum suspendere ac diutius retinere.

719. 1^o Quia ipsum enuntiabile erroneum appetibile voluntati faciunt, hæc fere sunt

a) quod illud receptis et amatis, aut usu familiaribus opinionibus congruat, vel quod e contrario opiniones sive ratione sui, sive ratione auctorum invisas impugnet;

b) quod conforme sit animæ desideriis atque cupiditatibus, præsertim si hæ fuerint vehementiores, et ex objecti præsentia novis stimulis excitatæ;

c) quia sic esse ad fines intentos utile foret;

d) amor ipse ordinis, proportionis, pulchritudinis, virtutis;

e) denique æstimatio nimia auctoritatis, aut e converso contradicendi prurigo, vel etiam novitatis amor.

720. 2^o Variæ quoque sunt causæ, quibus voluntati grave ac molestum fit assensum retinere; nempe

a) impatientia conatus et contentionis, quæ ad reflecten-

dum et ad solida rationum fundamenta investiganda requiritur;

b) vanitas ac nimia propriæ perspicacitatis fiducia, qua homo imbutus, dedecori sibi putat fore, si aliquid se non vidisse, aut tempore se egere ad quælibet perspicienda fateatur;

c) quæstionis de qua agitur parvipensio, vel quia ab homine proponitur quem despiciamus, vel quia inutilis æstimatur aut æstimari vulgo solet;

d) necessitas se determinandi ad agendum aut ad aliquid consilii capiendum, quæ moras non patiatur, vel quia res urget, vel quia anxietas animum discruciat.

721. Voluntas igitur ad errorem intellectum movet, quia vel ab uno vel ab altero horum motivorum allicitur ad iudicium. Nihilominus, ut supra notatum est (718, 5°), hæc voluntatis motio locum habere nequit, nisi aliqua in intellectu confusio existat. Si igitur confusio nulla intellectum perturbet, si evidentia veritatis illi affulgeat, male affecta voluntas ante omnia ab illa attentionem divertit, conquirens studiose aliquid quo serenitatem illam obnubilare possit; quod ubi invenerit in eoque intellectum defixerit, tunc enimvero assensum extorquet. Et hi errores sunt omnium pessimi, quia non modo inordinatum erga aliquod objectum voluntatis amorem supponunt, sed etiam odium fugamque agnitæ veritatis includunt. Sed non semper ita errat humana mens, imo communiter non ita errat. Frequenter enim confusio mentis omnem voluntatis actum præcedit: eamque voluntas contemnit, quum vero amore objecti movetur, aut eam nullo modo attendit, aut studiose fovet ac retinet, præcavens diligenter ab iis considerandis, quæ confusionem dissipare possent.

ARTICULUS III.

* *Difficultates.*

722. Quæ objici possunt contra statutam de erroris origine doctrinam, ad hæc fere reducuntur:

Obj. I. Multi errorus sunt dicendi necessarii, ut ex. gr.

1° Illi in quos inducimur per testimonium de cujus falsitate nulla suspicio occurrit, in quo tamen falsitas est.

2° Generatim errores omnes qui versantur circa ejusmodi propositiones, de quibus si quis dubitaret, ut stultus haberetur, quibus tamen potest falsitas subesse.

Resp. *Nego* errorem ullum necessarium esse, saltem physice (712, 2°).

Ad 1^m *Nego* errores istos esse necessarios. Non enim est evidens testimonii cum veritate connexio ex hoc solum, quod nulla suspicio oboriatur de opposito (408, 6°). Igitur assensus est semper liber, non minus quum est definitivus, et firmior quam testimonii auctoritas exigat, quam quum est opinativus et prudens, et solum materialiter erroneus.

Ad 2^m eadem esto responsio. Quanquam enim merito haberetur ut stultus, qui in omnibus evidentiam requireret, quia sibi præcideret operandi possibilitatem, nihilominus ex æquo verum est, ea omnia quibus potest falsitas subesse, evidentia destitui, adeoque non posse per se assensum mentis extorquere. In his igitur satis est, si ab errore formali caveamus (713).

723. Obj. II. Multi errores sunt plane ab omni influxu voluntatis exempti, ut v. gr. errores qui contingunt in numerorum supputatione, ex eo quod, me prorsus inadvertente, una numeralis nota pro alia e manu et calamo elebatur, v. gr. 9 pro 8.

Resp. *Dist.*: Errores mentis *nego*; errores phantasie aut manus, *subd.*: remote et indirecte et semper, *nego*; proxime et directe, *trans*.

Quoad exemplum animadverte, errorem mentis non contingere, quum manus unam notam scribit pro altera, sed in supputationis fine, quum judicas summam v. gr. vel differentiam quæsitam esse eam quam invenisti. Jam in hoc iudicio subauditur semper conditio hæc: nisi lapsus aliquis manus scribentis, ac phantasie suggerentis obvenerit. Qua inclusa conditione iudicium prudens est, et error mere materialis (713). Si vero, conditione illa exclusâ, absolutum

quis judicium ponat, error erit formalis, sed simul voluntarius manifeste; non enim est evidens ei qui judicat, aberrationem omnem abfuisse; imo evidens est potuisse obrepere, vel ex eo quod ita frequenter accidit.

724. Ille vero error manus aut phantasie, quanquam de eo nobis quæstio non sit, tamen ipse quoque aliquo modo voluntarius dicendus est, remote saltem et indirecte. Etenim ad aberrationem illam in scriptione duo concurrerunt: 1° inadvertentia seu attentionis interruptio, ut difficultas supponit, et supponendum est; 2° imaginatio, quæ ex occulta quadam associatione cum præcedentibus phantasmatibus, notam suggessit diversam ab ea quam intelligentia attendens dictasset. Jam hæc attentionis interruptio certe voluntaria fuit, quanquam facile largiar et moraliter fuisse inevitabilem (712, 2°), et quandoque fortasse non liberam.

725. Obj. III. Falsitas quandoque potest proponi intellectui ut evidens veritas, ac proinde error potest esse necessarius.

Id autem contingit ex invincibili ignorantia.

Nam 1° quædam propositiones evidentes sunt veræ sub quadam conditione, et falsæ sine illa. Atqui potest fieri, ut invincibiliter ignoremus sublatam esse conditionem. In hoc ergo casu judicium nobis evidens, erit falsum.

2° V. g. ei cui per miraculum se exhibeat spiritus angelicus sub sensibili figura, si miraculum ignoret, evidens erit hominem ipsi esse præsentem.

3° Simili quodam modo vulgus errat circa solis motum; invincibiliter enim ignorat terram moveri.

4° Idem dicito de omnibus illusionibus opticis, præsertim ante experientiam, qua illas corrigere discimus; v. gr. quum primo pastor cernit pedum sub aqua curvari.

726. Resp. *Neg. ant. cons. et quod ad probandum antecedens generatim dicitur*: ignorantiam invincibilem posse falsitati evidentiam veritatis tribuere.

Ad 1^m *Dist. maj.*: Propositiones ejusmodi sunt evidentes inclusa et attenta conditione illa, *conc.*; sunt evidentes ea conditione non inclusa aut non attenta, *neg.*; et *concessa*

min., dist. cons.: Judicium erit falsum, si in judicio includatur adhuc conditio, *neg.*; si non includatur, *conc.* Errabimus nempe, quia confundemus conditionalem propositionem evidentem cum categorica et non evidenti (715, 3°). Quando autem ignorantia est invincibilis, conditio sub qua judicium verum est, in judicio semper includitur.

Ad 2^m *Dist.*: Erit evidens hypotheticæ, *conc.*; absolute, *neg.*

Propositio evidens in hoc casu et similibus hæc est: *Hoc quod video est homo, si in hoc casu physica lex exceptionem non patitur.* Physica enim certitudo atque evidentia in singularibus casibus semper hanc habet implicitam conditionem, ex rei natura (408, 5°; 481, 3°).

Ad 3^m similis esto responsio. Evidens absolute esset solem moveri, si evidens esset non moveri terram. Atqui hoc evidens non est. Non enim perinde est quod non deprehendam telluris motum; illumque invincibiliter ignorem, et quod evidens mihi sit oppositum (499, 4°).

Igitur si categorice judico non moveri terram, ac per consequens moveri solem, affirmabo quæ evidentia non sunt. *Concedo* nihilominus errorem hunc moraliter necessarium esse.

Ad 4^m Quæcunque sit optica illusio, quæcunque ignorantia, nulli esse potest evidens rem esse semper ut apparet. Quomodo enim aut unde id evidens foret? Quicumque igitur subsequatur error, id certe non determinatur ab evidentia. Cæterum negari quoque posset, in pluribus hujusmodi illusionibus, etiam quum eæ primo se offerunt, aut judicium proferri, aut invincibilem ignorantiam vulgo haberi. Videmus enim homines in his casibus, quotiescunque possunt, statim alios adhibere sensus, ut veritatem deprehendant; id quod indicio est eos de veritate phænomeni dubitare (498). Ita qui pedum in lacu curvatum primo videt, admiratur, eumque statim extollit, curiose aspicit et tangit.

727. Ex dictis hujusque colliges

1° Errores mentis formales nunquam esse invincibiles, saltem physice.

2° Errores mentis materiales posse quandoque esse invincibiles vel moraliter, vel etiam physice, imo quandoque etiam ethice, quum nempe opinio unice prudens erronea est.

3° Multo magis errores alterius potentiæ, v. gr. phantasie aut virtutis locomotivæ invincibiles esse posse.

CAPUT III.

DE RATIONIS HUMANÆ LIMITIBUS.

ARTICULUS I.

De veritatibus supra rationem.

728. Superest ad hujus tractationis, ac totius adeo logicæ complementum, ut de rationis humanæ limitibus, ac de extensione propemodum quam evidentia habere potest, aliquid disseramus. Ad recte namque judicandum non minimum confert, ut scias intra quos terminos judicium tibi ferre liceat; quemadmodum ad jus ex æquitate dicendum, jurisdictionis acceptæ fines nosse necesse est. Porro, si rationalistas (456) audias, nulli sunt humano intellectui præfiniti limites, sed quantum intelligibilium patet ambitus, tantum intelligentiæ nostræ virtus atque perfectibilitas extenditur; ita ut nulla veritas sit ipsi inaccessibilis, nulla ad quam indefinito propecta progressu pertingere aliquando non debeat. Hanc assertionem vere intolerandam plane refutabit sequens.

PROPOSITIO I. *Fatendum est veritates quasdam esse, quæ absolute et per se rationis humanæ captum excedunt.*

Nota 1° hæc dici de humana ratione secundum se spectata, non tantum relative ad diversam, quam in individuis habet, capacitatem et evolutionem.

2° Ideo veritatem aliquam supra rationem esse, quod non possit intellectus prædicati quod rei convenit, ideam habere per se, aut certe quod non possit convenientiam aut discrepantiam inter rem et prædicatum illi conveniens aut non conveniens apprehendere.

3° Veritatem aliquam dici posse supra rationem

a) *absolute, et secundum quid.* Absolute est supra rationem ea veritas, quam mediis naturalibus assequi nullo modo possumus. Secundum quid illa, quam mediis iisdem non possumus cum certitudine aut cum perfectione cognoscere; ut v. gr. quædam futura libera, vel rerum essentia physica.

b) *per se, et per accidens.* Mentis humanæ vires per se illa excedunt, quibus cognoscendis hæ vires ex sese impares sunt. Per accidens, quæ cognosci nequeunt propter difficultates virium exercitium præpedientes; ut est v. gr. numerus stellarum.

729. Probatur propositio.

1° Intellectus humanus evidenter finitus est, ut qui contingens est, et successive perfectibilis, et ad se perficiendum tot adminiculis egens. Quis autem existimaverit, finitum intellectum parem esse iis omnibus cognoscendis, quæ intellectus infinitus intelligit? Etenim dici nequit intellectum infinitum a finito differre duntaxat quoad modum cognoscendi, non vero etiam quoad possibilitium cognitionum amplitudinem. Si enim inter intellectus finitos ejusdem speciei, quorum differentia sunt accidentales et distantia finita, non solum invenitur discrimen quoad celeritatem aut perfectionem cognitionis, sed etiam quoad numerum cognitionum possibilitium; multo magis hoc quoque discrimen haberi debet inter intellectum finitum et infinitum, quia ipsa differunt essentia, et infinite ab invicem distant.

Concludendum ergo, mentem infinitam cognoscere plurima, quæ sunt ultra humanæ cognitionis limites, hominique naturaliter impervia.

2° Multæ certe veritates, quæ ad divinam naturam pertinent, humani intellectus vires exsuperant.

Nam si quis alicujus rei essentiam non cognoscit intuitive per experientiam, aut cognitione argumentativa quæ intuitivæ æquivalet, is multa quæ ad eam rem pertinent, ignoret necesse est. Essentia enim est principium, ex quo proprietates deducuntur. Ut si quis ideam colorum experimentalem non haberet, is non alia posset de coloribus cognoscere, nisi quæ ex ideis indeterminatis entis, qualitatibus,

et aliis hujusmodi, atque ex proportionibus quibusdam cum aliis sensationibus deducere licet; si tamen cognosceret ex aliorum dicto colores esse.

Jam Dei essentiam humana mens naturalibus viribus nec intuetur, nec intueri potest. Neque potest ex ideis rerum cæterarum ideam essentiæ divinæ acquirere intuitivæ æquivalentem.

Idea enim intuitivæ æquivalens constare debet elementis abstractis a rebus, quæ cum objecto quod repræsentare nobis volumus, communi saltem genere contineantur. At res finitæ quos cognoscimus, ad talem Dei ideam nos evehere non possunt. Distant enim ab infinito infinite, nec genere cum illo communi continentur. Ex his itaque cognoscere Deum possumus, solummodo ut est prima omnium causa: nempe quod ipse est, quod non est ab alio, et quod perfectiones quæ in rebus finitis elucent, supereminenter continet. Et hæc quidem cognitiones rationis humanæ vires non superant: sed Deum ut est in se, et quæcunque divinæ essentiæ intima sunt, ab humana mente cognosci æque repugnat, ac cognitionem colorum quam visio suppeditat, ab eo haberi qui cæcus sit natus.

3º Cæterum mirari satis non possum, esse homines, qui negent esse aliquid humanæ rationi impervium, cum tam multa sint in ipsis rebus naturalibus, quæ mirari utique possumus et experimento cognoscere, at quorum essentias, causas, originem plane ignoramus. Quis enim corporum diversorum, aut virium quibus illa pollent, intimam naturam unquam rimatus est? quid est attractio seu potius attractiones tam variæ molecularum et corporum? quid extensio, quid impenetrabilitas, quid motus, quid vegetatio, aut quid animalis vitæ mysterium? Et si te ipsum introspicias, explica, si potes, quomodo sensationes gignantur, quomodo illas phantasia reproducat, quomodo anima corpori uniatur, aut in quo sita sit diversitas modificationum quas in se illa inducit quum cogitat, judicat, attendit, reflectit, vult. Admirande Creator et ineffabilis! Mysteriis undequaque circumdamur, ignorantia caligine pene obruimur; et erit adhuc qui in Te putet nihil sibi inexploratum esse?

730. PROPOSITIO II. *Quæ sunt supra rationem, nisi per summum nefas, dici nequeunt contra rationem esse.*

Etenim supra rationem est ea propositio, inter cujus terminos, nec convenientiam, nec discrepantiam, ratio suis relicta viribus deprehendere sufficit. Contra rationem est ea propositio, quæ evidenti veritati opponitur, nempe quæ in terminis quibus constat, vel absolute vel hypothetice, vel mediate vel immediate contradictionem aliquam manifestat. Jam quis non videat, quantum inter se hæc duo differant: *non posse cognosci et contradictionem includere?* Ergo quæ sunt supra rationem, non sunt hoc ipso profecto contra rationem: solummodo *non sunt secundum rationem*, quia quemadmodum ratione cognosci nequeunt, ita cum principiis quibus ratio regitur, aut cum iis quæ per media naturalia ratio cognoscit, connexionem necessariam nobis non manifestant.

731. PROPOSITIO III. *Veritates supra rationem possunt esse materia doctrinæ, quæ a superiore intelligentia aut a revelatione divina procedat.*

Non est hic quæstio, utrum possit superior intelligentia aut Deus immediate aliquam homines docere veritatem. Prima enim quæstio parum hoc loco utilitatis haberet, alteram autem vel proponere ineptum est, saltem in dubitantis modum. Unice illud quærimus, an veritates quæ rationis captum superant, proponi hominibus per superiorem doctrinam possint. Si enim homines has veritates intelligere nequeunt, inutile videtur eas ipsis proponi.

732. Respondeo, extra omnem dubitationem esse, illas quoque veritates quæ humani intellectus vires absolute et per se exsuperant, posse hominibus a Deo proponi. Nec obstat non posse hominem, etiamsi ejusmodi enuntiationes ipsi proponantur, prædicati propriam ideam habere, aut prædicati cum subjecto relationem percipere.

Nam quod ad primum spectat, etiamsi homo nequeat in præsentī suarum facultatum statu, ideam habere prædicati intuitivam aut intuitivæ æquivalentem, potest nihilominus divino edoctus magisterio, formare sibi rei conceptum ex

ideis indeterminatis atque ex aliqua cum rebus quas cognoscit analogia, qui veritati proportionem quadam respondeat; ad eum fere modum, quo cæcus colorum et eorum quæ ad visionem pertinent, notionem aliquam analogicam ex aliorum dictis formare sibi potest.

Quoad alterum vero; ex eo quod impar sit homo intrinsicæ prædicati cum subjecto convenientiæ percipiendæ, id solum sequitur, non posse eum cognoscere *cur res ita sit*. At si per divinam revelationem ei res manifestetur, cognoscet *rem ita esse*; ad quam cognitionem sufficit motivum extrinsecum.

735. CORROLARIA. Intelliges ex dictis: 1^o quam sit falsum cartesianum principium (690), si sub exclusiva forma ita proponatur: *Id omne ac solum quod clare et distincte percipimus, certum nobis est*. Ut enim alia omittam (1), revelata divinitus mysteria nec distincte nec clare percipimus, et tamen sunt nobis certissima. Verum nihilominus est, non ita principium hoc fuisse a Cartesio propositum.

2^o Veritatem a Deo revelatam etsi supra rationem sit, non posse unquam alicui propositioni metaphysice certæ esse repugnantem. Posse tamen opponi propositionibus physice certis, quia ex divinæ omnipotentiae virtute potest his aliquando derogari.

3^o Objectiones omnes contra revelatum quodcunque mysterium satis confutari, si ostendatur nullam in ipso contradictionem evidentem iis demonstrari.

(1) Cartesianæ doctrinæ pericula jam a suo tempore animadverterat Bossuet, quum ita scripsit: « De ces mêmes principes mal entendus un autre inconvénient terrible gagne sensiblement les esprits, car, sous prétexte qu'il ne faut admettre que ce qu'on entend clairement (ce qui réduit à certaines bornes, est très véritable), chacun se donne la liberté de dire: j'entends ceci et je n'entends pas cela: et sur ce seul fondement on approuve et on rejette tout ce qu'on veut: sans songer, qu'outre nos idées claires et distinctes, il y en a de confuses et de générales, qui ne laissent pas d'enfermer des vérités si essentielles, qu'on renverserait tout en les niant. Il s'introduit sous ce prétexte une liberté de juger qui fait que, sans égard à la tradition, on avance témérairement tout ce qu'on pense. » (Lettre au P. Lami.)

ARTICULUS II.

Difficultates.

734. Objici potest I. nullas esse posse veritates supra intellectus humani vires. Nam 1^o veritas est intellectus objectum; ergo quidquid verum est, potest esse intellectus objectum; 2^o quemadmodum quidquid bonum est, potest esse objectum voluntatis.

Resp. *Neg. ant.*: Ad 1^m *Dist. ant.* Nempe id ratione cujus intellectus assensum adhibet, *conc.*; hoc sensu, quod omne enuntiabile quod verum sit, possit intelligi a quocunque intellectu, *nego*. Hinc *nego cons. et consequentiam*.

Quum de propositionibus loquimur, assertio illa: *objectum intellectus est veritas*, intelligenda est de ipsa ratione veritatis quæ est in enuntiabilibus, quæque est objectum formale, ut aiunt *per quod*, videlicet ratione cujus intellectus enuntiabilibus assensum præbet. Sed ad hoc ut ratione veritatis præbeatur assensus, necesse est ut enuntiabile intellectui proponatur, atque intellectus ex aliquo motivo ejus veritatem agnoscat: quæ duo in veritatibus supra rationem locum non habent.

Ad 2^m *Dist.* Si ipsi proponatur ut bonum, *conc.*; secus, *nego*. Non enim voluntas fertur in ignotum, aut in id in quo non apparet boni ratio. Ita et intellectus non fertur assensu in id quod verum est, nisi id ipsi proponatur, et verum ab ipso intelligatur.

735. Obj. II Baylius. Si quid supra rationem foret, hoc ipso contra rationem esset: quod enim supra rationem est, non est rationi conforme.

Resp. *Neg. ant.* Ad prob. *Dist.*: Quod supra rationem est, non est rationi conforme *negative*, i. e. quatenus non iis continetur, quorum veritatem ratio per naturalia media cognoscit, *conc.*; *positive*, i. e. quatenus iis contineatur, quorum falsitatem ratio cognoscit. *nego*. Vide superius dicta (750).

736. Obj. III. Mysteriis hujusmodi nunquam potest assensus adhiberi.

Nam 1^o homo non debet assensum præbere, nisi iis propo-

sitionibus quas ratio suadet veras esse. Assensus enim rationabilis esse debet. Sed nequit ratio suadere veritatem eorum quæ sunt supra rationem.

2^o Nec possunt ista dici a Deo revelata. Deus enim quem adoro, inquit Rousseau, tenebrarum Deus non est, nec intellectum mihi largitus est ut eo non uterer. Injuriam ergo facit rationis auctori quicumque dicit, rationem subjiciendam esse.

Resp. *Neg. ant.* Ad 1^m *Dist. maj.* : Quas ratio suadet veras, esse per motiva sive intrinseca, sive extrinseca, *conc.* ; per motiva solum intrinseca, *nego.*

Dist. min. : Per motiva intrinseca, *conc.* ; per extrinseca, *subd.* ; si constet de revelatione divina, *nego* ; secus *trans.* Si enim de revelatione divina constet, jam ratio perspicit, non posse id quod proponitur verum non esse, proinde irrationabile plane esset, assensum negare aut suspendere.

737. Ad 2^m *Nego.* Ad argumentum quod subditur. *Dist. 1^m partem ant.* : Quatenus est summe intelligibilis in se, *conc.* ; quatenus sit ex toto intelligibilis a nobis, *nego.* Utique Deus est lux, sed lux immensa et infinita: tua autem pupilla, o miser, limitata est et infirma: idcirco immensam infinitamque lucem complecti non potest. Imo si in illa pervicacius defigi velit, eamque curiosius, quam par est, scrutari, excæbabitur omnino ac deficiet.

Dist. 2^m partem ant. : Deus non est mihi largitus intellectum, ut eo non uterer in iis perscrutandis quæ illi pervia sunt, *conc.* ; in iis quæ sunt ipsi impervia, *subd.* ; non est mihi largitus intellectum, ut eo non uterer ad inquirendas rationes intrinsecas, *omitto* ; ad credendum si revelentur, *conc.* Hic enim est usus legitimus intellectus in iis quæ sunt supra ejus vires, ut postquam de revelatione constet, inclinetur a voluntate ad assensum. Id tamen non impedit, quominus possit se convertere ad ea ipsa pro suo modulo illustranda et fidei scientiam constituendam.

Postremo *dist. cons.* Si subjiciatur ratio præjudiciis, erroribus et dubiis imprudentibus, *conc.* ; si subjiciatur auctoritati divinæ, *nego.* Ab eo utique injuria magna irrogatur rationis auctori, qui rationem propriam illi subjicere detre-

ctat, suamque rationem intelligentiæ infinitæ parem facit.

738. Obj. IV. Cæca hæc fides mysteriis adhibita rationi prorsus contraria est, quod patet

1^o ex difficultate quam experiuntur homines, in mysteriis admittendis;

2^o ex eo quod hæc fides rationem enervat, impedit, ac timidam facit.

Resp. *Dist. ant.* : Si mysteria extrinsecis argumentis non satis comprobentur, *trans.* ; secus, *nego.*

Ad 1^m *Nego.* Hæc enim difficultas vel consideratur ut est in intellectu, vel ut est in voluntate. In intellectu difficultas hæc tota est in eo, quod ipse per se assentiri nequit iis, quæ ex motivis intrinsecis non sunt illi evidentiæ. Sed si horum credibilitas sit illi evidens, non est contra rationem, ut a voluntate ad assensum inclinetur; imo hoc est rationi maxime consentaneum.

Si vero consideretur difficultas quam experitur voluntas in assensu imperando, hæc sane difficultas, quum res est evidenter credibilis, non aliunde oriri potest, quam ab animi elatione aut ab aliqua alia inordinata cupiditate: non est ergo rationi contrarium ut hujusmodi difficultas superetur, sed imo hoc a ratione exigitur.

Ad 2^m *Nego.* Non enim fides Deo adhibita rationem enervat, sed corroborat et elevat; non impedit, sed tutatur ac dirigit; nec facit timidam, sed reddit cautionem, ut et de iis quæ supra se sunt, temere non judicet, et ea quæ humanæ subsunt investigationi, accuratius expendat.

ARTICULUS III.

* *Utrum aut quo sensu ratio dici possit independens.*

739. Quoniam rationalistæ, dum christianæ religionis mysteria ac divinæ revelationis auctoritatem impugnant, nihil frequentius in ore habent quam rationis independen-
tiam; juverit expendere paulisper, utrum captiosa hac atque ancipiti loquendi ratione aliquid quod rationabile sit, et intra quos limites significetur.

PROPOSITIO IV. *Ratio humana nullo modo independens dici potest.*

In primis, si verba ut sonant accipiantur locutio hæc falsam æstimationem inducit, et rejicienda plane est. Ratio enim per se, ut quæ potentia est non libera sed necessaria, in omnibus prorsus actibus suis dependens est, aut ab objecto quod illam determinat, aut a voluntate quæ illam applicat ad rerum considerationem vel distrahit, inclinatur ad assensum vel removet (691, seq. 712). Ratio igitur per se nulla potitur independentia. Sed quoniam actus quidam rationis voluntati subijciuntur, cum voluntas libera sit, possunt actus quoque illi in sua causa extrinseca liberi esse. Quæri igitur debet, non utrum ratio sit independens, sed utrum voluntas in actibus rationis imperandis independens existat.

740. Quæstio ita proposita, fere soluta est, aut certe difficultatem vix patitur, cum a præcipua ambiguitate qua laborabat, liberata sit. Ut plene solvatur, notandum 1º independentiam voluntatis in actibus inferiorum potentiarum imperandis, triplicem considerari posse; aliam *a coactione*, nempe a vi externa quæ adigat voluntatem ad actum imperandum; aliam *a necessitate*, quæ intrinsece voluntatem determinet ad unum; aliam *ab obligatione*, videlicet quia lex honestatis non præcipit voluntati ut operetur vel secus. Hæc dicitur libertas *moralis*.

Notandum 2º præter firmum assensum, quem quum agitur de veritatibus supra rationem, atque evidenter credilibus, voluntas intellectui imperare et potest et debet, ut in præcedente articulo dictum est, plures esse actus quos voluntas intellectui imperare potest. Hi autem sunt a) dubium, b) attentio, reflexio, inquisitio, discussio, c) opinio.

Notandum 3º aliud esse independentiam voluntatis in imperandis internis actibus intellectus; aliud independentiam in iis manifestandis, et juxta receptas opiniones operandi.

Hæc omnia perperam confundi solent a rationalistis, quum hæc de re disputant.

741. Jam si de ipsis actibus intellectus loquamur, nulli ambiguum est, voluntatem independentem esse *a coactione*; independentem quoque esse *a necessitate* assensus, quoad enuntiabilia non evidentia, et in multis etiam quoad eviden-

tia, ut in primo hujus libri capite dictum est (692, seq.). Sed libertas *ab obligatione morali* multo angustioribus coarctatur limitibus.

742. Nam 1º si de dubio loquamur, inhonestum est de veritatibus aut in se evidentibus, aut quæ demonstratæ sint evidenter credibiles, dubitare velle; qui enim hoc vellet, imprudentissime ageret, et veritati aperte rebellaret. E contrario, quum propositio inevidens est, dubium præcipitur ante expensa motiva, et tamdiu præcipitur, quamdiu opinari prudens non sit. Postea vero quam opinari datur, dubium erit moraliter liberum, si prudentia aut aliqua alia virtus non præcipiat, ut aliquam opinionem sectemur. Vides igitur moralem voluntatis in dubio imperando libertatem vix aliquando haberi.

743. 2º Attentio et reflexio præcipiuntur ante iudicium, præsertim si de re paulo graviore judicare velimus. Obligamur pariter ad inquirendam veritatem pluribus in casibus, Discussio autem vel est dubitativa vel confirmativa. Illa ex dubio procedit, et reducitur ad veritatis inquisitionem; hæc oritur ex eo quod veritatis jam nobis certæ evidentiam distinctam efficere, aut cæteris communicare cupimus, et hoc examen ad scientiæ inquisitionem revocatur. Dubitativum porro examen irrationabile est, adeoque illicitum, quum veritatis seu credibilitatis evidentia nobis affulsit; in his solum examen confirmativum licitum est.

Tota igitur libertas moralis, quantum ad hosce actus pertinet, huc reducitur, quod quum veritatem assequi non temnemur, in potestate nostra sit, ut illam inquiramus vel secus; quodque ad scientificam cognitionem comparandam non obligemur.

744. Tandem 3º quænam est in opinando libertas moralis? In primis opinio omnis, sive ex uno sive ex altero capite imprudens (400), mala est et irrationabilis. Si vero ex duabus probabilibus (400) sententiis, altera nobis videatur altera probabilior, anne liberum est quamcunque sequi? Aliter hic loquendum si sententia speculativa sit, aliter si practica. Si sententia speculativa est, tunc enimvero et veritatis amor et

prudencia requirunt ut eam sequamur, quæ probabilior nobis videtur. Si vero sententia practica est, non est revera attendenda major aut minor sententiarum probabilitas, sed norma illa, quam certa quædam principia ad recte in dubiis agendum suppeditant.

745. Sed de his philosophi morales ac theologi decernant. Hæc ideo attuli, ut pateret opinandi libertatem moralem philosopho vix esse ullam. Neque obest commune dictum: *in dubiis libertas*. Non enim hoc effatum de libertate opinandi est, sed de libertate manifestandi receptas opiniones, et quidem non de libertate morali, sed de libertate *a coactione*. Æquum enim est, ut in materiis vere dubiis et controversis, sinamus quemcunque sequi opinionem illam, quæ probabilior ipsi videatur. Utrum autem et intra quos limites honestum sit, aut civili societati utile, ut opiniones certo erroneæ vulgari sinantur, hoc scientia moralis et politica, et nostrorum præsertim temporum experientia definiant. Sed si increduli et rationalistæ libertatem legalem aliquibus in regionibus obtinent, ut sine ullo impedimento errores suos manifestare, atque adeo veritates divinitus revelatas impugnare possint, ne, quæso, libertatem hanc cum ipsa opinandi libertate morali, rationabili, ac philosophica per summum nefas permisceant.

746. Quæ cum ita sint, quisque videt independentiam rationis, qua nostra gloriatur ætas, quoad rem ipsam nihil aliud quam magnam chimæram esse; quoad conceptum vero ideam quamdam esse ex confusione rerum diversissimarum et ex præcipuorum quibus homo astringitur, officiorum oblivione contemptuque exortam. Desinant homines sibi aliisque illudere: exlèges non sumus, nullaque in re, neque in ordine physico, neque in ordine morali, soluti prorsus ac liberi vivimus; sed quemadmodum omnis nostra facultas, atque in primis ratio legibus physicis subijcitur, ita homo in earum usu legibus honestatis obstrigitur, atque potissimum in usu rationis.

EXPLICIT LOGICA.

INDEX PRIMI VOLUMINIS.

LECTORI	pag. 3
PREFATIO primæ editioni præfixa	5
PROLEGOMENA. Philosophiæ etymon-cognitio historica et scientifica-sapientia-philosophiæ ambitus. Rationes ultimæ-sunt objectum philosophiæ. Definitio-dignitas philosophiæ. De ejus historia. Christianæ philosophiæ officium-et libertas. Quos duces sequamur. Partitio-unde incipiendum	9
LOGICA.	
PRENOTIONES. Logicæ definitio-logica naturalis et artificialis-hujus origo et definitio. Logica docens et utens. Finis logicæ-objectum-media-fructus. Est ars et scientia. Divisio logicæ. Ejus utilitas ac necessitas	16
LOGICÆ PARS PRIMA.	
Ordo rerum tractandarum	20
LIBER PRIMUS.	
CAPUT I. DE APPREHENSIONE ET IDEIS.	
ARTICULUS I. <i>De apprehensionis notione</i> . Quid sit apprehensio, quid idea. Ideæ discrimen a sensatione et phantasmate-ideæ objectum materiale et formale-notæ objecti-ideæ comprehensio et extensio	20
ART. II. <i>De quibusdam mentis operationibus circa idearum objecta, vel circa ipsas ideas</i> . Attentio-abstractio, eaque duplex-subjectum et forma-reflexio psychologica et ontologica-analysis-intentiones primæ et secundæ-synthesis-comparatio-apprehensio simplex et comparativa. Idearum divisiones tres.	22
ART. III. <i>De partitione idearum secundum originem</i> . Ideæ intuitivæ et factitiæ-excluduntur ideæ innatæ-idea intuitiva directa et reflexa-idea factitia, arbitraria et discursiva	25
ART. IV. <i>De normis ideæ factitiæ</i> . Consociabilitas notarum-idea chimærica-communis norma omnis ideæ factitiæ-norma specialis ideæ arbitrariæ-et ideæ discursivæ	26
ART. V. <i>De idearum partitionibus ratione objecti</i> . Ideæ geometricæ et puræ-simplices et compositæ-vel aperte vel occulte-ideæ concretæ et abstractæ-concretum triplex	27
ART. VI. <i>Alia idearum partitio secundum objectum</i> . Idea singularis-notæ individuantes-idea collectiva-idea universalis-directa et reflexa-ejus inferiora-discrimen inter ideam universalem et collectivam-idea particularis	29
ART. VII. <i>De universalibus</i> . Quid proprie sit universale-quid transcendente et quotuplex. Universalia quinque. Quid species-	
INSTITUTIONES, ETC. I.	20

- genus-differentia-proprium-accidens. Universalium classes sunt tantum quinque-cur hæ dicantur etiam prædabilia. 31
- ART. VIII. *De specierum et generum subordinatione.* Quid ea sit. Abstractionum series-ejus utilitas. Extensio et comprehensio ideæ universalis sunt in ratione inversa. Genus proximum, subalternum, supremum-differentia ultima seu specifica-differentiæ genericæ-species infima-species subalternæ. Quænam dicantur differre toto genere, vel specie, vel solo numero. 35
- ART. IX. *De Categoriis.* Quid sint, et in quo differant a prædicabilibus earum numerus juxta Aristotelem. Substantia-prima et secunda-quantitas continua et discreta-continuum permanens et fluens-relatio-qualitas, et ejus proximæ species-actio-passio-ubi-quando-situs-habitus. Categoriæ merito dicantur suprema rerum genera. 36
- ART. X. *De idearum partitione secundum perfectionem representationis.* Idea clara et obscura-distincta, indistincta et confusa-completa et incompleta-adequata et inadæquata-comprehensiva. 38
- ART. XI. *De mediis ad ideas perficiendas accommodatis.* Claritatis et distinctionis idearum necessitas-impedimenta-media quibus procuranda est. Indicium quo cognoscatur an quis completam rei ideam sit assecutus. 40
- ART. XII. *De ideis inter se comparatis.* Ideæ sociabiles et insociabiles Opposita-proprie et improprie. Proprie oppositorum genera quatuor, contradictoria, privativa, contraria, relativa. Contradictoria oppositio est omnium maxima. Ideæ identicæ et diversæ. Identitas et diversitas, intrinseca vel objectiva-totalis vel partialis. Notanda quædam. Ideæ associate. 41
- CAPUT II. DE IDEARUM SIGNIS.
- ART. I. *De signis notione.* Signum quid sit. Signum naturale et arbitrium-manifestativum et suppositivum. 43
- ART. II. *De vocabulis.* Internarum affectionum signa. Quid sit vox-articulata et inarticulata. Quid vocabulum. Vocabula per se significantia et non per se significantia. Quid sit oratio-quid nomen et verbum. Nomen est signum suppositivum rerum, manifestivum idearum. Quid sit terminus. Triplex terminorum partitio. 46
- ART. III. *De terminorum partitione secundum vim significandi.* Terminorum partitio in univocos et æquivocos-in quos terminos cadat hæc partitio. Univocatio et æquivocatio primario rebus, secundario vocabulis conveniunt. Æquivoca casu vel consilio-analogia. Quid sit analogia attributionis-analogum princeps, idemque duplicis speciei. Notanda circa analogiam attributionis. Quid sit analogia proportionis-quid proportio-quid proprie significet nomen analogum-discrimen inter analogiam attributionis et proportionis-quid importet analogia proportionis. Corollaria. 48
- ART. IV. *De terminorum partitionibus secundum objecta significata.*

- Termini concreti et abstracti-sociabiles et insociabiles-primæ et secundæ intentionis-adjunctivi et substantivi. Non omnia nomina quæ substantias significant, sunt substantiva-omne adjectivum est terminus concretus, at non vicissim-nomen adjectivum aliud significat et de alio dicitur-aliud directe, aliud indirecte exprimit. Materiale et formale significatum in adjectivis. Termini simplices et complexi-horum componentes terminus principalis et incidens-isque explicativus vel restrictivus. 52
- ART. V. *De terminorum partitione secundum extensionem.* Terminus proprius et communis. Quid immediate et quid mediate significet terminus communis. Quomodo fiat singularis, particularis, universalis et collectivus. 54
- CAPUT III. DE USU TERMINORUM.
- ART. I. *De terminorum suppositione.* Necessitas cognoscendi quasdam terminorum affectiones. Quid sit suppositio-materialis et formalis-realis et logica-singularis et communis-absoluta et personalis. 55
- ART. II. *De quadruplici descensu a termino communi ad individua.* Quid sit descensus ad individua. Descensus quadruplex, copulativus, copulatus, disjunctivus, et disjunctus. Notanda. 57
- ART. III. *De partitionibus suppositionis personalis.* Suppositio distributiva et collectiva-distributiva complete vel incomplete-itemque simpliciter vel cum exceptione-suppositio disjunctiva et disjuncta. Corollaria. 59
- ART. IV. *De terminorum statu, ampliatione, distractione.* Quia ratione tres istæ affectiones nominum suppositioni convenient. Quid sit status-quid ampliatio-varia ampliationis extensio ad temporum differentias quomodo accipiatur nomen quod ampliationem subit. Quid sit distractio. Tres istæ nominum affectiones diverso modo explicandæ sunt in substantivis et in adjectivis. 61
- ART. V. *De restrictione, diminutione, appellatione.* Quid sit restrictio et quomodo fiat-quid alienatio-diminutio-appellatio-vox appellans et vox appellata-vocis appellantis significatio. Appellatio modo cadit super formale significatum vocis appellatæ, modo super materiale. Quid dicendum de appellatione termini complexi ex voce appellante et appellata-quid cum appellans applicatur per propositionem voci appellatæ, quæ sit terminus concretus. Aliquando explicanda est appellatio. Minimarum rerum in scientiis præstantia. 63
- ART. VI. *Notanda quædam circa usum vocabulorum.* Vocabulis utimur ut ab aliis intelligamur. Cavendum est a vocabuli obscurioribus-a verbis inanibus-ab inutilibus metaphoricis-attendendum ad usum loquendi-et consideranda audientis conditio. De terminis philosophicis. 65
- ART. VII. *Notanda circa vocabulorum interpretationem.* Quid sit ars hermeneutica. Alterius voces interpretandæ juxta loquendi usum-de quo notantur quædam. Verba communiter interpre-

tanda sunt sensu proprio non translato. Attendenda sunt omnia scriptoris adjuncta. Quid præstandum cum obscuræ sententiæ occurrunt explicandæ. 67

CAPUT IV. DE DIVISIONE.

- ART. I. *De divisionis notione.* Divisionis notio-utilitas ac necessitas-divisio vocis seu distinctio, et divisio rei 68
- ART. II. *De toto et partibus.* Totius et partis notio-totum actuale et logicum seu potentiale Quid sit totum actuale-aliud est physicum, aliud metaphysicum-partes physiciæ sunt essentielles vel integrales-hæc rursus homogeneæ vel heterogeneæ. De toto morali quod ad actuale pertinet Quid sit totum potentiale-in quo differat ab actuali 69
- ART. III. *De variis divisionis speciebus.* Divisio totius actualis physica et metaphysica-totum physicum utriusque divisionis est capax. Divisio per se et per accidens-totius logici divisiones duæ per se, nempe generis in suas species et speciei in individua-tres secundum accidens, nimirum divisio subjecti in accidentia, accidentis in subjecta, et accidentis in accidentia 71
- ART. IV. *Præcepta ad bene dividendum.* Divisio sit adæquata. Duplex hac in re defectus. Nullum divisionis membrum debet esse per se toti divisio æquale, vel illo majus. Unum divisionis membrum alterum non includat. Corollaria. Apparens defectus contra prædictam regulam in quibusdam divisionibus. Divisio fiat primum in proxima et immediata membra; deinde, si opus est, singula membra in suas partes subdividantur 73

CAPUT V. DE DEFINITIONE.

- ART. I. *Quid sit et quotuplex definitio.* Definitionis etymon-utilitas ac necessitas. Definitio dupliciter spectari potest, prouti est in mente, et prouti verbis effertur-definitum quid sit-quot modis proponi possit-quomodo se habeat ad definitionem. Definitionis partitio in nominalem et realem 75
- ART. II. *De definitione nominali.* Ejus usus et definitio. Tribus potissimum modis fieri potest quandoque est arbitraria-sed intra quosdam limites 76
- ART. III. *De definitione reali.* Ejus notio, et discrimen a definitione nominali-definitio realis triplex, essentialis quæ est physica vel metaphysica-descriptiva ad quam reducitur causalis et genetica discrimen inter definitionem geneticam et causalem 78
- ART. IV. *Præcepta ad bene definiendum.* Omnis definitio sit definito clarior-vitia contra hoc præceptum. Nec sit latior nec angustior definito hinc vera definitio convertibilis cum definito esse debet. In definitione essentiali assumendum est genus proximum et differentia ultima. Definitio non sit negativa-nisi definiri debeant duo ita opposita, ut medium non habeant 79
- ART. V. *Utrum omnia definiri debeant vel possint.* Utrum omnia illustranda sint definitione essentiali. Omnia possunt definiri definitione descriptiva, aut genetica-non omnia definitione

essentiali-alia ob quarumdam idearum conditionem-alia ob nostram ignorantiam. 81

- ART. VI. *De methodo definiendi.* Quid præstandum ante definitionem nominis æquivoci. Substantiæ definiuntur per se-accidentia per substantiam in qua coherent-habitus et potentiæ per suos actus, vel per objecta ad quæ actus terminantur-relata per ea ad quæ respectum dicunt. Duplex methodus investigandæ definitionis; divisiva et collectiva-seu via descensus et ascensus 82

LIBER SECUNDUS.

CAPUT I. DE JUDICIO EJUSQUE SIGNO.

- ART. I. *De oratione et verbo.* Oratio imperfecta et perfecta-hæc potest esse enuntiativa, admirativa, interrogativa, imperativa, deprecativa, permissiva, optativa Suppositiva verbi significatio in his omnibus orationibus 85
- ART. II. *De judicii notione.* Judicii origo et definitio-judicium affirmativum et negativum. Omne judicium negativum ad affirmationem reducitur. Clarior judicii definitio. Judicandi actus totus versatur circa objectivam idearum identitatem vel diversitatem. Quæ præsupponantur in judicio-objectum judicii-judicium ad unitatem ideas reducit-cur ita vocetur-alia judicii appellationes 86
- ART. III. *De quibusdam judiciorum differentiis.* Judicia a priori et a posteriori. Aliæ horum judiciorum appellationes. Duplex nostrarum cognitionum ordo. Judicium immediatum et mediatum-prudens et temerarium 88
- ART. IV. *De judicii signo.* Propositionis definitio et elementa-formula generalis. Propositio constare potest una voce, vel duabus, vel pluribus. Subjectum et prædicatum in propositione eandem rem, sed diversimode significant Propositiones naturales, seu directæ; innaturales, seu indirectæ; præter naturam, seu per accidens. 90
- ART. V. *De copulæ significatione.* Discrimen verbi ac nominis quoad significationem. Duplex verbi substantivi significatio. Copula duo importat, aliud directe, aliud indirecte. Propositio est signum suppositivum identitatis affirmatæ. Triplex ratio dividendi propositiones. 92

CAPUT II. DE PROPOSITIONUM PARTITIONIBUS.

- ART. I. *De propositionum partitione ratione formæ.* Quid sit propositionis forma. Propositio affirmativa et negativa-infiniti subjecti et infiniti prædicati. Quomodo prædicatum, habita ratione suæ comprehensionis tribuatur subjecto in propositione affirmativa-quomodo habita ratione extensionis. Formula generalis cujuslibet propositionis affirmativæ. Hæc eadem quærentur de propositione negativa 94
- ART. II. *De propositionum partitione ratione extensionis.* Propositionis extensio seu quantitas Propositio singularis, particularis, universalis et indefinita. Quænam propositio sit vere univer-

- salis. Suppositio prædicati in propositione universali affirmante est disjuncta. Triplex universalitas, metaphysica, physica, et moralis. De extensione propositionis indefinitæ . . . 96
- ART. III. *De propositionibus aperte compositis.* Unde desumatur propositionum compositio. Propositiones simplices et compositæ aperte vel occulte. Definitio et resolutio propositionis copulativæ, et quid requiratur ad ejus veritatem-hæc eadem de adversativa-relativa-causali. Singularum resolutio in suas componentes . . . 99
- ART. IV. *De propositionibus hypotheticis.* Propositiones categoricæ et hypotheticæ harum triplex species. Propositio conditionalis-unde pendeat ejus qualitas-et veritas. Ad conditionalem accedunt propositiones rationales seu illativæ. Propositio disjunctiva quænam-alia propria, alia impropria-quid utraque affirmet-quid ad utriusque veritatem requiratur. Propositio conjunctiva-quid statuatur-quid requiratur ut vera sit . . . 101
- ART. V. *De propositionibus occulte compositis.* Quænam sint. Propositio exclusiva-alia exclusi subjecti, alia exclusi prædicati-quomodo exponitur-quot modis affici potest negatione. Exceptiva-quid differat ab exclusiva. Inceptiva ac desitiva-comparativa-reduplicativa et specificativa-in quo hæc differant et in quo convenient . . . 103
- ART. VI. *De propositionibus complexis.* Propositionum complexio duplex. Propositiones complexæ secundum materiam constant propositione incidente et principali. Omnis propositio habens copulam præteriti vel futuri temporis est complexa. Propositiones complexæ sunt simplices. Solum propositio incidens explicativa est per se falsitatis capax. Omnis propositio complexa ad duas reduci potest. Quandonam propositio incidens influat in principalis veritatem . . . 107
- ART. VII. *De propositionibus modalibus.* Quænam sint-duplex earum formula-modi quatuor, necessarium, contingens, possibile, et impossibile-hinc quadruplex modalium species-nulli sunt alii modi præter quatuor recensitos. In modali modum locum tenet prædicati principalis, dictum seu potius dicti verbum, principalis subjecti. Omnis propositio modalis est singularis-aliquas tamen quantitatis differentias admittit. Modalis qualitas-et veritas. Modalis conjunctiva . . . 109

CAPUT III. DE PROPOSITIONUM OPPOSITIONE.

- ART. I. *De propositionum simplicium differentiis quoad qualitatem et quantitatem.* Quæ sint propositiones subalternæ, contrariæ, subcontrariæ, contradictoriæ. Contradictoriæ non possunt simul esse veræ-nec simul falsæ. Ex veritate unius inferitur falsitas alterius, et viceversa. Contrariæ nequeunt simul esse veræ-possunt esse simul falsæ. Ex veritate unius inferitur falsitas alterius, at non viceversa. Subalternæ possunt esse simul veræ et simul falsæ. Non semper ex alterutris veritate vel falsitate alterutris veritas vel falsitas inferri potest. Sub-

- contrariæ possunt simul esse veræ in materia contingenti, non possunt in materia necessaria. Nunquam possunt simul esse falsæ. Si una ex eis vera est: altera potest esse vera vel falsa. Si una est falsa, altera vera esse debet . . . 113
- ART. II. *De propositionum simplicium oppositione.* Quid sit propositionum oppositio-oppositionis character-conditiones tres. Propositiones subalternæ non sunt oppositæ-subcontrariæ voce tantum, non re. Contrariis et contradictoriis vera competit oppositio-diversa tamen ratione-contrariæ laxiori sensu. Contradictoria propositionis physice vel moraliter universalis. Propositio singularis particulari nullo modo opponitur-quomodo universali opponatur. Contradictoria propositionis singularis fit mutando ejus qualitatem-idipsum dicendum de propositionibus quæ singulari æquiparantur. Contradictoria propositionis cujus subjectum disjuncte supponitur . . . 115
- ART. III. *De oppositione propositionum compositarum.* Regula generalis. Copulativa et disjunctiva impropria contradictoriæ sunt sub quibusdā conditionibus. Copulativæ contrariæ. Quænam sit contradictoria disjunctivæ propriæ-et quando ejus partes sunt plures quam binæ-et quando subjecti suppositio est confusa. Disjunctivæ contraria nulla est. Oppositio propositionis adversativæ-causalis-reduplicativæ-exclusivæ-et exceptivæ-itemque relativæ-conditionalis-conjunctivæ-et comparativæ . . . 118
- ART. IV. *De oppositione propositionum complexarum.* Duplex contradicendi modus in complexis secundum materiam. Exempla. Quædam complexæ in oppositione quantitatem quoque incidentis mutant. Exempla. Cujusvis modalis contradictoria habetur præfigendo negationi particulam negantem. Contrariæ modales modum eundem habent sed universalem-contradictoriæ modos habent contradicentes. Contrariæ, si ex necessario fuerint, dicta habent contradictoria vel contraria; si ex possibili aut impossibili, contradictoria vel subcontraria-contradictoriæ idem dictum habent. Exempla. Oppositio modorum diversæ appellationis Doctrinæ de propositionum oppositione utilitates . . . 121

CAPUT IV. DE TRANSITU AB UNA PROPOSITIONE AD ALIAM.

- ART. I. *De æquipollentia propositionum simplicium.* Theoriæ de propositionum æquipollentia et conversione necessitas. Æquipollentia propositionum quid sit-quam æquipollentiam logici speciatim considerent. Negatio præposita subjecto propositionis, facit eam suæ contradictoriæ æquipollentem-postposita subjecto enuntiationis universalis vel particularis, efficit eam æquipollentem suæ contrariæ vel subcontrariæ-præposita et postposita subjecto enuntiationis universalis aut particularis, facit eam suæ subalternæ æquipollentem. Eadem regulæ adverbis loci et temporis applicandæ sunt . . . 125

- ART. II. *De æquipollentia propositionum modalium.* Modales red-
duntur æquipollentes iisdem regulis ac simplices. Æquipollens
contradictoriæ-contrariæ-subalternæ. Exempla æquipollen-
tiæ modalium diversæ appellationis. Omnes modi æquipollen-
tes sunt ejusdem quantitatis. Quomodo fiant æquipollentes
modalium, quorum dictum est commune. Exempla . . . 127
- ART. III. *De conversione propositionum.* Quid sit fieri jure potest.
Quid præstandum ut rite fiat. Proprie est duplex, simplex et
per accidens-quæ propositiones convertantur simpliciter quæ
per accidens. Conversio per contrapositionem . . . 128
- ART. IV. *Animadversiones quædam.* Propositio cujus prædicatum
est singulare, vel singulari æquivalens, per conversionem fit
singularis, vel singulari æquivalens. Quum prædicatum pro-
positionis universalis affirmatiæ est definitio subjecti, vel
significat aliquam proprietatem ei soli convenientem, potest
non ex natura propositionis, sed ex rei natura, fieri conversio
simplex. Duo præ oculis habenda, ut recte fiat conversio.
Quandoque, ut conversio recta sit, exprimendus est status,
vel distractio, vel ampliatio, vel restrictio alicujus termini.
Difficultas proposita a Leibnitio . . . 151
- ART. V. *De duplici transitu ab una propositione ad aliam.* Transi-
tus per modum immediate illationis et per quæstionem. Usus
utriusque. Illationes immediatæ quænam sint-utrum possint
semper ad ratiocinium reduci-tres earum classes. Valet illa-
tio affirmativa ab inferiori termino ad superiorem; negativa
non valet. A prædicato complexo seu conjuncto ad ejus partes
divisas, et a prædicato diviso ad conjunctum non semper
valet illatio. A prædicato privativo ad negativum illatio bona
est, et non viceversa. A suppositione distributiva ad disjun-
ctivam et singularem valet illatio. A distributiva ad collecti-
vam et vicissim bona est vel mala illatio pro prædicati diver-
sitate-triplex hæc in re casus. Ab esse ad posse valet illatio.
A posse ad esse non valet. A non posse ad non esse datur
illatio. A non esse ad non posse non datur. A potentia agendi
ad actum datur illatio in causis necessariis, si ad agendum
sint proxime expeditæ; non item in causis liberis. A simul-
tanea possibilitate non sequitur possibilitas simultaneitatis.
Transitus per modum quæstionis quando locum habeat.
Exempla . . . 153

LIBER TERTIUS.

CAPUT I. DE RATIOCINIO EJUSQUE EXPRESSIONE.

- ART. I. *De ratiocinii notione.* Ratiocinii analysis-definitio-principia-
medium. Actus apprehensionis in ratiocinio duplex. Ratio-
cinium tribus judiciis absolvitur. Discrimen inter conse-
quentiam, apprehensionem consequentiæ, et conclusionem.
Ratiocinium purum, empiricum, et mixtum . . . 158
- ART. II. *De ratiocinii expressione.* Definitio argumentationis-et syl-
logismi. Syllogismus categoricus et simplex, hypotheticus et

- compositus. Syllogismi materia proxima et remota-extremum
minus et majus-mediis terminus. Syllogismus expositivus.
Præmissa major et minor. Forma syllogismi ejusque expres-
sio. Syllogismi qualitas . . . 141
- ART. III. *De conclusionis rectitudine et veritate.* Quid sit conclusio-
nis rectitudo et veritas. Conclusio potest esse simul recta et
falsa, ac vitiosa et vera. Consequens distingui potest, conse-
quentia non potest. De ratiocinio recto hæc statuuntur: 1^o ex
vero antecedente nequit colligi falsum consequens-2^o si con-
sequens sit falsum, una saltem præmissarum falsa sit oportet-
3^o ex falso antecedente tum falsum, tum verum conse-
quens erui potest-4^o si consequens verum sit, non idcirco
sequitur esse quoque verum antecedens-5^o quidquid stat cum
antecedente, stat etiam cum consequente, non tamen e con-
verso-6^o quidquid repugnat consequenti, repugnat quoque
antecedenti, non tamen e converso-7^o ex contradictorio con-
sequentis inferitur contradictorium antecedentis; at non e
converso . . . 142
- ART. IV. *Regula generalis ad dignoscendam syllogismi simplicis
rectitudinem.* In syllogismo simplici habetur consequentia, si
altera præmissarum conclusionem contineat, altera declarat
contineri. Applicatur regula syllogismo affirmativo. Quænam
sit præmissa continens, et quænam declarans. Eadem regula
syllogismo negativo applicatur . . . 145
- ART. V. *Regulæ partiales syllogismi simplicis.* Regulæ octo, quarum
quatuor syllogismi terminos respiciunt, reliquæ propositio-
nes-singulæ demonstrantur-1^a regula: Tum re, tum sensu
triplex modo terminus esto-termini possunt esse plures quam
tres, aperte vel occulte-occulte autem multipliciter-2^a Æque
ac præmissæ extendat conclusio voces-duplex peccatum con-
tra hanc legem-3^a Nunquam contineat medium conclusio
oportet-4^a Aut semel aut iterum medius generaliter esto-
5^a Ambæ affirmantes nequeunt generare negantem-6^a Utræque
si præmissa neget, nihil inde sequetur-7^a Pejorem sequitur
semper conclusio partem-Quænam vocetur in syllogismo pars
pejor. Regulæ exceptio-8^a Nil sequitur geminis ex particula-
ribus unquam . . . 147
- ART. VI. *Difficultates quædam enodantur.* Conclusio vera per ac-
cidens-binæ præmissæ apparentur negativæ-terminus in
conclusionem apparenter latior, quam in præmissis-syllogi-
smus expositivus-altera conclusio vera per accidens-syllo-
gismi cryptici syllogismus expositivus rectus cum binis
præmissis particularibus-syllogismi frequentes apud mathe-
maticos, qui videntur habere utramque præmissam particu-
larem . . . 152

CAPUT II. DE FORMULIS GENERALIBUS SYLLOGISMI SIMPLICIS.

- ART. I. *De figuris syllogismi.* Hujus tractationis dignitas atque uti-
litas vindicatur. Figuræ syllogismi quatuor. In 1^a figura

- major debet esse affirmativa, minor vero universalis-in 2^a alterutra præmissa negativa esse debet, major semper universalis-in 3^a minor debet esse affirmativa, conclusio particularis-in 4^a quando major est affirmativa, minor nunquam non erit universalis-quando minor est affirmativa, conclusio est particularis-in modis negativis major est semper universalis 155
- ART. II. *De singularum figurarum modis.* Quid sit modus syllogismi-prima figura quatuor habet modos directos, quinque indirectos-secunda figura quatuor-tertia sex-quarta quinque-modi quatuor peculiare syllogismi expositorii in secunda figura. Prima figura omnium est perfectissima. Syllogismi primæ figuræ et omnes syllogismi expositorii dicuntur perfecti, cæteri imperfecti 159
- ART. III. *De principiis cujusque figuræ propriis.* Quomodo inveniri queant principia, quæ figuras singulas earumque modos determinant. Formulæ syllogismorum cujusque figuræ-et principia quibus innotantur. Principium generale omnium figurarum. Principia aristotelica : dictum de omni et dictum de nullo non pertinent ad syllogismum in genere 161
- ART. IV. *De imperfectorum syllogismorum reductione juxta veteres.* Hujus reductionis ratio et triplex methodus. Quæ sit probatio directa-quænam innotescere debeant ut rite fiat, et quomodo ea cognoscantur-methodus servanda in hac probatione. Probatio indirecta quid sit-quando adhibeatur-et pro quibus syllogismis sit magis utilis. Probatio per expositionem quibus in casibus adhibeatur-et quo modo 165
- CAPUT III. DE SYLLOGISMIS PROPOSITIONEM COMPOSITAM CONTINENTIBUS.
- ART. I. *Notanda quædam.* Syllogismus cujus altera præmissa est propositio composita categorica, ad simplicem facile reducit. Quomodo judicandum de hujusmodi syllogismi rectitudine, quum propositio composita est copulativa-vel adversativa-vel relativa-vel causalis-vel exclusiva-vel reduplicativa. Quinam syllogismi sint proprio nomine compositi-eorum structura-et triplex classis 169
- ART. II. *De syllogismo conditionali.* Definitio-figura duplex-utraque quatuor habet modos. In prima figura partium qualitas servatur tum in minori, tum in conclusione, in secunda semper mutatur-in prima argumentatio semper est affirmativa, in secunda semper negativa. Duæ figuræ vitiosæ. Aliquando istæ quoque recte adhibentur. Syllogismi in quibus vel singulæ propositiones vel sola conclusio est conditionalis, sunt simplices. De syllogismo conditionali causali 172
- ART. III. *De syllogismo disjunctivo.* Quinam sit duplex ejus figura. Quid si disjunctiva sit impropria. Modi tres utriusque figuræ. In prima figura mutatur qualitas ejus partis quæ assumitur in minori, servatur ejus quæ in conclusione deducitur-in secunda e converso. In prima figura argumentatio est semper affirmativa, in secunda semper negativa. Si dis-

- junctionis membra plura sint quam duo, hæc argumentatio tres habet figuras 175
- ART. IV. *De syllogismo conjunctivo.* Quinam sit-unam habet figuram et tres modos. Quum propositio conjunctiva disjunctivæ æquivalet, duas habet figuras 177
- ART. V. *De reductione syllogismi disjunctivi et conjunctivi ad conditionalem, et conditionalis ad simplicem.* Quomodo syllogismus disjunctivus et conjunctivus ad conditionalem reducantur. Reductio syllogismi conditionalis ad simplicem, spectata illius materia. Generales reductionis formulæ spectata ejus forma 178
- ART. VI. *De syllogismis complexis.* Quinam hic considerentur. Reductio syllogismorum complexorum, in quibus extremum complexum dividitur in præmissis-vel in quorum conclusione sit propositio incidens, quæ principalis videatur-vel qui terminis constet obliquis. Quinam sint syllogismi modalis 180

CAPUT IV. DE CÆTERIS ARGUMENTATIONIBUS.

- ART. I. *De enthymemate, epicheremate, polysyllogismo.* Quid sit enthymema-ejus usus-propositiones enthymematicæ. Quomodo cognoscatur quænam præmissa in enthymemate reticeatur-et cujus figuræ sit enthymema completum. Quid si neutrum extremorum in antecedente enthymematis reperiatur. Quid sit epicherema quid polysyllogismus 183
- ART. II. *De sorite.* Quid sit-in quot syllogismos resolvatur. Quid si constet propositionibus hypotheticis. Quænam propositiones in sorite reticeantur-quem locum obtineant quæ exprimuntur-quam sedem habeant medii termini syllogismorum quos continet. Omnis sorites ad syllogismum, non omnis syllogismus ad soritem tanquam ad primitivam formam reducit. Nulla propositio in sorite, præter ultimam, potest esse negativa-nulla præter primam particularis. Sorites chrysippeus quid sit in quo peccet 184
- ART. III. *De dilemmate.* Quid sit-quot et quibus constet propositionibus. Quid si propositio disjunctiva habeat plus quam duo membra. Quibus modis dilemma vitiosum esse possit-quomodo, et ad quem syllogismum reducat 187

LIBER QUARTUS.

CAPUT I. DE METHODI NOTIONE.

- Quid sit methodus. De qua methodo agere debeat logicus. Hujus tractationis utilitas. Duplex scopus ordinandi intellectus operationes 190

CAPUT II. DE ARGUMENTATIONE DEMONSTRATIVA.

- ART. I. *Quid sit demonstratio.* Definitio in quo differat a cæteris argumentationibus. Præmissæ sunt causa certitudinis conclusionis-ac proinde sunt hæc priores et notiores. Quid sit definitio-propositio theoretica-axioma-postulatum theorema-problema-lemma-corollarium-scholion 191

- ART. II. *Quotuplex sit demonstratio.* Demonstratio directa et indirecta-earumque discrimen. Demonstratio a priori et a posteriori. Quo sensu hoc loco aliquid dicatur prius et posterius. Cur demonstratio, quæ est a priori, dicatur propter quid, et quæ a posteriori, quia. Quando fieri possit demonstratio a priori, et quando solum quæ a posteriori. Ratio ontologica duplex, seu in ordine physico et metaphysico. Demonstratio regressiva 192
- ART. III. *De principiis demonstrationis.* Quæ sint principia demonstrationis. Alia actu, alia virtute influunt in demonstrationem. Quæ actu influunt sunt immediata vel mediata-analytica vel synthetica. In principiis analyticis prædicatum vel pertinet ad essentiam subjecti, vel ab ea derivatur. Eadem sunt natura sua metaphysice universalis-et absolute necessaria-quæ mediata sunt a principiis per se notis derivantur-quæ sunt per se nota, alia communia, alia peculiarium scientiarum sunt propria. Principia synthetica alia sunt immediata, alia mediata-mediata universalis inductione efformantur 196
- ART. IV. *De inductione.* Etymon-acceptio duplex quo sensu hic assumatur. Quid sit experientia externa-observatio-experimentum. Inductio completa quid sit-non secundum formam, sed solum secundum materiam differt a syllogismo. Quid sit inductio incompleta ejus usus-quomodo legitime concludatur non est a syllogismo diversa-sed tribus constat syllogismis-nec dici potest syllogismus sine medio. Quænam constare debeant, ut certam conclusionem inductio suppeditet-quam habeat illa vim, quum agitur de actionibus liberis. Inductione cognoscimus leges physicas et morales. Quid hoc loco legis nomine intelligatur. Etiam propositiones analyticæ in inductione probari possunt 198
- ART. V. *De scientia.* Diversæ hujus nominis acceptiones significatio apud philosophos. Scientia partialis et totalis. Scientiæ partialis definitio-quid sit actus sciendi-quodnam ejus objectum-quænam ratio per quam hoc cognoscitur-quid sit cognoscere per causam. Perfecta scientia non habetur nisi per causam. Cognitio per causam non semper potest haberi 203
- ART. VI. *De scientiis totalibus.* Quid sit scientia totalis. Quam unitatem habeat, et unde eam desumat. Omnis scientia habet sua principia fundamentalia, quæ ipsa non demonstrat. Quid sit scientiarum subordinatio, et quotuplex. Omnis scientia est solum de universalibus, non autem de singularibus 205

CAPUT III DE ARGUMENTATIONE PROBILI.

- ART. I. *Prævia quædam.* Quid sit argumentatio probabilis, et in quo differat a demonstrativa-dicitur etiam syllogismus dialecticus. Sententiæ per se probabiles seu *maximæ*. Argumentatio probabilis a priori et a posteriori 207

- ART. II. *De analogia.* Quid sit-quibus innitatur principiis-spectata forma, est enthymema et ad syllogismum reducitur ejus conclusiones ex se sunt solum probabiles-at aliunde certæ esse possunt. Hæc argumentatio differt a proportionibus arithmetis et geometricis. Vitia cavenda in analogia. Ad analogiam pertinent similitudo et exemplum-quid sit inductio socratica 209
- ART. III. *De hypothesi.* Quid sit-ejus usus et finis probabilitatis fines non excedit-triplex est, physica, moralis et logica. Quæ conditiones requirantur, ut probabilis evadat. Hypothesis intervenus divini immediati in explicandis miraculis nulli legi physicæ opponitur. Usus hypothesium impossibile 212

CAPUT IV. DE DISPUTATIONE.

- ART. I. *De disputationis notione ac speciebus.* Quid disputatio sit. Est quadruplex, spectato fine quem nobis proponimus-apodictica-elenctica-apologetica-sophistica. Quid sit concertatio scientifica 214
- ART. II. *De quibusdam argumentationibus indirectis.* Cujusmodi sit indirecta argumentatio-argumentum ab absurdo argumentum negativum-instantia-argumentum ad hominem-argumenti retorsio et inversio-argumentatio per distractionem-argumentum ad ignorantiam-ad verecundiam-ad invidiam 215
- ART. III. *De sophismatibus.* Quid sint. Alia ex propria alicujus scientiæ materia desumuntur-alia ex communibus quibusdam fontibus. Hi sunt tredecim, sex in vocibus, septem in rebus 218
- ART. IV. *De sophismatibus in voce.* Equivocatio. Ambiguitas. Sophisma sensus compositi et divisi. Fallacia accentus. Fallacia figuræ dictionis 219
- ART. V. *De sophismatibus in re.* Fallacia accidentis-dicti simpliciter et secundum quid-ignorationis elenchi-petitionis principii-consequentis-non causæ ut causæ-plurium interrogationum 222
- ART. VI. *De scientifica concertatione.* Quid sit-ejus finis et utilitas-triplex ejus forma-communis-socratica-syllogistica seu scholastica-hujus præstantia 226
- ART. VII. *De syllogistica disputationis forma.* Munia defendentis. Quomodo distinguendum et subdistinguendum-quande negandum suppositum. Quid præstandum ab arguente. Triplex argumenti instaurandi modus. Arguens quid petere possit a defendente-non debet medium terminum temere immutare. Quid agendum quum difficultas soluta est. Argumenta extra formam 228

CAPUT V. DE METHODI DIVISIONE.

- ART. I. *De methodo analytica et synthetica.* Duplex ratio considerandi datum aliquod objectum. Quid sit juxta veteres compositio et divisio-resolutio et collectio. Hæc duo ad methodum analyticam; duo priora ad syntheticam reducantur. Si

- a subjecti consideratione ad prædicatum ratiocinando devenimus, methodo utimur analytica si viceversa, synthetica. Quomodo agnoscat methodus in aliqua ratiocinatione adhibitus, sive uno sive pluribus syllogismis hæc constet . . . 232
- ART. II. *De methodo qua servari debet, tum in questionibus solvendis, tum in propositionibus probandis.* Triplex quæstio quæ circa quamlibet rem proponi potest. Ad quæstiones solvendas methodus analytica adhiberi debet. In veritate jam cognita aliis demonstranda utraque methodus adhiberi potest-synthetica tamen est opportunior. Harum methodorum discrimina . . . 235
- ART. III. *De methodo in scientiis adhibenda.* In scientiarum inventionem analysis præcedere, synthesis succedere debet. In scientiis tradendis vel eodem ordine procedi potest, vel methodus omnino synthetica adhiberi. Singulæ demonstrationes quæ in scientia continentur, utraque methodo procedere possunt. Conclusio . . . 237

LOGICÆ PARS ALTERA.

Hujus partis objectum et partitio.

LIBER PRIMUS.

CAPUT I. DE VERITATE ET FALSITATE.

- ART. I. *De veritatis ac falsitatis notione.* Definitio veritatis in genere-triplex veritatis species. Veritatis logicæ explanatio et definitio. Duplex difformitas inter intellectum et rem, positiva et negativa. Difformitas positiva falsitatem constituit . . . 239
- ART. II. *De veritate idearum ac judiciorum.* PROP. I. *Veras dicimus ideas, vera judicia; sed non eodem modo utrique operationi veritas adscribitur.* Ideis sua competit veritas. Judicium spectari potest objective et subjective-verum dicitur objective spectatum-qua ratione verum dicatur. Veritas judicii affirmativi vel negativi idem est ac objectiva subjecti et prædicati identitas vel diversitas. Discrimen inter idearum ac judiciorum veritatem. Cur propositiones veræ dicantur *veritates*. Veritas ubique et apud omnes eadem est. Judicium subjective spectatum non est logico verum aut falsum, sed rectum aut erroneum. Erroris definitio. PROP. II. *Falsitas est graduum capax; veritas autem et ipsa gradus habere potest, non quidem respectu objecti formalis, sed respectu objecti materialis.* Falsitas omnis natura sua gradus admittit. Dicitur potest idea veritas habere gradus quatenus plures paucioresve notas exhibet objecti materialis. Veritas judicii gradus habere potest tum secundum extensionem, tum secundum firmitatem . . . 241
- ART. III. *Utrum in intellectuali apprehensione falsitas esse possit.* PROP. III. *Omnis intellectualis apprehensio per se spectata falsitatem in intellectum inducere nequit.* Quid apprehensionis rectitudinem constituat. Omnis perceptio aut vera est aut nulli nihil objecto tribuere aut detrahare potest. Hinc omnes ideæ intuitivæ de se veræ sunt item ideæ omnes factitivæ non deductivæ-atque etiam deductivæ respectu alicujus objecti, saltem

- possibilis. Omnis quoque apprehensio comparativa per se spectata, et ab influxu judicii soluta, recta est . . . 244
- ART. IV. *Quomodo falsitas in mentem subeat.* PROP. IV. *Falsitas in mentem subire potest solummodo per judicium-1º per judicium consequens simplicem apprehensionem-2º per judicium antecedens. Idem de apprehensione comparativa dici debet. Ideæ dicuntur falsæ occasionaliter, relative, præsuppositive, et abusive.* . . . 245
- ART. V. *Difficultates enodantur.* Multorum ideæ sunt a suis objectis difformes. Objectum quandoque apparet aliter ac est. Sæpe loco rei objectæ alia percipitur. Quibusdam ideis nulum respondet objectum. Quarumdam idearum objectum est impossibile. Si nullæ essent ideæ falsæ, nec judicia falsa dari possent. Saltem apprehensio comparativa, quæ falsum judicium præcedit, falsa dicenda est. Harum difficultatum solutio . . . 247
- ART. VI. *De veritate sermonis.* Logica veritas idearum vel judiciorum signis per analogiam tribuitur. Termini per se falsi esse nequeunt. Propositiones veritatem vel falsitatem continent-et mentis errorem vel rectitudinem manifestant. Veritas moralis magis quam logica ad sermonem per se pertinet. Veritatis moralis explicatio. Veritas vel falsitas moralis terminis per se non competit-competit autem externis quibuslibet signis, quæ pro internis affectionibus supponuntur, quum ex libertate procedunt-et speciatim propositioni Discrimen inter logicam et moralem judicii veritatem et falsitatem-illius mensura est res, hujus intellectus. Propositio falsa logice potest esse vera moraliter et viceversa . . . 249
- CAPUT II. DE ASSECUTIONE VERITATIS.
- ART. I. *Quid sit assequi veritatem.* Veritatis cognitio actu exercitio et actu signato. Mens falsitatem assequi non dicitur. Falsitatem intellectus cognoscere potest non quidem actu exercitio sed actu signato . . . 252
- ART. II. *De variis mentis statibus respectu veritatis.* Ignorantia-totalis et partialis. Dubium-positivum et negativum.-Opinio est verum judicium, at dubio permixtum-differt a suspitione, quæ judicium non est. Probabilitas. Opinio prudens et imprudens-probabilitatis gradus. Distinguendum probabile a possibili. Probabilitas absoluta et relativa. Judicium de opinionum controversarum probabilitate est natura sua mutabile. Omnis propositio probabilis potest esse falsa. Opinio prudens potest esse erronea, imprudens vera. Probabilitas probabilitatem non destruit. Sensus effati: præsumptio cedit veritati. . . 253
- ART. III. *De certitudine.* Quid sit-certitudo subjectiva et objectivahæc posita est in enuntiabilium necessitate-vel absoluta vel hypothetica. Certitudo subjectiva in objectivæ cognitione fundatur . . . 256
- ART. IV. *De speciebus certitudinis.* Pro diversa origine necessitatis propositionis, certitudo est metaphysica, physica vel mora-

lis. Tres hæc certitudines specie inter se differunt. Certitudo physica et moralis est hypothetica-in qua certitudine major sit necessitas. Certitudo physica et moralis ad metaphysicam aliquando reducitur. Certitudo de singularibus physica vel moralis, est semper hypothetica. Certitudo moralis improprie dicta seu prudentialis. 257

ART. V. *Utrum dentur in certitudine gradus.* PROP. *Gradus in certitudine habentur spectata solum assensus intensitate.* Certitudinem duo constituunt, exclusio formidinis errandi, et firmitas assensus-hæc solum gradus habere potest-qui tamen essentielles differentias in certitudine non inducunt. Quænam, veritates firmiorem sibi vindicent assensum. Certitudo supernaturalis fidei divinæ omni naturali certitudine firmior est. 260

ART. VI. *De supputatione graduum probabililitatis.* Probabilitas gradus habet-qui sæpe numeris exhiberi possunt. Probabilitas dati eventus est in ratione directa numeri casuum eventui faventium, et inversa numeri eventuum possibilium fractio probabilitem eventus representans. Certitudo non est cumulus probabilitatum, nec probabilitas certitudinis fragmen. 262

CAPUT III. DE CERTITUDINE PHILOSOPHICA.

ART. I. *De scepticismo.* Homo naturaliter certitudinem acquirit. Philosophi ejus fundamenta et errores in ea quærenda vitandos investigant. Certitudinis philosophicæ notio. Diversæ scepticorum classes. PROP. I. *Universalis dubitatio physice repugnat.* Nam 1^o naturaliter ac necessario certitudinem de multis habere cogimur-2^o ratio agendi scepticorum cum eorum doctrina pugnat. 265

ART. II. *De universalis dubitationis absurditate.* PROP. II. *Cum eo qui scepticum se in omnibus esse profiteatur, nulla potest institui disputatio.* Omnis enim disputatio ab aliquo principio, quod ut certum utrinque admittatur, procedat necesse est-at non idcirco scepticus triumphos agere potest. PROP. III. *Universalis dubitatio intrinsecam contradictionem includit.* 1^o Quia scepticus dum rationem suam fallacem dicit, ei fidem adhibet-2^o quia dum negat se veritatem aliquam cognoscere, hoc ipsum affirmat-3^o quia negando vel dubitando multa sibi rata ac vera esse ostendit Unde scepticismus universalis est metaphysice impossibilis 267

ART. III. *Utrum omnia demonstrari a philosopho possint vel debeant.* Philosophia ab aliqua affirmatione exordiat necesse est. PROP. IV. *Qui nihil affirmandum sibi putaret nisi demonstratum, ille opus aggrediretur scepticum et impossibile-scepticum quia universalem dubitationem simularet-impossibile quia nulla demonstratio est possibilis nisi principium aliquod indemonstratum admittatur. Igitur ante omnem demonstrationem quædam affirmanda sunt a philosopho ut certa et ut omnis certitudinis fundamentum. Qui putat in omnibus ad philosophicam certitudinem solius ope demonstrationis perveniri posse, ipsam philosophandi destruit possibilitatem Prima*

affirmatio, etsi sine demonstratione, non tamen sine motivo admittitur 269

ART. IV. *De veritatibus primitivis.* PROP. V. *Primitivæ veritates sunt tantummodo tres; videlicet: factum primum, principium primum, conditio prima.* 1^o Ante philosophicam demonstrationem philosophi existentia, demonstrationis principium, et scientiæ possibilitas in tuto posita sint oportet-2^o Admittendum est primum aliquod in ordine tum reali tum ideali, itemque aliquid quod utrumque inter se ordinem componat. Hæc veritates sine demonstratione admitti possunt et debent: quia 1^o sunt immediate evidentes-2^o nequeunt demonstrari sine petitione principii-3^o omnis negatio et dubitatio eas supponit 270

ART. V. *Refutantur quædam scepticorum objecta.* Scepticismus, cum nihil certo affirmet, ab omni errore est immunis. Ratio humana utpote finita, fallibilis semper est, idque essentialiter. Non repugnat intellectum ferri in falsitatem, ut non repugnat voluntatem propendere ad malum. Mens semper suspicari debet de errore. Dogmatici vel incidunt in progressum infinitum, vel in circulum vitiosum, vel aliquid gratuito verum supponunt. Sui singulis objectis responsiones subjunguntur 272

ART. VI. *De dubitatione methodica.* Cur de Cartesio loquendum. Cartesii processus in certitudinis philosophicæ theoria statuenda; ejusque principia. Exaggeratæ circa ejus doctrinam sententiæ. PROP. VI. *Multa sunt in methodica Cartesii dubitatione vitia eaque gravissima.* Cartesius haud clare loquitur-concessum sibi aut possibile putat de primis principiis, saltem simulate, dubitare, et de ratione ipsa diffidere-dum in his omnibus ratione utitur-unicum statuit cognitionum nostrarum fundamentum-in quo quidem vel multa alia ut certa supponit vel nihil assequitur-demum incidit in circulum vitiosum 276

LIBER SECUNDUS.

CAPUT I. DE MEDIIS QUÆ MENTI HUMANÆ SUPPETUNT AD ASSEQUENDAM VERITATEM.

ART. I. *De principiis certitudinis.* Triplex cognitionis principium, a quo, per quod et secundum quod 280

ART. II. *De fontibus veritatis.* Quid sint et quot. Quænam circa singulos quærenda sint 281

CAPUT II. DE SENSU INTIMO.

ART. I. *Notiones præviæ.* Descriptio sensus intimi duplex internorum factorum ordo-conscientia. Ordo cognitionum quæ per sensum intimum habentur-discrimina inter sensum intimum et conscientiam. 283

ART. II. *Notanda quædam.* Judicia conscientie immediata et mediata-priora duntaxat sensus intimi testimonio innituntur-sensus intimus solam facti interni præsentiam refert-memo-

ria facti interni cum actuali facti præsentiâ confundenda non est-animus sentit permanenter corpus quod informat-sensationum aliæ ad vim internam, aliæ ad sensum externum referri solent-an omnes ejusque ordinis affectiones animus sentiat-de sensu constantium et uniformium compositi affectionum-non est negandum aliquid in nobis accidere ex eo solum quod illud distincte non sentiamus . . . 285

ART. III. *Qua ratione omnis certitudo intimo sensui innitatur.* PROP. I. *Omnis certitudo subjectiva in intimo sensu aliquod fundamentum habet.* Semper enim certam conscientiam de aliquo interno facto supponit. Non tamen sensus intimus est fons universalis veritatis. Etiam certitudo primi principii in intimo sensu fundamentum habet . . . 286

ART. IV. *De certitudine judiciorum conscientia.* PROP. II. *Judicia immediata conscientia errori obnoxia esse non possunt.* Id demonstrari nequit-at demonstratione non eget-explicari tamen potest per principium contradictionis. Certitudo facti interni quam sensus intimus producit est metaphysica hypothetica . . . 287

ART. V. *Difficultates.* Sensus intimus non renuntiat multa facta interna-etiam ex iis quæ sensibilem mutationem inducunt. Sæpe dubitamus an affectio habita fuerit ista vel illa-imo de ipsa quærendam affectionum existentia-amentes et somniantes sentiunt affectiones quas non habent-sibi videntur esse quod non sunt-sæpe affectio sentitur ubi non est. Responsiones . . . 288

CAPUT III. DE SENSIBUS EXTERNIS.

ART. I. *Notiones præmittendæ.* Quid sit organum-sensoria-sensatio-facultas sentiendi. Sensationum classes quinque. Anima est principium sensus, organum animatum ejus subjectum. Non omnis sensatio proprie est repræsentativa. Distinctio sensitivæ perceptionis ab intellectuali perceptione et judicio. Quid sint sensibiles corporum proprietates-sensibile proprium-species sensibilis impressa et expressa-sensibilia communia-sensibilia per accidens. Sensuum est solum referre qualitates sensibiles quatenus nos afficiunt. Quo pacto sensatio vera dicatur prout est subjecti affectio, et prout est objecti repræsentatio . . . 291

ART. II. *De sensationibus subjective spectatis.* PROP. I. *In sensationibus, prouti subjecti affectiones sunt, nulla potest esse falsitas.* Nec enim subjectum potest non habere affectionem quam sentit, aut diversam habere ab ea quam sentit-nec organa affectionem receptam mutare . . . 294

ART. III. *De idealismo.* Per sensationes certi sumus corpora existere. De idealismo sceptico et dogmatico-subjectivo et objectivo. Status quæstionis determinatur . . . 295

ART. IV. *Idealismi confutatio.* PROP. II. *Certitudo de corporum existentia, quam sensationes gignunt aluntque, ab idealistis everti non potest.* Apparitiones corporum non eas habent causas quas idealistæ assignant. Non enim producantur a subjecto

cogitante, quia 1^a a modificationibus animi maxime differunt-2^a sensus intimus ea testatur, ex quibus patet eas extra mentem habere causam-3^a a repræsentationibus reproductis maxime discrepant-4^a a conditionibus pure internis non pendere ostenduntur-5^a exhibent eum ordinem, cujus causa ipse animus esse nequit. Non possunt in nobis excitari a Deo, corporibus non existentibus-quia Deus hoc agens induceret nos in errorem eumque invincibilem. Certitudo reflexa ac philosophica de corporum existentia sola ratione acquiritur. Argumenta in secunda parte allata primam quoque confirmant. Cujusmodi sit certitudo de corporum existentia . . . 296

ART. V. *Difficultates.* Sensationes sunt meræ animi modificationes. Inter sensationes et corpora nulla est relatio. Non cognoscimus quomodo corpora possint agere in nos-imo impossibile videtur corpora in spiritum agere. Delirantes et somniantes habent repræsentationes sensiles maxime evidentes-invincibili persuasionem putant existere objecta quæ ipsis repræsentantur. Non cognoscimus de corporibus, nisi qualitates sensibiles-quæ non sunt, nisi in percipiente etsi invincibili persuasionem putemus eas esse in corporibus. Deus potest per se, corporibus non existentibus, sensiles repræsentationes in nobis producere, ut pluries fecit-Deus potest permittere errorem necessarium, constantem et invincibilem, ut permittit v. g. in amentibus. Error iste corrigi potest a ratione. Deus non facit per plura quod fieri potest per pauciora. Genius malignus potest nobis illudere. Demonstratio existentia corporum ex Dei veracitate, quæstionem hanc ad theologiam reducit-et circulo vitioso dat locum. Responsiones . . . 303

ART. VI. *De peculiaribus judiciis quæ sensationibus, ut sunt repræsentativæ, innituntur.* Judicia immediata et mediata. Etiam judicia immediata erronea esse possunt, si debita conditiones non ponantur . . . 307

ART. VII. *Regulæ in usu sensuum attendendæ.* Sensus sint sanit-quomodo constare id possit-sint apte dispositi et convenienter applicati-notandum pro judiciis circa sensibilia communia ferendis. Quomodo judicandum de corporum figura magnitudine, distantia, motu. Quando nam rationis subsidium adhibendum . . . 308

ART. VIII. *De peculiarium judiciorum, quæ sensationibus innituntur, veritate.* PROP. III. *Sensiles repræsentationes, quantum ad propria sensuum objecta pertinet, a falsitate sunt immunes, si tamen sensus recte fuerint dispositi et convenienter adhibiti.* Nam referunt veras corporum erga nos relationes-in hunc solum finem sensus homini a Deo tributi sunt-si sensus perpetuo nos deciperent, nullam amplius iis fidem haberemus; quod tamen falsum est. PROP. IV. *Sensationes nequeunt esse erroris occasio, quum debitis sub conditionibus exceptæ, corporum figuram, magnitudinem, distantiam, motum vel quie-*

tem referunt. Nam repræsentationes huiusmodi qualitatum sunt intime connexæ cum repræsentationibus qualitatum per se sensibilibus. PROP. V. *Certum est ex legitimo sensuum testimonio, esse in rerum natura facta quædam constantia et uniformia, quæ naturæ leges vocamus.* Nam una cum qualitatibus sensibilibus hæc a sensationibus referuntur. Cujusmodi sit certitudo de sensibilibus corporum qualitatibus . . . 312

ART. IX. *Difficultates.* Plures scientiæ docent ideas juxta sensuum relationes efformatas falsas esse-multi errores a sensibus proveniunt circa figuram, magnitudinem, distantiam motum-que corporum-sensus sæpe rem unam pro alia, quæ ipsis obversatur, percipiunt-sensus etiam rite adhibiti non percipiunt res ut sunt in se-idem objectum diversa animalia, imo diversos homines diversimode afficiit-qui daltonismo obnoxii sunt, in errore invincibili versantur. Singulis objectis satisfiit . . . 314

CAPUT IV. DE IDEARUM OBJECTIVA REALITATE.

ART. I. *Objectiva idearum realitas asseritur.* Status quæstionis proponitur. PROP. I. *Veritas est indemonstrabilis, eademque demonstratione non egens, ideis objectivam realitatem exhiberi.* Hæc veritas necessario fluit ex eo quod mens veritati assequendæ apta est-eadem demonstrari nequit sine petitione principii-et est per se evidens-nam tota quæstio reducitur ad realitatem ideæ entis. PROP. II. *Qui de objectivo idearum valore dubitare posset, is de primis principiis, deque ipsis internis factis dubitare consequenter deberet, imo nec judicium ullum ponere, nec ratiocinari posset.* Nam 1º prima principia ex idearum consideratione efflorescunt-2º factorum internorum certitudo acquiritur ab intellectu per reflexionem, qua ideam ipsorum acquirit-3º in judicio idea aliqua refertur ad rem per subjectum significatam-4º ratiocinium pluribus constat judiciis. PROP. III. *Objectivus idearum valor negatione ipsa vel dubitatione affirmatur.* Qui enim hunc negat, ideæ de idea valorem assignat-qui dubitat, plurium idearum objectum a se certo cognosci supponit Objectiva idearum realitas habenda est ut veritas primitiva-dubium de illa est metaphysice impossibile. Mens quum rem cognoscit, non objecti ideam, sed ipsum objectum percipit . . . 317

ART. II. *Kantii systema exponitur.* Processus operis kantiani, cui titulus: *Critica rationis puræ*-1º Judicia synthetica a priori. 2º Cognitiones nostræ duplici constant elemento, objectivo et subjectivo, materia et forma. 3º Quid sint intuitiones seu visiones empiricæ, et *phænomena* seu apparentiæ. Duplex facultatis sentiendi forma, spatium et tempus. 4º Quid sit intellectus et quam partem habeat, in cognitionibus. 5º Categoriarum quid sint. 6 Duodecim enumerantur. 7º Centrum et ordo synthesis intellectualis-schemata. 8º Ideæ tres supremæ atque absolutæ a ratione efformatæ, nempe idea *psychologica*, *cosmologica* et *theologica*. 9º Nos non nisi sensibilia objecta

cognoscimus et quomodo-noumena. 10º Judicia synthetica a priori valorem objectivum non habent. . . 321

ART. III. *Kantii systema refutatur.* Kant in easdem incidit contradictiones ac sceptici-sibi insuper contradicit noumena admittens-cognitionem humanam inexplicabilem facit-fundamentum totius theoriæ falsum est-exemplis a Kant allatis respondetur . . . 324

CAPUT V. DE IDEARUM UNIVERSALIUM OBJECTUM.

ART. I. *Quæstionis status proponitur.* Quæstionis de objecto idearum universalium in omnibus scientiismomenta. Quadruplex hæc in re veterum philosophorum sententia-nominales et conceptuales-veteres ac recentiores-reales orthodoxi et heterodoxi . . . 329

ART. II. *Nominales puri confutantur.* PROP. I. *Habet humana mens ideas universales.* Nam 1º secus termini communes nil significarent-imò 2º nec inventi fuissent-3º omnis perceptio similitudinis-omnisque 4º idea collectiva ideam universalem importat . . . 331

ART. III. *Refutantur conceptuales.* PROP. II. *Universales conceptus habent in rebus fundamentum.* Probatur 1º ex similitudinem perceptione-2º ex univoca terminorum universalium applicatione ad plura-3º ex definitionibus et scientificis demonstrationibus . . . 334

ART. IV. *Rejiciuntur universalis separata.* PROP. III. *Universalis separata ac per se subsistentia plane absurda sunt.* Sunt enim contradictoria et omnino irrationabilia. An hæc fuerit Platonis sententia . . . 335

ART. V. *Rejiciuntur universalis a parte rei.* PROP. IV. *Nihil est de se et ante omnem intellectus operationem universale.* Secus enim 1º nulla esse possent singularia-2º unumquodque individuum esset, et dici posset universale-3º res eadem esset una simul et multiplicata in pluribus secundum eandem rationem 4º Opinto hæc ad pantheismum ducit . . . 337

ART. VI. *Statuitur universale per intellectum.* PROP. V. *Universalitas omnis constituitur per intellectum cum fundamento in re.* Universale constituitur unitate et communicabilitate-duo hæc naturis conveniunt per intellectus cognitionem præcisivam et comparativam. Universale *directum* et *reflexum-fundamentale* et *formale*. Universalium idearum objectum reale est spectata materia, non vero forma. Universale in ordine reali est *plura in actu, unum in potentia*, in ordine ideali *unum in actu, plura in potentia*. Ex suppositione contrarii principii errores omnes circa universalis exorti sunt. Quæstio de ideis universalibus ab alia de idearum origine per se præscindit . . . 339

ART. VII. *Difficultates nominalium.* Quidquid existit vel potest existere, singulare est, certoque loco ac tempore existit: universali autem hæc non competunt. Si quid universale existeret, nec ipsum a singularibus distingueretur, nec singularia inter se et eadem res subiret affectiones contradicto-

- rias. Si universale qua tale nequit existere, neque potest concipi. Idea universalis cum aliquorum individuorum comparatione fiat, omnia similia repræsentare non potest. Respondetur singulis . . . 345
- ART. VIII. *Difficultates ultra realistarum.* Natura quælibet universalis secundum se et ante omnem intellectus operationem est indifferens ad plura imo non potest adæquate contrahi in uno solo individuo. Natura secundum se est una specie, ideoque secundum se communis. Eadem natura de singulis prædicatur individuis. Universalium attributa realia individuis non conveniunt. Natura divina est realiter una, et a tribus personis possidetur. Universale cum sit objectum intellectus, ejus operationem præcedat oportet fieri nequit unum per cognitionem præcisivam quæ imo falsa esset. Universale per intellectum favet nominalismo et conceptualismo. Refutantur hæc omnia ex supra positis principiis. . . 345

CAPUT VI. DE IDEIS UT FONTEM COGNITIONUM CONSTITUUNT.

- ART. I. *De judiciis analyticis immediatis.* Horum judiciorum effectio. Eorundem discrimen a judiciis immediatis, quæ circa internum externumve sensum fiunt. Habitus principiorum . . . 349
- ART. II. *De certitudine hujusmodi judiciorum.* PROP. I. *Veritates analyticæ immediatæ, metaphysicæ atque absoluta certitudine gaudent.* Nam in contradictionis principio immediate fundantur. Earum unaquæque potest demonstratione indirecta confirmari non vero semper directa. Hæc judicia affirmantur independentem a reali objectorum existentia . . . 350
- ART. III. *Difficultates.* Idearum relationes cognoscere non possumus, quia earum naturam ignoramus. Ex eo quod quædam de ideis nostris vera sint, non sequitur vera esse etiam de rebus. Principia analytica immediata nullam novam cognitionem important imo tautologica sunt saltem sunt ut reliqua judicia, quia in omni judicio prædicatum ad notionem subiecti pertinet hæc quoque ab experientia pendent, quia ideæ ope sensuum acquiruntur ideoque solum hypothetice certa sunt. His omnibus satisfiit. . . 352
- ART. IV. *De ratiocinio.* Quæ veritates per ratiocinium deprehendantur. Duplex, quæ fieri potest, circa datum subiectum quæstio. Ratiocinii præcognita et prænotiones. Ante illud prænosci debet de subiecto *quid sit*, seu *rei*, seu *nominis*, vel *quod sit* pro diversa quæstionis natura. De prædicato *quid sit*, saltem nomine, cognitione actuali vel habituali. De principiis *an sint vera*, habituali saltem cognitione . . . 354
- ART. V. *De cognitionibus, quæ ratiocinio comparantur.* PROP. II. *Ratiocinium, cujus ope cognitiones nostras et ordinamus et amplifcamus, nobilissimum instrumentum est detegendæ veritatis.* Ratiocinii fecunditas. Peculiare cognitiones quæ ratiocinio puro, empirico vel mixto comparantur . . . 356

- ART. VI. *Difficultates.* Per ratiocinium nil novi cognoscitur, nam veritas conclusione contenta est æterna ante nos cognoscebatur in principiis erat jam cognita si esset ignota, nec quæri posset nec inventa cognosci. Finis prænosci debet ante media, at conclusio est finis ratiocinii. Conclusio explicite cognoscitur ante ratiocinium in ejus prænotionibus. Impossibile est ponere præmissas, si conclusio explicite non cognoscatur. Minus universalis cognoscimus ante magis universalis, conclusio autem est minus universalis quam præmissæ. Veritas universalium judiciorum a singulorum veritate pendet. Ratiocinium ab immediata intuitionem non differt continet semper petitionem principii. Difficultates solvuntur . . . 359
- ART. VII. *De certitudine conclusionis.* PROP. III. *Cognitiones per ratiocinium comparatæ falsæ esse non possunt, si tamen ratiocinium et præmissis constet veris, et ad legitimam formam sit exactum; quibus de rebus cum certitudine decernere possumus.* Hoc theorema demonstrari nequit at demonstratione non eget. Præmissas ratiocinii esse veras et formam legitimam, alii veritatis fontes et attentio manifestant. . . 363
- ART. VIII. *Difficultates.* Ratiocinium plurimos in errore adduxit ratiocinio omnis error defendi, omnis veritas impugnari potest eodem contradictoriæ sententiæ defenduntur. Multi putarunt se recte ratiocinari dum errabant. Certitudo de veritate præmissarum et de rectitudine ratiocinii non nisi ratiocinio cognosci potest. Ratiocinium utitur memoria, quæ sæpe est fallax. Objecta diluuntur . . . 364
- ART. IX. *De memoria ut est ratiocinii auxiliaris.* Memoriae notio. PROP. IV. *Memoria, quamvis debilitari aut etiam deficere possit, nunquam tamen per se sanam rationem in errore adducit.* Hæc veritas demonstrari proprie non potest at evidens fit 1^o ex eo quod neque reproductio, neque recognitio continere falsitatem possit 2^o ex continua experientia. Memoria non nisi improprie ac metaphorice fallax et labilis dici potest. Solutio difficultatis propositæ in art. præc. Peculiaria circa memoriam documenta. Præceptum generale, cujus ope memoria nunquam erit erroris occasio . . . 365

CAPUT IV. DE AUCTORITATE.

- ART. I. *Prænotiones.* Quid sit testis-testimonium-fides-auctoritas-testimonium divinum et humanum-dogmaticum et historicum. Triplex factorum species. Quodvis testimonium historicum affert cognitionem. Fides tum scientiæ, tum experientiæ opponitur. Testis auctoritas ipsius scientiæ et veracitate cognita constituitur . . . 368
- ART. II. *De fidei divinæ utilitate et necessitate.* PROP. I. *Veritates quæ humanæ rationis captum superant, cognosci aliter non possunt, quam fide adhibita divinæ revelationis testimonio.* Nullo enim naturali medio cognosci possunt. PROP. II. *Utile est humano generi ac sumopere conveniens, ut veritates quo-*

- que naturalis ordinis, quæ ad cognitionem, sive Dei, sive moralium officiorum pertinent, fide divina accipiat. Status quæstionis exponitur. Revelatio divina non est homini necessaria ad omnem veritatem ordinis theologicæ et moralis cognoscendam. Revelationis prædictarum veritatum utilitates maximæ. Ex dictis non sequitur aut naturam deficere in necessariis aut Deum ad eas revelandas teneri. Easdem omnes veritates humanum genus a solis philosophis addiscere non potest . 569
- ART. III. *De fidei humanæ utilitate et necessitate.* PROP. III. *Utile est omnibus, imo plane necessarium, ut testimonio humano, sive dogmatico, sive historico fidem in pluribus adhibeant.* Perspicuum hoc est in rationalis vitæ initiis. Auctoritas dogmatica ad multas veritates vitæ humanæ necessarias, vel docendas, vel confirmandas inservit. Auctoritas historica necessaria est ad multa cognoscenda facta, sive singularia sive universalia ad stabilienda multarum scientiarum fundamenta ad physicam certitudinem stabiliendam vel confirmandam ad cognoscenda plura quibus societas quælibet innititur . 575
- ART. IV. *De testimonii dogmatici auctoritate.* Quæcunque Dei testimonio innituntur, metaphysicam habent certitudinem. Assertio dogmatica, sive unius hominis sive plurium, per se fere nunquam firmam exigit fidem. Quænam faciunt veritatem testimonii dogmatici magis minusque probabilem. In qua materia sit minus erroris periculum. Sententia in qua doctores omnes uniformiter conveniunt, rejici non debet, nisi contrarium evidens appareat. Auctoritas dogmatica ei, qui rem de qua agitur callet, certitudinem quandoque parit. Eodem potest dubium omne expellere circa investigationum ac rationationumstrarum certitudinem. Regulæ circa testimonium humanum dogmaticum . 575
- ART. V. *De sensu communi.* Consensus totius humani generis non est semper, et in omnibus infallibile certitudinis motivum id experientia demonstrat et ratio. PROP. IV. *Sunt quædam communia judicia, quibus falsitas subesse nequit.* Talia sunt ea quæ a puro rationis fonte defluunt. Plurimæ exstant hujusmodi veritates ad quarum cognitionem communis consensus licet non sit necessarius, est tamen utilis. Usus consensus communis . 579
- ART. VI. *De testimonii historici auctoritate.* Testes immediati vel mediati-coevi, suppres, remoti. Quid sit narratio et famoralis traditio-documentum-historia-monumentum. Quid sit ars critica . 581
- ART. VII. *Prænotanda.* Quæ facta per historicam auctoritatem fieri certa possint-quid supponi debeat de omnium hominum sensibus-quid de communi eorum agendi modo. Legum moralium constantia certa est. Homo necessariam attentionem non omittit ad quædam facta cognoscenda. Homines quæerunt veracitatis laudem, et ægre ferunt mendaces haberi. Nemo gratis mendax . 582

- ART. VIII. *De certitudine parta per testimonium historicum.* PROP. V. *Testimonium historicum certis quibusdam adjunctis septum et communium plenam jure fidem sibi vindicat.* Potest enim certa esse 1° testium scientia-qui constare potest eorum sensus fuisse recte dispositos, et convenienter adhibitos-2° testium veracitas ex eorumdem multitudine, et varietate-ex adjunctis eorum coram quibus factum narratur-ex facti narrati consequentiis. Certitudo parta hominum testimonio moralis est-quandoque mendacium adfuisse physice vel metaphysice repugnat. . 584
- ART. IX. *De probabilitate testimonii historici.* Motiva, quibus facti probabilitas æstimanda est, vel positiva sunt, vel negativadesumuntur alia ex parte facti-alia ex parte testimoniorum conflictu . 587
- ART. X. *De traditione.* Ut traditio certam gignat fidem, debet 1° esse perpetua-2° ampla-3° versari circa factum publicum. Majus habet robur, si quibusdam adjunctis communiatur. PROP. VI. *Legitimæ traditioni falsitas subesse nequit.* Si traditio est legitima, certa est tum testium coævorum, tum sequentium generationum scientia et veracitas . 592
- ART. XI. *De documentis et monumentis.* Ut documenta vim probandi habeant, ostendi debent 1° authentica-2° integra-3° non interpolata. Ad hæc cognoscenda suppetunt indicia tum interna tum externa-quorum sagax faciendus est usus. Monumenta vim probandi habebunt, si fuerint authentica, factis contemporanea, traditioni legitimæ et documentis minime adversantia . 595
- ART. XII. *De auctoritate historiæ.* PROP. VII. *Documenta historica quibusdam adjunctis munita certam fidem facere possunt-si nempe ea legitima sint, et constet de scriptoris scientia et veracitate.* Utrumque ex adjunctis tum historici tum facti deprehendi potest. Quid agendum quum historici in facto aliquo narrando discrepant. Quæritur de pondere argumenti, quod deducitur ex historicorum silentio-1° quum non omnes coevi scriptores de facto silent-2° quum silent omnes. . 597
- ART. XIII. *Difficultates.* Singuli testis non pariunt certitudinem; ergo nec collectio-semper incerta est testium veracitas. Certitudo moralis non est digna sapiente. Certitudo historica, præsertim traditionalis, lapsu temporis infirmatur et evanescit. Miracula, cum habeant contra se leges physicas, auctoritate humana confirmari non possunt-singula diluuntur . 599

LIBER TERTIUS.

CAPUT I. DE VERITATIS CRITERIO.

- ART. I. *Status quæstionis.* Quid sit veritatis criterium, et motivum certitudinis. Quæri nequit an sit. Quærere quodnam sit, utile est et necessarium. Criterium per quæ et secundum quæ . 405

- ART. II. *De falsis criteriis.* PROP. I. *Nec cæcus naturæ instinctus, nec sensus quidam et affectio animi, neque conscientiæ testimonium, tanquam ultimum atque universale veritatis criterium constitui potest.* Non primum, quia aliud criterium antierius supponit, subjectivismum kantianum invehit-scepticis dat victas manus-facultatem intellectivam pessumdat. Secunda opinio est scepticismi fructus-falsa est tum ob rationes superiores-tum quia criterium mere subjectivum inducit-et illusionibus viam aperit. Falsa quoque tertia opinio, quia etsi conscientia conditio sit ad omnem certitudinem, non tamen est ratio omnis veritatis. PROP. II. *Neque humana, neque divina auctoritas unicum veritatis criterium est.* Prior opinio falso nititur fundamento-suis principiis falsa ostenditur-sibi contradicit-auctoritatem ipsam evertit-christianæ religioni est infensa. Ex his altera quoque opinio rejicienda ostenditur. 404
- ART. III. *De evidentia.* Evidentia proprie de rebus sensibilibus dicitur-est rerum necessaria visibilitas-quæ ex tribus exsurgit elementis. Objectis quoque intellectus recte tribuitur. Evidentia non pertinet ad intellectum, sed ad objectum. Evidentia intelligibilis est necessaria veritatis intelligibilitas ejus elementa. Vis humani sermonis hac in re. Veritas est necessario intelligibilis, quando enuntiabilem necessitas menti innotescit. Hinc evidentia definitio. Evidentia distinctio ab ejus intuitu, et a rei evidenti perceptione-nec non a necessitate assentiendi quam producit. Ideæ non dicuntur evidentes, at solum judicia. Evidentia non debet collocari in clara et distincta perceptione identitatis vel discrepantiæ-nec distingui in objectivam et subjectivam-nec solis veritatibus a priori tribui. 408
- ART. IV. *De partitionibus evidentia.* Evidentia; spectata ejus natura unica est-at ratione motivi partialis ex quo provenit, vel modi quo menti affulget, est immediata vel mediata-absoluta vel hypothetica-metaphysica, physica vel moralis intrinseca vel extrinseca. Evidentia extrinseca sæpe per se non sufficit, ut ad subjectivam certitudinem intellectum adigat. 412
- ART. V. *De evidentia ut est criterium veritatis.* PROP. III. *Evidentia est universale veritatis criterium, atque ultimum certitudinis motivum.* Status quæstionis exponitur. Probatur propositio ex analysi motivorum certitudinis-et ex certitudinis natura. Dubitatio de infallibilitate evidentia absurda est. Principium evidentia: quod est evidens verum est, idem est cum illa primitiva veritate: ratio potest veritatem cognoscere. Nulla propositio evidens potest esse falsa-nec propositio falsa potest fieri evidens. Qui de his dubitat in scepticismum labitur. 413
- ART. VI. *De evidentia primitiva.* PROP. IV. *Evidentia omnis dimanatio quædam est evidentia primitiva duplicis, qua gaudent primum factum primumque principium.* In evidentia primi principii fundatur enuntiationis necessitas-in evidentia primi facti ejus manifestatio. Vis conjuncta primitivarum veritatum.

- mentem cogit ad veritatem evidentem amplectendam. Multa trium veritatum primitivarum dependentia; quæ tamen est ejusmodi, ut singulæ sint independentes in eo, quod sunt certitudinis fundamenta. Discremen principii evidentia a principio cartesiano ideæ claræ et distinctæ-hujus defectus. 415
- ART. VII. *Utrum ab evidenti veritate intellectus resiliere possit.* Duplex hujus quæstionis sensus. Intellectus per se veritati, quæ ipsi facta sit evidens, non potest non adhærere. Veritates immediate evidentes nec per voluntatis influxum negari possunt. In assensu veritatibus mediate evidentibus præbendo potest voluntas diversimode influere. In iis quæ ex auctoritate humana evidentiam extrinsecam habent potest quandoque assensum impedire. Fides revelatis a Deo mysteriis adhibenda, pia voluntatis motione semper indiget. 418
- ART. VIII. *Difficultates.* Dum objectis satisfat, hæc statuuntur doctrinæ capita. Criterium evidentia non fundatur in mera apparentia, nec Protagoræ subjectivismum instaurat. Veritas rerum ab evidentia non pendet-non omne quod est verum, est evidens. Non omnis certitudo oritur ex evidentia veritatis intrinseca. Qui errant evidentiam jactantes, vel mentiuntur, vel appellant evidens quod solum est probabile, vel non affirmant illud ipsum quod ipsis est evidens. Quam differat evidentia a larvata falsitate. Quomodo mutetur propositio vera et evidens in aliam falsam. Evidentia nullo alio criterio indiget. Solvuntur Lamennaisii objecta; nempe statuto hoc criterio, ratio individualis fit iudex infallibilis veritatis; id quod absonum est, maxime ex eo quod spiritum privatum protestantium inducit. Natura duce homines, præsertim pueri, auctoritate ut unico veritatis criterio utuntur. Principium evidentia omnem patrocinatur errorem-stulti se eo possunt invincibiliter defendere. 422
- CAPUT II. DE ERRORE.
- ART. I. *De erroris natura.* PROP. I. *Erroris objectum est falsitas, sed sub aliqua veritatis specie proposita.* Probatur ex natura intellectus, cujus objectum formale est veritas. Neque per voluntatis imperium potest aliter fieri. Errores quos nulla veritatis species suasit, mendacia sunt. PROP. II. *Nullus error est physice necessarius.* Nam intellectus non nisi ab evidentia necessario determinatur-secus nullum esset veritatis criterium intellectus per se et natura sua in errorem ferretur-dubitatio universalis legitima esset. PROP. III. *Omnis error ex libera voluntatis motione originem habet.* Consequitur ex probatis. Error opinione semper continetur, nec cum certitudine conjungi potest. Potest quandoque esse moraliter necessarius. Non omnis error est opinio imprudens. Error formalis et materialis. 428
- ART. II. *De errorum causis.* Ad errorem duo requiruntur; falsitas veri speciem præ se ferens, et motio voluntatis. Falsitati ve-

ritatis speciem obducere possunt errores jam in mente recepti et præjudicia-auctoritas-confusio, quæ primitiva errorum omnium est radix. Confusione hac veri ac falsi in mente existente, falsum vero dum judicamus substituunt imaginatio-oblivio-indeterminata vocabulorum significatio. Fit autem substitutio ista ex defectu attentionis ac reflexionis-cujus defectus causæ aliæ sunt ex parte subjecti, aliæ ex parte objecti. Voluntas intellectum movet vel amore enuntiabilis-vel amore assensus-nunquam tamen sine præsupposita confusione quam quandoque voluntas procurat, quandoque contemnit, quandoque fovet 430

ART. III. *Difficultates.* An testimonium de quo nulla occurrit suspicio-aut falsitas de qua dubitare stultum putaretur, necessarium inducant errorem. An dentur errores c. g. in suppuratione numerica, ab omni voluntatis influxu immunes. Atque hic distinguuntur errores phantasie vel manus ab erroribus intellectus. Error intellectus est voluntarius. Error quoque phantasie vel manus indirecte et remote voluntarius est, saltem ut plurimum. Ignorantia invincibilis proponere nequit intellectui ut evidens id quod falsum est. Error mentis formalis nunquam est physice invincibilis-materialis vero potest esse invincibilis-multoque magis errores alterius potentie 434

CAPUT III. DE RATIONIS HUMANÆ LIMITIBUS.

ART. I. *De veritatibus supra rationem.* PROP. I. *Fatendum est, veritates quasdam esse, quæ absolute et per se rationis humanæ ceptum excedunt.* Veritas dicitur supra rationem duplici sensu. Probatur thesis ex humanæ mentis limitatione-ex incomprehensibilitate divinæ naturæ-ex eo quod in ipsis rebus naturalibus multa nobis ignota sint. PROP. II. *Quæ sunt supra rationem dici nequeunt contra rationem esse*-nam supra rationem et contra rationem maxime discrepant. PROP. III. *Veritates supra rationem possunt esse materia doctrinæ, quæ a superiore intelligentia aut a revelatione divina procedat.* Etsi in mysteriis haberi nequeat idea intuitiva prædicati, nec cognosci cur res ita sit, potest ejus idea haberi analogica et cognosci quod res ita sit. Falsitas cartesiani principii si exclusive proponatur. Veritates a Deo revelatæ possunt opponi propositionibus physice certis, nunquam iis quæ metaphysice certa sunt. Quid sufficiat ut objectiones contra revelata mysteria confutentur 438

ART. II. *Difficultates.* An et quo sensu quidquid verum est, possit esse intellectus objectum. Quod est supra rationem, est rationi non conforme negative, non positive. An ratio suadere queat veritatem eorum quæ sunt supra rationem. An rationis subjectio in credendis mysteriis, rationis auctori sit injuriosa. De difficultate quam homines experiuntur in credendis mysteriis. An fides his adhibita rationem enervet 443

ART. III. *Utrum, aut quo sensu ratio dici possit independens.*

PROP. IV. *Ratio humana nullo modo independens dici potest.*

Per se rationem independentem non esse, est prorsus manifestum : quæstio solum fieri potest, an sit independens voluntas in quibusdam actibus intellectui imperandis. Independentia voluntatis a coactione, a necessitate, ab obligatione. Quos actus intellectui voluntas imperare possit. Independentia interna et externa. Voluntas est independens a coactione et necessitate. Libertas ab obligatione morali quoad dubium-attentionem et reflexionem-inquisitionem veritatis-opinionem-multis arctatur limitibus. Effatum illud : *in dubiis libertas*, est de libertate a coactione quoad manifestationem receptarum opinionum, in materiis vere dubiis. Nulla nostra facultas, multaque minus ratio est exlex 445


COLUMBIA
UNIVERSITY
LIBRARY

ADAMS J. C.
VICTOR J. C.
1870




[illegible]

DEC 3 1974
JUL 2 1938



VOLUME 2




Fr. Paatet & Co.
New York & Cincinnati.

140

T61
2

COLUMBIA COLLEGE LIBRARY.



MADISON AVENUE.
NEW YORK.

INSTITUTIONES PHILOSOPHICÆ.



Volumen II.

PETRUS BECKX

PRÆPOSITUS GENERALIS SOCIETATIS JESU.

Cum opus, cui titulus : *Institutiones philosophicæ. Volumen II. Ontologia—Cosmologia*, a P. Salvatore Tongiorgi nostræ Societatis sacerdote lingua latina conscriptum, aliquot ejusdem Societatis Theologi, quibus id commisimus, recognoverint, ac in lucem edi posse probaverint; facultatem damus ut typis mandetur, si iis, ad quos pertinet, ita videbitur. In cujus rei fidem has litteras manu nostra subscriptas et sigillo nostro munitas dedimus.

Romæ, die 24 sept. 1861.

L. † S.

PETRUS BECKX.

—
IMPRIMATUR.

Fr. Hieron. Gigli O. P. S. P. A. Magister.

—
IMPRIMATUR.

Fr. A. Ligi O. M. C. Archiep. Icon. Vicesg.



APPROBATIO ILL^{luc} AC REV^{luc} DOMINI EPISCOPI BRUGENSIS.

Institutiones Philosophicæ quas R. P. Tongiorgi S. J. P. et in collegio romano philosophiæ professor, alumnis suis dictavit et typis romanis nuper descripsit, tanto pondere doctrinæ, tanta ratiocinii vi et perspicuitate sermonis eminent, quinimo tam eximio opinionum delectu præstant, ut eas, præ cæteris, in usum scholæ philosophicæ Minoris nostri Seminarii Rollariensis adoptaverimus.

Brugis, 8 septembris 1862.

† J.-B., EPISCOPUS BRUGENSIS.

Illust. ac Rev. Dominus Episcopus Leodiensis has *Institutiones* pariter adoptavit pro schola philosophica Minoris sui Seminarii Sancti Trudonis.

INSTITUTIONES

PHILOSOPHICÆ

SALVATORIS TONGIORGI

E SOCIETATE JESU

PHILOSOPHIÆ PROFESSORIS

IN COLLEGIO ROMANO EJUSDEM SOCIETATIS

—
Editio quinta.

—
V O L U M E N I I .

—
ONTOLOGIA — COSMOLOGIA



BRUXELLIS

EXCUDEBAT H. GOEMAERE

SUMMI PONTIFICIS TYPOGRAPHUS.

—
1873

—
PROPRIÉTÉ. DÉPOSÉ AU VOEU DE LA LOI.
—

INSTITUTIONES METAPHYSICÆ.

PRÆNOTIONES.

1. Metaphysica, si ex etymo (μετὰ τὰ φυσικά) vocis quæras significationem, idem sonat ac *post physica*, vel *ultra physica*. Hinc ex vi nominis metaphysica est : *scientia, quæ physicæ succedit*; vel *scientia, quæ naturam sensibilem transgreditur*.

Prima interpretatio ad historiam hujus scientiæ pertinet : quæ enim de illa scripsit Aristoteles, post physicorum libros collocata sunt, sive ab ipso Aristotele, sive, ut eruditi volunt, ab iis qui Stagiritæ scripta in ordinem classesque redegerunt; ex quo deinceps factum est, ut ab Aristotelicis omnibus hæc doctrina ultimo loco inter philosophicas traderetur; id quod cum harum quoque subordinatione scientiarum optime consonabat.

Interpretatio altera definitionem realem exhibet. Cum enim philosophicæ omnes scientiæ de rerum rationibus diversimode ultimis agant (Prol. VI), scientia hæc, si consideretur intra eos limites, quos illi veteres assignabant, eas rerum rationes sibi eligit contemplandas, quæ absolute ultimæ sunt et immateriales, i. e. ab omni materia, vel re, vel mentis consideratione abstractæ, et a sensuum experientia maxime remotæ; quæque propterea sunt revera inter omnes altissimæ ac nobilissimæ. Quicumque igitur fuerit nominis hujus auctor, non poterat hæc scientia aut convenientiore aut opportuniore vocabulo designari.

2. Metaphysica in duas partes a veteribus distinguebatur, quarum altera versabatur circa ens immateriale *præcisive*, nempe circa intrinsecas rerum rationes, quæ per mentis præcisionem ab omni materia abstrahuntur; altera vero circa ens immateriale *positive*, i. e. circa supremam rerum omnium causam extrinsecam, divinam nempe naturam, quæ reipsa ab omni materiæ concretionem est plane exempta. Hodierna autem studiorum distributio ac scientiarum conditio metaphysicæ limites amplificavit; ac novam propterea scientiæ hujus partitionem induxit. Primo itaque in *generalem* et *specialem* dividitur. Generalis, quæ *Ontologia* appellari solet,

objectum sunt rationes rerum ultimæ, quæ mentis præcisione a rebus abstrahuntur. Specialis vero in tres partes distribuitur. Prima est *Cosmologia*: hæc quæ de mundo corporeo generaliora sunt et maxime abstracta, quasi quoddam physicæ complementum, complectitur. Altera est *Psychologia*, quæ de animæ humanæ natura et facultatibus agit. Tertia est *Theologia*, quæ de Deo O. M. disserit. Hæc metaphysicæ partitio a Wolfio jam in vecta posterioribus omnibus arrisit, eaque, ut supra dixi, pro præsentī scientiarum ac studiorum conditione opportunissima accidit. Veteres, qui metaphysicæ nomine ontologiam solum nostram ac Theologiam complectebantur, quæ nos in psychologia et cosmologia disputamus, ad physicam rejiciebant.

3. Potest autem secundum hanc amplitudinem accepta metaphysica et suum retinere nomen, et definitione a veteri illa non multum dissona describi. Veteres enim, ut diximus, metaphysicæ objectum statuebant ens immateriale seu positive, seu præcisive (2). Jamvero anima humana, quanquam corpori conjuncta, natura tamen sua immaterialis est; habet enim ex se, ut independentē a materia et esse et operari possit. Cosmologia autem in mundo corporeo incorporeas rationes ac sensum transcendentē persequitur. Adhuc igitur metaphysica est: *scientia, quæ ex rerum rationibus diversimode ultimis, eas persequitur, quæ vel re vel mente a materia sunt magis abstractæ, sensumque transgrediuntur.*

Cæterum vix hac objectorum nobilissimorum, circa quæ metaphysica versatur, expositione jam videre est, scientiam hanc inter ipsas philosophicas disciplinas fundamentalem et præcipuam esse. Ipsa enim est, quæ notiones et principia, quibus scientiæ omnes indigent ac passim utuntur, illustrat; quæ veritates in omni cognitionum ordine fundamentales constituit; quæ ipsa cognoscendi instrumenta evolvit et explicat. Ac proinde merito appellata est Philosophia prima, imo simpliciter et proprio nomine Philosophia ac Sapientia; disciplina item architectonica; dignitate demum et utilitate princeps humanarum scientiarum ac domina. Quæ omnia tractatio ipsa rerum, multoque magis usus cuique probabit.

METAPHYSICA GENERALIS

SEU

ONTOLOGIA.

4. Ontologia est *scientia rerum, prouti notionibus maxime abstractis exhibentur*. Hæ porro notiones in hac scientia non considerantur *subjective*, i. e. ut sunt mentis actus ac proles, sed *objective*, i. e. in eo quod repræsentant et continent expressum. Ideæ hoc modo spectatæ dicuntur *conceptus*, *objectivi*, *notæ* seu *rationes objectivæ*, rerumque *conceptibilitates*, per quas objecta cognoscibilia sunt et cognoscuntur, quæque ab ipsis objectis mentis præcisione abstrahuntur.

5. Ex his objectivis rationibus eas sibi assumit ontologia indagandas, quæ sunt maxime abstractæ, nempe tum quæ omnia rerum determinatarum genera transcendunt, tum quæ ex his transcendentibus emergunt (Log. 36). Quæ quidem a cæteris differunt non modo quoad amplitudinem suam et indeterminationem, sed etiam quia omnibus, qui ratione pollent, communes sunt, et ad rationis exercitium plane necessaria; id quod de ideis generum et specierum dici nequit. Invenire enim poteris homines, quibus non sit idea quarundam arborum et animalium, multoque magis domorum, urbium, navium, rerumque his similium; invenes imo qui propter nativum sensitivæ potentiæ defectum nesciant quid sint colores aut soni, et nihilominus multas veritates cognoscunt, ac de multis ratiocinantur. Sed neminem invenes, qui ideis entis, veri, boni, unitatis et numeri, substantiæ et causæ, possibilis et impossibilis, aliisque hujusmodi sit destitutus. Quod si quis his careret, in eo ratio vel nunquam evigilasset, vel extincta plane foret. Quicunque enim ratione instructus est, naturalem habet ac necessariam ad has ideas efformandas dispositionem. Idcirco hæ ipse notiones essentielles humano intellectui merito dicuntur. Quoniam vero notio *entis* ea est ad quam supremæ

istæ notiones reducuntur, idcirco hæc scientia *ontologia*, nimirum *entis scientia* nuncupata est.

6. Circa supremas hasce notiones duo præstat ontologia: 1^o eas expendit, illustrat, earumque objectivum valorem, ubi opus fuerit, tuetur et explicat: 2^o principia prima, quæ ex iis efflorescunt, constituit, declarat atque confirmat. Atque hinc manifestum est, quanta sit ejus dignitas, utilitas et necessitas. Profecto quamcunque scientiam quis excolat, in ea sæpe hærebit, sæpe minus accurate loquetur et confuse disputabit, qui disciplinæ hujus ignarus est; neque is vere sapiens unquam esse aut dici poterit. Hinc Aristoteles hanc scientiam unam sapientiæ nomine insignivit.

7. Fallax illa ac levis empiricorum elapsi sæculi schola, cum sensistis omnibus et materialistis, omnem de rebus abstractis quæstionem, imo et considerationem a philosophia eliminatam voluit ut prorsus inutilem, et *facti* solummodo cognitionibus inhærens, eas unice philosophi studio dignas atque utiles esse docebat. Id sane erat ipsam perimere philosophiam. Quomodo enim facta, a principiis abstractis divulsa, scientiam constituent, cum neque observare ut par est facta, neque sagaciter experientiam adhibere, neque causas investigare, neque ad generales naturæ leges per inductionem ascendere sine aliquo principio possimus? Atque ut hæc missa faciam, anne præter ea, quæ sub experientiam cadunt, nihil præterea aliud sciendum est? Hæc scilicet iis solum cadere in mentem possunt, qui intelligentiam cum sensu et scientiam cum experientia confundant, quique sensibilia solum atque animalis vitæ commoda in pretio habentes, hominis dignitatem, veritatis jura, sapientiæ pulchritudinem in minimis habeant. Sed jam vix reliquæ ejus sectæ exstant; ipsa enim docuit experientia, quam multæ ac magnæ calamitates et tenebræ ex ea philosophandi ratione emergant.

8. Supra jam dixi (5) cur ontologiæ nomen huic scientiæ factum sit. Placuit tamen recentioribus nonnullis philosophis illam appellare *ideologiam*. Ac potest profecto ita appellari. Nihilominus vetustiore illam appellationem potius

retinendam existimaverim; primo quidem quia hoc Ideologiæ nomen a sensistis præteritæ ætatis translatus est ad rem plane diversam, videlicet ad descriptionem quamdam potius quam scientiam facultatum cognoscendi significandam; secundo vero quia scientia quam persequimur, non propriè ideas, sed objectivas rationes et entitates, quas ideæ repræsentant, pro objecto habet. Sed de his satis. Ontologiam trifariam dividemus. Primo de ente et de communibus ejus affectionibus; secundo de entium generibus supremis, seu de categoriis; tandem de entium realitate ac perfectione agemus.

LIBER PRIMUS.

CAPUT I.

DE ENTE IN GENERE.

ARTICULUS I.

De entis notione.

9. Entis notio, cum unicuique clarissima sit, proprie tamen definiri non potest. Primo quidem propter ipsam ejus claritatem; nequit enim per clariores conceptus explicari, ut postulat definitio; deinde vero, quia notionum omnium abstractissima est et simplicissima; postremo ex eo quod quidquid cogitemus, quidquid dicamus, entis rationem continet, quia omnia per talem rationem naturaliter primo percipiuntur. Igitur nullus potest ad ens definiendum afferri conceptus, qui entis rationem non comprehendat.

10. At declarari saltem potest, imo et debet, in quo entis ratio consistat, et quid entis nomine significemus. Ut hoc fiat, adverte, id quod in logica docuimus (L. 152, 153), verbum *est* significare semper actum rei cogitatæ, quem mens contemplata est et in se exprimit; hunc autem actum vel esse existentiae vel essentiae; nempe, ut ibidem explicavimus, esse actualitatem subjecti, vel a quacunque determinatione præcisam, vel ut determinato genere continetur. Actus autem essentiae, quanquam multiplices sint et diversi, hac tamen unica idea maxime communi comprehenduntur, videlicet *esse determinati*, quod idem est ac *entitas*, seu *realitas*.

11. Hinc colligitur 1º quid entis nomine veniat. Ens est quod habet esse. Esse autem vel est existentia simpliciter, vel realitas aliqua, ut modo diximus. Ens igitur duo significat: a) *id quod existit*; b) *id quod habet aliquam realitatem*; et hoc sensu idem est ac *res*. Res enim (quæ notio una est ex transcendentibus) est id quod habet *esse ratum*, nempe esse determinatum (10). In hac altera potissimum acceptione ontologia ens considerat.

* 2º Ex duabus hisce entis acceptionibus prima exhibet id,

quod primo in rebus percipimus. Existentia enim est minimum, quod de rebus cognosci possit; ac proinde prima nota est, quam res menti præferunt. Altera vero ultimum reflexionis et abstractionis terminum exhibet. Nam post cognitæ realitates diversas, et abstractionibus omnibus, quæ fieri possunt, effectis, conceptus qui superest ultimus, est conceptus realitatis indeterminatæ (10). Igitur ens secundum primam acceptionem est primum objectum cognitionis directæ, secundum alteram est ultimum objectum cognitionis reflexæ.

* 3º Quum cogitamus id, quod secundum hanc alteram acceptionem nomen *ens* significat illud non sejungitur ab eo, quod idem nomen significat secundum acceptionem primam. Quidquid enim intelligitur ut aliquam realitatem habens, id vel cogitatur ut actu existens, vel saltem ad modum habentis existentiam; quia nempe tale est, ut ei non repugnet existere: imo quidquid mente cogitatur, hoc ipso existentiam quamdam habet, ut veteres aiebant, *intentionalem*, nempe in ordine logico cognitionis (L. 155, 3º).

* 4º Deduces ex dictis, *ens* seu *rem*, dici primo de rebus existentibus, quæ actu realitatem habent; secundo per analogiam attributionis de iis, quæ possunt existere: hæc namque realitatem habent solummodo abstractam. Propterea ens possibile non esse primum, quod cognoscitur aut vocatur ens.

12. Ens dicitur *intellectus objectum*: nempe objectum materiale (L. 15); non vero semper et in omnibus *formale*. Quod 1º sit objectum materiale, per se patet. Quidquid enim est, intelligibile est, et tantum intelligibile est, quantum est. Ergo quidquid est, aptum est ad hoc, ut intellectivi actus sit objectum. Nota tamen, ens non esse objectum materiale intellectus, solum ut dicit aliquid existens, sed generatim ut dicit aliquid realitatem habens.

2º Si ens esset semper et in omnibus objectum formale intellectus, dicendum foret, intellectus nihil aliud percipere posse in rebus, nisi rationem indeterminatam existentiae aut realitatis; id quod est omnino falsum. Nihilominus

ratio entis ea est, quæ primo ab intellectu in rebus percipitur : atque insuper in omni conceptu latet tanquam primum elementum intelligibilitatis (9), omnisque cogitationis conditio (11).

ARTICULUS II.

* *De entis analogia.*

13. PROPOSITIO I. *Ens non est univocum nomen, sed analogum analogia attributionis.*

Expedienda est hoc loco quæstio illa : utrum hoc nomen *ens* univocum sit, an secus (L. 64) : quæ quidem quæstio in hac materia præcipua est, et multo majoris momenti, quam prima fronte videri possit. Ut nomen aliquod univocum vere sit, duo requiruntur, ut ex dictis in logica colligitur : 1^o ut idea nomini respondeat una, et quæ pluribus conveniat ; 2^o ut huic ideæ non respondeant in pluribus illis rationes diversæ, sed una ratio, quæ uniformiter iis insit. Sic v. gr. nomen *animal* univocum est, quia huic voci una respondet idea, et huic ideæ una ratio, quæ in homine et bruto eodem modo invenitur.

14. Jam, quod ad primum spectat, certe huic voci *ens* una respondet idea, quæ exprimit aliquid unum et omnibus conveniens, sive *ens* accipiat tanquam existens, sive tanquam res : et hoc est omnino manifestum. Omnia enim quæ existunt, omnia quæ aliquam habent realitem, in hoc quod existunt, vel aliquam habent realitem, similia sunt, et hoc entis conceptu repræsentari possunt.

15. Sed illud alterum quod ad univocationem requiritur, in entis conceptu deficit : quia huic conceptui non respondet ex parte rerum una eademque ratio, sed rationes respondent diversæ. Substantia enim et accidens, ens finitum et infinitum in ipsa entis ratione objective discrepant. Substantia enim est *ens per se*, accidens *ens in alio* : ens infinitum est a se, finitum dependenter ab alio. Neque dicas, modos hosce essendi esse differentias quasdam enti adjectas, cujusmodi est rationale et irrationale respectu animalis. Nam modi illi cum sint reales, jam sunt entia, adeoque non sunt extra

entis conceptum (L. 46) : quapropter non sunt differentie rationi entis adjectæ, sed differentie, quæ ipsam entis rationem in diversis diversam faciunt. *Ens* igitur et hic modus essendi *per se* non sunt duæ rationes objective distinctæ ac diversæ, quæ simul componantur, sed una tantum ac simplex ratio, quam mens, quia aliter non potest, ad modum compositorum explicat, distinguens diversis conceptibus, id quod est, et modum quo est. Item dicito de ente a se et ab alio.

16. Quæres quomodo rationes objective diversæ uno conceptu exprimi possint. Respondeo, humanam mentem duplici modo rerum rationes apprehendere : determinate videlicet, et altera ab altera distincta, vel indeterminate atque alteram ab altera non distinguendo. Igitur si primo modo entitates diversas mens intelligit, profecto diversos habet conceptus, puta entis finiti et infiniti, substantiæ et accidentis ; qui cum hac determinatione expressi in unum conceptum componi non possunt. Si vero res non concipit secundum proprium, quem habent in se, ac determinatum entitatis modum, sed indeterminate solum et confuse, prout sunt aliquid a nihilo distinctum, atque aliquid intelligibile, tunc unum entis conceptum efformat ; quia nempe rationes entium diversæ, prout cum hac indeterminatione et abstractione intelliguntur, convenientiam inter se habent, et in unam ideam coalescunt.

17. Sed ut entis conceptus sit unus, ratio tamen objectiva entitatis non est una in omnibus quæ sub entis notione comprehenduntur ; ac propterea entis notio neque univoca est neque proprie universalis, sed omnia genera transcendens. Quid ergo ? dices, eritne hoc nomen *ens* æquivocum ? Respondeo : non sane æquivocum casu, ita ut fortuito commune sit pluribus, sed æquivocum consilio, i. e. analogum (L. 65).

18. Ad hanc porro analogiam recte intelligendam notandum est 1^o in iis quæ analogæ sunt, communiter unum ex analogis habere sibi intrinsecam formam voce significatam ; cætera vero non ita, sed habere solum relationem ad illud, vel proportionem cum illo (L. 66, 68). Quare eadem vox ita

pluribus significandis imposita est, ut et rationes diversas significet, et diversos conceptus exprimat. Sed in analogia entis, forma quæ per vocem significatur, quanquam sit in utroque analogo diversa, est tamen utrique analogo intrinseca et propria; nam v. gr. ens finitum dicitur ens a propria entitate, non ab entitate entis infiniti, quemadmodum medicina sana dicitur ab animalis sanitate. Hinc est quod ens, quanquam rationes diversas significet, non tamen diversos exprimit conceptus, sed unum, ut supra declaratum est (14, 16). Hoc ipsum, ut alibi videbimus, locum habet in nominibus, quæ Deo tribuuntur et rebus finitis (4).

Notandum 2^o analogiam quam habent ad invicem rationes diversæ entis nomine significatæ, proprie non esse eam quam dicunt proportionis (L. 68); nam omnes dicuntur entia proprie et absolute, non vero altera proprie et absolute, altera improprie et proportionaliter: sed esse analogiam attributionis (L. 66), et quidem unius ad alterum. Substantia enim est ens per se, accidens per habitudinem ad illam; et ens infinitum absolute est ens, finitum vero dependenter ab illo; eatenus enim est ens, quatenus aliquod modo imitatur Dei essentiam, ab eoque producitur.

Notandum 3^o in analogia entis, si spectetur id quod hoc nomine significatur, analogum princeps esse ens infinitum, secundarium autem entia finita: nam hæc ab illo habent ut sint. Si vero spectetur ipsa nominis significatio, ens prius de entibus finitis dicitur, quam de infinito: illa enim prius a nobis cognoscuntur.

Propterea 4^o a veritate longissime abesse Gioberti, quum negat, hoc nomen ens rebus creatis tribui posse, ac soli Deo tribuendum esse contendit.

ARTICULUS III.

De negatione entis.

19. Non solum ens concipimus, sed etiam entis negationem, tum absolutam, quæ est negatio existentiae (10: L. 153), ut quum intelligimus centaurum non existere; tum relati-

(1) Cf. Suarez. *Met. Disp.* XXVIII. Sect. III, § 14.

vam, quæ est negatio certæ cujuscumque realitatis, ut quum apprehendimus lapidem non esse sensitivum. Porro negatio est proprie mentis actus unam ideam ab alia separantis (L. 141). Sed fundamentum ejus objectivum est in ipsa distinctione unius rei ab altera, quæ quasi remotio quædam est, quam in se invicem res exerunt. Et revera, ut in logica dictum est (L. 142), negandi actus æquivalet affirmationi distinctionis inter duo. Ex hoc manifestum est, *non-ens* neque percipi, neque ullo modo intelligi per se, sed duntaxat per respectum ad ens, videlicet ut remotionem illius (12). Ex quo sequitur, *non-ens* intelligi ab eo nullo modo posse, qui entis idea careret.

20. Negationem puram entis (purum non esse) *nihilum* vocamus. Et quemadmodum ens sumi potest et pro existente, et pro omni eo quod realitatem habet (11), ita et nihilum accipitur tum pro negatione omnis existentiae, tum pro negatione omnis realitatis. Si primo modo accipiatur, dicitur nihilum *positivum* vel *primitivum*; si altero, nihilum *negativum*.

* 21. PROPOSITIO II. *Nihilum etiam negativum concipi potest, sed affirmari nequit, nisi cum aliqua limitatione.*

Sane nemo negabit, nihilum percipi non posse per propriam realitatem, eodem pacto ac si esset aliquid. At certum ex æquo est, nihilum concipi posse per entis totalem negationem. Quemadmodum enim uno conceptu omnia quæ sunt complecti possumus, ita omnis realitas cogitatione una removeri potest, et sic remota concipi, nihil de illa affirmando, nihil negando.

Neque dicas, perinde esse concipere nihilum ac non concipere quidquam. Hoc enim omnino falsum est. Nam lapis v. gr. non concipit quidquam, et tamen nihilum non concipit. Quum non concipis quidquam, actu intelligendi cares, at quum nihilum concipis, actum intelligendi exerces. Qui nihilum concipit, nullam profecto sibi repræsentat realitatem, et in hoc convenit cum eo qui non cogitat quidquam; sed insuper omnem realitatem remotam intelligit, et in hoc cum illo non convenit.

* 22. Quum vero nihilum affirmamus, aut nihilum de seipso affirmamus, aut aliquid de nihilo, aut nihilum de aliquo, aut denique omnem absolute realitatem negamus.

In primo casu nihilum non affirmamus proprie, sed solum dicimus, exclusionem entis ens non esse, quæ affirmatio recidit, ut ex dicendis patebit, in contradictionis principium.

In secundo et tertio casu evidens est affirmationis absurditas, nisi nihili conceptus aliquo modo limitetur. Quomodo enim aliquid et nihilum absolutum identica esse possint?

Limitatur autem nihili conceptus vel explicite, ut quum dicimus: *nihil est in vacuo*; vel implicite, ut quum dicimus: *ego antequam essem eram nihil*, nempe nihil in ordine existentiae, non vero in ordine possibilitatis, vel: *circulus quadratus est nihil*, nempe, est idearum combinatio, quæ nullam realitatem compositam exhibet.

In tertio demum casu, hæc affirmatio: *nihil est*, aperte contradictionem implicat (L. 428). Propositio quoque: *nihil aliquando fuit*, absurda est, quia si aliquando nihil fuisset, etiam nunc nihil esset: quia ex nihilo nihil. Propositio denique hæc: *nihil aliquando erit*, absurda est et ipsa; quia inter ea quæ sunt est ens necessarium, quod nunquam potest non esse.

23. Ex idea negationis relativa (19), cum idea entis conjuncta, fundamentales illæ oriuntur ideæ *limitis*, *privationis* seu *defectus*, *distinctionis*, *determinationis*, aliæque de quibus postea; et ipsum contradictionis principium. Porro *limis* est negatio realitatis ulterioris in ente: *privatio*, negatio realitatis in ente apto ad illam habendam: *distinctio*, negatio unius de altero: *determinatio*, realitas per quam ens fit tale et non aliud.

ARTICULUS IV.

De ente rationis.

24. Adeo verum est intellectus objectum esse ens, ut in-

tellektus tunc quoque quum *non-ens* cogitat, ad modum entis concipiat illud ac fingat. Exinde ens rationis; quod generatim definitur: *id quod a ratione cogitatur ut ens, cum tamen in se entitatem non habeat*. Quum v. gr. intellectus concipit aerem luce non illuminari, nihil concipit per modum entis, sed solum negationem unius de altero apprehendit; sed quum negationis hujus conceptum simplicem efformare nititur, tunc de tenebris cogitat tanquam de quadam aeris affectione, ac puram negationem respicit tanquam ens, cui ad modum entium realium subjecti vel prædicati partes in propositione attribuit; ut fit v. gr. quum dicimus: *tenebræ erant*, vel: *aer est tenebrosus*. Negatio ita concepta est ens rationis.

* 25. In hoc autem concipiendi modo nulla est falsitas: quum enim hos conceptus effingimus, nullatenus affirmamus esse reipsa quæ non sunt, sed solum cogitamus de iis quæ non sunt ad modum eorum quæ sunt: qui quidem concipiendi modus est utique metaphoricus et improprius, non tamen falsitati obnoxius.

* 26. Ens rationis non habet cum entibus realibus communem conceptum, sed hic conceptus illi applicatur ex quadam proportionis analogia cum ente reali; quia videlicet ad modum entis realis cogitatur, et in rationis operationibus adhibetur. Hoc pacto dicitur *ens*. Dicitur vero *ens rationis*, quia nullum habet esse reale et a ratione independens, sed solum per actum intellectus objectivum quoddam esse in ipso intellectu acquirit.

27. Entium rationis triplex est classis. Ad primam pertinent eæ combinationes idearum, quæ aliquid impossibile exhibent, quodque nullam realitatem habet neque physicam neque metaphysicam: ad alteram negationes et privationes: ad tertiam relationes quædam, quæ vel ex toto vel ex parte finguntur ab intellectu, ut est ex. gr. relatio identitatis cum seipso. De his relationibus suo loco.

ARTICULUS V.

De principiis quæ ab entis notione dimanant.

28. Quum intellectus ens considerat, actum essendi (10),

quem in illo contuetur, in seipso per iudicium reproducit. Iudicium vero quod tunc efformat, est hoc: *ensest*, seu: *quod est, est*. Hoc dicitur principium identitatis: quod principium formam quoque assumit negativam: *quod non est, non est*: *nihilum non est*.

29. Si intellectus comparet ens cum non-ente, statim agnoscit, alterum alterius exclusionem esse: hinc iudicium; *ens non est non-ens*; et *non-ens non est ens*, seu: *esse excludit non esse*, et *viceversa*. Cujus exclusionis necessitate perspecta, iudicium in modale transformatur, videlicet in hoc: *impossibile est, esse et non esse se invicem non excludere*, seu: *idem non potest simul esse et non esse*. Hoc dicitur principium contradictionis, quia enuntiat duo contradictoria *esse, non esse*, consistere simul non posse. Idem principium aliis verbis Logici sic efferunt: *impossibile est duas contradictorias esse simul veras* (L. 190).

30. Postremo ex immediata oppositione entis cum ejus negatione, tertium dimanat principium: *qualibet res aut est aut non est*: quod dicitur principium *exclusi medii*, et est idem ac illud Logicorum: *impossibile est duas contradictorias esse simul falsas*.

31. Sed principium contradictionis, quoniam adeo fundamentale est, accuratius est declarandum.

In hoc principio subjectum effertur voce *idem*, quæ hic valet: *eadem res* (11); res quidem, quia quidquid cogitari potest, hoc principio complectimur, sive actu existat sive non; *eadem vero res* dicitur, quia contradictio identitatem subjecti in utraque propositione requirit.

32. Verbum *esse* utramque suam potestatem (10) in hoc principio retinet, ita ut accipi possit ac debeat tum *absolute* et *indeterminate*, tum *relative* et *determinate*. Asseritur nimirum repugnare, tum quod aliquid eodem tempore existat et non existat, tum quod certam aliquam realitatem habeat ac simul non habeat. Quum verbum *esse* hac secunda significatione sumitur, principium contradictionis sic quoque enuntiat: *non potest eadem res attributis constare contradictoriis*. Principium igitur contradictionis tum in rerum exi-

stentia statuenda, tum in essentiis proprietatibusque illarum investigandis primitivum fundamentum est.

33. Quærendum superest, cur notio temporis in hoc principio locum habeat: cur videlicet non satis sit dicere: *idem non potest esse et non esse*: sed addendum sit: *simul*, i. e. *eodem tempore*.

PROPOSITIO III. *Principii contradictionis nec universalitas permaneret nec veritas, si notio temporis ab illo excluderetur.*

Ratio generalis est, quod cum principium contradictionis omnia complectatur quæ existere et cogitari possunt, sine hoc addito falsum esset.

Primo igitur notio temporis in hoc principio requiritur, ut complecti possit omnia quæ existunt. Sane si quæcunque sunt necessario essent, mentio temporis in hoc principio redundaret. Quod enim necessario existit, non solum supposito quod existat, sed absolute non potest non existere. Ast objecta omnia quæ nos intuemur, contingentia sunt, et in tempore existunt; a *non esse* transeunt ad *esse*, et ab *esse* ad *non esse*. Non igitur repugnat simpliciter, Cæsarem ex, gr. esse et non esse; potest enim hodie esse, et cras non esse: illud solum repugnat, ut quum est non sit; videlicet ut eodem tempore sit et non sit. Igitur quum verbum substantivum existentiam significat, simultaneitatis notio ad contradictionem constituendam necessaria est: ea enim sublata, contradictio cessat.

34. Secundo est etiam necessaria hæc notio, quum verbum *est* relative accipitur. Quod quidem facile intelligitur, si sermo sit de singularibus; hæc enim possunt diversis temporibus habere quasdam qualitates easque non habere, et quosdam actus exercere vel secus.

Si vero sermo sit de universalibus, animadvertere sufficiet, universalis, quoad quædam, indeterminata esse; nimirum quoad differentias específicas vel individuales; ita tamen ut omne universale possit successive concipi determinatum differentiis contradictoriis. Sic angulus potest esse acutus, et potest esse non acutus, animal rationale et irrationale, corpus quiescens et non quiescens. Jam hæc omnes determina-

quem in illo contuetur, in seipso per iudicium reproducit. Iudicium vero quod tunc efformat, est hoc: *ens est*, seu: *quod est, est*. Hoc dicitur principium identitatis: quod principium formam quoque assumit negativam: *quod non est, non est: nihilum non est*.

29. Si intellectus comparet ens cum non-ente, statim agnoscit, alterum alterius exclusionem esse: hinc iudicium; *ens non est non-ens*; et *non-ens non est ens*, seu: *esse excludit non esse*, et *viceversa*. Cujus exclusionis necessitate perspecta, iudicium in modale transformatur, videlicet in hoc: *impossibile est, esse et non esse se invicem non excludere*, seu: *idem non potest simul esse et non esse*. Hoc dicitur principium contradictionis, quia enuntiat duo contradictoria *esse, non esse*, consistere simul non posse. Idem principium aliis verbis Logici sic efferunt: *impossibile est duas contradictorias esse simul veras* (L. 190).

30. Postremo ex immediata oppositione entis cum ejus negatione, tertium dimanat principium: *qualibet res aut est aut non est*: quod dicitur principium *exclusi medii*, et est idem ac illud Logicorum: *impossibile est duas contradictorias esse simul falsas*.

31. Sed principium contradictionis, quoniam adeo fundamentale est, accuratius est declarandum.

In hoc principio subjectum effertur voce *idem*, quæ hic valet: *eadem res* (11); res quidem, quia quidquid cogitari potest, hoc principio complectimur, sive actu existat sive non; *eadem* vero *res* dicitur, quia contradictio identitatem subjecti in utraque propositione requirit.

32. Verbum *esse* utramque suam potestatem (10) in hoc principio retinet, ita ut accipi possit ac debeat tum *absolute* et *indeterminate*, tum *relative* et *determinate*. Assertitur nimirum repugnare, tum quod aliquid eodem tempore existat et non existat, tum quod certam aliquam realitatem habeat ac simul non habeat. Quum verbum *esse* hac secunda significatione sumitur, principium contradictionis sic quoque enuntiatur: *non potest eadem res attributis constare contradictoriis*. Principium igitur contradictionis tum in rerum exi-

stentia statuenda, tum in essentiis proprietatibusque illarum investigandis primitivum fundamentum est.

33. Quærendum superest, cur notio temporis in hoc principio locum habeat: cur videlicet non satis sit dicere: *idem non potest esse et non esse*: sed addendum sit: *simul*, i. e. *eodem tempore*.

PROPOSITIO III. *Principii contradictionis nec universalitas permaneret nec veritas, si notio temporis ab illo excluderetur.*

Ratio generalis est, quod cum principium contradictionis omnia complectatur quæ existere et cogitari possunt, sine hoc addito falsum esset.

Primo igitur notio temporis in hoc principio requiritur, ut complecti possit omnia quæ existunt. Sane si quæcunque sunt necessario essent, mentio temporis in hoc principio redundaret. Quod enim necessario existit, non solum supposito quod existat, sed absolute non potest non existere. Ast objecta omnia quæ nos intuemur, contingentia sunt, et in tempore existunt; a *non esse* transeunt ad *esse*, et ab *esse* ad *non esse*. Non igitur repugnat simpliciter, Cæsarem ex, gr. *esse* et *non esse*; potest enim hodie *esse*, et cras *non esse*: illud solum repugnat, ut quum est non sit; videlicet ut eodem tempore sit et non sit. Igitur quum verbum substantivum existentiam significat, simultaneitatis notio ad contradictionem constituendam necessaria est: ea enim sublata, contradictio cessat.

34. Secundo est etiam necessaria hæc notio, quum verbum *est* relative accipitur. Quod quidem facile intelligitur, si sermo sit de singularibus; hæc enim possunt diversis temporibus habere quasdam qualitates easque non habere, et quosdam actus exercere vel secus.

Si vero sermo sit de universalibus, animadvertere sufficiet, universalis, quoad quædam, indeterminata esse; nimirum quoad differentias specificas vel individuales; ita tamen ut omne universale possit successive concipi determinatum differentiis contradictoriis. Sic angulus potest esse acutus, et potest esse non acutus, animal rationale et irrationale, corpus quiescens et non quiescens. Jam hæc omnes determina-

tiones, si diversis temporibus supponantur, nullam offerunt contradictionem. Contradictio tunc solum exsurgit, quum quis supponat unam eandemque rem differentiis determinatam contradictoriis eodem tempore; angulum ex. gr. eodem tempore acutum et non acutum, animal eodem tempore rationale et irrationale, etc.

35. Tunc solum simultaneitatis notio ad contradictionem constituendam memoranda non est, quum alterum ex contradictoriis prædicatis in subjecti essentia explicite vel implicite continetur. Tunc enim subjectum *necessario* tale est, nec potest unquam aliter esse (L. 555). Inde fit ut dicamus sine ulla temporis adjecta conditione: angulus acutus non potest esse non acutus; animal non potest esse insensitivum; et similia.

Ad hunc tantummodo casum pertinet principium illud Kantii: *prædicatum quod rei repugnat, illi non convenit* (1), quod principium contradictionis principio surrogandum perperam Kantius existimavit (2).

ARTICULUS VI.

* Principia de ente inter se comparantur.

36. PROPOSITIO IV. *Principium contradictionis, et primum principium quod ex entis notione efflorescat, et prima affirmatio est.*

Tria principia supra declarata diversarum in entis ideam reflexionum effectum exprimunt. Potest autem fieri quæstio de ordine successionis ac dependentiæ, quo hujusmodi reflexiones et principia subordinantur. Et ego quidem facile concedam, *in ordine apprehensionis* primum esse principium identitatis, subsequi principium contradictionis, ac tertio principium exclusi medii. Sed *in ordine affirmationis* et iudicii principem obtinet locum principium contradictionis: illo enim non supposito, nec primum nec tertium iudicium prodire possent. Et quoad principium exclusi medii, res est manifesta: hoc enim principium illatio immediata est ex

(1) Log. Transc. Lib. II, c. II., sect. 1.

(2) Cf. Jac. Balmes, *Fil. fundament.*, Lib. I, c. XX.

principio contradictionis. Si enim esse et non esse se invicem excludunt, positio unius est negatio alterius, et viceversa; adeoque nullum inter ipsa medium datur.

Quod vero ad principium spectat identitatis, illud sat est animadvertere, hoc certo affirmari quia evidens est; quia nempe necessitas ejus cognoscitur (L. 685). Atqui omnis necessitas per principium contradictionis constituitur (687). Ergo antequam principium identitatis affirmatione ratum habeatur, contradictionis principium præcedat oportet.

37. Exinde infero, principium identitatis esse ipsum contradictionis principium, incomplete tamen expressum. Si enim certam mentis affirmationem exprimit, nec inanis tautologia dici velit, alterum illud *est* aliquid amplius complecti debet, quam id quod significamus, quum primo dicimus: *quod est*. Hoc autem amplius est ipsum affirmationis pondus, ipsa objectiva necessitas expressa; nimirum dicimus: *hoc certo est*; seu (quoniam objectiva necessitas alia absoluta est, alia hypothetica) *dum est, necessario est*. Principium igitur identitatis ad hoc reducitur: *quod est, dum est, necessario est*. At quid sibi vult illud: *necessario est*, nisi hoc: *non potest non esse*? Et ecce tibi contradictionis principium.

Itaque principium contradictionis ab identitatis principio non differt, nisi quod illud perfecte et signate (L. 392) exprimit id, quod in altero concise atque exercite exprimitur.

Dicendum igitur, ab intellectu 1^o apprehendi in ente essendi actum; 2^o cognosci exclusionem oppositi, quam ille actus exercet; 3^o cognosci exclusionis mutuæ necessitatem; ac 4^o poni iudicium, quod est principium identitatis, seu contradictionis.

38. Ex his 1^o confirmatur quod in logica (L. 555) statuimus, contradictionis effatum primum esse principiorum omnium.

2^o Imo manifestum est, idem principium affirmationem primam esse.

39. Opponi posset: principium contradictionis primam affirmationem non videri. Nam

1^o Prima veritas certa hæc esse videtur : *ego sum*.

2^o Judicium negativum est posterius affirmativo, et modale posterius simplici. Sed principium hoc negativum est et modale. Ergo posterius est aliquo iudicio affirmativo et simplici.

3^o Ante omnem certam affirmationem supponi debet evidentiae principium : *quod est evidens, verum est*.

Resp. *Neg. ant.* Ad 1^m *Nego*. Nam quanquam factum primum, ut factum est, ejusque experientia suam firmitatem habeant ab omni principio independentem, omnemque affirmationem præcedant, nihilominus factum idem, prouti propositione exprimitur, suam objectivam certitudinem a principio contradictionis haurit, ut alibi explicatum est (L. 437, 5^o ; 689, 2^o).

Ad 2^m *Dist. maj.* : In ordine apprehensionis, *conc.* ; in ordine certæ affirmationis, *nego. Tr. min.*, et eodem modo *dist. cons.* Prima affirmatio ea esse debet, sine qua nullum enuntiabile certum esse potest. Atqui omne enuntiabile ex eo certum est, quod impossibile sit idem esse et non esse. Ergo hanc impossibilitatem ipsam, quæ omni certæ affirmationi implicita est, prima affirmatio constituere diserte debet. Recolantur quæ modo diximus.

Ad 3^m *Dist.* : Supponi debet mūtua habitudo inter objectum evidens et mentem, ut illo proposito mens assentiatur. *conc.* ; supponi debet propositio, quæ dicitur principium evidentiae, *nego*. Vide dicta in logica (L. 689, 3^o).

CAPUT II.

DE ESSENTIA ENTIIUM.

ARTICULUS I.

Quid sit essentia.

40. Essentia est *id quo res est id quod est*. Sane in qualibet re sunt quædam notæ, ex quibus ipsa habet, ut in hanc speciem aut in illam ordinetur, et cognoscatur quid sit ; quibus sublatis, rei conceptus constare amplius non potest. Quædam vero aliæ notæ sunt, quibus cogitatione præcis, vel

etiam reipsa deficientibus, adhuc tamen intelligitur quid res sit. Illæ igitur notæ, non istæ, rei essentiam constituunt. Sic, ut exemplo utar, parum refert an circulus sit majoris vel minoris magnitudinis, sit ex lapide aut papyro etc. ; quocumque enim modo hæc se habeant, circuli ratio non mutatur. Circuli enim propria ratio his omnibus non continetur, sed in eo quod omnia peripheriæ puncta a centro æquidistant. Idcirco si ab hac essentiali determinatione præscindis, circulum amplius non concipis.

Ex rei porro essentialibus constitutivis quædam aliæ determinationes seu qualitates dimanant, aliæ necessario, aliæ contingenter. Illæ, ut in logica dictum est (L. 37), proprietates essentiae, hæc accidentia essentiae dici solent.

41. Essentia hoc nomine appellatur, quia est id quod per essendi actum in unaquaque re primo esse intelligitur. Ab antiquis vocabatur quoque *quidditas* ; interrogandi enim *quid res sit*, respondemus subjiciendo illius essentiam, significatam vel per nomen rei proprium, quod respondet notioni essentiae confusæ, vel per definitionem, quæ distinctam essentiae notionem significat (L. 118). Definiri quoque solet essentia : *id quod primo de re concipitur* ; quia si essentia rei non percipitur, non cognoscitur quid res sit ; si autem non cognoscitur quid res sit, res profecto non cognoscitur. Ex eadem ratione essentia dicitur *principium eorum omnium quæ enti necessario insunt* ; nam hæc omnia ab essentia dimanare concipiuntur ; quatenus, intellecta essentia, intelligitur quoque cur attributa in ente sint. Unde attributa demonstrantur per essentiam ; essentia vero nihil habet se prius, per quod demonstrari possit (L. 296). Sic ex gr. demonstrare non potes, cur homo sit homo, et triangulum sit triangulum, sed intellecta horum essentia, proprietates eorum omnes demonstrare potes.

42. Demum essentia, si consideretur ut est principium activitatis qua ens pollet, et actionum quæ ab ipso eliciuntur, idem est ac *natura*. Natura enim est *entis ad certo quodam modo operandum dispositio atque tendentia* ; quæ idcirco ab Aristotele vocatur *principium motus* (1).

(1) II *Phys.*, tex. 3.

43. Rerum essentia, ex duplici modo quo considerari et explicari potest, in *physicam* et *metaphysicam* dividitur.

Essentia dicitur *physica*, quum essentialia constitutiva ut in re sunt considerantur, nulla abstractione aut artificiali partitione adhibita.

Dicitur vero *metaphysica*, et etiam *notionalis*, quum constitutiva entis metaphysice considerantur; essentia nempe divisa in partem communem, quæ genus est, et in partem propriam, quæ est differentia. Vide dicta in logica (L. 123, 1^o 107).

44. Manifestum porro est, essentiam metaphysicam seu notionalem a physica non distingui, nisi ex diverso modo, quo eadem res consideratur. Nam quum essentiam per physica elementa describimus, eam absolute respicimus; quum vero per elementa metaphysica, eam consideramus comparate ad alia, cum quibus aliquid commune et aliquid non commune habet. Hinc si physica essentia realis est, notionalis non est arbitraria, nec purum mentis figmentum; sed realis et ipsa quoad rem quam representat; licet realis non sit abstractionis modus, per quem illam repræsentat. Hinc per se ruit error Locui, qui essentiam realem opponit notionali, contendens, notionalem essentiam esse ut plurimum arbitrariam, incertam, et solum idea aliqua abstracta contineri, cui certum nomen fuerit applicitum, ut ejus ope res colligere in quasdam classes possemus (1).

ARTICULUS II.

De essentiarum cognitione.

45. Ut certum est res esse, ita certum quoque est essentias reales dari. Sed quæri potest, utrum, et intra quos limites eas cognoscamus. De hoc breviter.

ASSERTIO. I. *Nulli dubium quin probe cognoscamus rerum illarum essentias, quarum constitutio ab intellectu dependet humano.* Non enim potest intellectus humanus ignorare, quænam sint constitutiva, quæ ipse excogitat et conjungit.

Hujusmodi sunt 1^o artefacta omnia, ut est v. gr. navis, aratrum, liber, clavis, et generatim machinæ quæcunque et

(1) *De humano intellectu*, Lib. III c. III § 14, 15.

instrumenta ad certos fines atque usus constructa: 2^o quæcunque intellectus construit in ordine ideali et abstracto, quæ iis constant essentialibus determinationibus, quas mens ipsis assignat.

46. ASSERTIO II. *Essentias earum rerum quarum constitutio ab intellectu humano non dependet, cujusmodi sunt res naturales, imperfecte admodum, et exterius potius quam intime cognoscimus.* Etenim intellectus non potest eas cognoscere, nisi quantum ad id sensitiva intuitionem aut intimo sensu juvatur, ac propemodum manuducitur. Sensitiva autem cognitio intima rerum constitutiva non attingit, sed solum quasdam earum qualitates aut quosdam effectus. Non aliam igitur essentiarum hujusmodi notionem intellectus habet, nisi eam quam notæ istæ præbere possunt, cum indeterminatis notionibus entis, realitatis, causæ, subjecti conjunctæ. Unde essentiam omnem primo concipimus obscure per indeterminatum realitatis conceptum, ac deinde ulteriori accedente experientia et comparatione rerum ad invicem, ut realitatem quæ per determinatas qualitates certosque effectus se manifestat.

Sic corporis essentiam concipimus ut realitatem, quæ se manifestat extensione ac vi resistantiæ; essentiam *spiritus* ut realitatem, quæ vi pollet cogitandi et volendi; essentiam *lucis* ut realitatem, quæ determinatam in nobis sensationem excitat. Ita reliquis.

47. Hinc 1^o liquet essentias reales non esse nobis omnino ignotas, quemadmodum Lockius existimavit. Sunt enim nobis rerum essentia cognita, non quidem in se, sed in suis manifestationibus propriis atque constantibus, quæ quid illæ sint satis in conceptu nostro determinant.

2^o Hoc pacto conciliantur binæ veterum assertiones, quæ prima fronte sibi contradicere videntur. Prima est: essentias rerum cognosci immediate ab intellectu tanquam proprium objectum. Altera: essentias rerum esse nobis magna ex parte ignotas. Utraque sane assertio vera est. In prima enim sermo fit de cognitione illa, quæ obtinetur, quum universaliores atque indeterminatas notiones (ens, subjectum etc.) per notas qualitatum et effectuum determinamus (46). In altera

vero de cognitione eorum, quæ esse rerum intime constituunt. 3^o Cæterum ea essentialium cognitio quæ homini possibilis est, potest iteratis observationibus, diligenti experientia et ratiocinio magis minusve perfici; quod munus in primis scientiarum est. Hoc pacto notionem essentialiæ spiritus metaphysica perficit, ostendens ipsum esse substantiam simplicem, a materia independentem et immortalem. Sic physica cognitionem perficit corporum mixtorum et lucis, soni etc. Sed hæc quoque perfectior cognitio semper inadæquata est (46; L. 47, 4^o).

ARTICULUS III.

*Theoremata.*48. PROPOSITIO I. *Rerum essentialiæ sunt indivisibiles.*

Scilicet nec minui possunt nec augeri datæ rei constitutiva. Si enim minui hæc concipiantur vel augeri, jam non amplius rem illam habebis, sed aliam; illa enim ex his, et non pluribus neque paucioribus elementis constat. Plane ut in numeris, quæ est Aristotelis similitudo. Quaternario v. gr. si unitatem addas vel demas, habebis quinarium vel ternarium, sed non amplius quaternarium.

49. PROPOSITIO II. *Omne ens suam habet essentialiam.*

Ens enim sine sua essentialia esset ens sine suo esse; nempe ens sine eo, quod constituit ipsum ens (40); quæ quidem est aperta contradictio.

50. PROPOSITIO III. *Nulla res suam essentialiam potest amittere.*

Secus posset aliqua res non esse id quod est. Si enim quædam res suam amitteret essentialiam jam et esset illa res quæ prius erat, quia talis dicitur, et simul non esset amplius illa res, quia amisit id, quo res illa constituitur.

51. PROPOSITIO IV. *Essentialiæ sunt immutabiles.*

Si enim posset ens suam essentialiam in aliam mutare, jam quia suam amitteret essentialiam, non esset id quod est (50); et insuper esset id quod non est, quatenus essentialiam susciperet alienam.

52. Oppones mutationes perpetuas, quæ in rerum natura fiunt, per quas una res in aliam convertitur; v. gr. lignum

in flammam, rectangulum in triangulum, aqua in glaciem.

Respondeo negando in his omnibus mutationibus mutari essentialia; etenim solummodo quædam essentialiæ singulares cessant existere, aliæque illis succedunt, quæ prius non existebant.

Quod ut melius intelligas, adverte mutationes illas, per quas unam rem in aliam transiisse dicimus, accidere tantummodo in compositis, quorum essentialia ex determinatarum partium conjunctione constat. Quum igitur hæc conjunctio dissolvitur, compositi essentialia totaliter cessat existere, ac restant componentia; quæ vel separata manent, et suam singillatim habent essentialiam a totius essentialia diversam; vel cum aliis coalescunt elementis, et sic novam actu constituunt essentialiam. In hoc casu compositum primitivum in aliud mutari dicimus, non quod ejus compositi essentialia mutetur sed quia quædam sui elementa alterius compositi partes fiunt. Huc spectat mutatio combustibilis in flammam.

Fiunt quoque mutationes in compositis detractio vel additione partium integrantium, ut quum rectangulum mutatur in triangulum et e converso: in hoc quoque casu cessat rectangulum, sed essentialia utriusque semper eadem manet.

Postremo fiunt mutationes unius rei in aliam mutata solum ratione conjunctionis inter eadem elementa: ut quum aqua mutatur in glaciem; tunc enim cessat prima conjunctionis ratio, atque incipit secunda.

53. PROPOSITIO V. *Essentialiæ sunt æternæ.*

Videlicet in statu intelligibilitatis, non vero existentia (L. 296, 549). Quia nempe certæ ac determinatæ rei constitutiva hæc esse et non alia, non aliquando cæpit esse verum, sed semper verum fuit, ac necessario verum est. Intelligibilitas insuper rerum et possibilitas non in tempore esse cœperunt, sed ante omne tempus objectum necessarium divinæ intelligentiæ exstiteret, id quod melius ex dicendis intelligetur.

54. Binæ supersunt assertiones explicandæ potius quam probandæ.

1^o *Essentialiæ sunt necessariae.* Nempe 1^o necessario possi-

biles: possibilitas enim necessaria est, ut infra demonstrabitur. Non sunt autem essentialiter necessario existentes, ut patet: quia rerum finitarum existentia contingens est. 2^o Necessario sunt tales cujusmodi sunt: cujus quoque necessitatis ratio inferius afferetur.

2^o *Essentialiter sunt infinita*. Videlicet quoad extensionem, non vero quoad comprehensionem. Etenim notarum quibus constant complexio perfectionem aliquam finitam exhibet, sed in individuis indefinitis existentiam nancisci potest.

CAPUT III.

DE EXISTENTIA ET POSSIBILITATE.

ARTICULUS I.

De existentiae notione.

55. Quidquid realitatem aliquam habet (11) per quem cogitari possit, vel actu illam habet et extra mentem, vel non habet quidem actu, sed habere potest. Hinc entis divisio in *existens* et *possibile*, seu *ens in actu* et *ens in potentia*. Quæ duo in hoc conveniunt, quod sunt proprie ens, quatenus ens dicit rem (11), præcisione facta ab existentia vel non existentia: in hoc autem differunt, quod ens in actu includit existentiam, ens in potentia negationem ejus; adeoque opponuntur inter se negative, vel potius privative, ut existens et non existens. Ens in potentia est duntaxat in ordine intelligibili et metaphysico; ens actu non in hoc solum, sed etiam in ordine physico et actualitatis.

Existentiæ notionem simplicissimam simul et clarissimam frustra quis verbis illustrare tentet. Cogita quid de te dicas, quum dicis: *ego sum*; et quid sit existentia optime intelliges. Solet tamen fere his modis existentia describi: *actualis rei præsentia in ordine physico* — *complementum possibilitatis* — *actualitas essentialiter* — *ultima rei actualitas* — *id quo res constituitur extra suas causas*. Sed hæc omnia nihil revera exhibent clarius, quam hæc unica vox existentia.

56. Hæc porro vox, si ejus etymologiam spectes, significat

rei ex alia emersionem quamdam atque apparitionem. At si usum sequaris, idem est, ut diximus (10), ac *actualitas subjecti a quacunque determinatione præcisa*. Hinc usurpatur hæc vox etiam quum de Deo loquimur. Neque hic loquendi usus improbari potest cum Gioberti; nam significatio huic voci attributa emanationis notionem nullatenus jam comprehendit, saltem explicite; quod si implicite eam comprehendit, ea notio pertinet non ad id quod significat vox, sed ad modum significandi; secundum quem modum, non hæc tantummodo vox, sed omnia quæ de Deo dicuntur, ipsaque entis denominatio, de eo dici nequeunt (1).

* 57. Controversum fuit inter scholasticos, utrum existentia ab essentia distinguatur. Controversiam hanc plenissime expositam et solutam reperies apud Suarez in disputationibus metaphysicis (2). Ut breviter ea resolvatur, hæc duo in primis statuenda sunt:

1^o Conceptus essentialiter et existentia esse certe distinctos. Possumus enim cogitare de rei essentia, quin ejus existentiam attendamus, et de existentia in genere, quin de ulla particulari essentia cogitemus. Cujus distinctionis fundamentum invenit mens in rerum contingentia, quæ ex se et in suo conceptu existentiam non includunt, quam tamen ab alio recipere possunt.

2^o Essentiam existentem ab essentia abstracta, et in statu realitatis metaphysicæ realiter distingui, distinctione negativa, ut ens a non ente (54). Atque hoc pacto intelligendus videtur S. Thomas, quotiescunque docet, essentiam ab existentia realiter distingui (3).

Ex hujus præsertim animadversionis neglectu tota hæc quæstio orta est. Quæ enim de essentia abstracta et ideali dici debent, ac nemine negante dicuntur, ad essentiam realem et in statu physico a quibusdam translata sunt.

* 58. PROPOSITIO I. *Essentia realis entitas, ejusque existentia re non distinguuntur.*

(1) Cf. S. Th. Sum. th., p. I, q. XIII, art. III.

(2) Disp. XXXI.

(3) Cf. Sum. th., p. I, q. III, art. IV.

Quum essentia extra causas suas constituitur, et ad existendi actum traducitur, contendunt adversarii produci quoddam compositum ex entitate reali ac physica essentiae, et existentia; illamque se habere ut potentiam physicam ad esse actuale recipiendum, hanc vero ut actum, quo hæc potentia determinatur atque completur.

Jam 1^o quod entitas essentiae physicae sit potentia quædam ad actum existentiae, gratis asseritur. Nam:

a) Omnia quæ ad id probandum afferuntur argumenta, si quid probant, hoc unum probant, essentiam creaturæ intelligibilem non continere in suis constitutivis existentiae notam, sed potius indifferentiam ad existendum; ac propterea existentem essentiam ab essentia præcisa et ideali distingui, ut ens in potentia ab ente in actu: quam distinctionem realem esse nemo negat, ut modo diximus.

b) Aliunde vero nescio an unquam suaderi poterit, entitatem rei physicam ab ejusdem existentia distingui. Hoc enim tantumdem est ac si dicas: id quo aliquid est physice hæc res, differre ab eo quo est physice hoc ens. Præterea qui hoc contendit, assumit dari aliquod medium inter ens possibile et ens existens.

2^o Probatur entitatem realem essentiae non esse potentiam physicam ad existentiam recipiendam; sed esse existentem hoc ipso quod entitas realis est. Unum tantummodo brevitate gratia afferam argumentum.

Realis essentiae entitas habet omnia quæ nos intelligimus existentiae nomine. Ergo nihil præterea requiritur, ad hoc ut existens dici possit.

Prob. ant. Existentiae nomine in rebus creatis intelligimus aliquid, per quod eæ desinunt esse nihil, distinguuntur a mere possibilibus, nec in ordine amplius ideali, et in causarum suarum activitate continentur, sed extra causas realitatem physicam obtinere incipiunt; aliquid quod non æternum est, sed temporaneum, quod iis non necessario convenit, sed contingenter, quodque idoneæ causæ efficientiam requirit. Profecto ubi hæc omnia habentur, ibi existentiam

agnoscunt omnes. Atqui omnia hæc realis essentiae entitati conveniunt, ut manifestum est. Ergo.

* 59. Hinc colliges 1^o Essentiam esse inseparabilem ab existentia, per quam ipsa actu est; videlicet non posse in ordine realitatis alteram manere sine altera.

2^o Nihil existere posse existentia aliena absque existentia propria.

3^o Compositionem ex essentia reali et existentia esse metaphysicam, nempe ex partibus ratione sola distinctis (L. 107), cum fundamento tamen in re (57, 1^o).

* 60. Ex dictis facile refutabis quæ opponi solent.

Opp. I. Si existentia idem est ac essentia, consequitur existentiam finitis quoque entibus esse essentialem. Unde dicendum foret, entia finita necessario existere; quod enim pertinet ad essentiam necessarium est.

Resp. Neg. ant. Non enim existentia est constitutivum intelligibilis essentiae in entibus finitis, sed est ipsa essentia producta. Non est igitur entibus finitis essentielle ut actu sint, nec necessario illa existunt, sed hoc unum necessarium est, ut finita essentia, si producat, sit quædam existentia, et ut existentia omnis sit quædam essentia.

Opp. II. Res creatæ habent esse receptum et participatum: quod vero recipitur, in alio recipitur. Sed hoc in quo esse recipitur, nihil aliud esse potest quam essentiae entitas. Ergo.

Resp. Dist. 1^{am}. part. maj.: Res creatæ habent esse receptum ab aliqua causa, *conc.*; in aliquo subjecto, *subd.*: vere ac physice, *neg.*; metaphorice, quatenus essentia intelligibilis existentiam inter suas notas non continet, *conc.*

Dist. quoque 2^{am}. part. maj.: Quod recipitur, in alio recipitur, i. e. quod recipitur physice, *conc.*; quod recipitur metaphorice, ut supra, *nego.*

Et omissa min., *neg. cons.*

Ex hac distinctione patet, quo sensu res creatæ esse receptum habere dicantur. Quid si quis urgeat: si res creatæ habent esse participatum, aliquid sit oportet quod hoc esse participet; respondebis cum Alexandro Alensi: « non esse

» imaginandum, quod una res sit quæ participat, sicut essentia, et alia quæ participatur, sicut esse; sed quia una et eadem res est realitas modo participato, et per vim alterius, sicut per vim agentis: hæc enim realitas de se non est nisi sub modo possibili; quod autem sit et possit vocari actus, hoc habet per vim agentis (1). »

Opp. III. Quod est indifferens ad alterum, ab illo realiter distinguitur. Sed res contingentes sunt indifferentes ad existendum vel non.

Resp. *Dist. maj.*: Quod est indifferens physice, *trans.*; logice, *nego*. Et *contradist. min.*

Physice indifferens ad aliquid dicimus id, quod in statu physico constitutum potest illud habere et potest non habere. Hoc pacto homo indifferens est ad virtutem vel ad doctrinam. Indifferens vero logice id, quod potest sine altero cogitari, etiamsi non possit esse sine illo. Sic se habet virtus, ex. gr. ad hominem, qui est ejus subjectum.

Jamvero essentia actualis non est physice indifferens ad existentiam, sed logice tantum, quatenus cogitatur præcisione facta ab existentia, vel etiam negatione inclusa existentia, ut quum de essentia cogitamus ut est in potentia (34).

Opp. IV. 1^o Essentia est immutabilis, existentia vero mutabilis: 2^o essentia est æterna, existentia producta. Ergo.

Resp. ad 1^{am}. *Dist. 1^{am} partem.*: Essentia est immutabilis in eo quod essentia talis est, *conc.*; in eo quod physice est, *nego*. Transit enim a non esse ad esse, et potest transire ab esse ad non esse.

Conc. 2^{am} partem. Sed existentia mutabilitas eadem plane est ac mutabilitas essentia in eo quod physice est.

Ad. 2^{am} *Dist. 1^{am} partem.*: In statu intelligibili, quatenus physice nihil est, *conc.*; in statu actuali, *nego*; et *conc. 2^{am} partem.*

(1) In VII Met., text. 22.

ARTICULUS II.

De possibilitate.

61. Possibilitatis notio ex ipsa rerum existentium cognitione crescit. Quidquid enim existit, existendi capax est, prouti existendi capax erat antequam existeret. Hinc intelligimus, non id solum quod actu existit, existendi capacitatem habere, sed alia quoque multa quæ non existunt, ad existendum esse idonea. Sic possibilitatis puræ notionem acquirimus; id enim quod non est, et esse potest, *possibile purum* dicitur. Quum vero de possibilibus cogitamus, ac varias idearum combinationes exsequimur, quædam in his occurrunt, quæ ad existentiam devenire non posse cognoscimus. Et exinde impossibilitatis notio consurgit.

62. Possibilitas porro duplex distingui debet, *intrinseca* et *extrinseca*. Illa dicitur quoque *formalis* et *absoluta*, hæc *causalis* et *relativa*.

Possibilitas intrinseca est *habilitas ad existendum*, orta ex eo quod rei *constitutiva repugnantiam ad invicem non habent*; ut possibilitas statuæ ex auro.

Possibilitas extrinseca est *habilitas ad existendum, procedens ex virtute causæ, quæ idonea sit ad rem producendam*; ut v. gr. possibilitas extrinseca statuæ est ab artifice.

Possibilitas *adaquata* utramque complectitur. Utraque enim requiritur conditio, ut ens venire ad existentiam possit.

Huic duplici possibilitati duplex respondet impossibilitas. Nimirum dicimus intrinsece impossibile id, quod in suis constitutivis contradictionem continet, ut triangulum quadrilaterum. Et hæc intrinseca impossibilitas alia absoluta est, alia hypothetica, ut ex dictis in logica colligitur (L. 407. 405). Extrinsece impossibile est id, ad quod producendum proportionata causa non adest.

63. Possibilitas intrinseca est *absoluta*, ac limites non habet, nisi contradictionem; sed extrinseca *relativa* est: quod enim unius causæ vires superat, alterius non superat: ita quod illi impossibile; huic possibile est. Certe omnia quæ intrinsece possibilia sunt, extrinsecam quoque possibilitatem

habent, si infinita Dei virtus spectetur. Si autem vis causarum creaturarum, quædam nulli causæ creatæ possible sunt, quædam vero aliis possible, aliis impossible, ut patet. Quæ ab aliqua causa creata fieri possunt, *physice possible* dicuntur, quæ a nulla possunt, *physice impossible*: talis est v. gr. creatio ex nihilo.

64. Quum agitur de quibusdam actionibus ab homine ponendis, attendenda est etiam *moralis possibilitas* vel *impossibilitas*. Moraliter possibile, ut jam in logica (L. 407, 5^o; 635) statuimus, est id quod communibus hominum moribus non repugnat; impossibile quod repugnat. Radix autem moralis hujus possibilitatis vel impossibilitatis hoc principio continetur: quod quum ad aliquid agendum difficultas, præsertim magna, superanda est, homo quanquam physica potentia agere possit, agere tamen non solet, nisi bonum aliquod apprehendat, quod ipsum exstimulet ad agendum, et difficultatis pondus sufficienter compenset. Quum igitur difficultas est nulla; imo etiam quum ea levis est, vel absolute vel saltem relative, atque insuper bonum ab actione consequens, quantum satis est ut sufficiens apprehenditur, tunc actio est moraliter possibilis; quia dici nequit in more esse hominum, ut in talibus adjunctis difficultatem non superent. Quum autem difficultas est omnino magna, bonum autem vel exiguum est vel parum apprehenditur, actio est moraliter impossibilis; tunc enim communiter homines agere non solent.

65. Porro si quæras, utrum possit in specie determinari, quænam sint censenda moraliter possible vel impossible, respondeo esse quædam, in quibus exsequendis *communiter* moralis possibilitas vel impossibilitas habetur; sed non ita ut exceptiones omnino desint, aut deesse possint. Nam primo difficultatis gravitas, magna ex parte, crescit vel minuitur ex propensionibus, dispositionibus, apprehensionibus et cæteris adjunctis subjecti: potest igitur fieri, ut difficultas alicui gravis, alteri levis, sit, et e converso. Deinde bonum alicui vel etiam communiter sufficiens, alicui potest esse insufficientes vel e contrario; ac demum difficultas etiam magna,

propter bonum etiam insufficientes, quamquam communiter non superetur, physice tamen superari potest.

66. Igitur quum de multitudine aliqua hominum agitur, poterit cum certitudine determinari, utrum datæ conditiones moralem impossibilitatem constituent vel secus. Si enim in iis conditionibus 1^o hominum propensiones, et cætera adjuncta, ex quibus difficultatis gravitas relativa pendet, sunt communiter eadem, et gravem difficultatem communiter faciunt; 2^o si bona quæ in iis conditionibus homines sibi proponere possunt, communiter non apprehenduntur ut sufficientia; tunc certe communiter difficultas non superatur, adeoque moralis impossibilitas obtinebit. Exemplum vidimus, ubi de testium veracitate æstimanda actum est (L. 628, 5^o; 632, seq.).

Quum vero de singulis agitur individuus, certitudo de morali possibilitate vel impossibilitate, in iisdem conditionibus, erit semper hypothetica (L. 408, 5^o); nempe posito quod individuum et difficultatem sentiat ut communiter sentitur, et de bonis æstimet ut communiter æstimatur, atque ita se gerat ut communiter homines se gerere solent. Utrum autem hypothesis hæc verificetur, hoc fere semper intra probabilitatis limites continebitur (L. 408, 6^o).

ARTICULUS III.

De possiblebus.

67. PROPOSITIO II. *Quod possibile est non est omnino nihil.*

Etenim quod possibile est existentiam acquirere potest, et esse aliquid physice: nihilum autem non potest existentiam acquirere, nec unquam aliquid esse. Præterea possibile concipitur per se, non per negationem realitatis; nihilum autem ex opposito. Insuper res possible et existentes eodem conceptu repræsentantur; at nihilum cum nulla re existente communem conceptum habet. Postremo unum possibile ab alio differt per se, et alterum ab altero sæpe exoritur; nihilum vero a nihilo non differt per se, quanquam restrictivè accipiat (22); sed solum ratione diversarum

realitatum, quarum negationes concipiantur; et non gignitur proprie neque gignit, quia nihil est.

68. Igitur quanquam possibilia physice nihil sint (54), habent tamen suam realitatem objectivam atque esse suum. Realitas possibilium est entitas *metaphysica et abstracta*, videlicet ipsa eorum intelligibilia constitutiva. Hæc autem entitas metaphysica et abstracta quum concipitur, actu est in *statu logico* sive *ideali*, nimirum in intellectu, qui actu illam apprehendit: nec actualitatem habere potest per se; sed vel est concreta in rebus vel concepta in intellectu; ita ut si nullæ res essent, et nullus præterea esset intellectus, realitas quoque illa amplius non esset.

69. PROPOSITIO III. *Possibilia non sunt ea solum, quæ in serie temporum existentiam obtinent.*

Est contra fatalistas et Hobbesium, qui in eo errant, quod intrinsicam possibilitatem cum extrinseca permisceant, et præterea de summa rerum causa pessime sentiant.

1º Possibile est id quod in suis constitutivis idealibus repugnantiam non continet. Jam quis non videt infinita alia, præter ea quæ existentiam in tempore nanciscuntur, repugnantiam nullam continere? Quidquid enim cogites dato tempore existere, infinita alia illi similia in diversis temporis differentiis existere posse concipies. Ita quidquid accidat uni individuo, quidquid agatur ab illo, aliis accidere et ab aliis agi vel eodem tempore vel diverso nullatenus repugnat. Idem dicito de relationibus, quas unum individuum ad alia habet.

2º Perfectionum gradus in entibus finitis, magnitudo quoque corporum certos nullos limites habent; igitur semper poterit concipi aliquid perfectius vel minus perfectum iis quæ sunt, aliquid majoris molis vel minoris. Figurarum item varietas, ut quæ a numero laterum pendet, quemadmodum numerorum series, finem non habet.

3º Impossibile est, omnia quæ intrinsece possibilia sunt, ad existentiam venire. Multa enim possibilia contradictoria sunt, atque adeo contraria; adeoque simul existere non possunt: v. gr. hoc momento possibile est, Petrum

scribere et non scribere, bene valere et ægrotare. Et tamen impossibile est, ut scribat, hoc momento ac simul non scribat, utque bene valeat ac simul ægrotet. Si ergo scribit, si bene valet, sane non transiit ad existentiam statum nec transibit unquam id quod ex æquo possibile erat, Petrus nempe hoc momento non scribens, Petrus hoc momento ægrotans.

70. PROPOSITIO IV. *Possibilia æterna sunt.*

Possibilium realitas duntaxat in intellectu actualitatem sibi propriam nancisci potest (68). Igitur possibilium esse æternum dici poterit, si sit intellectus æternus, qui possibilia omnia semper cognoverit. Atqui intellectus divinus et est æternus, et omnia possibilia semper cognovit. Ergo possibilia in intellectu divino æternitatem habent. Sunt ergo æterna.

ARTICULUS IV.

De possibilitatis origine.

71. Duæ sunt de possibilitate intrinseca sat graves quæstiones. Prima, unde ipsa possibilitas originem ducat; altera de illius realitatis, quæ possibilium propria est (67), fundamento. Nunc de prima.

72. PROPOSITIO V. *Intrinseca possibilitas nec a rerum existentia pendet, nec ab humano intellectu.*

Prima pars vix aliquam exigit declarationem. Quanquam enim mens humana a rebus existentibus possibilium notiones desumat, nihilominus ipsa possibilitas manifeste est ab existentia rerum independens. Non enim ideo res potest esse quia est, sed e contrario ideo est quia potest esse. Ut enim potentia actum antecedit, ita capacitas existenti antecedit existentiam. Revera an re rerum conceptus, antequam illæ existerent, contradictionem includebant? Si includebant, nunquam res illæ potuissent existere; si non includebant, erat profecto possibilitas ante existentiam. Ergo ab hac illa non dependet.

Denique multa sunt possibilia, quæ adhuc non existunt, imo quæ nunquam exstitura sunt (69). Ergo.

73. Altero quoque pars, nisi perperam intelligatur, nullam patitur difficultatem. Ne putes igitur hic negari quod

paulo ante affirmatum est (68); videlicet possibile suam actualitatem nancisci non posse nisi in intellectu; neque, quod in logicæ exordiis statuimus, esse ideas factitias, quas intellectus sibi format, etiam ad arbitrium (L. 22). Non hæc dicimus, sed hoc unum, videlicet ab intellectu minime pendere, ut quædam ideæ inter se habeant, quædam non habeant repugnantiam; ita ut illæ in unum conceptum componi nequeant, hæc vero possint. Hoc autem est plane manifestum: intellectus enim apprehendit utique sociabilitatem vel repugnantiam idearum (L. 51), sed illam non facit; hæc enim pendet ab ipsius ideæ conditione atque elementis. Unde etiam quum ad arbitrium ideas factitias effingit intellectus, huic normæ necessario subjicitur (L. 24).

74. PROPOSITIO VI. *Intrinseca possibilitas admittenda est, quæ nec a potentia nec a voluntate Dei originem ducat.*

Prima opinio a quibusdam scholasticis inducta fuit, altera a Cartesio. Illi cum intrinsicam possibilitatem ab extrinseca non distinguere, totam quæ in rebus est existendi capacitatem a causa repetebant, ita ut aliquid ex eo solum possibile dicerent, quia Deus illud producere potest.

Cartesius vero existimavit, possibilitatem omnem et impossibilitatem libera Dei voluntate determinari, adeo ut aliquid possibile sit, quia Deus sic voluit, impossibile futurum, si aliter voluisset.

75. Refutatur prima opinio.

1^o Si unica ratio cur aliquid possibile habendum sit, hæc est, quia Deus illud producere potest, sane unica ratio, qua aliquid impossibile est, hæc esset, quia Deus illud efficere non potest. Nimirum quædam essent impossibilia, non quia divinæ actionis terminus esse nequeunt, sed quia divina potentia ad illa se extendere nequit. Quod quidem absurdum est, et divinæ omnipotentiae conceptum tollit.

2^o Si hæc sententia vera esset, nullo jure posset aliquid absolute impossibile dici. Præscindendo enim ab intrinseca contradictione, nemo potest probare, Deum aliquid facere non posse.

Quod si dicant, ea quæ Deus facere nequit, cognosci ex contradictione quam includunt, jam ipsi concedunt esse aliquam intrinsicam impossibilitatem, sine ullo ad divinam potentiam respectu; adeoque concedere debent, independentem quoque a divina potentia, ea quæ contradictoria non sunt, esse possibile.

76. Refutatur opinio altera.

1^o Si interna possibilitas a voluntate divina penderet, ab ea quoque penderet quoad rerum cognitionem divinus intellectus: cognitio enim supponit objectum: ante possibilem autem essentialium constitutionem nullum erat objectum intelligibile. Atqui plane repugnat divinum intellectum quoad rerum cognitionem a voluntate pendere: nam potius voluntatis est, ut pendeat ab intellectu, quia nihil volitum quin præcognitum; et præterea quia ad intellectum pertinet, ut voluntatem dirigat juxta sapientiam. Ergo dici nequit, internam possibilitatem a divina voluntate pendere.

2^o Juxta Cartesium idcirco solum quædam possibile non sunt, quia talia illa esse Deus non voluit. Si ergo Deus aliter voluisset, illa essent possibile; nempe existendi haberent capacitatem, adeoque divina virtute effici possent. Atqui hoc plane repugnat.

Nam repugnat terminum divinæ virtutis operantis esse nihilum absolutum; absurdum est enim Deum operari, et operando producere nihilum.

Atqui si dicas Deum efficere posse quæ possibile modo non sunt, dicis terminum divinæ virtutis operantis esse posse nihilum. Quæ enim modo possibile non sunt, elementis constant sibi contradicentibus. Jam quæ contradictoria sunt, se mutuo destruunt, cum non possit alterum illorum existere, nisi altero excluso. Igitur si Deus vellet utrumque simul, nollet simul utrumque, adeoque nihil vellet. Fac v. gr. Deum velle circulum quadratum. Quid vellet in hac hypothesi? Vellet circulum non circulum, et quadratum non quadratum; nimirum nec circulum vellet nec quadratum.

3^o Si Deus posset efficere, ut essent possibile quæ modo

intrinsece impossibilia sunt, posset aliquando efficere, ut non repugnaret amplius Deum non esse, aut Deum destrui; ac propterea semetipsum annihilare posset; ac generatim efficere ut aliquando non repugnaret idem simul esse et non esse. Quo semel posito, non modo certitudo de Dei existentia ac potentia, sed omnis omnino certitudo ruit. Cum enim liberam Dei voluntatem nemo perscrutari valeat, semper ambigendum esset, num forte veritati principii contradictionis aliqua derogatio facta esset. Jam quid amplius ad scepticismum requiras!

77. PROPOSITIO VII. *Intrinseca possibilitas et impossibilitas ex ipsis rerum essentiis emergit.*

Nam possibilitas hæc tota continetur sociabilitate idearum diversas entitates exhibentium. Cur autem quædam ideæ sociabiles existunt? Profecto quia entitates quas ipsæ repræsentant, sunt id quod sunt; si enim aliter se haberent, possent insociabiles esse. Ergo interna possibilitas et impossibilitas ex rerum essentiis dimanat. Ut exemplo utar, unde exsurgit possibilitatis circuli aurei? Sane ex eo quod essentia circuli nihil habet quod excludat esse aureum. E contrario quid est quod facit circuli quadrati repugnantiam? Nihil aliud quam hoc, quod circulus est circulus, et quadratum est quadratum.

78. COROLLARIA. 1^m *Possibilitas intrinseca immutabilis est.* Nam cum essentiæ sint immutabiles (51), earum quoque relationes inter se immutabiles sint oportet.

2^m *Est æterna*, quia nempe essentiæ sunt æternæ (53).

3^m *Est necessaria.* Nam non pendet a rebus contingentibus (72), nec a libera creatoris voluntate.

4^m *Est incrementi ac decrementi incapax.* Ad hoc enim ut incrementum acciperet, necesse foret aliquam novam essentiam exsurgere (77); id quod fieri nequit cum essentiæ sint æternæ. Ut vero decrementum subiret, necesse esset ut aliqua essentia mutaretur; id quod pariter impossibile est (50, 51).

79. Obijciunt I. 1^o Possibile est quod potest existere. Sed nihil potest existere, nisi per divinam potentiam. Ergo nihil est possibile, nisi per divinam potentiam.

Revera 2^o si fingas Deum omnipotentem non esse, tollitur omnis possibilitas. Ergo.

Resp. ad 1^m *Conc. maj. et dist. min.*: Quatenus divina potentia est radix possibilitatis extrinsecæ, *conc.*; intrinsecæ, *nego.*

Dist. cons.: Nihil est possibile nisi per divinam potentiam, possibilitate nimirum extrinseca, *conc.*; intrinseca, *nego.*

Ad 2^m *Dist.*: Tollitur possibilitas extrinseca, *conc.*; intrinseca, *nego.*

Inst. Tollitur quoque possibilitas intrinseca, si fingas Deum non existere.

Resp. *Dist.*: Tollitur, quia essentia divina fundamentum est omnis intelligibilitatis, adeoque et intrinsecæ possibilitatis, ut mox videbimus, *conc.*; quia tale fundamentum est omnipotentia, *nego.*

80. Obj. II. 1^o Voluntas omnipotens potest omnia facere. Ergo potest etiam facere, ut impossibilia sint possibilia.

2^o Secus omnipotentia limitibus coarctaretur.

3^o Ut statuatur quid Deus possit facere, quid non possit, totam divinæ potentiæ amplitudinem perspectam habere oporteret. Sed hæc infinite superat mentis humanæ captum. Ergo.

Resp. Ad 1^m *Dist.*: Potest omnia facere quæ potest velle, et quæ possunt fieri, *conc.*; quæ non potest velle, et quæ non possunt fieri, *neg.*; et *neg. cons.* (76, 2^o).

Ad 2^m *Nego.* Impossibile enim non est aliquid, sed plane nihil. Nullis autem limitibus circumscribitur divina potentia, quum dicimus ipsam non posse facere nihilum; quia non nihilum, sed ens actionis terminus esse potest. Potentia porro divina se extendit ad omnia, quæ entis rationem habent, et in hoc nullis limitibus continetur.

Ad 3^m *Dist.*: Si positive et singillatim id statuendum esset, *conc.*; si negative et universim, *nego.* Eodem modo *dist. min.* An opus est ut immensurabilem potentiam mensuremus, ad hoc ut statuamus universim, Deum facere non posse quod prorsus nihil est?

81. Inst. Si ita est, voluntas Dei ab instrinseco possibilitate

dependens est. Sed hoc dicere nefas. Deus enim nequit esse dependens a norma sibi extrinseca.

Resp. *Dist. maj.*: Tanquam a norma sibi intrinseca, *conc.*; extrinseca sibi, *nego*. *Contradist. min.*, et *conc. rat. add.* Omnis possibilitas fundatur in divina essentia, prouti ab intellectu divino comprehenditur, uti mox declarabimus. Non est ergo norma Deo extrinseca.

ARTICULUS V.

* Unde sit possibilitium intelligibilitas.

82. Quæritur nunc unde possibilitia, quæ æternæ cognitionis terminus existunt (70), æternam suam habeant intelligibilitatem: videlicet utrum in hoc ipso quod metaphysicam quamdam atque intelligibilem realitatem habent (68), sint a Deo independentia, an secus. Quæstioni satis facit sequens

PROPOSITIO VIII. *Omnis possibilitium intelligibilitas a divina essentia dependet, quatenus hæc divini intellectus objectum est.*

83. Duo præmittenda ad assertionis intelligentiam.

1° Deum possibilitia non cognoscere abstrahendo unum conceptum ab alio, aut plures conceptus componendo, aut aliud ex alio concludendo: Dei enim cognitio nec successiva est nec perfectibilis. Cognoscit igitur possibilitia per simplicem intelligentiam, qua rerum omnium essentias perfectissime comprehendit. Deus enim, qui rerum essentias comprehendit, intelligit (L. 48.), cognoscit quæcunque iis accidere possunt, omnes videlicet perfectionis gradus, omnesque determinationes ac relationes, quarum unaquæque essentia capax est. His autem omnia possibilitia continentur.

2° Quomodo autem uniuscujusque rei essentiam intelligat Deus, clarissime explicat S. Thomas (1), inquit: « Deus » essentiam suam perfecte cognoscit: unde cognoscit eam » secundum omnem modum, quo cognoscibilis est. Potest » autem cognosci non solum secundum quod in se est, sed » secundum quod est participabilis secundum aliquem modum similitudinis a creaturis. Unaquæque autem creatura

(1) *Summa theol.*, 1. p. q. XV, a. II. Cf. quoque in eadem 1. p. q. XIV, a. VI.

» habet propriam speciem (i. e. notas intelligibiles quibus » exhibetur ejus essentia) secundum quod aliquo modo participat divinæ essentiæ similitudinem. Sic igitur in quantum Deus cognoscit suam essentiam, ut sic imitabilem a » tali creatura, cognoscit eam ut propriam rationem (i. e. » essentiam intelligibilem), et ideam (i. e. exemplar) hujus » creaturæ; et similiter de aliis. » Ita s. doctor. Et hæc exemplares rerum omnium ideæ sunt universalis illa Platonis (L. 533) extra res posita, non in statu reali sed intelligibili, quæ sublimioribus omnibus intelligentiis mirifice semper placuerunt.

Divina igitur essentia, variis innumerisque modis imitabilis per creaturas, divino intellectui eam perfecte comprehendenti, omnes rerum essentias in intelligibili statu proponit et explicat. In his autem ideis divinus intellectus omnia possibilitia cognoscit (1).

84. Probatur propositio :

1° Ex adductis S. Thomæ verbis. Deus enim omnis possibilis essentiæ perfectionem in sua essentia perfectissimam certe præcontinet. Cum ergo seipsum perfecto cognoscat, cognoscere quoque debet omnes modos, secundum quos ejus essentia infinita per finitas quascunque essentias imitabilis est. Ergo essentiæ omnes finitæ intelligibilitatem habent, respectu Dei, ex divina essentia, prouti hæc intellectui obijciuntur.

2° Neque aliunde eam accipere possunt. Nam omnis realitas metaphysica et abstracta actualitatem habere nequit, nisi vel physicam in rebus existentibus, vel logicam in intellectu (68). Actualitatem porro logicam habere non potest, nisi prius aliquo modo physicam actualitatem habeat. Etenim logicam actualitatem habere nequit, nisi in intellectu. Sed intellectus supponit objectum; non enim facit id quod intelligit, sed reperit ac deprehendit. Porro intellectus realitatem metaphysicam et abstractam in seipsa deprehendere nequit; quia hæc in se ipsa actualitatem non habet. Ergo

(1) Hæc quæ de divina scientia hoc loco attigimus, melius intelligentur a tyronibus, quum in theologia fusius pertractabuntur.

oportet ut illam reperiat in aliqua re physica, in qua sit aliquo modo, et physicam actualitatem habeat.

Igitur omnis realitas metaphysica et abstracta, antequam actualitatem logicam in intellectu aliquo sortiatur, aliquam essentiam realem, tanquam sui fundamentum, supponit. Possibilia autem actualitatem logicam æternam in divino habent intellectu (70). Ergo eorum intelligibilitas ab aliqua physica essentia eaque æterna procedat necesse est. Talis autem essentia nulla est, præter divinam. Ergo.

3^o Ex absurdo. Si enim possibilem intelligibilitas a Deo esset independens, divinus intellectus, quum illa cognoscit, perficeretur, et quasi complementum acciperet a realitate sibi extranea, immutabili, æterna et quæ ab ipso nullo modo dependet; quæque, quod magis mirandum, nullam habet actualitatem. Quæ quidem omnia plane absona sunt.

85. Concludam pulcherrimis hisce Lessii verbis, quæ hac de re disputantibus semper ob oculos esse debent. « Omnia » possibilia continentur *in essentia* divina, tanquam in *originali radice*, et quasi *in exemplari virtuali et radicali*; *in sapientia* tanquam *in exemplari formali*, in quo etiam existunt objective modo perfectissimo et illustrissimo; magis enim ibi fulgent, quam in suis naturis creatis; *in potentia*, » tanquam *in causa effectrice* (1). »

Animadvertite igitur diverso plane modo possibilia esse in essentia divina et in intellectu. In essentia non sunt tanquam in exemplari formali; secus divina essentia rerum omnium formas in se vere præferret, essetque v. gr. vere animal, vere arbor; id quod horribile cogitatu est, et Deum monstrum facit. Sunt ergo possibilia in divina essentia tanquam in exemplari virtuali et radicali; quia divina essentia simplicissima et perfectissima imitabilis est pluribus modis, licet imperfectis et ab ejus perfectione toto genere diversis; hi autem diversi imitationis modi essentias posibles constituunt. Sunt vero essentiæ istæ posibles tanquam in exemplari formali, in divino solum intellectu, quatenus divinus intellectus diversos istos imitationis modos cognoscit; nam

(1) *De perfect. moribusque div.*, lib. V, c. II, § 10.

ex hac cognitione fit ut intelligibiles rerum essentiæ, quatenus divinæ cognitionis termini existunt, archetypas rerum ideas constituent.

86. COROLLARIA. 1^m In absurda hypothesi Dei non existentis nihil esset possibile, quia nihil intelligibile esset. Sed nihil ex æquo esset impossibile. Nam contradictio est inter ens et non-ens. Sublatis autem omnibus intelligibilibus, ens nullum esset intelligibile, adeoque non-ens nullum haberet oppositum.

2^m Omnis necessitas, immutabilitas et æternitas, quam rerum possibilitas præ se fert, a necessitate, immutabilitate, et æternitate divinæ essentiæ promanat.

3^m Esse objectivum possibilem, si hæc spectentur respectu humani intellectus, in ipsis rebus existentibus earumque proprietatibus fundamentum *immediate* habet (61). Sed quoniam res omnes ex quibus possibilem cognitionem accipimus, sunt quædam divinæ essentiæ assimilationes et imitationes (83, 2^o); hinc *mediate* et *remote* esse objectivum possibilem, etiam quoad nos, in divina essentia fundamentum habet.

4^m Noster intellectus, quum res sive existentes sive posibles apprehendit, ideas Dei archetypas contemplatur; non quidem in seipsis, nec per radios, ut ita dicam, directos, sed per radios reflexos; nempe in rebus creatis, quæ summi opificis ideas in se referunt, quantum nempe exemplar perfectissimum, ex iis quæ juxta illud facta sunt, utcunque cognosci potest.

ARTICULUS VI.

Difficultates.

87. Obj. 1. De possibilitate cogitare possumus omnino præscindentes ab essentia et intellectu divino. Ergo illan on pendet ab essentia et intellectu divino.

Resp. *Dist. ant.* : Si de possibilitate cogitemus et non de ejusdem natura, *conc.*; si simul cogitemus de ejusdem natura, *nego*. Etiam si duo sint arctissime connexa, possumus tamen de uno absolute cogitare, quin de altero cogitemus; ut quum

v. gr. de statua cogitamus ignorantes sculptorem, aut de creaturis, quin de creatore cogitemus. Hoc autem solum ostendit alterum connexorum posse aliter cognosci quam per relationem, quam habet ad alterum; non vero alterum cum altero connexum non esse, aut ejusmodi connexionem, ratiocinando saltem, cognosci non posse. Talia sunt possibilia, quæ a nobis cognoscuntur non in ideis Dei archetypis, sed in rebus existentibus: et nihilominus eorum intelligibilitas a divina essentia ultimato dimanare ratiocinando deprehenditur.

Unde *dist. cons.*: Possibilitas non pendet ab essentia et intellectu divino, in se et ultimo, *nego*; quoad cognitionem nostram, *subd.*: immediate, *conc.*; mediate, *nego* (86, 3°).

88. Obj. II. In hac sententia 1° essentia divina contineret essentias omnes, vel saltem 2° res omnes, quum fiunt existentes, e divina educerentur essentia. Nam quum res fiunt existentes, possibilia ipsa existentiam acquirunt: possibilia autem sunt in divina essentia. Jam hæc omnia absurda sunt. Ergo.

Resp. ad. 1^m *Dist.*: Realiter, *neg.*; tanquam exemplar, *subd.*: tanquam exemplar virtuale et radicale, *conc.*; formale, *nego*. Formale enim rerum exemplar continetur ideis divini intellectus; nec profecto iis continetur secundum realitatem, ut ita dicam, subjectivam idearum ipsarum, quæ realitas idem est ac divina essentia, sed secundum terminum quem ideæ repræsentant (85).

Ad 2^m *Dist.*: Quatenus creantur in similitudinem divinæ essentiæ cognitæ ab intellectu, ut est imitabilis extra se, *conc.*; quatenus aliquid rerum ex divina ipsa essentia educeretur, *nego*.

Ad rat. add. *Dist. maj.*: Hoc sensu quod res fiant ad instar possibilibus, *conc.*; quod possibilitas ipsa sit quasi materia ex qua res formantur, *nego*.

89. Obj. III. Saltem ex hac sententia hæc duo consequuntur: 1° Deum cognoscere per abstractionem: 2° esse in Deo plures ideas. Sed primum Dei perfectioni, alterum simplicitati adversatur. Ergo.

Resp. ad 1^m. *Nego.*: Non enim per abstractionem rationum diversarum ab essentia sua Deus possibilia cognoscit, sed per essentiæ suæ perfectissimam comprehensionem, qua fit ut non solum eam cognoscat ut est in se, sed etiam secundum quod participabilis est per plures ac diversas sui similitudines (83, 2°).

Ad 2^m. *Dist. maj.*: Plures ideas, nempe plures perceptiones et modificationes, *neg.*; nempe plures terminos unius ac simplicissimæ cognitionis, *conc.* Et *contrad. min.* Nam una ac simplicissima cognitione, quæ realiter est ipsa essentia divina, Deus et se et possibilibus omnium rationes cognoscit.

90. Obj. IV. Intelligibilitas rerum non promanat a cognitione. Ergo possibilia non pendent a divino intellectu.

Resp. *Dist. ant.*: Intelligibilitas divinæ essentiæ, *conc.*; intelligibilitas possibilibus, *subd.*: respectu Dei, *conc.*; respectu mentium finitarum, *subd.*: proxime, *conc.*; remote, *nego*. Mens enim divina constituit intellectione sua in statu ideali exemplaria rerum formalia; hæc autem nobis intelligibilia sunt in rebus, quæ creatæ sunt ad eorum exemplarium similitudinem (86, 3°).

Dist. cons.: Possibilia non pendent ab essentia divina, ut est objectum intellectus; nempe quatenus in essentia virtualiter continentur, *conc.*; in suo esse formali, *nego*.

CAPUT IV.

DE UNITATE ENTIIUM.

ARTICULUS I.

De unitatis conceptu.

91. Agendum nunc de communibus entis affectionibus, quæ videlicet enti per se ac proprie conveniunt, non ita tamen ut ex rei natura ab ipso distinguantur. Sunt enim in re ipsum ens, sed sub diverso respectu a ratione consideratum. Hæ autem affectiones sunt tres: *unitas, veritas, bonitas*. Et quoniam oppositorum eadem est scientia, de oppositis quoque notionibus erit dicendum, quæ sunt *multitudo, falsitas, malum*. Primo de unitate.

92. Unum definitur : *quod est indivisum in se*. Quare unitas neque est aliquid ab ente distinctum, neque aliquid positivi addit enti, sed solummodo notat negationem divisionis in ipsomet ente : quum enim divisio in ente concipitur, unius entis conceptus tollitur, eique succedit notio opposita *multitudinis*. Non tamen sola negatio divisionis unitatem facit, sed ratio entis indivisa.

93. Quidam opinati sunt in conceptu unitatis includi præterea divisionem seu distinctionem a quolibet alio, censueruntque unum definiendum esse : *quod est indivisum in se et divisum a quolibet alio*. Verum in primis non est hoc ita intelligendum, ut unitatis conceptus realem ab aliis entibus existentibus distinctionem includat. Etenim cum hæc realis distinctio multitudinem supponat, jam conceptus unitatis a multitudine penderet; id quod dici nequit; potius enim multitudinis conceptus unitatis conceptum supponit, ut infra dicemus, ac satis per se patet. Deinde antequam mundus esset, Deus erat perfecte unus, et perfecte unus esset, etiamsi cuncta in interitum ruerent. Ergo unitas realem ab aliis entibus distinctionem non includit, sed solummodo per accidens hæc illi convenit.

Quod si divisio ab aliis intelligatur per modum negationis, ut omne quod unum est, non sit aliud neque existens neque possibile, hoc certe omni enti convenit; nullum enim ens potest esse aliud a se; nihilominus neque hoc in unitatis conceptu continetur, sed potius ab unitatis conceptu necessario consequitur.

Igitur unum est quod est indivisum in se: si addas: divisum ab aliis, alium habebis conceptum, nempe *unum ex multis, unum indeterminatum*, qui conceptus voce *aliquid* exprimitur.

94. Propria hæc unius ratio valde differt ab alia hujus vocis significatione quam intendimus quando unum vocamus quod unicum est, ut quum dicimus unum Deum unamve Ecclesiam. Est porro *unicum* quod ita est unum, ut in aliqua ratione cum nullo alio similitudinem habeat. Unde unitas est *negatio consortis in aliquo genere*, neque est, ut patet, communis entis affectio.

95. Indivisio entis in se unitatem constituit *transcendentalem*, quæ et omnem unitatis rationem sub se complectitur, et omnia prorsus enti convenit: quæ tamen diversos habet gradus, prouti magis minusve ens divisionem a se arcet.

1^o Unitas perfectissima ea est quam dicunt *indivisibilitatis*, qua unitate ea distinguuntur entia, quæ non modo actu divisa non sunt, sed nec dividi in plures partes possunt. Hujusmodi sunt entia simplicia, ut est animæ humanæ substantia, actus item affirmandi, eligendi et similes. In hos porro actus dum reflectimus, unitatis hujus notionem adipsimus.

2^o Unitas huic succedit *compositionis*, quæ prodit ex conjunctione plurium, quæ ad unum compositum constituendum natura ipsa ordinantur. Talia sunt v. gr. corpora omnia.

3^o Proxima est unitas *artificialis*, ex iis constans quæ physice inter se non copulantur, nec ad talem unionem natura ordinantur, habent tamen ordinem aliquam nexumque inter se. Hujusmodi unitas est v. gr. in domo, vestimento, horologio et in toto morali (L. 109).

4^o Unitas infima est quæ dicitur *aggregationes*, quæ habetur quum plura entia, nulla physica unitione nulloque inter se ordine conjuncta, solummodo contigua sunt, quia temere congesta. Sic unus est lapidum acervus.

96. Unitas porro indivisibilitatis atque compositionis facit ens unum *per se*; unitas vero artificialis et aggregationis unum *per accidens*. Unum per se dicitur *ens simpliciter*, unum per accidens *ens secundum quid*; magis enim est entium multitudo, quam ens.

97. Hæc sufficiunt, ut demonstrari possit *unumquodque ens esse unum*. Nam unumquodque ens vel est simplex vel compositum. Si est simplex, non modo est indivisum sed etiam indivisibile (95, 1^o). Si est compositum, hoc ipso indivisum est; si enim sit divisum, non erit amplius compositum, non erit amplius ens ullo modo, sed entia.

ARTICULUS II.

De conceptu multitudinis.

98. Multa sunt *quæ in aliquo entitatis genere divisionem habent*: unde multitudo est *entium divisio*. Quæ divisio non hoc modo est intelligenda, quod multa sint ea duntaxat, quæ separata sunt et nullo inter se nexu conjuncta, sed ita sane quod multa sint ea, quorum unum non est aliud. Sic v. gr. partes quæ totum constituunt conjunctæ sunt et simul cohærent, et nihilominus sunt multæ partes, quia una pars non est altera,

* 99. Quæri potest, et attentione digna quæstio est, quid prius mens cognoscat, an unitatem, an vero multitudinem. Nam certe multitudo ex unitatibus constat, sed contra divisio ante divisionis privationem cognosci debet. Cum igitur unitas divisionis privatione contineatur, et multitudo divisione constet, multitudo ante unitatem cognosci debere videtur.

Respondendum cum S. Thoma, natura sua et in ordine realitatis prius esse unum quam multa, et indivisionem divisione; sed secundum apprehensionem nostram divisionis quidem conceptum antecedere conceptus indivisionis et unitatis; unitatem nihilominus cognosci ante multitudinem. « Oportet, ita ipse, quod divisio sit prius unitate, non simpliciter, sed secundum rationem nostræ apprehensionis. Apprehendimus enim simplicia per composita. » Unde definimus punctum, *cujus pars non est*, vel *principium lineæ*. Sed multitudo, etiam secundum rationem, consequenter se habet ad unum: quia divisa non intelligimus habere rationem multitudinis, nisi per hoc quod utrique divisorum attribuiamus unitatem: unde unum ponitur in definitione unius. Sed divisio cadit in intellectu ex ipsa negatione entis, ita quod primo cadit in intellectu *ens*, secundo quod hoc ens non est illud ens, et sic secundo apprehendimus *divisionem*, tertio *unum*, quarto *multitudinem* (1). »

(1) *Sum. Th.*, p. I, q. XI, art. II, ad 4.

100. Hæc nunc facile intelliges.

1^o Eadem res potest esse secundum aliquam rationem una, secundum aliam multa. Sic spectata rei essentia, res est una; spectatis partibus essentialibus vel integralibus, sunt in re multa. Itemque universale unum est actu, multa in potentia etc.

2^o Quod est unum per se, est unum simpliciter (96), et potest esse multa secundum quid; ut homo qui est unus essentia, et multa secundum partes essentiae vel secundum potentias. Quod vero est unum per accidens, est multa simpliciter et unum secundum quid; ut familia quæ simpliciter est multitudo, connexionem vero morali multorum una est.

3^o Hinc intelligitur quomodo ens dividi dicatur in unum et multa. Nempe, ut docet S. Thomas (1), *quasi per unum simpliciter, et multa secundum quid*. Ita igitur ens dividitur in unum et multa, ut unius nomine intelligatur quod est vere unum, adeoque *ens simpliciter* (96), et nomine multorum, quæ sunt unum per accidens, adeoque *ens secundum quid*. Nam quatenus multa sunt multa, et nullo modo unum, non sunt ens sed entia, adeoque sub ente contineri non possunt. Patet itaque divisionem entis in unum et multa recidere in divisionem ipsius entis in unum per se, et unum per accidens. Idcirco divisio illa non officit, quominus omne ens unum sit uno modo vel altero.

4^o Intelligitur etiam quomodo unum et multa opponantur.

a) Ratio unius simpliciter et unius secundum quid opponuntur tanquam perfectum et imperfectum. Quod enim est unum secundum quid, est imperfectum in ratione unitatis (96, 95).

b) Unum simpliciter et multa simpliciter opponuntur ad modum privationis, ut indivisum diviso. Idem dicendum de uno secundum quid, et de multis secundum quid.

ARTICULUS III.

De numero.

101. Quum mens multitudinem percipit et in unum col-

(1) *Sum. Th.*, p. I, q. XI, art. I ad 2.

ligit, ideam numeri efformat; numerus enim est *collectio unitatum*. Elementa porro quibus numeri idea constat, hæc tria sunt: 1° *unitas*; nam unitatum aggregatio intelligi nequit, nisi idea præcedat unitatis: 2° *divisio*; etenim ea solum quæ aliquo modo divisa sunt ab invicem, multa sunt (98): 3° *similitudo* aliqua seu *unitas logica* (L. 543, 527) multorum, vel secundum aliquam rationem determinatam, vel saltem secundum indeterminatam entis rationem; sine hac enim similitudine unitates non possent in unum colligi. Quum similitudo determinata consideratur, numerus appellari solet *concretus*, ut *duo homines, tres equi*: quum indeterminata est similitudo, nempe quum plura considerantur sub transcendenti notione *entis* et *rei*, numerus *abstractus* nuncupatur.

* 102. Quum igitur collective percipimus unum et alterum, sed unum quoad aliquid alteri simile, hæc collectiva perceptio ideam præbet numeri *duo*. Hoc pacto *tria* et *quatuor* simul percipimus, si vis menti suppetat ad hæc plura simul et distincte complectenda. Quum vis hæc deficit (deficit autem ut plurimum ubi ad *quinque* vel *sex* perventum fuerit) multitudinem in numeros jam notos dividimus, et ex horum additione altiores numeros concipimus, conceptosque signis commendamus. Sine signis enim nec valde numerando progredi, nec numerorum relationes cognoscere liceret. Hoc pacto v. gr. quinque concipimus ut quatuor plus unum, sex ut quinque plus unum, et ita de cæteris (1).

* 103. Ex his deduces 1° Numerum esse in rebus tanquam in sui fundamento, nempe quatenus res sunt numerabiles. Res enim sunt numerabiles, quatenus altera ab altera distinguitur, et altera alteri similis est: quæ quidem duo res ex se habent. Sed illa unitas collectionis, qua numeri conceptus absolvitur, extrinseca est rebus, et a mente prodit, quum plura collectim et sub similitudine, quam præ se ferunt, percipit.

2° Numerum a sensu non percipi. Quanquam enim suo modo sensus quæ plura sunt percipere possit, nequit tamen

(1) Cl. Balmes. *Fil. fund*, lib. VI, c. V, seq.

ideis unitatis, distinctionis, similitudinis informari; est enim illarum plane incapax.

3° Numerandi actum, quo determinata rerum multitudo cognoscitur, contineri simultanea vel successiva (98) perceptione plurium, eorumque comparatione et commensuratione cum idea, qua id exprimitur in quo singula conveniunt inter se. Hinc numerus definitur: *multitudo mensurata per unum*, ac proinde: *multitudo determinata*. Unum hoc est illa entis ratio, in qua res numeratæ conveniunt.

4° Unitatem mathematicam, nempe unitatem ut elementum numeri est, addere aliquid unitatis transcendentalis conceptui; nempe quod sit unitas in genere quantitas. Cujus peculiaris unitatis ratio in hoc esse videtur, quod ens indivisum, adeoque unum, sit præterea pars extensionis vel physicae vel logicae (L. 14, 45, 2°), quæ per analogiam extensionis appellatur.

5° Hinc sequitur, numerum concretum (101), quum oritur ex divisione quantitatis continuæ, quæ est extensio physica, proprie vocari quantitatem discretam (divisam); numerum vero qui resultat ex unitatibus quæ sint partes subjectivæ totius logici (L. 45, 2°), ita appellari solum analogice; numerum denique abstractum (101) quantitatem dici adhuc magis improprie; proprie esse numerum transcendentem. Nota tamen, veteres transcendentem appellasse numerum omnem, qui quantitas proprie dicta non esset.

6° Omnem multitudinem actualem, quoniam secundum aliquam unitatem multitudo est, sub aliquo numero contineri.

ARTICULUS IV.

Quotuplex sit unitas in rebus.

104. Statuendum in primis, aliam esse unitatem quæ convenit rebus ex se et ante omnem intellectus operationem, aliam quæ iisdem tribuitur, ut quibusdam intellectus operationibus subsunt. Illa *realis* unitas est, hæc *rationis*, quæ universalium propria est, nec extra mentem invenitur in rebus, sed fit ratione per cognitionem abstractivam et comparati-

vam, ut in logica declaravimus (L. 538); ac definiri potest: *unitas conceptus repræsentantis naturam plurium*. Adverte porro unitatem hanc esse et dici unitatem rationis comparate ad res quibus est extrinseca; sed si spectetur ipse conceptus in se, habet ipse unitatem sibi intrinsecam ac realem, ut patet.

103. Unitas realis iterum vel est unitas in genere quantitatis, unitas nempe *mathematica*, de qua paulo ante dictum est (103, 4°), vel *transcendens*, et omnibus rebus conveniens. Et hæc est alia *individualis*, alia *formalis*. Utrum aut quomodo hæc differant inter se, mox videbimus.

1° Unitas individualis, quæ et physica et numerica latiore saltem sensu appellari solet, est in hoc, quod individuum secundum eam entis rationem qua unum dicitur, non sit communicabile multis, tanquam inferioribus (L. 33).

Unde individuum definitur: *id quod in plura talia, quale ipsum est, dividi nequit*. Per hoc individui unitas universalium unitati opponitur: natura enim universalis communicabilis est pluribus, et dividitur in plura, quæ talia sunt qualis est ipsa. V. gr. hic conceptus *homo*, est multis hominibus communis, in quorum singulis tota hominis ratio reperitur: non ita individuum, quod potest utique dividi in partes essentialiter aut integrales, non vero in partes subjectivas.

2° Unitas formalis seu essentialis est *indivisio ipsius essentialis*, nempe in plures essentialiter. Prædicata enim essentialia rei determinatæ, hoc ipso quod illius rei essentialiter constituent, unam constituunt essentialiter non plures. Sic essentia hominis v. gr. ex suis constitutivis una resultat, non plures.

* 106. PROPOSITIO I. *Omne ens quod existit vel existere potest, est singulare.*

Hoc est jam demonstratum in logica, ubi universalia separata et universalia a parte rei rejecimus (L. 531-535). Si quid enim existeret, quod singulare non esset, hoc in plura talia, quale ipsum est, realiter divisum foret (103, 1°); videlicet esset realiter universale. Si ergo repugnat, aliquid esse realiter universale, repugnat quoque, aliquid singulare non esse.

PROPOSITIO II. *Est in rebus omnibus unitas formalis.*

Assertio hæc vix declaratione eget. Est enim manifestum, omne individuum non solum esse unum numero, sed unum etiam secundum essentialiter.

Quemadmodum autem unitatem individualement unumquodque habet, non ex mentis operatione, sed reipsa, ita et unitatem essentialiter. Vere enim unam habet essentialiter, non plures.

* PROPOSITIO III. *Unitas formalis ab individuali distinguitur, non tamen realiter, sed solum ratione.*

Prima pars theorematum patet ex eo, quod essentia intelligi potest præcisione facta ab unitate individuali; sed intelligi nequit quin in illa formalis unitas se prodat. Imo essentia, etiam quum cogitatur ut universalis, formalem unitatem retinet; quanquam unitati individuali sit eo modo opposita. Ergo unitas formalis ab individuali, saltem conceptu mentis, distinguitur.

Non tamen distinguitur realiter et ex rei natura. Etenim essentia omnis ex rei natura non est realis nisi in individuis. Ergo realem unitatem formalem non habet nisi in unitate individuali. Porro essentia rei individua est rei ipsi intrinseca et essentialiter. Ergo et unitas formalis essentialiter hujus est illi essentialiter intrinseca. Sed quod intrinsecum est essentialiter rei individua, ab ipsa realiter non distinguitur. Ergo unitas formalis essentialiter non distinguitur reipsa ab ejusdem unitate individuali.

* 107. COROLLARIA. 1° Formalis naturæ unitas multiplicatur, prouti multiplicantur individua. Etenim natura nulla est realiter una in pluribus; sed multiplicatur naturæ pro numero individuorum. Ergo et unitas formalis, quæ naturæ realis intrinseca proprietas est, cum natura reali multiplicatur.

2° Hinc individua quæ ejusdem naturæ esse dicuntur, non habent unam et eandem unitatem formalem omnibus communem, nec habere possunt; sed per mentis operationem qua natura universalis concipitur, eorum unitates formales in unam coalescunt.

3^o Individua certæ speciei per suas unitates formales similia sunt, ac per hoc fundamentum præbent conceptui mentis, quo natura formaliter una, omnibus communis apprehenditur.

ARTICULUS V.

* *De principio individuationis.*

108. Vocant individuationis principium id, quod facit ut individua similis naturæ inter se realiter distinguantur. Debet enim esse aliquid in ipsis individuis, per quod unumquodque non est multiplicabile, et unum non est alterum, quanquam unum alteri natura simile sit.

109. Opinio fuit Aristotelis (1), quem S. Thomas (2) ejusque schola secuti sunt, individuationis principium esse materiam, ut aiebant, *signatam*, nempe materiam, ut quantitati subjicitur. Ex quo concludebant in substantiis immaterialibus essentiam ab individuo non distingui, ac propterea tot esse earum species quot individua (3).

Quamvis S. Thomæ auctoritas magni semper facienda sit, nihilominus verum est quod de opinione hac scribit Suarez (4): « Fundamentum hujus sententiæ, si rationem spectemus, fere nullum invenio, quod ad Aristotelis auctoritatem non revocetur. » Non est itaque cur in ea nominatim refutanda immoremur. Adi, si placet, citatum auctorem, qui eam solide refellit, ostendens neque generatim neque in ipsis rebus corporeis individuationis principium materiam eo sensu dici posse (5). Multo minus in præsentī hoc dici potest a nobis, qui aristotelicum materiæ primæ conceptum rejecimus.

110. PROPOSITIO IV. *Id quod naturam individuum constituit, non est aliquid re distinctum a natura quæ fit individua.*

Etenim si id quod naturam individuum facit, re ab illa

(1) V. *Met.* c. VI, text. 42 et alibi.

(2) Cf. *Summ. theol.*, p. I, q. III, art. III et alibi.

(3) Arist. VII *Met.* c. XI, text. 41.— S. Th. I, c. et alibi.

(4) *Disp. Met.* V. Sect. III, § IV.

(5) *Ibid.* § V. Cf. etiam sect. II, § 23 seq.

distinguitur, jam natura ipsa ab hac individuali differentia re præcisa constat. Hæc porro natura ita præcisa vel singularis est vel universalis. Si singularis dicatur, natura dicitur individua ante adjectam differentiam individualementem. Si universalis, habebimus universale a parte rei, id quod ex dictis repugnans est.

111. PROPOSITIO V. *Natura omnis individua per suam ipsam realitatem individua est.*

Id sequitur immediate ex propositione præcedenti. Si enim fundamentum unitatis individualis non est aliquid re distinctum a natura quæ individua denominatur, sane hoc fundamentum vel nullum est, vel est ipsa naturæ individua realitas.

Præterea unaquæque res est una numero per illud ipsum formale atque intrinsecum principium, per quod est ens actu, atque in physico rerum ordine constat. Etenim nullum ens actu est aut esse potest, nisi quatenus unum numero ac singulare est (106). Jam omnis res per suam ipsam realitatem est ens actu (58). Per eandem igitur una numero ac singularis efficitur.

112. COROLLARIA. 1^o Essentia seu natura communis in individuis non re sed solum ratione a differentia individuali distinguitur. Differentia enim individualis est id per quod natura fit individua; hoc autem a natura individua non differt.

2^o Hinc differentia individualis essentialis est individuo, licet speciei, ut abstracte concipitur, accidentalis sit. Id enim quod intrinsece hoc vel illud individuum constituit, et sine quo ipsum neque esse neque concipi potest, profecto est illi essentielle.

3^o Consequitur, essentias individuorum, etiamsi sub eadem specie contineantur, pro differentia individualis diversitate diversas esse. Quapropter si prout in se sunt a nobis conciperentur, diversis plus vel minus, saltem ut plurimum, exhiberentur conceptibus (1). Cæterum differentia individuales, ut in se sunt, sub cognitionem nostram non cadunt; sed

(1) Cf. Suarez *Disp. Met.* V, sect. II, § 35.

eas solummodo cognoscimus per externa quædam indicia (L. 34).

4^o Mens humana, juxta proprium cognoscendi modum, attingit in individuis ea solum quibus essentia constituitur, præcisione facta a modo quem in singulis hæc constitutiva obvenit, qui modus differentia est individualis (1^o, L. 538). Hinc quoniam individua multa quoad hæc constitutiva plane similia sunt, specierum ac generum notiones emergunt, in ipsis rebus fundamentum habentes (L. 539). Hæc ideæ, pro mentis humanæ modulo, archetypas divinæ mentis ideas referunt (86, 4^o, 83).

CAPUT V.

DE VERITATE ENTIIUM.

ARTICULUS I.

Quid sit veritas entium.

113. Veritatem in logica (L. 370) definivimus : *adæquationem intellectus et rei*. Hæc definitio nullatenus mutanda est, quum de rerum veritate quæritur. Quemadmodum enim intellectus veritatem habet per comparisonem ad res, ita res per comparisonem ad intellectum; cum hoc tamen discrimine, quod quum veros dicimus mentis conceptus, res ad intellectum referuntur ut mensura ad mensuratum; quum autem dicimus veras res, res ipsæ rationem habent mensurati et intellectus mensuræ. Veritas enim rerum est in hoc, quod ipsæ alicui intellectus conceptui conformes existant.

114. Hujusmodi vero conceptus vel est exemplar ad cuius similitudinem res effecta est, vel est criterium secundum quod de rei natura fertur iudicium. Hinc res duplici modo veræ dici possunt : 1^o *per se et absolute*; 2^o *per accidens et secundum quid*.

Per se et absolute res veræ sunt per comparisonem ad intellectum illum, a quo dependet earum constitutio; si videlicet archetypas ideas adæquant, ad quarum exemplar conditæ sunt. Sic res omnes naturales veræ sunt comparate ad intellectum divinum; quia æternarum similitudinem

idearum, quæ in mente divina sunt, adamussim assequuntur. Eodem modo res artificiales, quæ a creatis agentibus fiunt, veræ dicuntur per comparisonem ad intellectum artificis, si præconceptam ab illo ideam exacte referant.

Per accidens autem et secundum quid rebus veritas tribuitur in ordine ad intellectum a quo non dependent, quum sunt id quod putantur vel dicuntur esse; seu quum habent entitatem conformem illi ideæ ad quam referuntur. Sic dicitur *amicus verus* ille qui habet omnes proprietates, quæ in idea tali nomine expressa continentur. Videlicet hinc tu consideras ea quæ constituunt amici ideam, inde mores actusque ejus qui amici opinionem de se gignit: ac si illi hi congruant, eum non solum amici speciem præferre, sed verum amicum esse statuis.

* 115. Notanda. 1^o Hoc altero modo res veræ denominantur, ut diximus, per accidens et secundum quid. *Per accidens* quidem, quia per accidens est quod res ideis nostris adæquantur; non enim ideo res veritatem per se habent, quod ideis nostris adæquantur, sed quia adæquantur ideis æternis. *Secundum quid* autem, quia res hoc pacto dicitur vera secundum æstimationem quam de se inducit vel inducere potest.

2^o Quotiescunque res veræ a nobis dicuntur, veræ semper dicuntur per comparisonem ad intellectus nostri ideas: non enim æternas ideas, imo nec creatorum artificum ideas intuemur.

3^o Patet, non posse nos aliquid dicere verum respectu alicujus ideæ, nisi postquam ideam hanc satis claram habeamus. Sic quum primo aurum quis videt, nequit ille decernere verum illud aurum esse, sed solum postquam experientia cognovit, quænam sint auri constitutiva, ita ut aurum ab aliqua quavis re discernat.

4^o Ex his tandem colligitur, rerum veritatem esse ipsam earum realitatem, addito respectu ad conceptum intellectus, cui hæc realitas conformis est. Quocirca verum ab ente differt per solam mentis considerationem.

ARTICULUS II.

De falsitate.

116. Falsitas rerum est *difformitas rerum ab intellectu*. Dicuntur res falsæ per se et absolute in ordine ad intellectum a quo dependent, si abnormes sint ab exemplari artificis idea; per accidens vero et secundum quid, comparatæ ad intellectum a quo non dependent. Et hoc dupliciter.

1º Quotiescunque res ejusmodi sunt, ut iudicii falsi occasionem præbeant. Tales sunt illæ quæ cum quibusdam aliis externam aliquam præferunt similitudinem: quum enim res illæ menti obijciuntur, apprehensionem quidem veram gignunt (L. 378), at viam parant falso iudicio, quo quis æstimet rem objectam esse eam cujus speciem gerit (L. 386, 5º). Sic quia stannum similitudinem habet cum argento, dicitur falsum argentum; et assentator blandiens, quia speciem præsefert amici, dicitur falsus amicus. Atque hic est modus potissimus, quo res falsæ dicuntur.

2º Dicitur etiam quandoque falsum in rebus id quod est falsum in mentis iudicio: quum videlicet per iudicium erroneum conceptus qui rei non convenit, ad ipsam refertur (L. 381), secundum hunc conceptum res falsa dicitur. Sic idolum dicitur falsus Deus, et diameter bipedalis falsus diameter solis, quia idolum falso iudicatur Deus, et diameter bipedalis falso iudicatur diameter solis.

117. Notanda. 1º Quum res falsæ dicuntur, id non intelligitur de falsitate absoluta, sed de falsitate per accidens. Nam respectu intellectus divini nihil est falsum; respectu autem intellectus humani, quotiescunque opus ab artificis idea difforme prodit, solet potius dici incongruum esse, aut deforme, aut male cecisse, quam falsum esse. Videlicet ratio mali, quæ magis nos afficit, in iis plus attenditur, quam ratio falsi: fortasse etiam quum opus malus et deforme dicimus, ipsius defectum notamus; si vero falsum diceremus, imperitiam nostram ac limitationem fateremur. Non tamen desunt in contrarium exempla (1).

(1) *Passo falso, colpo falso, gioco falso*; un faux pas, un faux coup, un faux jeu et similia.

2º Res quæ falsæ dicuntur, non dicuntur falsæ simpliciter, quia simpliciter veræ sunt, sed solummodo *secundum quid*; videlicet secundum id quod non sunt. Præclare S. Thomas: « Res comparata ad intellectum, secundum id quod » est, dicitur vera; secundum id quod non est, dicitur falsa. » Unde *verus tragædus est falsus Hector*, ut dicitur in 2º soli- » loq. Sicut igitur in his quæ sunt invenitur quoddam non » esse, ita in his quæ sunt invenitur quædam ratio falsita- » tis (1). »

3º Non tamen secundum omne id quod non est, res dicitur falsa (quis enim dicat solem falsum hominem, aut leonem falsum argentum?), sed duntaxat secundum id quod non est, et quod iudicatur esse, vel iudicari potest; præsertim si cum eo quod iudicatur esse, similitudinem habeat. Audiat iterum S. Thomas: « Innatum est nobis per ea, quæ ex- » terius apparent, de rebus iudicare, eo quod nostra cogni- » tio a sensu ortum habet qui primo et per se est exteriorum » accidentium: ideo ea quæ in exterioribus accidentibus » habent similitudinem aliarum rerum, dicuntur esse falsa » secundum illas res: sicut fel est falsum mel, et stannum » est falsum argentum (2). »

4º Falsitas in rebus nihil est; iis enim tribuitur solummodo quatenus non sunt entia, et per comparisonem ad conceptum aliquem intellectus.

ARTICULUS III.

Theoremata.

118. PROPOSITIO I. *Est in rebus veritas independenter a nostri intellectus cognitione.*

Res enim per se ac principaliter veritatem habent secundum ordinem ad intellectum divinum, quatenus illi conformantur; eamque habent independenter prorsus a nostra cognitione.

Præterea illo quoque veritas quæ respectu humani intellectus rebus tribuitur, independenter ab actuali cognitione iis

(1) *Sum. th.*, p. I, q. XVII. art. I ad I.

(2) *Art. cit. c.*

convenit. Habent enim entitatem ei quam de se inducere possunt, cognitioni atque opinioni conformem. Si autem cum hoc conceptu possibili conformitatem habent, jam nihil impedit quominus respectu intellectus humani veræ dicantur, atque talis veritas in iis a Deo cognoscatur.

119. PROPOSITIO II. *Nulla res falsa est respectu intellectus divini.*

Nam unaquæque res eam habet essentiam, eas proprietates atque individuantes notas, quæ divinam de ipsa ideam omnino adæquent. Fieri enim nequit, ut Dei operatio deficiat ab ideis, quibus ejus voluntas in operando dirigitur; hæc enim defectio impotentiam in operante argueret.

120. Objicies, in iis saltem quæ Deus naturæ ministerio operatur, multa a divinis ideis difformia censenda videri, ut sunt monstra, et quæcunque in iis quæ ad propriam naturam pertinent, aliquatenus deficient.

Respondeo hæc quoque supremi artificis ideis accuratissime commensurari. Etenim supremus artifex possibilium omnium ideas habet, adeoque et hujusmodi imperfectorum. Aliunde vero hæc non fortuito fiunt, sed sciente ac volente Deo, eaque omnia ad suos fines dirigente. Neque imperfectiones hujusmodi impotentiam arguunt principalis artificis, sed solummodo imperfectionem agentis naturalis, quam Deus tollere non vult.

121. PROPOSITIO III. *Omne ens est verum.*

Verum primo veritate absoluta (114); quia omne ens est actu conforme ideis divini intellectus, a quo cuncta dependent. Neque hoc solum de naturalibus rebus intelligendum est, sed etiam de hominum operibus; quæ talia sunt, qualia a Deo vel in causæ potentia, vel per prævisionem liberorum actuum cognoscuntur.

Verum deinde etiam veritate, quæ dicitur secundum quid. Omne enim ens in eo quod est, cognoscibile est, habetque entitatem æstimationi, quam de se causare potest, conformem (114, 118). Ens ergo omne verum est respectu quoque intellectus creati, etiamsi nullus esset intellectus hujusmodi, qui res cognoscere posset.

122. COROLLARIA. 1^o Intelligitur ex dictis celebris illa veri definitio a S. Augustino proposita (1): *verum est id quod est*. Quæ definitio nihilominus subjectum potius, ut ita dicam, veritatis, quam ipsam veritatis rationem determinat. Etenim omne quidem ens, hoc ipso quod est, verum est: atque hinc verum et ens re non distinguuntur; nihilominus ens non dicitur verum, nisi per comparisonem ad intellectum (115, 4^o).

2^o Etiam non-ens, ut negationes et privationes, verum dicitur, sed et ipsum in quantum est quodammodo ens videlicet ens rationis, apprehensum a ratione et cogitatum ut ens.

CAPUT VI.

DE BONITATE.

ARTICULUS I.

Bonitatis notio ac partitio.

123. Bonitas definitur: *quod est alicui conveniens*. Est autem alicui conveniens id quod illius tendentiæ seu capacitati conforme est et proportionatum. Hæc porro conformitas et proportio in ipsa rei, quæ bona dicitur, entitate ac perfectione fundatur. Quocirca quum aliquid bonum dicimus, ipsam rei entitatem ac perfectionem significamus, connotando simul inclinationem, tendentiam, capacitatem naturalem ad illam in aliquo existentem. Unde sequitur

1^o bonitatem re non distingui ab entis realitate ac perfectione.

2^o conceptum bonitatis a realitatis ac perfectionis conceptu distingui per hoc, quod realitatis ac perfectionis conceptui rationem addit convenientiæ.

3^o rationem hanc convenientiæ desumi ex inclinatione seu capacitatem ad ejusmodi perfectionem, quæ in aliquo invenitur.

Animadvertet porro, concretum nomen *bonum* pro abstracto *bonitatis* frequenter usurpari.

(1) II Soliloq. c. V.

124. Definitor quoque bonum: *id quod omnia appetunt* (1); bonum enim est appetitus objectum: ex quo appetitus omnis ad bonum fertur. Verum definitio hæc, uti notavit S. Thomas (2), ad posteriori sumitur; ratio enim appetibilis non est proprie id quod bonitatem constituit, sed est potius aliquid illud consequens vel concomitans. Non enim ideo aliquid bonum est quia appetibile, sed ideo appetibile est quia bonum est. Bonitas autem rem appetibilem facit, quia est perfectio conveniens.

Ex hoc etiam intelligitur, quo sensu bonitatis ratio sit in ratione finis constituenda. Scilicet eodem pacto quo bonum appetibile est, rationem finis habet vel habere potest. Ipsa igitur ratio finis non est id quod bonitatem constituit, sed bonitatis rationem consequitur. Bonitas vero est id, quod vim tribuit rei movendi ad agendum tanquam finis.

125. Bonum dividi solet: 1^o in *verum* et *apparens*. Verum est quod tale est cujusmodi existimatur; apparens quod non est bonum, licet existimetur. De hoc eadem dicenda quæ de falsitate rerum dicta sunt (116, seq.). Quænam autem bona vera sint vel falsa, id ex principali entis cujusque ac propria tendentia judicandum est. Quamvis enim in ente plures sint naturales inclinationes ac tendentiæ, una tamen est in unoquoque qua ad finem ipsius proprium dirigitur; et hæc præcipua in ente est, cui cæteræ omnes subordinantur. Id igitur quod tendentiam hanc principem explet, hoc affert enti perfectionem illi vere convenientem, eam nempe perfectionem ad quam natura destinatur. Hoc ergo est bonum entis verum. Quæ vero partialibus ac subordinatis inclinationibus satisfaciunt, si principali quoque tendentiæ congruant, et ipsa bona vera sunt; si illi contraria sint, falsa.

126. 2^o Bonum ens dicitur vel quia *secundum se* bonum est, vel quia *alteri*.

Bonum secundum se est quod perfectionem habet sibi convenientem. Sic homo est bonus sibi ratione sanitatis, virtutis, etc.

(1) Arist. I. *Eth.* c. I.

(2) In I *Eth.*

Bonum alteri est quod habet perfectionem alteri convenientem. Hoc pacto Deus est bonum hominis.

Manifestum porro est, omne id quod alteri bonum est, in se quoque, aliquo saltem modo, bonum esse. Nam quod alteri bonum est, tale est propter aliquam sui perfectionem. Omnis autem perfectio est bonitas entis in quo est.

Hinc intelliges, perfectionem seu bonitatem, qua ens sibi bonum est, esse in ipso subjecto, ac mentis operatione ab illa abstrahi; id vero quod bonum est alteri, esse rem concretam reipsa ab illo distinctam. Atque hinc fortasse factum est, ut ad comprehendendum uno nomine et id quo subjectum est in se bonum, et id quod bonum est alteri, concretum *bonum* pro abstracto *bonitas* frequentius usurparetur, ut supra notavimus. Id enim quo subjectum est in se bonum, dici potest bonum subjecto; sed id quod bonum est alteri dici nequit bonitas alterius, quia non est illius forma.

127. 3^o Pervulgata maxime est boni divisio in *honestum*, *utile*, *delectabile*; qua quidem, ut in logica obiter monuimus (L. 116, 3^o), non rerum quæ bonæ sunt classes exhibentur, sed ipsa boni ratio in rationes subjectas dispescitur. Proprie autem hæc divisio est boni humani; cætera enim entia vel delectationis capacia non sunt, ut omnia quæ sensu carent, vel honestatis, ut bruta animantia. Nihilominus divisio hæc extendi solet etiam ad bonum in genere, ut postea inuenimus.

a) Bonum honestum in genere est quod enti convenit *per se* et *ratione sui*. Animadvertendum porro est, bonum honestum latius et pressius accipi.

Latius acceptum est quidquid per se naturam entis perficit, ut sanitas, integritas, scientia, vita et ipsum esse: et hoc dicitur *bonum naturæ*.

Pressius est quod per se habet convenientiam cum natura rationali qua tali; id nempe quod rationali naturæ perfectionem ipsi propriam (125) confert; quæ in eo est, ut in agendo æternæ morum regulæ se conformet. Et hoc communiter intelligitur nomine boni honesti, et est idem ac *bonum morale*. Reperitur autem hæc bonitatis ratio tum in ac-

tibus, tum in habitibus, tum in objectis circa quæ actus habitusque versantur, si hominem deceant ratione utentem.

b) Bonum delectabile est id quod habet cum aliquo convenientiam, *propter delectationem* quam ipsi affert. Delectatio autem est quies appetitus in re convenienti. Nihil vero appeti potest, nisi aliquo modo cognoscatur. Quapropter delectabile bonum ab ea solum entia pertinet, quæ aliqua cognoscendi facultate pollent.

c) Tandem bonum utile est quod convenit enti non ex se nec propter delectationem, sed *ratione alterius boni* sive honesti sive delectabilis, quod per illud obtineri potest. Talis est v. gr. pecunia.

128. Hæc boni divisio, quæ, si omnia ejus membra proprie ac pressius sumantur, ad bonum solummodo pertinet humanum, extendi quoque potest, ut diximus, ad bonum in genere. Res enim omnes ad bonum aliquod natura propelluntur, quo perfectio cujusque propria continetur: hic autem naturæ impulsus, qui in entibus sensitivis est appetitus sensitivus, in rationalibus appetitus rationalis, in rebus inanimis potest per quamdam analogiam appetitus naturalis denominari.

Sic igitur id quo ultimo tendit appetitus, bonum honestum est; id quod est medium ad bonum honestum assequendum, est bonum utile; et quies ipsa in suo termino bonum est delectabile (1).

ARTICULUS II.

*Theoremata.*129. PROPOSITIO I. *Omne ens est bonum.*

1° Omne ens est *bonum secundum se* (126): quia omne ens necessario habet essentialem suam perfectionem, qua actu est, et tale ens est. Perfectio autem omnis est bonitas, qua ens in se bonum est. Ergo.

2° Est etiam *bonum alteri*. Etenim omne ens naturalem cum aliquo alio proportionem habet, vel ut pars cum toto, vel ut accidens cum subjecto, vel ut causa cum effectu, et

(1) Cf. S. Th. Sum. th. p. I, q. V, art. VI.

vicissim. Item nihil est quod ad alterius entis perfectionem, pulchritudinem, usum, delectationem non conferat, uti consideranti illico patet, quantumvis rerum bonitates multas ignoremus.

130. PROPOSITIO II. *E converso quidquid bonum est, ens est.*

Nam omne id quod bonum est, perfectionem habet sibi convenientem. Perfectio autem omnis entitas est.

131. Objicies, quædam dici bona, quæ entia non sunt, sed negationes vel privationes. Sic aliquid non habere aut non facere, imo quandoque ipsum non-esse bona dicuntur.

Resp. 1° Hæc omnia, prouti negationes vel privationes sunt, proprie esse carentiam alicujus mali, quæ, nisi aliud addatur, bonitas non est. Nihilum enim malo caret, neque tamen idcirco bonitatem habet. Hæc igitur bona dicuntur, quia vel sunt conditiones ad aliquod bonum acquirendum aut conservandum, vel sunt affectus aut signa boni possessi. Primo modo dicimus bonum non affluere divitiis, ratione tranquillitatis quæ inde consequitur: altero modo dicimus bonum non agere inhoneste, ratione positivæ voluntatis ita non agendi.

Resp. 2° Negationes hujusmodi et privationes, in eo quod bona dicuntur, entia quoque dici, et ad eundem modum dici bona, quo entia dicuntur. Cum enim hæc soleant a ratione respici ad modum entium (27, 24), idcirco et unitas et veritas et bonitas entium propria per quamdam analogiam ipsius tribuitur (122, 2°). Quapropter possent hæc denominari *bona rationis*, sicut denominantur entia rationis.

Non-esse vero dicitur bonum, quasi minus malum; quia nempe comparando malum quod ens patitur cum malo non existentiae, hoc minus malum judicatur præ illo.

132. Duo sunt hoc loco de bono pronuntiata celebria, explicanda potius quam probanda; indigent enim tantummodo explicatione ut recte intelligantur: si autem recte intelligantur, facile, præsertim post dicta, suadentur.

Primum est: *bonum est diffusivum sui*. Hoc effatum ita explicat S. Thomas: « Dicendum, quod bonum dicitur diffu-

» sium sui esse, eo modo quo finis dicitur movere (1). » Nempe, quod bonum est, appetibile est, et rationem finis habet, aut habere potest (124). Quum autem bonum appetitur ut finis, boni rationem in alias quoque res diffundit, videlicet in media ad talem finem assequendum idonea: facit enim illa amabilia et appetibilia propter seipsum. Hæc explicatio omni bono convenit, et veritatem universalem asserti tuetur.

153. Alterum: *Deus est omnis boni bonum* (2). Hoc non intelligi perinde debet, ac si rerum bonitas sit realis quædam participatio bonitatis divinæ, id quod absurdum foret quam maxime; sed ita duntaxat ut significet, omnem creaturæ bonitatem 1º a Deo pendere tanquam a primo principio exemplari (82); 2º a Deo produci tanquam a prima causa efficiente; 3º ad Deum ordinari tanquam ad causam finalem ultimam. Formalis vero creaturæ bonitas, quanquam a bonitate divina realiter distinguatur infinitoque secernatur intervallo, est nihilominus ejusdem bonitatis quædam similitudo, ut supra (83, 2º) explicatum est (3).

ARTICULUS III.

De malo.

154. Malum qua tale, est *privatio boni seu carentia perfectionis convenientis*. Non est itaque aliqua realitas aut affectio entis positiva; nam realitas omnis qua talis, est aliquid bonum (129) non malum. Neque est mera negatio boni; nam secus ea quæ non sunt, essent mala, imo omnia quæ sunt, præter Deum, mala essent, quia perfectione aliqua carent. Est igitur malum negatio alicujus boni, in subjecto cui bonum ejusmodi convenit ac debitum est, ex naturæ instituto. Hoc pacto negatio visus in statua, aut negatio prudentiæ in equo mala non sunt, sed negatio visus in animali, et prudentiæ in homine mala sunt.

Hic quoque advertes concretum *malum* pro abstracto

(1) Sum. th. p. 1, q. V, art. IV ad 2.

(2) Ex Augustino VIII De Trin. c. III.

(3) V.S. Th. Sum. th. p. 1, q. V, art. IV.

malitia usurpari, ut et de bono ac bonitate dictum est (126).

155. Quoniam malum oppositum est bono, consequitur quemadmodum bonum appetibile est, ita malum qua tale, appetibile non esse, sed potius a se appetitum avertere. Quamobrem malum ex se nec finis nec medii rationem habere potest. Aliquando tamen malum appetitur *per accidens*, quatenus non malum ipsum qua tale, sed res aliqua bona in qua malum est, intenditur; ut quum ab homine lucrum quæritur injustum. « Malum autem, ita apposite » S. Thomas, quod conjungitur alicui bono, est privatio » alterius boni. Nunquam igitur appeteretur malum, nec » per accidens, nisi bonum cui conjungitur malum, magis » appeteretur, quam bonum quod privatur per malum (1). »

156. Malum dividitur 1º in malum *in se* seu *secundum se*, et *malum alteri*.

Malum secundum se est mera privatio boni debiti ad subjecti perfectionem, sicut ægrotudo est malum animalis.

Malum alteri est quidquid alterum bono illi debito privatur aut privare potest. Sic lupo est malum agno, justitia judicis est malum sonti, amici mors alteri amico malum est.

157. 2º Dividitur communiter malum in *physicum* et *morale*.

Physicum est privatio boni naturalis (127).

Morale est privatio boni moralis (127). Invenitur hoc malum, ut per se patet, solummodo in agente rationali et libero: continetur enim deficientia liberæ actionis a morum regula.

Addi solet post Leibnitzium huic partitioni tertium membrum scilicet malum *metaphysicum*, quod situm dicitur in defectu ulterioris perfectionis. Sed defectus iste improprie solum et abusive vocari potest malum, cum non sit boni debiti defectus: imo vero ipse hic defectus est essentialis ac

(1) Sum. th. p. 1, q. XIX, art. IX.

debitus omni creaturæ, quia creatura nulla perfectionem infinitam habere potest.

* 158. Quæres an malum dividi posset per oppositionem ad divisionem communem boni in honestum, delectabile, utile; et cur non soleat ita dividi.

Respondeo posse ita dividi malum, sed divisionem hanc in eam, quam nuper commemoravimus reipsa recidere. Etenim divisio hæc erit in malum *inhonestum* seu turpe, *contristans* et *impediens*. Inhonestum late sumptum (127) est privatio boni naturalis, nempe malum physicum: inhonestum stricte acceptum est idem ac malum morale. Malum contristans est id a quo refugit appetitus propter tristitiam quam affert. Tristitia autem est passio ex conjunctione cum malo cognito. Igitur hoc quoque pertinet ad malum physicum, quia privat bono naturali, quod est ab huiusmodi passione esse immunem.

Malum impediens est id a quo abhorret appetitus non ex se, nec ratione tristitiæ, quam affert conjunctio cum illo; sed quia obstaculum est quod alterius boni assecutionem impossibilem facit vel difficiliorem. Quisque videt, et hoc reduci ad malum physicum vel morale.

Hinc patet quare partitio hæc mali non sit in usu; quia nempe reducitur ad illam, quæ et simplicior est et facilior.

* 159. Quæ modo dicta sunt, quæstionem movent de oppositione quæ bonum inter et malum est. Adverte, bonum et malum comparari inter se posse dupliciter; 1^o formaliter, nempe spectatis ipsis rationibus boni ac mali; 2^o materialiter, videlicet secundum res ipsas quæ bonæ vel malæ sunt.

Adverte iterum, bonum vel esse bonum subjecto in quo est, vel bonum alteri (126); ita et malum. Igitur:

1^o Bonum et malum ipsi subjecto, formaliter considerata, *privative* opponuntur: bonum enim huiusmodi est perfectio subjecto conveniens, et malum ejusdem privatio.

2^o Bonum et malum subjecto, materialiter considerata, possunt habere oppositionem contrariam (L. 52, 3^o), ut dele-

ctatio et tristitia; et hoc in moralibus magis quam in naturalibus; « quia, ita S. Thomas, moralia ex voluntate dependent. Voluntas autem objectum est bonum et malum. » Omnis autem actus denominatur et speciem recipit ab objecto. Sic ergo actus voluntatis in quantum fertur in malum, recipit rationem et nomen mali, et hoc malum contrariatur proprie bono. Et hæc contrarietas ex actibus in habitus transit, in quantum actus et habitus simulantur (1). » Videlicet actus bonus contrarius est actui malo, quia et unus et alter sunt duo actus positivi, secundum tendentiam maxime differentes.

3^o Tandem quod alteri malum est, bono opponitur *contrarie*, vel etiam *privative*. Potest enim fieri, ut sola boni privatio quæ in uno est, alterius sit malum.

ARTICULUS IV.

Theoremata.

140 PROPOSITIO I. *Malum non potest esse nisi in subjecto bono.*

Nam malum est privatio perfectionis subjecto debitæ. Ergo malum supponit subjectum, cui perfectio aliqua debeatur, et in hoc solo esse posset. Sed hoc subjectum debet necessario esse aliqua ex parte bonum.

Etenim 1^o si malum esset, deberet et ipsum inesse subjecto, et hoc alterum, nisi bonum sit, in alio insit oportet, et ita in infinitum.

2^o Subjectum nulla ex parte bonum, esset subjectum nulla ex parte ens (129, 130): nimirum nihil.

141. COROLLARIA. 1^m Nulla res est absolute ac simpliciter mala, sed solum secundum quid,

2^m Omnis res mala est aliqua res bona.

3^m Quamvis malum sit remotio boni sibi oppositi, non potest tamen ex toto bonum destruere.

142. PROPOSITIO II. *Causa mali efficiens non potest esse nisi bona.*

Quod malum omne causam habeat, et quod hæc causa

(1) *Quæst. Disp. De malo, art. 1. ad 4.*

bona sit, ita probat S. Thomas : « Malum est defectus boni » quod natum est et debet haberi. Quod autem aliquid deficiat a sua naturali et debita dispositione, non potest provenire nisi ex aliqua causa trahente rem extra suam dispositionem... Esse autem causam non potest convenire nisi bono : quia nihil potest esse causa, nisi in quantum est ens. Omne autem ens, in quantum hujusmodi, bonum est (1). » Hinc veritas elucet pulcherrimæ illius sententiæ : *malum non agit nisi virtute boni* (2).

143. PROPOSITIO III. *Bonum non potest esse efficiens mali causa nisi per accidens.*

Præmittendum, in causæ sive actione sive effectu aliquid esse per se, aliquid per accidens. Per se fieri dicitur quod ex virtute et intentione agentis, fit. Per accidens quod vel non fit ex virtute agentis, vel fit præter ejus intentionem.

Hoc posito, malum effici potest vel in ipsa causæ actione, vel in ejus effectu. Rursus actio causæ vel est necessaria, vel libera; et effectus vel est proprius effectus causæ, vel secus. Sed in omni casu malum efficitur per accidens. Ergo.

144. Nam 1º malum in actione causæ necessariæ, sive hæc principalis sit sive instrumentalis, profecto non provenit ex illius efficientia; nam efficientia causæ producit aliquid quod est ens, ac proinde bonum; sed potius ex illius deficientia. Sic ex. gr. motus imperfectio procedit in animali non ab ipsa vi motrice, ut est vis, sed solum ex ejus debilitate, vel ex membrorum defectu. Sed quæcunque sit causa, sive principalis sive instrumentalis, esse deficientem non per se illi convenit; per se enim illi convenit agere; sed solummodo per accidens potest illi convenire. Ergo.

2º Idem dicendum de actione causæ liberæ; nisi quod actio causæ liberæ differt in hoc ab actione causæ necessariæ, quod causa necessaria eo modo agit qui sequitur ex præsentia ejus dispositione, vel indispositione, aut defectu; adeoque non potest esse defectus in ejus actione, nisi ex defectu antecedente aut impedimento ipsius causæ; sed causa libera,

(1) *Sum. th.* p. 1, q. XLIX, art. I.

(2) *Lib. de div. nom.* c. IV.

ratione dominii quod habet in actus suos, non semper agit quantum potest et debet, ac propterea potest in actione deficere, etiam defectu in ipsa causa non præsupposito. Sic inhonesta omnis actio est a voluntate, quæ posset se æternæ legi subicere, ut deberet, sed se illi subicere detrectat.

3º In effectu proprio causæ, quem videlicet ipsa intendit, causari potest defectus vel ex ipsa actionis imperfectione, ut quum ex mala artificis actione opus efficitur deforme; vel ex materiæ circa quam causa agit indispositione, ut quum ex marmoris aut ligni defectu statua recipit deformitatem. Sed hæc omnia se habent per accidens ad causæ virtutem; non enim fiunt ex virtute agentis, sed vel ex defectu ipsius, vel ex impedimento ipsi appposito.

4º Tandem ex ipsa virtute agentis oritur quandoque malum, non tamen in effectu quem agens intendit, sed in alio effectu qui cum hoc connectitur: ex quo sequitur, ut effectus in se bonus, alteri malus accidat (136); ut quum ignis virtute propria perfecte agens, domum incendit aut manum ustulat; vel quum judex, actione rectissima perturbatum ordinem restaurare intendens, sontem pœna afficit. Sed malum alterius, conjunctum cum effectu bono quem agens intendit, per accidens ab agente efficitur. Ergo.

LIBER SECUNDUS.

CAPUT I.

DE SUBSTANTIA ET ACCIDENTE.

ARTICULUS I.

Divisio entis in substantiam et accidens.

145. PROPOSITIO. I. *Substantiæ et accidentis notiones experientia cuique obvia suppeditat.*

Statim ac in experientiam sive externam sive internam reflexionem adhibere incipimus, substantiæ et accidentis notionem adipiscimur, atque unam rem ab altera distinguimus, quanquam hæc nomina quibus philosophi utuntur ignoremus. Revera vel ipsæ rerum tam multæ ac sibi perpetuo succedentes mutationes statim ostendunt, esse aliquid quod mutationes recipit, et esse aliquid quod in his mutationibus accedit ad illud vel ab illo amittitur. V. gr. cera quam manibus contrecto, modo calida est modo frigida, dura primum deinde mollior ac mox liquescens, transit ab una manu in alteram, et pressione digitorum modo unam figuram accipit modo aliam; semper tamen eadem cera est quam primo accepi. Est ergo in rebus subjectum affectionum, et sunt affectiones sibi succedentes in illo: illud *unum* est, hæc plures: illud *identicum*, hæc diversæ inter se; illud *permanens*, hæc successivæ: illud *potest esse sine his*, secus nulla fieret mutatio; hæc sine illo esse non possunt, sunt enim illius affectiones.

Eodem pacto quæ intra nos accidere sentimus considerantes, in affectionum nostrarum multitudine, varietate, successione aliquid deprehendimus unum, identicum, permanens, et hoc est id quod eas affectiones recipit atque experitur. Sic igitur et externa et interna experientia ideam nobis suppeditant rei quæ *per se constat*, et rei quæ *alteri inest*. Illa est substantia, hæc accidens.

146. Quod vero hæc entis divisio in substantiam et acci-

dens adæquata sit, non est minus manifestum, si accidentis nomine intelligas non affectiones tantum variables, sed quidquid afficit vel modificat alterum. Profecto quidquid est, vel per se constat vel non per se, sed in alio. Nihil potest inter hæc duo medium inveniri; sunt enim immediate opposita, ut quæ contradictionem aperte præferunt. Nullum ergo est ens, cui alterutrum illorum non conveniat.

* 147. Porro jam in primo libro ostensum est (17), substantiam et accidens in ratione entis non univoce, sed analogice convenire. Unus quidem entis conceptus et substantiæ et accidenti communis est; ratio quoque hoc conceptu expressa est vere ac proprie in utroque, sed diversimode; est enim prius absolute in substantia, deinde in accidente cum habitudine ad illam.

* 148. Patet hinc, ens non dividi in substantiam et accidens, quasi genus in species; neque illa duo, *per se et in alio*, esse differentias proprie dictas quæ genus ad species determinant (15); sed solum modos essendi diversos, qui ipsam entis rationem diversam faciunt in diversis. Quod ut melius intelligas, scire debes 1º modum entis nihil aliud reapse esse, quam ipsum ens diverso modo consideratum. Dicitur enim rei modus « res concepta uno modo, respectu sui ipsius ut » est concepta alio modo: qui quidem diversi modi considerandi non sumuntur ex diversis in re existentibus, sed » ex habitudine ad diversa, sub qua habitudine res intelligitur. » Ita antiquus auctor Opusculi XLVIII inter Opuscula S. Thomæ (1); nec melius dici poterat. 2º Animadvertere debes, quosdam modos *essentiales* esse, ut *esse per se*, *esse in alio*; quosdam vero *accidentales*, ut *substare accidentibus*, *esse alteri unitum* et similia. Modos vero *essentiales* alios esse omni enti *communes*, ut *esse verum*, *bonum*, etc.; alios esse *proprios* quorundam entium; ut hi de quibus modo loquimur, *esse per se*, et *esse in alio*.

Et hæc in præsentī de his sufficiant. Erit certe notio hæc tibi perutilis, ad intelligendum quid sint modi essendi, de quibus sæpe mentio occurrit apud metaphysicos; quos mo-

(1) Tract. II, c. I.

dos ita nonnulli explicarunt, ut difficillimum fecerint ac pene impossibile concipere mente quid sint.

ARTICULUS II.

De substantiæ notione.

149. PROPOSITIO II. *Comparatione instituta inter subjecti affectiones ipsumque subjectum, substantiæ notio perficitur.*

Colligitur ex modo dictis nos primo cognoscere substantiam ex mutationibus quæ in illa fiunt, eamque concipere ut *subjectum constans affectionum mutabilium*. Atque ex hoc modo concipiendi ipsa *substantiæ* denominatio ortum habuit. Substantia enim ex vi nominis est *quod substat alteri*. Nimirum tale nomen substantiæ impositum est, quia cum accidentia sub sensus cadant, non vero substantia, hanc concipimus quasi substratum quoddam permanens, accidentibus subjectum, illaque propemodum sustentans.

150. Jam si iterum affectionum subjectum cum affectionibus comparemus, deprehendemus affectiones omnes ita in sua existentia dependere a subjecto, ut non possint ab ipso avelli et existere per se, sed in illo existere debeant; subjectum autem ab illis esse independens nec indigere illis ut sit; fuit enim sine unaquaque illarum, et esse perstat etiamsi illæ cessent. V. gr. mea cognitatio non potest esse sine mente mea, nec transire a me ad alterum; ita chartæ figura aut albedo sine charta et extra chartam existere, saltem naturaliter, nequit. Sed mens meas potest esse sine illa cogitatione, et charta sine illa figura, potestque mens ab una cogitatione ad aliam, et charta ab una figura ad aliam transire. Igitur substantia ita existentiam habet, ut per se sit, nec alio indigeat ut sit in illo. Affectiones autem ita existentiam habent, ut non per se sint, sed in alio ut in subjecto, quo indigent ut sint.

151. Ex his eruitur altera substantiæ definitio: *ens quod per se est, neque indiget alio tanquam subjecto cui inhæreat*. Quæ definitio eo melior est prima illa, quam experientia immediate suppeditat (149), quod cum libera sit a conceptu mutabilium affectionum, id solum complectitur quo perfectio

ipsa substantiæ continetur; adeoque universalis maxime est et divinam ipsam amplectitur substantiam, quæ vere per se est et non in subjecto, quin tamen ulli sit obnoxia mutationi. Nihilominus prima definitio ad omnem creatam substantiam se porrigit.

152. Ad cavendos turpissimos pantheismi errores sedulo notandum quid importent illa: *per se esse*, et *alio non indigere*, quum de substantia dicuntur. Substantia est per se, nempe independenter ab alio subjecto, et non indiget subjecto ut sit. Excluditur ergo a substantia dependentia ab alio tanquam a subjecto inhæsionis, non vero dependentia ab alio tanquam a causa. Independentia a subjecto inhæsionis facit ut ens per se sit: independentia a causa facit ut ens sit a se. Illud ens est omnis substantia, hoc est solummodo substantia infinita.

153. PROPOSITIO III. *Substantiæ idea clara est ac minime arbitraria.*

Sequitur ex hucusque dictis 1^o nos ideam substantiæ claram habere. Si enim clara non esset, substantiam cum accidente confundi a nobis oporteret. Cum enim omne ens vel substantia sit vel accidens (146), nihil aliud est quocum substantia confundi possit, nisi accidens. Jam quis dicat nos confundere cum accidente substantiam? Anne quispiam est, qui v. gr. rotunditatem dicat substantiam, et aurum aut lignum affectiones rotunditatis?

Sequitur 2^o substantiæ notionem confictam aut arbitrariam non esse, sed ex ipsis rerum naturis depromptam. Sponte enim exurgit hæc notio ex interna et externa experientia.

154. Notandum tamen 1^o nos cognoscere quidem quid sit substantia universim et per oppositionem ad accidens; minime autem compertum habere quid determinatas substantias intrinsece constituat: latet enim nos intima rerum essentia (46). Hinc est quod substantias ab invicem distinguimus non per intrinsecas ipsarum differentias, sed per affectiones ipsarum, perque effectus quos percipimus. Quamobrem idea, cujusvis peculiaris substantiæ continetur

notione generali et indeterminata *entis per se*, cui determinatæ qualitates inhaerent, et ex quo certi quidam effectus dimanant,

* 2° Sensu apprehendi externas solum affectiones, non tamen abstractas sed concretas; adeoque et ipsam substantiam attingi; non quia ipsam rationem entitatemque substantiæ ullo modo sensus percipiat, sed quia externas affectiones percipit in concreto prout in re sunt, non albedinem v. gr. sed album; quanquam affectiones per se sint sensuum objectum, ac substantia per accidens (L. 461). In eundem modum intellectus non intelligit primo affectionem a substantia abstractam, aut substantiam præcisam ab affectione, sed per modum unius objecti, accidens in subjecto; nec tamen accidens sub ratione formali accidentis, nec subjectum sub ratione formali subjecti, sed utrumque simul sub ratione entis hoc aut illo modo sensibilis. Formales vero ideæ substantiæ et accidentis comparatione et deductione postea acquiruntur.

3° Hinc ideæ affectionum concretarum sunt intuitivæ (L. 21), adeoque substantiarum ideæ ut sub experientiam cadunt sunt et ipsæ intuitivæ, non quidem quia substantia in se sit intuitionis objectum, sed quia substantia in suis affectionibus se intuendam præbet (quod veteres dicebant esse intuitivas *denominative*, non *quidditative*); ipsi vero conceptus substantiarum abstractarum non intuitivi sunt, sed factitii per deductionem (L. 22).

ARTICULUS III.

Lockii de substantiæ conceptu sententia refutatur.

155. Contendit Lockius, et post ipsum cæteri sensistæ, omni nos substantiæ idea carere: voces autem quibus substantias significamus, nihil aliud exprimere, quam qualitatum quarundam quibus constanter simul afficimur congeriem; de quibus qualitibus tanquam de re una loquimur, quia supponere solemus, eas ignoto aliquo substrato sustineri, in eoque subsistere. Ita ipse (1).

(1) *De intell. hum.* lib. II, c. XXIII.

156. PROPOSITIO IV. *Lockius in iis quæ disserit circa substantiæ conceptum, ludit in ambiguo, sibi contradicit et errat manifeste.*

1° Ludit in ambiguo: simul enim permiscet generalem substantiæ notionem cum cognitione substantiarum in specie. Intima quidem particularium substantiarum constitutiva nos latent: at minime nos latet et esse substantiam et quid sit (154, 155).

2° Sibi aperte contradicit. Nam

a) Assertit substantiæ vocabulum nulla mentem idea ditare, ac simul dicit, vocabulum idem excitare in nobis notionem subjecti qui qualitates inhaerent; quæ quidem notio profecto aliqua idea est.

b) Præterea statim ac dixit substantiæ nomine nos collectionem exprimere qualitatum, illico subjicit, non posse nos qualitates istas concipere subsistentes; quocirca necessario supponimus substratum aliquod in quo subsistant. At qui sic dicit, nonne hoc dicit: quanquam non habeamus ideam substantiæ, tamen necessario eam habemus?

c) Ipse Lockius fatetur, substantiam sermonis humani perpetuam esse materiam. Revera quid significant nomina substantiva concreta? quid deficit in abstractis? quid connotant adjectiva? At si nomina sunt quæ substantiam significant, est profecto in mente humana idea substantiæ. Vides habere hic locum argumenta omnia, quæ contra nominales afferuntur (L. 525, seq.). Lockius enim in hac parte prorsus ad nominales pertinet.

157. 3° Errat insuper manifeste Lockius 1° quum arbitratrur nomina substantiarum nihil aliud exprimere, quam congeriem qualitatum quas sensu percepimus, ignora ratione coexistentium. Nam ipse quoque fateri cogitur, nos, præter qualitates sensibiles, illarum quoque subjectum concipere. Revera quis dicat in pomi v. gr. conceptu nihil aliud comprehendendi, nisi figuram, colorem, dulcedinem coexistentes? Imo figuratum, coloratum et dulce mente apprehendimus, atque ita ut quanquam dici nequeat: figura est color vel dulcedo; dici tamen possit: figuratum est coloratum et dulce.

Quum igitur de substantia cogitamus, aliquid constans et unum cogitamus, licet qualitates sint multæ et variabiles. Nec necessario modos attendimus, quum de substantia cogitamus; imo possumus substantiam concipere in qua nullæ sint qualitates, ut quum substantiam divinam concipimus.

Errat 2^o quum asserit qualitatibus subjectum arbitrario a nobis supponi. Ad hoc enim ipsa rerum consideratio nos adducit (145). Insuper qualitatis notio supponit id quod *quale* est. Demum si qualitates sunt sine subjecto, jam ipsæ per se sunt, adeoque sunt totidem substantiæ.

158. Hæc Lockius opponit. I. Nulla sensatio ideam offert substantiæ, nec reflexio in sensationes eam gignit. Ergo.

Resp. 1^o Exinde consequitur solum, falsum esse Lockii systema de idearum origine; consequitur esse in homine aliquid aliud præter sentiendi ac reflectendi vires; et sensationes cum ideis non esse confundendas (L. 460, 462). Idea substantiæ pertinet ad intellectum qui illam efformat occasione sensationum, quum in earum objectis, et directa cognitione et reflexa, ea attingit, quæ ipse solus potest cognoscere.

Unde resp. 2^o *Dist. 1^a partem ant.*: Sensatio pura, *trans.*; sensatio cum intellectuali cognitione conjuncta, *nego*.

Simili modo *dist. 2^a part.*: Reflexio in sensationes puras, *conc.*; in ideas formatas occasione sensationum, *nego*.

159. Obj. II. Id quod idea substantiæ exhibetur, nihil aliud revera est quam congeries qualitatibus ignota ratione coexistentium. Ergo præter ideas qualitatibus, nihil aliud continet idea substantiæ.

Resp. *Neg. totum*, et Lockius ipse hoc nobiscum negat (156, 2^o).

160. Obj. III. Saltem fatendum est, quod quum qualitates istas respicimus ut subjecto inhærentes, hæc suppositio gratuita est et absurda. Quidnam enim sit hoc sustentaculum plane ignoramus.

Resp. *neg. ant.* Ad prob. *Dist.*: Ignoramus quid sint particulares substantiæ, *trans.*; quid sit substantia in genere, *nego* (154, 156, 1^o).

Inst. Ergo hæc notio, cum indeterminata sit, est inutilis.

Resp. *Nego*. Secus ideæ omnium communissimæ inutiles essent, et idea entis, quæ omnes transcendit, inutilis maxime.

ARTICULUS IV.

Substantiæ divisiones quædam.

161. Divisit Aristoteles (1) substantiæ rationem in *primam* et *secundam*. *Prima*, quæ proprie et primo substantia dicitur, est substantia singularis, ab eoque definitur: *quæ neque de subjecto aliquo dicitur, neque in subjecto aliquo est*: nempe non prædicatur de ullo sibi inferiori, quemadmodum universale, nec inhæret alteri, quemadmodum accidens.

Secundæ substantiæ sunt species vel genera, seu potius rationes specificæ vel genericæ (L. 540); quæ *non sunt in subjecto*, et per hoc ab accidente distinguuntur, sed *dicuntur de subjecto*: universale enim de individuis enuntiatur. Vocantur secundæ substantiæ, quia secundario eis convenit ut *substant* affectionibus: non enim per se hoc eis convenit, sed per individua, quæ sunt primæ substantiæ. Has autem denominationes induxit Aristoteles ut impugnaret platonicos, qui universales substantias per se primo extra singularia subsistere opinabantur (L. 530), atque idcirco eas appellabant primas, singulares vero secundas.

* 162. In hac divisione tria sunt advertenda.

1^o Ejus membra non re. sed ratione distingui. Universalis enim natura non distinguitur re a natura singularium.

2^o Primam substantiam primo ac per se substantiam esse, secundam autem solum ratione primæ, quatenus intime est in individuis, et non potest subsistere separata.

3^o Relationem hanc ordinis, quod nempe subsistere conveniat primo ac per se primæ substantiæ, secundario ac per primam secundæ, non esse relationem realem, sed ex nostro concipiendi modo consurgere.

(1) *Categ. c. V.*

165. Altera substantiæ divisio est in *simplicem* et *compositam*.

Substantia quæ unitate perfectissima (95) gaudet, i. e. quæ nec partibus physicis (L. 107) constat, nec in physicas partes resolvi potest, substantia est simplex. Quæ physicis constat partibus certa ratione conjunctis, et in plures partes resolvi potest, substantia est composita.

164. De substantia tum simplici tum composita suis locis instituetur disputatio: interea hæc statuere juverit.

1° Compositæ substantiæ essentia ex certa certarum partium conjunctione consurgit. Separatis enim partibus, aut una aliqua earum sublata, aut mutata conjunctionis ratione, tale compositum omnino cessat (52, 40).

2° Omnis composita substantia, cum in partes dividi possit, mutationi ac dissolutioni per se est obnoxia; adeoque essentialiter contingens.

3° Partes physicæ quæ compositam substantiam constituunt, sunt totidem substantiæ. Non possunt ab invicem actu separari, et separatæ esse perstant. Ergo per se sunt.

4° Omne corpus est substantia composita; ut enim experientia constat, corpus omne divisibile est saltem in partes homogeneas (L. 108). Quædam vero corpora coalescunt ex corporibus specie diversis, ut ex. gr. aqua; quædam non, aut saltem utrum ex diversis constant non est adhuc exploratum. Corpora hæc vocantur a chimicis substantiæ simplices, non eo quod partibus careant, ut patet, sed quatenus non coalescunt ex substantiis specie diversis. Cætera vero corpora vocantur substantiæ compositæ, vel antiquo nomine mixta.

5° Experientia demonstrat, mirabilem plane et incomprehensibilem esse numerum partium, nempe substantiarum (3°), quæ in modica materiæ particula continentur. Sed certum est, in harum divisione partium, ad primitiva quædam elementa deveniendum tandem esse, quanquam ad illas experientia pertingere non possit. Hæc autem elementa sunt primitivæ substantiæ, quæ certe simplices sunt, quatenus ex

pluribus substantiis actu distinctis non coalescunt; utrum vero extensione aliqua continua prædita sint, an puncta sint omnino simplicia, tunc investigabimus, quum de corporis essentia deque horum elementorum natura plenior instituetur disputatio.

165. Ex his quæ de composita substantia dicta sunt, facile intelliges, quid sit substantia *completa* et *incompleta*.

Completa substantia est ea quæ, sive simplex sit sive composita, ex se non ordinatur ad compositum substantiale constituendum. Hujusmodi est Angelus, sol, massa auri, homo, planta etc.

Incompleta est ea quæ ex se ordinatur ad substantiale compositum, ut anima hominis, ejusque corpus, ramus arboris, manus etc.

Sed de his in articulo sequenti.

ARTICULUS V.

De supposito et persona.

166. Colligitur ex modo dictis, substantias quasdam partis rationem habere, quatenus ad aliud perficiendum ordinantur et ad alterum accedendo complentur, ut est v. gr. corpus aut anima aut manus relate ad hominem: quasdam vero alias partis rationem non habere, quia non sunt addictæ alteri perficiendo nec ab altero complentur, sed sibi relictæ, sunt aliquid in se integrum atque completum, ut est v. gr. homo totus. Jam substantiæ singulares, in quibus hæc integritatis et proprietatis ratio invenitur, *supposita* dicuntur, et græco nomine *hypostases*. Est igitur suppositum: *substantia singularis, quæ per se integrum quoddam est atque completum*; videlicet: *quæ nec alterius pars est, neque uti pars spectari potest*. Modus hic existendi abstracte consideratus dicitur *subsistentia*.

Definito supposito, habes *personæ* definitionem. Persona enim est *suppositum rationale*; adeoque substantia singularis, quæ ratione pollet, quæque per se integrum quoddam est atque completum.

167. Aliis verbis persona cum Boëtio (1) definiri solet: *naturæ rationalis individua substantia*. Sed notandum est, voces illas; *individua substantia*, non significare simpliciter substantiam quacunque physice unam, sed substantiam completam quæ per se ac seorsim cohæret. Vox enim *substantia* ponitur quasi genus commune primæ ac secundæ substantiæ (161); vox autem *individua* eam determinat ad substantiam primam ut est perfecta substantia, nempe divisa ab omni alio sui que juris, non pars alterius (2). Porro si definitio hæc ita intelligatur quemadmodum intelligi debet, a definitione superius tradita nullatenus discrepat.

* 168. Ex data suppositi definitione ejus proprietates eliciuntur.

1° Esse convenit supposito primo ac per se; quia totum est id quod est; partes vero sunt id quo aliud est. Est quidem et partibus suum esse, sed ordinatum ad esse totius; quod et de naturâ suppositi dicendum. « Esse pertinet et ad naturam et ad hypostasim: ad hypostasim quidem sicut ad id » quod habet esse: ad naturam autem sicut ad id quo aliquid habet esse. » Ita S. Thomas (3).

2° Suppositum est maxime per se. Nam neque est in alio *ut in subjecto*, quod est accidentis; neque est in alio *ut de subjecto*, quod est speciei vel generis (161); neque est in alio *ut in toto*, quod proprium est partis.

3° Habet naturam, et quidquid naturæ inest, sive necessario sive contingenter. Id enim in ente cætera habet, quod dignissimum est et præstantissimum in composito; reliqua habentur. Jamvero totum est dignius partibus. Totum ergo habet, partes habentur. Suppositum autem est totum. Ergo. Sic dicimus hominem habere animam, corpus, facultates, scientiam, virtutem etc., hæc autem haberi ab homine.

4° Est sui juris, non alteri addictum nec res alterius. Hoc enim est proprium partis, quæ non sibi est sed toti, non sua est sed totius.

(1) Lib. *De duabus nat.*

(2) V. S. Th. *sum. th.* p. 1, q. XXIX, a. I ad 2.

(3) *Sum. th.* p. 1, q. XVII, a. II.

5° Est id quod agit. Ejus enim est agere cujus est esse. Esse autem est proprie totius (1°). Pars vero non est id quod agit, sed id quo suppositum agit.

Hinc intelliges receptissimum illud axioma: *actiones sunt suppositorum*: nempe quia suppositum est principium *quod agit*, natura autem *principium quo* actiones fiunt. Hinc actiones suppositis imputantur ab iisque denominantur. Sic homini tribuuntur actiones mentis et manus, et Deo Verbo actiones humanæ Christi naturæ.

6° Hinc patet cur substantia ita perfecta et completa dicatur suppositum; nempe quia de substantia tali prædicantur omnia quæ ad ens pertinent, tanquam de subjecto.

169. Ex datis notionibus hæc facile assertiones deducuntur.

1° Substantiæ quæ naturaliter ordinantur ad hoc ut sint alicujus compositi partes, rationem suppositi non habent, sive actu compositum constituent sive non. Semper enim partis rationem præ se ferunt partisque imperfectiones retinent.

2° Generatim loquendo una eademque substantia potest esse suppositum, et non esse. Erit suppositum, si seorsum ac per se cohæreat: non erit, si tanquam pars alteri uniat.

3° Hinc substantiæ quædam sola additione cessant esse supposita; sic binæ aquæ guttæ, quæ duo supposita sunt, si jungantur, unum constituunt. Ex eadem ratione, sola divisione, ex uno supposito plura fiunt, si tamen quæ divisa sunt ordinem ad aliud adhuc non præferant (1°). Sic tabula marmorea, in duas partes dissecta, in duo dividitur supposita, *quia separatio dat utrique partium totalitatem*, ut ait S. Thomas (1).

4° Quum binæ substantiæ finitæ in unum coeunt, ratio suppositi nec in una est nec in altera, sed in composito ex utraque: quia utraque substantia, cum in toto et per totum perficiatur, partis rationem habet. Patet id in humano composito.

(1) III *Sent.* D. V. q. III, a. III. ad 5

5° Repugnat absolute substantiam infinite perfectam suppositum ac personam non esse : substantia enim infinite perfecta non potest unquam carere eo, quod substantiam in suo genere maxime perfectam facit (168).

6° Si finita substantia ad personam infinite perfectionis accederet ac propria illius fieret, hoc ipso suppositum non esset. At persona illa infinita, cum perfici non possit nec suam amittere integritatem (5°), personæ dignitatem in unionem hac non amitteret, sed assumptam naturam ad suam traheret personalitatem. Quare in composito hoc personæ ratio non exsurgeret ab utraque natura, ut quum binæ substantiæ finitæ simul componuntur (4°), sed a solo assumptum ; ac propterea compositum, servata duplicis naturæ distinctione, esset persona ipsa assumptis. Hæc in incarnatione divini Verbi ita omnino facta esse, christiana fides docet. Et exinde est, quod unio divini Verbi cum humana natura *hypostatica* dicitur ; non enim in unam naturam Deus et homo coaluerunt, sed unica hypostasis Verbi, quæ divinam habebat naturam, humanam quoque coepit habere.

7° Ubi duæ sunt naturæ, ibi duo quoque sunt operationum genera. In Christo duæ naturæ sunt et una persona. Idcirco duo sunt operationum genera, operatio autem utraque personæ propria est (198, 5°). E converso in sancta Trinitate una est operatio externa trium personarum, quia una est earum natura.

8° Si hæc vera sunt, concludere necesse est, quamquam aliis aliter visum fuerit, personalitatem non addere naturæ existenti aliquam novam realitatem, sed statum solummodo quemdam ac modum existendi (148). Unde si naturam subsistentem consideres, natura et suppositum, seu persona, sola ratione conceptuque mentis differunt. Conceptus enim naturæ præscindit ab integritatis et proprietatis conceptu ; conceptus autem personæ hunc continet (1).

(1) Cf. præclarum oppido atque in hac materia classicum opus Claudii Tiphani S. J., cui titulus : *Declaratio ac defensio scholastica doctrinæ SS. Patrum Doctorisque angelici de hypostasi et persona.*

ARTICULUS VI.

De accidentibus generatim.

170. Accidentis notionem una cum notione substantiæ jam utcumque declaravimus (145, 146). Est videlicet *ens quod est in alio tanquam in subjecto*. Ad quam definitionem melius intelligendam, animadvertite pluribus modis unum esse in alio ; est enim pars in toto ; est effectus in causa ; corpus in loco ; contentum in continente etc. Ab his omnibus modis essendi in alio, differt *esse in alio ut in subjecto* : quod quid sit ita exponit Aristoteles. « In subjecto esse dico, quod ita » est in aliquo, ut non sit ejus pars ; quodque impossibile » est esse sine eo in quo est (1). » Accidens igitur est in alio, sed non ut pars in toto ; non enim accidens pars est subjecti, nec potest ab eo in quo est separatim existere, quemadmodum effectus potest esse extra causam, corpus extra datum locum, et contentum extra continens. Nihilominus accidens est ens, ac vere dicitur ens et res (11) ; quia non est nihilum, sed realitas determinata quæ actu existit ; tamen est ens quod habet esse in alio, et res est realitatis alterius, seu, ut dixit idem Aristoteles (2), *ens entis*. Unde accidens non definitur, nisi per substantiam (L. 134, 2°).

171. Sed nota 1° accidens latius et strictius accipi posse. Latius accipitur per oppositionem ad substantiam, et est quidquid aliquo modo afficit subjectum ex ejusque essentia dimanat, sive necessario, ut v. gr. proprietates et potentiæ naturales, sive contingenter, ut habitus et actus. Strictius est quidquid, salva essentia, potest esse vel abesse. Primum veteres appellabant accidens *prædicamentale* vel etiam logicum quia in Aristotelis prædicamentis (L. 45) utriusque generis accidentia collocantur ; alterum *prædicabile*, quod opponitur proprio (L. 37, 5°).

2° Quædam accidentia intrinsecus afficere proprium subjectum illudque modificare, ut sunt v. gr. potentiæ, actus et similia : hæc vocabantur a veteribus accidentia *physica*.

(1) *Antepred.* c. 11.

(2) VII *Met.* texte 2.

Quædam vero non intrinsecus afficere subjectum, nec proprie inesse illi; sed potius esse circa illud, vel aliquo alio modo ad illud extrinsecus referri, ut locus aut vestis. Hinc denominationes quas ex his subjectum accipit, dicuntur *denominationes extrinsecæ*.

Ex his concluditur accidentis notionem univocam non esse, sed analogam: ac primo quidem convenire accidentibus physicis, quæ vere insunt subjecto, secundario vero ac per proportionem denominationibus extrinsecis.

Nota adhuc 3^o quædam accidentia ipsam immediate afficere substantiam, ut v. gr. potentiæ; quædam alia mediate solum substantiam afficere, immediate alia accidentia. Sic v. gr. actus immediate modificant potentias, et his median- tibus substantiam.

172. Duæ quæstiones acutæ satis et implexæ superessent hoc loco tractandæ: 1^a de distinctione quæ intercedit inter accidens et ejus subjectum: 2^a utrum absolute sit de accidentis essentia ut inhæreant subjecto. Sed utraque quæstio non potest hoc loco pro dignitate resolvi. Pendet enim solutio a perfectiori cognitione ipsorum accidentium in specie: idcirco quum de singulis agatur, duplicem hanc quæstionem distincte enodabimus.

Quoad 1^m igitur dicere in præsentī sufficiat, si accidens latiori sensu accipiat (171, 1^o), non necessario omne id quod hac ratione dicitur accidens, a substantia distingui. Multa enim accidentia hujusmodi sunt duntaxat modi (148) sui subjecti, ut sunt extrinsecæ denominationes, et quædam alia de quibus postea.

Si vero ad accidens physicum quæstio coarctetur, hoc est quod alibi inquirendum esse diximus.

Quoad 2^m scholastici veteres dividebant accidentia in *modalia* et *absoluta*; dividebant pariter inhæSIONem in *actualem* et *aptitudinalem*. Modalia porro aiebant non posse unquam non inhærere subjecto inhæSIONE actuali; absoluta vero habere sibi essentialē inhæSIONem aptitudinalem, quatenus et ex se apta sunt ad afficiendam substantiam, et hoc illis convenit secundum propriam naturam; at posse per divi-

nam virtutem conservari a subjecto separata. Quæ postrema assertio an possit cum physicæ scientiæ placitis componi, et quomodo, et intra quos limites, hæc, inquam, omnia investigare, ut jam diximus, alterius est loci.

173. Entis affectiones latissimo sensu acceptæ (171, 1^o) aliæ absolute illud afficiunt, nempe sine respectu ad aliud, aliæ secundum respectum ad aliud. Primum genus continet *qualitatem* et *quantitatem*; alterum *relationes* omnes sive intrinsecas sive extrinsecas. De quantitate loquimur ubi de corporibus erit sermo. Nunc primo de qualitate, deinde de relatione.

CAPUT II.

DE QUALITATE.

ARTICULUS I.

De qualitatis notione ac partitione.

174. Qualitas, prouti species est accidentis quæ peculiari modo substantiam afficit, definiri potest juxta Albertum magnum (1): *accidens complens ac perficiens substantiam tam in existendo, quam in operando*. Quæ definitio vel ex eo se probat, quod qualitatem a cæteris accidentium speciebus (173) satis distinguit; nam nec quantitas nec relatio, sive intrinseca sive extrinseca, substantiam complent ac perficiunt; et præterea nihil est quod qualitatis nomine veniat, cui eadem definitio optime non conveniat. Ex ea porro definitione illico consequitur qualitatem proprie dictam substantiis solummodo finitis inesse posse. Etenim hæc solum compleri ac perfici possunt, ac ut perficiantur indigent; infinita vero substantia accidentalem perfectionem non habet, sed essentialē.

175. Ex his intelligitur 1^o cur qualitas dicatur a veteribus *accidens quod formam consequitur*. Nam, inquit Suarez: » quia forma est quæ complet ac perficit essentiam rei, et » confert principalem vim agendi; ideo qualitas quæ » adjungitur ad complementum utriusque perfectionis, di-

(1) In prædicam. c. I.

» citur consequi formam sive per dimanationem, sive per
» quamdam convenientem proportionem (1). »

Intelligitur 2^o descriptio illa altera qualitatis, qua dicitur:
*determinatio subjecti ad aliquod esse accidentale secundum
debitam mensuram* (2). Quia videlicet determinat substantiam
perficiendo illam secundum formam principalem, quæ est
cæterorum, quæ in ente esse debent, mensura.

Intelligitur 3^o cur differentiæ rerum, quando earum igno-
ratur essentia, per qualitates communiter assignentur. Nempe
quia per qualitates res in suo esse complentur.

Patet imo 4^o cur ipsæ specificæ generum differentiæ, eorum
qualitates appellantur; ut quum interroganti: quale animal
sit homo, respondemus esse rationale (L. 39). Nam quemad-
modum accidentales qualitates complent ac perficiunt sub-
stantiæ essentiam, ita essentialis differentia genus complet
ac perficit. Proportionem igitur quadam hæc quoque essen-
tialis perfectio qualitas appellatur.

176. Qualitas omnis, ut ex definitione immediate colligi-
tur, vel ad ipsum esse substantiæ perficiendum ordinatur,
vel ad ejus operationem. Sub prima specie continentur:
1^o *figura*, quæ modus est seu terminatio quantitatis, quæque
forma rei externa dicitur, prouti consideratur ut est in sub-
jecto corporeo: 2^o *sensibiles qualitates*, saltem quatenus ex
ipsa corporum sive permanenti constitutione sive transeunte
immutatione resultant: 3^o demum omnis alia qualitas, si
qua sit, quæ neque operatio sit nempe ad operationem per
se primo ordinetur, sed ad perficiendam exornandamque
substantiam. Præterea 4^o quædam sunt qualitates *ex pluribus
aliis resultantes*, ut sanitas, quæ ex humorum temperamento;
et pulchritudo, quæ ex partium dispositione, figura et colo-
ribus coalescit; ac status corporum diversus, ex quo vel so-
lida sunt vel liquida vel aerea, qui varii status ex diversarum
virium temperamento consequuntur.

177. Altera species comprehendit quidquid substantiæ ac-
cedit, tanquam proximum operationis principium. Sub hoc

(1) *Met. Disp. XLII, sect. 1, § VI.*

(2) *Cf. S. Th. Sum. th. 1. 2. p. q. XLIX a. II.*

continentur 1^o *potentiæ naturales*: 2^o *dispositiones et habitus*.
Nam vel proximum operandi principium a natura insitum
est, vel ei quod natura tribuit adjungitur. Jam vero primum
est naturalis potentia, alterum est habitus vel dispositio: ha-
bitus quidem si ex se sit permanens et durabile, ut scientia
vel virtus: dispositio vero si facile transmutabile sit, ut est
sensatio vel appetitio.

178. Hanc qualitatis partitionem, quæ ex ipsa definitione
sponte fluit, omnium optimam in præsentī existimo: nihil
enim in ea esse videtur, quod cum physicorum recentiorum
placitis congruere non possit. Cæterum de qualitatibus quæ
ad esse substantiæ perficiendum pertinent, non est nunc dis-
serendum; aliquid solum dicemus de specie altera; quia
conceptus, quos ea continet, abstractionem metaphysicæ ge-
neralis propriam participant.

ARTICULUS II.

De potentia.

179. Potentiæ nomen latissime accipitur ad possibilitatem
significandam; et secundum hanc acceptionem dicimus ens
aliud esse in actu, aliud in potentia (34). Non in hac latitu-
dine significationis nunc de potentia loquimur, sed ut pres-
sius accepta certam qualitatis speciem designat. Sic autem
accepta definitur: *principium proximum alicujus operationis,
ad eamque natura sua institutum et ordinatum*. In qua defi-
nitione hæc advertenda sunt.

1^o Potentiā dici principium proximum operationis. Prin-
cipium enim principale est ipsa substantia, quæ per poten-
tiam operatur.

2^o Operationis nomine venire actum qui a potentia dima-
nat, sive transeat in alterum subjectum, ut percussio, sive
maneant in ipsa potentia, ut cogitatio.

3^o Dici potentiam principium operationis, spectata ipsa
operatione in se, non vero spectato ejus modo; nam quoad
modum operatio ab aliis quoque principiis dependet, ut v.
gr. ab habitu.

4^o Tandem potentiam dici principium quod ad operatio-

nem natura sua institutum et ordinatum est. Si enim qualitas ad hoc per se primo non sit instituta, sed ad perficiendum aut conservandum subjectum, proprie non videtur appellanda potentia, licet consequenter vel per accidens operetur. Certum autem indicium erit, qualitatem ad aliquam operationem ita ordinari, quando, necessitate illius operationis seposita, non necessariam illam aut etiam superfluum existimari oporteret; ut v. gr. voluntas sine suis actibus esset plane supervacanea, imo neque concipi posset. Contra autem quum qualitas, etiam certa aliqua operatione seclusa, adhuc necessaria vel utilis est ad substantiæ perfectionem, hoc indicio erit, eam propter operationem illam non esse; ut v. gr. vis radios luminosos reflectendi aut absorbendi aut refringendi, quæ vires ex ipsa natura corporum eorumque constitutione consequuntur.

180. Celeberrima est potentiæ divisio in activam et passivam. Potentia activa est *principium mutationis in alio*. Passiva autem *principium recipiens mutationem ab alio*. Quæ divisio melius intelligitur ubi sermo erit de causis. Nunc hæc breviter notare sufficiet:

1^o Potest eadem potentia esse activa et passiva saltem respectu diversorum actuum, ut v. gr. intellectus, quatenus abstrahit vel attendit, activa potentia est, quatenus idea informatur, passiva.

2^o Nomine potentiæ *passivæ* non intelligitur potentia pure passiva (forte enim nulla poterit inveniri in genere qualitatis potentia huiusmodi); sed potentia quæ non agit, nisi ab alio moveatur, ut est v. gr. sensitiva facultas.

3^o Activæ potentiæ sunt vel pure activæ, vel activæ simul et passivæ. Potentia pure activa est quæ elicit suum actum, sed illum non recipit, ut est facultas locomotiva in animali: actus enim huius potentiæ non in ipsa potentia recipitur sed in membris. Est autem activa simul et passiva quæ et elicit suum actum et illum recipit, ut est v. gr. voluntas humana.

4^o Juxta Leibnitzium *vis* a potentia activa in hoc differt, quod « potentia seu facultas nihil aliud est quam propinqua

» agendi possibilitas, quæ tamen aliena excitatione et velut » stimulo indiget, ut in actum transferatur. Sed vis activa » autem quemdam seu *ἐντελέχειαν* continet, atque inter facultatem agendi actionemque ipsam media est, et conatum » involvit, atque ita per se ipsam in operationem fertur; » nec auxiliis indiget, sed sola sublatione impedimenti. » Quod exemplo gravis suspensi funem sustentem intendis; eut arcus tensi, illustrari potest (1). » Quæ distinctio, quidquid sit de leibnitzianis theoriis circa corporum vires, rejicienda sane non est, imo rerum naturæ valde consentanea videtur.

5^o Vis *passivæ* nomine apud recentiores post Keplerum venit corporum *inertia*, seu vis qua corpus vi activæ in se exercitæ resistit.

6^o Vis activa alia dicitur *viva*, alia *mortua*. Viva dicitur quæ cum actuali motu conjuncta est; mortua quæ cum motu non est conjuncta.

181. Cum potentia ad actum ordinetur, manifestum est potentiarum differentias ab actibus desumi; ideo non definiuntur nisi per actus (L. 134, 3^o). Differunt igitur potentiæ secundum actuum diversitatem. Actuum porro diversitas a diversitate objectorum desumitur. Nam, ut ratio cinatur S. Thomas: « Omnis actio vel est potentiæ activæ, vel » passivæ. Objectum autem comparatur ad actum potentiæ » passivæ, sicut principium et causa movens... Ad actum » autem potentiæ activæ comparatur objectum, ut terminus » et finis... Ex his autem duobus actio speciem recipit, sci- » licet ex principio vel ex fine seu termino (2). » Ita v. gr. actus videndi et audiendi inter se differunt, quia a diversis objectis, luce nempe ac sono, determinantur; itemque actus loquendi et judicandi inter se differunt, quia ad diversa objecta, tanquam ad terminum tendunt, ille ad significationem idearum, hic ad compositionem.

182. Notandum autem quod subdit idem S. Thomas, vi-

(1) De primæ philosophiæ emendatione. Inter Leibnitzii Opera T. II, pag. 20 edit. Genevæ MDCCCLXIII.

(2) Sum. th. p. 1, q. LXXXVII, a. III.

delicet: « Non quæcunque objectorum diversitas diversificat » potentias animæ sed differentia ejus ad quod per se » potentia respicit. » Sensus v. gr. per se respicit qualitatem sensibilem quæ per se, quatenus nempe sensibilis est, dividitur in colorem, sonum et similes, quæ sunt diversimode sensibiles, et idcirco alia potentia est coloris et alia soni. Quod autem res colorata sit magna vel parva, homo aut lapis, hæc omnia respectu rei sensibilis se habent per accidens. Ideoque secundum hæc potentiæ non distinguuntur.

ARTICULUS III.

De habitu.

183. Habitus ab *habendo* secundum tot significationes derivatur, quot verbo *habere* tribuuntur. Has significationes enumerat Aristoteles (1).

Generatim tamen duobus modis ab habendo habitus denominatur (2).

1° Secundum quod una res habet aliam rem; sic dicimur habere qualitatem, quantitatem, amicum, domum; et continens dicitur habere ea quæ continentur in ipso, et totum habere partes, et si quæ sunt similia. Juxta hanc ergo significationem habitus, seu potius *habitu*, est res quæ habetur.

2° Secundum quod una res aliquo modo habet se in se ipsa, vel ad aliquid operandum. Et secundum hoc habitus est ipse modus se habendi, bene nempe vel male, sive in ordine ad propriam naturam, ut est sanitas, sive in ordine ad propriam operationem, ut est virtus.

184. Sed omissis iis quæ subjectum bene vel male in suo ipso esse immediate disponunt (176), strictius dicitur habitus id quod subjectum ad operandum bene vel male disponit. Nec immerito: nam perfectio rei ultima in operatione consistit; est enim operatio vel finis naturæ, vel ad finem naturæ perducens. Tunc ergo maxime res bene vel male

(1) *Categ. th. ult.— V. Met. c. XX, XXXIII.*

(2) *Cf. S. Th. Sum. th. 1, 2 p. q. XLIX, art. I et III.*

disponitur, quum ejus potentiæ ad operandum bene vel male disponuntur. Hoc igitur sensu acceptus habitus definitur: *qualitas ex se stabilis in subjecto, per se primo ordinata ad facultatis operationem adjuvandam ac facilem reddendam.* Definitio et ex dictis clara est et ex dicendis in sequentibus assertionibus magis illustrabitur.

185. ASSERTIO I. *Esse hujusmodi habitus experientia ipsa constat tum interna tum externa.* Constat enim actus quosdam sæpius instauratos relinquere in anima pronitatem quamdam facilitatemque et quasi impulsus quemdam ad operandum; quæ facilitas, quasi nova quædam facultas, in ipsa manet, etiamsi ab actibus cesset. Ex qua fit ut operationes etiam difficillimæ, quæque, cum magnam industriam attentionemque ad plura requirant, prolixam satis temporis moram primo expostulant, deinde citissime et propemodum sine ulla attentione exerceantur; ut videre est v. gr. in iis qui cytharam pulsant vel scribunt vel legunt.

186. ASSERTIO II. *Subjectum proximum habituum, saltem in ordine naturali, de hoc enim loquimur, sunt entis potentiæ.* Est enim habitus perfectio quædam, qua principium operationis proximum informatur atque inclinatur ad actum. Principium autem operationis proximum sunt potentiæ.

187. ASSERTIO III. *Non tamen omnis potentia habituum est capax, sed illæ solum quæ non sunt natura sua ad unum tantummodo actum determinatæ, sed pluribus modis determinari possunt, atque ad diversos actus sunt indifferentes.* Hujusmodi namque potentiæ, cum sint ad singulas actuum species indeterminatæ, capaces sunt ulterioris illius determinationis quæ ab actibus relinquatur, quæque inclinatione ac promptitudine ad ejusdem generis actus instaurandos continetur. Id quod manifeste perspicitur in humana voluntate.

Illæ vero potentiæ, quas natura ipsa ad certam actuum speciem determinat, omnis plane habitus sunt incapaces. Nihil enim est quod ad ejusmodi determinationem addi possit, quo facilius ac promptius potentiæ ad agendum inclinatio fiat. Nam vi determinationis illius potentia prodit in actum naturali necessitate: nulla autem inclinatio major

necessitate naturæ. Ita v. gr. videmus vires materiales nullatenus exercitio perfici.

188. Colliges ex dictis 1° capaces habituum esse in primis facultates rationales; hæ enim natura sua indeterminatæ maxime sunt. Voluntas quidem humana indeterminata est, quia gaudet arbitrii libertate, adeoque indifferens est ad operandum vel secus. Intellectus quoque, licet in se sit potentia necessaria, tamen quia non modo ab objectis ad actum reducitur, sed etiam ad consideranda tum objecta tum proprias ideas diversimode applicari potest, ad hanc considerationem facilitatem acquirit, ut experientia demonstrat in arte v. gr. aut scientia.

2° Vires sensitivas per se non esse habitus capaces; ex instinctu enim operantur naturæ; sed quatenus in homine imperio rationis subduntur, ad diversa ordinari, ac proinde habitus suscipere posse, ut patet in virtutibus et vitiis.

3° In brutis animantibus habitus non habere locum, si illa sibi relinquuntur; quia tamen bruta rationi hominis subduntur, posse ab ipso homine disponi ad aliquid certo modo operandum per quamdam consuetudinem. Dispositio autem hæc et consuetudo proprie non est habitus nec inclinatio potentiarum ad actum, sed potius in eo tota contineri videtur, quod phantasma quo potentia ad actum determinatur, imaginationi firmiter inhæreat. Sed de his omnibus commodius suis locis.

189. Pauca nunc de habituum causa.

ASSERTIO IV. *Habitus alii sunt infusi, alii acquisiti; sunt etiam habitus qui naturales dicuntur.*

Habitus infusus ille est, qui influxu ipsius Dei producitur. Qui quidem, quoad ipsam rem, contineri potest intra naturæ limites, ut fuit v. gr. donum linguarum Apostolis collatum; vel omnem naturæ facultatem excedere, ut est v. gr. habitus fidei vel charitatis supernaturalis. Sed de his theologice.

190. Habitus acquisiti generantur per actus. Notandum porro habitus hoc pacto generari solummodo in iis potentiis, quæ ad proprios actus eliciendos aliquo modo moventur ac

passive se habent. In his autem quomodo per actus generetur habitus, sic exponit S. Thomas: « Omne quod patitur et movetur ab alio, disponitur per actum agentis: unde ex multiplicatis actibus generatur quædam qualitas in potentia passiva et mota, quæ nominatur habitus; sicut habitus virtutum moralium causantur in appetitivis potentiis, secundum quod moventur a ratione; et habitus scientiarum causantur in intellectu, secundum quod movetur a primis propositionibus (1). »

191. Postremo quidam habitus naturales dicuntur, secundum inchoationem quamdam ipso habitus, quæ ad naturam pertinet sive speciei sive individui. Hoc pacto in ipsa natura hominis est habitus principiorum, de quo in logica diximus (L. 554). Et in individuis sunt quidam habitus inchoati ex ipsa corporis complexione atque organorum dispositione, quibus quidam redduntur aptiores ad cognoscendum, vel promptiores ad virtutum vitiorumve actus, quam alii; quemadmodum dicimus esse in aliquibus naturalem prudentiam aut artem, et quosdam natura ferri ad mansuetudinem vel ad iram.

Sed notandum est, naturales hasce dispositiones esse potius inchoationes habituum quam habitus; ac revera ab ipsis potentiis non distingui. Quapropter etiam in his habitus proprie dicti exercitio actuum efficiuntur.

192. Dispositio (177), ut et de hac aliquid dicam, 1° latissime accipi potest, et sic accepta definitur: *ordo habentis partes*; 2° accipi potest genericè, nempe tanquam genus habitus, et est *qualitas perficiens aliquo modo potentiam*; 3° deum specificè, et sic distinguitur contra habitum, estque *omnis actus immanens potentiarum*; quia solummodo hi actus subjectum perficiunt, ut postea dicetur. Ab habitu autem differt, quia habitus est ex se permanens ac difficile transmutabilis, operatio vero fluens ac facile transmutabilis, ut quæ ab actuali influxu potentiæ pendet (2).

(1) *Sum. th. 1, 2. p. q. LI. a. II.*

(2) *Cf. Suarez. Met. Disp. XLII. Sect. III. § V, seq. et Sect. VII, § XII seq.*

ARTICULUS IV.

De qualitatū contrarietate.

193. Tres qualitatis proprietates recenset Aristoteles (1): 1^a est, in qualitatibus contrarietatem propriam inveniri: 2^a qualitatem intensionis ac remissionis capacem esse: 3^a secundum qualitatem res dici similes vel dissimiles. De postrema hac in sequentibus nonnihil dicemus: nunc aliquid de primis duabus.

194. Contraria sunt, juxta ejusdem Aristotelis definitionem: *quæ sub eodem genere maxime distant, et ab eodem subiecto mutuo se expellunt* (2).

Sunt igitur 1^o duæ res positivæ. Nam positivum cum negativo, non contrarie, sed contradictorie vel privative pugnat (L. 52, 1^o2^o). Sunt autem duo positiva non subsistentia; sed subiecto apto inhærentia. Substantiæ enim qua tales nullam inter se contrarietatem habent.

2^o Sub eodem genere continentur; videlicet vel proximo vel remoto. Nam contraria eidem subiecto vicissim insunt ex rei natura. Transitus autem ab uno ad aliud non fit per se inter ea quæ genere differunt; non enim v. gr. fit transitus a loco in qualitatem. Ac præterea si subiectum idem capax est divisim utriusque contrarii, hoc ideo est, quia contraria convenientiam aliquam habent, nempe in aliqua ratione generica coeunt. Inductione autem ostendi potest, non in genere solum summo, sed et in aliquo genere subalterno contraria convenire.

Non possunt autem quæ vere contraria sunt, ejusdem esse speciei, ut patet; secus non se hoc pacto excluderent. Ita caloricum v. gr. corpori additum caloricum præexistens non exstinguit, nec scientia scientiam.

3^o Inter se maxime distant: id quod primo intelligitur de differentia quoad naturam et essentiam, eaque maxima, non absolute, sed sub eodem genere: nulli enim dubium, posse unum contrariorum differre magis a rebus sub alio genere

(1) Categ. Cap. de qualitatibus.

(2) X, Met. c. VI.

contentis, quam a contrario altero; magis enim distat v. gr. error a scientia, multoque magis a colore aliisque disparatis, quam ab opinione vera, quæ est ejus contrarium; nihilominus in suo genere, quod est opinionis, opinio vera et error maxime differunt.

Quod autem distantia hæc maxima sit contrariorum propria, deduces ex eo, quod contrariorum est, ut se mutuo perfecte expellant, ita ut alterum nihil habeat de altero. Medium autem, ubi datur, aliquo modo de extremis participat, adeoque quatenus medium, est, neutrum extremorum perfecte expellit.

Secundo: distantia illa maxima intelligitur de distantia quæ est inter duo extrema alicujus latitudinis, quæ percurri possit; ut est distantia inter duo extrema puncta datæ lineæ. Quæ duo puncta contraria dicuntur, quia sibi repugnant secundum rationem terminorum motus, qui in uno incipit, in altero desinit, et viceversa.

4^o Se mutuo expellunt ab eodem subiecto. Nota, expulsionem esse duplicem, *effectivam* et *formalem*. Effectiva est, quando actio unius in subiectum alterius, hoc alterum expellit, quemadmodum actus virtutis oppositum vitium excludunt: *formalis* est, quando duo ex ipsa sui essentia simul esse non possunt, quatenus alterum alterius negationem includit: hoc pacto candor nigredinem expellit; candor enim est qualitas corporis qua fit ut colores omnes diffundat, nigredo est qualitas qua colores omnes absorbentur. Ad contrarietatem porro non effectiva expulsio, sed formalis per se requiritur, quæ omnium oppositorum proprietas est (L. 51); quanquam contraria quædam etiam effective se expellant. Hinc patet quare contraria se *mutuo* expellere dicantur; expulsio enim formalis necessario est reciproca.

Non tamen ita se expellunt contraria, ut exclusio unius alterius positio sit. Hoc enim proprium est duntaxat eorum, quæ contradictorie opponuntur. Concludes contraria posse simul a subiecto abesse. Vide dicta in Logica (52, 3^o).

195. Nunc de contrarietate qualitatū.

ASSERTIO I. *Certum est, non omnes qualitates contrarium*

habere. Nam et potentiae, si proprie accipiantur (179, 4°), sine contrario sunt; figura item ac forma et habitus nonnulli, ut v. gr. habitus principiorum, contrarium non habent: quaedam quoque qualitates sensibiles, ut v. gr. calor prouti est corporum affectio; qui quanquam ut frigori contrarius a veteribus haberetur, tamen non contrarie illi, sed privative opponitur, uti omnes physicae tirones norunt; est enim frigus caloris seu potius caloricæ subtractio. Aliud dicendum de sensationibus caloris ac frigoris, quæ, quoniam utraque positivum quiddam est, contrarie opponuntur. Actiones item quibus calorem aut frigus unum corpus alteri communicat, contrariæ sunt, quemadmodum contraria sunt dare et accipere.

ASSERTIO II. *Inter habitus maxime ac dispositiones interque qualitates sensibiles contrarietas exercetur.*

ASSERTIO III. *Non solum qualitates istæ contrariæ dicuntur, sed etiam ut supra notavimus (194, 3°), termini extremi omnis latitudinis a quorum altero ad alterum transitus fieri possit eundo ac redeundo. Nihilominus solæ qualitates propriæ contrariæ sunt, ut quæ contrarietatis notas omnes unice præ se ferunt.*

ASSERTIO IV. *Ratione horum quæ contraria sunt, alia quoque multa contraria nuncupantur: nempe*

1° ea quæ contrarias qualitates habent, ut v. gr. corpus album et corpus nigrum, homo justus et homo injustus;

2° quæ actu vel potentia sunt activa principia contrariorum, ut ignis qui excitat caloris sensationem communicando suum caloricum, et glacies quæ excitat sensationem frigoris caloricum subtrahendo; vel binæ vires quæ ad extrema contraria impulsum exercent;

3° quæ contraria recipiunt alterius actione, ut corpus quod sensatione caloris, et corpus quod sensatione frigoris afficitur; vel duo corpora quæ ad extrema contraria propelluntur.

4° Ipsi motus ac mutationes positivæ quæcunque ad contrarios terminos tendentes, ut actiones omnes quibus contrariæ sensationes cientur, ascensus et descensus corporum, etc.

ARTICULUS V.

De qualitatibus intensione ac remissione.

196. In omni realitate quæ incrementi et decrementi capax est, incrementum hoc aut decrementum triplici potest modo se habere, juxta pulcherrimam S. Thomæ doctrinam (1).

1° *Secundum ipsam realitatem seu formam*; ut videlicet ipsa forma in se ipsa perfectior sit vel imperfectior. Hoc pacto augetur scientia v. gr. geometriæ, in eo qui aliquod theorema geometricum addiscit, quod antea ignorabat.

2° *Secundum participationem subjecti*; quum nempe realitas aliqua magis vel minus educitur de potentia subjecti, subjectumque reducitur in actum illius. Ita assensus v. gr. est assensus intensior, ita quoque scientia, secundum se eadem, augetur in eo, qui expeditius ac promptius scientificas conclusiones recollit.

3° *Secundum numerum*; nempe secundum pluralitatem subjectorum, quæ certam formam participant. Quod incrementi genus habetur dupliciter, nempe vel quum subjecto formam aliquam habenti aliud simile subjectum accedit, ut quum corpori luminoso aliud corpus luminosum adjungitur; vel quum aliqua pars unius ejusdemque subjecti formam, quam prius nos habebat, recipit, quemadmodum calor crescit in homine serpendo per membra, quæ prius frigebant.

197. Si primum modum incrementi forma accipiat, ipsa forma dicitur *major* vel *minor*: si secundum, ipsum subjectum dicitur *magis* vel *minus* sciens v. gr., aut amans aut fortis etc.: si tertium, proprie ita loquendum esset: *plura* vel *pauciora* esse subjecta luminosa, calida, etc.; vel idem subjectum *secundum plura* vel *pauciora* calidum esse aut frigidum, nempe secundum plures vel pauciores partes.

198. Videndum nunc quænam sint realitates seu formæ, quæ uno vel altero modo incrementi vel decrementi capaces existunt.

Itaque 1° forma omnis quæ secundum seipsam, et non per

(1) *Summ. th.* 1. 2. p. q. LII. art. I.— 2. 2. p. q. XXIV. a. V.

ordinem ad aliud, speciem aliquam et essentiam constituit, incapax plane est in seipsa incrementi ac decrementi. Essentialia enim constitutiva nec augeri possunt nec minui, quia essentiae sunt immutabiles. Ita v. gr. non potest esse albedo per se major altera albedine, aut humanitas major altera humanitate, aut substantia major altera substantia in ratione substantiae.

2^o Quæ vero speciem recipiunt secundum aliquid ad quod ordinantur, possunt secundum seipsas incrementa ac decrementa recipere. Ita scientia v. gr. geometriæ est extensive major, quo plura sunt geometrica theoremata quæ complectitur; et motus v. gr. rectilineus est intensive major aucta velocitate, idem nihilominus perstans specie.

3^o Si spectantur formæ secundum quod participantur a subjecto, possunt eæ plus minusve participari, duobus exceptis casibus:

a) Quod subjectum formam participans, secundum eandem formam speciem sortiatur. Essentiae enim sunt indivisibiles (48); quocirca si subjectum totum id habet quod certam speciem constituit, ad illam pertinet speciem; si non totum habet, jam ad illam speciem non pertinet. Hoc pacto quia homo speciem sortitur ab humanitate, non potest unus homo esse magis homo quam alter. Et ita omnes substantiae.

b) Quod indivisibilitas de alicujus formæ ratione sit. Tunc enim necesse est, ut si subjectum formam participat, indivisibiliter totam participet. Hinc *numerorum species* gradus in se non recipiunt, non enim est unum quaternarium majus altero; quia omnis numerus est certa quædam collectio et non altera. Idem dicendum de *speciebus quantitatis continuæ*; nam hæ multiplicantur secundum numeros, ut bicubitum, tricubitum, etc. Item de *relationibus* inter quantitates, ut duplum, triplum, etc., ac postremo de *figuris*, ut triangulum, tetrangulum, circulus, etc. Quamvis enim possit esse unum triangulum majus altero, quia determinata magnitudo non est de extensionis ratione, non tamen potest esse unum triangulum magis triangulum quam triangulum alterum.

199. Ex his principiis de qualitatibus intensione ac remissione hæ facile assertiones eruuntur.

ASSERTIO I. *Habitus et dispositiones tam secundum se, quam secundum participationem subjecti, crescere possunt ac minui.*

1^o *Secundum se*; nam (198, 2^o) habitus et dispositiones speciem recipiunt secundum actus et objecta ad quæ ordinantur (184, 192, 181). Crescit autem habitus, prouti ad plura se porrigit, quæ intra proprii objecti ambitum continentur, ut jam de scientia dictum est. Et hoc est augmentum quod dicunt *extensivum*.

Non tamen omnes habitus hujus incrementi sunt capaces. Scientia enim et ars plus minusve circa proprium objectum extendi possunt, at virtus nequaquam. Nam « quicumque » habet aliquam virtutem, puta temperantiam, habet ipsam » quantum ad omnia ad quæ se temperantia extendit. Quod » de scientia et arte non contingit: non enim quicumque est » grammaticus, scit omnia quæ ad grammaticam pertinent, » Et secundum hoc bene dixerunt Stoici, quod virtus non » recipit magis neque minus, sicut scientia et ars; eo quod » ratio virtutis consistit in maximo. » Ita S. Thomas (1).

2^o *Secundum participationem subjecti*. Nam (198, 3^o) nec habitus nec dispositio subjecti speciem constituunt; neque indivisibilitas est de harum qualitatibus conceptu: imo potius contrarium; quod et experientia probat. Hoc alterum augmentum genus *intensivum* appellant.

200. ASSERTIO II. *Potentiae naturales, ommissa questione utrum in diversis individuis ejusdem speciei, tam extensive, quam intensive, majores minoresve esse possint, non videntur in eodem subjecto esse graduum capaces.* Dimanant enim immediate ab ipsa essentia substantiae: essentia autem semper est eadem. Ad agendum tamen quasdam ut plurimum requirunt conditiones, et quædam possunt contra se habere impedimenta. Unde actiones earum quoque potentiarum quæ ex necessitate agunt, non eodem semper modo sunt intensæ. Multo magis actiones potentiarum, quæ libertati subduntur.

(1) *Summ. th.* 1. 2. p. q. LXVI. a. I.

Cæterum nulli dubium, potentias materialium agentium crescere additione subjecti ad subjectum (196, 3^o); ut patet v. gr. in attractionibus, quæ sunt in massæ ratione directa.

201. ASSERTIO III. *Qualitates quæ ex pluribus resultant, incrementa admittere posse vel decrementa, facile intelligitur per hoc ipsum, quod ex pluribus resultant nec in indivisibili consistunt.* Qualitates item sensibiles intendi ac remitti experientia certissimum est. Quomodo autem intensio hæc et remissio explicanda sit, consule physicos.

202. Ex his colliges, *gradum* esse quamdam propemodum qualitatis quantitatem; ac proinde æstimari gradus aliquo gradu jam noto, tanquam unitate mensuræ, assumpto.

Hujus autem mensuræ determinatio arbitrio ut plurimum subijcitur. Neque possumus in se qualitates dimetiri, sed solum in effectibus: atque hinc est, quod qualitatum sensibilibus gradus facilius determinantur, quia certos effectus ac necessarios habent.

CAPUT III.

DE RELATIONE.

ARTICULUS I.

Quid sit relatio.

203. Relatio est *habitus* seu *respectus* unius entis ad aliud. Ad relationem constituendam tria requiruntur:

Subjectum, quod et *relatum* dicitur; est ens quod ad aliud habitudinem dicit.

Terminus, seu *correlatum*; videlicet ens ad quod aliud habitudinem dicit.

Fundamentum; est id secundum quod unum ad aliud habitudinem dicit.

V. gr. Quum lineam A dico æqualem lineæ B, subjectum hujus relationis est linea A, terminus linea B, fundamentum longitudo lineæ A.

204. PROPOSITIO I. *Relatio a suo fundamento non re sed ratione duntaxat distinguitur.*

Nempe æqualitas v. gr. in linea A non est aliqua entitas in ipsa linea, distincta ab ejus longitudine absoluta, sed est ipsa longitudo, ut se habet ad aliam longitudinem B, tanquam ad terminum quem denominatio æqualis connotat. Et idcirco longitudo ab æqualitate ratione distinguitur, quia primus conceptus longitudinem absolute considerat, alter longitudinem ut hæc aliam longitudinem respicit.

Hoc autem ita esse facile comperies, si animadvertas:

1^o Posito in re fundamento et termino, hoc ipso relationem haberi, imo repugnare plane eam non haberi aut tolli manentibus illis. Est enim impossibile v. gr. ut positis duabus quantitativis, hæc non sint æquales nec inæquales, et ut positis duobus quadratis vel duobus albis, hæc non sint similia.

2^o Rem fieri similem vel æqualem alteri citra ullam sui mutationem, sed posito duntaxat altero. Ergo relationes illæ, quanquam de novo adveniant, nihil tamen in subjecto ponunt novi. Ergo ab ejus absolutis realitatibus re non differunt.

3^o Tandem entitulas illas relativas quas nonnulli confinxerunt, et sine ulla necessitate requiri, et satis ridicule excogitatas esse, et esse prorsus incredibiles.

205. Illa porro realitas quæ relationis fundamentum est, potest esse tum accidens substantiæ, tum ipsa substantia. Primum probant relationes similitudinis et æqualitatis. Alterum relationes identitatis specificæ et creationis passivæ. Si relationis fundamentum sit ipsa substantia, relatio *essentialis* est; si accidens, *accidentalis*. Quod si fundamentum relationis sit aliquid quod non in subjecto ejusdem, sed in alio consistat, relatio dicitur *extrinseca*, et pertinet ad relationes rationis, de quibus mox. Tales relationes sunt *esse cognitum* et *honoratum*; quia earum fundamentum sunt actus cognoscantis vel honorantis, non cogniti et honorati.

ARTICULUS II.

Quotuplex sit relatio.

206. Dividitur I. relatio in *realem* et *logicam*.

Relatio realis est illa quæ viget inter res independentes ab intellectus consideratione et comparatione. Talis est relatio causam inter et effectum. Causa enim, etiamsi nemo illam cogitatione referat ad effectum, habet tamen ad illum realem habitudinem.

Relatio logica seu rationis est quæ fingitur ab intellectu, quum aliquid quod in re absolutum est, tanquam formam ad aliud ordinantem concipit. Talis est relatio identitatis cum seipso: hæc enim oritur ex eo quod « ratio bis » apprehendit aliquod unum, et statuit illud ut duo, et sic » apprehendit quamdam habitudinem ipsius ad se ipsum (1). »

207. Potest autem relatio esse 1^o realis in utroque relato, ac tunc dicitur *mutua*. Æqualitas v. gr. inter duas quantitates, et connexio inter causam et effectum sunt relationes mutuae.

2^o In altero relatorum realis, in altero logica; et hæc dicitur relatio *non mutua*. Hujusmodi est relatio inter scientiam et scibile. Nam scientia ad suum objectum reipsa ordinem dicit; in objecto autem non est relatio realis ad scientem, est enim scientiæ objectum aliquid absolutum, sed solum logica, secundum quod intellectus illud ut scientiæ terminum apprehendit.

3^o In utroque correlato logica. Exemplum habes in identitate rei cum seipsa, ut est inter subjectum et prædicatum propositionis.

208. Relatio porro mutua potest esse tum ejusdem denominationis, tum diversæ. Ejusdem denominationis est, quum fundamentum relationis est ejusdem rationis in utroque relato, eodemque modo utrumque denominat. Talis est relatio similitudinis, puta inter duos homines; propter hanc enim uterque dicitur alteri similis. Diversæ vero denomina-

(1) S. Th. *Summ. th.* p. I. q. XIII. art. VII.

tionis est, quum fundamentum relationis est in utroque relato diversum, nec eamdem utrique tribuit denominationem. Hujusmodi est relatio inter causam et effectum.

* 209. II. Usitata erat apud veteres altera relationum seu potius relativorum divisio, nempe in relativa *secundum esse* et in relativa *secundum dici*; quæ licet versetur potius circa nominum significationem, est tamen utilis ad relationis conceptum illustrandum et ad veterum intelligentiam.

Relativa *secundum esse* dicuntur ea nomina quæ ex suo principali significato ipsas relationes significant, ut quæ ad eas significandas imposita sunt. Talia nomina sunt *pater*, *simile*, *dominus*, etc.

Relativa *secundum dici* ea sunt quæ ex suo principali significato notant aliquid super quod fundatur relatio, ut v. gr. qualitatem; secundario autem relationem connotant, ut hæc nomina: *sensus* vel *scientia*; quorum primum significat ex primario significato potentiam quamdam, alterum habitum mentis; secundario autem respectum ad objectum sensibile vel scibile.

* 210. In utroque porro genere relatorum inveniuntur relationes reales et logicæ. Ita *pater* et *dominus* sunt relativa secundum esse, nihilominus *pater* relationem realem, *dominus* relationem logicam significat.

E converso *scientia* et *creator* relativa sunt secundum dici, ita tamen ut *scientia* relationem significet realem, *creator* vero relationem logicam, quæ divinam actionem consequitur.

* 211. III. Congruit fere cum præcedenti altera relationum partitio et ipsa veteribus acceptissima, in relationem videlicet *transcendentalem* et *prædicamentalem*.

Relatio transcendentalis est entitas absoluta, in qua secundario reperitur ordo seu habitudo ad aliquid aliud. Vocatur transcendentalis, quia in rebus omnibus reperiri potest; non quia rerum omnium essentia sit tota in puro respectu ad aliud, sed quia aliquis respectus ad aliud rerum omnium essentiam consequi potest.

Relatio prædicamentalis est purus ordo seu respectus rei

ad aliquid aliud. Quæ relativa definit Aristoteles: *ea quorum esse est ad aliud se habere*. Nempe quorum tota essentia est ad aliud referri. Ejusmodi relationes appellantur prædicamentales, quia peculiarem categoriam (prædicamentum) constituent.

Vides ergo relationem transcendentalem esse relationem secundum dici (209), et prædicamentalem secundum esse; quanquam veteres nomine relationis prædicamentalis eas solum relationes complecterentur, quæ et secundum esse sunt et reales.

ARTICULUS III.

De relatione reali.

212. Ut relatio realis sit, quatuor hæc requiruntur:

1^o Ut subjectum sit reale, et hoc per se patet.

2^o Ut fundamentum quoque reale sit in subjecto. Relatio enim aliam realitatem non habet, quam fundamenti. Si ergo fundamentum reale non sit, ipsa relatio realis esse non poterit.

3^o Ut terminus sit realis et realiter existens. Excipe eas transcendentales relationes, quarum subjectum est mens, vel etiam voluntas. Actus enim harum facultatum, idemque dicendum de habitibus, versari possunt circa possibilia et entia rationis; et nihilominus ad hos quoque terminos habitudines reales ineunt. At res aliæ quæ nec possibilia nec entia rationis objecti loco unquam habent, habitudines reales, nisi ad entia realia realiterque existentia, suscipere nequeunt.

4^o Ut fundamentum a termino realiter distinguatur. Nam si fundamentum a termino realiter non distinguitur, jam nec subjectum distinguitur a termino; adeoque nullus est realis ordo unius ad alterum, sed est duntaxat unius ad seipsum, qui quidem ordo mera est relatio logica.

Addi posset 5^m ut nempe subjectum habeat aliquid, per quod aliquo modo ad alterum ordinetur. Sed hoc revera ad secundum revocari potest. Tunc enim relationis fundamen-

tum vere est reale, quum subjectum ad terminum aliquo modo ordinat.

213. Si qua ex his conditionibus desit, illamque suppleat intellectus, relatio ad logicas pertinebit, ut quæ ab intellectu ponitur.

Hoc pacto relationes logicæ sunt ex defectu primæ conditionis relatio identitatis inter universale et individua; ex defectu secundæ; relatio inter possidentem et rem possessam, cujus relationis fundamentum in neutro correlatorum est aliquid physicum; omnes item relationes extrinsecæ (205); ex defectu tertiæ, relatio similitudinis inter hominem existentem et alterum nondum existentem; ex defectu quartæ, relatio identitatis secum ipso; ex defectu quintæ, relatio scibilis ad scientem; scientia enim ex se ad scibile ordinatur, non vero scibile ad scientiam; et relationes omnes Dei ad creaturas, ut alio in loco melius declarabitur.

214. PROPOSITIO II. *Existunt in rerum natura relationes reales.*

Non est cur multis assertum hoc demonstramus, quod tanquam per se notum assumi potest. Sane quamquam unius rei cum altera comparatio sine operatione intellectus habere locum non possit, nihilominus inest sæpe ipsis rebus independenter ab intellectu ordo quidam et respectus ad aliquid aliud, qui hujus comparationis fundamentum suppeditat. Ut enim nihil dicam de relationibus quibus divinæ personæ constituuntur, quas plane reales fateri necesse est; certe seclusa omni operatione intellectus, vere effectus a causa dependet, et homo v. gr. magis cum homine convenit, quam cum equo aut planta. Imo totius mundi ordo rerumque harmonia ac pulchritudo relationibus continetur. Si ergo realiter est ordo in rebus et harmonia et pulchritudo, existunt profecto relationes reales.

215. Relationes omnes reales et intuituæ, si fundamenti diversitas consideretur, ad duo genera revocantur, quorum primum continet relationes identitatis et differentię, alterum relationes connexionis, i. e. causalitatis et dependentię. De singulis modo agendum.

CAPUT IV.

DE IDENTITATE ET DISTINCTIONE.

ARTICULUS I.

De identitatis notione.

216. Identitas est *unitas aliqua plurium in entitate*; plurium videlicet sive re sive ratione distinctorum. Differt identitas ab unitate in hoc, quod unitas est denominatio absoluta, identitas vero relativa; hæc enim supponit plura, quæ inter se comparata, ad unitatem quamdam reducuntur. Est porro identitas relatio realis, quum ens refertur ad aliud a quo reipsa distinctum est; logica, quum ens refertur ad seipsum.

* 217. Adverte 1º quum identitas relatio est realis, plura objecta esse identica *secundum unum conceptum communem* (L. 537, seq.), ut est identitas Petri et Pauli quoad naturam; quum vero identitas est relatio logica, plures conceptus esse identicos *secundum unum objectum*, ut est identitas filii Dei et filii Mariæ in unica Christi persona. Quocirca identitatem hanc logicam vocavimus alibi *objectivam* (L* 54.)

2º Aliud proinde esse relationem identitatis inter plura, aliud unitatem fundamenti relationis hujus. Quum identitas est realis, fundamentum (in rebus finitis de quibus loquimur) est tantum *logice* unum (104), ea nempe unitate quæ idearum universalium est propria; quum identitas est logica, fundamentum est *realiter* ac *numerice* unum.

3º Eorum quæ sunt logice identica, alterum de altero affirmari posse (1º L. 143.): unde identitas logica definitur quoque *affirmabilitas unius de altero*. Quæ vero sunt realiter identica, non posse alterum de altero affirmari; potius unum de altero esse negandum. Cum enim sint realiter relativa, realiter opponuntur, adeoque distinguuntur realiter.

Adverte tandem 4º unitatem fundamenti identitatis (2º) vocari sæpe identitatem. Hoc pacto dicimus v. gr. Petrum esse realiter identicum sibi ipsi, cum proprie dici deberet esse secum ipso realiter unum vel reali unitate identicum.

218. Realis identitas diversa est pro diversitate fundamenti, nempe entitatis in qua plura conveniunt.

1º Si conveniunt in essentia, identitas dicitur *essentialis*: quæ quidem potest esse *specificæ*, ut est Petri identitas cum fratre suo; vel *genericæ*, ut est Petri identitas cum suo equo.

2º Si plura conveniunt in aliqua qualitate, eorum identitas dicitur proprie *similitudo*.

3º Si in quantitatis ratione conveniant, hæc convenientia dicitur *æqualitas*.

Circa æqualitatem hæc duo notanda:

a) Æqualitatem (idemque dicito de inæqualitate) versari tantum inter quantitates ejusdem speciei, non inter quantitates specierum diversarum. Sic linea lineæ, et superficies superficiei, et tempus tempori æqualia esse possunt.

b) Quemadmodum duplex est quantitas, altera propria quæ in extensione consistit, altera impropria quæ continetur perfectionis sive essentialis sive accidentalis gradibus; ita duplicem esse æqualitatem, propriam et translativam.

ARTICULUS II.

** De principio identitatis comparatæ.*

219. Principium illud: *quæ sunt identica cum uno tertio sunt identica inter se*, vocari solet principium identitatis, ac melius fortasse vocaretur principium *identitatis comparatæ*, ut a principio illo altero: *quod est est*, quod pariter identitatis appellatur (28), distingui posset. Quidquid sit de nomine, quomodo principium ipsum intelligi et exponi debeat, ex modo dictis facile deduces. Quum enim identitas duplex sit et realis et logica, tam de unaquam de altera potest intelligi.

Si intelligatur de identitate reali, sensus erit (217, 1º): *res quæ sunt identicæ cum tertio secundum unum conceptum communem, sunt identicæ inter se secundum hunc ipsum conceptum*: v. gr. si triangulum A convenit secundum altitudinem cum parallelogrammo B, itemque triangulum C secundum altitudinem cum illo convenit, duo triangula A et C altitudinem habent communem.

Si intelligatur de identitate logica, sensus erit ut in tertio logicæ libro explicatum est (L. 221, 2º): *conceptus qui sunt identici cum tertio secundum objectum, sunt identici inter se*

secundum hoc ipsum objectum : id quod in omni affirmante ratiocinio concluditur.

220. Dices fortasse, præter binas hasce expositiones, duas alias addi oportere ; nempe 1^o quod duo conceptus conveniant cum tertio secundum notas quibus coalescunt ; quam identitatem in logica (L. 54) diximus intrinsecam : 2^o quod duæ res conveniant cum tertia secundum rem.

Respondeo non posse principium hoc alia ratione, præter duplicem expositionem supra positam, explicari. Revera expositio quæ primo loco opponitur, reducit ad primam datam (219) : duo enim conceptus, hoc ipso quod inter se conveniunt quoad notas quibus constant, sunt duæ res quæ realem inter se identitatis relationem habent : et hæc relatio est secundum unum conceptum, nempe secundum conceptum *repræsentantis certum objectum*.

Expositio autem altera est absurda prorsus, ut quæ contradictionem includit. Quid enim significat, duas res convenire cum tertia quoad rem, nisi quod A et B, quæ sunt duæ res sunt simul una res, itemque quod C et B duæ res sunt et simul una ; ita ut utrumque par et realem distinctionem et realem unitatem præferat ? Atqui hoc plane repugnat (100, 4^a). Neque dicas in augustissima Trinitate singulas personas convenire realiter cum essentia. Nam essentia non est quædam res a personis re distincta, sed ratione solum a singulis personis distinguitur. Ac præterea identitas personarum cum essentia dicitur realis, non quia est relatio realis, sed quia identitas pro unitate usurpatur (217, 4^o). Sed de hoc alia mox.

221. Applicatio principii identitatis nonnullam quandoque facit difficultatem ; quæ tamen, si dicta probe teneantur, nullius negotii erit.

Adverte igitur 1^o ad recte applicandum principium istud, quum de rebus finitis agitur, tria servanda esse : a) ut tres omnino termini assumantur, : b) ut unus et alter seorsum cum tertio et sub eodem respectu comparentur ; nempe si identitas logica est, comparentur tres ideæ secundum idem objectum ; si identitas realis est, tria objecta comparentur

secundum eandem ideam : c) ut duorum quæ cum tertio conveniunt, identitas sub eodem respectu, sub quo cum tertio conveniunt, inferatur,

Adverte 2^o quum identitas logica est, tres ideas esse objective identicas ; ac propterea respectum sub quo conveniunt, esse ipsummet objectum quod ideæ exprimunt. Hic autem respectus ipsa affirmatione unius de altero significatur (217, 3^o) Quum vero identitas est realis, tunc quoniam plures res secundum plures diversasque rationes convenire possunt, diserte exprimendum est in quo conveniunt.

Hinc 3^o in primo casu principii identitatis applicatio fit *actu exercito*, nulla nempe mentione hujus principii facta, atque ita fit in omnibus syllogismis ; in altero vero fit *actu signato* ; posito nempe majoris loco principio identitatis, ac deinde in minori affirmando copulative duarum rerum secundum communem aliquam rationem cum tertia convenientiam. Exemplum quæres in logica (L. 240, 8^o).

222. Majorem difficultatem præ se ferre videtur hujus principii applicatio, quum ad Trinitatis divinæ mysterium transfertur. Quæ difficultas inde oritur, quod divina essentia non logice tantum, sed realiter communis est pluribus personis, quæ nihilominus realiter ab invicem distinguuntur : ex quo sequitur hanc vocem *Deum*, vel *essentiam divinam* ita esse terminum singularem, ut vim simul habeat termini communis ; quatenus una ac simplicissima natura diversimode in pluribus subsistit. Idcirco ubi in hac materia applicatio principii identitatis fit primo modo nuper explicato (221, 3^o), potest haberi fallacia accidentis in iis ratiocinationibus, quæ in alia materia legitime concludunt. Ut v. gr. in hoc argumento : *Essentia divina est Pater : Essentia divina est Filius : Ergo Pater est Filius*. Hac animadversione omnes hac in re difficultates solvuntur.

Neque inferas : ergo principium identitatis aliquando natat ac falsum est. Non enim ex dictis hoc sequitur, quemadmodum nec sequitur syllogismi formam legitimam esse aliquando fallacem ; sed hoc tantum colligere licebit, principia esse applicanda diversimode pro materiæ diversitate,

quemadmodum pro terminorum diversitate, modo legitima, modo prava esse potest data argumentandi forma.

223. Pari modo disserendum de principio illo altero huic affini : *quæcunque sunt idem secundum rem* (objective), *in quocunque est unum est et alterum*. Nempe ut explicat S. Thomas (1), *secundum quod idem sunt*. Essentia autem divina et paternitas v. gr. sunt objective idem secundum esse absolutum, sed ratione differunt ; non enim paternitas id solum dicit quod dicit essentia absolute et in abstracto, sed relationem insuper quæ unius tantum personæ est propria, non aliarum. Adeoque non licebit concludere : in quocunque est essentia divina, in eo et paternitatem esse.

ARTICULUS III.

De distinctione.

224. Identitati distinctio opponitur, ut exclusio illius : ac propterea describere illam licebit (216) : *carentiam aliquam unitatis inter plura*.

Animadvertere in primis necesse est, has voces : *distinctio*, *differentia*, *diversitas*, promiscue ut plurimum usurpari : nihilominus si pressius accipiantur, differentia aliquid addit supra distinctionem, et diversitas supra differentiam, ut modo explicabitur.

225. Distinctio igitur potest vel absolute dici, vel cum addito. Distinctio absolute dicta opponitur unitati (98) et identitati logicæ (216) ; estque negatio esse relativi, seu *negatio unius respectu alterius*, in eo simpliciter posita, quod unum non sit aliud. Hæc proprium sibi fecit distinctionis nomen, vel etiam appellatur *distinctio numerica*.

Hinc colliges, distinctionem hanc absolute dictam non differre a divisione quæ multitudinem constituit (98). Notandum tamen, divisionem dupliciter et ipsam accipi : 1º enim significare potest, quod duo vel plura habeant esse divisim, ita ut esse unius non sit esse alterius ; et hoc pacto divisio coincidit cum distinctione : 2º significare potest statum quemdam seu modum essendi duorum vel plurium, quatenus

(1) In 1^o Dist. XXXIII. q. 1. a. 1. art. 2.

nexu aliquo quo conjungi possent, non conjunguntur ; et hoc pacto divisio idem est ac separatio, neque unitati amplius aut identitati, sed *unioni* opponitur. Idcirco in definitione unitatis indivisio potius quam indistinctio ponitur, quia multa etiamsi distincta, si tamen sint unita, sub hoc respectu unum constituunt (98).

226. Distinctio cum addito non modo significat unum non esse aliud, sed insuper vel essentiam vel qualitatem vel quantitatem unius non esse essentiam, qualitatem, quantitatem alterius.

Distinctio quoad essentiam identitati essentiali (218, 1º) opponitur. Dicitur proprie *differentia*, si et unum et alterum quæ specie distincta sunt sub eodem genere contineantur ; *diversitas*, si ne in genere quidem proximo conveniant.

Distinctio quoad qualitates opponitur similitudini (218, 2º), ac dicitur *dissimilitudo* vel etiam *differentia*.

Distinctio demum quoad quantitatem opponitur æqualitati, ac dicitur *inæqualitas*. Huc pertinent relationes majoris et minoris. Item denominationes multipli et partis aliquotæ.

ARTICULUS IV.

De distinctione reali.

227. Distinctio absolute dicta (225), de qua tantum agendum est, dividitur in *distinctionem realem* et *distinctionem rationis*.

Distinctio realis est *carentia unitatis inter plura objecta*. Talis est individui distinctio ab individuo. Convenit cum diversitate objectiva, de qua in logica (L. 54) actum est.

228. Est autem 1º *adæquata* vel *inadæquata*. Adæquata, quam dicunt quoque *secundum totum esse*, est inter ea quorum unum cum altero, secundum nullam sui partem, logica identitate convenit ; ita ut nihil quod ad primi esse pertinet, possit de aliqua re, quæ ad esse alterius pertineat, in individuo affirmari (217, 3º). Sic homo ab homine, lapis ab arbore distinguitur.

Inadæquata inter ea est, quæ secundum aliquid sunt lo-

gice identica, secundum aliquid non sunt. Hoc pacto totum a parte distinguitur; nam totum importat plus quam pars.

2° Alia est distinctio *strictæ realis*, quam quidam vocant *realem absolutam*, vel *realissimam*, vel *realem majorem*: alia *realis modalis (realis minor)*. Postrema hæc versatur inter substantiam ejusque modificationes, quæ salva essentia possunt esse vel abesse (171); ut v. gr. inter mentem et actum affirmandi, inter planetam ejusque motum. De hæc suis locis ageamus. Prima illa omnem aliam realem distinctionem complectitur.

3° Ratione terminorum, qui distinguuntur, realis distinctio alia dicitur *positiva*, alia *negativa*. Illa intercedit inter res positivas ac reales, ut v. gr. inter Petrum et Paulum; hæc inter ens et non-ens ut inter lucem et tenebras, aut inter non-entia diversa, ut cæcitatem inter et surditatem.

* 229. PROPOSITIO I. *Realis origo unius ab altero distinctionis realis semper indicium est. Realis autem unius ab altero separabilitas tunc est hujus distinctionis indicium certum, quum utrumque simul separatim ab altero existere potest.*

Duo hæc sunt præcipua realis distinctionis indicia.

Quod autem attinet ad realem unius ab altero originem, res plane liquet. Nihil enim potest a seipso originem ducere. Hoc argumento cognoscimus tres divinas personas re distinguere inter se, quia relationibus originis distinguuntur.

Idipsum dicendum de mutua separabilitate; quum nempe utrumque simul absque reali cum altero unitione actu existere potest; quemadmodum v. gr. anima hominis ejusque corpus possunt existere separata. Ratio quoque hujus indicii est manifesta. Si enim duo separata manent, necesse est unum non esse alterum: nihil enim potest a seipso seungi, sed solum ab alio quod non sit ipsum.

* 230. Nota tamen 1° Quum separabilitas duorum mutua non est, quum nempe unum tantummodo sine altero in rerum natura manet, difficile est ex sola hac separabilitate discernere, utrum illa duo realiter an vero ratione distinguantur.

tur. Etenim v. gr. bruti corpus sine ejusdem anima in rerum natura manet, et hæc duo realiter distinguuntur: e contrario quantitas manet post sublatam, alterius quantitatis additione, figuram quam prius habebat; itemque fundamentum similitudinis manet, licet similitudo cesset sublato termino; nihilominus nec figura a quantitate, nec similitudo a suo fundamento realiter distinguitur. Igitur separabilitas hæc non potest haberi tanquam realis distinctionis indicium indubium. Sed de hoc alibi.

Nota 2° quamvis separabilitas mutua et simultanea (229, 2°) unius ab altero distinctionis realis sit evidens indicium, non tamen vicissim a distinctione reali posse concludi ad separabilitatem, aut e contrario ab inseparabilitate hac ad identitatem. Etenim tres divinæ personæ sint inter se realiter distinctæ, nec tamen separabiles.

ARTICULUS V.

De distinctione rationis.

231. Distinctio rationis est *carentia unitatis inter plures conceptus ejusdem rei*; seu aliis verbis: rei unius multiplicitas, prouti subest mentis conceptibus. Hæc igitur distinctio non est in re, sed ponitur a mente, quotiescunque per plures conceptus rem attingit. Hoc enim cognoscendi modo fit, ut objectum, in statu realitatis unum, multipliciter quamdam in statu ideali acquirat; ut v. gr. quum hominem considero ut substantiam, ut animal, ut rationale, ut creaturam; vel Deum ut sapientem, ut justum, ut immensum etc. Idcirco distinctio hæc rationis esse dicitur.

232. Duplex est distinctio rationis: alteram vocant distinctionem *pure mentalem*, veteres vocabant *rationis ratiocinantis*; alterum *cum fundamento in re*, et veteri vocabulo *rationis ratiocinatæ*.

Prima fit a ratione, quum rem exprimit pluribus conceptibus, sed non diversis: in quo potius repetit conceptum unum, unoque tanquam pluribus utitur, quam rem unam in plures conceptus dividat. Hac distinctione mens utitur, quum ideæ definiti definitionem applicat, dicens v. gr. *homo*

est animal rationale; et generatim quum aliquid de seipso enuntiat, vel quum aliquid ut sibi ipsi identicum concipit.

Altera fit a ratione, quum rem unam eademque pluribus conceptibus, iisdemque diversis, exprimit. Illi autem conceptus diversi sunt qui, ut in logica traditum est (L. 54, 55), non iisdem notis constant; et consequenter qui definitione differunt. Ita quum in simplicissima Dei essentia iustitiam a sapientia distinguimus, vel in homine animal a rationali, distinctione utimur rationis; quia iustitia et sapientia, animal item et rationale sunt diversi conceptus; tamen in Deo iustitia et sapientia non sunt duo habitus distincti, sed ipsa ejus essentia; itemque animal quod est in homine, a rationali quod in eodem est, re non differt.

233. Ex his apparet 1^o multiplices conceptus quibus distinctio hæc continetur, esse omnes *præcisivos*, qui nempe quamvis unam eademque essentiam expriment, non tamen totum id quod in illa est, repræsentant; adeoque esse omnes conceptus incompletos. Unde distinctio rationis ratiocinata definiri quoque solet hoc pacto: *distinctio quæ fit ab intellectu rem cognoscente per plures conceptus præcisivos et incompletos.*

2^o Distinctionem hanc illam ipsam esse, quam alio nomine dicunt *formalem*. Ea enim formaliter distingui dicuntur, quæ definitione differunt; nam ratio formalis idem est ac definitio. Rectius tamen appellabitur *pure formalis*, ne confundatur cum distinctione formali, quam dicunt ex natura rei, quam infra rejiciemus.

234. PROPOSITIO II. *Ratio quo fit ut una eademque res pluribus ac diversis conceptibus percipiatur, tum in intellectu imperfectione, tum in objectorum perfectione sita est.*

Primo in intellectu imperfectione. Noster enim intellectus totam rei intelligibilitatem unico conceptu exhaustire nequit, sed solum paulatim ac per plures incompletas perceptiones res cognoscit, easque, ut jam animadvertimus (46, 154), per conceptus indeterminatos perque externas earum affectiones et effectus qui ab iis dimanant. Accedit, quod plura objecta non intuitive, sed divinando tantummodo, atque ex objectis jam cognitis ratiocinando, conci-

pere possumus. Atque inde jam patet, quomodo realitas in se una variis conceptibus repræsentetur.

235. Secundo: huic pluralitati ac varietati conceptuum sæpe ipsa rerum perfectio fundamentum præbet his fere modis.

1^o Varietate statuum, in quibus res est vel esse potest. Hoc pacto, ut supra dictum est, personam a substantia distinguimus (169, 8^o).

2^o Diversitate relationum quibus eadem entitas fundamentum præbet, ut sunt:

a) varietas effectuum, quos una eademque vis producit: ita in calore distinguimus vim exsiccandi, liquefaciendi aut obdurandi, vitam vegetalem fovendi, etc.:

b) similitudines et dissimilitudines, quas cum aliis rebus eadem res habet: exinde genera et differentia:

c) relationis logicæ: ita eundem hominem considero ut civem, ut dominum, ut subditum, ut cognitum etc.

3^o Eminentia perfectionis unius, quæ æquivalet pluribus perfectionibus, quæ in inferioribus naturis dispersæ sunt vel realiter distinctæ; tunc præsertim, quum ad harum inferiorum perfectionum similitudinem superioris illius ideam efformare conamur. Hinc est quod in Deo plura attributa pluresque operationes distinguimus, ut suo loco fusius declarabitur. In hoc postremo casu, distinctio rationis vocari quoque solet *virtualis*.

ARTICULUS VI.

* *Utrum aliud præterea sit distinctionis genus.*

236. PROPOSITIO III. *Præter distinctionem realem et rationis modo descriptas, nulla alia distinctio, quæ media sit, assignari potest.*

Etenim nihil prorsus medium esse potest inter distinctionem dependentem ab intellectu, et distinctionem ab eo independentem. Jam distinctio quæ ab intellectu est independentem, realis est; quidquid enim habet esse independentem ab intellectu reale est. Distinctio vero quæ ab intellectu est dependens, distinctio est rationis.

Præterea inter unum et multa nihil datur medium, nisi nihilum: ens enim adæquate dividitur in unum et multa (100, 4^o b). Quæcunque igitur nos distincta concipimus, vel sunt realiter unum vel realiter multa. Si sunt realiter unum, distinguuntur ratione; si sunt realiter multa, re distinguuntur. Ergo præter hæc duo distinctionum genera, nullum aliud datur.

237. Nihilominus acuti quidam seu theologi seu philosophi, mediam hanc distinctionem invenisse sibi visi sunt, ex quo clamosissimæ olim in scholis contentiones excitatæ. De qua controversia nonnihil innuere necessarium nobis videtur. Si quis tamen a subtilioribus hisce disquisitionibus, tanquam a vepribus ac sentibus, refugere sentiat animum, is tria quatuorve folia placide evolvat, et tritam magis viam reperiet.

Tota hæc quæstio respicit attributa entis essentialia, quæ ens individuum constituunt ac realiter unum. Ea vocari quoque solebant *gradus metaphysici*, quia dum analysim institimus, a magis particularibus constitutivis, quasi per quosdam gradus, ad magis universalia ascendimus. Tales gradus sunt v. gr. in Petro, homo, animal, vivens, corpus, substantia, ens et prædicata differentialia quæ genera superiora ad inferiora contrahunt (L. 42, 5^o), et speciem ad individuum. Qui gradus dicuntur metaphysici, quia sunt partes entis non physicae sed metaphysicae. Est igitur quæstio de distinctione, quæ inter hujusmodi essentialia prædicata intercedit.

238. Primo Scotus, seu potius scotistæ, nam de Scoto quidam dubitant, opinati sunt, inter hæc attributa intercedere distinctionem reali illa, quam omnes recipiunt, minorem, sed majorem distinctione rationis; eamque appellarunt *formalem ex natura rei*; cæteri ducto ab auctoribus nomine, *scotisticam*. Dividebant igitur distinctionem objectivam et ex natura rei, in absolute realem et formalem. Illam haberi aiebant inter rem et rem, videlicet vel inter subjectum et subjectum, vel inter subjectum et formam ab eo separabilem; hanc vero non inter res, sed inter rei unius

ejusdemque *formalitates*, quæ ipsorum vox est. Formalitatum vero nomine intelligunt essentialia prædicata ejusdem rei vel individui, quæ diversimode definiantur.

Hæc formalitates juxta hos auctores, ita sunt conjunctæ, ut ne divinitus quidem separari possint, imo plane identificantur ac rem constituunt vere unam; nihilominus altera de altera negari potest; alteri quatenus tali quædam conveniunt, alteri quatenus tali nequaquam; adeoque actu distinguuntur objective, ex natura rei et ante omnem intellectus operationem. Hanc distinctionem rejicimus sequenti propositione.

239. PROPOSITIO IV. *Distinctio formalis ex natura rei non est admittenda.*

Nam 1^o id non est admittendum cujus nulla necessitas, quodque ad res creatas mysteria ipsa divina transfert sine necessitate. Sed talis est distinctio scotistarum.

a) Nulla ejus est necessitas. Etenim, ut jam constare potest ex modo dictis (234) et ex dictis in logica (L. 37), gradus illi metaphysici, et quæcunque ad eos pertinent aut de iis quæri possunt, optime explicantur per solam rationis distinctionem; quod et infra melius patebit.

b) Id quod in venerando divinæ Trinitatis mysterio maxime arduum est atque humanum vincens intellectum, in rebus omnibus reperiunt scotistæ. Est enim in hoc ejus mysterii arduitas, quod paternitas v. g. quæ secundum rem a divina essentia indistincta est, realiter tamen a filiatione distinguatur, quæ quidem re est eadem essentia divina. Sed admissa distinctione formali, rationale v. gr. Platonis reipsa est animal; animal autem est principium sentiendi; et nihilominus rationale Platonis secundum rem et ex rei natura non est principium sentiendi.

2^o Si ex natura rei animal et rationale distinguuntur, dicendum necessario erit, ea realiter distingui; id quod scotistæ negant, quia maxime absurdum; sed negant immerito. Etenim si animal et rationale actu et ex rei natura citraque mentis operationem distinguuntur, jam sunt realiter duo, quorum unum realiter non est aliud, quorum unum negari

potest ac debet de alio. Ergo sunt realiter distincta. In hoc enim ponimus omnes realem distinctionem, quod unum non sit secundum rem aliud, quod esse unius non sit esse alterius. Si vero dicant hanc esse formalem non realem distinctionem, in primis nomen diversum, præsertim si ad arbitrium impositum sit, rem diversam non facit, nec realis distinctionis mutat conceptum. Deinde quærimus: identitas formalis v. gr. inter hominem et animal rationale est ne vera ac realis unitas? Ita sane. Ergo distinctio formalis, quæ formali identitati opponitur, erit vera ac realis distinctio.

3^o Si natura v. gr. Platonis a sua individuatione ex natura rei non distinguitur, jam nulla Platonis essentialia prædicata ex natura rei inter se distinguuntur. Consequentia legitima est ex paritate rationis, ac de ipsa adversarii non dubitant. Sed naturam Platonis a sua individuatione non distingui ex natura rei jam in primo libro ostensum est (110, 111). Ergo.

4^o Noto denique, theoriam hanc, si ad divina attributa et ad distinctionem divinarum personarum ab essentia transferatur, nimiam habere affinitatem cum errore Gilberti porretani a Concilio rhemensi damnato. Asserebat enim Gilbertus naturam divinam Deum non esse, sed formam qua Deus est: quemadmodum humanitas homo non est, sed forma qua est homo; item sapientiam, æternitatem, etc.

240. Ad eandem quæstionem solvendam distinctionem *virtualem intrinsecam* in medium attulere quidam thomistæ. Distinctio autem virtualis, si in genere accipiatur, idem est ac æquivalentia distinctionis; quæ tunc locum habet, quum una eademque res multis distinctis æquivalet. Porro haberi æquivalentiam hujusmodi hoc sensu, quod una eademque causa causarum diversarum producat effectus, vel una eademque perfectio perfectiones diversorum entium in se contineat, hoc extra omnem prorsus dubitationem est positum (235).

241. Sed non in his posita est distinctio virtualis thomistarum. Putant ipsi æquivalentiam distinctionis eousque

procedere in rebus, ut res una eademque vi distinctionis hujus ac citra omnem intellectus operationem, capacitate polleat suscipiendi sine contradictione prædicata intrinseca ex se contradictoria, perinde ac si realis in illa duorum aut plurium adesset distinctio. Ita ut quemadmodum realis distinctio efficit, ut binis rebus prædicata contradictoria attribui possint, v. gr. quum dicimus: animal vivit, lapis non vivit; sic virtualis ope distinctionis circa subjectum unum idemque idipsum fieri liceat; ut v. gr. dicatur: animal quod est in homine est leoni simile; rationale non est leoni simile; perinde ac si animal et rationale duo subjecta forent vere distincta.

242. Patet hinc 1^o definitio distinctionis virtualis intrinsecæ. Est nempe *capacitas rei unius, antevergens omnem intellectus operationem, ad suscipienda sine contradictione prædicata intrinseca ex se contradictoria*.

Patet 2^o in quo differat distinctio hæc virtualis a formali scotistarum. Virtualis enim distinctio actualis non est, nec multipliciter ullam actualem in objecto ponit, quemadmodum scotistarum distinctio. Conveniunt tamen in hoc, quod utraque objectum in se unum attributorum sibi contradicentium capax efficiat.

Patet 3^o in quo differat virtualis distinctio a distinctione rationis ratiocinatæ. Qui enim hanc admittunt, hoc tantummodo sibi dari volunt, posse unum idemque objectum ex parte cognosci cognitione clara, ex parte cognitione obscura; posse item abstractionis ope rationes objectivas, quas pluribus incompletis cognitionibus deprehenderimus, unam sine altera cogitari: sed negant prorsus, objectum, prouti multiplex hac cognitione attingitur, contradictoria prædicata recipere posse; id quod in his quæ sequuntur adhuc explicabitur.

243. PROPOSITIO V. *Distinctio virtualis intrinseca, in rebus saltem creatis, nulla est.*

Dico in rebus saltem creatis; etenim utrum distinctio hæc admittenda sit inter essentiam divinam et divinæ Trinitatis personas, disputatio theologica est, quæ ad nos non pertinet.

Non esse autem admittendam in rebus creatis probari potest 1° argumento allato contra formalem distinctionem primo loco (239, 1°).

244. 2° Repugnat aliquid esse simul et non esse, non solum absolute, sed etiam relative (52). Sed si virtualis distinctio recipiatur, hoc profecto contingere dicendum erit. Eatenim distinctione recepta, hæc propositiones v. gr. tanquam veræ a parte rei et citra intellectus operationem recipiuntur: *Animal hominis est secundum rem idem ac rationale — Animal hominis est a parte rei principium sentiendi — Rationale non est a parte rei principium sentiendi*. Quid jam importat hæc tertia propositio? Profecto rationale objective, actu, realiter distingui a principio sentiendi. Unum enim non esse aliud et quidem a parte rei hoc tandem significat: unum ab alio objective distingui. Sed ex prima propositione rationale non distinguitur objective ab animali, et ex secunda animal non distinguitur objective a principio sentiendi. Ergo si tres istæ propositiones admittantur, concedendum est rationale objective distingui simul ac non distingui a principio sentiendi.

245. Objiciunt illico divina mysteria. Essentia divina, inquiunt, communicatur Verbo: paternitas divina non communicatur. Et nihilominus paternitas est essentia divina.

Omissis cæteris respondeo nullam esse paritatem. Etenim essentia divina communis est pluribus realiter distinctis; adeoque, ut theologi loquuntur, distinguitur a paternitate distinctione reali *in tertio*. At in rebus creatis distinctio hæc non admittitur ab adversariis, imo communiter in rebus finitis repugnare existimatur. Idcirco tres illæ de natura divina propositiones nullam continent contradictionem: sed non ita propositiones allatæ in argumento.

246. 3° Demum virtualis isthæc distinctio a) ratiocinii vim enervat, et syllogismi formam plane destruit. Quid enim evidentius, quam consequentia in ratiocinio isto: *Omne animal est principium sentiendi. Aliquod rationale est animal. Ergo aliquod rationale est principium sentiendi*? Tamen virtualis distinctionis sectatores, concessa majore ac minore, conse-

quentiam negabunt, quia animalitas et rationalitas sunt hominis virtualitates, ut ipsi aiunt, diversæ. Idemque continget in aliis rationiis innumeris.

b) Omnibus absurditatibus viam aperit. Poterit enim duplex contradictoria propositio ex æquo defendi, dummodo virtualis distinctio aliqua supponatur.

c) Imo virtualis distinctio in ipsa definitione sua absurdum continere videtur. Quid enim magis absurdum quam subjectum duo contradictoria in se conjungens sine actuali in seipso ac vera distinctione?

Mirandum ergo non est commentitiam hujusmodi distinctionem ab omnibus scholis et a plurimis quoque thomistis fuisse rejectam.

247. PROPOSITIO VI. *Distinctio inter essentialia prædicata est mera distinctio rationis.*

Etenim essentialia hæc prædicata 1° non distinguuntur actu ante intellectus operationem: non enim distinguuntur realiter ut manifestum est; tum quia nullum indicium est aut necessitas distinctionis hujusmodi; tum quia quodlibet ex iis, ut est, in statu reali ac concreto, cum veritate de aliis affirmatur: vere enim dicitur: Plato est homo. Homo est animal. Animal Platonis est rationale etc. 2° Non distinguuntur formaliter, ut modo probatum est. 3° Neque distinguuntur virtualiter, quæ distinctio foret aliquid majus distinctione rationis (242, 3°). Restat ergo ut ratione solummodo distinguantur.

248. Quæ rationis distinctio fit, ut supra diximus (233, 1°), per plures conceptus præcisivos et incompletos, quibus objectum reale non prorsus ut in se est, sed cum aliqua indeterminatione et obscuritate concipio. Ut quum v. gr. hominem a longe videns, animalis solum ideam excipio, hæc idea, quanquam pro objecto reali hominem habeat, non tamen representat hominem, seu animal illud reale ut in se est, sed duntaxat animal vagum et indeterminatum quod mente abstractum est.

249. Hinc 1° Confirmatur quod contra scotistas inculcatum

est, idearum hujusmodi objectum esse unum idemque, sed diversimode intellectum.

2° Confirmatur quoque quod contra distinctionis virtualis assertores contendimus, nihil esse quod prædicata contradictoria suscipere possit. Nam animal v. gr. hominis quamvis non concipiatur ut rationale, tamen in re rationale est, adeoque rationalis prædicata omnia illa conveniunt; et e converso.

3° Concludens, præcisionem hanc merito appellari *ex parte actus*, non vero objectivam esse aut dici posse. Singuli enim præcisivi conceptus unum idemque objectum ac totam ejus realitatem attingunt, quamvis non totam clare repræsentent, sed ex parte clare, ex parte obscure.

ARTICULUS VII.

* *Difficultates.*

250. Obijciunt I scotistæ. Attributiones contradictoriæ convenire nequeunt a parte rei, nisi subjectis vere distinctis ante operationem intellectus. Sed animali v. gr. et rationali hominis conveniunt, et quidem a parte rei, attributiones contradictoriæ. Ergo.

Prob. min. Animal a parte rei est ratio secundum quam homo est similis equo: rationale vero non est; imo potius est ratio secundum quam differt ab illo. Sed hæc duo sunt contradictoria. Ergo.

Resp. *Conc. maj.*; *neg. min.* Nam cum a parte rei animal et rationale sint una eademque res, quidquid vere de uno dicitur, de altero quoque cum veritate dici debet.

Ad prob. *Conc. 1^a part. maj.*, et *dist. 2^a part.*: Rationale hominis non est ratio secundum quam homo est similis equo, i. e. quemadmodum ratio hujusmodi est animal, *neg.*; alio modo, *trans.* Etenim rationale a parte rei idem est ac animal: adeoque ut modo dictum est, conveniunt illi omnia quæ animali conveniunt ante intellectus operationem.

Præterea *dist. min.* Hæc duo sunt contradictoria, si alterum neget et hominem et equum esse animal, *conc.*; si non negat, *nego.* Prima enim propositio huc redit: *Tam homo*

quam equus sunt animal. Altero vero hoc non negat, sed hoc tantummodo dicit: *Homo, non equus est rationalis*; id quod profecto nullam habet cum prima propositione contradictionem.

251. Obj. II. Quæ diversas habent definitiones, ea distinctas habent essentias. Sed animal et rationale diversas habent definitiones. Ergo.

Revera dici plane nequit: *animalitas est rationalitas.*

Resp. *Dist. maj.*: Si definitiones sint completæ, *conc.*; si sint incompletæ seu præcisivæ, *subd.*; quæ definiuntur essentias habent distinctas ratione, *conc.*; ex natura rei, *nego.*

Definitio completa est ea quæ realem objecti essentiam, sine ulla intellectus præcisione, explicat ut est in se. Jam vero animal hominis in statu reali et animal est et rationale; rationale item et rationale est et animal. Binæ ergo definitiones quibus separatim et animal et rationale describuntur, realem hominis essentiam incomplete exhibent, non vero diversas essentias.

Ad confirm. *Dist.*: Ex natura rei, *neg.*; ex modo significandi, *conc.* Termini enim abstracti significant rationes obiectivas jam mente præcisas: ac propterea, si quis unam de altera affirmet, ille significat unam esse alteram, non solum re, sed etiam conceptu, quod in allatis terminis falsum est.

252. Obj. III. Rationale a parte rei non est tota hominis essentia. Secus homo definiri posset hac sola voce: *rationalis*. Ergo est pars: ergo vere distinguitur a genere: *animal*.

Resp. *Neg. ant.* Nam rationale, ut est realiter ante mentis abstractiones, est totus homo. Neque inde sequitur posse hominem hac sola voce definiri; etenim hæc vox non rem solum significat, sed rem cum præcisione conceptam.

Et hæc sufficient in præsentī controversia. Quæ enim ab alterius opinionis supra expensæ (243) auctoribus obijciuntur, ex præjactis principiis (243, seq. 248) facile solves.

Notiones principii et causæ.

253. Principium est id a quo aliquid quocunque modo consequitur. Quod ab alio consequitur, *principiatum* dicitur. Hinc ad rationem principii, ut ex definitione patet, duo requiruntur: 1° ut quod principium dicitur sit aliquo modo prius principiato; 2° ut sit inter unum et alterum aliqua consecutionis connexio. Sed tum prioritas, tum connexio hæc multiplex assignatur.

254. Connexio consecutionis, ut ab hac incipiam, duplex esse potest; *extrinseca* et *intrinseca*.

Connexio extrinseca continetur consecutione mera unius post aliud. Sic aurora dicitur principium diei. Principium hoc modo cum suo principiato connexum proprie appellatur *initium*.

Connexio intrinseca constituitur positivo influxu unius in aliud; qui quidem influxus vel *in ordine logico* est, vel *in ordine physico*.

Est in ordine logico quum unum communicat alteri cognoscibilitatem et evidentiam; quo quidem respectu principia in scientiis nuncupamus veritates eas, quæ in aliarum cognitionem adducunt. In ordine autem physico habetur, quum unum alteri ipsum esse communicat. Quod in rebus creatis fit dupliciter. Unum enim esse communicat alteri, vel *tantumquam pars constitutiva essentiae alterius*, vel *tantumquam in alterius productionem influens*. Triplex igitur est genus illorum principiorum quæ intrinsece cum suis principiatis connectuntur; videlicet principium *cognitionis*, principium *essendi*, principium *existendi*. Quæ omnia complexus est Aristoteles, quum principium definivit: *id unde aliquid est, aut fit, aut cognoscitur* (1).

255. Prioritas qua principium præ principiato gaudet, est triplex. Nam principium proprie dictum et in ordine phy-

(1) V. Met. c. I.

sico, de quo nunc agimus, prius est suo principiato vel *tempore* vel *natura* vel saltem *origine*.

Tempore prius est id quod existit altero nondum existente. Sic Philippus fuit Alexandro prior.

Natura prius est id a cuius existentia dependet existentia alterius, quod per se impar existendo sit. Ignis v. gr. est natura prior calore quem diffundit, licet non tempore: itemque actus quilibet internus prior est natura intimo sensu, quo ille fit menti præsens.

Origine tandem sola prius est id a quo aliquid procedit, quin tamen naturam et existentiam habeat a primo dependentem. Talis prioritas inter divinas solummodo personas locum habet.

256. Animadvertite 1° unum altero prius esse posse tempore non autem natura, ut v. gr. Babylon fuit Roma prior; vel e converso natura non tempore, ut ignis et calor; ac tandem et tempore et natura, ut artifex opere suo.

2° Prioritatem tam naturæ quam temporis in utroque statu haberi posse, physico et ideali. V. gr. albedo natura prior est in statu physico relatione similitudinis cui fundamentum impertit; sanitas autem natura prior est haustu pharmaci in ordine solum ideali.

3° Hinc vides id quod aliud in uno ordine antevertit, posse esse illi posterius in ordine altero. Sanitas est prior pharmaco in ordine ideali, posterior illo in ordine reali.

4° Quotiescunque principium dicitur tempore prius principiato, id intelligendum est de principio ut est quoddam ens, non vero de principio formaliter considerato. Principium enim ut tale non potest secundum tempus principiato anteire. Relativa enim simul ponuntur.

257. Ut eorum, quæ tempore simul sunt non vero natura, subordinatio qua sese excipiunt, apte significetur, unum dicimus esse *in signo naturæ priori*; alterum *in signo posteriori*.

Est in signo naturæ priori respectu alterius quidquid natura prius est illo; in signo posteriori quod natura posterius est. Signum hoc loco idem valet, ac *conceptus rei in cogno-*

scente potentia existens : id enim quod natura prius est altero, concipitur et intelligitur in sua natura completum, quin alterum intelligatur; hoc autem alterum concipi nequit, nisi priore illo intellecto. Quæ ab eodem principio simul proveniunt, ut omnes effectus simultanei, dicuntur esse *in signo eorum* ut. v. gr. in bilance ascensus unius lancis et descensus alterius : quæ vero sunt in eodem instanti, sed nullam inter se vel ad tertium aliquod dependentiæ relationem habent, dicuntur esse *in signis disparatis*, ut præsens animi mei cogitatio et planetarum motus.

258. Nunc ad causæ notionem. Causa est *principium influxu suo determinans aliquid sibi insufficiens ad existendum*. In hac definitione vox illa : *principium*, generis locum tenet; sequentes : *influxu suo*, principium cum principio intrinsece connexum designant (254) : cætera palam faciunt causam esse principium natura prius re quam producit. Id quod causa efficit, *effectus* nuncupatur.

Causæ post Aristotelem ad quatuor classes revocari solent, videlicet ad *efficientem, finalem, materialem, formalem*; de quibus nunc est agendum.

ARTICULUS II.

De causa efficiente.

259. Causa efficiens est id *a quo aliquid fit*. Causæ efficientis propria est *activitas*, seu *vis agendi*; per hanc enim causa influit in effectum existentiam ipsi tribuendo.

Agere generatim dicimus id omne, quo interveniente, aliqua accidit mutatio, seu id omne quod efficit ut sit aliquid quod prius non erat. Activitas igitur est *id quo causa efficiens mutationes inducit*. Hinc Aristoteles efficientem causam definiit : *principium unde primo motus* (1), nempe mutatio. In activitatis autem exercitio dicitur *actus primus remotus* ipsa vis agendi; *actus primus proximus* eadem vis, quum adsunt omnia quæ ad agendum requiruntur : tandem *actus secundus* ipsum activitatis exercitium. Hoc actuale exer-

(1) II Phys. text. 29.

citium *actio* audit : quæ *transitiva* est, si mutatio ab agente producta in alio recipitur; *intransitiva* seu *immanens*, si in ipso agente recipiatur. Illa est perfectio facti, ut v. gr. illuminatio; hæc perfectio agentis, ut visio.

Mutatio quæ ab agente provenit *passio* nuncupatur, si extra subjectum agens recipitur; *actus*, si actionem immanentem consequitur.

260. Causalitas finita (de infinita enim alias), nempe ratio causandi, efficientis causæ finitæ propria, ipsa ejus est actio, quæ semper in præsupposito subjecto exercetur. Videlicet id quod causam efficientem denominat, non est sola vis activa aut sola realitas effectus, sed realitas hæc ut a vi activa in præsupposito subjecto producit. V. gr. id quod solem illuminantem denominat, non est sola lux aut vis irradians solis, sed lux ut a sole irradiane est in corpore opaco.

261. Porro actio hujusmodi idem re est ac passio, juxta communem veterum sententiam, ac ratione sola ab illa distinguitur. Revera eadem entitas quæ educitur e subjecto, puta calor, quæque ut est *ab hoc in hoc*, dicitur actio, eadem, inquam, prouti est *in hoc ab hoc*, passio nuncupatur (1). Hinc tamen minime inferre licet, agens et patiens, aut in abstracto agere et pati, idem esse secundum rem, ac solum ratione distinguï. Nam quanquam forma, a qua tam agens quam patiens denominantur, sit eadem, illa nempe quæ in subjecto producit; res tamen quæ ab hac forma denominantur, distinctæ sunt, ac diversas denominationes recipiunt.

262. Ad agendum, ut paulo ante innuimus (259), nonnunquam quædam requiruntur, non quia causæ rationem participant, sed quia virtutem causæ disponunt et applicant ad agendum, vel saltem impedimenta remonent quæ actionem prohibent. Ita v. gr. lux requiritur ad scribendum, et compedum solutio ad currendum. Requisita hæc etiam *conditiones* appellantur. Sunt autem variæ conditiones istæ pro varia causarum subjectorumque, in quibus hæ agunt, imo et adjunctorum inter quæ agunt, conditione. Quædam vero ita requiruntur, ut iis deficientibus, aliquæ

(1) Ex Arist. III. Phys. text. 20.

aliæ præsto esse queant; quædam vero suppleri nullatenus possunt: et hæ dicuntur conditiones *sine quibus non*, i. e. sine quibus causa nullatenus agit. Ita v. gr. boni ratio in aliquo objecto cognita, est conditio sine qua non agit voluntas.

263. A causa efficiente et conditione distinguenda est *occasio*; quæ est *id omne ad cuius præsentiam aliquid fit*. Differt, inquam, a causa efficiente; quia ab occasionis activitate effectus existentiam non recipit. Differt a conditione; quia occasio per se non requiritur ad hoc ut causa agat, posset enim agere sine illa. Sæpenumero tamen occasio allicit et invitat causam efficientem ad agendum, vel ad agendum hoc tempore potius quam alio, quatenus vel finem operandi proponit agenti, vel faciliorem exhibet ejus assecutionem. Ita v. gr. tenebræ sunt occasio ad meditandum et ad furandum.

264. Causarum efficientium multæ feruntur partitiones; en tibi præcipuas:

1^o Causa *prima* et causa *secunda*. Causa prima est quæ ab alia non pendet, et a qua cæteræ omnes dependent. Causa secunda est quæ pendet a prima.

2^o Causa *per se* et causa *per accidens*. Causa per se est quæ agit id quo naturali destinatione dirigitur, aut quod ipsamet agere intendit. Sol v. gr. ceram emolliens et lutum obdurans, homo item qui voluntarie hominem interficit, sunt causæ per se. Causa per accidens est agens in cuius effectu aliquid præter ejus intentionem conjungitur, maxime si id cum actione non sit necessario connexum; ut quum fodiens terram thesaurum invenit.

3^o *Principalis* nuncupatur causa efficiens a qua effectus primario dependet, ut est scriptor; *instrumentalis* quæ a principali movetur, ut est calamus.

4^o *Necessaria* dicitur quæ, positis omnibus quæ ad agendum requiruntur, non potest non agere; *libera* quæ secus.

5^o Causa *adæquata*, quæ per se par est effectui præstando; *inadæquate*, quæ aliarum indiget auxilio causarum: Quæ

simul concurrunt ad unum eundemque effectum, *concausæ* nominantur.

6^o *Univoca*, quæ effectum producit essentia sibi similem, ut est planta; *æquivoca*, quæ effectum producit essentia diversæ, ut est artifex.

7^o *Physica* est causa quæ effectum parit virtute propria, sive principali sive instrumentali. *Moralis*, quæ virtute propria nec producit effectum nec ad illum producendum ullo modo cooperatur, sed solum aliam causam aut aliam potentiam ejusdem suppositi aliquo modo inducit ad operandum. Hoc pacto imperium, consilium, minæ, preces sunt causæ morales, quatenus alterum ad operandum movent. Ita quoque merita vel demerita præmiorum vel pœnarum sunt causæ morales. Imo etiam voluntas causa est moralis actuum, qui a cæteris potentiis ipsa imperante eliciuntur, quique propterea *imperati* nuncupantur. Idcirco in definitione dictum est causam moralem inducere ad agendum vel aliam causam vel aliam potentiam ejusdem suppositi.

Patet ex his, causam moralem inducere posse ad agendum tantummodo causas illas, quæ cognoscendi facultate pollent. Ejus enim efficacia non continetur impulsu physico, sed exercetur in vires physicas alterius, mediante ejusdem cognitione.

ARTICULUS III.

Theoremata.

265. PROPOSITIO I. *Quidquid in effectu perfectionis est, in causa ipsius adæquata aliquo modo præcontinetur.*

Ratio est manifesta. Nemo dat quod non habet.

Perfectio autem effectus præcontineri potest in causa tripliciter.

1^o *Formaliter*, quum perfectiones utriusque sunt in eadem specie. Sic in nube pluvia, in atramento scripturæ color continetur.

2^o *Eminenter*, quum causa perfectione pollet nobilioris ordinis, per quam idem præstat et modo excellentiore, quod

perfectio inferior effectui communicata. Sic Deus rationem hominis præcontinet.

3° *Virtualiter*, quum causæ activitas talis est, ut per ejus exercitium perfectionem diversi generis effectui conferre possit. Sic artifex machinæ perfectionem continet, eamque suo modo continent etiam instrumenta.

COROLLARIA. 1° Nullus effectus adæquata sua causa potest esse perfectior. Secus esset in effectui aliquid quod in causa non præcontinetur.

2° Patet veritas adagii illius: *omne agens agit sibi simile*. Patet etiam quomodo hoc sit intelligendum.

3° Inter causam principalem et instrumentalem (264, 3°) hoc interest discriminis, quod causa solum principalis suam in effectum similitudinem inducit, instrumentalis vero non suam similitudinem inducit, sed confert ad similitudinem principalis inducendam. Quare in principali solum agente præexistit formaliter vel eminenter perfectio quæ in effectum transfunditur, non vero in instrumento.

266. PROPOSITIO II. *Causa necessaria, positis omnibus requisitis, tantum semper agit, quantum potest.*

Positis enim omnibus requisitis, non potest non agere. Ergo agit: tota certe activitate sua, non solum ejus parte, secus enim ejus activitas ex parte necessaria non esset.

Hinc 1° Causa necessaria et proxime ad agendum expedita, semper effectum vires activas adæquantem exerit.

2° Propterea ex perfectione effectus causarum hujusmodi perfectionem æstimare licebit.

3° Causa necessaria, manens eadem, semper idem agit (200).

4° Hinc æqualibus temporibus æquales producit effectus, inæqualibus inæquales, majori tempore majores, minori minores.

267. PROPOSITIO III. *Effectuum diversitas non semper causarum multipliciter arguit.*

Etenim una eademque causa pluribus potest viribus polere, ac proinde diversos effectus activitate sua proferre. Ita autem se habere causas naturales, exempla pene infinita demonstrant.

Hinc effatum illud: *causæ sine necessitate non sunt multiplicandæ*.

268. PROPOSITIO IV. *Causa omnis, quæ in præexistente subjecto agit, agere nequit, nisi vel per se vel per aliud sit illi præsens.*

Ratio simplicissima hæc est: nulla res potest agere ubi non est. Ubi enim res non est, ibi res illa nihil est. Nihili autem nulla est activitas. Ergo nequit causa agere in subjecto, cui aliquo modo non sit præsens.

Ut dixi, causa potest esse præsens subjecto in quo agit, vel per se vel per aliud, vel *immediate* nimirum vel *mediate*.

269. *Immediata applicatio causæ ad subjectum habetur:*

1° per *identitatem*, quum nimirum agens et passum sunt una eademque res; ut quum anima in se ipsa cogitationes et volitiones producit;

2° per *unionem physicam*, ut quum anima in corpus sibi conjunctum agit;

3° per *contiguitatem*, ut quum manu corpus externum propellimus.

Mediata vero:

a) per *instrumentum*: ita pictor agit penicillo, et miles lancea;

b) per *emanationem aliquam*: ita balsamum v. gr. agit in naribus;

c) per *actionem in causam aliam immediate applicitam subjecto*: ita sol, mediante æthere, lucem et calorem quaquaversus diffundit;

d) per *influxum moralem* (264, 7°).

270. Duo supersunt explicanda potius quam probanda pronuntiata, quæ in ore omnium versantur.

1^m *Modus operandi sequitur modum essendi*. Hoc effatum nulli dubium erit, si 1° excludantur operationes liberæ, in eo quod a libertate dimanant; ac 2° si ita intelligatur: modificato intrinsecus operandi immediato principio, quod est activitas agentis, ipsam quoque operationem modificari oportere. Hoc enim perpetua ac certissima experientia comprobatur, et per se manifestum est. At si ad operationes libe-

ras extendatur, rejiciendum est. Si vero intelligatur de modis essendi, qui quanquam supposito agenti intrinseci sint, immediatum tamen operationis principium non afficiant, falsum in pluribus erit. Non enim v. gr. diversæ sunt intellectiones hominis sedentis et stantis, si cætera quæ intelligendi facultatem afficiunt, paria utrobique sint.

271. 2^a Causa causæ est causa causati. Effatum hoc 1^o procul dubio verum est, si intelligatur de causa quæ causam alteram non modo producit, sed etiam ad agendum determinat. Ita certe Deus est causa vicissitudinis dierum ac noctium, quæ a solis luce ac telluris motu procedit.

2^o Causa tamen quæ causam alteram ita determinat, erit causa per se eorum effectuum, quos altera per se producit, et causa per accidens eorum, quos altera producit per accidens (264, 2^o); nisi vel intendat effectum cum alterius actione non necessario connexum, vel hunc prævidens non impedierit, si impedire illum poterat ac debebat.

3^o Causa demum, quæ licet causam alteram producat, non tamen illam ad agendum determinat, nullo modo causa est effectuum qui ab hac altera dimanant. Sic pater v. gr. eo quod est pater, non est causa criminum filii, quanquam possit aliunde esse eorum causa moralis, aut etiam physica concausa.

ARTICULUS IV.

Humii de causæ efficientis conceptu errores refutantur.

272. Humius inter præcedentis sæculi scepticos facile princeps, in hoc præsertim scepticismum fundavit suum, quod causæ ideam nos habere negavit. Cujus hæc est brevi ratiocinatio (1). Si causæ ideam humana mens adsequeretur, eam non aliunde sibi adscisceret, quam ab experientia. Jam ab experientia idea hujusmodi ortum habere nequit. Experientia enim factorum nobis successionem utique refert, sed connexionem nequaquam: secus sciremus in quo hæc connexio reposita sit; quod tamen ignoramus. Atqui connexio est quæ causalitatem constituit.

(1) *Essay*, VII.

Nilominus, subdit, quum bina facta conjuncta constanter perspicimus, ea in imaginatione nostra associantur: ex quo fit ut quum alterum iterum apparet, alterius quoque ideam excitet. Hinc causæ definitio: *objectum post quod aliud objectum ita consequitur, ut præsentia primi inducat ad cogitandum de altero*. Hæc porro connexio mentalis ex consuetudine orta, est id quod causalitatem vocamus: hæc fundamentum præbet principio illi: *futura præteritis similia sunt*.

Hujusmodi est Humii doctrina: quid autem ex ea sequatur nemo non videt. Oleum et operam perdit quicumque studet rerum cognoscere causas: scientia omnis impossibilis est: imo impossibilis quoque est rationalis certitudo de entium, quæ extra nos sunt, realitate, non enim aliter hæc cognoscitur, quum ex effectibus. Superest nobis solum certitudo de sensationum successione, et de idearum nostrarum existentia.

273. PROPOSITIO V. *Certissimum est 1^o nos causæ ideam habere, licet non cognoscamus in quo causalitas sive interna sive externa sita sit; 2^o causæ ideam experientiæ ope efformari.*

Humius tres quæstiones omnino distinctas, quæ circa causæ notionem occurrere possunt, temere permiscuit. 1^a est utrum sit in mente nostra causæ conceptus: 2^a utrum cognoscamus in quo causalitas sive interna sive externa sita sit: 3^a unde originem habeat causæ notio.

Jam prima quæstio nullam prorsus dubitationem admittit: adeoque etiamsi origo hujus ideæ nobis esset incognita, ejus tamen existentia neganda non foret. Revera

1^o Conscientia hanc ideam reperit in mente clarissimam, et valde diversam ab ea quam Humius describit. Probe enim distinguimus successionem a causalitate.

2^o Causæ notionem exprimunt in omnium gentium linguis, verba quæ activa dicimus; ut *facio, moveo, traho, serio* et alia infinita.

3^o Eandem continent conjunctiones multæ; ut *ergo, cur, propter, quia* et similes.

274. Quoad quæstionem alteram, notandum in primis est,

quamvis externa experientia solam factorum successionem exhibeat, experiri tamen nos intimo sensu activitatem nostram: immediate enim mihi refert sensus intimus activum influxum qui a me dimanat, sive quum meipsum immuto, sive quum in proprium corpus nisum exerceo. Est ergo falsum per experientiam nullo modo causalitatem cognosci. Fatendum tamen est, intelligentiam, dum in facta illa interna se reflectit, et exercitium activitatis proprii subjecti, ut sensu offertur intuendum, attingit, nec principium unde illa actio dimanat, nec quid actio ipsa sit in se, contueri posse; sed solum genericam et indeterminatam causæ notionem acquirere. Cognoscimus igitur quid sit causa in genere, non tamen cognoscimus quid sit in specie rerum singularum activitas. Sed hæc idea generalis abunde sufficit ad principium causalitatis constituendum: a principio autem causalitatis, et per inductionem quæ ipsi innititur (L. 306), veritates omnes experimentales universitatem accipiunt.

275. Postremo principium illud: *futurum est præterito simile*, ex duplici principio evidenti concluditur, quorum primum est: *causa necessaria, positis omnibus requisitis ad agendum, necessario agit* (264, 4^o); nempe (quæ conditio semper in his subaudienda est) *nisi libertas creatoris eam impediatur*. Alterum: *sapientia creatoris postulat, ut causarum naturalium activitatem vel nunquam vel rarissime impediatur*. Qua de re alibi fusius.

276. Ex his patet unde causæ idea exoritur. Nempe, ut alibi responsum est Lockio, quum de substantiæ conceptu sermo fuit (158, 145), ab experientia, sed cum intelligentia conjuncta. Ratio enim causæ relatio quædam est, quam sola intelligentia concipere potest. Sed invenit intelligentia ejus ideæ fundamentum et objectum, ut diximus, in intimo sensu (274). Sic igitur primo causæ ideam ex nobis ipsis habuimus.

Experientia autem externa profecto nihil aliud immediate attingit, quam facta factis succedentia; neque aliud præterea sensus attingere possunt. Sed intelligentia quum aliquid noviter existere apprehendit, analysim exercens in ideam

generalem facti contingentis, ad ideam causæ generalem et indeterminatam iterum devenit, non intuitionem sed deductionem, ut melius paulo post explicabitur. Est autem conceptus hujusmodi ille ipse quem supra descripsimus (259).

277. Porro quæ sit in specie censenda facti determinati causa, num factum quod præcessit, an vero aliquid aliud sive cognitum sive incognitum, hoc aliis ratiociniis variatque experimentis et inductione, quandoque cum certitudine definitur, quandoque probabiliter conjicitur, quandoque etiam ignotum manet. Est enim plane falsum quod Humius asserit, quum duo constanter conjuncta perspicimus, alterum a nobis vocari causam, alterum effectum. Nonnunquam enim inter ea quæ sibi constanter succedunt, nullam esse causalitatem cognoscimus, ut v. gr. inter diem et noctem, aut inter anni tempestates; nonnunquam etiam cognoscimus, adesse inter duo sibi succedentia dependentiam aliquam, non tamen ut a causa, sed ut a conditione mera, ut est v. gr. inter projectionem corporis combustibilis in ignem, ejusque combustionem.

ARTICULUS V.

Refutatur occasionalismus.

278. Occasionalismi systema, ab antiquis quibusdam e Maurorum gente præformatum (1), celebritatem suam inter recentiores debet Nicolao Malebranchio, philosopho sæculi XVII (2), quem deinde cartesianorum nonnulli secuti sunt. Hi docent, causas finitas, ac præsertim corporeas, nulla activitate instructas esse; sed esse tantum occasiones, ad quarum præsentiam, Deus juxta leges a se constitutas, effectus omnes qui ab ipsis rebus produci videntur, solus operatur. Ita ut in omnibus semper idem fere contingat, quod in miraculis, quæ ad sanctorum vocem contactumve fiunt. Nec corpora agunt in corpora, nec corpora inanimata in animata, nec anima in corpora externa, aut in proprium corpus. Imo juxta rigidissimos occasionalistas neque suas

(1) Hos impugnat S. Th. in *Summa contra gentiles*. Lib. III, c. 69.

(2) *Recherche de la vérité*, liv. VI, part. II, ch. III et *Eclaircissements*, 15.

ipsa cogitationes ac volitiones anima producit; sed Deus omnia in omnibus ac solus agit. Nullæ proinde sunt causæ secundæ (264, 1^o) quæ causæ efficientes vere dici mereantur.

279. PROPOSITIO VI. *Causæ secundæ non sunt mere occasionales dicendæ, sed vere efficientes.*

Nota antea 1^o Activitatem quam causis secundis asserimus, diversam esse pro agentium diversitate. Alio enim modo agunt spiritus, alio corpora.

Nota 2^o Non esse necessarium ut statuamus, in quo sita sit diversorum agentium activitas (274); aut ut explicemus quomodo in se mutuo res agant.

Nota 3^o Non esse imo necessarium, ut quæcunque a corporibus agi dicuntur, vere ab illis agi singillatim defendamus. Sufficit enim ut aliqua activitas corporibus adstruatur, in iis nempe, in quibus ea non agere absurdum foret.

Note 4^o Activitatem aliam esse spontaneam, aliam determinatione ab extrinseco accepta indigentem (264, 3^o). Corporibus autem non prima illa, sed altera hæc solummodo convenit; quæ tamen vera activitas est, ut quæ ratio aliqua est, licet non totalis, existentiae effectus.

280. Probatur propositio; ac primo de spiritibus.

1^o Aperte distinguimus ex intimo sensu quædam fieri in nobis, sed non a nobis: ut quum trahimur inviti; quædam vero fieri in nobis et fieri a nobis; ut quum animum advertimus ad meditandum, aut nos ipsi movemus, aut in corporibus externis aliquid efficimus. Hæc enim omnia fieri sentimus quia volumus, nec modo quia volumus, sed quia nimum quemdam et conatum exerimus; qui quidem non raro adeo est intensus, ut nos defatiget, quandoque etiam absterreat, faciatque ut a volendo conandoque ulterius abstineamus. Ipsum in primis volendi actum a nobis elici ita luculenter nobis compertum est, ut nihil magis. Testatur ergo sensus intimus nos activos esse, tam in actionibus immanentibus, quam in transeuntibus; imo ex hoc sensu, ut supra notatum est (276, 274), causæ idea primo in nobis exoritur.

2^o Si voluntas ipsa spirituum activitate nulla gaudet, quid

sequitur? Tollitur illico omnis humanorum actuum libertas; ac proinde nullum est amplius meritum vel demeritum; præmia omnia ac pœnæ ex æquo injustæ sunt atque absurdæ; nemo amplius est qui pius, nemo qui scelestus dici possit; imo si omnia Deus agit, ipsum inter actiones honestas et inhonestas intrinsecum discrimen evanescit.

Atqui hæc non christianæ modò fidei, sed et primis rationis principiis et sensui communi sunt plane contraria, omnemque humanam societatem funditus evertunt. Unusquisque igitur videt, quanta sit occasionalismi, si ad hæc usque extrema provehatur, et absurditas et impietas.

281. Probatur secundo propositio de corporibus.

1^o Inactiva esse corpora nullo modo probari potest; neque a priori neque a posteriori.

Non a priori. Ad hoc enim necesse foret ut corporum essentiam ex integro perspectam haberemus, aut saltem ut aliquam in iis deprehenderemus essentiali proprietatem quæ omnem prorsus activitatem excluderet.

Jam necessitatem corporum ex integro cognoscimus, nec proprietatem aliquam hujusmodi in illis deprehendimus. Extensio enim quam in corporibus intuemur, habet utique cum vi cogitandi aut volendi intimam repugnantiam, sed non cum activitate quacunque. Conceptus enim divisibilitatis ac multiplicis partium genericum activitatis conceptum nequaquam excludit.

Non a posteriori, nempe per experientiam. Etenim per experientiam activitatem solummodo cognoscere possumus: sola enim activitas nos afficere potest atque impressionibus suis immutare; inactivitas vero nequaquam; secus inactivitas esset activitas.

282. 2^o « Contra rationem sapientiæ est, ita S. Thomas, » ut sit aliquid frustra in operibus sapientis. Si autem res » creatæ nullo modo operentur ad effectus producendos, sed » solus Deus operetur omnia immediate, frustra essent adhibita ab ipso aliæ res ad producendos effectus. Repugnat » igitur prædicta positio divinæ sapientiæ (1). »

(1) *Contra Gent.* I, c.

283. Neque dicas frustra non adhiberi res, si Deus tanquam occasione illis utatur. Nam in primis etiam absque occasionibus istis poterat Deus agere in nobis quaecunque vellet, et quandocunque vellet. Quæ quidem responsio valet præsertim contra Malebranchium, qui corporum existentiam valide impugnari putat principio illo: Deum non facere per plurâ, quod potest fieri per pauciora (L. 490). Si enim absonum est juxta ipsum, Deum adhibere corpora, etiam tanquam sensationum causas, quanto magis absonum erit, Deum adhibere corpora quæ nihil agunt et nihil agere possunt?

284. Præterea cur Deus adeo artificiose organa nostra elaboravit, si corpora externa nullam in ipsis actionem exercent? Si ponas voluisse Deum, ut radii v. gr. certo quodam modo ad retinam appellerent, certamque affectionem in ipsa excitarent, statim intelligo quo tendat mirabilis oculi constructio. At si radii nihil agunt, sed omnia Deus, quid opus erat tam solerti artificio tantaque machinatione?

285. 3^o Denique, ut alia omittam, communis humani generis sententia occasionalismum profligat. Persuasio enim communis de corporum activitate, fixa rataque omnibus perinde est ac persuasio de corporum existentia. Nec facile inveniri poterit qui persuaderi se sinat, non ab igne se calefieri, neque a corporibus resistantiam ipsi opponi, sed immediate a solo Deo.

ARTICULUS VI.

Difficultates.

286. Obj. I. Omnia in omnibus operatur Deus. Ergo res creatæ nihil agunt. Prob. ant.

1^o Potest Deus omnia agere. Ergo agit omnia. Non sunt enim causæ multiplicandæ sine necessitate.

2^o Repugnat plane Deum in activitatis suæ consortium res creatas quasi socias adsciscere.

3^o Opinio quæ efficientiam tribuit causis secundis, est opinio pagana; his enim ea tribuit, propter quæ tanquam

inferiores quædam divinitates haberi possint; nempe vim agendi in nos, per quam et timeri et amari debeant, ac proinde adorari.

287. Resp. *Dist. antec.*: Ut causa prima, *conc.*; ut causa unica *nego*. Habet hunc verum sensum objecta propositio, quod nempe omnis actionis finitæ Deus est principium, quatenus existentiam et activitatem rebus contulit ac perpetuo conservat; iisque cum continenter in agendo concurrat: atque omnium est finis ultimus, ut qui summum bonum est (1). Hæc suo loco fusius explicabuntur.

Satis interim liquet ex eo quod Deus omnium actionum hoc modo principium sit, non excludi a causis finitis activitatem ipsis convenientem.

Ad 1^m *Dist. ant.*: In alio ordine, *omitto*; in præsentī ordine, *nego*. Videlicet si Deus corpora non creasset, posset profecto omnes corporum actiones eminenti sua virtute efficere, at si corpora creavit, jam non potest amplius, quin suæ sapientiæ derogat. Item si nulli essent actus vitales, voluntarii, liberi ac meritorii, nec sensus intimus ea nobis renunciaret quæ modo renuntiat (280), esto posset Deus, hac facta hypothesi, actus spirituum proprios in ipsis ex sese efficere spiritibus ac veluti ponere; quanquam qui ita opinaretur, nescio quomodo spiritus ideam conciperet; sed in hypothesi opposita suppositio hujusmodi est manifeste absurda.

Nego autem prorsus *consequentiam*. Nam etsi ponamus sine ulla limitatione, Deum omnia per se posse agere, non tamen sequitur eum omnia per se acturum; potuit enim habere rationes etiam nobis inexploratas creandi corpora activa, ac spiritus non mortuos sed viventes.

288. Quare ratio addita nullam vim habet. Verum est enim non esse multiplicanda entia sine necessitate, si tamen nomine necessitatis non stricta necessitas, sed ut alio in loco dictum est (L. 490), etiam congruentia, decor ac majus ali-quod bonum intelligatur; præsertim quum de Deo loquimur, cui nihil prorsus necessarium est.

Multo autem congruentius, decentius et oportunius ad

(1) Cf. S. Th. *Summ. th.* p. 1. q. CV. a. V. et *Contra Gent.* Lib. III, c. LXX.

creationis finem erat, et spiritus et corpora activitate donari, quam secus. Hoc enim pacto et sapientia et bonitas et potentia creatoris multo luculentius ostenditur. An non sapientius consilium quo physicus ordo inter tot contrarias vires, ac moralis ordo cum humana libertate servatur? Multo certe melior artifex ille, qui artis suæ disciplina multos erudit, quam qui artem suamet abditam mente et inclusam sinu teneat: ac multo mirandum magis effici ab aliquo machinam quæ textat aut consuatur, quam si suis ipse manibus eadem opera exsequatur. Quid vero si machinam hic ejusmodi extrueret, quæ alias machinas sibi similes perpetuo produceret? Atqui hoc Deus in plantis et animalibus efficit.

289. Ad 2^m *Dist.*: Tanquam causas ejusdem ordinis, *conc.*; tanquam causas diversi ordinis, *nego*. Repugnat sane, Deum res a se creatas adhibere ad opus, tanquam causas auxiliares aut instrumentales, quasi vero aliter operi perficiendo esset impar, aut viribus deficeret. Minime vero repugnat, causam primam contulisse rebus a se conditis ut proprios effectus agant; imo hoc maxime illam decet, ut modo diximus.

Ad 3^m Mirum quam sint hæc abnormia, et tumultuario effusa. Vis agendi quam secundis causis homines tribuunt, non est vis independens et infinita, nec timor omnis et amor adoratio est.

290. Obj. II. Spiritus nequeunt saltem movere corpora. Etenim:

1^o Facultas hæc in spiritus notione non invenitur.

2^o Motum producere possent solummodo per voluntatem. Atqui voluntas non potest motum producere.

3^o Vis movendi corpora est infinita. Nam movere corpus perinde est ac illud conservare in diversis successive locis. Conservatio autem hujusmodi est vis infinita.

Resp. Neg. ant.

Ad 1^m *Dist.*: In conceptu inadæquato, *conc.*; adæquato, *nego*. Ac præterea nulla est consequentia, nisi falsum illud principium supponatur: *id solum quod clare et distincte percipio verum est* (L. 753).

Ad 2^m *Neg. maj.* Nam, ut jam notavimus (280, 264, 7^o), non

voluntas immediate suo actu corpus movet, sed ad nutum voluntatis facultas peculiaris, quam *loco-motivam* dicimus, ut patet ex intimo sensu.

Ad 3^m Nescio quomodo difficultas hæc in mentem venire potuit Purchotio. Facilis est responsio. *Neg. ant.* Et ad prob. *Neg. maj.*

291. Obj. III. Corpora certe agere nequeunt. Omnis enim corporum actio foret per motum. Sed corpora motum producere non possunt, Nam

1^o Sunt inertia, nec se ipsa movere possunt. Ergo nec alia.

2^o Motus non potest ab uno corpore in aliud transire.

3^o Imo non intelligitur quomodo possit communicari motus.

Resp. Neg. ant. Ad prob. *Trans. maj.* Etenim nec tota corporis activitas motu continetur, cum certe corporis propria sit vis resistendi penetrare conanti, ut nunc alia de quibus quæstio fit, omittam; nec omnes corporum actiones ad motum gignendum reducuntur, saltem enim admitti debet in moleculis simplicibus vis quædam, qua in se invicem agentes copulantur et corpora constituunt.

Dist. min.: Per se, *conc.*; determinatione accepta ab extrinseco, *nego*. Nequeunt enim corpora se determinare ad actum; sed si ad actum aliunde determinentur, possunt alia corpora ad motum determinare tum immediate per se, tum mediate per ætherem, ut aiunt, imponderabilem.

292. Ad 1^m *Dist.*: Nequeunt corpora se determinare ad motum, *conc.*; nequeunt per se in motu perseverare, si fuerint determinata, *nego*.

In hoc tantum est inertia corporum, quod ad statum suum utcunque mutandum determinatione ab extrinseco proveniente indigeant; se ipsa enim determinare nequeunt. Dum ergo sunt in quiete non moventur nisi determinentur ad motum; dum sunt in motu non quiescunt nisi determinentur ad quietem. Sed quemadmodum accepta determinatione per se manent in quiete, ita per se motum inchoatum persequuntur.

Ad 2^m *Dist.*: I. e. idem numero motus non exit ab uno

corpore, ut in alium commigret, *conc.*; non potest unum corpus alterum ad motum determinare, *nego.*

Ad 3^o *Trans. ant.*; *Neg. consequentiam.* Fateor obscurum esse quomodo motus communicetur. At quid inde? Anne ideo negandum corpora agere et se mutuo movere, quia quomodo id fiat assequi non possumus?

ARTICULUS VII.

De causa finali.

293. Finis est *id propter quod aliquid fit.*

Actus quo finem volumus dicitur *intentio* finis. Ratio quæ ad finem volendum movet, *motivum.* Actio vel opus ad finis assecutionem conducent, *medium*, ac si impedimenta finis removeat, *remedium* nuncupatur.

Manifestum est finem amari *propter se* ac *rationi sui*, nempe propter bonitatem quam habere cognoscitur; medium vero qua tale amari *propter aliud*, nempe propter finem.

294. Finis dividi solet 1^o in *finem qui* (alias *cujus gratia*), et *finem cui.*

Finis qui est illud bonum cuius adipiscendi gratia fit actio; ut est doctrina in studio, vel sanitas in curatione.

Finis cui, est subjectum cui procuratur *finis qui*, tanquam bonum ejus; ut est homo in intentione studii vel sanitatis.

Utrique porro vera finis ratio convenit. Nam qui v. gr. philosophiæ studet, tam amore suiipsius movetur, quam amore doctrinæ, quam cognoscit suum bonum esse: non enim propter se solum studeret, nisi doctrina esset obtinenda, neque propter doctrinam solum, nisi illa bona esset. Quare finis uterque, seu concretum hoc: *homo doctus*, est integer, et adæquatus finis studenti propositus.

295. 2^o *Finis qui* in duas quasi partes dispescitur, nempe in finem *objectivum* et *formalem*, quem dicunt etiam *finem quo.* Finis objectivus est res in qua ratio boni invenitur, et quam adipisci desideramus: formalis est ipsa adeptio rei. Sic avaro pecunia est finis objectivus, pecuniæ possessio finis formalis. Hæc autem duo non sunt duo fines proprie,

sed unus finis, bonum nempe assequendum ab aliquo subiecto.

3^o Ex parte modi quo fine objectivo potiri possumus, dividitur finis in *efficiendum* et *obtinendum.* Primus est bonum quod ante agentis intentionem et actionem non supponitur existens, sed per illam constituitur, ut est ægroti sanitas aut studiosi doctrina. Alter est bonum quod ante intentionem agentis supponitur existens, atque ut acquirendus intenditur. Talis finis est aurum respectu avari.

4^o Ex parte rerum quæ rationem finis habere possunt, hæc res aliquando sunt *aliquid quod ex operatione resultat*, quemadmodum finis ædificationis est domus, et curationis est sanitas; aliquando *ipsa operatio*, quemadmodum finis contemplationis est ipsa contemplatio, et finis cantus est ipse cantus.

296. 5^o Pervulgata est finis partitio in *finem operis*, et *finem operantis*, seu, ut alii dicunt, in finem *intrinsicum* et *extrinsicum.* Porro finis operis est *id ad quod opus natura sua ordinatur*; uti in exemplis supra allatis finis operis ædificandi est domus, et canendi est cantus. Finis autem operantis est *id quod agens pro libitu intendit.* Hoc pacto finis v. gr. canentis potest esse lucrum, gloria, delectatio propria, honor divinus vel etiam ipse cantus: potest enim finis operantis esse id ipsum quod est finis operis.

297. Est etiam usu celebris divisio finis in *proximum* et *remotum vel ultimum*; quæ divisio ab ea maxime finis proprietate desumitur, quod sit ratio propter quam media amantur et adhibentur. Contingit enim quandoque, media quæ ad unum finem adhibentur esse inter se subordinata, ita ut primum sit medium ad secundum, secundum item ad tertium, et ita porro, donec in ultimo medio sistatur, quod ad finem primo intentum statim adducit. In hac ergo serie duplex est ordo distinguendus, alter *intentionis*, alter *exsecutionis.* In ordine intentionis primum quod intenditur est finis; deinde eligitur medium quod ad finem immediate adducit; deinde medium alterum ad primum illud exsequendum, etc. In ordine vero executionis primum est medium,

quod in intentione fuit ultimum, atque ultimo sequitur finis assecutio. Jam medium illud quod primo adhibetur in executionis ordine, nullo pacto finis rationem habet: nihil enim aliud fuit propter illud electum; sed medium quod secundum locum occupat, jam rationem finis habet præ primo, quia primum fuit electum propter ipsum; et hoc medium secundum dicitur finis proximus. Cætera media sunt fines remoti, quorum series sistit in fine ultimo. Mercator v. gr. domo egreditur, adit forum, negotiatur, lucrum assequitur, et in hoc et in aliis omnibus quæcunque agit, suam quærit felicitatem. In hac serie felicitas est finis ultimus, egressio ex propria domo finis proximus, cætera fines remoti; ille autem motus quem exsequitur ad egrediendum, purum est medium, quod nullam finis rationem habet.

298. Animadvertite 1^o Finem ultimum alium esse *simpliciter* ultimum, alium *secundum quid*. Est simpliciter ultimus ille finis ad quem agens se ordinat et sua omnia, quique ad nullum alium finem ordinatur. Est ultimus secundum quid finis ille qui ad nullum alium finem refertur, ad quem tamen non omnia referuntur, sed solum aliqua peculiaris mediorum series.

2. Finem secundum quid ultimum posse esse ipsum finem proximum.

3^o Tunc magis proprie finem proximum et cæteros, qui sunt inter proximum et ultimum, rationem finis habere, quam non modo singuli sunt rationes propter quas aliquid aliud ametur, sed etiam ipsi propter se amantur et intenduntur, quanquam vel ratione sui vel ex agentis intentione ad aliquid aliud ordinentur: hoc enim est finis maxime proprium, ut propter se ametur.

4^o Quandoque aliquis finis propter se diligitur, sed ita ut ad agendum movere non valeat, nisi alius quoque finis vel cum illo vel mediante illo intendatur; tunc primus ille finis dicitur *secundarius*, alter *principalis*. *Coordinati*, si unus cum altero intendatur; *subordinati*, si unus propter alterum. Exempla unusquisque in seipso reperiet.

ARTICULUS VIII.

Theoremata.

299. PROPOSITIO I. *Finis est vera ac proprie dicta causa.*

Constat hoc luculenter in agentibus intellectualibus in quibus finis suam causalitatem immediate ac primo exercet. Agentia itaque intellectualia, quum libere agunt, certum aliquem finem spectant, cujus intuitu se movent, primo quidem ad ipsius finis amorem, tum vero ad eligenda et exsequenda media propter illum. Neque aliud sunt actus liberi voluntatis, quam vel amor et intentio finis, vel electio mediorum vel imperium quo facultates cæteræ ad media seu invenienda seu exsequenda determinantur. Ergo finis motionem quamdam, exercet in voluntatem, qua motione influit in existentiam actionum ipsius, eorumque omnium quæ per ejusmodi actiones producuntur. Est ergo finis vera causa (258).

* 300. Ex his sequitur 1^o solummodo bonum, seu verum seu apparens, causæ finalis rationem habere posse. Bonum enim ac bonum solum voluntatem movet.

2^o Causalitatem finis in actu primo (259) esse ipsius finis bonitatem, ut cognitione representatur: ejus autem exercitium (actum secundum) esse agentis actiones, ut a fine, tanquam ab objecto voluntatem movente, dependent.

3^o Motionem quam finis exercet non esse physicam; hæc enim propria est causæ efficientis, sed metaphoricam et in ordine intentionali.

4^o In hoc distingui causalitatem finis a causalitate morali (264, 7^o), quod finis movet *ut sit*, causa moralis movet *quia est*.

5^o Voluntatis actus qui causæ finalis sunt effectus, ut ex jam dictis (299) constat, plures ac varios esse, aliosque *elicitos* ab ipsa voluntate, alios ab eadem *imperatos*. Qui omnes duos illos constituunt ordines, intentionis et executionis, de quibus supra dictum est (297). Amor finis, intentio ejus, inquisitio electioque mediorum ad ordinem pertinent intentionis: executio imperata mediorum, assecutio finis et gaudium de fine obtento ad ordinem executionis.

6° Finem quodammodo esse suiipsius causam, quatenus per efficientiam mediorum vel producitur vel acquiritur. Nullum autem in hoc est inconveniens. Nam primo quidem finis est causa, prout existentiam habet intentionalem (11, 300, 2°); est vero effectus in ordine existentiae realis. Deinde non immediate est sui causa, sed mediantibus actibus causae efficientis, quos ipse proxime causat. Hinc illud: *finis primus in intentione, ultimus in executione*.

301. PROPOSITIO II. *Omne agens propter finem operatur.*

Præmittendum est, agens operari posse propter finem dupliciter: 1° ut se ad finem movens et ad finem media ordinans; 2° ut motum ab alio atque ab alio ordinatum in finem. Primus autem modus operandi propter finem proprius est solummodo entis intelligentis. Nam solum ens intelligens ipsam finis rationem cognoscit, ac suorum actuum dominium habet. Agentia vero quæ intellectu carent, sive apprehendant materialiter finem, ut bruta, sive non, ut res inanimæ, semper naturali necessitate in finem aguntur; quemadmodum sagitta ad scopum tendit, non quia ipsa se ad scopum agat, sed quia a sagittario illuc dirigitur et impellitur.

In propositione asseritur, uno modo vel altero omne agens propter finem operari.

302. Prob. 1° « In his quæ manifeste propter finem agunt, » ita S. Thomas, hoc dicimus esse finem in quod tendit impetus agentis (1). » Atqui cujuscunque agentis impetus seu motus ad certum aliquem effectum tendat necesse est. Nam, ut idem S. Thomas ratiocinatur, « si agens non tenderet ad aliquem effectum determinatum, omnes effectus » essent ei indifferentes. Quod autem indifferenter se habet » ad multa, non magis unum eorum operatur quam aliud; » unde a contingente ad utrumque non sequitur aliquis effectus, nisi per aliquid quo determinetur ad unum. Impossibile igitur esset quod ageret. Omne igitur agens » tendit ad aliquem determinatum effectum, qui dicitur finis ejus (2). »

(1) Contra Gent. Lib. III, c. II, § I.—(2) Ibid. § 7.

Prob. 2° Omnes agens vel agit libere, vel necessario. Si libere, non modo propter finem operatur, sed ex intentione finis (299, 304). Si necessario, ex naturæ determinatione agit. Sed naturæ determinatio primæ causæ impulsus est atque directio. Prima autem causa et intelligens est et sapientissima. Ergo nullus ab ipsa procedit effectus, qui ad certum finem non dirigatur. Ergo etiam ea quæ necessario agunt, propter finem agunt, non quidem ab ipsis, sed a prima causa intentum.

303. PROPOSITIO III. *In serie finium subordinatorum non datur processus in infinitum.*

Non datur in electione mediorum. Nam si intentio a fine descendens ad media, in aliquo medio ultimo non sistat, nunquam incipiet executio et actio; primum enim in executionis ordine id est, quod fuit ultimum in ordine intentionis.

Non datur in intentione finium. Secus nunquam posset incipere intentio. Intentio enim incipiat oportet ab aliquo quod primum sit. Hoc autem primum vel intenditur propter se vel propter aliud. Si propter se, est finis in illa serie ultimus. Si propter aliud, jam non est primum quod intenditur; nam illud aliud intenditur prius. Ergo si in serie intentionum nihil est quod propter se intendatur, nulla poterit esse intentio.

304. PROPOSITIO IV. *Qui vult finem velle debet et media.*

Nam vel una cum fine media cognoscit, vel post finis cognitionem. Si una cum fine media cognoscit, tantum se porriget intentio ad media, quantum ad finem se porrigit. Si post finis cognitionem media cognoscit nec ea vult, jam hoc ipso voluntatem circa finem immutat. Non enim vult amplius finem, qui ea sine quibus haberi finis non potest, velle recusat.

ARTICULUS IX.

De causa materiali, formali, et exemplari.

305. Materia est id ex quo aliquid fit. Spectari potest materia tripliciter: vel in ordine ad compositum ex materia et

forma vel in ordine ad ipsam formam vel respectu agentis. Si primo modo spectetur, dicitur *materia ex qua*, et juxta hanc acceptionem se habet definitio allata: si altero, dicitur et *materia ex qua*, et *materia in qua*, nempe ex qua educitur forma, vel in qua est forma: si tertio, dicitur *materia circa quam*, nempe circa quam operatur agens.

Materia ex qua educitur forma, quæ una cum ipsa materia compositum facit, dicitur *subjectum sustentationis* vel *inhæSIONIS*: ita enim requiritur ad formæ productionem, ut sine subjecto ejusmodi existere forma non possit. Tale subjectum est v. gr. mens respectu cogitationis, et marmor aut lignum aut aliquid hujusmodi respectu figuræ cujuscunque.

Materia autem in qua recipitur forma, quæ tamen non ex ipsa educitur, dicitur *subjectum informationis* vel *adhæSIONIS*, et non requiritur ad formæ existentiam. Hujusmodi est corpus humanum respectu animæ rationalis.

306. Forma est *id per quod aliquid fit*, nempe id, quo accedente, materia determinatam accipit in aliquo genere entitatem; unde dicitur etiam *ratio essentialis* seu *compositi*.

Alia est forma *substantialis*, quæ videlicet una cum materia compositum substantiale constituit, ut est hominis spiritus: alia *accidentalis*, et est omne id quod inhæret substantiæ, ut actus volendi aut color.

* 307. Formæ hujusmodi dicuntur a veteribus *physicæ*: his opponuntur:

1^o Formæ *metaphysicæ*, quæ nimirum abstractione mentis ut formæ concipiuntur. Quum enim rem unam eandemque, sed diversis conceptibus intellectam, ut compositam ex pluribus consideramus, unum semper consideramus ut materiam, ut imperfectum quid, ut inchoationem rei, alterum vero ut formam perficientem ac consummantem. Ita naturam seu essentiam dicimus formam, et subjectum materiam, eodemque pacto genus respectu differentiæ materiam denominamus.

2^o Formæ *extrinsecæ*, quæ desumuntur a forma aliqua in alio subjecto existente, ut esse cognitum, aut honoratum. Vide dicta in logica de concretis (L. 30).

3^o Formæ *analogicæ*. In composito ex partibus integrantibus formæ dicuntur respectu cæterarum partes illæ, quæ cæteris complementum afferre videntur. Ita caput in homine, tectum in ædificio. Universim id quod rei ad plura indifferenti tribuit destinationem, usum, efficaciam determinatam, forma dicitur per analogiam. Hoc pacto promulgatio dicitur forma legis, et Theologi in Sacramentis materiam et formam distinguunt.

308. Ex his quæ de materia et forma dicta sunt, intelliges 1^o quid significant illa: *produci ex nihilo sui*, *produci ex nihilo subjecti*.

Producitur *ex nihilo sui* id omne quod actione agentis essentiam accipit determinatam et individuum, quæ prius in rerum natura non erat.

Producitur *ex nihilo subjecti* id quod ex materia præexistente, vel ex partibus componentibus non fit.

Ex nihilo sui et *non subjecti*, forma omnis sive proprie dicta sive improprie (307), quæ vel ex materia educitur, vel ex partibus componentibus efficitur.

Ex nihilo sui et *subjecti*, seu *ex nihilo absolute* id quod essentiam accipit quam prius non habebat, quæque nec ex præjacente materia educitur, neque ex partibus præexistentibus conflatur.

Intelliges 2^o quid sibi velint hæc alia, quæ frequentissime occurrunt apud veteres: *materiam esse potentiam*, *formam esse actum*. Nempe subjectum, sive inhæSIONIS sive informationis, quum formam non habet, potest nihilominus illam habere, et idcirco est in potentia respectu illius. Forma vero quando materiæ conjungitur, sive ab illa educatur sive non, dat composito ut actu sit ejusmodi compositum, et materiæ dat ut ad certam entis speciem et ad certum actum essendi determinetur.

* 309. PROPOSITIO I. *Materia rationem habet veræ causæ.*

Est 1^o causa intrinseca respectu compositi Est enim ejus pars essentialis ac necessario requisita, ut supponimus, in illo composito, adeoque influit in esse ipsius. Quis enimvero

dubitet utrum corpus influat hoc pacto in hominis essentiam aut marmor in essentiam statuæ?

Est 2^o causa intrinseca respectu formæ quæ ab ipsa educitur. Forma enim ejusmodi a materia dependet et ut fiat, et ut esse pergat. Ergo materia est ejus causa. Et est causa extrinseca; quia marmor v. gr. non est figuræ Apollinis constitutivum, sed solummodo subjectum.

Est porro sedulo animadvertendum, materiam respectu formæ, quæ ab ipsa non educitur, esse quidem subjectum, non vero causam materialem, sed solummodo conditionem ut illa fiat. Ita se habet corpus humanum respectu animæ.

310. PROPOSITIO II. *Forma item physica, ubicunque vere adest, propria causa est.*

Est 1^o causa intrinseca compositi quod constituit. Habet enim compositum a sua forma ut sit id quod est. A forma ergo dependet, ut ab intrinseco constitutivo.

Est 2^o causa extrinseca respectu materiæ in qua recipitur. Nam ipsi tribuit ut ad certam entium speciem actu determinetur.

311. Hæc in præsentī sufficiant. Sed cave ne his tantum notionibus imbutus, de rerum naturalium constitutione discernere aggrediaris. Quanquam enim notiones istæ sint utiles atque adeo necessariae: quanquam ea quæ præstituimus et cætera omnia quæ quis ex his notionibus *a priori* deducere velit, tuto recipi possint; tamen quum ad rerum naturam explicandam fit gradus, neque amplius a priori procedere licet, in primis et ante omnia videndum est, an notiones istæ rebus applicari possint et quomodo et intra quos limites; tum id omne quod in iisdem vagum est et indeterminatum, experimentalium scientiarum adminiculo determinari et compleri debet. Secus obscuritatem congeres, non lucem afferes, et in falsas quoque conclusiones non raro decides. Sed de his alio in loco.

312. Pauca de causa exemplari. Exemplar est *forma mente præconcepta, in cujus similitudinem fit aliquod opus ex intentione operantis*. Hinc deduces,

1^o Sola illa agentia quæ intellectu sunt prædita, exemplaribus ideis uti posse.

2^o Imo agentibus per intellectum exemplarem aliquam ideam necessariam esse. Etenim sicut ea quæ agunt ex naturæ necessitate, natura ipsa ad agendum determinantur, ita quæ agunt per intellectum, oportet ut per intellectum determinentur, non quidem quoad activitatis suæ exercitium, nam hoc ad voluntatem pertinet, sed quoad specificationem actus et directionem.

3^o Agens per intellectum non formaliter, sed eminenter effectus perfectionem præcontinere, videlicet in idea exemplari.

4^o Exemplar merito inter causas recenseri. Ars enim ad opera artificialia concurrat vere ut causa; sed non concurrat nisi per exemplar quo dirigit operantem. Ergo.

5^o Intelliges cur exemplar vocetur *causa formalis externa*; nempe quia rei faciendæ formam agenti offert.

6^o Nihilominus dicendum est, exemplar ad causam *efficientem moralem* proprie revocari. Ad causam quidem efficientem, quia concurrat ad opus constituendo artificem, proxime aptum ad agendum certo illo modo. Ad causam vero moralem, quia concurrat dirigendo, ac dictando quid sit faciendum.

ARTICULUS X.

De principiis rationis sufficientis et causalitatis.

313. Ratio definiri generatim potest: *id omne quo aliquid intelligitur vel potest intelligi* (1). Hinc rerum ideas seu conceptus quibus res cognoscit intellectus, appellare vulgo solemus rerum rationes (2). Ita dicimus rationem v. gr. virtutis aut animantis esse in hoc aut in illo, et essentiae conceptum rationem rei propriam nuncupamus. Communius vero rationis nomine significamus id quo intelligitur vel potest intelligi *quid sit res*, aut *quod sit*, aut *cur sit*. Et in hac speciali acceptione ratio triplex est: *essentiæ, existentiae, evidentiæ*

(1) reor, ratus, ratio.

(2) V. S. Th. Summ. th. p. 1. q. XV. a. 3.

seu *cognoscibilitatis*. Quæ partitio cum trita principiorum partitione conspirat (254). Est enim principium id unde aliquid est, aut sit, aut cognoscitur. Est tamen discrimen rationis a principio. Principium enim est *quod continet rei rationem*. Ratio autem in principio contenta est *id quo principium sui principiati esse principium intelligitur*.

314. Ratio porro essentiae invenitur in principiis rei intrinsecis. Quisque videt eas solummodo essentias rationem sui habere in alio, quæ ex pluribus principiis constant.

Ratio existentiae est in principiis extrinsecis, quæ sunt causa efficiens et finalis, et continetur causalitate utriusque. Quod si ens principia extrinseca non habeat, ratio existentiae in ipso ente sit oportet.

Ratio evidentiae est in principiis cognoscendi, quæ in ordine logico cum suis principiatis connectuntur; et est ipsa connexio unius veritatis cum altera: hæc enim connexio facit, ut certa aliqua veritas principium dicatur (254).

315. Ratio alia est *sufficiens*, alia *insufficiens*. Sufficiens est ratio, si omnia quæ in rationato sunt per illam plene intelligantur. Insufficiens, si non omnia.

Facile intelliges, rationem sufficientem sive essentiae sive existentiae sive evidentiae, esse connexionem principii cum principiati in actu secundo (259, L. 676). Sed quoad rationem sufficientem existentiae notandum sedulo est, aliam eam esse in causis necessariis, aliam in liberis (246, 4^a). In causis quidem necessariis est causæ activitas cum omnibus requisitis ad agendum, ut supra dictum est (262): in causis vero liberis, præter activitatem et requisita ad volendum, requiritur insuper electio voluntatis se ipsam determinantis ad agendum, ut suo loco explicabitur.

316. Principium rationis sufficientis ita enuntiatur: *nihil est sine ratione sufficiente*. Huic subordinatur principium illud alterum, quod vocant causalitatis: *nihil fit sine causa*; quod etiam affirmative et clarius ita effertur: *quidquid existere incipit, efficientem sui causam habet*.

Principium causalitatis minus late patet, quam principium rationis sufficientis. Etenim illud existentiae solum-

modo incipientis ordinem respicit; alterum vero tum essentiarum, tum existentiae, tum cognitionis ordinem amplectitur: nihil enim est id quod est, nihil existit aut cognoscibile est, nisi sit aliquid vel in ipso vel in aliquo alio, quod plene sufficiat ad ejus sive essentiam, sive existentiam, sive cognoscibilitatem constituendam.

317. Utrumque porro principium evidens est. Non defuere tamen qui illorum certitudinem impeterent. Quos inter Beguelinus berolinensis academicus elapso sæculo eminit, qui quanquam duo hæc principia simul permisceret, revera tamen contra principium causalitatis argutus est; objiciens principium hoc neque esse immediate evidens, nec demonstrari posse: unde conclusit non repugnare, ut aliquid sine causa ulla efficiente ad existendum prodeat, casu mere fortuito (1). Hunc ut refutemus, principii causalitatis absolutam et intrinsecam necessitatem breviter declarabimus, ostendendo in conceptu *existentiae incipientis* contineri conceptum hunc: *habens causam efficientem*.

ARTICULUS XI.

Asseritur principium causalitatis.

318. PROPOSITIO. *Principium causalitatis est analyticum et absolute certum.*

Sane 1^o quod incipit existere acquirit seu recipit aliquid quod prius non habebat: prius enim erat solum possibile; possibile autem existentiam non habet. Sed quidquid accipit quod prius non habebat, ab aliquo alio ente id accipiat necesse est. Non enim illud accipere potest a seipso, nam illud non habebat: non a nihilo; quia nihilum nihil habet et nihil dare potest, atque adeo acquirere aliquid a nihilo idem est ac illud non acquirere. Ergo quidquid existere incipit, ab aliquo ente accipit existentiam quam acquirit. Sed ens a quo alterum existentiam accipit, est causa efficiens. Ergo.

2^o Quod existere incipit, erat antequam existeret merum possibile, ac propterea indifferens ad existendum vel non existendum. Si enim ejusmodi non fuisset, profecto vel semper

(1) In *Actis Accad. Berolin.* MDCCLXXV.

exstisset, vel nunquam existere potuisset. Indifferens ergo cum esset ad existendum vel secus, quo existeret, oportuit ut ad existendum potius quam ad non existendum determinaretur. Hæc autem determinatio non potuit proficisci nisi ab aliquo ente; quod quidem evidens est per se, ac præterea probari potest ut in argumento præcedenti. Ergo.

3^o Si qua existentia incipere posset sine alterius inter-ventu, hoc ideo foret, quia ad existendum sufficit sola possibilitas, quemadmodum adversarius fatetur. Atqui nullatenus hæc sufficit. Nam in primis si hoc ita foret, omnia possibilita necessario existerent, adeoque nulla essent pure possibilita; id quod falsum et absurdum est (69). Deinde existentia est certe aliquid plus quam pura possibilitas. Igitur si ad existendum sufficeret sola possibilitas, id quod est *minus* sufficeret ad præbendum id quod est *plus*; videlicet *minus* esset *plus*. Sed hoc, adversario quoque fatente, contradictionis principium destruit. Ergo.

4^o Hoc totum confirmat sensus communis. Quicumque enim intellectu utitur, ubi quidpiam novi videt accidere, si causam ejus nesciat, supponit tamen adesse; imo inquit ac sciscitatur quomodo illud factum fuerit; nec acquiescit quacunque allata ratione, donec sufficiens afferatur. Quod si absque ulla causa rem accidisce dicas, te ut insansum deridebit (1).

319. COROLLARIA. 1^o Omnis effectus non causam quamcunque, sed sufficientem ac proportionatam causam habeat oportet. Secus esset aliquid in effectu quod causam non haberet.

2^o Effectus vim adæquatæ suæ causæ superare non potest. Ex eadem ratione.

3^o Nullum ens sui ipsius causa efficiens esse potest. Nam hoc ens quum se producit, existeret, quia agit; et simul non existeret, quia se producit. Ita ergo repugnat idem se producere, ut repugnat idem simul esse et non esse.

4^o Duo entia sibi invicem causæ efficientes esse non possunt. Nam si A producit B, dicendum est A esse natura priorem B (255): quod si A simul producit a B, erit simul A

(1) Cf. egregium opusculum Card. Gerdilii, cui titulus: *Réflexions sur un mémoire de M. Beguelin*. Opp. Edit. rom. T. II.

natura posterior B. Esset ergo A prior simul, et posterior B.

320. Si omnia quæ fiunt causam habeant necesse est, ergone, inquires, nullus erit casus fortuitus? Atqui tamen multa casu fortuito accidere passim dicimus, neque hoc in dubium adduci posse videtur.

Respondeo, duplicem sensum subjici posse huic voci: *casus fortuitus*. Potest enim accipi hæc vox *absolute* et *relative*. Absolute casus fortuitus est *eventus sine ulla prorsus causa*: hoc sensu hanc vocem usurpant et Beguelinns, et athei quum de rerum origine loquuntur: hic porro sensus, ut ex prædictis liquet, est prorsus absurdus.

321. Relative autem casus fortuitus est *eventus nec intentus nec prævisus*. Casus autem hoc sensu acceptus, absurdus est respectu Dei; quamvis enim quædam ex iis quæ accidunt, non sint ab eo intenta, nihil tamen illi potest esse non prævisum; cum omnia ipsius providentiæ subjiciantur. Sed respectu hominis nihil absurdi habet. Non enim est absurdum, imo sæpe fit ut aliquid conjungatur per accidens operationi alicujus causæ, quod homo non præordinaverit aut non præviderit. Igitur quæ tali modo simul contingunt, habent quidem suas causas et causas per se (264, 2^o), sed quarum effectus simul concurrunt insciis hominibus ac imprudentibus. V. gr. quod thesaurus existat sub congesta humo, hoc causam habet; et quod humus eo in loco fodiatur, hoc quoque causam habet; et utraque est causa per se. Tamen concursus effectuum istorum nullam habet causam per se, sed utraque illa causa est hujus concursus causa per accidens.

ARTICULUS XII.

Difficultates.

322. Objicit I. Beguelinus. Principium causalitatis valde obscurum est. Nam

1^o Supponit existentiam realem. Sed notio existentiae realis est valde obscura, quia definiri non potest.

2^o Idea existentiae non includit ideam causæ.

3^o Principium contradictionis ideo clarissimum est, quia ab existentia reali præscindit, et circa idealem existentiam versatur. Ergo a contrario etc.

Resp. *Neg. ant.*

Ad 1^m *Dist. maj.*: Ita ut ejus veritas ac necessitas ab aliqua existentia reali dependeat, *neg.*; ita ut existentia realis abstracte et universim in eo consideretur, *conc.*, et *neg. min.* tum quoad primam partem, tum quoad nexum causalem.

Est enim plane falsum, imo et risu dignum quod ibi asseritur; quis enim dicat esse obscuram notionem existentiae realis? Estque pariter falsum, id omne obscurum esse, quod definiiri non potest (L. 130, 131).

Ad 2^m *Dist.*: Idea existentiae utcumque, *omitto*; idea existentiae contingentis et incipientis non includit ideam causae, *subd.*: non includit cognitionem determinatae suae causae, *trans.*; non includit ideam habentis causam, *nego*.

Ad 3^m *Neg. prop. causalem*, et *dist. rat. add.* Præscindit etc., quatenus nempe existentiam realem considerat ut abstracte et universim concipitur, *conc.*; quasi vero existentiam realem nullo modo consideret, *nego*. Et *neg. consequentiam*.

Principium contradictionis circa existentiam quoque realem versatur, ut suo loco declaravimus (32); eodemque plane modo ac principium causalitatis existentiam realem considerat, nempe abstracte et universim. *Si quid existit non potest non existere*; ecce principium contradictionis. *Si quid existit quod prius non existerat, hoc causam habet*: ecce principium causalitatis. Ergo vel utrumque obscurum est, vel utrumque apertum. Cæterum nescio quid sibi vellet Begue-linus, quum existentiae realis notionem existentiae ideali opponebat. Quid enim est aliud existentia idealis, quam idea seu notio existentiae realis?

523. Obj. II. Principium rationis sufficientis sine circulo vitioso demonstrari non potest.

Nam demonstratio alicujus propositionis huc recidit, ut assignetur ratio sufficiens, propter quam attributum affirmari possit de subjecto.

Ergo qui aliquid demonstrare aggreditur, supponit non

posse attributum de subjecto affirmari, nisi adsit ratio sufficiens conjunctionis eorum.

Ergo qui vult demonstrare principium rationis sufficientis, tanquam certum sumit principium rationis sufficientis.

Resp. 1^o Adversarium hic subrogare principium rationis sufficientis principio causalitatis, imprudenter an ex industria nescio.

Resp. 2^o ad hominem. Si principium rationis sufficientis in omni demonstratione supponitur, hoc ipso certissimum est, et qui illud negat est scepticus.

Resp. 3^o retorquendo. Si quicumque aliquid demonstrare vult, hoc principium tanquam certum assumit, ergo adversarius quoque noster hoc principium habet tanquam certissimum, nam et ipse aliquid demonstrare aggreditur.

Resp. 4^o invertendo argumentum. Qui negat aliquam propositionem, quare eam negat, nisi quia non est ratio sufficiens cur prædicatum de subjecto affirmetur? Ergo qui aliquam propositionem negat, principium rationis sufficientis tanquam certum assumit. Ergo ille ipse qui negat principium rationis sufficientis, tanquam certum ipsum assumit.

Resp. 5^o directe. *Neg. ant.*

Ad prob. *Trans. maj. Disting. 1^m cons.*: Et hoc supponit quia cognoscit humani intellectus conditionem ac scientiae naturam, *conc.*; et hoc supponit tanquam conclusionem ex principio rationis sufficientis, *nego*. Certe demonstratio in hoc tota est, ut rationem sufficientem afferat, qua conclusio suadeatur. Qui ergo demonstrari aliquid posse putat, is putat posse ejus rei rationem sufficientem afferri; et qui demonstrationem affert ut aliquem suadeat, putat sane neminem suaderi sine ratione. Quare autem ita putat? Habes in distinctione.

Dist. 2^m cons. Supponit tanquam generatim verum principium rationis sufficientis, *neg.*; supponit hoc sensu, quod novit intellectum sine motivo non præbere assensum, *subd.* ut in distinctione superiori.

324. Obj. III. Si principium causalitatis admittitur tanquam absolute certum,

1° omnes veritates quæ illi innituntur essent habendæ ut absolute necessariae :

2° omnes proinde effectus essent necessarii. Nam posita causa cum omnibus requisitis ad agendum, impossibile est effectum non existere.

Resp. ad 1^m *Nego*. Sunt enim solum hypothetice necessariae : i. e. posito effectui, non potest hic non habere causam.

Ad 2^m. *Neg. ant.* Ad prob. *Dist.* : Si causa libere agat, *neg.* (315); si ex necessitate, *conc.* Et nota necessitatem horum effectuum esse tantummodo physicam, ac semper hypotheticam, posita nempe existentia causæ.

LIBER TERTIUS.

CAPUT I.

DE ENTIIUM PERFECTIONE.

ARTICULUS I.

Perfectionis notio.

325. Perfectum ex vi nominis est id quod plene atque ex integro factum est, ita ut quidquid res illa erat in potentia, ad actum reductum sit. Sed jam per quamdam extensionem, effectiois idea non attenditur, perfecti nomine communiter intelligimus quidquid actum completum habet, nempe *id omne cui nihil deest eorum, quæ ipsi debent inesse ad ejus complementum*. Et hæc notio tam creatis entibus, quam Enti increato, quanquam diversimode, convenit.

Realitates variæ sive essentielles sive non, quæ in ente esse debent, ut perfectum sit, *partiales* ejus *perfectiones* constituunt; realitatum vero istarum cumulus *perfectionem totalem*.

326. In rebus finitis (nam de perfectione entis infiniti alias) potest ulterius perfecti ratio explicari in ordine ad finem. Etenim ens complementum habere potest tam secundum esse proprium, quam secundum naturæ propriæ tendentiam. Perfectum igitur duplici modo intelligi ac dici poterit : nempe id cui nihil deest, quod debeat ipsi inesse ad ejus complementum, vel secundum esse ejus proprium, vel secundum naturalem inclinationem. Sed naturalis inclinatio entis cujusque est ad finem (301); et hæc completur assecutione finis. Quæ vero enti inesse debent, ut secundum esse proprium sit completum, ea sunt per quæ fini suo assequendo aptum efficitur. Est igitur perfectum 1° ens quod finem assequitur : 2° ens aptum fini assequendo. Primo modo perfectus est v. gr. homo qui beatitudine potitur æterna, quæ est hominis finis : altero modo perfectus est homo qui iis omnibus facultatibus instructus est, quibus humana natura constituitur, et finis sui assequendi capax efficitur.

* 327. Notandum tamen 1° perfecti denominationem rebus hoc postremo sensu communiter tribui. Primo quidem quia significatio hæc originem hujus nominis propius attingit; secundo autem quia perfectio hæc est magis nota.

2° Substantias procul dubio perfectas dici in ordine ad finem modo explicato. Quæ autem substantiæ insunt abstracte considerata, et ipsa hoc modo dici perfecta; non tamen omnia. Nam et operandi principia et operationes, quia per ipsas ad finem tenditur, perfecta dici possunt secundum finem: atque hoc pacto dicimus perfectum oculum, perfectam intelligentiam, perfectam orationem et similia, quum ad fines suos assequendos sunt apta ac proportionata. Cæteræ autem qualitates quæ ad operationem non ordinantur, quantum et ipsæ, ut sunt in subjecto, sint propter finem ipsius, per se tamen spectatæ non dicuntur perfectæ per comparationem ad finem, sed solum si in nulla re deficient, quæ ad earum essentiam pertineat. Ita circulus dicitur perfectus, si omnia ejus puncta a centro æquidistant. In hoc casu perfectum fere cum vero congruit (114).

328. Ex dictis hæc colligimus:

1° Perfectio reipsa a bonitate non distinguitur (123). Quemadmodum igitur omne ens est bonum, ita omne ens aliqua saltem perfectione perfectum est.

2° Perfectionis regula, seu id secundum quod perfectio entis in concreto (327, 2°) æstimari debet, est ipsius entis finis.

3° Hæc perfectionis regula *simplex* est, quum ens unicum finem habet; *composita*, quum ens plures fines habet vel subordinatos vel coordinatos.

4° Perfectio partium subordinata est fini totius. Nam totum est finis partium.

ARTICULUS II.

De perfectionis partitionibus et gradibus.

329. Perfectio totalis entis vel *relativa* est, vel *absoluta*; nimirum vel in aliquo solum genere continetur, vel supra omne genus et in ipsa entis ratione. Illam constituunt ea

omnia quæ certo cuidam rerum generi debentur; hæc omnes omnino realitates aliquo modo (263) continet, quibus ens potest esse perfectum.

330. Huic duplici perfectioni duplex opponitur imperfectio: 1° imperfectio *privativa* et in aliquo genere, quæ est defectus perfectionis illi generi debitæ, quæque perfectioni relativæ opponitur: 2° imperfectio *negativa*, seu defectus ulterioris realitatis; hæc opponitur perfectioni absolutæ. Patet ex alibi expositis (134, 137) imperfectionem privativam esse malum proprie dictum; negativam vero esse malum improprie dictum (malum metaphysicum), et rebus omnibus finitis esse communem.

331. Perfectiones partiales (325) aliæ dicuntur *simplices*, aliæ *secundum quid*, seu *mixtæ*. Perfectio simplex est ea quæ nullam omnino exhibet in suo conceptu imperfectionem, neque privativam neque negativam; seu aliis verbis *quæ æqualem sibi aut majorem realitatem non excludit*. Talis est vita, intelligentia, justitia et similes. Perfectio mixta est quæ imperfectionem aliquam in suo conceptu continet; quia videlicet *æqualem sibi aut majorem perfectionem natura sua excludit*. Talis est ratio corporis, ratiocinandi facultas aliæque hujusmodi.

Sunt item perfectiones partiales aliæ *essentiales*, quæ rem in suo esse constituunt; aliæ *accidentales*, ut magnitudo et qualitates, de quibus jam actum est.

332. Perfectio totalis absoluta nullos, ut patet, admittit gradus; perfectio autem relativa potest major esse vel minor, tum respectu aliorum generum, tum intra idem genus; videlicet et *extensive* et *intensive*.

Extensive major est 1° quo pluribus ac præstantioribus realitatibus constituitur; 2° quo nobilior est entis finis; 3° quo pluribus finibus assequendis est idoneum. Ex his capitibus homo v. gr. est bruto perfectior, et equus rana.

Perfectio generis propria, intensive major est in eo individuo quod 1° quæ sui generis propria sunt, cumulativè possidet; 2° quod ad finem assequendum est magis idoneum;

vel 3^o plenius aut promptius aut facilius finem obtinet. Sic vir est puero perfectior, doctus indocto, etc.

Hæc quæ de perfectione totali diximus aptari facile poterunt perfectionibus partialibus, tam iis quæ ad diversas species pertinent, quam iis quæ sub eadem specie continentur, eorum tamen habita ratione, quæ de realitatum quarumcunque incremento ad decremento in secundo superioris libri capite notata sunt (198).

333. Ut ea quæ de varia entium perfectione dicenda sunt ad certa quædam capita reducantur, considerabimus primo perfectiones generaliores, quæ ad ipsam entium realitatem spectant; tum eas quæ ad existentiam existendique modum revocantur; ac demum eas quæ ex relationibus exsurgunt. In his tamen omnibus quæ potissima sunt exponenda seligemus, tum quia metaphysicæ indoles hoc exigit, tum etiam quia limites nobis præstituti breves nos esse cogunt.

CAPUT II.

DE PERFECTIONIBUS QUOAD REALITATEM.

ARTICULUS I.

De simplici et composito.

334. Nonnulla jam de simplici compositaque substantia superius dicta sunt (163, 164); nunc quæ generalim de ente simplici et composito dicenda manent, hic colligemus.

Ens simplex est omne id quod nec pluribus constat, nec in plura resolvi potest: id omne videlicet, quod neque actu, neque potentia partes habet.

Ens compositum est omne id quod et pluribus constat, atque in plura resolvi potest.

Medium est inter hæc duo: quod pluribus non constat, sed in plura resolvi potest; nempe quod partes non habet actuales, sed habet in potentia. Hujusmodi est continuum geometricum: quod utrum in rerum natura existere censendum sit, alibi inquiremus.

335. Simplicitas et compositio in omni rerum genere locum habet. V. gr. simplex est secundum substantiam id

quod in plures substantias specie diversas resolvi nequit, ut sunt v. gr. apud chimicos metalla: secundum quantitatem id quod in partes quantitativas; secundum qualitatem id quod in qualitates plures dividi nequit; idemque dicito de cæteris. Hæc est simplicitas et compositio secundum aliquod genus. Est etiam compositio ex rebus ad plura genera pertinentibus, ut compositio ex substantia et accidentibus. Simplicitas vero absoluta est in eo, quod nullo modo resolubile est.

336. Hinc colliges 1^o quod simplex est, posse esse aliquo modo divisibile; ut v. gr. aurum, simplex quoad speciem substantiæ et vires quædam corporæ, simplices in suo genere, divisibiles sunt in partes quantitatis; et anima, quæ neque in partes substantiæ constitutivas neque in partes quantitatis dividi potest, divisibilis est secundum plures facultates.

2^o Proinde simplex ab inextenso differre.

337. Hæc nunc assertiones facile statuuntur.

ASSERTIO I. *Compositi notionem experientia externa nobis supplet. Omnia enim quæ sensibus subjiciuntur, composita sunt. Simplicis vero absolute ideam experientia solum interna gignit.* Nihil enim tale sensibus externis percipi potest; sed quum in nosmetipsos reflexione revertimur, plura deprehendimus quæ nec partium junctura constant, nec in partes ullas dividi vel sola cogitatione possunt. Hæc sunt actus percipiendi, affirmandi, negandi, eligendi, alique his similes.

ASSERTIO II. *Compositi perfectio ex certa certarum partium conjunctione consurgit, qua et ejus essentia constat (164, 1^o). Perfectio autem simplicis sita non est in sola exclusionem compositionis, sed in positiva aliqua realitate quæ compositionem excludit.* In eo vero quod absolute simplex est, hoc ipsum quod omnem compositionem excludit, proprietas est magnam includens perfectionem, videlicet identitatem perfectissimam entis cum omnibus quæ in eo sunt (216, 227) ejusque indisolubilitatem.

ASSERTIO III. *Proinde simplicis notio negativa non est.* Profecto sensus intimus meram negationem non refert, quum

simplicissimos animi actus renuntiat; nec quum eosdem actus intelligimus, solam negationem concipimus.

ASSERTIO IV. *Perfectio quæ ex compositione oritur, contingens est (164, 2°); quæ vero cum simplicitate sociatur, etiam cum essendi necessitate potest consistere.*

338. Compositio veri nominis est quæ *physica* audit, ea-que tunc habetur quum componentia sunt realiter distincta. Sed præter physicam compositionem frequens est apud Philosophos mentio compositionis *metaphysicæ*, quæ etiam *logica*, idque melius forte ac clarius nuncupatur. Est nam-pue tota rationis opus, ac metaphorice solum compositio dicitur. Partes enim ex quibus ipsa consurgit, non re, sed ratione solum distinguuntur, licet cum aliquo fundamento in re; quo fit ut altera ex iis partibus aliquo modo conside-rari possit ut determinabilis et in potentia; altera ut deter-minans et actus partis primæ; atque hoc pacto quod re com-positum non est, ad modum compositi ex materia ac forma concipitur.

Hujusmodi sunt compositiones ex *genere et differentia* (247; L. 27, 3° Coroll.), ex *supposito et natura* (169, 8°), ex *essentia et esse* (57), quas omnes alibi jam pro re explanavimus. Com-positio autem ex *subjecto et denominatione extrinseca* (171, 2°) vix potest huc revocari, ut quæ improprie admodum compo-sitio dicitur.

ARTICULUS II.

De toto et partibus.

339. Compositi notio ad totius notionem nos revocat: de qua nonnulla jam et in logica (L. 106, seq.) et in præcedenti hujus tractationis libro (168) dicta sunt. Quæri hoc loco po-test, utrum tria hæc: *totum*, *compositum*, ac *perfectum* inter se differant et quomodo.

Respondeo in primis, totum a composito in hoc differre, quod compositi notio conjunctionem tantummodo exhibet plurium, quæ partes vocantur; totum vero non hoc solum, sed addit præterea quod nulla pars ex iis quas in compo-sito natura postulat, ab eo absit. Ita v. gr. manus quatuor

instructa digitis aliquid compositum est, sed non totum.

340. Differt quoque totum a perfecto, quanquam vulgo ut synonyma existimentur. Totum enim 1° est id a quo nulla pars abest quæ adesse debeat: perfectum autem id a quo nihil abest eorum quæ ipsi debent inesse, sive hæc sint ejus partes sive non. Sic v. gr. homo dicitur perfectus scientia, virtute, experientia, licet hæc non sint hominis partes. 2° To-tum de rebus compositis proprie dicitur; est enim id quod nulla sui parte caret: perfectum vero tam de compositio di-citur, quam de simplici; imo simplici prius ac verius, quam composito convenit perfecti ratio.

341. Totum nihilominus qua tale, hoc ipso perfectum est quod totum est. Partes autem licet in aliquo entis genere perfectæ sint, qua partes tamen multipliciter sunt imper-fectæ, ut alio in loco indicavimus (168); quæ imperfectiones omnes ex eo derivantur, quod pars sit propter totum ac res alterius.

* 342. Subtiliores controversias, quæ inter veteres agita-bantur, juverit saltem attigisse.

Fuit post Avicennam (1) et Scotum (2) quorundam opinio, totum per se et a parte rei ab omnibus suis partibus, non solum seorsum existentibus, sed collective sumptis et simul unitis distingui. Totum enim, aiebant, melius quiddam est omnibus simul partibus, cum unaquæque pars in toto perficiatur; quædam insuper operationes attributionesque toti conveniunt, non vero partibus simul sumptis; ac demum ex partibus simul sumptis totum constituitur, quumque hoc corrumpitur, partes non pereunt.

* 343. Refutatur penitus opinatio hujusmodi, ut alia omit-tamus, hac una ratione. Si totum ab omnibus partibus con-junctis distinguitur, erit aliquid profecto per quod distingui-tur; aliquid videlicet partibus omnibus unitis adjectum. Id vero per quod aliquid ab aliis intrinsece et per se distingui-tur, constitutivum illius est. Ergo id per quod totum a suis partibus distingui dicitur, erit unum ex constitutivis totius,

(1) *Metaphys.* lib. III.

(2) In III Dist. q. II.

nempe una ex partibus totius. Ergo semper verum erit, totum non distingui ab omnibus suis partibus conjunctis; nisi dicere velimus esse aliquam partem ultra omnes partes et aliquod constitutivum quod est extra omnia constitutiva.

* 344. Quod ad contra sentientium argumenta attinet, egregia hæc Silvestri Mauri animadversio sufficiet. « Radix » æquivocationis in hac quæstione oritur ex eo, quod totum » dicit partes simul sumptas, non utcunque, sed ut se invicem intrinsece perficientes, ideoque dicit partes non semel » tantum, sed bis, nec solum in recto, sed etiam in obliquo. » Ex. gr. homo est corpus et anima, non utcunque, sed » corpus, ut animatum, et anima, ut materiata; ideoque corpus bis dicitur, semel in recto, et ut habens perfectionem » animæ, quæ importatur in obliquo, et ut habitum ab » anima, quæ importatur in recto. Quod enim significatur » in recto, importatur ut habens; quod in obliquo, ut habitum. Anima similiter bis dicitur. Ex hoc sequitur quod » quædam denominationes convenient toti, quæ non conveniunt partibus semel tantum et in recto sumptis; ideoque videtur quod totum distinguitur a partibus. Sed quod » tales denominationes convenient toti, non oritur ex eo » quod totum addit aliquid supra partes, sed quia easdem » partes bis dicit, ut explicatum est (1). »

* 345. Quæstio hæc altera apud sequioris ævi scholasticos orta est; an ipsa partium unio in toto esset aliquid a partibus re distinctum. Senserunt enim nonnulli compositum, præsertim hominem, constare non modo partibus essentialibus, corpore videlicet et anima, sed etiam unione tanquam entitate quadam modali, ab utroque componente secundum rem distincta.

Sed hanc entitatem modalem prorsus inutilem ostendent ea quæ de modis superius innuimus (148, 169, 8°). Partes quidem unitæ se invicem perficiunt et complent; ita ut ex utriusque componentis viribus vires resultent compositi propriæ; et hæc certe perfectio cum sit iisdem componen-

(1) *Quæst. phil.* Lib. II, q. XI, ad quintum.

tibus accidentalibus et contingens, ab eorum essentia distinguitur. Sed unio ipsa nullam novam realitatem importat. Nam vel hoc nomen *absolute* dicitur, vel *relative*. Si absolute res per illud significata nihil est aliud, quam abstractum metaphysicum (L. 30) *uniti* seu compositi; si relative, significat relationem mutuam componentium, quæ in utroque correlato a suo fundamento non distinguitur (204) (1).

ARTICULUS III.

De finito et infinito.

346. Finitum est ens quod *limites habet*: infinitum quod *limites non habet*. Limes vero est id *ultra quod nihil est quod ad ens pertineat*. Videlicet qui limites dicit, et realitatem aliquam significat et defectum ulterioris realitatis in illa connotat; sive demum hic defectus negatio sit sive privatio. Hinc colliges:

1° Limitis ideam ex parte positivam esse, ex parte negativam. Nihilum limites per se non habet; quia in nihilo nulla est realitas quæ limes esse possit.

2° Limitem idem esse ac perfectionem cum imperfectione sociatam.

3° Omne ens quod relative tantum perfectum sit (329), absolute finitum esse.

347. Infinitum aliud est *actu*, aliud *potentia* infinitum. Infinitum actu est quod *actu habet omnem perfectionem quam habere potest*. Infinitum potentia est quod *actu semper finitum est, sed sine fine augeri potest*. Vocatur proprio nomine *indefinitum*. Veteres primum appellabant infinitum *categorematicum*, alterum *syncategorematicum* (L. 61); nempe quia primum in recto et sine addito limites negat, alterum in obliquo et cum addito; non enim significat quod est sine limite, sed quod sine limite augeri potest.

* COROLLARIA. 1^a. Nihil majus excogitari potest ente actu infinito, saltem in eodem genere; et contrario semper aliquid majus excogitari potest ente potentia infinito, etiam in eodem genere.

(1) Cf. Tiphani, *De Hypostasi*, c. XLV.

2^m. In illo actus essendi nullo est limite circumscriptus; in hoc essendi potentia.

3^m. Illud est proprie sine fine; hoc potius est sine fine finitum.

548. Nota adhuc 1^o quoniam limites haberi possunt tam in quantitate vera, sive continua sive discreta, quam in quantitate metaphorica, quæ qualitatum ac generalius perfectionis gradibus continetur (202, 332); idcirco de infinito nos loqui posse sive respectu *magnitudinis*, sive respectu *multitudinis*, sive respectu *perfectionis*.

Nota 2^o quantitatem, præsertim perfectionis, duplicem esse considerandam: *formalem* et *virtualem*. Formalis est quæ secundum seipsam in partes quantitativas divisibilis est. Virtualis est perfectio simplex omnino in se et indivisibilis, quæ tamen pluribus æquivalet. Nos igitur loqui possumus de infinito secundum quantitatem formalem ac secundum virtuales. Infinitum primo modo foret extensio infinita, numerus infinitus, perfectio constans gradibus in infinitum multiplicatis. Altero modo est perfectio æquivalens perfectionis gradibus indefinitis; ita ut quicumque extra illam perfectionis assumatur gradus, superior adhuc gradus inveniri possit, cui illa æquivalet.

549. PROPOSITIO I. *Infinitum actu finitis acceptionibus exauriri non potest.*

Secus ibi terminum ac limitem haberet ubi acceptiones desinunt. Hoc valet de infinito tam secundum quantitatem formalem, si daretur, quam de infinito secundum quantitatem virtuales.

PROPOSITIO II. *Infinitum actu pertransiri nequit: videlicet nequit numerari, aut mensurari quocunque modo.*

Etenim numeratio ac mensuratio fit successivis acceptionibus, i. e. applicationibus unitatis (103, 3^o). Si igitur posset expleri infiniti numeratio aut mensuratio, acceptionum hujusmodi numerus et esset finitus, quia expletur, et simul exauriret infinitum, id quod absurdum est.

PROPOSITIO III. *Si plura in eodem genere darentur infinita, unum altero majus esse non posset.*

Quod enim altero minus esset, non haberet omnia quæ in ejusmodi genere haberi possunt, ac propterea infinitum non foret.

PROPOSITIO IV. *Finitum per finiti additionem non potest infinitum evadere.*

Secus finitis acceptionibus infinitum exauriri posset.

PROPOSITIO V. *Repugnat finitum maximum et finitorum absolute optimum.*

Si enim hoc ponere velis, quæram utrum possit illud crescere, nec ne. Si non potest, jam est infinitum; quia habet omnia quæ habere potest. Si crescere potest, jam additione facta, infinitum evaderet: non enim potest finitum maximum, incremento accepto, manere finitum. Proinde ex duobus finitis infinitum exurgeret.

PROPOSITIO VI. *Differentia finiti ab infinito non potest esse aliquid finitum.*

Secus hæc differentia finita, addita iterum quantitati finitæ subtractæ, infinitum præberet.

PROPOSITIO VII. *Nulla est ratio infiniti ad finitum.*

Hæc enim ratio vel quantitas finita foret vel infinita. Si finita, jam duæ quantitates finitæ infinitum æquarent. Si infinita, jam infinita plura infinitum unum æquarent.

PROPOS. VIII. *Indefinitum nunquam potest actu infinitum fieri.*

Nam indefinitum est semper actu finitum. Fieret ergo infinitum per finiti incrementi additionem.

PROPOSITIO IX. *Infinitum actu non potest ulla ex parte terminari.*

V. gr. non potest fieri ut sit linea actu infinita, quæ initium habeat, licet fine careat. Sit enim lineæ initium punctum X. Dantur in eadem linea puncta, quæ ab X actu infinite distent, an non? Si non dantur hæc puncta, linea est finita. Si dantur, adverte quædam puncta ab X finite distare. Cum ergo quædam finite, quædam infinite distent, profecto habetur in linea punctum aliquod, in quo fit transitus a finito ad infinitum; in eoque puncto erit distantia finita maxima, quæ vel modicæ cujuslibet extensionis additione evadit infinita. Hæc autem absurda sunt. Ergo.

ARTICULUS IV.

Utrum multitudo infinita actu esse possit.

350. PROPOSITIO X. *Multitudo actu infinita repugnat.*

1° Sit argumentum S. Thomæ. « Omnem multitudinem » oportet esse in aliqua specie multitudinis. Species autem » multitudinis sunt secundum species numerorum. Nulla au- » tem species numeri est infinita; quia quilibet numerus est » multitudo mensurata per unum (1). »

2° Supponatur ex unitatum accumulatione multitudo infinita. Hæc erit numerus infinitus, æquabitque numerum qui ipsum immediate præcedit, unitate adjecta. Jam numerus præcedens eratne infinitus, an vero non erat? Infinitum illum dicere non potes; nam crescere adhuc poterat, ac reipsa crevit additione unitatis. Erat ergo finitus, et unitate addita, factus est infinitus. Nimirum ex duobus finitis infinitum emergit; id quod absurdum est (349, Prop. IV).

3° In multitudine infinita cumulus unitatum certe infinitus est. At centenariorum v. gr. quæ in hoc unitatum cumulo continentur, finita ne multitudo est, an vero infinita? Finita esse nequit, secus enim finitis acceptionibus infinitum exhausti possit. Est ergo centenariorum multitudo infinita. Minor ne, an æqualis multitudini unitatum? Profecto minor. Ergo datur multitudo infinita minor altera multitudine infinita, et quidem in eodem genere numeri abstracti (349, Prop. III).

351. COROLLARIA. 1^m Repugnat non solum multitudo infinita simultanea, sed etiam successiva; i. e. series quæcunque actu infinita. Nam utrobique eadem absurda.

2^m Hinc et tempus reale actu infinitum repugnat. Est enim tempus reale series mutationum realium.

3^m Nulla extensio realis, neque si continua sit, infinita esse potest. Nam omnis extensio realis in partium saltem possibilium multitudinem distincta concipi potest. Harum autem multitudo partium ex mensuræ in unitatem assumptæ magnitudine pendet. Hæ igitur partes, ulnæ v. gr. aut pedes, quæ in extensione actu infinita sunt omnes actu, sunt ne

(1) *Summ. th.* p. 1, q. VII, art IV.

finitæ numero, an vero infinitæ? Si finitæ, jam ponis finitis acceptionibus exhaustiri posse infinitum. Si infinitæ, jam datur multitudo infinita. Sed utrumque repugnat. Ergo. Demonstrationem alteram desumes ex dictis in præcedente articulo (349, Prop. IX), si puncto cuicumque infinitæ extensionis applies quæ ibi dicta sunt de puncto X lineæ initio.

4^m Omnis extensio actualis figurata est: nam limitibus undequaque circumscribatur necesse est.

5^m Non modo quantitas proprie dicta, sive discreta sive continua (348, 1°), infinita esse nequit, sed neque quantitas perfectionis, finitorum graduum multitudine constans. Hæc enim perfectio ex gradibus infinita, omnia continebit absurda, quæ in extensione infinita et multitudine infinita continentur.

6^m Igitur si datur infinitum, hoc non est multitudo, non est extensio, non est ex gradibus finitis: est ergo necessario aliquid indivisum et plane indivisibile: propterea in unitate solummodo ac perfecta simplicitate reperiri potest.

7^m In simplicissima hac infiniti perfectione quantitatem solum virtualemente reperiemus, eamque indefinitam (348, 2°).

ARTICULUS V.

Difficultates.

352. Opp. I. Elementa materiæ sunt numero infinita. Nam materia est in infinitum divisibilis.

Resp. *Neg. ant. et prob.* Etenim in materiæ divisione ad ultima elementa tandem deveniendum est (164, 5°); quæ vel extensa sint vel inextensa, semper tamen finito numero continentur.

Inst. Saltem si ultima elementa geometrice continua sunt, in infinitum dividi possunt. Ergo.

Resp. *Conc. ant., et neg. cons.* Nunquam enim ejusmodi divisio numerum partium infinitum dabit. Verum quidem est, divisionem continui semper ulterius protrahi posse; sed hinc inferri solum potest, in continuo partes assigna-

biles indefinitas esse, ipsamque ejus divisibilitatem esse indefinitam.

333. Opp. II. Mathematici sæpe loquuntur de infinitis quantitativis; et quantitatem quaecunque finitam præ illis negligunt.

Resp. Loquuntur de indefinito, non de infinito actuali, ut omnes geometriæ tirores norunt.

334. Opp. III. Quæ possibilia sunt, ad actum reduci possunt. Sed possibilitium multitudo est infinita (69). Ergo multitudo infinita potest ad actum reduci.

Resp. *Dist. maj.* : Successive, et successione indefinita, *conc.*; simul omnia, *neg.* *Omitto min.* de cujus sensu in sequenti difficultate, et *neg. cons.*

* 335. Opp. IV. Certe multitudo actu infinita datur, tanquam divinæ cognitionis terminus. Nam

1° Omnia possibilia simul cognita multitudinem entium idealium actu infinitam constituunt. Sed omnia possibilia simul a Deo cognoscuntur. Ergo.

2° Deus cognoscit unico actu et distincte omnes terminos seriei indefinitæ, ex. gr. omnes actus, quos ponet, in sua perpetua existentia anima immortalis. Ergo.

Resp. *Neg. ant.*

* 336. Ut ad 1^m rationem respondeam, quædam prænotabo.

1° Possibilia sunt multitudo *indefinita*, et nullo propterea numero representari possunt. Cum enim in divina essentia virtualiter contineantur (85), spectari debent tanquam series quædam, quæ prodit coram intellectu ex ideali, ut ita dicam, evolutione unitatis simplicissimæ et infinitæ: hæc autem evolutio terminum seu limitem habere non potest (348, 2°, 331, 7°).

2° Si hæc evolutio, ex se et objective indefinita, fieret in intellectu finito, hic possibilia singula per infinitam perceptionum seriem cognosceret; quibus tamen perceptionibus utcumque multiplicatis, nunquam ad cognoscendi finem perveniret. Quare nunquam possibilia omnia, tanquam unam collectionem simul cognosceret. Nihilominus *in tota æterni-*

tate omnia *distributive* cognosceret successivis actibus; quia indefinita perceptionum series indefinitam seriem possibilitium adæquat.

3° Cum evolutio illa indefinita fiat in intellectu infinito, cujus cognitio successiva non est, intellectus iste unico actu cognoscit distributive omnes ejus seriei terminos, quos intellectus finitus successivis actibus indefinitis cognosceret; cum enim sit infinitus, extensione virtuali suæ perfectionis (348, 2°) indefinitis æquivalet actibus, et amplectitur ipse solus quidquid illi omnes in æterna serie constituti attingerent. Per hoc tamen objecti cogniti natura non mutatur. Unde quemadmodum possibilitium series indefinitis cognita actibus numerum totalem intellectui nunquam exhibet; ita cognita uno actu infinitæ virtutis non fit objective numerabilis, nec ad modum determinatæ collectionis cognoscitur; quanquam omnia possibilia distributive cognoscantur (1).

Quum igitur dicimus, Deum omnia simul possibilia cognoscere, verum dicimus si voce illa *simul* significemus actus unitatem; non autem si vox illa referatur ad objectum, ita ut objectum sub hoc actu constitutum collectionem determinatam ac propterea actu infinitam exhibeat.

337. Respondeo igitur ad 1^m Omnia possibilia simul cognita multitudinem actu infinitam constituunt; *dist. maj.*: si actus cognoscentis ita simul cognoscat omnia, ut collectionis completæ naturam tribuat objecto, *conc.*; si non tribuit, *neg.*

Sed omnia possibilia simul cognoscuntur a Deo; *contra-dist. min.*: ita ut actus cognoscentis collectionis completæ naturam objecto tribuat, *neg.*; ita ut non tribuat, *conc.*

* 338. Ad 2^m ex iisdem principiis respondeo. Deus cognoscit uno actu omnes terminos seriei indefinitæ; *dist. ant.*: distributive, *conc.*; ad modum completæ collectionis, *neg.*

Ergo cognoscit multitudinem actu infinitam: *neg. consequentiam.*

Nam Deus cognoscit omnes tuos futuros actus, quia æter-

(1) Cf. S. Th. *Contra Gent.* Lib. I, c. LXIX, § 40 et *Summ. th.* p. I, q. XIV, art. XII, ad 1 et ad 2.

nitatis ejus, quæ simplicissimum est et infinitum præsens, omnibus illis actibus indivisa coexistit. Quemadmodum ergo tu indefinite existens, et successivus omnium actuum tuorum cognitor, numerum in illis totalem non ponis; ita nec Deus cognitor simultaneus et æternus numerum illorum videt; quia indefinita series collectione determinata et completa contineri non potest; et sive indefinitis perceptionibus singuli ejus termini cognoscantur, sive unico actu indefinitis æquivalente, naturam non mutat.

ARTICULUS VI.

De conceptu entis finiti et infiniti.

359. Non proprie de origine horum conceptuum, quæ disputatio nostris quoque temporibus magno æstu agitari solet, ad præsentem tamen locum non pertinet; sed de objectivis eorundem conceptuum elementis ac formali ratione, aliquid dicere intendimus.

PROPOSITIO I. *Finitum non cognoscitur per infiniti negationem.*

Ita sensere Plato, Cartesius alique: unde concludebant infiniti ideam ingenitam esse. Sed ommissa in præsentem hac deductionem, ejus fundamentum facile convellitur.

Nam limes non est negatio infinitatis, sed negatio perfectionis defectum in dato subjecto, necesse profecto non est, ut hoc cum omnis realitatis plenitudine comparetur; quemadmodum, e. gr. ad cognoscendum vasis alicujus capacitatem limitatam esse ac majorem esse posse, necesse non est ut cum maris sinu illud comparem: sed hoc unum sufficit, ut vas capacius se mihi offerat, ejusque supra primum excessus a me advertatur. Sic prorsus ad cognoscendum ens aliquod esse finitum, satis est ut aliquam perfectionem in alio ente animadvertam, qua illud caret. Et ad hoc experientia abunde sufficit. Cum enim videamus quasdam res his perfectionibus ornari, quasdam vero aliis; itemque in eadem perfectione alias res magis, alias minus excellere; comparatione facta, statim intelligimus, suam cuique rei

inesse realitatem, aliquid vero realitatis deesse. Et exinde ideas entis finiti.

* 360. Nunc quid entis infiniti notio contineat inquiremus.

PROPOSITIO II. *Falso putavit Lockius infiniti conceptum hoc pacto efformari, quod finitæ perfectiones interminabili incrementorum serie auctæ concipiantur.*

Si enim ita esset, omnes qui de infinito cogitamus, infinitam hanc additionum seriem completam cogitaremus. Verum si hæc notio ita se haberet, inter chimæricas esset rejicienda. Exhiberet enim tanquam completum id quod compleri nequit, i. e. indefinitum factum infinitum; adeoque numerum infinitum in realitate positum: quæ omnia repugnantiam continent (349, Prob. VIII; 351, 5^o).

* 361. Ut accurate hac in re loquamur, supponendum est ex dictis, ad entis infiniti ideam nos non assurgere, nisi quum de Deo cogitamus. Quousque enim intra rerum sensibilibium aut possibilium limites versamur, concipimus utique realitatem, ac realitatem majorem et minorem, et indefinitam incrementorum ac decrementorum possibilitatem, sed adhuc de ente actu infinito cogitare non possumus. Tunc primum de ente infinito cogitare incipimus, quum intelligimus extra rerum hujusmodi seriem esse Deum.

* 362. Sed entis infiniti seu Dei duplex distinguendus est conceptus; alter *confusus et initialis*; qui Ens infinitum repræsentat quidem, sed non ut tale; alter *explicitus et formalis*, qui Ens infinitum ut tale repræsentat.

Primus ille, quæcunque sit ejus origo, de qua nunc non agimus, exhibet Ens quoddam supremum, primamque rerum causam. Alter exhibet hoc Ens, quatenus perfectiones omnes quas in rebus diversis cognoscimus dispersas, perfectissimo modo ac simplicissima entitate continet; ac propterea conceptus iste infiniti idem est ac conceptus absolute perfecti (329).

* 363. Hujus vero ideæ efformandæ occasionem quidem mens reperit in confuso illo supremi Entis conceptu; *elementa repræsentativa* et propemodum materiam desumit ex

ideis realitatum ac perfectionum, quas experientiæ ope collegit, quasque a nativis defectibus abstractione purgavit; *genesim* vero multiplici ratiocinio debet, quo mediante intelligit perfectiones illas omnes, et quidquid realitatis concipi potest, sine ullius admixtione defectus in Ente illo inesse posse ac debere. Quænam autem sint ratiocinia hæc, in theologia videbimus.

364. Interim plane liquet 1^o notionem infiniti non intuitivam esse nec arbitrariam, sed discursivam.

2^o Esse ex parte positivam, ex parte negativam. Negatio autem in ea contenta, negatio est limitis et imperfectionis, seu negatio negationis. Qua negatione ipsa, res maxime positiva concipitur.

3^o Ipsi respondere objectum reale.

365. Ex his omnibus facile solves quæ opponi solent: quorum hæc sunt præcipua :

1^o Infiniti notio perfectiones complecti deberet infinitas. Sed infinitas perfectiones complecti cognitione non possumus.

2^o Idea finita non potest infinitum objectum repræsentare.

3^o Si cognitione finita comprehendi posset infinitum, jam finitum fieret.

Resp. ad 1^m, *Dist. maj.* : Perfectiones infinitas numero, *neg.*; infinitas intensione, *subd.*: complecti has deberet, i. e. cognitione attingere, *conc.*; adæquate comprehendere, *nego.*

Et *contradistinguo min.*

Ad 2^m. Adæquata repræsentatione, *conc.*; repræsentatione vera, *nego.*

Ad 3^m. *Dist.* Si comprehendi posset adæquate, *conc.*; si cognosci potest cognitione vera, sed inadæquata, *nego.*

* 366. PROPOSITIO III. *Idea entis infiniti ab idea entis in genere longissime distat.*

Hanc propositionem hic interpositam non mirabitur, qui noverit in hac maxime conceptuum confusione ontologistarum systemata fundari. Exinde enim inferunt, infinitum nos inveni, eo ipso quod entis in genere idea informamur.

Prob. prop. 1^o. Ens infinitum et ens in genere differunt infinitate. Ens enim infinitum est ens infinitum actu, et quoad suæ perfectionis comprehensionem; ens vero in genere est ens infinitum solum quoad extensionem (L. 14); neque actu infinitum est, sed potentia. Ex eo enim solummodo infinitum dicitur, quod semper crescere potest multitudo rerum quas hac notione complecti possumus.

2^o. Differunt comprehensione ideæ. Nam idea entis infiniti certam ac determinatam essentiam exhibet, omnesque possibles perfectiones complectitur, saltem confuse cognitæ. At idea entis est plane indeterminata, nec certam ullam essentiam vel perfectionem repræsentat, sed ab omni determinata perfectione abstracta est.

3^o. Differunt ideæ extensione. Idea enim entis infiniti naturam solum divinam, quæ individua est et immultiplicabilis, refert; idea vero entis omnia genera, omnes rerum diversitates, omnia individua sub se complectitur.

Unde 4^o illa exprimit objectum maximum quod concipi queat, hæc minimum quod cogitari ac dici possit: illius objectum reale est, objectum hujus, ita ut concipitur, in rerum natura esse nequit: nihil enim est in rerum natura quod sit solummodo ens.

* 367. Hinc intelliges alio modo Deum, alio modo ens commune dici *ens simpliciter*, quod est *ens sine addito*.

Etenim 1^o. Deus dicitur ens simpliciter; quia nihil habet imperfectionis, seu non-entis: ens vero commune, quia ab omni determinata perfectione præscindit.

2^o. Deus dicitur ens sine addito, quia ejus essentia est ipsum esse, ac proinde non potest ad plura determinari aut in pluribus individuari; ens vero commune, quia cum nullam determinationem includat, ad omnia determinari potest.

3^o. Deus est ens simpliciter in ordine reali; ens commune in ordine ideali.

Hinc patet nomen hoc: *ens simpliciter*, æquivocum esse, et ad res maxime disparatas significandas usurpari; id quod jam notaverat ac declaraverat S. Thomas (1).

(1) *Summ. th.* p. I, q. III, art. IV, ad 1; et *Contra gentes*. Lib. I, c. XXVI.

CAPUT III.

DE PERFECTIONIBUS QUOAD EXISTENDI MODUM.

ARTICULUS I.

De ente necessario et contingenti.

368. Ens, existendi modo spectato, est in se *necessarium* vel *contingens*; *duratione*, *æternum* vel *temporaneum*; *durationis ratione*, *immutabile* vel *mutabile*.

De necessario et contingenti pluries jam in logica (L. 186, 405 et alibi) incidit mentio. Necessarium est *id omne quod est, et non potest non esse*; contingens, *quod potest esse et non esse*.

Ex dictis pariter in logica (L. 405-408) deduces *esse absolute necessarium* id cuius oppositum, sine ulla adjecta conditione, terminis constat contradictoriis; *hypothetice necessarium*, id ex cuius opposito prodit contradictio, si certa aliqua ponatur conditio. Ex quo colliges, id quod hypothetice solummodo necessarium est, in se contingens esse.

369. Hisce positis notionibus, facile statuuntur sequentia theoremata.

PROPOSITIO I. *Quod absolute necessarium est, nec initium habet, nec finem habere potest.*

Nam 1^o si aliter foret, jam dici oporteret, ejus oppositum possibile aliquando fuisse, aut esse aliquando posse. Sed ejus oppositum intrinsecam includit contradictionem. Dicendum ergo esset, id quod absolute impossibile est, fuisse aliquando possibile vel fore. Hæc autem plane repugnant (78).

2^o Quod incipit, quodque finem habere potest, ab aliqua conditione dependet ut sit et ut esse pergat. Est ergo contingens. Non ergo absolute necessarium.

Inde colliges, omne id quod necessarium est, æternum esse. Quod enim nec initium nec finem habet, æternum est.

PROPOSITIO II. *Omne id quod contingens est, existere nequit, nisi ab aliqua causa producat.*

Est enim indifferens ad existendum. Ut ergo existat, determinatione eget extrinsecus accepta. Recole quæ dicta sunt de principio causalitatis (318, 2^o).

Utrum vero ens contingens æternam possit existentiam habere, alibi inquiremus.

PROPOSITIO III. *Quod contingens est existentiam amittere potest.*

Non enim absolute repugnat ipsum non existere.

370. Duplici modo ens contingens ad existentiam venire potest, nempe vel *ex aliquo* vel *ex nihilo absolute* (308, 1^o).

Primus exoriendi modus dicitur *productio* seu *effectio*; et tam ad substantias, quam ad accidentia pertinet; alter *creatio*; et substantiarum solummodo proprius est.

371. Substantia duplici modo interire potest, vel quod in partes quibus constat, dissolvitur, et hic modus appellatur *corruptio*; vel quod ad nihilum absolute reducitur, et hic *annihilatio* nuncupatur.

Corruptio autem substantiæ vel efficitur *actione positiva*, ut quum chimica corporum combinatio dissolvitur; vel quia *altera ex partibus inepta unioni efficitur*, ut quum anima humana a corpore separatur.

Accidens esse cessat, quum e subjecto expellitur. Hoc autem fit vel *actione contraria*, ut motus motu destruitur; vel *ex corruptione subjecti*, ut destructo oculo, destruitur vis visiva; vel *ex defectu causæ*, ut deficit illuminatio opaci corporis, luminosi corporis actione deficiente.

372. De ortu et interitu entium, ne graviores quæstiones præoccupem, hæc tantum subjiciam:

PROPOSITIO IV. *Substantia composita cum ex aliquo tum ex nihilo produci potest. At substantia simplex non potest ex aliquo produci, sed solum ex nihilo absolute.*

Prima pars est per se manifesta: altera facile demonstratur.

Etenim substantia simplex non potest constitui per compositionem partium præexistentium, ut patet.

Non educi e subjecto: nam quod e subjecto educitur, accidens est ejusdem subjecti, non autem substantia.

Non extrahi utcumque e substantia composita. Si enim a substantia composita extrahi dicatur, jam erat in illa. Non hoc igitur pacto existere incipit.

Non tandem extrahi ex alia substantia simplici. Cum enim substantia simplex partes non habeat, nihil potest ab ipsa divelli.

PROPOSITIO V. *Substantia composita et partium dissolutione perire potest et per annihilationem. Substantia autem simplex solummodo per annihilationem.*

Utraque pars nulli dubia esse potest, qui noverit ens simplex carere partibus.

ARTICULUS II.

* *De enuntiabilem circa res contingentes veritate.*

373. Subtiliorem hanc quaestionem, quanquam ejus proprie sedes in logica sit, huc tamen rejeci, ut facilius a tiro-nibus intelligeretur. Quaestio est, quomodo id quod logica docet, contradicentium enuntiabilem alterum esse verum, alterum falsum, de enuntiabilibus contingentibus intelligendum sit. De iis enim enuntiabilibus quæ circa materiam necessariam versantur, nulla est difficultas. Revera cum id quod necessarium est, sit jam in causa determinatum, profecto quidquid aliquo modo necessarium est, determinate verum est, et quidquid illi opponitur determinate falsum. At cum res contingentes quodam tempore sint, quodam alio non sint, causamque habeant indifferentem ad utrumlibet, dubitari potest, an ex enuntiabilibus contradicentibus circa res hujusmodi alterum sit determinate verum, alterum determinate falsum.

374. Jam si enuntiabilia hæc sint de præterito aut de præsentī, facile concedunt omnes, determinatam illis inesse veritatem vel falsitatem. Enuntiabile enim determinate verum est aut falsum, prouti res expressa per subjectum, determinate est aut non est ut prædicato exprimitur (L. 374). Sed in enuntiabilibus istis ita se habet res: omnes enim rei affectiones jam sunt per suas causas determinatæ. Ergo vel affectio per prædicatum expressa fuit jam in re, et enuntiabile erit determinate verum; vel non fuit, et enuntiabile erit determinate falsum.

375. Sed ea quæ sunt de contingenti futuro, non ita se

habere quidam opinati sunt, in hanc adducti sententiam a quodam Aristotelis loco (1); in quo hic docet, reperiri quidem in ejusmodi contradictoriis veritatem et falsitatem, non tamen ita, ut necesse sit alterum determinate verum esse, alterum determinate falsum; sed tantum necesse esse ut alterutrum sit indeterminate verum, alterutrum indeterminate falsum; nempe ad eum modum quo disjunctim dicimus alterum oculorum esse necessarium ad videndum, aut alterum aurium ad audiendum (L. 83, 5° 4°).

376. Equidem litem non seram neque de Aristotelis mente neque de S. Thomæ sententia, quæ cujusmodi fuerit, non adeo certum est, ut putatur; hoc tamen notatum volo: 1° a nemine in dubium vocatum iri adductam sententiam si ita explicetur: ex contradictoriis de futuro contingenti *non necessario* alterum esse determinate verum, *non necessario* alterum falsum; sic enim, quæ est Aristotelis ratio, tolleretur omnis contingentia; sed hoc unum necessarium esse a priori et ante eventum, ut alterutrum verum, alterutrum falsum sit: 2° facile quoque omnes concessuros, non posse cum certitudine a nobis ante eventum cognosci, utrum ex contradictoriis determinate verum sit, utrum falsum.

At si de enuntiabili in se, exclusaque antecedente necessitate, disputatio fiat, opinio hæc ut falsa rejicienda videtur. Sit ergo:

377. PROPOSITIO. *Enuntiabilia de futuro contingente sunt determinate vera vel falsa.*

Noto 1° enuntiabile esse ipsam complexionem ex subjecto et prædicato: tunc autem obtineri veritatem quum prædicatum est idea subjecto conformis (L. 374); ita ut qui dicit: enuntiabile A est verum, hoc revera dicat: *hæc idea ad hoc subjectum relata est illi conformis.*

2° Quoniam relatio futuri vel præteriti temporis ad prædicatum pertinet (L. 149), in hac propositione: *Petrus annuet, prædicatum rite evolutum est ejusmodi: annuens instanti X, quod instans est futurum respectu affirmationis, quæ fiat instanti P.*

(1) I Perihermen. c. VIII.

3^o Actus mentis posse reales habere relationes ad objecta non existentia (212, 3^o); ac proinde etiam respectu objectorum ejusmodi, ideas veras actu esse ac dici solere, ut patet in enuntiationibus de re præterita aut possibili, et in multis enuntiationibus necessariis.

378. Probatur propositio. 1^o Enuntiabile in quo prædicatum est jam nunc subjecto conforme, determinate verum est; illudque in quo prædicatum est jam nunc a subjecto difforme, determinate falsum est. Sed in altero ex enuntiabilibus contradictoriis de futuro contingenti, jam nunc prædicatum est subjecto conforme, in altero difforme. Ergo.

Prob. min. In propositionibus istis: *Petrus annuet; Petrus non annuet*, subjectum est Petrus, cum omnibus quæ ad ipsum utcumque pertinent, sive in præsentis sive in futuro; ac propterea cum omnibus quoque quæ ad ipsum pertinent instanti futuro X (L. 151). Inter ea autem quæ tali instanti ad ipsum pertinent vel est vel non est determinatio illa *annuens*. Si est, prædicatum primæ propositionis est jam nunc subjecto conforme; si non est, jam nunc est difforme.

2^o Enuntiabile de præterito contingente, ut omnes fatentur, est determinate verum vel falsum: verum, si subjectum fuit quod enuntiatur fuisse; falsum, si non fuit (374). Ergo etiam enuntiabile de futuro contingente determinate verum est, si subjectum est futurum quod enuntiatur fuisse; falsum, si non est futurum.

Prob. consequentia et paritas. In utraque propositione, prædicatum non est una ex determinationibus quæ insint subjecto tempore præsentis. Ergo quemadmodum prædicatum primæ etiamnum est subjecto conforme, licet in illo nunc non insit actu affectio quam exprimit; ita quoque prædicatum secundæ jam nunc verum est.

Omitto alia plura quæ ad altiores quæstiones nos abducent. Sufficiant hæc, licet vix delibata. Qui plura cupit, adeat commentaria Conimbricensium (1) et Card. Ptole-

(1) In I. *Periherm.* c. VIII, q. unic. art. IV.

mæum (1); penes quos auctores inveniet quoque objectionum quæ afferri possent solutionem plenam.

ARTICULUS III.

De ente mutabili et immutabili.

379. Quoniam de æterno ac temporaneo (368) aliis in locis fiet sermo, superest nunc ut entis mutabilis et immutabilis notiones explanentur. Quem in finem ipsius mutationis conceptus primo est enucleandus.

Mutari ens dicitur, quum aliter se habere incipit ac antea. Propterea mutatio est *transitus entis ab uno modo se habendi ad alterum*. Tria igitur sunt mutationis elementa: *terminus a quo, terminus ad quem*, et utriusque *subjectum*: quæ veteres iis vocabulis designabant: *privatione, forma, materia*. A termino autem ad quem mutatio speciem recipit, quia per ipsum mutatio absolvitur et determinatur. Hinc ab eodem termino mutatio denominatur. Sic dicimus corpus calefieri, quum a frigido fit calidum, et albescere, quum alio quovis colore abjecto, album colorem inducit.

*380. Mutationem omnem *motus* nomine veteres complectebantur. Hinc facile intelliges aristotelicam motus definitionem; quæ obscura quidem est, non tamen ridicula, qualem nonnulli exstimarunt, at satis leviter. Et quoniam definitio hæc omnibus rata veteribus, frequentissime ab iis memoratur, placet de illa aliquid dicere.

Definitur ab Aristotele motus: *actus entis in potentia prout in potentia*, aliisque verbis: *actus mobilis prout mobile vel actus possibilis prout possibile*. Quæ omnia idemque sonant. Est autem *ens in potentia prout in potentia* subjectum mutationis, prouti potens est transire a termino a quo in terminum ad quem; et *actus ejus* est ipse transitus. In subjecto enim mutationis duplicem potentiam distinguere opus est, quemadmodum actum duplicem. Actus, inquam, rei mutabilis duplex est ratione termini ad quem; alius *in fieri*, quatenus forma, quæ est terminus ad quem, invadit et occupat subjectum, alius *in facto* perfectoque *esse*, quatenus forma in

(1) Dissert. XXXIII, *Log. Phys.*

subjecto quiescit ac permanet. Ita igitur duplex est rei mutabilis *potentia*; alia ad actum in fieri, alia ad actum in facto esse. Quum vero res mutatur, est adhuc in potentia respectu actus in facto esse, sed non est amplius in potentia respectu actus in fieri; hæc enim potentia jam transiit in actum, et hic actus est ipsa mutatio. Est igitur mutatio actus, et actus entis in potentia prouti est in potentia ad actum alterum, nempe ad actum perfectum. Et sit patet aristotelica definitio.

* 381. Hinc intelliges, quomodo motus seu mutatio idem sit secundum rem quod actio et passio, et quomodo ab iis differat secundum rationem. Nempe idem actus eademque forma, prouti est ab agente in subjecto, est *actio*, prouti est in subjecto ab agente, est *passio* (261), et prouti in fluxu est et ingreditur in subjectum, est *mutatio*.

* 382. Non alienum ab hoc loco arbitror quædam etiam subjicere de trito illo principio: *omne quod movetur ab alio movetur*; quod pariter ex Aristotele depromptum est (1). In primis quamquam effatum hoc sit de mutatione et de principio efficiente ipsius, differt tamen a principio causalitatis: nam in causalitatis principio agitur de necessaria dependentia effectus ab agente, in hoc autem de distinctione inter agens et actionis subjectum.

* 383. Ad rite porro intelligendum effatum ipsum hæc animadverti debent:

1° Pluribus modis agens a patiente distingui posse: nempe a) distinctione suppositorum; b) secundum diversas ejusdem suppositi partes, sive essentielles sive integrales; c) secundum diversas facultates; d) secundum diversos status aut actus ejusdem facultatis.

2° Necessarium plane non esse ut agens et patiens supposito distinguantur, ut patet:

3° In actionibus transeuntibus distinctionem agentis a passo satis esse evidenter: hujusmodi porro actiones in suo pronuntiato Aristoteles respicit; sed in actionibus immanentibus non adeo facile distinctionem hanc assignari,

(1) VII et VIII. *Phys.*

imo in actibus appetitus ac præsertim liberæ voluntatis nullam esse videri saltem realem.

4° Nulla ratione generali realem distinctionem sive principalis agentis sive immediati principii actionis a passo necessariam demonstrari. Ex eo enim quod inter agens et effectum datur realis relatio, ac propterea realis distinctio, non sequitur realem distinctionem dari quoque debere inter agens et actionis subjectum. Nam etiamsi potentia agat in seipsa, habet tamen cum effectu realem relationem; certe enim hic quoque effectus inadæquate ab agente distinguitur. Quod autem argumenti loco Aristoteles affert: *repugnare idem esse secundum idem in potentia simul et actu*, vim haberet utique hac in re, si idem secundum eandem facultatem, diceretur esse agens in potentia simul et in actu; patiens quoque in potentia simul et in actu; nullam autem vim habet, si dicatur idem secundum eandem facultatem esse simul agens et patiens in potentia, ac dein agens simul et patiens in actu. In hoc enim nullum est inconveniens (1).

5° Cæterum si spectetur agens finitum ut primæ causæ secum cooperantis adjunctam virtutem habens: nullum dubium, adæquatam activam potentiam a passo distingui saltem inadæquate, videlicet qua parte primæ causæ virtutem includit.

6° Est item manifestum, voluntatem se ad actum non movere, nisi quia a fine movetur. Quomodo vero actus voluntatis qui est circa finem, concurrat ad actus qui sunt circa media, an tanquam causa physica, an vero tanquam causa moralis, hoc quærere alterius est loci.

384. Tandem, ut ad propositum propius accedamus, dicendum est de variis mutationum speciebus, et de identitate quæ mutationi opponitur.

Mutatio naturalis, de qua loquimur, in ente his contingere potest:

1° Per accessum alicujus substantiæ ad alteram substantiam, ut v. g. planta mutatur accessu novarum particularum quas sibi adsciscit et assimilatur; vel per substantiæ e substantia recessum: ut v. gr. mutatur corpus animantis,

(1) Cf. Suarezium de his disserentem *Met. Disp. XVIII*, sect. III, præf. § 51.

quum anima expoliatur; aut marmor, quum ex eo fit statua.

2° Per acquisitionem alicujus qualitatis, vel per ejus privationem; ut mutatur corpus, quum ex frigido fit calidum; aut homo, quum seu virtutis seu vitii habitu informatur.

3° Per solam mutationem ordinis, quo sese excipiunt partes ejusdem rei: sic mutatur homo quum assurgit, et æs vel cera quum transfigurantur.

4° Per determinationem acceptam ad motum localem vel quietem.

5° Mutatione ordinis quo res una ad alias se habet. Cujus mutationis hæ sunt potissimæ species:

a) quum res acquirit relationes reales identitatis vel distinctionis, positis earum terminis; aut quum iis sublati, eas amittit:

b) quum incipit vel cessat habere rationem potentiae activæ, posita vel sublata passiva, et viceversa; quemadmodum v. gr. lux cessat et in oculum agere et esse visibilis, ipso oculo sublato.

385. Si ens cum seipso secundum diversa tempora comparetur, dicitur esse sibi identicum si mutationem non subiit. Proinde identitas hoc modo accepta est *cauentia mutationis*, seu *conservatio status in quo ens erat*. Ex variis porro gradibus quos habere potest, identitas hoc modo accepta triplex est: 1° *absoluta*, quum ens nullam omnino mutationem subiit: 2° *relativa et ad sensum*, quum aliqua quidem mutatio in ente paracta est, at sensu non deprehenditur: 3° *moralis*, quum res, licet sensibiles mutationes patiat, in communi tamen hominum æstimatione tanquam sibi identica habetur. Tale est *flumen aut natio*.

386. Facile nunc intelligemus, quid ens immutabile sit, quid mutabile.

Ens *mutabile* est quod ab uno modo se habendi transire in alterum potest (270). Immutabile, quod non potest.

Mutabilitas *intrinsicæ* in eo continetur quod ens intrinsicam aliquam perfectionem vel determinationem recipere vel amittere, vel secundum suas partes, si quas habet, diversimode ordinari queat, aut alias acquirere.

Mutabilitas *extrinsicæ* est in eo, quod res intrinsicè licet non mutetur, ordinem tamen quem ad alias res habet, amittere possit, vel quem non habet acquirere.

387. Inferes 1° Veram ac proprie dictam mutabilitatem eam esse quæ intrinsicè dicitur: extrinsicæ enim mutabilitas aliorum potius mutabilitas est.

2° Proinde absolutam immutabilitatem cum extrinsicæ mutabilitate consistere posse, si nulli intrinsicæ mutationi ens sit obnoxium.

3° Ens omne intrinsicè mutabile, in eo quod mutabile est, contingens esse (368, 385); et vicissim quidquid immutabile est, esse necessarium.

4° E converso omne contingens mutabile, omne necessarium esse immutabile.

CAPUT IV.

DE PERFECTIONE EX RELATIONIBUS ORTA.

ARTICULUS I.

De ordine.

388. Multitudinis perfectio ordine continetur: ordinis autem principium relationibus multorum. Est enim ordo juxta S. Augustinum: *parium dispariumque sua cuique loca tribuens dispositio* (1); et juxta Tullium: *compositio rerum aptis et determinatis locis* (2). Id autem quod locum rei cujusque proprium aptumque determinat nihil aliud est, quam aliqua rei ad cæteras, quibuscum componenda est, relatio. Sane res in se una, quatenus una est, ordinari non potest. Tunc solum incipit ordinis possibilitas, quum vel in re una plures partes consistunt, vel res plures occurrunt. Quum autem plura ordinare volumus, inquirimus primo an relationes aliquas inter se habeant; deinde quænam illæ sint et quam multæ, consideramus; ac postremo unam aut alteram ex illis assumimus tanquam regulam, quam in rebus distribuendis sequamur. Recogita, exempli gratia, quomodo or-

(1) *De Civ. Dei*, XIX, 15.

(2) *De Off.* I 40.

dinentur libri in bibliotheca, numismata, milites et similia. Poterit proinde definiri ordo hoc pacto : *constitutio plurium iis in locis, quæ certa aliqua ratio determinat*; aut brevius : *dispositio plurium secundum aliquam eorum relationem*.

Ordini opponitur inordinatio seu confusio; quæ est *dispositio plurium non in iis locis, quæ aliqua eorum relatio determinet*.

389. Si in rebus ordine digerendis unius tantum relationis ratio habeatur, ordo est *simplex*; si plurium simul, *compositus*. Erunt v. gr. volumina ordine simplici disposita, si attempta fuerit solum identitas materiæ; ordine composito, si præterea et magnitudinis et antiquitatis ratio sit habita.

Et res ordinantur et rerum operationes ac motus. Primus ille ordo *staticus* nuncupatur, *dynamicus* alter.

Dispositio rerum materialium et coexistentium *in spatio* fit; rerum sibi succedentium *in tempore*; rerum immaterialium et coexistentium in modo cogitandi, seu *in signis naturæ* (257).

Tam relationes reales quam logicæ ordinis regulam supeditare possunt. V. gr. ex relationibus logicis temporis oritur ordo *chronologicus*; et ex relationibus quæ juribus et officiis, merito ac demerito continentur, ordo *moralis* ac *socialis*.

Ex relationibus realibus identitatis et distinctionis existit ordo *symmetricus* et *harmonicus*. Ille est coaptatio plurium secundum æqualitatem et inæqualitatem; hic coaptatio plurium secundum similitudinem et dissimilitudinem. Relationes vero causæ et effectus constituunt ordinem *finalem*. Quum enim hæ relationes attenduntur, operatio ipsa rerum intenditur, ac res pro aptitudine quam ad finem habent, disponuntur.

390. COROLLARIA. 1º Eadem res diverso possunt ordine disponi, pro relationis quæ attenditur diversitate.

2º Hinc quæ uni ordinata sunt, alteri confusa videri possunt.

3º Nunquam ordo est omnino arbitrarius. Si enim in rerum dispositione relationem earum aliquam tanquam

regulam sequimur, ordo constabit et necessarius erit; si vero nullam relationem tanquam regulam sequimur, ordo nullus erit.

4º Ordo omnis qui in ipsis fundetur essentiis, est objective necessarius. Talis est ordo moralis.

5º Solum ens intelligens cognoscere ordinem illumque amare atque intendere potest; sola enim intelligentia relationes percipit.

ARTICULUS II.

Theoremata.

391. PROPOSITIO. I. *Non aliunde comperimus ens aliquod intelligens esse, quam ex eo quod ejus opera ordinata sint.*

Cogita unde cognoscas, cæteros homines rationales esse. Profecto non quia eorum ideas et ratiocinia intueris, sed quia eos loquentes audis, eosque vides varias ad suos usus adhibere res et aptare, et symmetriam quærere, taliaque agere et in talibus adjunctis, ut eorum actiones certos fines assequantur aut assequi conentur. Nempe quia ordinem aliquem, qui in his omnibus operibus elucet, deprehendis.

Eodem prorsus modo et non aliter cognoscimus, an ens intelligens rationis usum habeat expeditum: sanosque mente a dementibus atque ebriis discernimus; itemque deducimus an homo consilio operetur vel temere.

Patet igitur, hoc uno indicio et quasi vestigio intelligentiam intelligentiæque usum a nobis deprehendi. Atque hinc etiam inferes cur ordo ac res ordinatæ intelligentiæ tantopere placeant; quia nempe se propemodum in illis agnoscit, quemadmodum qui fratris aut amici memoriam conspicit.

392. PROPOSITIO II. *Opus ordinatum est causæ intelligentis effectus.*

Opus omne causam habeat necesse est, eamque sibi proportionatam (301, 1º). Causa autem ordinis proportionata nulla est, nisi ens intelligens. Etenim omnes causæ reducuntur ad *causas per se*, et ad *causas per accidens* (264, 2º; 321).

Jam ordo non potest esse in rebus solummodo ex accidenti. Nam quanquam duo aut plures effectus causarum per se ex accidenti simul concurrere possint, tamen effectus omnis positivus causam habet per se. Ordo autem positivus quidam effectus est. Præterea in omni ordine aliqua est constantia atque uniformitas. Ordo enim continetur pluribus secundum ejusdem relationis regulam dispositis. Pluralitas autem disponendorum constantiam dispositionis, et regulæ identitas uniformitatem manifestat. Atqui quod per accidens fit et fortuito, neque constantiam habet neque uniformitatem. Secus constantia et uniformitas nullam causam haberent. Ergo omnis ordo ad aliquam causam per se referendus est.

393. Causa autem per se ea est quæ suum effectum vel ipsamet intendit, vel naturali dispositione ac necessitate. Jam causa quæ intendit ordinem, profecto intelligens est. Quæ vero ex naturali dispositione ac necessitate, quæro unde nam naturalem hanc dispositionem ac necessitatem acceperit? Non a seipsa; quia nihil est causa suæ propriæ naturæ. Ergo ab alio. Hoc autem aliud, quum naturali illa dispositione suum opus instruebat, vel ordinem dispositione illa assequendum intendebat ut finem, vel operabatur necessitate naturæ? Si primum, intelligens erat; si alterum, redibit argumentum, donec in causa intelligente constas.

394. Patet hinc facile responderi objicienti regulares crystallizationis, ut aiunt, formas, quæ a causis pure mechanicis ac chemicis determinantur; tum etiam alia quædam quæ a brutis fiunt, et nihilominus pulcherrime ordinata sunt, ut v. gr. apum alvearia. His, inquam, omnibus facile respondebis: immediatum quidem agens irrationale esse, in quo nulla est repugnantia, ut et in operibus artefactis patet; sed tandem aliquando ad supremam Creatoris intelligentiam hæc omnia referenda esse (301).

395. Dices fortasse ex concursu fortuito irrationalium causarum aliquando contingere, ut quædam symmetricè disponantur, aut similitudinem accipiant operum quæ a causa

intelligente ad finem ordinantur; ut quum pictoris spongia in tabulam conjecta equi anhelantis spumam ad vivum effinxit, quam frustra ars pictoris pingere studuerat.

Respondeo, ubi habetur illa dispositionis constantia et uniformitas, quæ ordinem constituit (392), dispositionem illam ad causas irracionales referri nunquam posse; quum vero ea non habetur, sane non repugnare, ut ex concursu irrationalium causarum talis prodeat effectus, qui rerum ab intelligentia ordinarum speciem quamdam præ se ferat. Quanquam in his quoque casibus, si rem profundius inspexeris, invenes, saltem ut plurimum, causas irracionales ad illam operis ordinati speciem concursu suo simulandam, aptitudinem aliquam remotam ab intelligentia accepisse. Sed certe species illa rei ad finem ordinatæ, a re vere ad finem ordinata tam facile distinguitur, quam umbra a corpore.

ARTICULUS III.

* De pulchritudine.

396. Pulchra sunt, ex veterum dicto, quæ visa placent. Visa intellige cognita. Ex qua definitione, quamvis externa sit et per effectus, statim hæc eruuntur:

1° Pulchrum differre a vero. Nam veri cognitionem *per se* consequitur simplex affirmatio, qua dicimus rem esse ut apparet. At pulchrum placet, i. e. suavi quodam jucunditatis ac voluptatis sensu animum perfundit.

2° Differre ab ordine. Nam ordinis cognitionem subsequitur approbatio, quæ quidem aliquid majus est quam simplex affirmatio: qui enim affirmat, dicit *rem ita esse vel aliter*; qui vero approbat, dicit *rem ita esse ut esse debet*. Sed approbatio potest sine complacentia esse, imo cum displicentia sociari.

3° Differre a bono. Bonum enim quanquam et ipsum placeat, non tamen placet qua cognitum, sed qua conveniens est appetitui.

4° Hinc non omne quod placet, pulchrum esse aut dici posse.

397. Pulchritudinis essentiam atque intima constitutiva continet celebris illa ex Platone et Augustino definitio: *unitas in multitudine et varietate*; qua nulla verior aut pulchrior excogitari potest. Animadvertite igitur, quemadmodum ordo quædam est multitudinis perfectio, ita pulchritudinem ipsius ordinis perfectionem, ac vere *splendorem* esse. Nam et materiæ ordinis et ejus formæ aliquid addit, unde ille perfectior evadit et placet. Addit materiæ, quæ ipsa multitudine continetur, *multorum varietatem*: formæ autem quæ distributio est multorum secundum relationem aliquam, hoc superaddit, ut distributa *ad unitatem reducantur*. Hæc porro reductio ad unitatem varietatē servata, pulchri forma ac regula est.

398. Infinitus hic pateret campus, si quis varias pulchri species ac modos per otium percurrere vellet. Sed otium non suppetit ad flores legendos: satis erit, si ipsum quasi succum ex his depromptum brevissimis exhibeamus.

Primo in rebus sensibilibus reductio ad unitatem fit tum *dispositione symmetrica* inæqualium, tum *coaptatione harmonica* dissimilium. Dispositio symmetrica ita inæqualia distribuit, ut ex iis unum totum exsurgat binas habens partes æquales, sed oppositas. Considerata v. gr. animalia, præsertim perfectiora, et architecturæ opera. Coaptatio harmonica ita dissimilia sociat, ut ea se mutuo temperent et compleant. Talis est v. gr. musicus concentus, et variorum in tabulis distributio colorum.

399. Nota 1^a Tunc maxime pulchrum haberi, quum et dispositio symmetrica et coaptatio harmonica inæqualia simul et dissimilia conjungit.

2^a Dispositionem symmetricam esse propemodum basim ac fundamentum physicæ pulchritudinis in iis quæ visum afficiunt, non item in iis quæ auditum. Colores enim extensionem formalem habent, non item soni.

3^a In dispositione symmetrica pulchra duæ sunt semper, ut diximus, partes æquales et oppositæ. Hæ tamen quandoque immediate cohærent, ut v. gr. in quarumdā planta-

rum foliis; quandoque mediante tertio quod æquale non habet, ut in vultu hominis.

4^o Duæ hæ partes rei physice pulchræ essentielles, sunt partes ejus immediatæ et principales; quorum unaquæque per se pulchra esse potest. Si tamen pulchra est, erit aliquomodo ex duobus, eo quo diximus modo, inter se oppositis.

400. Hæc quam modo descripsimus, pulchritudo est *physica* et *materialis*. Quod si ea, quæ ad unum sociata reducuntur, sint res pure intelligibiles, vel unitas ad quam plura reducuntur sit logica (104), pulchritudo dicitur *intellectualis*.

Primo modo pulchra est v. gr. structura poematis, quatenus circa unum hominem aut eventum plura et diversa inter se scite agglomerat; ac pulcherrimus est ordo providentiæ divinæ, quo res et eventus tam multi tamque diversi, imo contrarii, tanquam media ad unum finem, certa ratione reducuntur.

Altero modo pulchritudo exinde consurgit, quod intellectui offeratur *obtentā vel detecta inter res varias assimilatio*. Talis est pulchritudo in operibus artium illarum quæ imitatione continentur, ut sunt eloquentia, poesis, musica, pictura et similes. Ipsa vocum ac translatorum et exemplorum pulchritudo huc spectat. Translatorum autem et exemplorum eo est major pulchritudo, quo magis diversa sunt ea inter quæ similitudo deprehenditur.

401. Pulchritudini physicæ et intellectuali addi debet *moralis*; quæ continetur *conformatione quæsita et obtenta inter actionem liberam et legem moralem, maxime quum actio videbatur illi conformis esse non posse*; nempe quum agentis adjuncta, cupiditates, necessitates huic conformitati aliquomodo obstare videbantur. Hæc est ineffabilis illa, quam omnes sentiunt et amant, pulchritudo virtutis. Hominem v. gr. prædivitem, quam alteri debet mercedem, solvere, bona actio est, sed non pulchra, aut saltem non pulchra magnopere; pulchra, certe erit, si quis cum quadam sollicitudine ac reverentia juris alterius, si stato tempore, si benigne ac liberaliter quod debet reddat. Justitiam autem ab aliquo constanter ac fortiter servari, quum officii custodia, odium potentum

aut vulgi iras, probra, ærumnas perniciem extremam illi affert, hoc enimvero pulcherrimum est, atque adeo sublime.

402. Obicies, quædam dici pulchra, quæ ad nullam ex descriptis pulchri speciebus revocari posse videntur, ut v. gr. quidam colores, aut viride pratum, aut cælum nocturnum sideribus micans.

Respondeo in primis, quædam pulchra dici, quæ proprie delectabilia et grata dici oporteret. Animadvertite deinde, quædam dici pulchra, quia elementum aliquod pulchri continent, nempe aut varietatem quæ placeat, aut qualitatem quæ res aliunde pulchras faceret pulchriores. Demum addi potest, non tam res quasdam dici pulchras, quam associationem sensationum, quas illæ ciet cum certis quibusdam ideis aut cum subjecti dispositionibus, desideriis, recordationibus. Si paululum consideres, ea quæ objecta sunt hoc pacto æstimari pulchra deprehendes.

403. Ex hucusque dictis colliges:

1^o Etsi res quædam pulchræ sensibus percipi queant, pulchritudinem tamen solum ab intellectu cognosci: adeoque bruta pulchritudinem nec percipere nec gustare, ut experientia quoque comprobatur.

2^o Esse quædam pulchri constitutiva essentialia; adeoque nec pulchritudinis rationem ex varia hominum æstimatione pendere, nec pulchri normas esse arbitrio omnino relictas.

3^o Deformitatem, quæ pulchritudinis contraria est, contineri dispositione multorum quæ unitatem destruat vel unitati repugnet. Unitas enim pulchritudinis forma est.

4^o Ea proinde in quibus convenientis solummodo varietatis inest defectus, nec pulchra per se esse nec deformia, ut est v. gr. plurium æqualium ac similium symmetrica dispositio.

404. Aliquid de *gratia* et de *sublimi*; quæ cum pulchritudine confundi non debent.

Gratia in motibus, gestibus, actibus deprehenditur, aut in iis quæ alicujus motus similitudinem præferre videntur, ut in curvis ac mæandris. Videtur autem sita esse gratia in ingenuo quodam ac simplici habitu obsecundandi in motibus

cum decore naturam, qui negligentiam æque atque affectionem devitet.

405. Sublime autem est quasi umbra quædam ac vestigium infiniti; quidquid enim sive extensionem immensurabilem præ se fert, sive vim cui assequendæ animus se impari sentiat, hoc sublime dicimus. Proinde definiri sublime potest: *quod intuentis facultatem longe excedere conspicitur*: seu oculis demum, seu mente conspiciatur.

Differt sublime a pulchro, et in se, et in effectibus. Differt in se, nam quemadmodum pulchrum varietate distinguitur et ornamentis, ordinem exigit et symmetriam, justisque appetit circumscribi limitibus, ut omnes suas partes simul offerre possit intuenti, luce denique et claritate maxime micat; ita sublime ab uniformitate non abhorret, ornamenta spernit, limites dedignatur, simplicitatem in primis habet sociam et austeritatem, nec raro negligentiam, ac tenebris et obscuritate grandescit. In animo vero contemplantis non suavem illam ac temperatam delectationem ciet, quæ pulchri cognitionem comitatur, sed admirationem, venerationem, imo et terrorem; quanquam et hic terror, et qui deinde subsequitur, animi se supra se tollentis æstus atque impetus vehementer oblectet.

METAPHYSICA SPECIALIS.

COSMOLOGIA.

1. Aggredimur nunc specialem metaphysicam, eamque a *cosmologia*, quæ tractatio est de mundo corporeo, auspicamur. Eamdem quippe in philosophando tenere methodum par est, quam humana tenet cognitio. Hæc autem primo in sensibilia intenditur, deinde in ipsum animum reflectitur, ac demum experientia et observatione exculta ac ditata, rerum causas inquirere incipit, donec in ultimo rerum principio, quasi in termino quodam conquiescat. Consentaneum est igitur naturæ intellectus, philosophum primo ad naturam corpoream meditatione se convertere; tum in seipsum redire, ac de humanæ vitæ principio inquirere: ac demum ad causam rerum supremam, quæ Deus est, ascendere. Hæc metaphysicæ pars quæ de mundo disputat corporeo, *Cosmologia*, ut diximus, solet appellari, atque etiam *Philosophia naturæ*, eo quod est quasi quoddam physicarum disciplinarum complementum. Hujus tractationem ita distribuemus, ut primo de corporum natura et qualitatibus disseramus; tum de mundo corporeo generatim ejusque origine; deinde de spatio ac tempore, quæ duo mundanorum omnium phenomenonum conditiones sunt atque elementa; ac demum de natura ejusque legibus, ac de miraculis, quæ potiora sunt exponamus.

LIBER PRIMUS.

CAPUT I.

DE CORPORUM NATURA SYSTEMATA VARIA.

ARTICULUS 1.

Systema peripateticum.

2. Quanquam corpora sint nobis experientiæ perpetuæ objectum, naturaque ipsa nostra ex corpore, tanquam ex parte essentiali constet; nihilominus quæstio de corporum natura difficillima semper habita est, magnisque tenebris obvolutam semper se philosophis obtulit. Semper tamen ex æquo, ab antiquissimis usque temporibus et a primis philosophiæ incunabilis, de corporum natura disputatum est.

3. Principio notandum est, omnem hac de re investigationem a duobus factis quæ obvia cuique observatio offert, tanquam ab inconcussis principiis, exordium semper duxisse. Primum est, corpora esse divisibilia: alterum ex corporibus inter se specie diversis unum non raro converti in aliud; v. gr. lignum in flammam et cineres, alimentum in sanguinem, et similia. Ex quibus pronum erat concludere: esse in corporibus aliquid vel aliqua quæ mutantur, et aliquid vel aliqua quibus mutantur; seu esse subjectum ultimæ mutationum istarum, et esse varia determinativa, quæ hoc subjectum in varias corporum species conforment. Tota igitur quæstio de corporum natura huc semper compulsæ est: quænam sint intrinseca principia quibus corpora constant. Sub tali forma quæstionem de corporum natura semper statuerunt philosophi, in hisque ipsis principiis investigandis summorum ingeniorum semper se exercuit industria.

Longum esset hypotheses omnes quas philosophi excogitarunt, singillatim referre; neque id necessarium est: præcipua tantummodo et quæ celebriora sunt exponemus:

4. Ac primo *systema peripateticum*, seu aristotelicum. Hoc a variis varie expositum est; hic expositionem scholasticorum afferimus; cujus hæc sunt præcipua capita:

Duo sunt rerum omnium corporearum principia intrinseca et per se: *materia prima* et *forma substantialis*, quæ inter se realiter distinguuntur.

Materia corporum naturalium dicitur *materia prima*, ut distinguatur a causa materiali tam accidentium corporeorum quam operum artificialium, quæ est ipsum corpus naturale. Definitur autem: *substantia incompleta, quæ ex se est commune subjectum formarum omnium informantium, et indifferens ut eas omnes recipiat*. Idcirco dicitur *pura potentia*, quia ex se nullum habet essendi actum, neque est hoc aut illud, sed potest diversis formis accedentibus esse hoc aut illud. Eadem est *una* tantum, saltem in corporibus sublunariis; *essentialiter simplex*, quia non componitur ex materia et forma; tamen in composito partibus integrantibus constat; *ingenerabilis* quia ante omnem generationem præsupponitur, et non aliter effici potest quam per creationem; *incorruptibilis*, quia corrupto composito ipsa non perit, sed per aliam formam determinatur: non tamen potest sine ulla forma naturaliter manere.

5. Forma substantialis est *substantia incompleta quæ materiam actuans, corpus determinatæ speciei cum ea constituit*. Ea appellatur *actus primus* corporis naturalis: actus quidem, quia corpus quod secundum materiam erat solum in potentia, adveniente forma incipit esse actu; primus vero, quia actus essendi quem materia a forma habet, accidentia omnia corporis et operationes præcedit, estque primaria earum radix.

6. Formæ aliæ sunt separatæ ab omni materia, ut angeli, aliæ informantes materiam. Hæ vero sunt vel spirituales vel materiales. Spirituales, ut anima humana, solum per creationem a Deo produci possunt; materiales vero activitate naturalium agentium ex materiæ potentia educuntur. Huiusmodi sunt animæ brutorum atque plantarum, et formæ omnes inanimatorum. Spirituales formæ habent esse et operationem a materia independentem; materiales a materia pendent, et ut fiant et ut conserventur, tanquam a præsupposito subjecto: quare illæ manent corrupto composito,

istæ pereunt. Omnis autem forma est *essentialiter simplex* quia non componitur compositione essentiali ex potentia et actu, sed est ipsa actus: quædam tamen formæ in partes integrales sunt divisibiles, ut v. gr. plantarum animæ.

7. Præter formas substantiales sunt in corporibus etiam formæ accidentales, ut quantitas et qualitas, quarum subjectum seu causa materialis nec est materia prima nec forma, saltem actu, sed tantummodo corpus ex utraque compositum. Tam forma substantialis quam accidentalis est actus, quia facit esse in actu id quod erat solum in potentia; nihilominus forma substantialis facit esse *simpliciter*, quia materia sine hac forma nullum esse habet; forma vero accidentalis facit esse *secundum quid*, quia id quod jam est, facit esse v. gr. album aut videns. Hinc cum introducitur in materiam forma substantialis, dicitur aliquid fieri simpliciter; v. gr. fit ignis: quum vero introducitur forma accidentalis, dicitur aliquid fieri hoc aut illud; v. gr. homo fil albus.

8. Introductio formæ in materiam appellatur *generatio*, et formæ separatio a materia *corruptio*. Unde generatio est motus ad formam, ac proinde a non esse ad esse; corruptio est motus ad privationem formæ, ac proinde ab esse ad non esse. Generatio ad formam substantialem est generatio simpliciter; ad accidentalem est generatio secundum quid, et proprio nomine *alteratio* vocatur.

9. Ad generationem autem tria requiruntur: 1° ens in potentia, quod in generatione substantiali est *materia prima*; 2° non esse actu, et hoc est *privatio*, quia non esse, in eo quod aptum est esse, privatio est; 3° id per quod ens in potentia fit ens actu, et hoc est *forma*. V. gr. materia sub quacunque forma est non ignis; sed non sub quacunque forma apta est ut sit ignis, at sub forma ligni vel paleæ aut alterius huiusmodi. Hæc igitur materia cum tali privatione est id ex quo fit ignis; forma autem ignis est id per quod fit ignis.

Hinc sequitur, quemadmodum materia et forma sunt principia corporum constitutiva *in facto esse*, ita materiam, privationem et formam esse principia eorundem *in fieri*, materiam et formam *per se*, privationem *per accidens*.

10. Cæterum non omnia corpora generationi et corruptioni obnoxia esse peripatetici autumabant; sed solummodo hæc infima et sublunaria: cœlos autem et cœlestia corpora ingenerabilia esse et incorruptibilia. Nihilominus cœlum quoque ex materia et forma constare plerique censebant, tamen ex materia ab hac sublunari longe diversa.

Hanc autem sublunarem materiam, quum primo fuit per creationem producta, productam esse censebant sub quatuor *elementorum* formis. Elementa itaque sunt prima corpora; videlicet *aer, ignis, aqua, terra*. Ex his autem fiunt mixta, quatenus, *elementorum* formis pereuntibus, nova mixti forma ex eorum materia educitur. Manet tamen in mixto aliquid *elementorum*; nempe *virtus qualitatum* tam activarum quam passivarum, quæ *elementorum* sunt propriæ; sed hæc manent in gradu remisso, ita ut media quædam qualitas ex iis fiat, licet quandoque cum alicujus qualitatis prædominio.

11. Hæc sunt præcipua peripateticæ doctrinæ capita de corporum natura. In quibus explicandis multæ, ut fit, oriebantur, atque hinc inde agitabantur quæstiones; illæque præsertim: utrum materia propriam entitatem existentiamque per se haberet; et utrum plures formæ possent in eadem materia simul coexistere. Vide Franciscum Suarez qui de his latissime disputat (1).

12. Quum vero atomica doctrina, per Cartesium et Gasendum instaurata, evulgari cœpit, non defuere inter eorum temporum peripateticos qui vel Aristotelem ad illam, vel illam ad Aristotelem pertrahere conarentur. Hi cum atomis corpora constare permetterent, hoc saltem dari sibi volebant, ipsas atomos materia prima ac substantiali forma, tanquam partibus essentialibus atque distinctis componi. Quidam etiam formæ nomine vim materiæ activam appellabant (2): quibus ansam præbuisse videtur Leibnitzius, qui formæ substantialis

(1) *Disp. Met.* XIII et XV.

(2) Utrosque memorat Jos. Mongold S. J. *Phil. rat. et exper.* T. II, Dissert. I, Phys. gen. Sect. I, § 21.

appellationem ad vim, in qua monadum naturam constituit, significandam transtulit (1).

Quisque videt in his opinionibus, præter materiæ ac formæ vocabula, vix aliud, ac ne vix quidem, de peripatetico systemate superesse.

ARTICULUS 11.

Systema elementorum simplicium.

13. Systema elementorum simplicium corporum constitutionem per substantias omni extensione carentes, earumque vires explicat. Hujus originem ad Pythagoram usque referunt, ejusque de numeris doctrinas; jure ne an injuria non disputo. Aliquam quoque analogiam habet cum Zenonis doctrina de continui compositione ex punctis. At certe ejus celebritas apud recentiores debetur, primum Leibnitzio. Cujus hæc sunt placita:

14. Corpora componi e substantiis simplicibus, quas ad Pythagoræ exemplum Leibnitzius *monades* atque cum Aristotele *entelechias* vocat, quo nomine Aristoteles formas substantiales appellaverat, sed diverso sensu. Formam enim appellavit Aristoteles *entelechia*, quia in ea est actus et perfectio materiæ; Leibnitzius vero eodem nomine monades appellat, quia in se perfectionem quamdam habent. Statuit insuper, monades istas nec extensas esse nec figuratas, nec spatium occupare nisi punctum; omnes esse inter se dissimiles; et in qualibet corporum particula numero infinitas; atque ita se contingere, ut nullum inter ipsas vacuum intersit: ad hæc singulas obscura quadam perceptione præditas esse, qua universum sibi repræsentant, et conscientia quidem carere, non tamen appetitu; mutationes omnes monadem ab intrinseco tantum procedere; proinde nullam esse

(1) « Il fallut donc rappeler et comme réhabiliter les formes substantielles, si « décriées aujourd'hui; mais d'une manière qui les rendit intelligibles, et qui sé- « parât l'usage qu'on en doit faire de l'abus qu'on en a fait. Je trouvai donc que « leur nature consiste dans la force, et que de cela s'ensuit quelque chose d'ana- « logique au sentiment et à l'appétit, et qu'ainsi il fallait les concevoir à l'imita- « tion de la notion que nous avons des âmes. » *Système nouveau de la Nature*. Got. Guill. Leibnitzii Opera coll. a Dutens, t. II, p. 50.

alterius ad alteram physicam actionem. Tamen sunt a Deo inter se conjunctæ atque ita conjunctæ, ut internæ cujusvis monadis mutationes cum omnium aliarum mutationibus harmonice conspirent: atque hoc pacto fit, et ex hac præstabilita harmonia, ut aliæ ab aliis determinari videantur. Ex hac monadum conjunctione oriuntur corpora, quæ proinde sunt aggregatio substantiarum; eorumque extensio pure phænomenica est.

15. Multa ex his incredibilia visa sunt vel ipsis Leibnitzi sectatoribus. Hinc Wolfius ac leibnitziani plerique, quam simplicia elementa recipiant, in eo tamen quod ad eorum naturam explicandam attinet, a magistro discesserunt; elementaque eadem vi motrice activa prædita volunt, et singula in singula agere ac reagere; atque hac mutua actione copulari: cumque ita copulentur ut alterum extra alterum existat, inde extensionem effici. Wolfius autem et ipse elementa omnia dissimilia inter se statuit: sed deinde recepta communiter inter leibnitzianos sententia fuit, elementa omnia prorsus homogenea esse; corporum vero diversitatem ex varia eorundem elementorum multitudine ac dispositione consurgere. Quemadmodum enim ex punctis atramento signatis omnes litteræ effici possunt, et ex his litteris voces quælibet; ita ex homogeneis simplicibusque elementis fiunt molecule constitutive eorum corporum quæ simplicia appellamus, et ex his diversimode consociatis corpora mixta.

16. Postremo Rogerius Boscovich hanc elementorum simplicium theoriam maximopere illustravit, matheseos subsidiis adhibitis. Is enim statuit, puncta omnia materiæ viribus quibusdam attractivis ac repulsivis esse prædita, quibus pro diversa eorundem inter se distantia ad accedendum ad se invicem, vel a se invicem recedendum determinantur. Harum autem virium legem exprimit per curvam, quæ in initio ordinatarum asymptotum habeat parallelum ordinatis in infinitum crescentibus ex ea parte, et ex opposita decrescentibus, donec ipsa curva axem secet ac resecet: desinat autem in crus infinitum, habens pro asymptoto ipsum axem, et

jacens ad partes ejus oppositas. In hac curva abscissæ binorum punctorum distantias exprimunt, et ordinatæ vires attractivas et repulsivas, prout jacuerint ad unam vel alteram axis partem. Atque his solis viribus secundum hanc legem variabilibus impenetrabilitatem corporum et gravitatem, variosque cohæsionis modos, elasticitatem, lucem, calorem, omniaque physica phænomena ingeniose explicat (1). Hunc multi postea recentiorum sequuti sunt.

17. Cæterum hujus systematis ratio fundamentalis apud omnes ejus defensores hæc una est. Corpora sunt composita. Compositum autem supponit componentia. Componentia autem, si composita et ipsa sunt, ultima elementa non sunt. Ultima igitur elementa composita esse non possunt. Ergo sunt simplicia: ergo inextensa. Ultima ergo elementa simplices et inextensæ substantiæ sunt.

ARTICULUS III.

* De dynamismo recentiorum.

18. Aliam viam inierunt ad corporum essentiam explicandam transcendentales Germaniæ philosophi. Hi rejecto *mechanismi* systemate, quod vim motricem tantummodo externam admittit juxta mechanicæ leges operantem, eum quoque dynamismum imperfectum putant, qui vires quidem intrinsecas in corporibus ponit, sed legibus mechanicis subjectas; ac *verum dynamismum* appellant systema, quod præter vires mechanicas, plasticas etiam vires admittit; quo ex capite dynamismum *teleologismi* nomine distinguunt.

19. Kant habetur ut pater veri dynamismi. Ejus autem doctrina ista se habet (2). Corpus non solum existit in spatio, sed illud implet, ita ut corpus alterum eo penetrare non possit: hoc vero phænomenon duas motrices vires postulat, alteram *attractivam*, *repulsivam* alteram. Vis repulsiva necessario est in corpore concipienda; per hanc enim vim, quæ

(1) In dissertatione *De lumine*, parte II, et in altera *De lege continuitatis*, et alibi.

(2) *Metaphysische Anfangsgründe der Naturwissenschaft. Kritik der Urtheilskraft.*

corporis partes dissociat atque dispergit, explicatur quomodo corporis partes sint extra partes. Sed si hæc tantummodo vis corpori inesset, vel ejus partibus, hæ partes in infinitum dispergerentur. Ut ergo unitæ permaneant, et spatium repleant, vis altera huic primæ opposita requiritur; hæc autem est vis attractiva. Quæ rursus per se non sufficeret: si enim sola vis attractiva regnaret, omnes partes in punctum mathematicum sese compenetrantes coirent. Duplici igitur vi corpora constant, attractiva ac repulsiva.

20. Sed non hisce solis. Per leges enim universales mechanicæ universalis solum phænomena explicantur, ad ea vero quæ particularia sunt explicanda, alias præterea vires supponamus oportet, quæ secundum finem operentur. In hac enim rerum universitate non finalitatem solum externam deprehendimus, vi cujus res sibi invicem accommodatæ sunt atque subserviunt, sed etiam finalitatem internam, vi cujus res singulæ se ipsas generant, conservant, perficiunt. Hæ vires quæ ad internum finem operantur, *plasticæ* vocari merentur. Quas quidem in corporibus organicis existere manifestum est; esse quoque in reliquis, inferre licet.

21. Per hæc tamen omnia Kantius, ut sibi cohæreat, fateatur non noumena (L. 545, 9^o), sed phænomena tantummodo explicari. Nempe ita res apparent nobis, ut ad eas apparitiones explicandas hæ vires omnes concipiendæ sint. Forte si alius intellectus a nostro diversus easdem res intueretur, ad explicandum earum ortum, operationes, interitum, plasticis viribus non egeret, sed mechanicis tantummodo viribus omnia explicaret. At certe cum ignoret intellectus utrum phænomena a parte rei sint id quod apparent, non potest ea quæ necessario secundum phænomena cogitat, ad rerum naturam transferre.

22. Post Kantium, plures qui de *naturæ philosophia* scripserunt, ac multi quoque qui ejus idealismum amplexi non sunt, ejus principia retinuerunt, juxta quæ docuerunt, intrinsecas vires corporum ipsam corporum essentiam esse, ita ut corpora nihil sint aliud quam loca viribus oppositis attractionis ac repulsionis repleta.

23. Alii vero transcendentales qui pantheismi systema sectantur, juxta capitale illud pantheisticæ sectæ principium: ea quæ in conceptibus nostris sunt sibi invicem opposita, in rebus ipsis unita, imo unum idemque esse, de his viribus sic statuunt. Aiunt videlicet, non esse cum Kantio dicendum, ad hoc ut verum extensum habeatur, præter vim repulsivam, vim quoque attractivam necessariam esse; sed prorsus vim repulsivam sine attractiva existere non posse. Vis enim repulsiva per se solanihil aliud gignit nisi spatium vacuum; et quia in hoc nihil est quod ipsa repellere possit, ipsa se impossibilem reddit. Vicissim attractiva vis per se nihil efficit nisi punctum: quod si punctum tantummodo habetur, ipsa attractio impossibilis est. Itaque binæ istæ vires se invicem essentialiter postulant; et hoc ipso quod sibi oppositæ sunt, ac se oppugnant, se invicem constituunt.

Hæc vero oppositorum identitas in rebus omnibus reperitur.

ARTICULUS IV.

* *Systema atomicum.*

24. Systema atomicum apud antiquissimos æque ac recentissimos rerum naturalium investigatores maxime celebratum, hodiernæ physicæ fundamentum est ac principium. Cujus summa, quod ad rei substantiam attinet, in eo continetur: corpora coalescere primitivis quibusdam corpusculis extensis, insensibilibus, inter se diversis, ac mutuo conjunctis, quæ ab eorum indivisibilitate *atomi* appellata sunt. Corporum autem diversitatem omnem ex varia variorum corpusculorum consociatione conflare. Quod vero spectat ad horum corpusculorum naturam ac proprietates, variæ apud veteres sententiæ fuere.

25. Anaxagoras docuit hæc rerum initia esse particulas infinitas, essentia ipsa dissimiles et ad singulas rerum species pertinentes, v. gr. infinitas atomos aureas, plumbeas, ligneas, osseas, carneas, sanguineas, etc.; quæ ita consociantur, ut in omni corpore aliquæ ex omni rerum specie particulæ insint; corpus vero in certa specie constituatur per

hoc, quod certæ speciei particulæ in illo præ cæteris abundant, primæque in fronte locatæ sint.

Empedocles ad quatuor tantum species atomos primitivas reduxit, terram, aquam, aerem, ignem, omniaque corpora quemadmodum in hæc resolvi putavit, ita ex his conflari statuit.

Leucippus, Democritus et Epicurus infinitam pariter multitudinem elementarium corpusculorum esse docuerunt, quæ quidem essentia similia essent, solumque magnitudine, figura, ordine, positura, motuque differrent: neque aliunde corporum oriri diversitatem, quam ex eo quod componendum atomorum figuræ, positiones, atque etiam intervalla varia sunt: ita enim conjunguntur atomi, ut inter ipsas vacuum aliquod interjaceat.

Non defuerunt sive inter veteres Aristotelis interpretes, sive inter recentiores qui ipsum Aristotelem inter atomistas adnumerandum esse censerent; quorum sententiam profecto non vacat expendere.

26. Atomistarum veterum doctrinas, quas scholastici systematis dominatus in contemptum atque oblivionem adduxerat, a theologicis, quibus scatebant, erroribus purgatas restituerunt sæc. XVII Renatus Cartesius et Petrus Gassendus.

Cartesius in pura extensione mathematica, in triplici nempe dimensione, essentiam corporis collocavit, ac propterea vacuum omne impossibile esse decrevit. Corporum materiam primam non atomos esse censuit, sed massam homogeneam, continuum, indefinitam et in indefinitum divisibilem. Hanc Deus initio creavit, eandemque deinde divisit in particulas innumerabiles, fere omnes cubicas, quæ rotatorio motu accepto, agitari cœperunt, invicemque collidi, affricque mutuo conteri atque abradi. Ex qua attritione, quemadmodum ex tornato ligno, tria elementorum genera effecta sunt. Primum elementum sunt minutissimæ particulæ, quasi scobs subtilis, quibus omne vacuum oppletur. Secundum globuli, in quos cubi primitivi, abrasis angulis, transformati sunt. Tertium particulæ aliæ irregulares, implexæ, diversisque figuris præditæ, et ad motum minus

aptæ. Mitto cætera æque hypothetica et arbitraria, quæ ad rem non faciunt.

27. Gassendus arbitrarías hypotheses et imaginationis figmenta studiosius declinans, veterum vestigia pressius secutus est. Is statuit corporum ultima elementa esse corpuscula solida, impenetrabilia naturaliter, atque indivisibilia, homogenea quoad essentiam, magnitudine tamen ac figura diversa; non infinita numero, sed finita. Hæc a Deo creata in rerum initio non separata inter se, sed in minimas quasdam moleculas conjuncta, quæ sunt corporum sensibilibus elementa. Ex his moleculis alias esse omnino similes, quia ex similibus atomis compactæ similique textura; alias ex opposito dissimiles. Ex moleculis hujusmodi simul compositis, vacuis spatiolis interpositis, oriri corpora; ex similibus elementaria, ex dissimilibus mixta. Generationes autem novorum corporum et corruptiones mutatione compositionis effici; quæ fit vel transpositione atomorum, vel additione, vel detractio.

28. Hæc autem omnia Gassendus fieri existimavit per motum localem atomis a Deo inditum, quo, quantum est ex se, deorsum ferrentur ad perpendiculi directionem; ita tamen ut quæque atomus ex alterius percussione secundum diversas directiones moveri posset. Ex his motibus reflexis contingit, atomos invicem colligari et connecti, ex iisque moleculas et corpora componi.

Newton mechanicis hisce impulsibus ac motibus attractionem, seu gravitationem universalem substituit.

29. In his omnibus quamdam atomicæ doctrinæ prope modum infantiam videre est. Cui parum accessit incrementi ex alchimistarum ac primævorum chemicorum tentaminibus. At hi saltem in eo quod relictis hypothesis et ratiociniis a priori, experientiam consuluerunt, unicam illam inierunt viam, qua ad veritatem hac in re accedere homo poterat. Ut autem perfecta est chimica analysis, ejusque productiones libra ponderatæ, mensura definitæ sunt, tunc tandem de natura corporum aliquid certi statuere datum est. Hinc recentiorum atomistarum doctrina a chemicorum conclusio-

nibus non differt, sed ab iis tota corrivatur, nulla re addita, nulla detracta.

ARTICULUS V.

De atomismo chimico.

30. Chimiae dogmata, quae ad generalem de corporum constitutione theoriam pertinent, ad haec praecipua capita revocari possunt.

1° Materia, quae idem sonat ac corporea substantia, alia est ponderabilis, alia imponderabilis. Corpora sensibilia utramque continent. Imponderabilis vero materia non solum corporibus sensibilibus immiscetur, sed mundana omnia spatia occupat. Ab ea repetuntur phaenomena lucis et caloris, electricitatis et magnetismi, et valde probabiliter etiam attractionis omnigenae. Imponderabilis dicitur, quia nullum adhuc in ipsa pondus deprehensum est.

2° Corpora sensibilia, quantum ad materiam ponderabilem spectat, alia *simplicia* dicuntur, alia mixta, seu composita. Simplicia sunt quae in plura corpora diversae naturae resolvi adhuc non potuerunt, quaeque proinde ex diversis corporibus non coalescere opinari licet. Composita sunt, quae in corpora diversae naturae resolvi possunt.

3° Omnia corpora in partes dividi queunt. Ultima corporum particulae quae mediis mechanicis sunt indivisibiles, dicuntur *moleculae integrantes*, suntque omnes inter se, et cum toto homogeneae. Compositorum vero corporum moleculae in partes heterogeneas resolvi possunt per chemicam analysim. Hae partes heterogeneae integrantium molecularum appellantur *moleculae constitutivae*. Quae possunt et ipsae compositae esse; ac solum in substantiis vere simplicibus compositae non sunt. Hae incomposita corpuscula vocare licebit *atomos primitivas*.

4° Hinc sequitur, corpora esse aggregata substantiarum, tot enim sunt in corpore substantiae, quot in eo sunt atomi primitivae; diversam item corporum naturam ab integrantium molecularum diversitate originem ducere.

5° Copulantur corporum moleculae, ac simul cohaerent

vi attractionis, quam dicunt molecularem. Quae attractio ab universali attractione distinguenda videtur, et tam inter moleculas homogeneas integrantes, quam inter moleculas constitutivas viget. Prima dicitur cohaesio, ipsique debetur corporum compages, altera appellatur affinitas, et ab ipsa oriuntur heterogenearum molecularum combinationes; ex his autem combinationibus integrantes compositorum corporum moleculae consurgunt.

6° Quemadmodum cohaesione moleculae conjunguntur, ita *calorico* dissociari possunt. Hinc sunt inter moleculas diversi cohaesionis gradus, prout una vel altera vis praevalet. Ex diversis hisce cohaesionis gradibus dependet distinctio corporum in *solida, liquida, aeriformia*.

7° Quum integrantes moleculae juxta mutuas attractionis vires libere disponi possunt, solidum inde emergit determinatam formam polyedricam praese ferens, quae in variis substantiis varia est. Solida ita efformata *crystalli* appellantur. Crystallorum autem omnium formae ad sex primitivos ac fundamentales typos revocantur.

8° Chimica affinitas inter diversarum substantiarum atomos non est eadem, sed inter alias major est, inter alias minor, et inter quasdam nulla. Eadem imo substantiae sub diversis adjunctis modo majorem inter se affinitatem, modo minorem exercent.

9° Omne corpus compositum ex binis semper coalescit componentibus, quae sunt vel substantiae simplices vel compositae pariter ex binis. Lex haec dicitur *dualismi chimici*.

10° In omni chimico composito ratio inter componentes eadem est semper; v. gr. in quantacunque aquae massa, hydrogenium semper est ad oxygenium ut 1 : 8. Haec dicitur *lex proportionum determinatarum*.

11° Una eademque substantia, sive simplex, sive composita, diversas combinationes inire cum altera potest; quae tamen combinationes exiguo semper numero continentur. In compositis autem, quae ex his diversis combinationibus emergunt, manente eadem unius componentis quantitate, alterius componentis quantitas major est, ita tamen ut sit

semper multipla minimæ quantitatis, quæ cum primo illo componente combinari potest : v. gr. 175 nitrogenii partes combinari possunt cum partibus oxygenii vel 100, vel 200, vel 300, vel 400, vel 500. Hæc lex vocatur *multiplorum*.

12° Ex postremis hisce duabus legibus deducunt chimici : 1°) atomos primitivas esse indivisibiles naturæ viribus : 2°) atomos cujusque substantiæ esse æquales inter se, tum mole, tum pondere ; 3°) atomos diversarum substantiarum et mole et pondere dissimiles esse. Ex crystallizationis vero phænomenis deducitur 4°) figuras atomorum diversas esse.

13° Illud tandem in comperto est apud omnes : atomorum essentialia proprietates illas esse, sine quibus corpora nec percipere sensu, nec mente concipere possumus : *extensionem* videlicet, ac *vim resistendi* penetrare conanti, aut locum occupare quem ipsæ occupant.

CAPUT II.

CRISIS.

ARTICULUS I.

* *Refellitur systema peripateticum.*

31. Nunc de expositis systematibus judicium ferendum est. Nota autem, velle nos hoc loco de inorganicis tantummodo corporibus sermonem habere. De organicis enim ut quæ ab inorganicis adeo differunt, separatim disserendum est.

Veniamus primo ad systema peripateticum scholasticorum. Quod quidem exponere operæ pretium erat, ut veteres auctores qui nihil in ore frequentius, quam materiam et formam habeant, intelligi possent : refutare autem videri posset non necessarium, cum obsoletum jamdiu sit, et a scholis eliminatum. Quia tamen nostra ætas ad scholasticorum doctrinas recondendas, magno quidem philosophiæ bono, se convertit, timendumque est ne sint aliqui, qui non attentis physicæ scientiæ post scholasticorum tempora progressibus, tantos duces indiscriminatim in omnibus sequi se posse arbitrentur ; male me consulere existimarem audito-

ribus meis, si de hac hypothese nihil dicerem, aut, ut passim fieri solebat, contemptu illam atque scommatibus satis refelli posse putarem.

32. PROPOSITIO I. *Scholasticorum theoriæ de corporum principis merito a recentioribus rejiciuntur.*

Intellige in primis quid asseratur.

1° Materiæ ac formæ vocabula dupliciter intelligi possunt : 1°) *indeterminate* : quo pacto materia est id quod in corporum conversionibus permanet, et forma aliquid quo posito fit unius corporis in aliud mutatio (3). Hujusmodi autem materia et hujusmodi forma non modo hic non impugnantur, sed neque impugnari possunt, et ab omnibus scholis, et in omni systemate semper admissæ sunt. Nullum enim est systema, quod ad corporum naturam explicandam non ponat in corporibus et aliquid quod permanet, et aliquid quod mutatur ; quemadmodum v. gr. in systemate atomico permanent atomi, quæ sunt materia, ac mutatur earum dispositio, qualitas, numerus, quæ omnia constituunt corporis formam. Unde 2°) materiæ ac formæ vocabula possunt intelligi *determinate* juxta varias philosophorum doctrinas. Hoc itaque loco materiæ ac formæ nomine intelligo cum scholasticis duas realitates distinctas, duasque substantias incompletas, quarum altera sit corporis potentia, altera actus modo supra explicato (4, seq.):

2° Equidem non dico, scholasticam theoriam absurdam esse, aut risu dignam. Absurdam non dico, quia id verum non puto : risu dignam dicere abhorreo, propter sapientes qui ea usi sunt, dum illa esset communis. Neque necessarium est ut theoriam istam absurdam dicamus. Agimus enim de hypothese ad corporum constitutionem explicandam inducta. Ad aliquam autem hypothesim rejiciendam, profecto necesse non est, ut ea ostendatur intrinsicè repugnans. Hoc unum itaque contendimus ; hypothesim scholasticam, quæ a recentioribus jamdiu rejecta est, et communissime rejicitur, merito rejici, nec iterum amplectendam esse.

33. Prob. I. Etiamsi quæ de prima materia a scholasticis

asserebantur, mitissime intelligamus cum Scoto, Suaresio aliisque, ut nempe materia ita pura potentia dicatur, ut tamen propriam essentiam et existentiam sibi vindicet, nihilominus quæ de forma corporum substantiali traduntur, recipere non possumus.

Si enim substantialis hæc forma esset compositio et ordo partium, ut est forma operum artificialium, aut qualitas modusque substantiæ, ut sunt accidentales corporum formæ, facile intelligeretur quid rei illa esset, et quomodo ex materia educi posset. At juxta scholasticos forma corporum substantialis realiter et adæquate a materia distinguitur, educitur tamen ex illa, et non fit ex nihilo. Jam in hisce assertis plura sunt quæ certe non levem difficultatem habent. Ipse Suaresius fatetur, in his explicandis *multos laborare* (1). Si igitur adeo difficile fuit ipsis scholasticis statuere quid ea verba significarent, non mirum si nobis difficile est rem iis verbis expressam comprehendere. Certe quidquid sit *eductiva illa* aut *receptiva* materiæ potentia, non facile explicabitur quomodo res, quæ actu in materia non continetur, possit tamen ex illa educi; neque ex nihilo educatur, solummodo quia educitur dependenter a subjecto eam sustentante ac recipiente.

34. Scio ad hæc omnia non deesse scholasticorum responsa: imo multæ huc congeruntur, præsertim a scholasticis tardioribus, loquendi formulæ, multæ afferuntur subtilesque distinctiones. Sed hæc ingenium quidem disserentium probant, at rem ipsam non magnopere illustrant. Quidquid sit, stat certe hoc argumentum:

Merito rejicitur illa hypothesis, quæ, ut minimum dicamus, magnas patitur difficultates, si aliæ hypotheses planæ et intelligibiles, ad rem de qua agitur explicandam idoneæ, præsto sint. Atqui scholasticorum hypothesis magnas certe patitur difficultates, aliæque opportunæ hypotheses nobis non desunt. Merito igitur illa rejicitur.

35. Prob. II. Quicumque sit physicæ studiis vel leviter excultus, profecto nunquam in animum inducet, ut quæ

(1) *Met. Disp. XV, sect. II, §14,*

physicorum omnium consensu tanquam physicæ scientiæ fundamentalia dogmata in præsentī recipiuntur, vel rejiciat vel contemnat. Nam præterquamquod nullæ modo theoriæ a physicis admittuntur, nisi quæ a plurimis experimentis, et naviter institutis, et sæpius instauratis, sponte dimanant, ea quæ diximus fundamentalia dogmata adeo clare, solide, harmonice naturæ phenomena explicant, tamque illustra in se divinæ sapientiæ vestigia exhibent, ut non modo suadeant animum, sed etiam admiratione ac stupore compleant. Si quis igitur hæc negaverit, cum eo sane disputandum non est.

Atqui inter hæc physicorum dogmata et peripateticam theoriam tanta est oppositio, ut physicorum dogmatibus receptis, illico tota peripateticorum theoria corruat, et vicissim qui ejusmodi theoriam complectitur, ea dogmata respuat necesse sit.

Revera si qua modo est apud physicos fundamentalis doctrina, hæc est atomica theoria superius exposita (20. seq.). Hac enim physici perpetuo utuntur, ut non modo corporum inorganicorum constitutionem, conversiones, rarefactionem et condensationem, ac varias statuum mutationes, sed etiam lucis, caloris, electricitatis ac magnetismi phenomena, magnæque ex parte vegetalis quoque œconomiae functiones explicant.

36. Jam 1^o atomica theoria recepta, formarum substantialium theoria per se concidit, saltem in eo quod attinet ad inorganica corpora, de quibus loquimur. Quod non tantum atomistæ affirmant, sed etiam facto ipsa suo peripatetica schola ostendit, quæ semper contra atomica quævis systemata, tanquam contra capitalem inimicum, dimicavit, eaque contentione, ut luculenter ostenderet, se cum atomistis pro aris ac focis dimicare. Et sane atomica theoria semel posita. formæ substantiales sunt, ut minimum dicam, prorsus inutilis, quemadmodum per se manifestum est, ex ex ipsis peripateticorum principiis deducitur.

Ubi enim sunt plures substantiæ, quæ suis viribus invicem adhærescunt, conjunctæque permanent, in hoc composito, juxta peripateticos, forma nulla physica necessaria

est; estque in eo solum forma quædam metaphysica, quæ ipsa partium compositione atque ordine continetur, quemadmodum in rebus omnibus artificialibus contingit (1). Atqui in atomico systemate atomi naturalibus suis viribus copulantur, copulatæque permanent. Posito igitur atomico systemate, juxta peripateticorum principia, nulla physica forma necessaria est.

37. 2º Dixi e converso admissa peripatetica theoria, respui atomicam theoriam oportere. Nam in peripatetica doctrina non atomis corpora constant, sed duobus principiis ex se inextensis, ex quorum conjunctione gignitur substantia, cujus quantitas continua est, indefiniteque divisibilis: hinc nulla molecularis attractio: nulla quoque attractio chimica inter diversæ naturæ atomos, sed solum appetitus quidam materiæ primæ ad diversas formas substantiales: in synthesis substantiarum non atomi atomis copulantur, nec permanent in composito atomi heterogeneæ impermixtæ, sed formis præcedentibus corruptis, unica nova forma materiam earum actuat: hinc corporum diversitas non a constituentium molecularum diversitate pendet, sed unice a diversitate substantialis formæ. Jam hæc qui affirmat, is atomicam theoriam universam subvertit. Ergo revera inter theoriam atomicam et peripateticam tanta est oppositio, ut alterutra recepta, altera rejicienda sit.

38. Juverit oppositionem hanc aliquo exemplo confirmare. Si v. gr. potassium accedat ad aquæ contactum, fit combustio; qua peracta superest oxidum potassii (*potassa*); ac volumen aliquod liberi hydrogenii. Explicatio hujus facti quam chimica scientia suppeditat, theoriis supra dictis innititur. Aqua ex hydrogenio et oxigenio constat; quæ substantiæ conjunctæ quidem sunt, sed non destructæ. Jam potassium habet ax oxigenium affinitatem majorem, quam hydrogenium; hinc oxigenii atomos, quas in aqua reperit, divellit ab atomis hydrogenii, easque sibi conjungit. Hæc chemicus juxta propriæ scientiæ principia.

(1) « Forma domus est compositio et ordo: quæ quidem forma consequitur naturalem virtutem quarundam rerum. » S. Th. *Summ. th.* p. 1, q. CIV, art. I.

Audi nunc peripateticum. Aqua, inquiet, substantia est ex materia prima constans et forma aquea. Potassium vero est agens, quod activa sua virtute corrumpit aquam, et ex materiæ qua illa constat potentia, hydrogenii formam educens, hydrogenium generat. In hac vero actione potassium repatitur, atque ipsum quoque corrumpitur actione aquæ, eademque actione generatur altera substantia, constans materia prima et forma potassæ.

Missa faciam reliqua: at profecto binæ istæ explicationes consistere simul non possunt, sed altera alteram destruit, Quemadmodum igitur chimica theoria theoriam evertit peripateticam, ita peripatetica evertit chimicam. Actum est igitur de chimica scientia, si peripateticam theoriam recipere cogamur.

39. Prob. III. Si qua hypothesis ea facta, quæ maxime explicare deberet, non explicat, merito seponitur; præsertim si aliqua alia hypothesis reperta sit, quæ facta eadem commode explicet.

Atqui atomica theoria, quod nemo negare potest, solide, dilucide, harmonice, pulchre omnia, quæ ad corporum constitutionem legesque pertinent, explicat et illustrat; proportionem determinatas, legem multiplicum, mineralium origines, corporum figuras, substantiarum mirabiles conversiones, sive ad brutam materiam pertineant, sive ad vegetale atque animale regnum; simplicissimis semper ac perspicuis utens principiis, eoque maxime: *minor vis majori vi superatur*. Omnia contingunt in rerum natura, ut contingere deberent positis chemicis theoriis. Ex hisce theoriis novi subinde processus a priori deducuntur, quibus intenti effectus feliciter obtinentur, atque intimæ naturæ latebræ perlustrantur. Sine hac scientia denique omnes physicae partes aliquid desiderant, atque in pluribus nutant.

Peripatetica autem theoria, nescio quænam phænomena explicet, aut quas naturæ leges illustret. Certe ea nullo facto suadetur, cumque nulla naturali scientia fœdus inire potuit.

40. Unum jam supra explicationis peripateticæ attuli exemplum. Placet afferre alterum: eritque factum omnium

simplicissimum, atque obvium. Quærat, cur binæ substantiæ quæ ad certum quoddam compositum efficiendum concurrerunt, hoc dissoluto, prodeant eadem quæ antea. Si ad chymica principia te conferas, vix ulla explanatio necessaria est, adeo iis positæ res clara est. Vide nunc in quantas ambages se conjicere debeat peripateticus; quo vero exitu, tute perspicies.

Materia prima, inquit, omnes formas potentia continet. Elementorum autem formæ in mixto continentur insuper virtute. Hæc vero virtualis præcontinentia importat in mixto qualitates ejusmodi ac dispositiones, quæ elementorum qualitibus sunt maxime affines. Hæc affinitas qualitatum inter mixtum ejusque elementa, vinculum quoddam successionis inter ea constituit. Atque hinc est, quod dum mixtum corrumpitur, ejus formale principium locum per se cedit iis principiis formalibus, quibus ob suas proprietates est maxime propinquum; quæ quidem principia sunt ipsæ formæ simplicium, ex quibus mixtum fuit genitum. Inde fit, ut simplicia hæc suum esse resumant, non mera partium separatione, sed vera entitatis productione. Hæc autem productio mira esse non debet, cum in chymica analysi potentissimæ naturales vires magis minusve interveniant, cujusmodi sunt sive caloricum sive electricum. Ita rem peripateticus explanabit.

41. Quam sit hæc explanatio obscura et implexa, nemo non videt. Sed præterea nulla fere in hac ratiocinatione assertio est, quæ neganda non sit. Omissis primis duabus,

1^o Negandum est, compositum quoad suas qualitates et dispositiones suis elementis esse proximius, quam aliis substantiis. Aqua v. gr. quoad proprietates suas omnes, multo minus ab alcool distat, quam ab oxygenio vel hydrogenio, quæ sunt ejus elementa. Quamnam enim proprietatem hæc habent cum aqua communem?

2^o Negandum, qualitatum affinitatem et propinquitatem vinculum successionis, de quo agimus, inter substantias inducere. Hoc enim est falsum in se; secus ex aqua potius alcool, quam oxygenium aut hydrogenium, gigni deberet. Falsum quoque est recepto superiore adversariorum prin-

cipio. Si enim mixtum suis elementis est maxime affine, quotiescunque ipsum corrumpitur, semper ejus elementa generari deberent; quod tamen est falsum; nam pro diversitate agentium (hæc est peripatetica doctrina), diversæ substantiæ ex aquæ materia generari possunt (38).

3^o Negandum sive caloricum sive electricum virtute novum esse produci posse. Utraque enim vis non agit nisi movendo, nihilque aliud per se producit nisi motum, ut physici unanimes docent. Hinc tam caloricum quam electricum moleculas separare, transferre, agitare, substantiarumque statum mutare possunt, at quod actu non est producere vel educere sane non possunt. Hinc docent physici, utramque vim ex eo solummodo chymicam gignere analysim, quod ex atomis unam moleculam constituentibus unam altera celerius movere, atque hoc pacto eam ab alterius attractione subtrahere possunt: synthesim vero efficere, eo quod motus uni atomo ab ipsis communicatus, vel eam ab alterius attractionis sphaera subtrahit, vel in alterius attractionis sphaeram propellit.

Si itaque hoc pacto rem adeo facilem peripatetici illustrant, quid erit de difficilioribus naturæ arcanis existimandum?

Igitur peripatetica hypothesis a veteribus quidem scholasticis, quibus naturæ leges parum exploratæ erant, nullæque melior suppetebat hypothesis, non absurde adhiberi potuit; ast a recentioribus qui facta longe plura cognoscunt, quibusque ad facta explicanda melius aliquid obtigit, rectissime rejicitur.

42. Prob. IV. Postremo theoria formarum substantialium non probatur, nullique nititur solido fundamento.

In primis plura sunt in illa arbitraria prorsus, nulloque vel argumento vel experimento probata. Revera, quomodo probare poterunt Aristotelis sectatores, materiam rerum omnium sublunarium unam esse, omniaque, absolute loquendo, posse inter se transmutari, aurum v. gr. in hydrogenium, aut sulphur in ferrum? Atqui hoc est primum quod postulant.

Deinde, ne dicam de materia cœlorum diversa a sublunari materia, deque cœlorum incorruptibilitate, quomodo suadebunt corpora omnia sublunaria corruptibilia esse, propriasque formas ex agentium naturalium operatione amittere posse? Aut quatuor esse prima elementa, eaque in mixto non actu servatis propriis formis, sed secundum qualitates tantummodo permanere? Omitto alia plurima: tota enim eorum physica disciplina gratuitis scatet suppositionibus et assertionibus. His igitur omissis, dico ipsa eorum argumenta nihil probare.

43. Multa quidem a veteribus scholasticis ad suæ doctrinæ confirmationem afferebantur argumenta, multoque plura a sequioris ævi doctoribus: non defuere tamen inter ipsos peripateticos magistros, qui doctrinam hanc non firmis ac necessariis rationibus, sed tantum probabilibus firmari fatebantur. Cardinalis vero Ptolemæus, vir egregie doctus, et voluntate certe peripateticus, candide fatetur convenire se cum peripateticæ doctrinæ adversariis, quantum ad probationum quæ ad ipsam confirmandam afferri solebant, levitatem; ac deinde subdit: « Crede mihi: vel solidi nihil afferri » potest, pro systemate peripatetico adstruendo, adeoque » simpliciter erit postulandum; vel unico a nobis allato argumentum » gumento satis est roboris ad ipsum confirmandum (1). » Hoc autem unicum argumentum, quod ipse afferri posse putaverat, est argumentum auctoritatis. De quo mox.

44. Cæterum argumenta omnia quibus peripatetici veteres utebantur ante exortas cum atomistis controversias, ad hæc reducuntur:

1° Homo constat forma substantiali ut intrinseca causa. Est enim anima humani corporis forma. Ergo et res omnes naturales.

2° Si non esset forma substantialis, omnes res naturales essent eadem secundum substantiam, cum materia prima sit una, et communis omnium rerum.

3° Nulla item esset generatio substantialis. Nam materia

(1) *Phil. mentis et sensuum*. Dissert. VIII. Phys. gen. Concl. II.

non generatur; productio vero accidentis non generatio est, sed alteratio.

4° Quum una substantia in alteram mutatur, v. gr. panis in sanguinem et carnem, aliquid ex prima substantia supersit necesse est, itemque novum aliquod elementum producatur oportet. Jam id quod superest materia prima est, id quod producitur, forma.

5° Denique arguebant ex variis, ut putabant, formarum huiusmodi naturalibus indiciis. Sit in specimen hæc ratiocinatio:

« Si aqua v. gr. calefiat, et postea removeatur agens, ab » intrinseco reducitur ad pristinam frigiditatem. Ergo si » gnum est esse in aqua aliquod intimum principium, a quo » iterum manat intensio frigoris, sublatis extrinsecis impedimentis. Illud autem principium non potest esse nisi » forma substantialis (1). »

45. Jam quis non videt quam facile rationes istæ enerventur? Quod ad 1^m spectat, respondebimus: *Omitto ant. ejusque probationem*, quæ vera quidem continent, sed alibi explicanda. *Nego consequentiam et paritatem*; nam hæc paritas, ut scribit Ptolemæus quem supra laudavi, « est innumeris » affecta disparitatibus, quantum videlicet interest inter animam rationalem, spirituales, per se subsistentem, immortalem, et entitates quasdam corporeas, corruptibiles, » incompletas (2). » Notandum et illud: non ab omnibus scholasticis hoc argumentum adhiberi, sed a solis thomistis qui existimabant ipsum esse corporis ab anima pendere; id quod scotistæ aliique negabant.

2^m *Negatur totum*. Nam materiam primam esse unam communemque rebus omnibus, gratuito asseritur, et falsum est. Falsum proinde, res secundum substantiam distinguere, visolum formæ substantialis. Corpora simplicia distinguuntur secundum substantiam per se; mixta vero secundum diversitatem substantiarum componentium.

Ad 3^m *Dist.*: Nulla esset generatio, seu mutatio substantialis

(1) *Suarez. Disp. Met. XV, sect. § VIII.*

(2) *Phil. mentis et sensuum*, l. c.

sensu peripatetico. *conc.*; alio sensu legitimo, *neg.* Etenim juxta peripateticos fit generatio substantiæ *novæ simpliciter*, nempeeductio novæ formæ ex materia prima: juxta atomistas autem fit generatio substantiæ *novæ secundum quid*, videlicet substantiæ compositæ ex binis præexistentibus substantiis, quin novum ullum ellementum producat. Quæ compositio est accidens respectu componentium, non vero respectu compositi, cum ejus essentiam constituat.

4^m Argumentum ex mutationibus substantialibus duriter judicat, ac pessime mulctat citatus auctor, his verbis: « Est » mera petitio principii, et æquivocatio inter materiam primam ab omnibus philosophis admissam, et materiam primam aristotelicam (1). » Cui sane contradicere nequeo. Nemo enim dubitat in mutationibus hujusmodi aliquid manere, et aliquid novi fieri, ipsique rustici hoc sciunt (3; 52, 1^a). Sed quod manet, et quod fit novi esse materiam primam formamque peripateticam, hoc profecto ex argumento non deducitur. Falso quoque supponitur, id quod fit novi esse *novum aliquod elementum quod producat*. Ut enim modo diximus, sufficit nova compositio elementi quod superest, cum aliquo alio aliunde adscito.

3^m Responsione non eget, sed excusatione. Sapientes enim viri qui ita disserebant, non tenebantur ea scire, quæ postea experientia laborque multorum paulatim posteros edocuit.

46. Quod si quis argumentum auctoritatis urgeat, atque invidiosam illam expostulationem oggerat: ergone tot sapientissimi ac sanctissimi viri qui inter scholasticos eminuerunt, quique hoc systema defenderunt, errarunt?

Dicam 1^o expostulatione simili: ergone omnes physicæ cultores, imo omnes philosophorum scholæ, quæ physicam atomismi theoriam ultro recipiunt, modo errant? Nonne eorum error in hac materia incredibilior est, præsertim cum veteres illi a priori, hi autem experientiæ tantummodo ductum sequentes, de rerum natura decreverint?

Dicam 2^o ut modo innui, non esse mirandum, si homines

(1) Loc. cit.

etiam sapientissimi aliqua ignorantia laboraverint in his præsertim rebus quæ sine multis experimentis definiri nequeunt, eoque tempore quo chimica scientia nulla erat.

Dicam 3^o veteres illos (nam de subsequentibus disputare nolo) ac S. Thomam præsertim, cum eo unice spectarent, ut sacram doctrinam illustrarent pro viribus ac tuerentur, physicum hoc systema a sæculari scientia recepisse, et quia communiter probabatur probasse, neque ad aliud animum intendisse, nisi ut illud ab erroribus ethnicorum purgarent, et cum christianæ fidei dogmatibus amice conciliarent. Neque in hoc sane imprudenter egere, imo exemplum nobis dedere, ut ab iis quæ unanimi alicujus scientiæ professoribus consensu recepta sunt, temere non discedamus. S. Thomas si nunc viveret, profecto peripateticus non esset. Vellem equidem omnes catholicos doctores his in quæstionibus mentem potius consiliumque S. Thomæ sequi, quam ut iis vestigiis quæ in aliena via ipse reliquit, pertinaciter inhærent.

Quæ deinceps allata sunt a peripateticis argumenta, ut contra insurgentes atomistas se defenderent ipsosque impugnant, infra fusius expendemus.

ARTICULUS II.

Refellitur systema elementorum simplicium.

47. PROPOSITIO II. *Leibnitziana monadum theoria arbitraria est et absurda.*

In his duabus assertionibus confirmandis multum immorari necesse non est. Nam, quod ad primam attinet, quis non videat, sine ratione a Leibnitzio negari vacuum, ac monades omnes inter se dissimiles confingi? Quis sibi inducere in animum poterit corpora ex animis, imo ex puris coalescere spiritibus? Spiritus enim est subjectum cogitans sine corporis adjumento, quemadmodum cogitant monades germani philosophi. Cui vero poterit suadere Leibnitzius, esse in corporis elementis actiones illas internas, quas nulla experientia manifestat, et nullas esse actiones externas, quas expe-

rientia perpetua nobis objicit? Quis demum, ut alia omittam, illud præstabilitæ harmoniæ commentum ab auctore suo serio proponi ut philosophicam hypothesim arbitretur? Patet ergo leibnitzianam monadum theoriam in plurimis arbitrariam esse.

48. Nec minus aperta est ejusdem absurditas. Sufficiant hæc duo, quod 1^o ponit in unoquoque corpore, et in quavis ejus portione monades numero infinitas. Sed præterquam quod numerus infinitus repugnat, illud ex hac positione necessario concludendum foret: omnium corporum massas inter se æquales esse, minimamque corporis unius particulam, quoad numerum elementorum, totum mundum æquare.

2^o Ponit quoque monades, quæ nullam extensionem habent ac punctum solummodo occupant, ita se contingere, ut nullum inter ipsas vacuum sit interjectum. At, quemadmodum contra Zenonem argumentatur Aristoteles (1), duo puncta quæ ita se contingunt, in unum punctum coalescunt. Quæ enim secundum se tota se tangunt, non sunt separata loco, sed se invicem penetrant, uti geometræ docent. Binæ ergo monades quæ se contingunt, unum tantummodo punctum occupant. Accedat tertia monas, commiscebitur illis; accedat quarta, quinta, sexta, et ita porro: omnes in unum punctum coalescent. Hoc pacto in leibnitziano systemate nulla haberetur continuïtas, nec realis nec apparens, sed totus mundus unico puncto contineretur.

49. PROPOSITIO III. *Systema quoque elementorum simplicium a Boscovichio adornatum nec gratuitis assertionibus caret, nec inconveniens omne devitat.*

Etenim gratuito asseritur, ut minimum dicam, vim attractivam quæ nulla est in virium centro, in aliqua deinde ab hoc centro distantia primo exseri, et intra aliquod spatium crescente distantia crescere. Gratuitum quoque est, cujusque simplicis elementi vim, pro distantiarum diversitate, modo repulsivam esse, modo attractivam, et a repulsiva in attracti-

(1) Phys. VIII.

vam, ac vicissim ab attractiva in repulsivam pluries mutari.

50. Inconveniens vero, quod in hoc systemate ego perspicio, hoc est, quod aut actionem in distans ponere cogitur, aut ad occasionalismum deflectere.

Etenim attractiones illæ repulsionesque simplicium punctorum vel sunt veræ ac physicae eorundem actiones, vel secus.

Si sunt veræ ac physicae actiones, jam simplicia hæc puncta agunt in distans. Inter unum enim et alterum vacua interjacet distantia, sine ullo medio, aut vehiculo, per quod actio unius ad alterum transeat. Ergo unumquodque ex his punctis agit in distans, agit ubi non est (O. 268).

Neque dicas contactum quantitatis a contactu virtutis distinguui; posse igitur duo quæ se non contingunt primo modo, altero se contingere. Ne, inquam, hoc dicas: nam contactus hic ipse virtutis haberi nequit, nisi ubi agens se præsens exhibeat; nullum enim agens agere potest ubi non est. Punctum autem simplex non modo est simplex in ratione substantiæ, ut Deus et anima humana, sed etiam in ratione quantitatis; est enim agens, cujus præsentia limitatur ad punctum geometricum in spatio. Ergo contactum virtutis exercere nequit, nisi in eo puncto in quo præsens est, et non ultra.

Si vero attractiones repulsionesque istæ non sunt punctorum mutuæ actiones, nullam aliam habere possunt causam, ipso Boscovichio fatente (1), quam aut præstabilitam quamdam harmoniam inter actiones, quas puncta exercent intra seipsa, aut actionem immediatam Creatoris. At prima hypothesi est ipsum Leibnitzii commentum, altera est purus putusque occasionalismus. Quomodo autem concipi possint substantiæ, quarum nulla est extensio, quarum præsentia limitatur ad punctum in spatio, quæ nulla vi pollent, in quibus neque vis resistendi ulla est, aut esse potest (48 2^o), ego sane non video.

* 51. Alterum quoque inconveniens in boscovichiana theoria plerique notant, quod nempe extensionem realem de

(1) Dissert. De lumine, p. I, § 54, et alibi.

medio tollat: extensum enim ex inextensis oriri nequit. Sed ut fatear quod sentio, in quo situm sit inconveniens istud, ego quidem non video. Etenim si extensionis nomine intelligunt verum continuum, fatetur Boscovich, imo fatemur omnes, corporum continuitatem apparentem esse, non realem. Dixi: fatemur omnes; nam ii quoque qui ultima elementa putant extensa esse, certe non asserunt ea se continere in omnibus punctis; imo spatium aliquod materia ponderabili vacuum inter atomos interpositum arbitrantur; secus nulla esset corporum porositas, nulla possibilis condensatio, neque motus molecularis in iis ullus existeret. Nullum vero in hoc invenimus absurdum; mirum enim non est minimas illas distantias sensibus non percipi; neque idealistæ ex hoc lucrari quidquam poterunt. Non est ergo absurdum corporum continuitatem apparentem esse.

Si vero extensionis nomine apparentem continuitatem intelligant, negentque hanc ipsam ex punctis boscovichianis oriri posse, id merito rejicietur. Si enim ea puncta contigua sunt ita, ut eorum distantia sensu percipi nequeat, jam impressiones quas ex eorum actione sensus recipiunt, continui representationem efficiant necesse est. Atque hoc pacto continuitatis phenomenon habebitur.

* 52. Illud unum ex hac doctrina consequitur, nihil esse in rerum natura quod vera continuitate gaudeat, cum hæc in elementorum extensorum hypothesi, quanquam non in corporibus, in elementis tamen eorum reperiatur. Ex hoc autem deducemus, geometricas demonstrationes, quæ in utroque systemate corporibus realibus rigore applicari non possunt, posse tamen in systemate atomico rigore applicari ultimis corporum elementis, non item in systemate altero. Hoc vero discrimen contemnendum est: nec potest esse ratio cur unum systema alteri præferatur. Nunquam enim nobis res erit cum atomis; neque huc sane geometria spectat.

53. Venio nunc ad argumentum illud, quo semper utuntur hujus theoriæ fautores (17): ultima compositi elementa com-

posita esse nequeunt: ergo sunt simplicia: ergo inextensa. Quod facile refellitur, altera consequentia negata. Ex argumento namque hoc unum sequitur: ultima compositi elementa quemadmodum partibus essentialibus non constant, ita non constare ex integrantibus re discretis, et in unum conjunctis: nullo autem pacto deducere licet, ultima elementa geometricæ continua esse non posse. In geometrico enim continuo nullo sunt actuales partes, sed solum possibiles; neque illud ex partibus coadunatis componitur, sed ita ut est, et totum quantum est, primo produci debuit. Igitur ultima elementa, licet non composita ex partibus, extensa esse possunt.

Profecto nemo negaverit, posse a Deo creari solidum corpus ita continuum, ut geometræ considerant. Hoc ergo corpus compositum non esset ex partibus, quanquam in partes dividi posset, mente saltem, divisionibus indefinitis. Igitur evidenter possibile est, creari a Deo corpus simplex simul et continuum. Igitur non potest a priori constare ultima corporum elementa extensa non esse.

* 54. Id quod ex ipsis adversariorum principiis ac positionibus deduci potest. Ponunt enim inter puncta simplicia vacuum interjectum. Quod quidem vacuum continuum quoddam est terminis realibus contentum. Quid porro est vacuum istud continuum? Est possibilitas extensionis realis, ut alibi dicemus; ipsique adversarii in hoc consentiunt. Hæc autem realis extensio quæ possibilis est, non est certe series punctorum quæ se contingant; hæc enim series, iisdem ultro fatentibus, repugnat. Restat ergo ut sit extensio realiter continua. Est ergo possibilis extensio realiter continua.

ARTICULUS III.

* Refelluntur dynamici.

55. PROPOSITIO IV. *Dynamismus transcendentalium plura congerit inepta atque absurda; quid tamen corpus sit, nullatenus explicat.*

Missa faciam plurima, quæ in his transcendentalium systematibus arbitraria sunt et absurda, itemque sophismata

lusque verborum quibus eadem innituntur, de quibus partim jam diximus (L. 516), partim alio loco dicemus: ea nunc tantummodo breviter perstringam, quæ ad præsentem controversiam faciunt:

56. Contra Kantium tria hæc notasse sufficit.

1^o Eum supponere vim repulsivam necessario in corpore concipi. Atqui vis repulsiva per se in corporis conceptu non reperitur, sed solum vis resistendi; quæ quidem duo perperam simul confunduntur. Vis enim repulsiva est vis motrix, qua corpus impactum corpus impellens in contrariam ei qua venerat, directionem repellit. Hæc autem vix motrix, quanquam a vi resistendi dimanet, non est tamen idem cum illa, nec conceptu nec re.

2^o Falsum est, corpus primitivum, quod est corpus continuum, vi repulsiva inter ejus partes exserta constitui. Nam non modo vis repulsiva, sed nec resistendi vis inter continui partes concipi potest; in continuo enim nullæ sunt actuales partes, quæ sibi invicem resistere possint.

3^o Denique vires motrices attractivæ et repulsivæ supponunt primo *subjectum* in quo sint, et a quo exerantur; deinde *objectum* quod attrahant repellantve. Atqui *subjectum* harum virium est corpus: corpus item est *objectum* quod hæ vires attrahunt ac repellunt. Igitur tam hæ vires, quam earum actus corpus supponunt, non constituunt. Non explicat ergo Kantius quid sit corpus, ne corpus quidem phænomenicum.

57. Reliqui qui a Kantii quidem idealismo declinant, ejus tamen principia amplectuntur (22), iisdem argumentis refelluntur. Ecquis præterea non videat, quam absurdum sit, substantiam corpoream esse vim compositam ex duabus contrariis, quæ se invicem destruunt?

58. Neque absurditas hæc per pantheisticas de oppositis theorias tollitur, aut minuitur.

Nam 1^o Etiamsi concedamus conceptus oppositos se invicem postulare, non idcirco de rebus ut sunt in se idipsum dici potest. Quis imo probare poterit, unum oppositorum si existat, alterius existentiam secum ferre? Quis dabit unquam, quietem sine motu consistere non posse, aut hoc ipso

quod album existit, aliquid quoque quod nigrum sit existere oportere?

2^o Quanquam res eadem conceptibus oppositis *in abstracto* considerari possit, quemadmodum v. gr. in eodem homine considerari potest et individuum determinatum, et essentia indeterminata; tamen neque hinc sequitur, et omnino falsum est, rem unam eandemque ex duobus objective ac realiter oppositis constare debere.

3^o Nominatim falsum est illud: vim repulsivam ex sui natura vim attractivam supponere, et vicissim. Elsi enim verum sit, in spatio vacuo actualem repulsionem exeri nullam posse, quia nihil in eo est quod repellatur, non tamen inde sequitur nullam in spatio vacuo vim repulsivam esse posse. Itemque in puncto mathematico nulla potest esse attractio; attractio enim spatium requirit; sed hinc concludere non licet, nisi aliunde probetur, in puncto vim attractivam esse non posse. Itaque ex eo quod in vacuo nulla possit fieri repulsio, et in puncto nulla attractio. hoc unum concludere licebit, quod conclusimus contra Kantium, et contra Hegelianos iterum concludendum est, videlicet attractionem et repulsionem nullam esse, nisi supponantur jam corpora quæ attrahantur ac repellantur; non vero in vacuo vim repulsivam, et in puncto vim attractivam non posse persistere; multoque minus unam vim alteram supponere.

ARTICULUS IV.

Atomismus veterum rejicitur.

59. PROPOSITIO V. *Nec in sola extensione geometrica corporis essentia sita est, nec a solo atomorum motu locali corporum constitutio repeti potest.*

Non moramur omnia refellere, quæ sive in Græcorum atomistarum, sive in eorum qui Cartesium proxime secuti sunt, systematibus arbitraria ac falsa reperiuntur; cum nemo jam sit qui illa tueatur aut curet. Hæc duo tantum notare placet, quia ad præsentem quæstionem propius spectant.

Prima opinio est Cartesii. Qui in hac quoque re, ut in pluribus aliis, satis inconsiderate procedens, corpus non juxta realitatem et experientiam, sed secundum quod mathematicæ abstractionis objectum est, definivit: *rem extensam in longum, latum et profundum* (1). Certe trina dimensio, una est ex essentialibus corporis proprietatibus, non tamen unica. Etenim

60. 1^o Illa est præter extensionem essentialis corporis proprietas, sine qua corporis idea tollitur, etiamsi de extensione cogites. Sed quum extensionem cogitas, si præterea non cogitas aliquam saltem vim resistendi penetrare conanti, profecto non corpus cogitas, sed vacuum quod physice nihil est. Ergo illa quoque resistendi vis ad corporis essentiam pertinet.

2^o Hinc perspicis quare Cartesius vacui possibilitatem negare coactus fuerit. Si enim omne vacuum est extensum, omneque extensum est corpus, profecto nullibi vacuum erit, sed ubique corpus. Omitto jam illud: omnino incongrue vacuum omne negari, multoque pejus absolutam vacui possibilitatem: hoc tantum dico: inficiari non posse Cartesium esse in humana mente hasce ideas satis claras, et omnino inter se distinctas, ideam corporis, et ideam vacui. Cur ipse utramque permiscet?

3^o Hisce adde, quod facilis est ex hac cartesiana theoria ad occasionalismum transitus, quemadmodum experientia comprobavit. Nam si corpora nulla vi sunt instructa, nihil agunt, sed passive se habent, atque ita passive, ut a solo Deo, qui per voluntatem agit, moveri possint, impulsu vero mechanico moveri nequeant. Mechanicus enim impulsus, nisi resistantiam in mobili reperiat, penetrare quidem illud valet, non autem dimovere.

61. Ex his patet, quam sit vanum illud Cartesii argumentum. Id constituit corporis essentiam quod in ejus idea clara et distincta comprehenditur. Atqui in idea clara et distincta corporis sola continetur extensio. Ergo (2). Et illud Malebran-

(1) *Princip.* P. II, § 4.

(2) *l. c.*

chii: Quod per se concipi potest est substantia. Sed extensio per se concipi potest. Ergo (1).

Resp. ad 1^m, *Trans. maj. nego min.*

Resp. ad 2^m, 1^o *Omitto maj. et min. et neg. consequentiam.* Ex argumento enim sequitur, extensionem esse substantiam si placet, possibilem, non vero hæc corporea, quæ nos afficiunt, extensionem puram esse.

Resp. 2^o *Dist. maj.*: Quod per se concipi potest ut realitas per se existens est substantia, *conc.*; secus, *neg.* Extensio sola non potest concipi ut realitas per se subsistens. Sola enim extensio vacuum est, non aliqua realitas.

62. Atomorum ponderabilium motu sive ad perpendicularum, sive declinatorio omnia fieri, veterum atomistarum communis opinio fuit, idemque sensere Cartesius et Gassendus, qui in hoc solum a veteribus recesserunt, quod hi motum adstruerent atomis essentialem, ipsi vero a Deo inditum vellent. At si hoc pacto emendata hypothesis ista absurda esse desinit, non tamen apta evadit ad corporum constitutionem explicandam.

Etenim motus iste mechanicus 1^o non explicat atomorum cohesionem. Duabus enim atomis v. gr. ex impulsu accepto concurrentibus, vel utraque moveri perget, vel utraque quiescet, vel altera quiescet, altera movebitur. In hoc ultimo casu nulla foret atomorum adhesio: in duobus primis casibus, atomi adhererent utique, sed si nulla alia vis adhesionem firmaret, nihil facilius esset quam ut dissociarentur. Quævis itaque vis sufficeret atomis dissociandis; id quod est contra experientiam.

Puerile est fingere atomos hamatas, uncas, ramosas; sed etiamsi rem itaingas, quis putet hoc sufficere ad cohesionem explicandam; cum præsertim crystallizationis leges ostendant atomos non temere ac confuse; sed ordinatissime disponi? Præterea quinam est motus mechanicus, aut unde acceptus, quum aereum corpus in liquidum, aut liquidum in solidum transit?

2^o Multo minus motu mechanico explicari potest chimica

(1) *Entret. metaphys.* I.

affinitas, ut patet ex eo præsertim quod 1° affinitas hæc in una eademque substantia varia est pro diversis substantiis, ac 2° non amittitur nec minuitur ad modum motuum mechanicorum, sed semper in atomis eadem permanet, atque in opportunis adjunctis exeritur.

ARTICULUS V.

Statuitur atomismus chimicus.

63. Satis sit de antiquatis opinionibus : ad statuendam veritatem deveniamus. In quo non est modo valde laborandum metaphysico. His enim in rebus non a priori procedendum est, sed a posteriori per observationes et experimenta ; quare totum fere negotium hoc physicum est. Physici vero jam suo muneri abunde satisfacere, proposita atomismi chimici hypothesi ; qua nulla alia, seu firmior, seu concinnior excogitari posse videtur. Duo igitur nobis præstanda sunt : 1° ut a physicis atomicam theoriam recipiamus, ac recipiendam esse demonstremus : 2° ut porro videamus, an theoriæ illi aliquid adjiciendum sit, quo experientia pertingere nequeat. Primum breviter expediemus.

64. PROPOSITIO VI. *Ut de corporum constitutione recte judicemus, universa in primis atomica theoria fundamenti loco statuenda est.*

Ut aliqua hypothesis sit probabilis, hæc tria requiruntur, juxta ea quæ in logica docuimus (L. 329) : 1° ut non sit absurda in se ; 2° ut nulli, seu observationi, seu experimento contradicat ; 3° ut facta, quorum gratia assumitur, commode explicet. Ut vero hypothesis certa fiat, requiritur ulterius 4° ut nulla alia possibilis ac probabilis hypothesis assignari possit (L. 327).

Jam vero stultum est quærere, utrum atomismi chimici hypothesis sit in se absurda. Quod autem nulli vel observationi vel experimento repugnet, corporumque conversiones ac phænomena omnia, ad quæ explicanda assumitur, præclare explicet, hoc uberrime physici demonstrant.

Nullam verò aliam hypothesim possibilem atque probabilem, hac rejecta, suppetere, id quoque physici ostendunt

argumentis ex legibus proportionum determinatarum, multiplo-
rum, et crystallizationis depromptis (30, 12°).

65. Atqui id quod physice verum est, nequit profecto metaphysicis esse falsum ; quodque est hypothesis necessaria ad facta explicanda, nequit abjici aut impugnari, quum ad regionem idearum evehimur. Secus experientia rationi, et ordo physicus ordini ideali adversaretur ; id quod quam maxime absonum est. Nefas est igitur philosopho aliquod systema amplecti, quod atomicam physicorum theoriam evertat ; imo vero necessarium est, ut quidquid illi adversatur, rejiciat, nihilque statuatur, quod cum ipsa componi nequeat.

Antequam investigemus an quid ulterius de corporum constitutivis philosopho asserere liceat, diluenda sunt objecta, quibus a peripateticis sæc. XVII et deinceps, systema atomicum in genere impugnatum est, quæque in atomismum chimicum converti possunt.

ARTICULUS VI.

** Objecta diluuntur.*

66. Opp. 1. Si juxta atomismi doctrinas componentia actu remanent in composito, nulla nova substantia producitur, sed solummodo fiunt nova aggregata accidentalialia. At communis sensus tenet, diversitatem corporum substantialem esse.

Probant autem majorem rationibus sequentibus :

1° Si componentia actu manent in mixto, combinatio chimica non differret, nisi secundum magis et minus, a pura commixtione corporum, quæ in minutas partes mechanicis mediis divisa fuerint. Diversitas autem quæ est secundum magis et minus, speciem non mutat. Jam commixtio illa est accidentalialis mutatio. Ergo et combinatio chimica accidentalialis mutatio esset.

2° Nec differret ab operibus artefactis, quæ efficiuntur diversarum partium conjunctione.

3° Hinc essentia corporum in meris accidentibus collocaretur ; nam dispositio, conjunctio, mutuaque actio molecularum accidentia sunt.

4° Corpora non essent unum per se, sed unum per accidens.

5° Nec componentia a composito specie differrent, eo quod species non ab accidentibus derivantur, sed a substantia. Componentia autem a composito solis differrent accidentibus.

67. Ad difficultatem fundamentalem initio propositam, nempe : Si componentia actu manent in mixto, nulla nova substantia producit, sed solummodo fit novum aggregatum accidentale.

Resp. 1° posse totum concedi, quin ullum inconueniens sequatur. Non enim est inconueniens vulgares quasdam ideas, circa ea quæ experientiæ non patent, a scientia corrigi oportere. Quid vero sequeretur incommodi, si corpora essent accidentale aggregatum?

Resp. 2° *Dist. maj. quoad 1^m partem* : non producit ulla substantia nova simpliciter, *conc.*; non producit substantia nova secundum quid, *nego*. Producit nempe substantia composita ex aliis substantiis, novisque proprietatibus ac viribus instructa.

Dist. 2^m partem : Fit novum aggregatum accidentale; nempe quatenus conjunctio non est componentibus essentialis, *conc.*; quatenus conjunctio sit mera juxtapositio fortuita, et non naturalibus viribus effecta, aut ex se non stabilis, *nego*.

Dist. min. : Sensus communis tenet, diversitatem corporum, substantialem esse, nempe ita ut vulgus hominum diversitatem substantialem concipiat sensu peripatetico, *neg.*; ita ut diversitatem substantialem confuse concipiat, quin de intima corporum constitutione quidpiam decernat, *conc.*

Diversitas substantialis quam nos adstruimus, optime coheret cum communibus hominum opinionibus, quæ de ea diversitate nihil peculiare decernunt. Hinc quum systema chemicum hominibus proponitur, intelligitur et placet; at potestne idem dici de doctrina peripatetica?

68. Ad 1^m argumentum *resp.* iterum : concessis omnibus,

quid aliud consequeretur, nisi quod notiones quædam vulgi confusæ hac potius ratione, quam ex peripateticis placitis perficiendæ essent?

Deinde *dist. 1^m partem* : Combinatio chimica et pura illa commixtio minutissimarum partium non differrent, nisi secundum magis et minus, et non secundum conjunctionis speciem, *neg.*; etiam secundum conjunctionis speciem, *conc.*

Dist. 2^m partem : Magis et minus non mutant speciem componentium, *conc.*; compositi, *subd.*; si eadem maneat conjunctionis ratio, *tr.*; si mutetur, *nego*.

69. Conjunctionis speciem quamvis altera magis, altera minus conjunctio dici mereatur, non tamen ab his gradibus præcise, sed a vario conjunctionis modo desumuntur; ex conjunctionis autem diversitate compositi species dependet. Intra eandem vero compositorum speciem nihil vetat plures haberi gradus, qui speciem non mutant (O. 198, 2°).

Jam commixtio illa mechanica, et chimica combinatio, quoad ipsum conjunctionis modum differunt tripliciter.

1° *Causa efficiente*. Illa enim commixtio fit viribus externis et mechanicis, non viribus ipsarum molecularum; hinc instabilis est, non naturalis, ac per media mechanica cessare potest. Combinatio vero chimica fit viribus affinitatis, quibus naturaliter moleculæ instructæ sunt; hinc naturalis est, et ex se stabilis; ac mediis solummodo chemicis dissolvi potest.

2° *Materia*. In illa enim conjunguntur fragmina sensibilia, et in qualibet quantitate; in hac atomi vel moleculæ ipsæ integrantes et in proportionibus determinatis.

3° *Effectu*. In illa enim particulæ conjunctæ suas proprietates non amittunt, in hac amittunt, ut locum dent novis totius proprietatibus. Ex illa resultat unum unitate aggregati, ex hac unum unitate naturali compositionis (O. 95).

70. *Minorem* argumenti : Hæc commixtio mechanica est accidentalis mutatio, *omitto*; et *dist. consequens* : Ergo et combinatio chimica mutatio accidentalis est; nempe non est essentialis.

lis partibus, *conc.*; non est naturalis nec stabilis ex se, *nego.*

Per hæc patet responsio ad 2^m.

71. Ad 5^m: Essentia corporum in meris accidentibus collocaretur, *Dist.*: Nempe in accidentibus componentium, *tr.*; in accidentibus compositi, *neg.* Mirum est, peripateticos hoc argumentum adeo magnificare. Quoniam compositi diversitas ex diversa partium natura ac diversa conjunctionis ratione dependet, manifestum est, hæc duo non esse compositi accidentia, sed essentialia constitutiva; quamvis componentibus, et simul conjungi, et tali modo conjungi, accidentale sit. Certe apud ipsos quoque peripateticos conjunctio determinatæ materiæ cum aliqua forma nec illi determinatæ materiæ, nec formæ essentialis est. Non tamen propterea ipsi inferunt unionem materiæ cum forma esse corporis accidens. Ita quoque panno esse viride, et viriditati inesse panno accidentia sunt; non tamen esse pannum et esse viride accidentia viridis panni dicuntur.

72. Ad 4^m. Corpora non essent unum per se, sed unum per accidens. *Dist.*: Si unum per se et per accidens definiantur definitione peripatetica, *conc.*; si definitione desumpta ex aliis principiis, *nego.*

Præmissa semper illa responsione: quid absurdi foret si hoc verum esset? dico definitionem unius per se quam peripatetici tradunt, eorum de corporibus doctrinæ inniti; unum enim per se definiunt cum Aristotele (1) *ens quod vel simplex est, vel ex potentia substantiali et proprio actu componitur*. Nil mirum igitur si hac definitione posita, corpora in systemate atomico non sint unum per se. At si non naturam ad conceptus nostros invitam trahere, sed conceptus nostros naturæ accommodare volumus, profecto ita concludemus: quoniam corpora videntur esse unum per se, illa autem definitio corpora, cujusmodi chimia ea esse docet, non comprehendit, definitio mutanda est: unumque per se definimus: *ens quod vel simplex est, vel ex intima plurium unitione, quæ novas composito proprietates atque operationes tribuat, resultat*. Ex qua patebit, non modo corpora esse unum per

(1) De anima II, text. 7.

se, sed etiam resultantem plurium virium; radium item coloris albi, aliaque hujusmodi.

Brevi: peripatetici non aliam agnoscebant compositionem substantialem; quam ex potentia et actu. Sed observatio et experientia nos cogunt, ut admittamus substantias compositas ex pluribus substantiis actu permanentibus, quarum species juxta componentium naturam, aut etiam juxta variam conjunctionis rationem differant. Huc redit in præsentī quæstio tota cum peripateticis; quod hi constanter utantur notionibus quibusdam e suo ipso systemate depromptis, quæ nullo pacto probantur necessario recipiendæ, nisi ipsum antea systema probetur; his proinde notionibus rejectis, aut paululum immutatis, omnia eorum argumenta concidunt.

73. Ad 5^m. *Nego* corpora in nostra hypothesi specie non posse differe. Nam corpus compositum ex substantia B et substantia C, essentialiter differt et a B et a C, et quidem secundum ipsam substantiam.

Ad rationem additam; nempe: species non ab accidentibus derivantur sed a substantia. Componentia autem a composito solis differrent accidentibus.

Dist. maj.: species accidentium, *neg.*; species substantiarum, *subd.*; in se, *omitto*; quoad nostram cognitionem, *nego*. Sed hæc dicta volui solummodo ut quædam in hac generali propositione inaccurate dicta notare. Ad difficultatem enim quod attinet, *omissa majori, dist. min.*: componentia a composito solis differrent accidentibus, seorsum sumpta *neg.*; simul sumpta, *subd.*: different solis accidentibus, quæ nempe sunt accidentia respectu componentium, *conc.*; respectu compositi, *nego*.

74. Opp. II. Dicendum plane, componentia non manere actu in mixto, sed quum fieri combinatio dicitur, novum esse substantiale produci, et quidem ita, ut pereuntibus componentium formis, ex eorundem materia nova forma substantialis educatur,

Nam 1^o mixtum manifestat novas vires novasque proprietates. Ergo per combinationem novum esse substantiale accepit. Operatio enim sequitur esse. Si ergo operatio mixti

diversa est ab operatione componentium, ipsum ejus esse immutatum est.

2^o Si agentia naturalia novum esse substantiale non producant, nihil agerent.

75. Resp. *Nego. ant.*

Ad 1^m Resp. 1^o Eodem argumento, una cum ratione addita, probare possem, funem non componi ex minutissimis filamentis actu perstantibus, et in domo non esse actu lapides quibus exstruitur, aliaque hujusmodi sexcenta.

Resp. 2^o *Dist. ant.*: Mixtum manifestat novas vires ac proprietates quæ resultant ex viribus ac proprietatibus componentium simul conspirantibus, *conc.*; secus, *nego*. Oriuntur enim in composito novæ proprietates eodem pacto ac in corpore moto duabus viribus oritur motus ex utraque resultans, et tamen ab utraque diversus.

Dist. cons. Ergo compositum novum esse substantiale accepit; i. e. novum modum essendi substantiarum componentium, ex quo prodiit nova substantia composita, *conc.*; novam formam substantialem peripateticam, *nego*.

Ad rat. add. Operatio sequitur esse, *tr.*

Ergo si operatio mixti diversa est ab operatione componentium, ipsum ejus esse immutatum est, *dist. cons.* Vel per additionem alicujus realitatis, ut placet peripateticis, vel propterea quod immutatus sit modus essendi componentium, ut placet nobis, *conc.*; solum per additionem realitatis, *nego*.

Ad 2^m. Agentia naturalia nihil agunt si novum esse substantiale non producant, *dist.* ut consequens superioris arguementi. Res est manifesta.

76. Placet huic quoque satisfacere argumento, quod nobis quandoque objicitur. Theoria hæc, inquiunt, materiæ et formæ fundamentum est universæ doctrinæ S. Thomæ et scholasticorum. Hæc porro doctrina et vera est, et omni veneratione digna. Ergo illius quoque fundamentum verum sit oportet.

Resp. 1^o *Neg. consequentiam*. Docet enim Logica etiam ex falso antecedente veram doctrinam concludi posse (L. 229, 5^o.).

Multo magis potest vera doctrina illustrari ac declarari etiam per aliquam falsam hypothesim.

Resp. 2^o *Neg. maj.* Nam nec theologica, nec philosophica scholasticorum doctrina theoriæ huic de corporum natura soliditatem suam debent.

Quod vero S. Thomæ doctrina sit omni veneratione digna, id ultro concedo, libenterque fateor. Nulla tamen ipsi, aut cæteris scholasticis doctoribus irrogatur injuria, si quasdam christianæ doctrinæ illustrationes aut explanationes, quas in iis legimus, quamvis ingeniosæ sint et ad intelligendum utiles, nihilominus tanquam nostris temporibus ac præsentibus physicarum scientiarum statui minus accommodatas seponamus.

Animadverto tandem non semper de materia ac forma physica S. Thomæ sermonem esse, sed sæpissime de materia ac forma analogica, quemadmodum et recentioribus usitatum est.

CAPUT III.

DE ATOMORUM ESSENTIA.

ARTICULUS I.

Sententiæ quædam refutantur.

77. Statuto atomismo chimico, pertinet, ut diximus, ad metaphysicum, ut inquireat an cognitio corporum ultra limites experientiæ præfinitos ratiocinio provehi possit. Quærendum est videlicet, utrum atomi substantiarum chimice simplicium primitiva corporum elementa sint, an vero ex aliis sint composita; primitivorumque elementorum, cujusque modi illa sint, investiganda essentia est.

78. Prænotandum autem, possibile esse, quod chimici ultro concedunt, substantias quas simplices dicunt, saltem quasdam, vere esse compositas; imo nullam esse in eo repugnantiam, quod unica tantum sit in corporibus vere simplex substantia. Non de hoc fit nunc quæstio. Sed, sive simplex substantia sit una, sive sint plures, hoc inquiretur, an atomus substantiæ simplicis sit primitivum corporum

elementum, an vero ipsa quoque ex aliis elementis coalescat.

Quæstionem propositam ita tractabimus, ut primo opiniones quasdam, quæ probandæ nobis non videntur, excludamus, ac deinde quid sentiendum sit colligamus.

79. PROPOSITIO I. *Atomi substantiarum simplicium neque coalescunt e substantiis inextensis, neque pura extensione geometrica constant.*

Prob. 1^a pars. Si substantiis inextensis, seu punctis, atomi coalescunt, hæc puncta vel se contingunt, vel non. Si se contingunt, in unum punctum coeunt, ut supra dictum est contra Leibnitzium (48, 2^o); si vero se non contingunt, vel agunt propriis viribus in se invicem, vel secus. Si primum dicas, ponis actionem in distans; si alterum, occasionalismum statuis. Vide dicta de systemate Roscovichii (50).

Prob. 2^a pars iis argumentis quæ adversus Cartesium allata sunt: est enim ipsa Cartesii positio, quæ hic impugnatur.

80. PROPOSITIO II. *Atomi non constant ex materia prima ac forma substantiali.*

Hoc est systema peripateticum ad minimos terminos reductum, et cum atomica doctrina utcumque compositum. Potest autem duobus modis intelligi: 1^o quod forma cujusque atomi sit immutabilis, videlicet quod in combinationibus chemicis atomi jungantur, suam formam retinentes, nullaque nova forma ad compositum habendum necessaria sit; 2^o quod formæ atomorum sint mutabiles, ita ut in combinationibus chemicis elementa maneant in composito tantum secundum materiam et virtutem (8), expulsisque formis prioribus, nova compositi forma materiam elementorum occupet.

Utrolibet modo intellecta sententia hæc facile excluditur:

81. Excluditur intellecta primo modo: nam neque a posteriori, neque a priori probari ullo modo potest.

Non a posteriori. Etenim nullum est factum, nulla physica lex, quæ talem atomorum compositionem exigat. Veteres quidem corpora constare materia et forma opinabantur ex eo, quod hoc pacto substantiales mutationes explicare se

posse crederent. At in sententia quam modo expendimus, mutationes omnes substantiales fieri ponuntur, ut theoria atomica postulat. Ratio igitur illa, cui tota peripatetica doctrina nitebatur, sententiæ huic non patrocinatur. Nulla igitur experimentalis ratio eam suadet.

Non a priori. Ad hoc enim necesse foret ut ostenderetur, repugnare substantiam quæ extensione sit prædita, et tamen ex potentia actuque composita non sit. Ast hoc profecto demonstrari a nemine poterit; ipsique veteres hoc agnoverunt (1).

82. Excluditur intellecta secundo modo; ac potiore jure excluditur.

Nam præterquam quod nullatenus necessaria est ad facta explicanda, sententia hæc primo gravatur iis omnibus incommodis, quibus scholasticorum systema rejicere in præsentia cogimur. Tria hæc memorabo, a quibus se liberare sententiæ hujus assertores frustra niterentur.

1^o Per sententiam hanc, æque ac per scholasticorum systema, tota chimica scientia, et cum ea physicæ universæ fundamenta subruuntur (35, seq.). Dico *chimicam subruam scientiam*. Nam certe facta quæ sub oculos cadunt, experimentaque physicorum nullæ hominum opiniones destruere valent; nec profecto quia hæc facta non destruunt, sententiæ hujus patroni sibi gratulari possent, se chimiam recentiorem recipere, et cum ipsa cohærere. Chimia enim non historica quædam factorum atque experimentorum expositio est, sed *scientia* quæ hæc facta atque experimenta explicat. Explicat vero per atomicam doctrinam et theoriam affinitatum inter heterogeneas substantias; totaque nititur huic fundamento: atomos substantiarum quæ combinantur, quamvis intime consociatæ sint, manere tamen id quod sunt, ac nullatenus immutari. Atqui si recipiatur opinio quam impugnamus, fundamentum hoc, una cum theoria atomica ac theoria affinitatum inter humanæ phantasie ludibria amandandum est; ac proinde explicationibus chemicis relictis, aliæ omnino factorum explicationes querendæ

(1) Suárez. *Disp. Met.* XIII, sect. X, § VIII.

erunt. Ergo qui hanc opinionem recipere vellent, ii chemicam scientiam, et per hoc physicæ universæ fundamenta directe oppugnarent, ac penitus subverterent.

2° Post hanc cladem, quasnam ii afferre possint factorum explicationes jam vidimus (38, 48). Qui itaque hoc systema suadere vellet, hunc sane ante omnia hoc in se onus suscipere oporteret, ut chemicam aliquam peripateticam conficeret, chemicæ atomicæ loco sufficiendam; at certe ejusmodi, quæ aliquo modo intelligi posset, et probabilitate non caret. Tunc itaque tandem, quum hæc nova chemia reperta fuerit, una scientia cum altera comparata, adduci in deliberationem poterit, utrum chemia hac nostra rejecta, chemia peripatetica recipi mereatur.

3° Interim quisque videt quam absurdum dissidium inter physicam scientiam, qua nostra merito gloriatur ætas, et metaphysicam modo exardesceret, si doctrinam quam impugnamus, metaphysici reciperent. Physicus sane explicaturus corporum naturam, hoc primi postulati loco præmittere cogeretur: quæcunque hac de re metaphysici disserunt, arbitraria et falsa esse; et e contrario metaphysicus hoc primo principio suos auditores imbuere deberet: theorias omnes, omnesque factorum explicationes quas a chemicis didicerunt, inanes esse et rejiciendas. Foret ne dissidium hujusmodi ad philosophiæ seu dignitatem servandam, seu profectum promovendum opportunum?

83. Sed præter hæc, quæ sunt opinioni huic cum veteri scholasticorum systemate communia, quibusdam insuper opinio eadem sibi propriis urgetur difficultatibus, quæ inextricabiles esse videntur.

Nam 1° qui ita opinantur, procul dubio elementorum nomine non intelligunt quatuor illa, *aerem, ignem, terram, aquam*; sed ut arbitrator, substantias illas, quas chimici simplices vocant, quæ quidem sunt tres circiter ac sexaginta.

Atqui nulla est iis ratio cur has aut illas substantias elementares appellent. Non enim hanc appellationem usurpare possunt sensu veterum; nam quatuor illæ substantiæ ideo ab eis elementa appellabantur, quia eas mixta omnia com-

ponere, et ante omnia formatas existimabant. Hi autem primum non admittunt, alterum probare non possunt. Non sensu recentiorum: nam elementa a recentioribus dicuntur eæ substantiæ, quæ pluribus heterogeneis substantiis actu conjunctis non constant. Sed omnes prorsus substantiæ juxta hanc sententiam habendæ sunt ejusmodi: hæc enim negat in ipsis mixtis remanere actu componentia. An forte substantias simplices chemicorum elementa appellare poterunt, quia non possunt in substantias diversas resolvi? Sed in hac opinione nullæ substantiæ resolvuntur, sed corrumpuntur omnes, etiam substantiæ simplices chemicorum. Igitur elementi nomen in hac opinione est vox, quæ nullum videtur habere sensum.

84. 2° Opinabantur veteres, omnia mixta, saltem perfecta, ad sui generationem elementa omnia requirere. At qui opinionem, quam modo impugnamus, in præsentī defendere vellet, certe non assereret omnes chemicorum simplices substantias ad omnia mixta efformanda concurrere. Quænam igitur erunt singulorum mixtorum elementa? Ad hoc puto adversarios respondere non posse. Si enim v. gr. dicent aquæ elementa esse oxygenium atque hydrogenium, nullo jure hoc dicent, et ex ipsorum principiis facile refellentur.

Nam juxta hæc principia, elementa aquæ esse nequeunt nisi ea corpora, quæ corruptione sui materiam relinquunt dispositam ad aquæ formam recipiendam. Ergo ad summum, oxygenium et hydrogenium erunt aquæ elementa, quum ex eorum corruptione aqua generatur. Sed quum viceversa ex corruptione aquæ hydrogenium generatur et oxygenium, aqua erit potius utriusque elementum, cum aliquo alio corpore fortasse.

Juxta eadem principia dicendum quoque foret, aquæ elementa in diversis adjunctis diversa esse. V. gr. lucernæ oleum, dum fit in aeris oxygenio combustio, præter acidum carbonicum, etiam vaporem aqueum suppeditat. In hoc ergo casu oleum esset unum ex aquæ elementis. Sæpe vero incertum erit, an aliqua substantia sit elementum mixti, an

vero agens quod formam generat, quemadmodum in allato combustionis exemplo de oxygenio existimandum foret.

Ex quibus non modo colliges, in hac sententia assignari non posse diversorum corporum elementa, sed etiam clarius perspicies, quod supra inculcavimus, ipsa experimentales scientias his opinionibus subverti.

85. 3^o Quum a veteribus peripateticis dictum audio : elementa manere in mixto virtute qualitatum suarum, probe intelligo quid dicere vellent. Nam qualitates elementorum propriæ quænam juxta ipsos fuerint, nemo ignorat. Aer calidus et humidus, ignis calidus et siccus, aqua frigida et humida, terra frigida et sicca. Quoniam vero hæ qualitates diversimode composita, et in gradu plus minusve remisso, in omni mixto reperiuntur, idcirco poterant illi dicere, elementa secundum suas virtutes in mixtis remanere. Sed peripateticismi atomici sectator, etiamsi definire posset, quid elementi nomine intelligi debeat, et quænam sint diversarum rerum elementa, nescio quomodo probare posset, elementorum qualitates in mixto remanere, aut edicere utcunque quænam elementorum qualitates in mixto remaneant. Nam certe non easdem qualitates esse elementorum existimabit, quas veteres assignabant. Dicere præterea nequit, remanere in mixto affinitates chemicas, quibus instructa sunt elementa : in hac enim sententia, ut supra vidimus, affinitates nullæ sunt. Cæteræ autem qualitates componentium propriæ, sive physicae, sive chemicæ, sive quæ in sensu nostros, sive quæ in alia corpora agunt, in mixtorum generatione evanescent, atque, ut chimici dicunt, *neutralizantur* : ipse corporum status, ut plurimum, immutatur, ac fluida aerea fiunt solida vel liquida, et vicissim. Nescio igitur prorsus, quem sensum fundat in hoc systemate assertio illa : *elementa manent in mixto secundum qualitates*, aut quomodo eadem probari, et cum experientia componi possit.

Patet itaque hanc sententiam multo esse impeditiorem, quam veterum scolasticorum sententiam ; multo magis proinde excludendam esse.

Stat itaque conclusio : dici nullo modo posse, atomos materia ac forma constare.

86. PROPOSITIO III. *Atomi non constant ex viribus attractivis ac repulsivis.*

Demonstratur ex iis quæ in præcedenti capite contre Kantium et dynamicos (55, seq.) dicta sunt.

87. PROPOSITIO IV. *Atomi non constant extensione et vi resistendi; neque adeo duabus realitatibus distinctis, quarum altera sit principium extensionis, altera radiæ vis resistendi; quæ secunda opinio multo minus admitti potest, si hæ duæ realitates dicantur esse materia ac forma peripatetica.*

Prob. 1^a pars.

1^o Atomus est substantia ; est ergo per se. Atqui extensio et vis resistendi constituere nequeunt aliquid, quod sit per se. Nam et extensio et resistendi vis sunt proprietates quæ subjecto egent. Nulla enim est extensio sine aliquo quod extensum sit et nulla est potentia resistendi sine aliquo quod resistere possit. Ergo extensio et resistendi vis non constituunt subjectum ; ac proinde non constituunt substantiam, sed potius supponunt subjectum ac substantiam. Sunt ergo proprietates atomi, at non atomi constitutiva.

2^o Vis resistendi quæ atomum constituere dicitur, vel est ex se extensa, vel non. Si primum, inutile est alterum atomi componens, quod est extensio : si alterum, jam atomus extensa non est. Tantum enim patet atomus quantum vis resistendi ; vis autem resistendi quæ inextensa sit, in pura extensione posita, inextensa manebit ; pura enim extensio non poterit illam extendere.

3^o Extensio quoque, quam vis resistendi occupat, ex se nihil est. Pura enim extensio purum vacuum est, videlicet, purum nihil. At nonne absonum dictu est, purum nihil atomorum constitutum esse?

Præterea hæc extensio, vel est ipsa extensio spatii æterni, quemadmodum Lockium opinatum esse ferunt (1), vel extensio producta.

Sed prima hypothesis est penitus absurda. Nam et spa-

(1) Cf. Ant. Genuensis *Metaphys. Elem.*, Tom. I, c. XII, prob. CLV.

tium imaginarium reale facit, et corporum constitutivum æternum atque improductum; illas insuper hujus spatii partes, quibus vis resistendi tributa dicitur, mobiles ponit, cum spatii partes omnes immobiles concipi necessario debeant.

Secunda quoque hypothesis admitti nequit. Quis enim dici ferat, vacuum fuisse productum?

4^o Tandem his addi potest ratio theologica. Si enim extensio ac resistendi vis corpoream substantiam constituunt, quid jam prohibeat, quominus in eucharisticis symbolis, panis vinique substantias servari dicamus?

88. Prob. 2^a pars.

Vel binæ illæ realitates ponuntur esse partes atomi semper permanentes, vel altera permanens esse, altera variabilis modo peripatetico.

Si primum dicas, necessarium non est, nec probari potest, atomum duabus istis realitatibus constare, neque proprietatum, quæ ab iis dimanare dicuntur, consideratio hoc ullo modo probat, ut mox videbimus.

Si dicas alterum, opinio hæc excludetur iisdem fere argumentis, quæ in propositione præcedenti allata sunt contra hypothesim peripateticam ad atomos translata.

89. Prob. 3^a pars.

Quoniam hæc opinio, ut modo diximus, iisdem fere argumentis refutetur, quibus peripatetica hypothesis refellitur, tamen ab ea in pluribus, iisque essentialibus differt. Idcirco negandum est, opinionem hanc cum peripatetica sententia convenire.

Ut enim plura omittam, 1^o etiamsi daremus atomum constare duabus realitatibus, quarum altera sit radix extensionis, altera origo virium, non ex hoc consequeretur realitatem primam esse potentiam, quæ actum primum essendi recipiat per secundam. Nam hæc secunda realitas a qua vires dimanant, erit ad summum conditio necessaria, ut extensio, quæ a prima procedit, sensibilis fiat; vel etiam, si placet, erit conditio necessaria, ut extensio a prima dimanet: sed hoc non obstante, poterit prima realitas esse realitas actualis per

se ac ratione sui, licet adhuc, eo quod posita conditio non est, effectum suum non produxerit. Certe contrarium probari non poterit, cum hæc realitas, ut in se est, incognita cuique esse debeat.

2^o Hæc opinio statuit, extensionem physicam ac resistendi vim esse duas realitates distinctas, ut quæ a duobus distinctis principiis resultare, et inter se oppositionem habere dicuntur. Atqui veteres tantum abest ut unam ab altera distinguerent, ut imo unam definirent per alteram. Testis est mihi luculentus, præter alios, Suaresius, qui postquam statuit, quantitatem esse formam dantem rebus corpoream molem vel extensionem, illico subdit: « Quid vero sit hæc » bere molem corpoream, declarare non possumus nisi per » ordinem ad hunc effectum, qui est *expellere similem molem* » *ab eodem spatio*, non quidem actu... sed aptitudine (1). » Supra autem tanquam synonyma hæc duo usurpaverat: *expellere similem molem ab eodem spatio*, et *resistere illi ne in idem spatium ingrediatur*. Pluresque sunt inter scholasticos qui extensionem definiunt: *naturalem corporis impenetrabilitatem* (2). Communem vero sententiam hanc fuisse, non unius tantum et alterius, patet vel ex eo, quod impenetrabilitas seu resistentia, quanquam sit perpetuum experientiæ objectum, tamen a veteribus inter vires et qualitates corporis non recensetur, nec de ea sub hoc nomine unquam fit mentio; videlicet quia apud ipsos resistendi vis ad quantitatem revocabatur.

3^o Ut liquet ex argumentis quæ afferunt qui ita opinantur, statuunt formam atomi esse totam in tota atomi extensione, et totam in singulis ejus partibus; ex quo consequitur formam materialem, etiam prouti est in subjecto, habere extensionem *virtualem* ut anima, sed non extensionem *formalem*. Ast hoc quoque longe distat a placitis scholasticorum. Juxta quos omnis quidem forma, ut etiam materia prima, simplex est, quia ex partibus essentialibus non constat; sed non omnis forma inextensa est; proinde omnis forma est in

(1) *Met. Disp. XL, sect. 1V, § 16.*

(2) *Cf. ex. gr. Jo. Baptistam De Benedictis in sua Phil. peripat. T. IV, lib. II, c. II,*

toto corpore et in qualibet ejus parte totalitate essentiae, sed non omnis *totalitate quantitatis*; sed solum anima rationalis, et juxta plerosque animae quoque brutorum (1). Forma igitur inorganica juxta veteres extensa est cum materia; et prout in illa est, quantitatem formalem habet, atque in partes integrantes est divisibilis (2).

90. PROPOSITIO V. *Extensio ac resistendi vis duo diversa principia non exigunt.*

Quoniam assertio hæc opinionis, quam modo impugnavi-
mus, præcipuum fundamentum est, placet illam aliquantulum expendere; id quod etiam ad finem nobis propositum non erit inutile.

Objicitur itaque hoc argumentum: Proprietates contrariæ ex eodem principio dimanare non possunt. Sed vis resistendi, idemque dicendum de omnibus viribus corporeis, est proprietas extensioni contraria. Nam extensionis proprium est, ut rem multiplicet, scindat, dispergat; vis autem perse unitatem, simplicitatem, indivisionem dicit. Ergo resistendi vis dimanare nequit ab eodem principio, a quo extensio procedit.

Sane multa in primis animadverti possent de principio illo: proprietates contrarias ex eodem principio dimanare non posse; ut patet ex dictis in ontologia de qualitatibus contrarietate (O. 194). Sed hisce omissis,

91. dico 1^o *Extensio ac resistendi vis non sunt proprietates ita oppositæ, ut ab eodem principio procedere nequeant.* Quæ assertio probatur a) auctoritate veterum, juxta quos, ut nuper dixi, extensio ac resistendi vis sunt una eademque res. Præterea b) si hæc duo essent vere contraria, non possent esse simul in eodem subjecto: hoc enim contrariorum est proprium. Atqui certe duo hæc sunt simul in atomo. Demum c) hæc duæ proprietates, adversariis fatentibus, ab

(1) Cf. S. Th. *Summ. th.*, p. I, q. LXXVI, et Suarez *Met. Disp.* XV, sect. X, § 31, seq.

(2) Docebant veteres extensionem formalem quantitatis per se convenire, materię vero ac formis materialibus, atque omnibus corporeis qualitatibus per accidens, nempe prouti quantitatis subsunt. Cf. *Comment. Conimbricens.* in II de anima, C. I, Q. VIII, art. I.

eadem essentia atomi procedunt, quod est juxta veteres; nam ex eorum principiis proprietates nec a materia, nec a forma originem habent, sed a composito; quanquam aliæ oriantur a composito *ratione materiæ*, aliæ *ratione formæ*. Si ab eadem essentia, et ab essentia vere una procedunt, jam non sunt ita oppositæ, ut ab eodem principio procedere non possint.

92. Dico 2^o *Neque in atomi extensione ea multiplicitas, neque in ejusdem vi ea unitas habetur, quales objiciuntur.* Non habetur *multiplicitas*: nam in extensione continua non sunt partes actu distinctæ, multoque minus dissipatæ ac dispersæ, sed solummodo partes in potentia. Id quod suo loco demonstrabitur. Cæterum hæc est sententia Aristotelis, S. Thomæ, aliorumque primæ notæ auctorum. Sufficiat nunc S. Thomæ auctoritas. « In divisione continui..... id quod » prius erat multa potentia, unum autem actu, fit plura (1). » Et alibi « Unitas rei consequitur esse ipsius. Partes autem » alicujus homogenei continui ante divisionem non habent » esse actu, sed potentia tantum; et ideo nulla illarum habet » unitatem propriam in actu; unde in actu non est accipere » ipsarum numerum, sed potentia tantum (2). » Quare qui extensionis rationem in partium scissione ac dispersione collocat, Kantianum potius conceptum (19) quam scholasticorum mentem sectatur.

93. Non *unitas*. Vim enim resistendi in atomo est extensa *formaliter*; videlicet non est tota in singulis atomi partibus, si hæc partes mente distinguantur. Esto sane vim hanc esse simplicem quoad essentiam; esto eam esse extensam per accidens; hoc parum refert; satis est si in atomo sit extensa *formaliter*, ut habeat in atomo eam ipsam unitatem ac multiplicitem quàm habet extensio. Si igitur extensio est multiplex, hæc quoque vis erit multiplex: si hæc vis una est, extensio quoque una erit; et tantum illa erit multiplex quantum multiplex est ista, tantumque hæc erit una, quantum illa una est.

(1) In III Dist. XXI, q. 1, art. 1. — (2) In IV Dist. X, q. 1, art. 3, q. 3, ad. 1.

Hinc unitas vis et multiplicitas extensionis non opponuntur, ac proinde binæ istæ atomi proprietates ad duo diversa principia referendæ non sunt.

94. Dico 3^o Si ab una realitate oriretur in atomo vera multiplicitas, non posset ab altera oriri vera unitas. Etenim prima realitas multiplicat se ac distinguit in partes. Realitas vero altera primam realitatem informat. At informatne illam antequam se multiplicet, an vero quum se multiplicat? Primum dici nequit; nam materia non dat extensioni ortum, nisi conjuncta cum forma. Sed esto: antequam se illa multiplicet, informetur. Ergo quum se multiplicat, non se solam, sed et formam qua ipsa actu est, multiplicabit.

Si vero dicas primam realitatem in eo ipso quod se multiplicat, ab altera informari, inferemus realitatem hanc alteram non unum quid informare, sed plura actu. Ergo et ipsa in plura se scindat necesse est.

Quidquid igitur dicas, erit semper concludendum: si ab una realitate multiplicitas oritur, unitatem ab altera oriri non posse.

95. Hinc dico 4^o Ex eadem realitate ex qua extensio dimanat, dimanare potest vis de qua loquimur.

Nam a) ea realitas a qua manat extensio, est una realitas vel plures.

Si est una; ergo unitatis illius, quæ in extensione geometrica viget, alia ratio quærenda non est. Præterea sequetur exinde, aliquid in se unum extensionis originem esse posse. Unde concludemus, realitatem quoque illam a qua vis dimanat, quamvis in se una sit, posse esse extensionis originem.

Si vero dicatur multiplex, negabitur in primis, realitatem hanc posse ex se multiplicem esse. Hæc enim realitas materiæ primæ æquiparatur. Atqui nulla est in materia per se partium distinctio; nam distinctio partium supponit quantitatem actualem, et oritur a forma; actus enim est qui distinguit, juxta pervulgatum apud veteres axioma. Deinde in hac hypothese falsum erit, esse unam realitatem unumque principium, a quo extensio est et multiplicitas partium;

nam potius multæ realitates ac multa principia erunt extensionis radices. Demum quæram iterum: unaquæque ex his realitatibus estne una an multiplex? Et hoc pacto redibit quæstio in infinitum, quousque fatearis, realitatem, ex qua dimanat extensio, unam esse. Cæterum ad hoc fatendum vel illud nosse sufficit: multitudini unitatem necessario præire. Quod si una est, stat primum argumentum.

b) Rursus, realitas illa simplex, a qua vis progerminat, quoniam forma substantialis esse dicitur, procul dubio ex materia educitur; nempe ex realitate quæ est extensionis radix. Si igitur ex realitate hac educi potest realitas illa simplex et indivisa, cur non etiam resistendi vis? Ergo ab eadem realitate, quæ est extensionis radix, oriri potest resistendi vis.

Ex his colligès, in argumento supra opposito (90), omissa majori, negandam esse minorem, cum iis quæ sequuntur.

ARTICULUS II.

Quæstio de atomorum essentia resolvitur.

96. Difficile nunc non erit statuere, quid de ultimis corporum elementis, ac de atomorum essentia censendum sit.

Probavimus initio, atomismum chemicum omnis hujus disputationis fundamentum esse debere. Atomi porro, in quibus chimia sistit, sunt atomi substantiarum simplicium; ac facile largiuntur chimici, substantias vere simplices esse fortasse multo pauciores iis, quæ modo recensentur. De his atomis primitivis quærebamus, an ultima corporum elementa essent, an vero ex aliis elementis constarent. Atomi enim sunt corpuscula saltem mente divisibilia; extensæ enim sunt. Jam post ea quæ hucusque disseruimus, facile colligi poterit, quid in proposita quæstione sentiendum sit.

97. PROPOSITIO VI. *Ultima corporum elementa sunt atomi; nempe substantiæ extensione geometrica, et vi resistendi præditæ.*

Probatur ex dictis. Nam atomi substantiarum vere simplicium vel sunt compositæ ex elementis re distinctis, vel prorsus incompositæ. Si sunt compositæ, vel constant ex binis

partibus, altera potentiā, altera actuali, vel ex pluribus partibus actualibus. Non sunt autem compositæ ex parte potentiā, et ex parte actuali, ut probatum est (80. seq.). Neque ex partibus actualibus. Nam hæ partes actuales aut vires sunt, aut puncta, aut alia corpuscula continua. Sed nequeunt esse vires (86) et nequeunt esse puncta ex demonstratis (79). Nequeunt item esse corpuscula continua; nam agimus de corpusculis substantiarum vere simplicium. Hoc unum itaque dicendum superest: atomos substantiarum simplicium esse prorsus incompositas: ac proinde ultima corporum elementa esse.

Hæc vero, quæ diximus de atomis ponderabilium corporum, quæ chimici considerant, dicenda ex æquo sunt de atomis ætheris imponderabilis, si ab atomis ponderabilium corporum primitivis reapse hæ differunt. Nam utrobique eadem rationes valent.

98. Pauca nunc de atomorum primitivarum essentia.

Dicendum itaque 1^o essentiam genericam atomici corpusculi primitivi hanc esse, ut sit substantia extensione geometrica ac vi resistendi prædita. Quæ duo non sunt essentia atomorum constitutiva realia, ut supra dictum est (87), sed binæ manifestationes substantiæ corporeæ ejusdem propriæ atque constantes, quæ in ultimis quoque corporum elementis reperiuntur necesse est. Hæ dicuntur essentielles eorum proprietates, qui una cum indeterminata substantiæ notione, satis determinant in conceptu nostro quid illa sint.

De cæteris autem viribus quibus atomi instructæ sunt, quarum ope in se mutuo agunt, non fit mentio in essentiæ descriptione; primo quidem quia sine illis atomus concipi potest; tum etiam quia hæ vires ab essentialibus proprietatibus dimanant, ut infra videbitur.

Dicendum 2^o de *specificâ* primitivarum atomorum essentia vix aliquid statui posse. Nam specificæ earum proprietates sensibus nostris non patent, ac solum se manifestant in corporum proprietatibus. Ignoramus præterea quænam sint vere simplices substantiæ. Nihilominus statuere possumus generatim, atomos diversarum substantiarum simplicium

differre debere vel figura, vel magnitudine, vel chemicis affinitatibus, vel aliquo alio hujusmodi.

Dicendum 3^o atomos primitivas, quamvis incompositæ sint, esse tamen, prout continui natura fert, sine fine divisibiles, saltem mente. Physice tamen videntur dicendæ indivisibiles.

99. Quæres an atomorum variæ species metaphysice compositæ dici queant; ita ut sit in illis aliquid imperfectum ac determinabile, quo pertineant ad genus substantiæ corporeæ, et aliquid perficiens ac determinans, quo in certa specie collocentur. Respondeo; si iis vocibus: *imperfectum* et *perficiens*, *determinabile* ac *determinans*, intelligis binas partes physicas, ut potentiam et actum peripateticorum (4, 5), negabitur 1^o compositionem hujusmodi metaphysicam esse; 2^o eam in atomis habere locum (80, seq.). Si vero intelligis iis vocibus binas partes metaphysicas, ut sunt in homine animal et rationale, quæ non sunt veræ partes, sed ratione tantummodo distinguuntur (O. 247), nemo negabit hanc in atomis idealem compositionem esse.

ARTICULUS III.

Satisfit objectis.

100. Opp. I. In atomismo chimico sistere non possumus. Nam

1^o Quæstio, quam agimus, non physica est sed metaphysica: agitur enim, non de explicandis factis, sed de explicanda essentia corporis seu atomi. Sed atomismus chimicus est quidem hypothesis physica idonea ad facta explicanda, non autem theoria metaphysica sufficiens ad explicandam corporum essentiam. Ergo metaphysicus in eo sistere non potest.

2^o Experimenta chimiæ non definiunt utrum elementa constant materia ac forma nec ne; itemque utrum maneant in mixto actu, an vero virtute.

3^o Huic igitur theoriæ non opponitur chimia, quemadmodum non opponitur iis, qui censent atomos elementares constare ex punctis.

101. Resp. *Neg. ant.*, juxta ea quæ supra declarata sunt.

Ad 1^m: Quæstio hæc non est physica sed metaphysica, tamen connexa cum physica.

Dist. pariter rat.: add. Agitur de explicanda essentia atomorum, ita ut non destruaturs explicatio physica factorum, quam chimia suppeditat, *conc.*; secus *nego*.

Neg min. et cons. quarum negationum ratio patet ex dictis.

Ad 2^m *Dist.*: Experimenta solummodo, *omitto*; scientia chimicæ quæ his experimentis innititur, *nego*. De hac oppositione inter chimicam scientiam et peripateticum systema quocunque modo proponatur, vide superius dicta (32. seq., 82).

Ad 3^m *Neg. et nego paritatem*. Qui enim atomos punctis constare censent, theoriam combinationum et affinitatum non evertunt; imo chimicæ scientiæ conclusiones omnes recipiunt. At qui peripatetica placita sectari vult, chimicam scientiam universam evertat oportet, ut supra demonstratum est.

102. Opp. II. Atomus materia ac forma constant necesse est, seu realitate ex qua fluat extensio, et realitate quæ sit vis origo. Etenim,

1^o Extensio atomi seu partium multiplicitas ac simul ejus unitas explicari nequeunt, nisi ponamus in ipsa atomo principium simplex, quod singulis immixtum partibus suam iis indivisionem impertiat.

2^o Materia, qua talis, est semper et ubique eadem; ex eaque extensio sola emergit. Si igitur molecula sola materia constaret, nullæ essent moleculæ heterogeneæ, seu diversæ naturæ et operationis. Ergo aliud principium moleculæ insit oportet, ex quo illa naturæ diversitatem sortiatur.

3^o Figura in quantitate continua qua atomus instructa est, non potest esse nisi a principio formali. Etenim extensio quæ pullulat a principio materiali, per se indifferentiam dicit ad figuram quamcunque.

103. Resp. *Neg. ant.* i. e. tam id quod de atomi compositione affirmat, quam id quod supponit de identitate inter materiam et formam ac binas illas realitates (89).

Ad 1^m *Nego*. Etenim ad hoc ut eam unitatem cum partium *possibilium* multiplicitate conjunctam explicemus, necesse non est ut partium multiplicitem ab uno principio, et unitatem ab altero oriri statuamus (90, seq.). Sufficit enim unum principium a quo utraque oriatur, seu potius quod per utramque se manifestet. Hoc principium erit substantia ipsa atomi cum tali extensionis mensura a Deo condita. Noto autem difficultatem hanc, si qua est, integram manere in systemate peripatetico vero, in quo formæ materiales ponuntur extensæ formaliter eodem pacto ac materia.

Ad 2^m *Dist. ant.*: Si materia usurpetur sensu peripatetico veteri (4), aut reformato, *tr.*; si usurpetur alio sensu legitimo, *nego*. Eademque sit distinctio ad *utrumque consequens*. Materia enim apud recentiores sunt ipsæ atomi, ex quibus corpora coalescunt; atomi vero non sunt semper et ubique eadem, nempe ejusdem naturæ, aut saltem hæc identitas non probatur. Cæterum sive atomi primitivæ sint diversæ naturæ, sive ejusdem, haberentur semper ex varia earum compositione moleculæ diversæ naturæ et operationis.

Ad 3^m *Dist.* Si quis supponat principium materiale in atomo sensu peripatetico, *conc.*; secus, *nego*. Sensu enim recentiorum principium materiale corporis sunt atomi, principium materiale atomorum nullum est, nullumque principium formale. Est enim atomus substantia incomposita, cui talis et non alia figura debetur vel quia eam natura sua postulat, vel quia eam a Creatore præfinitam habet.

Dist. rationem additam: extensio per se dicit indifferentiam ad quamcunque figuram; nempe extensio in abstracto, *conc.*; extensio a certæ atomi substantia requisita, aut ipsi determinata a Creatore, *nego*.

104. Opp. III. Ex atomorum mobilitate.

Communicatio motus impossibilis esset, nisi tota atomus impulsæ, eo ipso quo impellitur momento, vim motricem ab impellente communicatam illico reciperet. Atqui hoc supponit, atomum motum informari principio simplici, quod singulis ejus partibus insit.

Prob. major. Nulla materiæ pars assignari posset, quæ primo instanti celeritatem reciperet, cæteris deinde partibus communicandam. Materia enim est sine fine divisibilis.

Prob. minor. 1^o Principium simplex, cum veram unitatem extenso communicet, hoc facit idoneum ut unico instanti motum recipiat, tanquam unum subjectum.

2^o Vis motrix est inextensa per se et extensibilis solum per accidens. Ergo directe et primo recipi tantummodo potest in subjecto, quod sit inextensum per se, et extensum per accidens. Hoc autem est forma substantialis.

105. Resp. *Omitto majorem: nego minorem.*

Ad prob. major. *Nego suppositum*, quod nempe quum de atomo agitur sit assignanda aliqua pars, quæ primo celeritatem recipiat; quodque sint partes, quibus motus communicari debeat. In continuo nullæ sunt partes actu distinctæ; proinde nulla est pars quæ primo recipiat motum, nulla que fit a parte ad partem motus communicatio, sed tota atomus momento indivisibili determinationem recipit ad motum.

106. Ad 1^m prob. min. *Nego iterum suppositum* idem, quod extensum continuum, quia tale est, sit incapax recipiendi unico instanti motum. Cujus rei si vere incapax esset, capacitatem hanc a principio simplici recipere non posset: non enim ex eo quod principium simplex extenso insit, extensum fit inextensum. Aliunde vero, non principium illud simplex motum reciperet, sed ipsum extensum. Si qua igitur ex motus communicatione exurgeret difficultas, hæc in hypothesi quoque adversariorum integra permaneret.

Ad 2^m *Omitto ant.*, et animadverto vim motricem, sive hæc per se, sive per accidens extensa sit, si vis materialis est, esse certe extensam formaliter.

Nego consequentiam, idque ex pluribus capitibus.

107. 1^o Quia in ipsa adversariorum opinione forma substantialis, quæ est inextensa per se, recipitur in materia quæ est extensa per se. Et anima, quæ nullo modo est extensa, in corpore extenso recipitur. Argumentum igitur falso nititur principio.

2^o Hinc non agitur de extensione per se aut per accidens, sed de extensione formali aut virtuali. Nam difficultas deducitur a materiæ extensione formali. Atqui falsum est formam atomi materialem, si qua esset, formali extensione posse carere; ut supra demonstratum est. Ergo neque ipsa recipere motum posset.

3^o Novum est quod asseritur: in composito ex materia et forma motum recipi primo in forma, secundo in materia; quasi vero quoad actus ac passiones forma materialis et materia distinguerentur, et non efficerent unum per se.

4^o Quum hominis corpus motum ab extrinseco recipit, quid est quod directe et primo motum recipit? Sane anima, juxta hanc opinionem: nam anima est forma corporis, eaque vere simplex et inextensa. Ergo ex impulsu primo et directe impellitur anima, secundo et indirecte corpus. Hoc certe scholastici non docuerunt; imo potius contrarium.

108. Opp. IV. 1^o Sententia, quæ statuit atomos in composito actu permanere, non explicat mutationem totalem proprietatum compositi. Etenim proprietates omnes viresque compositi diversæ omnino sunt a proprietatibus componentium; quæ idcirco a chimicis *neutralizari* dicuntur. Atqui impossibile est, sub proprietatibus ac viribus specificè diversis eandem permanere substantiam: proprietates enim e substantia resultant.

2^o Si atomi actu manent in mixto, compenetratio admitenda est, quæ naturaliter est impossibilis. Etenim in aqua vr. gr. nullum est punctum in quo sit solum oxygenium vel solum hydrogenium, sed in quovis puncto utcumque exiguo est aquæ particula.

3^o In hac sententia explicari nequit mutatio substantiæ non viventis in corpus vivens, seu plantæ seu animalis.

109. Resp. *Nego ant.*

Ad 1^m jam supra responsum est (73, 75). In composito non est eadem substantia quæ est in singulis componentibus; sed sunt utriusque componentis substantiæ conjunctæ, ita ut ex utriusque componentis proprietatibus proprietates compositi conflentur. Itaque proprietatum *neutralizatio* est potius con-

sectarium atomicae theoriae. Quantam vero difficultatem creet adverso systemati, supra notatum est (85).

Ad 2^m *Neg. ant. et dist. rat. add.*: Nullum est punctum sensibile in quo utrumque elementum non invenitur, *conc.*; nullum est punctum absolute, *nego*. Qua ratione oppositum probari poterit, cum certum sit, in corporibus, etiam maximae densitatis, esse innumerabilia spatiola, in quibus nullum est ponderabile elementum? Si itaque in aqua v. gr. licet nullum sit sensibile vacuum, multa tamen sunt intervalla in quibus neque oxygenium est neque hydrogenium, eritne mirandum esse aliquod in ea spatiolum quod ab oxygenio occupetur, et non ab hydrogenio?

Ad 3^m *Negatur* transitum substantiae non viventis in viventem explicari non posse in nostra sententia. Imo quae ad vitam pertinent, multo clarius et intelligibilius in communi sententia explicantur, quam in systemate peripatetico, aut in quovis systemate affini, ut suis locis videbimus.

110. Opp. V. Qui atomos incompositas tuentur, pluribus iisque gravibus, urgentur incommodis. Nam

1^o Perimunt intrinsecum discrimen inter substantiam corpoream et spiritualement, nam utramque quoad essentiam faciunt simplicem.

2^o Ponunt activitatem atomi procedere ab eodem principio, a quo manat extensio: atque hoc pacto statuunt materiam ex se activam esse. Hoc autem repugnat. Si enim materia ex se activa ponitur, jam nulla esset ratio cur vitae quoque ac sensus principium esse non posset.

3^o Assignant ut corporum constitutiva corpora quaedam minora; in quo 1^o similes sunt iis qui quaerenti quanam sint domus constitutiva, responderent esse parvas domos; 2^o aberrant a proposita quaestione: non enim quaerimus prima quantitatis elementa; sed constitutiva essentiae quantitate praeditae.

111. Resp. *Neg. ant.* Nam si quod grave in his incommodum est, illud premit potius adversariorum humeros.

Ad 1^m *Nego* in nostra doctrina perimi intrinsecum discrimen inter corpoream spiritualementque substantiam. Ad *rat. add. nego suppositum*: videlicet discrimen hoc carentia com-

positionis ex binis realitatibus contineri. Essentiale enim discrimen utriusque est in hoc, quod corpus est essentialiter extensum, etiam in suis ultimis elementis, adeoque incapax per se sensus, multoque magis intellectus: spiritus vero est essentialiter immunis a quantitate, idemque sensu praeditus et intellectu.

112. Hinc *retorqueo argumentum*. Adversarii enim vere tollunt discrimen illud praecipuum, quod inter spiritum ac formas materiales, praesertim corporum inanimatorum, peripatetici veteres unanimiter admittebant; quod nempe spiritus ita sit simplex quoad essentiam, ut extensione formali careat, ac proinde sit totus in toto corpore quod informat, et totus in singulis ejus partibus; formae vero materiales sint quidem simplices quoad essentiam, sed tamen in subjecto extensione formali afficiantur, ac proinde non sint totae in singulis subjecti partibus totalitate quantitatis. Adversarii autem hoc discrimen tollunt, ut supra vidimus (89, 3^o).

113. Ad 2^m Ponimus activitatem atomi procedere ab eodem principio a quo manat extensio, *transeat*. Non enim ponimus haec duo *procedere* ab atomi substantia; sed dicimus eam substantiam his duabus proprietatibus esse essentialiter praeditam.

Subdunt: *Statuimus per hoc materiam ex se activam esse*. De qua *materia* est hic sermo? An de materia intellecta ad mentem eorum quos objectio aggreditur? Non videtur. Nam juxta nos materia est corpus, vel corporis elementum atomus. Sed talem materiam ex se activam esse adversarii negare non possunt; nam ipsi quoque admittunt substantiam corpoream, et atomos activitate esse praeditas ex se, nempe ex ipsa sua essentia, ex suis intrinsecis constitutivis. Si vero materiae nomine intelligunt materiam primam, quam nos non agnoscimus, objectio nos non impetit.

Praeterea quam *activitatem* memorant? An activitatem propriam corporis, et quae cum extensione consistere potest? Sed hac admissa, quomodo exinde consequetur, corpus esse capax ex se *vitalis*, quae praeter essentialia corporis, organismum postulat, aut *sensus*, qui praeter corpus requirit ani-

mam? Si vero activitatis nomine activitatem omnem intelligunt, nescio quos adversarios aggrediantur. Certe nos non dicimus, corpus ex se omnis activitatis capax esse.

114. Itaque ad omnes hasce ambiguitates dissipandas, respondeo : *dist.* 2^m *partem majoris* : statuimus materiam ex se activam esse : nempe materiam primam, aut aliquid illi simile, *nego suppositum* ; atomos, *subd.* ; statuimus atomos esse activas ex se, activitate quæ cum extensione sociari possit, *conc.* ; activitate omnigena, *nego*.

Eodemque pacto, *dist. min. et rat. add.*

115. *Retorqueo* deinde iterum *argumentum*. Etenim adversarii non quidem materiæ primæ elementorum, sed eorum formis extensionem formalem demunt, eamque iis tribuunt unitatem, ut vere nulla amplius sit ratio cur sensus principia esse nequeant : eoque magis quod in ipsorum doctrina sensus principium forma materialis est.

116. Ad 3^m resp. totum *argumentum* niti in æquivocatione hujus vocis : *corpus*, Quum enim quæri dicuntur corporum constitutiva, corporum nomine intelligimus, aliquid non modo extensum, sed etiam compositum ex multis partibus ad sensum distinctis et separabilibus, itemque aliquid non modo vi resistendi præditum, sed cæteris etiam qualitatibus sensibilibus. Quum vero dicuntur atomi esse corpora, corporum nomine intelligimus substantiam incompositam, extensione ac vi resistendi præditam. Quum igitur corpus primo sensu accipitur, atomi non sunt corpora ; quum sensu accipitur altero, id quod ex atomis componitur non est corpus, sed compositum ex corporibus.

117. Sed omissis vocibus, veniamus ad rem. Assignamus ut corporum constitutiva corpora quædam minora : *dist.* : nempe ejusmodi corpora, quæ habeant eas proprietates, ratione quarum quærentur corporum constitutiva, *nego* ; corpora quæ has proprietates non participant, *conc.* Proprietates videlicet quæ nos movent ad quærenda corporum constitutiva, non sunt certe extensio continua conjuncta cum resistendi vi, quibus proprietatibus atomi instructæ sunt, sed, ut a principio monuimus (5), 1^o corporum manifesta

compositio, 2^o mutationes unius corporis in aliud, quod qualitates sensibiles a primi qualitatibus diversas præ se fert. Hæ autem binæ proprietates non sunt in atomis ; imo diserte negamus eas proprietates iis inesse. Igitur atomi non incongrue assignantur ut corporum constitutiva.

Nec mirum est essentielles corporum proprietates extensionem ac resistendi vim, etiam in atomis inveniri. Mirum enim non est, extensum compositum constare incompositis extensis : et necessarium est, compositum resistens ex elementis resistentibus coalescere.

118. Ex his patet, nullum pondus habere paritates adductas. Qui enim v. gr. assignaret parvas domos ut domus constitutiva, stulte loqueretur, quia componentia ab eo assignata univoce convenirent cum composito, eaque omnia haberent, ratione quorum compositi constitutiva quærentur. At non stulte, sed sapienter loqueretur, si diceret, domus constitutiva esse lapides et cæmenta, quanquam lapides et cæmenta aliquas cum domo proprietates communes habeant.

119. Nec a proposita questione aberramus. Quæstio enim proposita duplex est : 1^a quam omnes proponunt : *quænam sint corporum sensibilibus constitutiva*. Cui respondemus cum chemicis, esse atomos. 2^a quam quidam proponunt philosophi : *quænam sint constitutiva atomorum*. Cui respondemus, constitutiva atomorum nulla esse, nec quoad essentiam, nec quoad quantitatem. Quod si quis quæreret, duabus hisce quæstionibus confusis : *quænam sint constitutiva essentiae quantitate præditæ*, responderemus, distinguendo quæstionem utramque : si sermo est de quantitate composita corporum, sunt atomi ; si sermo est de quantitate continua atomorum, nulla sunt.

120. Opp. VI. Systemati atomorum incompositarum præferendum est systema quod atomos materia ac forma constare docet. Nam

1^o Qui systema illud primum sectantur, fateri tandem aliquando coguntur, se intimam corporis primitivi essentiam ignorare ; ac propterea nihil explicant, et problema metaphysicum non solvunt.

2^o Hæc vero ignorantia professio latam scepticismo aperit viam. Nam v. gr. eodem pacto dicere licebit: anima humana est substantia, quæ se manifestat cogitatione et voluntate, sed cujus illa naturæ sit, nescio.

3^o Qui sic agit universam diruit metaphysicam, cujus finis est ut rerum essentias detegat.

4^o E contrario qui alterum systema propugnant, essentiam corporis explicant; nam essentialia ejus constitutiva assignant.

5^o Imo doctrina hæc compositionis substantialis ex materia ac forma, omnia explicat, regnam minerale, vegetale, animale, ipsasque formas separatas; estque vere universi philosophici ædificii fundamentum.

121. Resp. *Neg. ant.*

Tres primæ probationes fundantur in falsa quadam interpretatione verborum. Quum enim dicimus, nos intimam atomorum essentiam ignorare, eamque solum ex ejus sensibilibus manifestationibus cognoscere, sermo nobis est de cognitione *intuitiva*, quam profecto nemo sibi arrogat, si forte eos excipias, qui Absoluti cognitionem sibi vindicant. Non est itaque nobis sermo, nec esse potest de ea cognitione quæ homini possibilis est, quæque, ut in Ontologia explicavimus (O. 46), constat ex conceptibus quibusdam indeterminatis, entis, realitatis, principii, aliisque hujusmodi, atque ideis sensibilibus proprietatum. Hanc enim cognitionem et assequi possumus, et assequi pro viribus contendimus. Neque alia est cognitio corporeæ essentia, quam adversarii nacti sunt. Quare si qua ignorantia hac in re laboramus, ea nobis est cum iisdem communis. Nos enim atomi essentiam ita describimus: *substantiam extensione geometrica et vi resistendi præditam*. Illi vero: *substantiam coalescentem ex duabus realitatibus, quarum altera est principium extensionis, altera vis*. Inter quas binas descriptiones totum discrimen hoc est, quod partem definitionis indeterminatam nos simplicem ponimus; illi vere compositam ex duabus aliis indeterminatis; seu brevius, quod in una definitione una tantum est incognita, in altera incognita binæ sunt.

122. Hinc patet responsio ad 1^m Fatemur nos ignorare intimam primitivi corporis essentiam, i. e. carere intuitiva ejus cognitione, *conc.*; carere ea cognitione quam philosophus quærere debet, aut eam contemnere, *nego*. Hinc *nego consequens*.

Per hæc patet responsio ad 2^m et 3^m.

Ad 4^m. *Nego* in adversariorum sententia explicari corporis essentiam: hoc patet ex dictis; atque adeo ex ratione quæ subjicitur. Hoc ipso enim quod sententia hæc constitutiva atomorum assignat, et constitutiva talia, a veritate aberrat.

Ad 4^m. *Nego* per materiam et formam explicari regnum minerale, ut jam vidimus, aut regnum vegetale ut suo loco videbimus. *Concedo* libenter materiae ac formæ conceptus a veteribus traditos, vitæ animali optime applicari, ut alibi demonstrabitur. Materia vero et forma atomica nihil explicat, imo plura implicat; maxime si materiae ac formæ nomine principia illa duo extensionis et activitatis intelligantur.

CAPUT IV.

* QUOMODO EX ATOMIS CORPORA CONSTENT.

ARTICULUS I.

Notanda quædam.

123. Attractionis viribus atomos simul coalescere et corpora componere, certum omnibus est. Cujus illustratio doctrinæ ad physicas pertinet disciplinas. Duo tantummodo nobis animadvertenda sunt.

Primum spectat ad attractiones ac repulsiones, quæ inter atomos vel corpora exercentur. De quibus hoc ut certum haberi debet, nullam in iis esse posse actionem in distans. Neque hanc profecto physici requirunt. Inter quos communis modo sententia est, attractiones ac repulsiones fieri mediante fluido elastico imponderabili, quod ætherem vocant. Ac juxta opinionem valde probabilem, atomi, idemque dicendum de corporibus, quod ad effectum attinet, ita se habent ad invicem, ac si elastica quadam spirali connecteren-

tur; quæ si compressione coarctetur, atomi sibi mutuo appropriant, si vero expansione producat, a se invicem recedunt. In qua hypothesi, ut vides, nullæ necessario supponendæ sunt in atomis attractivæ ac repulsivæ vires propriæ dictæ. Sufficit enim earum vis resistendi cum potentia passiva ad motum recipiendum (1).

124. Notandum alterum pertinet ad crystallorum figuras. Docent physici, ad has explicandas satis esse attractionis vires, posita molecularum integrantium regulari figura. Etenim quum sunt ejusmodi adjuncta ut molecule integrantes secundum propria attractionis centra se libere attrahere possint, tunc altera ad alteram ita appellit, ut faciem faciei vel latus lateri applicet; ex quo necessario sequitur ordinata multitudinis dispositio, atque ex ea regularis totius massæ figura.

125. Molecularum autem integrantium regularem semper figuram esse, id primo ex observatione deducitur. Pulvis enim eorum quoque mineralium, quæ amorphæ sunt, si microscopio inspicitur, regulares ut plurimum figuras exhibet. Unde concludere possumus, ultimas moleculas regulares semper esse.

Hoc idem a priori ostenditur. Nam integrantes moleculæ vel compositæ sunt, vel incompositæ. Si integrantes moleculæ compositæ sunt, demonstrat mathesis, regularem earum figuram necessarium effectum esse æquilibrii inter attractivas repulsivasque vires atomorum easdem moleculas constituentium. Si enim constituentes atomi non se symmetricè disponent in molecula, vires attractivæ ac repulsivæ se mutuo elidere non possent; id quod ad æquilibrium requiritur (2). Si vero integrantes moleculæ sunt incompositæ, cujusmodi sunt in substantiis simplicibus, facile erit demonstrare, has quoque, imo has in primis regulari figurâ circumscribi,

(1) Confer Belli. *Riflessioni sulla legge d'ell'azione molecolare*. Milano 1853, p. 26 et alibi. — Cantoni. *Relazioni tra alcune proprietà termiche ed altre proprietà fisiche de' corpi*. Pavia 1862, p. 3, 43. — Poncelet. *Mécanique industrielle*, p. I. § 157.

(2) Cf. Amedei Avogadro opus, cui titulus: *Fisica de' corpi ponderabili*. T. I. Lib. II, sez. II. c. IV.

cum sint immediatum sapientissimi Creatoris opus, ut alia omittam. Putant multi Wollastonum sequentes, primitivas atomos globularis esse figuræ.

Quod si non raro corpora irregularem figuram sortiuntur, id mirum esse non debet. Si enim adjuncta non sinunt, ut attractio molecularis libere ac pacate exerceatur, et gravitatis vis prævalet, necesse est ut moleculæ altera super alteram temere ac festinanter ruant; ex quæ confusa commixtione regularis figura oriri nequit.

ARTICULUS II.

De crystallorum genesi quæstio.

126. Hæc quæ communis habet sententia, satis clara sunt, et cuique se probant. Objicitur tamen, ad crystallorum genesis explicandam aliquod aliud principium, seu vim, seu formam, necessarium videri, quo principio vires moleculares regantur, eleventur, et ad hunc determinatum effectum ordinantur. Aiunt enim:

1° Attractio cum sit eadem in omnibus corporibus, non explicat diversos crystallorum typos, ad quas unaquæque substantia pro sua natura tendit; cumque sit infinite varia pro adjunctorum diversitate, constantium typorum causa esse nequit.

2° Quædam substantiæ possunt duas diversas figuras induere et ad diversos typos pertinentes. Quæ aptitudo (dymorphismus) non potest a sola attractione repeti.

3° Quædam substantiæ fusibiles maxime ac vaporabiles, sub globuli forma coagulari incipiunt antequam polyedricam figuram assumant; id quod aliquam cum viventium genesi analogiam præfert.

4° Nonnulla afferunt quæ observantur in genesi crystallorum, si unus aut plures anguli detruncantur; illudque præsertim, quod si regulare aluminis octahedrum uno angulo mulctetur, ac dein in liquido collocetur ita, ut faciei quam cæsura effecit, incumbat, crescente crystallo formatur in opposito angulo facies illi similis, cæteris angulis manentibus acutis.

Ex quibus concludunt, necesse esse ut vim aliquam superioris ordinis in corporeis substantiis agnoscamus, quæ inferiores vires attractivas sibi subordinet, et ad effectum suæ propriæ naturæ consentaneum coordinet.

127. Respondebimus primo ad hæc quæ obijciuntur; ac dein de proposita hypothesi judicabimus.

Resp. itaque ad 1^m molecularem in primis attractionem in omnibus corporibus eandem profecto non esse: major est enim in quibusdam, minor in aliis, ut physici demonstrant. Sed hoc omisso, certe integrantium molecularum figura in diversis corporibus eadem non est. Hæc enim ex figura, numero, ac dispositione constituentium atomorum dependet; quæ omnia in diversis substantiis diversa sunt, ut chimia docet. Posita autem diversa figura in diversis moleculis integrantibus, varii crystallorum typi illico explicantur.

Variatur item attractio, seu potius attractionis effectus, pro adjunctorum diversitate: at variantur etiam in eadem substantia figuræ crystallinæ, ut aiunt, secundariæ. Quæ nihilo minus omnes si dymorphas substantias excipias, de quibus mox, ad eundem semper typum reducantur; quia molecularum integrantium forma eadem semper manet. Hæc omnia matheseos subsidiis a priori demonstrantur; ac vere nulla est in iis difficultas.

128. Ad 2^m Resp. 1^o *inversione argumenti*. Si substantiarum moleculæ conjunguntur vi superioris principii, quod juxta propriam naturam eas ordinat, cur manente hoc principio, moleculæ non semper eodem modo disponuntur? Manere autem hoc principium dicendum est, quousque eadem manet substantia; maxime si principio illi nomen tribuatur ac munus substantialis formæ. Patet igitur, in adversariorum hypothesi dymorphismum inexplicabilem esse: aut certe quidquid ipsi respondebunt, et nos potiori jure respondebimus.

Resp. 2^o *Negando* dymorphismum a sola attractione repeti non posse, posita molecularum integrantium regulari figura. Sufficit enim, si moleculæ integrantes unius ejusdemque substantiæ diversis temporibus diversas figuras accipere

possint. Quis porro negaverit, atomos unius ejusdemque moleculæ constituentes sub diversis adjunctis diversimode disponi posse? Variata siquidem una aut altera virium, quæ atomos sollicitant, mirum non est, variari quoque ordinem quo atomi se petunt atque invicem adhærescunt (1). Est autem certum, dymorphismum non habere locum, nisi in magna adjunctorum varietate, temperiei præsertim.

129. Ad 3^m *Neg. consequentiam*. Hoc ipso enim quod substantiæ illæ valde pronæ sunt ad liquescendum, aut evaporandum, fit ut in exiguis crystallis moleculæ, quæ angulos occupant, facillime, evanescant. Sed aliis atque aliis moleculis accedentibus tandem crystallus polyedricam formam assumit. Possent aliæ quoque hypotheses afferri, quas exponere non vacat.

130. Ad 4^m *Nego* et hic *consequentiam*. Etenim ut alia omittam; idem in alumine contingit, etiamsi inferior angulus non sit dissectus. Facile enim anguli in facies planas mutantur, præsertim horizontales, probabiliter gravitatis causa.

Cætera facta quæ adducuntur, nullam habent difficultatem.

Liquet ex dictis, non probari, ad crystallorum genesim explicandam, præter attractivas vires, aliquam aliam seu vim seu formam requiri. Ut hoc melius intelligatur, eandem hypothesim aliquantulum adhuc perpendemus.

131. PROPOSITIO. *Rejicienda est opinio, quæ crystallorum genesim repetit a vi quadam simplici superioris ordinis, seu a forma substantiali peripatetica, quæ vires moleculares regat, ac sibi subordinet, et ad determinatum effectum concurrere faciat.*

Ut varias formas quas hæc hypothesis accipere potest complectamur, ea tripliciter potest intelligi:

1^o quod unaquæque molecula materia ac forma constet, juxta opinionem, quam supra consideravimus (80); quodque præterea sit in toto corpore forma hæc, de qua agimus, quæ moleculas corporis universas moderetur ac regat, tota existens in toto corpore, ac tota in singulis ejus partibus.

(1) Cf. Aut. cit. l. c.

2° quod in crystallorum formatione, quum molecule conjunguntur, unaquæque molecula suam formam substantialem amittat, ac singulis formis molecularibus nova forma totius succedat, quæ crystalli figuram determinet.

3° quod ad crystallum efformandam, eliminata quacunque nova forma, solæ formæ moleculeares sufficere existimentur.

Dico igitur, quocunque modo hæc hypothesis intelligatur, non solum eam esse inutilem, ut modo demonstratum est, sed etiam intrinsicis quibusdam, iisque non levibus, laborare defectibus.

132. Sane si 1° modo intelligatur,

a) in primis vis illa moderatrix nihil habet cum forma materiali commune; ac proinde immerito tali nomine donatur.

b) Eadem vis, si forma materialis dicitur, non producit a Deo per creationem, sed ab agente aliquo naturali educitur ex materia, videlicet ex atomorum multitudine. Atqui repugnat e subjecto extenso et multiplici educi, eique inhærere formam simplicem, et quantitate carentem. Quod enim ex multiplici subjecto educitur, et in multiplici subjecto recipitur, necessario multiplex est.

c) Ad hæc: sumatur v. gr. crystallus cubica salis communis: est in ea, juxta adversarios, ipsamque pervadit vis hæc tota in tota existens, et tota in singulis partibus. Dividatur jam cubus in partes duas. Necessario dicendum, vim hanc, et ipsam, bifariam dividi: nisi velis dicere, divisa corpora unica forma unoque esse constare. At quomodo fieri potest, ut quod quantitate caret, bifariam dividatur?

d) Quandonam hæc vis, hæc forma e materia educitur, aut a quo agente, aut quomodo educitur? Quum molecule sunt dispersæ, hæc vis certe non existit; secus ea esset aliquid per se subsistens. Educitur itaque ex moleculis, quum molecule conjunguntur. Ergo vero non dicam, incredibile plane esse, ut contactus molecularum vim hanc mirabilem gignat; sed arripiam id unum, quod ex ejusmodi positione sponte consequitur: conjungi moleculas sine hujus vis influxu; ac

propterea ad crystallorum genesim, arcanam hanc virtutem nullatenus requiri.

133. Si 2° modo intelligatur,

a) inauditum est formas partium expelli a forma totius, quæ ipsis homogenea sit. Formæ enim expelluntur a subjecto, juxta peripateticos, ut locum dent formæ alicui diversæ, non ut dent locum formæ ejusdem essentiæ.

b) Hæc forma erit simplex et sine quantitate formali, quia tota est in singulis crystalli partibus et nihilominus erit divisibilis, ut supra dictum est (132, c); quæ duo componi simul non possunt.

c) Educitur eadem ad molecularum contactum. A quo autem agente? Nemo hoc edicere poterit.

134. Si demum tertius modus assumatur, hoc cæteris incredibilior videtur. Nam

a) Forma atomica ponitur dirigere ac moderari attractivas vires, ad crystallum una cum cæteris moleculis efformandam. Jam attractiva vis, qua aliqua molecula movetur, non est vis molecule attractæ, sed aliarum molecularum. Forma autem uniuscujusque molecule moderari utique poterit vim, qua eadem molecula alias trahit, non autem vires qua aliæ molecule ipsam trahunt. Sed ego enimvero nescio, in quo moderamen hoc propriæ attractionis consistere possit. Forte in eo erit, quod forma, ut bonus auriga, modo attractionem comprimat, modo relaxet, modo ad hanc partem convertat, modo ad illam, prouti in variis adjunctis requirit finis, nempe crystalli formatio. Quis autem hæc serio cogitare poterit? quis invenietur qui formæ materiali vim hanc discretivam atque intelligentem attribuat?

b) Etiam si unaquæque forma vim suæ molecule hoc pacto moderari posset, non obtineretur effectus, nisi formæ molecularum omnium inter se conspirarent, maxime in crystallizationis initio, et propemodum ex conducto operarentur. Hoc quoque quis dabit?

c) Formæ istæ vires attractivas moderari dicuntur ita, ut crystalli figura prodeat earum naturæ proportionata. At si præscindas a figura molecularum, et a conditionibus requi-

sitis ad virium æquilibrium (134; 124), quomodo exigere potest singularum molecularum natura, ut ex pluribus moleculis tot et non aliæ consociantur, et eo consociantur ordine qui requiritur ad hanc potius quam aliam figuram efformandam? Ratio itaque quæ assignatur est prorsus insufficiens.

Ex his omnibus patet quod propositum est. Concludendum proinde cum communi sententia, crystallos secundum necessarias attractionis leges gigni, neque ad hunc finem vim aliam quamcunque necessariam esse, aut admitti posse.

CAPUT V.

* DE CORPORUM PROPRIETATIBUS.

ARTICULUS I.

Enumeratio ac divisio.

135. Sequitur ut de corporum proprietatibus disseramus. In qua pariter quæstione, ut in ea quæ præcessit, non pauca sunt veteres inter ac recentiores dissidia.

Proprietates omnes corporum ad quantitatem et qualitatem veteres revocabant. Duo hæc accidentia corporum ab iis appellabantur, non ratione variabilitatis et contingentiae; nam nec quantitas, nec qualitates multæ corporum sunt in iis variabiles; sed quia et quantitas et qualitas habebantur ut formæ seu actus ab essentia dimanantes (O. 171).

Idem veteres figuram, seu formam externam ut quantitatis qualitatem spectabant (O. 176): cæteras autem qualitates in *primas* ac *secundas* partiebantur.

Qualitates primas hasce quatuor esse docebant; *calorem*, *frigus*, *humiditatem*, *siccitatem*; quas idcirco primas nuncupabant, quia eas rerum elementis naturaliter deberi, nullamque aliam qualitatem præsupponere opinabantur.

Cæteras corporum qualitates secundas vocabant, quia eas a primis dimanare censebant, vel mixtione, vel accidentali productione. In his vero distinguebant qualitates *sensibiles* ab *occultis* seu *specificis*. Sensibiles nuncupabant eas quæ sensu percipiuntur, ejusmodi sunt colores, sapor, gravitas, raritas ac densitas, aliæque hujusmodi. Occultas vero nomina-

bant varias illas virtutes, quibus res instructæ sunt ad diversos effectus producendos, ut vis qua magnes ferrum attrahit, viresque propriæ alimentorum, medicaminum ac venenorum, aliæque id genus.

136. Cartesius, Lockius, eorumque asseclæ qualitates *primas* appellarunt eas solum, quæ a geometrica extensione necessario dimanant; ejusmodi sunt figura, mobilitas, situs ac textura partium, et similes; *secundas* vero, qualitates sensibiles; quanquam hæc juxta eorum sententiam proprie non sint corporum qualitates a primis distinctæ, sed animi tantummodo modificationes, ortæ ex motibus atque impulsibus, quibus materiales particulæ organa nostra percellunt. His addit Lockius qualitates *tertias*, nempe potentias, quibus corpora in aliis corporibus mutationes quasdam producant: quæ pariter potentiæ a primis qualitatibus reipsa non distinguuntur.

137. Ex principiis supra constitutis (59; 98 1^o) manifestum est, non extensionem solum geometricam proprietatem corporum essentialem esse, sed etiam resistendi vim. Hinc corporum proprietates cæteræ tam ex hac, quam ex illa desumendæ sunt; aliæ enim ab hac, aliæ ab illa, aliæ ab utraque dependent. Proprietates item hujusmodi aliæ generales sunt omnium corporum, aliæ speciales et non ad omnia pertinentes. Demum a proprietatibus immutabilibus qualitates mutabiles et contingentes distinguendæ sunt.

138. Proprietates porro corporum *generales* ex omnium consensu sunt: 1^o *figurabilitas*, quia cum extensio infinita esse nequeat, certis quibusdam limitibus contineatur oportet; 2^o *mobilitas*, quæ proprietas est corporis prouti aliis coexistit, quatenus relationes loci quas ad illa habet mutare potest; 3^o *divisibilitas*; 4^o *porositas*; 5^o *impenetrabilitas*, qua fit ut locus a corpore occupatus ab alio simul corpore occupari nequeat; 6^o *facultas movendi alia corpora per impulsu*; 7^o *virtutes attractivæ ac repulsivæ*, ac potentiæ passivæ iis respondentibus: ad has revocatur *gravitas*; 8^o *inertia*, i. e. carentia principii intrinseci determinantis ad agendum; qua fit ut vires omnes corporum determinatione extrinsecus accepta

indigeant, nec per se statum quem corpus obtinet, mutare possint; 9^o *vis*, ut aiunt, *inertiæ*, (O. 180. 4^o) qua corpus unumquodque, quantum in se est, in statu quietis vel motus perseverat; ex quo fit ut vi externæ, quæ ipsum ad statum alterum determinare aggrediatur, resistantiam atque obicem opponat.

139. *Speciales* diversorum corporum proprietates, quamvis et ipsæ in essentialibus ac generalibus materiæ proprietatibus radicem habeant, non tamen ab iis tantummodo dimanant, sed insuper ab integrantium molecularum magnitudine, figura, situ, positione. Secus in omnibus corporibus essent eadem.

Sunt autem speciales proprietates: 1^o *pondus specificum*; 2^o *durities, elasticitas, ductilitas*, aliæque corporum dispositiones istis affines, nec non earum oppositæ: 3^o *chimicæ affinitates*; 4^o *varia ad caloricum capacitas*; 5^o *dispositiones ad hos vel illos colores* sub lucis actione diversimode recipiendos; 6^o *vires* denique *omnes* quibus vel in nostros sensus, vel in cætera corpora agere possunt, quarum quidem effectus sunt prorsus innumerabiles. Sed de his uberius physicæ disciplinæ.

140. Generales porro corporum proprietates merite *primæ* vocantur, quia ab essentialibus immediate dimanant. Quod si cognitionis ordo consideretur non hæ generales sed specificæ potius, saltem quædam, primæ dicendæ sunt. Usus tamen obtinet apud recentiores, ut generales primæ, specificæ vero secundæ dicantur.

141. Hæ sunt corporum *proprietates*, seu necessario inhærentes qualitates. Qualitates autem *mutabiles* sunt modi diversi, quibus necessariæ istæ proprietates actu determinantur, ac præter essentialiam. Hæ sunt *figura* regularis vel irregularis; *cohesionis diversa ratio*; *motus vel quies*; *diaphaneitas vel opacitas*; *actualis coloratio*; *variationes ponderis et capacitatis ad caloricum*; *varius electricus status*; *caloris gradus*; *status separationis aut combinationis cum aliis*; *actuale potentiarum exercitium*, ad quod reducuntur actiones omnes quas corpora sive in nostris sensibus, sive in aliis corporibus exercent.

Peculiaris de his omnibus ac plena disputatio ad physicam pertinet. Nos, pro instituti nostri ratione, aliquid solummodo disseremus de essentialibus materiæ proprietatibus et de qualitatibus sensibilibus habitudine ad substantiam corpoream.

ARTICULUS II.

De extensione corporum.

142. Quantitas seu extensio, ut alibi innuimus (L. 45. 2^o), alia continua est, alia discreta. Vera porro quantitatis ratio in quantitate continua proprie reperitur: discreta enim quantitas solum est plurium quantitatum, aut etiam, si latius intelligatur, plurium entium multitudo (O. 103. 3^o).

143. Extensum dicimus: *quod partes extra partes habet*. Quid vero sit partes extra partes habere, id varie a variis explicatur.

1^o Multi opinati sunt, hanc partium extensionem esse ipsam partium secundum suas et entitas distinctionem, ita ut una pars substantiæ extra aliam dicatur, quia una non est altera; quemadmodum v. gr. in homine caput non est cervix aut thorax. Hanc vocant extensionem *entitativam*.

2^o Juxta alios partes extra partes in extenso esse dicuntur, non solum quia distinctæ sunt, sed etiam ratione situs, quem obtinent in toto, quatenus ita affectæ sunt ut ordinem aliquem inter se servant, priorque sit ista, posterior illa; et unaquæque cum una aut altera immediate, cum cæteris mediate jungatur. Hæc est extensio *situali per ordinem ad totum* extensum.

3^o Explicant alii propriam extensi rationem per ordinem quem ejus partes habent ad locum, quod videlicet altera sit extra alterius locum. Hi existimant, propriam extensionis corporeæ rationem esse, quod extensi partibus sibi mutuo resistantibus, altera alteram repellat a loco in quo est; quo fit ut naturaliter repugnet alteram cum altera in eodem spatio simul manere. Hæc dici solet extensio *localis*.

144. Hanc autem localem extensionem distinguunt in *aptitudinalem* et *actualem*. Illam constituunt in ipsa naturali exi-

gentia, vi cuius extensi partes diversas spatii partes occupare debeant: hanc vero in actuali hac diversorum locorum occupatione. Illam censent esse propriam corporum extensionem, et ab iis inseparabilem, hanc autem, quæ primæ effectus est, ita esse in corporibus, ut ea possint divinitus privari.

145. Porro ut decernamus quid vero similis habendum sit, notandum est:

1^o Extensionis notionem primitivam esse, ut quæ et sensationum omnium basis est atque elementum, et sensibilibus omnium representationum conditio (L. 457, 461). Hinc proprie definiri non posse, aut clarius explicari quam ab unoquoque percipiatur.

2^o Quum in intimam extensionis realitatem ejusque radicem inquirimus, necessario nos tenebras offendere debere: non enim intueri possumus ipsam corporum essentiam, cum qua extensio intime connectitur.

3^o Aliter loquendum de extensione corporum, quæ ex partibus actualibus consurgit, aliter de extensione continui, in quo partes actuales nullæ sunt.

His præjactis, quid de corporum extensione sentiendum videatur, his quæ sequuntur propositionibus complectimur.

146. PROPOSITIO I. *Extensio corporum propria sita non est in mera partium distinctione.*

Nam in primis hujus sententiæ auctores non modo peripateticis de materia prima doctrinis innituntur, sed etiam supponunt eandem materiam primam ante formæ receptionem nullam ex se entitatem habere, adeoque distinctionis incapacem esse; id quod a multis scholasticorum negabatur. Quare admissis quoque peripateticis principiis, refutari potest.

Multo vero magis rejicienda est, atomicæ doctrinæ dogmatibus receptis. Patet enim, sola atomorum distinctione nec corpora effici, nec corporum extensionem, nisi atomi inter se copulentur.

147. PROPOSITIO II. *Merito veteres docent, extensionem localem actualem nec propriam corporum extensionem esse, nec a corporibus inseparabilem.*

Id enim quicumque catholici sumus, ex venerabili altarium nostrorum mysterio deducamus oportet. Christi enim corpus verum corpus est, et quantitatem quæ corporis propria est et a corpore inseparabilis, continenter retinet; nihilominus in sancta Eucharistia partes corporis Christi non extenduntur in loco, nec diversas loci partes occupant, cum Christi corpus non sit in loco secundum commensurationem propriæ quantitatis, sed secundum dimensiones specierum panis ac vini, totusque sit sub tota harum specierum extensione, ac totus sub qualibet ejus parte. Est igitur certum ex christianæ fidei dogmatibus, extensionem localem actualem propriam corporum extensionem non esse.

148. Nec tamen hoc ita fide tenemus, ut scientiæ quoque principiis ostendi non possit, talem corporis statum nihil habere repugnantiae, ac proinde divina virtute possibilem esse. De hoc alibi.

149. PROPOSITIO III. *Neque in extensione locali quam aptitudinalem dicunt, propria extensionis corporeæ ratio sita est.*

Etenim extensio corporum propria reperiri debet in corpore secundum se et absolute sumpto, non autem in corpore relative spectato. Ergo extensio corporum propria non est in iis per ordinem ad locum. Extensio enim quæ est in ordine ad locum, reducitur ad relationes aliquas ad alia corpora, quæ corpus naturaliter fundamentum præbet.

Ad hæc: qui docent extensionem localem propriam corporum extensionem esse, confundunt partium impenetrabilitatem cum corporis extensione: quæ tamen duo saltem ratione distinguuntur; quia extensio separari mente potest ab impenetrabilitate, ut fit a geometris.

Igitur extensio localis aptitudinalis dimanat quidem ab extensione quæ propria est corporum; sed non est extensio quæ corporibus primo ac per se convenit.

150. Hæc de corporibus. Si vero sermo sit de atomis, multo magis negandum est extensionem earum propriam sitam esse in partium mutua resistentia. Nullæ enim sunt in atomo partes actuales quæ sibi mutuo resistere, atque alia aliam a loco in quo sunt repellere possint.

151. PROPOSITIO IV. *Extensio corporum propria continuata partium serie, videlicet atomorum ordine et connexione continetur.*

Probatum primo exclusionis argumento. Quum enim dicimus, in extenso partes extra partes esse, id tribus modis intelligi potest, ut supra dictum est (145); nempe aut quod una pars non sit alia; aut quod una pars non possit occupare locum quem alia occupat; aut quod partes sint et distinctæ, et ordine quodam connexæ. Sed neque primus, neque alter extensionis modus extensionem corporum constituit. Restat ergo tertius modus.

Præterea huiusmodi extensio est in corpore absolute spectato et secundum se, et extensionem, quæ est per ordinem ad locum, necessario præcedit. Ideo enim substantiæ corporeæ partes partibus loci quodam ordine respondere debent, quia certo quodam modo inter se ordinatæ sunt.

Demum hac una posita, corpus est et divisibile et mensurabile et æqualitatis cum altero vel inæqualitatis capax: quæ quidem sunt primæ quantitatis proprietates.

152. Dices: sine vi resistendi, seu impenetrabilitate, quæ atomorum propria est, non haberetur in corpore ordo et connexio partium; partes enim sine illa se mutuo penetrarent, eundemque occuparent locum.

Respondeo. Hinc sequitur vim resistendi quæ est in atomis, esse causam ultimam quæ connexionem ipsarum efficit, quia attractiones omnes tandem aliquando in impenetrabilitate fundantur (125); itemque esse causam quæ perenniter connexionem conservat ac stabilem facit, ut ratio adducta probat. Non vero sequitur, vim resistendi, multoque minus impenetrabilitatem in ordine ad locum, esse rationem formalem extensionis corporeæ, quemadmodum eorum quos supra refutavimus (149), tenet opinio.

ARTICULUS III.

De extensione continui.

153. Duplici connexionis genere extensi partes copulatas concipere possumus; nempe vel ita ut inter connexarum

extremitates aliquid medium sit, vel ita ut inter easdem mediet nihil. Extensum in quo prima viget connexionis ratio, dicitur *interruptum*; illudque in quo viget altera, *continuum*. Potest autem quod reipsa interruptum est, continuum ad sensum videri: huiusmodi sunt corpora.

Partes quæ in continuo immediate copulantur, vel copulantur contactu extremitatum distinctarum, vel quia extremitates propriæ non habent, sed finis unius est initium alterius. Si primum, partes sunt actu distinctæ, ut sunt atomi corporum; si alterum, partes actu distinctæ non sunt, sed solum distinguibiles, ut in linea geometrica. Atque hæc vere ac propriè *continuitas* nominatur; illa autem prior dicitur *contiguitas*.

154. Ex his hasce definitiones erues. Continuitas est: *connexio partium quarum extrema sunt unum.*

Contiguitas: *connexio partium quarum extrema sunt simul; i. e. se contingunt.*

Continuum: *extensum in quo partium extrema sunt unum;*

Compositum ex contiguis: *extensum in quo partium extrema sunt simul.*

155. Continuum aliud est *permanens*, aliud *successivum*.

Permanens est illud *cujus partes sibi coexistunt*, et dividitur in lineam, superficiem, solidum.

Successivum est illud *cujus partes sibi non coexistunt*: Huiusmodi est motus localis, et omnis mutatio quæ fit in tempore.

156. Partes item in quas continuum divisibile est, aliæ dicuntur *aliquotæ*, aliæ *aliquantæ*, aliæ *proportionales*.

Aliquota pars est, *quæ aliquoties sumpta totum adæquat*; ut sunt palmi in ulna, et quadrantes in hora.

Aliquanta, quæ *non est commensurabilis cum toto*, seu quæ *repetita pluries vel totum excedit, vel ab eo deficit, adæquat nunquam*; ut v. gr. quadratum in area circulari.

Proportionales denique partes sunt, quæ *sunt subdividendo partes semel habitas eadem proportionem qua prior divisio facta est*. Ut quum v. gr. rectangulum bifariam dividis in duo re-

ctangula minora, et unumquodque ex his in duo adhuc minora secas, et ita porro.

137. De continuæ extensionis constitutione ac divisibilitate magna fuit a vetustissimis usque temporibus inter summos philosophos controversia. Zeno stoicorum ille princeps, pluresque cum illo veteres docuerunt, continuum ex indivisibilibus ordine dispositis componi, lineam nempe ex punctis, superficiem ex lineis, solidum ex superficiebus. Hinc continuum non esse ex se in infinitum divisibile; sed elementis constare finitis, quanquam nec humanæ vires divisiones omnes, quarum continuum capax est, explere, nec humani sensus ultima continui puncta attingere possunt. E contrario summi illi Plato et Aristoteles, cum mathematicis omnibus, hanc continui compositionem negant ac pro certo habent, continuum in partes proportionales semper minores sine fine divisibile esse. Quorum sententiam sine dubio amplectendam censemus. Et quoniam in atomis primitivis continuam extensionem realem esse arbitramur, nec desunt inter recentiores qui indefinitam continui divisibilitatem absurdam appellare non dubitent (1), idcirco sententiæ hujus fundamenta exponere opportunum ducimus.

138. PROPOSITIO I. *Continua extensio non componitur ex indivisibilibus, sed integrum quoddam est in partes semper continuas sine fine divisibile.*

Probatur prima pars: 1º argumento superius allato contra Leibnitzium (48). Ut ex. gr. ex punctis exsurgat linea, puncta se tangant oportet. Non possunt autem se tangere secundum sui partem, quia partes non habent. Ergo si se tangunt, secundum se tota se tangunt. Quæ autem secundum se tota se tangunt sunt simul tota, nempe se penetrant, ac proinde continuitatem non efficiunt.

2º Sed fiat sane linea ex punctis. Certe quo plura sunt puncta ordine disposita, eo longior erit linea. Linea ergo

(1) Ex. gr. Hume *Essay* XII. — Galuppi *Lez.* LXXXIV. Jac. quoque Balme (*Fil. fond.*, lib. III, c. XXI, seq.) licet sententiam hanc non dicat *absurdam*, *oppositam* tamen amplectitur.

quatuor punctis constans, longior erit linea punctorum trium; eritque longior ratione unius puncti quo superat alteram. Hoc pacto id quod nullam longitudinem habet, longitudini alterius incrementum affert.

3º Sint duo mobilia, quorum primum moveatur duplo velocius altero; percurrant autem ambo longitudinem tribus punctis constantem. Adversarii profecto negare nequeunt hujusmodi hypothesim possibilem esse. Sed facta hac hypothesi, quid consequitur? Cum eo tempore quo mobile primum datam longitudinem percurrit, mobile alterum ejusdem dimidium percurrat, consequitur, quo tempore mobile primum tria puncta transit, mobile alterum transire unum punctum cum puncti dimidio; quare punctum indivisibile dividetur, id quod prorsus repugnat.


4º Ex duobus circulis concentricis alter altero necessario est major. Nihilominus, si vera est sententia Zenonis, circuli concentrici æquales dicendi sunt. Si enim punctis circuli constant, ii circuli sunt æquales, qui eodem constant punctorum numero. In sententia vero hac, circulus interior eodem numero punctorum constare dicendus est, quo constat exterior. Cum enim a quolibet peripheriæ puncto duci possit radius ad centrum, possum sane concipere a singulis circuli exterioris punctis radios deductos. Sed hi radii omnes in suo ad centrum itinere per aliquod interioris circuli punctum transeant necesse est. Non possunt autem bini radii per idem punctum minoris circuli transire; binæ enim rectæ quæ duo puncta communia habent, non sunt binæ rectæ, sed una. Ergo tot erunt puncta in interiori circulo quot radii ab exteriori ducuntur; tot nempe erunt puncta in uno circulo, quot sunt in altero.

Hinc facile probatur, in hac hypothesi motum circularem impossibilem esse. In motu enim circulari singula quæque radii puncta todidem circulos concentricos describunt. Multaque alia possent afferri, quibus ostenditur, omnes fere geometrarum positiones hac hypothesi subrui. V. Benedictum Pererium Lib. X. *De rerum principiis* (1).

(1) C. XIII.

159. Pars altera propositionis ex prima immediate fluit. Si enim continuum ex indivisibilibus tanquam ex elementis non coalescit, repugnat ipsum in indivisibilia resolvi. Ergo quantumvis divisum concipiatur, partes quæ divisione fiunt, nunquam indivisibiles erunt, sed semper ulterius divisibiles.

160. Placet adhuc conclusionem hanc sequenti confirmare argumento, quod eo vel maxime e multis eligo, quia a quibusdam recentioribus immerito parvipenditur.



Sint binæ parallelæ AD , CN , quas simul connectat perpendicularis CD . Ex puncto A , quod est in parte superiori lineæ AD , duci potest recta ad quodvis punctum partis inferioris lineæ CN : nam inter duo quævis puncta recta duci potest. Unaquæque autem ex hisce rectis transibit per aliquod punctum lineæ finitæ CD .

Jam lineæ CN potest sine fine protrahi; non quod unquam evadere possit infinita, sed certe post quodvis incrementum potest adhuc longius protrahi. Sed rectæ omnes, quæ a puncto A procedunt ad CN , secant necessario CD . Ergo indefinitus rectarum numerus transibit per CD , et quidem ita ut semper omnes contineantur inter puncta C et D ; lineæ enim quæ ab A pergunt ad CN , nunquam pervenire possunt ad punctum D : secus lineæ AN coiret cum AD , ac proinde binæ parallelæ AD , CN in aliquo communi puncto N convenirent; id quod absurdum est. Ergo rectæ numero indefinitæ secantes CD eam semper ita secabunt, ut pars ejus quæ post divisionem superest, ulterius secari possit, quin unquam ad dividendi finem perveniant.

Argumentum igitur habes hujusmodi. Eousque potest subdividi CD , quousque potest protrahi CN . Sed CN potest sine fine protrahi. Ergo CD potest sine fine subdividi.

161. Duo ad hæc regerit Galluppius. 1^o In hoc argumento supponitur recta infinita. Hoc autem est in quæstione; agi-

mus enim de possibilitate infiniti, compositi, quæ includitur in divisibilitate infinita materiæ.

2^o Supponitur quoque extensionem non phænomenon esse sed aliquid reale. Hoc autem in quæstione est (1).

162. Sed facilis erit ad hæc responsio. Ad 1^{am} *Neg.* omnia et singula quæ asseruntur. Falsum est enim, supponi in argumento rectam infinitam actu; tantum enim supponitur nullam esse determinatam rectæ per se longitudinem, sed posse rectam semper augeri; id quod et quantitatis omnis discretæ et omnium dimensionum continui essentialis proprietas est. Falsum quoque, agi in quæstione hac de extensione infinita, aut de numero infinito: aliud est enim tueri indefinitam materiæ divisibilitatem, aliud partes materiæ existimare numero infinitas.

Ad 2^{am} *Neg.* quoque hoc alterum supponi, aut in quæstione versari. Non enim supponitur ab atomistis, atomos esse quantitate continuas, sed probatur. In præsentī vero controversia non agitur de extensionis realitate, sed de extensionis divisibilitate, supposita ejus realitate, seu potius præscindendo ab ejus realitate.

163. Difficiliora multo sunt quæ ab antiquis zenonistis opponerentur, ex quibus præcipua mox afferemus. Interim ex dictis hæc colligemus:

1^o Si continuum constare nequit finito punctorum numero, multo minus ex infinitis punctis coalescere posse.

2^o Partes in continuo esse solum in potentia, non vero actu, ut supra innuimus (155), et infra melius declarabitur.

3^o Quemadmodum essentia extensionis corporeæ in partium actualium ordine et connexione sita est (151), ita essentiam extensionis continui ordine et connexione partium possibilem contineri.

4^o Pleniorē continui definitionem (154) esse: *quod est divisibile in partes semper divisibiles, quarum extrema sunt unum.*

5^o Hæc autem indefinita divisibilitas te minime terrebit, si cogites magnitudinem omnem relativam esse. Propterea

(2) Lez cit.

quum divisio partes dabit quas tu minimas dices, partes illæ revera minimæ non erunt, sed solum admodum parvæ spectato certo quodam termino comparationis, et certa quadam facultate perceptiva. Sed si alium terminum comparationis assumas, aliamque perceptivam facultatem, portiones illæ erunt magnæ, atque adeo maximæ, et commode divisibiles. Et ita deinceps in infinitum. Unde perspicis hanc propositionem : *continuum est in infinitum divisibile*, congruere fere cum illa : *magnitudo omnis relativa est* : quam propositionem nemo negat.

ARTICULUS IV.

Difficultates.

164. Præcipua argumenta quibus Zenonis sectatores sententiam nobis probatam impugnabant, hæc sunt quæ sequuntur.

Obj. I. Si in linea sunt ubique puncta, linea ex punctis componitur. Sed in linea ubique puncta sunt. Etenim linea est ubique divisibilis. Divisio autem fit in puncto.

Resp. *Dist. maj.* : Si in linea sunt ubique puncta quæ immediate sequantur alia puncta, linea ex punctis componitur, *conc.* ; secus, *neg.* Et *contradist. min.*

Ad rationem additam, *dist. maj.* : Linea est ubique divisibilis, ita tamen ut nullæ sint possibiles divisiones in puncto aliquo quod immediate cohæreat ultimo, *conc.* ; secus, *neg.*

Et *dist. min.* : Divisio fit in puncto ; nempe ipsa divisio signat punctum ut terminum binas partes effectas copulantes, *conc.* ; fit divisio in puncto præexistente in linea, *neg.*

Cum ubique linea dividi possit, manifestum quoque est, posse ubique signari terminum, qui sit unius partis finis et alterius initium : atque hic terminus est punctum. Sic igitur in linea inveniuntur puncta. Punctum tamen post punctum invenire non possumus, quia linea semper est divisibilis in lineas, nunquam autem in puncta.

165. Obj. II. Corpus perfecte sphaericum in unico solum puncto planum tangit ; si vero super planum moveatur, lineam describit. Ex his argumentum :

Corpus sphaericum dum in plano movetur, semper planum tangit in unico puncto. Sed successivis hisce tactibus linea describitur. Ergo lineo successivis constat punctis.

Eodem pacto probari potest motu cylindri, planum constare lineis, et motu plani super planum, solidum planis coalescere.

166. Resp. ad argum. *Dist. maj.* : Ita ut tacto plane in uno puncto, dein distincte tangat in altero, *neg.* ; tactu qui est unus numero et continuus, *conc.* *Omissa min. dist. cons.* : Linea constat successivis punctis, si describitur tactibus successive distinctis, *conc.* ; si describitur tactu qui est unus numero et continuus, *neg.*

Ad rem Pererius supra laudatus. « Verum est, corpus » sphaericum, quum tangit planum, tangere in puncta, et » ideo si discrete et disjuncte tangeret planum quum movetur super ipsum, semper tangeret in punctis ; sed quia » movetur continue, tactus illius est unus numero et continuus, idem plane cum motu ipsius : quare tali tactui » et motui qui fit in longum, debet respondere in plano aliquid etiam longum et continuum et indivisibile secundum » latitudinem. Hoc autem non est punctum quia non est » longum : neque puncta quia hæc et sunt multa, et non » sunt continua : respondet igitur linea. Quare tale sphaericum cum non movetur per puncta sed per lineam (1). »

Ratione simili solves quæ addita sunt de cylindro et plano.

167. Obj. III. 1º Quo pacto se habet unitas ad numerum, ita indivisibile ad continuum. Sed numerus componitur unitatibus. Ergo continuum constat ex indivisibilibus.

2º Secus, si omnis continui pars est semper in alias partes divisibilis, unaquæque pars est multitudo partium. Hinc continuum foret multitudo multitudinum, quin unquam ad unitatem deveniri posset.

168. Resp. ad 1^m. *Dist. maj.* : In ratione initii, *conc.* ; in ratione componentis, *neg.* et *concessa min. neg. cons.* Numerus

(1) Op. cit. Lib. X, c. XIV.

quippe, cum quantitas discreta sit, ex rebus indivisis, i. e. unitatibus collectis componi potest. Continuum vero ex indivisibilibus componi nequit, quia indivisibilia non possunt immediate continuari. Tamen indivisibile, cum limes sit, initium est ac finis continui, et in hoc cum unitate convenit.

Ad 2^m. *Dist. ant.*: Unaquæque continui pars est multitudo partium actualium, *neg.*; partium possibilium, *conc.* Hinc *neg. cons.* Etenim continuum ipsum actu est unitas, ac multitudo solum in potentia.

169. Obj. IV. Si continuum esset in infinitum divisibile, pertransiri non posset. Ad hoc enim ut mobile continuum extensionem totam pertranseat, hujus dimidium transeat oportet. Sed etiam dimidium hoc in medietates duas divisibile est. Ergo antequam dimidium hoc pertranseat, dimidii dimidium transire debet, et sic in infinitum. Ast infinita dimidia pertransiri nequeunt. Ergo.

170. Resp. *Neg. ant.* Ad prob. *Dist.* Ut mobile extensionem continuum pertranseat, hujus dimidium transeat oportet nempe dimidium potentia solummodo discretum ab altero dimidio, *conc.*; dimidium actu discretum, *subd.*; si motus non sit continuus, et dimidium a dimidio discernat, *conc.*; secus, *nego.*

Trans. min. et dist. cons. Antequam mobile dimidium pertranseat, dimidii dimidium transire debet in infinitum, quin necesse sit dimidia hæc actu distinguere, *conc.*; ea distinguendo, *subd.*; distinguendo quot distinguere possunt *neg.*; distinguendo quædam interruptione ipsa motus, *conc.*

Assumptum quoque alterum *dist.*: Infinita dimidia pertransiri nequeunt, si distinguere actu debeant, *conc.*; si non debeant actu distinguere, *nego.*

Hæc brevi est celeberrimæ hujus objectionis ab Aristotele tradita solutio (1). Esset impossibilis motus, si mobile motu suo dimidia omnia signare deberet. Tunc enim non inveniret profecto dimidium primo signandum. At longe aliter se res habet. Nam si motus sit continuus, pertransit quidem partes

(1) VII Phys. texto 67.

potentia infinitas, seu potius infinite divisibiles, sed non pertransit partes infinitas actu, et actu distinctas. Non est autem absurdum pertransiri id quod actu finitum est, licet dividi sine fine possit. Si vero mobile motu suo partes actu designet, eo ipso motus continuus non est; non enim fit per continuum ut continuum. Atque hic certe motus pertransit partes actu distinctas, sed non partes infinitas, nec infinite distinctas.

Plura si cupis, apud citatem auctorem reperies (1).

ARTICULUS V.

De continui partibus et terminis.

171. Binæ supersunt adhuc de continuo quæstiones, in quibus valde se veterum omnium exercuit subtilitas; altera de continui partibus, altera de indivisibilium terminorum in continuo realitate. Subjicimus breviter aliquid de utraque.

PROPOSITIO II. *Dici nequit continuum constare partibus actu distinctis, licet non divisis; sive hæc partes numero infinitæ ponantur, sive finitæ.*

Manifesta est in primis hujus opinionis repugnantia, si partes numero infinitæ ponantur. Nam

1^o Repugnat multitudo quævis actu infinita.

2^o Cum sit aut esse possit unum continuum altero majus, existeret infinitum infinito majus.

3^o In hac hypothese vere haberetur multitudo multitudinum, quin unquam perveniretur ad unitatem, quæ multitudo multitudinum non esset (167, 168).

172. Quod si partes dicantur esse finitæ non idcirco minor erit in assertione, quam refutamus, absurditas.

Etenim 1^o partes continui, si ex ipsius continui natura actu distinctæ sunt, finitæ esse nequeunt. Si enim in continuo partes distinctas esse oportet, tot erunt in continuo partes distinctæ, quot essent partes divisæ, si divisio fieret. Atqui si divisio fieret ea nunquam finem haberet. Igitur multitudo partium distinctarum in continuo tanta esset, quanta nullis suc-

(1) Op. cit. c. XII et XIV.

cessivis acceptionibus exhauriri posset; id quod infinitæ multitudinis proprium, si ea existere posset, existimare oporteret (O. 349). Ergo si continuum natura sua partibus actualibus constat, hæ partes non possunt infinitæ non esse.

2^o Præterea quid est quod has partes designat in continuo? Ac si hæ partes finitæ sunt, quid earum numerum præfinit? qua mensura illæ continentur? qua figura constant? Profecto si partes in continuo actuales existunt, eas et quoad numerum, et quoad mensuram, et quoad figuram determinatas esse oportet. Sed hæc partium determinatio ex continui natura non fluit; proindeque sine ulla ratione sufficiente supponenda est.

3^o Denique hæ continui partes suntne continuæ an non? Si continuæ non sunt, puncta sunt, ac recidimus in Zenonis sententiam. Si continuæ sunt, jam et ipsæ partibus constant. Ergo non sunt ultimæ continui partes. Quænam autem erunt ultimæ? Nullæ profecto inveniri poterunt. Dicendum igitur aut continuum constare punctis, aut nullas ex se actuales partes habere.

173. Dices fortasse, continui partes neque finitas numero, neque infinitas esse; nam licet actu distinctæ sint, non sunt tamen divisæ.

Respondeo: si partes in continuo actuales nullæ ponantur, eas esse indefinitas, seu potentia infinitas: at si partes actuales ponantur, hæ necessario vel infinitæ actu vel finitæ, etiam ante divisionem dicendæ sunt. Etenim si partes sunt actu distinctæ, profecto una non est altera, hoc ipso actuali multitudinem constituunt. Multitudo autem actualis vel finita est vel infinita.

174. Neque obest illud: multitudinem unitatibus constare: unum autem esse quod indivisum in se est et divisum ab aliis. Nam in primis, ut in ontologia notavimus (O. 93), id quod unitatem constituit, non est divisio ab aliis, sed indivisio in se. Deinde divisio vel indivisio, quæ in unitatis conceptu reperitur, non separationem, sed actualem distinctionem significat (O. 93, 225). Itaque ubi habetur distinctio unius ab altero, ibi habetur unitatum pluralitas,

seu multitudo; etiamsi quæ distincta sunt, unita sint, atque adeo communi termino copulentur, ut in continui partibus contingit.

175. Concludendum ex dictis, continuum non constare partibus actu distinctis. Hoc ipsum tamen difficultatem non levem habet.

Etenim 1^o Quæ actu non distinguuntur, distingui nunquam actu possunt. Nam quæ actu non distinguuntur, sunt actu idem: idem autem a seipso distinctionem acquirere non potest. At continui partes certe possunt actu distingui. Ergo.

2^o Ea quibus attributiones contradictoriæ vel contrariæ actu conveniunt, actu distinguuntur: hæ namque attributiones in uno eodemque subjecto simul reperiri nequeunt. Jam in continui partibus oppositas attributiones hujusmodi sæpe reperies. Omitto quæ veteres hanc in rem proferebant ex corporum consideratione: corpora enim vere continua non sunt; sed certe ipsis atomorum partibus oppositæ affectiones conveniunt, ut v. gr. alia pars tangatur, puta, ab alia atomo, alia non tangatur, in una sit polus positivæ electricitatis, in alia polus negativæ, et similia.

3^o Si vero aliquæ partes actu distinguuntur in continuo, jam omnes ita distingui dicendæ sunt; nulla enim est ratio cur aliquæ partes actu, aliquæ solum potentia distinguantur.

Sit nihilominus

176. PROPOSITIO III. *In continuo per se partes non distinguuntur nisi potentia; actu vero distingui possunt solummodo ex causis extrinsecis.*

Ratio primæ partis est manifesta ex dictis. Cum enim continuum sit in infinitum divisibile, si continui partes ex ipsa ejus natura distinctæ actu essent, has partes infinitas esse oporteret. Id quod absurdum est, ut modo diximus. Superest igitur ut sint solum potentia distinctæ. Quæ distinctio huc redit, quod quæcunque continui portio designetur, ea pluribus minoribus portionibus æquivalet, quæ in ipsa ordine quodam designari possent.

177. Actu vero hæc portiones designantur per aliquam causam extrinsecam ipsi extensioni: 1^o per divisionem, si ea possibilis est, de quo modo non quæro; vel certe per partium designationem utcunque factam, saltem mente; 2^o per aliquod accidens, extensioni seu substantiæ extensæ superadditum; quum nempe in continuo ponitur aliqua oppositarum affectionum seu relationum diversitas, quæ in infinitum divisibilis non sit, sed in indivisibili consistat. Ut exemplo rem explicem, quando una atomi pars, prouti in 2^a difficultate objiciebatur, polum habet electricitatis positivæ, altera polum negativæ, vel una pars tangitur, altera non tangitur, hæc partes actu distinguuntur, quia harum affectionum limites certos terminos cuique parti attribuunt. Simili modo si parallelepipedum v. gr. motu oscillatorio circa proprium gravitatis centrum moveatur, hic ipse motus binas partes in eo distinguit: pariterque si mobile aliquod ita super continuum moveatur, ut non totum emetiatur, et in eo quiescat, quiete hac designat, terminum quemdam et extensionis, quam percurrit, et extensionis, quam non percurrit, atque hoc pacto distinctionem actualem binarum partium efficit. Idem dicito de similibus.

178. Dixi vero hanc partium distinctionem non effici, quando affectionum quarumcunque diversitas est in infinitum divisibilis. Tunc enim affectio hæc ipsa continui naturam participat, nullasque habet actuales partes. V. gr. in atomo pyramidali quæcunque partes assumantur, heterogeneitatem habent magnitudinis; quia quo propius accedunt ad basim latiores sunt, et quo propius accedunt ad verticem sunt arctiores. Atque idcirco hæc heterogeneitas distinctionem determinatarum partium nullam facit. Idemque dicendum de continuo sphaeræ motu circa suum axem, deque aliis hujusmodi.

Patet itaque, quomodo partes in continuo actuales nullæ sint ex ipsa continui natura; aliunde vero fieri in ipso aut designari queant.

179. Ad 1^m quod in contrarium objicitur, sic respondere possumus. Quæ actu non distinguuntur, nunquam distingui

actu possunt: *dist. ant.* : per se, et si eandem actualitatem retineant, *conc.*; aliquo alio accedente, quo actualitatem mutant, *nego*.

Ad probat. Quæ actu non distinguuntur sunt actu idem: *dist.*: Ita tamen ut quandoque potentia sint plura, ut est continuum ex ipsa sui natura, *conc.*; secus, *nego*.

Simili modo *dist. rat. add.* : Idem a seipso distinctionem acquirere non potest, nempe si sit idem actu et non æquivalens pluribus potentia distinctis, *conc.*; si idem sit actu et æquivalens pluribus potentia distinctis, *nego*.

Minorem vero: i. e. continui partes possunt actu distingui, *contradist. juxta dist. antecedentis*.

Continuum itaque, ut diximus, ita est actu unum, ut tamen æquivalet pluribus quæ potentia continet. Quamdiu autem hanc servat actualitatem certe in plura non distinguitur. At potest actualitatem mutare, ita nempe ut cesset esse unum actu, et vicissim incipiant esse actu partes, illi unitati æquivalentes. Tunc quod erat unum, distinctionem acquirere.

Quid ad 2^m ac 3^m reponendum sit, patet ex modo dictis.

180. Objicitur adhuc, actuales in continuo partes a causis solum extrinsecis effici non posse.

Nam 1^o si hanc distinctionem efficere debent tangendo unam partem, alteram non tangendo, quomodo tangere poterunt id quod actu non est?

2^o Dicendum esset, partem tangendam ipso contactu produci; id quod absurdum est.

3^o Si unicum existeret corpus continuum, et prorsus homogeneum, juxta nostram sententiam, nullæ essent in ipso actuales partes. Ergone vertex hujus corporis idem erit ac basis, et superficies idem ac centrum?

4^o Si continuum ex se partes non habet, dici nequit extensum. Nam in extenso sunt partes extra partes.

181. Resp. *Nego. ant.*

Ad 1^m *Dist.* : Tangi nequit id quod actu non est aliqua realitas, sed est realitas solum in potentia, *conc.*; id quod actu est aliqua realitas, et non est actu distinctum in toto ad

quod pertinet, *nego*. In nostra doctrina pars tangenda haberet actu suam realitatem in realitate continui; non tamen esset actu pars, quia continui realitas ex se nullis distinguitur partitionibus.

Ad 2^m *Dist.*: Dicendum esset ipso contactu produci realitatem partis tangendæ, *nego*; produci ejus distinctionem ab alia comparte, *conc.* Est eadem æquivocatio ac supra.

Ad 3^m *Conc. ant.*; *Neg. cons.* Vertex, basis et superficies continui non sunt partes ipsius, sed termini seu limites. Nemo autem negavit unquam, continuum ex sui natura diversis terminis actualibus circumscribi. At ex hoc non sequitur continuum ex se in partes actuales esse distinctum. Centrum vero non est nisi limes idealis intersectionis radiorum. Ac proinde signari actu centrum nequit, nisi partes actuales designentur ductu radiorum.

Ad 4^m *Nego. ant.* Ad rat. add. *Dist.*: In extenso sunt partes extra partes; i. e. partes actuales vel possibiles, *conc.*; partes necessario actuales, *nego*. Supra jam monuimus (163, 3^o). quemadmodum extensionis interruptæ seu discretæ extensio in partium actualium ordine et connexionem sita est, ita extensum continuum ordine et connexionem partium possibilium, in quas dividi potest, contineri.

182. Quæstio altera est de continui terminis. Hi sunt *punctum*, terminus lineæ; *linea*, terminus superficiei; et *superficies*, terminus solidi. De his autem tria quæri possunt; 1^o an sint extra mentem in corporibus; 2^o an sint in corporibus aliquid positivi; 3^o an inter se realiter distinguantur. De his multa veteres; sufficit nobis brevissime innuere quid sentiendum videatur.

183. Quoad 1^m itaque certum est, 1^o indivisibilia esse aliquid extra mentem, non tamen ita ut continuum tanquam partes constituent (158), sed ita ut ipsum continuum terminent, aut ejus partes designatas copulent. Nam linea v. gr. vere terminum habet quo finitur, et quo contingere aliam lineam possit: pariterque sicubi linea in duas distinguitur, hæ partes vere adhuc copulantur. Id autem quo linea finitur, et quo lineæ partes copulantur, est punctum. Eodemque

pacto vere sunt extra mentem tam lineæ, quam superficies sive terminantes, sive copulantes.

2^o Certum est item, nisi cum idealistis sentias, lineam et superficiem esse rationes quasdam seu dimensiones reales corporum, secundum quas corpora inter se comparari solent.

184. Quoad 2^m dicendum indivisibilia, quatenus termini sunt magnitudinis, non esse aliquid positivi, sed meras privationes; nempe negationes in subjecto apto ad oppositum (0. 362). Quid enim aliud est v. gr. punctum in concreto, nisi linea quatenus tanta est, et ultra non protenditur? Qui vero punctum ut positivum aliquid concipiunt, rem ponunt omnino superfluum. Nam sine hac entitula, linea adhuc terminata remanet. Idem dicas de cæteris indivisibilibus, respectu eorum quæ finiunt aut copulant: videlicet superficies non est aliud quam limes solidi, et linea non aliud quam limes superficiei.

185. Quoad 3^m denique, lineam et superficiem, prouti sunt reales corporum dimensiones, a soliditate (corporeitatem veteres appellabant) re non distingui.

» Extra animam, (ita Pererius hanc referens sententiam, » quam dein amplectitur,) non est alia res quæ sit magnitudo, nisi corporeitas, quæ habet in se rationem longitudinis, latitudinis, et profunditatis. Et quoniam hæ tres » rationes dimensionum sic se habent, ut conceptus unius » non includat conceptum alterius..... et quia nonnullæ » passionibus demonstrantur de corpore ratione latitudinis et » profunditatis, ob has causas intellectus has tres dimensiones vel rationes corporeæ magnitudinis distinxit in tres » species, easque nominavit lineam, superficiem et corpus (1). »

ARTICULUS VI.

De vi resistendi et impenetrabilitate.

186. Resistendi vis quæ corporibus inest, ab eorundem extensione, saltem ratione, distinguitur, ut supra dictum est.

(1) *De princ.* Lib. X, c. V.

Et quoniam vim hanc per proprium ejus effectum solummodo cognoscimus, idcirco eam ab hoc effectu denominamus ac definimus. Definiri autem potest hæc vis et in ordine ad corpus in quo est, et in ordine ad locum. In ordine ad corpus definitur: *vis qua corpus impedit, ne propriæ extensioni aliud quodcunque corpus suam extensionem commisceat.* In ordine ad locum: *vis qua corpus impedit, ne locus quem occupat, ab alio corpore occupetur, se prius non expulso.*

187. Quemadmodum autem extensio corporis in ordine ad locum consequitur extensionem in ordine ad se, ita vis resistendi altero modo considerata a prima dimanat. Utraque porro *impenetrabilitatem* producit; tamen et veterum et recentiorum usu receptum est, ut impenetrabilitatis nomine veniat effectus vis resistendi considerata in ordine ad locum; quia hic primo concipitur, et præterea ab impenetrabilitate in ordine ad ipsum corpus nunquam sejungitur, saltem naturaliter.

188. Animadvertendum est nihilominus, impenetrabilitatem in ordine ad se solius corporis esse propriam, quia solum corpus formalem extensionem habet; impenetrabilitatem vero in ordine ad locum per se quidem, et ad modum naturalis proprietatis, convenire corporibus; posse tamen etiam spiritibus convenire, non quatenus ipsi sint natura impenetrabiles, possunt enim spiritus penetrare omnia, ac proinde penetrari; sed quatenus possint, si velint, impedire, ne corpus aliquod locum subeat quem ipsi occupant. Hæc proinde spirituum impenetrabilitas non est necessaria proprietatis, sed contingens et libera.

Virtute præterea divina fieri potest ut resistendi vis, quam corpora exercent in ordine ad locum, aliquo in loco exeratur, quin vel ullum corpus, vel aliud agens quodcunque resistat.

189. Hæc quæ subdimus, facile intelliges.

1° Penetrabilitatem esse quemdam modum se habendi in loco, quo fit ut substantia permittat, locum quem ipsa occupat, ab alia simul substantia occupari.

2° Impenetrabilitatem, ut de extensione locali dictum est

(144), aliam esse *aptitudinalem*, aliam *actualem*. Illa proprie est *vis naturalis resistendi, quæ, quantum ex se est, penetrationem excludit*; hæc est *insuperabilitas vis resistendi respectu vis alterius, quæ actu in locum a corpore occupatum penetrare aggrediatur.*

3° Impenetrabilitatem ex sui natura *mutuam* esse, penetrabilitatem vero posse esse *non mutuam*. Videlicet quidquid est impenetrabile contra aliud impenetrabile tale est, non vero contra id quod est penetrabile; hoc enim etiam ab impenetrabilibus penetrari potest, vel etiam, si in eo hæc virtus vigeat, potest impenetrabilia penetrare.

4° Impenetrabilitatem esse atomorum propriam; corporum vero impenetrabilitatem aliam non esse, quam impenetrabilitatem atomorum.

5° Hanc atomorum impenetrabilitatem, æque ac eorum extensionem, continuam esse et mente indefinite divisibilem, partesque ex se habentem solummodo in potentia.

190. PROPOSITIO IV. *Actualis impenetrabilitas, etiam quoad locum, est corpori naturalis.*

Corpora ita penetrationi resistere, ut actu semper impenetrabilia sint, id perpetua nos docet experientia. Hinc atomos natura sua impenetrabiles esse existimandum est (144, 4°). Neque ulla excogitari potest ratio, quæ vel demonstret, vel etiam probabiliter suadeat, esse in corporea natura vim aliquam, qua fiat ut atomi aliquando se invicem penetrent. Nunquam enim ad explicandas chemicas combinationes aut aliud quodcunque phænomenum, hypothesis isthæc necessaria est.

Hæc intra naturæ ordinem omnino certa sunt. Quid vero præter naturæ ordinem divina virtute fieri possit, alibi docuimus.

ARTICULUS VII.

De corporum activitate.

191. Quoniam omnis corporum activitas cum vi resistendi coheret, admonet nos ipse locus, ut de ea quædam adnotemus. Et corpora quidem activitate prædita esse, alibi probatum est (O. 281, seq). Physicorum autem est ostendere, cujusmodi hæc activitas sit. Ex quorum placitis plena indu-

ctione probatis, colligere possumus, primigeniam corporum activitatem sub hisce tribus formis exeri: 1^o ut simplicem *resistentiam* ad penetrationem impediendam; 2^o ut *impulsum*, quo unum corpus alterum ad motum determinat; 3^o ut *reactionem* qua corpus reluctatur impulsui alterius, ne e statu quem obtinet deturbetur. Porro de primo actionis modo jam diximus, itaque pauca de altero ac tertio; ac dein aliquid de activitatis corporeæ effectibus subjiciemus.

192. PROPOSITIO V. *Unum corpus alterum impellere nequit, nisi ipsum quoque ab alio sit impulsus.*

Nam corpus non potest alterum impellere, nisi ad ipsum accesserit. Neque hoc sufficit; sed necesse est præterea, ut corpus impellens, in eo ipso quod ad alterum accedit, ipsumque tangit, sit actu determinatum, aut sollicitatum ad motum. Secus nulla ratio esset, cur corpus alterum loco exturbaret. Sed nullum corpus seipsum ad motum determinare aut sollicitare valet. Ergo ut unum corpus alterum impellat, necesse est ut aliunde ad motum urgeatur.

193. Hinc sequitur 1^o vim repulsivam, quæcunque illa sit, a vi resistendi aliquo modo distingui. Nam quamvis concedamus vim repulsivam a vi resistendi promanare, non tamen sola vi resistendi posita, hoc ipso vis habetur repulsiva. Vis enim repulsiva impulsu aliquo activo exercetur. Impulsus autem activus, præter resistendi vim, impulsus passivum ab impellente receptum supponit.

2^o Cum pressio sit impulsus quidam molecularum unius corporis in corporis alterius moleculas, idipsum de pressione dicendum quod de impulsu.

3^o Motus corporum in nullo corpore principium primum habere potuit. Hinc primum movens non est corpus.

194. Objicies, planetas attrahi a sole, qui tamen non movetur: itemque corpus elasticum in terram projectum resilire: terram ad eum repellendum ullo egere impulsu.

Resp. ad 1^{am} *negando* solem nullatenus moveri. Movetur enim motu duplici, rotatorio nempe circa proprium axem, atque etiam translative, ut recentioribus astronomis compertum est. Hic porro motus fluido imponderabili commu-

nificatur, ac per ipsum corporibus. Obscurum certe adhuc est quomodo phænomena attractionis producantur. Sed si problema non est omnino solutum, habemus nihilominus ea quibus solvi possit.

Ad 2^{am}. In corporum elasticorum collisione moleculæ corporis impulsæ primo quidem cedunt pressioni ab impellente exercitæ; sed dein se in pristinam positionem restitunt, ac tunc impellens repellunt. Cur autem moleculæ elastici corporis se in pristinam positionem restitunt? Profecto quia ipsæ quoque repelluntur.

195. PROPOSITIO VI. *Nulla exercetur actio unius corporis in alterum, sine reactione æquali et contraria.*

1^o Nulla est actio sine reactione.

Etenim corpus, v. gr. *A*, agit in corpus *B*, ipsum tangendo atque impellendo. Si corpus *B* penetrari posset, profecto corpus *A* per ipsum impune ac sine ulla resistentia trajiceret, quemadmodum si versaretur in vacuo; nullaque in hac hypothese daretur actio corporis *A* in *B*. At quoniam corpus *B* impenetrabile est, resistit adversus *A*, viresque exerit necessarias ad hoc, ut penetratio impediatur. Sed penetratio impedi nequit, nisi repellendo ipsum *A*. Hæc vero repulsio est reactio, videlicet actio patientis in agens. Ergo nulla est corporum actio sine reactione.

2^o Reactio est actioni æqualis.

Nam vis qua corpus in conflictu penetrationi resistit, tanta est quanta ad effectum requiritur. Si igitur corpus *A* urgeatur in *B* vi ut duo, *B* repellat *A* vi ut duo, ac vicissim ab *A* eadem vi repellatur.

3^o Reactio est actioni contraria.

Ratio est, quia directio vis penetrationem impediens, semper esse debet ejusmodi, ut corporum penetratio quam promptissime arceatur: secus aliquantulo tempore penetratio fieret. Ergo vis impediens directio directioni vis impellentis e diametro opposita sit oportet (1).

196. Ex his deduces impenetrabilitati in primis deberi:

(1) Cf. Euleri opusculum: *Recherches sur l'origine des forces*. Exstat in *Hist. de l'Acad. royale*. — Berlin, a. 1750.

1^o Communicationem motus. Nam si corpora penetrabilia essent, corpus *A* v. gr. impetens corpus *B*, per medium ipsum transiret, atque *B* maneret immotum. Sed quoniam impenetrabilia sunt, neutrum potest in alterius locum penetrare, nisi alterutrum loco cedat. Utrumque porro corpus determinationem habet ad occupandum locum eundem; corpus quidem *B* ex æquilibrio virium, quibus afficitur independentem ab *A*, et corpus *A* ex velocitate qua fertur ad mutandum jugiter in ea directione locum. Sed accedente *A* ad *B*, æquilibrio tollitur, et *B* determinatur ad cedendum loco, videlicet ad motum.

2^o Deberi quoque impenetrabilitati mutationem omnem, quæ in uno corpore vi alterius corporis inducitur. Nam omnis mutatio corporum ad aliquem motum reducitur, sive ad motum translativum, sive ad molecularem, sive ad motum materiæ ponderabilis, sive ad motum materiæ imponderabilis.

197. PROPOSITIO VII. *Vis omnis corporea nullam novam realitatem producere potest; sed solum præexistentium substantiarum immutare statum.*

Ratio in promptu est. Vires omnes corporeæ agunt per contactum, earumque actio omnis ad resistantiam, ad impulsus, ad reactionem reducitur. Sed vis quæ agit per contactum, supponit præexistens subjectum; ac rursus resistantia, impulsus, reactio nihil aliud possunt, nisi ut motum vel cieant vel destruant. Motus autem vel quies nec sunt novæ realitates, nec novas realitates gignere queunt, sed sunt solummodo status diversi substantiarum. Ergo.

Nihilominus, ut alibi notatum est (41, 3^o), vires quædam corporeæ, hoc ipso quod motum molecularum excitant, substantiarum diversarum syntheses atque analyses perficiunt; atque hoc pacto novas substantias compositas producunt.

CAPUT VI.

DE QUALITATUM CORPOREARUM HABITUDINE AD SUBSTANTIAM.

ARTICULUS I.

Quomodo qualitates sensibiles sint in corporibus.

198. Postulat doctrinæ ordo, ut postquam de corporibus eorumque affectionibus egimus, de mutua harum ad illa habitudine aliquid disputemus. Qua de re hæc quatuor consideranda veniunt: 1^o quomodo qualitates sensibiles sint in corporibus; 2^o quomodo a corporea substantia diversæ ejus affectiones dimanent; 3^o quo pacto ab ea distinguantur; 4^o quanta sit earumdem dependentia a substantia.

199. Quod ad primum attinet; nulla de hoc erat quæstio apud scholasticos: hi enim idipsum sentiebant de corporeis qualitativis, quod vulgus hominum semper existimavit, atque hodie existimat, esse nempe illas in corporibus absolute id quod sensibus apparent. Addebant peripatetici qualitates easdem esse formas accidentales corporum, quæ sui similitudinem in sensibus nostris imprimerent, per species quasdam ad eosdem transmissas.

200. Opinionem hanc impugnavit primo Cartesius; cujus hæc sententia fuit: nos clare percipere corporum magnitudinem, figuram ac cæteras primas qualitates; sensationes item nostras subjective spectatas clare nos distincteque percipere; at qualitates sensibiles objective spectatas obscure cognoscere, ita ut per solam perceptionem scire nequeamus, quid sit quod coloris v. gr. nomine significamus. Porro qualitates istas reipsa ad primas corporum qualitates reduci; nihilque aliud esse quam motus minimarum particularum, quo diversæ sensationes in nobis pro figuræ, magnitudinis ac duritiei, qua particulæ illæ instructæ sunt, varietate excitantur. Cum Cartesio ejusque assensu, Lockius quoque et Leibnitzius, quod ad rei summam attinet, consensere; deinceps fere omnes.

201. Patet ex his, quæstionem non esse de sensationibus ut sunt subjecti sentientis affectiones; nemo enim profecto quærit an affectio subjecti sentientis sit in objecto. Sed ver-

satur tota hæc questio solum circa qualitates *objective spectatas*, et uti sunt in corporibus; de his nempe quæritur, an sint idipsum quod in repræsentatione sensibili nobis apparent. Quare quæstio hæc et immerito contemnitur, et minus dextere solvitur a Buffiero (1) et Reidio (2); qui eam in pura æquivocatione sitam esse, et ex idiomatum imperfectione ortam existimant; quia nempe eadem voce, puta *caloris* tam sensum quem nos experimur, quam id quod sensum hujusmodi provocat, significare solemus.

202. Quo in judicio duo sunt reprehensione digna: 1^o ignorantia elenchi: satis enim clare Cartesius expresserat (3), qua de re loqueretur; nec difficulter id per se intelligi poterat; 2^o vocabulorum interpretatio: est enim falsum, voces quibus sensibiles qualitates significamus, v. gr. *colorem*, *sonum*, *dulcedinem*, et cæteras ejusmodi, significare ex æquo et subjecti sensum, et objecti qualitatem. Nam revera objecti solummodo qualitatem significant. Sic dicimus hunc vel illum in corpore *esse colorem*, ac in nobis *esse coloris visionem*; tubam *spargere sonum*, ac nos *sonum audire*, mel *esse dulce*, ac nos *dulcedinem gustare*. Nunquam vero dicentem audies, se habere sonum aut colorem, quia sonum audit coloremve perspicit; neminemque reperies qui manum, qua durum corpus contrectat, duram dicat, aut pares quæ odore percelluntur, odoratas prædicet. Quæ tamen locutiones omnes usu perpetuo tritæ forent, si vocibus de quibus agimus, utraque significatio et objectiva et subjectiva attributa fuisset. Quod si voces illas *colorem* et *frigus*, et quæ cum his conjugatæ sunt, etiam subjecto sentienti applicamus, id sua ratione non vacat; revera enim calor ab uno corpore ad aliud communicatur: quare uti calor est in igne, ita calor

(1) *Seconde logique*, art. XVII.

(2) *Essay* XII, c. XVII.

(3) « Ut autem id quod clarum est ab eo quod obscurum distinguamus, diligentissime est advertendum, dolorem quidem et colorem, et reliqua ejusmodi clare et distincte percipi, quum tantummodo ut *sensus sive cogitationes* spectantur: quum autem *res quædam* esse judicantur extra mentem nostram existentes, a nullo plane modo posse intelligi quænam res sint. » *Principior. Phil.* p. II, §68. Cf. quæ sequuntur.

per membra serpit, atque ego calorem recipio, fio calidus, sum calidus. Nihilominus cum meo calore est præterea conjunctus calor sensus; at quum hunc sensum ego directe exprimere intendo, sola calor voce non utor, sed dico v. gr. me sentire calorem, calore suffocari et similia.

Patet igitur, nullam esse æquivocationem in his vocibus, nullamque sermonis imperfectionem, quemadmodum auctores citati asserunt: ex quo deduces periculose semper a philosopho hoc suscipi negotium, ut humanum sermonem corrigat in iis quæ ad interna facta pertinent (L. 677).

203. Cæterum in eo quod citati philosophi Malebranchium reprehendunt, non omnino immerito eum castigant. Primo quidem quia Malebranchius in hanc quæstionem non modicam confusionem intulit, quum de vulgi opinione ita loquitur ac si ad objecta proprias sensationes homines transferrent (1). Quæ vox *sensatio*, ut notum est, tum subjecti sentientis actum, tum etiam per analogiam repræsentationem sensibilem apud philosophos significat, quæ duo Malebranchius non distinxit. Secundo jure reprehenditur hic auctor, quia, hac doctrina et hac æquivocatione abusus est ad idealistarum dubia confirmanda. Ad quem refellendum responsio Buffieri et Reidii opportunissima est, eaque ipsa nos in logica usi sumus (L. 486).

204. Jam ut ad rem ipsam deveniamus, non difficulter, puto, suadebimus assertiones sequentes.

PROPOSITIO I. *Negari nequit qualitates sensibiles absolute spectatas a sensili repræsentatione, qua eæ nobis exhibentur, dissimiles esse.*

Quum dico qualitates sensibiles absolute spectatas, intelligo qualitates easdem uti sunt in se, præcisione facta ab actione, quam in organa sentientis exercent, seu uti a puro spiritu, qui corpora cognosceret, intelligerentur. Hanc porro assertionem physici demonstrant. Ipsi enim docent *colores* esse motus vibratorios ætheris; colores autem diversorum corporum motus vibratorios ætheris in corporibus existentis, qui circumstanti ætheri communicantur; *calorem* quoque

(1) Cf. Opus malebranchianum. *Recherche de la vérité*, liv. VI, p. II, ch. II.

hoc ipso ætheris vibratorio motu contineri; *sonos* in se esse motus vibratorios medii, in corpore vero sonoro motus vibratorios molecularum qui medio communicantur; *odores* esse particulas corporum in aere dispersas, quæ aptitudo inest ad membranas sensitivi corporis vellicandas; *sapores* aptitudinem corporum ad organicas papillas movendas; *duritiem, mollitiem*, cæterasque tactiles qualitates sitas esse in majori vel minori corporis resistentia ab aggregatione diversa molecularum dependente.

Jam hæc omnia in sensibili qualitatuum representatione non exhibentur, sed eorum loco quædam quæ percipi utique possunt, sed nullatenus definiri aut declarari. Ergo.

205. PROPOSITIO II. *Est similitudo inter qualitates sensibiles absolute spectatas, et materialem impressionem quam in organis causant.*

Id manifestum est in iis qualitatibus, quæ agunt per motum medii, sive imponderabilis, sive ponderabilis. Hic enim motus ipse organis communicatur. Hoc pacto motus ætheris luminosi retinam immutat, ut apparet ex coloribus, qui in ipsa adamussim exprimuntur; ita caloricum in corpore sensitivo est materialiter idipsum quod in corpore quocunque: pariterque motus vibratorius aeris transit ad membranas tympani ac foraminis ovalis, dein ad humorem aqueum labyrinthi, ac tandem ad nervos acusticos.

Eæ vero qualitates quæ motum non includunt, sed contactu materiæ ponderabilis exercentur, uti sunt odores, sapores et qualitates omnes tactiles, calore excepto ejusque privatione, quæ frigus est, hæc inquam qualitates cum impressionibus quas efficiunt in organis eam certe similitudinem habent, quæ inter causam et effectum necessario reperitur (O. 265).

206. PROPOSITIO III. *Representatio sensilis conformis est qualitatibus sensibilibus, non absolute, sed relative spectatis, nempe ut agunt in subjecto sentiente.*

Hoc jam ostendimus in logica contra scepticos (L. 500. 4^o; 505); nunc autem eos impetimus, qui opinati sunt arbitrario fere constitutum ab auctore naturæ, ut certis corporum

qualitatibus certæ quædam responderent sensiles representationes, quin ulla inter has et illas naturalis connexio intercederet. Ita sensit Lockius (1). Contra quem scite Leibnitzius animadvertit: non esse Deo tribuendum quod sine ordine ac ratione agat. Aliunde effectum suæ causæ semper respondere (2). Cæterum in eam sententiam incidit Lockius, eo quod vires corporum actionesque ab iis exercitas non satis attendit, sed motum in iis solummodo particularum minimarum consideravit. Representatio autem sensilis secundum eas maxime vires ac secundum earum impressionem in sensu exercitam, objecta nobis offert. Unde colores v. gr. non sunt simpliciter representationes vibrationum ætheris, sed representationes earum vibrationum, prouti in ipsis ac per ipsas æther retinam percellit.

207. In eo vero quod Lockius objicit, dolorem quem ex punctura acus sentimus, nullam habere similitudinem cum motu acus carnem penetrantis, nulla prorsus est paritas. Dolor enim non est sensatio representativa acus ejusque motus, sed effectus. Sensatio autem representativa acus est sensatio tactus, qua figuram et acumen acus, et progressivus ejus motus intra carnem exhibentur. Et hæc sensatio suo objecto conformis est modo supradicto.

ARTICULUS II.

Quomodo corporum qualitates a substantia dimanent.

208. Venio ad quæstionem alteram supra propositam. Vetus erat sententia accidentia corporum physica et intrinseca (O. 171, 2^o), quæ sunt quantitas et qualitas, vel dimanare a subjecto per naturalem quamdam, ut aiebant, resultantiam, quemadmodum v. gr. quantitas, vel per actionem aliquam qua subjectum immutetur, ut lumen.

Cartesius, ut supra diximus, opinatus est extensionem esse ipsam corporum essentiam; Lockius primariam qualitatem; uterque statuit qualitates corporum omnes a magnitudine, figura, motuque particularum dependere. Recentiores

(1) *Essay on the human mind*. II, chap. VIII, § 15.

(2) *Nouveaux essais sur l'entend. humain*, liv. II, § 14, 16.

vero atomistæ hanc doctrinam rejiciunt. Quis enim putet, sola extensione explicari posse impenetrabilitatem ac physicum motum corporum, attractionem, caloricum, electricitatem, magnetismum? Videsuperius dicta (59-62). Sumo igitur tanquam certum, qualitates omnes secundarias, tam necessarias quam variabiles, a substantia corporea procedere, mediante extensione et vi saltem resistendi quæ ejusdem substantiæ essentialia attributa sunt. Quæstio est tantummodo de modo, quo memoratæ qualitates ab his duabus procedunt; itemque quo pacto binæ istæ essentialia proprietates a substantia dimanant.

209. PROPOSITIO IV. *Qualitates omnes corporeæ, sive necessariæ illæ sint, sive variabiles, ab extensione ac vi resistendi dimanant, vel absolute vel posita conditione.*

Hoc loco dimanationis nomine intelligo consequentiam quamdam essendi, saltem secundum conceptus nostros, sive absolute sive hypothetice necessariam. Dimanatio hujusmodi, quod ad qualitates corporeas attinet, triplex est: 1º per meram resultantiam; 2º per resultantiam posita aliqua actione; 3º per resultantiam posito aliquo termino.

210. 1º Dimanatio *per meram resultantiam* habetur, quum ex duobus quæ distincte concipiuntur, unum ponitur in ordine realitatis hoc ipso quod ponitur alterum. Ita ab extensione dimanant *figurabilitas*, quia cum extensio infinita esse nequeat, certis limitibus contineatur oportet; *divisibilitas* et *inertia*: quod enim partes extra partes habet, nusquam sibi identicum est, ac proinde seipsum determinare ad actum non potest. Eodem modo a vi resistendi dimanant *impenetrabilitas*, ac *vis inertiae*, ut supra ostensum est (187, 193); et ab extensione simul ac vi resistendi *mobilitas* et *facultas motrix per impulsu*m. Idem dicendum de plerisque *generalibus proprietatibus* (138), viribus attractivis ac repulsivis exceptis.

2º Resultare dicimus *aliqua actione posita* eas qualitates, quas corpus possidere incipit non vi solum essentialium proprietatum, sed præterea eo quod immutetur partium numerus, vel partium situs, vel status corporis, activitate sive interna corporis quod mutatur, sive externa.

Hoc pacto *figura* corporum consequitur dispositionem molecularum, quæ fit earumdem molecularum viribus; ac variatur per additionem, detractionem, vel etiam transpositionem partium ab externa aliqua vi effectam, aut per status mutationem, quum v. gr. solidum in liquidum transit. Hæc eadem *statuum diversitas*, seu *cohesionis diversa ratio* actionem majorem vel minorem caloricam consequitur. Pariter posita actione, quæ ponderabiles moleculas intra imponderabile fluidum constituit, *attractive* ac *repulsive virtutes* emergunt; positaque actione, quæ magnitudinem, figuram ac situm molecularum determinavit, *proprietas corporum speciales* (139) illico resultant. *Combinationis item aut separationis status* affinitatum chemicarum exercitio debetur.

211. Huc quoque spectat *motus* et *quies* corporum. Quies enim sequitur actionem, qua totum corpus ad certum locum occupandum determinatur; motus sequitur actionem, qua corpus determinatur ad cedendum loco.

Lux porro et *caloricum, electricitas* et *magnetismus* juxta recentiorum doctrinam nihil aliud sunt quam unius ejusdemque substantiæ modificationes, per motum diversimode transformatum (1). Patet ergo, phænomena hæc omnia resultare media aliqua actione, quæ unam aut alteram motus speciem inducat, aut unam in alteram transformet.

212. Dixi 3º qualitates quasdam resultare ex essentialibus corporis proprietatibus, *posito aliquo termino*. Ad quod intelligendum notare sedulo debes quod alibi de relationibus (O. 204) et de mutationibus agentes (O. 384, 5º) animadvertimus, videlicet relationes acquiri vel amitti, quin ulla in subjecto mutatio intrinseca fiat; sufficit enim tantummodo, si subjectum suis ornatum proprietatibus terminum nanciscatur, ad quem per illas aliquo modo referatur.

Hoc igitur pacto *actuales corporum actiones* ex essentialibus, generalibus ac specificis eorumdem qualitatibus resultant. Næmpe corpora agere dicuntur, quotiescunque ponitur terminus, qui per ejusmodi qualitates immutetur. Ita

(1) Cf. opusculum cl. P. Secchi, S. J. *Sulla correlazione delle forze fisiche*. Roma 1858.

unum corpus ad alterum accedens, vel totum ipsum determinat ad motum translaticium, vel ejus moleculas ad motum intestinum; ita lux opaca corpora colorat, et qualitates sensiles sensationem gignunt, et unum corpus alterius qualitates, aut statum immutat; quia nempe activis passiva applicantur.

213. PROPOSITIO V. *Extensio corporum prodit ab extensione ac vi resistendi atomorum per resultantiam.*

Liquet ex supra dictis. Extensio localis resultat posito termino (212); extensio vero in ordine ad ipsum corpus, posita actione virium cohæisionis et affinitatis (151, 125).

Utrum vero et quomodo, extensio ipsarum atomorum ac vis resistendi, quæ in ipsis est, a substantia dimanet, hoc pendet a quæstione sequenti.

ARTICULUS III.

De distinctione accidentis corporei a substantia.

214. Licet nunc ad arduas illas quæstiones de accidentium a substantia distinctione ac dependentia, quas in ontologia proposuimus (O. 172), quantum ad corpora inorganica pertinet, animum advertere. Primo itaque quæritur, an accidentia, physica corporum realiter a substantia distinguantur.

Notabis autem 1º sermonem nunc esse de iis accidentibus, quæ intrinsecus substantiam corpoream afficiunt, sive necessario eam afficiant sive contingenter. Hæc enim accidentia physica dicuntur (O. 171, 2º, 172 ad 1º).

2º Quæstionem propositam huc redire; utrum accidens corporeum, secundum entitatem quam actu in corpore habet spectatum, sit aliqua realitas ultra realitatem substantiæ, quæ ex eadem substantia educatur; an vero nullam realitati substantiæ addat realitatem, sed solummodo respectum aliquem atque ordinem, sive unius substantiæ ad aliquid aliud sive partium substantiæ inter se; quem ordinem dicunt modum essendi seu modificationem substantiæ (O. 148).

215. PROPOSITIO VI. *Qualitates et affectiones quæ ab essentialibus corporum attributis utcumque dimanant, non sunt realitates ab iisdem distinctæ.*

Prob. 1º Si hæ qualitates et affectiones ab essentialibus attributis realiter distinguerentur, dicendum esset, eas esse formas quasdam accidentales, e corporea substantia eductas. Atqui eductio formarum accidentalium e substantia fere iisdem difficultatibus obnoxia est, quibus impugnari solet formarum substantialium eductio ex materia prima. Nec magis intelligimus, cur eductio illa non sit ex nihilo, ex eo tantummodo quod accidentia ex potentia educantur substantiæ, et in substantia recipiantur. Merito igitur has entitates accidentales philosophi recentiores rejiciunt; præsertim cum non desint hypotheses multo clariores ac solidiores ad rem de qua agitur explicandam, quas physicæ scientiæ nobis suppeditant.

2º Ipsa accidentium communis notio ac definitiones aristotelicæ a scholasticis receptæ, quanquam ab iis propriæ doctrinæ ingeniose aptarentur, videntur tamen nobis omnino favere. Accidens enim est *ens in alio, ut in subjecto*. Ergo neque existentiam habet vere propriam, neque physicam essentiam simpliciter, sed quodammodo, nempe in substantia, ut Aristoteles notavit (1); unde per substantiam definiri eget (O. 170). Dicitur quoque accidens esse *ens alterius, ens entis*, ut idem dixit Aristoteles (2). Ergo ejus entitas ad substantiam pertinet et est aliquid substantiæ.

3º Clarius hoc ipsum inductione probatur.

216. Sane qualitates constantes affectionesque variables aliæ immediate resultant ex proprietatibus essentialibus, ut in præcedente articulo dictum est, aliæ posita actione, aliæ posito termino.

Jam 1º Quæ resultant *immediate* ex essentialibus attributis, ab iisdem non distinguuntur nisi conceptibus nostris, ut manifestum est, et minime controversum. Quis enim dicat v. gr. divisibilitatem realiter distingui ab extensione, aut impenetrabilitatem a vi resistendi? Ergo affectiones istæ a substantia corporea non distinguuntur nisi ratione.

217. 2º Venio ad qualitates et affectiones quæ resultant

(1) Met. VII, 4.

(2) Met. VII, 2.

posita actione (210, 211). Hæc reducuntur ad figuram, ad cohesionis diversam rationem, ad statum combinationis vel separationis, ad proprietates speciales, ad motum vel quietem.

a) Figuram ab extensione realiter non differre etiam veterum sententia fuit. Posita enim extensione quibusdam limitibus circumscripta, hoc ipso figuram habes, nec ad eam variandam aliud requiritur, nisi ut partes extensas augeas vel minuas, aut diversimode disponas.

b) Ut corpus a solido in liquidum, aut fluidum aereum transeat, et vicissim, nihil aliud requiritur, nisi causa efficiens, quæ est caloricum intensius vel remissius.

c) Combinationem duorum corporum nihil iis addere, et separationem nihil tollere, est ut puto, per se manifestum.

d) Proprietates quas diximus speciales (139), nihil essentialibus attributis adjicere, præter respectus aliquos compositionis ac situs particularum, et ex dictis (210, 139) deducere potes, et a physicis plenius addisces.

e) Quies in loco (ubicationem veteres appellabant) nihil aliud per se est, quam relatio corporis extrinseca. At difficilius est motus eorumque phænomenorum, quæ ad motum reducuntur, explicatio. Corpus enim, quum ad motum determinatur, aliquid acquirit quod prius non habebat, quodque sive vis motrix, sive velocitas, sive impetus appelletur, aliquid reale videtur.

218. Dicendum nihilominus, in motus communicatione nullam mobili communicari aut ex ipso educi realitatem a substantia distinctam, sed corpoream substantiam determinari solummodo ad cedendum loco, i. e. ad mutandas relationes extrinsecas, quæ locum constituunt. Hujus vero determinationis ratio, quum de corporibus inanimis agitur, est impenetrabilitas impellentis et impulsus, ut supra dictum est (196, 1^o). Ex hac enim fit, ut quum corpus ab alio corpore impetitur, quoniam neutrum in alterius locum penetrare potest, nisi alterutrum loco cedat, illud quod vi minore loco potitur, loco exturbetur. Hac autem determinatione semel accepta, quia iners est, nequit eam per se immutare, adeoque nequit per se in loco aliquo sistere, sed loco sem-

per cedere pergit. Nec est in ulla spatii parte ratio, quæ ipsum ad quietem determinare possit, eo quod ad omnes spatii partes corpus est indifferens. Itaque loco jugiter cedat necesse est, donec a vi aliqua externa per determinationem oppositam in quiete constituatur. Potest igitur explicari motus sine ulla adventitia realitate.

219. 3^o Qualitates quæ *posito termino* resultant, esse tantummodo substantiæ modos, non formas reales apud veteres in confesso erat. Nisi quod pauci quidam e tardioribus peripateticis arbitrati sunt, hujusmodi modos esse quiddam ex natura rei a subjecto distinctum, ipsiusque subjecti indifferentiam aliquam atque indeterminationem auferens. Quorum accuratam subtilemque refutationem videre poteris apud Ptolemæum (1) et Tiphani (2).

Et de actuali quidem corporum actione, de qua nunc sermo est (212), res videtur omnino manifesta. Actio enim, ut alibi notavimus (O. 261), est ipse effectus, prouti fit dependenter a causæ activitate. Hæc vero dependentia, quemadmodum in ipsomet effectu nihil aliud ponit quod reale sit, præter ipsius effectus realitatem, ita quoque causæ activitati nihil superaddit entitatis, quod ab eadem activitate re distinguatur. Quare quidquid hæc denominatio: *causa agens* ultra activitatem importat, hoc totum nihil est aliud, nisi connotatio extrinseca remotionis impedimentorum, et applicationis idonei subjecti (O. 268).

Patet ergo, qualitates affectionesque corporum quæ ab essentialibus eorumdem attributis resultant, non esse realitates corporeæ substantiæ adjectas, sed modos solummodo quosdam se habendi. Quare merito dicuntur substantiæ *modi seu modificationes*.

220. PROPOSITIO VII. *Per hæc quæ diximus non aufertur distinctio inter substantiam ejusque modos contingentes, quam dicunt realem modalem.*

Quoniam aliqua substantiæ corporeæ ejusque essentialium attributorum a contingentibus ejusdem modificationibus

(1) Dissert. V, Phys. Met.

(2) *De Hypostasi*, c. XL, seq.

admittenda distinctio videtur, quam alibi diximus *realem modalem* (O. 228, 2°), quæritur in quo sita sit hæc distinctio.

Nota 1° agi hic de distinctione datæ modificationis non in genere considerata, sed in individuo; v. gr. hujus albedinis ab hac charta, et illius sphaericitatis ab illa cera.

Nota 2° aliam esse quæstionem, si quæras: quomodo substantia *habens certum aliquem modum*, sed cogitata sine illo, ab eodem modo distinguatur; aliam vero, si quæras: quomodo substantia *non habens certum aliquem modum* ab hoc ipso distinguatur.

221. Prima quæstio solvetur respondendo distinctionem illam esse tantummodo *rationis*. Hæc enim duo v. gr. *rotundum* et *rotunditas* in hoc tantum differunt, quod primum in recto exprimit substantiam, in obliquo modum (L. 73, 4°); alterum vero in recto modum, et in obliquo substantiam (O. 171); quæ quidem differentia distinctionem solum rationis constituit. Jam cera quæ est rotunda et rotunditas eadem omnino ratione inter se differunt ac rotundum et rotunditas. Ergo.

222. Ad quæstionem alteram respondeo, modos omnes corporeæ substantiæ, ut ex dictis (215, seq.) patet, sitos esse in aliquo respectu vel ipsius substantiæ ad alia, vel partium ejus inter se. Qui respectus quanquam nullam realitatem substantiæ adjiciant, possunt tamen ab ea sejungi, quia non sunt in ipsa vi essentiae, sed ab actione aliqua, aut ab applicatione termini dependent. Idcirco si actio posita non fuerit, vel cesset, si terminus non fuerit appositus vel removeatur, ii quoque respectus deficient.

Distinctio itaque substantiæ a modo quam habere potest, et quo actu caret, est distinctio substantiæ relatione carentis a relatione hac ipsa. Et quoniam relatio hujusmodi re idem est ac substantia relationem habens (124), sequitur substantiam sine modo a modo differre, ut substantia sine relatione ab eadem substantia cum relatione. Hæc autem distinctio est realis *inadequata et negativa* (O. 228, 1° 3°); inadequata secundum id quod venit in *recto*, quia substantia est utrobi-

que eadem; negativa secundum ea quæ veniunt in *obliquo*, quæ sunt relatio, et privatio ejus. Huc igitur redit distinctio realis modalis.

223. Facile nunc solves quæ obijci solent; videlicet:

1° Videtur contra sensum communem assertio hæc: mutationes fieri reales, quin aliquid reale accedat ad substantiam, vel ab ea discedat.

2° Quæ separari possunt, realiter distinguuntur. Modi autem a substantia separari possunt.

3° Corpus non est sua figura aut suus motus. Ergo.

4° Si ceræ v. gr. rotunditas nihil est præter ceræ substantiam, quandiu cera existat, existet etiam hæc rotunditas, etiam quum cera complanata fuerit; quod est absurdum: si vero rotunditas aliquid est præter ceræ substantiam, est aliqua realitas addita substantiæ. Ergo.

224. Ad 1^m Resp. 1° Hoc argumentum probare nimis. Probat enim, eas quoque mutationes quæ a plerisque veteribus habebantur ut modi (219), esse realitates a substantia distinctas. Id quod et veritati et sensui communi contrarium est. Quotus enim quisque reperiatur, qui existimet, aliquam realitatem incubuisse mihi quia Romæ sum, quam non haberem si alibi essem?

Resp. 2° *Dist.*: Absurdum est, fieri mutationes reales, quin vere accedat ad substantiam vel discedat aut alia substantia, aut aliqua relatio, *conc.*; quin accedat vel discedat aliqua realitas accidentalis, *nego*.

225. Ad 2^m *Dist.*: Distinguuntur distinctione realitatis a realitate, vel distinctione realitatis a modo realitatis, *conc.*; tantum priore distinctione, *nego*.

Ad 3^m *Dist.*: Corpus non est sua figura, quatenus idea figuræ talis convenit pluribus corporibus, et non est materiæ essentialis, *conc.*; quatenus realitas figuræ non sit ipsa realitas corporis, *nego*.

Ad 4^m *Dist.* 1^m *partem*: si ceræ rotunditas non est ulla realitas præter ceræ substantiam, et non est relatio inter substantiæ partes, *conc.*; si est relatio inter substantiæ partes, quandiu manet cera, manebit, quoque rotunditas, *subdist.*: si

relatio hæc dimanaret ab essentia partium ac totius, *conc.*; si dependet ab actione aliqua contingenti, *nego.*

Dist. 2^a partem: si rotunditas est aliquid præter ceræ substantiam quod non sit mera relatio, hoc aliquid est realitas addita substantiæ, *conc.*; si est aliquid quod est mera relatio, *nego.*

226. PROPOSITIO VIII. *Nulla quoque videtur esse realis distinctio inter corpoream substantiam ejusque essentielles proprietates, extensionem videlicet, ac resistendi vim.*

In hac assertionem nulla est difficultas, si de essentialibus hisce attributis loquimur, prouti sunt in toto corpore. Nam extensio corporis nihil addit extensioni atomorum, nisi forte vacuum interjectum; et resistendi vis quæ in corpore viget, nihil est aliud, quam congeries virium quæ sunt in atomis.

227. Si vero de his attributis loquamur ut sunt in atomis, nulla est ratio quæ nos cogat, imo nullum est indicium quod nos suadeat, ut ea spectemus tanquam realites a substantia distinctas. Inter ipsos veteres quantitatem a substantia corporea distingui negarunt nominæ, Melchior Canus, alique; distingui vires seu potentias negavit Scotus cum aliis pluribus. Suaresius vero fatetur, distinctionem realem quantitatis a substantia *non posse ratione naturali sufficienter demonstrari* (1); distinctionis autem virium a substantia *rationem a priori difficile reddi, neque esse cur a prudenti philosopho in re tam abdita expetatur* (2).

Revera experientia nihil offert nobis, ex quo de hac distinctione suspicari possimus: a priori vero quis dicat, hanc distinctionem ab ipso corporeæ substantiæ conceptu requiri, cum substantiæ hujus realis essentia, ut in se est, sit intuitioni nostræ impervia prorsus et inexplorabilis? Imo vero cum substantia corporea per hæc duo attributa se nobis perpetuo manifestet, dicendum videtur, ea ad substantiæ corporeæ essentiam ipsam pertinere, ac propterea ab eadem substantia non distingui.

(1) *Met. Disp.* XL. Sect. II, § 8.

(2) *Ibid.* Disp. XVIII. Sect. III, § 16.

ARTICULUS IV.

De dependentia accidentis corporei a substantia.

228. Superest ultimo loco quæstio de accidentibus absolutis (O. 172, 2^o); an scilicet sint quædam corporea accidentia, quæ divina saltem virtute conservari possint a subjecto separata. Scholastici, ut in ontologia diximus (l. c.) accidentia dividebant in *modalia* et *absoluta*.

Modalia vocabant ea, quæ ita a subjecto dependent, ut sine ipso ne divinitus quidem conservari possint; inter quæ non ea tantummodo collocabant quæ eo quoque tempore, ex communi sententia, ut modi habebantur, cujusmodi v. gr. sunt duratio, figura, actio, aliaque præterea, sed etiam quædam alia quæ inter formas physicas adnumerabantur, qualia sunt v. gr. accidentia, ut aiunt, intentionalia.

Absoluta accidentia vocabantur formæ accidentales physicae, quæ naturaliter quidem exigunt inesse subjecto, non tamen ita ut prorsus repugnet, ea sine subjecto conservari, saltem divina virtute. Hæcerant quantitates et qualitates corporeæ.

229. Præmittendum est, theoriæ hanc accidentium absolutorum invaluisse apud scholasticos ut sacrosanctæ Eucharistiæ mysterium, quantum attinet ad panis vinique species in eo permanentes, explicaretur. Erat autem communis eo tempore sententia, qualitates sensibiles non virium quarundam actiones esse, sed formas quasdam staticas, quæ per species ad sensum immissas, facultatem sensitivam ad actum determinarent. Proinde assumebant tanquam certum certitudine sensuum, has formas easdem numero manere in altaris sacramento, quæ antea essent (1). Nec profecto aliud, ea posita doctrina, rationabiliter dici poterat. Fuit tamen apud ipsos quoque scholasticos hac in re aliqua opinionum diversitas. Ex antiquioribus enim, quidam cum nominalibus existimabant, quantitatem re non distingui a substantia et qualitatibus: adeoque solas qualitates esse

(1) « Respondeo dicendum quod sensu apparet, facta consecratione, omnia accidentia panis et vini remanere. » S. Th. th. p. III, q. LXXV, art. V. « Accidentia panis et vini... sensu deprehenduntur in hoc sacramento remanere post consecrationem. » *Ibid.* q. LXXVII, art. I.

accidentia absoluta, non vero quantitatem. Alii vero cum s. Thoma autumabant, quantitatem et qualitates inter se et a substantia realiter distingui; in Eucharistia vero tam quantitatem quam qualitates manere a substantia separatas, sed quantitatem manere omnino sine subjecto, qualitates autem in quantitate recipi ut in subjecto. Demum plurimi ex philosophis non peripateticis sæc. XVIII, difficultatibus physicis adacti, in eam venerunt sententiam, solam quantitatem accidens absolutum esse; qualitates autem non esse nisi quantitatis modificationes.

230. Cæterum nulla ex his opinionibus aliqua fuit Ecclesiæ definitione sancita; neque unquam systema accidentium absolutorum a suis assertoribus, saltem ab antiquioribus scholasticis, propositum vel ut fidei catholicæ dogma, vel ut ad fidem catholicam tuendam necessarium (1); nisi quatenus existimarent, nullam aliam explicationem iis, quæ de hoc mysterio credenda sunt, conformem, præter hanc unam, afferri posse. At si ad species eucharisticas explicandas alia afferri possunt, quæ cum catholica fide omnino cohæreant, quisque videt quæstionem de accidentibus absolutis esse mere philosophicam hominumque opinionibus relictam. Atque ita plerique recentiores theologi sentiunt (2). Veniamus jam ad generalem quæstionem.

231. Ut quæstionis status accuratius determinatur, notare juverit propositionem hanc: *accidentia corporum conservari possunt a Deo separata a substantia*, duplici modo intelligi posse, videlicet indeterminate, et determinate; ac

(1) Vide v. gr. qua ratione hac de re loqueretur antiquus auctor *opusculi XLVIII* inter Opusc. S. Thomæ: « Licet Deus posset aliquod accidens separare a subjecto, ut communiter tenetur de accidentibus hostiæ consecratæ etc. » (Tract. 1, c. VIII.) Non dicit necessario hoc tenendum esse, sed solum communiter teneri. S. Thomas in *summa th.* (p. III, q. 77, art. 1) memorat quorundam opinionem qui existimabant accidentia eucharistica esse, sicut in subjecto, in ære circumstante.

(2) « Fides nos docet credere realem Christi præsentiam, non autem ut accidentia absoluta peripateticorum, aut aliud quodlibet philosophicum systema. Fides semper simplex est, hominum additamenta ut plurimum implexa sunt ac diffilia. » Ita cl. p. Jo. Perrone in *Prælect. theol.* vol. VII. Tract. de Euch. c. 1, § 119. Cf et notam subjectam.

determinate quidem multipliciter, pro notione diversa quæ subicitur voci: *accidens*, ac pro ratione diversa modi quo accidentia a Deo conservari dicuntur. Si duo hæc indeterminate accipiantur, ut ea vulgus accipere solet, vix esse poterit inter catholicos quæstio de re: si vero determinate sumantur juxta aliquam philosophicam theoriam, ea propositio poterit esse philosophice vera in uno sensu, falsa in altero. Idipsum dicendum de hac ipsa voce: *accidens absolutum*. Potest enim ea vox per se explicari indeterminate ita: qualitas quæ *sensu deprehenditur* (1), quæque sensibus offertur absque dependentia a substantia, cui naturaliter inhæret et potest v. gr. cum peripateticis intelligi hoc pacto; realitas quædam, seu forma accidentalis physica, educta e substantia corporea, ab eaque realiter distincta, eadem numero manens absque substantia. Quod si ita explicetur accidens absolutum, est notio quæ non ad fidei depositum pertinet, sed ad physicam quamdam theoriam, quæ certe difficultatibus non caret.

232. Advertendum, quæstionem hanc, ex dictis, jam amplius esse non posse de universis accidentibus corporeis: nam qualitates omnes quæ ex essentialibus corporis proprietatibus resultant, non sunt realitates ab iis distinctæ, sed duntaxat earumdem modi (216, seq.). Quæstio itaque solum fieri potest de essentialibus corporis proprietatibus; an videlicet extensio ac resistendi vis accidentia absoluta appellari possint *sensu peripatetico*. Jamvero extensio ac resistendi vis non videntur esse realitates ejusmodi, quæ, substantia cui insunt de medio sublata, permanere possint.

233. Id quod suadetur 1^o ex dictis (226, 227). Nullum enim judicium nobis suppetit, quo suspicari possimus, extensionem ac resistendi vim esse realitates a realitate substantiæ corporeæ distinctas; imo omnia suadent distinctas non esse. Quod si a substantia non distinguuntur secundum realitatem, non sunt nisi essentialia ejusdem modi; ac proinde ipsa sublata, persistere non possunt secundum eam entita-

(1) Vide notam ad § 229.

tem quam in substantia habebant: hæc siquidem entitas nulla alia est quam entitas substantiæ.

2º Etiam si a substantia distinguerentur, adhuc tamen concipi nequit, quo pacto hæc duo a substantia separata persistere possent. Etenim extensio sine resistendi vi mera privatio est, ac purum nihil. Vis autem resistendi sine substantia consistere non posse videtur. Vis enim, quæcunque illa sit, est facultas agendi: facultas autem agendi agentem connotat. Secus transeunte illa ad actum, haberetur actus sine agente. Idcirco etiam scholastici vires seu potentias, non inter accidentia absoluta, sed inter accidentia modalia collocabant. Qualitates autem sensibiles et quantitatem absoluta accidentia esse censebant, quia duo hæc nec vires nec virium actus esse existimabant.

334. Cæterum si quis resistendi vim ita mente conciperet, ut eam conservari posse putaret, sublata substantia, secundum eandem illam entitatem quam in substantia habet, certe non is ego sum qui de hoc litem serere velim. Nam ut sæpius dixi, intimam hujusce vis essentiam non cognoscimus; fatendumque est, argumenta modo adducta ut apodictica haberi non posse.

235. Sed quidquid sit de hoc, certum est nulla nos necessitate premi, ut admittamus realem hujus vis a substantia separabilitatem, ad hoc ut probemus, accidentia corporea sine substantia cui inerant, a Deo conservari posse; id quod philosopho potissimum querendum est in hac controversia.

Etenim omnibus indubitatum esse debet, vires extensionemque corporeæ cujusvis substantiæ, hac deficiente, posse a Deo conservari hoc pacto, quod divinæ virtutis operatio, et extra sensus et in sensibus ea omnia efficiat, et eodem modo, quæ substantia suis viribus, intraque suæ extensionis limites, naturaliter operabatur atque adeo patiebatur.

236. Quod quidem constat 1º ex manifesto principio, quo sanctus Thomas hac ipsa questione utitur. « Divina virtus, » ita ipse, potest producere effectus quarumcunque causarum secundarum sine ipsis causis secundis.... quod » accidit propter infinitatem virtutis ejus, et quia omnibus

» causis secundis largitur virtutem agendi (1). » Ex hoc principio fluit sponte assertio proposita.

2º Ut in præcedenti capite dictum est (188 in fine), virtute divina fieri potest, ut resistendi vis, seu impenetrabilitas propria substantiæ corporeæ, aliquo in loco exeratur, quin vel ullum corpus vel aliud agens quodcunque vi propria resistat. Hoc autem vel unum sufficit, ut effectus omnes aliqujus corporis proprii sine illo corpore producantur.

237. Fac itaque, sublata v. gr. panis substantia, divinam virtutem efficere, ut in loco ubi erat panis, intraque eosdem limites, resistentia habeatur, eodem modo atque ordine, quo a panis illius atomis atque moleculis exercebatur. Ex hoc illico habebis extensionem, eamque mobilem ac divisibilem, similem in omnibus extensioni panis; habebis eandem figuram, cohesionem, duritiem cæterasque qualitates generales et speciales (138, 139), quas panis præ se ferebat. Accedent undæ luminosæ, et in illa superficie eodem modo modificabuntur ac diffundentur, ac prius a superficie panis; caloricum eodem modo impenetrabilitates illas atomicas commovebit: atque undæ sonoræ in aere eodem modo ac prius ab extensione hac ciebutur: gravitas demum attractionesque omnes eadem erunt. Hinc tactus, visus, auditus, gustus in ea extensione reperient eadem, quæ antea reperiebant, neque hanc substantiæ apparentiam a vera substantia intellectus rei ignarus discernet. Imo non solum humani sensus, sed et æther, et aer, et corpora cætera, si sensus essent capacia, apparentes illas moleculas apparensque illud corpus a veris moleculis veroque corpore non distinguerent.

238. De odoribus specialis quædam videtur vigere difficultas, cum hi minutissimorum corpusculorum effluviis, ac proinde substantiarum quadam multitudine constent. Sed revera difficultas specialis in hoc nulla est; nam cum divina virtus suppleat molecularum omnium prius coherentium resistentiam, et hujusmodi, ut si dicam, resistentiæ moleculares iisdem motibus agitentur quibus antea moleculæ substantiales agitabantur; perfecto ille quoque motus in iis

(1) *Contra Gent.* Lib. IV, c. LXV.

vigebit ex quo prius quædam moleculæ segregabantur, et segregatæ hac illac volitabant; cum hoc tantum discrimine, quod nunc non erunt minutissima corpuscula, ut prius, sed minutissimæ resistantiæ ad instar corpusculorum. Simili fere modo per accidentia absoluta multa explicat s. Thomas (1).

Si hoc non placet, facile intelliges, aliis quoque modis Deum odores corporum servare posse; nempe vel servando intra quosdam limites particulas odoras, quæ prius a substantia effluxere; vel, etiam immediate efficiendo in sensu impressiones eas, quas huiusmodi corpuscula gignerent.

239. Facile colliges, quo pacto juxta hanc sententiam accidentia corporum absque subjecto manere dicuntur. Manent videlicet non secundum entitatem quam prius in substantia habebant, sed *secundum entitatem effectuum*; suntque hæc accidentia sine subjecto identica cum accidentibus, quæ prius erant in subjecto, non identitate numerica et absoluta, sed identitate *relativa et sensibili*.

240. Hac ratione multi recentiores sacræ Eucharistiæ mysterium, quod attinet ad panis viniq[ue] species in eo manentes, explicari posse autumant. Sunt etiam qui contradicant. Nobis satis erit hoc unum monuisse: quum de mysteriis divinis agitur, illud semper præ oculis habendum esse: agi de rebus humanæ menti inaccessis.

(1) *Sum. th.* p. 3, q. LXXVII, art. IV. — VII.

LIBER SECUNDUS.

CAPUT I.

DE MUNDO CORPOREO GENERATIM.

ARTICULUS I.

De mundi notione.

241. « Quem κόσμον græci nomine ornamenti appellaverunt, eum et nos a perfecta absolutaque elegantia *mundum* (1). » Mundi porro nomine rerum creatarum universitatem complectimur. Quoniam vero res creatæ aliæ sunt spiritus, aliæ corpora, idcirco mundi nomine modo utrumque rerum ordinem, modo unum tantummodo significamus: unde *mundum intellectualem a mundo corporeo* distinguimus. Platonici mundum *archetypum*, seu *intelligibilem*, appellabant mundi ideam quæ in divina mente fulget. Communiter tamen mundi nomine mundum intelligimus corporeum; quem etiam hæc vox *mundus* ex prima institutione significat. De hoc nobis est sermo.

242. Describi solet mundus corporeus: *compages ex cælo terraque coagmentata, iisque naturis, quæ his continentur* (2). Nec dicas, perperam sensibilibium rerum universitatem in cælum terramque distribui, cum terra comparata ad cælestia corpora sit veluti punctum cum sphaera collatum. Meminisse enim debes descriptionem illam hominibus proponi, qui terram incolunt, quique proinde quantum supra se cælum patere vident, tantum sub se terram extendi prospiciunt: non incongrue igitur ad ea quæ supra sunt et quæ subter, tota rerum compages revocatur.

243. Mundus porro absolute consideratus est multitudo luminosorum corporum atque opacorum intra imponderabilis materiæ oceanum natantium. Luminosa corpora sunt sol ac stellæ fixæ; opacæ planetæ et cometæ. Omnia opaca

(1) Auctor libri: *de Mundo*.

(2) Plinius *Hist. nat.* II, 4.

corpora, quæ nobis nota sunt, una cum sole systema quoddam constituunt, in quo sol medium occupat, ipsa vero circa solem tanquam centrum perenni circuitu feruntur. Est autem maxime probabile, stellas singulas suo planetarum cometarumque satellitio stipari, quemadmodum sol; ac proinde systema solare nihil aliud esse nisi unum e sidereis systematibus, ac fortasse nec maximum, nec copiosissimum. Quibus vero relationibus stellaria hæc systemata inter se connectantur, nemo cum probabilitate determinare potest. Compertum tamen in præsentī est, quasdam stellas circa alias stellas moveri, ipsumque solem versus Herculis signum ferri, ac probabiliter ipsum quoque circa aliquod attractionis centrum suam orbitam habere præfinitam. Consule astronomos: nobis ad scopum nostrum sufficit hæc attigisse.

ARTICULUS II.

De mundi unitate.

244. Binas hoc titulo quæstiones comprehendimus: 1^a est, an in collectione hac corporum, quam mundum dicimus, aliqua sit unitas: 2^a an collectio hæc sit unica.

PROPOSITIO I. *Sua est mundo, eaque mirabilis unitas.*

245. 1^o Est in mundo unitas *aggregationis*, ac *materialis continuationis*. Etenim æther subtilissimus omnia mundana spatia replet: per hunc sidera etiam remotissima cum terra communicant, ac suos radios ad nos usque demittunt; eoque mediante magna attractionis lex varia inter se corpora connectit.

2^o Est unitas *logica* similitudinis. Figura enim mundanorum corporum eadem est, eadem vires, eademque leges omnium motus ac vicissitudines temperant: multoque plures similitudines hujusmodi perspiceret, qui totum mundanum systema intime cognoscere posset; natura enim ubique sibi constat.

3^o Est unitas *compositionis* et *ordinis*. Primo quidem quia omnia quæ in mundo sunt, ad Deum ordinantur tanquam ad finem ultimum: quæ unitas quam sit perfecta atque admiratione digna, a priori quidem argumentari possumus, sed

intellectu concipere non possumus. Deinde vero quia mundana corpora ad se invicem ordinata sunt, atque in se invicem agunt; luminosa centra planetis lucem et calorem affundunt, eosque in suis orbitis continent: varia siderea systemata se mutuo librant; omnia mundana corpora se mutuo attrahunt; atque in hos omnes effectus tota ætherea massa influit. Fatendum tamen iterum, hanc quoque unitatem multo esse oportere majorem, quam humanus intellectus assequi possit.

* 246. PROPOSITIO II. *Plures sunt, atque adeo sine numero, mundi possibiles.*

Nam 1^o et numerus, et positio, et motus mundanorum corporum sine fine variata concipi possunt; idemque dicendum de cujusque systematis, ac de singulorum globorum vicissitudinibus, deque variis corporibus quæ in iis collocari poterant. Certe enim neque ex mundi idea, neque ex materiæ natura, neque ex ultimo mundi fine hæc sunt ad unum determinata. Atqui unaquæque ex his variationibus mundum constituit a præsentī diversum. Ergo.

2^o Si hic tantum mundus qui modo est, possibilis esset, eo condito infinita Dei potentia fuisset exhausta. Hoc autem prorsus repugnat. Igitur non modo repugnat nullum alium mundum possibilem esse, sed quoniam potentia Dei infinita exhauriri nequit, nec unquam exhauriretur quamvis nova semper entia produceret, concludendum, mundos possibiles nullo determinato numero contineri.

* 247. PROPOSITIO III. *Plures simul mundos sejunctos et independentes existere nullatenus repugnat.*

Dico, *sejunctos et independentes*; nam si mundana quæcunque systemata communi fluido connectantur, et influxum ad invicem exerceant, jam non plures mundos, sed unum efficiunt. Contradiciunt statutæ propositioni cum quibusdam veteribus cartesiani, sed prorsus immerito.

Etenim inter mundos intrinsece possibiles, de quibus supra, plures certe sunt ejusmodi, in unius existentia alterius existentiam non excludat. Hi ergo coexistere possunt. Quid vero rerum Creatorem impediat, quominus,

si velit, huiusmodi mundos simul ad existentiam traducat?

* 248. At enim si plures mundi existerent, iique sejuncti atque independentes ab invicem, dicendum esset vacuum iis interjacere. Hoc autem est quod cartesiani pati non possunt.

Resp. Concedo, plures mundos, si existerent, vacuo dividi oportere : sed injuria cartesiani ab hoc vacuo abhorrent; atque irrationabiliter agunt, quum ex vacui horrore plurium mundorum negant possibilitatem. Non enim id quod evidens est negare licet, solum quia aliquid inde sequitur, quod nos intelligere nequeamus. Deinde, nisi dicamus puram extensionem geometricam esse corpus, quomodo probabitur vacuum huiusmodi repugnare? Sed de hoc alibi.

* 249. Objicies adhuc : repugnare mundorum pluralitatem; mundus enim, cum sit rerum universitas, omnia creata complectitur. Repugnat autem esse aliquid ultra omnia creata.

Resp. Mundum unum esse rerum universitatem, facta hypothese quod Deus unum tantummodo mundum condiderit. Quod si Deus plures mundos condidisset, profecto mundus unus tota rerum universitas non esset. Quanquam, si cæteri mundi essent a nostro aspectu nostraque cognitione prorsus remoti, adhuc dici posset mundum hunc qui nobis obtigit, totam rerum sensibilibus universitatem esse.

* 250. Ex dictis colliges, definiri a nobis non posse, utrum unus sit a Deo mundus conditus, an vero plures. Non enim id a priori constare potest, ut modo vidimus, neque a posteriori, quia si præter hunc quem incolimus, alii mundi existerent, ii forent experientiæ nostræ penitus inaccessi. Solum igitur ex divina revelatione quæstio hæc solvi posset; sed de hac re nihil Deus nobis revelavit.

* 251. Diversa prorsus de mundorum pluralitate proposita est quæstio a quibusdam aliis tum antiquis, tum recentioribus philosophis. Qui mundi nomine non rerum spectabilem universitatem, sed globum ab animalibus hominibusque habitabilem intelligebant, eo modo quo terram quam incolimus mundum dicere solemus. Inter veteres Xenophanes maxime

et Anaxarchus opinati sunt, lunam ac planetas terraque huic globo similes esse, ac viventibus refertos : idipsum inter recentiores contendit Fontenellius (1). Imo non pauci ex iis qui censent stellas esse totidem soles suis planetis stipatos, hos quoque planetas habitatoribus homini similibus esse sedes attributas opinantur.

* 252. Erraret profecto qui hanc opinionem certam assereret; sed erraret forte non minus qui eam primo intuitu improbabilem judicaret. Eam namque suadent 1^o analogiæ plures inter terram et planetas. Sane et eadem est planetarum ac terræ figura, idem est motus, tam rotationis circa proprium axem, quam translationis circa solem. Sunt etiam in planetis montes, valles, ac maria; in nonnullis atmosphæræ quoque indicia deprehenduntur: cumque terra unum habeat satellitem i. e. lunam, quæ noctes illuminat, planetis a sole remotioribus non unus tantum, sed, plures satellites attributi sunt. Nonne ex his omnibus sponte videtur emergere conclusio : ergo et terra et planetæ ad eundem finem condita sunt?

2^o Quem in finem tot astra quibus firmamentum scintillat, ex nihilo educta credamus; quorum plurima vix a paucis astronomis instrumentorum validissimorum ope deprehendi ac distingui possunt? Astra certe homini visibilia ad aliquos usus nobis opportuna accidunt; at quis credat nullum alium finem illis præstitutum esse, nisi ut menses annosque eorum ope distinguere possemus? Magna est hæc utilitas, sed nec necessarium erat in hunc finem tantam astrorum multitudinem condi, nec unicus iste finis tantæ molitionis censeripotest. Non enim astra illa sunt aurei quidam clavi cælorum fornici defixi, sed immania corpora, a terra remotissima, quorum fortasse pleraque solem ipsum magnitudine superant.

3^o Postremo et sapientiam et bonitatem divinam decere videbatur, ut quoniam poterat, mundi spatia qua late patent, intelligentibus creaturis repleret, quæ et beneficiis creationis

(1) *Entretiens sur la pluralité des mondes.*

uti possent, et rerum omnium Conditori laudis et amoris obsequia rerum omnium nomine deferrent.

* 253. Notandam porro hypothesim hanc, quæ cum Dei notione apte cohæret, religionis christianæ dogmatibus nullo pacto adversari, ut jam libenter fatentur theologi. Revera non docet christiana fides, omnes homines possibiles, aut omnia entia intelligentia hominibus similia, ex Adamo originem ducere oportere, sed solum homines qui in terra ex terrenis nascuntur. Quod si humilem hanc terram, quæque in tanta mundorum multitudine vix aliquid videri possit, Deus sic dilexit, ut *Filium suum unigenitum* ipsi daret, quid concludendum exinde? Non profecto hanc unam entium intelligentium sedem esse, sed facta primum animadversione, Deum in suis dispensandis donis liberrimum esse, hoc unum inde concludendum: si in cælestibus orbibus incolæ sunt, eos quoque Deum, qua illum decet charitate, adamasse, miris certe, sed inexcogitabilibus modis: divina enim bonitas nec ejus immensitate angustior est, nec potentia minor.

ARTICULUS III.

De mundi extensione.

254. De mundi quoque extensione duo quæri possunt: 1^o sitne illa finita, an vero infinita: 2^o quibus limitibus, si finita est, contineatur. Cartesius ejusque asseclæ opinati sunt, mundi extensionem nullis coerceri limitibus. Aiebant enim nullos mente cogitari posse mundi limites, ultra quos extensionem trine mensurabilem mens adhuc non concipiat. Extensio autem est corpus, ac proinde est aliquid ad mundum pertinens. Ergo quicumque modo fines præfinitur, ultra eos mundus semper protenditur. Hinc nulli sunt mundi limites.

255. PROPOSITIO IV. *Mundi extensio necessario finita est.*

Probatur 1^o ex dictis in ontologia de infinitæ extensionis repugnantia (O. 351, 3^o); si ea mundi extensioni applicentur.

2^o Ex falsitate eorum quibus adversarii ratio innititur.

Nam falsum est, ut in præcedenti libro ostensum est (50, 60) puram extensionem geometricam corpus esse; et hoc sufficit ad argumentum evertendum. Sed falsum præterea est, extensionem, quam ultra mundi fines concipimus, esse aliquid reale, ut infra videbimus.

256. Quod ad quæstionem alteram attinet, nota sunt veterum opiniones de mundi figura. Mundum esse sphaeram existimabant, primo quidem quia sic apparet, deinde vero propter rationes quasdam ex natura circularis figuræ depromptas, quas in præsentī referre necessarium non est. Recentiores astronomi docent, mundi extensionem humanas omnes mensuras effugere, humanæque mentis comprehensionem superare. Cum his itaque concludendum, mundi magnitudinem, ejusque figuram nec notam esse mortalibus, nec forte unquam notam futuram.

CAPUT II.

DE MUNDI ORIGINE.

ARTICULUS I.

De materiæ creatione.

257. Creatio, ut alibi diximus (O. 370), est effectio rerum ex nihilo. Notio hæc veteribus philosophis omnibus aut incomperta plane aut valde obscura fuit: ex quo factum est, ut vel mundum e divina substantia emanasse existimaverint, vel saltem materiam infectam Deoque coæternam fecerint. Ex his duobus erroribus alterum in theologia refutabimus; alter est modo refellendus. Materiæ porro nomine intelligimus elementa primitiva ex quibus corpora formantur.

258. PROPOSITIO I. *Materia non est a se.*

Nam 1^o Ens a se essentialiter est unicum, simplex, immutabile, infinite perfectum, prorsus independens, ut in theologia demonstratur. Materialia autem elementa sunt plurima; sunt extensa; sunt mutabilia quoad positionem, actionem, conjunctionem cum cæteris; sunt limitata et perfectionibus nobilissimis carentia; dependent postremo ab invicem, nam se invicem attrahunt repelluntque. Ergo materiale

quodvis elementum non est a se ; multoque minus omnium hujusmodi elementorum collectio.

Hoc argumentum, ut vides, transferri facile potest ad probandum, ipsos spiritus et res quascunque, præter Deum, non posse esse a se.

2º Quod est essentialiter indifferens ad ea, sine quorum altero non potest existere, est profecto ad existendum quoque ex se indifferens. Non enim fieri potest, ut aliquid sit ex se determinatum ad existendum, quin simul ex se determinationem habeat ad aliquid eorum sine quorum altero existere nequit.

Atqui materia, ex physicorum omnium consensu, est ex se indifferens ad motum et ad quietem, est insuper ex suo conceptu indifferens ad hanc vel illam figuram, ad hanc vel illam magnitudinem; et tamen non potest existere nisi vel in quiete vel in motu sit, ac nisi determinatam aliquam figuram ac magnitudinem accipiat.

Ergo materia est indifferens essentialiter ad existendum. Existencia igitur non est illi essentialis; ac proinde materia non est ens a se.

5º Vires attrahendi ac repellendi, quibus materiales atomi instructæ sunt, vel essentielles ipsis esse dicuntur, vel secus.

Si non sunt essentielles, sequitur materiam aliunde eas accepisse, adeoque alteri obnoxiam esse, eique plane subijci, a quo et modificari potest, et ad fines varios dirigi. Hoc autem destruit prorsus conceptum entis a se.

Si sunt vires illæ essentielles atomis, sequitur unamquamque atomum essentialiter esse propter aliud, nempe propter formanda corpora; huc enim tendunt attractivæ vires. Sed ens a se non potest esse propter aliud, sed unice propter se; quod enim in se sui esse rationem et independentem ab omni alio habet, cum sit sua sibi bonitas, non potest ad aliud tanquam ad finem ordinari. Et hæc satis sint in re manifestæ.

259. PROPOSITIO II. *Materia produci debuit ex nihilo.*

Cum enim non sit a se, ab alio produci debuit. Hoc autem

a quo materia producta est, non potuit esse materia. Primo quidem quia materia immediate non agit nisi tangendo, mediate vero agit attrahendo vel repellendo. Sed hi omnes agendi modi supponunt materiam, ut actionis subjectum jam præexistens actioni. Ergo materia non potest agere nisi in materiam præexistentem. Non potest ergo materia materiam sua actione producere.

Præterea redibit semper questio: a quonam materia producens fuit producta? Siquidem materia nulla potest esse a se.

260. Fuit ergo spiritus qui materiam produxit. Spiritus autem non potuit materiam educere e sua substantia: nam spiritus substantia est simplex et indivisibilis. Non potuit illam educere aliunde: nec a materia alia, quia non erat; nec ab alio spiritu, quia indivisibilis. Ergo materia ita producta est, ut e nulla re præexistente fuerit educta. Fuit ergo ex nihilo effecta.

261. COROLLARIA. 1º Errarunt ergo turpissime Democritus, Epicurus, atque insequentes deinde athei, qui atomos materiales infectas æternasque fecerunt.

2º Non minus turpiter errant pantheistæ illi, qui mundi materiam e divina substantia expressam comminiscuntur.

3º Mundanæ materiæ creator est prima rerum causa. Primam autem rerum causam omnes vocant Deum. Deus ergo est mundi creator. Hoc nunc innuisse sit satis, quod suo loco postea demonstrabitur.

Ad difficultates, quæ seu de creatione cogitantibus occurrere possunt, seu ab adversariis tam antiquis quam recentioribus oggeruntur, dissipandas, pauca hæc sufficient quæ subijcimus.

262. Creatio, ut supra diximus, est effectio entis ex nihilo, nempe ex nullo subjecto præexistente, quod locum teneat causæ materialis (O. 305). Et per hoc distinguitur a cæteris actionibus, quæ e præexistente aliquo subjecto varias rerum formas educunt. In hoc autem quod dicimus ens ex nihilo fieri, nemo sane, nisi desipiat, existimabit, ipsum nihil spectari quasi materiam ex qua ens fiat, Particula enim illa

ex non designat hoc loco habitudinem materialis causæ, saltem positive, sed ordinem juxta quem nihilo succedit ens. Nam propositionem hanc: *ens fit ex nihilo*, dupliciter potes exponere; nempe vel: *ens fit ex non ente*; vel: *ens non fit ex aliquo ente*. Primo modo particula *ex* significat *non-ens* esse quasi terminum a quo; altero modo significat utique habitudinem causæ materialis, sed *negative*.

263. Ex hac creationis notione hæc facile statuuntur.

1º Creatio passiva, proprie loquendo, non est mutatio. Mutatio enim in eo est, quod idem subjectum ab uno modo se habendi ad alterum transeat; ac propterea tribus hisce continetur elementis: *termino a quo, termino ad quem, et eodem* utrobique *subjecto* (O. 379). Ens autem quod fit per creationem, non erat ullo modo ante creationem. Unde in creatione non habetur subjectum commune termini a quo et termini ad quem, imo ipse terminus a quo desideratur.

Nihilominus de creatione cogitare et loqui solemus, ut de mutatione quadam rei quæ prius non erat, ac postea est: atque hinc dici potest, creationem mutationem esse secundum modum intelligendi.

2º Creatio omnem excludit successionem, neque in tempore fit, sed in indivisibili momento, quanquam possit unum post alterum successive creari. Ratio est quia successio mutatio est.

3º Creatio activa proprie non est actio transiens. Actio enim hujusmodi re idem est ac mutatio (O. 381), atque in subjecto præexistente recipitur. Præterea creatio est actio Dei propria: nulla autem divina actio proprie transiens est, sed solummodo æquivalenter.

4º Creatio relatio est. Nam, ut ait s. Thomas « cum actio » et passio convenient in substantia motus, et differant solum secundum habitudines diversas (O. 381),... oportet quod subtractio motu, non remaneant nisi diversæ » habitudines in creante et creato (1). » Hæc autem relatio in Deo quidem est relatio rationis; in re autem creata est

(1) Sum. th. p. 1, q. XLV. art. II, ad 2.

relatio realis, quæ continetur *dependentia esse creati a suo principio cum novitate essendi*.

5º Ex creationis denique notione facile colligitur, creari substantiarum proprium esse. Quod enim creatur fit extra subjectum; adeoque existit sine dependentia a subjecto. Talis autem existendi modus substantiarum est proprius (O. 151).

ARTICULUS II.

De mundi initio.

264. Refellendi modo sunt ii gentiles philosophi, qui mundum a Deo quidem genitum, sed æternum esse arbitrati sunt. Hujusmodi fuere Aristoteles in primis, cum vetustis peripateticis, et platonici quidam, quorum princeps est Proclus. Dixi platonicos quosdam; nam ad Platonem quod spectat, quidam censent eum docuisse mundum in tempore conditum (1). Ad defensores æternitatis mundi pertinet quoque Averroes, simulque fatalistæ omnes, ac recentiores eclectici, qui mundum a Deo necessario prodiisse sentiunt.

265. PROPOSITIO III. *Manifeste errarunt quicumque opinati sunt, mundum, seu mundi materiam necessario esse sempiternam i. e. sine existentie initio.*

Etenim cum mundus non sit a se, sed a Deo, sempiternæ existentie necessitas ei convenire non potest nisi ex eo, quod Deus mundum condere non poterat, nisi sempiternum. Si autem ad hoc Deus astringebatur, profecto astringebatur vel ratione ipsius mundi, vel ex propria natura. Atqui utrumque evidenter absurdum est.

266. Absurdum primo, Deum astringi ad mundum condendum æternum, ex ipsius mundi natura.

Nam 1º mundus est contingens, ut patet ex hoc ipso, quod a Deo est. Quod enim ab alio est, non est a se; proinde non habet existentiam sibi essentialem; nec necessario existit, ac propterea possibile est ipsum non existere, quod autem possibile est non existere, contingens dicitur.

Mundus itaque est contingens. Sed quod est contingens, non modo ex se existentiam non requirit æternam, sed nul-

(1) Cf. Pererium, *De rerum principiis*, lib. XV, c. V.

iam prorsus existentiam requirit; quia spectata ejus essentia, possibile est ipsum non esse. Ergo.

2° Dici nequit, Deum quodam quasi justitiæ debito compulsum fuisse ad mundi productionem. Etenim nec mundus possibilis quidquam habebat, quod suum esset, cum ipse non esset: nec Deus aliquid aliunde acceperat, quod esset retribuendum.

3° Præterea cur mundus hic potius, quam mundus alter ipso melior, fuisset necessario creandus? Imo si aliquid creari postulabat, cur aliquid tantum ac non possibilia omnia?

4° Demum existentia cum initio nullam certe repugnantiam continet, ut hoc tantum in præsentī dicam. Ergo etiam posita voluntate divina, qua mundi hujus existentia decreta est, non idcirco Deus cogebatur ad hoc ut mundum æternum faceret.

267. Absurdum secundo, Deum compelli ex ipsa sua natura ad hoc, ut mundum vellet æternum. Nam Deus nec mundo eget nec ulla re quacunque, ad suum esse aut ad suam perfectionem; unde quoad rerum productionem est prorsus liber. Ergo non solum Deus natura sua non determinatur ad suam mundo æternitatem participandam, sed etiam nullo modo determinatur ad mundi productionem.

Præterea omnino repugnat mundum æternum esse, ut in fra. videbimus. Igitur repugnat Deum natura sua compelli ad mundi productionem æternam. Absurdum est enim quam quod maxime, Deum natura sua compelli ad impossibile.

268. Rationi accedit auctoritas. Ipse enim Aristoteles fateatur, omnes qui retro fuerant philosophos mundi æternitatem negasse (1). Plurimi quoque post Aristotelem idipsum sensere. Eademque generis humani universi constans sententia fuit, ut antiquissimæ diversarum nationum, et in veteri et novo orbe, traditiones testantur (2).

(1) De celo, lib. I.

(2) Cf. Augustinum Eugubinum: De perenni Philosophia, lib. VII, et Ant. Genuesem Met. elementa, t. V, dissert. II.

ARTICULUS III.

Refelluntur objecta.

269. Subjicimus argumenta præcipua, quibus errorem hunc veteres philosophi suadere conabantur. Præcipua dixi: nam quædam ex his totam vim suam nanciscuntur ex falsa illa suppositione: nullam rem ex nihilo fieri posse; multa præterea solvuntur iisdem principiis; plura tandem memoranda amplius non sunt, ut quæ in obsoletis circa corporum constitutionem doctrinis tota innituntur; quæ tamen, etiam his receptis doctrinis, a doctoribus scholasticis funditus eversa sunt.

270. Opp. I. Deus est æternus: ergo mundus, quoque æternus sit oportet. Nam

1° Actio Dei est æterna. Ergo mundus, qui est ejus effectus, est æternus.

2° Posita causa sufficiente, si ea perfecta sit, necesse est poni effectum. Sed Deus est causa sufficiens mundi, eaque perfectissima. Ergo posita æternitate divina, mundus quoque æternus est.

271. Resp. Neg. primi argumenti consequentiam.

Ad 1^m Conc. ant. et neg. cons. Dei enim actio non est transiens, sed immanens, cum Deus solo suæ voluntatis nutu operetur. Effectus porro ejus qui per voluntatem agit, sequitur secundum intellectus determinationem ipsiusque voluntatis imperium. Intellectus autem quemadmodum effectus naturam ac modum omnem determinat, ita et tempus quo fieri debeat, præfinit, eodemque pacto voluntas utrumque imperat. Si igitur intellectus divinus disposuit mundum fieri non æternum, et hoc voluntas imperavit, licet hic actus sit æternus, mundus æternus non erit, sed præfinitum a Deo initium habebit.

272. Ad 2^m Dist. maj.: Si causa agat ex necessitate naturæ, conc.; si agat per liberæ voluntatis imperium, subd.: ponitur effectus secundum propositum ipsius voluntatis, conc.; secundum quod ipsa est, videlicet posita ipsa voluntate, nego.

Contrad. min.: Deus est causa sufficiens mundi, agens per

liberæ voluntatis imperium, *conc.*; agens ex naturæ necessitate, *nego.*

Dist. cons.: Posita Dei æternitate, mundus quoque æternus esse debet, si effectus divinæ voluntatis poneretur posita ipsa voluntate, *conc.*; si poni debeat secundum ipsius voluntatis propositum, *nego.*

273. Obj. II. Ex immutabilitate divina.

1° Agens quod non semper agit, mutatur quum agit, quia transit de potentia in actum. Sed Deus non potest mutari. Ergo non potest non semper agere quod agit.

2° Alio modo. Idem in omnibus manens idem, aut nihil facit aut facit semper idem. Sed Deus est semper in omnibus idem. Ergo aut nunquam mundum fecit nec unquam faciet, aut semper fecit ac semper faciet.

274. Resp. ad 1^m *Dist. maj.*: Agens quod non semper agit, i. e. in quo non est semper actus quo aliquid facit, mutatur, *conc.*; i. e. cujus effectus non semper existit, *nego.* Etenim Dei actus idem est ac divina substantia, quæ eadem manet semper, nec ullam in se mutationem recipit ex eo, quod effectus quidam externi a Deo in tempore procedant. Ex hoc relatio duntaxat extrinseca ipsi acquiritur.

Conc. min. et dist. cons. eodem pacto.

275. Ad 2^m *Dist. maj.*: Si quod manet semper idem ex necessitate naturæ operatur, *conc.*; si operatur intellectu et voluntate, *nego.* *Conc. min. et dist. cons.*: Si Deus mundum efficere ex necessitate naturæ, *conc.*; si mundum efficit juxta præfinitionem intellectus per imperium voluntatis, *nego.* Vide dicta in prima difficultate (271, ad 1^m).

276. Obj. III. Ex bonitate divina.

1° Deus semper facit quod melius est. Sed melius est mundum esse ac semper esse, quam non semper esse. Ergo Deus ab æterno mundum fecit.

2° Si mundus æternus non est, Deus infinito tempore nihil fecit; id quod, bonitate ejus attendita, inconveniens videtur. Nam si potuit Deus mundum æternum facere, at noluit, non est summe bonus et invidia tangitur; si vero voluit, at non potuit, limitatæ virtutis est.

3° Saltem quæri semper poterit: cur mundum ante non fecit?

277. Resp. ad 1^m *Dist. maj.*: Deus semper facit quod melius est simpliciter, *neg.*; quod melius est operi quod facit, *subd.*, i. e. præfinit semper operi eum perfectionis gradum, qui sit major aliis possibilibus, *nego*; providet operi media quæ sunt aptiora ad attingendum eum perfectionis gradum, quem ipse præfinit, *transeat.*

Contrad. min.: Esse semper melius est simpliciter, *conc.*; melius est mundo; *subd.*, nempe hoc adderet mundo gradum perfectionis majorem, *omitto*; foret medium aptius ad attingendum eum perfectionis gradum, quem ipsi Deus præfinit, *nego.*

278. Ad hæc intelligenda sufficiet hæc pauca animadvertere:

1° Mundi finem esse divinæ bonitatis manifestationem non absolute, sed in eo gradu finito ac determinato, quem libere Creator decrevit: mundique perfectionem sitam esse in hujus finis assecutione, ut in theologia fusius declarabitur.

2° Hunc finem obtineri optime, tanquam per medium omnium aptissimum, per mundi durationem cum tali initio, cujusmodi revera mundus habuit.

3° Semper esse melius est simpliciter, quam non semper esse, ea præcise ratione qua esse Deum melius est, quam esse creaturam; quia æternitas solius Dei attributum est. Idcirco dici nequit, melius esse mundo quod semper sit; repugnat enim mundum semper fuisse, ut postea videbimus. Sed

4° Etiam si mundus æternus esse posset, hoc melius illi esset, quia perfectionis gradum majorem illi tribueret, non quia aptiorem faceret ad finem sibi præstitutum assequendum.

5° Deus non tenetur ad communicandam suis operibus omnem illam perfectionem, quam ipse communicare potest.

279. Ad 2^m Deus infinito tempore nihil fecit, *omitto.* Nam ante mundi initium non fuit tempus reale, sed ideale dun-

taxat tempus a nobis concipitur. *Nego* autem, in eo quod Deus per hoc tempus nihil fecerit, ullum inconveniens fuisse.

Ad argumentum dico, Deum nec potuisse nec voluisse mundum æternum facere, quia, ut mox videbimus, mundus æternus repugnat. Sed hoc omisso, negari quoque potest conditionalis prima, nempe: si Deus potuit mundum æternum facere, at noluit, non fuit summe bonus, sed invidus. Deus enim ex bonitate sua nulla necessitate astringitur ad hoc, ut aliquid extra se faciat; multoque minus ut toto tempore faciat quo facere potest.

280. Ad 3^m *Nego* quæri semper posse, cur Deus mundum ante non fecerit. Nam si quæras, cur tali tempore fecerit, præsto erit responsio; quia sic divinus intellectus præfinivit, sic divinæ placuit voluntati. Stulte autem ages et arroganter, si quæras adhuc, cur intellectus divinus non præfinierit mundum ante creari, aut cur hoc divinæ non placuerit voluntati.

281. Obj. IV. Tempus est sempiternum. Sed tempus nullum est sine rebus mutabilibus. Ergo res aliquæ mutabiles ab æterno fuere.

Prob. major. Qui negat tempus sempiternum esse, hoc ipsum affirmat. Nam qui hoc negat, affirmat tempus aliquando non fuisse, videlicet prius non fuisse, postea fuisse. Sed hæc: *aliquando, prius, postea* quoddam tempus significant. Ergo erat tempus quando tempus non erat; id quod absurdum est.

Ita Aristoteles, ac post eum Proclus, et post utrumque Kantius.

282. Resp. *Dist. maj.*: Tempus reale sempiternum est, *neg.*; tempus ideale, *transeat. Contradist. min.*: Tempus reale nullum est sine rebus mutabilibus, *conc.*; tempus ideale nullum est, videlicet concipi nequit, si nullas res mutabiles existere intelligamus, *nego*. Sufficit enim ad tempus ideale concipiendum rerum mutabilium cogitata possibilitas, ut alibi dicitur.

Hæc eadem distinctio argumentum additum solvet. Quum enim dicimus: tempus aliquando non fuit, illud *aliquando*

intelligi potest tam de tempore reali, quam de ideali, sed diversimode.

Si de tempore reali intelligitur, significat: *non semper*; videlicet non semper successio rerum mutabilium fuit: successio hæc initium habuit. Si vero de tempore ideali, significat nos concipere tempus possibile antequam inciperet reale tempus. Idem dicas de illis *prius* et *postea*.

Sic patet, et Aristotelem et Proclum et Kantium in mera vocis æquivocatione ludere, et imaginationis ludibrio decipi.

283. Cætera quæ recentiores sophistæ obijciunt argumenta, his solutis facillime solves; sunt enim omnia ex veterum erroribus deprompta. Argumenta omnia veterum fuse relata ac solide discussa reperies apud s. Thomam (1) et Benedictum Pererium (2).

ARTICULUS IV.

* *De mundi æterni repugnantia.*

284. Scholastici fide christiana edocti mundi durationem initium habuisse, hac in re ab Aristotele penitus discessere, mundique æternitatem, quod ad factum pertinet, multoque magis quoad ejus necessitatem, respuerunt. Quidam etiam negabant prorsus, seu mundum, seu creatam quamlibet rem ab æterno potuisse fieri. Sed alii non ita: ast ut Aristotelem aliquo modo protegerent, contendebant mundi æterni intrinsecam impossibilitatem nullam esse, ideoque libertati divinæ relictum aiebant, ut mundum æternum faceret vel temporaneum.

285. Ad hos accessit sanctus Thomas, qui tamen quum affirmaret mundum non semper fuisse sola fide teneri, et *demonstrative probari non posse* (3); ultro concessit, rationes quæ suo tempore ad hoc demonstrandum afferebantur, *probabilitatem habere*, licet *usquequaque non de necessitate concluderent* (4). Ad quam sententiam ferendam adductus est s. do-

(1) *Contra Gent.* Lib. II, c. 31-37.

(2) *De rerum principiis.* Lib. XV.

(3) *Summ. th.* p. I. q. XLVI. art. II.

(4) *Contra Gent.* Lib. II, c. XXXVIII.

ctor zelo præcipue christianæ religionis, « ne forte aliquis, » sic ille, quod fidei est demonstrare præsumens, rationes » non necessarias inducat, quæ præbeant materiam irridendi » infidelibus, existimantibus nos propter hujusmodi rationes » credere quæ fidei sunt (1). » Ita loquebatur Aquinas eo tempore quo averroistarum impietas christianæ fidei maxime minabatur; illuc semper spectans ut philosophorum placita cum fide, qua fieri posset, amice conciliaret. Igitur qui mundi æterni possibilitatem admittunt, s. Thoma sin minus duce, at certe fautore gloriantur. Sed oppositam sententiam, præter Albertum magnum, s. Bonaventuram, aliosque magni nominis doctores, Ecclesiæ patres, quicumque de hac re aliquid scripsere, Basilius maxime et Augustinus, ac recentiores fere omnes amplectuntur; a quibus minime discedendum existimamus.

286. PROPOSITIO IV. *Mundus ab æterno conditus intrinsece repugnat.*

Demonstratur multipliciter ex repugnantia multitudinis infinitæ (O. 350). Si enim mundus semper fuisset, infiniti v. gr. dies hodiernum diem præcessissent, aut certæ infinita temporis intervalla periodo diurnæ æqualia. Hoc adversarii nostri ultro concedunt. Quo posito, arguimus:

1^o Si mundus semper fuit, exstitit multitudo *actu* infinita dierum. Sed omnis multitudo *actu* infinita repugnat. Ergo.

287. Confirmatur argumentum. Nam infinitum non modo esse nequit in multitudine quæ sit simul *actu*, sed neque in successione præterita; quamvis esse possit in successione futura. Etenim infinitum in successione futura est infinitum duntaxat in potentia, nempe quoad possibilitatem incrementi, in qua infinitate nulla est repugnantia; sed infinitum in successione præterita est infinitum quoad actum incrementi accepti.

Revera a) omne infinitum aut est infinitum potentia, aut *actu*. Sed infinitum in successione præterita profecto non est infinitum potentia. Ergo est infinitum *actu*. Ergo.

(1) *Sum. Th.*, l. c.

b) Infinitum in successione præterita est multitudo quæ *actu* exstitit, et collectionem ex parte objecti completam efficit. Omnis autem hujusmodi multitudo est in aliqua specie multitudinis, nempe in aliqua specie numeri. Numerus autem infinitus est infinitus *actu*. Ergo.

288. Confirmatur adhuc repugnare multitudinem *actu* infinitam etiam successivam. Etenim a) posito infinito successivo in successione præterita, potest illico haberi infinitum simultaneum. Nam certe unoquoque die successionis illius poterat Deus unum spiritum, unamve auri v. gr. atomum creare, et omnia in hoc usque tempus conservare. Spiritus autem vel atomi hujusmodi essent in præsentī multitudo infinita simul in *actu*.

Igitur si quod est infinitum in successione præterita, possibile est etiam infinitum simultaneum.

b) Imo in successione præterita infinita repugnantia quædam reperitur, quæ in infinito simultaneo non exstat.

Nam in omni successione omne consequens necessario suum habet antecedens. Repugnat ergo, in aliqua successione plura esse consequentia quam antecedentia. Atqui in successione infinita præterita, plura essent consequentia quam antecedentia. Etenim omnes successionis hujus termini essent consequentes alterum; quia nullus est terminus primus, qui sit antecedens et non consequens: ultimus vero terminus esset ipse quoque consequens, ut cæteri, sed non esset antecedens, quia nullus alius terminus ipsum subsequitur. Ergo revera in hac successione termini consequentes plures essent quam antecedentes.

289. Arguimus 2^o Si mundus semper fuisset, infiniti dies pertransissent, infinita dierum series foret exhausta. Sed infinitum nec pertransiri nec exhauriri potest (O. 349, I, II). Ergo.

290. Confirmatur argumentum. a) Concipi nequit, quo pacto hæc dierum series sicuti terminum habet *a parte post*, ita terminum quoque non habeat *a parte ante*. « Nam, ita cardinalis Toletus, istud tempus et dies a Deo facta sunt.

» Quomodo autem potest comprehendi quod sint dies a Deo,
 » et ordine fluant, et non cognoscat ipse quem primo pro-
 » duxit (1)? »

b) « Esto, prosequitur idem auctor, non possit assignari
 » primum: non effugitur difficultas. Nam semper verum est
 » pertransita esse infinita: dies inquam, et annos, et gene-
 » rationes infinitas, etsi non detur primum (2). »

c) Hæc unitas temporis, quam dicemus *diem*, percurrit
 tempus durationis mundi. Nam toto hoc tempore fuit dies
 post diem. Unde iterum sic possumus argumentari. Transitus
 fit ab uno extremo in alterum. Atqui tempus durationis
 mundi præteritæ procul dubio transit. Ergo in hoc tempore
 sunt duo extrema. Ergo hoc tempus finitum est utrimque,
 proinde nullo modo æternum.

291. Arguimus 3^o Si mundus semper fuisset, infinito fieret
 quotidie additio. Nam dies præteriti in hac hypothese essent
 infiniti; et tamen iis quotidie adderetur dies. Repugnat au-
 tem, infinito additionem fieri (O. 347, 1^o). Ergo.

292. Confirmatur. a) Demonstravimus alibi (O. 349, IX),
 repugnare infinitum actu, quod ex una parte finitum sit. Id
 ergo omne quod ex una parte limites habere cognoscitur,
 infinitatis est incapax. Ergo dierum præterita successio, quæ
 certe unum limitem habet, infinita esse nequit.

b) Negari nequit, multitudinem dierum qui hodie præte-
 riti sunt, majorem esse multitudine dierum qui ante sex mil-
 le, puta, annos in præteritorum numero computabantur. Quum
 de multitudine agitur, parum refert ex qua parte ipsi
 incrementum accesserit; sed certe multitudo prima major
 est secunda. At multitudo quoque prima erat multitudo infi-
 nita. Ergo multitudo infinita crescere potuit.

293. Postremo arguimus 3^o Si mundus semper fuisset, ha-
 beremus infinitum infinito majus. Si enim mundus semper
 fuisset, annorum numerus, quos mundi duratio complecte-
 retur, certe finitus esse non posset; aliter ejusmodi duratio
 percurri posset et exhauriri finitis acceptionibus; id quod.

(1) In VIII Phys. c. II. Text. X, q. II.

(2) Ibid.

cum infiniti natura repugnat (O. 349, III). Horum ergo an-
 norum numerus infinitus esset. Sed dies qui his annis conti-
 nerentur, certe multo plures essent; imo infinites plures.
 Ergo infinitum unum ab infinito altero in eodem genere
 multitudinis infinites superaretur.

Jam a) infinitum infinito majus esse non potest in eodem
 genere, ut alibi ostendimus (O. 349, III.). Ergo mundus non
 semper fuit.

b) Si mundus quot dies habet, tot haberet annos, profecto
 annorum mundi numerus major esset, quam modo sit. Quo-
 modo ergo poterit annorum hujusmodi multitudo unquam
 esse infinita?

294. II. Demonstratur propositio ex rerum creatione. Cum
 iis enim agimus, qui nobiscum tuentur, Deum non modo
 mundi architectum et opificem esse, sed etiam rerum om-
 nium mundanarum materiam ex nihilo eduxisse. Atque esse
 creatum cum esse æterno componi nequit.

Enim 1^o creatio vere ponit extra Deum res creatas, quæ
 ex se esse non habent, et ex nihilo educuntur. Hæc autem
 positio passive considerata, ex rei natura momentum ali-
 quod signat, quod a sequentibus mutationibus distingui-
 tur.

Atqui hoc momentum suapte natura est ipsum temporis
 initium. Nam tempus nihil est aliud, quam mutationum se-
 ries quæ post creationem rebus creatis contingunt. Quum
 igitur ponuntur res creatæ, temporis initium ponitur.

Sed tempus quod initium habet, æternum esse non potest.
 Ergo.

295. 2^o Dices: si mundus æternus est, nullum instans
 assignari potest, in quo primo a Deo dimanavit. « Sicut
 » enim, inquit, (ita de æternitatis mundi assertoribus
 » S. Augustinus) si pes ex æternitate semper fuisset in pul-
 » vere, semper subesset vestigium, quod a calcante factum
 » nemo dubitaret; sic et mundus semper fuit, semper exi-
 » stente qui fecit (1). »

At qui hoc dicunt creationis conceptum plane tollunt.

(1) De Civ. Dei. Lib. X, c. XXXI.

a) Quia, ut diximus, creatio vere ponit res extra Deum. Hoc autem dici non potest, si nullum instans assignari potest, in quo ponantur, uti vel in allata similitudine perspicies.

b) Quia sic tolleretur discrimen omne inter creationem et conservationem. Nam et creationi et conservationi hoc commune est, quod res a Deo dependeant secundum esse quod habent. In hoc vero creatio a conservatione differt, quod creatio, præter dependentiam hanc, connotat insuper *novitatem essendi*; conservatio vero præcedentem rei existentiam supponit (263, 4°). Si itaque res finitæ nunquam esse cœperunt, nunquam haberunt essendi novitatem; ac proinde semper conservatæ fuerunt, nunquam creatæ. Id quod profecto mente concipi non potest (1).

296. COROLLARIA 1° Ex argumentis modo allatis intelliges vim rationis illius, quam patres perpetuo adhibent, præsertim contra arianos: *æternitatem solius Dei propriam esse*. Nempe quia creatura quævis et produci eget, et existentiam habet tempore mensurabilem; quæ duo cum æternitate pugnant. Dei autem est et esse a se, et extra tempus esse, quia prorsus immutabilis est.

2° Respondere poteris quærenti, unde repugnantia mundi æterni probetur. Probatur videlicet non ex parte virtutis divinæ, sed ex parte mundi, et nominatim ex duabus mundi proprietatibus omnino essentialibus, quæ sunt esse *continuentem* et *successivum*.

3° Quanquam igitur Deus ab æterno virtutem habuerit qua mundum creare poterat, et ab æterno mundus possibilis fuerit, divina tamen virtus mundum æternum creare non potuit; quia mundus æternus possibilis non est.

4° Si qua creatura concipi posset in qua nulla esset successio, hæc quoque ab æterno creari non potuit; quia creatio temporis initium importat, ac proinde existentia cujus-

(1) « Ponere mundum æternum esse, sive æternaliter productum, ponendo res omnes ex nihilo productas, omnino est contra veritatem et rationem .. et adeo contra rationem ut nullum, philosophorum quantumcunque parvi intellectus crediderim hoc posuisse, » S. Bonaventura. *In II sent.* Dist. I, q. II.

vis rei creatæ rerum aliarum saltem possibilium mutationibus mensurabilis est. Nullum autem mensurabile infinitum.

5° Mundus proprie loquendo dici nequit creatus in tempore; quia ante creationem, nullum erat reale tempus; sed *cum tempore*; quia temporis initium creatio posuit.

6° Si quis dicat, Deum potuisse mundum creare prius, hoc non aliter intelligere poterit, quam de tempore ideali; nempe creationem rerumque vicissitudines ita ordinari potuisse, ut post hanc creationem, et ante eas rerum vicissitudines quæ creationem reipsa consecutæ sunt, aliæ insuper vicissitudines possibiles contingerent.

CAPUT III.

DE MUNDI OPIFICIO.

ARTICULUS I.

Unde sit rerum distinctio atque ordo.

297. Duo supersunt quærenda: 1° quis fuerit mundi, ac rerum quæ in eo sunt opifex; 2° quo modo et ordine mundi opificium perfectum sit. De fine enim ejus ac perfectione dicetur commodius in theologia.

PROPOSITIO I. *Corporum mundanorum distinctio et ordo a Deo est materiæ creatore.*

Videlicet materiæ distributio in cœlestes globos, ac terræ formatio, itemque mira illa rerum varietas quibus terra exornatur, non materiam, non casum fortuitum, sed eundem qui materiam, ex nihilo eduxit, Deum effectorem habet. Utrum vero immediate aut mediate per alia agentia sibi subjecta, Deus hæc perfecit, modo non quærimus. Est iterum hæc propositio contra epicureos, eosque omnes qui materiæ viribus essentialibus, vel casui fortuito mundi opificium attribuunt.

298. Probatur propositio 1° Deus cum sit intelligens, creare materiam non potuit, nisi in aliquem finem; operum autem Dei hic unus finis esse potest, ut ejus perfectionem ac bonitatem manifestent. Sed iners atomorum massa, si

talispermansissetcujusmodi creata est, huicfini assequendo, saltem eo modo qui Deo dignus esset, par non erat. Oportuit ergo, ut ex hac materia variæ res formarentur, quæ tum multiformi sua perfectione, tum ordine quem inter se haberent, divinam perfectionem, quantum poterant, repræsentarent.

2° Qui mundi opificium perfecit, ostendit se absolutum dominum esse et materiæ et spirituum. Nam materiam formavit prouti voluit, ipsasque atomos suis legibus obligavit; spiritus vero humanos corporibus intimo necessarioque nexu conjunxit. Sed nemo alius hoc pacto dominari poterat seu materiæ seu spiritibus, nisi et materiæ et spirituum creator. Ergo.

3° Si quid materia per se efficere poterat, sane vi sibi essentiali hoc fecisset. Atque vis materiæ essentialis inepta erat prorsus ad mundi formationem. Nam vis essentialis materiæ est vis resistendi, quæ per se non agit nisi uni corpori aliud corpus admoveatur. Sed nullum corpus admove se potest alteri per se; quia nullum corpus potest se determinare ad motum. Ergo neque resistendi vis transire ad actum poterat sine primo aliquo motore, qui corpus esse non potest (192, 5°). Sed præterea ad mundi constitutionem requirebantur attractionis, cohesionis, affinitatis vires, et calor, et lux, et electricitas, et magnetismus. Atqui hæ omnes vires resultant quidem ex vi resistendi, sed non ex illa sola, at posita actione alterius, qui ponderabilem materiam intra imponderabilem opportune distribuerit, ac motus varios utriusque atomis impresserit. Hæc autem distributio et ille impulsus sapientissimam mentem postulabant; nam totum, veluti in germine, futurum hunc ordinem continere debebant. Ergo.

4° Unde iterum sic arguo. Qui materiales atomos creavit, creare eas non potuit, nisi aliquo modo dispositas, et vel in quiete vel in motu constitutas. Nefas autem existimare, primitivam illam dispositionem sine consilio, ac sine summo consilio, creatorem constituisse, aut singulas atomos in quiete vel motu incogitantem posuisse. Utrumque ergo ex intentione alicujus finis effecit. Atqui poterat atomos ita dispo-

nere, in iisque tales ciere motus, ut exinde vires diversæ quas materia nunc possidet, resultarent, ac dein ex iis viribus per varias vicissitudines hæc rerum universitas oriretur. Cur ergo dicemus, creatorem atomis eam dispositionem eumque motum non dedisse?

5° Sed organica corpora ulteriorem adhuc creatoris curam expostulabant. Omnes enim quotquot sunt materiæ inorganicæ attributæ vires, prorsus ineptæ sunt ad plantas animantesque effingendas. Plantæ enim v. gr. ex seminibus vel ex aliis plantis progerminant; semina autem in plantis solummodo elaborantur. Imo substantia omnis, sive vegetalis, sive animalis, sive liquida, sive solida, intra ipsa vegetalia et animalia duntaxat, ac mediis organis, non solis mechanicis aut chemicis viribus, conflatur. Eademque hæ substantiæ organicæ extra organa, et ab influxu vitæ remotæ, tantum abest ut plantas aut animalia efficere possint, ut imo ad modum substantiarum mineralium crystallinas formas assumant, ac materiæ inorganicæ leges in omnibus sequantur. Sunt ergo in corporibus organicis vires naturales ad sibi similia gignenda, sed nulla est vis hujusmodi in natura inorganica. Peculiaris illa molecularum distributio et conjunctio quam organisationem dicimus, nec per chemicas attractiones, nec per electricitatem, nec per aliam hujusmodi vim quamcunque perfici primo potuit.

299. Quod si essent in materia elementari virtutes illæ plasticæ nescio quæ, quibus plantas et animantes primo formatas esse quidam somniati sunt; cur hæ vires non amplius operantur? Cur nunquam videre licuit equos aut homines e pulvere erumpentes, aut plantas sine semine fruticantes? Certe quum tellus eas corporum organicorum species produxit, quæ hodie in ea vigent, statum præsentis similem obtinuisse putanda est. Cur ergo quæ prius tam fecunda parens fuit, modo sterilis facta est? Præsertim quum species illæ atomorum, ex quarum concursu corpora organica prodire, in rerum natura adhuc subsistant.

300. Sed de animalibus illud quoque notandum est: ea non solum organico corpore constare, sed anima insuper

simplici et a corpore distincta; quæ certe per atomorum concursum effici non potuit, sed infinitam creatoris ex nihilo virtutem postulabat. An ergo dicemus creatorem animas fecisse, corpora vero casui commisisse?

301. Objicient fortasse, oriri hodieum animalia aliter quam per generationem; v. gr. insecta quædam ex putri, et ranas post imbrem ex pulvere. Sed in primis aniles fabellas recinunt, quum hæc in præsentī obijciunt. Nemo enim ignorat, utramque opinionem esse rejectam, ac factum utrumque aliter modo ab omnibus explicari. Ast hoc omisso, cur cætera quoque animalia hoc pacto non amplius enascuntur? Nonne omnia sic primo nata sunt? Cur ergo primitiva illa ortus ratio in omnibus fere speciebus vigere desiit?

302. Addam et hoc: animalia quum primum ex terra emersere, aut perfecta prodiisse dicuntur, cujusmodi sunt modo animalia adulta, an vero imperfecta, quemadmodum embryones, catuli, puli, infantes. Si primum dicunt, rem dicunt plane incredibilem et arbitrariam, imo omnibus quæ experientia demonstrat, plane contrariam. Nihil enim videmus oriri perfectum. Quis autem putet, plus potuisse terram vita carentem, aut fortuitum molecularum quarundam concursum, quam modo possint animalia, ex quibus animalia generantur solummodo imperfecta? Alterum ergo dicendum. At quomodo potuisset infans v. gr. diu vivere sibi relictus ac solus, sine ullo subsidio, nutrimento, defensione?

Igitur materia elementaris, cum omnibus suis viribus, organica corpora, multoque magis animalia, perse effingere non potuit. Ergo in hunc finem vis alia a materiæ viribus diversa requirebatur. Hanc autem vim summo consilio ac divina sapientia operatam fuisse ejus opera evidentissime manifestant. Ergo.

ARTICULUS II.

* *De modo et ordine quo mundus est conditus.*

303. Modum atque ordinem quo hæc rerum universitas a summo opifice condita et perfecta est, triplici methodo determinare possumus; deductione ex principiis analyticis, tra-

ditione, observatione. Viam alteram persequi historici est; qui tertiam inierunt peculiarem de terræ formatione statuere scientiam quam *geologiam* dicunt: prima est philosophi propria. Fatendum tamen, solam analysim conjecturas tantummodo præbere posse philosopho; quare ut aliquid certi definiatur, traditionis ac geologiæ adjumenta accersere oportet. Nos breviter exponemus quid suppeditare videatur analysis, atque hoc deinde traditionis et geologiæ testimonio confirmabimus.

PROPOSITIO II. *Mundi constitutio mundanorumque corporum molitio post creatam a Deo materiam, ipsius materiæ viribus commissa fuisse videtur; ita tamen ut divinus opifex 1º sapientissima atomorum materialium dispositione ac motione omnem futurarum vicissitudinum seriem determinaverit ac præparaverit, et ad intentum finem ordinaverit; 2º immediate operatus sit in plantarum et animantium, multoque magis in hominis formatione.*

304. Duobus modis divinum mundi opificium perfici potuisse manifestum est. Potuit enim Deus uno momento omnia efficere et perficere, materiam creans simul et secundum archetypas ideas formans. Potuit quoque, materialibus atomis creatis, iisque opportune dispositis ac motis, cætera quæ naturalibus viribus fieri poterant, iis efficienda committere; ut variis modis attrahentibus sese primis rerum elementis aut repellentibus, per successivas evolutiones ac motus, primum cælestes orbes ac terrestres globus constituerentur, ac deinde in terra, et aer et maria et montes, et si quæ alia naturæ viribus fieri poterant, efficerentur; tum ipse pro vario atmospheræ statu ac telluris temperie, variis terram convestiret plantis, ac diversas animantium classes effingeret.

305. Primus effectiois modus manifeste possibilis est, nihilque habet quod Deum dedecet. Modi quoque alterius possibilitas non minus evidens est, si duo illa quæ in propositione præstituimus, in tuto collocentur. Ut enim paulo ante diximus, primitiva atomorum dispositio fortuita esse non potest (298, 4º). Organicorum quoque corporum, ac

maxime animalium, inorganicæ materiæ vires causa sufficiens non sunt (298, 5°). Si igitur et primitiva atomorum dispositio et plantarum atque animantium formatio immediatæ Dei operationi tribuantur, evidenter possibile est, cætera quæ naturæ viribus fieri poterant, voluisse Deum ut ab iis efficerentur.

306. Cum uterque modus possibilis sit Deoque conveniens, utrum horum adhibuisse Deum existimemus? Hic, ut dixi, nihil aliud rationi licet, quam probabilitates conjecturasque sectari. Dico igitur, si a priori de re hac decernere volumus, probabilius esse, Deum naturalium virium ministerio, quoad eæ poterant aliquid efficere, usum fuisse. Hæc est enim divinæ providentiæ consueta agendi ratio, ac tum in corporeo mundo tum in spiritali, nec in naturali solum ordine; sed etiam in eo qui est supra naturam, perpetuo notata lex, ut quæcunque creatæ res acceptis a creatore viribus agere in alicujus operis executione possunt, ea omnino illis efficienda committantur; ac tum solum divinæ potentiæ immediatæ adsit actio, quum vel creatæ agentia nulla sunt, vel si quæ sunt, viribus ad opus idoneis destituuntur. Mitto exempla quæ sunt infinita et obvia; ac noto solum, hanc agendi modum, ut alibi dixi (O. 288), divinam sapientiam, bonitatem, potentiam multo magis commendare, quam si Deus omnia immediate ageret.

Jam in rerum exordio putandum est, Deum usitatum sibi agendi modum servasse, cum præsertim tunc et providentiæ futuræ ordo inciperet, et ad mundi finem hic agendi modus maxime conduceret. Concludere igitur licet, divinum artificem non omnia per se immediate perfecisse quæ ad mundi molitionem pertinerent; sed ea quæ ipse solus facere poterat, ipsum fecisse, ea vero ad quæ virium creaturarum operatio sufficiens erat, iisdem exsequenda destinasse.

307. Quod si hoc fuit divini auctoris consilium, profecto non poterant omnia uno momento fieri. Nam creatæ vires non agunt nisi in tempore, ac per multos solummodo variosque motus, perque multas ac successivas vicissitudines, combinationes, pugnas, catastrophes ad hunc rerum ordi-

nem constituendum pervenire poterant; etiamsi de solo inorganico regno loquamur. Ac si iis legibus in rerum principio materia regebatur quibus nunc regitur (de quo quis dubitet?), certissimum est, tantarum rerum molitionem, nisi longo temporis decursu, perfici non potuisse. Ergo si divini operis executio materialibus viribus commissa est, diuturnum satis temporis intervallum mundi conditio postulavit.

308. Hæc ratio conjectando; ejusque conjecturas mirifice confirmat, institutis in terrestri cortice accuratissimis observationibus, geologia. Illud enim in præsentī apud geologos omnes, vel certe apud nobilissimos quosque, ratum in hac re fixumque est, terreni globi strata atque involucra naturæ viribus successive elaborata multorum sæculorum opere fuisse. Id quod eorundem stratorum natura, partitio, dispositio, elevatio, inclinatio, ac fossilia corpora quæ in iis consepulta reperiuntur, vel invitis animis suadere videntur.

309. Post primum terrestris globi corticem, qui vegetali, ut aiunt, terra fluvialibusque crassamentis, aut vulcanicis ejectionibus constat, jacet certa quædam series stratorum, quæ alia aliis super posita sunt, et inter se tam substantiarum quibus coalescunt, quam fossilium organicorum quæ continent, natura differunt. Strata hæc *terrena* vocant geologi.

Quæ profundissima sunt, et olim *primitiva*, appellabantur, igne elaborata creduntur. In his eminent crystallizationis opera plus minusve distincta, plus minusve perfecta; nullæ vero sunt organicorum corporum reliquiæ.

His superinsident terrena, quæ quidam dixere *transitionis*. Hæc ex marino sedimine genita se produnt, et ab igne modificata. In his fossilia inveniuntur organica, nempe plantæ, zoophyta et quædam testacea.

Succedunt terrena *secundaria*. In his pariter aquarum sedimenta reperis, atque insuper immania fossilis carbonis crassamenta; simul vegetationis reliquias multas, reptilium ingentium exuvias, ac prima avium vestigia.

Editiora sunt terrena *tertiaria*. In quibus præter marinas exuvias, reliquæ multæ delitescunt quadrupedum terrestrium; inter quas quæ vetustiores apparent, a generibus modo in terra degentibus valde differunt; recentiores non ita.

310. Ex horum omnium observatione deducunt geologi 1^o Strata hæc seu involucria terrestris globi alia aliis antiquiora esse, videlicet inferiora superioribus. 2^o Ea esse evidenter aquea sedimenta, neque celeris undarum transitus, aut cataclysmi cujusdam præceps ac perturbatum opus, sed a tranquillis ac diu permanentibus aquis lente demissa. Hinc 3^o terram, ubicunque ea strata sunt, marinis ut plurimum, alicubi etiam palustribus aquis diu fuisse contactam. 4^o Cum strata eadem concentrica non sint, sed horizontalia in plano, ad latera vero montium elevata, concludere necesse est, substantias quæ in profundioribus terræ visceribus latebant, sæpe in altum ejaculatas e mari erupisse, ac superimpositos sedimenti cortices extulisse ac sinuasse. 5^o Hinc terram habitabilem e mari emersisse, ac sæpe ubi mare fuerat terram fuisse, et vicissim terræ mare successisse; nam super elevata strata iterum horizontalia cernuntur, et sub marinis subsidentiis palustres, cum terrestris vegetationis reliquiis. 6^o Multas magnasque vicissitudines conversionesque superficiem telluris passam esse ante hominis apparitionem; nullæ siquidem hominis exuviæ aut monumenta in supra descriptis terrenis reperiuntur. 7^o Fuisse tempus quum nec plantæ nec animantia ulla in terra essent, plantas dein germinasse, postremo animantia apparuisse, alia post alia; imperfectiora primum, dein perfectiora. Demum 8^o multa plantarum, multa animantium genera late super terram multiplicata fuisse, dein omnino deleta, aliis in eorum locum succedentibus.

311. Ex his omnibus concludunt, naturæ vires secundum leges quibus nunc reguntur, operantes, gradatim, successive, cum progressu ab imperfectis ad perfectiora, longo sæculorum decursu, multisque interpositis terrarum elevationibus, ac violentarum eruptionum vicissitudinibus, terrestrem glo-

bum ad eum statum ornatumque adduxisse, in quo erat quum hominis domicilium esse cœpit. Conclusio igitur nostra geologiæ universæ conclusio est.

312. Eadem confirmant populorum traditiones. Quæ quidem detractis fabularum additamentis et allegoriæ involucriis, huc redeunt omnes: mundum divina virtute genitum in tempore; præcessisse chaos seu elementorum commixtionem; deinde successive ignem, mare, cælum, terram, viventia producta, atque ultimo hominem. Ita mosaica in primis historia, quam divina nobis commendat auctoritas; tum Ægyptiorum, Phœnicum, Chaldæorum, Persarum, Hetruscorum, Græcorum, nec non novi orbis populorum traditio. Horum omnium cosmogoniæ quoad essentialia cum Moysis narratione conveniunt; hic autem consensus non aliunde repeti potest quam a primitiva revelatione, per primos humanæ stirpis parentes ad posteros transmissa.

313. Quod vero spectat ad temporis periodum, intra quam mundi conditio perfecta est, ex profanis traditionibus nihil certi hac de re determinari potest. Divina solum Moysis historia hoc tempus determinat. Docet enim inspiratus auctor, primo totam mundi aspectabilis materiam ex nihilo conditam « In principio creavit Deus cælum et terram (1); » deinde sex dierum spatio mundi molitionem ornatumque perfectum esse. Id quod prima fronte iis quæ diximus, quæque geologia docet, obstare videtur. Quæ apparens pugna ut removeatur, sedulo in primis notandum est, dies illos mosaicos, quorum primi tres effluerunt antequam tellus solis radiis illuminaretur, septimus vero, in quo Deus *requievit ab universo opere quod patrarat* (2), adhuc perdurat, hujusmodi inquam dies mirabiles quosdam dies esse, et extra nostrorum dierum ordinem positos; nec mirum si ab iis omnino differant.

Certe cujusmodi hi dies fuerint, difficile explicari posse sapientiores quique semper existimarunt; in iisque explicandis nunquam patrum ac theologorum unanimis senten-

(1) Gen. I, 1.

(2) Gen. II, 2.

tia fuit. Sane s. Augustinus pluresque alii cum illo opinati sunt, sex illos dies unicum fuisse momentum, in quo *causaliter, invisibiliter et potentialiter* omnia facta fuerint quæ deinde in temporum serie reipsa facta sunt (1). Quæ opinio *rationabilior* habita est a S. Thoma (2), et æque probabilis ac vulgaris interpretatio, quæ dies illos vigintiquatuor horis contineri statuit (3).

Recentiores vero non pauci existimant, dies hujusmodi diurnas temporis periodos fuisse. Atque hanc nos sententiam amplectendam censemus, quæ quoad rei substantiam, cum Augustini sententia congruit.

314. Omittam igitur referre hypotheses cæteras, quæ ad conciliandam cum geologorum placitis Moysis narrationem, a piis doctisque viris excogitatæ sunt. Missa quoque faciam hermeneutica argumenta, quæ ad hanc sententiam confirmandam allata sunt, aliaque ex ipsa genesi deprompta (4). Sufficiet solum hæc duo notasse : 1^o vocem *dies*, etiam apud Hebræos, sæpe accipi pro tempore, etiam longissimo ; sæpe pro lucis tempore ; 2^o vocem *vespera*, significare tenebrarum initium, aut totum tenebrarum tempus : vocem *mane* lucis initium.

315. Potius, nam philosophicum negotium hoc est, exponam breviter rationes præcipuas, quæ nos suadent, ut vulgarem mosaicorum dierum interpretationem seponamus.

1^o Et re quidem vero poterat Deus omnia per se uno momento facere, poterat quoque per has, quas rebus a se conditis indidit, vires ac leges : uno aut altero modo semper Deus operatur. Quænam igitur ratio reddi poterit, cur mediam quamdam in eo rerum principio inierit viam? Illa omni ex parte, unoque instanti perfecta creatio, ad ostendendam divinam potentiam aptissima erat : hæc per naturales causas

(1) De Genesi ad lit. Lib. IV et alibi.

(2) In II sent. D. XII, art. II.

(3) Summ. th. p. I. q. LXXIV. art. II.

(4) Eas hypotheses et hæc argumenta reperies in docto opusculo eruditionis æque ac pietatis plenissimo quod cl. P. Jo. Baptista Pianciani S. J. hoc de argumento edidit, cui titulus : *In historiam creationis mosaicam commentatio*. Neapoli, 1831. Cf. § V, seq. et § LI, seq.

perque simplicissimas leges elaborata formatio, sapientiam fortiter ac suaviter omnia disponentem mirifice commendabat. At in tertia hac operandi ratione nihil video quod Deum deceat. Concipere enim nequeo Deum ita operari, ut cum leges statuisset quæ huic rerum ordini constituendo pares essent, iis tamen non utatur, imo eas violet, aliasque in earum locum ad naturæ initia gubernanda constituat, atque magnorum ope miraculorum urgeat effectum quem integrum jam inde a principio præstare poterat : cumque urgere sic vellet, tamen uno solum instanti singulis operetur diebus, subsequenti die alteroque momento opus suum resumpturus.

2^o Cum aliquid frustra facere Deum suspicari nefas sit, hic tamen Deus sapientissimus exhibetur confusionem creans, cum ordinem regnare vellet, sequenti reapse die confusa separaturus ordinemque inducturus.

Quorsum triduana illa lux ante solis ortum, cum sol post tres dies apparere debebat? Hodie tantam aquarum vim producit ut totam terræ superficiem contegant, totaque aquis terra imbibatur : cur hoc, si crastina die aquas in unum latius reducturus est, ut apta herbis atque arboribus terra inveniatur?

At quæro, quomodo aquæ in unum locum recesserunt, quæ totam pridie terram occupabant? Vel erant maris cavitates, vel non erant. Si erant, quid aquas impedit ne naturali motu in eas procurrerent? Si non erant, ergo cum Deus paulo ante terræ superficiem æquabilem fecisset, postea opus suum emendavit, eamque hiulcam fecit.

3^o Quid fuit lux illa quæ primo die refulsit; aut ubi illa refulsit? Non a sole fuit, nam de sole fit mentio quarta die : fuit ergo aliquid aliud quod tribus illis diebus, quasi quoddam solis supplementum esset. Quidquid fuerit, si immota mansit lux isthæc, tota terra fuit semper dies, aut si unum tantum hemispherium illuminabatur, fuit semper ex una parte dies, ex altera semper nox. Non fuit ergo diebus illis vicissitudo diei et noctis. Si vero lux hæc gyrum egit, primo hoc gratuito supponitur; deinde fecit illa diem in uno hemi-

spherio, ac tenebras reliquit in altero. Semper proinde in terra et dies fuit et fuit nox.

4^o Demum vulgaris interpretatio magnum hoc habet incommodum, quod geologiæ conclusionibus (310) contraria est; ac propterea si quis ei pertinaciter inhærere velit, is nobilissimæ scientiæ bellum indicat oportet. Id quod in divinæ scripturæ interpretatione cavendum maxime semper patres censuerunt, atque in primis Augustinus (1) et Thomas (2).

316. Si quis has omnes difficultates declinare aut superare se posse putat, asserendo per miraculum esse factum id omne quod intra sex illos dies naturalibus viribus fieri non poterat, huic primo cum Suaresio respondebimus: « Opera » miraculosa vel extraordinaria absque necessitate vel » sufficienti testimonio audienda non sunt (3). » Deinde videant qui ita sentiunt, an de Deo digne loquantur quum talia ipsi miracula adscribunt; quæ nimirum potentissima sapientia in eum finem effecerit, ut vel recens a se factum opus corrigeret, vel absurdos effectus a suis ipsis operibus dimanantes impediret, miracula quæ legibus naturæ derogarent in ipso naturæ ac rerum exortu, quum maxime suum cuique rerum generi modum atque ordinem Deus præscriberet; quæque partim ad accelerandum creationis opificium, partim ad retardandum fierent. Videant an hæc agendi ratio digna sit illo, qui vel uno voluntatis suæ nutu omnia facere quæ vult, vel sapientissime in causis disponere faciendâ potest.

317. Cum igitur vulgarem sex dierum interpretationem tot tamque graves difficultates premant, in ea nullo pacto con-

(1) « Hoc indubitanter tenendum est, ut quidquid sapientes hujus mundi de « natura rerum veraciter demonstrare potuerint, ostendamus nostris libris non « esse contrarium. » *De Gen. ad lit.* Lib. I, c. XXI. Idipsum docet pluribus aliis locis.

(2) « Cum scriptura divina multipliciter exponi possit, nulli expositioni aliquis « ita præcise inhæreat, ut si certa ratione constiterit hoc esse falsum quod aliquis « sensum scripturæ esse crederet, id nihilominus asserere præsumat, ne scriptura « ex hoc ab infidelibus derideatur, et ne eis via credendi præcludatur. » *Sum. th.*, p. 1, q. LXVIII, art. I.

(3) *De opere sex dier.* I, II, c. VII.

quiescere possumus. At pone dies illos sex temporis periodos fuisse, tantæ diuturnitatis quanta ad opus secundum Dei leges consummandum requirebatur: atque hoc ubi posueris, uno veluti ictu difficultates et rationis et scientiæ profligas, omnibus geologorum placitis factum est satis; et non modo nulla est amplius geologiam inter ac mosaicam historiam discordia, sed est concordia tanta, ut fateri quisque debeat, mirabilem prorsus eam esse ac divinam historiam, quæ omnes naturæ indagatores in tam abditis veritatibus promulgandis prævertit, et jam inde a vetustissima ætate ea docuit, quæ post multa sæcula multorumque labores, vix nostris temporibus, omnibus adhibitis adminiculis scientiarum, reperire tandem ex parte potuit humanum ingenium.

Concludemus ex dictis hucusque, et rationem, et observationem, et traditionem omnem probare, mundi molitionem naturæ viribus a divino opifice permissam esse, ac in temporis successione perfectam.

ARTICULUS III.

* *Brevis cosmogoniæ adumbratio.*

318. Superest, ut quo ordine mundi moles effecta, ac terra quam incolimus formata fuerit, breviter innuamus. Inutile prorsus est, ut commemorem arbitrarias illas et obsoletas cosmogonias et geogonias quæ in eum unice finem a profanis quibusdam auctoribus in medium prolata videntur, ut Moysis narrationi contradicerent. Has enim omnes funditus jam evertit geologia. Simul porro collatis hujus scientiæ conclusionibus cum iis quæ sacra docet historia, hæc eventuum series in mundi primordiis fuisse videtur:

319. Principio creavit Deus materiam omnem tam ponderabilem quam imponderabilem; ponderabilem in varias massas distributam, imponderabilem quaquaversus diffusam. Massæ porro materiæ ponderabilis opportunis secernebantur intervallis, ac tot erant numero, quot sidera ac planetas archetypa mundi idea præfiniebat. In invisibilibus hisce et in compositis atomorum, ut ita dicam, agminibus tota physicarum vicissitudinum series, totus futuri mundi

ordo totaque pulchritudo, quasi in semine præcontinebantur.

320. « *Moleculæ elementares* (prosequar enim verbis » viri cl. a quo hæc didici, cujus commentarium supra » citavi), legi universalis gravitatis obediens, alteræ ad » alterum accederent necesse erat, atque ita quæ ad tellu- » rem nostram efformandam fuerant a Creatore præordi- » natæ, globum hunc consociatæ constituerent. Igitur dum » undecunque hæ moleculæ sibi invicem occurrerent, post- » quam altera ad alteram satis accesserant, chimicæ com- » binationes juxta chimicas leges confici debebant. Ita e » simplicibus seu elementaribus moleculis mixta efficie- » bantur.... Hæc... lucem aliquam generabant, simulque » temperiem elevabant: qua ex re novæ combinationes oriri » debebant, et lux et calor magis ac magis augeri. Inter has » novas combinationes, imo una ex præcipuis putanda est » fuisse synthesis aquæ, quæ magnam vim caloris luminosi » producit; cumque maxima ibi adesset copia elementorum » illorum ex quibus aqua constat, in immensum calor et lux » augeri, novæque inde affinitates excitari debuere... Ex his » combinationibus nova fiebant incrementa caloris et lucis. » Interea istæ syntheses et combustiones una cum luce et » calore quorum et effectus erant et causæ perspatium dif- » fundebantur (1). »

Quid plura cupis? Ecce tibi post tenebras lucis initium, lucem, diem primum.

321. « Statim ac, ita idem auctor, in tellure et in circum- » stante spatio primum illud incendium resedit, descen- » dente infra gradum luminosi caloris temperie, obscuritas » fortasse perfecta terram rursus occupavit. Etsi enim valde » probabiliter sol tunc erat radios evibrans quibus lux pro- » pagatur, tamen... a densissimo vapore opacisque per » spatium disseminatis corpusculis, radiorum solarium iter » obstruebatur, nec ii ad tellurem usque, nisi paucissimi ac » debiles pertingebant. Et revera maxima illa aquæ copia quæ

(1) *In hist. mosaicam creationis commentatio.* Auct. Jo. Baptista Pianciani, S. J. § XXXIV.

» recens genita fuerat, quæque ob temperiem nimis adhuc ela- » tam, super terræ superficie consistere non poterat, cingebat » undequaque terram densissima nebula vaporis, ut dicunt, » vesiculosi, cui probabiliter innumeræ aliæ opacæ parti- » culæ sive metallicæ, sive aliarum specierum commisce- » bantur.... At paulatim opaca corpuscula præcipitabant, » et quando temperies satis depressa id permisit, maxima » etiam vis aquæ decidebat, et globo terrestri superextende- » batur... Caligo illa dissipabatur... magna illa corpuscularis » sphaera quæ globum terrestrem cingebat, satis diaphana » evasit. Vapor tamen aqueus concretus, et ille quidem » copiosus, in editis sphaeræ hujus regionibus mansit, ubi » major fuerat refrigeratio quam in parte inferiori; atque » ita nebulosum veluti fornitem constituit, qui per illam » diaphanam atmosphæram ab aqua terram contigente se- » parabatur... Nebulosus ille fornix astrorum quidem vi- » sum prohibebat, at satis meare sinebat solarem lucem, » quemadmodum et modo fit quum nubes cælum obdu- » cunt (1). »

Habes iterum tenebras in terra, ac deinde lucem, diem secundum.

322. Tum vi subterranei ignis terræ ex undis elevari cœperunt, et in parato sibi loco vegetalis regni primitiæ apparere. Vegetatio autem in uda illa et calida et constanti temperie, intraque atmosphæram acido carbonico refertissimam, mirifica accipiebat incrementa, ac brevi omnes, quæ emerserant, terras occupavit. Simul incipiebat in aquis animalis vita ab imperfectissimis hujus regni divisionibus *radiantium*, seu *zoophytorum* et *mollium testaceorum*, de quibus nullam Moyses mentionem facit; nam eorum solummodo animalium originem commemorat, quæ per illud tempus inter animalia computabantur.

323. Si vespèram et mane in die hac et sequentibus quæris, audi auctorem quem sequimur: « Magna vis ex imo in » altum terrena satis extensa agens, atque ad ea super aquas » elevanda idonea, si uno aut fere eodem tempore in multis

(1) *Ibid.* § XXXIX.

» terræ partibus, iisque inter se dissitis operata est, potuit
 » materia ex imo in aerem ejaculata obscuritatem quamdam
 » producere ut sæpe fit in aliqua parte aeris quum ignivo-
 » morum montium fauces eructant. Præter ejaculatam ma-
 » teriam, magnam quoque vaporis vim tunc elevatam, et
 » cum vapore innumeras heterogeneas particulas quæ in
 » aqua tunc erant, æstimare possumus....

» Nec illud probabilitate caret, ipso initio dierum gene-
 » siacorum quarti, quinti et sexti tres revolutiones fuisse
 » in tellure, et ab his elevationes novas, majores adhuc iis,
 » quas tertia hæc periodus adduxit, profectas. Animadver-
 » terunt geologi, has telluris perturbationes ut minus anti-
 » quæ sunt, ita majores effectus produxisse; tum quoque
 » vel ante has perturbationes accidisse, vel ab eis] fuisse
 » inductas mutationes quasdam in aqua et in aere magni
 » momenti, quibus factum est, ut hæc media existentiae ac
 » nutritioni novarum classium viventium apta redderen-
 » tur... Non absurde igitur supponere possumus operibus
 » trium horum dierum præcessisse obscuritatem a maxima
 » copia vaporum concretorum, arenæ et aliarum molecu-
 » larum ex imo erumpentium effectam... Dispersio hujus
 » caliginis et restitutio lucis *mane* dici potest (1). »

324. Post hanc periodum, dissipato vaporum nebuloso
 fornice, quo tellus hucusque circumcincta fuerat, sol, luna
 ac stellæ in terra videri cœperunt. « Idque vel gradatim ob
 » naturales causas lente et assidue operantes, vel, quod for-
 » tasse probabilius est, ob aliquam magnam catastrophem
 » quæ terrestri atmosphæræ notabilem attulit mutationem,
 » et continuos illos vapores disperdens, aerem radiis astro-
 » rum permeabilem fecit (2). » Quem quidem eventum hoc
 tempore contigisse, sola nos docet Moysis narratio; neque
 id profecto aliunde colligi poterat.

325. Insequenti epocha marinos reptiles, testudines, pi-
 sces, reptilia, volantia, alataque insecta, aves demum rerum
 conditor effinxit. « Hæc dies, ex geologicis doctrinis longis-

(1) Op. cit. § XLVII.

(2) Ibid. § LVI.

» sima periodus fuisse putanda est. Facies telluris et maris
 » pluries immutata fuit... Interim lutulentæ eruptiones e
 » maris fundo profectæ aquas late turbabant, et non modo
 » innumera individua, sed plures species fortasse, imo et
 » intégræ viventium genera destruebant: immensa congeries
 » vegetabilium substantiarum in imo recondebatur mari, et
 » in futuros usus nascituri generis humani reservabatur:
 » tandem antiquæ illæ telluris perturbationes, et aquarum
 » nobis fontes parabant, et metalla (1). »

326. In ultima periodo, quæ longo et ipsa tempore com-
 prehensa fuisse videtur, animalia terrestria condita sunt;
 primo multa quæ amplius non exstant, dein quæ nostra adhuc
 ætate vigent, interque hæc primo herbivora, deinde
 feræ et quadrumanes. Quum vero omnia ita disposita, tem-
 perata, exornata sunt, ut hominis aptum domicilium terra
 effecta esset, tum demum hic universi princeps, et totius
 naturæ nomine creatoris sacerdos, homo apparuit.

327. Ex his vides quam mirabili consensione et geologia
 sacram historiam illustret, et sacra historia geologiam com-
 pleat. Mirandum sane, disciplinam hanc quæ in hostium, ut
 ita dicam, castris genita fuit, ut adolevit, ut terræ viscera
 perlustravit, atque ad scientiæ dignitatem evecta est, cum
 ad *maledicendum* divinæ revelationi ab incredulis vocaretur,
 ipsi e contrario, in Balaami illius similitudinem (2), *bene-*
dixisse, ad ejusque tuendam veritatem, incredulorum acie
 deserta transiisse. Nec vero aliter fieri poterat. Quemadmo-
 dum enim nulla tenebrarum cum luce cognatio est, nulla
 societas; ita quoque nullum veritatis contra veritatem dissi-
 dium est. Simile quiddam pluribus aliis disciplinis, intra
 paucorum annorum spatium, accidisse vidimus.

(1) Ibid. § LXVI.

(2) Num. XXII, 11.

LIBER TERTIUS.

CAPUT I.

DE SPATIO.

ARTICULUS I.

Questionis expositio.

328. Quæstiones aggredimur satis obscuras, et non paucis difficultatibus asperas; quæ difficultates non modo a variis philosophorum opinionibus, sed a phantasia maxime nostra consurgunt, quæ cum in pluribus aliis magno nobis adjumento est, hac in re mentem valde implicat, et in devia abducit. Exponamus primo conceptus nostros.

329. Si nosmetipsos consulamus, quid nobis obversetur animo, quum de *spatio*, *loco*, *distantia*, *vacuo* cogitamus, hæc profecto deprendemus:

1° *Spatium* nobis repræsentari tanquam *extensionem* in longum, latum et profundum, quaquaversus diffusam; absolute *vacuam*, in qua omnia locantur, omnia insident ac moventur corpora quæcunque sunt, totusque jacet mundus; quæ corporum omnium antecessit existentiam, quæque substituta foret, etiamsi omnia corpora in nihilum abirent: extensionem hanc non mundi limitibus definiri, sed ultra quoscunque limites in *immensum*, ac sine fine protendi, ita ut infinita possit in se corpora recipere: eandem *immobilem*, *geometricè continuam*, *unam*, plane *indivisibilem*, quaquaversus *permeabilem*, *increatam* demum, *æternam*, *necessariam*, *indestructibilem* esse. Talem spatii repræsentationem mente gerimus: atque hoc est spatium quod *absolutum* ac *purum* dicimus.

Exinde 2° *loci* notio derivatur: locum enim appellamus eam spatii hujus partem, quam corpus occupat.

3° *Distantiam* vocamus partem hujus spatii, quæ inter duo corpora interjacet.

4° *Vacuum* eam partem in qua nullum insidet corpus, ut est infinitum spatium extramundanum.

330. Quæritur jam, quænam realitas conceptibus hisce respondeat. Recenseamus primo philosophorum opiniones.

Democritus, Epicurus, alique ex Græcis, quibus dein adhæsit Gassendus, putarunt spatium extra mentem esse in omnibus idipsum quod nos concipimus, extensionem nempe vere existentem, rerumque omnium receptaculum infinitum et increatum; quæ nullum quidem corpus sit, nihilominus sit quædam res, non substantia profecto nec accidens, sed medium quiddam inter utrumque.

Cartesius ex sua de corporibus sententia (26) conclusit, spatium hoc esse verum corpus, non imaginarium, sed reale (255, 2°).

Newtonus, Clarkeius, nonnullique alii ex Anglia philosophi idipsum, quod Gassendus, de spatio senserunt, affirmaruntque præterea, spatium esse attributum divinæ substantiæ, nempe immensitatem. Aliquid simile dixerat insignis theologus Leonardus Lessius; qui tamen non de spatio reali locutus esse videtur, sed potius de origine possibilitatis spatii realis (1).

Contra hos Leibnitzius contendit, spatium nil aliud esse quam *ordinem simultaneorum existentium*. Quam sententiam præformaverat Scotus, quum docuit, locum esse *relationem continentis ad rem contentam*. Juxta hanc sententiam leibnitziani spatium reale a possibili distinguentes, hocdefinire solebant: *possibilitatem locandorum corporum*.

Paulo aliter antiqui nonnulli ante Aristotelem asseruerunt, spatium ante corpora mente quidem concipi ut extensionem aptam ad corpora successive recipienda: hanc vero aptitudinem non esse potentiam, quæ in ejusmodi extensione sit, sed potentiam quæ est in corporibus. Ejusdem sententiæ fuit cum quibusdam aliis Avicenna. Juxta quam Card. Ptolemæus (2), alique recentiores spatium absolutum nihil aliud esse aiunt, quam *possibilitatem corporum, extensione sola spectata*.

Demum Kantii opinio fuit, ut alibi retulimus (L. 515, 3°),

(1) *De div. perfect.* Lib. II, c. II, § 10.

(2) *Philosophia mentis et sensuum.* Diss. VI, Phys. Met. sect. I, § XIV.

spatium esse formam subjectivam facultatis sentiendi, qua phænomena formantur.

Nunc quid de his opinionibus existimandum sit, videamus.

ARTICULUS II.

Quid sit spatium.

351. PROPOSITIO I. *Spatium absolutum, prouti a nobis concipitur, non est aliquid extra mentem existens.*

1° Spatium huiusmodi, fatentibus huius sententiæ auctoribus, nec substantia esset nec accidens. Atqui repugnat reale esse aliquid, quod nec substantia sit nec accidens. Hæc enim duo immediate opponuntur; quia quidquid est, vel est per se, vel non est per se. Si per se, est substantia; si non est per se, vel est nihil, vel est accidens.

2° Extensio actu infinita repugnat (O. 351, 5°). Hoc autem spatium actu infinitum dicitur, atque adeo dici debet: nulli enim in eo limites concipi possunt. Quod si actu existit, non potest esse infinitum in potentia; necessario igitur infinitum est actu.

3° Repugnat aliquid existere increatum, præter Deum. Quod enim increatum foret, a Deo quoque foret independens. Absurdum est autem esse aliquid a Deo independens. Præterea ens increatum est ens a se. Ens autem a se est infinite perfectum: spatium autem non est certe huiusmodi. Ens demum a se est unicum natura sua, ut in theologia demonstrabitur. Ergo præter Deum nullum aliud potest esse ens a se.

352. PROPOSITIO II. *Spatium absolutum non est divina immensitas.*

Nam 1° immensitas divina, cum a divina substantia realiter non distinguatur, simplicissima est, atque a formali extensione penitus abhorrens. Atqui spatium est formaliter extensum: sunt enim in eo partes extra partes. Frustra vero reponit Clarekius, in spatio partes vere non esse, quia nunquam a toto, aut a se invicem separari possunt. Frustra inquam: non enim actualis separationis possibilitas partes

constituit extensi: at sufficit, quod partes in eo assignari possint ac mensurari. Atqui corpora quæ in spatio sunt, partes in spatio distinguunt, ac propria superficie mensurant. Ergo.

Hinc 2° immensitas divina, quæ infinita est, ex partibus in se finitis coalesceret, et esset extensio infinita. Est autem omnino absurdum, infinitum ex finitis consurgere: est item absurdum, extensionem infinitam esse. Ergo.

3° Non immerito opinio hæc judicatur viam ad pantheismum sternere. Si enim Deum formaliter extensum dicere possumus, nonne facilis inde erit deductio: divinam substantiam ipsam mundi substantiam esse? Qua re nihil potest dici majus absurdum.

353. PROPOSITIO III. *Est aliquod spatium, quod merito reale dicitur.*

Hoc est spatium mundanum, quod recte definitur: *extensio in longum, latum et profundum, quæ exsurgit ex mundanis omnibus corporibus in hac, in qua sunt, continuata serie coexistentibus.* Revera cum spatium extensio continua sit, in qua corpora continentur, spatium reale erit extensio realis continua, in qua corpora contineantur. Atqui spatium mundanum est huiusmodi extensio. Terram enim excipit aer, et aerem subtilissimus æther, qui ad remotissima usque sidera pertingit. Mundana autem corpora, in eo quod continuatam hanc seriem constituunt, realem quamdam extensionem efficiunt, in qua unumquodque continetur ut pars in toto. Ergo.

354. PROPOSITIO IV. *Spatium absolutum nihil aliud objective est, quam extensio possibilis, quæ ex corporum coexistentium serie sine fine continuata constitui potest: seu brevius, possibilitas extensionis realis mox explicata.*

Hoc ut intelligatur, distinguendum in primis est id quod mente concipitur, quum de spatio cogitamus, a phantasmate quod ejusmodi conceptui associat imaginatio. Conceptus ille est quem modo expressimus; phantasma vero est representatio extensionis actualis circumquaque diffusæ, tenuissimæ, immotæ, obscuræ, quin ulli termini in ea designati appareant. Phantasma porro huiusmodi imaginatio haurit ex vacuo mundano apparenti, in quo corpora locari posse con-

spicimus; illudque associat conceptui spatii possibilis, quemadmodum semper aliis conceptibus alia phantasmata associat, ex ea nostræ naturæ lege qua fit, ut intellectus in suis actibus a phantasmatis dependeat, iisque propemq̃dum innitatur. Cumque hoc phantasma sit unum ex iis per quæ imaginatio conatur mentis conceptus, quantum potest, sensibilibus notis exhibere, non est mirandum, si phantasma istud mentis conceptui nec opinantes substituamus. Ex hac autem substitutione consequitur, ut de extensione possibili, tanquam de re existente, et cogitemus et loquamur.

Notandum deinde, quum spatium dicimus esse extensionem possibilem, extensionem solummodo geometricam a nobis considerari, præcisione facta a vi resistendi et a cæteris corporis qualitatibus.

355. Probatur propositio 1^o argumento exclusionis. Id quod concipimus quum spatium concipimus, non est aliquid existens; ut certum est ex modo demonstratis. Sed aliunde non est purum nihil, ut patet. Ergo est aliquid possibile. Est autem extensio. Ergo est extensio possibilis.

2^o Intellecta extensione possibili modo supradicto, hoc ipso intelligitur ac sine ullo addito spatium absolutum. Omnes enim notæ quæ in spatii absoluti conceptu continentur, et in phantasmate eidem adnexo, sensibilibus lineamentis utcumque representantur, sunt notæ extensionis possibilis, quæ illi unice convenire possunt.

Sane corporum cœsistentium series possibilis finem nullum habet; nullus est enim limes possibilitatis. Ergo extensio quoque quæ ex serie illa consurgere potest, nullo fine constringitur. Hinc apparet cur spatium concipiatur *extra mundi limites indefinite diffusum*. Concipitur idem *increatum, æternum, necessarium, indestructibile*; quia possibilitas necessaria est, eademque nec producta est, nec initium habuit, nec finem habere potest. *Immobile* insuper, *continuum* et *indivisibile*; quia possibilitas omnia comprehendit quæ comprehendere potest, nullamque mutationem admittit. Demum *omnia corpora spatio insidere* cogitamus, in eoque recipi quum creantur; quia quod existit est etiam possibile;

quia existentia possibilitatem supponit; quia ad existentiam traducto uno corpore, æqualium illi, quæque illius loco substitui possent, possibilitas non deficit.

Sic itaque patet, spatii absoluti notas, quæ insolubile ænigma offerre, imo contradictionem continere videntur si spatium ut res quædam in statu existentiae posita consideretur, optime explicari, nullamque amplius objicere difficultatem, si ad extensionem possibilem referantur.

Ergo revera spatium absolutum nihil est aliud, quam extensio possibilis intellecta et existentis extensionis phantasmati consociata.

356. Ex his colliges 1^o Spatium absolutum merito vocari *ideale*, aut etiam *imaginarium*. Ideale, quia nulla alia realitas in eo est, quam quæ est possibilitatis propria, nempe realitas metaphysica et abstracta, quæ solum in statu ideali actualitatem habet. Imaginarium vero, quia hic conceptus ab imaginatione extensionis existentis divelli nequit.

2^o Immensitatem divinam dici posse aliquo sensu spatii possibilis fundamentum. Quanquam enim essentia divina, ut alibi ostendimus (O. 84), sit possibile omnium fundamentum, et omnipotentia sit ratio cur ad existentiam venire possint; tamen si præsentia litas divinæ substantiæ infinita non esset, jam extensio possibilis limitata esset: divina enim potentia, quæ corpora creat et conservat, non potest latius patere quam divinæ substantiæ præsentia litas. Sed de his in theologia.

* 357. Objici solet 1^o Sublatis omnibus corporibus, spatium quod superesse intelligimus, mensurabile est. Sed quod mensurabile est, reale est. Ergo.

2^o Si quis ad extremas mundi oras procurreret, telum jaculari, vel brachium attollere profecto posset. Hæc autem fieri in nihilo, vel in idea abstracta, est absurdum. Ergo spatium extra mundi oras infinitum, reale est.

* 358. Resp. ad 1^m Dist. : Mensurabile est terminis corporum possibilem, *conc.*; terminis propriis ac realibus, *nego*. Distinctionis ratio manifesta est. Corpora possiblea dimensiones habent, et hæc solum dimensiones in spatio ideali

concupi possunt. Nec mirum esse debet, mensurabilitatem rei possibili convenire; mensurabilitas enim nihil aliud denique est, nisi quædam intelligibilitas unius rei per comparisonem ad rem aliam.

Ad 2^m *Const. maj.*; *dist. min.* : Absurdum est hæc fieri in nihilo; nempe cum prius ultra mundi oras esset nihilum, *nego*; hæc fieri in nihilo tanquam in receptaculo, *trans*. Itemque absurdum est hæc fieri in idea abstracta; videlicet cum prius ultra mundi oras erat solum possibile aliud corpus, quod cæteris corporibus jam existentibus adderetur, *nego*; absurdum est hæc fieri in idea abstracta, tanquam in recipiente physico corporis, *conc*.

* 339. Colliges 3^o ex dictis nec spatii conceptum, neque adeo phantasma, esse formam subjectivam facultatis sentiendi. Non conceptum: primo quidem, quia conceptus ejusmodi in solo intellectu esse potest; solus enim intellectus possibilitati percipiendæ par est: deinde vero quia possibilitas est aliquid a subjecto independens. Non phantasma; quia phantasma hoc experientia, ut dixi (334), suppetat.

* 340. Objicit Kant. 1^o Ut possim meas sensationes referre ad aliquid extra me positum, unamque rem extra alteram mihi repræsentare, necesse est me jam habere spatii repræsentationem. Non ergo hæc ab experientia deducitur, sed potius experientiam possibilem facit.

2^o Spatium est unum et indivisum: diversaque spatia particularia percipi nequeunt, nisi spatium totale limitando.

3^o Possum quidem concipere spatium sine ullo corpore, sed corpus sine spatio nequeo.

4^o Infinitum est spatium: ejus igitur repræsentatio ab empiricis corporum repræsentationibus originem habere nequit.

* 341. Resp. ad 1^m *Nego ant. consequens*. Falsum enim, repræsentationem spatii esse conditionem præviam, ad hoc ut possim res extra me positas percipere. Hoc ipso namque quod res extra me positas percipio, spatium percipio. Cur autem percipio res extra me positas? Nempe quia sentio im-

pressionem receptam provenire ab activitate, quæ extra mei corporis ambitum reperitur. Cur item percipio rem unam extra aliam? Quia res ita se habent; nec oppositum affirmari potest, nisi ab eo qui idealismum gratis instaurare velit.

Ad 2^m *Dist.* : Spatium *reale* est unum et indivisum, *nego*; spatium *ideale*, *transeat*. Hinc *nego* spatia particularia percipi non posse, nisi spatium totale limitando. Nam spatium totale reale percipitur ut totum, ex diversorum corporum extensione compositum: spatium vero ideale concipitur tollendo limites, quibus coercentur spatia partialia, ac totum spatium reale.

Ad 3^m Non possum certe concipere corpus sine spatio, si sermo sit de intuitionem sensili ac de spatio reali; at possum mente concipere unicum corpus non existens in spatio reali. Quod si hoc quoque corpus, quod unicum suppono, in spatio ideali positum concipio, ratio petenda est ex dictis (335, 2^o).

Ad 4^m Spatium infinitum est in potentia, non vero actu infinitum. Falsum autem, ejus repræsentationem a corporum repræsentationibus oriri non posse. Nam repræsentato spatio reali una cum corporibus, mens potest hujus spatii limites remove semper magis, quia intelligit hoc reale spatium semper magis augeri posse, novorum corporum extensione accedente.

ARTICULUS III.

De loco.

342. Quid sit locus nunc facile intelliges. Locus a spatio indefinito in hoc differt, quod spatium indefinitum nullis continetur limitibus, locus autem limitibus continetur: est enim spatii pars quam corpus occupat (329, 2^o). Sicut igitur spatium indefinitum est possibilitas extensionis, ita locus est hæc eadem possibilitas *certis limitibus determinata*.

343. Hi autem limites sunt vel *reales*, vel *ideales*. Reales sunt externæ corporum realium superficies, quæ locati corporis superficiem tangunt et quasi constringunt; ut v. gr. littora

quæ mare continent; ideales vero sunt superficies corporum possibilium, quæ corpus aliquod circum ambire concipiuntur; ut sunt v. gr. limites intra quos mundus concipitur locatus. Erit autem locus realis, vel idealis, prouti limites quibus continetur, reales sunt, vel solum possibiles.

344. Quæ de loco dicimus, eadem de distantia quoque dicenda sunt; nisi quod locus a distantia differt in his duobus; quod 1^o loci notio primario respicit extensum possibile, secundario autem et in obliquo limites ipsum definientes: distantia vero primario limites respicit; est enim relatio quædam inter eosdem limites, secundario autem et in obliquo extensum possibile, quod inter eos limites existere potest; per hoc enim determinatur distantie magnitudo; 2^o locus realis proprie ac presse dicitur de spatio comprehenso inter limites saltem aliquo modo immobiles, ut sint limites domus, agri, urbis, et per hoc locus differt a vase seu recipiente mobili ut est navis aut currus; distantia autem dicitur de spatio comprehenso tam inter limites mobiles, quam inter immobiles.

* 345. Definitio loci quam tradidimus, memoratur ab Aristotele in IV Phys. (1) ac post ipsum nacta est defensores multos, estque fere communis apud recentiores. Aristoteli tamen non placuit. At rationes, quibus eam impugnat, hoc unum ostendunt, intervallum quod locus dicitur, non esse ipsam vasis capacitatem quæ a vase dependet et cum vase transfertur. Quod proculdubio nos non negamus.

* 346. Definivit locum Aristoteles: *superficiem continentem, immobilem, primam*. Quæ definitio explicat cur dicamus aliquid loco contineri. Res enim continetur in loco, quatenus ambientium corporum superficiebus tangitur atque concluditur, ut v. gr. amnis inter ripas. Addidit vero superficiem *immobilem*, ut locum a recipiente mobili distingueret; non enim vasis parietes dicuntur aquæ locus: addidit quoque *primam*, ut locum rei proprium distingueret a communi in quo alia quoque corpora continentur, ut est v. gr. cubiculum

(1) Text. 36.

respectu eorum omnium, quæ in ipso sunt suis propriis locis.

* 347. Cæterum aristotelica definitio cum ea, quæ superius allata est, non difficulter conciliabitur, si attendamus, locum dupliciter intelligi posse. Dicimus enim, ut modo innui, res contineri loco, et dicimus ex æquo res occupare atque implere locum. Jam primæ locutioni respondet locus aristotelicus: sunt enim superficies ambientium corporum, quæ rem locatam continent: alteri vero respondit notio illa loci e spatii possibilis conceptu derivata; nam corpus locatum non occupat neque implet superficies corporum ambientium, sed spatium quod iis constringitur. Primus est locus quem vocant *extrinsecum*; alter *intrinsecus* merito vocari potest.

* 348. Constitutio seu mansio corporis in loco, atque adeo id quo corpus in loco constituitur, et intra ipsum continetur, *ubicatio* a veteribus appellabatur, et a quibusdam etiam *loci intrinseci* nomine designabatur. Opinio fuit apud tardiores nonnullos scholasticos, ubicationem esse modum re distinctum a locato et a loco, ac nescio quid reale ipsis superadditum, quemadmodum alibi de unione diximus (O. 343). De hac opinione mox.

349. Dupliciter autem substantia finita in loco contineri potest, videlicet *circumscriptive* et *definitive*.

Circumscriptive, quum substantia tota est in toto loco, et nullibi extra ipsum, sed ita ut diversis loci partibus, diversæ partes ejusdem respondeant. Hoc pacto aqua v. gr. est in vase.

Definitive, quum substantia tota est in toto loco, et extra ejus limites nullibi; sed ita ut tota quoque sit in singulis loci partibus. Ita anima humana est in corpore quod informat.

* 350. PROPOSITIO I. *Constitutio rei in loco non est modalis aliqua realitas, sed mera relatio extrinseca.*

Nam præterquam quod nemo clare intelligere aut explicare potest, quid sit hæc modalis entitas rei locatæ superaddita, quum in loco constituitur; hoc certe sufficit ad eam excludendam: non esse admittendum quod prorsus inutile sit.

Aqui hæc entitas est prorsus inutilis ad intelligendam rei constitutionem in loco; quia hæc optime intelligitur, quin de entitate hujusmodi cogitemus. Etenim, si de corporibus loquamur, primo non potest intelligi corpus existens, quin aliqua pars spatii possibilis eo velut impleta intelligatur. Sic omne corpus, hoc ipso quod est, locum idealem necessario occupat. Deinde posito hinc uno corpore, inde aliis quibusdam ipsum tangentibus, nonne habes hoc ipso omne id quod requiritur ad locum realem? Patet itaque ubicationem non esse realem ullam entitatem corpori superadditam.

* 351. Est autem ex se relatio extrinseca corporis locati (O. 205): hujus enim relationis fundamentum sunt aliorum corporum reales superficies, quæ quidem sunt aliquid extrinsecum corpori quod locatum denominatur; aut etiam superficies ideales spatium ideale secantes, quæ non modo extrinsecæ sunt corpori locato, sed præterea neque sunt in existentiae statu.

Dixi per se: nullum enim est corpus quod naturaliter in locosit, quin præter extrinsecas locationis relationes, aliquas quoque relationes intrinsecas ad circumstantia corpora habeat. Nam saltem ea contingit, et in hoc pressionem quamdam exercet ac penetrationi simul resistit, atque aliis quoque modis in illa agit pro suæ naturæ diversitate.

352. PROPOSITIO II. *Omnia corpora naturaliter existunt in loco circumscriptive: spiritus autem definitive.*

Ratio primæ partis est, quod corpus naturaliter est in loco per hoc, quod secundum suam extensionem loco commensuratur: ideo enim certum aliquod spatium occupat, quia ipsius volumen hanc spatii portionem adæquat. Commensuratio autem unius ad alterum est et secundum totum, et secundum partes; ita ut toti respondeat totum, et parti pars. Ergo.

Spiritus vero, cum quantitate formali careat, commensurari loco non potest. Vel ergo nullo modo in loco est, vel in singulis loci partibus secundum se totus est. Cujus modi existendi exemplum aliquod habes in sono, qui ita est totus intra certam aliquam sphaeram, ut sit etiam totus in singulis ejus punctis, cum in singulis punctis totus audiatur.

353. PROPOSITIO III. *Mundana corpora in certo aliquo loco esse incipiunt, in eoque esse pergunt, quia vires quibus sollicitantur ad æquilibrium deveniunt; spiritus vero quia corporibus in loco existentibus fiunt aliquo modo præsentēs.*

Dico in prima parte *mundana corpora*: si enim unicum tantummodo corpus creatum fuisset, hoc ab ipso creante seu ad motum seu ad quietem determinare oportebat.

Mundana autem corpora in se invicem agunt sive immediate sive mediate, nullaque est materiæ particula, quæ saltem attractionis universalis viribus non urgeatur. Patet ergo, non posse ullum corpus quiescere aut in quiete manere, nisi tunc quum attractivæ vires quibus sollicitatur, vel fiant æquales et contrariæ, ac se mutuo elidant, vel ab aliqua alia vi pariter æquali et contraria elidantur.

Quod de toto corpore dicimus, idipsum de singulis corporis partibus dicendum est. Ideo nempe una pars corporis est in una loci parte, et altera in altera, quia virium æquilibrium hanc et non aliam iis collocationem dedit.

* 354. At spiritus, qui viribus corporeis non urgetur, per has vires locum non mutant, nec per earum æquilibrium in loco quiescunt saltem per se. Igitur ex eo solum in loco esse incipiunt, quod vel agunt in aliquo corpore, vel alicui corpori physice junguntur, vel quopiam alio modo, si quis est alius, fiunt corpori præsentēs secundum substantiam. Ita v. gr. angelus in loco est, quia agit in corpore, et anima rationalis, quia physice corpori jungitur.

* 355. PROPOSITIO IV. *Omne corpus est per se in loco, saltem ideali: spiritus autem sunt in loco non per se, sed per accidens.*

Omne enim corpus extensum est, et pars seriei illius quæ spatium physicum constituit (353). Ergo physici spatii partem per se occupat; proindeque per se est in loco reali (343).

Quod si unicum corpus existeret, hoc quamvis in spatio reali non esset, nihilominus extensione sua aliquam spatii possibilis seu idealis partem adæquaret. Per hoc igitur esset necessario in loco ideali. Esse enim in loco ideali tan-

tundem est, ac extensionem habere, quæ alicui parti extensionis possibilis commensuretur.

Quoniam vero omne corpus per se extensum est, per se quoque est in spatio saltem ideali.

* 356. Quod de spiritibus affirmamus, ex dictis consequitur. Spiritus enim cum extensione careant, nulli parti extensionis possibilis commensurantur, ac propterea per se in loco non sunt, sed solum in immensitate Dei, cujus virtute omnia subsistunt. Sed quoniam possunt esse uno modo vel altero præsentibus corporibus secundum substantiam, ideo possunt quoque secundum substantiam esse in locis quæ a corporibus occupantur; ac proinde in loco quoque ideali esse concipiuntur.

ARTICULUS IV.

* *De corporum compenetracione.*

357. Duæ hic occurrunt vere arduæ quæstiones, ad quas philosophi nunquam animum advertissent, nisi divinæ potentiæ miracula ac religionis christianæ mysteria aliquid nobis de supernaturali statu quem corpora obtinere possunt, revelassent. Quæstiones sunt hujusmodi: 1^a an possint duo corpora in uno eodemque loco proprio consistere; 2^a an possit unum idemque corpus in pluribus locis existere. Aliquid dicemus de utraque.

358. PROPOSITIO V. *Impenetrabilitas quoad locum non est corpori essentialis, ita ut intrinsece repugnet bina vel plura corpora in uno eodemque loco simul coire.*

Quid sit impenetrabilitas quoad locum, supra dictum est (187). Imaginatione profecto comprehendere nequit quod hic asseritur; nihilominus non difficulter intellectui suadetur. Etenim in hoc quod bina corpora eundem simul locum occupent, nulla est contradictio, aut certe nulla ostendi potest. Nam est quidem corporibus essentielle ut resistent penetrationi, non autem ut resistentia hæc superiori virtute nunquam vincatur. Omnes namque vires, nisi infinitæ sint, superiori virtute vinci possunt. Quis autem dicat resistendi vim infinitam esse? Potest igitur superiori virtute vinci.

Quamquam autem inter corporeas vires nulla reperiatur quæ ad hoc idonea sit, omnipotens certe virtus nullis rerum a se conditarum viribus potest esse inferior.

359. Ad hæc: Deus relationes naturales unius vel duorum corporum ad certum locum abrumpere potest, ut manifestum est. Qui enim hoc negat, is negat corpoream naturam omnipotenti voluntati subditam esse. Ambigendum quoque non est, Deum duobus corporibus relationem eandem ad eundem locum posse tribuere. Hoc autem si faciat, corpus utrumque jam in eodem loco erit (354).

Igitur non repugnat, ab uno corpore alterum corpus, vel ab una atomo alterum atomum penetrari; non quidem virtute ipsorum corporum aut atomorum, sed virtute divina.

360. Ex dictis colliges.

1^o Posse divinitus unum corpus alterum sibi impenetrabile transmeare, quin hoc loco cedat.

2^o Binas aut plures ejusdem corporis partes in uno eodemque loco divina pariter virtute posse constitui.

3^o Totum proinde corpus in exiguo spatio collocari posse. Quod licet vehementer mirum sit, minus tamen fortasse mirabere, si recogites quam ingentia corpora, quantique locorum tractus in uno retinæ puncto distinctissime expressi contineantur.

4^o Non tamen per hoc corpus extensionem quæ est in ordine ad se, et eam quæ aptitudinalis dicitur (143, 2^o; 144), amissurum. Amitteret enim solummodo extensionem localem actualem (144, 147).

5^o Hinc deduces, quod catholica docet fides, Christi nempe corpus totum esse etiam sub exigua sacramentalium specierum particula, id nullatenus rerum essentiis repugnare.

6^o Demum perspicies extensionem localem actualem, licet corpori naturalis sit, essentialem non esse, nec a corporibus inseparabilem (147).

ARTICULUS V.

De corporum multilocatione.

361. Multilocatio, quæ etiam replicatio dici solet, est si-

multanea ejusdem entis existentia in pluribus locis adæquatis, ut si quis v. gr. se præsentem exhiberet eodem tempore Romæ et Neapoli. Dicitur porro in locis *adæquatis*, nempe in ejusmodi locis, quorum quisque sit enti sufficiens; non vero in pluribus locis partialibus, quæ unum locum totalem atque enti proportionatum simul constituent. Corpus enim secundum diversas suas partes est in diversis locis partialibus, sed non ideo multilocatum existimatur; quia omnia illa loca partialia locum ipsi continendo idoneum efficiunt. Nec replicari dicitur anima, eo quod sit tota in loco capitis, ac tota in locis pedum; quia loca hæc singularum partium unum locum totalem totius humani corporis constituent. Et ex opposita ratione Deus non replicatur, eo quod omnibus locis sit præsens, hoc ipso quod nullus est locus finitus, quantumvis amplius, qui sit ipsi proportionatus, ipsumque contineat.

362. Pro diversitate modi quo res loci limitibus continentur, diversa quoque ratio est multilocationis. Si res in pluribus locis circumscriptive existat, multilocatio dicitur *circumscriptiva*; si tantum definitive, *definitiva*; si in uno loco circumscriptive, in altero definitive vel quasi definitive, *mixta* multilocatio appellari consuevit.

Quæritur jam an multilocatio corporum sit possibilis.

363. PROPOSITIO VI. *Nulla multilocatio est corpori naturaliter possibilis; ut certum ex æquo est, multilocationem saltem definitivam vel mixtam, nullam repugnantiam includere: id quod etiam de circumscriptiva multilocatione probabilius dicendum videtur.*

Prima pars multis probari non indiget. De rerum enim natura judicare debemus juxta id quod constanter fieri per spicimus (L. 306). Jam nunquam profecto deprehendimus corpus in dissitis simul locis constitutum; imo constanter cernimus, nullum corpus novum sibi vindicare locum, nisi per motum; videlicet priorem locum deserendo. Itaque concludamus necesse est, naturæ hanc legem esse, ac naturali necessitate fieri ut nullum corpus in pluribus simul locis existat.

364. Pars altera catholicum dogma est. Certum enim fide est, sacratissimum Christi domini nostri corpus existere circumscriptive in cælo (extra terram), et simul in altaris sacramento quasi definitive: dico autem *quasi definitive*, quia ex una parte non est in altari aut alibi, nisi ubi sunt species panis ac vini; ex alia vero est in pluribus omnino altaribus, ac sub speciebus numero distinctis. Fide igitur certum est, unum corpus replicari multilocatione tam mixta, quam definitiva (362). Ex facto autem facti non repugnantia necessario deducitur.

365. Revera in hujusmodi multilocationibus nulla contradictio est, ac certe nulla ostenditur. Ex eo enim quod dicimus Christi corpus esse in cælo simul et in terra, non sequitur ipsum esse in cælo, et non esse in cælo; sed solum ita esse in cælo, ut possit quoque esse, ac reipsa sit etiam alibi, licet diversimode; id quod sane omni contradictione vacat.

366. Proculdubio contradictorium quid esset replicatio hæc loci, si idem corpus quod est in se unum, efficeret multiplex. Atqui hoc nullatenus efficit multilocatio sive definitiva, sive mixta. Nam hujusmodi multilocationes ad summum multiplicant externas aliquas ejusdem corporis relationes; v. gr. in sancta Eucharistia corpus Christi, quamvis non ineat eas relationes sive intrinsecas sive extrinsecas ad corpora circumstantia, quæ cum extensione locali sociantur (351), habet tamen vi transubstantiationis extrinsecam relationem ad species, sub quibus prius erat panis vinique substantia. At vero multiplicatio externarum relationum corpus non multiplicat. Secus etiam corpus quod diversis temporibus, vel in eodem loco permanet, vel in diversa loca transfertur, multiplicari dicendum esset.

367. Difficilius concipitur possibilitas circumscriptivæ multilocationis. Hæc enim multiplicat relationes locales corporis, easque relationes intrinsecas, quæ cum iis sociantur (351). Nihilominus illustra quædam facta ac prorsus indubia, quæ in vitis sanctorum Antonii patavini, Francisci Xaverii aliorumque, etiam recentiorum leguntur, postulare videntur, ut hujus quoque replicationis possibilitatem ad-

mittamus. Quamvis enim hujusmodi facta absolute loquendo explicari aliter possint, v. gr. per visionem imaginariam aut per corpus tantum apparens, hæ tamen explicationes particularibus illis factis explicandis minus aptæ inveniuntur; cum ea ipsam virorum illorum præsentiam atque operationem in diversis locis exigere videantur.

368. Cæterum hæc relationum localium et operationum externarum multiplicatio terrere nos minime debet. Nam tandem aliquando quis dicat, se in his evidentem reperire contradictionem?

Sane attributa quæ contraria sunt *ratione subjecti*, uni eidemque subjecto convenire non possunt, v. gr. vulnerari et sanum esse, vivum esse et mortuum, bonum et malum, cogitare diversa et his similia. Atque hæc profecto in corpore multilocalo haberi simul nequeunt; neque habentur in sanctorum multilocationibus neque supponendæ sunt. Attributa vero quæ sunt contraria tantummodo *ratione loci*, nempe ratione respectuum ad diversa corpora, ut v. gr. sedere et stare, moveri et quiescere, aliaque hujusmodi, hæc, inquam, si in diversis locis corpori replicato convenire posse dicantur, nihil in hoc contradictionis includi videtur. Relationes enim loci nihil aliud sunt, quam relationes ad corpora diversa. Jam quare relationes ad corpora diversa diversæ esse in eodem non possint? Hanc certe diversitatem in corporibus quoque non multilocalis, et juxta consuetum naturæ ordinem in loco se habentibus perspicimus, quum v. gr. qui in navi sedet, quiescit respectu eorum quæ in navi sunt, ac movetur respectu littoris.

Igitur neque circumscriptiva corporis multilocalio contradictoria dici potest.

369. Contra multilocationis in genere possibilitatem.

Obj. I. Principium certissimum est ea quæ distinctis locis existunt realiter distingui: separabilitas enim unius ab altero unum est ex realis distinctionis indicium.

Hoc autem principium evertit replicatio, si possibilis est. Nam per replicationem idem corpus separaretur a seipso; quia in distinctis locis existeret.

370. Resp. *Dist. maj.* Principium quod objicitur est certissimum physica certitudine, *conc.*; certitudine metaphysica, *nego* (L. 407). Hinc exceptionem pati potest, si divina virtute consueto naturæ ordini derogatio fiat.

Ad rat. add. *Dist.* Separabilitas quoad realitatem est realis distinctionis indicium, quando nempe utrumque ex duobus potest esse sine altero (O. 229, 2^o), *conc.*; separabilitas quoad locum tantummodo, quum videlicet quæ sunt in distinctis locis, quoad realitatem omnino conveniunt, *subd.*; hujusmodi loci inseparabilitas est realis distinctionis indicium secundum consuetum naturæ ordinem, *conc.*; absolute et sine exceptione possibili, *nego*.

Neg. min. Ad rat. add. *Nego 1^m partem*, quod nempe corpus separaretur a seipso, et *causalem nexum*. Ex eo enim quod corpus existat in locis separatis, non sequitur profecto, idem separari a seipso; ad hoc enim necesse foret, ut corpus non esset ubi est.

371. Obj. II. Corpus multilocalum 1^o distaret a seipso;

2^o esset unum et plura;

3^o circumscriberetur loco, et non circumscriberetur;

4^o moveri posset motibus contrariis.

Hæc autem omnia repugnant.

372. Resp. ad. 1^m *Nego*. Loca quidem diversa distant, quia ubi est unus locus non est alter; at corpus multilocalum nequaquam, et quidem ex opposita ratione; quia totum est ubicunque est.

Ad 2^m *Nego*; sed esset unum in pluribus locis (366).

Ad 3^m *Dist.*: Circumscriberetur loco uno positive, et non circumscriberetur exclusive, *conc.*; circumscriberetur et non circumscriberetur positive, *nego*. Videlicet quum in uno loco esset, contineretur spatii debiti limitibus, non tamen ita ut hoc impedimento esset, quominus alio in loco, seu definitive seu circumscriptive contineretur.

Ad 4^m *Dist.*: Moveri posset motibus contrariis ut a pluribus locis, *conc.*; ut ab eodem loco, *nego*. Sane corpus in naturali suo statu contrariis motibus moveri non potest, quia cum unum locum occupet, si contrariis motibus moveretur, v. gr.,

ad dexteram simul partem et ad sinistram, consequeretur, ipsum moveri ad dexteram, et simul non moveri. At si per multilocationem bina loca occupet, hoc amplius non consequitur; sed consequitur solum, ipsum moveri positive ad partem utramque.

Cæterum notandum est, in multilocatione definitiva vel mixta corpus multilocatum moveri solum per accidens, quia non est in loco eo modo, qui naturaliter proprius est corporum, nempe per quantitatis contactum (352).

ARTICULUS VI.

* *De vacuo.*

373. Quærendum jam de spatio vacuo; an possibile sit, an sit.

Distinguendum est in primis vacuum *proprie dictum* a vacuo *improprie dicto*. Vacuum *proprie dictum* est spatium in quo nullum prorsus est corpus, nec ponderabile, nec imponderabile. Vacuum *improprie dictum* est extensio, in qua est quidem aliquod corpus, sed invisibile, quodque vel non impedit alterius corporis collocationem, ut est æther, vel facile et sine sensu cedit, ut aer.

Vacuum *proprie dictum* aliud est *imaginarium*, aliud *reale*. Imaginarium est vacuum, quod extra mundi limites concipimus. Reale est vacuum, cuius limites superficiebus realium corporum definiuntur.

Rursus, vacuum reale aliud dicitur *coacervatum*, aliud *disseminatum*; quæ nomina fatendum est satis impropria esse. Vacuum porro coacervatum est vacuum magnum et continuatum; disseminatum est vacuum insensibile quod inter atomos materiæ tam ponderabilis quam imponderabilis intercipitur.

374. PROPOSITIO VII. *Vacuum reale ac proprie dictum possibile est.*

Nam 1º nulla est repugnantia in conceptu vacui *proprie dicti* inter limites reales. Quid est enim vacuum? Est spatii puri pars, est possibilitas extensionis. Possibilitas vero extensionis, quamquam ex se indefinita sit, potest tamen vi

quarundam conditionum limitari ac definiri. Hujusmodi autem conditiones sunt reales corporum superficies. Intra talis enim superficies non est amplius possibilitas extensionis cujuscunque, sed possibilitas tantum extensionis certæ cujusdam mensuræ. Quid in hoc contradictorii est? Vacuum in se nihil est, sed hoc non impedit, quominus hoc nihilum limitibus realibus definiri possit. Imo aliis limitibus definiri nequit, quam limitibus realibus. Quemadmodum enim limes realitatis est negatio ulterioris realitatis, ita limes negationis est negatio ulterioris negationis; quæ ulterior negatio impediri nequit, nisi ab aliqua realitate.

2º Impossibile non est, imo evidenter possibile est, divina potentia annihilari penitus et aerem, et ætherem, et omnia quæ in hac aula sunt, cæteris corporibus in suis locis immobiler manentibus. At si hæc fieret annihilatio inter aulæ parietes haberes vacuum. Rursus, evidenter possibile est creari a Deo bina tantummodo corpora, eaque spherica. Fac itaque ea creari; ac pone quomodocunque placeat, ea se contingere vel secus. Si se contingunt, cum in uno tantum puncto se contingere possint, necessario inter hæc duo corpora habebitur vacuum; ac multo magis habebitur, si se non contingunt.

375. PROPOSITIO VIII. *Est vacuum proprie dictum in mundo.*

Quisque novit, id quod vulgus vacuum appellat, esse vacuum *improprie dictum*. Vacuum item *improprie dictum* est vacuum quod fit in barometro, aut in campana pneumatica, illudque quod inter extimam atmospheræ superficiem et sidera extenditur. Nam spatia hæc omnia æthere plena sunt. Non est itaque in rerum natura vacuum quod dicunt coacervatum. Sed de existentia vacui quod dicunt disseminatum nullatenus ambigendum est.

Verum quidem est; inter atomos ponderabilium corporum ætherem esse diffusum; sed certe inter atomos ætheris vacuum aliquod sit oportet. Nam non solum atomi corporum ponderabilium, sed etiam ætheris atomi certo moventur, ut patet ex phænomenis lucis, caloris, electricitatis, magnetismi. At motus vacuum supponit. Quomodo enim posset

una molecula aliquam aliam impellere ac deturbare foco, si omnia circumquaque spatia plena essent, nullo prorsus interjecto vacuo?

376. Aristotelici *physicam* vacui possibilitatem negabant, juxta tritum illud; *natura abhorret a vacuo*: sed nemo nescit, experimenta quæ ad hunc naturæ horrorem probandum ab iis afferebantur, alia prorsus ratione nunc explicari, et contra vacui existentiam nullam amplius difficultatem facere.

377. Sed Cartesius ejusque asseclæ censuerunt, absolutam vacui repugnantiam esse. Atque hæc fere eorum argumenta sunt.

Dicunt 1^o Si intra vas aliquod omnia annihilentur, vasis latera se mutuo contingant oportet. Nam inter ipsa nihil interjacet. Non erit igitur vacuum inter vasis latera.

2^o Distantia realis non potest esse nihil. Nam distantia quæ nihil est, distantia non est: sed distantia vacua nihil foret.

3^o Nihili nulla esse potest extensio realis. Sed vacuum foret nihil et simul realiter extensum.

4^o Distantia hæc vacua nec substantia foret, nec accidens.

378. Resp. ad 1^m *Nego*. Est enim hæc assertio mira prorsus, et etiam credere volenti incredibilis.

Ad. rat. add. *Dist.*: Nihil interjacet, et tamen aliquid interjacere potest, *conc.*; nihil interjacere potest, *nego*. Non proprie quia aliquid inter duo vasis latera interjacet, ea sunt ab invicem distantia, sed quia aliquid inter ipsa potest interjacere. Jam hæc possibilitas non tollitur ex eo, quod omnia quæ in vase sunt in nihilum redigantur.

Ad. 2^m *Dist. maj.*: Distantia realis non potest esse nihil, quoad terminos ipsam distantiam definientes, *conc.*; quatenus nullum corpus intra reales hosce terminos actu existat, *nego*. Eodemque modo *dist. rat. add.* et *contradist. min.*: Distantia vacua, quanquam nihil non sit, spectato ordine possibilitatis, est tamen nihil spectato ordine existentiae. Sed hujus nihili etiam in ordine existentiae termini sunt reales, et idcirco vacuum hujusmodi dicitur reale.

Ad 3^m *Dist. ant.*: Nihili quod tum in ordine existentiae, tum

in ordine possibilitatis nihilum sit, nulla est extensio realis, *conc.*; nihili, quod in ordine possibilitatis nihilum non sit, nulla est extensio realis, *subd.*; si termini, quibus definitur, sint reales, *neg.*; si termini non sint reales, *conc.* Umbra quoque nihil positivi est. Tamen lineæ quæ superficiem illuminatam definiunt, faciunt ut umbra extensionem realem habeat.

Ad 4^m *Dist.* In statu possibilitatis, *neg.*; in statu existentiae, *subd.*; non est substantia, pariterque non est accidens intrinsecum, *conc.*; non est accidens extrinsecum (O. 171, 2^o), *nego*. Est nempe actu, et realiter relatio quædam accidentalitatis et extrinseca inter superficies quæ distantes dicuntur. In statu vero possibilitatis est substantia extensa possibilis, cujus limites iisdem realibus superficiebus determinantur.

379. Forte dices: si inter ætheris atomos vacuum interjectum est, quomodo illæ in se invicem agunt? Operatio enim in distans repugnat. Responsio petenda ex dictis (298, 3^o). Atomus ætheris in se invisem non agunt, nisi aliqua ex iis in motu positæ ad alias accedant, easque impellant.

CAPUT II.

DE TEMPORE.

ARTICULUS I.

De temporis notione.

380. « Quid est tempus? Si nemo ex me quærat, scio; si « quærenti explicare velim, nescio. » Ita præclare s. Augustinus (1). Revera nemo est. qui claram temporis notionem non habeat; ast hujus notionis analysis omnium fortasse difficillima est. Conemur tamen, sapientum vestigia sequentes.

1^o Perpendemus ideam temporis quæ in humana mente viget: 2^o quid sit in se tempus censendum, statuemus.

381. Temporis notio tria elementa continet: *præteritum*, *præsens*, *futurum*; quæ ita se mutuo excipiunt, ut omne momentum a futuro fiat præsens, et a præsentis præteritum.

(1) *Confess.* XI, 14.

Præteritum non est præsens, sed fuit præsens. i. e. amisit esse præsens.

Futurum pariter non est præsens, nec fuit præsens, sed debet esse præsens.

Præsens autem quid est? Non annus, non dies, non hora, non quæcunque mora temporis, quæ a nobis dicatur præsens, est revera præsens. Si enim extensionem quamcunque temporis cogitas, licet brevissimam, hæc præterito constat, præsentis, ac futuro. Præsens igitur concipi nequit, nisi ut punctum indivisibile, *quod ita raptim a futuro in præteritum transvolat, ut nulla morali extendatur* (1).

* 382. Non tamen indivisibilium additione momentorum, sed indivisibilis momenti fluxu non interrupto constare tempus concipimus. Quamadmodum igitur linea, quæ puncti motu generatur, continua quantitas est, ita et tempus.

Hinc 1^o quemadmodum quum linea describitur, punctum est terminus lineæ descriptæ, ac simul initium lineæ describendæ; ita præsens in existentia fluente est finis existentiae præteritæ, ac initium futuræ; sed prouti punctum est transitus a parte lineæ descriptæ in partem describendam semper fluens ac variabilis, ita quoque præsens.

2^o Ut linea potest indefinite dividi, et quæcunque partes in illa concipiantur, hæc semper sunt *lineolæ* divisibiles ulterius, sic quoque tempus indefinite dividi potest, sed quæcunque partes in ipso assumantur, semper *tempuscula* sunt.

3^o Concipere potes in linea primum atque ultimum punctum, ac punctum quodcunque medium signare; sed non secundum aut penultimum, nec duo puncta immediate se contingentia. Eodemque pacto in temporis continuitate concipere potest primum atque ultimum, indivisibile momentum, sed non momentum secundum ac penultimum, aut duo momenta immediate sibi succedentia.

4^o In linea descripta pars anterior et pars posterior dicuntur semper relative, nempe respectu habito puncti alicujus in linea designati. Eodem modo in temporis fluxu quævis pars

(1) Ibid. c. 13.

dici potest præterita vel futura, pro diversitate præsentis quod consideretur; quemadmodum v. gr. quum Christus natus est, fuerunt Alexandri tempora, ac futura erant christiana sæcula, quæ nobis præterita sunt.

383. Si temporis absoluti idea cum idea spatii absoluti conferatur, in multis ambæ conveniunt, quanquam in quibusdam quoque discrepent.

Revera tempus concipimus ut essentialiter *unum*, in quo, et secundum quod omnia quæ sunt, durant, ac diffluunt; idem cogitamus *præcessisse* rerum omnium existentiam, ac *substituturum* etiamsi rerum omnium fieret annihilatio; tum *initii* tum *finis incapax*, ac proinde *æternum, increatum, necessarium* esse: *continuum* insuper et *indivisibile*; nequeunt enim temporis partes separari, neque continuatus ejus fluxus potest concipi discerptus; *immobile*, fieri enim nequit ut partes temporis mutent ordinem quem inter se habent, v. gr. ut dies hodiernus sit hesternus vel crastinus; ac tandem *immutabile*, nam ut mutari nequeunt geometricæ relationes inter magnitudines, ita quoque mutari nequeunt relationes inter varias temporis partes. In his omnibus binæ idea spatii ac temporis mire conveniunt.

Discrepant autem in his duobus; quod 1^o spatii partes sibi coexistunt; temporis partes altera alteri sibi succedunt; 2^o spatium res solummodo corporeas amplectitur et continet, tempus vero res omnes continere videtur, tum corporeas tum incorporeas.

ARTICULUS II.

Quid sit tempus.

384. Hujusmodi est temporis notio. At quid est tempus in se? Profecto temporis notio nobis suggeritur tum ab interna tum ab externa experientia, in eo quod *durationem cum successione* nobis offert, i. e. in subjectis permanentibus mutationes sibi succedentes. Videndum itaque quid sit in rebus duratio, quid successio; sic enim intelligemus quid sit duratio successionis, videlicet tempus in se.

* 385. PROPOSITIO I. *Duratio realis ab entis existentia non*

distinguitur re; distinguitur tamen ratione, quatenus dicit permanentiam existentiae.

Probat 1^a pars. 1^o Fatentur omnes, durationem esse quasi extensionem quamdam ac continuationem existentiae: itaque eae habet ad existentiam ut productio lineae ad lineam, atque intensio qualitatis ad qualitatem. Sed productio lineae realiter non differt a linea, nec intensio qualitatis a qualitate. Ergo.

2^o Duratio, cum sit res quaedam, suam existentiam habeat oportet. Vel itaque haec durationis existentia a duratione non distinguitur, vel secus. Si non distinguitur, ergo est aliqua existentia, quae a sua duratione non distinguitur. Cur autem non omnis? Si distinguitur, quæram iterum: existentia haec durationis durat, necne? Si non durat, habebimus durationem rei cujus existentia non durat, quod est maximopere absurdum; si vero durat, an duratio haec existentiae ab existentia distinguitur, an non? Si primum dicas, nullus erit finis existentiarum et durationum; si alterum, concludemus ut prius, nullam existentiam a sua duratione distingui.

3^o Duratio vel est aliquid additum existentiae, vel non. Si non, jam nec distinguitur ab illa realiter. Si est aliquid existentiae additum, quid addit? Profecto continuationem existentiae. Ergo non distinguitur a continuatione existentiae.

* 386. Dices, quum res producitur, in primo suae existentiae instanti existit, et non durat. Ergo duratio saltem distinguitur ab existentiae initio. Respondendum, existentiae initium esse quoque initium durationis, quemadmodum tota existentia est tota duratio, et unius finis alterius quoque finis est. Hinc quantum existentiae additur existentiae initio, tantumdem durationis additur initio durationis. Ex quo novum habes argumentum ad propositum ostendendum. Sed dicta sufficiunt.

* 387. Quod in 2^a parte asseritur a nemine in dubium vocatur: est enim per se manifestum, durationis conceptum aliquid dicere quod existentia non dicit. Quid autem hoc sit clare exponit Suarez his verbis: « existentia dicit actualitatem rei extra suas causas absolute, et non connotando » praexistentiam aliquam: duratio vero dicit perseveran-

» tiam aliquam in eadem existentia; quae perseverantia non est aliquid distinctum ab ipsa existentia, sed connotat » secundum nostrum concipiendi modum praexistentiam » ejusdem existentiae, seu quod talis existentia concipi » possit ut existens ante quodlibet instans pro quo durare » dicitur (1). » Ex quibus postremis verbis deduces, recte quosdam affirmasse, durationem dicere existentiam, connotando successionem, cui vel coexistat, vel possit coexistere res quae durare dicitur.

* 388. PROPOSITIO II. *Successio est relatio exclusionis mutuae, quam habet existentia unius respectu existentiae alterius.*

Tunc una res alteri succedere dicitur, quum haec *esse desinit*, et illa *esse incipit*. Si enim existentia unius rei permanet dum res altera esse incipit, haec res non sibi succedunt, sed coexistunt. Successio igitur est relatio quaedam inter esse et non-esse, in hoc posita, quod *esse* unius importet, supponat, includat utcumque *non-esse* alterius. Definiri igitur potest successio ut supra.

389. Duratio, seu permanentia essendi tripliciter se habere potest respectu successionis. Vel enim permanentia essendi talis est, ut cum nulla successione conjungi possit, vel cum successione conjungitur, vel est permanentia ipsius successionis.

Primus durationis modus est *aeternitas*; alter dici solet *aevum*; tertius est *tempus*.

Aeternitas igitur est esse permanens, cui nulla successio affectionum conjuncta est, aut conjungi potest.

Aevum est esse permanens, cui successio affectionum conjuncta est, au saltem conjungi potest.

Tempus est ipsa successionis permanentia.

Aeternitas est duratio, quae possidetur tota simul quoad omnia; aevum est duratio quae possidetur tota simul, sed non quoad omnia; tempus est duratio cujus partes se mutuo excludunt.

390. Esse autem aeternitatem, adeo certum est, ut certum est esse Ens a se, et absolute immutabile.

(1) *Disp. Met. Disp. L, sect. II, § X.*

distinguitur re; distinguitur tamen, ratione, quatenus dicit permanentiam existentiae.

Probatur 1^a pars. 4^o Fatentur omnes, durationem esse quasi extensionem quamdam ac continuationem existentiae: itaque eae habet ad existentiam ut productio lineae ad lineam, atque intensio qualitatis ad qualitatem. Sed productio lineae realiter non differt a linea, nec intensio qualitatis a qualitate. Ergo.

2^o Duratio, cum sit res quaedam, suam existentiam habeat oportet. Vel itaque haec durationis existentia a duratione non distinguitur, vel secus. Si non distinguitur, ergo est aliqua existentia, quae a sua duratione non distinguitur. Cur autem non omnis? Si distinguitur, quæram iterum: existentia haec durationis durat, necne? Si non durat, habebimus durationem rei cujus existentia non durat, quod est maximopere absurdum; si vero durat, an duratio haec existentiae ab existentia distinguitur, an non? Si primum dicas, nullus erit finis existentiarum et durationum; si alterum, concludemus ut prius, nullam existentiam a sua duratione distingui.

3^o Duratio vel est aliquid additum existentiae, vel non. Si non, jam nec distinguitur ab illa realiter. Si est aliquid existentiae additum, quid addit? Profecto continuationem existentiae. Ergo non distinguitur a continuatione existentiae.

* 386. Dices, quum res producitur, in primo suae existentiae instanti existit, et non durat. Ergo duratio saltem distinguitur ab existentiae initio. Respondendum, existentiae initium esse quoque initium durationis, quemadmodum tota existentia est tota duratio, et unius finis alterius quoque finis est. Hinc quantum existentiae additur existentiae initio, tantumdem durationis additur initio durationis. Ex quo novum habes argumentum ad propositum ostendendum. Sed dicta sufficiunt.

* 387. Quod in 2^a parte asseritur a nemine in dubium vocatur: est enim per se manifestum, durationis conceptum aliquid dicere quod existentia non dicit. Quid autem hoc sit clare exponit Suarez his verbis: « existentia dicit actualitatem rei extra suas causas absolute, et non connotando » praexistentiam aliquam: duratio vero dicit perseveran-

» tiam aliquam in eadem existentia; quae perseverantia non » est aliquid distinctum ab ipsa existentia, sed connotat » secundum nostrum concipiendi modum praexistentiam » ejusdem existentiae, seu quod talis existentia concipi » possit ut existens ante quodlibet instans pro quo durare » dicitur (1). » Ex quibus postremis verbis deduces, recte quosdam affirmasse, durationem dicere existentiam, connotando successionem, cui vel coexistat, vel possit coexistere res quae durare dicitur.

* 388. PROPOSITIO II. *Successio est relatio exclusionis mutuae, quam habet existentia unius respectu existentiae alterius.*

Tunc una res alteri succedere dicitur, quum haec esse desinit, et illa esse incipit. Si enim existentia unius rei permanet dum res altera esse incipit, haec res non sibi succedunt, sed coexistunt. Successio igitur est relatio quaedam inter esse et non-esse, in hoc posita, quod esse unius importet, supponat, includat utcumque non-esse alterius. Definiri igitur potest successio ut supra.

389. Duratio, seu permanentia essendi tripliciter se habere potest respectu successionis. Vel enim permanentia essendi talis est, ut cum nulla successione conjungi possit, vel cum successione conjungitur, vel est permanentia ipsius successionis.

Primus durationis modus est *aeternitas*; alter dici solet *aevum*; tertius est *tempus*.

Aeternitas igitur est esse permanens, cui nulla successio affectionum conjuncta est, aut conjungi potest.

Aevum est esse permanens, cui successio affectionum conjuncta est, au saltem conjungi potest.

Tempus est ipsa successionis permanentia.

Aeternitas est duratio, quae possidetur tota simul quoad omnia; aevum est duratio quae possidetur tota simul, sed non quoad omnia; tempus est duratio cujus partes se mutuo excludunt.

390. Esse autem aeternitatem, adeo certum est, ut certum est esse Ens a se, et absolute immutabile.

(1) *Disp. Met. Disp. L, sect. II, § X.*

Esse ævum, demonstrant substantiæ simplices et incompressitæ, quæ sunt diversarum affectionum subjectum, ut sunt puri spiritus, animæ rationales et atomi primitivæ. Nam licet in harum substantiarum affectionibus sit successio, tamen eorum esse substantiale nulla distinguitur successione, mutatione nulla; nihil eni in eo præterit, nihil novi advenit.

Tandem esse tempus, manifestum est ex mutationibus substantiarum compositarum ac corruptibilium, et ex mutationibus affectionum tam spiritalium, quam corporearum; in qua serie permanet aliud nisi mutatio.

391. PROPOSITIO III. *Tempus reale a rerum mutationibus non distinguitur.*

Sequitur ex dictis. Omnis enim duratio re non distinguitur ab existentia ejus rei cujus est duratio. Tempus autem est duratio successionis, seu mutationis quæ contingit in rebus. Ergo.

* 392. Hinc 1° tempus extra mentem nihil aliud est, quam *existentia rerum quæ se reciprocè utrinque excludunt.*

2° Ab hac definitione re non discrepat aristotelica definitio, qua tempus dicitur esse: *numerus motus secundum prius et posterius* (1). Hac enim definitione nihil aliud significatur quam hoc: tempus esse mutationem, quæ licet ex se sit continua, est tamen aliquo modo etiam discreta, quatenus est numerabilis secundum partes, quæ certo quodam ordine se excipiant, ita ut altera prior, altera posterior dicatur. Quæ definitio sic intellecta, ab ea quæ superius exhibita est non differt, nisi in hoc, quod Aristoteles considerat tempus ut mensuræ rationem habet.

3° Ante mundum conditum nullum erat tempus reale. Etenim ante mundum conditum solus erat Deus. In Deo autem successione nulla est. Tunc ergo cœpit tempus, quum res mutabiles esse cœperunt.

4° Intelliges quoque ex dictis, quid sit *præsens, præteritum et futurum.*

Præsens est ipsa rei existentia, et nihil aliud: est conceptus absolutus non relativus.

(1) *Phys.* IV, text. 401.

Præteritum et futurum sunt idæ relativæ ad aliquod præsens, nempe ad aliquod esse. Continentur enim idæ non esse unius relati ad esse alterius, a quo primum illud esse excluditur. Differunt autem in hoc, quod quum præteritum concipimus, primo concipimus esse rei, ac secundo ejus exclusionem per aliud esse: quum autem futurum, primo concipimus esse rei exclusum per aliud esse, ac secundo esse ejusdem rei non exclusum, sed excludens aliud esse.

5° Patet autem has relationes, si sola spectetur successio, esse relationes rationis ex extrinsecas.

6° Intelliges postremo quid sit coexistentia. Tunc duo coexistere concipimus, quum de utriusque existentia cogitamus, quin de alterutrius non existentia cogitemus. Coexistentia nimirum est simpliciter *existentia plurium quæ se non excludunt.*

* 393. PROPOSITIO IV. *Tempus reale continuum est, non constans ex indivisibilibus.*

Nam 1° tempus reale mutatione continetur. Mutatio autem est ipsum *feri* rei, quæ non totum simul, sed paulatim, ac per partes non interruptas suum esse acquirit. Hujusmodi autem transitus continuitatem quamdam importat. Tempus igitur reale continuum quoddam est.

2° Mutationes omnes corporeæ reducuntur ad motum localem, sive translatitium, sive intestinum corporibus. Atqui motus localis constare nequit ex indivisibilibus. Motus enim localis fit ab uno loco ad alterum. Fit ergo percurrendo certam aliquam extensionem. Extensio autem, ut alibi demonstravimus (158), non componitur ex indivisibilibus. Ergo etiam motus. Ergo etiam tempus. Vide Aristotelem in *physicis* (1).

* 394. Quod si qua sit mutatio improprie dicta, quæ indivisibili memento fiat, ut est creatio ex nihilo, hæc tempus non constituit, sed signat momentum in tempore (294). Sic quoque motus finis aut interruptio, quemadmodum punctum in extensione, ita momentum indivisibile in tempore signat.

(1) *Phys.* VI, text. 4, et IV, text. 99.

Sed ex hoc inferri nequit, aut extensionem constare punctis, aut tempus momentis, ut alibi declaratum est (166).

* 395. PROPOSITIO V. *Tempus absolutum est duratio possibilis, quæ ex rerum sine fine sibi succedentium serie constare potest; seu brevius, possibilitas successionis.*

Quemadmodum alia plurima, ita quoque ipsam successionis ac durationis successivæ rationem licet a rebus abstrahere. Si igitur abstractione hac facta, cogitemus de duratione successionis, seu de ordine inter esse et non esse terminorum, quæ indeterminata sint et quoad naturam et quoad multitudinem, conceptus iste omnes possibiles terminos jam amplectens, est tempus absolutum, cujus characteres supra exposuimus (383).

Hoc jam facile intelligitur 1º quia tempus independens a rerum existentia nihil aliud esse potest, quam tempus possibile. Tempus enim reale cum a realibus rerum mutationibus non distinguatur, sine rebus existentibus nullum est.

2º Quia temporis absoluti characteres (383) successioni quidem reali convenire non possunt, at optime conveniunt successioni possibili; plane ut de spatio supra dictum est.

Merito itaque tempus absolutum *ideale* appellatur.

ARTICULUS III.

De motu ac mensura temporis.

396. Mutationem omnem corpoream veteres cum Aristotele motum vocabant (O. 379); id quod in præsentī potiori jure facere licet, cum revera mutatio omnis corporea ad unicam motus localis rationem, ut diximus (393, 2º), pertineat.

Quemadmodum *quies est permanentia corporis in aliquo loco*, ita *motus est continua loci mutatio*; videlicet successio positionum corporis unius respectu corporum coexistentium (351). Successivæ jam istæ positiones et tempus constituunt (388), et spatium quoddam determinant, certis limitibus comprehensum (344). Hinc duobus istis elementis, tempore ac spatio, motus continetur ac mensuratur.

Aptitudo mobilis ad datum spatium dato tempore percurrendum dicitur *velocitas*: quæ major est vel minor, prouti eodem tempore majus vel minus percurritur spatium.

397. Cum tempus mensuram motus constituat, quæres quomodo possit vicissim tempus, ut solet, motu mensurari. Animadvertite, hoc pacto res omnes mensurari, nempe assumendo unitatis loco aliquam quantitatem, eamque quantitati dimetiendæ iterum atque iterum applicando. Quantitas vero illa, quæ in mensuræ unitatem assumitur, dimetiendæ quantitati, intra quantitatis genus, homogenea esse debet. Sic linea lineis, superficies superficiebus, solida solidis mensurantur. Cum igitur tempus sit mutationum series (388), non aliter mensurari poterit quam determinata aliqua mutatione in unitatem mensuræ assumpta. Ut autem mutatio hæc iterato adhiberi possit ad mensuram, renovetur necesse est, et perpetuo, et uniformiter. Mensura igitur omnis temporis est *mutatio aliqua perpetua et uniformis*. Hoc pacto motus est temporis mensura.

398. *Naturalem* temporis mensuram humano generi suppeditant cælestium corporum motus. Hi enim motus non modo sunt constantes et ad sensum uniformes, sed etiam spectabiles omnibus, ac propterea mensuram præbent omnibus communem.

Mensuram *artificialem* suppeditant instrumenta, quæ vel cælestes motus imitantur, ut horologia, quæ indicis motu diurnum motum repræsentant; vel quæ mutationem aliquam uniformiter iterabilem perficiunt, ut casum pulveris vel aquæ.

399. Si quis mensuris hujusmodi omnibus caret, aut ad illas non attendat, non aliam habere poterit temporis mensuram, quam internas suas affectiones, non quidem omnes, sed eas quarum conscientiam habuit, ac memoriam saltem confuse servat. Unde sequitur, quod quo plures sunt affectiones hujusmodi, eo longius apparet datum temporis intervallum, quia plures partes in eo notantur. Atque hinc fit, ut idem temporis intervallum a quibusdam longius existimetur quam reipsa fuerit, a quibusdam brevius. Longius existimatur

ab iis, qui aut vehementioribus pulsantur affectibus, aut novis afficiuntur sensationibus, aut otio languescunt, aut curis anxium animum, aut desiderio distentum gerunt. Brevius e contrario ab iis, qui in oppositis adjunctis versantur. Brevissimum, imo nullum, iis qui lethargo oppressi vel graviori somno sepulti jacent.

400. Solvere jam per te poteris, ex dictis hucusque, sequentia problemata.

1° Si Deus unicum ens creasset, utrum posset ejus duratio mensurari, et quomodo.

2° An si existeret unicum tantummodo corpus, hoc moveri posset.

3° Si cœlestes motus omnes atque terrestres tempore dimidio breviori conficerentur, an posset mutatio hæc a nobis deprehendi.

4° Cur juvenibus anni diuturniores, senibus breviores videantur; vitæque sit misero longa, felici brevis.

LIBER QUARTUS.

CAPUT I.

DE NATURÆ ORDINE AC LEGIBUS.

ARTICULUS I.

De natura.

401. Multiplex hujus vocis *natura* significatio est. Omissis porro iis interpretationibus, quæ immediate ex vocis etymo derivantur, præcipua ejus significatio, ut apposite animadvertit Suaresius (1), et ad quam cæteræ reducuntur, ea est qua substantiarum essentias denotamus. Denotamus autem hac voce essentiam dupliciter: 1° per modum formæ metaphysicæ subjectum constituentis in certa aliqua specie (O. 307); 2° quæ significatio est hujus vocis maxime propria, prouti essentia est *principium internum primum et adæquatum operationum passionumque substantiæ*. Secundum hoc natura describi solet, ut alibi memoravimus (O. 72); *entis ad certo quodam modo operandum dispositio atque tendentia*.

402. Animadvertite porro 1° naturam proprie attribui *substantiis*, ut diximus, non vero substantiarum modis. Modi potius dicuntur esse secundum naturam, aut præter vel contra naturam.

2° Naturam esse *principium internum* mutationum substantiæ, nempe ex ipsis ejus constitutivis resultans, non adscititium et ex accidenti ipsi inhærens, ut est v. gr. principium motus artificialis in horologio. Per hoc tamen non excluditur principium externum, seu determinatio ab extrinseco accepta, sine qua quædam substantiæ mutari non possunt. Sed hæc quoque substantiæ, externa determinatione accepta, diversimode agunt ac patiuntur, si diversa sit earum natura.

3° Per hoc quod natura dicitur *primum et adæquatum principium*, distinguitur tum a suis potentiis seu facultatibus,

(1) *Disp. Met.* XV, sect. XI, § IV VI.

quæ sunt principia secundaria; tum a partibus essentiæ seu physicis seu metaphysicis, quæ sunt principia inadæquata.

4^o Semper tamen præ oculis habendum est, nullius rei naturam nos posse cognoscere aliter quam ex effectibus, qui ab ejus potentiis ac viribus procedunt, ut sæpe dictum est.

403. Juxta hæc definiendum erit, quid *naturæ* nomine intelligatur, quum rerum universitatem naturam appellamus. Videlicet hac voce significamus 1^o *mundanorum corporum connexionem et ordinem*; 2^o *magis proprie complexionem virium, quæ simul harmonice conspirantes, mundanarum vicissitudinum seriem certo ordine ac lege efficiunt*; 3^o quoniam vires causarum secundarum a prima causa sunt, quæ etiam cum iis operantibus omnia operatur, non raro naturæ nomine *naturæ auctor Deus* intelligitur.

* 404. Præter legitimas hujus vocis acceptiones, aliæ quædam memorandæ sunt, quæ ab erroneis et obsoletis opinionibus originem traxere. Ac primo Democrito, Epicuro et atheis natura genitrix, detractis metaphoris ac poeticis ornamentis, nihil est aliud quam materia æterna ac necessaria cum suis viribus brutis casu operantibus; de cujus erroris absurditate jam aliquid attigimus (258. 298, 3^o 5^o), et rursus in theologio fusius disputabimus.

Platonici complures, forte quia quasdam magistri sui metaphoras perperam interpretati sunt, existimarunt mundum immane quoddam animal esse; cujus anima omnes mundi partes contineret, motusque gubernaret, rerumque omnium genitrix esset. Quæ opinio plurimis inter antiquos philosophos arrisit, teste Plutarcho (1). Istis igitur omnibus natura est anima mundi. Nemo autem, arbitror, a nobis expectat, ut commentum hoc serio refellamus.

Maxime omnium errarunt stoici, qui mundi animam Deum esse putaverunt, qui corpoream materiam tanquam unitum sibi corpus pervaderet, regeret, divinaque ratione omnes

(1) *De plac. philos.*, l. II, c. III.

ejus motus temperaret; atque hinc mundum esse ac dici Deum.

* 405. Singularis fuit inter recentiores, quanquam et ipsa ex veterum seu sententiis seu loquendi modis expressa, opinatio Cudworthi (1). Hic existimavit mundanum ordinem, ac viventium præsertim originem, explicari non posse, nisi hæc fiat hypothesis: esse præter Deum Naturam quamdam genitricem, divinæ providentiæ subjectam ejusque administram. Hanc ipse putat substantiam esse incorpoream et viventem, sed infimo vitæ genere, vita nempe vegetativa, quamquam aliquem ei sensum et perceptionem tribuere videatur. Ea tamen consilio ac ratione non pollet; et quanquam ordinem ac ratione agat, ignorat tamen suorum operum fines, nec suarum actionum conscientiam habet. Hæc itaque rebus omnibus conjuncta vis omnia fingit ac format, in quibus artis vestigium aliquod aspiciamus; divina vero providentia errores quos illa admittit, emendat, eamque perpetuo moderatur.

* 406. Vanum hoc Cudworthi idolum facile evertitur per ea quæ theologia docet de conservatione rerum creaturarum, et de primæ causæ jugi cooperatione cum causis secundis; de quibus suo loco. Plura Moshemius (2); sed obvia iis qui rectis imbuti sunt principiis: nec ea referre opus est.

ARTICULUS II.

De naturæ legibus.

407. Ut ex dictis in logica (L. 308) colligitur, naturæ legem dicimus *modum constantem et uniformem, quem agentia materialia in agendo servant*; qui agendi modus ideo lex dicitur, quia summi opificis imperio rerum vires statutæ sunt, certisque normis subjectæ. Hæc leges, quoniam inter varia corpora relationes, quasdam constantes inducunt, ordinem quemdam constituunt, qui *ordo naturæ* dicitur. Eventuum vero secundum hunc ordinem consecutio, *naturæ cursus* appellatur.

(1) *Syst. intellect.*, c. III, dissert. De Nat. gen.

(2) In notis ad cit. opus Cudworthi.

408. Esse porro naturæ leges adeo manifestum est, ut si quis, intellectis terminis, probari hoc sibi vellet, is vel scepticus plane, vel novus in mundo hospes existimandus esset. Cum scepticis alibi egimus (L. 502).

Profecto habet suas evidentissimas leges et minerale regnum et vegetale et animale; et in his unaquæque classis, familia, genus, species, imo singulæ viventium partes, singula organa iisdem invariabiliter elementis constant, eadem figura, eodem ornatu, iisdem qualitatibus sensibilibus distinguuntur, easdemque ad cætera corpora relationes servant. Generatio viventium, eorumque ortus et interitus, omnesque organicæ functiones, vires item et facultates, mores et instinctus animantium talia a nobis modo deprehenduntur, qualia in vetustissimorum temporum monumentis expressa legimus, aut perspicimus.

Et hæc omnibus sunt in manifesto. Physicæ vero disciplinæ in eo totæ versantur, ut occultiores naturæ leges detegant ac demonstrent. Inde novimus, nullam esse in rerum natura vim, nullum motum, nullum eventum, nullamque eventuum seriem, quæ certis atque invariabilibus normis non subjiatur. Inutile est, ut singulas recenseam.

Liquet ergo, esse naturæ leges, tam naturæ universalis, quam particularis.

* 409. Cæterum leges illæ, quas physicæ scientiæ considerant, supremæ rerum leges proprie non sunt. Mundum enim quum consideramus, quasdam alias deprehendimus leges superioris ordinis, quæ non naturæ, sed auctoris naturæ constantem uniformemque agendi modum exhibent. Hæc vocari solent leges *cosmicæ*, ac satius forte vocari possent leges *providentiæ* in physicis legibus statuendis, ac naturæ cursu dirigendo. Sunt autem et ipsæ adeo manifestæ, ut a nemine in dubium adduci possint; æque partim experientia et inductione, partim ex divinorum attributorum conceptu demonstrantur. Reduci possunt ad sex.

* 410. *Prima* vocari potest *lex utilitatis*; eoque enuntiatur axioma: *Natura nihil facit frustra*. Alibi docuimus, quomodo sit hoc axioma intelligendum (L. 409; O. 288). Quod

vero nihil reipsa sit in rerum natura inutile aut superfluum, id obviæ observationes, multoque magis physicorum studia ostendunt; a priori vero facile idipsum demonstratur ex divinæ sapientiæ conceptu. Qua de re alibi.

Serunda non incongrue appellabitur *lex medii naturalis*; atque ita enurtiari potest: *Quæ mediante operatione causarum secundarum fieri possunt, Deus immediata sua operatione non facit*. De lege hac superius locuti sumus (306), quo in loco ejus quoque fundamenta attigimus.

* 411. *Tertia* est *lex continuitatis*, quæ a Dionysio his verbis jam fuerat expressa: *supremum inferioris naturæ attingit infimum superioris* (1). Sed apud recentiores lex hæc suam celebritatem Leibnitzio debet, a quo sic exprimitur: *Natura nunquam saltus facit* (2). Non dico omnes legis hujus applicationes a Leibnitzio factas, veras esse, sed certe negari nequit, nihil cautius evitare naturam, quam abruptos transitus ab uno extremo ad alterum; idque manifestum est 1º in corporum compositione et formatione; nam corpora et ex minimis constant elementis, et lento processu effinguntur; ut patet in crystallorum formatione, et præsertim in plantarum et animantium genesi; 2º in actionibus et motibus corporum; per gradus enim fere insensibiles ac per minima incrementa vel decrementa, ab uno extremo itur in alterum: ut obvia probant exempla; 3º in scala specierum; quæ quamquam plus minusve differant, in ipsa tamen varietate gradus quosdam continuumque progressum servant. In quo tamen, ut errandi occasio præcludatur, tria hæc sedulo notanda sunt:

* 412. 1º Hæc quæ dicimus, longissime abesse a falsa illa et absurda atheorum ac pantheistarum hypothesi *progressus necessarii*, quo una rerum species in alteram reipsa transiisse dicitur, ut in naturali historia contendit Lamarckius. Continuitatis enim lex non in necessitate materiæ, aut unitate substantiæ, sed in sapientia ac libertate Conditoris fundamentum habet.

(1) De div. nom. c. VII.

(2) Cf. v. gr. opus cui titulus: *Nouvel Essai sur l'Entend. hum.* Avant-propos.

2° In transitu a materia bruta ad entia organica, multoque magis a plantis ad animantia, continuitatis legem in exteriori solum forma ac specie servari posse. Organisatio enim et vita organica, etiamsi imperfectissima, ingenti intervallo viventia a non viventibus determinat, et quoad structuram, et quoad leges quibus subjiciuntur: animantia vero, etiamsi sensu tantummodo polleant, præter organicum corpus, substantia insuper constant a materia prorsus diversa: anima item rationalis, quæ est in homine, ab anima sensitiva brutorum ipsa essentia discrepat.

3° Continuitatem non servari in transitu a plantis ad animalia; nam perfectissimæ plantæ, ut arbores, sunt maxime dissimiles ab imperfectissimis animalibus. Transitus ergo habetur a mineralibus ad plantas simul et ad animalia, quasi ad duas series simultaneas, semperque magis divergentes; ita tamē ut in suis initiis quam proximæ sint quoad externam speciem, atque altera alteri coherere videatur. Similima enim vegetalibus imperfectissimis sunt imperfectissima animalia, ut zoophyta, infusoria, et alia quædam, quæ utrum animalia sint an plantæ, adhuc dubium est (1).

* 413. Quarta lex est unitatis, quæ in legibus physicis præsertim apparet, et in finium subordinatione. De qua jam aliquid diximus (243).

Quinta lex pulchritudinis. De hac alibi dicemus; et satis manifesta per se est.

Sexta lex constantiæ. Hæc duo importat: 1° quod ordo naturæ legesque semel a Creatore constitutæ in alias non mutantur; 2° quod his legibus exceptiones non inducuntur, nisi raro et ex digna causa. Ita autem fieri experientia liquet; ita fieri oportere, divinæ sapientiæ, bonitatis ac providentiæ, præsertim erga genus humanum, consideratio, ut mox videbimus, facile demonstratum dabunt.

(1) Cf. *Saggi filosofi del* P. G. B. Pianciani d. C. d. G. Vol. II, appendice, Dia-
logo I.

ARTICULUS III.

De legum physicarum contingentia.

414. Ad duos oppositos errores refellendos dicendum aliquid 1° de physicarum legum contingentia; 2° de earum certitudine. Illa contra pantheistas et deistas, hæc contra Humium in tuto collocanda est.

PROPOSITIO I. *Leges physicæ, quanquam hypothetice necessariæ, absolute tamen contingentes dicendæ sunt.*

* 415. Quod sint certe hypothetice necessariæ, adversariis, quibuscum certamus, probandum non est: cæterum ex dictis sponte fluit.

Nam, ut supra dictum est, qualitates omnes affectionesque corporum ab essentialibus eorumdem proprietatibus sponte resultant, si quædam ponantur conditiones (209, seq.); a qualitatibus autem huiusmodi, si earum actio non impediatur, naturales omnes effectus necessario consequuntur: non enim sunt materiæ vires indifferentes ad actum, sed ad unum determinatæ. Igitur et corporum qualitates et naturales effectus cum essentialibus corporum proprietatibus necessario connectuntur, non quidem simpliciter sed posita conditione.

* 416. Ad probandam itaque legum physicarum contingentiam satis erit ostendere, conditiones huiusmodi contingentem poni, et a corporum essentia nullatenus consequi. Id autem non difficulter ostenditur.

Sane conditiones de quibus sermo est, ut ex dictis colliges (209, seq.), ad has reduci possunt:

1° Ut quædam substantiæ simul componantur, sive ponderabilis illa cum ponderabilibus, sive ponderabiles inter se.

2° Ut hoc aut illo modo elementares atomi disponantur, et major minorve earum multitudo acervetur.

3° Ut motus vel translatus, vel molecularis secundum unam alteramve directionem, et cum hac vel illa velocitate, corpori communicetur.

4° Ut ex minerali materia organa quædam efformentur, certam quamdam figuram et usum, certumque inter se ordinem habentia.

5° Denique ut organicum quoddam corpus anima informetur, sive sentiente tantum, sive sentiente et rationali.

Jam quis est adeo vecors, qui non fateatur, hæc omnia a materiæ essentialibus proprietatibus, extensione ac vi resistendi, tam parum consequi, quam parum consequitur ex igni essentia ut ex eo fiat scamnum, aut ex essentia ferri ut in machinam conformetur?

417. Ut uno aut altero utar exemplo, motus v. gr. queis terra ac planetæ omnes, sive circa suum axem, sive circa solem moventur, aperte contingentes sunt. Nam data materiæ essentia, imo data quoque planetæ cujusque, v. gr. terræ, figura, volumine, densitate, nihil in ea est quod requirat hanc aut illam motus velocitatem, hanc aut illam directionem, quodque orbitæ locum, planum, figuram determinet. Hæc omnia poterant in infinitum variari. Ita quoque motus diurnus poterat breviori tempore vel longiore absolvi, et secundum oppositam directionem ferri.

Exemplum alterum evidentissimum in corporibus organicis reperies. Ultima enim eorum elementa sunt substantiæ simplices inorganicæ ex quibus mineralia quoque constant.

Quis igitur dicat, posita harum substantiarum essentia, repugnare prorsus, ut ex iis substantiæ organicæ hæc et non aliæ non componantur, ut ex hisce substantiis organa plantarum et animantium tam varia et ad tam varios usus spectantia non exstruantur, ac demum ut ex hisce organis plantæ et animalia non consurgant? Hæc si quis dicat, cum eo sane disputandum non esset.

Nulli ergo qui sapiat, dubia esse potest legum physicarum contingentia.

ARTICULUS IV.

De legum physicarum constantia.

* 418. Venio ad questionem alteram (414). Existimavit Wolfius conclusiones quæ inductione colliguntur, non certas esse, sed solum probabiles (1). Quod si verum esset, concludere deberemus, certitudinem nobis nullam esse* de

(1) *Log.*, p. II, § 674, seq.

legibus naturalibus, saltem quod ad futuros eventus attinet: leges enim naturales inductione deprehenduntur (L. 308). Idem sensit Lockius cum omnibus præteriti sæculi sensistis.

Humius vero qui, ut alibi diximus (O. 272), causæ notione e medio dempta, de mera eventuum successione certitudinem nobis reliquam fecit, concessit utique, nos consuetudine quadam idearumque associatione, minime dubitare de futurorum eventuum similitudine cum eventibus præteritis; negavit tamen, persuasionem hanc ullum in rebus fundamentum habere, aut ratione probari posse.

* 419. Hæc enim propositio, ita ipse, *futurum erit præterito simile*, non est experimentalis; futurum namque experientiæ objectum esse non potest; neque est a priori, quia in notione eventuum præteritorum non perspicimus contentam notionem similitudinis cum futuris. Non repugnat igitur, variari naturæ cursum, et res aliquas similes iis, de quibus experientiam cepimus, effectus dissimiles, atque adeo contrarios, in posterum nobis offerre.

Quare quum argumento inductionis utimur, ut suadeamus a rebus similibus similes anteactis effectus in posterum consecuturos, supponimus semper id quod in quæstione versatur: videlicet futurum præterito fore simile.

* 420. Ad scepticas hasce theorias refellendas, necesse sane non est, ut cum Reidio aliisque e scotica schola philosophis, ad naturæ instinctum atque ineluctabile imperium, tanquam ad extremam in naufragio tabulam confugiamus: suppetunt enim humanæ menti evidentia principia atque in promptu posita, quibus tota hæc quæstio facile dirimitur. Dixi *principia*; quod est sedulo notandum. Radix enim erroris hujus, ut et aliorum plurimorum, est vulgaris ille Lockii empirismus, qui omnia ab experientia repetit, et totam in sensibus philosophiam demergit. Non igitur a sola experientia, sed ab experientia simul et quibusdam principiis a priori, tam inductiva argumentatio, ut in logica ostendimus (L. 306), quam certitudo de legum naturalium constantia dependet.

421. PROPOSITIO II. *Legum naturalium constantia, etiam quoad futuros eventus, indubiis innititur fundamentis.*

Supponimus ex alibi dictis causæ notionem, eamque in ipsa experientia fundamentum habere (O. 275, seq.); principium item causalitatis (O. 318); itemque leges naturæ esse effectus qualitatum ac virium diversarum, quæ corporibus insunt (415); ac tandem naturæ auctorem et gubernatorem esse Deum.

422. Sic porro arguimus. Naturæ leges, ut paulo ante dictum est (415), resultant ex essentialibus corporum proprietatibus, posita aliqua conditione contingenti. Igitur donec essentielles corporum proprietates et cæteræ conditiones iis superadditæ permanent, et ab agendo non impediuntur, naturæ leges eadem erunt. Causa enim necessaria, positis omnibus quæ ad agendum requiruntur, necessario agit, nisi impediatur. Proinde ad hoc ut naturæ leges mutationem subeant, unum ex his contingat necesse est, vel 1º quod essentielles corporum proprietates mutentur; vel 2º quod mutentur contingentes illæ conditiones quibus cæteræ corporum qualitates affectionesque constituuntur; vel saltem 3º quod naturales corporum actiones Deus impediat. V. gr. ut mutetur ordinarius effectus affinitatis chemicæ, quam una substantia habet ad alteram, necesse est ut modificentur eæ atomorum conditiones ex quibus affinitas determinatur, vel resistendi vis a qua ultimato ipsa procedit, vel demum ut affinitatis actionem divina virtus elidat. Itemque ut mutationem subeant leges mechanicæ cœlestis, necessarium est, ut vel novas a Deo determinationes sive sol sive planetæ recipiant, vel cesset corporum inertia vel naturales vires Deus impediat.

423. Atqui nulla ex his suppositionibus labefactare potest certitudinem de legum physicarum constantia.

Non prima; nam essentiæ sunt immutabiles.

Non secunda; de quo vadem habemus Creatoris sapientiam ac providentiam. Etenim corporea natura in hominis gratiam condita est; pessime autem fuisset homini provisum, si leges, quibus corporea natura regitur, Deus passim immu-

taret. Fac enim dubiam esse legum naturalium constantiam: jam nulla foret experientiæ utilitas, nulla providentia futuri, nullus in humanis actibus ac relationibus ordo, nullumque certum consilium, sive parandis quæ vitæ necessaria sunt, sive arcendis quæ noxia, sive remediis adhibendis; omnia plena dubitationis essent, plena terroris; hominumque societas consistere non posset.

Non denique tertia suppositio admitti potest. Nam licet fateamur, non repugnare divinæ sapientiæ ac providentiæ, imo maxime eam decere, ut propter finis se dignos Deus quandoque naturalium legum effectus impediat, tamen id passim fieri ac sine ratione est Deo prorsus indignum. Hæc enim inconstantia in sapientem non cadit; et ex illa eadem, quæ modo notavimus, in hominum vita sequerentur incommoda.

Igitur certa est legum physicarum quoad futuros eventus constantia.

424. Hinc colligemus 1º duo esse principia a priori, quibus legum physicarum constantia, et futurorum eventuum cum præteritis similitudo stabilitur.

Primum: *Causæ necessariae, positis requisitis ad agendum necessario agunt nisi impediuntur virtute divina.*

Alterum: *Divina sapientia postulat ut constantibus legibus utatur in mundi administratione, utque causarum naturalium effectus vel nunquam, vel rarissime impediat.*

2º Generale hoc pronunciatum: *Leges naturales sunt constantes*, et quod ab ipso immediate consequitur: *Futuri eventus in iisdem adjunctis similes erunt præteritis*, esse principia a priori, quæ ab inductione non pendent.

3º Constantiam nihilominus legum physicarum in particulari, per se, physice certam esse. Nam si de certitudine objectiva sermo est, hæc supponit effectum, de quo agitur, ex naturæ lege fieri; si vero de certitudine subjectiva, hæc supponit naturæ ea de re legem experientia et inductione fuisse cognitam.

4º Certitudinem demum de constantia legis alicujus in hoc aut illo futuro casu esse physicam hypotheticam; impli-

citam enim habet conditionem illam: *nisi per divinam virtutem legi fiat exceptio*; quæ exceptio in casibus peculiaribus, ut diximus, non repugnat. Confer dicta in logica (L. 408).

ARTICULUS V.

De ente naturali ejusque oppositis.

425. A natura ejusque legibus aliquid *naturale* dicitur. Est itaque hic locus, ut de ente naturali deque ejus opposito fiat sermo. Dicitur aliquid *naturale* duobus modis, prouti et de natura supra dictum est (401, 403): nempe 1° respectu alicujus determinatæ naturæ; 2° respectu naturæ universæ. Primo modo *naturale* est: *id omne cujus ratio sufficiens est in entis natura*; ut v. gr. naturalis est in homine sanguinis circulatio. Secundo modo: *quidquid est juxta cursum aut ordinem naturæ universæ*. Est autem secundum naturæ ordinem, *quidquid naturæ rerum convenit*; itemque *quidquid in datis adjunctis fieri potest, aut debet viribus entium mundanorum juxta leges physicas*, v. gr. quod lapis sublato fulcimento decidat, vel quod quædam corpora igne dissolvantur. Est secundum naturæ cursum: *quidquid continetur inter eos eventus, quorum consecutio naturæ cursum constituit*: ut quod verno tempore flores erumpant, vel quod sol certa quadam hora sit cras oriturus.

426. Naturali, prouti dicitur respectu alicujus naturæ particularis, opponitur diversimode *voluntarium*, *violentum*, *artificiale*; et secundum hanc oppositionem diversimode specificatur naturalis significatio. Versatur autem tota hæc oppositio circa rei mutationes et motus.

1° *Voluntarium* est, quod fit cum cognitione finis, ac propterea non est per solam entis naturam determinatum ad unum. *Naturale* igitur secundum oppositionem ad *voluntarium* est *id omne quod ab entis natura determinatur ad unum*. In bruto v. gr. actus comedendi voluntarius est, functiones digestivæ sunt naturales.

2° *Violentum* est id omne, quod ab extrinseco rei accidit contra naturæ propensionem, seu repugnante natura. Hinc *naturale* quatenus violento opponitur, est *id ad quod natura*

insitam propensionem habet. In hunc modum *naturale* est v. gr. uni substantiæ separari ab altera, cum qua chimice combinata est, si tertia accedat substantia ad quam affinitatem habeat majorem; violenta est autem separatio quæ fit per electricitatem. Notandum tamen, *naturale* hoc sensu intellectum et violentum proprie reperiri in iis solum entibus, in quibus sunt veræ ac proprie dictæ propensiones; ut sunt entia voluntate prædita.

3° *Artificiale* est id omne cujus principium non est naturæ insitum, quemadmodum est in marmore figura Jovis, et in horologio motus indicis. Quapropter *naturale*, ut condistinguitur ab artificiali, est *id cujus principium est ipsa natura insitum*. Ita dicitur homini naturalis ratiocinandi facultas et loquendi. Animadvertite porro, quum dicimus artificialium principium non esse naturæ insitum, hoc intelligi de principio adæquato. Semper enim præsupponitur in natura inadæquatum aliquod et radicale principium eorum omnium, quæ per artem fiunt. Nam neque marmori v. gr. figura aliqua tribui posset per artem, nisi esset in marmore cohesio particularum ac soliditatis status; nec in machina aliquis produci potest motus, nisi viribus utendo naturæ.

427. Hinc perspicies, in quo præcipue natura ab arte differat, eique præcellat. Nam 1° natura *effective* operatur; ars solum *directive*. Natura namque viribus sibi propriis opera sua producit; ars vero viribus naturæ. Nam et subjectum artis sunt potentiæ naturales, et opera artis ad hoc unum reducuntur, ut naturalia agentia passivis diversimode conjungantur, eorumque actiones diversimode modificentur.

2° Natura in ultimis quoque corporum elementis agit, ipsasque atomos conjungit, ac singillatim movet et ordinat; ars vero solum corpora jam formata disponit, eaque plerumque in superficie tantum modificat.

3° Natura sua opera per se conservat, atque etiam artis opera. Ars vero propria opera per se conservare nequit, quanquam et ad propria opera, et quandoque etiam ad opera naturæ conservanda, suo modo concurrat.

2° Machinæ quas natura construit, quæ sunt corpora orga-

nica, machinas sibi similes efficiunt; ars autem machinis suis ad hoc pertingere non potest.

428. Naturali prouti dicitur respectu naturæ universæ, opponitur *fortuitum*, et *supernaturale*; sed fortuitum opponitur naturali, quatenus naturale dicit id quod est *juxta cursum naturæ*; supernaturale vero, quatenus naturale significat id quod est *juxta ordinem naturæ* (425).

429. Fortuitum enim est id quod in cursu naturæ non per se continetur, sed per accidens; quia provenit ex concursu causarum, quæ sunt quidem in naturæ ordine, sed quarum operationes non sunt a natura coordinatæ inter se aut subordinatæ. Hinc fortuitum dicimus raro contingere.

Naturale igitur per oppositionem ad fortuitum est *id quod per se continetur in naturæ cursu*. Mors v. gr. ex senio vel feбри naturalis est; ex fulgure vel ruina, fortuita.

430. Supernaturale est omne id quod naturam superat. Potest autem aliquid superare naturæ universæ *exigentiam*, ut est v. gr. gratia sanctificans; vel *vires* universæ naturæ, ut est recuperatio instantanea sanitatis. Illud est supernaturale *quoad ipsam essentiam*, hoc quoad effectiōnem, et dicitur *miraculum*; de quo mox.

Naturale itaque per oppositionem ad supernaturale duobus modis dicitur.

1^o *Quidquid est secundum naturæ exigentiam*. Est autem secundum naturæ exigentiam finis ultimus, qui ejus facultates expleat, et media quæ ad hunc finem assequendum necessaria sunt: Hoc pacto dicimus, beatitudinem aliquam esse finem naturalem naturæ intelligentis, et virtutes morales esse virtutes naturales.

2^o *Quidquid non excedit vires naturæ juxta leges physicas operantium*. Ita dicimus miranda plura, quæ a præstigiatoribus fiunt, esse opera naturalia.

CAPUT II.

DE MIRACULIS.

ARTICULUS I.

Miraculi notio.

431. De supernaturali, ut exigentiæ naturali opponitur, disputant theologi. Ad nos pertinet ut de miraculo, videlicet de supernaturali, prouti ab operatione naturali distinguitur, quæ necessaria scitu sunt breviter exponamus. Doctrinam hanc omnem a s. Thoma corrivabimus: nemo enim hac de re melius scripsit. Definienda in primis venit recta miraculi notio.

432. PROPOSITIO I. *Miraculum proprie est effectus qui totius naturæ creatæ ordinem ac facultatem excedit.*

Probatur ita, juxta doctrinam quam s. Thomas variis in locis proponit (1). Miraculi nomen ab *admiratione* desumptum est: dicitur enim aliquid miraculum quasi admiratione plenum, habensque in se vere ac simpliciter admirationis causam. Admirationem autem duo gignunt, juxta Aristotelis doctrinam (2): primum est quod causa ejus rei quam admiramur sit occulta; alterum quod in re hac aliquid appareat, per quod videatur effectus contrarius ei, quem miramur, expectari debere. Ex hoc duplici capite homines v. gr. electrica et magnetica phænomena mirantur.

433. Sed causa effectus mirabilis potest esse occulta dupliciter, nempe vel *quoad nos*, vel *secundum se*. Quoad nos occulta est, quum non est natura sua et omnibus occulta, sed huic tantum vel illi, quemadmodum causa eclypseos occulta est rudibus, non autem astronomis. Quod si causa fuerit natura sua omnibus occulta, erit occulta secundum se. Talis est Deus, qui a sensibus remotissimus est, et cujus essentiam humanus intellectus cognoscere non potest.

434. Pariter in re in qua aliquid miramur, quandoque est dispositio ad oppositum vere et *secundum rei naturam*, ut si

(1) *Q. disp. de Pot. q. VI, art. II. Summ. th. p. I, q. CV, art. VII; et q. CX, art. IV. Contra gentes. Lib. III, c. CI.*

(2) *I Met., c. II.*

lapis sursum ascenderet; quandoque autem hæc dispositio ad oppositum est tantummodo *in opinione admirantis*, ut quum puer primo videt ferrum ad magnetem attolli.

Denique potest effectus naturæ repugnans vel esse præter vires et ordinem alicujus naturæ particularis, ut quum lapis a quopiam sursum projicitur; vel esse præter vires et ordinem rerum omnium creatarum, ut si lapis nulla vi attollente aut projiciente sursum ascenderet. Hæc dicimus excedere ordinem facultatemque totius naturæ creatæ.

455. Hisce præstitutis, sic conclusio proposita demonstratur. Miraculum proprie acceptum, cum sit aliquid vere mirabile, ac maxime mirabile, illud est dicendum, in quo duo illa, quæ admirationem gignunt, maxima sunt; videlicet in quo causa est occultissima, et effectus est ei qui contingere debere videretur, maxime oppositus. Sed causa occultissima est Deus; effectus autem ei qui contingere deberet maxime oppositus ille est, qui totius naturæ creatæ ordinem ac facultatem excedit, qui quidem solummodo Deum habere potest auctorem. Ergo miraculum proprie acceptum est effectus, qui totius naturæ creatæ ordinem ac facultatem excedit.

456. Hinc intelliges 1º Non id omne quod sola virtute divina fieri potest, esse miraculum proprie dictum, sed id tantummodo, quod sola virtute divina fit in rebus illis, in quibus secundum naturæ creatæ ordinem oppositum contingere deberet.

2º Quapropter creatio rerum ex nihilo in temporis initio, et creatio animarum, quæ fit in temporum serie, miracula proprie non sunt. Nam creatio ex nihilo non pertinet secundum naturæ ordinem ad aliquam aliam causam, præter Deum.

3º Miracula proprie dicta fiunt solo Dei imperio, et ex ejus auctoritate in vires legesque naturæ. Nam si fierent per applicationem alicujus causæ secundæ, jam intra naturalem ordinem continerentur.

4º Hinc patet discrimen miraculi a *miro*. Mirum enim est quidquid insuetum est in naturæ sensibilis cursu, quod

tamen aliquando contingit, vel quia quædam activa quibusdam passivis ab homine conjunguntur par artem vulgo occultam, ut quum potassium arte separatum a suis naturalibus combinationibus in aquam projicitur et comburitur; vel quia agens creatum sed occultum res quasdam movet, aut naturæ sensibilis vires applicat, impedit, determinat, ut quum angeli Heliodorum flagellis ceciderunt, aut quum maligni spiritus mensas agitant. Mirum itaque nec ordinem naturæ creatæ, nec facultatem excedit.

5º Patet quoque discrimen miraculi a *præstigio*. Præstigium enim est mera illusio per immutationem a vi aliqua intelligente et invisibili effectam in organis, sive sensuum, sive phantasie. Hoc quoque naturæ creatæ fines non superat.

6º Atque hinc ulterius intelliges quantum differat miraculum ab *opere magico*.

Magia enim est ars mira patrandi, sive per occultas naturæ vires, sive per occultam industriam, sive malorum demonum interventu.

Prima et altera magiæ ratio dicitur *naturalis*, tertia *diabolica*.

7º Postremo multo majus ac manifestius est miraculi discrimen ab eventibus naturalibus *extraordinariis*, qui videlicet secundum naturæ cursum raro contingunt; cujusmodi sunt eclipses, auroræ boreales, apparitiones cometarum, et similes.

457. Venio ad miraculi divisiones. Omnia miracula facultatem naturæ excedunt; sed non omnia eodem modo. Hinc triplex miraculorum species.

Nam 1º alia superant naturæ facultatem quoad ipsam facti substantiam, videlicet *quantum ad id quod fit*. Huc spectant ea omnia quæ naturæ vires nunquam facere possunt, ut v. gr. quod duo corpora sint simul in eodem loco.

2º Alia superant naturæ facultatem, non quantum ad id quod fit, sed *quantum ad id in quo fit*. Hæc sunt quæ natura facere potest et facit, sed non in certis quibusdam subjectis. Sic v. gr. intra naturæ ordinem est; quod animal quum gene-

ratur, vitam recipiat et visum, sed non quod animal mortuum vitam recipiat, vel quod post cæcitatem ad visum redeat.

3° Alia excedunt naturæ vires quantum ad *modum* et *ordinem faciendi*; suntque ea quæ fiunt a natura et fiunt in eodem subjecto in quo fit miraculum, sed a natura fiunt per certas quasdam causas et certo quedam processu, per miraculum vero sine his; ut quum aliquis subito sanatur a feбри, sine curatione et sine remediis, quæ natura requirit.

Hæc est miraculorum divisio, quam s. Thomas proponit in *Summa theologia* (1): ex qua etiam miraculorum gradus desumuntur.

438. Parum ab hac differt divisio, quam idem alibi Aquinas tradit, miraculorum *supra naturam*, *contra naturam*, *præter naturam* (2).

1° *Supra naturam* dicuntur, quum effectum illum, quem Deus facit, natura nullo modo facere potest, quatenus formam per miraculum inductam natura vel nunquam inducit, vel non in ejusmodi materiam. Hujusmodi sunt corporis glorificatio, et mortui resurrectio.

2° *Contra naturam*, quando in natura est dispositio contraria effectui, quem Deus operatur, neque huic naturali dispositioni naturale impedimentum oppositum est; ut quum tres pueri in camino ignis non sunt combusti, vel quum aquæ Jordanis steterunt.

3° *Præter naturam*, quum Deus producit effectum, quem natura producere potest, sed non eo modo quo a Deo fit; ut est instantanea curatio.

ARTICULUS II.

De causa miraculorum efficiente.

439. PROPOSITIO II. *Solus Deus miracula proprie dicta facere potest.*

Ita clare ac breviter probatur ex s. Thoma:

1° « Quod est sub ordine totaliter constitutum, non potest

(1) P. 1. q. CV, art. VIII. Eandem aliis verbis tradit in III. *Contra gent.*, c. CI.

(2) De Pot. q. VI, art. II ad 3.

» præter ordinem illum operari. Omnis autem creatura est » constituta sub ordine, quem Deus in rebus statuit. Nulla » ergo creatura potest supra hunc ordinem operari, quod » est miracula facere (1). »

2° « Quando aliqua virtus finita proprium effectum operatur ad quem determinatur, non est miraculum: licet » possit esse mirum alicui, qui illam virtutem non comprehendit... Omnis autem creaturæ potentia est limitata ad » aliquem determinatum effectum, vel ad aliquos. Quidquid » ergo virtute cujuscunque creaturæ fiat, non potest dici » miraculum proprie, etsi sit mirum creaturæ virtutem » illius non comprehendenti (2). »

3° « Omnis creatura in sua actione requirit subjectum » aliquod, in quod agat. Solius autem Dei est, ex nihilo aliquid facere... Nihil autem quod requirit in sua actione » subjectum, potest agere, nisi illa ad quæ subjectum est in » potentia: hoc enim agens in subjectum aliquod operatur, » ut educat illud de potentia in actum. Nulla igitur creatura, » sicut nec creare potest, ita et nec agere potest in aliqua re, » nisi quod est in potentia illius rei. Fiunt autem multa » miracula divinitus, dum in re aliqua fit divina virtute » quod non est in potentia illius rei... Hæc igitur miracula » nulla virtute creata fieri possunt (3). »

440. PROPOSITIO III. *Tam boni quam mali spiritus mirabilia quædam perpetrare possunt, non per modum miraculi, sed per modum artis.*

Per modum miraculi mirabilia fiunt absque naturalium agentium actionibus, ut ex dictis in præcedenti articulo manifestum est: per modum vero artis, quum mediante actione principiorum naturalium agens intelligentia præditum ea facit, quæ natura producere non potest, vel saltem convenientius, utilius, ornatus ea facit, quæ natura ruditer producere solet.

441. Prima pars propositionis quæ negativa est, ex præcedenti propositione immediate consequitur.

(1) *Contra gent.* Lib. III. c. CII, § 1.

(2) *Ibid.* § 2.— (3) *Ibid.* § 3.

Altera pars ita ostenditur ex s. Th. principiis.

Spiritus certe corpora loco movere possunt: non hoc in hominis quoque potestate est, quod autem potest inferior, potest superior. Igitur spiritus boni et mali 1° possunt efficere ea omnia quæ ad motum localem reducuntur, videlicet non modo transferre etiam celerrime corpora, eorumque partes conjungere, vel dissociare, sed etiam lucis, caloris, electricitatis ac magnetismi phænomena ciere, et si quæ sunt alia quæ motu contineantur; 2° possunt applicare activa passivis ad varios producendos effectus; 3° demum commovere sensuum et phantasie organa, quemadmodum in representatione sensili, in ejusque reproductione contingit; ita ut sine externis objectis, eorum representationes excitentur.

442. Sic mira plurima operari possunt. 1° Quia sunt invisibiles. Unde etiam motus consueti fieri ab homine, vel ab aliis naturalibus agentibus, si per ipsos fiant, miri sunt; ut est v. gr. mensarum agitatio, aut corporum elevatio. 2° Quia activas passivasque corporum virtutes multo melius quam homines cognoscunt, easque facilius ac celerius ad effectum applicare possunt; tum etiam quia plura simul ad opus admove, et intensiore impetu, et majores agitare corporum moles ipsis datur, quam humanis viribus permissum sit. 3° Quia representationes phantasticas, aut etiam sensiles excitare possunt, vel organa immutando, vel medium.

Igitur spiritus tam boni quam mali naturali virtute, quæ corpora movent, mira plurima operari possunt, non per modum miraculi, sed per modum artis; nempe ea solum quæ motu viribusque corporum ad finem aliquem adhibitis, fieri queunt (1).

443. Sedulo tamen notanda hæc duo.

1° Tam bonos quam malos angelos providentiæ divinæ ordinationi subditos esse, propterea malis angelis liberum non esse, ut quæcunque volunt faciant, imo plurima quæ naturaliter facere possunt, facienda ipsis non permitti; quare ea solum exsequi ipsis licet, quæ Deus permittit.

(1) Cf. S. Th. q. cit. art. III.

2° Si quando boni spiritus per organorum commotionem aliquid homini repræsentent, non idcirco hominem ab ipsis in errorem induci. Nam ex ipsis rei adjunctis, vel alio aliquo modo aut error præcavetur, aut facile deprehenditur. E contrario mali spiritus hoc ipsum intendere possunt, ut hominem decipiant ac ludibrio habeant.

444. PROPOSITIO IV. *Boni spiritus miracula proprie dicta operari possunt, non tanquam causæ principales, sed tanquam Dei instrumenta ac ministri: id quod de malis spiritibus dici nequit.*

Mirifice hanc propositionem declarat s. Thomas. Hæc primo præmittit. « Angeli ad miracula facienda tripliciter » operantur. Uno modo precibus impetrando... Alius modus est, quod Angeli materiam disponunt sua naturali » virtute, ad hoc quod miraculum fiat... Tertius modus est, » quod operentur etiam aliquid coagendo. » Postea subdit de hoc tertio modo:

« Constat quod Deus solo imperio miracula operatur: videmus autem, quod imperium divinum ad inferiores rationales spiritus, scilicet humanos, mediantibus superioribus, scilicet Angelis, pervenit, ut in legis veteris latione » apparet: et per hunc modum per spiritus angelicos vel » humanos imperium divinum ad corporales creaturas pervenire potest, ut per eos quodammodo naturæ præsentetur » divinum præceptum, et sic agant quodammodo spiritus » humani vel angelici ut instrumentum divinæ virtutis ad » miraculi perfectionem: non quasi aliqua virtute habitua- » liter in eis manente, vel gratuita vel naturali, in actum » miraculi possint... Sed virtus ad cooperandum Deo in » miraculis, in sanctis intelligi potest ad modum formarum » imperfectarum, quæ non permanent nisi per præsentiam » agentis principalis, sicut lumen in aere ac motus in instrumento (1). »

445. De malis spiritibus hæc subjicit:

« Ad hujusmodi quæ sunt supra facultatem naturæ ipsorum, eis a Deo nulla datur potestas: quia cum operatio

(1) Q. cit. art. IV.

» miraculosa sit quoddam divinum testimonium indicativum
 » divinæ virtutis et veritatis, si dæmonibus, quorum est tota
 » voluntas ad malum, aliqua potestas daretur faciendi mira-
 » cula, Deus falsitatis eorum testis existeret (1). »

ARTICULUS III.

De causa miraculorum finali.

446. PROPOSITIO V. *Finalis miraculi causa, non quidem in ordine physico, sed in altiori providentiæ ordine continetur: in eoque est posita, ut miraculo, tanquam signo ac testimonio divino, aliquid a Deo hominibus manifestetur.*

Nota 1º ordinem *physicum* esse ordinem rerum materialium ad certos quosdam effectus: ordinem vero *providentiæ* esse ordinationem rerum omnium, ac maxime entium intelligentium, ad mundi finem. Ordo igitur *physicus* minus patet, quam ordo *providentiæ*; estque medium huic subordinatum.

2º Quæ Deus per miracula testatur, tum ad aliquam personam, tum ad aliquam doctrinam pertinere posse. Ad personam pertinet manifestatio innocentiae, sanctitatis, amoris Dei ad illam, aut e converso criminis et nequitiae: ad doctrinam confirmatio veritatis ejus, vel etiam divinæ originis.

447. Finem miraculorum non contineri intra *physicum* ordinem, manifestum est. Nam in iis in quibus naturæ ordo immediatam Dei operationem constanter requirit, ut diximus (456; 1º, 2º), miraculum non est. Supponi autem nequit; naturæ ordinem indigere aliquando posse miraculo, ut conservetur: hoc enim ostenderet in supremo opifice prævisionis defectum, quemadmodum in humano artifice, quum in machina a se exstructa aliquid emendare cogitur, ne illa dissolvatur aut inutilis fiat.

Miracula vero non possunt a Deo fieri, nisi propter finem. Hinc finem miracula habeant necesse est; qui cum in ordine physico non contineatur, ad ordinem certe providentiæ pertineat oportet. Per hæc patet prima propositionis pars.

(1) Q. cit. art. V.

448. Pars altera propositionis probatur 1º ex omnium consensu populorum, qui semper in monstris et prodigiis Divinitatis sigillum quoddam agnoverunt, et quæcunque miraculo confirmarentur, tanquam ipsius Dei testificatione firmari, arbitrati sunt.

Probatur 2º ex ipsa rei natura. Nam miraculum est operatio divina. Operatio autem est voluntatis signum: ex natura autem et adjunctis operationis dignoscitur voluntatis intentio. Igitur quum miraculum fit in alicujus seu favorem, seu punitionem, per hoc ipsum ostenditur Dei in illum benevola voluntas, vel ira. Ac tum præsertim quum Dei nomen invocatur, ut alicujus hominis vel innocentiam vel sanctitatem, vel doctrinæ traditæ veritatem confirmet, si revero miraculum fiat, quis neget, velle Deum, ut rei de qua agitur, fides habeatur?

449. Nominatim, ut apposite animadvertit s. Thomas, miracula sunt signum apprime idoneum ad supernaturalem doctrinam confirmandam. « Naturale est homini, ita ipse, » ut veritatem intelligibilem per sensibiles effectus deprehendat. Unde sicut ductu naturalis rationis homo pervenire potest ad aliquam Dei notitiam per effectus naturales, » ita per aliquos supernaturales effectus, qui miracula dicuntur, in aliquam supernaturalem cognitionem credendorum homo inducitur (1). »

Et alibi « Quia quæ sunt fidei humanam rationem excedunt, non possunt per rationes humanas probari; sed » oportet quod probentur per argumentum divinæ virtutis; » ut dum aliquis facit opera, quæ solus Deus facere potest, » credantur ea quæ dicuntur esse a Deo: sicut quum aliquis » defert litteras annulo regis signatas, creditur ex voluntate » regis processisse, quod in illis continetur (2). »

450. Ex dictis sequitur 1º quæcunque vel uno miraculo confirmantur, indubia prorsus esse, quantumvis intellectus humani comprehensionem excedant.

(1) *Sum. th. 2. 2. p. q. CLXXVIII. art. I.*(2) *Ibid. p. III, q. XLIII, art. I.*

2° Idem dicendum, si quando Deus alicui homini concedat miraculorum potestatem instrumentalem (444).

3° Itemque si quædam mira a bonis spiritibus patrata esse constet.

4° Ad divinam pertinere providentiam ut sicubi permittat, a spiritibus malis seu mira, seu præstigia fieri, id in ejusmodi permittat adjunctis, ut clara suppetant hominibus indicia, quibus cognoscant, ea divina signa non esse: secus Deus in errores invincibiles homines adduceret.

ARTICULUS IV.

* De quibusdam falsis miraculi notionibus.

451. Facile nunc erit, de quibusdam falsis miraculi notionibus judicium ferre. Sunt primo quædam miraculi definitiones, quæ revera non definitiones sunt, sed negationes. Hujusmodi est illa Spinosæ: miraculum esse *opus naturæ, cujus causam naturalem exemplo alterius rei solitæ explicare non possumus* (1). A qua parum abludit Lockii definitio. Is enim ait: *miraculum esse operationem sensibilem, quæ cum spectatoris captum superet, ipsiusque opinione cursui naturæ constituto contraria sit, ab eo pro divina habetur* (2). Quarum prima totam miraculi rationem in humana ignorantia collocat, altera in præjudicio. Uterque una cum aliis quid ad eos accedunt, refutabitur, ostendendo miraculorum possibilitatem.

1° Clarekius (3) hoc tanquam principium assumit, nullas esse materiæ vires, nullam activitatem; omniaque a Deo, vel immediate per se, vel per creaturas intelligentes fieri. Hinc proprie loquendo, naturæ vires esse Dei operationes, naturæque cursum nihil esse aliud, quam voluntatem Dei, prouti ratione quadam continua, constanti et uniformi agit. Hinc miraculum definiri posse dicit: *effectum consueto naturæ ordini contrarium, ab alicujus entis intelligentis, hominique superioris insueto interventu productum*.

(1) *Tract. theol. polit.*, c. TI.

(2) *Tract. de mirac.*

(3) *Tract. on the exist. of God.* ch. XIX.

2° Bonnetus (1) opinatur, duos a Deo constitutos esse ordines, duasque causarum series, ex quarum prima consuetus naturæ cursus dimanet, ex altera vero insueti effectus ac præter consuetum naturæ cursum, in certis quibusdam locorum, temporum, personarum adjunctis a Deo paratis, originem habeant. Miraculi proinde notio juxta Bonnetum huc redit, ut sit: *effectus consueto naturæ cursui contrarius, ex occulto causarum naturalium ordine, Deo præparante, promanans*.

3° Houttevillius (2) demum docet, unum tantummodo legum naturalium systema a Deo fuisse constitutum, atque ita dispositum, ut ex eo tam consueti effectus, quos naturales dicere solemus, quam insueti ac mirabiles, quos dicimus miracula, gignerentur; illi constanter et per notas leges, hi præfinitis quibusdam temporibus, et per leges occultas. Proinde miraculum, juxta hanc doctrinam, nihil est aliud quam: *effectus insuetus ab occultis naturæ legibus procedens*.

455. PROPOSITIO VI. *Clarekii, Bonneti et Houttevillii theoria, ad miracula facilius intelligenda excogitata, probari minime possunt.*

Nam 1° in arbitrariis hypothesibus totæ innituntur ut primo patet intuitu, quæ nec probantur, nec probari possunt. Hypotheses vero, quibus Clarekii theoria innititur, non arbitrariæ modo, sed falsæ sunt. Quis enim Clarekio dabit, nullas esse materiæ vires, nullas operationes, nullas leges, omniaque a causis intelligentibus immediate fieri?

2° Dant omnes fatalistis et incredulis id quod maxime iis negandum est, videlicet: si leges naturæ sunt, iis a Deo derogari non posse. Idcirco enim Clarekius negat esse naturæ leges, et cæteri duo concludunt miracula secundum naturæ leges esse.

3° Hinc discrimen omne, tam inter miraculum et naturalem effectum, quam inter utriusque causas, hisce theoriis prorsus tollitur. Miracula enim vel ab iisdem agentibus, a quibus consuetus naturæ ordo pendet, vel a viribus naturæ

(1) *Palingénésie philosophique*, p. 17, c. 5, 6.

(2) *De la rel. chrét.*, l. I, c. V.

occultis fiunt : nihilque est in iis quod divinam virtutem speciali quadam ratione et immediate operantem requirat ; id quod communi hominum sensui contrarium est.

Perperam igitur communi de miraculis theoriæ, quam supra cum s. Thoma exposuimus, nova hæc opinamenta suffecta sunt ; præsertim cum nulla sit eorum necessitas ; quia miracula, juxta communem sententiam accepta, sunt evidenter possible, ut modo ostendemus.

ARTICULUS V.

De miraculorum possibilitate.

454. PROPOSITIO VII. *Eventus qui totius naturæ creatæ ordinem ac facultatem excedant, et intresece et extrinsece possible sunt.*

Primo : *sunt possible intrinsece.*

Ex eo enim in hujusmodi eventibus contradictio reperitur, quod vel naturæ creatæ ordo esset absolute necessarius, vel naturæ creatæ facultas infinita. Nam si primum verum esset, ordo naturæ præteriri nunquam posset, cum in iis quæ absolute necessaria sunt, nulla unquam derogatio aut exceptio sit possible. Si verum esset alterum, jam vis nulla excogitari posset, quæ naturæ facultatem excederet.

Atqui 1º falsum plane est, naturæ ordinem esse absolute necessarium. Etenim physicæ omnes leges, ut supra demonstratum est (414), sunt absolute contingentes : proindeque si conditiones mutentur, et idoneæ causæ virtus accedat, non repugnat aliquid fieri, quod et naturæ particularis leges, et naturæ universæ ordinem prætergrediatur.

2º Falsum quoque, naturæ facultatem infinitam esse. Nihil enim quod creatum sit et contingens, infinitum esse potest. Ergo inter agentia creata nullum est, quod ad infinitatem virtutis pertingere possit.

455. Secundo : *sunt possible extrinsece.*

Probatur 1º generali argumento. Causa quæ essentia et virtute universæ naturæ ordinem ac facultatem excedit, efficere potest id, quod excedit ordinem facultatemque naturæ. Sed certe Deus est ejusmodi causa. Ergo.

Deus excedit naturæ ordinem : « quia, ut s. Thomas dicit, » ordini secundarum causarum ipse non est subjectus, sed » talis ordo ei subjicitur, quasi ab eo procedens, non per » necessitatem naturæ, sed per arbitrium voluntatis ; » potuisset enim et alium ordinem rerum instituere (1). »

Deus excedit naturæ facultatem ; etenim naturæ facultas finita est, virtus autem divina est infinita, et ad omnia possible se porrigit.

456. Probatur 2º distinctius. Divina virtus efficere potest tum quæ *supra naturam* sunt, tum quæ *contra naturam*, tum quæ *præter naturam* (458). Ergo.

1º Efficere potest quæ sunt *supra naturam*.

Nam virtus infinita efficere potest ea omnia, ad quæ virtus finita non pertingit, tam sine præexistente subjecto, quam in quocunque subjecto præexistente.

2º Efficere potest quæ sunt *contra naturam*. Et hoc dupliciter.

Primo causæ creatæ suam cooperationem subtrahendo. Etenim causæ secundæ nihil agere possunt, nisi Deus cum ipsis ad effectus productionem concurrat. Si igitur Deus cooperationem suam aliquo tempore intermittere decernat, hoc ipso causa secunda, licet expedita ad agendum, omnibusque positis requisitis, suo carebit effectu.

Secundo, cohibendo, atque adeo elidendo vi majori vim causæ creatæ, sive immediate per se, sive mediate per aliam causam, aucta naturali ejus activitate.

Hoc pacto v. gr. Deus efficere potest, ut corpus humanum in igne positum non comburatur, tam subtrahendo igni suam cooperationem, quam communicando corpori vim illam, qua quædam alia corpora dissolventem ignis actionem elidunt.

3º Efficere potest quæ sunt *præter naturam*. Primo quia causa prima, à qua est omnis activitas, operari potest quæcunque causæ secundæ operantur, sine instrumentis quibus illæ indigent : in se enim præcontinet et principalium cau-

(1) *Summ. th. q. CV. art. VI.*

sarum virtutem, et instrumentalium; ac præterea nutu solo voluntatis operatur.

Secundo, quia naturalium principiorum efficaciam augere ac modificare potest, ita ut agant celerius, intensius, copiosius, quam naturæ eorum vires ferant, aut aliquid aliud agant, aut modo diverso. Hæc enim etiam a creatis agentibus intra certos limites quotidie fieri videmus. Quidni ergo hæc ipsa possit, imo multo majora vis infinita?

Tertio, quia quod causæ secundæ ex præexistente subjecto efficiunt, ipse ex nihilo potest educere in temporis momento.

ARTICULUS VI.

Difficultates.

457. Quæ Spinoza, Voltaire, alique miraculorum osos contra eorumdem possibilitatem obijciunt, ad pauca hæc semper redeunt, quæ subjicimus.

Obj. I. sensu pantheistico. 1^o Leges naturæ universalis mera sunt Dei decreta, quæ ex necessitate et perfectione divinæ naturæ sequuntur. Ergo nihil contingere potest, quod iis repugnet.

2^o Si Deus aliquid contra leges naturæ ageret, jam contra suam naturam ageret.

3^o Virtus et potentia naturæ est ipsa Dei virtus et potentia. Ergo potentia naturæ est infinita, ejusque leges ad omnia, quæ a divino intellectu concipiuntur, se extendunt.

458. Resp. ad 1^m *Dist.* 1^m *partem ant.*: Actus divinæ voluntatis, quo naturæ leges præfiniuntur, est merum Dei decretum, *conc.*; modus constans et uniformis, quem natura in agendo servat; id quod legis naturæ nomine intelligi solet, *nego.*

Dist. 2^m *ant. partem*: leges naturæ sequuntur ex necessitate divinæ naturæ, *neg.*; ex ejus perfectione, *subdiv.*: ex sapientia, bonitate, atque omnipotenti Dei voluntate, *conc.*; ex perfectione essentiali, ut modi quidam ipsius, *nego.*

Dist. tandem *cons.*: Nihil contingere potest quod his legibus repugnet, sine Dei decreto, *conc.*; per Dei decretum, *nego.*

Ad 2^m *Nego.*

Ad 3^m *Dist. ant.*: Quia natura vires et potentiam a Deo creatore accepit, *conc.*; per identitatem, *nego*, et *nego cons. utrumque*, cujus negationis ratio manifesta est.

459. Obj. II. Saltem plane dedecet, Deum leges a se constitutas mutare ac violare. Hoc enim ostenderet:

1^o Deum in suis decretis mutabilem esse:

2^o Neque satis ab initio omnia prævidisse:

3^o Ejusque leges emendatione egere, ac si insufficientes ad finem essent et imperfectæ.

Hæc vero omnia Deo indigna sunt. Ergo.

460. Resp. in primis *negando*, Deum quum miracula patrat, leges a se statutas *mutare* ac *violare*. Non enim mutat leges, sed iis derogat, vel potius facit ipse per se aliquid, quod per naturæ leges fieri non potest. Multo minus eas violat: ille enim solus legem violare proprie dicitur, qui subditus cum sit legi, non agit juxta ejus præscriptum.

Ad 1^m *Neg.* Deus enim ab æterno et rebus leges præscripsit, et sibi quædam præter has leges agenda reservavit; utrumque juxta suæ providentiæ ordinem. Opera mutat, consilium non mutat.

Hinc *nego* 2^m.

Ad 3^m *Nego* leges a Deo constitutas per miracula emendari. Non enim Deus per miracula physicas leges emendat, cum illas non mutet, ut modo dictum est, sed suspendit, et actione sua prætergreditur: in quo nullum est inconveniens. Cum enim leges physicae omnes providentiæ ordini subordinentur (446, 1^o), iis utitur Deus, vel non utitur, prouti providentiæ ordo postulat.

Hinc *dist.* quod additur: leges per miracula ostendi insufficientes ad finem et imperfectas. Nempe ostenduntur insufficientes ad finem non suum, non autem insufficientes ad finem suum, qui est ut naturæ ordo servetur (447).

Sunt vero imperfectæ, quatenus vires naturæ finitæ sunt, nec omnia possunt; nullo autem pacto imperfectæ in ordine ad finem, quem per illas Deus intendit.

461. Obj. III. Leges naturæ derogationem pati nequeunt. Nam

1° Fluunt ab essentiis rerum. Hæ autem sunt absolute immutabiles.

2° Deus contra naturam agere nequit.

3° Legibus honestatis neque a Deo derogari potest. Ergo a pari.

462. Resp. *Neg. ant.*

Ad 1^m Resp. 1° *Dist. maj.* : Leges naturæ fluunt ab essentiis rerum absolute, *neg.*; positis conditionibus contingentibus, *conc.* (416). Hoc autem sufficit ut derogationem pati possunt (454, 1°).

Præterea resp. 2° *Omissa maj., dist. min.* : Essentiæ rerum sunt immutabiles in se et in determinatione ad certos effectus, *tr.*; ita ut effectus earum impediri non possint, *nego.* Vide superius dicta (456, 2°).

Hinc *neg. consequentiam.*

463. Ad 2^m *Dist.* : Deus agere nequit contra naturam, i. e. contra ipsas rerum essentias, et possibilitatem intrinsecam, *conc.*; contra ordinem a se inditum naturæ creatæ, *nego.*

Notandum vero est, Deum proprie non agere contra naturam, si quando contra ordinem rebus inditum operatur. Nam non est proprie contra naturam id, quod est ab auctore naturæ. Quam in rem ita præclare s. Augustinus : « Id est cuilibet » rei naturale, quod ille fecerit, a quo est omnis modus, » numerus et ordo naturæ (1). » Itemque non est contra rei naturam id, ad quod res est in potentia. Sed ut s. Thomas animadvertit : « res est in potentia ad diversa, secundum » habitudinem ad diversos agentes: unde nihil prohibet, quin » natura creata sit in potentia ad aliqua fienda per divinam » potentiam, quæ inferior potentia facere non potest. Et ista » vocatur potentia obedientiæ (2). »

464. Ad 3^m *Nego paritatem.* Nam, ut idem s. Thomas scribit. « Deus potest facere contra ordinem, qui est unius » creaturæ ad alium.... non tamen potest facere contra » ordinem creaturæ ad seipsum... Unde contra ordinem

(1) *Contra Faust.* lib. XXVI, c. III.

(2) *De pot.* q. VI, art. I.

» justitiæ Deus facere non potest. *Cursus autem naturæ est » secundum ordinem unius creaturæ ad alium (1).* »

ARTICULUS VII.

De miraculorum cognitione.

465. Ut miracula suum finem assequantur, duo ab hominibus cognoscenda sunt: 1° factum quod naturæ ordinem excedere dicitur; 2° factum idem revera naturæ ordinem excedere, ac divinum signum esse (446).

Primum experientia sensuum cognosci potest, aut per alienum testimonium, ut reliqua sensibilia facta cognoscuntur; neque solum probabiliter, sed etiam cum certitudine, si ea quæ critica requirit, non desint. De hac re in logica satis dictum est (L. 638, 3°; 665, seq.).

Nunc tantummodo quædam subjicienda sunt de cognitione altera, quæ difficilior est, et dubiis quandoque non paucis impedita.

466. PROPOSITIO VIII. *Ex consideratione facti mirabilis una cum ejusdem adjunctis, cognosci potest, ut plurimum, utrum illud sit signum divinum, an non: quum vero hoc cognosci certo nequit, si ejusmodi factum signum divinum non est, semper indicia suppetunt ad dubitandum de ejus origine.*

In æstimatione facti mirabilis hæc dubia esse possunt: 1° an illud sit ex occultis naturæ corporeæ viribus; 2° an sit ex hominis arte vel fraude; 3° an sit a bono, vel malo spiritu per modum artis, aut præstigii; 4° an superet prorsus vires totius naturæ creatæ. De singulis aliquid: plenior enim de his notitiam apud christianæ religionis apologetas passim reperies.

467. 1° *Potest cognosci factum mirabile non esse opus occultarum virium naturæ corporeæ.*

In hunc finem considerandus est effectus in se, et subjectum in quo fit, et modus quo fit. Deinde videndum, an in ipso subjecto sint naturaliter, aut possint esse vires idoneæ ad ejusmodi effectum tali modo efficiendum; tum etiam an hæ vires sint in corporibus circumstantibus, ac maxime in

(1) *Ibid.* ad 3.

iis quæ forte ad opus adhibita fuerint. Si in his omnibus reperiri non possit sufficiens facti ratio, opus naturæ corporeæ adscribi non poterit.

468. Hoc autem quandoque est per se manifestissimum, ut si v. gr. tempore plenilunii eclipsis solaris accadat, aut si sola voce claudus sanetur: sæpe tamen peritiam aliquam in re physica ac medica postulat, nec raro peritiam summam. Nunquam tamen requiritur, ut omnes omnino naturæ corporeæ vires, earumque in variis adjunctis efficacia plene cognoscatur, quæ quidem cognitio humani intellectus capacitatem excedit; sed hoc tantummodo exploratum sit oportet, eas causas, quæ effectui interfuerunt, ei præstando pares non esse.

469. Denique hoc certum omnibus esse debet, quicumque divinam providentiam agnoscunt: non posse a Deo permitti, mirum ex occultis naturæ viribus in talibus adjunctis contingere, ut signum divinum videatur ad aliquid confirmandum, si id de quo agitur falsum sit, et nullum medium suppetat, quo dignosci possit, eventum illum signum divinum non esse.

470. 2^o *Potest cognosci facta quædam mirabilia non esse humana arte, vel fraude patrata.*

Quod spectat ad artem, mirabilia arte fiunt, vel per motus locales dexteritate quadam contextos, aut artificiosa celeritate oculis intuentium subductos, vel per applicationem naturalium agentium ad passiva proportionata. Itaque si quid per motum localem, aut naturæ viribus adhibitis ab homine fieri nequit, hoc certe non erit artis operatio.

Fraude fingi possunt quædam adjuncta, ut opus quoddam miraculosum simuletur, v. gr. infirmitas, ut sanatio dein per miraculum effici videatur. In hoc autem, quoniam de facto agitur, si quando ejusmodi dubium ex personarum ac finis consideratione inciderit, consulendæ sunt criticae leges.

Cæterum et in hoc idem notandum est, quod de miro naturali notavimus ex divinæ providentiæ consideratione (469).

471. 3^o *Potest cognosci, facta quædam mirabilia nec malo-*

rum spirituum opus esse, nec eorundem interventu effecta fuisse.

Hoc indubitatum erit, quotiescunque certo constet, opus de quo agitur, vel simplici motu locali, vel per applicationem alicujus agentis naturalis effici non posse, ut v. gr. constat in mortui ad vitam reditu.

472. Quoniam autem de hoc raro constare poterit, idcirco non solum factum considerandum est, sed maxime facti adjuncta, ac nominatim *operans, operandi modus ac finis*. Semper enim ex horum consideratione, mali spiritus operationem cognoscere dabitur (450, 4^o).

a) Si thaumaturgus pius est, et honestis moribus, et ab omni fraude alienus, humanæque gloriæ non est captator, sed demisso animo ac modesto, hoc indicio erit eum mali spiritus artibus non operari; si contra, suspicio legitima oriri poterit.

b) In operandi modo, quum quis Dei nomine operatur, nihil est quod non sit honestum, grave, sapiens, plenum pietatis atque humanitatis. Ubi autem vides inhonesta, obscena, ridicula, vana, superstitiosa, crudelia, ibi certe nec Deus est, nec bonus angelus.

c) Quinam sint miraculorum fines, supra dictum est (446, seq.); qui fines omnes ad Dei gloriam, tanquam ad finem ultimum, reducuntur. Si effectus mirabilis huc spectat, ac cætera non desint, non erit maligni spiritus operatio. At si quis effectum mirabilem ad propriam gloriam, aut lucrum, aut ad humanæ curiositatis pabulum, aut ad morum corruptionem, aut ad doctrinas manifeste impias, absurdas, falsas confirmandas dirigat, hic certe vel arte propria vel mali dæmonis arte operatur.

473. Nec mirum videatur, si ad dignoscendam miraculi originem, doctrina in cujus confirmationem illud fit, attendenda esse dicitur, cum tamen miraculum ad doctrinam confirmandam adhibeatur. Aliter enim doctrina miraculi criterium est, aliter miraculum doctrinæ. Quando doctrina inspicere debet, ad judicandum de miraculo, non requiritur ut constet nobis de ejus veritate, aut de divina origine, sed solum ut constet, eam posse esse veram, nec repugnare ut sit a

Deo; quem in finem hoc unum compertum esse debet, eam nulli certo principio, sive per rationem, sive per revelationem jam cognito esse evidenter contrariam, nec morum honestati aut pietati erga Deum infensam. Quum vero miraculum ut doctrinae criterium adhibetur, tunc de doctrinae veritate atque origine quaeritur.

474. 4^o *Opus mirabile, sive sit miraculum proprie dictum, sive a bonis spiritibus vi sua naturali operantibus procedat, semper ut signum divinum habendum erit.*

Hoc per se patet, quum opus mirabile est miraculum proprie dictum. Miraculum enim proprie dictum immediate Dei operatio est. Si autem opus mirabile sit ex naturali bonorum spirituum virtute adhuc erit divinae voluntatis signum: boni enim spiritus, cum in omnibus Deo sint subjecti, nihil agere possunt quod Dei voluntati repugnent; proinde falsitati favere, eamque promovere ac suadere nullatenus possunt.

EXPLICIT COSMOLOGIA.

INDEX SECUNDI VOLUMINIS.

INSTITUTIONES METAPHYSICAE.

Metaphysicae etymon partitio-definitio-præstantia . . . pag. 3

ONTOLOGIA.

Ontologiae definitio-ejus objectum-Empirismi levitas et absurditas. Ontologiae partitio 5

LIBER PRIMUS.

CAPUT I. DE ENTE IN GENERE.

ARTICULUS. I. *De entis notione.* Ens non potest definiri-sed ejus notio potest declarari. Ens significat 1^o id quod existit. 2^o id quod aliquam realitatem habet. Ens juxta primam acceptionem est id quod primo cognoscitur; juxta alteram est ultima abstractio. Hæc altera significatio a prima non disjungitur-et pertinet primo ad existentia, secundo ad possibilia. Quemadmodum verbum *est*, sic nomen ens duo significare potest-quæ significatio præcipue in ontologia spectetur. Ens est intellectus objectum materiale, non vero semper formale . . . 8

ART. II. *De entis analogia.* PROP. I. *Ens non est univocum nomen, sed analogum analogia attributionis.* Probat ex natura nominis univoci et analogi. Quomodo rationes objective diversæ unico conceptu representari queant. Entis ratio omnibus quibus tribuitur, intrinsece et proprie convenit. Quodnam sit in analogia entis analogum princeps et secundarium. Ens proprie dicitur etiam de rebus creatis 10

ART. III. *De negatione entis.* Negatio fundatur in objectiva rerum distinctione. Non-ens percipi non potest per se. Nihilum positivum et negativum. PROP. II. *Nihilum etiam negativum concipi potest, sed affirmari nequit, nisi cum aliqua limitatione.* Nihilum concipi potest per remotionem omnis realitatis-non idem est percipere nihilum ac non percipere quidquam. Affirmatio quævis nihili sine aliqua limitatione absurda est. Notio idearum limitis, privationis, distinctionis, determinationis 12

ART. IV. *De ente rationis.* Quid sit ens rationis. Nulla in eo est falsitas-dicitur ens analogia proportionis triplex ejus classis . . . 14

ART. V. *De principiis quæ ab entis notione dimanant.* Qua ratione ex idea entis efflorescant principia identitatis, contradictionis, et exclusi medii. Significatio verbi esse in principio contradictionis. PROP. III. *Principii contradictionis nec universalitas permaneret nec veritas, si notio temporis ab illo excluderetur.*

Nam singularia possunt diverso tempore existere et non existere, vel aliquas affectiones habere et non habere-item universalia affici differentiis contradictoriis-quandonam notio simultaneitatis non sit necessaria. Formula principii contradictionis juxta Kant

15

- ART. VI. *Principia de ente inter se comparantur.* PROP. IV. *Principium contradictionis et primum principium quod ex entis notione efflorescat, et prima affirmatio est.* In ordine apprehensionis primum est princ. identitatis, subsequitur princ. contradictionis, ac tertio princ. exclusi medii. In ordine affirmationis primum est princ. contradictionis. Princ. identitatis est ipsum princ. contradictionis incomplete et concise expressum. Facti primi et conditionis primæ affirmatio in princ. contradictionis fundatur-quo pacto idem princ., licet negativum et modale, positivo et simplici posterius sit

18

CAPUT II. DE ESSENTIA ENTIIUM.

- ART. I. *Quid sit essentia.* Variæ definitiones. Essentia physica et metaphysica-realiter non distinguuntur

20

- ART. II. *De essentialium cognitione.* ASSERTIO I. *Certe cognoscimus rerum illarum essentias, quarum constitutio ab intellectu dependet humano.* ASSERTIO II. *Essentias earum rerum, quarum constitutio ab intellectu humano non dependet, imperfecte admodum et exterius, potius quam intime cognoscimus.* Error Lockii. Conciliantur binæ veterum assertiones. Quomodo essentialium cognitio perfici possit

22

- ART. III. *Theoremata.* PROP. I. *Rerum essentia sunt indivisibiles.* PROP. II. *Omne ens suam habet essentiam.* PROP. III. *Nulla res suam essentiam potest amittere.* PROP. IV. *Essentia sunt immutabiles.* In mutationibus, quæ accidunt in rerum natura, non mutatur essentia, sed una essentia cessante, alia illi succedit. PROP. V. *Essentia sunt æternæ.* Quo sensu essentia dicantur necessariae et infinitæ

24

CAPUT III. DE EXISTENTIA ET POSSIBILITATE.

- ART. I. *De existentia notione.* Divisio entis in existens et possibile. Existentiæ descriptiones variæ. Conceptus essentia et existentia sunt distincti. Essentia existens ab abstracta realiter distinguitur distinctione negativa. PROP. I. *Essentia realis entitas, ejusque existentia re non distinguuntur.* Entitas essentia physica non est potentia ad actum existentia sed est existens eo ipso quod est entitas realis COROLLARIA. Non sequitur ex dictis existentiam esse omni enti essentialem-quo sensu res creatæ habeant esse receptum et participatum-et sint indifferentes ad existendum. Contraria attributa existentia et essentia conciliantur

26

- ART. II. *De possibilitate.* Possibilitatis et impossibilitatis notio. Utraque duplex est, intrinseca et extrinseca-possibilitas intrinseca est absoluta, extrinseca est relativa-de possibilitate physica et morali-possibilitatis moralis æstimatio

31

- ART. III. *De possibilibus.* PROP. II. *Quod possibile est, non est omnino nihil.* Probatur. Realitas possibile est entitas metaphysica et abstracta-cujus esse est logicum seu ideale. PROP. III. *Possibilia non sunt ea solum quæ in serie temporum existentiam obtinent.* Præter ea quæ existunt, indefinita alia concipi possunt. Entitatum et perfectionum gradus in entibus finitis sunt indefiniti. Impossibile est omniaabilia simul existere. PROP. IV. *Possibilia æterna sunt.* Nam ab æterno cognita sunt a Deo

35

- ART. IV. *De possibilitatis origine.* PROP. V. *Intrinseca possibilitas nec a rerum existentia pendet, nec ab humano intellectu.* PROP. VI. *Intrinseca possibilitas nec a potentia nec a voluntate Dei originem ducit.* Nam si primum, 1º Dei potentia coarctaretur-2º nil dici jure posset impossibile-si alterum, 1º Divinus intellectus quoad cognitionem a sua voluntate dependeret-2º terminus divinæ virtutis operantis esset nihilum-3º omnis rueret certitudo. PROP. VII. *Intrinseca possibilitas et impossibilitas ex ipsis rerum essentiis emergit.* Nam idearum sociabilitas ab ipsarum constitutivis dependet. Hinc possibilitas intrinseca et immutabilis-æterna-necessaria-incrementi ac decrementi incapax. Sola possibilitas extrinseca pendet a Dei potentia.-Non posse facere impossibilia non est potentia defectus

35

- ART. V. *Unde sit possibile intelligibilis.* PROP. VIII. *Omnis possibile intelligibilis a divina essentia dependet, quatenus hæc divina intellectus objectum est-quomodo Deus possibiles omnes essentias cognoscat.* Deus cognoscit omnes modos secundum quos ejus essentia est imitabilis-nulla est alia realitas, quæ possibilis intelligenda Deo ab æterno præferre possit-in contraria hypothesi Deus in sua cognitione perficeretur a realitate sibi extranea. In absurda hypothesi Dei non existentis, nihil esset possibile, nihil impossibile. Ubi esse objectivum possibile respectu humani intellectus fundamentum habeat

40

- ART. VI. *Difficultates.* De possibilitate cogitare possumus præscindendo ab essentia et intellectu divino. In hac sententia 1º essentia divina containeret omnes essentias-vel 2º res omnes, quum fiunt existentes, ab ea educerentur-3º Deus cognosceret per abstractionem-4º plures in Deo essent ideæ. Solutiones

45

CAPUT IV. DE UNITATE ENTIIUM.

- ART. I. *De unitatis conceptu.* Communes entis affectiones tres, unitas, veritas, bonitas. Quid sit unum. Quid unicum. Unitas transcendentalis indivisibilitatis-compositionis-artificialis-aggregationis. Unitas per se et per accidens. Omne ens est unum
- ART. II. *De conceptu multitudinis.* Notio multitudinis-divisio ante unitatem cognoscitur, unitas ante multitudinem. Eadem res

45

- potest esse una et multiplex secundum diversam rationem. De divisione entis in unum et multa. Quomodo unum et multa opponantur 48
- ART. III. *De numero*. Numeri notio-triplex elementum-divisio in concretum et abstractum. Quomodo numerorum ideas efformemus. Numerus in rebus est fundamentaliter-unitatem suam habet a mente-a sensu non percipitur. Alia numeri definitio. Unitatis mathematicæ notio. An omnis numerus sit quantitas. Omnis multitudo actualis sub aliquo numero continetur 49
- ART. IV. *Quotuplex sit unitas in rebus*. Unitas realis et logica. Unitas realis est mathematica, vel transcendens-hæc individualis vel formalis. PROP. I. *Omne ens quod existit vel existere potest est singulare*. PROP. II. *Est in rebus omnibus unitas formalis*. PROP. III. *Unitas formalis ab individuali distinguitur, non tamen realiter, sed solum ratione*. COROLLARIA. Formalis naturæ unitas multiplicatur una cum individuis. Individua ejusdem naturæ non habent unam et eandem unitatem formalem omnibus communem-at per suas unitates formales similia sunt. 51
- ART. V. *De principio individuationis*. Quid sit-Aristotelis opinio de materia signata. PROP. IV. *Id quod naturam individuum constituit, non est aliquid re distinctum a natura quæ sit individua*. PROP. V. *Natura omnis individua per suam ipsam realitatem individua est*. Nam omne ens unum est per id ipsum, per quod est ens actu; est autem ens actu per suam realitatem. COROLLARIA. Essentia seu natura in individuis solum ratione a differentia individuali distinguitur. Differentia individualis individuo essentialis est, speciei accidentalis. Essentia individui, etiam ejusdem speciei, diversæ sunt pro differentia individualis diversitate. Quomodo in intellectu specierum ac generum notiones emergant, et archetypas divinæ mentis ideas referant 54
- CAPUT V. DE VERITATE ENTIIUM.
- ART. I. *Quid sit veritas entium*. Veritatis rerum notio. Veritas per se et absolute, et veritas per accidens, ac secundum quid. Ratio harum appellationum. Veritas respectu idearum nostrarum. Quid differat verum ab ente 56
- ART. II. *De falsitate*. Quid sit-falsitas per se et per accidens. Hæc dupliciter dicitur. Respectu intellectus divini nihil est falsum. Nihil est falsum simpliciter-neque secundum quamcunque ideam. Falsitas in rebus nihil est. 58
- ART. III. *Theoremata*. PROP. I. *Est in rebus veritas independentem a nostri intellectus cognitione*. PROP. II. *Nulla res est falsa respectu intellectus divini*. Objectioni satisficit. PROP. III. *Omne ens est verum-tum veritate absoluta, tum relativa*. Definitio veri a S. Augustino proposita. Quomodo non-ens verum dicatur 59

CAPUT VI. DE BONITATE.

- ART. I. *Bonitatis notio et partitio*. Bonitatis definitio. Distinctio inter bonitatem et realitatem perfectionemque entis. Boni defi-

- nitio juxta Aristotelem. Bonum verum et apparens-secundum se et alteri-honestum, delectabile et utile 61
- ART. II. *Theoremata*. PROP. I. *Omne ens est bonum-tum secundum se, tum alteri*. PROP. II. *Quidquid bonum est, ens est*. Quomodo negationes et privationes bona dicantur. Explicantur duo illa effata: *Bonum est diffusivum sui. Deus est omnis boni bonum*. 64
- ART. III. *De malo*. Quid sit malum. Malum appeti nequit nisi per accidens. Malum secundum se et malum alteri. Malum physicum morale et metaphysicum. Oppositio inter bonum et malum 66
- ART. IV. *Theoremata*. PROP. I. *Malum non potest esse nisi in subjecto bono*. PROP. II. *Causa mali efficiens non potest esse nisi bona*. Hinc effatum: *malum non agit nisi virtute boni*. PROP. III. *Bonum non potest esse efficiens mali causa nisi per accidens-sive causa sit necessaria-sive sit libera-sive effectus causæ proprius consideretur-sive effectus alter cum eo connexus*. 69

LIBER SECUNDUS.

CAPUT I. DE SUBSTANTIA ET ACCIDENTE.

- ART. I. *Divisio entis in substantiam et accidens*. PROP. I. *Substantia et accidentis notiones experientia cuique obvia suppeditat*. Entis divisio in substantiam et accidens et adæquata. Substantia et accidens non sunt species propriæ dictæ entis. Quid sit modus entis. Modi essentialis et accidentales-illi communes et proprii. 72
- ART. II. *De substantiæ notione*. PROP. II. *Comparisonem instituta inter subjecti affectiones ipsumque subjectum, substantiæ notio perficitur*. Substantiæ notio perfectior. Substantia est ens per se non a se. PROP. III. *Substantiæ idea clara est ac minime arbitraria*. Quo pacto individuas substantias attingat intellectus et sensus. Quomodo ideæ substantiarum sint intuitivæ. 74
- ART. III. *Lockii de substantiæ conceptu sententia refutatur*. PROP. IV. *Lockius, in iis quæ disserit circa substantiæ conceptum, ludit in ambiguo, sibi contradicit, et errat manifeste*. Probatur ex ipsius dictis. Lockii objectionibus fit satis 76
- ART. IV. *Substantiæ divisiones quædam*. Substantia prima et secunda-solum ratione distinguuntur. Substantia simplex et composita. Essentia substantiæ compositæ-ejus contingentia-ejus partes sunt aliæ substantiæ. Quædam de corporibus eorumque partibus. Substantia completa et incompleta 79
- ART. V. *De supposito et persona*. Notio suppositi-substantiæ-personæ. Esse convenit supposito primo ac per se. Suppositum est maxime per se-habet naturam et quidquid naturæ inest. Est sui juris-est id quod agit. Actiones sunt suppositorum. Quibus finitis substantiis et quando suppositi ratio conveniat. Substantia infinite perfecta est necessario suppositum et persona. De unitione finitæ substantiæ cum persona infinitæ perfectionis. Ubi plures sunt naturæ, ibi plura sunt operationum genera. Personalitas nihil est aliud quam status quidam ac modus existendi 81

- ART. VI. *De accidentibus generatim.* Accidentis notio. Accidens prædicamentale et prædicabile-accidens physicum, et denominatio extrinseca-accidens accidentis. Duplex circa accidentia quaestio proponitur. Affectionum entis generalis partitio 85

CAPUT II. DE QUALITATE.

- ART. I. *De qualitatis notione ac partitione.* Qualitatis definitiones-et princeps partitio 87
- ART. II. *De potentia.* Potentiæ notio. Potentia activa et passiva-Vis-viva et mortua. Potentiarum differentiae ab actibus desumuntur-actuum vero diversitas ab objectis 89
- ART. III. *De habitu.* Habitus varia acceptio habitus operativus. ASSERTIO I. *Esse huiusmodi habitus experientia constat tum interna, tum externa.* ASSERTIO II. *Subjectum proximum habituum sunt entis potentiæ.* ASSERTIO III. *Non omnis potentia habituum est capax.* Quænam potentiæ sint habituum subjectum. ASSERTIO IV. *Habitus alii sunt infusi, alii acquisiti: sunt et qui naturales dicuntur.* Quid sit dispositio et quotuplex-in quo differat ab habitu 92
- ART. IV. *De qualitatum contrarietate.* Tres qualitatum proprietates. Contrariorum definitio. Contraria sunt duæ res positivæ-sub eodem genere continentur-inter se maxime distant-se mutuo expellunt. ASSERTIO I. *Non omnes qualitates contrarium habent.* ASSERTIO II. *Inter habitus maxime ac dispositiones interque qualitates sensibiles contrarietas exercetur.* ASSERTIO III. *Etiâ termini latitudinis quæ percurrî possit, contrarii dicuntur.* ASSERTIO IV. *Ratione eorum quæ contraria sunt, etiâ alia quædam contraria nuncupantur.* 96
- ART. V. *De qualitatum intensione ac remissione.* Triplex genus incrementi ac decrementi. Quænam realitates incrementi capaces sint vel decrementi. ASSERTIO I. *Habitus et dispositiones tam secundum se, quam secundum participationem subjecti, crescere possunt ac minui.* ASSERTIO II. *Potentie naturales non videntur in eodem subjecto esse graduum capaces.* ASSERTIO III. *Qualitates quæ ex pluribus resultant, itemque qualitates omnes sensibiles incrementa vel decrementa possunt admittere.* Graduum qualitatis mensura 99

CAPUT III. DE RELATIONE.

- ART. I. *Quid sit relatio.* Relationis definitio-et triplex elementum. PROP. I. *Relatio a suo fundamento non re, sed ratione duntaxat distinguitur.* Quæ sit relatio essentialis, accidentalis et extrinseca. 102
- ART. II. *Quotuplex sit relatio.* Relatio realis et logica-mutua, non mutua, utrinque logica-ejusdem vel diversæ denominationis. Relativa secundum esse et secundum dici. Relatio transcendentalis et prædicamentalis 104
- ART. III. *De relatione reali.* Quatuor ad relationem realem habendam requisita. Si quam ex his conditionibus suppleat intellectus, relatio est logica. PROP. II. *Existunt in rerum natura re-*

lationes reales. Relationum quæ reales sunt et mutuae, duplex genus 106

CAPUT IV. DE IDENTITATE ET DISTINCTIONE.

- ART. I. *De identitatis notione.* Identitas definitur-differt ab unitate. Animadvertenda circa unitatem fundamenti et identitatis. Identitas realis essentialis, eaque specifica vel generica. Similitudo-æqualitas, propria vel translatitia 108
- ART. II. *De principio identitatis comparatæ.* Expositio huius principii, quum sermo est de identitate reali-et quum de identitate logica. Nulla alia expositio est possibilis. Animadvertenda circa huius principii applicationem-nominatim quum ad divinæ Trinitatis mysterium transfertur. De principio huius affini: quæcunque sunt idem secundum rem, in quocunque est unum, est et alterum. 109
- ART. III. *De distinctione.* Quid sit-quid inter se differant distinctio, differentia et diversitas. Distinctio absolute dicta et cum addito-triplex huius species 112
- ART. IV. *De distinctione reali.* Quid sit-dividitur in adæquatam et inadæquatam-absolutam et modalem-positivam et negativam. PROP. I. *Realis origo unius ab altero distinctionis realis semper indicium est.* Realis autem unius ab altero separabilitas tunc est huius distinctionis indicium certum, quum utrumque simul separatim ab altero existere potest. Quum duorum separabilitas mutua non est, dubium est an hæc distinguantur. A distinctione reali nequit concludi separabilitas, nec ab inseparabilitate identitas 115
- ART. V. *De distinctione rationis.* Quid sit. Alia est rationis ratio- cinantis, alia rationis ratio- cinatæ. Conceptus præcisivi. Distinctio formalis est distinctio rationis. PROP. II. *Ratio qua fit ut una eademque res pluribus ac diversis conceptibus percipiatur, tum in intellectus imperfectione, tum in objectorum perfectione sita est.* 115
- ART. VI. *Utrum aliud præterea sit distinctionis genus.* PROP. III. *Præter distinctionem realem et rationis nulla alia distinctio, quæ media sit, assignari potest.* Quid sint gradus metaphysici-quid distinctio formalis ex natura rei-quid formalitates. PROP. IV. *Distinctio formalis ex natura rei non est admittenda-quia 1º non est necessaria et mysteria divina transfert ad res creatas-2º ea distinctio esset realis-3º admittenda esset distinctio naturæ a sua individuatione-4º hæc opinio est affinis errori damnato Gilberti Porretani.* Quid sit distinctio virtualis-et virtualis intrinseca. PROP. V. *Distinctio virtualis intrinseca, in rebus saltem creatis, nulla est-1º non est necessaria-2º contradictionem importat.* Solvitur objectio ducta a Trinitatis mysterio-3º absurditatibus viam aperit. PROP. VI. *Distinctio inter essentialia prædicata est mera distinctio rationis.* Nulla enim alia distinctio illis convenit. Quomodo fiat ab intellectu distinctio per conceptus præcisivos 117

- ART. VII. *Difficultates*. Gradus metaphysici 1° admittunt a parte rei attributa contradictoria-2° habent diversas definitiones-3° sunt partes totius essentialis. Solutiones . . . 124

CAPUT V. DE CAUSIS.

- ART. I. *Notiones principii et causæ*. Quid sit principium. Triplex connexio consecutionis-et triplex prioritas. Animadversiones de prioritate temporis et naturæ, tam in statu physico, quam in ideali. Principium est tempore prius principatio prouti ens, non prouti principium. Quæ dicantur esse in signo naturæ priori vel posteriori, in signo eodem, in signis disparatis. Quid sit causa et quotuplex . . . 126
- ART. II. *De causa efficiente*. Causæ efficientes definitio. Quid sit activitas-actus primus remotus et proximus, actus secundus-actio transitiva et intransitiva passio-actus Causalitas causæ finitæ continetur ipsa actione quæ in præsupposito subjecto exercetur-quæ actio idem re est ac passio. Quid sit conditio et occasio Præcipuæ causarum efficientium partitiones . . . 128
- ART. III. *Theoremata*. PROP. I. *Quidquid in effectu perfectionis est, in causa ipsius adæquata aliquo modo præcontinetur*. Causa potest effectum præcontinere formaliter, eminenter, virtualiter. Nullus effectus adæquata sua causa potest esse perfectior. Omne agens agit sibi simile Discrimen inter causam principalem et instrumentalem. PROP. II. *Causa necessaria, positis omnibus requisitis, tantum agit quantum potest*. COROLLARIA. PROP. III. *Effectuum diversitas non semper causarum multiplicitem arguit*. PROP. IV. *Causa omnis quæ in præexistente subjecto agit, agere nequit, nisi vel per se, vel per aliud sit illi præsens*. Quia nulla res potest agere ubi non est. Causa multimodis potest ad subjectum applicari-tam immediate, quam mediate. Duo illa pronuntiata declarantur: *Modus operandi sequitur modum essendi. Causa causæ est causa causati* . . . 131
- ART. IV. *Humii de causæ efficientis conceptu errores resutantur*. Humii doctrina circa causas efficientes-ejusque consecutaria. PROP. V. *Certissimum est 1° nos causæ ideam habere, 2° causæ ideam experientiæ ope efformari* Cognoscimus quid sit causa in genere, non quid sit activitas causarum in specie. Unde oriatur principium: *futurum est præterito simile* Idea causæ oritur ab experientia cum intelligentia conjuncta. Quomodo peculiarium factorum causas cognoscamus. Aliud est successio, aliud dependentia factorum, etiam si constans . . . 134
- ART. V. *Refutatur occasionalismus*. Occasionalismi auctores et dogmata. PROP. VI. *Causæ secundæ non sunt mere occasionales dicendæ, sed vere efficientes* Status questionis declaratur. Probatur prop. 1° quoad spiritus.-2° quoad corpora . . . 137
- ART. VI. *Difficultates*. Deus, cum omnia per se agere possit, nequit res creatas in consortium activitatis suæ adsciscere. Opposita opinio pagana est. Spiritus creati, utpote immateriales et finitæ virtutis, corpora movere nequeunt. Corpora, cum se

- movere nequeant, nec alia movere possunt. Communicatio motus nec possibilis est, nec concipi potest. Singulis objectis satisfiit . . . 140
- ART. VII. *De causa finali*. Quid sit finis-intentio-motivum-medium-remedium. Finis amatur propter se, medium propter aliud. Finis qui, et finis cui-finis qui objectivus et formalis-finis efficiendus et obtinendus-finis operis et finis operantis-finis proximus et remotus. In serie plurium finium duplex spectandus ordo: intentionis et executionis. Finis ultimus simpliciter, et secundum quid. Finis secundarius et principalis-fines coordinati et subordinati . . . 144
- ART. VIII. *Theoremata*. PROP. I. *Finis est vera ac proprie dicta causa*. Probatur ex modo agendis entis intellectu præditi. Solum bonum causæ finalis rationem habere potest. Causalitas finis-motio intentionalis. Distinctio inter causalitatem finis et causalitatem moralem. Qui actus sint causæ finalis effectus. Finis est primus in intentione, ultimus in executione. PROP. II. *Omne agens propter finem operatur*. Duplex modus agendi propter finem. Probatur prop. 1° ex actionis natura. 2° ex singularum causarum natura. PROP. III. *In serie finium subordinatorum non datur processus in infinitum*. Probatur tum quoad ordinem intentionis, tum quoad ordinem executionis. PROP. IV. *Qui vult finem velle debet et media*. Secus nec finem vellet . . . 147
- ART. IX. *De causa materiali, formali et exemplari*. Quid sit materia-triplex eam spectanti ratio. Subjectum sustentationis et informationis. Quid sit forma-substantialis et accidentalis-physica-metaphysica-extrinseca-analogica. Quid sit produci ex nihilo sui-ex nihilo subjecti. Materia est potentia, forma est actus. PROP. I. *Materia rationem habet veræ causæ*. Est enim causa intrinseca respectu compositi, et extrinseca respectu formæ PROP. II. *Forma physica ubicunque vere adest, propria causa est*. Est enim causa intrinseca compositi quod constituit, extrinseca respectu materiæ in qua recipitur. Quid sit exemplar. Exemplaris idea necessaria est agentibus per intellectum-hæc merito inter causas recensetur-cur dicatur causa formalis externa-ad causam efficientem moralem proprie revocatur . . . 149
- ART. X. *De principiis rationis sufficientis et causalitatis*. Rationis notio-ejus discrimen a principio. Ratio essentialis, existentis et evidentiæ in quibus principiis singillatim reperiatur. Ratio sufficiens et insufficiens Enuntiatio principiorum rationis sufficientis et causalitatis. Beguelli circa error . . . 153
- ART. XI. *Asseritur principium causalitatis*. PROP. *Principium causalitatis est analyticum et absolute certum*. Probatur ex existentis incipientis notione-et ex sensu communi. Utrum, aut quo sensu casus fortuitus sit possibilis . . . 155
- ART. XII. *Difficultates*. Principium causalitatis, cum supponat existentiam realem, valde obscurum est. Idea existentis non in-

cludit ideam causæ. Princ. rationis sufficientis demonstrari non potest sine circulo vitioso. Si princ. causalitatis esset absolute certum, omnes veritates contingentes quæ illi inniuntur, habendæ esset ut absolute necessariæ. Solutiones . 157

LIBER TERTIUS.

CAPUT I. DE ENTIIUM PERFECTIOE.

- ART. I. *Perfectionis notio.* Quid sit perfectum. Perfectio totalis et partialis. Entium finitorum perfectio in ordine ad finem. Perfectio substantiæ et accidentium. Perfectio a bonitate reipsa non distinguitur-ejus regula est finis perfectio partium . 160
- ART. II. *De perfectionibus partitionibus et gradibus.* Perfectio totalis absoluta et relativa-duplex eis respondens imperfectio. Perfectiones partiales simplices et mixtæ-essentiales et accidentales. Perfectio absoluta nullos admittit gradus-perfectio relativa gradus admittit tum extensive, tum intensive. Perfectionum partitio . 162

CAPUT II. DE PERFECTIOIBUS QUOAD REALITATEM.

- ART. I. *De simplici et composito.* Simplicis et compositi notio. Medium inter utrumque. Simplicitas in aliquo genere, et absoluta. Simplex an aliquo modo sit divisibile-differt ab inextenso. ASSERTIO I. *Compositi notionem experientia externa nobis suppeditat; simplicitatis vero absolutæ ideam experientia solum interna gignit.* ASSERTIO II. *Compositi perfectio ex certa certarum partium conjunctione consurgit, perfectio autem simplicis sita est in positiva aliqua realitate, quæ compositionem excludit.* ASSERTIO III. *Simplicis notio negativum non est.* ASSERTIO IV. *Perfectio quæ ex compositione oritur contingens est, quæ vero cum simplicitate sociatur, etiam cum essendi necessitate potest consistere.* Compositio physica et metaphysica. 164
- ART. II. *De toto et partibus.* In quo differunt totum, compositum et perfectum. Totum ab omnibus partibus conjunctis minime distinguitur. Oppositæ sententiæ refutatio. Partium unio in toto non est aliquid a partibus re distinctum . 166
- ART. III. *De finito et infinito.* Quid sit finitum-infinitem-limes. In finitum actu et potentia-quantum inter se differunt. Triplex infinitum considerari potest, magnitudine, multitudine, perfectione. Infinita quantitas formalis et virtualis. PROP. I. *Infinitem actu finitis acceptionibus exhaustiri non potest.* PROP. II. *Infinitem actu pertransiri nequit.* PROP. III. *Si plura in eodem genere darentur infinita, unum altero majus esse non posset.* PROP. IV. *Finitum per finiti additionem non potest infinitum evadere.* PROP. V. *Repugnat finitum maximum et finitorum absolute optimum.* PROP. VI. *Differentia finiti ab infinito non potest esse aliquid finitum.* PROP. VII. *Nulla est ratio infiniti ad finitum.* PROP. VIII. *Indefinitum nunquam potest actu infinitum fieri.* PROP. IX. *Infinitem actu non potest ulla ex parte terminari.* 169

- ART. IV. *Utrum multitudo infinita actu esse possit.* PROP. X. *Multitudo actu infinita repugnat.* Probatur ex natura multitudinis et ex absurdis. Hinc repugnant multitudo infinita etiam successiva-tempus infinitum-extensio infinita. Omnis extensio figurata est. Gradus infiniti perfectionis repugnant. Infinitum est indivisibile. Ejus quantitas est virtualis . 172
- ART. V. *Difficultates.* Materia, aut saltem ultima ejus elementa, in infinitum divisibilia sunt. Infinitum mathematicorum. Infinita possibilia possunt ad actum venire. Datur multitudo infinita ut terminus divinæ cognitionis. Solutiones. Aliquid innuitur de modo quo Deus tum possibilia omnia, tum seriem quamcunque indefinitam cognoscit . 175
- ART. VI. *De conceptu entis finiti et infiniti.* PROP. I. *Finitum non cognoscitur per infiniti negationem.* Ad finiti ideam habendam sufficit negatio cujuslibet perfectionis. PROP. II. *Falsa putavit Lockius infiniti conceptum hoc pacto efformari, quod finitæ perfectiones interminabili incrementorum serie auctæ concipiantur.* Idea sic efformata absurda esset. Entis infiniti conceptus confusus et explicitus. Quomodo hic efformetur. Notio infiniti est discursiva-ex parte positiva et ex parte negativa-habet objectum reale. Potest intellectus finitus infiniti notionem habere. PROP. III. *Idea entis infiniti ab idea entis in genere longissime distat.* 1º Infinitate-2º comprehensione ideæ-3º ideæ extensione-4º objecto. Qua diversa ratione Deus et ens commune dicantur ens simpliciter . 176

CAPUT III. DE PERFECTIOIBUS QUOAD EXISTENDI MODUM.

- ART. I. *De enti necessario et contingenti.* Notiones necessariæ et contingentis. PROP. I. *Quod absolute necessarium est, nec initium habet, nec finem habere potest.* PROP. II. *Omne id quod contingens est, existere nequit nisi ab aliqua causa producat.* PROP. III. *Quod contingens est, existentiam amittere potest.* Productio entis, et creatio ex nihilo. Substantiæ corruptio et annihilatio. Accidens quot modis esse amittat. PROP. IV. *Substantia composita cum ex aliquo, tum ex nihilo produci potest. At substantia simplex solum ex nihilo absolute.* PROP. V. *Substantia composita et partium dissolutione periri potest et per annihilationem.* 180
- ART. II. *De enuntiabili circa res contingentes veritate.* Status questionis exponitur. PROP. *Enuntiabilia de futuro contingente sunt determinate vera vel falsa.* Probatur 1º ex natura enuntiabilium-2º ex paritate enuntiabilium de præterito contingente . 182
- ART. III. *De ente mutabili et immutabili.* Mutationis notio. An mutatio omnis dici possit motus Aristotelica motus definitio vindicatur. Actus in fieri et in facto esse. Mutatio idem est secundum rem quod actio et passio. De pronuntiato illo: *Omne quod movetur ab alio movetur.* Multiplex distinctio inter agens et patiens haberi potest. An hæc duo necessario distinguere debeant. Modi quibus naturales mutationes possunt accedere. Identitas entis cum scipso, absoluta, relativa vel

moralis. Mutabilitas et immutabilitas-intrinseca vel extrinseca 185

CAPUT IV. DE PERFECTIONE EX RELATIONIBUS ORTA.

ART. I. *De ordine.* Ordinis notio et definitio. Ordo simplex et compositus-staticus et dynamicus in spatio, in tempore, in signis naturæ-chronologicus-moralis-symmetricus et harmonicus-finalis. COROLLARIA 189

ART. II. *Theoremata.* PROP. I. *Non aliunde comperimus ens aliquod intelligens esse, quam ex eo quod ejus opera ordinata sint.* PROP. II. *Opus ordinatum est causæ intelligentis effectus* Nam causam sui proportionatam aliunde non habet. Quid dicendum de operibus ordinatis, quæ proveniunt vel a causis pure mechanicis et chemicis, vel a brutis, vel a fortuito irrationalium causarum concursu 191

ART. III. *De pulchritudine.* Quid sit pulchrum-differt a vero-ab ordine-a bono-non est omne quod placet. Pulchritudinis essentia et constitutiva-pulchritudo physica ex dispositione symmetrica, et harmonica coaptatione-pulchritudo intellectualis et moralis. Præter has nulla est alia pulchritudinis species. Pulchritudo solum ab intellectu cognoscitur. Pulchritudinis ratio ab hominum æstimatione est independens. Quid sit deformitas-sunt quædam nec pulchra, nec deformia. Quid sit gratia-quid sublime, et in quo differat a pulchro 195

METAPHYSICA SPECIALIS.

COSMOLOGIA.

Metaphysicæ specialis partitio. Cosmologiæ notio et partitio. 198

LIBER PRIMUS.

CAPUT I. DE CORPORUM NATURA SYSTEMATA VARIA.

ART. I. *Systema peripateticum.* Quo reducatur quæstio de corporum natura. Expositio systematis peripatetici. Intrinseca corporum principia materia prima et forma substantialis-utriusque proprietates-formæ accidentales. Generatio, corruptio, alteratio. Materia, privatio, forma sunt constitutiva corporum *in fieri*: materia et forma constitutiva *in facto esse*. Non omnia corpora generationi et corruptioni sunt obnoxia. Quatuor elementa sublunaria, seu prima corpora. Perperam alia systemata ad peripateticum pertrahuntur. 199

ART. II. *Systema elementorum simplicium.* Primi hujus systematis auctores. Monades leibnitzianæ earum proprietates-quomodo corpora constituant. Wolfii aliorumque modificationes. Quomodo Boscovichius hoc systema perfecit. Ratio fundamentalis hujus systematis 205

ART. III. *De dynamismo recentiorum.* Mechanismus, dynamismus, teleogismus. Phænomena corporum postulant ut duas vires in iis concipiamus, attractivam et repulsivam-et præterea vires plasticas. Hæc tamen omnia nequeunt a nobis

ad rerum naturam transferri. Alii in his viribus ipsam corporum essentiam collocant. Pantheistæ docent vires attractivas et repulsivas se invicem constituere, et unum idemque esse. 205

ART. IV. *Systema atomicum.* Corpora omnia constituuntur atomis. Variæ veterum opiniones circa atomorum naturam. Quæ sit, juxta Cartesium, eorum natura-quid materia prima corporum-quando creata-et quomodo ex ea triplex elementorum genus effectum sit. Gassendi opinio circa corporum elementa-illorumque constitutionem. Newtoni attractio. Progressus atomicæ doctrinæ 207

ART. V. *De atomismo chimico.* Materia ponderabilis et imponderabilis. Corpora simplicia, mixta et composita. Moleculæ integrantes et constitutivæ-atomi primitivæ. Corpora sunt aggregata substantiarum. Corporum diversitas oritur a diversitate molecularum integrantium. Attractio molecularis moleculas conjungit, caloricum dissociat. Corpora solida, liquida, æriformia. Crystalli. Chemicæ affinitatis varietas. Lex dualismi chimici-proportionum determinatarum-et multiplosum. Illationes chimicorum circa atomorum existentiam, naturam et proprietates. Essentiales atomorum proprietates sunt extensio et vis resistendi 210

CAPUT II. CRISIS.

ART. I. *Refellitur systema peripateticum.* PROP. I. *Scholasticorum theoriæ de corporum principiis merito a recentioribus rejiciuntur.* 1º Formæ substantialiseductio, maximas patitur difficultates. 2º Theoria peripatetica certis physicæ dogmatis opponitur. 3º Facta non explicat, atomica autem theoria ea mirifice explicat et illustrat. 4º Theoria formarum substantialium non probatur, nullique nititur solido fundamento. Peripateticorum veterum argumenta expenduntur. Argumento ex auctoritate desumpto respondetur 212

ART. II. *Refellitur systema elementorum simplicium.* PROP. II. *Leibnitziana monadum theoria arbitraria est et absurda.* 1º Nihil fere in ea probatur-2º absurdum est monades cujusque corporis esse numero infinitas-ac sese contingere. PROP. III. *Systema quoque elementorum simplicium a Boscovichio adornatum nec gratuiti assertionibus caret, nec inconveniens omne de vitat.* Arbitraria est attractio et repulsio prouti in his elementis supponitur-ponitur actio in distans, aut ad occasionalismum deflectitur-defenditur hoc systema ab alia quadam imputatione. Non est necessarium ultima corporum elementa, quia simplicia esse debent, esse quoque inextensa 225

ART. III. *Refelluntur dynamici.* PROP. IV. *Dynamismus transcendentium plura congerit inepta atque absurda; quid tamen corpus sit nullatenus explicat.* Perperam supponitur a Kant, necessario concipi in corpore vim repulsivam, quam confundit cum vi resistendi. Continuum nequit constitui vi repulsiva inter ejus partes exserta. Systema Kantii corpus potius supponit,

quam explicat. Absurdum est corporis essentiam constare viribus oppositis. Pantheistarum hypothesis de unitate contrariarum virium refellitur 227

ART. IV. *Atomismus veterum rejicitur.* PROP. V. *Nec in sola extensione geometrica corporis essentia sita est, nec a solo atomorum motu locali corporum constitutio repeti potest.* Cartesius male definit corpus: *rem extensam in longum, latum et profundum*-conceptus corporis et vacui permiscet-viam aperit occasionalismo. Cartesii et Malebranchii argumenta evertuntur. Motus atomorum nequit explicare ipsarum cohaesionem-chimicamque affinitatem 229

ART. V. *Statuitur atomismus chimicus.* PROP. VI. *Ut de corporum constitutione recte judicemus universa in primis atomica theoria fundamenti loco statuenda est.* Hypothesis atomismi chimici non modo probabilis est, sed physice certa. Proinde nequit metaphysicus eam rejicere, aut aliquod systema amplecti, quod eam evertat 252

ART. VI. *Objecta diluuntur.* Si componentia actu remanent in composito, combinatio chimica nihil aliud est, quam mutatio accidentalitatis-nec differt ab operibus artefactis, quæ efficiuntur diversarum partium conjunctione essentia corporum in meris accidentibus collocatur corpora non sunt unum per se, sed unum per accidens componentia a composito nullatenus specie differunt, sed solis accidentibus-proinde per actiones chemicas nulla nova substantia producitur, sed solum fiunt nova aggregata accidentalitatis-quæ omnia sunt contraria, communi hominum sensui. Sua cuique objecto adhibetur responsio. Explicatur nominatim discrimen inter commixtionem mechanicam et chemicam combinationem-tum quid sit compositio substantialis, et unum per se. Opponunt insuper: mixtum manifestat novas vires novasque proprietates, quibus componentia carebant. Agentia naturalia, si novum esse substantiale non producant, nihil agunt. Ergo componentia non manent actu in mixto. Theoria materię et formę est fundamentum universę doctrinę S. Thomę et scholasticorum, quę et vera est et omni veneratione digna. Responsiones 253

CAPUT III. DE ATOMORUM ESSENTIA.

ART. I. *Sententię quędam refutantur.* Status quęstionis definitur. PROP. I. *Atomi substantiarum simplicium neque coalescunt et substantiis inextensis, neque pura extensione geometrica constant.* Probatur ex antea dictis. PROP. II. *Atomi non constant ex materia prima ac forma substantiati.* Si forma cujusque atomi supponitur immutabilis, ejus existentia nequit probari. Si mutabilis, tota scientia chimica et physice universę fundamenta subruuntur. Ad hæc elementi nomen est vox quę in hac doctrina nullum habet sensum-nequeunt in ea assignari singulorum mixtorum elementa et asseri nequit elementa manere in mixto secundum qualitates. PROP. III. *Atomi non*

stant ex viribus attractivis et repulsivis. Ex jam dictis deducitur. PROP. IV. *Atomi non constant extensione et vi resistendi: neque adeo duabus realitatibus distinctis, quarum altera sit principium extensionis, altera radix vis resistendi; quę secunda opinio multo minus admitti potest, si hæc duę realitates dicantur esse materia ac forma peripatetica.* Extensio et vis resistendi nec existunt per se, nec aliquid per se existens constituere possunt. Extensio prouti hic concipitur nequit vim resistendi extensam facere. Extensio in se vel nihil est, vel aliquid absurdum. Altero opinio probari nullo pacto potest-eaque a peripatetica hypothesi in pluribus essentialibus differt. Probari nequit radicem extensionis et virium originem se habere ad invicem ut potentia se habet ad actum. Extensio ac resistendi vis juxta veteres sunt unum idemque. Juxta eosdem forma materialis est extensa formaliter. PROP. V. *Extensio ac resistendi vis duo diversa principia non exigunt.* Extensio ac resistendi vis non sunt proprietates ita oppositę, ut ab eodem principio procedere nequeant. Neque in atomi extensione ea multiplicitas, neque in ejusdem vi ea unitas habetur, quales obijciuntur. Si ab una realitate oriretur in atomo vera multiplicitas, non posset ab altera oriri vera unitas. Ex eadem realitate ex qua extensio dimanat, dimanare potest vis resistendi. 259

ART. II. *Quęstio de atomorum essentia resolvitur.* PROP. VI. *Ultima corporum elementa sunt atomi, nempe substantię extensione geometrica et vi resistendi præditę.* Ex jam dictis deducitur. Generica atomi primitivi essentia-differentia specifica. Atomi primitivę sunt physice indivisibiles. An varię atomorum species metaphysice compositę dici queant. 251

ART. III. *Satisfit objectis.* Chimia nil decernit de atomorum essentia. Atomorum unitas, varietas, figura et mobilitas postulant in iis principium formale simplex a principio materiali realiter distinctum. Vis motrix est per se inextensa; proinde recipi directę debet in aliquo per se inextenso. Sententia quę statuit atomos in composito actu manere, nec mutationem totalem proprietatum compositi, nec mutationem substantię non viventis in corpus vivens explicat-corporum compenetrationem inducit. Qui atomos incompositas tuerentur, perimunt intrinsecum discrimen inter substantiam corpoream et spiritualement-statuunt materiam ex se activam esse, quod repugnat-assignant corpora ut corporum constitutiva-a proposita quęstione aberrant. Systema atomorum incompositarum intimam corporis primitivi essentiam non explicat-viam aperit scepticismo; imo universam diruit metaphysicam-contraria omnia dicenda sunt de doctrina peripatetica. Solutiones 255

CAPUT IV. QUOMODO EX ATOMIS CORPORA CONSTENT.

ART. I. *Notanda quędam.* Nulla esse potest sive in atomis, sive in corporibus actio in distans. Quomodo censendę sint fieri attractiones et repulsionem inter substantias quasvis corporeas.

- Ad crystallorum figuram explicandam sufficit regularis molecularum integrantium figura-quæ et ex observationibus deducitur-et rationibus a priori demonstratur. 263
- ART. II. *De crystallorum genesi quæstio.* An sit aliqua vis seu forma præter attractionis vires, ad crystallorum genesim explicandam necessaria. Diversitas sive attractionis sive figuræ molecularum integrantium in diversis corporibus satis explicat diversos crystallorum typos. Dymorphysmus a sola attractione repeti potest, et in adversariorum hypothesei evadit inexplicabilis. Objecta crystallorum phænomena nullam aliam vim præter attractionem requirunt. PROP. *Rejicienda est opinio, quæ crystallorum genesim repetit a vi quadam simplici superioris ordinis, seu a forma substantiali peripatetica, quæ vires moleculares regat ac sibi subordinet, et ad determinatum effectum concurrere faciat.* Triplex modus quo hæc hypothesis proponi potest. Quocunque modo intelligatur, ea et insufficientis est ad finem-et multis intrinsecis laborat defectibus. 265

CAPUT V. DE CORPORUM PROPRIETATIBUS.

- ART. I. *Enumeratio ac divisio.* Generalis proprietatum corporum partitio juxta veteres-qualitates primæ et secundæ-sensibiles et occultæ. Earumdem partitio juxta Cartesium et Lockium. Quæ sint proprietates corporum generales et speciales-seu primæ et secundæ-quæ mutabiles qualitates. 270
- ART. II. *De extensione corporum.* Quid sit extensio-triplex extensionis explicandæ ratio. Extensio aptitudinalis et actualis. PROP. I. *Extensio corporum propria sita non est in mera partium distinctione.* PROP. II. *Merito veteres docent, extensionem localem actualem nec propriam corporum extensionem esse, nec a corporibus inseparabilem.* Id a fide docetur, et id possibile esse philosophice ostenditur. PROP. III. *Neque in extensione locali, quam aptitudinalem dicunt, propria extensionis corporeæ ratio sita est.* Probatur tam de corporibus, quam de atomis. PROP. IV. *Extensio corporum propria continuata partium serie, videlicet atomorum ordine et connexionem continetur.* Deducitur ex præcedentium opinionum exclusionem. Hujusmodi extensio est in corpore absolute spectato et secundum se, et extensionem, quæ est per ordinem ad locum, necessario præcedit-eadem est radix primarum quantitatis proprietatum. Objectioni fit satis. 275
- ART. III. *De extensione continui.* Quid sit continuïtas-contiguitas-continuum-compositum ex contiguis-continuum permanens et successivum. Partes continui aliquotæ, aliquantæ, proportionales. Duplex philosophorum opinio circa extensio-continui constitutionem et divisibilitatem. PROP. I. *Continua extensio non componitur ex indivisibilibus, sed integrum quoddam est in partes semper continuas sine fine divisibile.* Prior pars probatur ex pluribus absurdis-altera ex priori deducitur-et confirmatur argumento ex geometria deprompto-quod ab adversariorum exceptionibus defenditur. Continuum nequit ex infinitis punctis coalescere. Partes in continuo sunt solum

- in potentia. In qua sita sit essentia extensionis continui. Plenior continui definitio. Indefinita continui divisibilitas redditur intelligibilis. 276
- ART. IV. *Difficultates.* Linea ubique habet puncta-imo gignitur a corpore sphaerico, dum in plano movetur successivo diversorum punctorum tactu: constat ergo ex punctis. Continuum ita se habet ad indivisibile, ut unitas ad numerum. Si continuum esset indefinite divisibile, foret multitudo multitudinum, quin unquam ad unitatem deveniri posset-nec posset totum percurri. Singula diluuntur. 282
- ART. V. *De continui partibus et terminis.* PROP. II. *Dici nequit continuum constare partibus actu distinctis, licet non divisis; sive hæc partes numero infinitæ ponantur, sive finitæ.* In utraque enim hypothesei plura eaque gravia habentur absurda. Partes actuales, licet non divisæ, necessario sunt aut finitæ, aut infinitæ. Difficultates nostræ sententiæ: quæ actu non distinguuntur, nunquam distingui actu possunt. Partes continui sæpe habent attributiones oppositas. Si aliquæ partes in continuo actu distinguuntur, omnes ita distingui dicendæ sunt. PROP. III. *In continuo per se partes non distinguuntur nisi potentia: actu vero distingui possunt solummodo ex causis extrinsecis, nempe vel per divisionem saltem designatam, vel eo quod superadditur continuo aliqua affectionum diversitas, quæ non sit in infinitum divisibilis.* Objectis supra positissimis satisfi. Objectioni adhuc: Causa extrinseca nequit tangere id, quod actu non est. Absurdum est partem contactu produci. In corpore continuo idem esset vertex ac basis, superficies et centrum. Si continuum ex se partes non habet, dici nequit extensum. Subduntur responsiones. Termini continui sunt punctum, linea, superficies-sunt extra mentem linea et superficies sunt dimensiones reales. Indivisibilia, ut termini sunt, nihil sunt positivi. Linea et superficies sunt dimensiones, a soliditate non distinguuntur. 285
- ART. VI. *De vi resistendi et impenetrabilitate.* Notio vis resistendi, et impenetrabilitatis. An impenetrabilitas solius corporis sit propria. Quid sit penetrabilitas. Impenetrabilitas aptitudinalis et actualis. Impenetrabilitas ex sui natura est mutua; penetrabilitas potest esse non mutua. Impenetrabilitas primo et per se est atomorum propria-ac proinde, quatenus est in iis, continua est. PROP. IV. *Actualis impenetrabilitas etiam quoad locum est corpori naturalis.* Probatur experientia. 291
- ART. VII. *De corporum activitate.* Primigenia corporum activitas sub tribus formis exeritur. PROP. V. *Unum corpus alterum impellere nequit, nisi ipsum quoque ab altero sit impulsus.* Est enim per se iners. Vis repulsiva a vi resistendi distinguitur. De pressione Primum movens non est corpus-satisfi duabus objectionibus. PROP. VI. *Nulla exercetur actio unius corporis in alterum sine reactione equali et contraria.* Id enim fert resistentia quam unum corpus alteri penetrare conanti opponit.

Communicatio motus, omnisque mutatio quæ in uno corpore inducitur vi alterius corporis, impenetrabilitati in primis debetur. Prop. VII. *Vis omnis corporea nullum novam realitatem producere potest, sed solum præexistentiam substantiarum immutare statum.* Non omnis corporea actio reducitur ad motum sive ciendum sive destruendum in altero corpore-syntheses et analyses per motum determinantur . . . 295

CAPUT VI. DE QUALITATUM CORPOREARUM HABITUDINE AD SUBSTANTIAM.

ART. I. *Quomodo qualitates sensibiles sint in corporibus.* Opiniones veterum et recentiorum. Status quæstionis determinatur. Carpitur Buffieris et Reidius. Voces quibus qualitates sensibiles significamus, non sunt æquivocæ. Quid dicendum de hac voce: *calor*. Auctor confusionis Malebranchius. Prop. I. *Negari nequit qualitates sensibiles absolute spectatas a sensili representatione, quæ eæ nobis exhibentur, dissimiles esse.* Probatur ex his quæ physica docet de natura qualitatum sensibilibus. Prop. II. *Est similitudo inter qualitates sensibiles absolute spectatas, et materialem impressionem quam in organo causant.* Probatur tum de qualitativis quæ agunt per motum medii, tum de iis quæ agunt per contactum. Prop. III. *Representatio sensilis conformis est qualitativis sensibilibus non absolute, sed relative spectatis, nempe ut agunt in subjecto sentiente.* Lockius erravit, quia corporum vires non attendit. Objectio hujus auctoris dissolvitur . . . 297

ART. II. *Quomodo corporum qualitates a substantia dimanant.* Status quæstionis proponitur. Prop. IV. *Qualitates omnes corporeæ, sive necessariae illæ sint, sive variabiles, ab extensione ac vi resistendi dimanant, vel absolute, vel posita conditione.* Triplex dimanationis modus explicatur, et singulæ corporum qualitates sive permanentes, sive mutabiles ad unum aliquem ex iis reducuntur. Prop. V. *Extensio corporum prodit ab extensione ac vi resistendi atomorum per resultantiam* . . . 301

ART. III. *De distinctione accidentis corporei a substantia.* Quæstio explicatur. Prop. VI. *Qualitates et affectiones quæ ab essentialibus corporum attributis utcumque dimanant, non sunt realitates ab eisdem distinctæ.* Probatur 1º ex difficultatibus doctrinæ formarum accidentalium 2º ex accidentium communi notione et definitionibus aristotelicis 3º ex inductione completa-speciatim motus phenomena explicantur. Prop. VII. *Per hæc quæ diximus non aufertur distinctio inter substantiam ejusque modos contingentes, quam dicunt realem modalem.* Substantia habens certum aliquem modum, sed cogitata sine illo, ab eodem modo solum ratione distinguitur-substantia non habens certum aliquem modum ab hoc ipso distinguitur distinctione inadæquata et negativa, seu reali modali. Quibusdam objectionibus satisfiit. Prop. VIII. *Nulla quoque videtur esse realis distinctio inter corpoream substantiam ejusque essentialis proprietates, extensionem videlicet ac resistendi vim.* Nulla ratio, nullumque indicium hanc distinctionem suadet . . . 304

ART. IV. *De dependentia accidentis corporei a substantia.* Qua ratione, et apud quos theoria accidentium absolutorum invaluerit. Ea non est fidei dogma. Sed juxta recentiores plerosque theologos, mera opinio philosophica. Hæ voces; *accidens*, et *accidens conservatum absque substantia* dupliciter accipi possunt; sensu indeterminato et vulgari, et sensu determinato ex hujus vel illius scholæ placitis deprompto. An extensio et resistendi vis esse possint accidentia absoluta sensu peripatetico. Ad controversiam philosophicam dirimendam nulla est necessitas admittendi realem separabilitatem vis resistendi a substantia. Explicatur quomodo vires et extensio alicujus substantiæ, hac deficiente, possint a Deo conservari. Quo pacto juxta hanc sententiam accidentia, quæ absque subjecto manent, sint identica cum iis quæ prius substantiæ inerant. Conclusio quoad sacram Eucharistiam. . . 314

LIBER SECUNDUS.

CAPUT I. DE MUNDO CORPOREO GENERATIM.

ART. I. *De mundi notione.* Quid mundi nomine veniat-mundus intellectualis et corporeus-cur mundus corporeus in cælum et terram dividi soleat. Quæ complectatur . . . 317

ART. II. *De mundi unitate.* Prop. I. *Sua est mundo, eaque mirabilis unitas.* Unitas 1º aggregationis et materialis continuationis-2º unitas logica similitudinis-3º unitas compositionis et ordinis. Prop. II. *Plures sunt, atque adeo sine numero, mundi possibiles.* Nam 1º omnia mundi accidentia variari sine fine possunt-2º infinita Dei potentia nequit exhauriri. Prop. III. *Plures simul mundos sejunctos et independentes existere nulloatenus repugnat.* Plures enim inter mundos possibiles se invicem non excludunt. Satisfiit quibusdam objectionibus. Nequit a nobis definiri an unus existat mundus vel plures. Quid judicandum sit de existentia animalium hominumque in aliis astris. Hæc hypothesis certa non est; et tamen omnino probabilis-nec christianis dogmatibus ullo modo adversatur . . . 318

ART. III. *De mundi extensione.* Prop. IV. *Mundi extensio necessario finita est.* Nam 1º extensio infinita repugnat-2º Adversariorum argumenta falsa sunt. Mundi figura nec cognoscitur, nec forte unquam cognoscetur. . . 322

CAPUT II. DE MUNDI ORIGINE.

ART. I. *De materiæ creatione.* Quid materiæ nomine intelligatur. Prop. I. *Materia non est a se.* Nam 1º entis a se characteres non habet-2º est indifferens ad ea, sine quorum altero existere non potest-3º Unaquæque atomus est alteri obnoxia, ac certe propter aliud. Prop. II. *Materia produci debuit ex nihilo.* Nam a materia produci non potuit: a spiritu non potuit educi ex præexistente substantia. Mundi creator est Deus. Creationis notio illustratur. Creatio passiva non est mutatio. Creatio excludit omnem successionem. Creatio actio non est activa transiens. Creatio est relatio. Creari substantiarum est proprium. . . 323

- ART. II. *De mundi initio.* Qui sint mundi æterni assertores. PROP. III. *Manifeste errarunt quicumque opinati sunt mundum seu mundi materiam necessario esse sempiternam, i. e. sine existentie initio.* Nec enim materia requirit ut creetur æterna: nec id divina natura postulat. Maxima philosophorum pars semper mundi æternitatem negavit . . . 527
- ART. III. *Refelluntur objecta.* Actio Dei est æterna-Deus, qui æternus est, est causa sufficiens mundi, eaque perfectissima. Rerum creator Deus est semper idem. Mundus non æternus pugnat cum infinita Dei bonitate. Tempus est sempiternum: nullum autem tempus sine rebus mutabilibus. Responsiones subjiciuntur . . . 529
- ART. IV. *De mundi æterni repugnantia.* Hujus controversiæ origo et auctores. PROP. IV. *Mundus ab æterno conditus intrinsece repugnat.* Nam 1^o si mundus semper fuisset, existeret multitudo actu infinita-repugnat autem multitudo actu infinita, etiam successiva. Ad hæc, si mundus semper fuisset, infinitum exhauriretur-infinito fieret quotidie additio-haberetur infinitum infinito majus-2^o Creatio, si passive spectatur, temporis initium ponit. Si mundus æternus est, tollitur discrimen omne inter creationem et conservationem. COROLLARIA. Æternitas solius Dei propria est. Repugnantia mundi æterni probatur ex parte ipsius mundi. Mundus æternus non potuit esse terminus virtutis divinæ. Etiam creatura, in qua nulla esset successio, æterna esse non posset. Mundus proprie dici nequit creatus in tempore, sed cum tempore. Quo sensu dici possit, Deum potuisse mundum creare prius . . . 533

CAPUT III. DE MUNDI OPIFICIO.

- ART. I. *Unde sit rerum distinctio atque ordo.* PROP. I. *Corporum mundanorum distinctio et ordo a Deo est materiæ creatore.* Probatur ex divinorum operum fine-ex dominio Dei-ex consideratione virium materialium-ex necessitate primitivæ alicujus dispositionis-ex corporum organicorum formatione. Excluduntur vires plasticæ materiæ elementaris, et generatio spontanea . . . 539
- ART. II. *De modo et ordine quo mundus est conditus.* Triplex hujus quæstionis solvendæ methodus. PROP. II. *Mundi constitutio mundanorumque corporum molitio, post creatam a Deo materiam, ipsius materiæ viribus commissa fuisse videtur; ita tamen ut divinus opifex 1^o sapientissima atomorum materialium dispositione ac motione omnem futurarum vicissitudinum seriem determinaverit ac præparaverit et ad intentum finem ordinaverit; 2^o immediate operatus sit in plantarum et animantium, multoque magis in hominis formatione.* Potuisset Deus uno momento mundi opificium perficere, vel hoc materiæ viribus committere. Ratio suadet, mundi molitionem naturæ viribus permissam esse, ac longo temporis intervallo perfectam-id geologica scientia comprobatur. Terrestris corticis summaria descriptio, ac geologiæ conclusiones præcipuæ. Idipsum om-

- nium populorum traditio confirmat. Ex quo fonte determinari queat duratio successivæ mundi molitionis. Mosaici dies; mane et vespera. Mosaicos dies sex diurnas periodos fuisse pluribus rationibus ostenditur. Miracula inutilia non sunt admittenda. Mirabilis mosaica historia cum scientia concordia. 542
- ART. III. *Brevis cosmogoniæ adumbratio.* Ex collatione scientiæ geologiæ cum sacra historia colligitur series eventuum in mundi primordiis. Creatio ac dispositio elementorum-tenebræ, lux-atmosphæra-vegetalium primitivæ-mane et vesperasol, luna, stellæ, reptiles, pisces, volatilia, animalia terrestria, et homo. Sacra historia et geologica se mutua illustrant. 351

LIBER TERTIUS.

CAPUT I. DE SPATIO.

- ART. I. *Quæstionis expositio.* Quomodo nos concipiamus spatium, locum, distantiam, vacuum. Variæ philosophorum opiniones circa horum conceptuum realitatem . . . 556
- ART. II. *Quid sit spatium.* PROP. I. *Spatium absolutum, prouti a nobis concipitur, non est aliquid extra mentem existens.* Nam hoc spatium 1^o nec esset substantia nec accidens-2^o esset extensio actu infinita-3^o esset increatum. PROP. II. *Spatium absolutum non est divina immensitas.* Hæc opinio pugnat cum simplicitate-et immensitate divina-et viam ad pantheismum sternit. PROP. III. *Est aliquod spatium quod merito reale dicitur.* Nempe extensio quam efficit mundanorum corporum continuata series. PROP. IV. *Spatium absolutum nihil aliud objective est, quam extensio possibilis, quæ ex corporum coexistentium serie sine fine continuata constitui potest.* Distinctio inter spatii conceptum et phantasma. Probatur propositio argumento exclusionis-et ex possibili extensionis proprietatibus. Spatium absolutum jure vocatur ideale et imaginarium-immensitas divina dici potest spatii possibilis fundamentum. Satisfit quibusdam difficultatibus. Spatium absolutum non est forma subjectiva. Kantii argumenta refelluntur . . . 558
- ART. III. *De loco.* Loci definitio, et limites. Locus realis et idealis. Quid sit distantia et in quo differat a loco. Aristotelica loci definitio explicatur-et cum nostra conciliatur. Quid sit ubicatio. Substantia finita contineri potest in loco circumscriptive vel definitive. PROP. I. *Constitutio rei in loco non est modalis aliqua realitas, sed mera relatio extrinseca.* Hujusmodi realitas intelligi nequit, et est inutilis. Fundamentum relationis, quam constitutio rei in loco importat, est in corporibus circumstantibus. PROP. II. *Omnia corpora naturaliter existunt in loco circumscriptive, spiritus autem definitive.* Corpus naturaliter loco mensuratur. Spiritus nequaquam. PROP. III. *Mundana corpora in certo aliquo loco esse incipiunt, in eoque esse pergunt, quia vires quibus sollicitantur, ad æquilibrium deveniunt; spiritus vero, quia corporibus in loco existentibus sunt aliquo modo præsentis.* Mundana enim corpora eorumque par-

tes vel mediate vel immediate in se invicem agunt. Spiritus viribus corporeis nullo urgentur. PROP. IV. *Omne corpus est per se in loco, saltem ideali; spiritus autem sunt in loco non per se sed per accidens* 365

ART. IV. *De corporum compenetracione.* PROP. V. *Impenetrabilitas quoad locum non est corpori essentialis, ita ut intrinsece repugnet, bina vel plura corpora in uno eodemque loco simul coire.* Vis enim resistendi vinci potest-et potest Deus duobus corporibus relationem eandem ad eundem locum tribuere. Possibilis est corporis unius per aliud transmeatio. Partes ejusdem corporis in eodem loco constitui possunt imo totum corpus quid amitteret corpus ita locatum-Sacramentalis Christi praesentia Extensio localis actualis non est corpori essentialis 368

ART. V. *De corporum multilocatione.* Quid sit multilocatio circumscriptiva, definitiva et mixta. PROP. VI. *Nulla multilocatio est corpori naturaliter possibilis: at certum ex aequo est multilocationem, saltem definitivam vel mixtam, nullam repugnantiam includere; id quod etiam de circumscriptiva multilocatione dicendum videtur.* Prior pars ab experientia colligitur-multilocatio definitiva et mixta nullam implicat contradictionem-nam externarum solummodo relationum multiplicationem imitant-multilocatio quoque circumscriptiva factis indubiis suadet-ur corpori circumscriptive replicato nequeunt convenire attributa quae contraria sunt ratione subjecti; at possunt quae contraria sunt ratione loci. Opponunt: 1° quae distinctis locis existunt, realiter distinguuntur-2° Corpus replicatum distaret a seipso-esset unum et plura-circumscriberetur loco et non circumscriberetur-moveri posset motibus contrariis. Singulis objectionibus respondetur 369

ART. VI. *De vacuo.* Vacuum proprie et improprie dictum-imaginarium et reale-coacervatum et disseminatum. PROP. VII. *Vacuum reale ac proprie dictum possibile est.* Nullam enim continet repugnantiam-evidenter infertur ex annihilationis possibilitate. PROP. VIII. *Est vacuum proprie dictum in mundo-nempe disseminatum.* Id postulat atomorum imponderabilium motus. Opponunt: Ea inter quae nihil existit, se mutuo contingant oportet. Distantia realis foret nihil-et nihilo inesset extensio realis. Vacuum nec substantia foret, nec accidens. Si inter atomos aetheris vacuum est interjectum, ea agere ad invicem non possunt. Respondetur singulis 374

CAPUT II. DE TEMPORE.

ART. I. *De temporis notione.* Temporis elementa: praeteritum, praesens, futurum. Momenti fluxus. Analogiae temporis cum continuo permanenti-et temporis absoluti cum spatio absoluto-quae tamen in duobus discrepant. 377

ART. II. *Quid sit tempus.* Experientia nobis offert durationem cum successione. PROP. I. *Duratio realis ab entis existentia non distinguitur re, distinguitur tamen ratione, quatenus dicit per-*

manentiam existentiae. Probatum ex durationis et existentiae conceptibus. PROP. II. *Successio est relatio exclusionis mutuae, quam habet existentia unius respectu existentiae alterius.* Eternitas, aevum, tempus. PROP. III. *Tempus reale a rerum mutationibus non distinguitur.* Quid tempus in se-Aristotelica temporis definitio. Nullum tempus ante mundum. Quid praesens, praeteritum, futurum. Relationes temporis sunt extrinsecae. Coexistentia. PROP. IV. *Tempus reale continuum est, non constans ex indivisibilibus.* Deducitur ex conceptu mutationis, et motus localis. Momentum. PROP. V. *Tempus absolutum est duratio possibilis, quae ex rerum sine fine sibi succedentium serie constare potest.* Declaratur, et probatur ex dictis 379

ART. III. *De motu ac mensura temporis.* Quid motus localis, quies, velocitas. Quo pacto motus sit mensura temporis. Mensura naturalis et artificialis. Mensura temporis ex internis affectionibus. Idem tempus aliis breve, aliis longum. Varia problemata 384

LIBER QUARTUS.

CAPUT I. DE NATURAE ORDINE AC LEGIBUS.

ART. I. *De natura.* Quid significet natura quum vel peculiaribus substantiis vel rerum universitati tribuitur. Repudiantur falsae quaedam hujus vocis acceptiones. Materia Epicuri Anima mundi. Natura genitrix juxta Cudworthum. 387

ART. II. *De naturae legibus.* Quid sit lex naturae-ordo naturae-cursus naturae. Certo existunt leges naturae tam universalis quam particularis. Lex utilitatis, medii naturalis-continuitatis-unitatis-pulchritudinis-constantiae-singulae declarantur et demonstrantur 389

ART. III. *De legum physicarum contingentia.* PROP. I. *Leges physicae quanquam hypothetice necessariae, absolute tamen contingentes dicendae sunt.* Haec enim leges necessario resultant ex quibusdam positis conditionibus-quae tamen corporibus sunt omnino contingentes. Exempla 395

ART. IV. *De legum physicarum constantia.* Erroneae quaedam hae de re opiniones. Ad solvendam hanc quaestionem non ad instinctum naturae, sed ad principia recurrendum est, rejecto empirismo. PROP. II. *Legum naturalium constantia etiam quoad futuros eventus indubiis innititur fundamentis.* Nam essentiae sunt immutabiles-conditiones vero ex quibus resultant corporum vires immutari, aut harum virium effectus passim impediri Deo attributa non sinunt. Legum physicarum constantia duplici principio a priori stabilitur. Leges naturales esse constantes est principium a prio. Constantia legum physicarum in particulari per se physice certa est-quumque agitur de casu aliquo futuro, etiam hypothetica 394

ART. V. *De ente naturali ejusque oppositis.* Duobus modis aliquid naturale dicitur. Quid sit voluntarium, violentum, artificiale, et quid naturale per oppositionem ad haec singula. In quo praecipue natura ab arte differat eique praecellat. Naturale

per oppositionem ad fortuitum et supernaturale. Utraque hæc notio illustratur. 598

CAPUT II. DE MIRACULIS.

- ART. I. *Miraculi notio.* PROP. I. *Miraculum proprie est effectus qui totius naturæ creatæ ordinem ac facultatem excedit.* Miraculum ab admiratione dictum. Admirationem duo gignunt quæ in miraculo proprie dicto excellentiori quodam modo reperiri debent-id postulat ut miraculum totius naturæ ordinem et facultatem excedat. Hinc non omne id quod sola virtute divina fieri potest est miraculum. Creatio non est miraculum. Miracula fiunt solo Dei imperio, et ex ejus auctoritate in vires legesque naturæ. Miraculi discrimen a miro a præstigio-ab operibus magiæ sive diabolicæ-ab eventibus naturalibus extraordinariis. Miraculorum partitio pro diverso modo quo naturæ facultatem excedunt. Miracula supra, contra vel præter naturam. 401
- ART. II. *De causa miraculorum efficiente.* PROP. II. *Solus Deus miracula proprie dicta facere potest.* Nam 1º omnis creatura in suis operationibus ordini a Deo statuto subicitur-2º Omnis creaturæ potentia est limitata ad aliquem determinatum effectum-3º Omnis creatura nequit agere, nisi ea ad quæ subiectum in quo agit, est in potentia. PROP. III. *Tam boni quam mali spiritus mirabilia quædam perpetrare possunt, non per modum miraculi, sed per modum artis.* Spiritus naturali virtute operari possunt ea omnia, quæ motu viribusque corporum ad finem aliquem adhibitis, fieri queunt-inter quæ plurima mira sunt. Tam boni quam mali spiritus divinæ providentiæ subsunt. Ad iidem sint homini causa erroris. PROP. IV. *Boni spiritus miracula proprie dicta operari possunt non tanquam cause principales, sed tanquam Dei instrumenta ac ministri; id quod de malis spiritibus dici nequit.* Angeli ad miracula facienda tripliciter operantur. Speciatim vero divinum præceptum exsequendum creaturis exhibendo. Si Deus miracula patrandi facultatem malis spiritibus daret, eorum falsitatis testis existeret. 404
- ART. III. *De causa miraculorum finali.* PROP. V. *Finalis miraculi causa non quidem in ordine physico, sed in altiori providentiæ ordine continetur, in eoque est posita, ut miraculo tanquam signo ac testimonio divino aliquid a Deo hominibus manifestetur.* Ordo physicus minus patet quam ordo providentiæ, et huic subordinatur. Quæ Deus per miracula testatur, ad aliquam tum personam, tum doctrinam pertinere possunt. Prior pars prop. probatur ex utriusque ordinis natura Altera 1º ex consensu omnium populorum-2º ex ipsa miraculi natura-3º ex veritatum supernaturalium relatione ad humanam intelligentiam. COROLLARIA 408
- ART. IV. *De quibusdam falsis miraculi notionibus.* Rejiciuntur definitiones Spinozæ et Lockii-Theoriæ Clarckii, Bonneti et

- Houttevillii de naturæ legibus. PROP. VI. *Clarckii, Bonneti et Houttevillii theoriæ ad miracula facilius intelligenda excogitata, probari minime possunt.* Nam 1º innitantur hypothesebus arbitrariis, et aliquando etiam falsis-2º dant fatalistis et incredulis id quod maxime iis negandum est-3º tollunt omne discrimen tam inter miraculum et naturalem effectum, quam inter utriusque causæ 410
- ART. V. *De miraculorum possibilitate.* PROP. VII. *Eventus, qui totius naturæ creatæ ordinem ac facultatem excedant, et intrinsece et extrinsece possibiles sunt.* Sunt intrinsece possibiles, quia nec ordo naturæ creatæ est absolute necessarius, nec ejus facultas infinita. Extrinsece, quia 1º Deus excedit ordinem et facultatem naturæ 2º Ostenditur singillatim, Deum efficere posse quæ supra, quæ contra, quæ præter naturam sunt. 412
- ART. VI. *Difficultates.* Leges naturæ universalis sunt mera Dei decreta, quæ ex necessitate et perfectione divinæ naturæ sequuntur. Si Deus ageret contra leges naturæ, ageret contra suam naturam. Virtus et potentia naturæ est ipsa Dei virtus et potentia. Si Deus leges a se constitutas mutaret ac violaret sese ostenderet mutabilem, improvidum, insipientem-Deus nequit derogare legibus naturæ, quia hæc fluunt a rerum essentiis-nequit agere contra naturam-ut legibus honestatis, ita etiam physicis derogare non potest. Solutiones Deus nunquam proprie agit contra rerum naturam, licet agat contra naturæ ordinem 414
- ART. VII. *De miraculorum cognitione.* Facta quæ naturæ ordinem excedunt tum sensuum experientia, tum per alienum testimonium cognosci cum certitudine possunt. PROP. VIII. *Ex consideratione facti mirabilis, una cum ejusdem adjunctis, cognosci potest ut plurimum, utrum illud sit signum divinum, an non; quum vero hoc cognosci certo nequit, si hujusmodi factum signum divinum non est, semper indicia suppetunt ad dubitandum de ejus origine.* Ex adjunctis facti mirabilis constare potest, illud nec esse opus occultarum virium naturæ-nec humana arte aut fraude patratum. Deus nequit permittere mirum, quod ab ipso non sit, divinum signum videri, quin medium suppetat ad errorem vitandum. Cognosci potest, an facta quædam mirabilia malorum spirituum sint opus, vel secus. Quomodo doctrina sit miraculi criterium, et miraculum doctrinæ. Omne opus mirabile, sive a Deo, sive a bonis spiritibus vi sua naturali patratum, semper ut signum divinum habendum est 417



COLUMBIA UNIVERSITY



0032198051

VOLUME 3

Fr. Pastet & Co.
New York & Cincinnati.

140

T61

3



MADISON AVENUE.
NEW YORK.

INSTITUTIONES PHILOSOPHICÆ.



Volumen III.

PETRUS BECKX

PRÆPOSITUS GENERALIS SOCIETATIS JESU.

Cum opus, cui titulus : *Institutiones philosophicæ. Volumen III. Psychologia — Theologia*, a P. Salvatore Tongiorgi nostræ Societatis sacerdote lingua latina conscriptum, aliquot ejusdem Societatis Theologi, quibus id commisimus, recognoverint, ac in lucem edi posse probaverint; facultatem damus ut typis mandetur, si iis, ad quos pertinet, ita videbitur. In cujus rei fidem has litteras manu nostra subscriptas et sigillo nostro munitas dedimus.

Romæ, die 28 decembris 1861.

L. † S.

PETRUS BECKX.

—
IMPRIMATUR.

Fr. Hieron. Gigli O. P. S. P. A. Magister.

—
IMPRIMATUR.

Fr. A. Ligi O. M. C. Archiep. Icon. Vicesg.



APPROBATIO ILL^{ISS.} AC REV^{ISS.} DOMINI EPISCOPI BRUGENSIS.

Institutiones Philosophicæ quas R. P. Tongiorgi S. J. P. et in collegio romano philosophiæ professor, alumnis suis dictavit et typis romanis nuper descripsit, tanto pondere doctrinæ, tanta ratiocinii vi et perspicuitate sermonis eminent, quinimo tam eximio opinionum delectu præstant, ut eas, præ cæteris, in usum scholæ philosophicæ Minoris nostri Seminarii Rollariensis adoptaverimus.

Brugis 8 septembris 1862.

† J.-B., EPISCOPUS BRUGENSIS.

—
PROPRIÉTÉ. DÉPOSÉ AU VŒU DE LA LOI.

INSTITUTIONES

PHILOSOPHICÆ

SALVATORIS TONGIORGI

E SOCIETATE JESU

PHILOSOPHIÆ PROFESSORIS

IN COLLEGIO ROMANO EJUSDEM SOCIETATIS

—
Editio quinta.

—
VOLUME III.

—
PSYCHOLOGIA — THEOLOGIA



BRUXELLIS

EXCUDEBAT H. GOEMAERE

SUMMI PONTIFICIS TYPOGRAPHUS.

—
1873



APPROBATIO ILL^l AC REV^l DOMINI EPISCOPI LEODIENSIS.

Eximie Domine,

Jampridem nobis significaveras, te valde cupere, ut in manus discipulorum tuorum liber de disciplinis philosophicis ratione scholastica digestis traderetur, qui his dotibus excelleret, quibus ejus generis tractatus præcipue commendantur. Ut his tuis votis respondeamus, Institutiones R. P. Tongiorgi in Collegio Romano professoris, cujus ipse lectiones non sine emolumento ac laude per tres annos hausisti, præ cæteris optavimus, quia præclari hujus auctoris scripta philosophica eas omnes dotes, quas nobis enumerasti, exhibent, eruditorum quidem virorum et nominatim doctissimi DD. Malou, episcopi Brugensis, sententia, quorum consilio usi sumus. Præstant enim illæ Institutiones facilitate sermonis, ratiocinii perspicuitate et firmitate, sana atque eximia doctrina; eas opiniones psychologicas et ontologicas exhibent, non quæ vanam novitatem redolent, sed quas docta scholæ catholicæ corona tradit, tacente vel approbante Ecclesia. Clarissimus auctor, ut qui in nulla re philosophica peregrinus, quæstiones cosmologicas erudite enodat; et eos, quos movet incredulitas hodierna, errores præcipuos summa perspicuitate reteggit, summa rationis vi insectatur ac perstringit.

Itaque spero fore ut discipuli tui, his Institutionibus imbuti, te duce veram solidamque philosophiam adipiscantur.

Datum Leodii hac 10 Maji 1862.

† THEODORUS, EPISC. LEODIEN.

Reverendo admodum Domino J. SAAL, S. Theologiæ ac Philosophiæ doctori, in Seminario minori Trudonopolensi disciplinarum philosophicarum professori.

PSYCHOLOGIA.

1. Plures sunt scientiæ, quæ, nobilissimum aspectabilis mundi opus, hominem considerant. Homo enim in se uno et materialem et spiritalem naturam mirabili nexu conjungit. Humanum porro corpus anatome maxime, et physiologiâ considerant: metaphysica nobilissimam hominis partem sibi jure vindicat quæ materiam excedit, nempe animam: corpus vero non considerat, nisi secundum habitudinem quam ad animam habet.

2. Hanc metaphysicæ partem plurimis esse impeditam difficultatibus, fatentur omnes; ut vere dici queat, non in practico solum ordine, sed etiam speculativo, difficillimum homini esse nosse seipsum. Ratio hujus difficultatis hæc est potissimum, quod cognitionis hujus fundamentum atque adeo instrumentum subjectiva reflexio existit: hæc autem speculandi ratio impeditissima est: tum quia in hujusmodi reflexione difficulter diu inhærere possumus; tum quia dum ejus fructus colligimus, difficulter errorem vitamus. Cæterum maximam hac in re difficultatum partem sustulerant profundæ subtilesque veterum disputationes, quas immerito recentiorum plerique neglexerunt; ex quo factum est, ut soluta jam a veteribus problemata iterum sibi proponerent, ac solvere tentarent; nec raro contigit, ut ea nec apte proponerent, nec apte solverent. Nihilominus injuste ageret qui negaret, a recentiorum quoque studiis magnas huic scientiæ utilitates allatas fuisse. Quare nec veterum nec recentiorum subsidia contemnat oportet, qui sedulus ac sincerus veritatis quæsitores esse velit.

Agemus primo de vita in genere ac de variis viventium speciebus; tum de anima humana ejusque facultatibus.

LIBER PRIMUS.

CAPUT I.

DE VITA IN GENERE.

ARTICULUS I.

De vitæ conceptu.

3. PROPOSITIO I. *Nulla vitæ definitio melior quam quæ a veteribus tradebatur: activitas qua ens seipsum movet.*

Vitæ definitionem, quæ et experientiæ et loquendi usui plene satisfaciatur, apud recentiores physiologos frustra quæras. Cum enim hi accuratissimi sint et maxime perspicaces in vitæ phænomenis mechanice explicandis, ejusque instrumentis describendis, quando tamen de ipsa vitæ notione agitur, eam cursim, obscure, atque adeo inaccurate exponunt, et quod inde consequitur, cum magna opinionum varietate. Sufficiet celebriores memorare.

4. Juxta Georgium Ern. Stahl vitæ nihil est aliud formaliter, quam conservatio corporis in sua mixtione corruptibili, sine omni corruptionis istiusmodi actuali eventu (1). Ast hæc definitio in primis ex vi verborum aptari posset cuicunque chimico composito facile dissolubili, sed caute custodito ne a dissolventibus contingatur. Deinde non amplectitur nisi vitam vegetativam, et in hac attingit potius effectum quemdam actuum vitalium, quam essendi modum a quo ipsi procedunt, qui est vita. Demum convenire potest etiam cadaveribus incorruptis, sive per aromata, sive per miraculum.

5. Ex hac Stahlîi definitione suam desumpsisse videtur celebris ille alter physiologus Bichat, juxta quem vita est: *complexio functionum quæ morti resistunt* (2). Quæ quidem descriptio, quanquam vitæ quædam superioris definitionis devitet, in illud tamen gravissimum incidit, quod vitam explicat per mortem, nempe quod reale est per ejus privationem (L. 126, e). Præterea vitam solummodo entium corruptibilium spectat, imo vero unum ex ejus effectibus, eumque non primum nec præcipuum.

(1) In Theoria medica vera. — (2) Recherch. physiol. P. I.

6. Communior est definitio Richerandii, qui vitam vocari dicit: *complexionem phænomenorum quæ sibi succedunt in corporibus organicis intra limitatum temporis spatium* (1). In qua præter defectum notatum in præcedentibus, quod nempe de vita solum organica loquatur, illud etiam habetur incommodi, quod nominalis potius definitio est quam realis; non enim quid sit vita determinat, sed subjectum in quo ipsa reperitur.

Mitto alias vitæ descriptiones quæ afferri solent, quæque vel falsæ sunt, vel idem per idem declarant.

7. A scholasticis igitur, ut multa alia, ita et vitæ notio haurienda est. Hi vitam definiebant: *activitatem qua ens movet se ipsum*: quæ definitio, si recte intelligatur, non potest non probari.

Animadvertendum itaque 1º Motum de quo hic sermo, non esse solummodo motum translaticium, sed mutationem omnem qua ens seipsum immutat aut utcumque se ad operationem agat (O. 380), seseque perficiat.

2º Ad vitam requiri, ut motus principium internum sit viventi, ita ut vivens non ab aliena activitate determinetur ad agendum, sed ab activitate sibi insita. Unde aquæ fluentes, aut e fistula erumpentes vita carent, quia motus ille est a gravitate, vel a pressione aeris. Ast animal vivit, qui quum v. gr. ambulat, aut volat, hi motus ab interno principio determinantur.

3º Actionum vitalium terminum esse ipsum vivens. Sol v. gr. vivens non dicitur ex eo quod radios evibret: nam quamvis actio hæc a principio intrinseco determinetur, habet tamen externum terminum.

4º Hinc patet, actiones vitales esse actiones immanentes (O. 259); et viceversa actiones omnes immanentes vitales esse.

5º Propterea actus omnes vitales ipsum subjectum, a quo dimanant, perficere, activitatemque qua vita continetur, ad subjecti perfectionem jugiter tendere.

6º Definitionem datam pertinere ad vitam in actu primo,

(1) Nouv. Elém. de Physiol. T. I, Proleg.

quæ vita substantialis est, et ipsum esse viventis. Vita autem in actu secundo est omnis actio vitalis; quæ dicitur vita accidentalis, et ab esse viventis finiti distinguitur.

8. Datam definitionem non posse non probari liquet 1^o ex plana illa quidem, sed vere sapienti s. Thomæ animadversione, qua sic statuit. « Ex his quæ manifeste vivunt, acci-
» pere possumus quorum sit vivere et quorum non sit vivere.
» Vivere autem manifeste animalibus convenit... Unde secun-
» dum illud oportet distinguere viventia a non viventibus,
» secundum quod animalia dicuntur vivere. Hoc autem est
» in quod primo manifestatur vita, et in quo ultimo rema-
» net. Primo autem dicimus animal vivere, quando incipit
» ex se motum habere, et tamdiu judicatur animal vivere,
» quamdiu talis motus in eo apparet: quando vero jam ex
» se non habet aliquem motum, sed movetur tantum ab alio,
» tunc dicitur animal mortuum per defectum vitæ (1). »

2^o Idipsum patet ex metaphoricis locutionibus; tunc enim aliquid, quod vivens proprie non est, vivum dicimus, quum aliquem motum habet, qui ab intima aliqua vi determinari videatur. Hoc pacto v. gr. aquam e fonte erumpentem vivam dicimus.

9. Hinc colliges, non minus contra loquendi usum, quam contra rerum veritatem ivisse eos, qui vel omnia vivere docuerunt, vel mundo universo vitam tribuerunt. Motus enim omnes quibus et terræ globus et corpora cœlestia urgentur, ab extrinseco determinantur; itemque in minerali regno omnes motus ab impulsu extrinseco accepto gignuntur.

ARTICULUS II.

De vitæ gradibus.

10. PROPOSITIO II. *Eo perfectior vita est, quo perfectior est modus se movendi, majorque unitas atque identitas moventis et moti.*

Quod ad primum attinet, ut subtiliter notat s. Thomas, tria

(1) *Sum. th. p. 1, q. XVIII, art. I.*

in moventibus et motis per ordinem considerata veniunt: *finis* qui movet agentem; *forma* per quam agens agit, videlicet determinatio agentis quæ in illo sit actionis principium; ac tandem *executio* actionis. Quæ igitur viventia hæc omnia ex se habent, perfectissima sunt, quæ non omnia, imperfectiora.

« Inveniuntur quædam, ita prosequitur s. doctor, quæ
» movent seipsa, non habito respectu ad formam vel finem,
» quæ insunt eis a natura, sed solum quantum ad executionem
» nem motus; sed forma per quam agunt, et finis propter
» quem agunt, determinantur eis a natura. Et hujusmodi
» sunt plantæ, quæ secundum formam inditam eis a natura
» movent seipsas secundum augmentum et decrementum.
» Quædam vero ulterius movent seipsa non solum habito re-
» spectu ad executionem motus, sed etiam quantum ad for-
» mam quæ est principium motus, quam per se acquirunt.
» Et hujusmodi sunt animalia, quorum motus principium
» est forma non a natura indita, sed per sensum accepta.
» Unde quanto perfectiorem sensum habent, tanto perfe-
» ctius movent seipsa.... Sed quamvis hujusmodi animalia
» formam, quæ est principium motus, per sensum accipiant,
» non tamen per seipsa præstituunt sibi finem suæ opera-
» tionis vel sui motus; sed finis est eis inditus a natura, cu-
» jus instinctu ad aliquid agendum moventur per formam
» sensu apprehensam. Unde supra talia animalia sunt illa
» quæ movent seipsa etiam habito respectu ad finem, quem
» sibi præstituunt. Quod quidem non fit nisi per rationem
» et intellectum, cujus est cognoscere proportionem finis
» et ejus quod est ad finem, et unum ordinare ad alte-
» rum (1). »

Sunt itaque tres vitæ gradus: *vita vegetativa*, *vita sensitiva*, *vita intellectiva*.

11. Idipsum deduces ex altera consideratione, videlicet identitatis quam in vivente habet movens et motum.

In plantis habetur unitas compositionis, finis, et ordinis; ac si tota planta consideratur, ea vere seipsam nutrit et auge-
get; nihilominus nulla est in ea molecula, quæ proprie seip-

(1) *Sum. th. p. 1, q. XVIII, art. III.*

sam moveat, sed una molecula alteram movet, et una pars alteram; quanquam hi motus omnes, omnesque simul partes totius fini subserviant.

Ast in animalibus non sunt solum organa corporea, sed etiam principium simplex et indivisibile, quod totum corpus et singulas ejus partes informat; proindeque licet in animali sint diversa organa ac diversæ partes, et in his diversa fiant et recipiantur, unum tamen idemque principium est, quod iis omnibus inest et in omnibus agit ac patitur.

Denique intellectiva substantia cum sine organis corporeis actus vitales sibi proprios exerceat, non modo in se simplex est et indivisibilis, sed etiam nulla organorum multiplici- tate indiget, in quibus activitatem suam distribuatur.

Igitur maxima unitas invenitur in viventibus vita intel- lectiva, minor in viventibus vita sensitiva, minima in venti- bus vita vegetativa.

12. Ex utroque capite deducitur, super hos omnes vitæ gradus, perfectissimam vitam esse Dei.

Prænotandum 1º Dei vitam esse vitam intellectivam.

2º Deum non movere seipsum motu proprie dicto, qui mutationem involvit et successivam perfectionis acquisitio- nem, sed motu latissime accepto, quatenus actum significat. Nam quod creatæ intelligentiæ habent efficiendo aliquid in seipsis, Deus sine ulla actione per seipsum habet. Hoc igitur sensu Deus se movet ad actum intellectivæ vitæ, quod suum actum non ab alio habet, sed a seipso per suam essen- tiam, quia est ens a se.

15. Ex hoc fit 1º ut Deus se moveat modo perfectissimo. Nam si duo illa spectentur secundum quæ vitæ perfectio æstimatur (10), nempe finis agendi, et forma quæ agendi principium est, intelligentiæ finitæ, quanquam fines pecu- liares sibi præfigant, non tamen sibi præstituant finem ulti- mum, quem ipsis natura præfinit: ac prætera formam, quæ est agendi principium, habent aliquo modo ab objecto quod apprehendunt. Quare licet se moveant, tamen etiam moven- tur et ab objecto apprehenso, et a fine ultimo. Deus autem

cum sit ipse sibi finis ultimus, et adæquatum sui intellectus objectum, a seipso solum movetur.

2º In Deo movens et motum adeo perfecte unum sunt, ut divinus intellectus sit ipsa divina substantia. Nec modo Deus est sua intelligendi vis, sed suus intelligendi actus; nam hæc in Deo non distinguuntur. Unde ipse est sua vita in actu secundo, id quod de nullo vivente creato dici potest. Omne enim ens creatum est ab alio, non a seipso; actus autem vi- talis ab ipso vivente sit oportet. Repugnat ergo ens creatum esse ipsum actum vitalem.

ARTICULUS III.

De vitæ principio.

14. Cum corporum viventium a non viventibus tanta sint discrimina, ut ipsis oculis deprehendantur, facile erat intel- ligere, esse in viventibus aliquid quod in materia bruta non est. Hoc porro quod est in solis viventibus, id quo viventia esse illud sibi proprium habent, vitæ principium dicitur. Esse igitur aliquid vitæ principium, nemo negat, nisi qui negat principium rationis sufficientis; at quid sit istiusmodi principium, hoc difficile est ad inquirendum.

15. Aristoteles doctrinæ de corporum constitutione a se traditæ insistens, vitæ principium in forma aliqua substan- tiali collocandum censuit: quam formam *animam* vocavit, extendens ad viventia omnia nomen quo humanæ, atque adeo belluinæ vitæ principium appellari vulgo consuevit. Cele- berrima est aristotelica animæ definitio: *actus primus cor- poris physici, organici, potentia vitam habentis*.

Scholastici Aristotelis definitionem, universamque ejus de anima doctrinam unanimes recipiebant; sed in ea expli- canda non paucas miscebant controversias, atque varias in opiniones discedebant. Inter hasce controversias præcipua erat illa: utrum corporei viventis una tantum forma sit an multiplex.

16. S. Thomas (1) cum sua schola, pluresque alii docue- runt, viventis corporei unicam esse formam animam, a qua

(1) *Summ. th.*, p. 1, q. LXXVI, ad 2. Cf. Suarezium; *De anima*.

vivens et esse corpus et esse vivens accipiat, partesque singulae viventis esse substantiale sibi proprium omniaque sua accidentia adipiscantur: adeo ut in vivente, expulsis successive formis omnibus materiam disponentibus, nihil sit aliud nisi materia prima et anima. Juxta hanc sententiam in definitione aristotelica anima dicitur actus corporis, ut calor actus calidi; dicitur actus primus per oppositionem ad operationem, quæ est actus secundus; et actus primus corporis organici potentia vitam habentis, quia per animam corpus est organicum, ac vitales potentias recipit, propter quas corpus vivum a non vivente discernitur.

17. E contrario Scotus (1), et ipse cum sua schola aliisque doctoribus, censuerunt, in viventibus præter animam esse aliam quamdam formam substantialem, quam formam *mixtionis*, seu *corporeitatis* appellarunt: hujus muneris esse, ut corpus organicum constituat independentem ab anima, ordinatum tamen ad illam ut proprium ejus subjectum, quod per ipsam fiat vivens; eandemque formam variis viventis partibus esse substantiale cujusque proprium impertiri. Plerique docebant, formam corporeitatis partibus heterogeneis constare, seu formis partialibus diversis, ita ut v. gr. forma substantialis nervorum a forma ossium aliarumque partium differat. Juxta hos auctores in definitione Aristotelis anima dicitur actus primus corporis organici, non quia dat ipsi esse corporis, aut esse organicum, sed quia dat ipsi esse viventis.

Alii fuerunt qui formas in viventibus adhuc magis multiplicarent, quorum opiniones referre inutile est.

18. Nec major fuit opinionum concordia inter philosophos, qui postremis hisce ætatibus a scholasticorum doctrinis recesserunt. Cartesius vitam omnem plantarum et brutorum per mechanicas leges explicari posse putavit: quem secuti sunt Boerhavius et Haller aliique vetustiores physiologi, quos *jatromathematicos* vocant. *Jatrochimici* vero quorum dux exstitit Sylvius, ad chemicas combinationes confugerunt: quos inter Paracelsus et Van-Helmontius novum quoddam

(1) In IV Sent. Dist. XI, q. III, art. secundo.

principium materia sensibili subtilius in viventibus supposuerunt, quod *archeum* appellarunt. Stahl vitam omnem in homine ab animæ intellectivæ operatione repetiit: hujus sectatores *animistæ* dicti sunt. E contrario *materialistæ* non modo vitam vegetativam, sed sensitivam quoque et intellectivam ad materiæ vires ac motus reducere conati sunt.

19. Nostris adhuc temporibus opinionum varietates physiologos ac philosophos dividunt. Sunt enim qui ad vitæ phænomena explicanda vim quamdam requirunt sui generis a mechanicis chemicisque viribus plus minusve diversam, quam *vim vitalem* seu etiam *organicam* appellant. Hi *vitalistæ* dicuntur. Contra quos *anti-vitalistæ* contendunt sufficere vires cosmicas, eas nempe quibus mineralia corpora instructa sunt; vimque vitalem nihil esse aliud, quam vel electricitatem, vel chemicas affinitates, vel attractionem molecularem, vel vim quamdam ex his omnibus resultantem.

20. Inter ipsos vitalistas non una est sententia. Plurimi enim sunt qui vim vitalem vix memorant, nec determinant quid hoc nomine intelligant; alii fatentur, nomen hoc non designare vim aliquam determinatam, sed esse nomen collectivum, quo causæ omnes phænomenorum vitalium comprehenduntur; alii vires omnes naturæ vitales existimant et vocant; alii sentiunt vim vitalem esse vim oppositam viribus mechanicis et chemicis et cum ipsis perpetuo luctantem; alii eam reduci ad vires mechanicas et chemicas, sed sub certis quibusdam conditionibus constitutas, vi quarum non consuetos effectus, sed diversos ipsæ producant: sunt denique qui principium vis vitalis, etiam quoad vitam vegetativam, animam esse doceant, in homine quidem animam intellectivam, in brutis sensitivam; nec desunt philosophi qui in ipsis plantis substantiam quamdam simplicem vitæ principium esse arbitrentur.

21. Sufficiat in præsentem hanc opinionum varietatem enumerasse, ut exinde deducamus id quod fatentur omnes, mirabile quiddam esse vitam, atque inter naturalia mysteria obscurissimum. Cæterum ut aliquid de vitæ principio dici possit ad singulos vitæ gradus descendendum est; cum enim

hi gradus adeo inter se differant, nihil potest de omnibus simul generatim statui.

CAPUT II.

DE VITA VEGETALIIUM.

ARTICULUS I.

De differentiis vegetaliū a corporibus inorganicis.

22. De vita *vegetalium* hic loquemur; non de vita vegetali utcunque. Vitam enim hanc considerare oportet in iis viventibus, quæ hæc sola gaudent: quum enim de animalibus agitur, quæ non vita solum vegetali vivunt, sed insuper anima sensitiva instructa sunt, quædam insurgunt quæstiones, quæ quum de vegetabilibus loquimur, locum non habent.

23. Considerandum primo venit, quam multa quantaque sint vegetaliū a mineralibus discrimina. Capitalia hæc a naturalium rerum scriptoribus recensentur.

1^o *Organisatio*. Mineralia sunt ubique homogenea nec partes præferunt ad diversos fines destinatas. At vegetalia partibus constant heterogeneis, ligno, cortice, foliis, floribus aliisque, quarum unaquæque ad finem aliquem aptata cernitur, et cum cæteris apte conjuncta ad totius bonum conspirat. Ad hæc singulæ harum partium cellulæ, fibræ ac vasa substantiis sive liquidis, sive aereis refertæ sunt, quousque planta vivit.

2^o *Forma*. Inorganica corpora, quum crystallisatio fit sine impedimento, figuras geometricas accipiunt, quæ planis ad angulum concurrentibus terminantur; quandoque eadem substantia varias accipit figuras. Ut plurimum autem hæc corpora, saltem extrinsecus, amorphæ sunt, earumque formæ a corporibus externis se produnt determinatas. At corpora organica ejusdem speciei figuram semper induunt eandem; singularum item partium eadem semper forma manet ac dispositio. In diversis autem speciebus mirifice variæ sunt et totius et partium formæ, quæ tamen semper lineas rectas et angulos declinant, curvasque elegantiae ac gratiæ plenas sectantur.

3^o *Chimica constitutio*. Mineralia enim vel sunt substantiæ

non compositæ, vel diversimode compositæ ex binis componentibus, semper tamen secundum propositiones valde simplices. Vegetalia vero eorumque partes immediate constant certis quibusdam substantiis, quæ naturaliter non coalescunt nisi organorum ministerio, ut sunt v. gr. saccharum, amyllum, olea volatilia etc.; quæque merito substantiæ organicæ vocantur, non solum quia corpora organica in eas immediate resolvuntur, sed etiam quia integrantes earumdem moleculæ quædam organorum quasi rudimenta esse videntur. Ultima vero corporum vegetaliū elementa sunt potissimum hæc quatuor: carbonium, hydrogenium, oxygenium, nitrogenium: ex his maxima pars massæ organicæ constat: ac propterea hæc *elementa organogena* appellantur; his quandoque aliæ quædam substantiæ intermischentur, sed paucissimæ et exigua quantitate. Singulæ vero substantiæ organicæ tribus, ut plurimum, elementis organogenis constituuntur, nonnunquam solum duobus: proportionibus tamen sunt semper multo magis complexæ, quam in mineralibus.

4^o *Ortus*. Corpora inorganica coalescunt ex plurium accessu molecularum, fortuito concurrentium viribus attractionis molecularis et chimicæ affinitatis, quibus eorum massa indefinite augeri potest, si materia non desit. Modo autem ex analysi corporum magis compositorum emergunt, modo fiunt simpliciorum synthesisi. Vegetalia autem semper oriuntur ex germine, quod prius in aliquo alio corpore ejusdem speciei elaboratur, ac dein ex ipso decisum, in novum individuum consurgit, ex quo nova germina ac nova individua prodibunt.

5^o *Incrementum*. Mineralia augentur per *suprapositionem*, videlicet per novorum additionem stratorum, quæ in superficie eorumdem considunt. Organica vero crescunt per *intussusceptionem*, videlicet varias substantias exteriores absorbent, easque interna et artificiosa elaboratione sibi assimilant, atque hoc pacto explicant ac dilatant id quod in germine inchoatum et quasi delineatum latebat.

6^o *Duratio*. Mineralium existentiae nulli sunt præfiniti

limites; ea enim tandiu perstant, quandiu vis aliqua mechanica partes ipsorum ab invicem non dividit, aut chimica reagentia eorundem elementa non dissociant. Sed organicorum corporum duratio, quæcunque demum sit ejus rei causa, certe aliqua periodo continetur. Etiam si enim extrinsecæ causæ eorum dissolutionem non accelerent, tamen ita sunt constituta, ut tandem aliquando cesset motus ille intestinus, quo moleculas perpetuo et absorbent intra se, et extra se refundunt. Quumque hic motus definitive cessat, vegetale moritur, totaque ejus compago per successivas resolutiones in substantias organicas recidit.

24. Hæc porro omnia ostendunt 1^o vegetalia quanquam generalibus corporum legibus subdantur, regi tamen insuper legibus quibusdam sibi propriis, quæ diversæ sunt ab iis quibus materia bruta subjicitur: hinc 2^o viribus quoque propriis instructa esse, quæ materiæ inorganicæ facultatem excedunt.

ARTICULUS II.

De functionibus vegetalium.

25. Vitales vegetalium operationes *functiones* appellant; eas in duos ordines botanici distinguunt; aliasque vocant *functiones vegetationis*, seu *nutritionis*, alias *reproductionis*. Uterque ordo organa distincta habet in plantis perfectioribus: eoque perfectior planta censetur, quo magis hæc organa distinguuntur; ita ut perfectissimæ sint eæ, in quibus unaquæque specialis functio organum sibi attributum habet; imperfectissimæ vero illæ, in quibus unaquæque cellula functiones omnes exsequitur, ut sunt algæ.

26. Functiones vegetationis eo spectant, ut corpus organicum, ex variis corporibus quæ ipsum circumstant, eas sibi vindicet substantias, quæ idoneæ sunt sive ad conservandas partes sui jam formatas, sive ad novas formandas partes, easque augendas conservandasque.

Hæ functiones sunt in plantis:

1^o *Absorptio* humoris ex terra per radices.

2^o *Circulatio*; ascensus nempe hausti humoris per cellu-

las ac vasa lignei contextus usque ad corticem et folia, et descensus per contextum corticalem a summo ad radices usque.

3^o *Respiratio*. Succus ascendens et ad aeris præsentiam constitutus, quædam elementa ex eo haurit, quædam in ipsum refundit: videlicet diurno tempore carbonem surripit ex acido carbonico, et refundit oxygenium; noctu vero acidum carbonicum emittit. Respirationem plantarum comitatur *exhalatio* aquei vaporis.

4^o *Secretiones et assimilationes*; videlicet unaquæque vegetalis pars e latice descendente ac modificato per aeris contactum, eas sibi decerpit materias, quæ sibi suoque fini conveniunt, easque sibi conjungit, communicans iis proprietates quibus ipsa instructa est. Hoc pacto augentur texturæ cellulares, fibrarum fascies et vasa, et cum foliis gemmæ erumpunt, quæ deinde in ramos et flores explicantur.

27. Functiones reproductivæ hoc sibi proprium munus habent, ut germina præparent, quæ in nova ejusdem speciei individua succrescant.

Huc spectat 1^o *florum eductio*, in quibus sunt organa ad germen præparandum destinata.

2^o *Fecundatio* ovulorum, quæ fit in plantis perfectis (cotyledoneas vocant), per pollinem ex antheris emissum in ovarium.

3^o *Fructificatio*; seu processus ille per quem cæteris fecundationis organis collabentibus ovarium excrescit in pericarpium, et ovulum in semen, in quo embryon explicatur.

4^o *Disseminatio* quæ contingit postquam fructus ad maturitatem pervenit. Tunc enim semina ex planta decidunt, et pericarpio dehiscente vel dissoluto, hac illac sparguntur, ac terræ commissa germinare incipiunt, vitamque vivere sibi propriam.

28. Hinc perspicis 1^o functiones vegetativas effici in bonum individui; per has enim individuum se conservat et perficit; functiones autem reproductivas esse in bonum speciei; per has enim conservatur species atque amplificatur.

2^o Utrumque functionum ordinem necessarium fuisse.

Necessariæ fuerunt functiones reproductivæ, quia corpora vegetalia corruptibilia sunt. Primis ergo speciei cujusque individuis pereuntibus, tota in illis fuisset extincta species, si individua sibi similia ex se producere illa non poterant.

Hinc necessariæ fuerunt functiones vegetativæ. Cum enim planta generet plantam ex aliqua sui parte a se decisa, nempe ex semine, individuum sibi actu simile, ac mole speciei debita gaudens generare non potest. Solummodo igitur generat embryonem, h. e. individuum simile virtute. Fuit ergo necessarium ut embryonem molem sibi debitam ex se acquirere posset, et ad perfectionem speciei debitam pertinere. Quod quidem assequi non poterat, nisi illi tribuerentur idoneæ vires, quibus substantias aliquas exteriores sibi vindicaret ac propriæ substantiæ assimilaret.

Hinc patet 3^o in ordine intentionis functiones vegetativas consequi originis modum, ac propterea functiones reproductivas; quanquam in ordine executionis functiones reproductivæ vegetativas supponant, iisque innitantur.

29. PROPOSITIO I. *Non immerito tres vegetalis vitæ potentiæ seu vires ab aristotelicis assignabantur, scilicet nutritiva, augmentativa, generativa; neque doctrina hæc recentiorum placitis realiter adversatur.*

Hoc quod postremo asseritur, facile evincitur. Etsi enim recentiores, ut modo dictum est, duos in vita vegetali functionum ordines agnoscant, nutritionis nempe et generationis; tamen quum de nutritione loquuntur, duo in ipsa accurate distinguunt munia, conservationem videlicet reparationemque formatarum partium, ac novarum partium formationem et incrementum (1). Igitur a veteribus in eo tantum differunt, quod operationes duas uno complectuntur nomine, quo medium utrique operationi subserviens significatur.

30. Veteres nutritionem ab augmentatione ipsis nominibus ac definitionibus distinguebant; ac nutritionem constituebant

(1) « La nutrition est cette fonction par laquelle le corps organisé prend dans les matières en rapport avec lui les principes propres tant à entretenir et fortifier ses parties déjà formées qu'à former des parties nouvelles, tant à le conserver qu'à l'accroître. » *Botanique*, par M. Adr. de Jussieu. Leç. III, § 221.

in conservatione ac reparatione viventis per conversionem alimenti in propriam substantiam; augmentationem vero in aggeneratione novæ substantiæ secundum quantitatem ad acquirendam debitam magnitudinem.

Porro duo hæc merito distingui, patet ex eo quod unius operationis conceptus conceptum alterius non includit. Conceptus enim nutritionis seu assimilationis integer persistit, etiamsi a plantæ incremento præscindas. Manet enim suus nutritioni finis vel in eo tantum, quod necessarium est viventi ut se conservet, ea reparando, quæ sive per respirationem, sive per evaporationem, sive per varias egestionem, sive demum per annuam foliorum, florum, fructuum jacturam, continenter deperdit. Nutritio igitur, quemadmodum in animalibus adultis contingit, necessaria viventi est, etiamsi incrementa illi debita non attendantur. Præsertim si non de incrementis solummodo partium præexistentium sermo sit, sed de novarum quoque partium, gemmarum nempe ac ramorum formatione; quæ formatio quasi quædam generatio est, cum non immerito gemmæ embryonibus comparentur (1). Hoc enim augmenti genus cum nutritionis conceptu multo minus connectitur.

31. Verum quidem est, ab augmentatione nutritionem supponi, nec aliter crescere vivens, quam nutritionis ope. Ast hoc ostendit quidem, operationem unam alteri subordinari tanquam medium ad finem; minime vero operationum distinctionem destruit. Secus generatio quoque a nutritione non differret; generatio enim nutritionem eodem modo supponit ac augmentatio.

Ex his concludes, vitam vegetativam optime definiri posse (7): *activitatem qua corpus organicum se nutrire et augere, ac sibi simile generare potest.*

ARTICULUS III.

De principio vitæ in vegetabilibus.

32. Videndum nunc quodnam sit vegetalis vitæ in plantis principium; quænam scilicet, ex allatis supra de principio

(1) Jussieu, I c. § 250 bis.

vitali opinionibus (15, seq.), sit præferenda quum de plantis agitur. Notandum porro, non hic agi de prima vegetali origine, nec de prima vegetali causa efficiente, sed de principio illo per quod vegetalia vitam possident, et similia sibi germina procreant. Certum est enim ex alibi dictis (C. 298, 5^o), non potuisse vegetalia viribus materiæ brutæ primo produci, sed primum vitæ auctorem fuisse Deum, qui vel semina construxit ex quibus plantæ orirentur, vel plantas ex quibus semina gignerentur.

Quid vero in hac re sentiendum videatur, sequentes propositiones demonstrabunt.

33. PROPOSITIO II. *Principium vitæ vegetaliū non est forma substantialis ejusmodi, quæ corpori organico tribuat non modo ut sit vivens, sed etiam ut sit actu et ut sit corpus organicum.*

Hæc est una ex sententiis quæ apud scholasticos vigeant, ut supra retulimus (16), quæ forte est magis aristotelicæ quam cæteræ, sed non ex æquo veritati propior. Nam

1^o Posita generali illa theoria de corporum principiis, quod nempe corpora omnia constant materia prima ut pura potentia, et forma substantiali ut actu primo illius, opinio hæc verosimilior erat, et toti systemati, ut modo diximus, forte congruentior. Sed systemate hoc everso, hæc quoque opinio fundamento suo destituitur, ac sponte concidit. Suo autem loco (C. 32, seq.) ostensum et peripateticum systema admitti modo non posse. Ergo.

2^o E converso qui hanc modo opinionem amplecti vellet, is admittere deberet principii loco, quum minerales substantiæ absorbentur a vegetabilibus, iisque assimilantur, evanescere earum formas, iisque unicam vegetalis formam succedere.

Qui vero hoc admittit, is admittere quoque debet :

a) corpora ipsa inorganica constare materia ac forma, et quidem forma non stabili, sed mutabili;

b) formas substantiales educi ex potentia materiæ virtute generantis, vel aggenerantis.

His autem duobus totum peripateticum systema de generali corporum constitutione continetur; quod quidem merito a recentioribus rejicitur. Ergo.

3^o Ex analysi corporum organicorum ac substantiarum organicarum, prodeunt tandem aliquando substantiæ quædam inorganicæ et chimice simplices, quæ ad regnum minerale pertinent, ac multis mineralibus compositis communes sunt. Concludendum igitur, hæc ipsa elementa in corporibus organicis actu permanere, etiam quum illa vivunt, nisi velimus hypotheses arbitrarias et incredibiles confingere.

4^o Si negas actu manere in vegetabilibus inorganica elementa, admittere debes formas infinitas alias aliis sibi succedentes quum vegetalia corrumpuntur, easque eductas ex potentia materiæ vi caloris, si corruptio sit naturalis, aut vi chimicorum reagentium, si hæc adhibeantur. V. gr. debes in primis admittere formam *cadavericam* vegetalis emortui, deinde formas varias pro variis fermentationis phasibus, donec planta in fimum resolvatur: si vero per chimica reagentia substantiæ organicæ educantur, admittere debes formas feculæ, amyli, sacchari, aliasque sexcentas, ac tandem formas carbonis, hydrogenii, cæterasque, omnes noviter eductas ex potentia materiæ primæ; cum tam facile sit substantias easdem, absque ulla formarum eductione ac successione, concipere extractas ex vegetali in quo actu continentur.

5^o Omitto referre argumenta quibus hæc opinio a scotistis impugnabatur; quæ quidem argumenta multo majorem vim in præsentii scientiarum statu obtinerent; sed necessaria non sunt. Nihil enim est in vegetaliū vita, quod ad hanc hypothesim admittendam nos cogat, aut eam utcumque suadeat: neque ullus est modo inter physiologos vitalistas, qui de ea mentionem faciat, quique adeo principia physica et chimica quæ ipsam evertunt, tanquam certa ac fundamentalia non habeat.

34. PROPOSITIO III. *Nihil est in vegetabilibus quo suaderi possit esse in iis, præter corpus organicum, principium aliquod activitatis simplex, seu substantiam a materialibus elementis distinctam.*

Huc redit, seclusis materiæ primæ ac formæ notionibus,

opinio scotistarum (17); nec desunt inter recentiores qui in hanc sententiam propendere videantur. Porro quæ ad eam comprobendam ex vegetalium consideratione colligi posse videntur, ad hæc reducuntur:

1^m quod vegetalía legibus sibi propriis subjiciantur, quæque a legibus inorganicorum corporum propriis magnopere differunt;

2^m quod mira unitate gaudeant, quæ maxime agnoscitur tam in plantæ successiva formatione ex semine, quam in mutua organorum dependentia, ac functionum harmonia;

3^m quod planta identica sibi æstimetur in omnibus suis ætatibus; quæ quidem identitas exsurgere nequit ex materialium elementorum identitate; hæc enim perpetuo mutantur;

4^m quod vires materiales ad vitales functiones explicandas insufficientes esse videantur.

35. Sed revera nihil est horum, quod principii simplicis de quo agimus, existentiam suadere possit.

Non 1^o nam ex *legum diversitate* hoc unum necessario deducitur: vires atque adeo essentiam compositi organici a viribus et essentia inorganici differre. Hæc autem virium et essentiae diversitas oriri potest a diversa materialium elementorum dispositione, a diversa conjunctione materiae ponderabilis cum imponderabili, ab organorum structura et dispositione. Non dico nunc, hujusmodi esse virium organicarum originem; dico tantummodo esse posse; id quod non difficulter concipies, si attendas, quam variæ corporum proprietates resultent ex quibusdam positis conditionibus (C. 210, seq.); v. gr. quam diversæ sint leges lucis, caloris, electricitatis et magnetismi, cum tamen phænomena hæc ad unum idemque agens pertineant. Si quis igitur ex legum diversitate thesim, de qua agimus, probare vellet, is in id incumbere deberet ut ostenderet, esse aliquas in vegetalibus vires, quæ tantummodo a substantia simplici, distincta a materialibus elementis, et organico corpori conjuncta, dimanare ac repeti queant; quod quidem fieri posse non puto.

36. 2^o Non majorem *unitas* vegetalium difficultatem creat. Alia est enim unitas et indivisibilitas essentiae, alia unitas principii essentiae, sive intrinseci, sive extrinseci. Jam in vegetalibus apparet certe unitas indivisibilis essentiae, quæ licet composita sit, in indivisibili tamen consistit, ut omnis alia essentia. Apparet quoque unitas indivisibilis principii extrinseci, nempe unitas *finis*, unitas *ideæ archetypæ*, unitas *artificis*: at nihil est ex quo colligere possimus indivisibilem principii alicujus intrinseci unitatem. Unitas enim intrinseca essentiae vegetalium non alia re, quam mirabili quadam plurium conjunctione et ordinatione continetur. Sunt enim in vegetali plura organa sed harmonice disposita, plures vires sed harmonice conspirantes, plures functiones sed harmonice coordinatae, successivæ evolutiones sed harmonice se excipientes; brevi secundum celebre Hippocratis effatum: *consensus unus, conspirantia omnia*; ita ut unaquæque pars, unaquæque vis, functio, evolutio alteri subserviat, omnesque simul ad totius conservationem et incrementa collineent. Ex quibus deducere necesse erit, ut dixi, unitatem finis, ideæ exemplaris et artificis, non vero unitatem principii intrinseci simplicis et indivisibilis.

37. Quam unitatem neque veteres exigebant. Ii enim plantarum formam divisibilem esse communi consensu docebant (1); multi vero etiam compositam. Scotistæ namque, ut supra dictum est (17), docebant corporeitatis formam in viventibus ex pluribus formis partialibus heterogeneis constare: cæteri vero facile concedebant, ipsam vegetalium animam componi formis quibusdam partialibus et heterogeneis, aptis tamen ut inter se uniantur et continentur, unamque integram formam totius constituant (2). Nulla autem ratio est, cur nos majorem quam illi unitatem in vegetalibus postulemus, maximo cum nulla nova observatio aut experimentum id exigat.

38. 3^o *Identitas* quoque plantarum facile intelligitur. Pro-

(1) Cf. *Comment. Coll. Conimbr.* S. I in II de Anima c. I, q. VIII, art. I.

(2) Cf. Suarez. *Met. Disp.* XV, sect. X, § 51.

fecto plantas sibi identicas esse, vulgo existimamus ac dicimus omnes. Ast ad hanc existimationem explicandam necesse sane non est, ut ad simplex hoc vitalitatis organicæ principium confugiamus. De hujusmodi enim principio homines ne cogitant quidem, quia plantarum identitatem affirmant; quorum plerique identitatem hanc confuse tantum intelligunt, nec in quo ea reposita sit explicare sciunt. Certe homines *animæ* vocabulum quod vitali brutorum principio applicant, ad principium vitale plantarum significandum nullo unquam tempore transtulerunt; id quod sane fecissent, si de simplici aliquo principio in ipsis existente cogitassent.

39. Si vero quærat, quid sit quod in plantis permaneat (siquidem aliquid permaneat necesse est, si eæ sibi sunt aliquo modo identicæ); respondebunt physiologi, materialia plantæ elementa nullo instanti esse omnia illa quæ erant instanti præcedente; singulis enim instantibus quædam moleculæ in organismum subeunt, et quædam ex eo elabuntur; maximam nihilominus harum molecularum partem aliquo tempore permanere, ad sensum vero permanere omnes. Ad hæc moleculas quæ noviter introducuntur, paucissimas esse singulis momentis, easque sensu non percipi, nec mutationem ullam sensibilem atque abruptam seu figuræ, seu texturæ, seu functionum inducere, sed adhærere statim partibus jam existentibus, cum iisque harmonice conspirare; adeo ut functiones omnes perpetuo continuentur, ac vegetalis status præsens sit simul et status antecedentis effectus, et subsequenter præparatio. Ex quibus concludunt, identitatem plantæ esse *permanentiam in individua elementorum et ad sensum stabili massa, organismi, figuræ, functionum quæ ad speciem pertinent, sine sensibili ac repentina mutatione, et cum determinata dependentia statuum subsequentium a præcedentibus*. Si cui hæc omnia parum videantur ad identitatem aliquam constituendam, is animadvertat multo minora esse ea quibus efficitur gentis aut nationis identitas, quæ tamen et a Deo et ab hominibus rata habetur.

40. 4^o Non cogunt denique ea quæ vitalistæ jure optimo

congerunt ut ostendant *vires solummodo materiæ inorganicæ ad vitales functiones explicandas insufficientes esse*.

Ex his enim hoc unum et nos cum ipsis concludimus: In plantis præter hasce vires esse *aliquid aliud* quod earum exercitium modificat ac regit, atque adeo, variat et auget. Hoc autem quid est? Ut probaretur esse substantiam simplicem organa pervadentem atque unificantem, ostendi deberet, nullam aliam hypothesim suppetere. Sed hoc non ostenditur: imo, ut modo videbimus, afferri potest aliquid aliud magis planum atque intelligibile. Ergo.

41. PROPOSITIO IV. *Vires quædam peculiares in vegetalibus agnoscendæ sunt, quæ in materia inorganica non vigent. Hæc tamen vires non aliud esse videntur, quam variæ resultantur virium mechanicarum et chemicarum, prouti hæc sub organismi conditionibus operantur.*

Probatur 1^a pars :

Cum vires non cognoscamus nisi ex effectibus, eas merito vires et existimamus et dicimus essentialiter diversas, ex quibus diversi constanter effectus prodeunt. Hoc pacto v. gr. in una eademque substantia attractionem molecularum a chemicis affinitatibus, et caloricum ab electricitate distinguimus. Atqui perspicimus profecto in vegetalibus effectus diversos ab iis qui materiæ inorganicæ viribus producuntur. Quod constat

42 1^o ex legum supra notata diversitate (25, 24) ;

2^o ex functionum organicarum analysi, in quibus, quamvis plura sint quæ viribus materiæ brutæ communibus perficiuntur, quædam tamen sunt quæ his viribus solis tribui non possunt, ut v. gr. assimilationes tam multæ ac variæ, et constans organorum omnium formatio atque explicatio juxta certum aliquem typum, aliaque hujusmodi.

3^o Quandoque ipsæ vires mechanicæ et chemicæ diverse modo agunt in vegetalibus, ac in materia inorganica. Ex. gr. elementa organogena intra vegetalia associantur, et secundum proportionem diversas ab iis quas servant in combinationibus regni mineralis, et modo prorsus diverso, ut patet

ex theoriis *typorum unimembrum et substitutionum*, quas recentiores chimici illustrarunt (1).

4^o Si quando materia aliqua organica arte chimiae conflatur, conditiones et processus qui in hunc finem adhibentur, plane differunt ab iis quas in corporibus organicis adhibet natura ad eandem substantiam componendam.

43. Necesse non est ut plura addamus, nec ut singillatim ostendamus contra exaggeratos *anti-vitalistas*, vitae phaenomena nec sola electricitate, nec solis affinitatibus, nec aliis huiusmodi causis explicari posse. Hæc enim quæ delibavimus, satis esse videntur ut concludamus, existere in vegetabilibus vires quasdam ipsis peculiares, et a viribus quæ in minerali regno vigent, essentialiter diversas (2). Hasce vires *vitales* dicimus.

44. Probatur 2^a pars :

Advertendum in primis, quanquam vires vitales in solis materiae brutæ viribus reponi non possint, certum tamen esse apud omnes, has vires non excludi a viribus vitalibus, imo earum sin minus elementa, at certe instrumenta esse. Huiusmodi enim vires sunt a materia inseparabiles, licet quandoque occultari possint et ab agendo impediri; constat insuper experientia, multas vegetalium functiones, magna saltem ex parte, juxta communes leges mechanicas aut chemicas confici. Igitur materiae brutæ vires ad materiam quoque organicam pertinent, sed non solæ. Quæritur jam, quid sit quod viribus materiae brutæ additum, una cum iis vim vitalem efficit. Nostra vero sententia est, non esse opus ut admittamus in vegetalibus realitates aliquas materiae superadditas, sed satis esse vires inorganicas *sub quibusdam conditionibus operantes*; has vero conditiones *artificiosa organismi constitutione* contineri.

45. Primum suaderi facile potest ex doctrina alibi tradita de resultantia unius vis ex altera, posita actione quæ certas aliquas circumstantias determinet (C. 210, 2^o). Hoc pacto vi-

(1) Cf. Cl. Prof. Seb. Purgotti. *Trattato di Chimica applicata*. Vol. Chimica organica. Lib. I. Sez. III.

(2) Cf. cit. Auct. Sez. IV, § 2073, seq.

res omnes mechanicæ et chimicæ a resistendi vi resultant; v. gr. materia ponderabili consociata cum imponderabili, resultant ex vi resistendi attractio molecularis, affinitates chimicæ, attractio universalis; itemque motus translativus, diversimode receptus in moleculis, fit lux, calor, electricitas, magnetismus.

Hoc porro resultantiae genus in artefactis luculentius apparet. In hac enim machina v. gr. est ingens vis loco-motiva, quæ quidem est ab aqueo vapore, sed artificiose coacto et compresso in anthliis; in hac alia est virtus efficiendi paucis momentis ex liquenti pulte siccam chartam: virtus hæc resultat et ex aliqua vi gignente motum localem, et ex calorico, et ex attractione moleculari; sed nulla ex his viribus, nec omnes simul, ejusmodi effectum producere possunt, nisi multis artificiis earum actiones modificentur, et harmonice consociantur. Idem dicito de cæteris huiusmodi.

Igitur eodem pacto fieri potest ut ex viribus mechanicis et chemicis, sub influxu quarundam conditionum, quas Creatoris sapientia posuerit, vires vitales resultent.

46. Ad probandum alterum, machinarum exemplum opportunissimum accidit. Vere enim, organum quodvis, cum ad finem aliquem assequendum divina summi opificis arte aptatum sit, machina dici meretur: imo unamquamque substantiarum organicarum moleculam ingeniosissimo artificio compositam existimare necesse est; id quod patet vel ex complexa huiusmodi molecularum constructione. Inter humanas autem machinas, et hasce divinas hoc inter cætera discrimen est, quod machinæ humanæ massas solum majores minoresve materiae movent ac modificant, dividunt et componunt; hæ autem non massas, sed moleculas singillatim et atomos. Facile itaque concipitur, quomodo in huiusmodi machinis, actione nunc mechanica, nunc chimica, ac modo vi caloris, modo electricitatis, vitæ vegetalis phaenomena perfici possint, quæ tandem aliquando ad molecularum varios motus, et consociationes, et collocationes reducuntur. Sic v. gr. cum videam ex fuso metallo virgam vel filum per machinam promi, non difficulter concipiam, sal-

tem in genere, qua ratione ex germine radices et plumula prodire, atque ex trunco gemmæ ramique succrescere possint.

Illustriora exempla dabunt machinæ aliæ multæ, quæ quanto exquisitiore artificio apparatus sunt, tanto mirabiliora excidunt opera; quæ machinæ adeo intuentes primo percillant, ut vere anima quadam informari videantur.

47. Concludendum itaque, vires vitales vegetaliū posse concipi ut resultantes ex viribus mechanicis et chemicis, prouti hæ sub organismi conditionibus operantur. Sed quomodo suadebitur ita rem se habere? Ad hoc suadendum duo nobis sufficiunt. 1^o argumentum exclusionis: Ex cæteris enim hypothesis quas expendimus, prima certis exploratisque doctrinis opponitur (33); altera (34) quanquam plus exigit quam sententia modo exposita, revera tamen vegetaliū vitam explicat minus, saltem minus intelligibiliter; tertia demum (43) insufficiens est, nisi in nostram hanc recidat. 2^o principium illud certissimum: *non sunt multiplicanda entia sine necessitate*. Si hoc ergo quod dicimus, ad vitam vegetaliū explicandam sufficit, aliquid ulterius exigere prohibemur.

48. Notanda. 1^o Formale in plantis vitæ principium est ipse organismus. Per hoc enim principium functiones plantarum propriæ peraguntur.

2^o Motus in quo vita est plantæ, non est motus laticis sive ascendantis sive descendantis: hic enim motus per transeuntem organismi actionem efficitur. Vita igitur plantæ sita est in mutationibus illis quas planta in se inducit; videlicet in nutritione et augmento. Hujusmodi enim mutationes vere sunt plantæ actiones immanentes: tota namque planta per suum organismum earum principium est, totaque cas in se recipit.

3^o Organismus autem ad hasce functiones operatur tripliciter: a) sua ipsa structura; huic enim debentur phænomena quæ ad endosmosin et capillaritatem revocantur: b) intestino motu; ad laticis enim ascensum ac discensum explicandum requiri videtur contractio aliqua vasorum, quæ con-

trarios hosce motus determinet, ad eum fere modum quo in animalibus cordis contractiones cient sanguinis circulationem: demum c) vi quadam quæ chemicas elementorum actiones in diversis plantæ partibus diversimode modificat, ita ut eadem elementa in uno organo unum compositum v. gr. saccharum efforment, in aliis vero compositum alterum, v. gr. substantiam cellularem (1).

49. Dices 1^o Juxta hanc explicationem vires vitales non sunt vires vegetaliū propriæ. Ergo nomine tenus vires vitales asseruntur.

2^o Doctrina proposita organismum supponit, et per organismum omnia explicat. Sed præsens controversia est de ipsa organismi origine. Organismus enim gignitur et augeatur per functiones vitales. Videmur ergo in circulum vitiosum incidere.

3^o Concludi posset ex dictis, artem chimiæ, quemadmodum ex elementis mineralibus quasdam organicas substantias composuit, v. gr. uream, saccharum, sebum, alcool aliaque hujusmodi, ita forte in posterum organis ac plantis producendis parem futuram.

4^o Imo inferri posset, plantas a machinis non differre. Sunt enim quædam machinæ quæ seipsas movent.

5^o Ignis quoque vivere dicendus esset: nam ignis se nutrit et augeat.

Resp. Ad 1^m *Nego ant.* et *cons.* Certe si vires diversorum corporum propriæ eæ solæ vocari deberent, quæ ad nullas alias generaliores reduci possunt, fateor, non modo in corporibus organicis, sed etiam in inorganicis, nullas esse vires proprias, excepta resistendi vi; ex hac enim, positis conditionibus quibusdam, omnes resultant. Sed non ita virium diversitatem æstimare licet, nec ita de ea loqui solemus. Quemadmodum igitur in corporibus inorganicis vires diversæ merito distinguuntur ex effectuum diversitate, ita quoque in organicis vires quædam peculiare agnoscendæ sunt.

Ad 2^m *Trans. maj. Dist. min.*: Præsens controversia est de

(1) Composita hæc, quæ licet ex iisdem constant elementis, diversas proprietates præ se ferunt, *isomerica* vocant.

origine ipsa organismi, nempe de origine prima, *neg.*; de origine per vires corporum organicorum, *conc.* Solutio tradita supponit, unum organismum necessarium esse, ut per functiones vitales organismus alter producat; adeoque supponit, primum organismum non fuisse virium vitalium effectum; id quod nemo negat (32).

Ad 3^m *Neg.* Tunc enim poterunt chimici organica corpora construere, quum typographi, effusis simul pluribus litterarum sacculis, litterisque temere commixtis, Aeneida componant. Chimici enim hoc unum possunt, ut unius substantiæ massam in alterius massæ contactum adducant, ut exinde affinitatum vi analysis aliqua aut synthesis consequatur. Idcirco mirum non est, si substantias quasdam organicas, quarum constitutio simplicior est, produxerunt. Multo erit difficilior, ac fortasse impossibile est, ut substantias producant magis complexas, ac secretiori naturæ artificio digestas (1). Organa vero et organica corpora construi posse chimicorum artificiis, hoc enimvero ridiculum dictum est, ne dicam insanum: perinde enim foret ac si diceret, ea *casu* fieri posse. Certe si homo oculos haberet satis acutos ad atomos materiæ tam ponderabilis quam imponderabilis singillatim discernendas, manusque aptas ad atomos easdem prensandas, ac disponendas juxta typum primum a Deo exstructum, tunc, credo, posset homo plantas efficere. Videant igitur qui tanta sibi pollicentur, an possibile sit, duplici hac facultate hominem aliquando potiri.

Ad 4^m *Nego omnia.* Machinæ seipsas proprie non movent, sed potius moventur vi aliqua mechanica ipsis continenter applicita. Plantæ autem intrinsecum ac naturale sui motus principium sibi insitum habent, illudque actione sua explicant per gradus atque conservant (48). Ad hæc: motus plantæ proprius est, ut diximus, nutritio et augmentum, ac præterea generatio: nulla autem est machina quæ se nutriat et augeat, quæque machinulas sibi similes generet. Hæc sufficiunt ut plantæ ab omnibus machinis immenso distent intervallo.

Ad 5^m *Nego.* Nam in flamma nullus est organismus, ac

(1) Cf. Purgotti Op. cit. Sez. III, § 2048, seq.

nulla actio quæ immanens sit. Flamma enim nihil est aliud quam volumen incandescentis materiæ, quæ perpetuo mutatur, et cum aeris oxygenio combinatur. Idcirco nihil in flamma est quod se nutriat. Nihil quoque est quod se augeat: solummodo majus minusve volumen incandescentis materiæ in flammam exsurgit, prouti magis vel minus affluit materia combustibilis. Hinc statim ac materiæ hujusmodi affluxus cessat, flamma exstinguitur; at plantæ, etiamsi nutrimento careant, aliquo saltem tempore vitam protrahunt.

CAPUT III.

* DE VITA ANIMALI.

ARTICULUS I.

De animalium a vegetabilibus essentiali discrimine.

50. Sequitur ut accedentes propius ad hujus tractationis subjectum, post vegetalem vitam, de animali disputemus. Quemadmodum porro illam in plantis consideravimus, in quibus sola est, ita hanc in brutis præsertim animalibus considerabimus, in quibus a principio intellectivæ vitæ non dependet: plura tamen, quæ de animali vita dicenda hoc loco forent, in eum locum rejiciemus, in quo disserendum erit de iis hominis facultatibus, quæ sunt ipsi cum brutis communes.

51. Animalis vita vegetativam supponit eique suberstruitur; primo quidem quia subjectum animalis vitæ nec oritur, nec animales functiones exercet, nisi dependenter a functionibus vegetativis; deinde etiam quia vegetalia ad se nutrienda et augenda elementis inorganicis utuntur; animantes vero organica solummodo elementa in suos usus adhibere possunt. Hoc jam ostendit, animantes in superiori quodam ordine præ vegetabilibus esse collocatas. Differentiæ vero unius regni ab altero aliæ externæ sunt et secundariæ, aliæ internæ et essentielles. Illæ respiciunt 1^o structuram partium et chimicam compositionem; 2^o functiones vitæ vegetativæ, quas animalia et plantæ diversimode exercent; de quibus lata physiologi. Essentiale vero discrimen situm est in functionibus animalium propriis, quas physiologi vo-

cant *relationis*; quia per has animal ad objecta quæ ipsum circumstant, intenditur. Quæ functiones ad binas facultates reducuntur, ad *facultatem* nempe *sentiendi*, et ad *loco-motivam* seu *contractilitatem*.

52. Quid sit sentiendi facultas notum cuique supponimus propria experientia; aliquid insuper de facultate hac in logica delibavimus (L. 457, seq.). Ad contractilitatem vero quod attinet, nota, tria esse in animalibus motuum genera. Primum genus est eorum motuum, qui generalibus materiæ viribus debentur, ut quum animal v. gr. ex alto decedit. Hi motus *mechanici* appellantur. Alterum complectitur eos intestinos motus, qui a viribus organicis ex necessitate procedunt, ut sunt v. gr. circulatio sanguinis, assimilationes, secretiones etc. Hi dicuntur motus *organici*, *plastici*, *automatici*. Denique ad tertium genus pertinent motus illi qui animalis appetitui subditi sunt, ab eoque determinantur. Hi dicuntur motus *animales*, *dynamici*, *autonomici*. Atque hi sunt motus qui ad specialem contractilitatis facultatem revocantur.

53. Ex binarum facultatum hujusmodi actibus animalia a plantis distinguimus, quia in plantis hujusmodi actus non apparent: esto aliquam oscillationis motum aut excitabilitatem quamdam in nonnullis plantis observari; certe enim nec ii motus spontanei sunt, aut ab appetitu dimanant, nec excitabilitas illa cum sentiendi facultate quidquam commune habet.

Fuere tamen inter antiquos philosophos qui sentiendi vim etiam plantis tribuerent, quæ opinatio valde placuit physiologis e sensistarum schola. Quidam enim, ut Robinet, Bichat, Richerand, sentiendi vim plantis aperte largiuntur: quidam vero alii, ut Tracy, in ancipiti hoc relinquunt. Quæ opinio si vera esset, nullum jam inter plantas et animantes essentielle discrimen, saltem certum, intercederet. Sed non difficulter opinio isthæ erroris convincitur.

54. Notandum autem 1º aliam quæestionem esse utrum sentiendi facultas sit solummodo animantium propria, an vero etiam eorum viventium quæ solo immobiliter defixa,

hauriunt radicibus succum quo se nutriant; aliam vero illam: utrum certa aliqua familia viventium sensu prædita sit, an secus. Hoc si dubium fuerit, dubium quoque erit, an familia illa sit inter plantas, an vero inter animantes collocanda; hujus autem dubii solutio ad rerum naturalium solertes indagatores pertinebit: at prima quæstio metaphysica est, nec ancipitem solutionem habet.

2º Sensationem non esse meram impressionem organicam, sed impressionem organicam receptam in vivente, quod et se et sua organa præsentia sibi habeat, rerumque externarum impressiones non excipiat solum sed percipiat. Hoc homines intelligunt sensationis nomine. Similiter non omnis motus, sive accessus ad alterum, sive recessus, sensitivam perceptionem aut appetitum proprie dictum supponit.

55. PROPOSITIO I. *Plantæ sentiendi facultate non gaudent.*

Probatur 1º Plantæ nullum præferunt sensationis indicium. Non solum enim nulla sunt in ipsis organa, quæ sensationibus excipiendis destinata esse videantur, sed præterea nulla functio est in iis, quæ sensationes expostulet, nullus motus qui a sensatione determinatum se prodat. Igitur sicut ex hisce indicibus inferimus sentire animantes, ita ex omnium indiciorum hujusmodi absentia inferendum est, plantas non sentire.

2º Repugnat divinæ providentiæ, aliquam enti facultatem tribui, quæ nulli fini subserviat, inutilesque cruciatus eidem enti afferat. Atqui sic se haberet in plantis sentiendi facultas.

Nam plantarum finis immediatus est, ut per vitæ vegetativæ functiones se conservent atque explicent, speciemque propagent; finis mediatum ut animalium usibus præsto sint. Atqui ad vitæ vegetativæ functiones, cujusmodi eæ a plantis exercentur, nullatenus requiruntur sensationes. Non enim plantæ alimenta sibi conquirere, neque utilia a noxiis discernere debent; quæ enim ipsis necessaria sunt, humus et aer ultro offerunt: neque aliquid appetere aut fugere, aut quocunque modo sibi consulere possunt, cum loco-motiva

facultate priventur. Multo minus necessaria ipsis est sensatio, ut animalium utilitatibus inserviant. Igitur sentiendi facultas esset plantis prorsus inutilis.

Imo molestissima foret, perpetuique supplicii causa. Cum enim aut se loco movere, aut variis sui partibus ad defensionem uti concessum ipsis non sit, mala omnia experiri deberent, quin ea ullo modo seu declinare seu repellere possent. Non est enim in earum potestate, aut aeris intemperies declinare, aut morbis remedia quærere, aut bestiarum dentes, hominumve secures effugere.

3^o Corpus organicum sensationum sedes esse nequit, nisi anima simplici, indivisibili, quæque singulis organismi partibus tota præsens sit, informetur; ut ex dicendis patebit. Itaque si ad vitam vegetalem explicandam, aliquam huiusmodi animam in plantis agnoscere cogeremur, posset quis forte contendere, huiusmodi animam sentiendi facultate carere non posse. At si nullatenus necesse est talem animam plantis inesse, quemadmodum supra demonstratum est, nulla jam superest ratio, cur sentiendi principio plantas instructas esse opinemur.

56. Animadversiones supra positæ omnes præoccupant difficultates, easque nominatim quæ e zoophytorum quorundam, aut e spongiariorum consideratione oriri possunt. Videlicet quæstio erit, utrum hæc viventia sint sensu prædita an non, utrum sint solo tactu, an præterea aliquo alio sensu instructa; utrum animalis vita sit in iis aliquando sopita aut suspensa, et de aliis similibus. Sed quomodocunque quæstiones huiusmodi resolvantur, nulla adversus metaphysicæ dogmata existet difficultas. Si enim aliquo sensu illa pollere probabuntur, inter animalia collocanda erunt; secus, inter plantas. Igitur hoc unum incertum esse poterit, ut supra diximus (54, 1^o), utrum quædam viventia ad animale regnum, an ad vegetale pertineant.

57. PROPOSITIO II. *Bruta animalia sentiendi facultate proprie dicta esse prædita, ambigendum non est.*

Quemadmodum ii, quos modo refutavimus, distinctionem inter plantas et animantia subverterunt, nimium plantis con-

cedendo, ita quidam alii animalem ipsam vitam brutis ademerunt, sentiendi facultate eisdem negata. Primus hanc opinionem evulgavit sæculo XVI hispanus quidam medicus, nomine Gomez Pereira (1), eandemque propugnarunt deinde Cartesius, Malebranchius, alique ex ea disciplina non pauci. Horum sententia bruta machinæ quædam sunt, ex earum genere quas *automata* vocamus, quia cum occultis artificibus mechanicis moveantur, se tamen ipsas movere videntur. Sic bruta omni motus intrinseco principio destituta sunt, sed omnia in ipsis fiunt, vel ex mechanicis quibusdam impulsibus, ut Pereira sensit, vel quia a Deo moventur eadem ratione qua ipsa se moverent, si sensu donata fuissent, ut opinatus est Cartesius. Contra singulares hæc opiniones probatur statuta propositio.

58. Prob. 1^o Sunt in brutis organa simillima iis; quibus homo instructus est ad sensationes excipiendas: est in iis cerebrum, est systema nerveum, saltem in perfectioribus. Ergo bruta sentiendi vi gaudent.

Consequentia probatur 1^o) analogiæ argumento: quæ enim similia sunt, similes fines habent (L. 323, 324). 2^o) ex Dei sapientia. Si enim bruta non sentiunt, miranda illa tot organorum artificia inutilia plane forent.

2^o Idipsum ostendunt brutorum voces, membrorumque in diversis adjunctis, ac totius adeo corporis tam varii motus. Ex his enim nemo est qui concludere non debeat vel invitatus, bruta differentias colorum, saporum, odorum, sonorum percipere, calida a frigidis, dura a mollibus, aspera a lævibus discernere; quædam ipsis molesta, quædam grata accidere; eaque famem, sitim, dolorem, voluptatemque experiri. Eorum enim effectuum huiusmodi tantummodo sensationes ratio esse possunt; nisi dicere velimus, Deum hæc omnia simulare ad inutilem lusum nostramque deceptionem.

3^o Animalia, ut patet, ita comparata sunt, ut alimentum non sibi ultro delatum recipiant, sed quærere debeant et seligere. Atque in hunc finem facultas se movendi ipsis collata est comparataque aptissima instrumenta, quibus escam

(1) In *Margarita antoniana*.

sibi convenientem arriperent, ac deglutioni aptam efficerent. Sed media hæc insufficientia essent, nisi animal insuper idoneum foret ad convenientia alimenta percipienda, nisi alimentorum necessitatem experiretur, et ad utilia sibi eximularetur voluptate, et a noxiis dolore retraheretur; quæ quidem omnia sentiendi facultatem important.

Itaque animalia bruta immediatum finem suum assequi non poterant, nisi sentiendi acultate donarentur. Deus autem nulli deest, in iis quæ ad finem necessaria sunt: imo si quod est medium, quo res a se conditæ finem suum per se assequi possint, quin ipse immediate eas ad finem urgeat, medium hoc semper iis confert, ut eo utantur (C. 440). Ergo.

4^o Idipsum probatur argumento validissimo, quod supeditat communis hominum sensus, isque adeo communis, ac firmis adeo defixus radicibus ut difficile valde creditu sit, adversarios ipsos de animalium sensationibus, serio, saltem constanter, dubitasse.

59. Deduces ex dictis.

1^o Esse in brutis non sensitivæ solum perceptionis, sed etiam *sensitivi appetitus* facultatem. Est autem sensitivus appetitus potentia, quæ ab objecto apprehenso movetur, secundum quod hoc animali conveniens est. Hunc autem appetitum in brutis esse patet 1^o observatione: nam passionum diversarum indicia, quæ in suis motibus et operationibus bruta præferunt, non sunt profecto nec pauciora, nec minus evidentia quam indicia sensationum. 2^o ex fine sensitivæ facultatis (§8, 3^o). Nihil enim prodesset ad finem objectorum perceptio, nisi perceptionem consequeretur motio, qua animal ad objecta sibi convenientia ferretur et a noxiis retraheretur, ac varias quas possidet vires ad necessarias operationes pro opportunitate admoveret.

2^o Deduces quoque, *contractilitatem* saltem aliquam sensitivæ facultatis sequelam necessariam in naturæ intentione fuisse. Nam sine facultate hac, sentiendi facultas animantibus ad finem satis non fuisset, imo irremediabilium dolorum perpetua causa exstitisset (§5, 2^o).

3^o Majorem proinde minoremve contractilitatis facultatem

brutis attribui debuisse, prouti magis minusve in iis sentiendi facultas vitæque necessitates paterent. Inde est, quod quibusdam animalibus loco se movere concessum est, et quibusdam quidem celerrime, quibusdam tardius, quibusdam tardissime; quibusdam vero aliis, ut mollibus acephalis, hoc solum datum est, ut in loco cui inhærent, expandere se aut constringere possint.

4^o Contractilitatem esse animalis proprietatem ab essentia dimanantem, proinde in animalis definitione ejus mentionem necessariam non esse.

ARTICULUS II.

De cæteris brutorum facultatibus.

60. Neque ad animalis vitæ finem assequendum, facultates, quas memoravimus, sufficere poterant, animalibus saltem perfectis, neque eæ satis sunt philosopho ad facta explicanda. Idcirco nemo est, qui perfectioribus brutis, præter sentiendi vim, appetitum et contractilitatem, memoriam insuper quamdam et instinctum, ut aiunt, non concedat: veteres autem aristotelici, qui de brutorum operationibus multo distinctius ac plenius disserebant, quatuor in iis facultates, præter tres illas principales, cum Averroë distinguebant, quas *sensus interiores* vocabant; nempe *sensum communem, phantasiam, æstimatoriam, memorativam*.

Utrum porro hæc sint quatuor distinctæ potentiæ, ut plerique existimabant, an vero ad pauciores reduci possint, parum hoc in præsentem refert: ad certum est, esse in brutis, vim exerendi eos actus, qui ad quatuor hasce vires, tanquam ad proxima principia distincta, a plerisque veterum referri solebant. Hoc sensu de his potentiis nunc loquimur.

61. PROPOSITIO III. *Animalis vita* internum sensum in primis, tum, si perfecta sint, eas quoque facultates requirit, quas veteres phantasiam, æstimatoriam, memorativam appellabant.

1^o *Internum sensum*. Veteres, ut dixi, sensum communem

vocabant, quem nos, eo quod denominatio hæc ad rem prorsus aliam significandam apud recentiores translata est (L. 621), sensum internum appellare malimus. De quo jam nonnulla dicta sunt in logica (L. 443; 447, 4^o); aliaque dicenda erunt, quum agemus de hominis facultatibus. Veteres cum Avicenna ita hunc sensum describebant: *virtutem cui redduntur omnia sensata*: videlicet: vim a qua omnes sensus, tanquam a radice derivantur; ad quam omnis impressio sensibilis terminatur; et in qua sensus omnes conjunguntur.

62. Bruta autem sensu hoc interno pollere, ut a cæteris modo abstinenceam, manifestum est maxime ex duobus.

1^o Quia non solum percipiunt varias qualitates sensibiles, quæ sunt propria cujusque sensus objecta, sed etiam discrimen unius ab altera, v. gr. sonum quem aures excipiunt, non esse sapidum illud quod ore gustant. Præterea norunt, objectum v. gr. talis coloris ac figuræ esse sibi sapidum, vel secus. Hæc autem percipere non possent, nisi in ipsis una eademque vis simul perciperet quæ diversi sensus singillatim attingunt.

2^o Quia non solum sentiunt varia sensuum objecta, sed etiam suos sentiendi actus. Cur enim quasdam sensationes excipere appetunt, et quasdam alias aversantur, nisi quia in illis excipiendis voluptatem, in his vero molestiam doloremve experiuntur? Videmus insuper animantes, quandoque v. gr. aures arrigere ut audiant, naresque admoveere objectis, ut odorem melius percipiant, et linguam porrigere ad aliquid gustandum. Ergo norunt, se per hæc organa sentire. Sensus autem particulares sensationes suas percipere nequeunt, non enim visio videtur, aut gustus gustatur: sensus insuper se in se reflectere non possunt, cum sint facultates organici affixæ, et ad suum proprium objectum determinatæ. Est igitur in animantibus, præter sensus externos, sensus internus toto corpore diffusus,

63. 2^o Est in brutis *phantasia*, nempe vis conservandi species tam sensibus externis, quam sensu interno receptas.

Etenim indiciiis evidentibus constat, bruta sensibilibus absentium speciebus moveri. Nam « et per loca nota sine

» errore jumenta pergunt, ita graphice S. Augustinus, et » cubilia sua bestię repetunt, et canes dominorum suorum » corpora recognoscunt, et dormientes plerumque immurmurant, et in latratum aliquando erumpunt (1). » Sensus autem externi, ac sensus ipse internus sensibilia absentia attingere nequeunt. Concludendum ergo, esse in brutis aliam quamdam vim, quæ rerum olim sensu perceptarum imagines conservet.

64. 3^o Est etiam in brutis *æstimativa*. Hæc definitur ab Algazele: *virtus apprehendens de sensato quod non est sensatum*, et ab aliis, virtus apprehensiva intentionum, quæ per sensum non accipiuntur (2).

Quod autem hanc facultatem in animantibus ponere oporteat, ita breviter s. Thomas demonstrat. « Si animal moveatur solum propter delectabile et contristabile, non esset » necessarium ponere in animali, nisi apprehensionem formarum quas percipit sensus, in quibus delectatur aut » horret. Sed necessarium est animali, ut quærat aliqua vel » fugiat, non solum quia sunt convenientia vel non convenientia ad sentiendum, sed etiam propter aliquas alias » commoditates et utilitates, sive nocumenta: sicut ovis » videns lupum venientem fugit, non propter indecentiam » coloris vel figuræ, sed quasi inimicum naturæ. Et similiter avis colligit paleam, non quia delectet sensum, sed » quia est utilis ad nidificandum (3). » Alia exempla pene infinita congeri possent: huc enim pertinent ea fere omnia, quæ in brutis miramur maxime, per quæ aliquam cum entibus intelligentibus similitudinem ipsa præferunt.

Concludit aquinas: « Necessarium est ergo animali, quod » percipiat hujusmodi intentiones, quas non percipit sensus exterior. Et hujus perceptionis oportet esse aliquod » aliud principium, cum perceptio formarum sensibilibus » sit ex immutatione sensibili, non autem perceptio intentionum prædictarum (4). »

(1) *Contra Ep. Fundam.* c. XVII.

(2) Ita Auctor opusculi. *De potentia animæ*, quod est XLIII inter opuscula S. Thomas c. IV. — (3) *Summ. th.* p. 1, q. LXXVIII, art. IV. — (4) *Ibid.*

65. Solent quidem recentiores philosophi eas operationes quas modo memoravimus, ad instinctum naturæ referre. At si rem attente scrutemur, ipse naturæ instinctus ad aliquid appetendum et operandum, sine hac æstiativa virtute explicari nequit. Natura enim non mechanico quodam impulsu pecudes urget, sed secundum earum naturam. Nempe movet eas ad operandum, movendo in iis appetitum; appetitum autem apprehensione aliqua moveat necesse est. Quæ quidem apprehensio, quoad multa, est apprehensio rei, ut delectabilis sensui vel secus; sed non semper, ut modo ex s. Thoma notatum est. Superest igitur, ut ad quædam appetendâ, et hinc ad quædam operandâ, bruta moveantur mediante aliqua alia apprehensione, quæ præsentem objecto adeo iis sit naturalis, ut naturalis est visio per oculos, et auditus per aures. Non enim possunt ad hæc apprehendenda devenire bruta nisi naturæ determinatione: ratione enim carent atque discursu. Determinatio autem naturalis ad aliquem actum nihil est aliud, quam potentia seu facultas a natura indita, ac necessario prodiens in actum. Igitur hoc ipso quod instinctu naturæ bruta moveri dicimus, dicere oportet, eam facultatem quam æstiativam appellamus, iis naturalem esse; ac naturæ instinctum in hac ipsa facultate exordiri, quum hæc præsentem objecto ad actum determinatur.

66. Dices fortasse, hæc omnia posse experientiæ ac memoriæ tribui. Sed in primis bruta ostendunt, ea quæ diximus se percipere, etiam quum nulla experientia præcessit, et statim ac prima se offert occasio. Ita v. gr. equus, quum primum audit leonis rugitum, quanquam leonem nunquam viderit, neque actu videat, tamen contremiscit totus, ac sudore manat, fugitque præceps si potest, aut saltem fugere conatur. Deinde, si memoriæ nomine intelligas perceptionem rei ut præteritæ et ante cognitæ, hæc ipsa perceptio, ut acute notat S. Thomas (1), ad æstiativam virtutem referenda

(1) Ipsa ratio præteriti, quam attendit memoria, inter hujusmodi intentiones computatur, l. c.

est; cum intentio præteriti temporis sensibus externis attingi non possit.

67. 4º Demum agnoscenda est in brutis *memorativa* vis, nempe vis conservatrix earum intentionum, quas apprehendit æstiativa.

Nam non solum bruta conservant species quas sensu externo perceperunt, sed etiam prædictas intentiones quæ sensibus non attinguntur. « Cujus signum est, inquit s. Thomas, quod principium memorandi fit in animalibus ex aliqua hujusmodi intentione, puta quod est nocivum vel » conveniens (1). »

68. Hæc satis sint ad demonstrandum quod propositum est. Notandum interim, has omnes facultates ab intelligendi vi longissime differre. Intellectus enim proprium est, ut rationes rerum universales percipiat, facultatum autem hujusmodi proprium objectum non sunt rationes universales, sed solummodo qualitates individuæ et concretæ. Quemadmodum enim visus in objecto corporeo non universales colorum rationes apprehendit, sed solum individuos colores quibus afficitur, ita v. gr. æstiativa facultas non communem rationem rei utilis aut convenientis, sed duntaxat objectum aliquod particulare, ut utile sibi aut conveniens percipit. Proinde facultates omnes hujusmodi intra sensitivum ordinem continentur.

ARTICULUS III.

Utrum anima brutorum sit intelligens.

69. Mirabiles operationes quas instinctu ductuque naturæ bruta exsequuntur, quosdam philosophos adeo perculere, ut iis tandem sibi persuaderent, etiam pecudes intellectus ac rationis participes esse. Ita opinati sunt inter antiquos Empedocles, Democritus, Anaxagoras, maxime vero Pythagoras, qui easdem esse hominum brutorumque animas docuit; deinde vero Plutarchus, Sextus Empiricus, Philo, Porphyrius, alique, quos inter Celsus « bestias hominibus » non solum sapientiores, sed etiam Deo chariores esse, »

(1) Loc. cit.

impie asserere non dubitavit (1). Inter recentiores vero ut alios omittam, ultro in hanc sententiam descenderunt, post Lockium et Condillachium, sensistæ; quod mirum esse non debet: sublato enim inter sensum et intellectum omni discrimine, necesse iis erat concludere, pecudes si sensu non carent, intellectus expertes non esse. Nihil dico de materialistis, quorum hæc potissima cura est, ut hominem ad belluarum conditionem deprimant.

70. E sensistarum schola in plurium quoque physiologorum scripta error iste dimanavit; quanquam ex his non pauci, quoad loquendi modum potius, quam quoad rem errare videantur. Quomodocunque sit, hi brutorum operationes, in quibus ordo ad finem apparet, alias *instinctivas* appellant, alias *intellectivas*, seu *rationales*; operationes quæ semper et ab omnibus eodem modo fiunt, ad primum genus referunt; quæ vero experientiam consequuntur, aut ex imitatione procedunt, ad alterum; easque in superioribus solummodo speciebus, hominisque quoad organisationem simillimis, reperiri fatentur.

Erroneas hasce opiniones, quibus essentielle inter hominem et pecudes discrimen tollitur, refutabit.

71. PROPOSITIO IV. *Bruta animantia intellectu et ratione carent.*

Prob. 1^o Sane nullus est intellectus, nulla ratio in eo subjecto, in quo nullæ sunt ideæ universales, quodque primitivis ipsis et communissimis conceptibus caret. Atqui sic se habent bruta animantia. Id quod, vel ex his duobus, est prorsus manifestum:

a) quod naturalibus tantummodo signis proprias affectiones manifestent, nunquam autem addiscant uti vocabulis aut aliis arbitrariis signis, ad res quas percipiunt aut in memoria habent, significandas; licet quædam animantes organa possideant, ad ea ipsa vocabula quæ ab hominibus adhibentur, proferenda, ut sunt v. gr. picæ ac psittaci, « cum nihilominus, ut recte animadvertit Cartesius, homines a nativitate surdi et muti, sicque non minus, sed po-

(1) Origenem *Contra Celsum*, lib. IV.

» tius magis quam bruta destituti organis quibus alii in
» loquendo utuntur, soleant propria industria quædam
» signa invenire, quibus mentem suam aperiant iis qui-
» buscum versantur, et quibus vacat ipsorum linguas ad-
» discere (1). »

b) quod neque intelligant vocabulorum, quibus homines utuntur, significationem, etsi inter homines perpetuo versentur, eosque invicem colloquentes audiant. Hoc unum ab ipsis extundere homines possunt, ut ad quædam verba vel nutus imperanti obediant; id quod nihil aliud requirit, quam quamdam phantasmatum associationem.

Hæc autem plane ostendunt, bruta animantia conceptuum universalium incapacia esse; ac nihil aliud percipere quam particularia quæ sensus afficiunt.

Quod si universale nullum percipere queunt, profecto et ad judicia proprie dicta formanda, et ad ratiocinandum sub quacunque forma sunt prorsus imparia. Ergo.

72. 2^o Si intellectu et ratione bestię fruerentur, in se suosque actus reflectere possent, ac proinde operationes suas in dies perficerent, resque plurimas quæ ipsorum usus opportunitissimæ forent, adhibere addiscerent, et instrumenta aliqua quæ uterentur, saltem aliquando excogitarent.

Atque nihil horum in iis perspicimus. Quæ primis suæ vitæ temporibus, sine ulla experientia, sine ulla disciplina statim operari aggrediuntur, hæc deinde semper, eademque cum perfectione uniformiter operantur; etiam tum quum, mutatis per accidens adjunctis, operatio est ad finem inepta: nullum sibi ex rerum natura adjumentum conquirunt, nisi eas solummodo res quas natura duce adhibere incipiunt etiam antequam earum utilitatem experientia cognoverint: nec hominum inventa in suos usus convertunt, nec artes hominum imitantur, nec instrumenta ulla ad opus adhibent; eademque, quæ primis mundi ætatibus, uniuscujusque speciei industriæ, artificia ac tota agendi ratio præsentī tempore perseverant.

(1) *Dissertatio De Methodo*, § V.

73. 3^o Bruta luculenter ostendunt, nullum se bonum percipere aut utcumque cognoscere, quod sensibile non sit. Hinc nullum in iis causarum investigandarum desiderium, nulla indagandæ veritatis cupiditas, nullus ordinis ac symmetriæ amor deprehenditur. Præterea notionibus honestatis et justitiæ, virtutis et vitii prorsus carent, moralemque imputabilitatem aut obligationem non agnoscunt. Sensibilia solummodo bona et ad animalem vitam pertinentia inquirunt, et corporeæ solum voluptatis desiderio aut doloris timore moventur.

Quis autem inducere in animum poterit, ens intelligens esse, quod bonis solummodo sensibilibus afficiatur, quodque nec veritatem, nec ordinem, nec necessarias entium relationes ullo modo intelligat?

74. 4^o Intelligentiæ comes individua est libertas arbitrii, qua sub iisdem adjunctis possit voluntas ad contradictoria aut disparata, aut etiam contraria se convertere. Atqui nulla plane libertas hujusmodi in brutis. Omnia enim cujusque speciei individua in iisdem adjunctis eadem operantur; semper enim bonum sensibile præsens, eaque ad quæ natura inclinatur, appetunt, et quantum possunt prosequuntur. Ergo non arbitrio se regunt, sed suapte natura uniformiter moventur ac determinantur.

75. 5^o Demum nullæ sunt brutorum operationes, quæ intelligentiam ac ratiocinium necessario requirant.

Non operationes specierum inferiorum, quas ipsi physiologi ad instinctum referunt (69). Et re quidem vera, 1^o si hujusmodi operationes ad intelligentiam ac ratiocinium referendæ essent, concludere oporteret, insecta multa imperfectissima intellectus perfectione hominem longe superare. Nam si brutorum industriæ atque artes ad cibos seligendos atque servandos, ad venandum ac prædandum, ad medicamina adhibenda, ad mansiones sibi ac proli ædificandas, ad prolem alendam, nutriendam, defendendam, ad cognoscenda transmigrationum tempora, ad societatem quamdam inter se ineundam, si hæc inquam omnia aliaque multa consilio ac rationi tribuenda essent, fateri jam deberemus, a) bruta

animantia cognoscere naturæ corporeæ leges, geometriam, mechanicas æquilibrii leges, virtutes herbarum, proprium organismum; prævidere futuras et sui et prolis, quam quædam animantes nunquam videbunt, necessitates; imo et ventos et tempestates prospicere, tum b) sine experientia, sine magistro, sine præviis tentaminibus aut erroribus, summa prudentia ac sagacitate, deducere ex his omnibus cognitionibus, quæ sibi agenda sint, quæ cavenda, quæ vitæ ratio instituenda, quibus operibus vacandum. Id quod proculdubio humanam omnem facultatem longe superat.

2^o Homo qui intellectu ac ratione pollet, plurima agit ex naturæ instinctu, quæ multam et finium et mediorum cognitionem supponere videntur; cum tamen nesciat prorsus humana ratio, quomodo aut cur illa agantur. V. gr. ex mero instinctu homo exercet ea quæ pertinent ad respirationem, variosque musculos, contrahit ad varias sui corporis partes movendas, et æquilibrii leges servat, similiaque multa optime facit, sola duce natura, quæ quomodo fiant vix aliquo modo, multarum scientiarum accersitis subsidiis, cognoscere paucissimi possunt. Si hæc igitur ab homine fiunt sine rationali cognitione, quanto magis existimandum erit, inferiora animantia in suis operationibus naturæ solummodo instinctum sequi?

76. Quod attinet ad superiorum specierum operationes, profecto ad eas explicandas necessario facultates omnes ordinis sensitivi, quas supra descripsimus (61, seq.), supponendæ sunt, at nihil est in iis quod nos cogat, ad intellectivam cognitionem ideæque universales brutis tribuendas. Sufficit enim ad eas explicandas, sive voluptas operationi insita, sive dolor quem operatio avertit, sive alia quævis sensatio, sive æstimativus sensus, quo aliqua ut sibi utilia percipiunt aut noxia, sive phantasia aut memoria, quæ rebus in præsentia perceptis applicat phantasmata, quæ rei ejusdem vel rerum similium, alio tempore perceptarum, speciebus associata sunt.

77. Hæc, quam memoravimus, phantasmatum associatio nominatim explicat tum eas brutorum operationes, quæ ex

casuum similium expectatione, quasi per analogiæ argumentum, procedere videntur, tum quæ ab iis peraguntur quasi ex habitu quodam, educatione ac magisterio hominum inducto. Nisi quod in primo casu associatio hæc phantasmatum naturalis est, in altero artificiosa et ab hominis industria. Tota enim bestiarum educatio huc denique redit, ut cum aliquo hominis imperio vel signo phantasma voluptatis vel doloris in bruti imaginatione jungatur, ac repetitis actibus firmiter imprimatur (O. 188, 3°).

ARTICULUS IV.

De vitæ animalis principio.

78. Principium animalis vitæ dicimus id quo corpus organicum sensum ac motum habet. Hoc et vulgus et philosophi animam appellant. Pluribus porro, quæ occurrunt, quæstionibus ad opportuniorum locum rejectis, hic statuere tantummodo volumus quæ ad animæ brutorum naturam pertinent.

PROPOSITIO. V. *Anima brutorum est simplex et indivisibilis.*

79. Est simplex, quia ex partibus essentialibus non constat: est indivisibilis, quia non est formaliter extensa, nec in partes integrantes resolvi potest; sed tota est in toto corpore, ac tota in singulis ejus partibus. Plurimi porro ex aristotelicis huic propositioni adversabantur; quorum alii probabilius existimabant, animas brutorum omnium divisibiles esse; quidam etiam opinabantur, eas ex partibus heterogeneis constare; alii vero, quanquam animas imperfectorum animantium divisibiles esse censerent, animas tamen animantium perfectorum indivisibiles esse docebant. Inter hos est angelicus doctor ac s. Bonaventura. Sed post exagitationem cum materialistis controversias, vix ulla jam hac de re dubitatio superesse potest. Itaque animantium quorumcunque animas, etiam imperfectorum, videlicet omnem prorsus animam sensitivam, simplicem et indivisibilem esse cum communi sententia contendimus.

80. Assumptis quæ paulo ante dicta sunt de vi sentiendi

(57, seq.), de vi appetendi (59), de interno sensu (61, 62), argumenta ad propositionem statutam demonstrandam nullo negotio construes, juxta ea quæ mox subjiciemus, ad animæ humanæ simplicitatem probandam.

81. Binæ sunt hujus loci speciales difficultates.

1. Quum aliqua pars ab animali abscinditur, hæc aliquanto tempore se movet. Imo quædam animalia, exsecto capite, toto adhuc corpore se movent, ut v. gr. muscæ, quæ capite mulctatæ volant. Quin etiam reptiles in binas partes divisæ, secundum utramque partem vivere pergunt. Ergo in his anima dividitur.

2. Annulata quædam, ut lumbrici terrestres, si in plures partes dividantur, unaquæque pars novum ejusdem speciei individuum constituit. Fluvialilibus vero polypis, quos hydras vocant, utcunque dissectis, tot animalia fiunt quot partes.

82. Ad 1^m respondebis *negando*, partes decisas vivere, quamvis se moveant. Ille enim motus est continuatio motus vitalis, quem animal dolore exstimulatum, in ea parte quæ abscindebatur, excitavit, vel etiam motus quem muscoli, adhuc vi motrice referti, vi externi irritamenti, puta aeris, concipiunt. Illa autem pars solummodo post divisionem vivere pergit, in qua sunt organa vitæ essentialia. Notandum quoque, animalium quæ frigidi sanguinis dicuntur, organicum contractilitatis passivam potentiam, etiam post mortem, longiori tempore retinere; ita ut stimulis vi externa musculis, membra eorum omnia agitari conspiciantur. Muscæ vero amputato capite volant, quia adhuc earum corpus non est anima viduatum. Negabis igitur, ex his quæ opponuntur, concludi posse animarum divisionem.

83. Ad 2^m respondendum est, non dividi animas, sed animalia multiplicari corporis divisione. In annulatis enim organa omnia ad vitam necessaria extenduntur uniformiter ab una extremitate ad alteram, ita ut unumquodque transversale segmentum organa omnia essentialia contineat, et a toto vix differat, præterquam longitudine. Quum ergo unum segmentum a reliquo dividitur corpore, ab animæ prioris

dominio subtrahitur, novaque informatur anima, quo fit ut novum sola divisione animal generetur. Quare hujusmodi animalia *fissipara* vocantur, quia hac sui divisione novos quodammodo foetus parere possunt, quemadmodum arbores per tales propagantur.

Idipsum probabilius, ut cæteras hypotheses omittam, dicendum de hydris: nisi quod hæ multiplicantur divisione utcunque peracta, quia massa quadam uniformis ubique naturæ constant, in qua unaquæque pars easdem functiones exsequitur; ac propterea nulla earum ad totius vitam necessaria est, unaquæque autem in se continet quiddam ad vitam, quantum est ex corpore, requiritur. Quare mirandum non est, si quacunque parte abscissa, novum in ea procreetur animal; eoque minus hoc mirandum est, quod naturalis horum animalium propagatio fit per erumpentes gemmas, quæ in quosdam quasi ramulos crescunt, ac sponte dein ab animali genitore separantur. Quare animalia hæc *gemma* appellatur.

84. COROLLARIA. 1. *Anima brutorum non educitur ex potentia materiæ*; quæ Aristotelis opinio fuit. Nam qui hanc opinionem sequi vellet, is, ut de plantis agentes diximus (33), totum de corporum principiis peripateticum systema amplecti deberet, cum omnibus consecrariis, quæ in citato loco notavimus.

Si vero, ut indubitatum est, materia animati corporis sunt tandem aliquando eadem atomi, quibus cætera corpora constant, plane repugnat, ex materia hujusmodi educi posse brutorum animam. Hæc enim anima est simplex et indivisibilis. Repugnat autem, e subjecto multiplici educi, eique inhærere aliquid simplex, inextensum, indivisibile (C.132, b). Hæc autem deductio valet, ut manifestum est, etiamsi quis elementa corporum ultima esse puncta simplicia opinaretur.

2. *Anima brutorum est substantia*. Nam neque corpus est; nec corporis qualitas, aut affectio, aut temperamentum. Hæc enim omnia divisibilia sunt, et cum corpore dividuntur.

3. *Eadem non potest oriri nisi per creationem*. Patet ex dictis in ontologia (O. 372). Non itaque activitati generantis originem debet.

4. *Est dependens a corpore quoad omnes suas operationes*. Omnes enim bruti facultates intra sensitivum ordinem continentur (68). Actus autem facultatum sensitivarum sine corpore exerceri nequeunt: eorum enim subjectum neque anima est, neque corpus, sed compositum ex utroque (L.458). Igitur nullum actum anima sensitiva exercere potest independentem a corpore.

5. *Non tamen ex se a corpore dependet quoad ipsum esse*. Nam neque accidens corporis est, neque forma materialis dici potest (1°): est autem substantia. Ergo per se est.

6. Hinc intelliges quo pacto dici possit *subsistens*, quo pacto non possit. Subsistens *latius* acceptum excludit inhærentiam in altero, ut in subjecto; ac proinde opponitur accidenti et formæ materiali percipateticorum; et hoc pacto acceptum, idem est ac substantia. *Pressius* vero, subsistens excludit imperfectionem partis; ac dicitur de iis omnibus quæ non sunt in alio ut in toto: quare hoc sensu idem est ac suppositum (O. 168, 2°; 166). *Anima igitur sensitiva est subsistens primo modo, non autem altero*.

7. Postremo *anima brutorum a corpore soluta, et vivere et esse desinit*; non quidem corruptione sui, sed annihilatione naturæ ejus debita, ut communi sententia receptum est.

Primo quidem, quia bruti anima corpore exuta, non est amplius vitæ capax. Ejus enim vita sensitivæ facultatis operationibus tota continetur; ac proinde a corpore tota dependet. Cum igitur vivere extra corpus non possit, nulla est amplius ratio, cur inutilis illa quæ superest, existentia conservetur.

Deinde quia belluinæ animæ finis informatio tantummodo est corporis, non vero perfecta felicitas in creatoris sui cognitione et amore constituta, ad quam quidem assequendam immortalitas necessaria est.

Demum quia anima ejusmodi nec meriti nec demeriti capax est, ex quo nulla ipsi præmia, poenæ nullæ debentur.

LIBER SECUNDUS.

CAPUT I.

DE ANIMÆ HUMANÆ NATURA.

ARTICULUS I.

Prævia quædam.

85. Homo in quo quæcunque in hac rerum universitate mirabilia sunt, compendio quodam collecta emicant, non vegetali solum ac sensitiva, sed etiam intellectuali vita vivit. Quæ tres vitæ sic se mutuo excipiunt in illo, ac tam harmonice consertæ sunt, ut unaquæque a reliquis duabus, plus minusve, licet diversimode, quoad proprios actus dependeat. Sed miranda hæc connexio, quemadmodum hominis augeat dignitatem ac pulchritudinem, ita quæstionem de humanæ vitæ principio non parum impeditam facit. De quo hæc ex ordine quærenda occurrunt. Primo an sit aliquid a corpore distinctum: secundo sitne unum an vero multiplex; tertio quomodo cum corpore uniatur: quarto quænam sit ejus origo: demum quænam ejus duratio. Ad primam quæstionem veniamus.

86. Infinita res esset, si omnes tam veterum græcorum, quam recentiorum materialistarum de animi humani natura erroneas opiniones recensere vellemus. Omnes tamen hac in re aberrationes huc redeunt: animam esse ipsum hominis corpus, vel ejus partem, vel qualitatem aut temperamentum, vel subtiliorem aliquam purioremque materiam; animi vero operationes esse motus, vel conatus ad motum.

Omnia igitur materialistarum systemata refellemus, si ostenderimus, animam humanam nec corpus esse, nec esse dependenter a corpore. Ostendemus porro eam non esse corpus, eo quod est simplex; non esse dependenter a corpore, eo quod est spiritualis.

87. Ut autem de nominibus quæstio non fiat, hæc prænotamus. 1^o animæ humanæ nomine intelligimus principium

illud, per quod homo sensitivus est, cogitat ac vult: in qua definitione nemo profecto dissentire potest.

2^o Animam *simplicem* dicimus, et quoad *quantitatem*, et quoad *essentiam*. Quoad quantitatem, quia nec constat ex partibus integrantibus, nec in partes integrantes resolvi potest. Quoad essentiam vero, quia non constat ex pluribus constitutivis, nec in eas potest resolvi.

3^o Adverte porro, animam esse quidem simplicem secundum quantitatem, sed *non in genere quantitatis*. Simplex enim secundum quantitatem dupliciter dicitur, nempe vel *intra genus continui*, vel *extra totum continui genus*. Quod simplex est secundum quantitatem intra continui genus, in ipso continuo situm determinatum habet, ut limes seu longitudinis seu temporis, ac mente solummodo a continuo abstrahitur, nec potest per se in rerum natura consistere. Et etiamsi quis punctum per se existens conciperet, hoc punctum anima esse nequit. Anima enim, ut alia omittam, certe non punctum humani corporis occupat, sed totum corpus, aut certe aliquam ejus partem divisibilem: præterea corpora sentit ac percipit. Punctum autem non potest occupare nisi punctum, nec sentire nisi punctum, si tamen vel punctum sentire queat.

Id vero quod est simplex extra continui genus, extensione quidem formali caret, et nihilominus, quoniam in extensione situm sibi essentialem non habet, extensum corpus occupare potest, illudque intime penetrare ac pervadere, eoque mediante ab aliis corporibus affici, eaque percipere, si cæteroqui hac vi sit instructum.

4^o Demum substantiam *spiritualem* vocamus substantiam simplicem, quæ in suis operationibus, saltem quibusdam, ab organorum materialium concursu est independens; adeoque non indiget corpore, ut sit et agat.

ARTICULUS II.

De animæ simplicitate.

88. PROPOSITIO I. *Anima humana est simplex tum quoad quantitatem, tum quoad essentiam.*

Probatur 1^a pars. *Est simplex quoad quantitatem.*

1^o Quod extensum est, per se non potest extensum, ac proinde corpora, percipere.

Si enim subjectum extensum posset per se, triangulum v. gr. percipere, profecto sensilis repræsentatio trianguli ita in eo fieret, ut singulæ trianguli partes in distinctis extensi percipientis partibus repræsentarentur, quemadmodum fit in speculo. Igitur unaquæque extensi percipientis pars unum trianguli latus ad summum perciperet; nulla vero pars omnia latera simul, totumque triangulum. Singulæ enim partes percipere quidem poterunt id quod ipsas afficit: at ea quæ cæteras partes afficiunt, percipere certe non poterunt. Ergo nihil est in extenso quod triangulum percipere queat.

Diximus, quamlibet extensi partem unum trianguli latus ad summum percipere posse: sed neque hoc concedere licet, spectata illa parte per se. Si enim et ipsa extensa est, perciperet per partes; unaquæque igitur pars aliquam lineæ portionem, nulla vero lineam totam perciperet.

Est igitur manifestum, id omne quod extensum est, extensionem percipere non posse per se. Ex quo sic arguere licet: Homo extensionem percipit, quum corporea organa a corporibus circumstantibus afficiuntur. Sed corporea organa, ut quæ extensa sunt, inepta per se sunt extensioni percipiendæ. Ergo præter corpus et organa corporea, est in homine principium aliud inextensum ac plane simplex, quo homo ipse fit extensioni percipiendæ idoneus. Principium autem per quod homo sentit, vocamus animam. Ergo anima hominis est simplex.

89. 2^o Unusquisque sibi conscius est, se plures ac diversas eodem tempore sensationes experiri, easque inter se comparare. Sed et ad hæc subjectum quod extensum sit, est per se prorsus ineptum.

Etenim diversæ istæ sensationes vel manent in diversis partibus vel ad unam confluent.

Si sunt in diversis partibus, nulla pars omnium simul

conscia esset; nulla posset inter diversas sensationes comparisonem instituere.

Si in una parte, quæro ulterius, utrum hæc pars sit simplex, an vero extensa. Si simplex, jam non est extensum quod plures sensationes habet, easque comparat: habemus animam simplicem. Si composita, redibit argumentum.

90. 3^o Anima humana se in se reflectit, omnesque suas affectiones relegit et expendit, ita ut vere in se totam redeat tota.

Atqui ens extensum hujusmodi reflexionis capax non est. Reflexio enim extensi in seipsum hoc solum modo fieri potest, ut una pars ejus super aliam inclinetur partem, non vero ut una pars in seipsam aut totum in totum redeat; quod est impossibile. Ergo.

91. Prob. 2^a pars. *Anima est simplex quoad essentiam.* Facile autem notabis, argumenta quæ subjicimus, primam quoque partem demonstrare.

1^o Anima habet ideas quæ etiamsi pluribus notis constent, sunt tamen in indivisibili positæ (O. 48), ita ut qui simul non teneat notas omnes, quæ ideam A constituunt, aliām quidem ideam habere possit, non tamen ideam A.

Dico igitur: ideæ quas animus habet, haberi nequeunt a subjecto composito. Ergo animus simplex est quoad essentiam.

92. Prob. ant. Si idea v. gr. justitiæ est in subjecto composito, vel est per omnes ejus partes divisa, vel in una tantum parte residet, vel tota est in singulis partibus.

Si primum dicas, unaquæque pars percipiet, si placet, elementum justitiæ, aut melius dimidiam, decimam, centesimam hujus ideæ integrantem partem; quod quidem plane absurdum est: sed nulla pars compositi hujus percipientis, neque etiam partium collectio ideam habebit justitiæ. Præterea ideæ illæ simplicissimæ, v. gr. entis, veritatis, aliæque hujusmodi, in quibus compositio nulla est, quomodo possunt concipi divisæ in partes?

Si alterum, in primis hæc una pars esset animus, non totum compositum: deinde hæc pars quæ justitiæ ideam ha-

bere ponitur, vel est simplex, vel composita. Si simplex, ergo fatentur, simplex esse quod cogitat; si composita, redibit argumentum, donec pervenias ad simplex.

Si tertium, a) admittis tot cogitantes, quot partes sunt in composito; quod quidem est gratuitum, inutile et absurdum; b) redit interrogatio: singulæ istæ partes suntne simplices, an vero compositæ? Et sic redit argumentum.

93. 2° Animus plures inter se ideas comparat, earumque relationes deprehendit; ideasque in iudicio componit affirmando ac negando separat. Hæc omnia subjectum prorsus incompositum necessario requirunt. Primo quidem ut instituaturs comparatio, quemadmodum dictum est in prima parte (90); deinde vero, quia actus simplicissimus affirmandi vel negandi concipi prorsus nequit divisus in partes; ac proinde non potest nisi in subjecto simplici (91) existere.

94. 3° Volitio est tendentia quædam in objectum cognitum. Nullus ergo potest exeri voluntatis actus, nisi cognitio aliqua voluntati præluceat, objectumque proponat.

Pone nunc in subjecto non simplici volitionem. Erit in illo etiam cognitio. Dic quæso, utrum cognitio et volitio pertineant ad diversas partes, an vero utraque in una eademque parte resideat.

Si primum dicitur, absurdum dicitur, et quia est contra intimum sensum, et quia impossibilis volitio est, nisi in eo qui vult, sit cognitio.

Si alterum, non te extricabis, nisi subjectum in quo est et cognitio et volitio, dicas esse simplex.

95. 4° Postremo animus libertate gaudet indifferentiæ. Itaque si ex partibus coalescit, vel omnes ac singulæ partes seorsum sunt liberæ, vel solum earum collectio, vel una tantum.

Si primum, jam in una anima sunt plura subjecta quæ volunt. Præterea quoniam singulæ partes sunt suorum actuum dominæ, poterit altera pars velle, altera nolle objectum idem. Hæc quis credat?

Si secundum, quomodo potest exurgere aggregatum libertate gaudens, cum nulla pars seorsum accepta libera sit?

Si tertium, nisi dicas illam unam partem simplicem, redibit argumentum semper.

96. Patet itaque 1° animam humanam neque esse corpus humanum, neque ejus partem, neque ullum plane corpus. Omne enim corpus compositum est, extensum, divisibile: anima autem simplex.

Patet 2° animam non esse qualitatem, affectionem, temperamentum qualitatum corporis. Hæc enim omnia composita sunt, extensa et divisibilia, quemadmodum est corpus.

Patet igitur 3° animam esse substantiam a corpore distinctam.

ARTICULUS III.

*De animæ spiritualitate.*97. PROPOSITIO II. *Anima humana est ens spirituale.*

Demonstratur. Principium simplex quod in quibusdam suis operationibus a materiali organo sit independens, est ens spirituale (87, 4°). Atqui anima humana est hujusmodi, tum in intellectus, tum in voluntatis operationibus. Nam

98. 1° Potentia quæ sit materiali organo defixa et per illud agat, valde læditur a proprio objecto, et ad sua munia fit inepta, si quando hoc vehementissime ipsam afficiat. Sic læditur videndi facultas luce vehementi, et auris magno strepitu obsurdescit, et phantasia patitur, si qua imago prætermodum ipsam commoveat. Ratio est, quia in hac prævalida objecti actione corporale organum stimulos experitur excessivos et violentos, unde et ipsum vitiatur, et fit animæ instrumentum ineptum.

Ast in intelligendi facultate longe aliter se res habet. Tunc enim maxime recreatur ac roboratur intellectus, quum objecti sui actionem maxime persentit; ita ut nulla re magis delectetur ac proficiat, fiatque aptior ad cætera cognoscenda, quam quum altissimas veritates perfecte cognoscit, earumque evidentiam intente contemplatur.

Ergo intellectus non est potentia organo materiali defixa.

99. 2° Si quæ sunt operationes ab organo materiali independentes, sane illæ sunt quæ non solum hujusmodi adju-

mento non egent, sed etiam per illud exerceri nullo pacto possunt. Jamvero operationes intellectus per organum materiale exerceri non posse, certissimum est.

Etenim a) ea cognoscit intellectus, quibus organum materiale nullatenus affici potest. Hujusmodi sunt possibilitas, impossibilitas, necessitas, contingentia, negationes et privationes, simplicitas, æternitas, honestas, turpitudine, jus, officium et alia hujusmodi mere idealia objecta. Ad hæc, despiritu, de Deo cogitat, et simplicissimas animi affectiones per conscientiam relegit. Hæc omnia, cum materialia objecta non sint, sed materia multo sublimiora, corporali instrumento attingi non possunt; corpus enim non potest nisi corpus tangere; ex quo sequitur potentiam, quæ his afficitur, quæ hæc concipit, materialis organi adjumenta prorsus respuere.

b) Intellectus insuper ipsas res sensibiles modo multo nobiliori cognoscit, quam per impressiones organicas percipi queant. Dum enim sensus individuorum præsentia afficitur, mens universales in illis rationes contemplatur, cujusmodi sunt ratio entis, unius, veri, boni, rationesque omnes genericæ ac specificæ, quas abstrahit a concretis, et separatim concipit, et inter se conjungit, aliisque applicat objectis. Relationes præterea multiplices inter experientia objecta cognoscit, similitudinis, æqualitatis, causalitatis et dependentiæ, medii et finis, successionis, ordinemque rerum et pulchritudinem.

c) Cogitat insuper et cognoscit multa, quæ quanquam sensibilia sint, sensus tamen nunquam affecerunt. Sic uno quovis individuo objecto percepto, cognoscit infinita alia huic similia posse existere; et cognita causa ejusque natura, effectus futuros, aut loco dissitos, vel certo prænuntiat vel probabiliter divinator, et vicissim cognito effectui, causæ existentiam ac naturam ratiocinando deducit. Atqui materiale organum iis solum affici potest, quæ præsentem in illud actionem exercent, aut olim exercuerunt. Ergo.

d) Denique de rebus sensibilibus quandoque mens decernit contra id quod sensibus percipitur; dumque v. gr. oculi vident remum sub aqua contractum, aut solem bipedalis ma-

gnitudinis, mens illusionem corrigit, et remum judicat integrum, solemque tellure multo majorem. At facultas quæ hoc pacto judicat, organica esse nequit. Omnis enim organica facultas ab impressionibus in organo receptis ad actum determinatur.

100. 3^o Si voluntatem hominis consideres,

a) ejus appetitio non est ad bonum quod organa sensitiva afficit, quod est bonum animalis vitæ, limitata; sed immensitatem quamdam habet capacitatis ac desiderii. Etenim quemadmodum intellectus bonum in genere apprehendit, ita hæc ad omne bonum fertur

b) et ad illud in primis quod omnem corporum ac materiæ conditionem excedit. Quare maxime delectatur veritate, scientia, virtute, honore, ordine, pulchro, sublimi et similibus; præ quibus interdum bona omnia sensibilia et corporea contemnit. His autem objectis omnibus moveri non potest organica potentia, quia ab his organa affici nequeunt.

c) Postremo hominis voluntas est libera, nimirum quantum ad agendum excitetur ab objecto, tamen per arbitrii indifferentiam, ad agendum vel non agendum se ipsa determinat. Sed facultas quæ sit organis alligata, semper ad objecti præsentiam determinatur ad actum, nec indifferens esse ad agendum, nec se ipsa determinare potest.

101. COROLLARIA. 1^m Ex his omnibus iterum deduces, *animam humanam esse substantiam*. Nam 1^o per se multa agit et independentem a corpore. Ergo per se est et independentem a corpore. Præterea 2^o est subjectum unum et constans plurimarum affectionum. Tale autem subjectum est substantia.

2^m *Ne divina quidem virtute fieri potest ut materialis substantia intelligendi ornatur facultate*. Nam quanquam anima materiam informans, in ea et per eam sentire queat, tamen materia per se neque sensitivæ perceptionis capax est, ut vidimus (88, 89). Multo magis ergo repugnat, intelligentiæ operationes ab ipsa exerceri; cum ad has operationes exercendas ne instrumenti quidem munus sortiri possit, ut modo demonstratum est. Lockius ergo, qui de hoc dubitat, vehementer errat.

ARTICULUS IV.

Difficultates.

102. Obj. I. Affirmari nequit cogitandi facultatem non posse existere in materia. Etenim :

1^o Ideæ tum materiæ, tum cogitationis plane inadæquatas habemus.

2^o Materia organica mirabiles acquirit proprietates. Ergo si exquisitori quadam organisatione conformaretur, fortasse etiam cogitare posset.

3^o Eoque magis quod insunt materiæ proprietatis quædam simplices, ut sunt velocitas, vis motrix, attractio, vegetatio, vires multiplices. Ergo.

Resp. *Nego ant.*

103. Ad 1^m *Dist.* : ita tamen ut cognoscamus ejusmodi proprietates, tum materiæ, tum cogitationis, quæ simul consistere non possunt, *conc.*; secus, *neg.* Materia enim est essentialiter composita et extensa, et non potest agere nisi in materiam. Cogitandi autem facultas requirit subjectum incompositum et inextensum, et objecta prorsus immaterialia attingit. Etsi igitur intimam materiæ naturam ignoremus, novimus tamen materiam extensionis subjectum esse, atqui adeo cogitandi facultate pollere non posse: nisi dicere velis, idem subjectum proprietatibus contradictoriis et contrariis constare posse.

Ad 2^m *Conc. ant.*; *neg. consequentiam.* Organisatio enim, utcunque perfecta, materiæ essentiam non mutat.

Ad 3^m *Dist.*: Ideæ abstractæ harum proprietatum exhibent aliquid simplex, *conc.*; ipsæ proprietates, ut sunt in materia, simplices sunt, *neg.* Insuper *neg. consequentiam.*

104. Proprietates istæ relationem continent, quæ est aliquid indivisibile, prouti ab intellectu concipitur. At relationum istarum fundamentum, seu proprietates ipsæ in se, non sunt aliquid a materia distinctum, adeoque sunt aliquid compositum et divisibile.

Revera velocitas est relatio spatii ad tempus: reipsa autem est corpus in motu.

Vis motrix est productum ex velocitate in massam corporis; ac proinde, ut ipsa massa, divisibilis est.

Attractio, quidquid sit in se, est et ipsa relatio quædam, quæ certe a corporis massa et distantia pendet.

Vegetatio a multarum partium structura, dispositione, conjunctione pendet, et motu peragitur.

Vires denique omnes quibus materia pollet, essentialiter sunt extensæ, compositæ ex pluribus, et cum inertia sociantur; non enim possunt semetipsas ad actum per se determinare.

Postremo vires omnes actusque materiæ versari non possunt, nisi circa materiam, objecta vero immaterialia attingere nequeunt. Etiam si igitur daremus eas esse simplices, semper tamen negandum foret, materiam intelligere posse.

105. Inst. 1^o. Cartesiani docuerunt bruta esse machinas mere corporeas. Atqui bruta sensationes experiuntur.

Resp. *Dist. maj.*: Et simul docuerunt bruta nullas experiri sensationes, *conc.*; secus *neg.* Quod si qui aliter docuerunt, pessime docuerunt.

Dist. min.: Si sunt machinæ, *neg.*; si animam habent simplicem et inextensam, *conc.* (88, 89).

106. Inst. 2^o Saltem nihil vetat, quin existimemus, ultima materiæ elementa vi cogitandi donari posse.

Resp. *Nego.* Etenim, si elementa materiæ ultima ponantur extensa, ea posse cogitare ex dictis est manifeste impossibile. Si vero ponantur esse puncta simplicia,

1^o Difficultas non est ad rem: etenim elementum materiæ simplex non est materia, nec corpus, nec res extensa.

2^o Negari posset hæc suppositio ex dictis alibi (C. 49, seq.); sed non est modo ineunda hujusmodi quæstio.

3^o Etiam data hypothesi, negandum est, hoc elementum posse esse sentiendi principium, ut supra dictum est (87, 3^o).

4^o Quomodo vero veritas, virtus, universalis puncto attingi poterunt? Multo magis ergo repugnat, punctum intelligere.

Igitur ultima materiæ elementa, etiam si simplicia ponantur, cogitandi vi donari non possunt.

107. Obj. II. Cogitatio non pugnat cum extensione et compositione.

Etenim, 1^o diversæ partes compositi, incompleta vi cogitandi præditæ, ita conspirare inter se possunt, ut una exinde cogitatio nascatur; quemadmodum ex. gr. in horologio singulæ partes horas non designant, sed ex omnium conspiratione horæ designantur.

2^o Cogitatio omnis explicari potest per motum partium subtilissimarum.

108. Resp. *Nego ant.*

Ad 1^m *Neg.* In primis vis cogitandi incompleta absurde supponitur. Vis enim cogitandi est vis sibi repræsentandi objecta, ac potissimum objecta simplicissima quæ organo corporeo attingi nequeunt (99). Vel ergo habetur ex toto, vel nullatenus habetur. Præterea, data etiam hac suppositione, nunquam posset ex hisce incompletis cogitationibus cogitatio completa exurgere. Cogitatio enim non est actio transiens ad terminum externum, sed actio immanens (O. 259), cujus terminus est essentialiter intra ipsum agens: subjectum enim cogitans sibi ipsi objectum repræsentat non alteri. Jam vires illæ, quarum actio transiens est et in termino externo completur, possunt utique ita disponi, ut omnium virium, vel immediate vel mediate, unus idemque sit terminus, utque omnes simul id efficiant, quod seorsum singulæ efficere non valent. At vires quæ terminum externum non habent, sed solum internum, non possunt simul ita confluere, ut ex virium conjunctione una activitas conflatur. V. dicta (91, seq.).

Ex his patet, nullam esse adductam paritatem.

109. Ad 2^m *Neg.* Assertionis falsitas pluribus argumentis evidenter ostenditur: unum hoc nobis sufficiet.

Si omnis cogitatio motu constat, quum plures habeo perceptiones, plures in partibus illis tenuissimis excitari motus, dicere oportebit. Peto jam, an motus isti sint in diversis partibus, an vero in una tantum.

Si sunt in diversis, nulla pars omnium simul perceptionum sedes esset, nulla esset omnium conscia.

Si sunt in una tantum, jam una eademque pars pluribus motibus, distinctis inter se atque diversis gaudere posset. Sed duo hæc supra modum absona sunt:

1^m quia motuum materialium lex est, ut quum duo motus idem punctum materiale urgent, confundantur in unum motum compositum, qui a componentibus est plane diversus;

2^m quia diversitas motuum a diversa celeritate vel directione puncti materialis exoritur. Sed plane absurdum est, unum idemque punctum moveri simul in plures directiones; absurdum pariter, moveri simul diversis celeritatibus, quia excessum majoris spatii supra minus percurreret simul et non percurreret.

Nec juvat si dicas, motus sibi succedere rapidissimos. Si enim singuli sunt in diversis partibus, nihil proficit hypothesis. Si vero in eadem, aut secundus motus fit durante adhuc primo, aut non. Si primum, redit argumentum; si alterum, non satisfit experientiæ.

110. Obj. III. Anima vel est ipsum corpus humanum, vel certe substantia corporea. Nam:

1^o Ut multi docent, recipitur in corpore, et per totum corpus diffunditur.

2^o Quod non est extensum, non potest affici a corporibus. Anima autem afficitur a corporibus.

3^o Quod non est extensum non potest percipere corpora.

111. R. *Nego ant.*

Ad 1^m *Dist.* 1^m *partem*: recipitur in corpore, ut corpus recipitur in alio corpore, aut accidens corporeum in suo subiecto, *neg.*; ut substantia simplex et vitæ principium, *conc.*

Dist. 2^m *partem*: diffunditur per totum corpus, i. e. circumscriptive in illo distenditur *neg.*; definitive existit in illo et agit in illo, *conc.*

Ad 2^m *Dist. maj.*: Quod non est extensum i. e. quod est punctum geometricum, non potest affici a corporibus, *conc.*; quod est substantia simplex et quantitatem corpoream excedens, *subd.*: si vis hæc non sit corpori conjuncta, *omitto*; si sit corpori conjuncta, *neg.*

Ad 3^m *Dist. maj.*: Quod est punctum geometricum non potest corpora percipere, *conc.*; quod est substantia simplex, *subd.*: non potest corpora percipere secundum rationes intelligibiles, *neg.*; per impressiones organicas, *subd.*: si non sit organis conjuncta, *conc.*; si sit conjuncta, *neg.* Tantum porro abest ut anima dici debeat extensa, quia percipit in organis extensum, ut imo ex hoc ipso probetur esse simplex, ut vidimus (88, 89).

Hæc omnia, quanquam prolixiore tractatione digna, sufficit tamen innuere, ut difficultates oppositæ concidant.

112. Inst. Anima subest iisdem omnino vicissitudinibus ac corpus. Etenim:

1^o Crescit et senescit, crescente ac senescente corpore.

2^o Si organicae functiones perturbentur, perturbantur quoque intelligentiæ operationes.

3^o Facultatum mentalium evolutio pendet a conditionibus corporis, et a causis externis quæ in corpus agunt.

4^o Denique animus semper movetur cum corpore.

113. R. sp. *Dist. ant.*: Non tamen semper, nec eodem modo, *conc.*; semper et eodem modo, *nego.*

Dico primo generatim: *non semper* animum iisdem omnino vicissitudinibus subesse, quibus corpus subest. Nam:

1^o Sæpe corpore crescente, animi facultates non perficiuntur.

2^o In juventute, quum corpus est maxime robustum, vis mentis et iudicii maturitas minor est quam in senectute, quum corpus fit debile et languescit.

3^o Quæ corporis evolutioni atque incremento prosunt, sæpe animo nocent: itemque quæ mentum faciunt validiorem, sæpe corpus debilitant.

4^o Sæpe animus adversatur quæ organis corporeis grata accidunt.

5^o Corpore coæcto ad aliquid agendum, animus ad volendum non cogitur.

6^o Abscisso v. gr. brachio, animæ pars non abscinditur, etc.

114. Dico secundo: *non eodem modo*, ut ex dicendis patebit.

Ad 1^m *Dist.*: Anima crescit et senescit eodem modo ac corpus, *nego*; diverso, *subd.*: quia est identica cum corpore, *neg.*; ratione unitiōis cum corpore, et dependentiæ ab illo, *conc.*

Crescit corpus quoad ipsam substantiam, novarum partium susceptione: crescit animus solum quoad habitus, experientia videlicet, scientia, arte, virtute et aliis. Ad hæc autem recipienda incrementa, diuturnum actuum exercitium, ac præterea organorum materialium usus multiplex, nec non perfectio quædam requiritur. Hinc patet, cur animus ætate perficiatur, quemadmodum ætate perficitur corpus, sed diversa ratione.

Patet etiam, cur in senibus senescere dicatur senescente corpore. Senescit enim animus in eo quod, senescente corpore, decrescit phantasiæ ac sensitivæ facultatis vigor. Cum enim hæ facultates per organa exerceantur, debilitatis organis, et ipsæ languescant oportet.

Ad 2^m *Dist.*: perturbantur ratione sui, *neg.*; per accidens, *conc.*

Intelligentiæ operationes per corporea organa non exercentur. Quare vitialis organis, non idcirco per se intelligentiæ operationes perturbari oporteret. Sed vitialis organis, perturbatur exercitium facultatum earum quæ ab organis dependent, quæ sunt sensus et phantasia. Quoniam vero harum facultatum usus ad intellectus operationes, tanquam conditio, requiritur, hinc fit, ut organorum perturbatio intelligentiæ quoque exercitium perturbet.

Ad 3^m *Dist.*: mediate, *conc.*; immediate, *nego.* Videlicet ab organorum statu dependet facultatum organicarum exercitium, et ab hoc exercitio, tanquam a conditione quadam, facultatum mentalium applicatio.

Ad 4^m *Conc.* Nam anima et corpus unam compositam substantiam efficiunt. Cæterum spiritus quoque separatus moveri potest, sed diversa ratione ac corpus; prouti diversa ratione spiritus separatus et corpus in loco sunt.

CAPUT II.

DE ANIMÆ HUMANÆ UNITATE.

ARTICULUS I.

Utrum sit eadem anima sensitiva et rationalis.

115. Quærendum nunc venit de animæ humanæ unitate. Existimavit Plato, tres in homine animas esse, non modo distinctas inter se, sed etiam loco divisas, videlicet concupiscibilem, eandemque nutritivam in hepate, irascibilem in corde, et cognoscitivam in cerebro. Hæc fuit Galeni quoque, aliorumque veterum medicorum sententia. Quos sequens Averroës opinatus est, tres animas, vegetativam, sensitivam, intellectivam in homine esse, at non loco sejunctas, sed simul commixtas. Appollinaristæ et manichei duas animas homini tribuerunt: apollinaristæ sensitivam et rationalem; manichei bonam et malam.

Ut nihil dicam de *archo* Paracelsi (18), inter recentiores Barthez, vitalismi auctor, docuit, in homine duo distincta vigere principia, animam, ac vim vitalem, conspirantia inter se, sed non confusa. Ac ne nimius sim in omnibus recensendis, Dr. Günther hominem nuper divisit in animal, quod est suprema naturæ evolutio, et spiritum qui illi conjungitur.

Communissima vero omni tempore doctrina fuit, eademque humani generis universi sententia, unam esse in homine animam, quæ intellectiva sit, ac sensitiva, et a qua ipsa quoque vegetalis vita uno modo vel altero, sed certe essentialiter dependeat.

116. PROPOSITIO I. *Eadem est in homine anima sensitiva ac rationalis.*

Prob. 1^o ex unitate intimi sensus. Idem enim subjectum, quod in variis sensuum organis varias sensationes experitur, quodque sensitivi appetitus actus elicit, idem est quod intelligit ac ratiocinatur. Hæc enim omnia unum idemque subjectum, ut ad se pertinentia, in se experitur; eademque intelligentia, quæ ad proprias intellectiones se convertit,

sensationes quoque et appetitiones reflectendo relegit. Neque aliunde cognoscimus, sensu nos ac ratione præditos esse, nisi quia et sentire nos, et intelligere reflectendo deprehendimus.

Igitur principium sensus et principium intelligens unum idemque principium est. Fieri enim prorsus nequit, ut una anima experiatur ut suum, quod ab altera fit; aut ut in alterius actum reflexione redeat. Actus enim immanentes sunt essentialiter in solo agente.

117. 2^o Idipsum ostendit, nexus multiplex inter facultates sensitivi ordinis, et intellectivi. Nam:

a) Operationes sensus, si valde intensæ sint, operationes intelligentiæ impediunt. Ut autem scite advertit s. Thomas: « diversæ vires quæ non radicanter in uno principio, non » impediunt se invicem in agendo, nisi forte earum actiones » essent contrariæ, quod in proposito non contingit (1). »

b) Elementa intelligibilia non alibi reperit intellectus, quam in objectis per sensum oblati.

c) Ad operationes rationis exercendas, experientia sensuum, et phantasia juvamus.

d) Voluntas intellectiva sensus, phantasiam, ac facultatem loco-motivam ad actum movet, non minus quam intellectivas vires.

Hæc autem omnia contingere non possent, si anima sentiens non esset eadem ac rationalis. Ergo.

Ex his patet, erasse eos omnes qui sensitivam hominis animam ab intellectiva distinxerunt, vel qui homini utcumque sensum ac motum independentem ab eadem anima tribuerunt.

118. Nominatim nexus ille necessarius, qui existit inter cognitionem et concupiscibilem, et irascibilem, Platonis errorem prorsus profligat. Nam concupisci non potest, nisi bonum cognitum. Ergo illa eadem anima quæ concupiscit, bonum cognoscat oportet: ergo eadem est anima quæ concupiscit, et quæ cognoscit. Rursus, omnes passionibus irascibilis in boni concupiscentia radicem habent. Non enim speramus,

(1) *Contra Gent.* Lib. II, c. LVIII, § 7.

nec timemus, nec irascimur, nec audemus, nec generatim contra difficultates quæ bonum impediunt, pugnamus, nisi amore boni. Ergo eadem est anima, in qua passiones concupiscibilis et irascibilis sedem habent.

119. 3^o Ipsa illa intestina pugna inter cupidinem et mentem, ex qua Plato pluralitatem animarum deducebat, animæ potius unitatem luculenter ostendit. Hæc enim pugna in variis inclinationibus ac motibus ad opposita bona sita est: inclinationes autem ac motus hujusmodi sunt actus immanentes, qui in agente, toti quanti sunt, manent, nec ad aliud transire possunt. Si igitur anima mente pollens ab anima concupiscente distincta ac divisa esset, unaquæque suas affectiones experiretur, suisque motibus moveretur, nullumque esset in nobis subjectum, quod oppositorum bonorum illecebras in se experiretur. Atqui illud idem subjectum quod bonum honestum mente probat et appetit, hoc ipsum appetitu sensitivo ad bonum sensibile fertur. Hoc igitur bellum non animarum est, sed inclinationum ad opposita bona, quæ in eadem anima excitantur. Quemadmodum dubitatio non est nec esse potest duarum mentium conflictus, sed est pugna rationum diversarum, quæ eandem in opposita trahunt.

120. Ex hac postrema animadversione colliges, quo pacto præcipua illa contra statutam veritatem objectio refellatur: Experimur intra nos intestinam quamdam pugnam. Sed pugna non potest esse ejusdem cum seipso. Ergo sunt intra nos duo quæ pugnant, nempe duæ animæ.

Resp. *Dist. maj.*: Experimur intra nos pugnam animarum, *neg.*, pugnam inclinationum ad bona opposita, *conc.*; *contradist. min.*, et *neg. cons.*

Quemadmodum videlicet mens trahitur hinc inde ab oppositis motivis ad oppositas propositiones, vel corpus idem ab oppositis viribus ad oppositas partes, ita una eademque anima a bono sensibili et a bono rationis hinc inde trahitur.

121. Quod si quis urgeat: nequeunt in una eademque anima existere simul inclinationes oppositæ; respondebis *distinguendo*: inclinationes oppositæ *efficaces*, *conc.*; *ineffica-*

ces, neg. Nequit profecto voluntas ita trahi ab oppositis bonis, atque ita inclinari ad utrumque, ut simul utrumque eligat. Sed potest ita trahi, ut alliciatur ab utroque, quia aliquam boni et appetibilis rationem utrumque præ se fert. Hic quoque valent adductæ paritates.

ARTICULUS II.

Utrum anima humana sit vegetativæ vitæ principium.

122. PROPOSITIO II. *Anima rationalis et sensitiva vegetativæ quoque vitæ in homine principium est.*

Vegetalis vita, ex se et generatim, anima aliqua ut sui principio non indiget, prouti supra demonstratum est (33 seq.). Sed nunc quæritur, an vita vegetalis qua homo viget, ab anima pendeat. Responsio nostra est, vitam vegetalem originem habere ab anima 1^o in quibusdam certo; 2^o *probabiliter* in omnibus.

123. Prob. 1^{ma} Vitam hominis vegetalem aliquo modo ab anima originem habere, manifestum est ex necessaria functionum omnium vegetalis vitæ a facultatibus sensitivi ordinis dependentia. Etenim, functiones nutritivæ v. gr. ut generatim de animantibus supra notatum est (58, 2^o), diversum in homine ac in plantis exordium habent. Hominis enim nutritio incipit prehensione ciborum, eorumque trituratione ac deglutitione. Prehensio autem sensationes internas famis ac sitis, ac sensitivi appetitus motum supponit, ipsa autem, æque ac trituratio et deglutitio, pluribus facultatis motricis actibus continetur. Respiratio item, ut cætera omittam, quamvis non semper, frequenter tamen voluntaria est.

Igitur anima humana ut sensitivæ, ita vegetalis quoque vitæ in homine principium est.

124. Prob. 2^{ma} Probabilissimum est, cæteras quoque functiones ad nutritionem pertinentes, non mediantibus solum præcedentibus functionibus, sed etiam immediate secundum seipsas ab anima dependere; primo quidem eas quæ motibus automaticis (52) peraguntur, ut sunt *digestio*, *circulatio*, *respiratio involuntaria*; tum eas quoque, quæ qua ratione

fiant, physiologi ignorant, videlicet *secretiones* et *assimilationes*.

Etenim 1^o hæ functiones omnes nervorum ministerio complentur: id quod de functionibus primi generis exploratissimum est: functiones vero generis alterius, quanquam quomodo eæ fiant, ut dixi, obscurum sit, fieri tamen nervorum ope, est jam fere certum apud physiologos. Jamvero tam nervi a quibus dependent digestio, circulatio, respiratio, tam ii qui secretionibus præsent, sunt nervi *mixti*, qui nempe sub eodem involucro fibras tam sensiferas, quam motrices conjunctas continent. Sed fibræ saltem sensiferae animatae sunt, aut certe sub perpetuo animæ influxu. Igitur in nervis quibus vitæ organicæ functiones subordinatae sunt, viget perpetuus animæ influxus. Quidquid ergo per illos fit, sub animæ influxu fit.

125. Dixi fibras saltem sensiferas esse sub perpetuo animæ influxu: hoc enim est prorsus indubitatum. Sed verosimilius idipsum de fibris etiam motricibus dicendum est, quanquam eæ in gangliari systemate voluntati subjectæ non sint:

126. 2^o Contendere possumus, vires quibus organicæ functiones peraguntur, non solius corporis esse, sed corporis simul et animæ. Impossibile enim videtur, animam, quæ simplex substantia est, et maxime activa, quæque non molis extensione, sed sui suæque virtutis communicatione corpus informat intimeque pervadit, nihil suis viribus agere quum corpus agit suis; viresque corporis nulla in re ex tali societate modificari atque augeri. Concludendum itaque, vim omnem quæ in animato corpore viget, valde probabiliter esse vim compositam ex corporis animæque viribus resultantem.

127. Quod ut aliqua hypothesi explanem, attende hinc quidem vim omnem corpoream ultimato ad vim resistendi redire (C. 210 seq.); inde vero spiritum quoque vis resistendi, modo sibi proprio, capacem esse; animam vero humanam hac facultate esse indubitanter instructam, ut patet ex facultate loco-motiva; cujus certe principium ac radix in

ipsa reperitur. Hæc autem vis resistendi quæ animæ propria est, quanquam a vi resistendi quæ propria est corporis, sit essentialiter diversa, tamen quoad effectum similis est illi, proindeque cum illa conspirare, eamque modificare optime potest. Non difficulter itaque concipies, quomodo anima corpori infusa, illudque pervadens, vim hanc suam vi propriæ corporis commisceat, atque intime conjungat. Quo posito sequitur, non solum resistere corpus, sed corpus simul et animam; ac proinde vires omnes organicas, quæ ex vi resistendi resultant, non a corpore solum dimanare, sed a conjuncto. Atque hinc concludere pronum est, organicas functiones conjuncti viribus peragi: nisi quis existimare velit, aliquam peculiarem vim animæ inesse ad functiones organicas ordinatam, qua de re disputare nolo.

128. 3^o Denique vitam organicam ab anima dependere, suadent quoque relationes multiplices quæ organicam inter animaleque vitam existunt. Hujusmodi sunt

a) relationes *perfectionis*. Nam quo perfectiores sunt in animalibus sensitivæ facultates, eo exquisitiori artificio vitæ organicæ apparatus digesti sunt, ac distincti, eorumque functiones perfectius exercentur.

b) relationes *durationis*. Tandiu enim vita organica protrahitur, quandiu viget sensitiva; et viceversa quum illa abruptitur, hæc quoque perimitur. Quod certe non contingeret, saltem adeo constanter, si vita organica a principio vitæ sensitivæ esset independens.

c) relationes *subordinationis*. Vitæ namque vegetativæ functiones organa ipsa sensitivis facultatibus attributa, quæ certe anima ut sibi propria possidet et informat, perpetuo nutriunt et augent.

d) demum relationes *influxus ac dependentiæ mutuae*. Nemo ignorat quantus sit influxus passionum, imaginationis, atque adeo operationum mentalium, in functiones digestivas, in varias secretiones, in circulationem, motusque viscerum automaticos. V. gr. profundæ mentis elucubrationes nutritionem imminuunt; mœrores animi eandem impediunt; ex forti odore lacrymæ, ex vehementi dolore sudor, ex come-

stionis imaginatione saliva copiose segregatur; ira motum cordis accelerat, terror deprimit, memoria rerum sordidarum vomitum provocat.

129. E converso minor non est climatis, ætatis, sexus, alimentorum influxus in animi propensiones, atque adeo in ipsum intellectivæ facultatis exercitium: notumque est medicis, quantum sanguinis seu qualitas seu quantitas, et morbi præsertim abdominales in nervorum excitabilitatem, in animæ passiones, in mentis statum possint.

Quibus aliisque plurimis, quæ huc faciunt, attentis, mirum non est, si non raro animi ægritudines remediis physicis, et remediis moralibus morbi organismi curari debeant.

130. Jam hæ relationes omnes facile intelliguntur, si vita organica ab anima sensitiva dependeat; at vix, ac ne vix quidem earum ratio aliqua excogitari potest, earumque præsertim constantia inexplicabilis videtur, si vita hominis organica a vitæ sensitivæ principio independens supponatur.

131. Ex dictis colliges: 1º errasse veteres illos omnes, qui vegetativam quamdam animam a sensitiva diversam in homine vigere existimarunt.

2º Errare quoque eam vitalistarum scholam, quæ principium vitale, nescio quod, ab anima diversum, et a viribus materiæ distinctum homini inesse docet (115).

3º Quæ de homine dicimus, de brutis quoque animalibus dicenda esse; nam etiam quoad illa eadem valent rationes.

4º Sententiam satis communem, quæ statuit, vitam hominis organicam ex toto quidem ab anima pendere, ita tamen ut sub immediato ejus influxu eæ solum peragantur functiones, quas facultas motrix exsequitur (123); hanc, inquam, sententiam, quanquam certo falsa dici non possit, esse tamen minus probabilem.

5º Deduces quoque, hominem *unum vivens* esse, quamvis ejus vita multiplex sit. Omnis enim ejus vitalis activitas ab uno principio, eodemque simplici et indivisibili dimanat.

Non possum tamen iis assentiri, qui putant unitatem hanc periclitatum iri, si anima humana, juxta sententiam modo citatam, omnium organicarum functionum immediatum principium non esset. Non enim sequitur ex ea sententia, ut quidam dicunt, hominem fore quasi duo subjecta, plantam simul et animal; ad hoc enim requireretur ut vita organica ab animali, et animalis ab organica esset independens: imo nec illud sequitur, hominem aliquo modo plantam dici posse; planta enim includit privationem sensus in subjecto vivente vita organica. Igitur hoc tantummodo ex ea sententia sequitur, hominem esse corpus vivens vita organica, factumque animal eo quod anima sensitiva informatur. Et quoniam in ea sententia vita organica ab anima, ex parte quidem immediate, ex toto autem mediate dependet, idcirco etiam in ea sententia verum foret, corpus ab una eademque anima omnem vitam recipere; id quod sufficit ut homo unum vivens et esse et dici possit.

ARTICULUS III.

* *Stahl's opinio refellitur.*

132. PROPOSITIO III. *Falsum plane est animam humanam vitæ vegetalis principium esse per intelligentiam et rationem.*

Fuit hæc Stahl's opinio; qui insuper existimavit, animam sibi ipsi corpus exstruere rationali cognitione.

Sed 1º in has incredibiles assertiones Stahl'ius se conjecit, quia non distinxit id quod anima rationalis efficit, ab eo quod efficit *ut rationalis*, et ab eo quod efficit per *cognitionem rationalem*; quæ tamen distinctiones capitales sunt, atque usu tritæ. Profecto, quanquam una sit anima, tamen plures sunt ejus facultates: anima vero tunc operatur ut rationalis, quando vel ratione operatur, vel aliqua alia facultate, dirigente ratione. Atqui non semper actus aliarum facultatum eliciuntur ab anima, aut elici possunt sub ductu rationis. Nam v. gr. anima sentit, et imaginatur, et appetitu sensitivo movetur, etiam non præeunte ratione. Imo tunc quoque quum dirigente ratione aliquam aliam facultatem ad actum applicat, ratio quidem finem ac motiva agendi voluntati pro-

ponit, eique suggerit variarum facultatum actus, qui ut media ad finem collineare debent; at non edocet modum quo singuli actus exeruntur, quem modum homo novit confuse instinctu naturæ, non cognitione distincta ac rationali. Nescit enim hominis ratio, quomodo v. gr. moveantur oculi, aut rei absentis imago in memoriam revocetur.

Igitur eorum quæ anima rationalis operatur, multa non operatur ut rationalis, et iterum multa non operatur ex cognitione rationali, seu, ut veteres dicebant, per intellectum. Ergo ex eo quod anima rationalis vitæ organicæ principium sit, nullo modo sequitur, eam esse hujusmodi principium ut est rationalis, aut per cognitionem rationalem.

133. 2^o Quum per rationalem cognitionem operamur, novimus quomodo operatio fiat, et tam operationis ipsius, quam modi operandi reflexam conscientiam habere possumus, quum libuerit, quantacunque sit agendi consuetudo.

Patet primum; nam ratio est quæ dicat modum operis faciendi. Ergo ratio novit quomodo opus fiat.

Patet alterum; quia quæcunque ratione prælucente operamur, voluntarie operamur: ratio enim non immediate cæteras facultates movet, sed mediante voluntate. Quæ autem voluntarie agimus, conscientiæ non sunt abdita, ut patet experientia.

Atqui nullam prorsus conscientiam habere possumus actuum rationalium, quibus organicæ vitæ providemus, nec scire possumus adhuc, quo pacto organicæ vitæ functiones fiant. Ergo.

Neque dicat Stahl horum actuum rationalium conscientiam non haberi ex assuetudine. Hoc enim quod dicit, ad summum valeret, si sermo esset de affectionibus compositi (L. 447, 6^o, 7^o); quum vero agitur de actibus intellectus et voluntatis, locum non habet, ut modo probatum est.

134. 3^o Si vegetalis vitæ principium omnino est intelligentia, quid de brutis Stahlus opinabitur? Quidquid dicat, arma nobis suppeditabit ad ipsum oppugnandum. Si enim negabit brutorum animas vitæ organicæ principium esse, primo, hoc negabit contra omnem analogiam: deinde hoc

ipso fatebitur, nullum animæ influxum, nedum ejus intelligentiam, ad vitam organicam constituendam conservandamque necessarium esse. Si vero dabit a brutorum animabus vitam organicam pendere, concedet nobis intelligentiam hujus vitæ principium non esse; nisi errores erroribus cummulans, contendere velit brutorum animas intelligere.

135. Dicendum igitur, animam humanam in organicam vitam influere (si eas operationes excipias, quas in hunc finem elicit ut sensitiva, atque ut principium motus) non per intellectum, sed *per modum naturæ* (C. 426, 1^o); videlicet virtute independente ab intellectu et voluntate, quæque eodem plane modo ac vires corporeæ, positis debitis conditionibus, necessario exit in actum. Id quod minus mirabere, si attendas sensitivam quoque facultatem ejusdem esse conditionis. Nam pendet quidem v. gr. a voluntate, atque adeo quandoque ab intellectu, ut oculus huc vertatur aut illuc; sed quod proposito debitis sub conditionibus objecto, virtus visiva ad actum transeat, hoc profecto neque ab intellectu neque a voluntate dependet.

ARTICULUS IV.

* *Difficultates.*

136. Obj. I. Anima humana non potest non sentire quidquid operatur. Atqui non sentit operationes organicas a se fieri. Ergo hæ operationes ab ipsa non fiunt.

Resp. *Dist. maj.*: Anima non potest non sentire quidquid ipsa agit in se, *conc.*; quidquid agit conjunctum, *subd.*: non potest hoc non sentire confuse vel distincte, vividius vel remissius, *conc.*; semper distincte ac vivide, *nego* (L. 453, 2^o).

137. Notandum in primis, animam sentire suam cum corpore conjunctionem, ac proinde etiam corpus cui conjuncta est. Hic tamen sensus confusus est, non distinctus: non enim anima singulas quas informat, nervorum fibras, earumque cursum sensu distinguit, aut reflexione distinguere potest. Id quod patet etiam in nervis qui sensationibus inseruiunt, et in iis qui sunt voluntarii motus instrumenta. Nam profecto anima sentit se v. gr. videre atque audire, et in

hunc sensum reflectit; quo tamen pacto se habeant nervi optici et acustici, nec sentit, nec cognoscit utcunque. Itemque sentit se musculos movere; at quibus nervis hoc efficiat, ipsi non est notum. Quin imo ipsa prorsus nescit se nervos habere quibus sentit, nervosque quos movet. Idipsum ergo dicendum de nervis vitæ organicæ: non potest anima distinctum eorum sensum habere, aut eos reflexione cognoscere.

2° Hinc sequitur, animam distincte sentire non posse munus, quod ipsa exercet in conjuncti operationibus, videlicet in sensu, in motu, in functionibus organicis. Ad hoc enim necessarium esset, ut sentiret distincte nervos in quibus sentit, quos movet, quibus functiones organicas administrat.

3° Sentit tamen nerveum systema universum confuse, eo sensu quem vocant fundamentalem (L. 447, 4°). Suum influxum in sensationes et motus voluntarios sentit ut actus distinctos inter se, quia revera in eos influit actibus distinctis; influxum vero in functiones organicas, qui perennis est, non sentit nisi in perenni illo sensu conjunctionis, cujus variationes exprimimus quum dicimus, nos bene vel male nosmetipsos habere.

4° Notandum postremo non esse confundendum sensum quem anima habet sui corporis, cum sensu tactili quo corporum extraneorum impressiones percipiuntur. Hoc enim sensu nervi plurimi, etiam sensitivi, ipsumque cerebrum carent. Hinc functiones vitæ animalis et organicæ interno sensu tactili non experimur, nisi quatenus per illas nervi qui hoc sensu instructi sunt, vellicantur. Sensitiva autem facultas in glangliari systemate, quæcunque demum sit ejus rei causa, remissa est ac torpida, nisi morbus aliquis viscerum insueto modo eam excitet.

138. Obj. II. Si vita organica in homine ab anima, quæ sensitiva simul et vegetativa sit, dependet, consequi videtur, etiam vitam organicam plantarum ab aliqua anima vegetativa dependere. Admittenda est igitur anima plantarum.

Resp. *Neg. consequ. et parit.* Vita enim organica in homine,

idemque proportionem dicendum de cæteris animalibus, diversa plane est a vita organica plantarum; nam et initium sumit a quibusdam vitæ sensitivæ actibus (123), et per systema nerveum exercetur (124): quæ duo in plantis non habentur. Unde potius opposita conclusio inferri debet. Effectus enim dissimiles ad dissimiles causas referendi sunt. Præterea animam hominis cæterorumque animantium in vitam organicam influere, deducimus etiam ex hoc, quod novimus aliunde esse in homine animam. Si enim anima hominis corpus informat, nequit ejus vis in functiones organicas corporis a se informati non influere (125). In plantis autem animam esse, nulla ratione constat.

139. Obj. III. Vita vegetativa, etiam in animalibus, ab anima non dependet. Nam:

1° Embryon vegetat ante animationem.

2° Organicæ vitæ functiones perseverant, etiam nolente voluntate.

3° In hominis cadavere quandoque succrescunt capilli et ungues.

140. Resp. ad 1^{am} *Omitto.* Nos enim tuemur, non omnem vitam organicam, sed vitam organicam in corpore animato, et quidem perfecto, ab anima dependere. Quidquid igitur sit opinandum de fœtu ante animationem, hoc assertionis nostræ veritatem non infirmat. Noto tamen, plurimum sententiam esse, fœtum in ipsa conceptione anima rationali informari.

Ad 2^{am} *Transeat ant. nego cons.* Non enim anima per solam voluntatem ad vitales operationes concurrat. Ipsa enim sensitiva facultas independens est a voluntate.

Ad 3^{am} *Transeat.* Pili et ungues non sunt partes animatæ, sed vegetalia quædam humanæ cutis propria: vegetant ergo in cadavere vi dispositionum ad ipsas enutriendas, quas in eo vita reliquit.

CAPUT III.

DE UNITIÖNE ANIMÆ ET CORPORIS.

ARTICULUS I.

De animæ sede.

141. Agendum nunc de unitiöne animæ cum corpore: ac primo de extensione, ut ita dicam, unitiönis hujus: an videlicet alicui parti corporis, an vero toti corpori anima conjungatur; secundo, de hujus unitiönis modo.

142. Quod ad primum attinet, variæ fuerunt omni tempore philosophorum opiniones. « Alii in corde, alii in cerebro » dixerunt animi esse sedem et locum: » ita Tullius (1). Aristoteles toto corpore animam diffusam censuit. Mitto eos qui trium animarum sedes assignarunt, de quibus supra (113). Scholastici omnes, Aristotelem secuti, animam in toto corpore residere docuerunt,

Inter recentiores, Cartesius animum iterum in cerebrum reduxit, eamque in glandula pineali (2) collocavit, Lancisius et Lapeyronius in corpore calloso (3), alii alibi, quos memorare non vacat.

143. Opiniones hujusmodi quæ in peculiari aliqua cerebri parte animæ sedem constituerunt, nullum jam amplius sectatorem habent; rationes enim physiologicæ quibus illæ innitebantur, explosæ sunt anatomes accuratioris observationibus. Nihilominus plerique adhuc physiologi, ex iis qui materialistæ non sunt, animam in cerebro collocant; non tamen omnes: sunt enim qui censent cum veteribus, animam toti se corpori exhibere præsentem; cum his consentiunt jam philosophi non pauci; neque nobis ab hac sententia discedendum videtur.

144. PROPOSITIO. I. *Anima est in toto corpore ipsi conjuncto.*

1º Id luculenter probant affectiones et actus ordinis sensi-

(1) *Quest. Tusc. Lib. I, c. 9.*

(2) Glandula pinealis, seu conarium, est corpusculum cinereum, cono pineo figuræ simile, situm in cerebro, ante cerebellum, et post tertium ventriculum.

(3) Corpus callosum, seu ut alii dicunt, maxima cerebri commissura, est camera quedam quadrilatera, quæ duo cerebra hæmisphæria conjungit.

tivi, qui in diversis corporis partibus sedem suam propriam habent. Nam ibi est anima, ubi patitur et agit. Atqui patitur et agit in toto corpore. Ergo est in toto corpore.

Ad minorem demonstrandam afferri possent phænomena phantasias, passionum, facultatis loco-motivæ. Sed brevitatis gratia, afferemus tantummodo quæ ad facultatem sentiendi pertinent. Dico igitur, sensationum actus non in cerebro, sed in organis toto corpore habere sedem.

145. Probatur 1º ex intimo sensu. Profecto non modo corporum externorum impressiones, sed ipsum sentiendi actum sentimus. Unusquisque autem qui sentit, nullatenus dubitat, quo in loco sit sensationum sedes, sed certus est se videre in oculo, se gustare in lingua, se calore, frigore, dolore affici modo in una corporis parte, modo in altera, ut vel ipsa loquendi ratio continenter manifestat.

146. Hinc probatur 2º hoc ipsum ex communi sensu; qui profecto in hac re non exiguum pondus habet. Sentire nos in cerebro ea omnia quarum sensum in diversis organis experimur, incredibile vulgaribus paradoxon est; iique ipsi qui amore systematis hoc affirmant ac docent, fateri coguntur, vulgare præjudicium interna experientia, quasi perpetua illusionem, suaderi; atque ita suaderi, ut practice deponi non possit.

147. Conantur tamen internum hunc sensum cum theoria quam amplexi sunt, utcunque componere. Aiunt enim, nos sentire quidem in cerebro, sed ex consuetudine quadam, sensum quem experimur, ad nervorum extremitates, in sensoriiis in quibus motus initium factum est, referre. At explicandum iis manet, quomodo consuetudo hæc acquiratur, et unde originem habeat. Consuetudo enim repetitis actibus acquiritur: multi vero actus a primo aliquo exordiantur necesse est. Dicant ergo, qua ratione fieri possit, ut animus sensationem habitam ad membra primo referat. Vel sentit animus ut sibi præsentia sibi conjuncta, omnia corporis membra, vel secus. Si animus proprii corporis membra non sentit, profecto nescit se illa habere; quomodo ergo poterit sensationem aliquam ad membra primo referre? Si vero

animus omnia proprii corporis membra sentit, jam non sentit solum in cerebro; nec refert ad membra sensationes, sed eas in membris experitur. Patet igitur, consuetudinem referendi sensationes cerebri ad membra explicari non posse, nisi admittatur id quod adversariorum sententiam, ad quam sustinendam consuetudo hæc in medium affertur, prorsus evertit.

148. Probatur 3^o ex multis difficultatibus, quæ adversariorum sententiam impeditam maxime, et omnino improbabilem faciunt. Nam cerebrum omni sensu caret, etiam sensu tactus; atque etiamsi pungatur, incidatur, ustuletur, nullo sensu doloris afficitur. Quomodo ergo concedere poterimus, hoc organum affectiones etiam minimas aliarum corporis partium, ad se e longinquo delatas sentire, suas vero non sentire?

Ad hæc: organorum, structura mire varia est, pro varietate impressionum, ad quas recipiendas illa ordinata sunt. Nervi autem per quos impressiones hujusmodi præterfluere debent, structuræ sunt uniformis. Quomodo ergo impressiones in organis receptæ varietates suas servant, dum per nervos deferuntur? aut quomodo cerebrum diversas ex eis affectiones experiri potest? præsertim cum impressiones omnes organorum per motum nervorum aut spirituum, ut aiunt, ad cerebrum deferantur; quo in motu ulla aut solum exigua varietas, quæ essentialis sit, reperiri potest.

Præterea, in hac hypothese anima qualitates sensibiles perciperet ubi illæ non sunt. Nam ad cerebrum neque lux, neque calor objecti, neque undæ sonoræ pertingunt; sed solummodo nervorum ac fluidi nervei motus. Cur ergo non potius nervos, nec fluidi hujus motum anima percipit? Mirabile sane est, animam non percipere ea quæ cerebrum afficiunt, eaque solum percipere quæ cerebrum nunquam affecerunt.

Mitto alia quæ afferri possent. Hæc sufficiunt ut concludamus, animam non in cerebro, sed in organis sentire; ac proinde in toto corpore esse præsentem.

149. 2^o Probatur eadem propositio ex hominis conceptu,

ejusque unitate. Nam juxta opinionem quam refutamus, cerebrum esset animæ domicilium, reliquum vero corpus appendix quædam, quam anima nervorum ope, tanquam quibusdam habenis, moveret ac regeret. Proinde in homine binæ essent partes distinguendæ; pars dirigens et pars directa, conjunctæ inter se ut currus et auriga, vel baculus et manus (1): animal vero, si quod est in homine, cerebri confiniis contineretur. Animal enim est corpus animatum: in hac autem sententia solummodo cerebrum dici potest animatum; si tamen et ipsum animatum dici mereatur. Atqui alius profecto est hominis conceptus ex omnium hominum sententia; alia est hominis unitas.

150. 3^o Animus vel residere dicitur in puncto cerebri indivisibili, vel in aliqua ejus portione extensa, vel in toto cerebro.

Primum si dicatur, hoc punctum deberet esse centrum, quo nervi omnes confluerent. Atqui nullum in cerebro punctum est, quo nervi omnes confluant. Et quamvis nervi omnes simul confluerent, certe in punctum indivisibile confluere nequeunt. Nervi enim non sunt lineæ geometricæ, sed fibræ, eaque compositæ. Fac tamen punctum indivisibile centrum esse nervorum. Huc motus omnes coibunt, multiplices sane, et tam directione oppositi, quam impressionum quas referre debent, natura. At quum motus diversi in unum punctum coeunt, confunduntur. Animus ergo diversas impressiones, quæ eodem tempore ad cerebrum deferantur, distincte sentire nequit. Hoc vero contra experientiam est: scimus enim, nos plures easque inter se diversas sensationes excipere distincte posse. Ergo.

Si vero dicas, animam vel aliquam cerebri partem vel totum cerebrum occupare, fateris jam, animam, licet simplicem, extensam sedem occupare posse. Ex quo concludemus, non repugnare quod toto illa corpore resideat; eamque

(1) Expressiorem similitudinem reperies in telegrapho electrico. In hac opinione, anima se habet ut telegraphi director in statione quadam centrali; cerebrum ut ejus cubiculum; fila metallica sunt nervi; stationes variae ad quas fila pertingunt, sunt sensus.

reipsa in toto corpore residere, si toto corpore virtutem suam manifestat.

Ex his patet quod propositum est.

151. Ad hanc tamen animæ in toto corpore præsentiam recte intelligendam, hæc sedulo notanda sunt :

1° Anima non est in corpore eo modo, quo corpus unum est in alio. Nam unum corpus in alio est hoc pacto, quod quantitas unius quantitatem alterius circum tangit. Anima vero non est in corpore hoc quantitatis contactu, cum ipsa quantitatem non habeat : sed contactu suæ vis, quam vi corporis propriæ conjungit, quaque ipsum corpus perficit, vivificat ac movet.

2° Quoniam anima simplex est et quantitate carens, non potest ita esse in toto corpore, ut sit secundum unam sui partem in una corporis parte, et secundum alteram in altera ; sed tota est in toto corpore, ac tota in singulis ejus partibus. Id quod non difficulter concipies, si mente teneas quod alibi diximus (87, 3°), animam non esse simplicem ut punctum, quod est simplex in genere quantitatis ; sed ut substantiam quæ quantitatis naturam excedit. Propterea quemadmodum simplex intellectio corpus attingit, quin secundum rei intellectæ partes dividatur ; ita animæ substantia indivisibilis divisibile corpus totum amplectitur.

3° Duo corpora non possunt se contingere, nisi solummodo secundum superficies ; ac propterea contingens est contactu extrinsecum. Ast anima, quæ non contactu quantitatis, sed substantiæ indivisibilis virtute corpus tangit, corpus totum penetrat ac pervadit. Hinc solum anima, ac spiritus generatim, potest esse in corpore propriæ ac vere. Etenim potest quidem unum corpus in poros alterius penetrare, sed non in ipsius moleculas ; ac proinde unum corpus nunquam est in altero propriæ ac vere.

4° Anima quæ tota est in singulis corporis partibus totalitate essentiæ, non est tamen in singulis *totalitate virtutis* ; virtus enim ejus ad quosdam actus exercendos, diversa organa tanquam instrumenta, requirit. Est igitur in diversis organis secundum varias potentias.

5° Quum in toto corpore animam esse dicimus, non est putandum, omnes omnino substantias animales anima informari. Illas enim solum partes anima informare dicenda est, quæ per se ac primo, tum animalis, tum organicæ vitæ functiones exercent. Hujusmodi autem partes omnes nerveo systemate continentur. Igitur nerveum systema, quod toto corpore expanditur, atque in omnem ejus partem fibrillis ac filamentis suis serpit, est subjectum quod immediate anima informat. Cætera quæ sunt in humano corpore, instrumenta sunt ac media vitalium operationum, vel etiam effectus.

ARTICULUS II.

Difficultates.

152. Objicitur I. factum vulgatissimum, quod videlicet cessare perspicitur omnis sensatio, si nervi qui in sensuum organis expanduntur, ita ligentur aut recidantur, ut cum cerebro non amplius communicent. Idem contingit in nervis motoribus musculorum, qui voluntatis imperio subduntur. Ex quo concludendum videtur, quemadmodum hodieum concludunt physiologi multi, nervos esse vehicula quædam, quæ impressiones in sensuum organis receptas ad cerebrum deferunt, cerebrum vero ipsum sensorium esse commune, atque animæ domicilium.

Huc pariter spectat factum alterum a Cartesio primo observatum, quod ii quibus membrum aliquod amputatum est, conqueruntur frequenter, se in deperdito membro dolorem experiri ; nempe quia ex assuetudine, dolorem quem in cerebro experiuntur, ad membrum illud, ut prius, referunt.

153. Resp. ad 1^m *negando consequentiam*. Ex his enim factis hoc solum sequitur, ad sensationes et ad motus necessariam esse nervorum cum cerebro conjunctionem : non vero animam in cerebro sentire, et in solo cerebro degere. Nam conjunctionis hujus necessitas aliis hypothesibus explicari potest ; v. gr. quod sensatio fiat quidem in organis, sed ad sentiendum requiratur reactio aliqua cerebralis (1). Quæ reactio facile admittetur, si attendamus hinc quidem hypo-

(1) Ita opinatur Cl. Tissot *Anthropologie spéculat. gén.*, t. II, p. II, chap. V.

thesim fluidi nervei ab omnibus jam recipi; inde vero sensationem non passivam solum, sed etiam activam esse. In nervis vero motoribus fluidum nerveum a centro ad terminos periphericos deferri, communis sententia est.

Ad 2^m petatur responsio ex alibi dictis (L. 456). Ii quibus membrum aliquod amputatum est, dolorem *confuse* experiuntur in iis nervorum ramulis, qui prius in membrum illud ac in varias ejus partes extendebantur. Vi autem phantasie et assuetudinis, de hujus doloris sede judicant ut prius.

154. Obj. II. Si anima est in toto corpore,

1^o vel extenderetur cum corpore, id quod ejus simplicitati opponitur; vel replicaretur in corpore, id quod naturaliter fieri nequit.

2^o Crescente corpore cresceret, imminuto imminueretur.

3^o Quum diversae corporis partes oppositis motibus moventur, ipsa quoque moveretur tota motibus oppositis, quod certe repugnat. Ergo.

155. Resp. 1^o generatim, hæc omnia ex æquo afferri posse contra sententiam eorum, qui in certam aliquam corporis partem animam retrudunt; nisi quis animam ponat in puncto corporis indivisibili, id quod quam absonum sit, supra vidimus.

156. Resp. deinde ad 1^m *negando disjunctivam*. Anima enim nec extensionem formalem recipit, nec replicatur in corpore. Primum patet ex modo dictis (151, 1^o-3^o). Alterum constat ex dictis de replicatione. Replicatio enim est entis existentia in pluribus locis *adæquatis*. Locus autem adæquatus animæ est totus locus, quem corpus humanum occupat (C. 361). Est igitur anima in corpore, ut substantia indivisibilis, quæ virtute sua totum corpus pervadit, ac perficit (119, 1^o).

Ad 2^m *Nego*. Ea enim, crescente altero vel decrescente, crescant et decrescant, quæ cum altero coextenduntur. Anima autem corpori non coextenditur.

Ad 3^m *Dist.*: Anima motibus oppositis movetur per se, *nego*; per accidens, nempe ut est corpori conjuncta, *conc.*

157. Anima moveretur per se, in suam substantiam ac vim,

deserto corpore quod informat, alteri corpori applicaret. Ejusmodi enim est spirituum motus, quod suam virtutem applicent, prius rei in uno loco existenti, deinde rei existenti in loco altero (1). Hoc autem motu anima non movetur. Sed movetur per accidens, videlicet ad motum corporis. Qui motus, ut passivus est, non est proprie nec solius corporis, nec solius animæ, sed compositi. Quemadmodum autem corpus ab anima habet ut se movere possit, ita anima ratione corporis habet, ut in oppositas partes moveatur. Utque nulla contradictio est in hoc, quod anima utrumque oppositum motum intelligat, velit et active determinet, ita nulla contradictio est in eo, quod ipsa cum diversis corporis partibus oppositos motus subeat.

158. Obj. III. Anima non est tota in singulis corporis partibus. Nam:

1^o Si anima tota est in una corporis parte, nihil ejus esse potest extra partem illam. Ergo.

2^o Si anima est tota in unaquaque corporis parte, essent in toto corpore cum omnibus suis potentiis; potentiæ enim in animæ essentia radicem habent. Sed illud falsum est, non enim anima toto corpore videt, aut cogitat.

159. Resp. ad 1^m *Dist.*: Si anima esset tota in una corporis parte *totalitate essentiae*, nihil ejus esse posset extra partem illam, *nego*; si esset tota in una parte *totalitate quantitatis*, *trans.*

Cum anima quantitatem non habeat, nequit esse tota in aliquo loco totalitate quantitatis, sed quum dicitur tota esse in singulis partibus corporis, hoc intelligitur de totalitate essentiae.

160. Ad 2^m *Dist. maj.*: cum omnibus suis potentiis inorganicis, *omitto*; cum omnibus suis potentiis organicis, *nego*. Et *dist. rat. add.* potentiæ inorganicæ in animæ essentia radicem habent, *conc.*; potentiæ organicæ, *subd.*: in animæ solius essentia, *nego*; tam in essentia animæ, quam in essentia corporis, nempe in essentia compositi, *conc.*

Potentia animæ inorganicæ, cum instrumento corporeo

(1) Cf S. Th. *Summ. th.* p. I, q. LII, LIII.

non egeant, neque in hac, neque in illa corporis parte, proprie loquendo, exercentur. At potentiae organicae, cum non solius animae sint, sed animae conjunctae organo, in ea solum corporis parte esse possunt, quae ad ejusmodi potentiarum actus idonea sunt instrumenta (151, 4^o). Hinc facultatum istarum distributio ab organis dependet.

ARTICULUS III.

De unitiois modo.

161. Superest altera quaestio proposita, videlicet de unitiois modo. Cum anima et corpus sint duae substantiae distinctae, arctissimo tamen nexu conjunguntur, ita ut affectiones unius in alteram substantiam influant, ac fere in omnibus altera ab altera dependeat. Quæritur itaque, cujusmodi sit conjunctio ista. Hæc est celebris illa quaestio *de commercio*, quæ recentiorum præsertim philosophorum animos in plures ac varias sententias distraxit. Ab ea porro commercii voce nos consulo abstinuimus; hæc namque vox quaestionem non recte collocare, et inveniendæ veritatis viam occludere, aut certe impedire videtur; ut ex dicendis patebit.

162. Ut expeditior sit et clarior tractatio, primo statuemus id quod tanquam omnino verum habendum est; deinde varias opiniones expendemus, et ad statutæ veritatis normam exigemus.

PROPOSITIO II. *Animæ humanæ cum corpore conjunctio physica est et substantialis, ejusmodi nempe ut e duabus distinctis substantiis una composita substantia, una natura exsurgat.*

163. Unitio physica et substantialis in eo sita est, quod binæ substantiæ, quum ad se invicem accedunt, physicas suas proprietates in unum conferant; ita ut proprietates, vires, operationes compositi a proprietatibus, viribus, operationibus utriusque componentis diversæ sint. Ex quo sequitur 1^o unamquamque substantiam componentem suppositi rationem amittere (O. 169, 3^o); 2^o ex duabus componentibus substantiis unum subjectum constitui, unumque operationum passionumque principium; videlicet unam naturam (O. 257).

Diversitas itaque proprietatum, virium et operationum indicium est ac tessera, qua substantiales unitiones a juxta-positionibus ac meris mixtionibus mechanicis distinguimus.

Substantialium unitiois exempla manifesta habes in chemicis combinationibus. Quam enim differunt proprietates v. g. chloruri aurei a proprietatibus chlori, et a proprietatibus auri! itemque quid magis diversum ab oxygenio et sulphure, quam acidum sulphuricum?

164. At substantialis unitio multo melius inter spiritum et corpus, quam inter bina corpora concipi potest. Etenim,

1^o Corpora eo melius combinantur, quo magis oppositis instructa sunt proprietatibus. Cum igitur spiritus et corporis proprietates maxime oppositæ sint, atque adeo contrariæ, multo magis quam quælibet corpora, spiritus et corpus ad substantialem conjunctionem aptitudinem habeant necesse est.

2^o Affinitates chemicæ unius corporis ad alterum metaphoricæ sunt, et virium extrinsecarum effectus. At spiritus veram ac proprie dictam inclinationem ad corpus insitam habere, et in seipso experiri potest.

3^o Nullum corpus ad substantialem cum altero unitiois tantam aptitudinem habere potest, ut multo major in spiritu non sit. Etenim quantumvis duæ massæ in combinationibus chemicis intime jungantur, moleculæ tamen unius substantiæ moleculas alterius penetrare non possunt, sed solum atomos suas constitutivas atomis alterius interserere, et gravitatis centra simul confundere, atque adeo, si placet, suas ex imponderabili materia atmosphæras simul permiscere. Ast anima proprie ac vere penetrare materiam potest, ac simplici sua substantia integrum pervadere corpus. Multo igitur melius proprietates suas ipsi communicare, et proprietatibus corporis participare, unumque cum corpore patiendi et agendi principium efficere valebit.

165. Nunc probatur thesis.

Substantialis unitio, juxta ea quæ præmisimus, innotescit ex eo, quod e duabus substantiis unum compositum ex-

surgat, quod proprietates et operationes præ se ferat a proprietatibus atque operationibus substantiarum componentium diversas. Atqui sunt in homine proprietates et operationes diversæ a proprietatibus et operationibus, tum animæ, tum corporis. Ergo.

166. Probatur minor, ut omittamus ea quæ ad vitam vegetativam pertinent,

1^o ex sensu proprii subjecti. Homo sentit se extensum, atque in se inferiores partes ac superiores, dexteram ac sinistram, anteriores ac posteriores, internas et externas distinguit, propriasque affectiones modo in una parte, modo in altera experitur. Jam corpus nequit ullo pacto sentire se, anima vero, ut est in se, nequit se extensam sentire. Ergo hic sensus neque animæ est, neque corporis, sed compositi ex anima et corpore.

2^o Ex facultate sensus externi. Anima simplex et inextensa materialium objectorum impressiones excipere non potest. Nam hæ fiunt per contactum superficiei unius corporis cum superficie alterius, et per conflictum impenetrabilitatis unius cum impenetrabilitate alterius. Atqui anima, cum sit inextensa, nullam habet superficiem quæ ab altera superficie tangi possit; et ex se impenetrabilis non est. Aliunde corpus extensum est et impenetrabile; proindeque impressiones alterius corporis excipere potest, sed eas experiri nequit (88, 89).

Simile argumentum ex phantasia deduces.

3^o Ex motu spontaneo. Corpus est iners, ac seipsum ad motum determinare non valet. Anima ex se motu locali non movetur, ut supra dictum est (157). Homo autem motu locali movetur, ac seipsum ad motum determinat.

4^o Ex appetitus sensitivi passionibus. Passiones enim hujusmodi ita sunt propriæ compositi, ut nec soli animæ convenire possint, nec soli corpori. Non animæ, quia corpoream immutationem in suo conceptu includunt, non corpori, quia corpus appetitus est incapax.

5^o Demum ex somno et dementia.

Ex somno. Nam anima lassitudini obnoxia non est, nec

virium reparatione ulla indiget. E contrario, functiones quæ in somno suspensæ manent, ut sunt reflexio et libertatis exercitium tam quoad actus elicitos, quam quoad imperatos, ad corpus non pertinent.

Ex dementia. In dementiæ statu impediuntur functiones mentales, at non læditur mens, quæ læsioni non est obnoxia, sed organa solum corporalia.

Somnus igitur et dementia nec solius animæ nec solius corporis sunt, sed compositi ex anima et corpore.

Patet igitur assertum (1).

167. PROPOSITIO III. *Substantialis animæ cum corpore conjunctio constitui videtur per hoc, quod anima corpus pervadens, vim suam vi corporis propriæ associet admisceatque.*

Posse animam hoc pacto corpus pervadere, manifestum est ex supra dictis (164, 3^o); ita reipsa corpus pervadere, concludi necessario debet, posita animæ in toto corpore præsentia (144, seq.). Hoc autem ipsum sufficere ad corporis animæque substantialem unionem absolvendam, non difficulter ostenditur.

168. Etenim quisque videt, posita tum unius substantiæ intima penetratione in alteram, tum virium utriusque substantiæ commixtione, illico consequi

1^o quod vires compositi a viribus utriusque componentis differant; ex qua virium differentia sequitur differentia operationum et proprietatum;

2^o quod utraque substantia suppositi rationem amittat: utraque enim est pars quæ alterius consortio aliquo modo perficitur (O. 169, 4^o);

3^o quod unum novum principium agendi ac patiendi, seu nova quædam natura constituatur. Principium enim hujusmodi est ipsum compositum, quod aliter ac componentia agit ac patitur.

Atqui tria hæc substantialem unionem omnem constituunt (163). Ergo.

Idipsum deduci posset ex analysi singularum facultatum

(1) Hæ fuse pertractata reperies in erudito ac vere pretioso opusculo Cl. P. Jo. Baptistæ Pianciani, S. J. *Saggi filosofici*, Saggio II.

atque operationum, quæ hujus compositi propriæ sunt (166): ut quisque per se facile colliget.

169. Animadvertite ad hæc quæ sequuntur:

1° Quemadmodum supra notavimus (151, 5°), animam esse in toto corpore, quia est in nerveo systemate; ita nunc quoque dicendum, animam nerveum systema pervadere, ejusque viribus, ac viribus præsertim fluidi nervei, vires suas admiscere.

2° Firmiter semper tenendum est, animam corpori conjungi conjunctamque manere, non voluntate, sed naturæ necessitate et creatoris imperio. In hoc quod corpori conjungitur, et vires suas illi associat, et in hoc statu permanet, ita se habet anima, ut res omni cognitione atque appetitu carentes. Nihilominus, quoniam hic status est ipsi naturalis, amat hanc sui cum corpore conjunctionem, et a corpore abstrahi naturaliter abhorret.

3° Ex eo quod anima substantiam ac vim suam substantiæ ac vi corporis associare dicitur, non est inferendum, vim omnem animæ esse corpori affixam, omnemque ejus actum medio corpore exerceri. Nam virtus intellectiva qua anima pollet, cum per organum corporeum exerceri nequeat, materiæ societatem respuit, quanquam a cæteris facultatibus organicis in præsentis animæ statu dependeat, ut alibi dicitur.

4° Persona humana (7° ego) non est anima, multoque minus corpus; sed compositum ex anima et corpore. Ratio est quam paulo ante (168, 2°) innuimus, videlicet animam et corpus rationem partis habere, quia ad compositum constituendum natura ordinantur, et in composito perficiuntur. Ratio ergo personæ in utraque substantia deficit. Nihilominus quoniam anima pars in homine principalis est, latiore quodam sensu anima dicitur humana persona, homo, ego.

5° Ex modo dictis sequitur, unionem inter animam et corpus dici non posse *hypostaticam*: unio enim hypostatica non fit, quum ex duabus substantiis seu naturis componitur hypostasis; secus omnis quoque combinatio chimica esset

unio hypostatica; sed quum duæ naturæ uniuntur per hypostasim; nempe quum aliqua persona naturam sibi extraneam assumit, ac propriæ naturæ conjungit. Hoc autem contingere nequit, nisi in eo qui et ante unionem persona sit, et per unionem personæ rationem non amittat; qui videlicet assumptam quidem naturam perficiat, ipse autem ab assumpta natura nullatenus perficiatur (O. 169, 6°). Hujusmodi sunt personæ divinæ. Idcirco unio Verbi Dei cum humana natura est, ac dicitur hypostatica.

Quanquam igitur unio animæ et corporis cum unionem hypostatica conveniat in eo, quod et in una et in altera duæ sint naturæ et una persona; tamen differunt inter se 1° quia in unionem animæ et corporis persona consurgit ex ipsa unionem, in unionem vero hypostatica persona unionem præcedit et unionem facit; 2° in prima unionem naturæ conjunctæ unam naturam efficiunt, in altera autem non ita; sed binæ naturæ impermixtæ manent, quia natura assumptis nihil patitur, nihil recipit, nec per unionem perficitur.

ARTICULUS IV.

* *Refelluntur falsa systemata.*

170. Nunc facile erit de variis hypothesis ad animæ et corporis unionem explicandam excogitatis, judicium ferre. Rejiciendæ primo quæ falsæ sunt.

PROPOSITIO IV. *Animæ rationalis non unitur corpori ut motor mobili.*

Hæc est Platonis opinio, qui censuit animam rationalem totum esse hominem: eam vero corpori præesse ut nauta navi, eoque uti tanquam instrumento; proinde ex anima et corpore non fieri compositum ullum, quemadmodum non fit ex Socrate et indumento quo ipse utitur.

171. Refutatur hæc opinio 1° ex dictis in præcedenti articulo. Homo enim est una natura ex anima et corpore, non anima utens corpore. Sunt enim operationes quædam et passiones, quæ ad animam simul et corpus pertinent, tanquam ad unum principium. Oportet ergo ex anima et corpore unam fieri naturam.

2° « Sensus, ita arguit s. Thomas, est virtus passiva ipsius organi. Anima igitur sensitiva non habet se in sentiendo » sicut movens et agens, sed sicut quo patiens patitur: quod » impossibile est esse diversum secundum esse a patiente. » Non est igitur anima sensibilis secundum esse diversa a corpore animato (1). »

172. Quod si dicas, animam quidem sensitivam corpori hoc pacto conjungi, non vero animam intellectivam; si, inquam, hoc dicas, præterquamquod hæc suppositio absurda est, ut supra demonstravimus (116, seq.), consequetur etiam, ut idem s. Thomas notat, « quod homo non sit animal, sed » utatur animali; nam per animam sensitivam aliquid est » animal; et quod homo non sentiat, sed utatur re sentiente (2); » quæ profecto absona sunt.

Mitto alia argumenta quæ afferri possent; nam res ex dictis satis clara est.

173. PROPOSITIO V. *Systemata causarum occasionalium et harmoniæ præstabilitæ, ad animi corporisque unionem explicandam inventa, ad finem inepta sunt, et in se falsa probantur.*

Primum systema Malebranchium auctorem habet, ac dicitur quoque systema *assistentiæ*. In hoc negatur non modo physica unio inter animam et corpus, sed etiam influxus omnis unius substantiæ in alteram. Deus solummodo esse dicitur, qui positis quibusdam motibus in corpore, ideas affectionesque his consentaneas in mente producit; et ex æquo motus in corpore excitat animæ cogitationibus ac volitionibus respondentibus: quare motus corporis sunt causæ occasionales affectionum animi, et voluntates animi causæ occasionales motuum corporis.

174. Hujus systematis inconvenientia manifesta sunt. Nam:

1° Physicam ac substantialem corporis animæque unionem penitus aufert; qua sublata, humanæ vitæ phænomena nullatenus explicantur, ut supra probatum est (166, seq.);

(1) *Contra Gent.* lib. II, c. LVII.

(2) *Ibid.* c. LVIII, § 4.

imo humanæ naturæ conceptus perit: anima enim et corpus, Dei operatione harmonice mota, una profecto natura non sunt.

2° Falsæ illi doctrinæ innititur, activitatem causarum secundarum nullam esse, ipsisque spiritibus vim corpora movendi competere non posse. Quam doctrinam suo loco refutavimus (O. 275, seq.).

3° Conscientiæ repugnat. Unusquisque enim sibi conscius est, se non tamen habere ideam aut cogitationem impressionum in corpore receptorum, aut status in quo corpus versatur, ægritudinis v. gr. aut famis, sed hæc omnia vere experiri. Quæ experientia in corpore solo esse nequit, neque in sola anima, sed solum in subjecto composito ex utraque substantia. Sentimus præterea nos nisum exercere atque conatum ut corpus moveamus, non tantummodo id velle.

Ex his patet assertum de Malebranchii systemate.

175. Systema harmoniæ præstabilitæ Leibnitzium auctorem, Wolfium præcipuum patrocinatorum habet. Qui sic statuunt: anima vi sibi propria, sine ullo externo incitamento, et independentem prorsus a corpore, suas omnes perceptiones et appetitiones continuata serie producit, ita ut consequentis perceptionis seu appetitionis ratio sufficiens in antecedente perceptione seu appetitione semper contineatur. Idem dicendum de corpore. Corpus per se solum, sine ullo animæ influxu, suorum motuum seriem exsequitur, in qua pariter serie motus præcedens subsequentis est ratio sufficiens. Animæ igitur ita agunt ac si nulla essent corpora, et corpora ita agunt ac si nullæ existerent animæ. Nihilominus cuivis animæ tale corpus a Deo attributum est, quod singulis ejus affectionibus semper congruis motibus responderet. Ex hac præstabilita harmonia fit, ut binæ series independentes affectionum animæ et motuum corporis ita sibi consonent, ac si altera in alteram influeret. Plane, si magna licet componere parvis, ut contingit in puparum scenis. Alter pupam movet, alter verba recitat, uterque harmonice cum altero.

176. Jam 1° nemo non videt, physicam unionem ac natu-

ram humanam hoc quoque systemate penitus tolli. Mera enim consonantia actuum ac motuum non est physica substantiarum unio; præsertim cum et anima et corpus omnia agant sine ullo influxu mutuo, eademque, Wolfio fatente, servaretur inter animæ actus et corporis motus harmonia, si anima in uno loco degeret, v. gr. Romæ, et corpus in altero, puta Constantinopoli.

2° Hæc hypothesis et ipsa conscientiæ repugnât, ut hypothesis præcedens, et ex iisdem capitibus (174, 5°).

3° Tollit insuper libertatem omnem. Nam et actus animi et motus corporis ex præcedenti statu sive animi sive corporis sunt ad unum determinati.

4° Arbitrarie prorsus ac falso asseritur, rationem sufficientem status sequentis sive animi sive corporis, esse unice statum antecedentem. Nam sæpenumero ratio sufficiens affectionum nostrarum est nobis extrinseca. Quo negato, vides idealismo latam aperiri viam.

5° Illa demum vis corporis, bruta certe ac ratione carens, quæ sine ullo mentis influxu eos omnes exsequitur motus et actus, quos ab hominibus poni videmus, non modo sine ulla ratione asseritur, sed ad humanam rationem ludibrio habendam excogitata videtur. Lege Antonium Genuensem in tertia metaphysicæ parte (1).

177. PROPOSITIO VI. *Systema quoque physici influxus, seu causalitatis, nec animæ corporisque unionem explicat, nec a gravibus difficultatibus est immune.*

Systema hoc, satis communiter receptum, statuit animam agere in corpus seu in fluidum nerveum, determinando ipsum ad motum: et corpus in animam agere, determinando illam ad objectorum externorum perceptionem.

178. Sed 1° in hac quoque hypothesi humanæ naturæ perimitur unitas. Nam hæc mutua actio non facit ut ex duabus substantiis fiat unum operandi patiendique principium; quemadmodum ex eo quod in aliqua machina binæ partes in se invicem agant, non sequitur eas substantialiter unitas esse, unamque naturam efficere. Erunt itaque in homine

(1) C. II, *Systematis leibnitziani enarratio*.

binæ naturæ omnino distinctæ, ac proinde bina supposita, contra id quod supra demonstratum est (163, seq.).

2° Eadem hypothesis cum intimo sensu non bene cohæret. Nam licet v. gr. ad animi imperium facultas loco-motiva exerceatur, tamen, intimo teste sensu, non ita exercetur, ut anima corpus urgeat, quemadmodum externa corpora urgere solemus; sed subjectum illud unum, quod dicimus nostrum ego, se exerit ad motum contractione musculorum. Pariterque nemo unquam sensit corpus impressionem receptam in animam transferre, ac dein animam videre, tangere, dolere, sed sentimus omnes impressionem receptam, non in anima, neque in corpore, sed in corpore animato, statim ac illa recipitur, et in quacunque parte recipiatur.

3° Demum in hoc systemate illud est vehementer improbandum, quod corpus in animam agere statuat. Nam corpus movere quidquam nequit, nisi illi applicetur. Applicatur autem corpus objecto in quo agit, per quantitatis contactum. Sed quantitatis contactus exerceri non potest, nisi in alia quantitate. Atqui anima quantitate prorsus caret. Quomodo igitur corpus in animam agere poterit, et ita agere, ut et vim ejus perceptivam et vim appetitivam ad actum moveat?

179. Concludendum igitur, unionem corporis et animæ in mutua actione sitam non esse. Non agit una substantia in alteram, sed utraque substantia simul per modum unius agit ac patitur. Non est commercium inter animam et corpus, sed ex anima et corpore una est natura.

ARTICULUS V.

Sitne anima humana forma corporea, et quomodo.

180. Expendendum superest systema peripateticum, quo statuitur animam corpori conjungi ut forma materiæ. Quod quidem quomodo esset intelligendum, a diversis scholis, ut alibi diximus (15, seq.), diversimode explicabatur. At si præscindas ab iis quæ apud veteres semper controversa fuere, quæque nunc aliter, quam ab iis factum sit, ex physicæ principiiis definienda sunt, sententia illa veterum a doctrina quam supra tradidimus (162, seq.), nullatenus differt.

Primo itaque ex iis quæ dicta sunt, sententiæ hujus veritatem confirmabimus; deinde quomodo ea intelligenda sit determinabimus.

181. PROPOSITIO. VII. *Anima rationalis humani corporis est forma.*

Sane, si opinionum varietates seponas, materia apud aristotelicos est substantia incompleta, est subjectum recipiens formam, estque per se potentia solum habens esse illud quod per formam communicatur: forma vero est et ipsa substantia incompleta, quæ ad certum aliquem essendi actum materiam determinat, suique communicatione facit, ut sit actu illa essentia quæ prius in materiæ potentia fuit.

Atqui constat per se corpus esse hominem incompletum, constat ex dictis corpus ab anima totum penetrari ac repleri; itemque non habere ex se esse viventis: animam vero partem hominis esse, non totum hominem, eamque communicatione sui determinare corpus ad hoc ut actu vitam habeat, atque homo sit. Ergo anima humana vere dici potest ac debet corporis forma.

2º Idipsum deduces ex variis proprietatibus compositi ex materia ac forma, quas veteres cum Aristotele assignabant. Forma itaque, juxta veteres, dat substantiæ corporeæ esse simpliciter; forma ac materia in uno esse conveniunt; ex utraque fit unum per se; compositum ex utraque agit non ratione materiæ, sed ratione formæ, quæ ut est actus, ita est actionis principium.

Has omnes proprietates reperies in unione substantiali animæ et corporis, cujus veritatem supra demonstravimus. Revera anima dat homini esse simpliciter, videlicet esse talem substantiam, non esse secundum quid, seu esse aliquod accidentale (1): corpus item et anima in uno esse conveniunt, nempe in uno esse composito, quod est esse proprium hominis: ex anima et corpore fit unum per se; quia anima est actus et corpus est potentia; denique homo agit quæ suæ

(1) Quemadmodum substantia est ens simpliciter et accidens ens secundum quid; ita esse simpliciter est esse substantiam, et esse secundum quid est esse secundum accidens. Cf. Scotum. In IV sent. D. XI, q. III, § 43 et 50.

naturæ sunt propria, non ratione corporis, sed ratione animæ, quæ sensus, motus vitæque omnis principium est.

182. Concludere igitur oportet, animam, eamque rationalem 1º esse veram corporis formam, non metaphoricam (O. 507);

2º esse corporis formam per se, videlicet non per accidens nec per aliud. Non per accidens, quia naturaliter hanc aptitudinem et hoc munus habet, ut informando corpus, sit humanæ vitæ principium. Non per aliud, quia vita hominis propria non efficitur per aliquam aliam animam mediam inter corpus et spiritum, quæ virtute spiritus moveatur ac regatur, sed solum ab anima rationali dependet.

3º Hinc animam rationalem esse corporis formam immediate.

4º Demum eandem esse corporis formam essentialiter, tum ex parte ipsius animæ, quia hoc est de ejus essentia ut sit apta corpori informando; tum ex parte compositi, i. e. hominis, quia composito hujusmodi essenziale est, ut corpore tanquam materia, et anima rationali tanquam forma coalescat.

* 183. Pauca nunc de modo quo hæc doctrina intelligenda est; quæ facile deducemus ex alibi dictis.

1º Anima non ita est forma corporis, ut ipsum esse corporis, qua tale, ab anima dependeat (16). Corpus enim humanum constat tandem aliquando atomis substantiarum elementarium certo quodam modo compositis, et actu permanentibus. Vide dicta de principio vitæ in vegetalibus (33, seq.). Corpus igitur humanum, attenta sola ratione corporis, est substantia completa, imo aggregatum substantiarum; estque solummodo incompletum, attenta ratione animalis rationalis.

2º Neque idcirco admittenda est in humano corpore forma ulla corporeitatis (17) cum Scoto, neque formæ partiales nervorum, ossium, ac partium cæterarum juxta aliorum veterum sententiam. Nam corpus humanum est corpus vi cohesionis quæ atomi conjunguntur, et corpus tale efficitur per vires mechanicas et chemicas sub organismi conditionibus

(44, seq.), et sub animæ influxu (122, seq.) operantes.

3^o Hinc materia quam anima informat, non est materia illa prima, sed corpus organicum, seu potius nerveum systema, ac fluidum maxime nerveum (169, 1^o).

4^o Aliquid igitur dandum est veteribus thomistis, aliquid scotistis. Concedere debemus thomistis, nullam aliam formam esse in homine præter animam rationalem: concedere debemus scotistis, materiam quam anima informat, esse corpus organicum.

5^o Si quæras an anima dici debeat forma *substantialis*, respondebo in primis hanc vocem non tam declarare rem, quam declaratione egere; respondebo deinde posse animam dici formam substantialem; nam et ipsa substantia est, non accidens, et sui communicatione corpus collocat in certa substantiæ specie, nempe in specie viventis.

6^o Ex dictis colliges, theoriam materiæ ac formæ, quæ ex consideratione hominis et animalium primo deducta est, quousque in animalibus consistit, veritatem attingere; ac tunc solum a veritate deflectere, quum ab animalibus ad plantas et ad cætera corpora, analogiæ nimis extensæ vitio (L. 32^æ), transfertur.

* 184. Animam rationalem humani corporis formam esse, ecclesiasticis definitionibus non semel firmatum est. Primo quidem in concilio viennensi sub Clemente V, anno 1311, his verbis: « Porro doctrinam omnem seu positionem te-
« mere asserentem, aut vertentem in dubium, quod sub-
« stantia animæ rationalis seu intellectivæ vere ac per se
« humani corporis non sit forma, velut erroneam ac veritate
« catholicæ fidei inimicam, sacro approbante concilio, re-
« probamus; definientes, ut cunctis nota sit fidei sincera
« veritas, ac præcludatur universis erroribus aditus, ne
« subintrent, quod quisquis deinceps asserere, defendere,
« seu tenere pertinaciter præsumpserit, quod anima ratio-
« nalis seu intellectiva non sit forma corporis humani per se
« et essentialiter, tanquam hæreticus sit censendus (1). » Id-
psum confirmatum est in lateranensi Concilio, sub Leone X;

(1) Clement, *De summa Trinitate et fide catholica*. Tit. I, c. unic.

cujus hæc sunt verba: « Hoc sacro approbante concilio,
« damnamus, et reprobamus omnes asserentes, animam in-
« tellectivam mortalem esse, aut unicam in cunctis homini-
« bus, et hæc in dubium vertentes: cum illa non solum vere,
« per se, et essentialiter humani corporis forma existat,
« sicut in canone fel. rec. Clementis Papæ V prædecessoris
« nostri, in generali viennensi concilio edito continetur,
« verum et immortalis, et pro corporum quibus infunditur,
« multitudine, singulariter multiplicabilis et multiplicata,
« et multiplicanda sit (1). »

Novissime sanctissimus d. n. Pius papa IX in litteris apo-
stolicis ad cardinalem Geissel archiep. coloniensem datis
anno 1857, in quibus Güntheri errores damnat, inter cæteros
errores hunc quoque annumerat: « Noscimus, inquit, iis-
« dem doctrinis lædi catholicam sententiam ac doctrinam de
« homine, qui corpore et anima ita absolvatur, ut anima,
« eaque rationalis, sit vera, per se, atque immediata cor-
« poris forma. »

* 185. In his porro Ecclesiæ decretis notandum est, non
illud proprie definiri de quo modo agimus; scilicet animam
se habere ad humanum corpus, ut forma ad materiam; sed
hoc potius, quod ad quæstionem de animæ unitate pertinet:
animam rationalem esse eam animam, quæ in humano cor-
pore formæ munere fungitur. In hac itaque propositione
complexa: *Anima rationalis est forma humani corporis*, binæ
sunt distinguendæ propositiones (L. 184, 3^o): *Aliqua anima est
forma humani corporis*; et: *Hæc anima est anima rationalis*. Pro-
positio hæc altera affirmatur in decretis supra positis; prima
illa supponitur ut communis sententia. Id quod manifestum
est ex auctoribus quos damnant, et ex eorum erroribus.
Etenim tam viennense quam lateranense decretum latum
est contra averroistas quosdam (2), qui ponebant animam
quidem vegetativam et sensitivam esse hominis formam,
at substantiam intellectivam esse substantiam separatam,

(1) Sess. VIII. Can. *Apostolici regiminis*.

(2) Viennense decretum latum est contra Petrum quemdam Olivam; lateranense
contra Pomponatium.

quæ cum homine non conjungeretur ut forma, sed solum per species intelligibiles. Non erat igitur in controversia positum, an aliqua anima forma esset corporis, multoque minus qua ratione esset forma; sed hoc solum, an anima intellectiva forma corporis dici deberet (1). Erat autem maxime necessarium ut in tuto collocaretur hæc veritas: principium sensus in homine idem esse ac principium intellectivum; qua identitate sublata, et incarnationis divinæ mysterium, et animi immortalitas, et universa doctrina theologica de homine constare amplius non poterant.

* 186. Ex dictis hæc statui possunt.

1^o De modo quo anima est corporis forma, nihil unquam ab Ecclesia directe definitum est. Licet enim Ecclesia, quum animam rationalem formam corporis assereret, non alio sensu hanc locutionem accipere poterat, quam eo qui tunc communiter obtinebat; nihilominus, etiam hoc sensu retento, de modo quo anima est corporis forma, variæ opiniones esse possunt, prouti in scholis catholicis eo tempore reipsa vigeant. Proinde omnes istæ opiniones in Ecclesiæ decretis disjunctive supponuntur; ut sensus sit: anima rationalis est forma corporis, nempe hoc pacto, vel illo, vel aliquo alio, juxta varias sententias quæ in scholis catholicis vigent, atque adeo vigere possunt, salvo tamen sensu generali in quo omnes consentiunt. Atque idcirco fortasse Ecclesia nunquam dixit, animam rationalem esse formam *substantialem* corporis; sed statuit solum esse formam corporis; ne quis ex ea voce, quamvis immerito, ansam arriperet ad hoc, ut suam sententiam cæteris præferri existimaret.

2^o Nulla hinc opinio cæteris prælata, nulla damnata est. Quod et factum ostendit. Nullum enim catholica schola hac definitione unquam usa est ad suam peculiarem sententiam confirmandam, nulla se per illam vulnerari putavit; sed sententiæ omnes quæ prius vigeant, pacifice dein viguerunt, imo novæ quoque sententiæ sine ulla erroris suspicionem, ac nemine reclamante, prolatae sunt.

(1) Cf. quæ habet Porreclanus in Sum. th. S. Thom. p. I, q. LXXVI, art. 1.

ARTICULUS VI.

De humanæ personæ identitate.

187. Est hic locus, ut aliquid dicamus de humanæ personæ identitate, de qua famosa sunt Lockii deliria. Omnes quidem de humanæ personæ identitate consentiunt, sed quum definire volumus, quomodo sit hæc identitas explicanda, nonnihil difficultatis occurrit. Homo enim non est sola anima, sed anima corpori conjuncta. Ex his autem duobus, anima quidem quoad substantiam semper sibi identica est, corpus autem perpetuas mutationes subit.

Lockius (1) identitatem spiritus ab identitate hominis et ab identitate personæ distinguens, identitatem personæ in conscientia, seu potius in conscientiæ extensione constituit, ita ut tantum hanc identitatem patere arbitretur, quantum conscientia ad præterita facta se porrigens, ea sibi tribuit, et cum præsentis suo statu conjungit.

188. PROPOSITIO VIII. *Humanæ personæ identitas non est sita in conscientia, seu in conscientiæ extensione.*

Sane nemo negat, conscientiam esse medium quo unusquisque propriam identitatem cognoscit, ac de ea certus est. Est enim conscientia quæ in præsentem statum reflectens, eumque cum diversis statibus præteritis quos memoria conservat, comparans, identitatem agnoscit subjecti inter variabiles affectiones permanentis. Est igitur conscientia *medium*, quo personæ propriæ identitatem unusquisque cognoscit; hæc vero identitas est *objectum*, quod per ejusmodi medium cognoscitur. Lockius itaque personæ identitatem in conscientia collocans, medium cognitionis cum cognitionis objecto confundit; qua confusione nihil potest esse turpius philosopho. Quid enim diceret de eo qui colores esse oculum, aut antiquitatis monumenta esse artem criticam contenderet, quia colores oculo, et antiquitatis monumenta critica arte dignoscimus?

189. Quam vero falsa sit in se Lockii opinio, patet

1^o ex ingentibus absurditatibus, quæ ipsam consequuntur.

(1) *Intell. hum.* Lib. II, c. XXVII,

Si enim conscientia identitatem personæ constituit, oblivio personas in uno eodemque homine multiplicat: homo ebrius vel amens non est ille ipse qui sobrius erat suique compos: nemo est mortalium, cujus persona sit illa eadem quam mater utero gestavit ac peperit: actiones meæ quarum oblitus sum, ad me amplius non pertinent; proinde nec pœnæ ullæ mihi, nec præmia ratione illarum debentur; unde sola oblivio delictorum novum hominem facit, et ex reo innocentem. Quod si conscientia posset ex uno in alium hominem transferri, id quod Lockius, ut videtur, impossibile non censet, sequeretur et illud; ex multis hominibus unam personam fieri posse.

Apposite Reidius hanc fingit hypothesim (1). Est quidam miles, qui primis suæ vitæ annis ob quædam male facta vapulavit in collegio: dein quum primo stipendia meruit, signum hosti diripuit; serius supremus dux designatus est. Quum vero signum sustulit, recordabatur eorum quæ gesserat in collegio; quum dux factus est, recordabatur se signum sustulisse, sed e memoria illi exciderant plagæ in collegio receptæ. Ex principiis Lockii, puer qui vapulavit, eadem persona est ac ille qui signum sustulit; atque ille qui signum sustulit, eadem persona est ac ille qui factus est dux. Ex his porro duobus per identitatis principium consequitur, eum qui factus est dux, eandem personam esse ac puer qui in collegio vapulavit. Sed quoniam hujus rei dux memoriam non servat, concludendum quoque est, ducem et puerum eandem personam non esse. Dux igitur est et non est eadem persona quæ vapulavit.

2^o Directe. Persona non est ulla facultas, nec ullus actus, sed est substantia completa. Hoc est certissimum et ex communi sensu, et ex alibi dictis (169, 4^o; O. 166, seq.) Non ergo in hominis conscientia, sed in ejus substantia humanæ personæ identitas quærenda est.

190. PROPOSITIO IX. *Humanæ personæ identitas ex his tribus conjunctim consurgit; 1^o ex identitate absoluta quoad animæ substantiam; 2^o ex identitate physica, quæ vegetaliū propria, quoad*

(1) Essay III, ch. IV.

corpus; 3^o ex identitate modi quo binæ substantiæ simul unitæ sunt.

Sane, persona humana est substantia composita hominis individui, prout in se est aliquid integrum atque completum. Liqueat ex dictis (O. 166, seq.). Igitur eadem manente individua hac substantia, eadem manet humana persona. Atqui substantia composita eadem manet, si et componentia manent eadem, et unionis ratio eadem perseveret. Essentia enim substantiæ compositæ certa certarum partium conjunctione continetur (O. 164, 1^o). Ergo si eadem manet anima, idem corpus, eadem utriusque conjunctio, eadem quoque manet humana persona.

191. Jam anima, quoniam substantia est simplex et quantitate carens, licet quoad modos qui in ea sibi succedunt, jugiter mutetur, quoad ipsam tamen substantiam absolute immutabilis est. Corpus autem humanum, cum sit compositum organicum, eam servat identitatem quæ hujusmodi compositorum est propria; quæque in eo sita est, ut particulæ sensim in organismum invectæ, cum organica massa ita commisceantur, ut hæc ad sensum sit stabilis, organismus, figura, functiones essentielles sensibilem mutationem non patiantur, ac status sequens organicæ vitæ sit status antecedentis effectus. Demum unionis ratio inter animam et corpus est jugiter eadem: quomodocunque enim corpus immutetur, semper illi anima ut forma conjungitur.

192. Non est igitur necessarium ad humanæ personæ identitatem tuendam, ut existimemus cum Bonneto (1) aliisque auctoribus, animam humanam germi cuiusdam subtiliori et immutabili conjunctam esse, quod nunquam dissolvatur, nunquam ab ea, ne per mortem quidem separetur; quæ quidem hypothesi et prorsus arbitraria est, et suis non caret incommodis.

(1) In Palingenesia et alibi.

CAPUT IV.

DE ANIMÆ HUMANÆ ORIGINE.

ARTICULUS I.

De originis modo.

193. Demonstrata animæ hujus nostræ simplicitate ac spiritali natura, operosum non foret de ejus origine decernere; nisi erroneæ plurium opiniones, quæ refellendæ occurrunt, negotii aliquid afferrent. Et quoniam hujusmodi errores alii spectant originis modum, alii tempus, de utroque argumento distincte dicendum est.

194. Ad primum quod attinet, testatur Tullius, docuisse Pythagoram, ex Deo animos nostros decerpi (1): idem opinati sunt stoici, ac serius manichei; dein omnes qui plus minusve pantheismum sectati sunt.

Error est alter traducianorum; quorum duces exstiteret Tertullianus maxime et Apollinaris. Hi statuebant animam a parentibus in filios per generationem propagari ac *traduci*: atque hoc pacto se originalis reatus diffusionem explicare posse autumabant.

Hisce erroribus opponitur vera sententia, docens animam humanam omnem a Deo immediate produci per creationem ex nihilo.

195. PROPOSITIO I. *Error est absurditate plenus, animam humanam e divina substantia decerpi, aut ab ea utcunque dimanare.*

Sufficiat referre quæ contra hunc errorem scripsit s. Augustinus: nam de pantheismi monstro in theologia uberius disseremus.

Sic itaque disserit Augustinus contra manicheos: « si » anima substantia Dei est, substantia Dei errat... substantia » Dei violatur, substantia Dei decipitur, quod nefas est

(1) *De nat. Deor.* Lib. I, c. XI.

» dicere (1). » Et alibi: « Non est pars. Dei anima :... quod » si esset, nec deficeret in deterius, nec proficeret in melius, » nec aliquid in semetipsa vel inciperet habere quod non » habebat, vel desineret habere quod habebat quantum ad » ejus ipsius affectiones pertinet. Quam vero aliter se habeat, » non opus est extrinseco testimonio. Quisquis semetipsum » advertit, agnoscit... Non est itaque natura incommutabilis, » quæ aliquo modo, aliqua causa, aliqua parte mutabilis » est. Deum autem nefas est nisi vere summeque incommu- » tabilem credere. Non est igitur anima pars Dei (2). »

196. PROPOSITIO II. *Anima humana non est ens a se, sed ab alio.*

Ens enim a se est infinitum, ut in theologia demonstratur. Anima autem humana est multipliciter finita. Ens a se est immutabile absolute; anima est mutabilis, ac perpetuo mutatur.

Si anima humana non est ens a se, non est absolute necessaria, est contingens. Est ergo ab alio producta (O. 369, II).

197. PROPOSITIO III. *Animæ humanæ non propagantur per traducem.*

Nam vel a corpore parentum animæ filiorum traduci dicuntur, vel ab anima: itemque vel per educationem ex alterutra substantia, vel per alterutrius substantiæ actionem. Quidquid autem dicatur, aliquid absurdum dicitur.

1º *Non enim possunt filiorum animæ educi ex parentum corpore.* Nam substantia simplex et spiritalis e substantia composita, extensa, inertis, quæque proprietates habet naturæ spiritus prorsus oppositas, decerpi, erui, aut quomodocunque educi nequit.

2º *Non possunt educi ex parentum anima.* Anima enim parentem simplex est, et in partes resolveri non potest. Repugnat igitur, partem aliquam ex ea decidi aut effluere, atque alteri communicari.

3º *Non possunt produci actione substantiæ corporeæ.* Corporea namque substantia non agit, nisi præexistentem ma-

(1) *Contra Fortunatum Manich.* Disp. I, § XI.

(2) *Epist.* CLXVI, § 3.

teriam transformando, nempe materialia elementa movendo, associando, dissociando. Anima autem cum sit simplex, ex materiæ transformatione, elementorumque analysi aut synthesisi oriri nequit.

4^o *Non possunt produci actione animæ parentum.* Vel enim parentum animæ animas filiorum ex præexistente materia effingerent, vel ex nihilo educerent. Atqui primus productionis modus animæ producendæ naturæ repugnat, ut patet; alter producentium vires longesuperat; creatio enim infinitam virtutem postulat. Sed hoc omisso, si quis diceret animam filiorum creari ex nihilo a parentibus, hic certe ad traducianorum sectam non pertineret. Creatio enim non est transfusio nec traductio.

198. Forte dices, si elementa corporum puncta simplicia esse supponantur, sententiam hanc non adeo absurdam videri. Potest enim unum aut alterum ex iis elementis a parentibus in prolem transmitti, et intelligentia ac voluntate a Deo ornari.

Exceptionem hanc jam supra præoccupavimus (106; 2^o, 3^o, 4^o; 87, 3^o; C. 50). Neganda prorsus omnia: negandum in primis, hæc puncta per se exsistere posse et esse aliquid. Deinde si quod punctum hujusmodi exsistere posset et esse aliquid, hoc profecto nec corpus informare posset, quia punctum determinatum situm in spatio habet, proindeque non potest occupare nisi punctum: nec sentire, quia punctum nec superficiem contingere potest, nec punctum: nec demum intelligere, quia intelligentia requirit subjectum a materiæ conditionibus prorsus exemptum. Hæc omnia ex dictis satis intelliguntur.

199. Adverto præterea, etiam ex eo sententiam hanc rejiciendam esse, quod consecraria habeat absurditatis non minus quam periculi plena. Si enim ex elemento materiali fieri potest anima intelligens, quid vetat quominus dicamus ex anima intelligente fieri iterum posse elementum materiale, aut ens sola vi sentiendi instructum? Quibus semel positis, essentialia inter materiam et spiritum discrimen tollitur; brutorum animæ ab anima hominum non differunt, nisi per accidens,

et animæ nostræ immortalitas in dubium facile revocabitur.

200. Objici quoque solet: 1^o Parentes, si animam proli non communicant, hominem non generant, sed solummodo hominis corpus.

2^o Animam filiorum a parentibus derivari, suadere videtur similitudo indolis ac propensionum, quæ in iisdem cernitur.

201. Resp. ad 1^m *Nego.* Generatio passiva hominis sita est in unitione animæ cum corpore. Ad hanc autem unitiorem et parentes et Deus concurrunt. Parentes per hoc quod materiam disponunt ad animam rationalem recipiendam; ita ut ex naturæ lege exigat ea informari. Deus autem concurrat animam rationalem creando. Tamen parentes solummodo vere ac proprie hominem generare dicuntur; quia terminus actionis eorum est individuum ex eorum substantia, ipsisque simile quoad naturam: Deus autem per hoc quod facit in hominis generatione, hominem generare non dicitur, quia homo nihil accipit de substantia divina, neque quoad naturam est Deo similis.

Ad 2^m *Nego.* Ad explicandam namque eam indolis ac propensionum similitudinem, quæ tamen non semper inter parentes natosque deprehenditur, satis est quod nati a parentibus quoad corpus dependeant. Ex corporis enim temperamento pendet facultatum organicarum varia conditio, et ex hac indolis ac propensionum varietas.

202. PROPOSITIO IV. *Anima humana produci nequit aliter quam per creationem ex nihilo.*

Anima enim est substantia simplex. Substantia autem simplex non potest ex præexistente subjecto produci, sed solum ex nihilo absolute, ut constat ex alibi demonstratis (O. 372). Ergo.

Cum autem solus Deus virtutem creandi possideat, ut in theologia demonstrabitur, anima humana immediate a Deo producatur necesse est.

ARTICULUS II.

De originis tempore.

203. Queritur jam quo tempore anima a Deo creetur. Pythagoras, Socrates, Plato arbitrati sunt animas omnes in mundi exordiis a Deo genitas fuisse, easque in astris primum collocatas peccasse, atque idcirco corporibus tanquam carceribus fuisse inclusas, hac lege, ut quæ sancte vitam egissent, e corpore egressæ in suum astrum reverterentur ad beate vivendum; quæ vero male egissent, iterum in corpora inferioris conditionis migrarent, atque adeo in bruta permutarentur. Hunc animæ transitum a corpore in corpus vocant *metempsychosin*. Opinionem hanc apud orientales populos, Chaldaeos maxime et Ægyptios, a vetustissimis temporibus viguisse, eruditi testantur.

Paganam hanc doctrinam de animarum præexistentia a platoniceis haustam inter christianos intulit Origenes; de cujus sectatoribus hæc scribit s. Augustinus: « animas dicunt, » non quidem partes Dei, sed factas a Deo, peccasse a conditore recedendo; et diversis progressibus pro diversitate » peccatorum a coelis usque ad terras diversa corpora, quasi » vincula meruisse. Et hunc esse mundum, eamque causam » mundi fuisse faciendi, non ut conderentur bona, sed ut » mala cohiberentur (1). »

Alio modo præexistentiam animarum docuit Leibnitzius. Ejus sententia fuit, sive serio sive joco prolata, parum refert, omnes futurorum hominum animas esse monades ab initio mundi cum cæteris creatas, et in organico corpusculo inclusas: in hoc statu sola facultate sentiendi esse præditas, donec homines illi quorum animæ futuræ sunt, procreentur; tunc eas intellectu ac ratione ornari.

204. Communis autem sententia est, animam tunc creari quum in fœtum infunditur, quanquam variæ sint opiniones circa tempus quo infunditur. Celebris est opinio s. Thomæ

(1) *De civ. Dei*, lib. XI, c. XXIII.

ac plurium scholasticorum (an tamen fuerit Aristotelis dubium est) fœtum prius animari anima vegetativa; deinde, hac expulsa, succedere illi sensitivam; ac demum hac quoque ejecta, quum corpus aliquam perfectionem attingit, animam rationalem in ipsum immitti. Plurimi tamen huic opinioni omnitempore contradixerunt, quæis ratum erat, fœtum humanum non alia anima informari quam rationali, quanquam hæc juxta variam corporis dispositionem prius vegetativas solum functiones, deinde etiam sensitivas, ac tandem intellectivas exerceat.

In præsentī quoque opiniones alia ratione dividuntur. Multi existimant fœtum anima non informari, nisi quum organis in eo essentialibus efformatis ac evolutis, ad vitales operationes exercendas, idoneum efficitur. Alii vero sentiunt, in ipso conceptionis momento animam a Deo creari, et corpori conjungi.

205. PROPOSITIO I. *Animæ humanæ nec ante mundum corporeum, nec in mundi exordiis, nec ante corpora quæ ab iis informanda erant, productæ sunt.*

1º Uti possumus argumento s. Thomæ in re simili. « Manifestum est, inquit, quod Deus primas res instituit in perfectio statu suæ naturæ, secundum quos uniuscujusque rei » species exigebat. Anima autem, cum sit pars humanæ naturæ, non habet naturalem perfectionem, nisi secundum » quod est corpori unita. Unde non fuisset conveniens animam sine corpore creari (1). »

2º Doctrina de præexistentia animarum cum illa altera nectitur: animam non esse natura sua aptam natamque ad hoc ut cum corpore uniatur, hinc corpori non uniri unitione physica et substantiali, sed tantum accidentali, et ut motor mobili (170). Si enim animæ tanto tempore antequam corporibus conjungerentur, productæ sunt, tantoque tempore absque corporibus vixerunt: vere ac serio, quærendum jam est cur dein in corpora immissæ fuerint. Non enim potest amplius ea reddi ratio: quia animæ ad hoc conditæ sunt, et

(1) *Summ. th.* p. I, q. XC. art. IV, — Cf. *Contra Gent.* lib. II, c. LXXXIII.

hoc esteis naturale, ut corporibus uniantur. Fingenda itaque erit aliqua hypothesis, ut explicetur cur animæ, præter sui naturam vel etiam contra, corporibus inclusæ sint; id quod exemplo suo philosophi quos refellimus, confirmarunt. Igitur ex doctrina hac necessario infertur, unionem animæ cum corpore naturalem non esse, proinde non substantialem, sed accidentalem. Hæc autem positio falsa est, ut supra demonstravimus (171). Ergo.

3^o Animæ antequam corporibus unirentur, vixissene dicuntur vita sibi propria, an secus? Non vixisse vix concipi potest. Sed fac non vixisse: cur ergo tanto ante tempore conditæ sunt? Si vero vixerunt, si multa intellexerunt, voluerunt, fecerunt; cur aut quomodo eorum omnium oblitiæ sunt? Nunc sane anima actuum facultatum inorganicarum quos exercuit in corpore, oblivisci potest, quia actus hujusmodi aliquo modo a phantasmatis dependent; unde oblitteratis organorum vitio phantasmatis, memoria intellectiva suo fundamento destituitur; ast actus quos anima extra corpus posuit, nullo modo a phantasmatis dependent: non potest igitur ex corporis influxu eorum memoria deleri. Horum igitur actuum memoria ex conjunctione cum corpore deleri non poterat, sed indelebilis permaneret.

4^o Postremo, doctrina de animarum præexistentia nulli nititur fundamento, ut patebit ex consideratione rationum, quas varii hujus doctrinæ patroni adducebant.

206. Aiebant enim 1^o Animæ sunt corporibus nobiliores. Eas ergo post corpora produci non decuit.

2^o Indignum Deo videtur ut omnibus generationibus invigilet, ad momentum captandum quo animam creare debeat. Ita pythagorici.

3^o Homines quum artes scientiasque addiscunt, nihil vere novi addiscunt, sed eorum quæ ante didicerunt, reminiscuntur. Ita Socrates

4^o Addebant origenistæ, ac deinde Wolfius repetiit: Si Deus *die septimo requievit ab universo opere quod patrarat* (1), nullam amplius rem in præsentia creat.

(1) Gen. II, 2.

5^o Denique hæc erat platonice atque origenistis usitatissima ratio: intelligi non posse, cur Deus animas in hæc tam miseranda corpora immittat, nisi supponamus, eas aliquo scelere a se patrato hoc sibi malum esse promeritas.

207. Quisque perspicit, non difficulter hujusmodi rationes refutari posse.

Resp. ad 1^m *Nego consequentiam*. Quis enim demonstraverit, ea quæ nobiliora sunt, prius creari debuisse? Imo vero si res inferiores ad præstantiores ordinandæ sunt, dicendum potius, quæ præstantissima sunt, post omnia condici oportere; finis enim in ordine executionis est ultimus. Ac revera inter ipsas res corporeas, prius inorganica corpora, deinde plantæ, deinde animalia, ac postremo hominem conditum esse et sacræ litteræ, et geologia docent (C. 318, seq.).

Ad 2^m *Nego*. Quod enim Deus singulis generationibus intersit, indignum eo non est; nec mirum esse debet iis qui noverunt, Deum omnia perpetuo conservare, et cum omnium agentium operationibus semper concurrere, quin tamen anxietate ulla sollicitetur aut labore lassescat.

Ad 3^m Scientiam hominis esse reminiscientiam affirmabat Socrates; at quo jure hoc affirmatur, eodem negatur. Affirmatur enim, sed non probatur, nec probari potest.

Ad 4^m Nulli ignotum est, quomodo divina illa *requies* de qua Genesis loquitur, intelligenda sit. Requievit nempe Deus a mundi fabrica; quatenus nova deinde rerum genera non condidit amplius, sed res conditas administrare cœpit juxta leges a se præstitutas.

Ad 5^m *Nego*. Negationis ratio exponetur in sequenti propositione.

* 208. PROPOSITIO II. *Irrationabiliter prorsus asseruere platonici et origeniani, animas hominum corporibus inclusas fuisse in anteactorum scelerum pœnam.*

Etenim 1^o si hoc pacto res se haberet, animæ conjunctio cum corpore non esset naturalis unio, sed violenta. Atqui conjunctio animæ cum corpore est prorsus naturalis. Anima enim ex se aptitudinem habet ad hoc ut corpori uniatur, et

corpus vicissim ut uniatur animæ: utraque insuper substantia hac unione perficitur, unamque naturam conjunctæ constituunt. Ergo hæc utriusque conjunctio violenta non est.

2º Consideratio humani corporis ac totius adeo mundi corporei profecto non iram conditoris, sed summam benevolentiam ostendit. Nulla certe est pars in humano corpore, quæ ex se ad hominis bonum mirificè aptata non sit. Quæ vero sunt extra nos, in eum finem nobis collata se produnt, ut continenter nostræ necessitati, utilitati, oblectamento subserviant.

3º Si corpus est animæ carcer, nihil magis desideraret anima, quam ab his vinculis liberari, ac mors non esset pœna, sed pœnæ finis. Atqui homines naturaliter vitam amant mortemque refugiant, et tam apud Deum quam apud homines mors rationem pœnæ habet, ac vitæ protactio beneficii loco habetur. Ergo.

Dici quidem solet, præsertim a piis viris corpus animæ carcer; neque hæc locutio improbanda ullo modo est, ut ab iis accipitur. Corpus enim animæ carcerem appellant, non quia simpliciter malum sit animæ esse corpori conjunctam, sed ratione boni majoris quam sit vita præsens, quod bonum juxta hunc providentiæ ordinem assequi non possumus, nisi prius mortem subeamus. Quare ex hoc loquendi modo non infirmatur argumentum modo allatum, sed potius confirmatur. Quanquam enim bonum suum maximum in hac vita homo assequi non possit, tamen vitæ hujus conservatio et protractio et a Deo et ab hominibus in beneficiorum numero computantur.

4º Demum quam stulte et crudeliter hæc pœna infligeretur, quæ tunc animabus ad emendationem infligitur, quum scelerum a se patratorum prorsus oblitæ sunt! Justæ enim ac sapientis pœnæ ratio postulat, ut qui pœna afficitur, agnoscat se puniri, præsertim si ex pœna quam patitur, ad scelus detestandum, illudque in posterum cavendum moveri debeat. Quis igitur dicat, hujusmodi pœnam a Deo infligi potuisse!

* 209. Quod vero attinet ad dolores et ærumnas, quibus in præsentī vita anima subicitur, in primis falsum est, dolores solummodo et ærumnas ex sua cum corpore conjunctione animæ obtingere. Nam multa quoque bona ex hac conjunctione anima consequitur; per organa enim corporea quasdam exercet facultates quas sine illis exercere non posset; cæteris vero facultatibus quæ organo corporeo non indigent, offertur a sensibus objectum ipsis proportionatum, ut in actus suos erumpant, ac in seipsis perficiantur. Mitto alia. Quod si quibusdam malis homo est obnoxius, hinc utique inferemus, præsentem vitam ultimum hominis finem non esse, sed solum palestram ad merendum ipsi attributam; inferemus quoque hominem in hac vita indigere stimulo ac medicina; sed nullo jure inferre licebit, animas in hac vita pœnas luere delictorum quorum sibi consciæ non sunt. Cæterum de hujus vitæ malis fusius disputabitur in theologia.

* 240. PROPOSITIO III. *Improbanda quoque est Leibnitzii opinio de animarum præexistentia in corpusculis seminabilibus.*

Nam 1º juxta hanc opinionem nulla proprie est generatio hominis, nulla mors. Animæ enim humanæ sunt alicui corpori conjunctæ a rerum principio, ab eoque nunquam posthac separabuntur. Generatio autem animalis continetur conjunctione animæ cum corpore organico; ac mors separatione unius ab altero. Juxta Leibnitzium vero in generatione augetur solummodo corporis moles, et in morte imminuitur. Hæc autem sunt omnino contra sensum communem, notionesque ab omnibus receptas.

2º Cur corpuscula illa in humanum corpus excrescant, Leibnitzius dicere nequit. In ejus enim sententia, animæ et intelligunt et operantur independentes prorsus a corpore (175). Quid ergo opus est, ut quum intelligentiam adipiscuntur, seminalia corpuscula augeantur?

3º Hæc opinio connectitur cum leibnitziano systemate de corporum natura, quod suo loco refutavimus (C. 47). Sed hoc prætermisso, quis non videat quam absurde statuatur, omnes, monades ejusdem esse naturæ ac anima rationalis;

rationemque esse veluti quamdam perfectionem adventitiam, quæ esse et abesse possit salva natura? Atqui facultates entium in ipsa essentia radicem habent; esto quod possint vi adjunctorum impediri ne ad actum deveniant. Igitur si quæ sunt facultates quarum essentia sit capax, hæ semper ac necessario illam comitantur; si quæ vero sunt quæ illam non semper, aut non necessario consequantur, essentia est earum incapax.

Missa facio alia plura quæ afferri possent, ex dominicæ præsertim incarnationis mysterio. Satis enim liquet ex dictis, theoriâ hanc et arbitrariâ esse, et nullo pacto defendi posse.

* 211. PROPOSITIO IV. *Pythagorica metempsychoseos doctrina inter humanæ mentis aberrationes merito adnumeratur.*

1^o Doctrina hæc supponit animæ cum corpore unionem violentam esse ac pœnalem; quæ hypothesis vana est et absurda, ut probatum est (208).

2^o Eadem doctrina nec probatur, nec probari potest. Non enim probari potest a priori. Quis enim probaverit, ex notitiis Dei, animæ, corporis, peccati, præsentis vitæ, et similibus, animarum ab uno in aliud corpus migrationes illas inferri? Nec probari potest experientia. Omnes enim quum in nova corpora immittimur, præteriti status prorsus obliviscimur, si Pythagoram et quosdam alios excipias, qui singulari privilegio nonnihil de præteritis sæculis reminiscuntur (1). His proinde credendum erit.

3^o Habetur quoque in hac pœnali transmigratione absurditas illa quam supra notavimus; pœna nempe ei illata, cui omnis scelerum memoria adempta sit.

4^o Illud nominatim in hoc figmento rationi repugnat, quod anima hæc nostra belluino corpori æque ac humano conjungi, et utrumque indiscriminatim vivificare posse dicatur. Ex hoc enim sequitur, unionem animæ humanæ cum hoc corpore naturalem non esse; et hoc corpus ejusmodi animæ non ut proportionatum instrumentum conjungi, sed ut pon-

(1) Laërt. *De vitis phil.* Lib. VIII.

dus asportandum utcunque applicari; proindeque hominem compositum substantiale non esse. Præterea si animæ humanæ in brutorum corporibus habitant, jam bruta personarum jura possident, nec sunt amplius res, quibus pro arbitrio uti possimus. Denique, ne plura consector, animæ humanæ in belluina corpora dejectæ, vel rationales facultates servant, vel secus. Si servant, falsum est bruta intellectu et ratione carere, quemadmodum supra demonstratum est (71, seq.): si non servant, quomodo facultates quæ ab essentia animæ dimanant, quæque organis corporeis non indigent, ab anima divelli possunt?

212. PROPOSITIO V. *Anima humana creatur quum corpori conjungenda est.*

Est corollarium ex præcedentibus. Si enim animæ a rerum exordio conditæ non sunt, cur postea creari debuerint, anti-quam corporibus conjungerentur? Pars profecto est propter totum. Si ergo intentio naturæ est ut hominem producat, anima est propter hominem; ac proinde tunc animam creari oportet, quum procreandi hominis tempus advenit. Homo autem procreatur, quum corpori anima conjungitur.

213. Quo autem tempore animam corpori conjungi dicendum sit, ut dixi, opiniones discrepant. Certe necessarium est, animam, eamque rationalem, in corpus jam esse infusam, quum fœtus dynamicos motus (52) exercere incipit. Hi enim motus ab anima sensitiva dependent; quæ anima in homine non est a rationali distincta. Probabilius est autem, infundi animam in ipso conceptionis momento: 1^o quia tunc ex communi hominum sensu homo procreari dicitur; 2^o quia ad functiones vegetativas in animali perficiendas animæ quoque influxus verosimilius requiritur, ut in præcedente libro dictum est (124, seq.). Igitur quum fœtus vitam vegetativam sibi propriam vivere incipit, anima informetur oportet; præsertim cum in prima potissimum corporis formatione animam influere debere, non difficulter suadere sibi quisque possit.

CAPUT V.

DE ANIMA HUMANÆ IMMORTALITATE.

ARTICULUS I.

Utrum anima possit a corpore separata esse et vivere.

214. Superest ut de animæ humanæ duratione inquiramus; an videlicet ejus existentia ac vita hujus vitæ angustis, imo an certis aliquibus contineatur limitibus, an vero sempiterna futura sit. Maxime vero interest ad gravissimam hanc quæstionem pro merito explicandam, veritatemque dilucide confirmandam, ut per quosdam quasi gradus procedamus. Primo itaque quæremus, an possit anima humana a corpore separata existere ac vivere: secundo qua ratione posset existentia vitæque privari; tertio an reipsa futura sit funeri superstes; quarto an sit immortalis vita fruitura.

215. PROPOSITIO I. *Anima humana potest a corpore separata existere ac vivere.*

Potest existere. Est enim substantia a corpore distincta, non corporis accidens aut aliquid ipsi utcumque inhærens, ut supra demonstratum est. Igitur ejus existentia a corpore non dependet; potest ergo existere a corpore separata, quemadmodum et corpus ejusque elementa post separationem ab anima existere pergunt, quia substantiæ sunt.

216. *Potest vivere.* Propria enim animæ vita continetur actibus intelligentiæ ac voluntatis, qui sunt actus vitales omnium nobilissimi. Igitur si potest anima a corpore secreta hosce actus exercere, ea profecto vivere potest.

Atqui ad hosce actus exercendos, non deest illi in eo separationis statu nec potentia nec objectum.

Nec deest illi *potentia*: quia tam intellectus quam voluntas, ut supra vidimus (98, seq.), non sunt facultates compositi propriæ, atque organis corporeis indigentes. Possunt ergo in anima permanere, etiamsi ipsa a corpore separetur. Imo vero cum in ipsa animæ essentia radicem habeant, fieri

nequit ut manente anima, ipsæ non maneant. Quamdiu igitur anima existentiam suam continuabit, tandiu his facultatibus ornabitur.

217. Non deest illi *objectum*; imo multiplex in promptu est.

Ac 1^o quanquam objecta corporea per sensiles impressiones non possit amplius percipere, potest tamen in ipsorum intelligibilibus rationibus illa contemplari. Nonne puri spiritus, imo et Deus hoc pacto corpora cognoscunt?

2^o Nobilissima illa objecta, quæ adeo mentum rapiunt, veritatem, virtutem, Deum, eo melius nunc intelligimus et contemplamur, quo magis mentem a sensibilibus abstrahimus. Ergo multo melius ac latius hæc contemplari poterit animus, quum fuerit omnino a corporis impedimento solutus.

3^o Cumque animus sit sibi ipsi intime et essentialiter præsens, potest semper in semetipsum intelligentia reverti, suasque affectiones advertere, relegere, comparare, ex iisque ratiocinari, etc.

4^o His adde ideas omnes cognitionesque quas in vitæ hujus stadio sibi comparavit, quarum memoriam intellectivam spiritus conservabit.

5^o Postremo, novus ille status, ac societas illa spirituum nova suggeret objecta cognoscenda, novosque cognoscendi modos suppeditabit.

218. Si autem hæc omnia intelligentiæ suppetent objecta, jam nec voluntati objectum deesse potest. Potest igitur voluntas animæ separata, pro suo statu ac conditione, affectus omnes experiri actusque exercere, quos hæc objecta excitant.

219. Objici solet ad hæc: 1^o Nulla est in mente cogitatio sine præcedente sensatione; 2^o nulla imo idea sine phantasma. Sed nulla sensatio sine corpore, nullumque phantasma. Igitur sine corpore nulla erit in mente cogitatio, nulla idea.

Resp. quoad 1^{am} partem. *Dist. maj.*: Nulla cogitatio in mente est sine præcedente sensatione: et hoc provenit ab intrinseca dependentia cognitionis a sensatione, *nego*; a dependentia extrinseca et pro præsentis mentis statu, *conc.*

220. Cum sit mens corpori conjuncta, in eoque propemo-

dum demersa, omnis ejus cognitio de rebus a se distinctis, cum sensatione incipiat necesse est. Igitur sensatio est occasio, seu etiam conditio, quæ in præsentī statu vim excitat intellectivam, objectum ipsi primo proponens. Non est autem conditio necessaria ad cogitandum deinceps, etiam in præsentī statu; ad hoc enim sufficiunt phantasmata quæ imaginatio reproducit: multoque minus est conditio ex se, et absolute necessaria ad intelligentiæ exercitium. Quomobrem inferri nequit, animam a corpore solutam non posse quidquam cogitare, quia sensationibus caret; quemadmodum ex eo quod homo domi manens, cælum nequit aspicere, nisi fenestram aperiāt, inferri nequit, eundem non posse deinde cogitare de cælo fenestris clausis; multoque minus, si domo egrediatur videre cælum non posse, quia fenestras non habet quas aperiāt.

Quomodo vero mens a corpore separata objecta cognoscere poterit non est explicare necessarium sufficit illud: Deum, qui modo per sensationes objecta menti offert, posse immediate, et per species a seipo communicatas, mentem ad cognoscendum determinare. Confer quæ sublimissima illa Aquinatis mens hac de re vere mirabiliter disputat (1).

221. Quoad 2^m partem, *dist. maj.* Nulla idea sine phantasmate, ex connexionē intrinseca et absoluta, *nego*; ex connexionē extrinseca et pro præsentī statu, *conc.* Est videlicet ex unitiōne animi cum corpore, non ex cogitationis natura.

ARTICULUS II.

Utrum anima ab aliqua vi creata destrui possit.

222. PROPOSITIO II. *Anima humana a nulla vi creata potest existentia vitæque privari.*

Non potest privari *existentia*. Etenim duobus modis, ut in ontologia dictum est (O, 372), substantia perire potest, vel corruptione vel annihilatione. Corrupti autem nequit sub-

(1) *Summ th.* p. I, q. LXXXIX, coll. q. LV.

stantia, nisi partibus constet: corruptio enim est compositi dissolutio. Anima igitur humana, ut quæ simplex substantia est ac partibus non constans, incorruptibilis est. Hinc non aliter amittere existentiam potest, quam per annihilationem.

Ast annihilationis causa solus Deus esse potest: ipse enim solus res creat et conservat. Solus ergo Deus, non aliqua creata vis, animam humanam existentia privare potest.

223. Sed fac esse vim creatam, quæ aliquid in nihilum redigere valeat. Certe cum omnis vis creata sit a Deo dependens, ejusque providentiæ ac potentiæ subjecta, si Deus absolute vult animam humanam post hominis mortem existere, nulla vis, etiamsi posset, eam perimere valebit. Deus enim cui nihil resistit, hoc impedit. Jam mox demonstrabimus, Dei voluntatem absolutam esse, ut anima hominis post mortem existat ac vivat. Ergo.

Eodem pacto concludere adhuc poteris, etiamsi anima corporea esset et corruptibilis, si tamen Deus vellet eam esse sempiternam, causas quascunq̃ue ipsi destruendæ dissolvendæque impares fore.

224. Non potest privari *vita*. Nulla enim creata vis cogitandi facultatem ac volendi ab anima humana divellere potest: facultates enim hujusmodi cum ab ipsa ejus essentia necessario dimanent, nec organis indigeant corporeis, avelli ab ipsa nequeunt, nisi ipsa destruat.

Nulla item creata vis objectum omne his facultatibus præripere valet, aut inter ipsas et objectum impedimenta ponere. Nam objecta hujusmodi, saltem præcipua, vel sunt animæ ipsi interna (217, 5^o, 4^o), vel sunt mere intelligibilia (217, 1^o, 2^o), ac divini luminis immediata participatione animæ manifestari possunt (217, 5^o; 219).

Ac præterea si Deus efficaciter vult animam vivere, nulla vis hanc vitam impedit, etiamsi per se posset.

225. Obj. I. Anima potest existentiam amittere. Nam:

1^o Omne quod oritur, perire potest.

2^o Quod est contingens, ex se in nihilum tendit. Anima autem humana contingens est.

Resp. ad 1^m *Dist.*: quod oritur per compositionem ex pluribus, *conc.*; quod per solam creationem, *subd.*: perire potest corruptione, *nego*; annihilatione, *conc.*

Ad 2^m *Dis. maj.*: quatenus indiget causa conservante, ut creante indiguit, *conc.*; secus, *nego*. *Conc. min.* et eodem modo *Dist. cons.*

226. Obj. II. Anima 1^o habet morbos suos puta ignorantiam, dementiam et vehementissimarum febres cupiditatum. Morbi vero sunt corruptionis initium.

2^o Quamvis perimi non possit per partium dissolutionem, potest tamen per successivam remissionem in gradu suæ realitatis evanescere, et in nihilum abire.

3^o Eoque magis quod, experientia docente, potest anima suas interdum facultates amittere, ex. gr. memoriam, vim motricem, ipsam conscientiam, ac tandem vim informandi corpus.

227. Resp. ad 1^m Noto in primis, morbos qui animæ esse dicuntur, si ignorantiam excipias, non animæ esse proprie, sed compositi ex anima et corpore. Sed hoc omisso, *resp. generatim, dist. maj.*: Anima habet morbos suos, dissimiles omnino a morbis corporis, *tr.*; ejusdem naturæ cum illis, *nego*.

Dist. min.: Morbi sunt corruptionis initium; morbi nempe corporis, *conc.*; morbi compositi, *subd.*: sunt corruptionis initium quoad corpus, *conc.*; quod ipsam animam, *nego*.

Morbi corporis tendunt ad ipsum dissolvendum; hinc sunt corruptionis initium. Sed morbi animæ proprii non possunt, ut patet, ipsam corrumpere, aut annihilare (222). Ii tamen morbi qui sunt proprii compositi, ut v. gr. cupiditates seu passiones affectivæ, possunt profecto, ut experientia ostendit, graves ipsi corpori læsiones inferre, ex quibus compositi dissolutio consequatur; animæ autem substantiam lædere nequeunt.

228. Ad 2^m *Nego*. Etenim animæ substantia, cum sit prorsus simplex, nec intendi potest nec remitti. Potentiæ item ejus quæ ab essentia dimanant, nec crescere possunt nec minui in seipsis, ut in ontologia declaratum est (0. 200).

Major itaque vel minor intensio reperitur solum in actibus potentiarum, propter conditiones quas potentia ad agendum requirit, ut ibidem notavimus, et in habitibus qui peractus generantur. Falsum itaque, animam constare gradibus, ex quorum successiva remissione evanescere possit.

Ad 3^m *Dist.*: Anima amittit ipsas facultates sibi proprias, *nego*; earum exercitium, *subd.*: per se, *nego*; ex defectu instrumenti quo utitur, quod est corpus, *tr.* (114).

ARTICULUS III.

Utrum anima a corpore separata reipsa vivet.

229. PROPOSITIO III. *Anima humana post separationem a corpore superstes vivet.*

Notetur 1^o in hac propositione id solum nos statuere: animam, saltem aliquo tempore post separationem a corpore, victuram: seu melius, a duratione hujus futuræ vitæ nos in præsentem præscindere.

2^o Cum anima non aliter perimi possit, quam a Deo per annihilationem (222); liquet, id quod proposuimus demonstratum iri, si probaverimus, Deum non esse animam in nihilum redacturum.

230. Probatur propositio.

1^o In tot mutationibus ac vicissitudinibus corporeæ naturæ nulla materiæ particula a Deo in nihilum redigitur. Nam in primis omnia destructionis phænomena explicari possunt per solam compositorum divisionem et analysim. Præterea Deus nunquam actionem suam immediatam adhibet in naturæ cursu dirigendo, nisi ubi ea necessaria sit ad mundi ordinem conservandum. Sed ad mundi ordinem conservandum nunquam profecto necessaria est vel unius atomi annihilatio. Ergo.

Si igitur Deus nec unam materiæ atomum in nihilum abire sinit, quanto minus nobilissimam animi substantiam? In humani corporis dissolutione ejus primitiva elementa non per-

eunt, quia naturaliter destrui non possunt: cur igitur animus pereat?

251. 2° Si tamen Deus aliquid annihilare dicatur, certe unusquisque fatebitur, eum ad id non adduci, nisi aliquod motivum, quod infinita sapientia dignum sit, hoc postulet; ut quum brutorum animas annihilat (84, 7°).

Si hoc, 1° assignent adversarii motivum, cur Deus animam annihilare velle censendus sit. Nefas enim exceptionem generalis legis inducere, quin ejus afferatur ratio.

2° Probari potest, nihil esse quod a Deo hoc exigat. Non enim hoc postulat animæ natura, non ejus separatio a corpore, non mundi bonum, vel physicum, vel morale. An ex eo erit animæ pereundum, quod ad nullum finem utilis futura sit ejus existentia? Atqui potest anima separata assequi finem illum ultimum, cujus gratia condita est, finem nempe totius mundi, qui est Conditoris gloria; eoque modo assequi, qui ipsi animæ proprius est, videlicet per summi boni cognitionem et amorem.

3° Ea quæ subjiçientur ostendent: Deum non modo nullum habere motivum ut animam conservare desinat, sed imo debere sibi, debere suis attributis, ut illius existentiam post fatum perennem velit.

252. 5° Deus infinite bonus non potuit rationalem animam creare, ut misera semper esset, sed solum ut ipsi benefaceret, felicemque eam redderet; præsertim cum vehementissimum felicitatis desiderium ipsi inseruerit. Hoc enim desiderium necessaria naturæ nostræ ac principalis tendentia est: necessaria vero ac principalis naturæ tendentia est ad finem. Per hoc ergo desiderium nobis inditum manifestat Deus, se ad felicitatem hominem creasse.

Atqui si altera post præsentem vita non superest, in qua beatitatem nancisci contingat, fateri necesse est, nos ad miseriam ærumnasque natos esse. Nam in hac vita innumera mala et corpus et spiritum discruciant; ita ut omnis homo aliqua ex parte sit miser, maxima vero hominum pars sit omnino miserrima. Ergo.

253. 4° Deus infinite sapiens et rectus et bonus non potuit

hominem in peiori conditione collocare, quam sit brutorum conditio. Atqui sic plane egisset Deus, si vitam aliquam hac, quam vivimus, meliorem nobis non præparavit.

Bruta enim a) bona solum sensibilia appetunt, nec multis egent; quæ verò ipsis necessaria sunt, facile assequuntur, omnia abunde suppeditante natura; iisque plene satiantur.

Homo vero non sensibilia solum bona, sed bona insuper multo præstantiora appetit, divitias, honorem, scientiam, virtutem, securitatem et quietem animi; brevi eam desiderat felicitatem quam ratio cognoscit, felicitatem nempe omni ex parte perfectam. Sed felicitatem hanc, ut supra dixi, nemo prorsus assequitur; quantumcunque enim minutis hisce præsentis vitæ bonis abundemus, satiari his non possumus, sunt enim omnia animo hoc nostro ac desiderio minora. Quin bona hæc eadem vix pauci obtinent, idque labore summo; nemo fere omnia simul; plurisque vero ex virium ac mediorum cæterorum defectu, hæc assequi physice impossibile est. Unde pars hominum maxima sunt ægri, pauperes, rudes, contempti, laboribus distenti, pleni curis, tristitia atque doloribus,

b) Ex alia parte bruta conditionem ea quæ ipsis contigit, meliorem non percipiunt: de præteritis malis non dolent, de futuris non sunt sollicita, mortem non præsentunt. Quo fit ut sine ulla sollicitudine, sine ambitione, sine invidia, sine timore, vitam vivant tranquillam ac liberam.

Ast homo perpetuo comparat bonum ad quod aspirat, cum ærumis quibus premitur; expendit quæ alii possideant, quibus ipse careat; quid ipse jure mereatur, quid habeat. Ad hæc præteritis cum tristitia recollit injurias, impendentium calamitatum timore agitur, non suis modo, sed aliorum quoque miseriis angitur, consanguineorum, amicorum, reipublicæ; mortem denique, quæ omnium finis sit, instantem sibi et appropinquantem recogitat. Quare timoribus ac desideriiis conflictatus, invidia ac mœrore tabescens, angustiiis et doloribus plenus, mala innumera patitur, quæ irrationalium pecudum genus ignorat. Ergo.

254. 5° Repugnat divinæ sapientiæ et bonitati, excitasse

in humana natura inclinationes contrarias quas conciliare impossibile sit. Atqui sunt in humana natura inclinationes contrariæ quæ, si altera vita non datur, nunquam conciliabuntur.

Est enim in homine hinc quidem, ut diximus, naturale felicitatis desiderium; inde vero a) inclinatio ad virtutem, et naturalis lex quam Deus servari vult: b) inclinatio ad societatem, et naturalis necessitas qua homo astringitur, in societate degendi.

Prima contradictio manifesta est: quia virtutis via aspera est, et magnis plena laboribus; vitiorum vero semita proclivis, et sensibus jucunda. Si igitur tota felicitas nostra præsentium bonorum fruitione contineretur, jam virtus quasi quoddam naturæ malum esset, et inimica virtutis felicitas. Adeoque ex desiderio felicitatis virtutem fugere, et ex virtutis amore felicitati valedicere oporteret. Tamen nos miseri et felicitatem necessario concupiscimus, et necessario virtutis amore rapimur. Ex una parte felicitatem quam possumus majorem, et quomocunque possumus inquirimus; ex altera lex naturalis urget nos, ac severo exigit imperio, ut bona omnia caduca ipsamque vitam, si opus fuerit, virtuti immolemus. Quod si quis exsequi renuat, illius animus miserandum in modum torquetur, et remorsibus laceratur. Quomodo conciliantur hæc, nisi felicitas, quam in fugaci hac vita præ virtute despicere oportet, alibi cumulativius inveniendi sit, tanquam ipsius virtutis præmium?

Secunda contradictio non est manifesta minus. Ex eo enim quod homo in societate degit, necesse est, ut privatum bonum publico postponat, incommoda multa et pericula subeat, nec infrequenter vitam ipsam profundat.

235. 6^o Postremo Deus, qui sanctissimus est et justissimus, non potest erga virtutem et vitium indifferenter se habere; ita ut eodem in pretio tam bonos quam malos habere videatur. Sed si altera vita non datur, in qua præmia ac pœnas pro meritis retribuatur, tali modo se gereret Deus. Nam in præsentis vitæ curriculo eum rerum administrandarum ordinem tenet, ut hujus vitæ bonis indifferenter, ut

plurimum, fruuntur boni et mali; adversis item casibus indifferenter utrique obnoxii sint. Ergo.

ARTICULUS IV.

Utrum anima sit futura immortalis.

236. PROPOSITIO IV. *Anima humana post separationem a corpore perpetuo existet ac vivet.*

1^o Redit primum argumentum allatum in superiore propositione. Quomodo probabitur, Deum velle tandem animam hanc nostram extinguere? Quænam ejus rei ratio excogitari potest? Anne aliquando anima ad finem suum inepta fiet? Anne aliquando rerum ordinem ejus existentia perturbabit?

237. Imo a) Cum Deus pro sua sapientia omnia regat, prouti fert rerum singularum natura, plane dicendum est, quod quemadmodum dissolvi sinit corruptibilia composita, ita incorruptibilem spiritum perenni existentia donabit.

b) Præsertim cum spiritus iste non aliquo solummodo tempore post discessum a corpore, sed perpetuo in fine suo conquiescere possit.

c) Est præterea semper capax parata sibi felicitate ulterius fruendi. Quis cogitare poterit hanc in Deo voluntatem, ut humanas animas de medio tollere decreverit, postquam aliquo tempore felicitatem, in quam tam vehementer inhiant, summis vix labiis degustaverint?

d) Ex his omnibus sic arguere possumus. Ex materia, motione ac natura operum, temporis duratio cui hæc ab artifice destinata sunt, dignoscitur. Sic dicimus, Ægyptios ad æternitatem ædificasse pyramides, quum earum soliditatem aspiciamus. Jamvero Deus animam humanam creavit simplicem, incorruptibilem, quæ corpore non eget ut sit ac vivat, quæ a nulla vi finita existentia vitæque privari potest; eandemque capacem fecit, ut nobilissimo fine summaque felicitate perpetuo frueretur.

Ergo non ad tempus determinatum, sed ad æternitatem opus hoc destinavit.

238. 2^o « Impossibile est, ita arguit s. Thomas, naturæ desiderium esse inane: natura enim nihil facit frustra. Sed

» quodlibet ens intelligens naturaliter desiderat esse perpetuum... Illa enim quæ non cognoscunt esse nisi ut nunc, » desiderant esse ut nunc, non autem semper, quia esse semper » piternum non apprehendunt... Illa autem quæ ipsum esse » perpetuum cognoscunt et apprehendunt, desiderant ipsum » naturali desiderio. Hoc autem convenit omnibus substantiis » intellectualibus. Omnes igitur substantiæ intellectuales » naturali desiderio appetunt esse perpetuum. Ergo impossibile est quod esse deficient (1). »

239. 3^o Non solum esse desideramus, sed felices esse volumus, et quidem ea felicitate quam ratio cognoscit, i. e. omnino perfecta. Desiderium hoc felicitatis est maximum, imo unicum naturæ desiderium, eique essenziale ac summopere necessarium; hoc enim solo desiderio movetur homo ad agendum, humanaque conservatur societas. Profecto desiderium huiusmodi nequit esse homini datum ad ludibrium atque tormentum.

Sed si anima non est immortalis, hoc felicitatis desiderium revera ad ludibrium ac tormentum homini datum fuisset. Nam si anima non est immortalis, huic desiderio nunquam satisfiet.

240. Etenim ad perfectam felicitatem tria requiruntur: 1^o absentia omnis mali; 2^o possessio omnis boni quod naturæ conveniat; 3^o securitas nunquam excidendi ab hoc statu. Quæ postremo conditio potissima est.

Nam a) felicitas naturæ intelligentis potius spe et securitate futuri, quam boni præsentis possessione continetur. Ita infelicitas timore potius futuri mali, quam tolerantia præsentis. Profecto si quis pauper sit et contemptus, vel in carcere detineatur, sciat tamen se proxime evehendum ad regnum, hunc profecto feliciorē existimamus eo qui regnum possideat, sciatque se brevi in summas misérias delapsurum.

b) Felicitas in eo est, ut bonum quod quis possidet desiderio respondeat. Desiderium autem tantum patet, quantum boni convenientis cognitio. Si ergo bonum quodcunque possi-

(1) *Contra Gent.* Lib II, c. LV, § 12.

deamus, at majus bonum idemque nobis conveniens cognoscamus et non possideamus, felices esse non possumus. Jam vero nos felicitatem perpetuam cognoscimus ac desideramus, ejusque capaces nos esse intelligimus. Quantumcunque igitur magna sit parata nobis felicitas, si perpetua non sit, perfecta non erit.

c) Quare si tertia illa conditio desit, desunt et reliquæ. Nam non abest amplius omne malum, quia timor amittendi summum bonum magnum est malum: nec possidetur omne bonum naturæ conveniens, quia bonum enti intelligenti maxime conveniens est esse perpetuum.

241. Dico igitur: si anima non est immortalis, felicitatis desiderio nunquam satisfiet. Etenim in hoc mortalis vitæ curriculo huic desiderio certe non fit satis. Nemo enim mortalium in terra constitutus, beatitatem possidet tribus illis conditionibus perfectam. Restat ut ei satisfiat in altero illo existentiae nostræ stadio, quo properamus. At quæcunque sit felicitas illic nobis parata, si anima immortalis non est, deest tertia illa conditio sine qua beata vita esse non potest. Ergo si anima immortalis non est, neque in futura illa vita felicitatis desiderium explebitur. Nunquam itaque explebitur.

242. Expende hic, quantus in futura illa vita animam occuparet pavor, si sciret, se licet bonis omnibus, affluentem, brevi tamen in nihilum redactum iri. Quemadmodum enim in præsentī vita omne gaudium amaritiæ conspergit mortis ingruentis prospectus, ita in futura illa vita annihilationis expectatio. Imo multo acerbior foret metus iste, quam in hac vita mortis metus.

Nam a) bonum amittendum esset multo majus, quam bona omnia vitæ præsentis. Totum ergo illud ac tam grande bonum in amaritiem ac venenum animæ verteretur; et quo magis aliquis felicitate summa dignus esset, eo magis esset infelix.

b) Malum ingruens esset totale exterminium, et annihilationis. Si tam amarus est mortis aspectus, quid foret annihilationis certæ expectatio? Profecto anima tantum prospiciens

malum, præclare secum agi putaret, si in pristinae vitæ miseria redire sibi daretur. Hoc enim multo melius, quam totius esse irreparabilis amissio. Quis jam existimet, cum timore hoc felicitatem perfectam posse consistere?

243. 4^o Concludat omnia argumentum a communi hominum suffragio deductum. Quemadmodum enim Tullius affirmat, « uti Deos esse natura opinamur, sic permanere animas » arbitramur consensu nationum omnium (1). » Huc spectant sepulcrorum monumenta, ritus funebres, expiationes et sacrificia pro mortuis, apotheoses, mortuorum consultationes, aliaque hujusmodi. Testimonia scripto tradita, sive ab historicis, sive a philosophis, sive a poetis, innumera plane sunt: imo perenne consensus hujus testimonium est ipsa humana societas. Etenim sine futuræ vitæ persuasionem nullibi hominum convictus ad aliquod tempus permanere potuisset.

ARTICULUS V.

Difficultates.

244. Obj. I. Anima non potest funeri superesse. Etenim :

1^o Forma non potest existere extra subjectum. Anima autem est corporis forma.

2^o Per mortem cessat animæ finis, qui est corporis informatio.

3^o Propterea animæ belluarum in morte annihilantur.

4^o His accedit quod anima sine corpore esset ens incompletum.

245. Resp. *Neg. ant.*

Ad 1^m *Dist. maj.* : Forma quæ sit accidens, aut quæ ratione solum a subjecto distinguatur, *conc.*; forma quæ sit substantia, et a subjecto realiter distincta, *neg.* Et *contradist. min.*

Ad 2^m *Dist.* : Informatio corporis est finis animæ proximus et inadæquatus, *conc.*; ultimus et totalis, *neg.*

(1) *Quest. Tusc. Lib. I.*

Finis enim animæ humanæ ultimus et adæquatus est felicitas, et Dei gloria: informatio vero corporis est finis secundarius seu medium ad finem ultimum assequendum.

Ad 3^m *Tr. ant.*; *neg. conseq. et paritatem.*

Animæ brutorum, ut alio in loco diximus (84, 7^o), nullum alium finem habent, quam ut corpus informant. Idcirco nulla est paritas. Cæteræ quoque rationes quæ suadent brutorum animas in nihilum abire, in anima humana non habent locum; quinimo contraria omnia de ipsa dicenda sunt. Recole quæ hucusque disputavimus.

Ad 4^m *Dist.* : Esset ens incompletum in ordine ad compositum humanum, *conc.*; in ratione substantiæ, *neg.*

246. Obj. II. Saltem animi immortalitas non potest philosophice demonstrari.

1^o Quod enim dependet a libera creatoris voluntate nequit ratione sola cognosci. Atqui animi immortalitas a libera creatoris voluntate dependet.

2^o Deus non tenetur mercedem ullam virtuti rependere; omnia enim sua homo illi debet.

3^o Eoque magis quod virtus sibi ipsi præmium sit.

4^o Nulla vero proportio est inter brevem hanc hujus vitæ militiam et felicitatem æternam.

247. Resp. *Nego ant.* Ad 1^m *Dist.* : si hæc voluntas nullo modo sit rationi manifesta *conc.*; secus, *neg.* Unde autem hac in re Dei voluntas sit nobis manifesta, argumenta allata demonstrant.

Dist. insuper min. : Quatenus Deus liber fuit ad hominem creandum, *conc.*; posita hominis creatione, *neg.* Patet ex dictis (232, 233, 238, seq.).

Ad 2^m *Dist.* : non tenetur propter solum hominis meritum, *conc.*; propter sua attributa, *neg.*

Ad 3^m *Dist.* : Tale præmium quod sit sufficiens attento hominis desiderio, divinisque attributis, *neg.*; tale præmium quod sufficiens non est, *conc.* (234, 239).

Ad 4^m *Dist.* : Nulla est proportio hæc, spectato tempore quo virtus exercetur, *tr.*; spectata natura ac fine subjecti a quo exercetur, *neg.* Virtutis namque exercitium homini propo-

nitur tanquam medium, ad assequendam eam, quam natura desiderat, felicitatem. Felicitatem autem desiderat perfectam; nec perfecta felicitas esse potest nisi æterna sit.

248. Inst. Si futura superesset vita homines mortem non timerent.

Resp. *Dist.*; mortem non timerent, quatenus est violenta separatio a corpore, *nego*; quatenus es transitus ab hac vita ad futuram, *subd.*: si rebus sensibilibus non adhærerent, et certi essent de sorte quæ eos manet in futura vita, *conc.*; secus, *nego*.

Horroris quo mortem aversamur, duplex causa est: alia physica, alia moralis. Physica est ex lege unionis animæ cum corpore, ex qua fit, ut anima compositi conservationem amet, illiusque dissolutionem, quantum potest, arceri aut differri cupiat. Hunc autem horrorem non excludit persuasio de vita futura, quemadmodum medicinæ horrorem non excludit persuasio de ejus utilitate ad valetudinem recuperandam.

Causa moralis duplex est, amor nempe bonorum sensibilibus, quibus omnibus morte privamur, et anxietas de sorte quæ in futura vita nobis continget. Et hæc quidem anxietas causa præcipua est, qua horror mortis excitatur. Ex quo fit, ut horrore isto improbi homines vehementer perturbentur, cum e contrario qui innoxii sunt, læto vultu mortem opperiantur.

249. Obj. III. Argumentum quod ex felicitatis desiderio deducitur, nullum pondus habet.

Nam multa sunt naturalia desideria quæ non implentur, ut desiderium scientiæ, divitiarum, honorum, vitæ etc.

Resp. *Nego ant.*: Ad rationem additam, *dist.*: desideria hæc naturalia sunt, quatenus felicitatis desiderio subordinantur tanquam media ad finem, *conc.*; secus, *nego*.

Naturaliter ac necessario felicitatem desideramus; et ex hoc desiderio fit, ut quidquid ad felicitatem nostram conferre posse putemus, hoc appetamus. Quidquid igitur in particulari desideramus, tanquam medium ad felicitatem desideramus. Desideria vero hæc particularia, quanquam aliquid appetant

ut medium ad finem naturalem conducens, non semper tam naturalia sunt, i. e. juxta naturam. Si enim quandoque bonum aliquod sit vere medium ad felicitatem necessarium, ejus desiderium erit juxta naturam; secus non erit.

Jam bona, de quibus sermo est in difficultate, neque felicitatem constituunt, neque sunt media ad felicitatem necessaria; quia tam illorum possessio, quam illorum defectus, medium ad felicitatem futuram esse potest. Quare sæpe ratio nos urget, ut quædam ex his bonis despiciamus, atque adeo abjiciamus.

250. Inst. Si argumentum hoc admittatur, unum aut alterum ex his duobus admitti quoque debet: videlicet vel ipsas impiorum animas futuras felices, vel saltem eas non futuras immortales.

1^m quia desiderium naturale non potest esse inane. Sed impii quoque homines felicitatem naturaliter desiderant. Ergo hoc desiderium non potest in illis esse inane; proinde ipsi quoque felicitatem assequuntur.

2^m quia destinatio ad immortalitatem consequitur destinationem ad felicitatem. Sed impii ad felicitatem non destinantur. Ergo neque destinantur ad immortalitatem.

251. Resp. *Nego ant.* Ad 1^m *Dist. maj.*: desiderium naturale non potest esse inane, ita ut natura non destinetur ad id quod desiderat, *conc.*; ita ut individua non assequantur id ad quod destinantur, *subd.*: si ad hoc destinantur absolute, *conc.*; si ad hoc destinantur conditionate, *nego*.

Conc. min. Dist. 1^m *cons.* juxta distinctionem majoris, et *nego* 2^m *cons.*

Felicitatis desiderium inane foret, si naturæ humanæ finis felicitas perfecta non esset, vel si felicitatem hujusmodi homo assequi nullatenus posset. Atqui destinantur omnes ex prima Dei intentione ad felicitatem perfectam, omnesque illam assequi possunt. Ergo desiderium felicitatis in nullo inane est. Sed quanquam omnes ad hunc finem destinantur, eumque assequi possint, non tamen omnes illum assequuntur. Non enim absolute ad ejusmodi finem destinantur, sed conditionate, scilicet dependenter ab uniuscujusque meritis.

252. Ad 2^m *Dist. maj.* : Destinatio ad immortalitatem consequitur destinationem ad felicitatem, nempe destinationem ad capacitatem felicitatis, *conc.*; ad ejusdem assecutionem, *nego*.

Contradist. min. : Impii ad felicitatem non destinantur; i. e. non destinantur ad hoc ut sint capaces felicitatis, *nego*; ad assequendum felicitatem, *subd.* : absolute, *conc.*; conditionate, *nego*.

Immortalitas requirebatur in primis, ut humana natura perfectæ felicitatis capax esset, ut ex dictis liquet (240). Deus autem, quanquam non absolute sed conditionate voluerit, homines singulos felicitatem consequi; tamen absolute voluit humanam naturam perfectæ felicitatis assequendæ capacem esse; quia in perfecta hac felicitate hominis finem collocavit independentem ab uniuscujusque meritis et a felicitatis consecutione. Ergo absolute quoque voluit, omnem animam humanam immortalem esse. Hinc immortalitas animi una est ex proprietatibus naturæ humanæ essentialibus. Quemadmodum igitur ex eo quod homo aliquis finem suum assecuturus non erat, homo esse non desiit, nec cessavit finis iste esse ejus finis, nec ipse capacitatem ejus assequendi amisit; ita quoque non fuit immortalitate privatus.

ARTICULUS VI.

De poenæ futuræ æternitate.

253. Ex his sponte emergit gravissima illa quæstio : utrum quemadmodum bonorum felicitatem ratio humana demonstrat futuram æternam, ita poenas quoque impiorum æternas fore demonstrare possit. Etenim cum impiorum quoque animæ sint natura immortales (252), certum est, eas non esse in nihilum unquam redigendas. Unum ergo superest aut alterum; videlicet aut quod æternis addicantur poenis, aut quod post aliquod poenæ tempus, Deus earum miseriæ finem imponat.

Respondendum ad hæc : de poenarum duratione divinam

in primis revelationem consulendam esse; quemadmodum ipsa est quæ de earumdem poenarum natura nos edocere debet: nihilominus rationem ipsam humanam sibi relictam, si hac de re decernere quidpiam tentet, poenarum æternitatem validissime suadere.

254. Nam 1^o ratio docet, peccatum omne, quo ordo a Deo constitutus subvertitur, gravem Dei injuriam esse. Injuriam autem magnitudo crescit in ratione directa dignitatis ac juris, quo persona offensa præcellit. Qui autem Deo rebellat, majestatem offendit infinitam, et jus lædit infinite magnum. Peccatum igitur malitiam habet objective infinitam. Sed proportio justitiæ postulat, ut poena cum culpa æqualitatem aliquam habeat. Culpa ergo infinite injusta poena infinita reparari debet. Cum autem poena nulla infinita esse possit intensitate, superest ut duratione saltem infinita esse debeat.

2^o Qui graviter peccat se constituit, quantum ad se pertinet, in inordinatione perpetua; quatenus perversionem in se suscipit natura sua irreparabilem, Nam 1^o semper verum erit, hominem injuriam Deo intulisse, ab eoque se avertisse, ut ad rem aliquam creatam, tanquam ad finem ultimum, se converteret; 2^o homo per se non potest unquam pro infinita hac injuria Deo condigne satisfacere; nec 3^o Deus tenetur injuriam hanc offensori suo condonare. Ita peccatum natura sua malum est irreparabile et æternum: poenam ergo irreparabilem æternamque meretur.

3^o Vita hæc quam in terra vivimus, via quædam est et palæstra, ideo nobis attributa, ut finem, qui felicitas est, per ordinis custodiam assequi possimus: vita vero futura terminus est, in quo præmia vel poenæ pro meritis cuique retribuendæ sunt. Morte igitur merendi tempus omnino interciditur, ac tempus incipit retributionis. Si quis ergo postquam peccavit, in ordinem se restituere renuit, opportunitates obtinendæ veniæ contempsit, et culpa quam admisit illigatus decedit, in culpa irreparabiliter maneat oportet. Æquum est igitur ut irreparabiliter a fine excidat.

4^o Deus et infinite misericors est et infinite justus. In hac autem vita quæ probationis et meriti stadium est, misericor-

diam suam erga fontes latissime dominari voluit, justitiæ propemodum oblitus; quo fit ut iis et creationis beneficia non subtrahat, et ad futura promerenda bona tempus concedat, veniam cuique offerens, effusissimaque clementia omnia delicta pœnitentibus condonans. Æquum igitur est, ut in vita altera cui meritorum retributionem reservavit, justitiam suam in omnibus exerceat, oblitus veluti misericordiæ: ne eos qui misericordiæ tempore abusi sunt, eosque qui illo recte sunt usi, sors eadem tandem excipiat.

5^o Hunc vero providentiæ ordinem hominis conditio in primis postulabat. Etenim spectata hominis natura, cupiditatum vehementia, bonorum sensibilibum illecebris, maximaque difficultate virtutis, pœna finem habitura non foret medium ex se sufficiens ad homines in officio semper et quibusvis in adjunctis continendos. Etenim quantumvis pœnæ tempus productum intelligatur, « si finis omnium, ut apposite » s. Hieronymus, similis est, præteritum omne pro nihilo » est; quia non quærimus quid aliquando fuerimus, sed » quid semper futuri sumus (1). » Quod et facto ipsi suo flagitiosi quique homines ostendunt, qui ut licentius vivant, hoc maxime percipiunt ac non raro suadere sibi conantur, pœnas nempe futuræ vitæ finem habituras esse.

255. Obj. I. Pœnarum æternitas pugnat cum Dei bonitate infinita. Nam sævitiem quamdam ac crudelitatem in ipso arguit, et inexplebilem vindictæ sitim.

Resp. *Nego*. Dei enim bonitas non est cæca quædam et imbellis affectio, quæ vel sapientiam excludat, vel justitiam impediat. An ideo quia Deus bonus est, se ac sua jura contemni impunesinet? nec offensori suo qui infinitæ ejus beneficentiæ ingratisimum se exhibuit, qui ejus donis obstinato animo abusus est, qui promissa ab eo præmia nihili fecit, pœnas meritis infligere poterit?

256. Ad rat. add. *nego* quod asseritur. Etenim sævus ille est qui aliorum cruciatibus delectatur, crudelis qui atrocitate animi pœnæ modum ultra debitum exaggerat. Deus autem

(1) Contra origenistas.

non amore pœnæ, sed amore ordinis pœnas infligit; per pœnam enim et hominis peccatum, et obstinatio in peccato ad universi finem ordinantur; nec si æterna pœna peccantes punit, modum in puniendo excedit, sed potius eum modum tenet quem justitia præfinit. Denique justitia ejus quæ tranquillissime judicat, nihil habet de illa commotione, quam ira etiam in homines justos inducit; multoque minus de furore illo ac perturbatione, quæ humanam vindictam quandoque deturpant.

257. Obj. II. Pœnæ æternæ cum justitia pugnant. Nam nulla est proportio inter momentaneum peccati actum et pœnam æternam.

Resp. *Nego ant.* Ad rat. add. *dist.*: nulla proportio temporis, *conc.*; commensurationis justæ, *nego* (254).

258. Obj. III. Si qui sunt perpetuo infelices futuri, in his felicitatis desiderium inutile est, imo mendacio simile.

Resp. *Nego 1^a partem*. Nam absque hoc desiderio, quod est essentielle naturæ intelligenti, homines illi non essent homines.

Dist. 2^a partem. Esset in illis hoc desiderium mendacio simile, si argueret destinationem absolutam ad felicitatem, *conc.*; si arguit destinationem conditionatam, et capacitatem tantummodo absolutam, *nego*. Vide nuper dicta (250-252).

LIBER TERTIUS.

CAPUT I.

DE ANIMÆ POTENTIIS IN GENERE.

ARTICULUS I.

* *Quæstiones variae.*

259. Sequitur ut de animæ humanæ facultatibus disputemus. Ac primo expediemus breviter quædam, quæ de iis generatim inspectis quærenda occurrunt.

260. De potentia universim jam diximus in ontologia (O. 179, seq.). Nunc de animæ potentiis quæritur 1^o *an sint plures, et cur.*

Respondeo, potentiarum distinctionem ab actuum diversitate cognosci; actuum vero diversitatem ab objectis desumi (O. 181.). Id autem quod actuum diversitatem atque adeo pluralitatem necessariam facit, est agentis limitatio. Si enim agentis virtus talis est, ut diversa quidem objecta possit attingere, non tamen simul ea omnia complecti possit; necessario consequitur, ut quando in unum objectum intenditur non intendatur ad alterum, ad quod tamen intendi potest. Propterea virtus hujusmodi modo est actus respectu certi cujuspiam objecti, modo est duntaxat agendi *potentia*; et quemadmodum ex objectorum diversitate diversæ sunt actuum species, ita etiam finita virtus in diversas potentias, quasi in partes quasdam, dispescitur.

Jam activa animæ humanæ virtus, prouti experientia docet, ejusmodi est ut distinctis ac diversis actibus ad diversa objecta intendatur: alius enim v. gr. est actus audiendi, alius intelligendi, aut ambulandi. Ergo activa animæ humanæ virtus in plures potentias dividitur.

261. Hoc ipsum s. Thomas pulcherrime exponit sequentibus verbis: « Quæ sunt in rebus infima, non possunt con- » sequi perfectam bonitatem: sed aliquam imperfectam con- » sequuntur paucis motibus. Superiora vero his, adipiscuntur » perfectam bonitatem motibus multis... His autem superiora » sunt, quæ adipiscuntur perfectam bonitatem motibus pau- » cis. Summa vero perfectio invenitur in his, quæ absque » motu perfectam possident bonitatem... Dicendum est ergo. » quod res quæ sunt infra hominem, quædam particularia » bona consequuntur. Et ideo quasdam paucas et determi- » natas operationes habent, et virtutes. Homo autem potest » consequi universalem et perfectam bonitatem; quia potest » adipisci beatitudinem. Est tamen in ultimo gradu, secun- » dum naturam eorum quibus competit beatitudo. Et ideo » multis et diversis operationibus et virtutibus indiget anima » humana. Angelis vero minor diversitas potentiarum com- » petit. In Deo vero non est aliqua potentia vel actio, præter » ejus essentiam.

« Est et alia ratio quare anima humana abundat diversi- » tate potentiarum: videlicet quia est in confinio spiritua- » lium et corporalium creaturarum. Et ideo concurrunt in » ipsa virtutes utrarumque creaturarum (1). »

262. Ex dictis intelliges 1^o quid sint apud veteres *totum potentiale*, seu *potestativum*, et *partes potentiales*, seu *partes virtutis*. Videlicet totum potestativum est virtus finita: partes autem virtutis sunt diversæ vires seu potentiae, in quas illa dividitur.

2^o Intelliges quoque totum potestativum ad totum integrale commode revocari. De toto integrali diximus in logica (L. 107, 108.).

3^o Vix porro necesse est ut moneam, totum potentiale, de quo modo diximus, longe differre a toto potenciali, seu universali, de quo in logica sermo fuit (L. 106, 110).

263. Quæritur 2^o *an potentiae quæ sunt in homine, sint omnes in anima humana tanquam in subjecto.*

(1) *Sum. th. p. I, q. LXXVII, art. II.*

Respondeo triplex esse in homine potentiarum genus. Aliæ enim sunt in eo ratione corporis; videlicet vires quæ ad materiam pertinent, ut vis resistendi, gravitas, aliæque hujusmodi: aliæ vero sunt in eo ratione animæ, ut sunt intellectus et voluntas; quæ facultates sine organo corporeo exercentur: aliæ demum in eo sunt ratione compositionis ex anima et corpore, ut est sensus (166, 3º). Igitur vires quæ sunt in homine, aliæ sunt in corpore tanquam in subjecto; aliæ in anima; aliæ in conjuncto.

Notandum tamen, etiam potentiarum quæ sunt in conjuncto, primum principium ac veluti radicem animam esse. Anima enim forma est corporis; proinde corpus per animam habet ut sit vivens. Radix ergo vitalium potentiarum quæ sunt conjuncti propriæ, anima est.

264. Quæritur 3º *An potentiæ sive animæ, sive conjuncti sint activæ vel passivæ.*

Respondeo, unamquamque potentiam sive animæ sive conjuncti, esse aliquo modo passivam, et aliquo modo activam: potentia enim hoc ipso quod potentia est, ad actum non transit, nisi aliquo modo moveatur. Potentiæ autem de quibus loquimur, sunt omnes activæ et passivæ respectu diversorum; ac possunt etiam esse activæ et passivæ respectu sui ipsorum. Primo modo sensitiva facultas v. gr. est passiva respectu objecti sensibilis a quo movetur, et est activa respectu perceptionis ejusdem objecti. Ita quoque voluntas est passiva, quatenus a bono proposito movetur motione indeliberata; et est activa, quatenus bonum propositum amplectitur vel repellit.

Est tamen considerandum, quasdam potentias esse magis activas quam passivas, et quasdam e converso magis passivas quam activas; quia illæ magis moventur, quam moveant; istæ autem magis movent, quam moveantur. Sic v. gr. sensus est facultas magis passiva quam activa: at voluntas est magis activa quam passiva.

Respectu vero sui ipsius, sunt activæ simul et passivæ omnes illæ potentiæ, quæ actionem a se elicitam in se ipsis recipiunt. Ita voluntas in eo quod eligit, est etiam subjectum in quo hæc actio recipitur.

265. Quæritur 4º *An potentiæ animæ ab essentia ejusdem re distinguantur.*

Respondeo, inter veteres opinionem satis communem fuisse potentias esse accidentia ab essentia substantiæ distincta, ab eaque dimanantia. Plures tamen oppositam sententiam amplexi sunt. Breviter dicam quid veri videatur similis.

Distinguendæ sunt in primis potentiæ conjuncti a potentiis quæ in sola anima resident. Potentiæ conjuncti cum ex animæ corporisque viribus, quasi in unum collatis (167) resultent, certe ab animæ viribus et ab animæ substantia inadæquate distinguuntur.

Si vero loquamur de potentiis solius animæ propriis, deque iis viribus, secundum quas anima potentiarum organicarum est radix (263), ex dictis (260-262) colligi potest, unamquamque ex his potentiis totam animæ energiam non esse, sed tantummodo partem ejusdem, quatenus ea se diversimode exerit pro objectorum diversitate. Hinc unaquæque ex his potentiis a tota animæ potentia inadæquate distinguitur. Nulla autem est ratio cur dicamus, totam animæ potentiam et energiam ab animæ substantia distingui. Igitur unaquæque potentia ab animæ substantia inadæquate distinguitur. Atque hæc videtur fuisse sententia s. Augustini, quum scripsit. « Si sola » anima cogitetur, aliquid ejus est mens, tanquam caput » ejus, vel oculus, vel facies; sed non hæc ut corpora cogitata » sunt. Non igitur anima, sed quod excellit in anima » mens vocatur (1). »

266. Facile porro intelliges 1º pessime ratiocinaturum, si quis ex modo dictis ita concluderet: cum animæ virtus in partes distinguatur; animæ quoque substantia, quæ idem est ac ejus virtus totalis, divisibilis est. Etenim falsum est, animæ virtutem, quanquam in partes distinguatur, esse tamen secundum se divisibilem. Nam ut recte animadvertit s. Thomas, *totum potentiale adest singulis partibus secundum totam suam essentiam, sed non secundum totam virtutem* (2). Id quod oritur, ut diximus (260), ex finitæ virtutis limitatione, quæ

(1) De Trin. Lib. XV, c. VII.

(2) Sum. th. p. I, q. LXXVII, art. I, ad 1.

non potest intendi simul ad omnia objecta ad quæ potest intendi; unde quum per unum actum ad unum objectum intenditur, non agit totum quod agere potest; et hoc significamus quum dicimus, eam non agere secundum se totam. Hinc patet partes virtutis non dividere virtutem secundum ejus essentiam, sed tantummodo secundum ejus terminationes, seu relationes ad diversa. « Quantitas dimensiva, ita Albertus M., » est infinite divisibilis per intranea sibi: quantitas autem » virtualis dividitur ad id quod extra eam est (1). » Propterea ex eo quod animæ virtus in partes distinguitur, nullo modo sequitur animæ substantiam divisibilem esse.

2º Intelliges, in exposita quoque sententia dici posse, potentias animæ ab ejus essentia dimanare: dummodo dimanare dicantur per meram resultantiam (C. 210). Intelliguntur enim potentiæ in animæ essentia non absolute spectata, sed si cogitetur per comparisonem ad objecta. Videlicet: anima comparata ad lucem, est radix vis visivæ, comparata ad intelligibile est intelligendi facultas, et ita porro.

ARTICULUS II.

Animæ potentiarum partitio.

267. Potentiarum partitio inde desumenda est, unde earum diversitas dignoscitur; videlicet ex operationum diversitate. Omissis porro potentiis ad vitam vegetativam pertinentibus, de quibus et nos jam aliquid diximus (25, 124 seq.), et physiologi ut de re sibi attributa plenius disputant, de potentiis solum vitæ animalis et intellectivæ loquemur.

Utriusque vitæ operationes vel obiter considerando, quisque statim perspicit, triplex in primis potentiarum genus esse distinguendum, videlicet potentias *cognoscendi*, *appetendi*, *exsequendi*. Diversæ enim sunt operationes quibus animus objectorum notitiam capit, ab iis quibus in objecta fertur,

(1) *De homine*. Tr. I, q. LXXIII, in corp.

aut ab iis quibus aut proprium corpus, aut externa corpora movet.

268. Rem ulterius dispicienti apparet, facultatum cognoscendi atque appetendi, duplicem ordinem esse. Alia enim est cognitio quæ nobis est cum brutis communis, alia quæ hominis est propria. Illa est cognitio sensitiva, hæc intellectiva. Hinc duplex facultas, *sensus* nempe, et *intellectus*. Eodemque pacto duplex facultas appetendi deprehenditur, videlicet *appetitus sensitivus*, et *intellectivus*.

269. Rursus facultas cognoscendi sensitiva comprehendit.

1º facultates *apprehensivas*, quæ sunt *sensus intimus* (sensus communis, fundamentalis, quamquam hæc tria non sint omnino idem), *sensus externi*, et *æstivativa*, de qua alibi dictum est (64), cujus loco veteres in homine ponebant *cogitativam*, quia intentiones illas, quas cætera animalia naturali instinctu percipiunt, homo *per collationem quamdam adinvenit* (1).

2º facultates conservativas, quæ sunt *phantasia* et *memorativa* (65, 67). His veteres addebant *reminiscentiam*, qua homo *sylogistice inquirat præteritorum memoriam* (2).

270. Facultas item cognoscendi intellectiva continet 1º facultatem *expressivam*, cujus actus sunt *perceptio*, tam simplex, quam comparativa (L. 19, 50); quæ est apprehensio proprie dicta; tum *judicium* seu compositio apprehensorum et *ratiocinatio* seu motus a compositionibus notis ad ignotas. Ad perceptionem reducuntur *attentio*, *abstractio*, *reflexio*, *comparatio*, de quibus in logica aliquid diximus (L. 15, seq.);

2º facultatem *conservativam*, quæ dicitur *memoria intellectiva*.

Hæc in præsentī sufficiunt, quamquam rudi calamo vix delineata. Nihil enim aliud nunc quærebamus, nisi ut viam quæ nobis terenda esset, utcunque describeremus. Veniamus jam ad singula.

(1) S. Th. *Sum. th.* p. I, q. LXXVIII, art. IV.(2) *Ibid.*

CAPUT II.

* DE SENSU INTIMO.

ARTICULUS I.

De sensus intimi objecto.

271. Dicendum primo de sensu intimo, qui facultatum cæterarum fundamentum est atque essentialis conditio. De hoc sensu vix aliquid locuti sunt Aristoteles et scholastici, qui tamen uberius de conscientia ac reflexa sui cognitione disserebant. Plura recentiores necessitate compulsi, de sensu intimo disputarunt. Nos jam in logica (L. 443, seq.) non pauca præmisimus; quæ omnia hic supponuntur. Nunc primo de objecto intimi sensus generatim; deinde de intimo sensu ut est animæ proprius; tertio de sensu animæ prout est in corpore; ac postremo de intellectuali sui ipsius cognitione.

272. Reidius quem schola scotica sequitur, opinatus est, sensu intimo solas modificationes attingi, non autem earum subjectum; intellectum vero modificationes quæ sunt experientiae objectum, ad objectum *ego* referre vi instinctivi illius principii: *omnis modificatio supponit subjectum cui inhæreat*. Rosminius quoque putavit, substantiam sensationibus non attingi, sed ratiocinio deduci ex eodem principio. Notus est Condillachii error, ex lockianis theoriis depromptus: nostrum *ego* nihil esse aliud quam collectionem sensationum, quas unusquisque experitur: qua assertionem subjecti sensum verbis concedit, re autem negat. Nihil dicam de Kantio, cujus dogma est, sensum tam internum quam externum, nullum objectum exhibere, sed solum impressiones multiplices ac dissipatas; intellectum vero esse qui objectum format (L. 515; 4, seq.). Contra hos strenue dimicavit Gallup-

pius (1); cui tamen præiverant veteres generalibus quibusdam jactis ac solidissimis principiis (2).

273. PROPOSITIO I. *Sensus intimus non solas subjecti affectiones, sed ipsum quoque subjectum attingit.*

Recole quæ in ontologia adnotavimus de substantiæ cognitione (O. 154, 2°); quæque illic dicta sunt de sensu externo, applica intimo sensui.

Probatur prop. 1° Sensus intimus affectiones attingit subjecti, ut sunt in re ante quamvis mentis operationem. Sensus enim intimus mentis opificium omne antecedit. Atqui ante omnes mentis operationem affectiones sunt concretæ, non abstractæ, nec distinctæ a subjecto. Non est enim in rerum natura hinc v. gr. dolor aut cogitatio sine substantia, inde substantia a suis affectionibus præcisa, quemadmodum in statu ideali fit per mentis abstractionem: sed est tantummodo dolens aut cogitans. Ergo sensus intimus concretum hoc ipsum, *dolens* aut *cogitans*, attingit, videlicet modificationem una cum subjecto, tanquam quid unum.

2° Affectionem quam per sensum intimum experimur, profecto ut nostram experimur: secus fieri non posset, ut eam referremus ad subjectum *ego*, quemadmodum postea per reflexionem fit. At si ita est, idem sensus indivisibiliter attingit et affectionem et affectionis subjectum. Ergo in affectionum sensu subjecti sensus includitur.

3° Si sensus propriarum affectionum cum sensu proprii subjecti non esset perpetuo conjunctus, nemo dein reflectendo judicare posset, se unum eundemque esse, ad quem successivæ ac variæ affectiones quas experitur, pertinent: proinde idea *ego* haberi non posset. Cum enim affectiones discrepent ab invicem, et altera post alteram transeant, nemo posset eas ad unum subjectum referre, nisi una cum earum sensu aliquid experiretur constans et invariabile, quod affectionibus omnibus subesset. Cum ergo unusquisque de sua identitate certissimus sit, concludere necesse est affectionum sensum a subjecti sensu non esse disjunctum.

(1) *Lezioni di Logica e Metafisica*. Vol. IV. Lez. LXXXI, LXXXVIII.

(2) Cf. v. gr. Suarez, *Disp. Met.* XXXVIII. Sect. II.

ARTICULUS II.

De sensu sui primitivo et essentiali.

274. PROPOSITIO II. *Sensus actualis suiipsius est animæ essentialis, et a quacunque affectione seu actu independens.*

Adverte in antecessum : 1° *Sensum* suiipsius essentialem animæ dici, non conscientiam, quæ est intelligentiæ cognitio reflexa (L. 444).

2° Dici essentialem animæ sensum sui ipsius *actualement*; nempe non facultatem tantummodo sentiendi se, sed etiam hujus facultatis actum.

3° Hunc sensum dici *independentem ab omni affectione seu actu*, quatenus non eget affectione aliqua subjecti ut a potentia transeat ad actum; sed est *natura* prior quacunque affectione et quocunque actu subjecti.

4° Cum tamen anima determinatum aliquem essendi modum semper obtineat, nunquam posse seipsam sentire, quin aliquam simul affectionem sui sentiat.

5° Denique sentire se nihil esse aliud, quam experiri se sibi præsentem. Qui sentit se, profecto declarationes ultiores non requirit.

275. Probatur prop. 1° Ut vis aliqua necessario agens de potentia in actum transeat, hæc duo requiruntur et sufficiunt; ut vis expedita sit ad agendum, et ut objectum sit ipsi, prout convenit, admotum. Atqui anima quæ sentire seipsam debeat, essentialiter est unita huic objecto, imo identica cum illo est; hinc virtus quæ certe animæ inest, sentiendi seipsam, essentialiter expedita est ad agendum; quid enim interponi possit inter animam et animam; aut quid possit efficere, ut anima sibi ipsi sit extranea? Ergo vis animæ sentiendi seipsam ab ipso existentiae ejus exordio essentialiter est ad actum determinata.

2° Si anima ab aliqua affectione excitari posset ad sentiendam seipsam, proculdubio affectionem illam experiri deberet ut suam. Atqui si anima ante omnem affectionem non sentit se, nullam affectionem experiri potest ut suam. Quare enim

anima aliquam affectionem experitur ut suam? Profecto quia illam experitur in se, quia sentit se per illam immutari. Quomodo vero sentire posset aliquid in se, nisi prius sentiret se? quomodo posset sentire se mutari, nisi et quum mutatur, et antequam mutaretur adesset sibi? Ergo si anima ante omnem affectionem se non sentit, a nulla affectione excitari potest ad seipsam sentiendam.

276. Ex dictis hæc inferuntur :

1° Sensus sui non est in anima ad modum potentiae, sed est actus perpetuus. Nihilominus quoniam per hunc actum anima fit habilis ad suas affectiones sentiendas, dici potest ac debet, sensum intimum potentiam quamdam esse, si tamen simul ea dicatur sita in actuali sensu suiipsius, quem anima possidet.

2° Sensus sui humanarum omnium facultatum basis est ac radix. Est namque basis ac radix *sensus intimi*, ut modo dictum est. Hinc etiam *sensus externi*, qui in sensu intimo fundatur, ut alio in loco indicavimus (L. 447, 5°), et mox dicetur. Est quoque basis ac radix *intelligentiæ*: intelligendi namque facultas, ut subtiliora omittam, quid aliud denique est, quam vis representandi sibi ipsi rerum essentiam? Quomodo vero mens aliquid sibi representare, aliquid sibi dicere posset, si se non sentiret? Non pluribus opus est, ut perspicias etiam *appetitum* in sensu hoc primitivo fundari; omnis enim appetitus cognitionem aliquam seu sensus seu intellectus supponit, et ad sui boni amorem reducit.

3° Hinc, præter cætera multa, etiam ex hoc capite absurda est illa Fichtei doctrina, quod *Ego* seipsum ponit eo ipso actu quo ponit *non-ego*. Etenim *non-ego* sentit se, et ut insipienter dicam, ponit se, priusquam objecta externa esse percipiat.

4° Chimera est *absolutum* illud pantheistarum transcendentalium, quod nec subjectum est, nec objectum, sed purum cogitare aut sentire. Nam quod cogitat sibi cogitat et quod sentit se sentit.

5° Ex his intelliges sensum sui solvere, seu potius excludere quæstionem illam, quam recentiores multi adeo magni-

faciunt, quam plures non satis dextere dirimunt, quamque Kant insolubilem putat; quomodo scilicet fiat transitus a subiecto ad objectum. Nullus enimvero est hic transitus, saltem si objectum universim omne complectamur. In sensu enim sui ipsius, subjectum et objectum conjuncta reperiuntur, et ita conjuncta, ut qui hanc conjunctionem negare ausit, eam hoc ipso confirmet, quemadmodum in logica vidimus (L. 428, a).

6° Sensus sui est in anima independentem a corpore; proinde sensus intimus *ex se* non est organica facultas. Id quod patet etiam ex eo, quod animasentitsuos intellectuales actus, quorum subjectum non est organum animatum, sed solum anima (98, seq.).

ARTICULUS III.

De sensu proprii corporis.

277. Anima vi sensus quem habet sui, non modo sentit eos actus, quos elicit independentem a corpore, sed eos quoque quorum subjectum est humanum compositum. Idcirco in logica sensum intimum in superiorem et inferiorem distinximus (L. 443). Nunc de hoc inferiori sensu aliquid dicendum est.

PROPOSITIO III. *Anima sentit perenniter suam in corpore quod ipsa informat præsentiam.*

278. Nam 1° Si seipsam anima sentit, necesse est ut simul sentiat statum in quo est. Nunc autem est corpori intime conjuncta, atque ita conjuncta, ut unam cum corpore naturam constituat (162). Oportet ergo animam sentire se corpori conjunctam, et unum quid cum illo constituentem.

2° Idipsum experientia probat. Nemo enim est qui se extensum non sentiat; nemo est qui proprium subjectum sentire unquam potuerit partibus carens. Atqui si anima se solam sentiret, extensionem in se sentire non posset. Si ergo anima extensum perenniter sentit, non se solam, sed se in corpore et cum corpore sentit.

3° Anima non modo sentit per impressiones in corpore receptas externa objecta, sed ipsum quoque sentiendi actum. Has autem sensationes in variis corporis partibus experitur, aut saltem ad varias corporis partes refert; utrumvis enim dicatur, hac in re perinde est. At quomodo fieri posset, ut anima sensationes suas in organis sentiret aut ad organa referret, si prius, saltem natura, proprium corpus non sentiret ut suum sibi conjunctum? Confer hac de re alibi dicta (62, 6°; 143, 146).

279. Notanda hæc sedulo:

1° Sensus hic corporis merito *fundamentalis* dici potest (L. 447, 4°). Ut enim ex modo dictis perspicitur, fundamentum est exterioris sensus. Hic tamen sensus, quem nos fundamentalem vocamus, non est omnino idem cum eo cui hanc appellationem Condillachius tribuit. Is enim sensum fundamentalem vocat sensum actionum, quas variæ nostri corporis partes in se invicem exerunt, ac præsertim sensum motuum respirationis (1). Ut vides, nomen est idem, sed res diversa. Ille enim sensus sensum proprii corporis, de quo hic agimus, supponit. Hic porro corporis sensus non differt quoad rem ab eo interiori sensu quem Aristoteles sensum communem appellat (61); quia est *communis radix et principium exteriorum sensuum*, ut s. Thomas dicit (2). Ideo enim rerum externarum impressiones sentire possumus, quia perpetuo sentimus organa, in quibus impressiones excipiuntur. Non tamen in cerebro peculiare ejus organum statui potest, nisi eo modo quem alibi exposuimus agentes de sensibus externis (133).

2° Sensus sui in corpore non est animæ essentialis, sed unionis statum consequitur. In hoc autem statu hic sensus non est potentia, sed actus perpetuus; qui potentia dici potest solummodo respectu affectionum humani compositi.

3° Anima immediate sentit se in corpore quod informat; videlicet in toto nerveo systemate (151, 5°; 169, 1°). Cæteras vero substantias humani corporis constitutivas, ut v. gr.

(1) *Traité des sensat.* II. p. ch. I.

(2) *Sum. th.* p. I, q. LXXVIII, art. IV, ad 2.

ossa, sanguinem, adipem, sentit ad modum exteriorum corporum, quatenus nervos premunt, vellicant, contingunt utcunque.

4° Cum se et corpus anima sentiat, non tamen se ut agentem, et corpus ut actionis subjectum sentit, aut viceversa; imo se et corpus non ut duo sentit, sed per modum unius; sentit videlicet extensum, quo secundum suam virtutem ipsa extenditur. Hoc autem liquet ex eo, quod nemo est inter mortales, qui solo sensu animam a corpore distinguere possit. Unde communis loquendi usus unica illa voce, *ego*, et animam et corpus designat.

5° Hinc inferes, sensum hunc corporis esse facultatem organicam, ut quæ ex unitione animæ et corporis resultat (166, 1°). Hujus vero principium ac radicem esse sensum sui animæ proprium.

6° Sensus fundamentalis non excitatur occasione peculiarium sensationum, sed omnibus illis prior est, saltem natura, ut diximus. Per hunc tamen sensum, ut alibi docuimus (106, 1°), nec corporis nostri figuram definitamque magnitudinem percipimus, nec diversas ejus partes distincteprehendimus; sed solum indefinite et indistincte ejus extensionem ut nostram experimur. Sensationes autem variæ, quæ subinde percellimur, distinctum diversarum partium sensum gignunt; ac postremo externorum sensuum usu nostri corporis ejusque partium figuram magnitudinemque nos edocet.

7° Non est cur hic denuo animadvertamus, non omnes compositi affectiones animam distincto sensu experiri. Jam enim suis locis notavimus, nec affectionum constantium et uniformium, nec operationum vitæ vegetalis distinctum sensum haberi (L. 447, 7°; Psych. 137, 3°). Affectiones autem quæ his operationibus causantur, ut sunt satietas, fames, sitis, aliæque hujusmodi, distinguit quidem inter se, sed affectiones elementares ex quibus illæ coalescunt distincte non experitur, sed confuse.

8° Ex hoc corporis sensu prima extensionis oritur notio.

ARTICULUS IV.

Quomodo anima seipsam cognoscat per intellectum.

280. Cognitionem intellectualem suiipsius cum intimo sensu conjungimus, tum propter nexum unius tractationis cum altera, tum ut facilius quisque videat quantopere hæc duo inter se differant. Cæterum de hoc discrimine plura diximus in logica (L. 444-446). In præsentī quærendum est, quomodo per intellectum anima seipsam cognoscat; an scilicet immediate et ex se animæ essentia sit nobis intelligibilis, an vero per actus qui ab ipsa dimanant.

281. Duobus porro modis quæstio hæc intelligi potest, ut recte notat s. Thomas (1). Potest enim ab homine cognosci per intellectum anima 1° *particulariter*, et *an sit*, videlicet cognoscendo se habere in semetipso principium quo sentit, intelligit ac vult; 2° *universim*, et *quid sit*, videlicet quænam sit animæ natura. Jam si secundo hoc modo quæstio intelligatur, manifestum est, animam hoc pacto non immediato intuitu, sed ex ejus operationibus cognosci, et ut cognoscatur multam subtilemque inquisitionem necessariam esse, ut tota hæc psychologiæ tractatio demonstrat. Sed non de hac cognitione nunc agimus, quæ ad scientiam pertinet, at de prima illa, quæ pertinet ad conscientiam, et est omnibus communis. De ea quæritur an saltem ipsa immediata sit atque intuitiva, ut quidam opinati sunt. Nos sequendam ducimus Aristotelis ac s. Thomæ sententiam, qui censent, animam per actus suos semetipsam intelligere. Distinguit autem s. Thomas (2) duplicem cognitionem, *actualement*, et *habitualement*; ac primam quidem ait per actus haberi; alteram vero per ipsius animæ essentiam. Utraque assertio delaranda est.

282. PROPOSITIO IV. *Anima non intelligit se immediate ac per seipsam, sed per actus suos.*

1° Id patet ex notione animæ ut est in humano intellectu.

(1) *Quæst. disp. q. X. De mente*, art. VIII. — *Contra gent. Lib. III, c. XLVI. — Summ. th. p. 1, q. LXXXVII, art. 1.*

(2) *Quæst. disp. I. c.*

Omnes enim hanc animæ ideam in mente gerere reperiuntur, quod anima sit *principium vitalium operationum*; *subjectum variarum affectionum*; *substantia quæ sentit in corpore, quæ intelligit ac vult*. Jamvero hujusmodi notio similis est prorsus notionibus rerum externarum, quas ex effectibus cognoscimus (O. 46). Ergo.

2º Si anima intelligens se per se ipsam immediate cognosceret, omnis homo intelligeret quid est anima; nam sola præsentia animæ sufficeret ad movendum intellectum ad ipsius cognitionem, ut lux quæ ideo quia per se visibilis est, sola sua præsentia oculum ad actum visionis determinat. Insuper nullus homo errare posset circa animæ naturam; intellectus enim humanus naturaliter animam cognosceret; in iis vero quæ naturaliter cognoscuntur, nullus est error. Atqui plurimi sunt, qui omnino ignorant quid sit anima: multi quoque errarunt et errant in definienda animæ natura. Ergo.

3º Cognoscendi vis tandiu actum suum habet, quandiu est ipsi conjunctum id quod ipsam ad actum movet. Atqui anima semper adest sibi: si vero per se est sibi intelligibilis, sola ejus præsentia intellectum movet ad ipsam cognoscendam. Ergo si anima est per se sibi intelligibilis suam semper naturam actu intelligeret; qua quidem re nihil est magis falsum.

283. De habituali cognitione ita disserit s. Thomas :
 « Quantum ad cognitionem habitualement sic dico, quod anima
 » per essentiam suam se videt, i. e. ex hoc ipso quod essentia
 » sua est sibi præsens, est potens exire in actum cognitionis
 » sui ipsius; sicut aliquis ex hoc quod habet alicujus scientiæ
 » habitum, ex ipsa præsentia habitus est potens percipi
 » pere illa quæ subsunt illi habitui. Ad hoc autem quod percipiat
 » anima se esse, et quid in se ipsa agatur attendat, non
 » requiritur aliquis habitus; sed ad hoc sufficit sola anima,
 » quæ menti est præsens: ex ea enim actus progrediuntur,
 » in quibus actualiter ipsa percipitur (1). »

284. In quibus s. Thomæ verbis notabis:

(1) *Quæst. disp. I. c.*

1º quid sit habitualis cognitio. Scilicet non est actus quidam perpetuus, sed dispositio ad actum ponendum. Vide quæ diximus in logica de habitu principiorum (L. 554).

2º unde sit in anima hæc dispositio. Docet s. Thomas, eam non esse ex habitu proprie dicto, sed ex essentia animæ, quæ est animæ præsens.

285. Si ulterius inquiras, quid sit illa animæ præsentia, per quam ipsa anima in suos actus intellectu reflectere atque actualem sui notitiam acquirere potest, hoc non difficulter deducemus ex dictis.

PROPOSITIO V. *Anima capax est seipsam intelligendi, quia sui suorumque actuum sensum perennem habet.*

Nam 1º intellectus animæ actus in ipsa animæ essentia intueri nequit. Ad hoc enim oporteret, ut animæ essentia esset illi per se intelligibilis; id quod dici nequit, ut modo demonstratum est. Igitur ut intellectus animæ actus percipiat, ad sensum quem et sui et suorum actuum anima habet, convertatur necesse est.

2º Maxime cum intellectiva actuum internorum cognitio reflexione perficiatur. Reflexio enim præviam aliquam obiecti, in quod dirigenda est, cognitionem supponit. Hæc autem prævia cognitio nequit esse per intellectum, ut patet. Superest ergo, ut sit ea ipsa cognitio, quæ sensu intimo continetur.

3º Id ipsum confirmatur ex eo quod affectiones omnes, quarum existentiam obscure vel confuse sentimus, obscure quoque vel confuse intellectu relegimus, et eas quarum clarus et distinctus est sensus, clare distincteque intelligere possumus. Affectionum vero essentiam immediata reflexione semper confuse intelligimus, ac solummodo ratiocinando distinctius aliquid cognoscere de iis possumus. Id ipsum dicendum de earum causis.

286. Ex his colliges 1º quinam actus intellectualem sui cognitionem præcedere debeant, et quo ordine. Primo anima sui sensum habeat oportet: deinde sentire incipit externorum corporum impressiones, et objecta externa percipere sensu, dein intellectu. Dum hos actus exercet, intimo sensu

omnes experitur ut suos; sed adhuc in hunc sensum intelligentia non reflectitur, saltem reflexione perfecta. Post aliquantum tempus, quum intelligentia satis se explicuit, anima in facta interna intelligentiæ obtutum convertit; intelligit se sentientem, se intelligentem, se appetentem, ac tandem notionem illam *ego*, efformat.

Colliges 2^o objectum conscientiæ esse non solas modificationes aut cogitationes subjecti, sed subjectum modificatum, aut cogitans. Hoc enim conscientia intelligit, quod sensus experitur. Sensus autem, ut diximus (273), non solas subjecti modificationes, sed etiam subjectum attingit. Vide alibi dicta de substantiæ notione (O. 154, 2^o). Hinc nostrum *ego* non est collectio sensationum, ut dixit Condillachius, nec formatur ab intellectu ut sensit Kantius (272).

Colliges 3^o in conscientiæ actu haberi dualitatem illam subjecti et objecti, quæ perceptionis est propria (L. 459). Nam hoc ipso quod animus in activitatis suæ intellectualis objectum seipsum assumit, *me* perceptum a *me* percipiente distinguit. In sensu vero intimo hæc distinctio non fit.

Colliges 4^o id quod dici solêt a recentioribus quibusdam: factum generale, seu generale conscientiæ objectum esse *me percipientem non-me*, vere dici, si sermo sit de conscientia sensationum externarum, aut actuum intelligentiæ, cujus objectum semper est ens; non autem si sermo sit de conscientia affectionum mere subjectivarum.

Demum colliges 5^o alienissimum esse a veritate quod statuit Cousinius (1); factum fundamentale conscientiæ esse phænomenon ex tribus terminis coalescens, quæ sunt: *finitum* (*ego*, et *non-ego*); *infinitem*, et *utriusque relatio*.

(1) Introduction à l'Hist. de la Phil. 6. Lec.

CAPUT III.

DE SENSU EXTERNO.

ARTICULUS I.

De hujus facultatis subjecto et divisione.

287. Plura jam variis in locis ad externam sentiendi facultatem pertinentia disputata sunt. Diximus in logica, quid sit sensatio ac sentiendi facultas (L. 457-460); quæ sensuum objecta (L. 461, 462); quæ fundamenta certitudinis quam sensationes gignunt; qui sensuum errores (L. 464, seq.). Definitum est in cosmologia, quo pacto qualitates sensibiles sint in corporibus, quamque habeant cum sensili representatione similitudinem (C. 204, seq.). Demum in præcedentibus hujus tractationis libris, egimus de sensationum sede (145, seq.); de fluido nerveo, deque nervorum ac cerebri munere in sensationibus (153); ac de subjecto facultatis sentiendi (166, 2^o). Est nunc locus ut accuratius aliquid statuamus de subjecto ac principio facultatis hujus; tum de ejus actu, ac de rerum externarum cognitione quam per eandem acquirimus.

288. Fuit opinio Platonis, sensum esse operationem animæ propriam, ut est intelligendi actus. Aristoteles autem contendit, solum intellectum esse facultatem ob organo corporeo independentem, sensum vero facultatem esse non animæ solius propriam, sed animæ corpori conjunctæ, ut quæ ab organorum concursu essentialiter dependeat. Aristotelem plerique scholasticorum secuti sunt; Platonis vero sententiam a Cartesio instauratam permulti recentiores sectantur, iique omnes necessario sectari debent, qui animæ et corporis conjunctionem per mutuum commercium seu influxum physicum explicant. Juxta hos immutationes seu motus, quos externa objecta in corpore perficiunt, mera sunt sensationum occasio. Sensatio vero in eo continetur, quod anima hos motus percipit; nam hoc ipso, aiunt, corpus externum quod

harum motionum causa est, sibi repræsentat. Hanc primo opinionem refutandam ducimus.

289. PROPOSITIO I. *Non anima sola, sed compositum ex anima et corpore facultatis sentiendi subjectum est.*

Probatur 1^a pars negativa.

1^o Hæc opinio supponit animam corpori uniri per mutuum influxum. Omissis porro cæteris hujus hypotheseos incommodis (178), hoc unum in præsentia urgere sat est. Quomodo anima motiones seu mutationes sui corporis percipit? Sane, vel quia corpus physice in animam agens, eam motu suo afficit, vel quia mera occasio est, cur Deus perceptionem in illa excitet. Sed primum dici nequit, quia absurdum (178, 3^o); alterum si dicatur, incidimus in systema causarum occasionalium, quod supra rejectum est (174). Ergo.

2^o Esto, animam percipere posse motum in corpore quod ipsa inhabitat, excitatum. Percipiet profecto nervorum seu fluidi nervei vibrationes: at objectum a quo nervi moti sunt, nullatenus percipiet. Poterit ad summum, hoc motu percepto, ex effectu ratiocinando ad causam ascendere, atque concludere secum ipsa, eum quoque motum aliquam causam habere. Sed in primis quænam sit hujusmodi causa, et qualis sit, cognoscere ipsa non poterit. Ac præterea aliud est objecti alicujus existentiam per ratiocinium inferre; aliud, objectum percipere, atque eo modo percipere, quo in sensatione exhibetur.

290. Probatur 2^a pars affirmativa.

1^o Sensatio sita est in experientia quadam actionis, quam objectum corporeum in corpore sentientis exercet. Atqui, ut alibi probavimus (166, 2^o; 178, 3^o), anima sola corporei objecti impressiones excipere, aut ab hujusmodi objectis immutari nequit, et consequenter nequit impressiones hujusmodi experiri. Corpus vero potest quidem pati atque immutari ab alio corpore, sed ejus impressiones experiri non potest. Ergo neque sola anima, neque solum corpus potest esse sensationis subjectum. Ex adverso, compositum ex anima et corpore idoneum est, tum ad recipiendam aliorum corporum actionem, tum ad eam experiendam (279, 4^o). Ergo.

2^o Sensitiva perceptio requirit subjectum extensum; nam extensio repræsentari nequit concrete ac materialiter, nisi in subjecto extenso: sed simul requirit subjectum quod totam simul extensionem repræsentatione una et indivisibili attingat, ut alibi dictum est (88). Atque subjectum hujusmodi nec anima est, nec corpus: non anima quia extensa non est; non corpus, quia corpus non est aptum nisi ad hoc; ut secundum varias sui partes varias extensi partes attingat. Corpus autem anima informatum, et extensum est, et totam extensionem una et indivisibili repræsentatione percipere potest; anima enim informans tota est in toto corpore et tota in singulis ejus partibus. Ergo solummodo corpus anima informatum, sensitivæ perceptionis est idoneum subjectum.

291. Facultas itaque sentiendi est compositi propria. Inde sequitur, ad eam constituendam et animam et corpus proportionato sibi modo concurrere. Compositorum enim proprietates non aliter gigni possunt, quam ex componentium proprietatibus simul conjunctis, seque mutuo temperantibus; quo pacto ex duobus diversis coloribus oritur tertius color, et ex duobus impulsibus ad angulum concurrentibus, unus impulsus secundum diagonalis directionem.

292. Est autem manifestum, corpus ad facultatem sentiendi constituendam concurrere, tum generalibus materiæ proprietatibus ac viribus, tum organorum externorum ac totius nervei systematis structura. Unde patet, corpus concurrere ad hoc ut materiam et instrumentum. Anima vero, quoniam corporis est forma, concurrere in idipsum debet ut principium vitæ, et ut causa principalis. Concurrit autem, ut jam exposuimus (279, 1^o), sensu sui, qui ipsi essentialis est. Hic enim sensus, qui ex se extensionis est prorsus expers, et spiritalibus solum actibus afficitur (276, 6^o), posita animæ conjunctione cum corpore, extensionem acquirit, neque ad animam solum, sed ad animam simul et corpus terminatur; et consequenter non animæ solum actus, sed corporis quoque affectiones experitur.

293. Externa sentiendi facultas in quinque peculiares sensus, tanquam in partes virtutis (262, 1^o) dividitur. Quorum

subjectum sunt animata organa iis attributa (L. 457). De quinque sensibus hæc modo generatim adnotare sufficiat.

1° Ex dictis colligere licet, horum sensuum diversam irritabilitatem (1) non ab anima dependere, sed ab organis et a nervis. Id enim quod anima de suo confert ad sensitivam facultatem, semper idem est, nempe sensus sui. Diversitas igitur omnis oriri nequit, nisi ex eo quod confert corpus. Facile vero concipitur, unum aliquod organum aptum esse posse ad hoc, ut a certa quadam vi immutetur, reliqua vero non ita.

2° Cum potentiarum diversitas ab actibus, ac proinde ab objectis desumatur, nullo negotio intelligitur, visum, auditum, gustum, odoratum sensus esse diversos. Tactum autem licet unum sit organum, videlicet cutis, tamen plura sunt objecta: tactu enim sentimus non modo resistentiam, sed etiam molliem et duritiem, calorem et frigus, aliaque hujusmodi. Estimare itaque possumus cum s. Thoma « tactum esse » unum genere, sed dividi in multos sensus secundum speciem; qui tamen non separantur ab invicem secundum organum, sed per totum corpus se concomitantur: et ideo » eorum distinctio non apparet (2). »

3° Absolute loquendo fieri posset, ut vivens cujus organica constitutio ab hac nostra diversa foret, plures sensus possideret, quemadmodum ex adverso animantes quædam nobis imperfectiores aliquo ex sensibus, qui nobis attributi sunt, carent.

ARTICULUS II.

De sensationis natura opiniones.

294. Veniamus nunc ad actum facultatis sentiendi, qui *sensatio* dicitur. Duo in hoc actu considerare possumus: primo id quod in ipso *materiale* est, videlicet immutationem

(1) Irritabilitatem vocant physiologi aptitudinem organismi viventis ad hoc, ut posita quorundam stimulorum actione, se ipsum reagendo modificet. Ita v. gr. irritabilitas retinæ in eo est, ut quum luce percellitur, sensationem visus eliciat, ad cæterorum vero corporum contactum nihil sentiat: contrarium contingit in nervis, qui sensu tactili pollent.

(2) *Sum. th.* p. 1, q. LXXVIII, art. III, ad 3.

organicam, tum organi externi, tum nervorum et cerebri: secundo id quod in eodem actu *formale* est, quodque proprie sensationis nomine venit. Prima consideratio pertinet ad physiologos; altera metaphysica est. Nos igitur prima supposita, alteram tantum suscipimus.

295. Sensationes, ut in logica dictum est (L. 447, 5°; 463), dupliciter spectari possunt; ut sunt affectiones actusque subjecti, et ut sunt realitatis externæ representationes. Si primo modo spectentur, ad sensum intimum pertinent, ac nullam post dicta difficultatem objicere possunt. Quæstio igitur in præsentia tota est de sensili representatione; an scilicet representatio hæc sit non modo subjectiva, sed etiam, ut aiunt, objectiva, ita ut sensatio ipsam realitatem externam attingat. Equidem existimo, problema istud ex Aristotelis et scholasticorum principiis non difficulter solvi. At recentiores nonnulli philosophi, qui se primo philosophiam exstruere arbitrabantur, mirum quantas in hanc controversiam tenebras, quantas ambiguitates invexerint. Exponemus primo et veterum doctrinam, et recentiorum opinamenta.

296. Veterum de sensationibus doctrinam usitatosque loquendi modos probe tenere non ad hanc modo quæstionem utile est, sed ad complures alias et philosophicas et theologicas controversias. Ea potest ad hæc summa capita revocari.

1° Sensatio est actus conjuncti, et in organo perficitur. In sensatione duo distinguenda sunt: receptio speciei sensibilis, et operatio hanc receptionem consequens.

2° Quoad primum, ad sensationem requiritur, ut sensus ab exteriori objecto immutetur. Hæc autem immutatio alia est *naturalis*, alia *spiritualis*. Naturalis est, secundum quod forma objecti recipitur in organo modo materiali, ut quum corpus a calidiori corpore calefit; spiritualis, secundum quod forma objecti in organo animato recipitur modo immateriali, et intentionali. Hujusmodi forma *species* sensibilis appellatur. Naturalis porro immutatio non sufficit ad sensationem; nec ea in omni sensatione reperitur; at spiritualis immutatio omnino necessaria est. Unde sequitur, speciem quoque necessario ad sensationem requiri.

3^o Hæc autem species est similitudo quædam qualitatis sensibilis, non quidem secundum convenientiam in natura, sed secundum repræsentationem; hujusmodi enim similitudo inter cognoscentem et cognitum requiritur. Hinc celebre illud effatum: *sensus in actu est sensibile in actu*; scilicet sensus, quum ad actum determinatur, est unum unitate similitudinis cum sensibili forma (actu), seu sensibili qualitate.

4^o Quæres, cur species in organo immateriali modo esse dicatur. Ad hoc declarandum notabant veteres, qualitates sensibiles aliter esse in objecto, aliter in medio, aliter in organo animato. In objecto sunt ut formæ in materia disposita, nempe ut in subjecto inhæsionis, a quo et in quo habent esse materiale; in medio sunt ut in deferente impressionem objecti; in organo vero, ut movens in mobili, nempe ut causa efficiens, et ut virtus quæ sensum ad actum determinat. Unde sequitur, in organo formam objecti esse quasi per se, et ad modum formarum spiritualium, quæ quoad esse a materia non dependent. Hinc species dicitur esse in organo modo immateriali et spirituali.

5^o Dictum modo est, speciem esse quæ sensum ad actum determinat. Hoc est itaque munus speciei sensibilis, ut sensum qui erat in potentia, faciat esse actu. Unde dicitur forma qua cognoscens cognoscit. Sicut enim res per suam formam habet ut sit, ita cognoscendi virtus per formam seu similitudinem rei cognitæ habet ut cognoscat.

6^o Non tamen in speciei sensibilis receptione sita est sensatio, sed in operatione quæ hujusmodi receptionem consequitur, ut effectus suam causam. Quæ quidem operatio non est transiens in aliquem effectum circa sensibile objectum, sed immanens, et perfectio operantis.

7^o Id quod per hanc operationem cognoscit sensus, non est species sensibilis, nec esse potest. Species enim hæc, est forma cognoscentis, seu id quo sensus fit actu cognoscens, non vero cognitionis terminus.

8^o Objectum igitur quod sensus percipit, est objectum externum, cujus similitudo est species sensibilis.

9^o Species sensibilis cum non sit cognitionis objectum, est

tamen cognitionis *medium*; sed *medium quo* sensus cognoscit. Triplex enim cognitionis *medium* distingui oportet: 1^o *medium sub quo* objectum cognoscitur; estque id quod potentiam perficit, quin eam tamen determinet ad aliquod particulare objectum; 2^o *medium in quo* cognoscitur; estque id omne, per cujus cognitionem ducitur cognoscens in alterius cognitionem; quemadmodum inspicendo speculum ea inspiciamus quæ in ipso repræsentantur; 3^o *medium quo* cognoscitur; et hoc est forma seu species, quæ potentiam ad aliquod particulare objectum cognoscendum determinat.

10^o Ex dictis tandem intelligitur, quo pacto sensus potentia passiva dici possit. Sensus considerari potest per ordinem ad objectum, et absolute in se. Per ordinem ad objectum rationem habet passivæ potentiæ; ab objecto enim speciem recipit. In se autem est potentia operativa seu cognoscitiva.

297. Hæc est Aristotelis de sensatione doctrina, quo nemo melius inter græcos philosophos de humana cognitione diseruit. Eadem doctrina scholasticorum disputationibus illustrata, vixit constanter in scholis usque ad Cartesium. Cartesius autem sensationes spectare cœpit non ut conjuncti actus, qui in organis perficiantur, sed ut animæ cogitationes, quæ occasione motus nervorum ad cerebrum pertinentis, in ipsa excitarentur. Hujusmodi philosophandi ratio, quæ Lockio quoque arrisit, et apud plurimos invaluit, primum fuit hac in re obscuritatis et confusionis principium. Necesse enim erat, ut qui cartesianis principiis imbuti essent, tandem aliquando a seipsis quærerent: quo pacto anima a suis affectionibus subjectivis ad externam realitatem transeat, ac distinguat *ego* a *non-ego*. Hoc fuit problema quod deinde philosophorum semper ingenia torsit. Ut ei porro satisfacerent, alii alias inierunt vias: quæ quidem ad has revocari possunt:

298. 1^o Idealistæ expeditissimam viam se inire arbitrantur, in eo quod negant realitatem ullam externam esse, quæ idearum sensilium objectum sit.

2^o Cartesius existimaverat, corporum existentiam inferri

ex ideis sensilibus, ut causa deducitur ab effectu (1). Hunc, præter ejus sectatores omnes, secutus est Romagnosi (2), pluresque alii juniorum.

3° Malebranchius in perceptione sensibilibus, cognitionem per sensum a perceptione pura distinxit. Sensum esse, ait, modificationem animæ a Deo productam; ideam vero esse objectivam, i. e. corpus in statu intelligibili, quod Deus nobis manifestat; unde conclusit, ut alibi vidimus (L. 467), certitudinem de corporum existentia non haberi, nisi per fidem (3).

4° Leibnitzius docuit, nullam monadem, neque adeo animam ab objectis externis modificari posse. Igitur ipsa sibi mundum externum repræsentat, ita ut repræsentatio sequens rationem sui sufficientem in antecedente repræsentatione habeat. Quæ quidem representationum series, etiamsi mundus non existeret, in anima tamen successive explicaretur. An vero mundus externus existat, in ancipiti relinquitur, nisi abstrusa Wolfii ratiocinia adhibere velimus (4).

5° Kant statuit, sensationes fieri intuitiones, et ad objectum externum transferri, quia cognoscens formam subjectivam spatii sensationibus conjungit (L. 515, 5°).

6° Ideologi præteriti sæculi eam veterum cæperunt instaurare sententiam: sensationibus non ideas objectorum, sed objecta percipi; eas proinde sufficere, ut corpora externa a nobis ipsis discernamus. Hanc tamen prærogativam soli tactui concesserunt.

D'Alembertus arbitratur, discrimen hoc agnosci tactu activo; quum enim una pars nostri corporis aliam quampiam ejusdem partem tangit, sensatio dupla est; quum vero corpus tangit extraneum, sensatio est unica (5). Hanc sententiam amplexus est, et multis illustravit Condillachius; qui

(1) *Med. III.*

(2) *Che cosa è la mente sana.* P. I, § 5.

(3) *Rech. de la ver.* L. III, II, p. t. VI. — *Eclairciss.* VI. sur le I. Livre.

(4) Wolfii. *Theol. nat.* P. II, § 644, 645.

(5) *Elcm. de Phil.* § 6.

præterea fatetur, vagam quamdam et confusam extensionis notionem deberi tactui interno, quem ipse sensum fundamentalem appellat; quo sensu diversarum corporis partium reciprocas actiones experimur (1).

7° Tracyus tactum per se, atque adeo cum motu conjunctum nullo modo sufficere putat ad realitatem externam manifestandam, nisi hæc tria accedant: nempe primo sensus motus; deinde voluntas, quæ cupiat hunc sensum experiri adhuc; ac demum resistantia, quæ impediat hujus motus ejusque sensus continuationem. Ex hac resistantia cognoscimus esse aliquid quod nos non sumus, quodque nobis obsistit (2). Idipsum Soave senserat (3).

8° Reidius et Stewartius cum schola scotica contenderunt, in omni sensatione animam non corporum ideas propriasque affectiones, sed ipsa corpora directe percipere; ita ut constanter perceptio sensationem sequatur, sensatio vero objecti impressionem. Quia tamen de causis physicis juxta sceptica Humii principia (O. 272) sentiebant, diserte statuerunt, tria illa esse constanter eo ordine conjuncta; nullum tamen inter ea nexum necessarium esse. Quapropter juxta hos auctores persuasio de corporum existentia nullum aliud fundamentum habet, nisi instinctum sensus communis (4).

9° Galluppius quoque cum Reidio docet, in omni sensatione objectivam realitatem directe percipi, negat autem nexum inter perceptionem ac realitatem externam necessarium non esse; imo intrinsece necessarium esse contendit: sentire enim, inquit, et non sentire aliquid, contradictoria sunt. Notat autem, omnem quidem sensationem esse realitatis externæ perceptionem, non omnem tamen perceptionem esse extensionis (5).

299. Ut ex tot tamque diversis opinionibus, quid in hac controversia tenendum sit, eruamus, hoc in primis sedulo

(1) *Traité des Sensat.* II. p.

(2) *Ideologie I,* p. c. VII.

(3) *Esame della Fil. di Kant.* Art. V.

(4) V. Stewart. *Phil. of the hum. mind.*, c. I.

(5) *Saggio sulla crit. della conosc.* Tome II, ch. I, § 23 et alibi.

cavendum est, ne binæ quæstiones prorsus diversæ, quæque ex diversis principiis dirimendæ sunt, perperam commisceantur. 1^a est, an sensationes objectum externum percipiant, sintque ex se discretivæ objecti a subjecto; 2^a quomodo intellectus ideam corporis efformet, realemque corporum existentiam agnoscat. Harum quæstionum confusionem non modicam huic argumento obscuritatem sæpe attulisse arbitror. Distincte igitur de utraque.

ARTICULUS III.

Sensationis natura et objectum definitur.

500. PROPOSITIO I. *Objecta materialia in sensus agunt, et in hoc quod agunt, qualitatum sensibilibus species in iisdem imprimunt.*

Quod objecta materialia in sensus agant, inficiantur solum occasionalistæ, leibnitziani, et Reidii sectatores, ex diversis tamen principiis. Sed jam aliis in locis refutavimus tum occasionalistarum dogmata (O. 279), tum leibnitzianarum monadum systema (175, 176; c. 47); tum demum Humii doctrinas quas Reidiani sequuntur (O. 273). Itaque ut exploratam veritatem assumimus, objecta materialia in sensus agere, neque modo in organum, sed in organum animatum (285).

501. Quod vero hæc objectorum actio speciem ejusdem objecti in sensibus imprimat, ita probari potest. Species est, ex dictis (296, 3^o), similitudo quædam qualitatis sensibilis, eam in organo animato repræsentans. Atqui materialis impressio, quam unaquæque sensibilis qualitas in proprio organo facit, similitudo quædam est qualitatis ipsius, quæ eam in organo repræsentat, ut actio et effectus causam a qua procedunt; prout alibi demonstratum est (l. 205). Insuper eadem materialis impressio non corporeum tantummodo organum immutat, sed organum animatum, nempe ipsum subjectum facultatis sentiendi. Ergo vere objecti materialis actio ejus speciem in sensu imprimit.

502. Ex his vides, totam veterum doctrinam de speciebus

impressis recipi in præsentī posse, dummodo eadem ad recentioris physicæ doctrinas inflectatur in his quatuor: ut 1^o loco formarum intelligamus in objectis quidem vires activas, in organis vero motus moleculares ab iis inductos; utque 2^o immutationem naturalem a spirituali (296, 2^o) in hoc tantum distinguamus, quod naturalis immutatio sit molecularum materialium motus, spiritualis vero sit motus idem, ut ad conjunctum pertinens; sicque 3^o speciei nomine intelligamus hunc organi animati motum, prout est actio qualitatis sensibilis eam repræsentans modo explicato: unde 4^o species impressa nihilerit aliud quam passio organi animati, quæ ab actione hac qualitatis sensibilis sola ratione distinguitur (O. 261).

503. PROPOSITIO II. *Ad actum sentiendi necessario requiritur species sensibilis ab objecto in sensus organo producta.*

Nam 1^o certum est, objectum quod sensatione percipitur, aliquo modo ad sensationem gignendam concurrere. Certum ex æquo est, ad hoc ipsum non concurrere solummodo ut terminum a quo actione denominetur, sed etiam ut principium determinans ac movens sensum ad agendum. Secus nulla ratio foret, cur objectum quoque valde distans non perciperetur; aut cur eodem momento quædam objecta clarius, quædam obscurius sensus attingeret. Ratio itaque sensationis postulat, ut ad eam excitandam objectum concurrat, sensum determinando ac movendo. Atqui determinatio ac motio in sensu ab objecto effecta, est species sensibilis, juxta id quod modo dictum est. Ergo.

2^o Cognitio omnis in eo est, ut res cognita sit in cognoscente. Hoc omnes intelligunt cognitionis nomine, non quod cognoscens ad rem cognitam trahatur, sed quod eam ad se trahat; id quod exprimunt voces illæ *apprehendere, percipere, capere, tenere, habere aliquid in mente, incidere, venire, defixam esse rem in mente; aut a mente dilabi*, et similes, quibus omnes homines perpetuo utuntur. Liqueat autem, res externas in cognoscente esse non posse secundum suum esse reale ac materiale. Superest ergo ut sint in ipso secundum aliquam sui similitudinem.

Jam sensatio est cognitio quædam; per sensationes enim, quomodocunque demum hoc fiat, rerum externarum notitiam acquirimus. Ergo sensationis natura requirit, ut res per eam cognita sit in sensu cognoscente per aliquam sui similitudinem seu speciem.

3^o Denique hoc est per experientiam experimentalesque scientias adeo manifestum, ut mirum videri debeat, si quis ea de re adhuc dubitet. Nemo saporibus gustat, nemo qualitates corporum tactiles experitur, nisi hi sensus ab externo objecto per aliquam suæ vis impressionem ad actum determinentur. Ii vero sensus qui objectum distans representant, cujusmodi sunt visus, auditus, odoratus, actuum suum non eliciunt, nisi idem objectum per medium eos moveat. Quis nescit radios lucis ab objecti superficie quaquaversus diffusos ejusdem imaginem visibilem in omnem partem deferre? quæ quidem imago non retinæ solum, sed etiam speculis, et cuicunque superficiæ adhærere potest, et lentibus colligi. At nisi radii ad retinam appellant, in eaque imaginem hanc pingant, visio non fit. Ita nisi tremitus sonoris corporis per aerem delatus, nervo acustico communicetur, nullus est auditus; nullusque est odoratus, si odoræ particulæ ad nares non pertingant, easque non vellicent.

Experientia itaque certum est, ad sensationem requiri actionem objecti in sensus, seu (302) speciem ab objecto impressam.

304. PROPOSITIO III. *Sensatio non receptione speciei sensibilis, sed operatione aliqua eam consequente absolvitur.*

Etenim 1^o Si sensatio sita esset in sola speciei receptione, esset solummodo passio sensus, et actio objecti. Proinde non foret actio immanens et vitalis, actio enim hujusmodi a principio intrinseco dimanet, et in eodem a quo oritur subjecto recipiatur necesse est. Atqui sensatio et est, et ab omnibus habetur actio viventis propria, non actio rerum externarum. Ergo.

2^o Omni actioni materiali respondet æqualis et contraria reactio (C. 195) Actio autem objecti in organum, non est solummodo in organum, sed in conjunctum (302). Ergo actioni

qua objectum speciem sui in organo imprimit, respondeat oportet æqualis et contraria conjuncti reactio. Supra autem ostensum est, sensationem in cerebrali reactione sitam esse; ex quo fit, ut nulla sit sensatio, nisi organum cum cerebro communicet (153). Ergo vere sensatio est operatio quæ receptionem specierum consequitur.

305. PROPOSITIO IV. *Sensilis cognitionis objectum non sunt species sensibus impressæ, sed sensibiles corporum qualitates a quibus illæ imprimuntur. Has tamen qualitates sensus cognoscunt per species.*

Prob. 1^a pars.

1^o Sensilis species est principium, quod sentiendi facultatem ad operationem movet ac determinat. Id autem quod per sentiendi operationem cognoscitur, est ejusdem operationis terminus. Jam actionis principium nec est, nec esse potest ejusdem actionis terminus. Ergo species sensibilis non est id quod sensus cognoscit. Quod si sensus in sua operatione speciem sensilem non cognoscit, superest ut cognoscat objectum, cujus illa similitudinem gerit.

2^o Quum sensus receptam ab objecto impressionem experitur, terminus in quem fertur, non est propria passio, sed objectum a quo patitur. Sane voces illæ: *videre, tangere*, et similes in communi sermone actus sentiendi exhibent. Atqui nemo dicit, se videre retinæ motum a luminis radiis excitatum, aut se tangere pressionem proprii corporis ex alterius corporis resistentia; sed dicunt omnes, se videre lumen, aut objectum luminosum, se tangere corpus externum resistens, et generatim se sentire id quod sensus afficit. Ergo id in quod actus sentiendi fertur, non est propria passio, sed objectum agens. Alio in loco (C. 202) vidimus falso dictum esse a quibusdam, voces illas: *color, sonus, durities, dulcedo* et cæteras, quibus significamus ea quæ sentiendo cognoscimus, sentiendi actum significare. Sed non minus falsum est, iis vocibus significari passiones organi, seu species, quibus actus sentiendi determinatur.

306. Prob. 2^a pars. Sensus cognoscunt sua objecta per species ab iis impressas. Videlicet, ut ex supradictis patet

(296, 9°), species sunt medium *quo* sensus objecta sua percipiunt, non vero medium *in quo* ea percipiunt. Si quis enim hoc postremum diceret, is assereret id quod modo improbatum est, sensum directe percipere speciem, in eaque tanquam in quadam imagine objectum apprehendere. Quæ non veterum sententia est, sed cartesianorum et lockianorum. Speciem itaque dicimus esse medium, quo sensus objectum percipit, nempe id quo determinatur ac movetur ad illud percipiendum.

307. Sane 1° objectum in sensationes percipimus solum secundum quod agit in subjecto sentiente (303, 3°. C. 206). Per tactum v. gr. nihil aliud percipimus, nisi vim qua corpus resistit, aut caloricum communicat, aut alitercunque nervos cutaneos afficit. Ita quoque objectorum radios non videmus, nisi secundum quod ii ad retinam usque pertingunt; qui si intercipiuntur, aut detorqueantur, visio cessat. Idem de reliquis sensibus dicendum. Ac probe notandum est, nos qualitates sensibiles sentire, non ut eient in organo molecularum solummodo materialium motum, sed ut motum hunc cientes, conjunctum afficiunt. Patet itaque sensus ad propria objecta percipienda per species ab iis impressas determinari.

2° Objecti perceptio pro diverso organorum statu ac dispositione diversa est. Hinc omnes sensuum illusiones, de quibus diximus in logica (L. 493, seq.) Diversa est item sensatio pro varia objecti distantia et positione, ac medii natura (L. 497). Cur autem, nisi quia sive ex diverso organorum statu, sive ex diversis objecti adjunctis diversimode sensus afficitur?

3° Si quis existimaret, quemadmodum existimasse videtur Reidius, hoc quod dicimus, objecta ipsa a nobis directe percipi, ita esse intelligendum, ut sensus quasi extra subjectum progrediens, objectum externum transeunter attingat, hic sane mirifice deciperetur. Sensatio enim, ut omnis alia cognitio, non est actio transiens, quæ in objecto cognito recipiatur illudque immutet, sed actio immanens, quæ, tota quanta est, in agente manet. Ac licet objectum ex organi reactione aliquid patiat, non tamen hæc passio sensationem

constituit, ut per se patet. Cum igitur operatio sensus sit immanens, non aliter potest sensus externum objectum percipere, nisi quatenus hoc intra ipsum aliquo modo tractatum, esse incipiat eidem intimum. Id quod, ut supra diximus (303), assequitur sensus per speciem. Quoniam autem sensus objectorum speciem per seipsum sibi imprimere nequit, necesse est ut objectum agens in sensum, sui specie ipsum consignet. Atque ex hoc sensus dicitur, et est potentia passiva.

Igitur ex immanentia sensitivæ operationis manifestum est, sensum non percipere objectum, nisi per speciem ab eo impressam.

308. COROLLARIA. 1^m Quum juxta usitatum loquendi modum dicimus, sensationem esse sensum, seu experientiam impressionis in organo receptæ, intelligere debemus, eam esse *sensum* seu *experientiam objecti per impressionem receptam*. Ex quo colliges, sensationem accuratius quam in logica factum sit, (L. 457), describi posse: *actum quo animal objectum externum cognoscit per impressionem ab ea in organo receptam*.

2^m Inter impressionem et sensationem nexus est necessarius, non solum successionis, sed etiam causalitatis; idemque ex objecti atque organi animati natura dimanans. Errat ergo Reidius qui hoc negat (298, 8°).

3^m Unaquæque sensatio in externo aliquo objecto suam causam habet. Falsum ergo est, quod Leibnitzius asseruit, representationes rerum externarum ita se excipere, ut representatio antecedens representationis sequentis unica sit causa.

4^m Quod Reidius contendit, non corporum ideas aut subjecti affectiones in sensatione percipi, sed ipsa directe corpora, verum quidem est, non tamen novum, nec ab ipso inventum, sed receptissimum dogma scholæ veteris, cujus doctrinam Reidius perperam intellexit. Hinc confundens medium *quo*, et medium *in quo* aliquid cognoscitur (206, 9°), corporum perceptionem in actione transeunte collocavit,

eamque a sensatione distinxit, utque hæc tueretur, totam physicarum causarum doctrinam subvertit.

5^a Quæstio illa apud ideologos celeberrima de *ponte*, videlicet quo pacto in sensationibus mens transeat a suis affectionibus ad objecta realia (297), non inutiliter modo proponitur, sed perperam. Est enim plane falsum id quod hæc quæstio supponit, in cognitione haberi transitum a subjecto ad objectum. Cum enim juxta communis sensus decretum, cognitio in hoc consistat, quod res cognita sit in cognoscente (303, 2^a), si pontem ullum quærere necesse est, quæri non debet ad hoc, ut subjectum transeat ad objectum, sed potius ad hoc ut objectum in subjectum introeat. Pons autem hujusmodi est sensus, in quem objectum ingreditur per speciem quam ipsi actione sua imprimit.

ARTICULUS IV.

Objecta quædam diluuntur.

309. Per ea quæ huc usque diximus, facile refelles quæ objici solent, tum a Reidio aliisque, qui absque ulla distinctione contendunt, sensationem non fieri media rei imagine; tum ab iis qui opinantur, in sensationibus nostras solummodo affectiones a nobis directe percipi.

Primi hæc fere objiciunt:

1^o Nullæ sunt imagines odorum, saporum, sonorum, qualitatatum tactilium: Ergo hæc omnia non percipiuntur mediante imagine.

2^o In sensu hæc imagines efficerentur per organorum motus. Inter hujusmodi autem motus et sensuum objecta nulla est similitudo.

3^o Quod si colorum imago in retina pingitur, plerique mortalium eam prorsus se recipere ignorant. Nequeunt igitur per eam res apprehendere.

4^o Etsi daretur, inter impressiones organicas et sensuum objecta similitudinem aliquam esse, adhuc tamen anima per hasce objectorum imagines objecta percipere non potest. Ad hoc enim ut per imaginem in rei quam illa repræsentat cognitionem veniamus, cognoscere oportet imaginem ut objecti

imaginem, nempe ut objecto conformem; quod quidem cognosci nequit, nisi prius cognoscatur objectum.

310. Resp. ad 1^m *Dist. ant.*: Nullæ sunt hujusmodi objectorum imagines visibiles per figuras et colores, *conc.*; nullæ sunt eorundem similitudines, *subd.*: si hæc qualitates absolute spectentur, *omitto*; si spectentur relative, videlicet ut agunt in subjecto sentiente, *nego*. Relege quæ de hoc argumento disseruimus in cosmologia (C. 205, 206).

Dist. cons.: Hæc omnia non percipiuntur mediante imagine, tanquam medio *in quo, conc.*; tanquam medio *quo, nego* (296, 9^o).

Ad 2^m *Dist. cons.*: Inter motus organicos et sensuum objecta nulla est similitudo naturæ, *omitto* (C. 205); nulla est similitudo repræsentationis, *subd.*: ut supra.

Ad 3^m *Transeat ant. et dist. cons.* eadem distinctione medii *in quo*, et medii *quo*.

Hæc eadem distinctione dissolvitur 4^a objectio. Certe enim quum in imagine res aliqua solo obtutu percipienda est, oportet, ut et imaginem et rem cognoscamus, et utriusque similitudo sit nobis comperta. At quum imago est tantummodo principium quod cognoscentem ad actum determinat, nulla hujusmodi cognitio prævia requiritur.

311. Quod ad alterius sententiæ momenta attinet, præcipua hæc sunt:

1^o Oculus immediate non videt nisi radios ab objecto diffusos; hi enim retinam percellunt. Sed radii deferunt ad oculum objecti imaginem; ergo.

2^o Sensationes plures experiri possumus, quin aliquo externo objecto sensus excitentur; v. gr. si oculorum bulbi comprimantur, luminosos in iis circulos videmus; aures quandoque ex se sibilant vel tinnunt; gustus amaritiam experitur, quum stomacho laboramus. In his autem nihil aliud sensus percipiunt, quam proprias affectiones. At hæc sensationes non differunt ab iis, quas præsentibus objectis excipimus. Ergo in his quoque subjectivas solum affectiones percipimus.

3^o Videtur negari non posse, nos affectiones nostras in

sensatione percipere. Nam unusquisque sibi conscius est, se videre, se audire, et ita de reliquis.

312. Resp. ad 1^m *Conc. maj.*; *dist. min.*: radii sunt imago objecti oculorum proprii et immediati, *nego*; sunt imago objecti proprii sed mediati, *transeat*. Ut enim sæpe dictum est, proprium visus objectum sunt colores. Colores autem sunt motus vibratorii ætheris, qui uniformiter quaquaversus diffunditur, ac denique retinam immediate afficit. Radii igitur non sunt imago objecti immediati oculorum, sed immediatum eorundem objectum. Undæ vero ætheris quæ retinam non tangunt, ac primæ quoque undæ quæ in corpore et a corpore gignuntur, sunt objectum oculorum mediatum; quod tamen in omnibus cum objecto immediato convenit ac solo numero ab eo distinguitur.

Ad 2^m *Dist. 1^m partem maj.* Sensationes experimur, quin ab externo objecto sensus excitentur; ita tamen ut excitentur semper a proprio objecto immediato, *conc.*; secus *nego*. *Nego* quoque 2^m *maj. partem*.

Dist. denique min.: Hæ sensationes a cæteris non differunt quoad speciem impressam et objectum immediatum, *conc.*; quoad objectum mediatum, *nego*.

Ad exempla allata respondere possumus, ex oculi compressione cieri undas luminosas in æthere, qui oculum pervadit; easque retinam afficere, ac videri eodem modo quo videntur undæ ab externis objectis compulsæ. Ad alterum dici potest, nervum acusticum percelli ab undis sonoris primo excitatis, quæcunque demum sit ejus rei causa, vel in aere qui tympanum occupat, vel etiam in humore labyrinthi. In utroque igitur casu immediatum horum sensuum objectum est semper idem, videlicet undæ quæ nervum sensitivum afficiunt; mediatum solummodo objectum variat, quod in aliis sensationibus externum est, in his vero internum. In tertio autem exemplo nulla est difficultas; amarities, enim, quam gustus sentit digestionis vitio, debetur biliari illi sedimento quo lingua eo tempore contegitur. Quæ ex reliquis sensibus obijci possunt, similes solutiones habent.

Ad 3^m *Dist.*: In sensatione nos affectionem perceptionem-

que nostram experimur sensu interno, cujus objectum est ipse sentiendi actus, *conc.*; eas percipimus per ipsum sentiendi actum, *nego*. Utique conscii sumus nos v. gr. videre, non tamen per actum visionis, sed per sensum internum, qui omnes actus comitatur, ac revelat subjecto.

ARTICULUS V.

Qui sensus sint discretivi objecti a subjecto.

313. PROPOSITIO V. *Tactus certe est discretivus objecti a subjecto; non tamen solus, sed etiam visus. Reliqui vero sensus, quanquam ipsi quoque suum objectum cognoscant, non tamen ipsum a subjecto per se clare discernunt.*

Quid intelligamus quum dicimus, sensationem discretivam objecti a subjecto, jam noscis ex logica (L. 459).

314. Probatur 1^a pars de tactu.

Subjectum sentiens per tactum, experitur extensum resistens ei parti proprii corporis qua ipsum tangit, puta manui vel pedi. Sed extensum resistens subjecto tangenti, ei se offert ut distinctum a tangente, i. e. ut aliquid objectivum. Ergo tactus est ex se vere discretivus subjecti ab objecto.

Perperam ergo contendit Tracys, tactum ex se esse affectionem mere subjectivam, ac proinde realitatem externam manifestare non posse, nisi accedat resistentia motui voluntario. Si enim resistentia quam tactus ex se experitur, ut mera subjecti modificatio apprehenditur, profecto etiam resistentia motui voluntario se ut meram modificationem, non quidem voluntariam, sed necessariam et ex natura subjecti dimanantem, exhibebit sentienti.

Cæterum quisque videt, in argumento quod attulimus, supponi quod supra probatum est (145, seq.), sensationem non perfici in cerebro, sed in organis. Si autem hoc non supponatur, quemadmodum a sensistis non supponitur, quæcunque ad hanc sententiam confirmandam afferantur, nullo negotio eludi possunt (148). Multo magis si supponatur, animam se habere in cerebro ut spectatricem motuum, qui in eo cientur.

315. Dices: quum subjectum altera sui parte alteram tangit, v. gr. quum manum pectori admoveat, extensum resistens experitur; et nihilominus subjectum est idem. Respondeo subjectum esse idem, quatenus unum est suppositum, et in diversis partibus una est anima; sed partes corporeas esse diversas, ac distincto sensu utramque affici, quo se ab altera discernit: subjectum autem duplicem hunc tactum, ac reciprocam partium resistantiam interno sensu experiri.

316. Probatur 2^a pars de visu.

Incredibilia sunt quæ commentus est Condillachius, ut tueretur, hominem qui solo visionis sensu instructus esset, existimaturum colores quos videt, subjectivam sui affectionem esse; quumque se colorem esse putaret, non tamen se superficiem coloratam arbitraturum (1). Atque e contrario nos ita arguimus:

Visus objectum suum proprium, i. e. colores, percipere nequit, quin simul extensionem percipiat. Extensionem autem colorum quos videt, percipit ut a subjecto distinctam. Ergo visus objectum a subjecto discernit.

317. Probatur major.

Visus percipiendos colores, percipit 1^o superficies. Colores enim visu percipimus, ut iis in retina pinguntur; in retina autem pinguntur ut superficies coloratæ. Hinc per diversos colores diversas visus percipit superficies, vel ejusdem superficiei diversas partes, diversamque superficierum magnitudinem; ac si plures colores juxta positi ipsi offeruntur, ex colorum limitibus superficierum limites varios, hoc est *figuras*, apprehendit.

Hinc 2^o etiam *soliditas*, seu *volumen*, visu dignoscitur. Sufficit enim, ut dum oculus sensationem elicit, vel ipse vel objectum moveatur. Solidum enim continetur superficierum non in eodem plano constitutis. Oculus autem, si motus accedat, superficies diversas in diversis planis constitutas conspiciat necesse est. Motu ergo mediante soliditatem percipiet. Neque in hoc a tactu superatur. Etenim etiam tactus solidita-

(1) *Traité des sensat.* P. I, ch. XI.

tem non percipit, nisi per aliquem motum sentiat superficies quæ ipsum afficiunt, in diversis planis jacentes.

3^o Postremo etiam *distantiam*, objectorum ab oculo visus percipit, sub eadem conditione motus. Certe si tam oculus, quam objectum immobilia permaneant, oculus distantiam objecti percipere nequit. Oculus ita constitutus volumen non percipit, sed motu indiget ut illud percipiat, prouti modo dictum est. Distantia autem volumen est quoddam inter oculos et objectum jacens. Igitur oculus sine motu distantiam percipere nequit. At motu accedente vel oculi vel objecti, quemadmodum volumen, ita quoque distantiam percipiet. Quisque porro intelligit, non esse hic sermonem de accurata distantiae cognitione (L. 499, 3^o), sed de cognitione qualicunque.

318. Probatur minor argumenti supra propositi (316): oculus extensionem percipit, ut a subjecto distinctam.

Etenim quum oculus motu mediante volumen percipit et distantiam, non potest hanc distinctionem non agnoscere. Duplex enim extensum oculis percipimus: alterum est solidum unum, nobis perpetuo præsens, a quo nos, etsi velimus, separare nosmetipsos non possumus, quodque interno sensu ad nos pertinere experimur (278, seq.); alterum vero in quo varia solida sunt, eaque semper variabilia, etiam ad voluntatis nutum, ac magis minusve distantia, ad quæ omnia sensus ille internus sese non porrigit. Ergo primum illud extensum ut nostrum, hoc alterum ut a nobis distinctum visus exhibet.

319. Celebris est adversus discretivam oculorum vim Condillachii objectio (1), ex quodam cæco a nativitate, quem Chezeldenus londinensis chirurgus salutaris artis operatione curavit. Erat hic adolescens cujus oculi opacitate *crystallini* (*cataractas* vocant) laborabat. Cumque novo lucis beneficio frui cœpisset, testabatur se objecta percipere oculis adhærentia, prægrandia, illimitata, confusa; donec ope tactus extensionem tribuere coloribus, eosque ad objecta transferre didicit.

(1) *Traité des Sensat.* III p. Ch. V.

320. Multa sunt a pluribus auctoribus et in facti narrationem, et in conclusionem ex eo illatam animadversa: nec omnia referre juvat: pauca hæc sufficient, quæ subdam.

1° Ex pathologia male arguitur ad physiologiam. Certe oculus qui per plures annos succreverat inexercitus, et ab extraneo corpore occupatus, difficulter mobilis erat, nec radios excipere poterat eodem modo, ac oculus qui sanus et undequaque perfectus, quando natura postulat, luci aperitur. Hoc ipse Condillachius alibi animadverterat (1).

2° Adolescentis illius responsionibus fidendum valde non est. Cum enim, quod ad sensationes visus attinet, plane novus esset, carebat ideis omnibus quas hic sensus suppeditat; proinde vim vocabulorum quæ ad visionem pertinent, vel nullo modo vel parum intelligebat. Poterat igitur ipse inaccurate loqui; ophthalmicus vero artificiosas urgens quæstiones, poterat ea responsa omnia extundere, quæ suis opinionibus confirmandis acciderent.

3° Sed revera ex hoc experimento quid ad summum inferri jure potest? Hoc sane, et non aliud: oculos, quum post tenebras plenam repente lucem hauriunt, confusas impressiones excipere, id quod omnes experimur; atque insuper, quum primo diem vident, non illico suo munere perfecta fungi, sed exercitio aliquo indigere ut perficiantur. Ast immerito prorsus exinde concluditur, oculos ope solummodo tactus, subiectum ab objecto discernere posse. Ad hoc enim per se pares sunt, præsertim si motus accedat, ut supra dictum est.

4° Id quod aliquatenus ipsa Chezeldinii narratio testatur. Ait enim, adolescentem vidisse objecta oculo adhærentia. Ergo is et objecta a subjecto discernebat, et licet parum, a retina tamen distantia percipiebat. Quid ergo, quum moveri cœpit?

321. Probatur 3° pars propositionis de reliquis sensibus. Quod reliqui quoque sensus non subjecti affectiones, sed objectum directe cognoscant, res est ex dictis (305) manifesta. Sed aliud est quod hi sensus suum objectum cognoscant,

(1) *Essai sur l'origine des connaissances humaines* I. p. Sect. VI.

scant, aliud quod objectum percipiant ut a subjecto distinctum. Jam distinctionem hanc hi sensus non videntur per se clare cognoscere. Odores enim, sapes, atque etiam soni nihil habent ex se, quo se ut objectivos exhibeant. Extensio enim quam odoratus, gustus, et auditus sensationes implicant (L. 27), non objectiva est, sed subjectiva, videlicet extensio corporis sentientis, quæ ad sensum fundamentalem pertinet: sapes enim v. gr. diversam a sonis atque ab odoribus sedem occupant. Objectivam igitur extensionem eæ sensationes non revelant. Actio vero objecti, quam saporem aut odorem dicimus, si a tactu eam comitante præcindas, adeo est dissimulata ac latens, ut ab interna quadam causa videri possit producta. At quoniam hæ sensationes solitariae non sunt, sed cum visus ac tactus sensationibus in uno eodemque interno sensu conjunctæ, brevi ac facile ipsæ quoque discretivæ fiunt.

322. Ex dictis inferes 1° esse generatim falsum, quod quidam philosophi opinati sunt, discretionem subjecti ab objecto per sensus nullam fieri, sed ab intellectu post experientiam per ratiocinium inferri; atque hinc sensationes haberi ut *cognitiones* non posse. Id quod ex eo quoque falsum apparet, quod non infantes solummodo, sed etiam bruta objecta externa a seipsis se discernere, perpetuo demonstrant.

2° Multo magis falsum esse quod Kant docuit, intuitiones sensiles ex conjunctione sensationum cum formis subjectivis spatii ac temporis effici. In primis enim sensationes ex se objectorum sunt perceptiones; quædam autem ex iis objectum a subjecto discretum natura sua exhibent! ac cum iis reliquæ. Præterea quis non videat, quam absurde dicatur, sensationes per elementum subjectivum objectivas fieri? Spatium enim est conditio ac forma subjectiva sensus: corpora autem in spatio apparere debent. Ergo in subjecto, non a subjecto discreta, appareant necesse est.

ARTICULUS VI.

Quomodo intellectus corpora cognoscat.

323. Supra (299) monuimus, non esse confundendam sensationes. ETC. III.

sitivam corporum cognitionem, cum intellectiva. Cujusmodi illa sit huc usque vidimus; nunc aliquid de altera.

Duo quoad corpora cognoscere potest intellectus: 1^o quid sint; 2^o an reipsa extra mentem existant. Supponimus ex dicendis utramque cognitionem, in eo statu quem nunc obtinet, ab intellectu acquiri non posse, nisi sensationum ope.

324. PROPOSITIO VI. *Intellectus corporum ideas immediate format sensationum ope; externorum vero corporum existentiam cognoscit ratiocinio.*

In primis constat ex dictis (279, 8^o) ad rudimentalem quamdam corporis ideam efformandam sensum sufficere proprii corporis. Eam porro perficit intellectus sensationibus externis adhibitis. Ac primo genericam ideam format, ex iis quæ tactus maxime ac visus percipiunt. Generica enim corporis idea exhibet substantiam extensione ac vi resistendi præditam. Jam extensionis conceptum abstrahit intellectus tam a tactus, quam a visus sensationibus; resistantiæ vero notionem ex tactus sensationibus haurit. Ergo.

Ad specificas vero ideas efficiendas reliquis omnibus sensibus utitur.

325. Quod ad corporum existentiam attinet, existentia proprii corporis immediate ab intellectu percipitur per reflexionem in sensum proprii corporis. Cætera vero corpora existere cognoscit ratiociniis innumeris et quotidianis, quorum elementa sunt hinc quidem sensitivæ intuitiones, et constantia quam deprehendimus inter sensationes visus et tactus; inde vero principium causalitatis (L. 470).

326. Neque dicas, pueros horum ratiociniorum incapaces esse; qui tamen de corporum existentia non dubitant. Etenim si pueri ad ita ratiocinandum vere idonei non essent, hoc unum concludere deberemus, eos sensitiva solum cognitione corpora apprehendere, ut bruta apprehendunt; intellectiva autem de eorum existentia certitudine carere. Sed si sermo sit de pueris, qui rationem exercere cœperint, negandum plane est, ratiociniis hujusmodi eam inesse difficultatem, quæ eorum vires superet. Principium enim causalitatis in ipsis rationalis vitæ exordiis ab homine cognosci dicendum.

est: eo enim non cognito, vix ulla ratiocinatio circa res contingentes et quotidiana facta institui posset, aut medium ullum ad finem disponi. Hoc autem principium probe pueris notum esse, satis demonstrat sollicitudo illa, qua rerum causas ex adultioribus perpetuo sciscitantur. Berkeleyi vero et cæterorum idealistarum sophismata illi ne suspicantur quidem; ac propterea non indigent responsionibus ex veracitate ac bonitate Dei depromptis, ut ab iis se expediant.

CAPUT IV.

DE IMAGINATIONE AC MEMORIA SENSITIVA.

ARTICULUS I.

Notiones experimentales.

327. Præ omnibus fortasse facultatibus sensitivi ordinis mirabiles sunt imaginatio et memoria; sed quum eas considerare aggredimur, nulla ex æquo tractatio fortasse est obscurior. Multa quidem de his semper disseruere philosophi; fatendum est nihilominus, tot illustrium ingeniorum disputationibus naturæ secretum reseratum non esse. Fortasse nec reserari potest. Quare in hoc maxime loco nos lector reperiet breves. Exponemus primo summatim quæ de his facultatibus experientia comperta sunt, dein hypothesim aliquam, quæ probabilior videatur, innuemus.

328. Quisque sibi conscius est, se non modo præsentis suas affectiones interno sensu experiri, externoque percipere objecta quæ organa afficiunt, sed etiam internas hasce externasque sensationes, quum præsentis amplius non sunt, etiam post diuturnum tempus, instaurare se posse atque ut præsentis relegere. Insuper non modo objectorum, quæ sensu percepit, imagines se posse renovare, sed insuper easdem variis ac miris modis dividere atque componere. Demum, se probe cognoscere, plures sensationes quas in sua imagine contuetur reviviscentes, olim præsentis fuisse.

329. Est igitur in homine virtus seu facultas 1° retinendi sensationes olim habitas, easque reproducendi; 2° componendi ex iis varia objecta, quæ sensu non percepit; 3° recognoscendi sensationes reproductas, ut olim a se habitas. Primam et alteram facultatem *phantasiam* seu *imaginationem* appellare solemus: quidam autem philosophi facultatem reproducendi, phantasiam; componendi vero, imaginationem proprio nomine dixerunt. Imagines quæ uno aut altero modo, rebus absentibus, fingimus, *phantasmata* nuncupant.

Primam simul ac tertiam facultatem dicimus *memoriam*, sensitivam quidem, si sit per simplicem apprehensionem sensationis præteritæ, intellectivam vero si sit recognitio comparativa (L. 590, seq.) actuum spiritualium (1). Sed de hac modo non loquimur.

330. De hisce facultatibus hæc certa sunt:

1° Reproduci possunt sensationes tum internæ, tum externæ: quemadmodum enim v. gr. imaginor templum aut domum quam vidi, ita etiam sitim, aut dolorem capitis, aut cordis gaudium quod olim expertus sum; ita etiam præteritas meas imaginationes ac recordationes. Omnium item sensuum objecta per imaginationem revocari possunt, etiam odores, ac sapes, ac tactiles qualitates, ut quisque in se experitur. Fatendum tamen est, eas internas sensationes quæ proveniunt ab organorum vitio vel læsione, languidiore imagine reproduci quum causa cessavit, quam reliquas quæ huiusmodi causam non habent: pariterque phantasmata visus et auditus esse, ut plurimum, ceteris evidentiora.

2° Eo facilius, cæteris paribus, sensationes reproducuntur, quo maiore attentione illas primo excepiimus. Et generatim reproductio fieri non potest, nisi aliqua, licet perbrevis, attentio objecti perceptionem comitata fuerit. Attentio item ad reproducta phantasmata, ea facit vividiora.

3° Reproductio haberi potest absque recognitione. At non recognitio sine reproductione. Nequeo enim cognoscere, me id quod modo præsens percipio, alio tempore percepisse, nisi perceptio habita reproducatur, una cum iis adjunctis quæ

(1) V. S. Th. Sum. th. p. 1, q. LXXIX. art. VI, ad 2.

tunc eam comitata sunt. Hæc porro adjuncta possunt esse plura vel pauciora, et clare vel obscure instaurari. Si clare instaurantur, memoria est definiti temporis, si obscure, memoria est quoad tempus indeterminata.

4° Reproductionis phantasticæ causa est *associatio*, seu nexus inter representationes existens, quo fit ut dum una præsens est, alteram quoque evocet. Qui nexus, ut in logica de ideis dictum est (L. 56), potest esse *objectivus* et *subjectivus*. Objectivus est relatio aliqua, quam ad invicem habent objecta sensibilia v. gr. similitudo, causalitas, oppositio, loci identitas vel propinquitas, simultaneitas, vel successio. Subjectivus est relatio inter sensationes, quibus objecta nobis repræsentata sunt, ut quum sensationes fuere simultaneæ, aut sibi succedentes, quum in similibus adjunctis vel in oppositis habitæ sunt, quum similes effectus vel oppositos produxerunt. Quum itaque binæ representationes hoc inter se nexu vincuntur, facile fit, ut quum altera per actum sentiendi habetur, altera quoque in imaginatione reviviscat; id quod eo promptius ac melius fit, quo majori attentione hi nexus fuerint animo defixi.

Quum vero una representatio cum multis aliis connexa est, si imaginatio sponte operetur, eam præ cæteris clare reproductit, quæ vel recentius vel validius sensum affectit, vel cum qua præsens sensatio aut imaginatio plures associationis nexus habet; cæteras obscure tantum, et velut a longe positas pingit.

5° Fieri quoque potest, ut causa organica, veluti sanguinis motus aut qualitas, quarumdam imaginum reproductionem determinet. Fortasse tamen in his quoque casibus reproductio debetur associationi internæ affectionis, quam ea causa organica per se ciet, cum affectionibus et imaginibus reproductis.

6° Reproductio in homine quandoque naturalis est, quandoque quæsitæ. Naturalis est, quum phantasmata sensationibus vel aliis phantasmatibus succedunt, ex mera associatio-nis lege. Quæsitæ, quum voluntatis influxu pertentatur promodum imaginatio, ut representationem quam illa cupit,

emittat. Fit autem hoc intellectu dirigente, et ostendente vi ratiocinii ea phantasmata, quibus possibile est, phantasma quæsitum associatione esse connexum. Sic unum phantasma post aliud ab imaginatione elicitur voluntate imperante, donec vel reperiatur quod quæritur, vel voluntas cesset phantasmam torquere. Patet autem, id quod hoc pacto quæritur, simpliciter ignotum esse non posse, sed esse notum saltem confuse. Reproductionem huiusmodi veteres *reminiscentiam* appellabant; quæ quidem in brutis animantibus, ut per se liquet, inveniri nequit.

7^o Compositio quoque phantasmatum vel sponte fit ab imaginatione, vel dirigente intellectu et imperante voluntate. Primæ formationis exempla habes in pluribus somniorum aut delirii imaginibus, alterius in artificum operibus. Primi generis phantasmata format imaginatio quum imagines vel ab eodem sensu vel a diversis sensibus receptas, alias post alias vi associationis tam rapida successione reproducit, ut aliæ aliis temere commisceantur. Phantasmata vero generis alterius, coniungendo phantasmata ab intellectu selecta, juxta leges quasdam de quibus aliquid in logica diximus (L. 24, seq.)

8^o Reproducendi facultas in homine habituum est capax, queis fit idonea ad peculiare aliquod phantasma; vel ad quamdam phantasmatum seriem reproducendam. Hic habitus inducitur, quotiescunque aliquid memoriæ, ut dici solet mandamus.

9^o Nemo ignorat, quantam phantasmata simulare possint evidentiam: præsertim quum actuales sensationes nullæ sunt, ut in somno, atque adeo in vigilia, si in tenebris versemur. Quandoque ipsa ratio phantasiam vim coercere non potest.

10^o Delirium ac dementia ab inordinatione phantasiam originem habent, quum vel tota reproducendi facultas vitatur, imaginesque permiscet atque agitat, excusso penitus rationis iugo, vel unum duntaxat phantasma in ipsa ita desiguitur, ut mens intelligere nequeat, ipsum phantasma esse, non objectum reale (1).

(1) De imaginatione ac memoria sensitiua plura apud plures reperies. Cf. v. gr.

ARTICULUS II.

* *Hypotheses ad facta explicanda.*

351. Ex brevi hac factorum quæ ad phantasmam memoriamque pertinent, analysi, quisque videt, eorum rationes intimis humanæ naturæ latebris repositas esse oportere: mirum proinde non esse, si in re tam abdita investiganda tenebris obruamur. Necessarium non puto systemata omnia exponere, quæ in hac re excogitata sunt; seligam solummodo ex omnibus hypothesi quæ probabiliores videntur.

352. ASSERTIO I. *Ex affectionibus ordinis sensitivi quas experimur, manet in sentiente determinatio ad sentiendum, non quidem actu, sed secundum quamdam dispositionem, cujus ope reproduci possit actu, ubi debitæ conditiones ponantur.*

Etenim affectio sensitiva manifeste non manet in organo sensus; secus sensitivæ perceptiones omnes semper actu permanerent. Neque supponere possumus, ut multi opinati sunt, manere in cerebro, ut in organo sensus interioris communis, species quasdam impressas, sive actibus sensationum, sive a sensationum objectis. Etenim concipi nequit quomodo in cerebri fibrillis manere possint tot motus, quot diversæ sensationes in eo ciere debent, aut quomodo hi motus non confundantur, aut qui fiat ut manente per hunc motum determinatione ad actum, actus non sequatur. Nihil dico de iis qui species in cerebro concipiunt ut quædam rerum vestigia, quæ in eo tanquam in cera imprimantur. Materialis itaque impressio, quæ sensationis est causa, neque in organo, neque in cerebro conservatur.

Si quid igitur de sensitiva affectione in sentiente manet, quid manet? Profecto cum non maneat sensatio, neque actualis determinatio recepta ad sentiendum, superest ut hæc determinatio maneat ad modum dispositionis seu habitus. Est autem necesse ad phantasiam phænomena explicanda, ut

Muratori: *Della forza della fantasia umana*, et Stewart: *Elements of the philosophy of the human mind*. I vol., cap. II, et II vol.

accepta determinatio aliquo modo in subjecto maneat. Ergo.

353. ASSERTIO II. *Sensationis reproductæ sedes verisimiliter est organum, in quo ea primo habita est.*

Indubium puto cuique esse debere, sensationem reproduci in aliqua conjuncti parte. Nam ut sensatio est in organo animato, ita quoque ejus simulacrum eandem sedem habeat oportet. Sensilis enim repræsentatio extensum subjectum postulat. Quid autem verisimilius, quam ut sensatio in eadem conjuncti parte instauretur, in qua realiter recepta est? Id primo inferri posse videtur ex similitudine simulacri cum reali sensatione. Deinde, si bene attendimus, ipse intimus sensus hoc nobis referet. Videmur enim nobis visibilia quæ imaginamur, oculis percipere, et sonos auribus, et lingua sapes. Ac si quando phantasia nobis reproducit dolorem, quo stomachus, aut tibia, aut guttur laboraverit hunc non alibi quam in stomacho, tibia, gutture reproducit. Quid quod, si imaginatio vividior sit, eosdem physiologicos effectus in organo simulacrum sensationis producit, quos ipsa realis sensatio producere solet? Ut quum v. gr. acrem imaginamur saponem, segregari incipit saliva, eodem fere modo ac quum gustatio realis est. Ex his concludi posse videtur, sensationis reproductæ sedes esse sensationum organa.

354. ASSERTIO III. *Dispositio quæ est in organo animato ad actum reproducendum, hunc non reproducit, nisi per motum fluidi nervi in cerebro inchoatum.*

Ut species seu determinatio recepta ad sentiendum sensatio non est (304), ita quoque hujus determinationis retentio non est imaginatio; præsertim cum hæc retentio mera sit dispositio, ut modo dictum est. Necesse est igitur, ut accedat aliquid, quod agens in potentiam dispositam ad actum, eam ad actum reipsa determinet. Existimare autem licet, hoc fieri a cerebro per nervi fluidi motum.

Hæc enim hypothesis primo consona est communi sententiæ, quæ statuit cerebrum esse imaginationis organum. Præterea, ut sensatio cerebri reactione absolvitur (121), sic ejus reproductio cerebri actione determinari debere vide-

tur. Id quod experientia confirmat. Quandoque enim ex cerebri læsione imaginatio deficit, vel certa quædam phantasmata penitus obliterantur. Denique hoc quoque intimo sensu confirmari potest: quum enim rebus imaginandis intendimur, capite nos operari sentimus, nec raro fit ut capite laboremus.

355. ASSERTIO IV. *Id quod hanc cerebri actionem determinat, præter dispositionem in eo quoque a sensatione relictam, est præcedens aliqua sensatio aut etiam phantasma; in homine vero etiam voluntas.*

Manere etiam in cerebro dispositionem ad sensationem, in eo quod ad ipsum attinet, reproducendam, ex dictis (332) liquet. Ad sensationem enim et cerebrum et organum, licet diversimode, concurrunt. Ergo in utroque dispositionem aliquam a sensatione relinqui existimandum est. Sed hæc dispositio non sufficit ad actum instaurandum; at requiritur præterea aliquid quod eam compleat, et cerebrum ad plures sensationes reproducendas dispositum, ad unam potius quam ad alteram reproducendam determinet. Quid autem hoc sit, eruere possumus ex associationis lege.

Quum binæ reales repræsentationes, seu simultaneæ seu successivæ, sensui pluries offeruntur, ex binis speciebus quæ sensum ad binas perceptiones determinant, una species complexa coalescit, quæ ipsum determinat ad utramque, et ex binis dispositionibus ad eas instaurandas in sentiente permanentibus, una dispositio ad instaurandam utramque. Quum itaque, agente iterum in sensus objecto, cerebrum reagit, reactio hæc alteram actionem sibi conjunctam trahit, sive secum sive post se, prouti vel simultaneo nexu vel successivo species conjunctæ sunt. Id ipsum quod sensatio, efficere potest phantasma præcedens, si aliqua de causa reviviscat; in homine vero etiam voluntas, cui phantasia est aliquo modo subjecta.

356. ASSERTIO V. *Memoria sensitiva nihil aliud esse videtur, quam sensus internus simultaneus sensationis præsentis et phantasmatis ejus vi reproducti, una cum adjunctis sensationis præteritæ*

Quum de memoria sensitiva sermo est, arcere prorsus mentem necesse est a comparatione, ac apprehensione comparativa, ab idearum nexu quocunque qui in ideis universalibus situs sit. Hæc enim omnia, cum sint propria intellectus, in sensitiva memoria habere locum non possunt. Propterea nihil superest aliud, nisi ut subjectum sentiens apprehensione immediata sensus externi vel interni rem præteritam ut præteritam apprehendat. Hanc autem apprehensionem puto aliam non esse ab ea quam proposui. Est enim per se manifestum, rem non posse ut præteritam apprehendi sensu externo. Aliunde solus phantasie actus, seu phantasmatis reproductio est quidem cognitio rei præteritæ, sed non ut præteritæ. Si vero una cum præsentis sensatione, phantasma rei ejusdem quam sensus percipit, reviviscat, et cum eo adjuncta perceptionis præteritæ, quæ nunc objectum idem non amplius circumstant; sensus intimus experiatur simul sensationem præsentem per sensum hauriri; phantasma vero reproductum per sensum non hauriri. Non existimo facultates mere sensitivas ulterius procedere posse; sed illa duplex consociata cognitio sufficit ut dici possit, subjectum sentiens aliquo modo distinguere a præsentis id quod præteritum est. Neque aliquid aliud necessarium est, ut explicentur eæ brutorum actiones, quæ præteritarum rerum memoriam requirere videntur.

Et hæc sufficiant, donec meliora occurrant aut suggerantur.

CAPUT V.

DE HUMANO INTELLECTU.

ARTICULUS 1.

De distinctione intellectus a sensu.

537. Nunc de altiori cognoscendi facultate, de intellectu videlicet, quo homo a brutis secernitur, ac nobilissimam in se Creatoris imaginem præferens, materiam sibi subjicit, mundique sensibilis limites transgreditur. Ac primo ii profligandi sunt, qui de ipsa hujus facultatis existentia litem

movent, qui vel inficiantur esse in homine facultatem ullam cognoscendi quæ sensum excedat, vel intellectum verbis quidem concedunt nobis, re autem negant. Hoc hominum genus *sensistas* appellamus, si in homine agnoscant aliquid quod materia non sit; *materialistas* vero, si ipsam sentiendi vim materiæ tribuant. Materialistas jam alibi insectati sumus (86, seq.). Modo sensistas refellere oportet. Sensismi initia apud Græcos reperiuntur. Empedocles enim, teste Aristotele (1), intellectum a sensu non differre existimavit. Inter recentiores vero sensismi instaurator est Lockius, promotor Condillachius; in quorum sententiam præterito sæculo plerique philosophorum serviliter ierunt.

538. Lockii doctrina hæc est. Anima ex se est tabulæ abrasæ similis, in qua nihil descriptum sit; experientia vero accedente, primo ideas recipit simplices, deinde ex his ideas complexas format. Ideas simplices per sensus ac per reflexionem recipit; per sensus ideas qualitatuum corporearum; per reflexionem ideas operationum animæ; per sensus æque ac per reflexionem ideas voluptatis, doloris, potentiæ, existentiae, unitatis, successionis. In ideis simplicibus acquirendis anima est passiva: activa vero 1º quum ideas complexas format, conjungendo simul plures ideas simplices; 2º quum binas ideas juxta positas considerat, formatque ideas relationum; 3º quum idearum quæ sunt reipsa conjunctæ, alteram ab altera abstrahit, ac retinet solum ideas qualitatuum pluribus communium, quæ sunt ideæ generales. Ex his vides, Lockium aliquas animæ facultates attribuisse præter sentiendi vim sive externam sive internam, quæ tamen facultates hoc unum munus habent, ut circa sensationes diversimode operentur.

539. Post Lockium Condillachius in arenam descendens, has quoque facultates nobis diripuit. Visum est illi inutile supponere, animam immediate a natura suas facultates recepisse; natura enim, inquit, nobis organa commodat, ut per voluptatem nos edoceat quæ sint quærenda, et per dolorem quæ fugere debeamus. Hoc naturæ satis est; experientiæ vero

(1) De anima II, text. 150, seq.

curam committit, ut per habitus quosdam opus ab ipsa inceptum consummet (1). In homine igitur nihil est aliud nisi sensatio; ac si quid præter sensationem esse videtur, hoc non est nisi sensatio diversimode transformata. *Attentio* est sensatio quædam exclusiva; *comparatio* est duplex attentio, nempe dupla sensatio; *judicium* est animadversio similitudinis vel differentiæ inter duas sensationes exclusivas; proinde ipsum quoque mera sensatio; *reflexio* est series judiciorum, videlicet sensationum congeries; *imaginatio* est reflexio conjungens in unum objectum qualitates in multis divisas; non aliud ergo est quam sensationum coaptatio; *ratiocinium*eductio unius judicii ex altero cui erat implicitum; totum ergo sensationibus constat. Per has facultates anima intelligit ea ad quæ se convertit, quemadmodum aure intelligit sonos; hinc harum facultatum collectio *intellectus* dicitur. « Fieri nequit intellectus idea accuratior. » Ita concludit homo levissimus (2).

540. PROPOSITIO I. *Præter sentiendi facultatem, est in anima humana superior quædam cognoscendi facultas, quam intellectum dicimus.*

Nam 1º si non esset in homine superior hæc cognoscendi facultas, humana cognitio a brutorum cognitione, ac proinde homo a brutis non differret secundum essentiam, at solummodo secundum majorem vel minorem sensus perfectionem, v. gr. secundum perfectionem tactus, ut existimat Condillachius (3). Atqui conclusio hæc non modo humanæ dignitati et communi sensui, sed obviæ quoque experientiæ repugnat. Homo enim ea cognoscendi vi pollet, qua sensibilia omnia transcendit, universalia apprehendit, in se suosque actus reflectitur, ad suos fines nova semper media excogitat, interque opposita bona quasi judex eligit. (71, seq.). Nihil autem horum in brutis perspicitur. Humana ergo cognitio a brutorum cognitione ipsa differt essentia.

2º Sensus est facultas quæ per organi corporei affectiones

(1) *Traité des Sensat.* Dessein de l'ouvrage.

(2) *Logique*, p. I, ch. VII.

(3) l. c. in nota.

exercetur. In homine vero est facultas quædam cognoscendi, quæ per corporeum organum nec exercetur, nec exerceri potest, ut alio in loco demonstratum est (97, seq.). Ergo.

3º Ideæ quas intellectui tribuimus, tantum abest ut sint sensiles ipsæ repræsentationes, aut earum reproductiones, prouti sensit Condillac, ut imo ab iis infinite differant. Etenim

a) repræsentationes sensiles sunt tantummodo de rebus singularibus: singularia enim sunt, quæ sensus afficiunt; intellectuales autem ideæ sunt de universalibus rationibus, non v. gr. de hoc aut de illo homine, sed de ratione hominis propria, de eo quod est esse hominem.

b) repræsentationes sensiles sunt semper de rebus corporeis; nam qualitates sensibiles, quæ sunt propria sensuum objecta, sunt tantummodo in rebus corporeis. Ideæ autem vel sunt de rebus incorporeis, quæ nihil habent cum sensibilibus qualitatibus commune, ut sunt existentia, possibilitas, necessitas, jus, officium, substantia, causa, aliaque plurima; vel si de rebus corporeis, eas repræsentant sine iis conditionibus, quæ a repræsentatione sensili aut imaginaria sunt prorsus inseparabiles. Nam v. gr. non potest sensus aut phantasia repræsentare triangulum, nisi determinatæ alicujus magnitudinis, et cum certa aliqua laterum inclinatione, nec hominem, nisi alicujus certæ staturæ, hujus illiusve coloris, et in determinata aliqua positione ac statu corporis: at idea trianguli ab ejus magnitudine et ab omni determinata laterum inclinatione præscindit, unde fit ut triangulis quibuscunque conveniat; itemque idea hominis nec staturam ullam, nec colorem, nec situm partium repræsentat.

Necesse est igitur concludere, sensum ab intellectu essentialiter differre.

4º Sine facultate cognoscendi quæ sensum excedat, nulla veritas necessaria cognosci posset; ac propterea nullum principium a priori possibile foret, nec certitudini proprie dictæ ullus superesset locus. Ratio in promptu est. Sensus enim singularia percipiunt. Singularia autem et quæcunque eis

insunt, contingentia sunt. In contingentibus autem necessarium reperiri nequit.

5^o Denique juris et officii notiones nec per sensus acquirere, nec sensibilia elementa utcumque conjungendo aut separando, formare possumus. Sensationes enim obligationis moralis conceptum nullo pacto continent; ac solum inducere possunt ad prosequendum id quod voluptatem affert, et ad vitandum quod doloris molestiæ causam esse perspeximus. Ens itaque mere sensitivum, juris et officii notiones habere nequit; ac proinde nec moralitatis et obligationis, nec meriti vel demeriti, nec præmii vel pænæ capax est. Atqui homo eas notiones habet, et est ens moralitatis capax. Ergo non sola cognitione sensitiva gaudet.

341. Ex his perspicis, quænam sit ultima sensismi conclusio; hæc scilicet: hominem esse quoad essentiam bruto similem, natum ad voluptatem, beatum si animales instinctus expleat, nulli legi subjectum, nulli pænæ quæ legitima sit obnoxium, ejusque vitam et existentiam morte penitus absolvi. Sane ex illationis absurditate principii falsitas arguenda erat. Sed humanæ cupiditates, quibus adeo abjectum de nostra natura indicium ab antiquissimis usque temporibus acceptissimum fuit, exitialem illationem avide arripuerunt. Quid post hæc factum sit de humana societate vidimus, et experimur adhuc.

342. PROPOSITIO II. *Nisi cognoscendi facultas sensu superior animæ tribuatur, per operationes omnes quas illis Lockius attribuit, e sensibilibus qualitatibus ambitu eadem emergere non posset.*

Sine hac superiori facultate repræsentationes omnes humanæ mentis, quas Lockius ideas vocat, nihil aliud essent, quam sensationes aut phantasmata, ut patet etiam ex origine quam suis ideis Lockius assignat (338). Si itaque tales sunt ideæ, quidquid in iis animus operetur, earum naturam mutare non poterit, eodem pacto ac quidquid operetur chemicus circa corpora, corpoream substantiam in aliam quæ corporea non sit, mutare nequit. Igitur animus intra sensibilibus qualitatibus ambitum semper versabitur.

343. Revera operationes animi circa ideas, juxta Lockium, hæc sunt: *compositio, juxta-positio abstractio.*

Jam 1^o phantasmata utcumque composita, nihil aliud exhibebunt, quam collectionem phantasmatum, nempe qualitatibus sensibilibus, ut sensu perceptæ sunt.

2^o Juxta ponantur binæ repræsentationes sensiles, ac simul considerentur: manebunt semper binæ repræsentationes, ex earumque consideratione nunquam relationum notiones exsurgent. Relationes enim reales revocantur ad relationes identitatis, et ad relationes causalitatis (O. 215). Atqui neutræ percipi possent.

344. Non relationes identitatis. Nam binæ qualitates sensibiles juxta positæ, semper duplicem sensationem gignant necesse est, ac nunquam ut aliquid unum apprehendi poterunt, nisi accedat facultas perceptiva sensu superior, quæ rationem entis in rebus apprehendat.

Non relationes causalitatis. Etenim repræsentationes sensiles exhibent solummodo res sibi succedentes, non unius rei influxum in alterius existentiam. Licet autem, ut alibi dictum est (O. 274), intimo sensu causalitatem propriam homo sentiat; non tamen causalitatis ideam acquirere potest, nisi in intimum sensum reflectat, et existentie ideam habeat, et substantiam propriam a propriis modificationibus distinguat. At sensus intimus nequit se reflectere in seipsum, nec per facultatem sensitivam existentie ideam haberi potest, aut fieri distinctio substantie a modificatione. Ergo.

Quod si animus, ut a Lockio confingitur, relationes reales cognoscere non posset, multo minus relationibus rationis, v. gr. relationibus temporis, aut relationibus moralitatis, intelligendis idoneus foret. Harum enim relationum fundamenta sunt notiones rerum prorsus insensibilibus.

345. 5^o Quid poterit abstrahere animus a sensationibus aut phantasmatibus? Profecto quasdam partes, aut quasdam sensibiles qualitates. Poterit v. gr. capitis alicujus individui repræsentationem reproducere, et parietem quem videt album, imaginari atratum. At ideas universales nunquam effingere poterit. Fac enim, ut Lockius assumit, posse animum

separare a Petro, Jacobo, Joanne quod est singulis peculiare, atque id tantum retinere quod est omnibus commune. Quid est hoc omnibus commune? In Lockii sententia nihil aliud esse potest, quam aliqua sensibilis qualitas. Igitur supererit representatio plurium sensibilibus qualitatibus, v. gr. color Petri, color Joannis, color Jacobi; supererunt nempe tres colores individui, aut tres altitudines, aut tres figuræ, aut aliquid hujusmodi. Hæc autem quæ supererunt, fieri nunquam poterunt aliquid unum, nisi forte hoc pacto, quod animus ad unum ex iis se convertat, cæteris non attentis. Unum autem in pluribus, quod universale constituit, nunquam ab animo percipi per abstractionem poterit, nisi inter ea quæ abstraxit, identitatem essentialis antea percipiat; quam quidem, ut diximus, percipere nequit. Itaque in Lockii sententia non potest humanus animus universales ideas per abstractionem efficere.

346. PROPOSITIO III. *Turpiter hallucinatur Condillachius, quum asserit, omnes animæ facultates ad sensationem transformatam reduci.*

1º Quam sit hoc inconsiderate dictum, vel ex eo manifestum est, quod ut ponamus esse in anima humana sensationes transformatas, præter sensationes et sentiendi facultatem, tribuenda animæ erit vis aliqua activa a sensu diversa, quæ in sensationes agat, easque transformet. Quam vim, si Condillachius a sensatione non discernit, similis est illi qui fabrum a stipite quem dolat, distinguere nescit.

347. 2º Sensatio est mera representatio qualitatis sensibilis, est affectio subjecti, quæ ab objecto determinatur. Atqui

a) attentio non meram representationem, nec passivam subjecti affectionem dicit, sed activitatem quæ sentiendi facultatem ad certum aliquod objectum percipiendum convertit, applicat, ac defixam tenet. Ergo attentio est aliquid a sensatione diversum, etiam tum quum ad sensibilia dirigitur.

b) Id potiori jure de judicio dicendum. Demus sane comparisonem esse tantummodo duplicem attentionem, demus quoque judicium esse perceptionem. Falsum est in primis, esse perceptionem similitudinis vel differentie inter binas

sensationes. Nam quum judicamus v. gr. purpureum illud odorem esse, non sane percipimus, sensationem coloris purpurei similem esse sensationi odoris, sed objectum quod una sensatione nos affecit, esse idipsum quod nos affecit altera.

Falsum præterea perceptionem similitudinis, vel differentie, inter duas sensationes, aut inter duarum sensationum objecta, non esse aliud quam binas hasce sensationes conjunctas. Patet ex iis, quæ supra dicta sunt contra Lockium de relationum cognitione (344).

Denique judicia plurima humanæ mentis circa objecta insensibilia versantur, ut v. gr. omnia judicia moralia. Alia plura, quæ dici possent, prætermitto.

c) Quid de ratiocinio dicemus? Satis commode Condillachius ratiocinium describit, ut eductionem unius judicii ex altero, ut per hoc suadeat, inferendi actum esse propemodum attentionem quamdam, ad unam ex præcedentis perceptionis partibus coarctatam. Sed etiamsi res ita se haberet, cum judicium ad sensationes reduci nequeat, ratiocinium quoque ad sensationes pertinere non posset.

Deinde verum quidem est, conclusionem in altera præmissarum contineri. At educi vel deduci ex ea nequit, nisi altera præmissa accedat, et ex utraque simul consequentia aperiatur. Explicet igitur Condillachius, quo pacto consequentie intuitus ad sensationes revocari possit; ostendat videlicet consequentiam esse objectum sensibile, et assignet sensum quo percipitur.

ARTICULUS II.

De objecto intellectus.

348. Venio nunc ad humani intellectus objectum. Non erit hic sermo de objecto intellectus, ut est potentia aliquo modo passiva, nempe de eo quod movet ac determinat intellectum ad actum; de hoc enim infra disputabitur; sed de objecto intellectus, ut est virtus operatrix, de eo nempe cujus apprehensione intellectus ab omni alia facultate distinguitur. Primum illud vocant *objectum quo*, hoc alterum *objectum quod*.

*349. Objectum porro hujusmodi considerari potest 1^o *materialiter* et *collective*, nempe secundum extensionem quam habet; 2^o *formaliter* et *exclusive*, i. e. secundum id cuius apprehensio ad solum intellectum pertinet; et in hoc duo possunt præ oculis haberi, vel ratio formalis quæ ab intellectu apprehenditur, vel modus quo ea repræsentatur; 3^o *formaliter*, et *sub ratione finis*. Primo modo objectum intellectus est *omne ens*; secundo est *essentia*, et *universale*; tertio est *veritas intellectus*. De universali infra; nunc de cæteris.

350. PROPOSITIO I. *Formalis ratio quam intellectus apprehendit est rerum essentia.*

Notandum 1^o essentiam apprehendi posse duplici idea, concreta et abstracta (L. 29). Essentia quæ intellectus objectum dicitur, est essentia concepta non per ideam abstractam, sed per concretam; non humanitas v. gr. sed homo; quam concretam essentiam veteres ex Aristotele vocabant: *quod quid est*. Potest tamen intellectus, postquam essentiam hoc modo concepit, eam abstracte concipere, ut formam quamdam metaphysicam (O. 307, 1^o);

2^o essentiam, ut alibi diximus (O. 47, 2^o), esse humani intellectus objectum, prouti exprimitur per rationes illas communissimas et maxime indeterminatas, *ens*, *unum*, *bonum*, *subjectum* et similes, hasque vel solas, ut primo contingit, vel per qualitaturn et effectuum cognitionem coarctatas, id quod fit experientia crescente.

351. Probatur propositio.

1^o Res a diversis potentiis diversimode cognoscuntur. Attingi autem res cognitione possunt, vel *relative*, i. e. quatenus afficiunt immutantque ipsum cognoscens, vel *absolute*, quatenus videlicet sunt aliquid in seipsis. Jam sensus, ut supra dictum est (303), res percipiunt, prouti hæc diversis modis organa afficiunt; visus enim vidit colores quatenus retinam movent, aures audiunt sonos, secundum quod nervum acousticum agitant, idemque dicito de reliquis. Intellectus vero non afficitur ab objectis. Percipit enim corpora quæ in ipsum agere non possunt, cum sit inorganica facultas. Igitur

non relative res cognoscit; superest ergo ut eas cognoscat absolute, nempe secundum id quod sunt.

2^o Hoc ipsum inferri potest ex intellectu præ sensu præstantia. Quo enim cognoscendi potentia nobilior est, eo profundius ac perfectius res apprehendat oportet. Sensus autem unam aut alteram qualitatem percipiunt, prouti qualitates sub experientiam cujusque sensus cadere possunt; imaginatio, quæ superior facultas est, non unum tantum qualitatem, sed omnes tam divisim quam conjunctim amplectitur. Intellectus autem, cum sit his omnibus altior, non qualitates rerum, quæ sunt extimæ illis, et ut ita dicam earum cortex, sed quod rebus intimum est percipiat oportet. Id autem quod est rebus intimum est essentia, quæ qualitatum omnium est radix atque subjectum. Hanc ergo intellectus percipere dicendus est. Atque hinc intellectus nomen sortitur; *intelligere* enim est quasi *intus legere*.

3^o Manifestum cuique est, nos in rebus rationem *entis* percipere; quam quidem non sensus percipiunt, sed intellectus. Hanc autem rationem semper intelligimus, quotiescunque intellectu aliquid percipimus; quia omnes mentis conceptus hunc conceptum continent, et in hunc resolvuntur (O. 9). Ens autem pertinet ad rerum essentiam. Ergo.

352. Oppones fortasse, intellectum non modo essentiam rerum percipere, sed etiam essentiæ accidentia, ipsasque sensibiles qualitates. Nam de his quoque judicamus et ratiocinamur, et scientiam habemus, ut v. gr. de figuris, de sonis, de coloribus. Optime quidem: hæc omnia cognoscit intellectus: at quid inde inferas? Hoc sane: intellectum non tantummodo substantiarum, sed etiam qualitatum, et qualitatum quoque sensibilibum essentias percipere: quod mirum esse non debet; nam etiam qualitates substantiarum sunt quædam entia, suamque habent essentiam, ac per hoc scientiæ objectum esse possunt.

353. PROPOSITIO II. *Objectum adæquatum intellectus, si ejus extensio spectetur est omne ens.*

Ratio est in promptu. Id omne quod est aliquid in se, id omne quod essentiam habet, ab intellectu cognosci potest, ut

patet ex dictis. Omne autem ens est huiusmodi. Ergo.

354. PROPOSITIO III. *Nihilominus objectum intellectui humano, in eo in quo nunc est statu, primo ac per se proportionatum est rerum materialium essentia.*

Facile intelligis, per hanc propositionem non ita excludi subjecti cognoscentis actus, ac si hi non essent intellectui humano proportionatum objectum. Quanquam enim hi proprie non sint objectum; sunt enim in subjecto, et fiunt ab intellectu objectum, quatenus anima vim intellectivam in seipsam retorquet (286, 3°); nihilominus ii quoque sunt hoc modo intellectui humano, etiam in presenti statu, intelligibiles, ut patet. At non sunt id quod *primo ac per se* intellectui offeratur. Primo enim homini offeruntur objecta externa, quæ ille sentit et intelligit, ac deinde in actus, queis ea sentit et intelligit, intellectu revertitur.

355. Probatur propositio.

Objectum intellectui proportionatum ac proprium est illud, quod per naturalia media ei primo ac per se cognoscendum offertur. Atqui tale objectum sunt res materiales; hæ enim per sensus ei sponte offeruntur ante quodvis aliud objectum intelligenda. Nam cæteras intelligentias ac Deum cognoscit post experientiam ac per ratiocinium; seipsum vero per reflexionem in actus, quibus objecta externa intellexit. Ergo.

356. PROPOSITIO IV. *Objectum intellectus, prouti hoc nomine intelligitur terminus in quem intellectus tendit, est ipsius intellectus veritas.*

Etenim terminus in quem intellectus tendit, est cognoscendi actus. Fit autem intellectus cognoscens per hoc, quod rei cognitæ conformatur. Hæc autem intellectus cum re conformitas est intellectus veritas (L. 371). Ergo.

357. Hinc est 1° quod intellectus dum rerum essentias apprehendit, nunquam est ex se a rebus difformis, ut jam in logica demonstratum est (L. 378). Etenim, ut acute s. Thomas animadvertit, « sicut res habet esse per suam formam, » ita virtus cognoscitiva habet cognoscere per similitudinem » rei cognitæ. Unde sicut res naturalis non definit ab esse

» quod sibi competit secundum suam formam..., ita virtus » cognoscitiva non deficit in cognoscendo respectu illius rei, » cujus similitudine informatur... Intellectus informatur si- » militudine quidditatis rei (1). »

Hinc quoque est 2° quod quum intellectus reflexe percipit aliquam ideam esse rei conformem, assentiri cogitur. Cognito enim proprio objecto, ad illud necessario tendit (L. 710).

Hinc 3° veritas aliter dicitur objectum intellectus apprehendentis, aliter intellectus judicantis. Dicitur enim objectum intellectus apprehendentis quatenus est terminus in quem tendit apprehendendi actus, ut modo dictum est. Dicitur vero objectum intellectus judicantis, secundum quod est *ratio formalis*, vi cujus intellectus enuntiabilibus sibi propositis assensum præbet.

CAPUT VI.

DE IDEARUM NATURA ET ORIGINE.

ARTICULUS I.

Exponitur primo systema aristotelicum.

358. Sequitur ut intellectus operationes consideremus. Duplex est humani intellectus essentialis operatio: apprehensio et iudicium: ratiocinium enim, et quæcunque alia intellectu operamur, ad duos hosce actus revocantur. Incipiamus a primo:

Hic se nobis offert celeberrima illa quæstio de natura et origine idearum. Cujus quanta sit gravitas, nemo non percipit; quanta sit difficultas, perpetuæ philosophorum hæc de re contentiones satis manifestant. A perantiquis enim philosophiæ ætatibus de idearum origine acerrime disputatum est, ac nostris adhuc temporibus pertinaciter disputatur. Cavendum tamen ne, quemadmodum quidam arbitrari

(1) *Summ. th.* p. I. q. XVII. art. III.

videntur, tanta aestimetur hujus quaestionis gravitas, ut quasi principii loco recipiatur, nullam veritatem constitui a philosopho posse, nisi haec primum quaestio definiatur; difficultas quoque non adeo exaggeretur, ut quis sibi persuadeat, nihil in hac controversia statui posse, quod certum sit, opinionesque omnes, ut fit in iis quae vix levissime probabilia sunt, eodem in pretio, atque adeo nullo in pretio impune posse haberi. Utrumque enim iudicium et falsum est penitus, ut ex dicendis patebit, et rei philosophicae non leviter noxium accideret.

359. Quatuor sunt de idearum origine praecipua systemata. 1^m est systema *idearum innatarum*, quod sub variis formis a Platone ad Kantium usque et Rosminium propositum pluries fuit: 2^m systema *aristotelicum*, quod ab omnibus scholasticis unanimiter receptum est: 3^m systema *ontologismi*, cujus auctor Malebranchius plures in nostra adhuc aetate sectatores habet: 4^m systema *traditionalium*, omnium recentissimum. Nihil dico de *sensismo*. Haec enim abjectissima doctrina intellectum ejusque ideas non explicat, sed negat. De ea jam actum est in praecedenti capite.

* 360. Inter recensita systemata, peculiarem proculdubio attentionem suo jure a philosopho sibi vindicat systema aristotelicum: auctoritate enim caeteris longe praestat. Neque in hac controversia, ut in quaestione illa altera de corporum principiis, ulla sunt facta recentius animadversa, neque ulla nova instituta sunt experimenta, quae hujus auctoritatis vim elidere aut etiam infirmare queant. Nec vero auctoritate solum illud valet; sed etiam, si recte intelligatur, et absque praedjudicio expendatur, rationi se unice probat, saltem quod ad rei caput ac summam attinet. Primo itaque hoc exponemus atque expendemus; deinde caetera quae rejicienda arbitramur.

* 361. *Systema aristotelicum* his praesertim capitibus continetur.

1^o Humanus intellectus non est semper in actu erga suum objectum, sed ex se est in potentia, indigetque ut a potentia ad actum transeat. Quod autem a potentia ad actum transit,

oportet ut ad actum determinetur; ac proinde quadantenus passivum est. Intellectus igitur determinatione aliqua indiget, ut actum suum ponat, ac potentia passiva dici potest.

2^o Rerum corporearum essentia est proprium intellectus humani objectum. Ad hoc autem objectum pertinet, ut intellectum ad suum actum determinet. Sed rerum corporearum essentia non est actu intelligibilis: quia cum sit materialis, intellectum qui immaterialis est, immutare non potest. Oportet igitur, ut fiat prius actu intelligibilis et aliquo modo immaterialis. Proinde necesse est, ut in intellectu sit aliqua virtus, quae rei materialis quidditatem intelligibilem actu efficiat.

3^o Inde sequitur, in intellectu humano duplicem potentiam esse, alteram activam, passivam alteram. Activa vocatur ab Aristotele *intellectus agens*, passiva *intellectus possibilis*. Illius munus est, objecta materialia, quae intelligibilia actu non sunt, facere actu intelligibilia; id quod exsequitur producendo *species intelligibiles* (intellectuales) in intellectu possibili: ad hunc vero pertinet, species hujusmodi recipere, atque intelligendi elicere.

4^o Ut species sensibilis est similitudo quaedam objecti individui secundum aliquam sensibilem qualitatem, ita species intelligibilis similitudo est objecti a conditionibus materialibus denudati. Hanc porro speciem intellectus agens producit *abstractione* quadam a phantasmatibus; unde etiam dicitur phantasmata illuminare. A phantasmatibus autem species abstrahi dicuntur: videlicet non a sensationibus ut sunt subiecti affectiones, sed a sensilibus representationibus quae unum idemque objectum, pro sensuum quibus haustae sunt varietate, diversimode exprimunt; quaeque in phantasia coadunantur, et vi interni sensus (62, 1^o) in unum simulacrum componuntur. Non est opus ut referam opinionum varietates, quae in his omnibus particulatim explicandis apud diversos auctores ortae sunt. Vide Suarez in libro quarto de anima (1).

5^o Species intelligibilis non est id quod intellectus intelli-

(1) C. II, § 4 seq.

git, sed id quo ad intelligendum movetur. Proinde est quasi quoddam objecti semen in intellectiva potentia insertum, quo ipsa fit idonea ad ideam objecto similem generandam. Igitur intellectio non est productio specierum aut earum receptio, sed operatio quam intellectus possibilis specie informatus ac fœcundatus elicit.

6° Intellectus in eo quod operationem intellectivam elicit, quamdam rei intellectæ intentionem in se format, quam dicunt *intellektionis terminum, speciem expressam objecti, mentis conceptionem, verbum mentis*, ac denique *ideam*. Hoc verbum, seu idea, est similitudo rei intellectæ, ut species intelligibilis, ab ea tamen omnino distinguitur.

7° Proprios actus, per eosque seipsum intellectus potest intelligere: nam quamvis hi singulares sint, sunt tamen immateriales; sed valde controversum fuit apud veteres, quomodo intellectus singularia materialia cognosceret. Qua de re infra.

8° Memoria intellectiva est ipse intellectus possibilis, qui species intelligibiles receptas conservat, ac per eas intelligendi actum reproducere potest.

9° Res incorporeas, quarum non sunt phantasmata, intelligere non possumus, nisi per aliquam comparisonem ad sensibilia.

10° Tanta est intellectus nostri in hoc præsentis vitæ statu a phantasiæ operatione dependentia, ut ea quoque, quorum species intelligibiles penes se habet, intelligere aut recolere nequeat, nisi simul imaginatio ad phantasmata congrua convertatur.

11° Ex his omnibus patet, quo pacto intellectus nostri cognitio ortum habeat a sensibus, et a sensitivis facultatibus dependeat. « Non potest dici quod sensibilis cognitio, ita » s. Thomas, sit totalis et perfecta causa intellectualis cognitionis, sed magis quodammodo est materia causæ (1); » videlicet quia intellectui agenti suppeditat phantasmata, ex quibus quasi ex materia quadam ipse educit formas intelligi-

(1) *Sum. th.* p. 1, q. LXXXIV, art. VI.

bilium, quibus intellectus possibilis ad intelligendum determinatur.

12° Pronuntiatum illud: *nihil est in intellectu quod non fuerit in sensu*, certe nec apud Aristotelem, nec apud aristotelicos saltem alicujus nominis, reperitur, sed sæpe, recurrit apud sensistas. Quod si juxta aristotelicæ doctrinæ placita intelligendum sit, ita erit explicandum: *Objecta materialia quæ intellectus intelligit, fuerunt prius percepta a sensibus, sed in iisdem objectis alia sensus, alia intellectus apprehendit: a sensibilibus vero intellectis ad multa alia, quæ prorsus immaterialia sunt, intelligenda mens manuducitur; quæ tamen non intelligit, nisi phantasmatis adjunctis*. Si vero dictum illud ita interpretetur: *Cognitio intellectus ea tantum continet quæ a sensu accipit; nisi quod hæc sensilia elementa varie modificat*; hæc erit doctrina Lockii vel Condillachii, non Aristotelis et scholasticorum.

ARTICULUS II.

Idearum origo juxta exposita principia explicatur.

362. Id quod quæstionem de idearum origine maxime difficilem facit, hoc est, ut explicetur quomodo intellectus noster suum proprium objectum, nempe rationes universales, necessarias, immutabiles, æternas percipiat, cum tamen et ipse et res omnes, quarum experientiam habere possumus, sint singulares, contingentes, mutabiles, caduæ ac fluxæ. Versatur autem hæc controversia potissimum ac primo circa ideas primitivas ac fundamentales (O. 5), ac primos essentialium conceptus: consentiunt enim omnes, ex his primis ideis, experientiæ ductu, cæteras deinde ideas efformari.

363. Dico igitur harum idearum originem in exposita Aristotelis et scholasticorum doctrina satis commode explicari; saltem, ut præmonui, quod ad rei summam attinet; id quod sequentibus propositionibus ostendemus.

PROPOSITIO I. *Perceptiva virtus intellectus nostri determinatione aliqua indiget, ad hoc ut actum suum exerat. Ad eam autem determinandam res materiales ex se ineptæ sunt*; sen-

siles quoque repræsentationes atque imaginationis phantasmata sunt insufficientia.

364. Probatur 1^a pars. Virtus perceptiva nostri intellectus ex se neque hujus neque illius determinati objecti cognitionem actualem habet, sed natura sua indifferens est ad hoc vel ad illud cognoscendum. Quod autem ad plura indifferens est, non agit, nisi determinatione accepta. Ergo intellectus, ut a potentia ad actum transeat, et aliquid particulare cognoscat, determinatione aliqua indiget; quam cum sibi ipsi tribuere nequeat, necesse est ut eam aliunde accipiat. Hanc determinationem, juxta veteres vocare possumus *speciem intellectualem*.

365. Prob. 2^a pars.

1^o Objectum materiale, ut est in se, agere, in intellectum non potest. Corpus enim ineptum est ad spiritalem et inorganicam potentiam movendam atque immutandam. Ergo.

2^o Ut aliquod objectum cognoscendi facultatem ad actum determinet, intime illi uniatur necesse est. Cognitio enim, ut in præcedentibus dictum est (303, 2^o), in quadam objecti apprehensione sita est. Objecta autem externa et materialia, ut sunt in se, intellectivæ potentiæ intime conjungi non possunt, ut per se liquet. Ergo.

366. Prob. 3^a pars.

1^o Licet sentiendi facultas atque imaginatio in eadem anima, in qua est intellectus, radicem habeant, nihilominus sensilis omnis repræsentatio non est in anima solum, sed in conjuncto. Hinc de materiali natura adhuc participat, ac proinde potentiam passivam intellectus, quæ prorsus immaterialis est, immutare non potest.

2^o Objectum quoque in materiali organo repræsentatum, aptum adhuc non est, ut inorganicæ potentiæ intime conjungatur; id quod ad intellectionem requiritur.

3^o Objectum corporeum, prouti in sensu et phantasia continetur, non est proprium intellectus objectum; sensus enim et phantasia non percipiunt corporum essentiam, quæ est proprium intellectus objectum (350). Omnis autem potentia quæ determinatione indiget, a proprio objecto determinanda est.

Ergo per sensationes et phantasmata objecta materialia aliquo modo sunt perceptivæ intellectus virtuti admota, quia anima in qua est intellectus, jam iis afficitur: sed non sunt adhuc illi ita conjuncta ut necesse est ad ipsum determinandum.

367. PROPOSITIO II. *Dicendum nihilominus, phantasmata requiri ad hoc ut perceptiva virtus intellectus ad sensibilia percipienda determinetur.*

Nam 1^o anima in qua est intellectus, cum objectis externis primo conjungitur, non aliter quam per sensationes ac phantasmata, quæ sensiles repræsentationes coadunatas reproducent. Oportet autem objectum quod ab intellectu percipiendum est, aliquo modo animæ conjungi. Ergo.

2^o Si ea solum considerentur quæ intellectus habet ex semetipso, intellectiva virtus per hæc solum determinari nequit ad hoc potius quam ad illud percipiendum: ex se enim intellectus est indifferens ad omnia. Est itaque necessarium, ut ad determinatas perceptiones intellectus aliunde moveatur. Nihil autem est a quo determinari possit, nisi sensitiva cognitio.

3^o Accedit quoque experientia. Si enim cuipiam homini aliquis sensus desit, hic intellectiva cognitione eorum omnium quæ ad eum sensum pertinent, prorsus caret. Sic v. gr. qui cæcus natus est, perspectivæ scientiam ac picturæ artem comparare sibi non potest. Similiter si corporalia organa quæ imaginationi deserviunt, lædantur, etiam intellectus operationes impediuntur ac perturbantur, ut videre est in amentibus. Ergo.

368. PROPOSITIO III. *Supponi potest perceptivam intellectus potentiam ad sensibilibus essentiam percipiendam, ipsius animæ virtute, per abstractionem a sensilibus repræsentationibus determinari.*

Ut hæc propositio probetur, duo necessaria sunt: 1^o explicandum est, quo pacto abstractio hæc a sensilibus repræsentationibus intelligi debeat; 2^o eorum quæ in hac hypothesi proponuntur, possibilitas in tuto est collocanda.

369. Itaque quod ad primum attinet, abstractio hæc a sen-

silibus repræsentationibus duplici modo intelligi potest:

a) quod ideæ ipsæ a sensationibus abstrahantur, ita ut eæ nihil sint aliud quam elementa prius in sensatione contenta, quæ ab ipsa deinde separentur ac diversimode componantur. Abstractio ita intellecta sensismus est merus.

b) quod animus, oblata sibi per sensum re materiali, vi sibi propria præscindens a facto sensationis, essentiam rei intelligibilem quæ vere in illa est, deprehendat. Hæc autem est, saltem quod ad rei substantiam attinet, sententia Aristotelis et scholasticorum; quæ aliquantulo fusius declaranda est.

Igitur anima quatenus organis corporeis inserta est atque immixta, sentiendi et imaginandi actus exercet. Per hosce autem actus repræsentatio sensilis elicitur, quæ objectum quidem a subjecto discretum exhibet (313), sed non ut objectum, ut ens. Perceptio enim sensitiva non absolute sed relative objecta attingit (303). Ast animæ virtus non est penitus organis mancipata, sed potest absque organorum ministerio operari. Igitur post sensilem repræsentationem, potest anima e regione, ut ita dicam, organica ad superiorem se regionem attollere. At quomodo? Videlicet præscindendo a facto subjectivo impressionis quam ab objecto corporeo una cum organis accepit, et per hoc a facto existentie objecti quod ipsam affecit. Hac præcisione facta, hoc objectum ut objectum percipit, nempe ut ens (L. 509). Ad hanc vero præcisionem exsequendam, ipsa illa modificatio quam in sensatione recepit, eam determinat; ac propterea præcisio hæc non est voluntaria, sed naturalis.

* 370. Si hac in re Aristotelis et scholasticorum vocabula usurpare placet, vim qua anima percipere potest objectum absolute ut objectum, vocabis intellectum *passivum* seu *possibilem*, i. e. determinabilem; vim qua anima se attollit e regione sensitiva ad intellectualem, dices *intellectum agentem*, seu determinantem; præcisionem a facto sensilis repræsentationis, *abstractionem a phantasmatis*; determinationem quam anima se ita elevans sibi tribuit ad objectum nobiliori illo modo percipiendum, appellabis *speciem intellectualem*

lem impressam ab intellectu agente in intellectu passivo. Quæ species recte dicitur *abstrahi a phantasmatis*, primo quidem quia hæc determinatio in perceptivam intellectus potentiam inducitur ab anima, eo quod ipsa sensili repræsentatione afficitur, et a facto hujus sensitivæ affectionis emergit; deinde vero quia notæ et quasi lineamenta quibus objectum in intellectu percipiente exprimitur, sunt ratio indeterminata objecti seu entis, quæ radicaliter, et ut ita dicam, materialiter in sensili repræsentatione continetur (313), et qualitates sensibiles quibus objectum corporeum nos affecit (O. 46); non tamen amplius relative perceptæ, sed absolute conceptæ. Unde phantasmata ad intellectualem hanc speciem se habent quasi ad modum causæ exemplaris (1).

371. Probatur secundo, nihil esse in hac hypothèsi; quod possibile, atque adeo verisimile non sit.

Tota enim hæc hypothesis huc redit, quod anima humana vim habeat 1º percipiendi ut objectum id quod in sensatione percipitur secundum quod afficit subjectum; ac 2º determinandi se, posita sensatione, ad hanc absolutam perceptionem.

Jamvero 1º non est absurda vis illa percipiendi objectum corporeum ut objectum. Nam objectum omne revera est in se aliquid quod sua constat essentia. Rursus, per sensationem anima objectum corporeum a se distinguit. Quid igitur repugnantie est in hoc, quod possit ulterius procedere, et hoc quod a se distinguit, percipere ut a se distinctum, ut in se est, ut objectum, ut ens? Anima profecto res materiales per unum organum diversimode percipit ac per organum alterum: v. gr. id quod oculis coloratum percipit, tactu percipit resistens ac gustu sapidum. Quidni possit, postquam objectum per organicas affectiones relative percipit, dein exerere se propemodum ab organis, et ex edita mentis specula non relative amplius illud ipsum, sed absolute cognoscere?

2º Non est absurdum, imo maxime congruum, quod anima ad objectum ita percipiendum seipsa determinare valeat. Non enim repugnat, imo experientia certissimum est, unam

(1) Cf. Suarez; *De anima*, lib. IV, c. II, § 12 seq.

animæ facultatem per alteram ad actum determinari posse; quemadmodum v. gr. intellectus appetitum, et appetitus intellectum aliquo modo determinant. Omnes enim animæ facultates ad unam eandemque pertinent simplicissimam animam; seu potius omnes facultates sunt una eademque animæ virtus, quæ ideo in plures facultates distinguitur; quia circa diversa objecta distinctis actibus diversa munia exercere potest (266). Potest igitur anima, ut est principium facultatis sentiendi, semet, posita sensatione, determinare ad hoc ut a facto subjectivo simul et objectivo præscindat; ac rursus in eo quod præcisionem hanc exsequitur, se ad vis apprehensivæ superioris actum movere.

Præterea naturæ animæ valde consentaneum est, ut cum non tota sit organis demersa, sed superiori suæ virtutis parte organis supereminet, semetipsam naturaliter determinet, ut ab actu organicorum ordine ad superiorem ordinem transeat.

Hypothesis ergo proposita possibilis est, ac verisimilima.

372. PROPOSITIO IV. *Si hæc hypothesis recipiatur, explicatur optime quomodo intellectus noster objecta materialia percipiat.*

Sane, ad hoc problema solvendum, explicare oportet, quomodo anima, quæ sensuum ministerio relative solum res materiales cognoscit, easque individuas et contingentes, ad essentiæ universalis et necessariæ cognitionem provehat (362). Atqui hunc transitum commode explicant binæ illæ vires *abstractiva* et *perceptiva*, quæ animam humanam instructam ponimus. Nam si anima potest percipere ut objectum et ens, præscindensque a contingenti existentia facto, id quod in sensatione relative percipiebat, jam essentiam rei percipiet (350, 2°), ac propterea aliquid ex se universale et necessarium (O. 53, 2° 1°). At nos ponimus animam instructam vi naturali percipiendi objectum ut objectum; eam insuper ponimus præditam vi præscindendi a facto subjectivo sensationis, et per hoc a facto objectivo, i. e. a contingenti objecti existentia: ponimus denique per hanc ipsam

præcisionem vim illam perceptivam superiorem naturaliter ad actum reduci. Ergo hæc hypothesis optime explicat quomodo, posita sensatione, intellectus noster objecta materialia modo sibi proprio percipiat.

375. Ex his colliges.

1° Cognitionem intellectualem ortum habere a sensibus, ex eo solum quod sensus intellectivæ virtuti objectum a se perceptum, quasi materiam quamdam, offerunt, circa quam ipsa exerceatur. In anima autem ipsa est virtus activa quæ intellectum movet.

2° Intellectum humanum duplici vere potentia constare, *abstractiva* et *perceptiva*. Prior activa est, altera passiva: illa non intelligit, sed agit determinando in altera intellectionis actum: hæc intellectionis actum elicit, a priore mota ac determinata.

3° Vim abstractivam, seu intellectum agentem (361, 3°, 4°), esse idipsum quod *lumen intellectuale* dicere solemus. Quemadmodum enim lumen corporeum corpora actu visibilia facit, ita intellectus agens eadem facit actu intelligibilia.

ARTICULUS III.

De verbo mentis.

374. Nunc aliquid de ipso intelligendi actu, ac de verbo mentis.

PROPOSITIO V. *Intellectiva perceptio non est mera passio perceptivæ virtutis, sed operatio. Per hanc vero operationem mens in seipsa verbum seu ideam producit, qua rei quam percipit, essentiam exprimit.*

Probatur 1° pars. 1° Si intellectio mera mentis passio esset, ipsa speciei receptione consummaretur. At speciei receptio nihil est aliud, quam determinatio ad intelligendum. Ergo intellectio est aliquid diversum a speciei receptione; ac proinde non est mentis passio.

2° Si intellectio non esset mentis operatio, sed passio, esset actio transiens alterius operantis in mente recepta. Proinde intellectio non foret vitalis actio. Vitalis enim actio

est immanens, et ab eadem potentia elicitur, in qua recipitur.

Igitur quamvis mens ad intelligendum determinatione indigeat, ut supra dictum est, posita tamen determinatione operatur, et ita intelligit.

575. Probatur 2^a pars.

1^a Actio, ut actio, nihil est aliud quam quidam rei cujuspiam modus, nempe ejus dependentia ab agente. Sed modus non est, nisi sit res cujus est modus. Ergo actio non est, nisi sit aliquid quod ab agente dependeat. In omni igitur actione aliquid ab agente procedit, et hoc est actionis terminus. Id autem quod procedit ab agente per actionem transeuntem, est aliquid extra ipsum, et e contrario quod ab agente procedit per actionem immanentem, est aliquid intra ipsum agens.

Jam intelligendi actio est immanens. Ergo per eam producitur terminus menti intrinsecus. Hic autem terminus est verbum mentis, objectum exprimens. Cognitio enim perficitur per assimilationem cognoscentis ad rem cognitam. Ergo.

2^a Intellectus rem sive præsentem, sive absentem indifferenter intelligit, ut etiam imaginatio. Objectum autem potentiae, dum ipsa agit, semper illi præsens sit oportet. Necesse est igitur, ut quemadmodum per imaginandi actum formatur in imaginatione sensibilis imago, ita per intellectum formetur imago objecti intelligibilis, sive hoc sit præsens sive sit absens.

3^a Intellectus præterea hoc habet sibi proprium, quod res intelligit ut separatas ab iis conditionibus, quæ existentiam necessario comitantur. Nam hominem v. gr. intelligimus, sine ulla determinata magnitudine, nullo certo situ corporis, aut colore, aut figura. Hoc autem pacto res intelligi non posset, nisi intellectus rem quam intelligit, in seipso exprimeret. Ergo.

* 376. Ad verbi naturam melius intelligendam, hæc sedulo animadvertenda :

1^a In verbi productione mens nostra activa est, et simul passiva. Activa quia illud elicit, passiva quia illud in se recipit.

2^a Verbum appellatur quoque *idea*, et *species expressa*. Et hæc quidem tria re idem sunt, videlicet objecti similitudo ab intellectu in semetipso producta ; differunt tamen ratione. Verbum enim proprie significat dimanationem termini mentalis ab intelligente ; idea vero rationem imaginis quæ est in eodem termino ; species autem expressa utrumque designat.

3^a Cognitio spectari potest, ut est actio seu productio, et ut est actus completus, seu qualitas producta ; nempe veterum vocabulis, vel *in fieri*, vel *in facto esse*. Utroque autem modo spectata cognitione, verbum ab ea secundum rem non distinguitur. Productio enim hæc est verbum, ut fit ; qualitas vero producta est verbum, ut factum.

4^a Terminus intrinsecus cognitionis, ut est actio, est actus seu verbum ; ut est actus ac verbum, est objectum cognitum et expressum. Hinc verbum, seu idea, mentis quidem modificatio est, sed alterius repræsentativa. Hoc autem est ens intellectum, in cujus similitudinem se mens format, quum intelligit.

5^a Verbum itaque non est id *quod* cognoscitur directa cognitione, sed est id *quo* aliquid aliud cognoscitur. Quemadmodum enim per speciem intellectualem mens determinatur ad intelligendum, ita per hoc quod verbum producit ac recipit in seipsa, intelligens actu constituitur.

6^a Hinc patet errasse Reidium, qui ideas omnes eliminandas putavit, ut tueri possemus cognitionis objectum esse res. Qui in eo quoque deceptus est, quod cognitionem sensilem ab intellectu distinguere nescivit. Multo magis ontologi errant, qui sibi persuadent ideas subjectivas non esse, sed cognitionis objectum : de quibus infra.

7^a Ideæ non sunt cognitionis directæ objectum ; at nemo negat easdem cognitione secunda ac reflexa intellectus objectum esse posse, atque adeo objectum *in quo* cognito res cognoscamus ; ut quum per idearum analysim rerum proprietates intelligimus.

ARTICULUS IV.

De cognitione singularium et universalium.

377. Una ex præcipuis difficultatibus in hac controversia illa est: quomodo intellectus singularia materialia cognoscat. Aristoteles hanc inter intellectum et sensum differentiam constituit, quod sensus sit singularium, intellectus universalium (1). S. Thomas idipsum docuit, eo maxime fundamento innixus: principium individuationis esse materiam individualem. Is statuit intellectum, cum sit immaterialis, individua quæ materialia sunt, intelligere non posse, nisi eorum naturam a conditionibus materialibus abstrahat. Naturam autem ita abstractam non esse amplius singularem, quia non est amplius in materia individuali. Propterea intellectum directe non singularia sed universalia intelligere: posse nihilominus singularia intelligere indirecte et per quamdam reflexionem, seu conversionem ad phantasmata, e quibus rei universalis species abstracta fuit (2).

E contrario alii non pauci, inter quos Suaresius, censent intellectum nostrum singularia quoque materialia per proprias eorum species, nec per conversionem ad phantasmata, sed directe cognoscere (3).

Si mediam quamdam opinionem promere licet, tam prima sententia quam altera unum, ut ita dicam, veritatis latus exhibere videtur; ac fortasse si utraque apte componatur, veritatem integram assequi dabitur.

378. Prænotandum 1º id quod singularis cujusque essentiam a cæteris intrinsecus distinguit, determinate a nobis non cognosci; hinc singularia ab invicem discernimus solummodo per collectionem quamdam accidentalium modorum, quibus singularis essentia non constituitur, sed manifestatur (L. 31.). In hoc conveniunt omnes.

(1) De anima, II, ch. V.

(2) Summ. th. p. I. q. LXXXVI. art. 1; et alibi passim.

(3) Suarez: De anima, lib. IV, c. III.

2º Fatendum quoque rationem illam qua s. Thomas utitur, non posse a nobis adhiberi. Nam quod materia sit individuationis principium, a peripateticis de corporum natura theoriis deducitur; imo vero, iis quoque admissis impugnari potest (O. 109).

3º Advertendum denique est, quum inquiritur, an intellectus in rebus materialibus solum universale cognoscat, non esse sermonem de universali reflexo, sed de directo (L. 338), nempe de ratione aliqua, quæ ex se universalis sit, licet ut universalis non cognoscatur. Rationes enim specificæ universales esse cognoscuntur, comparatione facta individuum, ut alibi traditum est (L. 33, 338).

379. PROPOSITIO VI. *Primæ conceptiones humani intellectus sunt non modo universales, sed maxime indeterminatæ.*

Enim 1º communis sententia est, primas intellectus conceptiones esse illas: *ens, unum*, aliasque hujusmodi; id quod ostendunt etiam primæ voces, quibus pueri ac rudes utuntur, qui res maxime disparatas hac appellatione rei indiscriminatim designant. Voces autem mentis conceptus manifestant. Jam notiones hujusmodi sunt omnium maxime indeterminatæ. Ergo.

2º Hoc quod dicimus usque adeo verum est, ut si quando pueri nomina quædam propria addiscant, hæc ipsa sic adhibeant, ac si conceptus tantummodo communes significarent. Atque inde est, ut observat Aristoteles, quod *pueri principio viros omnes appellant patres, postea autem unumquemque determinant* (1).

3º Id naturalis quoque intellectus nostri conditio postulat; qui cum principio omni cognitione careat, ac successive perficiatur, ab actibus imperfectis ad perfectiores gradu quodam ascendat necesse est. Oportet igitur, ut primo per conceptus obscuros, deinde per claros atque distinctos res cognoscat. Primi itaque conceptus quos format, ii esse debent qui rebus omnibus sunt communes, ac minimum quod ab intellectu percipi possit, continent. Conceptus autem magis determi-

(1) Phys. I, text. 5.

nati, qui præviam aliquam experientiam et comparisonem exigunt, primi esse nequeunt. Patet itaque, primos intellectus conceptus esse eos quos indeterminatos, dicimus, et inter hos eos qui sunt maxime indeterminati.

380. PROPOSITIO VII. *Negari nequit, intellectum nostrum, saltem postquam experientia edoctus est, ita singularia cognoscere, ut proprios distinctosque eorum conceptus efformet.*

Hoc 1^o patet ex eo, quod judicia nostra plurima sunt de singularibus; ut quum v. gr. judicamus: Petrum esse verum amicum, illum annulum esse aureum, et aliquam individuum actionem honestam esse aut turpem. Prudentiæ virtus et ars practica circa singularia perpetuo versantur, ac de singularibus semper judicant. Atqui judicium proculdubio ad intellectum pertinet: prudentia item et ars sunt intellectuales virtutes. Ergo intellectus et singulare quod est in iis iudiciis subjectum, et universale quod est in prædicato, proprio conceptu cognoscit, unumquæ ab altero distinguit.

2^o Intellectus est sensu ac phantasia superior; ac secundum naturalem ordinem hoc munus habet, ut non modo iis facultatibus utatur, sed etiam eas dirigat et corrigat. Ergo singularia, quæ ab iis cognoscuntur, ab intellectu quoque cognoscantur necesse est.

381. PROPOSITIO VIII. *Intellectus noster singularia materialia per proprias ipsorum species cognoscere potest.*

Nam 1^o si ens materiale in genere per proprias species intelligi potest, cur non etiam ens materiale individuum? Profecto intimam individualitatis essentiam cognoscere non possumus per propriam speciem; sed neque intima essentiarum communium constitutiva hoc pacto cognoscimus (O. 46). Quemadmodum itaque essentias communes per externas aliquas manifestationes concipimus, ita quoque essentias individuales concipere possumus.

2^o Singularium proprius conceptus continetur notis toti speciei communibus, per accidentalium quorundam modorum collectionem coarctatis. Atqui notæ communes percipi ab intellectu possunt per proprias species; itemque omnes

illi modi quibus individua distinguuntur; nam nec forma, nec figura, nec locus, nec tempus, nec nomen, nec alia quævis hujusmodi adjuncta ea sunt, quorum species in intellectu recipi nequeant. Ergo.

3^o Anima a corpore separata certe aliquorum singularium cognitionem conservabit. Eorum igitur species intellectus possidebit. Ergo capax est intellectus recipiendi species individuorum proprias.

382. PROPOSITIO IX. *Dicendum nihilominus, conceptus quoslibet intellectus in se spectatos, rationem aliquam universalem natura sua semper exprimere. Hinc ut intellectus singulare qua tale cognoscat, necesse est, ut ad sensationis seu præsentis seu revocatæ factum se convertat.*

Prob. 1^a pars.

Vel sermo est de conceptibus primis et indeterminatis, vel de conceptibus per proprias singularium species effectis.

Si de prioribus loquimur, nemo non videt eos conceptus non communes modo, sed communissimos esse. Idem, ut patet per se, dicendum de specificis quibusvis rationibus.

383. Illud potius mirum videbitur ipsos conceptus qui per proprias singularium species efformantur, ex se universales esse. Tamen si quis rem paululum consideret, facile intelliget, ita omnino esse sentiendum. Sane si intima singularitatum diversarum constitutiva, ut in Dei cognitione sunt, intellectus noster conspiciere posset, hoc quod dicimus verum non esset. Illi enim conceptus vere, et ex se, et essentialiter singularium essent proprii. Sed non ita noster intellectus singularia cognoscit; ast etiamsi species singularium proprias illi concedamus, hæ species, ut sæpe dictum est, notis aliquibus communibus, et accidentalium quorundam modorum collectione solummodo continentur. Atqui, ut in logica monuimus (L. 318), quævis hujusmodi collectio talis est in statu pure intelligibili posita, ut pluribus individuis possibilibus conveniat. Existere enim certo loco, certoque tempore, tali forma, figura, nomine, relationibus, non est profecto aliquid, quod necessario uni tantum individuo possibili conveniat.

384. Concedo equidem, hæc omnia simul, si ut factum considerentur, pluribus amplius convenire non posse. Etsi enim v. gr. plura individua similia in certo quodam loco, diversis temporibus existere possint, non tamen eodem tempore. Solum itaque factum, cognitum ut factum, est illud quod rejectis cæteris possibilibus, quibus conceptus ex se communis applicari potest, hunc in uno tantum defigit, hypothetica necessitate. Solum ergo factum, cognitum ut factum, singulare ut singulare nobis manifestare potest. Noster autem intellectus a facto præscindit, quia experientiæ limites transcendens, solam objecti, quod ipsi offertur, entitatem intelligibilem naturaliter apprehendit. Ergo.

385. Hinc patet ratio 2^a partis.

Nam ut singulare, qua tale, cognoscatur, necesse est, ut intellecta individui entitas ad factum reducatur. Hæc autem reductio fieri nequit, nisi conversione ad sensationes. Factum enim ut factum solo sensu a nobis attingitur. Ipsa namque sensatio purum factum est, illudque immediate nobis præsens; res vero externæ sensatione exhibentur, ut facti hujus terminus et objectum.

Sic autem ut diximus, singularia qua talia ab intellectu cognosci, graphice ostendit terminus singularis *ex demonstratione* (L. 78, 1^o). Hic enim constat termino communi, et demonstrativo pronomine; ut v. gr. *hic homo*. Jam terminus communis communem essentiam significans, intellectus conceptum promittit; demonstrativum vero pronomen supponitur audienti pro gestu quo sensationis objectum, indicetur ac si extenso digito diceret: aspice naturam quam nomino, in objecto quod ego designo: de hoc loquor objecto.

386. Conversio porro ista est reflexio intellectus in repræsentationes sensiles vel phantasmata, prouti per intimum sensum sunt quiddam animæ præsens. Quod postremum addo, quia quæcunque repræsentatio sensilis vel quodcunque phantasma, si præcisione facta ab interna eaque præsentia affectione, ut aliquid objectivum ab intellectu inspiciatur, hoc ipso universale quiddam est, prouti constat ex dictis (383). Ast actualis intimus sensus est essentialiter fa-

ctum, atque ita est factum, ut neque in statu intelligibili facti naturam exuere possit, neque ut universale quid apprehendi. Est enim natura sua contingens, et individuus, et fluens, ac proinde nec multiplicabilis est, nec iterabilis, etiam in eodem subjecto. Proinde repræsentatio sensilis, quum respicitur ut hujus facti terminus, non potest non apprehendi ut factum.

387. Ex hucusque disputatis deduces:

1^o intellectus nostri objectum, id nempe quod directe et ex se in rebus intellectus percipit, esse universale, non tamen cognitum ut universale.

2^o cur rationes ab intellectu perceptæ sint necessariae, immutabiles, æternæ, et aliquatenus infinitæ. Quia nempe licet individua, quæ sensu percipimus, prorsus contingentia sint, est tamen in illis essentia quædam, quæ quum ab intellectu apprehenditur, non ut factum, sed ut quiddam ex intelligibilibus constitutivis coalescens, habet jam eas omnes proprietates, quæ ad essentiam in statu intelligibili consideratam pertinent (O. 51 53).

3^o Deduces quoque iterum quod supra statuimus abstractionem elementi idealis phantasmatis huc denique redire, quod vis activa animæ humanæ propria perceptivam intellectus potentiam determinet ad hoc, ut id quod in phantasmate repræsentatur, ut *objectum* et *ens* in se ipsa exprimat, præscindens a facto subjectivo, videlicet a facto impressionis quam in organis illud producit, et per hoc a facto objectivo, i. e. ab actuali ejus existentia.

4^o Demum intelliges ex dictis, quo ordine intellectus universalialia cognoscat. Duplex in universalium cognitione distinguendus est ordo; alter directus et spontaneus, alter reflexus atque scientificus. Si de primo ordine sermo sit, manifestum est, intellectum magis universalialia ante minus universalialia cognoscere. In eo enim qui primo aliquid cognoscit, cognitio obscura claram, confusa distinctam, et incompleta completam præcedit; eoque tardius acquiruntur conceptus, quo majorem experientiam pluresque comparationes postulant (379, 3^o).

Si vero alterum ordinem consideremus, inverso itinere procedit intellectus. Nam ad investigandas rerum proprietates atque principia, conceptus quos habere se reperit, resolvit in partes, donec per successivas præcisiones ad ultima elementa deveniat.

ARTICULUS V.

De cognitione immaterialium.

388. Quæremus modo, quo pacto intellectus noster immaterialia cognoscat. Ut alibi diximus (O. 4) alia sunt immaterialia secundum rem, alia secundum mentis considerationem. Immaterialia secundum rem naturaliter nobis nota, sunt anima nostra, et prima rerum causa Deus; immaterialia secundum mentis considerationem sunt ideæ puræ, quæ nullum sensibile elementum continent, ut ideæ entis, simplicis, veri, honesti aliæque hujusmodi. Dicamus de singulis.

Quod ad animam nostram attinet, opportuniore loco statuimus, animam intellectiva cognitione non per seipsam se, sed per suos actus cognoscere (282, seq.). Superest ut definiamus, quomodo hosce actus intellectus apprehendat.

389. PROPOSITIO X. *Actus sive conjuncti proprios, sive spirituales intellectus percipit determinatione accepta ab intimo sensu.*

Prob. 1^a pars ex eo quod ii actus, quorum subjectum non est sola anima sed conjunctum, aliquo modo materiales sunt; proinde, ut tales, intellectum ad cognitionem immediate determinare nequeunt. At radix facultatem, a quibus hi actus eliciuntur, est intimus sensus, qui in eadem anima, in qua est intellectus, sedem habet (291). Quoniam autem de facto, ut factum est, percipiendo agitur (386), sufficit ad intellectum determinandum intimus sensus, quo affectiones illæ ad animam pertinent.

390. Prob. 2^a pars. Actus spirituales sunt in sola anima, tanquam in subjecto: sunt ergo illi ex toto intime præsentés

per sensum, quem habet sui; proinde per seipsos, absque ulla alia specie, intellectum ad actum determinare possunt.

391. Nota 1^a internas affectiones percipi posse ab intellectu, actu vel spontaneo, vel reflexo. Actus autem spontaneus, qui determinationem ab intimo sensu acceptam naturaliter sequitur, vix rem delibat, uti maxime contingit in externis sensationibus. In his enim intellectus ad rem externam percipiendam directe intenditur, ad subjectivam autem affectionem indirecte solum et oblique. At potest intellectus in hanc affectionem, reflecti, externa re neglecta. Hæc vero reflexio, qua internæ affectiones proprie percipiuntur (286, 5^o), conscientiam constituit (L. 444).

Nota 2^a affectiones internas, ut singulare quid, primo ab intellectu percipi; earum vero conceptus universales fieri abstractione reflexa, per quam intellectus ab individualis sensus facto præscindit, et affectionem propriam ut objectum considerat, non amplius attendens ad se v. gr. dolentem aut cogitantem, sed simpliciter dolentis aut cogitandis conceptus efformans. Nova deinde abstractione formæ a subjecto (L. 29), doloris et cogitationis ideas effingit.

Nota 3^a animam seipsam quoque cognoscere dependenter a sensibus. Nam se cognoscit per proprios actus. Ejus autem actus vel sunt actus sensuum, vel ab actibus sensuum dependent.

392. PROPOSITIO XI. *Idea Dei est idea deducta ex rebus finitis; cujus elementa sunt ideæ perfectionum finitarum, adjecta notatione excessus, et negatione imperfectionum omnium.*

Idea Dei alia est confusa et initialis, alia explicita et formalis, ut alibi diximus (O. 362). Jam prior illa idea Deum exhibet ut *ens quod est prima rerum causa, et a quo omnia dependent*. Utraque vero nota constat elementis indeterminatis, et ex rerum finitarum consideratione depromptis, quæ sunt ideæ *entis, causæ et potentiæ*, addito conceptu eminentiæ cujusdam, et negatione dependentiæ ab alio Conceptus autem eminentiæ est a rerum finitarum consideratione: una enim res alteri excellit; ex eodemque fonte negationem dependentiæ intelligimus: multas enim res videmus a qui-

busdam aliis dependere, ab aliis non dependere, ut v. gr. sol ab homine non dependet. Quod ergo ad primam hanc Dei notionem attinet, manifestum est quod asseruimus.

393. Notio altera perfectior Deum exhibet, ut ens infinitum infiniteque perfectum. Quid autem intelligimus, quum infinitam hanc Dei perfectionem cogitamus? Sane eum esse intelligentem, liberum, potentem, justum, beneficum, providum, sed multo magis ac melius, quam quaelibet alia natura, quam animo fingere possimus; ad hæc, esse sine causa a qua dependeat, sine initio, sine mutatione, sine compositione, sine ullo limite perfectionis. Hæc est perfectissima Dei notio quæ in humana mente reperiatur; nec vel mortaliū sapientissimi nobiliorem aut sublimiorem Entis infiniti conceptum assequi possunt, ut experientia constat. Jam si in hoc conceptu consideres quod positivum est, nihil invenies quod non sit experientia cognitum; quod superest reliquum, est affirmatio excessus et negatio defectus. Patet itaque assertum, etiam quoad Dei notionem explicitam et formalem.

394. Hinc colliges, quid reponendum sit iis, qui illud perpetuo obijciunt: infinitum per finitas perfectiones concipi non posse. Qui enim ita loquuntur, supponunt ideam qua infinitum concipimus, positivis ac propriis notis eum repræsentare. Quod si verum foret, profecto hæc idea elementis a rebus finitis abstractis componi non posset. Sed infiniti notio non est ejusmodi, ut dictum est; sed partim positiva, partim negativa, atque illud ipsum quod in ea positivum est, non per proprias notas Deum refert, qui finita omnia excedit, sed solum per analogicas, ut in theologia latius explicabitur. Nullum itaque absurdum, si hæ notæ a rebus finitis desumantur, adjecta tamen affirmatione excessus ac negatione defectus; quibus duobus Dei incomprehensibilitas exprimitur.

395. PROPOSITIO XII. *Rationes rerum immateriales mens nostra vel cognoscit per species abstractas a sensationibus, sive internis sive externis, vel ex aliis immaterialibus rationibus per comparisonem et judicium componit.*

Sane rationes hujusmodi vel immediate intellectus apprehendit, vel mediate. Si immediate constat ex dictis, immediatam hanc apprehensionem fieri per abstractionem a sensibilibus modo explicato; si mediate, eæ apprehendi nequeunt, nisi ex varia elementorum immediate abstractorum comparisonem et compositionem.

396. Immediate abstrahit intellectus conceptus communissimos *entis, unius, multitudinis, boni et mali*, saltem physici, quos in rebus omnibus natura sua intellectus apprehendit, ut oculus colores, et auris sonos; tum vero perceptione comparativa notiones accipit *relationum, ordinis, pulchritudinis*, aliasque cum his connexas.

397. Inter ideas porro quas immediate intellectus abstrahit, quædam sunt, quas illi reflexio solum in spirituales actus suppeditare potest. Ex his v. g. ideam *simplicis* adipiscitur intellectus (O. 337); et ex reflexione in proprias cognitiones, in propriam activitatem, in prima principia, ideas *veræ, causæ, necessitatis* educit; ut aliis in locis explicatum est.

398. Mediate ex rerum eventuumque collatione ideas *contingentiæ et possibilitatis, substantiæ et accidentis, spatii ac temporis*, aliasque hujusmodi colligit. Ex idea vero *ordinis*, et per varias apprehensiones comparativas, quibus, sive in genere sive in specie, ordinem servandum esse intelligit, ideas morales *honesti et inhonesti, meriti ac demeriti, juris et officii, virtutis et vitii*, tam generatim quam speciatim efformat.

Ex his omnibus patet, cunctas humani intellectus ideas a sensibus vel proxime vel remote originem ducere.

ARTICULUS VI.

* *De dependentia intellectus ab imaginatione.*

399. Intellectum a sensibus dependere in idearum suarum acquisitione, huc usque explicatum est; nunc quæritur, utrum acquisitis ideis, absque dependentia a sensitivis facultatibus, uti possit.

Adverte 1º certum esse, intellectum sensibus externis non ita esse mancipatum, ut absque eorum ministerio nullatenus

operari queat. Imo vero eo melius suis actibus vacat, quo minor est sensuum cum externis objectis communicatio. Quæritur itaque solum, an ab imaginatione hanc dependentiam habeat.

Adverte 2º non quæri, utrum ex se et absolute intellectus ab imaginatione dependeat, sed solum utrum in hac animæ cum corpore societate, imaginationis indigeat ministerio. Certum est enim, dependentiam hanc ex natura ipsa intellectus nullam esse, ut alibi diximus (97, seq.).

400. PROPOSITIO XIII. *Intellectus humanas in hoc suo statu operari non potest, nisi phantasia cooperante juvetur.*

Etenim 1º si ex cerebri læsione phantasia perturbetur, intellectus quoque in suis operationibus aberrat; nec ea ipsa quæ jam cognovit, recogitare ordinate potest.

2º Quum aliquid intelligere conamur, etiamsi hoc incorporeum sit et immateriale, phantasmata semper aliqua componimus, in quibus objectum intelligibile, tanquam in aliqua sensibili imagine, utcunque adumbretur. Itemque quum alios docemus, metaphoris utimur atque similitudinibus ex corporea natura depromptis, et ut universalia intelligant, particularia sensibilia proponimus.

3º Idipsum ostendunt voces, quas adhibemus ad immaterialia objecta significanda, quæ omnes ex rebus sensilibus desumptæ sunt. Hoc pacto quæ ad Deum, et ad spirituales animæ actus, et ad substantias immateriales universas pertinent, significare solemus. Nihil autem melius quam communis loquendi ratio, modum quem mens in cogitando tenet, exprimere potest.

4º Intellectus et phantasia in una eademque anima vigent; hinc harmonice connectuntur ad invicem, ac se mutuo juvant impediuntque. Multo autem facilius ac promptius anima per phantasiam, quam per intellectum operatur. Ex quo fit, ut intellectus ad objectum suum attendere non possit, si phantasia ad aliud quidpiam convertitur; adeo ut insaniens phantasia intellectum secum abripiat, prouti in dementibus contingit. Ad hoc igitur ut intellectus se in objectum suum intendere possit, necesse est, ut phantasia quoque ad ea se

convertat phantasmata, quæ intellectus operationibus aliquo modo respondeant. Proinde quando phantasia fecunda est imaginum hujusmodi, et docilis pedissequa intellectus, hic facile operatur, ac in veritatis contemplatione diu consistere potest. Secus si phantasia arida sit, vel instabilis, vel in conceptis aliquibus phantasmatis facile inhærescat.

401. Nota adhuc: 1º ex his quæ, postremo præsertim loco, diximus colligi, quo pacto intellectus phantasmatis ad intelligendum indigeat; scilicet non ipse ad phantasmata convertatur necesse est, sed phantasia illi cooperando ad convenientia phantasmata convertatur oportet.

2º Quum de rebus sensibilibus cogitamus, phantasmata eorum propria reproducit imaginatio; quum autem cogitamus de insensibilibus et immaterialibus, imaginatio in iis detinetur phantasmatis, quæ analogiam aliquam, sive attributionis sive proportionis, cum objecto immateriali habent, aut saltem in iis, quæ externus aliquis associationis nexus ejusmodi objecto aliquando conjunxit, ut sunt v. gr. vocabulorum phantasmata.

3º Vocabulorum phantasmata, ut modo diximus, certe frequenter adhiberi; non tamen hæc sola intellectui deservire. Multa enim cogitamus, quæ qua voce significantur nescimus, aut saltem non recordamur.

ARTICULUS VII.

De memoria intellectiva.

402. Superest ut de memoria intellectiva, juxta principia supra posita, aliquid statuamus; id quod paucis assertionibus expediemus.

ASSERTIO I. *Certum est, in humana mente memoriam aliquam intellectivam esse.*

Nam quisque sibi conscius est, ideas olim habitas animum reproducere ac recognoscere. Ideæ autem per imaginationem seu memoriam sensitivam reproduci non possunt. Ergo per facultatem superiorem reproducentur.

403. ASSERTIO II. *Memoria intellectiva a perceptiva intellectus facultate non distinguitur.*

Est enim memoriæ proprium, ideas reproducere. Non posset autem illas reproducere, nisi ideas quas intellectus expressit aliquo modo in se conservaret. Ideas autem ab intellectu expressam a quam alia facultate conservari dicemus, potius quam ab eodem intellectu? Si quis aliter existimaret, is facultates non necessarias arbitrarie induceret.

404. ASSERTIO III. *Hinc determinatio ab intellectu recepta postquam hic ad actum transiit, in eo manet, saltem aliquo tempore. Manet autem ad modum habitus, vel etiam ad modum actualis determinationis ad cognitionem confusam.*

Manere determinationem huiusmodi, patet ex ipsa reproductione, maxime in iis cognitionibus quæ magno studio ac labore comparatæ sunt, ac postea facile reproducuntur, ut in scientiis videre est. Non tamen semper manet determinatio recepta, maxime quum attentio eam-firmiorem non fecit. Videtur autem dicendum, eandem manere, non ut actualement determinationem, sed ad modum habitus; secus enim anima semper ad actum determinaretur, ac proinde semper actu omnia intelligeret quæ aliquando intellēxit.

405. Dicit nihilominus potest, manere mentem ad cognitiones antea habitas aliquo modo determinatam actu, non profecto ita ut omnia quæ aliquando cognovit, semper distincte intelligat, id quod est prorsus contra experientiam; sed ita ut omnia semper confuse cognoscat, ac distincte solum ea quæ primo intelligit, vel ad quæ iterato intelligenda, modo mox explicando, convertitur. Ut qui montem conscendit, confuse videt ea omnia, quæ prius distincte vidit, ad quæ ex ea altitudine patet prospectus; et quo altius ascendit, eo plura prospicit; distincte vero ea solum videt, in quæ oculorum aciem defigit.

406. ASSERTIO IV. *Ideæ olim habitæ reproducuntur reproductione phantasmatum iis respondentium.*

Utcunque manere dicas in intellectu determinationem semel receptam aliquid actu intelligendum, sive ad modum habitus sive ad modum confusæ cognitionis, semper aliquid

aliud necessarium est, ut intellectus ad intellectionis reproductionem, aut saltem ut ad distinctam intellectionem determinetur.

Hoc autem esse phantasma certæ alicui intellectioni respondens, primo colligitur ex dictis de dependentia intellectus a phantasmatibus (400, 4^o); tum etiam experientia suadetur. Quum enim ea quæ olim intelleximus, reminisci volumus, phantasmata quædam reproducere conamur, quæ iis consociata esse existimamus.

407. ASSERTIO V. *Recognitio fertur per se in præteritos subjecti actus; ac iis mediantibus, in eorum objecta.*

De recognitione diximus in logica (L. 590, seq.). Nunc tantum de ejus objecto. Recognitio fertur in id quod præteritum est, ut tale est. Prætereunt autem ea quæ existunt, ac proinde quæ singularia sunt. Universalis enim sunt extra tempus, et in statu intelligibili, in quo nihil præterit, nihil novi fit. Ergo ea solum possunt ut præterita agnosci, quæ ut singularia cognoscuntur. Intellectus autem noster, ut supra diximus (591, 2^o; 582), subjecti quidem actus ut singulare quid percipit; objecta vero quæcunque ea sint, per universales solummodo rationes apprehendit. Ergo.

CAPUT VII.

DE ONTOLOGISMO.

ARTICULUS I.

Exponitur ontologorum doctrina.

408. Venio nunc ad cætera systemata, quæ supra recensui (559). Incipiam ab *ontologismo*, qui cum idearum originem ab immediata Dei visione repetendam censeat, quasi splendore quodam suo primas sibi partes arrogare videtur.

Ontologismi parens Malebranchius habetur: nomen vero recentius est re, ac Giobertium auctorem habet. Juxta quem,

cum binæ sint philosophandi oppositæ rationes, quarum altera a subjecto et ab intimo sensu tanquam a principio inchoatur, altera ab objecto, seu ab intelligibili absoluto directe apprehenso; prima illa *psychologismus*, altera vero *ontologismus* appellari meretur.

409. Ontologi omnes in hoc conveniunt, Deum immediate perceptum-omnis cognitionis fontem et originem esse. Sub quo autem respectu videatur, varii varia sentiunt. Ex his autem discrepantiis potissimum variæ ontologismi formæ repetendæ sunt. Recensebo quæ præcipuæ sunt.

410. I. Primam formam Malebranchias inexit. Cujus doctrina huc redit.

1° Intelligentia humana, quæ facultas mere passiva est, duplex affectionum genus excipit, perceptiones *puras*, et perceptiones *sensiles*. Unde duplex in homine cognitio; altera, qua ipsum intelligibile per se, scilicet Deum, et ideas claras rerum, et harum idearum relationes contuemur; quæ quidem cognitio dici potest ac debet cognitio *per lumen*; altera, qua nosmetipsos percipimus, unaque ideas confusas seu nostras modificationes, voluptatem, dolorem, lucem, colores, sapes, aliaque id genus. Hæc autem est cognitio *per sensum*, et appellari quoque potest cognitio *per conscientiam*.

2° In perceptione pura tria hæc distinguere possumus: perceptionem simplicem, iudicium et ratiocinium. Perceptione simplici intelligimus ideam; iudicio binarum idearum relationem; ratiocinio binarum relationum relationem. Cæterum, si proprie loquamur, iudicium affirmatio est; affirmatio autem assensus voluntatis, intelligentiæ affectionibus adhibitus.

3° Rursus, in perceptione sensili duas modificationum differentias distinguere oportet; scilicet, ut communi more loquamur, sensationes quibus objectum tanquam præsens, et phantasmata quibus objectum tanquam absens percipimus: hæc autem a sensationibus sola differunt intensitate.

4° Deus lumen est mentis: idcirco cognitio omnis quæ per lumen sit, ab ipso Deo tanquam a fonte dimanat. Deus est insuper causa idearum obscurarum, seu modificationum

nostrarum, quibus, ut vulgo dicimus, corpora sentimus atque imaginamur.

5° Per lumen cognoscimus primo Deum ejusque perfectiones. Cognitio Dei non est per ideam. Idea enim objecti imago est: entis autem infiniti nulla est imago. Deus immediate ac directe percipitur, quatenus ipse qui per se intelligibilis est, menti affulget, ac se ens absolutum, universale, infinitum manifestat.

6° Cognoscimus quoque per lumen res corporeas, quatenus Deus ideas corporum, quas in se habet, nobis aperit. Quemadmodum autem rerum ideæ quæ in Deo sunt, omnes rerum proprietates continent, ita qui hasce ideas videt omnes rerum proprietates successive potest cognoscere. Sed objectorum sensibilibus ideæ in Deo existentes dupliciter in animum agunt, affectione pura, et affectione sensili; quocirca modo eas ideas cognitione per lumen videmus, modo sentimus.

7° Demum veritates ac leges æternas per lumen cognoscimus: veritates, quæ nil aliud sunt, quam idearum relationes; leges æternas, quæ nil aliud sunt, quam essentialis rerum ordo ab ideis exhibitus. Hic autem ordo nobis exhibetur, ut qui Deum quidem ad sui amorem necessitate naturali astringat, nos autem solummodo moraliter obliget.

411. Novam quamdam Ontologismo formam tribuit Giobertius. En præcipua ejus sententiæ capita:

1° Cognitionis omnis principium est *intuitus idealis*. Immediatum hujus objectum est *Idea*, quæ non est forma quædam representativa ac subjectiva, sed verum ipsum objectivum et absolutum, ipsum Ens, seu Deus ut Ens. Hinc prima idea (primum psychologikum), et prima res (primum ontologikum) identica sunt, ac primum unum; quod merito primum philosophicum appellari potest.

2° Nostra cognitio duplici continetur perceptione: *directa* et *reflexa*. Perceptio directa est immediata objecti apprehensio: reflexa est perceptio, qua in primam perceptionem et in objectum apprehensum cogitatio regreditur. Prior illa

in nobis est ab ipso vitæ intellectualis exordio, ac perpetua est; altera voluntaria est.

3^o Objectum intuitus est Deus, Ens reale et concretum, quod se coram mente nostra sistens, dicit: *Ego sum necessario*. In hac objectiva voce omnis evidentiae et certitudinis situm est fundamentum. Sed Deus a nobis videtur, non in sua abstracta realitate, et ut est in seipso collectus, sed ut ens reale et concretum, atque ita ut revera est. Est autem creans *existentias*. Hinc mens nostra Deum contuens, tria perspicit: Ens infinitum et necessarium; actionem creativam qua hoc Ens se cum suis operibus externat, et existentias contingentes quæ actionis creativæ sunt terminus. Hinc formula idealis, quæ scibillum universorum basis sit ac fundamentum, hoc continetur enuntiatio: *Ens creat existentias*.

4^o Hæc Ideæ per primum intuitum cognitio, indeterminata est, confusa et dispersa. Quapropter necesse est ut accedat reflexio, quæ intuitum circumscribat, ac variis modis determinet, primitivumque conceptum, per gradus quosdam, successive ac paulatim explicet. Hoc exsequitur convestiendi sensibili intelligibile. Hinc visio intelligibilis sub alicujus sensibilis forma, reflexionis est opus. Necessaria tamen ad hoc sunt vocabula, quæ Ideam ex se indeterminatam circumscribunt atque coarctant.

5^o Ideæ aliæ sunt absolutæ, aliæ relativæ. Illæ ad Ens, hæ ad existentias pertinent. Neutrum porro idearum genus deductione acquiritur. Nam licet Ens per seipsum intelligibile sit, tamen ejus essentia nobis est ignota. Hinc Entis proprietates deductione cognosci a nobis non possunt. Essentia item existentis inexcogitabilis est. Hinc ideæ quoque relativæ deductione apprehendi nequeunt. Itaque et illæ et istæ relate ad nos sunt ab invicem independentes; nobis autem singulæ revelantur et communicantur, quum Ens nos ad existentiam vocat, suumque actum creativum aperit.

6^o Ex hoc sequitur, omnia nostra judicia esse synthetica a priori, non quidem synthesi subjectiva, sed objectiva, quæ sita est in Entis revelatione. Primum tamen judicium: *Ens necessario est*, analyticum est; quia divini judicii est repeti-

tio. Ac primum istud judicium prima reflexio est, et philosophiæ initium esse debet.

412. Nostræ ætatis ontologi, alii cum Malebranchio archetyparum Dei idearum visionem, alii cum Giobertio creativi actus intuitionem tuentur; ab hisque magistris in intellectuali cognitione explicanda non multum differunt. Hæc vero iis communia sunt placita:

1^o Deum esse semper menti præsentem per immediatam perceptionem, qua ipsum cognoscimus, ut Ens infinitum, ut Ens simpliciter, ut absolutum. Ideas veri, pulchri, honesti et similes aliud non esse, quam ideam Entis absoluti sub diverso respectu consideratam.

2^o Deum ita cognitum, esse intellectualis omnis cognitionis principium, sine quo nihil est intelligibile: esse lumen per quod intellectus videt; primamque normam, juxta quam intellectus intelligit et judicat; imo id quod nos rationales facit.

3^o Res sensiles earumque qualitates tum sensu, tum intellectu a nobis cognosci. Sensum eas cognoscere secundum physicam earum individuumque existentiam; proinde eas cognoscere in seipsis. Intellectum vero eas cognoscere secundum earum essentiam metaphysicam et intelligibilem, quæ cum sit aliquid æternum, necessarium, immutabile, cognosci nequit, nisi in Deo.

4^o Relationes entium contingentes et sensibiles, videlicet motus ac modificationes individuales, sensu immediate percipi. Relationes autem essentielles et intelligibiles, quæ sunt veritates universales, æternæ, necessariae et immutabiles, in Ente infinito directe et immediate conspici: sunt enim cum ipso identicæ.

5^o Hæc omnia, ipsumque Absolutum, ab intellectu tam directe, quam reflexe cognosci: directe in Absoluti immediata intuitionem; reflexe in *notionibus*, quas intellectus sibi format ad objectivarum idearum similitudinem. Reflexis hisce cognitionibus directam illam semper magis perfici. Occasionem vero reflexarum cognitionum sensationes esse.

413. Non desunt quoque, qui mitiorem quamdam ontolo-

in nobis est ab ipso vitæ intellectualis exordio, ac perpetua est; altera voluntaria est.

3^o Objectum intuitus est Deus, Ens reale et concretum, quod se coram mente nostra sistens, dicit: *Ego sum necessario*. In hac objectiva voce omnis evidentiae et certitudinis situm est fundamentum. Sed Deus a nobis videtur, non in sua abstracta realitate, et ut est in seipso collectus, sed ut ens reale et concretum, atque ita ut revera est. Est autem creans *existentias*. Hinc mens nostra Deum contuens, tria perspicit: Ens infinitum et necessarium; actionem creativam qua hoc Ens se cum suis operibus externat, et existentias contingentes quæ actionis creativæ sunt terminus. Hinc formula idealis, quæ scibillum universorum basis sit ac fundamentum, hoc continetur enuntiatio: *Ens creat existentias*.

4^o Hæc Ideæ per primum intuitum cognitio, indeterminata est, confusa et dispersa. Quapropter necesse est ut accedat reflexio, quæ intuitum circumscribat, ac variis modis determinet, primitivumque conceptum, per gradus quosdam, successive ac paulatim explicet. Hoc exsequitur convestiendi sensibili intelligibile. Hinc visio intelligibilis sub alicujus sensibilis forma, reflexionis est opus. Necessaria tamen ad hoc sunt vocabula, quæ Ideam ex se indeterminatam circumscribunt atque coarctant.

5^o Ideæ aliæ sunt absolutæ, aliæ relativæ. Illæ ad Ens, hæ ad existentias pertinent. Neutrum porro idearum genus deductione acquiritur. Nam licet Ens per seipsum intelligibile sit, tamen ejus essentia nobis est ignota. Hinc Entis proprietates deductione cognosci a nobis non possunt. Essentia item existentis inexcogitabilis est. Hinc ideæ quoque relativæ deductione apprehendi nequeunt. Itaque et illæ et istæ relate ad nos sunt ab invicem independentes; nobis autem singulæ revelantur et communicantur, quum Ens nos ad existentiam vocat, suumque actum creativum aperit.

6^o Ex hoc sequitur, omnia nostra judicia esse synthetica a priori, non quidem synthesi subjectiva, sed objectiva, quæ sita est in Entis revelatione. Primum tamen judicium: *Ens necessario est*, analyticum est; quia divini judicii est repeti-

tio. Ac primum istud judicium prima reflexio est, et philosophiæ initium esse debet.

412. Nostræ ætatis ontologi, alii cum Malebranchio archetyparum Dei idearum visionem, alii cum Giobertio creativi actus intuitionem tuentur; ab hisque magistris in intellectuali cognitione explicanda non multum differunt. Hæc vero iis communia sunt placita:

1^o Deum esse semper menti præsentem per immediatam perceptionem, qua ipsum cognoscimus, ut Ens infinitum, ut Ens simpliciter, ut absolutum. Ideas veri, pulchri, honesti et similes aliud non esse, quam ideam Entis absoluti sub diverso respectu consideratam.

2^o Deum ita cognitum, esse intellectualis omnis cognitionis principium, sine quo nihil est intelligibile: esse lumen per quod intellectus videt; primamque normam, juxta quam intellectus intelligit et judicat; imo id quod nos rationales facit.

3^o Res sensiles earumque qualitates tum sensu, tum intellectu a nobis cognosci. Sensus eas cognoscere secundum physicam earum individuumque existentiam; proinde eas cognoscere in seipsis. Intellectum vero eas cognoscere secundum earum essentiam metaphysicam et intelligibilem, quæ cum sit aliquid æternum, necessarium, immutabile, cognosci nequit, nisi in Deo.

4^o Relationes entium contingentes et sensibiles, videlicet motus ac modificationes individuales, sensu immediate percipi. Relationes autem essentielles et intelligibiles, quæ sunt veritates universales, æternæ, necessariae et immutabiles, in Ente infinito directe et immediate conspici: sunt enim cum ipso identicæ.

5^o Hæc omnia, ipsumque Absolutum, ab intellectu tam directe, quam reflexe cognosci: directe in Absoluti immediata intuitionem; reflexe in *notionibus*, quas intellectus sibi format ad objectivarum idearum similitudinem. Reflexis hisce cognitionibus directam illam semper magis perfici. Occasionem vero reflexarum cognitionum sensationes esse.

413. Non desunt quoque, qui mitiorem quamdam ontolo-

gismi formam secuti, rejecta archetyparum idearum et actus creativi intuitione, omnes intellectuales cognitiones ex immediata Dei cognitione sub respectu Entis absoluti derivant, ea fere ratione, qua ex innata entis idea Rosminius. Quare ipsorum systema ipsum est systema rosminianum, una ultima conclusione adjecta. Hæc itaque ontologismi forma intelligitur ex ipsa rosminiani systematis expositione, quæ inferius dabitur.

ARTICULUS II.

Ontologismus refellitur.

414. PROPOSITIO. *Ontologismi theoria falsa est et periculosa. Probatur 1^a pars: ontologismi theoria falsa est.*

Quamvis in quibusdam hujus doctrinæ capitibus, varii ejus propugnatores diversa opinentur, in hisce tamen duabus assertionibus omnes unanimes consentiunt, quæ totius systematis caput ac summam continent. Prima est: *Deum immediate a nobis cognosci*; altera: *Dei visionem intellectualium omnium cognitionum medium esse, ipsumque intelligentiæ lumen constituere*. Jam binæ istæ assertiones certo falsæ probantur.

415. Falsum primo, *nos immediate Deum intueri*.

Etenim 1^o huic intuitioni constanter adversatur conscientiæ testimonium. Omnibus enim hominibus, ontologis ipsis minime exceptis, conscientia pernegat, se hunc intuitum in animo deprehendere, quantumlibet intimas ejusdem latebras perscrutetur. Atqui hunc maxime intuitum, si is vere in nobis esset, præ aliis omnibus internis factis, occurrere conscientiæ necesse foret: esset enim factum internum, ad solum pertinens spiritum, non compositi proprium (L. 447, 6^o), illudque perpetuum, totumque ad se rapiens intellectum, atque omnis cognitionis et appetitionis elementum. Si ergo hic intuitus in intellectu esset, non posset intellectus in se rediens ipsum non deprehendere.

416. Nec dicas, quod hoc factum distincte a conscientia adverti non possit, id ex assuetudine fieri. Assuetudo enim tunc solummodo conscientiam impedit, quando sensationem exstinguit (L. 447, 7^o). Unde si quid ex assuetudine in hoc

argumento concludi posset, hoc potius concludendum esset, ex assuetudine hunc intuitum deficere; atsi permaneat, concludi nequit, adverti non posse. Quemadmodum, quia nosmetipsos perpetuo sentimus, quotiescunque libet, in hunc sensum reflectere possumus, ex hoc ipso, quod sensus iste in omni affectione est implicitus.

Præterea affectionem aliquam conscientia relegi non posse, in iis ad summum affectionibus contingit, quæ ex se perceptivæ non sunt, quæ videlicet objectum a subjecto clare distinctum non offerunt. Ast in actibus ex se perceptivis hoc fieri nequit. Ii enim actus non puram affectionem continent, sed objectum exhibent a subjecto distinctum. Etiam si igitur subjectum ex assuetudine affectionem distinctam amplius non experiretur, semper tamen posset in objectum sibi oblatum advertere. Jam intuitus absoluti esset vera intellectus perceptio. Ergo intellectus semper posset in hanc perceptionem conscientiæ obtutu redire.

417. 2^o Si Deum in seipso immediate intueremur, ipsam ejus essentiam immediate conspiceremus; id quod adeo absurdum est, ut ab ipsis ontologis negetur; qui dicunt Deum a nobis videri ut Ens absolutum, ut Ens perfectissimum et infinitum, nequaquam tamen ipsam ejus essentiam nobis manifestari. Ast immerito ontologi hoc negant. Etenim si Deum non immediate cognoscimus, sed per conceptus analogicos ex rerum finitarum consideratione haustos, mirum non est, si divisis conceptibus ipsum exprimamus, modo ut Ens, modo ut infinite perfectum, modo ut sapientem, modo ut bonum: hi enim conceptus sunt ab invicem independentes, ut qui a rebus diversis abstrahuntur, ac diversimode formantur. Sed Deus in seipso simplicissimus est: nulla penitus est in eo essentia ab existentia, aut attributorum a natura distinctio, vel etiam distinctionis fundamentum. Nequit igitur in se inspectus concipi per partes: nequit in se percipi ut Ens, ut perfectum, ut necessarium, quin hoc ipso ejus essentia percipiat. Vel itaque Deus nullo modo in seipso et immediate videtur, vel videtur ut est in se, ac secundum ipsam essentiam.

418. Falsum æque est, *immediatam Dei visionem esse*

medium cæterarum cognitionum, ita ut in Deo cognito rerum rationes atque æternæ veritates a nobis cognoscantur.

Nam 1^o hoc admissio, humani intellectus notio destruitur. Dicendum enim foret, intelligendi facultatem compleri, ut ita dicam, per aliquid ab homine diversum, h. e. per ipsum Deum; ita ut quemadmodum sentiendi facultas est in organo ex conjunctione cum anima; ita facultas intelligendi in anima prodeat ex conjunctione cum Deo.

2^o Quum dicunt Deum cognitum esse id in quo omnia cognoscuntur, hoc dicunt vel de cognitione Dei ut est Ens simpliciter et Ens infinitum, vel de cognitione exemplarium idearum quæ sunt in mente divina.

Si primum dicatur, jam falsum esset nos rationes rerum æternas in Deo intueri. Nam infinitum in se cognitum nullius rei finitæ ideam nobis suppeditare posset. Rerum enim æternarum rationes in divina perfectione non sunt formaliter, sed tantummodo ut in fundamento, eminenti quodam modo (O. 83). Proinde etiam hac infiniti cognitione posita, non idcirco rerum finitarum ideas proprias in eo reperiremus, sed ad summum ex ejus consideratione aliquas earumdem ideas analogicas efformare possemus.

Si dicatur alterum, in primis gratuita prorsus est assertio isthæc. Deinde ex ea sequeretur, nos intimas rerum essentias plene cognoscere; id quod est omnino falsum. Demum cum ideæ Dei archetypæ sint id quod divinus intellectus vitali actu intelligit, quatenus suam essentiam ut imitabilem cognoscit (O. 83, 2^o), plane inexplicabile est, quomodo hæc ideæ intuitionis nostræ objectum esse queant.

3^o Hinc aliud argumentum. Nam exemplares, quæ in Deo sunt, rerum rationes videri nequeunt, nisi ipsa divina essentia prius videatur. Rationes enim hujusmodi nihil aliud in Deo sunt, quam divina essentia, prouti per res a se distinctas imitabilis est. Prius autem aliquid cognoscitur, ut est in se, quam ut est per comparisonem ad aliquid aliud. Atqui divina essentia, ut est in se, ontologis consentientibus, nec videtur a nobis, nec videri potest. Ergo.

419. Probatur 2^a pars. Ontologismi theoria periculosa est.

Id ostendunt consecraria non pauca, quæ ex ea doctrina deduci non adeo difficulter possunt; quæ quidem plurimi ex ontologis sincere rejiciunt, et ex animo aversantur; at non idcirco hæc cum doctrina quam ipsi defendunt, logicam aliquam connexionem habere cessant. Itaque.

1^o Doctrina catholica est: Deum in se cognitum esse beatitudinis objectum: hinc ab homine mortali nullatenus immediate videri, sed solummodo cognitione abstractiva et deducta ex rebus creatis cognosci posse. Quæ sententia non modo apud Ecclesiæ patres et in catholicis scholis communis est, sed etiam in sacris litteris non dubia habet fundamenta (1). Hæc autem doctrina, si vera sunt ontologorum placita, nonne esset deserenda, aut saltem limitanda multipliciter, et explicationibus, certe non obviis, interpretanda?

2^o Quemadmodum ontologi contendunt, intellectum res finitas non cognoscere, nisi quatenus summum Ens cognoscit, ita quoque ratum habent, voluntatem nullum finitum bonum appetere, nisi quatenus summum Bonum appetit. Ast ex hoc nonne illud consequi videtur: omnes voluntatis motus honestos esse? Recta siquidem et honesta est dilectio, qua aliquid propter Deum et in Deo diligimus. Hoc autem si semel admittatur, homo amplius peccare non potest, quia nulla actio inhonesta est amplius possibilis.

3^o Ontologorum doctrina faciles ad rationalismum aditus parat. Est enim rationalismus negatio supernaturalium veritatum, earum nempe veritatum, quas humana mens naturalibus viribus assequi nequit, quæque solum fidei divinæ sunt objectum. Jam ex principio visionis divinæ immediatæ duplex conclusio inferri potest. Altera est: *Cum humana mens Deum videat, nec mysteria quæ revelata esse dicuntur, in eo videre possit, mysteria hujusmodi nec a Deo revelata sunt, nec admittenda.* Altera: *Nullæ sunt veritates absolute et per se supra rationem: quæ enim mens humana præteritis seculis minus exulta in Deo non vidit, videbit in posterum per humanitatis progressus altius evecta.*

(1) Sap. XIII; Io. I, 18; Rom. I, 19, 20; I Cor. XIII, 12 et alibi.

Jam utraque conclusio rationalismi scopum assequitur. Ergo.

4° Demum ontologismus ad pantheismum quoque viam complanare videtur.

Primo quia, ut supra dixi (418, 1°), ponit ipsam intelligendi facultatem ex animæ cum Deo conjunctione intima exsurgere.

Deinde quia, si res non sunt in seipsis intelligibiles, sed solum in Deo, nonne inferre licebit, res non habere esse proprium, sed ad esse divinum pertinere? Intelligibilitas enim cum realitate convertitur.

Quid vero, si cum plurimis ontologis dicamus, ipsam *entis* ideam nihil aliud esse, quam Deum cognitum ut Ens! Hoc enim posito, concludi poterit: quum dicimus v. gr. *hominem esse ens*, non esse hoc ita intelligendum: *homo est aliquod ens*, sed ita: *homo est ipsum Ens contractum, ac certo quodam modo determinatum*.

420. Non est opus, ut pluribus exponam quæ seu malebranchiano, seu giobertiano ontologismo peculiariora sunt.

E supra posito malebranchianæ doctrinæ compendio quisque videt, auctorem hunc ontologismo occasionalismum conjungere, quatenus ipsas sensationes a divinarum idearum actione repetit; ex quo sequitur, sensuum organa esse prorsus inutilia; eundem confundere simul intellectum, sensum, et imaginationem, cum nullum aliud discrimen inter hasce facultates assignet, quam majorem minoremve perceptionis claritatem, ac distinctionem; statuere demum, internas nostras affectiones solo sensu, non autem cognitione per lumen, a nobis cognosci; qua re negat intellectum in interna facta reflectere posse. Quæ quidem omnia falsa atque absurda sunt.

421. De Giobertio autem hæc innuere sufficiet:

1° Juxta hunc auctorem, reflexio Infinitum circumscritbit ac limitat. Ergo Infinitum intuitu primo videmus, reflexione videre non possumus. Hoc jam incredibile est. Sed præterea hinc sequitur, Infiniti ideam reflexam prorsus haberi non posse. Ab illo itaque cognitionum ordine, cujus conscientiam

habemus, quo utimur, quo philosophamur, Infiniti idea plane abest.

2° Ad reflexionem vocabula necessaria esse dicit: his enim idea quæ reflexionis objectum est, circumscritbitur ac definitur. At vocabulum circumscribere ideam in mentis nostræ usum non potest, nisi mens vocabuli significationem antea didicerit. Jam quum vocabuli significationem addiscimus, vel id ipsum cognoscimus quod per ideæ circumscriptionem cognoscendum est, vel non. Si primum dicat, idea jam est circumscripta, antequam per vocabulum circumscribatur; si dicat alterum, profecto vocabulum ad ideam circumscribendam erit inutile.

3° Actum creativum a nobis videri non modo falsum est, sed etiam ridiculum. Creationis namque actus considerari potest, vel ut est in Deo, vel secundum externam efficaciam, quam habet ad modum actionis transeuntis (C. 263, 3°). Atqui primo modo videri nequit, nisi ipsa Dei essentia videatur: actus enim creandi, ut in Deo est, cum divina essentia est plane identicus. Divinam autem essentiam a nobis non videri, adversarius fatetur. Altero vero modo accepta creatio videri quidem fortasse poterat ante plura annorum millia quum res e nihilo emergerunt; id quod unico momento factum est (C. 263, 2°): at postea videri amplius non potuit, nec poterit unquam, sed solum per ideas factitias cogitari. Dices, videre nos rerum conservationem, quæ est quasi quædam continuata creatio. Sed neque hanc videmus, at solum ejus effectus videmus, scilicet res quæ sunt et a Deo conservantur.

4° Contra omnem veritatem est, et communi sensui intollerabilis assertio illa: primum scientiæ principium hoc esse: *ens existentias creat*. Hæc enim propositio, si ita intelligatur: *Deus e nihilo mundum eduxit*, est quidem vera, at non est principium per se evidens; multoque minus principium omnium evidentissimum, cujusmodi sit oportet principium primum.

5° Demum, ne alia plurima consector, etsi hic auctor vocibus quas adhibet, fucum facere studeat, et creationis

nominatim vocabulum liberaliter usurpet, nihilominus germanicum pantheismum olet ac stillat undequaque, ut jam a pluribus ostensum est (1). Revera hæc una pantheismi hypothesis hujus auctoris doctrinam explicat, ejusque contradictiones conciliat.

ARTICULUS III.

Expenduntur ontologismi fundamenta.

422. Nunc videamus, quibus fundamentis ontologismi moles innitatur. Præcipua solum afferemus, et quæ aliquam argumenti speciem præ se ferunt. Plura enim ex iis quæ Malebranchius præsertim disputat, sunt prorsus inepta.

Dicunt ontologi I. Ens infinitum, immensum, universale percipi nequit per ideam ab ipso distinctam.

Nam 1^o quælibet idea ab ipsa diversa est aliquid particulare et finitum, quod Infinitum repræsentare non potest. Ergo infinitum percipitur, quia menti immediate affulget.

2^o Infinitum cognosci nequit ex finitorum entium consideratione.

3^o Ideæ entis in genere, boni, pulchri nullum aliud objectum habere possunt, nisi Infinitum.

423. Resp. *Nego. ant.* ejusque *suppositum*. Quum enim Malebranchius et ontologi aiunt, Ens infinitum percipi non posse per ideam ab ipso distinctam, supponunt, ideam esse id quod ab eorum adversariis, ac nominatim a scholasticis percipi dicitur; id quod patet ex dictis falsum esse. Idea enim est id quod mens in se exprimit, quum rem percipit. Noto insuper, pessime illud asseri: *Ens infinitum esse ens universale*.

Ad 1^{am} *Dist. ant.*: Idea quælibet est aliquid particulare, *conc.*; est aliquid finitum, *subd.*: ut est mentis modificatio, *conc.*; si objective consideretur id quod exprimit, iterum *subd.*: est aliquid finitum, spectatis notis positivis, *conc.*;

(1) Cf ex. gr. Zarelli (P. M. Carol). *Il sistema filosofico di V. Gioberti*. Parigi MDCCCXLVIII.

spectatis simul negationibus quæ iis conjungi possunt, *nego*. Recole superius dicta de Dei cognitione (394).

Ad 2^{am} respondebis, eadem adhibita distinctione inter notas positivas et negativas.

Ad 3^{am} *Nego*. V. dicta in ontologia (O. 366). Mirum sane est in hac æquivocatione ontologos tanta moliri.

424. Dicunt II. Entia finita cognosci nequeunt, nisi prius Deus cognoscatur. Etenim:

1^o Ens finitum non potest cognosci, ut ens sic et non aliter determinatum, nisi prius cognoscatur Ens, ut ens. Sed ens, ut ens, est Ens simpliciter, seu Infinitum. Ergo.

2^o Varios entitatis gradus cognoscere non possumus, nisi per comparisonem cum summa perfectione, a qua res cæteræ plus minusve deficient. Sed comparatio cum summa perfectione fieri nequit, nisi hæc cognoscatur.

3^o Ens contingens ac dependens cogitari nequit, nisi Ens quoque absolutum, a quo contingens dependet, cogitetur.

425. Resp. *Nego* quod asseritur.

Ad 1^{am} *Dist. maj.*: Ens finitum cognosci nequit ut tale ens, nisi prius cognoscatur ens ut ens: nempe nisi prius cognoscatur sub ratione indeterminata entis, *conc.*; nisi prius cognoscatur aliud ens ut ens, *nego*. Cum ens finitum sit ens, potest ex se cognosci ut ens, quin necesse sit ut cum alio comparetur. Rationem autem entis esse primam, quam in rebus apprehendimus, supra demonstratum est (379).

Nego. autem *min.* Æquivocationem in ea manifestam agnosces ex dictis in ontologia (O. 367).

Ad 2^{am} *Nego. maj.* Hanc quoque difficultatem in ontologia præoccupavimus (O. 359).

Ad 3^{am} *Dist.*: Ens contingens cogitari nequit, nisi Ens quoque absolutum cogitetur, nempe si ens contingens cogitetur secundum quod realitatem quamdam habet, *nego*; si cogitetur ut contingens, *subd.*: nequit ut tale cogitari, nisi cogitetur aliquid aliud, a quo esse acceperit *conc.*; nisi cogitetur ipsum ens absolutum, *nego*. Quanquam enim verum sit, adæquatam contingentis causam reperiri non posse, nisi ad Ens necessarium deveniamus, est tamen falsum ipsam

contingentiam non cognosci, nisi simul Ens necessarium cognoscatur. Ad *contingentiam* enim cognoscendam illud cognoscere sufficit: ens modo esse, modo non esse. Cognita vero contingentia entis, per applicationem principii causalitatis cognoscitur ejus *dependentia* ab aliqua causa. Ac demum ulterius ratiocinando, deprehendimus, primam rerum causam non posse esse contingentem.

426. Inst. Si entis solummodo ideam habes, hæc est idea obscura, quæ Deum et mundum complectitur. Si clara fiat mundi idea, clara quoque fiet idea Dei: nam cognosci creatura nequit, nec esse ejus proprium, nisi cum Deo conferatur.

Resp. Idea entis Deum et mundum complectitur tanquam bina correlativa *nego*; tanquam duo disparata, et tantummodo *analogice* sub uno conceptu comprehensa, *conc.* Hinc *nego* quæ subduntur; ac negationis ratio patet ex modo dictis.

427. Dicunt III. Universalia non possunt cognosci, nisi Dei ideæ videantur. Nam:

1º Quæ sunt extra Deum sunt singularia, et caduca. Ergo in iis universale, quod immutabile et æternum est, cognosci nequit.

2º Qui videt ideam universalem, videt id quod plura participant. Atqui id quod entia participant est in Deo.

3º Qui videt universale aliquod objectum, rem creatam non videt; ergo videt objectum increatum, nempe Deum.

428. Resp. *Nego ant.*

Ad 1^m *Dist. ant.*: Secundum existentiam, *conc.*; secundum essentiam abstractam a conditionibus existentiae, *nego*.

Dist. cons.: Universale cognosci nequit in singularibus, si essentia non abstrahatur a conditionibus existentiae, *conc.*; secus, *nego*. Vide superius dicta (387).

Ad 2^m Noto in primis, non esse accurate dictum, ideas universales videri; quia, ut pluries jam dictum est, ideæ non sunt id quod percipimus, saltem perceptione directa, quamquam post perceptionem directam objectum perceptionis reflexæ esse possint.

Resp. deinde, si hæc quæ dicuntur nec e pantheistarum sententia, nec secundum fautores universalium a parte rei intelligantur, concedi posse impune omnia, quin aliquid pro se ontologi lucrentur. Equidem sunt in divina mente ideæ archetypæ, ad quarum similitudinem res factæ sunt; ast hinc non sequitur, mentem nostram ex rebus juxta ideas Dei archetypas productis, ideas universales abstrahere non posse.

Ad 3^m *Dist.*: Qui videt universale, rem creatam non videt; i. e. videt rem idealem, quæ nec existit, ut videtur, nec creari potest, *conc.*; videt aliquid reale et increatum, *subd.*: si videat ideas æternas Dei, *conc.*; si percipiat universale, quod est in rebus, vel si in universalem ideam acquisitam reflexione redeat, *nego*. Universale enim in rebus, quod fundamentale dicunt (L. 539), reale est, licet in rebus universalitatis formam non habeat: quatenus autem reale est, creatum est. Itemque idea universalis quæ in mente existit, et aliquid reale est, et aliquid creatum, scilicet spiritus creati modificatio, activitate ejusdem producta; objectum autem quod ab ipsa repræsentatur, (universale formale), prouti ab ipsa repræsentatur, reale non est, nec creari potest, sed solum mente abstrahi.

429. Dicunt IV. Deus rerum omnium ideas in se continet, et est intime nobis conjunctus. Si ergo suas ideas manifestare velit, spiritus ei conjunctus opera Dei per eas intelliget. Jamvero quod Deus id velit, plura demonstrant. Nam

1º Deus non facit per plura et implexa media, quod fieri potest mediis paucioribus ac simplicioribus. Nihil autem simplicius, quam quod Deus nobis conjunctus, suas ideas nobis manifestet.

2º solum in hac hypothesi palam fit omnimoda creati spiritus a Deo dependentia. Juxta eam enim animus nihil intelligit, nisi quia Deus vult illud manifestare. Quod adamussim respondet doctrinæ Pauli. *Non sumus sufficientes cogitare aliquid a nobis tanquam ex nobis, sed sufficientia nostra ex Deo est* (1).

(1) II Cor. III, 5.

3^o Ideæ in animam nostram agunt, magnaue efficacia agunt, nosque seu miseros, seu felices efficiunt. Solus autem Deus potest in animam immediate agere.

4^o Deus omnia facit propter se. Quemadmodum ergo voluntatem hominis fecit ejusmodi, quæ nihil amare possit, nisi quatenus Deum naturaliter et necessario amat, sic talem debuit intelligentiam efficere, quæ nihil intelligat, nisi quatenus Deum intelligit.

430. Resp. Deus est intime nobis conjunctus; *dist.* : ut causa creatrix et conservatrix, *conc.* ; ut objectum determinans intellectum ad sui visionem, *nego*. Hæc duo conjunctionis genera valde differunt, et unum sine altero esse potest.

Ad 1^m *Dist. maj.* : ut in logica (L. 490); si nullum finem habeat adhibendi plura, *conc.* ; secus *nego*. Si Deus suas ideas nobis manifestaret, suam quoque nobis manifestaret essentiam; ac proinde nos beatos efficeret. Hoc autem Deus in præsentī vita non vult, imo nec pro futura vita velle tenebatur, sed ex dono prorsus gratuito ad hunc supernaturalem finem nos evexit.

Ad 2^m *Nego exclusivam*. Etiam si dicamus animam suas ideas formare, adhuc verum est, eum nihil intelligere, nisi quia Deus vult illud intellectui manifestare. Id enim omne quod intelligimus, manifestatur nobis a Deo, hinc quidem per creaturas, inde vero per activitatem qua intellectum nostrum donavit. Ex loco autem Apostoli quem citat, oppositam potius conclusionem inferre debebat Malebranchius. Affirmat enim Apostolus, esse in nobis *sufficiētiā* ad cogitandum; hanc autem ex Deo esse. Quanquam in eo loco non de naturali cogitatione Paulus loquatur, sed de salutari cogitatione, quæ est ex supernaturali principio.

Ad 3^m Resp. Ideas in animam agere non physice, sed *intentionaliter*, ut aiunt, ac metaphorice. Agunt enim, quatenus voluntas appetit vel refugit quæ intellectus apprehendit. (O. 300, 3^o). Cæterum mirum non esset, si una facultas in alteram ejusdem animæ facultatem ageret. Etenim anima potest agere in seipsam; ac propterea falsum est, solum Deum in illam agere posse.

Ad 4^m *Dist. ant.* : Deus omnia facit propter se; nempe ad suam bonitatem manifestandam, idque variis modis, *conc.* ; omnia facit *per se*, nullam rebus a se conditis tribuens activitatem, *nego*.

Nego item *consequens*, ejusque suppositum, quod nempe voluntas hominis nihil amare possit, nisi quatenus naturaliter ac necessario Deum amat. Quæ propositio non modo falsa est, sed penitus absurda, ut supra ostensum est (419, 2^o).

431. Dicunt V. Animo non potest inesse virtus, qua ideas producat.

Nam 1^o ideæ sunt entia spiritualia, ac proinde perfectiora corporibus, quæ Deus produxit. Quare qui putat sibi inesse vim ideis producendis parem, videtur sibi adscribere virtutem efficiendi entia perfectiora, quam quæ Deus fecit.

2^o Animus vim creandi non habet. Si autem ideas produceret, eas crearet: hæ enim ex impressionibus materialibus formari nequeunt.

3^o Animus ideas producere non posset, nisi prius rem producendam cognosceret. Sed cognoscere rem perinde est, ac ejus ideam habere. Ergo.

432. Resp. *Nego ant.*

Ad 1^m *Dist. ant.* : Ideæ sunt entia spiritualia, nempe modificationes entis spiritualis, *conc.* ; secus *nego*. Idea sunt perfectiores corporibus, ratione substantiæ cui insunt, *conc.* ; per se ac simpliciter, *nego*. Substantia enim omni modificatione est simpliciter perfectior. Hinc *negandum consequens*.

Ad 2^m *Nego* animum *creare* ideas. Ideæ enim non sunt realitates quæ ex nihilo educi debeant, sed intellectus modificationes. Neque ex impressionibus materialibus formantur, sed ex activitate intellectus resultant, objecto per sensus proposito, ut supra explicatum est.

Ad 3^m *Nego maj.* Intellectus enim producit ideas ad modum naturæ; ad quam productionem non requiritur prævia rei producendæ cognitio, quemadmodum requiritur in artis operationibus, atque etiam in reminiscētia vel in ratio-
cinio.

433. Dicunt VI. Ratio cujus omnes participes sumus, est ipsa ratio universalis, necessaria, immutabilis, ipsa ratio Dei, mentibus nostris longe superior, quam omnes ex æquo consulunt quicunque rationales sunt. Sane

1^o nisi dicamus unam esse rationem quæ omnes intelligentias illuminat, quamque omnes consulunt, nunquam certi esse possemus, omnes homines easdem veritates videre quas videt unusquisque. Recte Augustinus: « Si ambo videmus verum esse quod dicis, et ambo videmus verum esse quod dico, ubi quæso id videmus? Nec ego in te, nec tu in me, sed ambo in ipsa, quæ supra mentes nostras est, incommutabili veritate (1). »

2^o Sentimus omnes veritatem a nobis non creari, sed ut aliquid ante nos positum a mente recipi, non secus ac ab oculo solis radii recipiuntur.

3^o Veritates sunt æternæ, necessariae, et immutabiles. Atqui extra Deum nihil est ejusmodi.

4^o Nos intelligimus veritates quas Deus intelligit, et ordinis quam ipse necessario sequitur, immutabilem legem. Atqui quod Deus intelligit, in Deo est: in Deo quoque est regula quam Deus necessario sequitur. Ergo.

434. Resp. *distinguendo* singula, quæ in antecedente dicuntur.

Ratio humana est ratio *universalis*, non quidem ratio unica numero, omnibusque realiter communis, sed ratio quæ pro individuorum multitudine multiplicatur: est ratio *necessaria*, non tamen *subjective*, sed in rationibus *objectivis* quas percipit, et circa quas operatur: est *immutabilis* eodem modo. Nullo igitur pacto est ratio Dei, sed participatio seu similitudo participata divini intellectus.

435. Ad 1^m quod attinet, hæc animadvertantur:

1^o *Una est ratio quæ omnes intelligentias illuminat*, nempe causaliter, i. e. sui similitudinem omnibus communicando, seu lumen intelligentiæ nostræ creando, *'conc.*; præfulgens singulis, ut objectum et locum increatum, *nego*.

(1) *Confess. Lib. XII, c. 25.*

2^o *Una est ratio quam omnes consulunt*, quatenus omnes, ex ejusdem divini luminis participatione, easdem rationes in objectis apprehendunt vel apprehendere possunt, easdemque rerum relationes intelligunt vel possunt intelligere, *conc.*; quatenus omnes rationem unam *objectivam* immediate, ut normam, inspiciant, *nego*.

3^o *Omnes homines easdem veritates vident, quas videt unusquisque*; h. e. easdem veritates expressas in una eademque ratione superiori, *nego*; easdem veritates, ut exprimendas ab omnibus, qui in rebus easdem rationes apprehendant, quas nos apprehendimus, *conc.*

4^o Hinc patet, cur certi simus, *omnes homines easdem veritates videre, quas nos videmus*. Etenim certi sumus, nos percipere res rerumque relationes, prouti sunt *objective*: sentimus item *evidentia* relationum perceptarum nos cogi ad sic et non aliter judicandum. Hinc concludimus, fieri non posse, ut quicunque sit intelligendi capax, ea quæ nos percipimus, non percipiat, et ad eadem quæ nos proferimus, judicia proferenda, *evidentia* eadem non cogatur.

436. Ad s. Augustini locum respondebimus cum s. Thoma: » Aliquid in aliquo dicitur cognosci dupliciter. Uno modo » sicut in objecto cognito: sicut aliquis videt in speculo ea, » quorum imagines in speculo repræsentantur. Et hoc modo » anima in statu præsentis vitæ non potest videre omnia in » rationibus æternis: sed sic in rationibus æternis cognoscunt omnia beati, qui Deum vident, et omnia in ipso. Alio » modo dicitur aliquid cognosci in aliquo, sicut in cognitionis » principio, sicut si dicamus quod in sole videntur ea, quæ » videntur per solem. Et sic necesse est dicere, quod anima » humana omnia cognoscat in rationibus æternis, per quarum » participationem omnia cognoscimus. Ipsum enim lumen » intellectuale, quod est in nobis, nihil est aliud, quam quædam participata similitudo luminis increati, in quo continentur rationes æternæ (1). »

437. Ad 2^m *Dist. 1^m partem*. Quisque sentit se non creare

(1) *Summ. th. p. 1, q. LXXX, art. V.*

veritatem objectivam, quæ est relatio a nobis independens inter objecta cognita, *conc.*; i. e. se non proferre iudicium conforme veritati objectivæ, *nego*.

Dist. 2^a partem. : Sentimus veritatem a nobis recipi etc., scilicet objectorum intelligibilitatem mentes nostras afficere, sicut radius solis omnium oculos afficit, *conc.*; quasi vero objectorum ideæ existentes in mente infinita, vel lumen ipsum substantivum et increatum nos afficeret, *nego*.

438. Ad 3^m *conc. maj.* eo modo intellectam, quem in antecedenti capite (387, 2^o), et in ontologia, agentes de rerum essentiis (O. 54-55), explicavimus.

Dist. min. : In ordine reali existentiae, *conc.*; in ordine ideali et intelligibilitatis, *subd.* : independenter a Deo, *conc.*; dependenter a Deo, *nego*. Vide alibi dicta de possibilitatis fundamento (O. 86).

439. Ad 4^m *Dist.* : Intelligimus veritates quas intelligit Deus, prouti sunt in divino intellectu, *nego*; intelligimus easdem rerum relationes quas Deus intelligit, *subd.* : ita tamen ut nostra cognitio determinetur ab objectis, in quibus existunt essentiæ, quarum exemplares ideæ sunt in divino intellectu; Deus autem in sua ipsa essentia intelligat omnia, *conc.*; ita ut nos intelligamus quæ intelligimus, in divina essentia, *nego*.

Conc. min. et nego cons.

CAPUT VIII.

* DE SYSTEMATE IDEARUM INNATARUM.

ARTICULUS I.

Varie hujus systematis formæ exponuntur.

440. Sequitur, ut idearum innatarum systema expendamus. Hujus primam formam in socratica et platonica doctrina reperimus. Plato semina quædam a Socrate sparsa colligens atque excolens, statuit animas humanas, dum in astris dege-

rent (203), ideas rerum æternas et immutabiles intellexisse, per species intellectuales a summa Mente ipsis inditas. Postquam vero in admissorum scelerum poenam, corporibus, quasi carceribus, inclusæ fuerunt, retinuisse quidem ingenitas illas species, sed mole ac pondere corporum, quibus demersæ sunt, impediri, quominus per illas ad actum cognitionis determinentur. Hinc ut ideas actu iterum intelligant, aliquo alio incitamento indigere: excitari autem a sensationibus: sensationes enim res menti corporeas offerunt, quæ idearum participatione suam essentiam sortiuntur. Ex his concludebat Plato, nihil novi nos in dies intelligere, sed per ingenitas species naturaliter cuncta cognoscere, non tamen actu sed habitu; cognitionem vero omnem quam nunc adipisci arbitramur, veteris cognitionis reminiscantiam esse.

441. Ingenitas ideas, diverso tamen modo, Cartesius iterum ejusque asseclæ in philosophorum scholas intulerunt. Divisit Cartesius mentis humanæ ideas in *adventitias*, *factitias* et *innatas*. Quid vero ideæ innatæ nomine intelligeret, non est satis exploratum. Semel tamen professus est, se nunquam scripsisse vel judicasse, *mentem indigere ideis innatis, quæ sint aliquid diversum ab ejus facultate cogitandi*; easque solum ideas vocasse innatas, quæ nec ab objectis externis, nec a voluntatis determinatione procederent, sed a sola cogitandi facultate (1).

442. At longius progressi sunt cartesianorum plerique. Horum sententia est, admittendas esse ideas quasdam mentibus omnium impressas, seu formas quasdam repræsentativas, quas mens non quidem actuali reflexione contempletur jugiter, sed perceptione quadam habituali semper cognoscat: ita tamen ut si attentio deficiat, eæ involutæ in nobis et quasi consopitæ delitescant, si autem attentio adhibeatur, rursum excitentur, mentique præsententur. Hujusmodi sunt idea in primis supremi Numinis; tum etiam ideæ illæ omnes, quibus nituntur generalia quædam principia, quorum veritas ab omnibus facillime intelligitur; ut v. gr. illa: *quæ*

(1) Cf. Cartesii notas in programma belgicum ad art. 12. Exstant inter ejus epistolæ.

sunt eadem uni tertio, sunt eadem inter se; et: quod tibi fieri non vis, alteri ne feceris, aliaque id genus.

443. Inter idearum innatarum fautores recensendi quoque sunt Leibnitzius ac Wolfius, et ipse Kantius. Censuit Leibnitzius, ut alibi retulimus (C. 14), infimi ordinis monades, ex quibus corpora coalescunt, obscura quadam perceptione naturaliter præditas esse, qua rerum universitatem sibi repræsentant. Alteram vero monadum esse classem, quæ claris ideis sed confusis instructæ sunt: hæ sunt brutorum animæ. Tertiam vero classem animas humanas complecti, quæ non clara modo, sed etiam distincta rerum repræsentatione gaudent; ita tamen, ut omnia sibi confuse principio repræsentent, distincte vero per partes et cum quadam successione, in qua antecedens repræsentatio sit subsequæntis ratio sufficiens (175). Hunc fere in omnibus sequitur Wolfius.

De Kantio alibi diximus (L. 515).

444. Iluc denique spectat Rosminii viri cl. systema, quod cum recentissimum sit, ejusque auctor ingenio, subtilitate, eruditione, multis præcellat, diligentius exponi meretur. Cujus doctrinæ hæc summa est: unicam esse in humana mente ideam innatam, videlicet ideam *entis* possibilis et communismi. Sic itaque statuit:

1º Instituta idearum nostrarum analysi, facile deprehendimus, in iis omnibus ideam entis contineri; nisi quod idea entis est prorsus indeterminata, cæteræ vero ideæ ens aliquo modo determinatum exhibent. Nam v. gr. in idea lapidis ego cognosco ens non quodcunque, sed unum aliquod ens, quod lapidis determinationes habet. Idem de cæteris dicatur. Itaque ens in omni reperitur idea; adjectæ vero determinationes nihil aliud sunt, nisi ipsa entis idea certis quibusdam modis limitata. Omnibus proinde ideis idem substratum subjicitur, omnes idem elementum includunt, quod est esse ideale seu possibile.

2º Determinationes enti superadditæ vel complete ens determinant, vel solummodo ex aliqua parte determinant, et ex altera indeterminatum relinquunt. V. gr. possum mihi formare ideam libri certæ cujusdam magnitudinis ac formæ,

certis quibusdam typis impressi, iisque omnibus accidentibus instructi, quæ certum aliquem librum afficiunt. Hæc est idea libri determinata, quanquam adhuc generalis sit, quia pura est idea, non vero liber realis; estque veluti quidam typus menti propositus, in cujus exemplum indefinitus realium librorum numerus fieri posset. E contrario habere possum ideam libri aliqua ex parte indeterminatam, ut quum librum cogito secundum ejus essentialia constitutiva, præcisione facta a magnitudine, forma, typis, ac cæteris hujusmodi. Ideæ porro ex toto determinatæ *concretæ* appellantur; quæ vero ex parte indeterminatæ sunt *abstractæ*. At si ex libri idea omnes ejus determinationes tam accidentales quam essentielles abstraho, elabitur liber e mente, nec aliud superest, quam idea *entis* ex toto indeterminati.

3º Ex his sequitur, duo explicanda esse ad problema de idearum origine solvendum; videlicet primo origo ideæ indeterminatæ, ac secundo origo determinationum quæ ipsam afficiunt.

4º Quod ad primum attinet, idea entis possibilis exhibet aliquid omnino *universale* ac *necessarium*, et consequenter aliquid *infinitum* atque *æternum*. Hujusmodi autem idea nec a sensationibus, nec a propriæ existentiae sensu oriri potest, nec reflexione seu abstractione effici, nec occasione sensationis sive a nobismetipsis, sive a Deo in animo nostro produci. Superest igitur, ut sit innata, videlicet non acquisita, sed naturaliter insita, atque ab ipso Creatore menti oblata.

5º Varias autem entis determinationes cognoscimus per sensum tam internum, quam externum. Facile porro intelligitur, quo pacto sensationes in ideas convertere possimus, si idea entis innata ponatur. Quum enim animus sensationes experitur, secum ipse dicere potest: hic est unum ens sensatione limitatum ac determinatum. V. gr. quum stellam aspicit, non cogitat amplius ens indeterminatum, sed ens cum determinationibus luminis ejusque graduum, magnitudinis, formæ, aliisque. Hæ omnes qualitates ens determinatum efficiunt, atque omnes a sensibus suppeditantur.

6º Quum dicimus: *hic est ens luminosum*, affirmamus ali-

quid. Cognitio autem quæ in affirmatione sita est, seu in *persuasione subsistentiæ* (existentiæ realis), ideam includit; nequit enim realis existentia affirmari de objecto, quin aliqua simul ejus idea habeatur. Itaque quum judico aliquid subsistere, duo simul habeo, nempe ideam rei, et judicium de ejus subsistentia. Idea rei, quatenus huic judicio sociatur, vocatur a Rosminio *intellectualis rei perceptio*.

7° In perceptione hac intellectuali, idea quidem rei continetur, sed cum objecto particulari et sensibili adhuc colligata. At divelli inde potest, si a cogitatione subsistentiæ ejusdem objecti præcisio fiat. V. gr. si servata stellæ imagine, de ejus reali existentia non cogites, eamque consideres ut stellam possibilem, ut typum indefinitarum numero stellarum, quæ per creatoris potentiam produci possunt, hæc stella possibilis erit idea pura determinata. Quæ stellæ determinatio possibilis non est amplius sensatio; hæc enim realis est, non possibilis; nihilominus sensatio occasionem mihi præbuit ad eam reperiendam, animusque intelligens eam reperit considerando ut possibile id, quod sensatio ut reale offerebat. Hoc autem animus efficere potest; cognoscit enim, quid sit ens possibile. Quum vero stella possibilis sit universalis, hæc spiritus operatio, qua stellam ut possibilem respicit, a Rosminio vocatur *universalizatio*.

8° Ut universalizatio efficit ideas complete determinatas (2°), ita *abstractio*, quæ altera est mentis operatio, reliquas format ideas, quæ sunt ex parte determinatæ, et ex parte indeterminatæ; ut quum animus non modo a subsistentia stellæ, sed etiam a magnitudine, a luminis intensitate, aliisque accidentibus hujusmodi præscindit.

9° Itaque humana quævis cognitio duplici constat elemento; videlicet elemento *a priori* et *formali*, quod est idea entis, et elemento *a posteriori* et *materiali*, quod determinationibus a sensu oblati continetur. Per has determinationes idea entis convestitur, limitatur ac in reliquis omnes ideas transformatur. Hæ autem determinationes materialiter suppeditantur a sensationibus, formantur vero duplici illa operatione, universalizatione et abstractione.

10. Sic solvitur quæstio de idearum origine. Nam omnes ideæ genericæ et specificæ sunt ipsa entis idea, sensationum ope ac duabus iis mentis operationibus diversimode determinata. Primitiva autem illa idea, cum ad hasce operationes tanquam necessaria conditio prærequiratur, per easdem formari nequit. Necesse est igitur, ut homo eam a natura accipiat, sciatque quid sit ens, quin hoc addiscere debeat; omnia enim per hanc primam cognitionem addiscit.

ARTICULUS II.

Expenduntur theoriæ Platonii et Cartesii.

445. Expendemus modo systemata Platonis, Cartesii et cartesianorum; deinde rosminianam theoriam. De Leibnitzii enim et Kantii opinionibus alibi satis dictum est (176, 508, 5° L. 516).

PROPOSITIO I. *Intellectus humanus res non cognoscit per species ingenas.*

Hæc est Platonis, ut diximus, opinio. Refutatur autem:

1° Quia duabus falsis hypothesis tota innititur. Prima est, animas corporibus præexistisse et unionem animæ cum corpore pœnalem esse. Altera, immediatum nostri intellectus objectum esse ideas divinas, atque adeo, juxta platonicos quosdam, ideas immateriales separatas. Utraque hypothesis supra rejecta est (203, 415, seq. L. 531, seq.).

2° Animæ rationalis cum corpore conjunctio naturalis est, ac pulcherrimum naturæ opus. Est ergo in animæ rationalis bonum, non in detrimentum. In magnum autem ejus detrimentum cederet conjunctio ista, si naturalem ejus cognitionem non modo non promoveret, verum etiam impediret ac pene aboleret, ut a Platone ponitur.

3° Intelligi prorsus nequit, quomodo corpus animæ cognitionem, quæ per species in ipsa jam inditas determinari possit, impedire queat. Cognitio enim hujusmodi nullo pacto dependeret a sensibus, nec per corporeum aliquod organum expromenda esset. Anima vero si in seipsa jam species rece-

pit, easque in seipsa servat, habet in seipsa adæquatum suæ cognitionis principium: nec corpus in animam agere potest, aut species ipsi impressas obfuscare utcunque aut delere, aut animæ vincula injicere, ne in actum erumpat: quæ quidem omnia multo magis vera sunt in sententia Platonis, juxta quem anima corpori, tantummodo ut motor mobili, conjungitur (170).

446. Celebris est, et specie quadam non caret ratio illa, qua Plato suadebat, nihil novi nos addiscere, sed reminisci solum, quæ olim didicimus. Homines enim quicunque, quantumvis rudes, si apte interrogentur, recte ac vere ad singula respondent: nemo autem verum respondere potest, nisi in iis, quorum cognitionem habet. Ergo omnes homines, antequam scientiam acquirant, veritatem cognoscunt.

Respondet optime s. Thomas: « dicendum, quod ordinata » interrogatio procedet ex principiis communibus per se » notis ad propria. Per talem autem processum scientia » causatur in anima addiscentis. Unde quum verum respon- » det de his de quibus secundo interrogatur, hoc non est » quia prius ea noverit; sed quia tunc ea de novo addiscit. » Nihil enim refert, utrum ille qui docet, proponendo » vel interrogando procedat de principiis communibus ad » conclusiones. Utrobique enim animus audientis certifica- » tur de posterioribus per priora (1). »

447. PROPOSITIO II. *Nullæ sunt ideæ innatæ.*

Primo nullæ sunt, si ideæ innatæ ita intelligantur ut a Cartessio in loco supra citato (441) intelliguntur. Cartesio enim ideæ innatæ illæ esse videntur, ad quas ex ipsa natura facultatis cogitandi mens determinatur.

At 1° si ponamus cogitandi facultatem esse ex se ad hasce ideas determinatam, eæ statim ab ipso suo ortu in mente vigerent. Id quod est contra experientiam. Ideæ enim quæ hoc pacto innatæ dicuntur, solum post experientiam, ac post plures alias cognitiones, in humana mente versari incipiunt. Reponet Cartesius, tunc eas ex habitualibus fieri actuales, et

(1) *Sum. th.*, p. 1, q. LXXXIV, art. III ad 3.

ex directis reflexas. Hoc autem quomodo probabit? An eo quod essentialis sit animo actualis aliqua intellectus operatio? Quid vero si hoc negetur, ut negari debet? Est igitur hæc assertio gratuitis principiis innixa.

2° Falsum est, esse in intellectu humano ideas, quæ neque ad adventitias neque ad factitias revocari possint. Nominatim vero ideæ illæ, ex quibus principia prima procedunt, ut ideæ *entis*, *uni*, *identitatis* et cæteræ hujusmodi, sunt adventitiæ per abstractionem superius explicatam (396, seq.). Ideæ vero Dei et ideæ morales sunt factitiæ ac deductæ, ut supra ostensum est (392, seq. 398).

448. Secundo: nullæ sunt ideæ innatæ, ut intelliguntur a cartesianis (442).

Nam 1° eorum opinio supponit, ideas esse semper perceptionis objectum, et a perceptione realiter distinctas, id quod falsum est (376, 5°), et idealismo viam aperit.

2° Quid vero sint illæ formæ menti impressæ, et habituali cognitione intellectæ, quin de hac cognitione sensus intimus nos monere possit; quomodo illæ consopitæ delitescant; aut quomodo deinde mens ad eas reflexe contuendas determinetur, hæc profecto omnia nescio an intelligi possint, probari vero nullatenus possunt.

3° Eadem opinio non sufficit ad idearum originem explicandam. Cæteræ enim ideæ quæ innatæ non sunt, si cum sensationibus, ut par est, non confundantur, quomodo, aut qua vi produci dicuntur? Sane aut a Deo, aut a mente occasione sensationis. Si dicant a Deo, dicunt quod probare nullatenus possunt. Si a mente, inferemus, eadem vi mentis eas quoque ideas, quæ innatæ dicuntur, produci posse.

4° Demum hujusmodi innatæ ideæ minime necessariae sunt, cum earum origo assignari possit, nec majores revera difficultates præ se ferat, quam cæterarum idearum origo.

449. Subjicimus præcipua rationum momenta, quibus suam opinionem cartesiani confirmabant.

Aiebant 1° Humanæ menti essentialis est aliqua actualis cogitatio. Ergo nec in primo suæ existentiae exordio omni cogitatione, etiam habituali, destituta esse potest.

2^o Anima humana ad Dei imaginem condita est. Quis autem hujusmodi imaginem in pura cogitandi facultate, prorsus inani et omnium egena, agnoscat?

3^o Ad ipsam hominis naturam pertinet invictum felicitatis desiderium. Sed voluntas felicitatem desiderare nequit, nisi intellectus eam cognoscat, saltem confuse: ignoti enim nulla cupido. Ergo.

4^o Non felicitatem quamcunque, sed perfectam felicitatem naturæ instinctu desideramus et inquirimus. Sed perfecta felicitas in summo duntaxat bono reperiri potest. Ergo humana voluntas summum bonum, nempe Deum naturaliter appetit. Ergo Deum naturaliter cognoscit.

5^o Quod omnes omnium ætatum homines sine ullo magisterio intelligunt ac recipiunt, hoc in omnium mentibus anticipata notione inscriptum sit oportet. Atqui hujusmodi sunt ideæ in quibus prima moralitatis principia fundantur. Ergo.

450. Resp. ad 1^m *Nego ant.* Aliquam enim *intellectus* actualem operationem humanæ menti essentialē esse, gratis asseritur, et falsum est. Quod, si dicere solemus, primorum habitum principiorum intellectui naturalem esse, hoc intelligi debet non de quibusdam cognitionibus in eo impressis et latitantibus, sed de naturali dispositione ad prima principia formanda, per primitivarum idearum analysim (L. 554). Solum actualis sui sensus est animo essentialis, ut supra demonstratum est (274).

Ad 2^m Anima humana est Dei imago, sed imperfecta. Deus enim est purus actus. Anima autem humana est actus potentia mixtus; est enim actu quoad naturam ejusque proprietates; sed ad ulteriorem suam perfectionem est in potentia.

Ad 3^m *Dist. maj.*: Ad naturam hominis pertinet felicitatis desiderium, i. e. facultas appetendi bonum, secundum quod cognoscitur, *conc.*; explicitum et actuale desiderium felicitatis, *subd.*: posita ejus cognitione *conc.*; antequam cognoscatur, *nego*. Felicitas enim non in ipso existentiae initio a mente cognoscitur, sed post aliquod tempus, quum nempe ita sese explicuit intelligendi facultas, ut hanc ideam formare sibi possit. Postquam autem mens felicitatis notionem adepta est,

profecto naturale homini est ac necessarium, ut eam desideret.

Ad 4^m *Dist. maj.*: Felicitatem perfectam naturaliter desideramus, i. e. desideramus ut expleantur animi tendentiæ ad bonum nobis conveniens, quodcunque illud sit, *conc.*; desideramus determinatum illud objectum, in quò bonum nobis conveniens reipsa est positum, *nego*.

Conc. min. et dist. cons.: Humana voluntas Deum naturaliter appetit, nempe Deus per naturale hoc desiderium hominem ad se ordinavit, *conc.*; homo per hoc desiderium se ordinat ac tendit ad Deum, *nego*.

Summum bonum est Deus: nos autem bonum nostrum perfectum desideramus, antequam cognoscamus atque adeo quantumvis ignoremus, hoc in Deo solo reperiri. Hoc itaque desiderium, quamvis indicio sit, Deum esse ultimum finem humanæ naturæ, non tamen a Dei cognitione ullo modo dependet, nec ad Deum per se explicite tendit.

Ad 5^m *Nego ant.* Vide dicta in responsione ad 1^m.

ARTICULUS III.

Expenditur systema Rosminii.

451. PROPOSITIO III. *Rosminii de idearum origine sententia multiplici ex capite rejicienda est.*

Omissis plurimis, quæ sive in totum Rosminii systema sive in ejus partes animadverti possent, hæc tantummodo quæ subdimus, ad id, quod nobis propositum est, demonstrandum sufficient.

1^o Itaque totum hoc systema huic innititur fundamento: ens in omni idea contineri: entis autem, si hoc abstracte spectetur, attributa propria esse universalitatem, necessitatem, infinitatem, æternitatem. Atque ex his rosminiana conclusio deduci sane non potest. Jam enim ostendimus, ideo ens in omni idea contineri, quia est primā nota, quæ in rerum cognitione ab intellectu apprehenditur per abstractionem (372; 387, 3^o): ostendimus item, abstracta omnia, hoc ipso quod intellectus ab existentiae conditionibus, abstra-

hendo præscindit, iis omnibus ornari characteribus, quibus idea entis instrumenta est (387, 2°). Ergo necesse non est, ut eo fundamento posito, entis idea innata esse dicatur.

Notandum præterea, ens quod in omni idea continetur, dici posse *universale*, non tamen univoce (O. 13, seq.), nec ut universale cognosci, nisi post multa entia cognita (L. 338). Est item *necessarium*, videlicet non ipsum ens, ut a nobis cognoscitur, sed ejus possibilitas; est *infinum*, non tamen secundum realitatem, at secundum extensionem (O. 365): ac demum est *æternum*, si a fundamento reali omnis possibilitatis præscindamus, per remotionem potius quam per affirmationem, quatenus intelligibilitas ac possibilitas entis ab actuali existentia, proindeque ab omni tempore præscindit. Ens autem hoc pacto universale, necessarium, infinitum, æternum, est idea quæ a rebus individuis et contingentibus abstrahi potest (387, 2°; 428).

2° In hoc systemate non explicatur idearum origo. Etenim sensatio in ideam transformari dicitur, quia sensatio ens ideale determinat. Atqui hæc entis idealis per sensationem determinatio admitti non potest. Ut enim supra demonstratum est (366), intellectus a facultate organica determinari nequit. Ens autem ideale est in intellectu, ac sensatio est actus organicæ facultatis. Itaque etiamsi largiremur, esse menti innatam ideam entis in genere, adhuc tamen aliquid aliud in ipsa mente necessario ponendum esset, quo, posita sensatione, ens ideale determinaretur.

Dices intellectum in sensatione agnoscere debere modum determinatum entis possibilis, quod prius a se cogitabatur; ideamque entis possibilis nihil aliud esse, quam conditionem ad agnoscendam in sensatione entis limitationem. At nihil proficiet Rosminius, si hæc reponat. Etenim ut intellectus in sensatione entis modum, seu limitationem agnoscat, instituenda est illi inter ens indeterminatum et ens determinatum comparatio. Sed comparatio hæc institui ab eo non potest, nisi prius utrumque comparisonis terminum percipiat. Si vero ens determinatum percipi dicatur ab intellectu antequam cum ente indeterminato comparetur, jam idea entis

indeterminati, ad cognoscendam in sensatione entis limitationem, est prorsus inutilis.

3° Hoc idem systema ad absurdas conclusiones nos adducit. Nam sensatione posita, mens, præter ideam entis possibilis quam contemplatur, vel deprehendit in ipsis objectis illud esse reale quod ipsis est proprium, vel secus. Primum Rosminius dicere nequit, quin totum suum systema funditus subruat. Dicat ergo alterum necesse est; nempe intellectum sensationem ad res existentes referre, quin prius entis rationem in sensatione agnoscat. Hoc autem si dicat, judicia synthetica a priori instaurare, et cognitionum nostrarum realitatem problematicam efficere videbitur. Perceptio enim intellectiva, seu iudicium illud quo affirmamus: *id quod sentio existit*, subjecto prædicatum attribuit, non quia hoc illi convenire mens perspicit, sed ex subjectiva necessitate, et sine fundamento. Nam et sensationes, juxta Rosminium, non sunt objectorum perceptiones, sed meræ subjecti affectiones; et ens quod objectis applicatur, est aliquid ideale, quod in sensationis objecto non percipitur, sed ante omnem experientiam naturali necessitate menti contuendum offertur.

4° Demum et illud a quibusdam animadversum est: hujus systematis auctorem ita de ente ideali quandoque disserere, ut difficile sit definire quid illud sit; et quamvis ejus animus sincere a pantheismo abhorruerit, nihilominus quosdam modos loquendi ab ipso adhibitos, esse ejusmodi, ut pantheistæ fortasse iis abuti possent.

452. Argumentum præcipuum, quo Rosminius suadere conatur, entis ideam innatam esse, huc redit.

Ideæ universales nequeunt esse omnes acquisitæ: idea enim universalis efformari nequit, nisi vel abstractione vel iudicio. Atqui utraque operatio ideam universalem supponit. Ergo necesse est, esse aliquam ideam universalem, quæ non sit opus intellectus, sed in illo ingenta.

Prob. min. quod 1^a Abstractio in hoc sita est quod assumpta idea quapiam particulari, notæ communes quæ in illa sunt, a notis propriis separentur. Sed notæ communes sunt ipsa idea universalis, quam quærimus. Ergo ante abs-

tractionem supponi debet idea universalis jam in mente existens, et in particularibus ideis contenta.

Prob. quoad 2^m In omni judicio prædicatum, quod a subjecto distinctum concipimus, eidem jungimus. Prædicatum autem quodcumque a subjecto distinctum, notionem semper generalem continet; nam quousque certo alicui subjecto non conjungitur, pluribus atque adeo infinitis subjectis possibilibus conjungi potest.

453. Ex iis, quæ hucusque de idearum natura et origine disputata sunt, non difficulter eruitur hujus argumenti solutio.

Primo itaque animadvertendum, universale duplex distinguere oportere, *directum* videlicet et *reflexum*, ut in logica declaratum est (L. 538). Illud est essentia, seu ratio specifica, quæ proprium est intellectus objectum; hoc vero eadem essentia, cognita ut communis pluribus.

Animadvertendum secundo, duplicem quoque abstractionem esse; alteram *simplicem*, seu *directam*, qua intellectus, oblato per sensus individuo, essentiam ejus apprehendit (369, 370), alteram *comparativam* seu *reflexam*, quæ ex ideis specificis quas mens possidet, notas genericas elicit. (L. 37, 2^o).

454. Respondeo nunc ad difficultatem propositam.

Nego Ant. Ad probationem, *omissa majori, dist. min.*: Judicium supponit ideas universales, *omitto*; abstractio, *subd.*: abstractio simplex et directa, *nego*; abstractio comparativa et reflexa, *conc.* Et *nego cons.*

Ad 1^m *Dist. maj.* Abstractio simplex et directa separat notas communes, quæ sunt in idea particulari, a notis propriis, *nego*; abstractio comparativa et reflexa, *transeat*. Abstractio enim simplex non circa ideam, sed circa objectum per sensus oblatum exercetur; nec notas communes a propriis, sed essentiam ab existentiae conditionibus separat. Hæc autem abstractio est, quæ universale directum facit, ut sæpe dictum est.

Omitto min. et *dist. consequens* distinctione majoris.

Quoad 2^m, animadvertendum est, in judicio ideam universalem directam, non vero reflexam supponi, saltem necessario. Hac animadversione posita, concedi potest argumentum, sed nihil inde sequitur, quod rosmianiano systemati faveat.

CAPUT IX.

* DE TRADITIONALISMO.

ARTICULUS I.

Traditionalium sententia exponitur.

455. Reliquum est, ut traditionalium systema ad examen revocemus. Systema hoc omnium recentissimum est, ac Bonaldium auctorem habet (1). In eum vero finem excogitatum est, ut rationis individualis infirmitas, et revelationis ac traditionis absoluta necessitas, ad rationalismum radicatus extirpandum, firmiter stabiliretur. Tota porro hujusmodi doctrina ad hanc summam reducit: mentem humanam sibi relictam ultra sensibilibus perceptionum ambitum excurrere, ideasque universales ac notiones abstractas sibi cudere non posse, sed egere auxilio rationis alterius, quæ ideas universales et veritates quæ ex his ideis efflorescunt, easque præsertim quæ ad religiosum, moralem ac socialem ordinem pertinent, ei tradat atque communicet. Traditionem autem hanc fieri in præsentis hominis statu per rationem socialem, mediante loquela, quam societas in qua degimus, nobis communicat; loquela enim, cum sit idearum expressio ac veluti corpus, eas nobis præsentat ac perceptibiles facit.

456. Hinc statuunt 1^o sine verbo impossibilem esse cogitationem, ut visio est sine luce impossibilis; impossibilemque esse homini veritatis inventionem, ut creatio illi impossibilis est.

(1) OEuvres de M. de Bonald, t. VIII. *Recherches philos. sur les premiers objets des connaissances mor.*, ch. I, II.

2° Primum hominem a Deo immediate ideas accepisse, hoc ipso quod loquelæ donum ab eo accepit.

3° Educationem socialem per loquelam esse absolute necessariam, ad hoc ut ratio cogitare incipiat, et ut cogitare pergat.

4° Fieri prorsus non posse, ut homo verba aut quælibet idearum signa proprio Marte inveniatur.

5° Absolutam esse ac naturalem revelationis primitivæ, seu instructionis educationisque divinæ necessitatem, ad intellectum rationemque hominis formandam.

6° Rationem esse mere passivam, seu receptivam cognitionum, quæ ipsi cum verbo communicantur.

7° Veritatem omnem a societate per auctoritatem tradi, et ab individuis per actum fidei suscipi, fidemque esse rationis ac scientiæ principium.

457. Hæc traditionalismi primitiva forma, quam Bonaldius professus est, omnes prorsus ideas et cognitiones intellectuales complectitur. At plures deinde ex eadem schola philosophi originariam hujus doctrinæ crudelitatem variis modis emollire ac temperare conati sunt.

Cl. Bonnetty, saltem postremis hisce temporibus, traditionis necessitatem ad eas solas veritates quæ ad religiosum ac moralem ordinem pertinent, coarctare videtur; quæ vero sunt extra horum dogmatum ambitum, aut quæ ex iis rationis derivantur, a philosophis inveniri posse non negat (1).

P. Ventura concessit et ipse intellectui vim formandi sibi ideas primitivas entis in genere, ejusque proprietatum, ideas generis et speciei, concreti et abstracti, causarum et effectuum, aliasque id genus; quin etiam notiones boni ac mali morales, ad quas, ut ipse putat, per physici boni ac mali cognitionem evehimur; existimavit tamen notiones Dei, spiritus et immortalitatis animæ, tum etiam officiorum moralium claram distinctamque cognitionem non posse hominem aliunde recipere, quam a revelatione divina, per loquelam traditionemque propagata. Nihilominus diserte docuit, has ipsas veritates, quas ratio suis sibi viribus comparare nequit,

(1) *Annales de phil. chrét.* IV, série, t. VII, p. 81.

postquam ab ipsa per fidem receptæ sunt, demonstrari ab eadem posse, earum cognitionum ope quas ex se acquirit (1).

458. Demum non desunt, qui adhuc mitiorem traditionalismi formam in præsentī proponant. Quorum hæc est sententia.

1° Mentem humanam pollere quidem vi interna, sibi quæ propria; eandem tamen, ut homo, qualis nunc nascitur, ad expeditum rationis usum perveniat, externo aliquo auxilio opus habere.

2° Principia veritatum rationalium, metaphysicarum ac moralium a Deo conditore humanæ menti indita esse; ita tamen, ut solummodo confusus quidam harum veritatum sensus et vaga quædam apprehensio ipsi insit: ad hoc autem, ut homo claram, distinctam, certam Dei et veritatum moralium cognitionem sibi comparare possit, institutione aliqua sociali, sive per verbum, sive per scriptum, sive per gestum, sive per alia quæcunque media, quæ societatis commercium suppeditat, indigere.

3° Institutionem hanc non esse habendam ut efficientem causam, per quam homo ad expeditum suæ rationis usum perveniat, sed tanquam meram conditionem, sine qua non possit ad expeditum illum usum pervenire.

4° Postquam homo suæ rationis usu reapse fruitur, sua sola ratione quamplurimas veritates naturalis ordinis assequi posse.

459. Adverte, traditionalismi doctrinas cum aliorum quoque systematum, circa idearum originem, principiis coherere aliquatenus posse.

Et re quidem vera Bonaldius ideas innatas admittere videtur, sed eas, sine verbo latentes dicit et invisibiles, et quasi quosdam propemodum characteres acromaticos per verbum colorandos: accedente autem verbo, ideam fieri perceptionem, videlicet coram intellectu præsentem fieri, ac percipi.

(1) *La ragion filosofica, e la ragion cattolica.* Conferenze del R. P. Gioacchino Ventura. Conf. I, II.

Bonnetty omnes ideas innatas excludit, et solas in animo facultates agnoscit.

Ventura, quod mirum est, cum Aristotelis ac s. Thomæ doctrina limitatum suum traditionalismum conciliari optime putat.

Denique sunt etiam, qui traditionalismum cum ontologismo consociant, quatenus confusam illam cognitionem, quæ traditionem præcedit, ex intuitu Entis infiniti comparari asserunt. Quam sententiam minus mirabere, si recolas quod supra vidimus, ontologistas videlicet recentiores, ad notiones distinctas acquirendas, sermonem necessarium existimare.

ARTICULUS II.

Traditionalismus refellitur.

460. PROPOSITIO I. *Absurde asseritur, primas ideas universales recipi per verbum, aut signum quodcunque arbitrarium.*

Sane 1^o ideas per verbum tradi aut gigni, non minus absurde dictum videtur, quam ideas fieri per sensationis transformationem. Verbum enim auditum ex se est mera sensatio; quomodo itaque mera hæc sensatio ideas, quæ sunt quiddam a sensatione prorsus diversum, nullamque naturalem relationem cum illa habens, in mente producit? Quomodo fit, ut vocabula, in diversis linguis omnino diversa, easdem in mentibus infantium ideas excitent; et e converso idem sonus, in diversis linguis, diversas ideas imprimat? Aut quomodo vox, scriptum, gestus, quæ adeo inter se differunt, eundem nihilominus effectum producant? Hæc dicuntur a traditionalibus *mysteria*. At non certe mysteria divina, aut naturalia, nec mysteria ullo modo, sed si proprie loqui velimus, absurda sunt.

2^o Verbum aut signum quodcunque, nullum subsidium intelligentiæ afferre potest, nisi mens ejus significationem intelligat. Significatio autem est nexus quidam inter signum ac rem significatam; et in signis arbitrariis, est nexus ex arbitrio institutoque hominum inductus. Quum itaque verbum in aure sonat, vel hunc nexum mens jam cognoscit, vel

secus. Si non cognoscit, nunquam per signum in rei significatæ cognitionem deveniet. Si vero hunc nexum cognoscit, hunc cognoscere nequit, nisi rei significatæ ideam possideat. Ergo ut verba aliquod subsidium menti conferant, necesse est, ut res quas illa significant, mens prius cognoscat: videlicet verba possunt quidem efficere, ut ex associatione inter verbum et ideam jam constituta, ideæ rerum quas ipsa significant, in mente reviviscant, sed ideas in mente primo producere profecto non possunt.

3^o Quomodo autem vim significandi quæ vocabulis inest, mens primo cognoscit? Profecto vel per alia vocabula quorum significationem jam noverit, quæ proinde aliquas ideas in mente audientis existentes supponunt, vel denique per signa quædam naturalia, quæ dum vocabulum profertur, ad objectum per illud significatum mentis attentionem dirigant. Ita v. gr. subijcimus pueri oculis duo vasa, duos bacillos, duo folia æqualia, unumque alteri applicamus et commenturamus, et simul ingeminamus eam vocem: *æqualia*. Ex hoc puer intelligit, nos per eum sonum significare velle id quod ipse, iis objectis tali modo sibi oblati, mente concipit. At si pueri mens, per attentionem quam ad objecta sibi commonstrata convertit, ideam æqualitatis vi sibi propria efformare non posset, sane et signum naturale, et signum arbitrarium tam essent illi inutilia ad vocabuli significationem intelligendam, quam stipiti aut lapini. Ergo 1^o signa quæcunque non ideæ causa sunt, sed ad summum occasio; 2^o signa arbitraria neque occasionis munere fungi possent, nisi signis naturalibus sociarentur; 3^o signa quoque naturalia inutilia essent, nisi mens vi sibi propria ideas elicere posset; 4^o demum non ideæ per signa, sed signa per ideas intelliguntur.

4^o Quum agitur de vocabulis, quæ rerum rationes prorsus insensibiles, ad quas audientis attentio per signa naturalia converti nequit, significant, quo pacto eorum significatio primo ab infantibus intelligitur? Necesse plane est, ut infans eam eruat ex consideratione et comparatione plurium locutionum, in quibus eadem vox recurrens unam eandemque

rationem in rebus diversis significet. Ita. v. gr. puer primo intelligit significationem vocis *hodie*, posteaquam diversis diebus, de factis sibi notis dici audivit: *hodie pluit*; *hodie venit amicus*; *hodie mater ægrotat*; et similia. Hæc inter se comparans, et ideam ei voci subjectam format, et vocis significationem intelligit. Quæ operationes, ut patet, notiones identitatis et diversitatis in eo supponunt. Ergo has quoque ideas possideat necesse est, ut huiusmodi vocabulorum significationem intelligat.

461. PROPOSITIO II. *Absurdum est pariter, nullam veritatem ab humana mente cognosci posse, nisi per divinam revelationem traditione transmissam.*

Etenim 1^o hoc semel admissio, omnis cognitio actu cæcæ fidei contineretur; atque una societatis auctoritas veritatis criterium, ac certitudinis motivum esset. At fides sine aliqua prævia scientia irrationabilis est, imo impossibilis: repugnat præterea, auctoritatem quamlibet unicum aut supremum veritatis criterium esse. Vide quæ in logica dicta sunt contra Lamennaisium (L. 672). In quo enim traditionalium saltem rigidiorum, doctrina a Lamennaisii doctrina discrepet, ego quidem non video.

2^o Cum hujus opinionis assertores diserte fateantur, ac fateri porro debeant, humanam traditionem, sive in conservanda sive in tradenda doctrina divinitus initio tradita, minime infallibilem esse, necesse est inferre, rationem in plerisque hominibus necessitate prorsus physica ad errorem compelli, et in errore detineri. Hoc autem et falsum est, et absurdum, et cum divinæ providentiæ conceptu omnino pugnat.

3^o Idem, cum positivam revelationem divinam ad quamlibet veritatem intelligendam homini absolute necessariam faciant, essentielle omne discrimen inter veritates rationales ac revelatas e medio tollunt; in quo non modo communi sensui, sed etiam unanimi theologorum consensui refragantur, et philosophiam cum theologia confundunt, ac dum rationalistas, ultra præscriptos a veritate limites persequantur, ipsam veritatem eorum ictibus exponunt.

5^o Fieri nequit ut homo ab homine instruatur, nisi ratio discentis vi sibi propria veritatem cognoscere possit, atque adeo nisi aliquid sciat, antequam instruatur.

Probatur 1^m Instructio enim hoc tantum discenti conferre potest, ut ejus rationem dirigat ac propemodum manuducat, ad quasdam operationes successive et ordine quodam exendas; ut v. gr. discipulus revocet primo quasdam ideas vel acquirat, deinde ut quasdam idearum relationes percipiat, et ut quædam principia ipsi nota ad particularem aliquam materiam applicet, et exinde particulares aliquas conclusiones inferat. Certe si operationes istæ a mente discipuli non fiant, hic nihil addiscet unquam; nec magister, quantumvis inclamet, doctrinam suam illi tradere alio modo aut communicare poterit. « Sicut medicus, ita præclare s. Thomas, dicitur causare sanitatem in infirmo, natura operante; ita etiam homo dicitur causare scientiam in altero, operante ratione illius: et hoc est docere (1). » Pone nunc, discipuli rationem non esse potentiam activam, sed mere passivam, ut ponitur a rigidis traditionalibus, quid, quæso, poterit ex instructione proficere?

Prob. 2^m primo ex iis, quæ supra diximus de ideis. Ut enim discipulus doceatur, docentis verba intelligat oportet. Nequit autem ejus verba intelligere, nisi ideas rerum quæ per ea significantur, jam mente teneat.

Præterea, si prima rationis principia discipulus ignorat, ac certa non habet, conclusiones addiscere nunquam poterit. At prima principia nec addisci possunt, nec certa haberi, nisi per idearum intuitionem. In his enim prædicatum ex ipsa subjecti notione eruitur; atque ideo evidentissima sunt ac certissima, quia prædicatum quod in iis est, de ipsa subjecti ratione esse immediate cernitur. Ergo nisi hæc principia per se addisceret mens, addiscere ea nunquam posset per disciplinam.

462. PROPOSITIO III. *Falso asseritur, revelationem traditione*

(1) Quæst. disp. Q. De Magistro, art. I. Cf. quæ de hac re pulcherrime disputat S. Augustinus in libro : *De Magistro*.

communicatam physice necessariam esse, saltem ad ideas ac veritates quæ ad ordinem seu religiosum seu moralem pertinent, assequendas.

Nam 1^o etiamsi ita mitigetur traditionalismus, superest adhuc inconueniens supra notatum (461, 2^o), hominem in rebus maximi momenti, in errorem necessarium trahi, si instructio socialis errorem veritatis loco ipsi primo communicet. Et quoniam longe maxima hominum pars, juxta hos auctores, primas veritates quas ab instructione sociali recepit, nunquam transcendit, inferendum est, homines sane plurimos, toto vitæ suæ tempore, in errore necessario defixos manere.

2^o Stat et illud, quod postremo loco in præcedenti propositione animadvertimus (461, 4^o): non posse hominem instructionis adminiculo ad hasce ideas ac veritates adduci, nisi ejus ratio virtute sibi propria et eas ideas efformare, et eas veritates apprehendere queat. Quare qui dicit, hominem instructionis ope ad has veritates pervenire posse, is fatetur, esse in homine vim idoneam ad has veritates suis propriis operationibus attingendas.

3^o Cum ii quibuscum nunc agimus, naturalem homini virtutem largiantur, qua possit absque disciplina ideas universales primitivas acquirere, et principia quæ ex iis emergunt, cognoscere, nulla ratio est cur negent, eum ad præcipuas ac fundamentales veritates, sive religiosas sive morales, per hanc eandem virtutem posse pertinere.

463. Etenim ad cognoscendam supremi alicujus Numinis existentiam, hæc tria requiruntur ac sufficiunt: idea primitivæ entis, causæ et effectus, et ex his principium causalitatis; deinde hujus mundi conspectus; ac demum impulsus aliquis ad reflectendum in ea quæ videntur, et ad eorum causam requirendam.

Atqui juxta adversarios, absque positiva revelatione humanaque traditione, homo primitivas ideas acquirere potest, et principium causalitatis exinde elicere; potest quoque mundum conspicere, ejusque ordinem ac pulchritudinem intelligere. Hæc autem pulchritudo ipsa, aut certe insolita

quædam phænomena, aut vitæ necessitates ac pericula, non modo ad sui rerumque causam inquirendam exstimulare hominem possunt, sed vix fieri potest, ut illum ad hanc inquisitionem non exstimulent atque adigant. Ergo ratio, per ea quæ adversarii ipsi concedunt, in supremi Numinis cognitionem devenire potest. Fateor equidem, primitivam hanc cognitionem fore valde imperfectam; fateor quoque, eam a paucis perfici ulterius posse, absque externo aliquo adjuvamento; ac vix quemquam idoneum fore, ad explicitum Entis infiniti conceptum (O. 362) ab omni errore immunem, absque divinæ revelationis præsidio, sibi comparandum (L. 601). Ast ad aliquam Dei ideam rationem individualem suis viribus pervenire posse, negari nequit nisi ab eo qui vim omnem rationi denegaverit.

464. Idem dicendum de primis ac fundamentalibus moralis ordinis ideis ac veritatibus. Ad eas assequendas veritates, quæ deductione plus minusve implexa ex hisce primis inferuntur, profecto quilibet homo per se non sufficit; multo minus ad perfectam morales legis cognitionem assequendam. Sed ad prima moralitatis principia cognoscenda cujuslibet hominis ratio, quæ primis ideis primisque theoreticis principiis ditata sit, sufficere dicenda est.

Idea enim ordinis una est ex primitivis ideis: hanc ergo ideam ratio assequi potest, fatentibus adversariis. Potest ergo ratio entium ordinem cognoscere; v. gr. parentes esse supra se; cæteros homines natura sibi æquales; rerum omnium auctorem supra omnes. Quod si ordinem entium cognoscit, cognoscet quoque, saltem ubi deliberandum ipsi sit quid agere oporteat, cognoscet, inquam, actiones quasdam juxta ordinem, quasdam contra illum esse. Ad plures enim cognitiones hujusmodi satis est facilis aliqua idearum comparatio, et ratiocinandi facultas. Quum autem cognoverit aliquid juxta ordinem, aliquid contra esse, nil facilius, nil magis in promptu positum deductione illa: ordinem a se in suis actionibus servandum esse. Sane plurimæ rerum naturalium theoreticæ cognitiones primis moralibus cognitionibus sunt longe difficiliore. Si itaque ad illas rationem per-

tingere posse adversarii fatentur, multo magis fateri debent, has extra ejus naturalis activitatis limites non esse constitutas.

465. PROPOSITIO IV. *Dici nequit, verbum externum, aut signum quodcunque arbitrarium, esse conditionem necessariam ad hoc, ut homo ad expeditum suæ rationis usum, seu ad claras distinctasque cognitiones perveniat.*

Qui ita sentiunt, revera traditionalismi doctrinam in aliam immutant, ac fere in omnibus deserunt, ut facile attendenti patebit. Nihilominus etiamsi traditionalismus hoc pacto mitigetur, probari a philosopho nequit.

Nam 1^o falsum est, verbum aut aliud quodvis arbitrarium signum, esse conditionem sine qua ideæ claræ acquiri non possint. Etenim omne signum arbitrarium, ut supra vidimus (460, 5^o), ad ideas in mente excitandas esset prorsus inutile, nisi et mens vi sibi propria instructa esset qua ideas efformare posset, et objectum ab ipsa concipiendum per signum aliquod naturale aliquo modo determinaretur, eique offerretur. Jam quis probare poterit, mentem humanam, si ad certa aliqua objecta contemplanda alterius monitu dirigatur, eorum ideas formare posse; ex eorundem vero objectorum spontanea inspectione, aut etiam fortuito occursu, non posse? Si puer æqualitatis notionem efformare potest, quum plura objecta æqualia ipsi a magistro successive offeruntur, cur non poterit id ipsum, si plura objecta æqualia sub ejus aspectum successive incidant, ejusque ad se attentionem trahant? Totum discrimen hoc erit, quod in primo casu puer et ideam æqualitatis format, et vocis qua hac exprimitur significationem addiscit, in altero vero solam efformat ideam, quin de modo illam significandi cogitet.

2^o Ut puer ex audito vocabulo ideam definitam adipiscatur, necesse ne est, ut id quod vocabulum significat, obscure cognoscat, an secus? Si hoc postremum dicatur, nullo modo verbum potest esse conditio, ut clare cognoscatur id quod nullatenus antea cognoscebatur. Patet ex dictis in propositione prima (460). Si vero dicatur, obscure saltem esse cognoscendum id quod vocabulum significat, primo gratuito

affirmabitur, omnem hominem omnia quæ per vocabula significari possunt, obscure cognoscere; nec gratuito solum, sed etiam falso: hæc enim assertio aliter defendi non poterit, quam theoriis ontologismi, aut idearum innatarum, in medium adductis. Deinde si humanæ menti obscura hæc cognitio spontanea esse dicitur, inferri debet, non esse amplius illi physice impossibile, ut sine externo adjumento cognitiones claras adipiscatur. Ad hoc enim unice necesse est, ut mens in directam illam cognitionem reflexione reducat; quod quidem, cum a voluntate pendeat, erit ad summum moraliter tantum impossibile. Quanquam neque hæc moralis impossibilitas, quoad omnes cognitiones, admitti posset; sæpenumero enim reflexio moraliter possibilis esset; ut quum validæ sensationes, aut pluries instauratæ, ad reflectendum moverent; imo vero quandoque foret moraliter necessaria, ut quum non modo stimulus ad reflectendum vehemens, sed etiam facilis et grata reflexio esset.

Quod de ideis claris diximus, de certa quoque veritatum cognitione dicendum. Si nulla neque vaga veritatum cognitio supponenda dicitur, repugnat claram earundem cognitionem per verbum acquiri. Si dicitur supponenda, ea gratuito ac falso humana mente supponetur; ac præterea cognitio certa veritatis non physice impossibilis, sed moraliter tantum, imo sæpe moraliter possibilis, atque adeo necessaria in pluribus foret.

3^o Cæterum, ut ex dictis (367) manifestum est, naturale incitamentum ad intellectivæ virtutis exercitium est sensatio ac phantasma. Per hoc enim offertur intellectui objectum, circa quod sua virtute operans, rationem entis quæ in eo est, apprehendit. Non enim intellectus potentia est mere passiva, in qua ab externo agente omnia fiant, sed est potentia etiam activa (374), quæ hanc unice conditionem expectat, ut objectum sibi, prout convenit, proponatur; quo proposito; illico juxta propriam naturam agit.

Simili modo, naturale requisitum ad veritatis apprehensionem ac judicium est evidentia indentitatis inter binas ideas: quæ evidentia non potest non affulgere menti, si quas-

dam ideas præsentibus habeat, et ad reflectendum se in illas utcunque excitetur.

466. PROPOSITIO V. *Vocabula, quanquam ad intellectus perfectionem promovendam sint summopere utilia, non sunt tamen illi ad cogitandum absolute necessaria.*

Prima pars non indiget probari multis. Præcipuæ vocabulorum utilitates hæ sunt :

1° Cum intellectus noster phantasmatibus indigeat, quibus juvetur et quasi sustentetur dum cogitat, quo magis phantasmata quibus utitur, sunt clara ac facilia, quo magis simplicitatem cum varietate, et uniformitatem cum flexibilitate conjungunt, eo facilius, promptius, celerius mentis operationes peragantur necesse est. Atqui vocabula præ omnibus phantasmatibus his dotibus mirabiliter excellunt. Hinc cætera phantasmata rebus abstractis difficilius applicari possunt; analysi, comparationi et compositioni idearum, ratiocinationi præsertim, ægre deserviunt; ac menti, dum de insensibilibus cogitat, non tam præsidium, quam divitula suppeditant. Ast hæc omnia vitantur, incommoda per vocabulorum usum. His adde, quod plura sunt quæ aliis phantasmatibus, præterquam vocabulis, repræsentari nequeunt : ut sunt v. gr. numeri, si primos excipias.

2° Memoriae maxime juvant vocabula. Nam et facile retinentur, et facile inter se associantur, et facile reproducuntur; ita ut paucis sonis memoria servatis, multa atque adeo plurima memorari possint. Nam non ideas tantummodo, sed et judicia multa, et prolixas ratiocinationum series pauca vocabula, imo una quandoque vox complectitur, et compendio in memoriam revocat.

3° Vocabula vere inter signa principatum obtinent. Sunt enim signa omnium expeditissima, ac facillime adhibentur; et pro re quacunque, sive concreta sive abstracta pro substantiis ac pro earum modis et actionibus, pro quavis animi seu actione seu affectione, pro quacunque temporis differentia audientibus supponi possunt.

4° Demum omnes scientiæ thesauri quos sapientum industria congregat, et quæcunque, sive humano sive divinotesti-

monio cognoscenda sunt, per vocabula præsentibus communicantur et ad posteros transeunt.

467. Secunda pars 1° colligitur ex dictis (465). Patet enim, nos cogitare posse, antequam vocabula addiscamus.

2° Intellectus noster multarum rerum, quas sive sensu usurpavimus sive imaginatione composuimus, ideas habet claras oppido atque distinctas, iisque in suis operationibus utitur, quin tamen vocabula quibus illæ significantur, cognoverimus.

3° Sæpe recordamur quorundam conceptuum, quin verba iis significandis attributa memoria retineamus. Unde fit, ut circumlocutiones aliquas quærero debeamus, quum ii conceptus manifestandi sunt.

4° Quandoque adeo velox ac fulguri similis est apprehensio nostra, ut impossibile sit, eam vocabulorum seriem, quæ ad illam exprimendam in imaginatione ordinate reproducenda fuisset, adeo celeriter fuisse productam. Ita contingit v. gr. quum rei quam apprehendimus, magnitudine percipimur, aut quum aliquam ratiocinationem audientes, extemplo vitium in ea latens intelligimus; aut quum, proposita aliqua objectione, uno instanti percipimus unde ejus solutio petenda sit; aut quum, audita aliqua propositione, ad ultimas usque ac remotissimas conclusiones quæ ex ea deduci possunt, animus sese porrigit; et in aliis plurimis.

5° Plures experimur affectiones internas, quas reflexione adhibita, non modo sine vocabulis cogitamus, sed nec vocabula invenire possumus quibus ea significemus, nisi illud : *nescio quid*. Appetitus item ac voluntatis inclinationes et actus, sine ullius vocabuli phantasmate, mente relegimus.

Est itaque manifesta assertionis nostræ veritas.

468. Disquisitio illa, utrum homines quin prius articulas voces audierint, loquelam aliquam invenire possint, ad controversiam cum traditionalibus nullo modo pertinet. Etenim etsi quis hoc neget, nihil exinde traditionales lucrabuntur. Idcirco in quæstione hac immorari non est animus.

Cæterum animadverti debet, 1° quæstionem hanc non esse de eo quod factum sit, sed de eo quod sub hypothesis quadam

possibili fieri potuisset. Congruum enim omnino fuit, ut primi humani generis parentes loquelæ donum a Deo immediate acciperent: atque ut certum haberi debet, eos divino magisterio edoctos loqui didicisse.

2^o Fieri potest ut homines v. gr. duo, qui aliorum hominum consortia nunquam frequentarint, nec loquelam audierint, animadvertentes ex mutuo sui ipsorum aspectu, externa quædam internarum affectionum signa ex ipsa nostra natura sponte in nobis erumpere, alter alterius affectiones paulatim cognoscant; deinde cognoscat uterque, se ab altero cognitum fuisse; ac demum sive unus sive alter desideret et conetur ut ab altero cognoscatur. Quisque videt, in hunc finem signa naturalia ab iis voluntarie adhiberi posse, et hoc pacto naturalia signa aliquo modo fieri artificialia; progressuque temporis aliquos gestus ac motus, atque adeo imitativas aliquas voces, ut signa seu rerum externarum seu affectionum internarum, ab iis usurpari (1).

3^o An solitarii hujusmodi homines a vocibus imitativis ad vocabula ex conventionem significantia transitum facere valeant, id in utramque partem cum aliqua probabilitate disceptari posse existimaverim (2).

ARTICULUS III.

Satisfit objectis.

469. Traditionales argumenta depromunt

I. ex factis.

Nam 1^o constat, inquit, hanc esse naturæ nostræ legem, ut ad rationis usum homo perveniat, rationis alterius quæ formata fuerit, auxilio.

2^o Quicumque, quavis de causa, sociali institutione caruerint, usu quoque rationis carere reperti sunt. Id videre licuit in pueris quibusdam, qui extra hominum societatem quandoque adoleverunt; idemque perspicimus in surdo-mutis, qui

(1) Cf. Galluppi. *Elementi di Filosofia*, vol. II. c. III, § 28 seq.

(2) Negativæ opinionis momenta reperies apud Cl. Maret: *Philosophie et religion*, et apud R. P. Dmowski: *Institutiones philosophicæ*. Psych. c. III. Affirmativam tuetur R. P. Chastel: *De la valeur de la raison hum.* II p.

antequam instruantur, omni idea intellectuali ac morali carent.

470. Resp. ad 1^m *Dist.*: Homo ad rationis usum pervenit alterius rationis auxilio; i. e. ad rationis actus quoscunque, *nego*; ad rationis actus perfectiores, *subd.*: ita ut rationis alterius auxilium sit vera cognitionum causa, *nego*; ita ut institutio rationi auxilietur ad modum monentis ac dirigentis, ut propriis viribus ad quasdam cognitiones perveniat, *conc.* Hæc omnia supra explicata sunt.

Ad 2^m *Dist.*: Hi de quibus sermo, carebant usu rationis, i. e. omnibus omnino ideis rationis, atque omnis veritatis cognitione, *nego*; carebant ideis Dei et moralium officiorum, *subd.*: ex aliqua causa accidentali, *trans.*; ex nativo rationis humanæ defectu, *nego*.

471. Quod attinet ad particularia facta, quæ obijci solent, notandum est 1^o facta hæc esse pauca, nec criticæ libra satis ponderata. Quis enim tuto æstimare possit, illorum puerorum internum statum vel satis exploratum fuisse, vel satis potuisse explorari? Non sunt igitur facta hæc tanti ponderis, ut tota de rationis humanæ viribus theoria iis superstrui queat.

2^o Fieri non posse, ut positis sensationibus, aliquas ideas, v. gr. entis, unitatis, multitudinis, æqualitatis, similitudinis, causæ, effectus, aliasque hujusmodi ii non essent assecuti; id quod nonnulli eorum satis ostenderunt. Libenter tamen concedam, hosce homines ita eas ideas possedissee, ut non idcirco easdem sub abstractissima illa forma, reflexa cognitione, statim deprehenderent. Nam rudes omnes, etiamsi a pueris loqui didicerint, vix unquam communissimos hosce conceptus a concretis, a quibus eos abstrahunt, reflectendo sejungunt.

3^o Si ideis religiosis ac moralibus carebant, id non tantummodo ad instructionis defectum, sed potissimum ad accidentalem aliquam causam referri posse ac debere, ut ad idiotismum iis peculiarem, vel ad defectum temporis convenientis, vel quia adhuc in ea adjuncta non inciderant, in quibus hujusmodi ideæ sponte progerminant.

Hoc unum ex hisce factis concludendum est: institutionem

socialem rationis progressibus summopere utilem esse, et quoad aliqua necessariam : non autem, ante illam ac sine illa, rationalem nullam cognitionem haberi posse.

472. De surdo-mutis vero hæc jam certa sunt.

1° Ante educationem ideis primitivis ac fundamentalibus eos non carere.

2° Non sine exaggeratione dictum fuisse, eos nullam ideam religiosam et moralem spontanea rationis operatione fuisse adeptos.

3° Eos instrui per signa maxime naturalia, ac certe per hæc ante omnia alia signa.

4° Si diu simul degant aliqui surdo-muti, eos signa quædam artificialia ex se ipsis invenire, ut se mutuo intelligant.

Quæ omnia evertunt funditus traditionalium asserta.

473. II. Proferunt analogias quasdam vis intellectivæ cum viribus corporeis. Etenim vires omnes quæ in rerum natura vigent, externo aliquo incitamento egent, ut in actum exeant. Itaque vis quoque intellectiva, ut agat, eget impulsu ab alterius ratione accepto.

Resp, *Omitto ant. Nego conseq.* Primo quidem, quia intellectus est vis prorsus diversi generis a viribus corporeis. Deinde vero quia etsi intellectiva vis indigeat ut aliquo modo ad actum determinetur non tamen inferri potest, id quod illam determinat, socialem institutionem esse oportere. Potest enim sufficienter excitari ipsa magistra natura, sensatione mediante. Ac revera nullum aliud est aut esse potest intellectivæ virtutis immediatum determinativum, ut supra dictum est (460, 3°; 465).

474. III. Arguunt ex intellectualium operationum analysi.

Homo, inquit, sine verbo vel signo, et consequenter sine alterius institutione, cogitare nequit. Nam

1° Constat hominem sua verba cogitare, antequam suas cogitationes verbis eloquatur.

2° Hinc nobiscum ipsi et cum Deo taciti colloquimur; sine verbo autem, etiamsi maxime velimus, cogitare non possumus.

3° Philosophorum communis doctrina est, λόγος, seu *verbum* mentis, essentiale esse cogitationi.

4° Sine verbo ideæ intellectuales sunt vagæ et indefinitæ, ac solum per verbum et in verbo percipi possunt : tanta autem idearum varietas et multitudo, nisi verba accedant, est veluti atomorum fluctuans chaos.

5° Demum humana cogitatio humanæ naturæ congruat necesse est. Humana autem natura spiritu constat et corpore. Ergo humana quoque cogitatio spiritali elemento et sensibili coalescere dicenda est. Sensibile autem elementum est verbum.

475. Resp. *Nego ant.*

Ad 1^m *Dist.* : ut plurimum, et ex assuetudine, *conc.*; semper et ex necessitate naturali, *nego*.

Ad 2^m Primam partem *dist.* ut supra : alteram *nego*. Vide quæ hanc in rem paulo ante diximus (467).

Ad 3^m *Dist.* : Essentiale est cogitationi verbum, i. e. conceptus (374, seq.), verbum videlicet *nullius linguæ*, ut dicit s. Augustinus (1), *conc.*; vocabulum exterius proferendum, *nego*.

Ad 4^m *Nego omnia*. Metaphoræ magis minusve pulchræ argumentorum munere fungi non possunt. Noto quoque illud; adversarios hoc etiam peccare, quod perpetuo ideas assumant, ut id quod a mente intelligitur, etiam in directa cogitatione.

Ad 5^m *Negatur* assertio postrema. Elementum enim sensibile in humana cogitatione est phantasma aliquod (400, seq.), quodcunque illud sit, non autem necessario phantasma vocabuli.

Et de his hactenus (2).

(1) De Trin. Lib. XV, c. XI.

(2) Plura reperies in opere P. Chastel supra citato.

CAPUT X.

DE JUDICIO.

ARTICULUS I.

Sitne judicium apprehensio.

476. Humanæ cognitionis perfectio judicio mentis, tam immediato, quam mediato, continetur. Post apprehensionem itaque de altero hoc mentis actu aliqua nobis dicenda sunt, ut intellectus humani analysim, quantum satis est, absolvamus. Quærendum primo, an judicandi actus ab apprehensione vere distinguatur.

Veteres omnes, cum Aristotele, hanc distinctionem ratam habuere, ac judicium in *compositione* ac *divisione* eorum quæ apprehensa essent, constituerunt. Eandem distinctionem cartesiana schola retinuit, licet erronee de judicio senserit, ut postea dicetur. At Lockius judicium in apprehensione convenientiæ aut oppositionis inter ideas positum arbitratus est; isque hanc opinionem vulgarem fecit (1). Hanc enim deinde Condillachius (2), ac sensistæ secuti sunt: nec desunt inter philosophos, qui cum a sensismo sint quam maxime remoti, hanc nihilominus de judicio opinionem sectentur. Nobis opposita sententia tenenda videtur.

477. PROPOSITIO I. *Mentis judicium situm non est in apprehensione convenientiæ vel discrepantiæ inter ideas.*

Sane 1^o actus causa, seu motivum, ab hoc ipso actu differt. Atqui apprehensio convenientiæ idearum vel discrepantiæ, judicii causa seu motivum est. Revera, quum a nobis quæritur, cur hoc aut illud judicium protulerimus, respondere solemus: *quia sic mihi res videbatur esse*: videlicet: judicavi sic, quia percepi huic subjecto hoc prædicatum convenire. Ex hoc præterea aliquando errantes damnare solemus

(1) *De hum. intellectu*. Lib. IV, c. 1.

(2) *Art de penser*. I p., ch. VII.

ac vehementer improbare, quod de ignoratis judicium ferant: nihil enim, ut recte Tullius dicit, hoc est turpius, quam *cognitioni et perceptioni assertionem approbationemque præcurrere* (1).

2^o Constat ex dictis in logica (223, 3^o), consequentiam esse convenientiam vel discrepantiam extremorum inter se, quæ ex præmissis prodit et coram mente se sistit; consequentiæ autem intuitum esse rationem, cur judicemus in conclusione extrema inter se convenire. Hinc argumentum.

Apprehensio consequentiæ a conclusione differt, et non est judicium, sed judicii causa. Sed apprehensio consequentiæ est apprehensio convenientiæ vel discrepantiæ inter conclusionis terminos. Ergo aliqua apprehensio convenientiæ idearum vel discrepantiæ judicium non est.

3^o Certum est apud omnes, judicium posse esse imprudens ac temerarium. Hoc et propria cuique experientia non raro suavit, et sapientum monita, ipsaque logicæ disciplinæ præcepta frequenter inculcant. Est autem temerarium judicium, quum sine sufficienti examine judicamus, aut quum levibus motivis innixi ita judicamus, ac si res certa esset (L. 400). Hinc monita illa: quum ratio clara non apparet, judicium non esse properandum: rem prius esse mature perpendendam: in rebus dubiis prudens esse assensum mentis cohibere. Jamvero si judicium est convenientiæ vel discrepantiæ perceptio, nullum judicium temerarium esse posset, ac salubria hæc monita omni sensu carerent.

478. Probatur 1^{um} Nam perceptio convenientiæ vel repugnantiae semper est proportionalis vi motivorum, quæ menti apparent; atque hinc si motiva nulla suppetunt, nulla est perceptio; si dubia sunt oblata motiva, convenientiam ut dubiam percipimus; si omnino firma, percipimus certam. Nunquam itaque convenientia aut repugnantia idearum absque examine sufficienti et ex levibus motivis percipi poterit, nec quum dubia est, ut certa percipietur. Itaque temeritas in perceptione nulla esse potest.

Brevius. Convenientiam aut discrepantiam idearum vel

(1) *Acad.* I, c. XXII.

apprehendo ut certam, vel ut dubiam, vel nullatenus apprehendo. Si ut certam apprehendo, nulla est in hoc temeritas; idem dicendum si apprehendo ut dubiam; si vero nullatenus apprehendo, juxta sententiam quam refellimus, nullum est judicium. Ergo ex hac sententia inferitur, judicium temerarium nullum esse.

479. Probatur 2^a. Si judicium est perceptio convenientiæ vel discrepantiæ, monita illa ita essent explicanda: *quum ratio clara non apparet, perceptio properanda non est*. Si diceres: perceptio non potest properari; factum saltem enuntiares, cæteroqui manifestum. At quum dicis, perceptionem properandam non esse, exhibes ut prudentiæ præceptum id quod ex natura mentis necessario consequitur.

Antequam convenientiam idearum percipias, res mature pendenda est. Hoc quoque quum dicis, factum enuntias, nec semper verum.

In rebus dubiis prudens est perceptionem mentis cohibere. At in rebus dubiis quid possum percipere, nisi rem dubiam? An hanc ipsam perceptionem suspendere teneor? An si eam non suspenderem, temere agerem? Imo vero in rebus dubiis non suspendenda perceptio est, sed si res id mereatur, curandum ut ulterius promoveri possit.

Hæc itaque omnia luculenter docent, ex communi hominum sententia, judicium tunc temere proferri, quum judicamus de convenientia quam non percepimus; insuper judicium esse aliquid quod perceptionem convenientiæ vel discrepantiæ consequitur, aut vero consequi debet, ut rectum sit; ac proinde judicium ab hac perceptione omnino distinguui.

480. Fortasse dices: judicium temerarium juxta oppositam sententiam habetur, quum voluntas intellectum applicat ad unius tantum partis motiva consideranda, et ab alterius motivis avertit. Tunc enim judicat incognita causa.

Respondeo, hoc effugium, ex iis quæ diximus, jam esse præclusum. Nam intellectus ad unam partem conversus percipiet quantum percipere potest, certa ut certa, dubia ut dubia, nihil ubi nihil est quod suadeat. Nulla proinde ex

hoc habebitur temeritas, nullumque temerarium judicium, nisi aliquid aliud accedat. Etiam si vero nihil aliud accedat, erit tamen semper culpabilis voluntas, si incumbat illi officium, ut alterius quoque partis motiva consideret; sed hæc culpa sola judicium temerarium non erit.

481. 4^o Probatur adhuc propositio ex eorum consideratione judiciorum, quæ *imperata* dicuntur. Esse judicia quædam a voluntate imperata, nemo dubitat; actus fidei supernaturalis est hujusmodi. Cæterum magnum, atque adeo maximum voluntatis in intellectus judicia esse influxum, fatentur omnes.

Dico igitur: si judicium perceptio est, judicia imperata nulla sunt. Voluntas enim flectere quidem potest intellectum ad inquirendum an binæ ideæ convenient, nec ne, ad attendendum, ad reflectendum; potest quoque a quibusdam percipiendis ipsum avertere; at efficere nequit imperio suo, ut percipiat quidpiam, nisi quod ipsi propositum sit. Perceptio autem eorum quæ intellectui proponuntur, ex natura ipsa intellectus consequitur: ac propterea ipse percipiendi actus nunquam est imperatus secundum se. Ex quo concludendum, inquisitionem intellectus, ejusque attentionem ac reflexionem, vel etiam horum defectum, imperata esse posse; at judicium nequaquam, nisi judicium sit aliquid perceptioni superadditum.

482. 5^o Adhuc: si judicium perceptio est, nullum judicium falsum esse posset. Perceptio enim, etiam quæ comparativa est, ex se falsa esse nequit, ut in logica probatum est (L. 380, 5^o). Judicium itaque, si esset perceptio convenientiæ idearum, omnes perceptionis proprietates participaret, ac propterea nunquam ex se falsum esset. Non posset autem esse falsum per accidens; quia perceptio non est falsa per accidens, nisi per alicujus judicii influxum (L. 384, 2^o). Nisi ergo sit aliquod judicium falsum per se, nulla potest in perceptione esse falsitas per accidens. Igitur judicium, si perceptio est, nullo modo falsum esse unquam posset.

483. 6^o Probatur quoque conclusio nostra ex notionibus

communiter receptis, de variis mentis statibus respectu veritatis. Et re quidem vera.

1° Ignorantia est status mentis, in quo objecti cognitione caret (L. 396). Qui itaque idearum seu convenientiam seu discrepantiam non percepit, in ignorantia versatur, saltem partiali. Atqui cum ignorantia hac consistere potest iudicium. Possunt enim homines ex præsumptione iudicium ferre de iis quæ ignorant, nempe de iis quæ utrum convenient, nec ne, non perceperunt.

2° Dubium est suspensio intellectus inter utramque contradictionis partem (L. 397). At profecto non perceptionis suspensio est, sed alterius actus qui perceptionem ex se prærequirit, videlicet assensus. Hinc quum dubium in quo versamur, significare volumus, dicere solemus: *non video quid sit mihi sentiendum: nescio cui parti assentiar, quia neutrius veritatem apprehendo, ut par esset ad assensum adhibendum*. Quis autem dixerit: *non video quid sit mihi apprehendendum*; aut: *nescio quam partem percipiam*? Notabis quoque iterum in expressione dubii, quod supra statuimus (477, 10), apprehensionem non ut iudicium ab hominibus haberi, sed ut iudicii motivum.

3° Opinio est assensus intellectus, cum formidine tamen de opposito, et hæsitatione quadam (L. 398). Opinio autem est iudicium. Ergo iudicium non apprehensio est, sed assensus. Ac si quis assereret, assensum ipsum ab apprehensione non differe, inferemus, opinionem a dubio positivo non distingui, ac proinde opinionem iudicium non esse: in dubio enim positivo mens tam unam partem quam alteram apprehendit cum formidine et hæsitatione.

4° Certitudo demum habetur, quum mens objecto firmiter adhæret. Certitudo autem profecto est iudicii firmitas. Igitur primo, iudicium est adhæsiō mentis. Deinde mens, quum certa est, objecto adhæret, cognito ne an incognito? Sane cognito. Cuinam vero adhæret objecto? Non alteri puto, quam alicui enuntiabili, videlicet alicui convenientiæ vel discrepantiæ idearum. Adhæret autem objecto cognito. Ergo convenientiæ vel discrepantiæ cognitæ, seu perceptæ. Ergo

convenientiæ vel discrepantiæ perceptio adhæsiōnem seu iudicium natura præcedit, ac proinde ab illo differt.

Quod si adhæsiōnem dicas perceptionem esse, ego duo quæram abs te: primo quid sit firmitas perceptionis: deinde quid concipere debeam, quum dicis mentem percipere firmiter convenientiam perceptam.

484. 5° Postremo apprehensionem convenientiæ et discrepantiæ a iudicio distingui, aperte colligitur tum ex nominibus quibus utramque operationem homines significant, tum ex utriusque expressione apud omnes recepta.

Apprehensio et iudicium voces translata sunt. Cur porro apprehensionis vocabulum primæ mentis operationi attributum sit, ex alibi dictis colliges (303, 2°). Iudicium autem est a jure dicendo. Differt ergo prima mentis operatio ab altera, ut actus quo aliquid manu arripimus, a iudiciali actu. Cur autem a iudiciali potissimum actu hujus operationis nomen genus humanum desumpsit, nisi quia omnes homines experiuntur, se non solum convenientiam aut discrepantiam idearum intelligere, sed etiam de hac ferre sententiam, quatenus ideæ subjecti attribuunt quod suum est, nempe prædicatum illi conveniens?

485. Iudicii expressio est propositio, qua unum esse dicitur alterum: *A est B*. Expressio vero perceptionis convenientiæ vel discrepantiæ, hæc est: *res mihi videtur ita se habere*. Quæ binæ loquendi formulæ sunt plane diversæ. Quanquam enim altera quoque locutio propositio sit, non tamen dicit rem ita se habere, sed exprimit solummodo iudicium de mentis statu.

Sedulo porro notandum est, locutionem hanc usurpari, non modo ut rationem reddamus iudicii nostri, sed in eum maxime finem, ut a iudicii expressione absteineamus. Frequenter enim dicimus, rem nobis ita videri, quum optamus ut cæteri intelligant, apparere quidem nobis motiva sufficientia ad iudicandum, nosque idearum convenientiam vel discrepantiam apprehendere; non audere tamen iudicium ferre, et quod percipimus ratum habere. Quomodo possent homines

significare manifestius, se apprehensionem a iudicio distinguere?

Cætera quæ afferri possent, missa facio. Hæc paulo fusius persecutus sum, ut ostenderem controversiam hanc minime spernendam esse, sed in totam prope cognitionis humanæ theoriam radices suas agere; atque ex diversa eam dirimendi ratione pluribus aliis controversiis non modicam seu claritatem seu obscuritatem affundi.

ARTICULUS II.

Utrum iudicium sit actus intellectus, an vero voluntatis.

486. Considerandum secundo, ad quam facultatem iudicium pertineat. Asseruit Cartesius, ejusque sectatores cum Malebranchio constanter docuerunt, iudicium actum voluntatis esse. Quæ opinio communi philosophorum sententiæ, imo vero humani generis consensioni adversatur.

PROPOSITIO II. *Iudicium non est actus a voluntate elicited, sed ab intellectu.*

Dicimus iudicium esse actum ab intellectu elicited. Nam nemo inficiatur, et nos etiam in propositione præcedenti hoc supposuimus (481), et magnum esse voluntatis influxum in nostra iudicia, et multa iudicia esse actus a voluntate imperatos.

487. Probatur propositio.

1º Actus quibus tendimus in ens sub ratione veri, ad intellectum pertinent, quemadmodum actus quibus tendimus in ens sub ratione boni, ad voluntatem. Verum enim est intellectus objectum (387 2º), ac bonum voluntatis (O. 124.). Atqui iudicium in suum objectum tendit sub ratione veri. Nam iudicii objectum formale est enuntiabile (L. 144 2º), non ut bonum ac nobis conveniens, sed ut verum est, ac verum apparet. Ideo enim intellectus, saltem ex se, prædicatum subjecto conjungit, quia hoc est illi conforme (L. 375, 2º); atque hæc conformitas ipsi evidenter manifestatur (L. 685). Ergo.

2º Iterum, terminus actuum intellectus est ens in ipso intellectu exprimendum: terminus voluntatis est ens in seipso assequendum. Jamvero terminus iudicii est actus essendi

objectivus expressus per affirmationem (L. 153), non autem prosequendus per appetitionem. Affirmatio enim est verbum mentis. Verbum autem aliquid exprimat necesse est. Exprimat vero non rem, sed actum ejus, ut dictum est.

5º Ad hæc: in pluribus judiciis, evidentia coacti, affirmamus id a quo voluntas abhorret, quodque maxime cuperet non esse; et e converso negamus esse id quod vellemus esse. Ergo.

4º Demum, iudicium non esse voluntatis actum, ex ipsa ejus appellatione et expressione manifeste colligitur. Iudicii enim actus (484) non est velle aliquid, sed decernere ut cuique tribuatur quod ipsi debetur. Exprimatur vero iudicium per verbum indicativum *est* (L. 152); quod nullum animi motum in rem, nullamque voluntatis affectionem significat: hæc enim per alios verbi modos, atque adeo per alias orationis partes significantur.

488. Cartesiani, ut suum assertum suadeant, illud potissimum urgent: iudicium esse assensum quemdam propositæ veritati, vel a falsitate dissensum; assensum autem et dissensum idem esse, ac velle et nolle; esse igitur voluntatis actus.

Sed hæc argumentatio nullo negotio dissolvitur, *negata minori*. Assensus enim non solum ad voluntatem pertinet, sed etiam ad intellectum: qui duo assensus, licet hoc eodem nomine subinde appellari soleant, re tamen omnino discrepant. Assentitur enim intellectus, quatenus verbum affirmationis profert; voluntas vero, secundum quod sibi complacet in agendis. Falsum igitur, assensum ac dissensum idem esse semper, ac velle et nolle.

Imo si proprie loquamur, assensus de solo intellectu dicitur; voluntatis vere actus consensus appellari debet. Audi s. Thomam. « Assentire est quasi *ad aliud sentire*; et sic im- » portat quamdam distantiam ad id cui assentitur. Sed con- » sentire est *simul sentire*; et sic importat quamdam conjun- » ctionem ad id cui consentitur. Et ideo voluntas, cujus est » tendere ad ipsam rem, magis proprie dicitur consentire. » Intellectus autem, cujus operatio non est secundum motum

» ad rem, sed potius e converso, magis proprie dicitur assen-
» tire (1). »

489. Subdit Malebranchius, iudicium esse quietem quamdam desiderii sciendi aliquid. Desiderium autem et quies voluntatis sunt.

Resp. *negando maj.* Hujus desiderii quies non est iudicium, sed iudicii effectus qui in voluntate gignitur, partamque ab intellectu cognitionem et acquisitam iudicii certitudinem consequitur. Voluntas enim veritatis cognitionem ut quoddam humanæ naturæ bonum appetit, in eaque delectatur, ut de quovis alio bono quod cæteras hominis facultates perficiat. Potest tamen iudicium aliquo modo ipsius intellectus quies dici; non tamen iudicium omne, sed tantummodo iudicium certum. Non sane quia in intellectu sit desiderium, et desiderii quies quæ delectationem constituit; sed quia per iudicium certum cessat dubium omnino, comprimiturque omnis suspicio de opposito, quæ quasi quædam intellectus fluctuatio est: cessat item inquisitio de ea re, quæ est quidam motus ad veritatem. Si qua igitur est in iudicio quies, ea pertinet ad intellectum, et a voluntatis quiete prorsus differt.

ARTICULUS III.

De iudicii natura.

490. Nunc statuendum est, quænam sit iudicii natura. Id quod exsequemur, nam aliter fieri melius non potest, veterum, ac potissimum s. Thomæ, insistendo vestigiis.

PROPOSITIO III. *Judicium est actus quo mens binos conceptus in unum componit.*

Prob. 1^o ex humanæ mentis limitatione ac perfectibilitate. Hoc argumentum explicari clarius non potest, quam ipsi s. Thomæ verbis.

« Deus, ita s. doctor, sicut scit materialia immaterialiter » et composita simpliciter, ita scit enuntiabilia non per modum enuntiabilium, quod scilicet in intellectu ejus sit » compositio vel divisio enuntiabilium, sed unumquodque

(1) *Sum. th.*, I, II, p. q. XV, art. I, ad 5.

» cognoscit per simplicem intelligentiam uniuscujusque: » sicut si nos, hoc ipso quod intelligimus quid est homo, » intelligeremus omnia quæ de homine prædicari possunt.

« Quod quidem in intellectu nostro non contingit, qui de » uno in aliud discurrit, propter hoc, quod species intelligi- » bilis sic repræsentat unum, quod non repræsentat aliud. » Unde intelligendo quid est homo, non ex hoc in ipso alia » quæ ei insunt, intelligimus, sed divisim secundum quamdam successionem. Et propter hoc ea, quæ seorsum intelligimus, oportet nos in unum redigere per modum compositionis vel divisionis, enuntiationem formando (1). »

Et alibi. « Intellectus humanus necesse habet intelligere » componendo et dividendo. Cum enim intellectus humanus » exeat de potentia in actum, similitudinem quamdam habet » cum rebus generabilibus, quæ non statim perfectionem » suam habent, sed successive acquirunt. Et similiter intellectus humanus non statim in prima apprehensione capit » perfectam rei cognitionem: sed primo apprehendit aliquid » de ipsa, puta quidditatem ipsius rei, quæ est primum et » proprium objectum intellectus; et deinde intelligit proprietates et accidentia, et habitudines circumstantes rei essentiam. Et secundum hoc necesse habet unum apprehensum » alii componere et dividere, et ex una compositione et divisione ad aliam procedere; quod est ratiocinari (2). »

2^o Judicium est actus mentis. Ergo conceptum aliquem formet necesse est: omnis enim actus mentis terminum intrinsecum habet, qui ejus verbum est, seu conceptus ab ipsa expressus. Judicium est insuper actus unus et indivisibilis. Ergo uno tantum verbo absolvitur, unum conceptum format. At iudicii materia sunt duo conceptus, sine quibus iudicium esse nequit. Ergo conceptus unus in iudicio ex duobus efficitur: non commixtione certe vel confusione; nam uterque conceptus in iudicii enuntiatione distincte ponitur; ergo fit unus compositio.

3^o Judicium, si verum est, rem exprimit ut est in se, ac

(1) *Sum. th.*, p. I, q. XIV, art. XIV.

(2) *Ibid.* q. LXXXV, art. V.

per conceptus prædicati ac subjecti eam exprimit. Sed in re prout est in se, prædicatum et subjectum sunt unum et idem objectum; idem enim v. gr. est homo, et animal quod de homine prædicatur. Ergo iudicium ex conceptibus prædicati ac subjecti aliquo modo unum efficiat necesse est.

4^o Denique constat, plurimos esse conceptus, qui non uno tantum, sed pluribus iudiciis compositi sunt. Hujusmodi sunt conceptus omnes, quorum notas successivis apprehensionibus intelleximus, sive per experientiam, sive per auctoritatem, sive per scientiam.

Patet ergo quod assertum est.

491. Fortasse objicies; non omne iudicium compositionem videri; iudicium enim negans non componit conceptus, sed separat, ac proinde potius divisio est; quemadmodum etiam a veteribus appellabatur.

Respondendum, iudicium considerari posse dupliciter, scilicet et secundum se, et secundum objectivas rationes, quas complectitur. Si primo modo consideretur, ut psycholice considerari debet, semper est conceptuum compositio; semper enim iudicium fit per comparisonem conceptuum, semperque uni conceptui conceptum alterum sive positivum sive negativum adjungit; qua de causa in logica diximus, iudicium omne negativum ad affirmandi actum reduci (L. 142). Si vero iudicium consideretur secundum rationes objectivas, quæ sunt ejus materia, quandoque compositio nuncupatur, quandoque divisio. Compositio quidem, quum res quarum conceptus comparat, objective conjunctas esse decernit, divisio vero quum affirmat esse sejunctas.

492. Facile nunc intelliges hæc quæ subjicimus.

1^o Forma compositionis quæ fit in iudicio, est expressio actualitatis rei. Iudicii enim forma in propositione exhibetur per copulam, cujus proprium est, ut actum per modum actus significet (L. 153). Hinc mens in iudicio rem exprimit, ut aliquem essendi actum ex se propemodum emittentem, et in seipsa recipientem (L. 152).

2^o Hinc perspicies, qua in re verbum a mente judicante prolatur, differat a verbo mentis apprehendentis apprehen-

sione comparativa idearum identitatem vel discrepantiam. Quum enim hanc mens apprehendit, intuetur in uno conceptu habitudinem quam habet ad alterum, eamque habitudinem, ut rem quamdam, et ut aiunt, *in facto esse*, in semetipsa exprimit; quum autem judicat, eandem habitudinem exprimit ad modum actus, et ut dicunt, *in fieri*, unumque sic ex duobus conceptum format. Nempe ut alibi diximus (L. 152), apprehensio comparativa repræsentat identitatem per modum relationis, ut pictor; iudicium per modum actus eam reproducit, ut mimus. Notandum præterea, in iudiciis falsis multo magis utrumque verbum differre, ut in logica declaratum est (L. 701.).

3^o Ex his et illud intelliges: intellectivæ facultatis actum non esse solummodo apprehensionem, sive simplicem sive comparativam, sed etiam apprehensorum compositionem. At poteritne compositio hæc dici cognitio? Poterit sane, si cognitionem latissime sumas pro actu quo mens aliquod verbum exprimit; non autem si cognitionis nomine apprehensionem intelligas. Hinc vides cognitionem eo sensu acceptam latius patere, quam apprehensionem.

4^o Iudicium est actus reflexus: nam ut ideæ comparentur, et ad invicem ordinentur, intellectus in suas ideas reversio necessario requiritur.

5^o Intellectus, quantum est ex se, ad judicandi actum determinatur ab apprehensione identitatis vel discrepantiæ inter ideas.

6^o Rerum determinatarum conceptus formantur primo per iudicium. Nam id quod intellectus in rebus primo concipit, est ratio indeterminata entis; postea vero peculiarium rerum determinationes concipit. Necesse est ergo, ut secundas hasce notiones primæ illi conjungat.

7^o Omnes ideæ distinctæ iudicium supponunt. Ideæ enim distinctæ fiunt considerando singillatim objecti notas, per analysim seu abstractionem, easque iterum conjungendo, ut totum objectum repræsentent.

ARTICULUS IV.

* *An omne iudicium sit ex idearum comparatione.*

495. Sequitur ut videamus, an iudicium omne legitimum idearum comparationem, et identitatis vel discrepantiæ perceptionem supponat. Negavit hoc Reidius ejusque schola; cujus opinionem alii quoque philosophi secuti sunt. Quorum sententia est, ut alibi diximus (L. 668), iudicia quædam primitiva omnibusque communia ex humana mente necessario erumpere, non vi experientiæ, aut immediati intuitus, aut ratiocinii, sed quadam naturæ instigatione et impulsu, quo ad assentiendum cogamur, etsi cur assentiendum sit non videamus. Hoc pacto existentiam identitatemque proprii subjecti, et corporum existentiam, ac generatim existentiam substantiæ, realitatem quoque internarum affectionum, et sensuum ac memoriæ veracitatem, causalitatis principium, ac prima principia moralitatis, plurimasque alias fundamentales veritates cognosci, seu potius credi naturæ nostræ testimonio: harumque veritatum collectione sensum naturæ communem constitui.

494. PROPOSITIO IV. *Nulla sunt aut esse possunt legitima mentis iudicia, quæ sine ulla convenientiæ vel discrepantiæ prævia perceptione, ex cæco quodam instinctu ponantur.*

Legitima iudicia voco, quæ non procedunt ex animi temeritate ac levitate, red recte et ordinate fiunt, et ut natura intellectus postulat.

Prob. propositio. Nam 1^o cæca hæc iudicia humanæ mentis naturæ prorsus repugnant. Mens enim humana est facultas intelligendi ac rationandi, ad hoc facta, ut a veritate moveatur ad actum; unde etiam quando credit, ideo credit, quia percipit esse credendum. At veritates illæ quas cæco iudicio amplecti dicimur, nullo modo a mente cognoscuntur, aut mentem movent; nam nec immediato patent intuitu, nec ratiocinio inferuntur, nec ita creduntur, ut prius cognosci queat sive cui credantur sive cur credendæ sint. Ergo cæca hæc iudicia mentis naturæ nullatenus congruunt.

2^o Eo vel magis, quod eæ veritates quæ sunt horum iudiciorum objectum, vitæ intellectualis, moralis ac socialis fundamenta sunt. Nonne absonum videtur, rationem ipsa sua fundamenta intelligere non posse? et quod hinc sequitur, omnem rationalem cognitionem rationali fundamento carere, ac in bruta quadam coactione inniti? Quis sibi poterit in animum inducere, Deum qui intelligentiam ac rationem homini tribuit, ut veritatem intelligeret, huic intelligentiæ ac rationi non esse largitum sufficientes vires, ad prima et fundamentalia humanæ cognitionis principia percipienda: ita ut pecudum more compellendi sint homines ad assensum iis adhibendum?

3^o Reidius ad hanc theoriam confugit, ut veritatem objectivam et cognitionum nostrarum certitudinem contra Humii et scepticorum conatus tutaretur. Sed theoria hæc contrarium potius effectum obtinet; nam et scepticis valida arma suppeditat, et omnia certitudinis propugnacula subruit. Si enim hæc enuntiata necessitate quadam naturæ recipiuntur, anne idcirco vera sunt? Utile est illa credere: sine hac fide societas stare non posset. Esto. Ergone utilitas veritatis norma erit? Aut timor exitii certitudinis motivum? Natura inquit, me propellit. Quid si in falsitatem te adducat? Nec ad Deum naturæ auctorem confugere juvat. Undenam enim novi, et Deum esse, et me esse a Deo, nisi per hanc fatalem iudicandi necessitatem? Patet itaque, actum esse de cognitionis certitudine, si hæc ejusmodi fundamento incumbit. Kantii systema nihil est aliud, quam reidiani instinctus determinatio ac systematica explicatio; nec non conclusionis ultimæ in ea latentis deductio, quæ est: conceptus iudiciaque nostra objectivo valore destitui.

4^o Denique et illud notandum est, quo ipsum hujus opinionis fundamentum evertitur, nulla nos necessitate premi, ut cæcum hunc instinctum admittamus. Etenim eæ veritates ad quas hic instinctus nos propellere debet, et in se sunt intelligibiles, et ab omnibus qui ratione utuntur, intelligi possunt.

495. Primo quidem certum est, eas veritates in se intelli-

gibiles esse. Sunt enim vel experimentales vel analyticae; et quaedam immediate evidentes, quaedam vero quae evidenti ratiocinio ex evidentibus seu principiis seu factis inferri possunt. Ut enim de exemplis supra allatis (493) tantummodo dicam, existentia proprii subjecti est iudicium experimentale immediatum, posito intimo sensu (L. 689, 2°). Corporum existentia et sensu et intellectu cognoscitur: ab intellectu autem per ratiocinium, ut supra dictum est (324). Alibi quoque ostendimus, et substantiae existentiam (O. 145, seq.), et internarum affectionum realitatem (L. 452), et sensuum ac memoriae veracitatem (L. 500, 591), et causalitatis effectum (O. 318), et propriam identitatem (190), et primum moralitatis principium, vel immediata evidentia fulgere, vel evidenter demonstrari posse. Ostendimus quoque, falsum esse praecipuum reidianae theoriae fundamentum, substantiam sive propriam sive corporum externorum, (O. 154, 2°), propriamque causalitatem sensu nullatenus attingi (O. 274).

496. Certum deinde est, huiusmodi veritates ab omnibus qui rationis sunt compotes, non instinctu caeco, affirmari, sed ideo affirmari, quia intelliguntur. Nam 1° quae sunt immediate evidentes, neminem latere possunt qui primas ideas adeptus sit; ratiocinia vero quae caeteras demonstrant, obvia sunt et in promptu posita, ut suis locis declaratum est.

2° His adde, quod occasiones eas veritates apprehendendi quotidianae sunt et obviae. Exercitatio autem ac repetitio actuum et facilitatem et celeritatem gignit agendi. Inde fit, ut homines in dies magis magisque exerciti, ea iudicia promptissime eliciant.

3° Ipse speculationis atque institutionis scientificae defectus, quanquam causa sit, cur quaedam notiones non satis distinctae a rudibus habeantur, nihilominus hoc habet utilitatis, quod plures amovet difficultates, quae ex ingenii excellentia, ex eruditione, ex alienorum errorum cognitione, menti studiis excultae se oggerere consueverunt.

497. Nec obstat illud, rudes vulgaresque homines haec principia distincte exponere, eorumque rationem reddere nescire; nec ab iis eruditos intelligi, quum principia eadem

propriis vocabulis distinctisque enuntiant. Etenim exinde solum inferri poterit, homines communiter quasdam veritates confuse percipere, non autem omni earumdem cognitione carere. Sane, alia est clara veritatis cognitio, alia distincta (L. 47; 1°, 2°). Clara est, quum et praedicati et subjecti ideas a caeteris mens discernit, agnoscitque eas convenire inter se non vero discrepare, aut vicissim; ac simul intelligit, rationem qua convenientia haec vel discrepantia constituitur, hanc potius esse, quam aliam quamvis. Cognitio vero distincta acquiritur, quum mens in suas claras cognitiones reflexione rediens, earum analysim instituit, et singula elementa quibus convenientiae vel discrepantiae ratio constat, singillatim enucleat ac notat. Nemo autem negaverit, primum illum cognoscendi modum sine hoc altero posse consistere; cognitionemque veritatis quae solummodo clara sit, veram cognitionem esse.

Homines igitur qui cognitione scientifica carent, quarumdam veritatum evidentiam clara percipiunt, non tamen distincte: v. gr. nemo est qui non intelligat, quid sit *meum* et *tuum*; sibi quae *suum* esse reddendum, et rationem cur reddendum sit: videlicet, ut dicere solent, *quia meum est*; quae vera est ejus principii ratio; nec aliam denique afferre philosophi possunt. Sed elementa ex quibus vis hujus rationis consurgit, ut sunt jus in uno, officium in altero, ordo servandus, obligationis moralis radix, aliaque huiusmodi, plerique distincte non percipiunt ac propterea veritas haec est iis evidens, sed evidentia confusa. Ast haec sufficit, ut mens ad assensum determinetur. Hinc assentiuntur omnes, sed sui assensus rationem explicare nesciunt.

498. Animadvertendum quoque est, plurimas veritates in peculiaribus earum applicationibus, et individuis seu rebus seu eventibus propemodum obvolutas, plerumque a rudibus intelligi, vix autem unquam sub forma universali et abstracta (L. 303); aut certe non statim sub hac forma intelligi, sed solummodo post tempus magis minusve diuturnum. Ratio est, quia mens non satis exercita in ideas universales et transcendentibus difficulter reflexione redit; in ideas vero

magis determinatas, ac præsertim in ideis singularium facile se convertere potest; quia phantasmata quibus in hoc juvetur, sunt illi magis in promptu. Hinc fit, ut quædam evidentia principia, si vocabulis universalibus et abstractis enuntientur, ut plurimum non intelligant; qui tamen concretas eorumdem applicationes primo obtutu percipiunt. Si v. gr. rusticum quempiam ita interroges: estne verum hoc principium: *ordo entium servandus est*? is reponet attonito similis; non intelligo quæ dicis. At explica terminos, non definitionibus scientificis, nam has multo minus comprehendet, sed particulari aliqua applicatione; dic ei: *debemusne Deo potius obedire, quam homini, si contraria præcipiant*? Promptissima erit responsio: *Deo*. Interroga iterum; quare? non minus prompte subjiciet: *quia Deus homini præstat*.

499. Objecit Cousinius, judicia saltem illa, quæ circa existentiam seu substantiarum seu modorum versantur, idearum comparatione effici non posse. Hujusmodi sunt illa: *ego cogito: ego sum: corpora existunt: Deus est*.

Nam si meum *ego*, ita ille, non quidem existens, sed, ut fieri debet, ab existentia distinctum, cum generali et abstracta existentiae idea conferatur, ex collatione hac nil aliud percipi poterit, quam hoc: has ideas se mutuo non excludere; sed mei *ego* existentia realis percipi non poterit (1).

500. Respondendum, *negando* quod asseritur. Ad exemplum autem quod attinet, animadvertendum 1º ideæ mei *ego* comparationem non fieri cum idea existentiae, sed cum idea *existentis*; non enim dicere licet: *ego sum existentia*, sed dicit unusquisque: *ego sum existens*, nempe existentiam habens.

2º Sensus intimus me existentem mihi renuntiat per modum facti, sine ulla distinctione prædicati a subjecto. Deinde ego intellectus in me obtutum convertens, una apprehensione simplici, unoque conceptu, me existentem apprehendo; postea vero analysim adhibens, distincte noto et subjectum *ego*, et attributum *existens* (391, 2º).

(1) Cours de l'Histoire de la Phil. 25º leçon.

3º In judiciis experimentalibus convenientia prædicati cum subjecto non deprehenditur ex idearum consideratione, sed vi experientiæ præcedentis (L. 146). Intelligo enim me cum aliquo existente identicum esse, non quia ego sum ego, sed quia prius me existentem expertus sum.

Quomodo autem seu corporum seu Dei existentia cognoscatur, supra dictum est (324, 392). Hic tantummodo notandum, utramque cognitionem non immediata apprehensione ab intellectu, sed mediata comparari.

CAPUT XI.

DE FACULTATE APPETENDI.

ARTICULUS I.

De appetitu in genere.

501. Veniamus ad appetendi facultatem, qua entium intelligentium perfectio absolvitur. Sicut enim cognoscendi vis veritatis nos participes facit, ita vis appetendi bono nos conjungit.

Quærendum 1º quid ea sit.

Ad hoc intelligendum, notandum est, omni enti naturalem esse aliquam inclinationem, qua ad terminum quempiam intenditur, in quo quiescit, quique aliquo modo illius bonum est. Hæc vero inclinatio in rebus cognitione carentibus ab externo impulsu et ab alterius actione determinatur; ut contingit v. gr. in affinitate chimica vel gravitatione. Sed ea entia quæ cognitione pollent, non solum a viribus physicis moveri possunt, sed etiam motu intentionali (O. 300, 3º) ab objectis quæ in eorum apprehensione per sui speciem existunt. Prima illa inclinatio appetitus *naturalis* a veteribus appellabatur; hæc altera *elicitus*. Patet autem, appetitum naturalem non proprie appetitum dici. Res enim materiales non sponte suum terminum petunt, sed potius ad eum trahuntur, et quamvis ad eum intenduntur et in eo quiescant,

non tamen ad ipsam hanc quietem, nec ad termini sui ascensionem tendunt, ut ad bonum suum; videlicet operantur cum fine, sed non propter finem.

Ex his liquet, appetitum de quo loquimur, esse *tendentiam in bonum apprehensum*.

502. Quærendum 2^o quotuplex sit appetitus in homine.

Respondendum, appetitum in homine esse duplicem, *sensitivum et intellectivum*; quorum primus *inferior*, alter *superior* dici solet, ac proprio nomine *voluntas*. Quod ita s. Thomas pulcherrime demonstrat.

« Necesse est, inquit, dicere, appetitum intellectivum » esse aliam potentiam a sensitivo. Potentia enim appetitiva » est potentia passiva, quæ nata est moveri ab apprehenso... » Passiva autem et mobilia distinguuntur secundum distinctionem activorum et motivorum: quia oportet motivum » esse proportionatum mobili, et activum passivo: et ipsa » potentia passiva rationem habet ex ordine ad suum activum. Quia igitur est alterius generis apprehensum per intellectum, et apprehensum per sensum, consequens est, » quod appetitus intellectivus sit alia potentia a sensitivo (1). »

503. Quærendum 3^o quodnam sit utriusque appetitus objectum.

Per se est aliquod bonum cognitum, ut colligitur ex dictis. Et appetitus quidem sensitivi objectum est bonum illud quod sensu apprehenditur, quod est voluptas organica, vel aliquid quod illam affert (63). Appetitus autem intellectivi objectum est bonum, prouti ab intellectu apprehenditur. Intellectus autem non hanc tantummodo aut illam boni speciem, sed plura diversorum ordinum bona, atque ipsam boni in genere rationem agnoscit. Hinc objectum adæquatum intellectivi appetitus est id omne, in quo boni ratio utcumque deprehendi potest, videlicet omne bonum.

Dixi per se appetitus objectum esse bonum: potest enim appetitus etiam circa malum versari, non quidem ratione

(1) *Sum. th. p. I, q. LXXX, art. II.*

sui, sed ratione boni cui opponitur; nec illud appetendo, sed rejiciendo.

504. Quæritur 4^o sitne appetitus potentia pure passiva.

Respondeo, appetitum, etiamsi a libera voluntatis electione præcisio fiat, esse potentiam partim passivam, partim activam: passivam quidem, quia ab objecto movetur; activam vero, quia mota agit; atque iterum passivam, quia actionem suam in semetipsa recipit.

Movetur porro ab objecto, non tamen ut a causa efficiente, sed ut a fine (O. 300, 3^o); quatenus objectum in cognoscendis facultatis apprehensione existens, offert appetitui in semetipso aliquid, cui ipse inclinationem suam naturalem ad bonum applicet.

Operatur vero dum inclinationem hanc suam applicat, et objecto, prouti in apprehensione fulget, se conjungit, ejusque quasi quadam impressione suum affectum consignat (1). Activa hæc impressio est terminus appetitivæ operationis, ac per eam amans in re amata esse dicitur. Hæc eadem se habet ad appetitum, ut verbum ad intellectum. Quæ proinde de verbo diximus (376), huic applicanda sunt, proportionem servata.

De mali odio seu fuga eadem dicenda sunt; nisi quod circa malum apprehensum appetitus operatur, non ei se coaptando, sed ab eo recedendo.

505. Ex dictis colliges, facultatem appetendi a cognoscendi facultate multipliciter differre.

Nam 1^o hæc objectum ad se trahit, illa se trahit ad objectum; unde hæc quieti, illa motui assimilatur, et quemadmodum hæc apprehensiva dicitur, ita illa expansiva dici meretur.

2^o Facultas apprehensiva novum quemdam existendi modum objecto tribuit in seipsa: appetitiva autem vis objecto in alia facultate existenti, quasi extra se egrediens, se coaptat.

3^o Objectum in intellectu existens perfectionem quamdam ab illo acquirit, vel etiam imperfectionem; prouti nobilius

(1) Cf S. Th. *Summ. th. p. I, q. XXXVII, art. I.*

est esse rei in intellectu, quam in seipsa, vel e converso. Contra autem voluntas perfectionem ab objectis imperfectioremve accipit; bona enim fit voluntas, quæ bonum diligit, ac mala est, quæ inhonesta sectatur.

ARTICULUS II.

De appetitu sensitivo.

506. Ut plura paucis complectamur, hæc de appetitu sensitivo innuere sufficiet.

1° Sæpenumero, sive ex internis causis, sive ex quorundam externorum objectorum impressione, gignitur in nostris organis intestina quædam molestia et inquietudo, seu etiam dolor: quæ quum experimur, sponte appetimus quæ nos ab eo statu eximere possunt, eaque aversamur quæ illum producant aut promovent. Molestos hosce status, naturales *indigentias* (*bisogni*) cum recentioribus appellare possumus: ii vero motus spontanei appetitionis vel aversionis, qui hunc statum consequuntur, appetitus sensitivi sunt actus. Quum vero aliquid agendo vel ab aliqua actione cessando, et alicejus objecti assecutione vel remotione, naturali indigentia satisfecimus, cessat molestus ille organorum status, ac status alter succedit, organorum texturæ atque organicis functionibus apprime congruens, cujus sensus *voluptas* dicitur. Sensus v. gr. famis aut sitis est naturalis indigentia; desiderium escarum seu potus, est motus appetitus sensitivi; saporum gustus, ac sensus ille bonus qui toto corpore per comestionem diffunditur, est voluptas consequens.

2° Homo non iis solum indigentis urgetur, quæ ex animalis naturæ conditione dimanant, sed pluribus quoque aliis, quæ rationis apprehensionem consequuntur. Hinc ejus quoque appetitus sensitivus ad plura alia bona se porrigit, ad quæ brutorum appetitus non fertur; quorum quædam ad sensibilia bona revocantur, ut deliciae, commoditates, divitiæ; quædam sunt bona intelligibilia, ut honor, scientia, Deus; in quæ appetitus quoque sensitivus suo modo tendere potest, *propter intensionem appetitus superioris*

partis, ex quo fit redundantia in inferiorem appetitum, ut loquitur s. Thomas (1).

3° Celeberrima est et perantiqua appetitus sensitivi divisio in duas quasi partes, quarum altera *concupiscibilis*, altera *irascibilis* audit. Illa est inclinatio simplex ad prosequendum ea quæ sunt convenientia secundum sensum, et ad refugendum quæ molesta sunt; hæc vero est inclinatio ad resistendum iis omnibus quæ convenientia impediunt aut impugnant, vel molesta ingerunt. Propterea ipsa est quasi primæ propugnatrix; ejusque objectum dicitur esse bonum *arduum*, quia scilicet eo tendit ut contraria superet.

4° Varios appetitus sensitivi actus Græci *πάθη*, Latini *motus animi, perturbationes, affectus*; vel etiam *passiones* appellantur. Horum actuum differentia a diverso modo quo appetitus objectum ab appetente considerari potest, desumuntur: nam pro apprehensionis diversitate diversi motus in appetitu exsurgunt.

Appetitus objectum est bonum prosequendum, et malum removendum; utrumque secundum se et absolute, ab concupiscendi vim pertinet; prouti vero difficultatibus impeditur, ad vim irascendi. Præterea tam uni vi quam alteri seu bonum seu malum offerri potest, vel ut futurum, vel ut præsens.

Si itaque concupiscenti vi bonum absolute exhibeatur, hoc gignit in ea *amorem*, qui est cooptatio quædam appetitus ad bonum, seu complacentia in illo. E converso malum absolute consideratum excitat *odium*, quod est amoris contrarium.

Bonum futurum eum motum producit, quem dicimus *desiderium*; malum autem *fugam* seu *abominationem*.

Denique quum bonum jam possidetur, appetitus in eo quiescit: quæ quies *delectatio* dicitur vel *gaudium*. Malum ex opposito, quum præsens opprimit, *tristitiam* producit.

Quum autem boni futuri assecutio difficilis est, difficultates vel apprehenduntur ut superabiles, vel ut insuperabiles. Si primum, elevatur vis irascendi motu illo quem nominamus

(1) *Sum. th. I, II, p. q. XXX, a 1, ad 1.*

spem; si alterum, *desperatione* deprimitur. Itemque quum malum futurum ita apprehenditur, ut ejus quidem fuga difficilis sit, vitari tamen ipsum malum possit, insurgit in illud appetitus eo motu, quem dicimus *audaciam*; quum vero futurum malum inevitabile aestimatur, appetitus *timore* corripitur, et ab impugnando malo desistit.

Demum quum bonum difficile adipiscimur, nullus gignitur actus qui vis irascendi sit proprius, sed sequitur solum in vi concupiscendi delectatio. Sed quum malum illatum est, si ultio possibilis esse apprehendatur, appetitus *ira* movetur, anhelans proprii mali causæ malum inferre. Si vero impossibilis ultio appareat, tristitia quæ nimium gravat, *dejectio* appellari solet.

Ex his liquet, actus appetitus præcipuos hos enumerari: amorem et odium; desiderium et fugam; *spem* et *desperationem*; *audaciam* et *timorem*; *delectationem*, *tristitiam*, *iram*, *dejectionem*.

5° Passionum nomine, aliquando veteres, et recentiores communiter, non motus appetitus quoscunque significant, sed hos motus, ut recessum a rationis regula includunt; neque motus tantum, sed habitus juxta eos operandi. Brevi passionum nomine ipsos vitiorum habitus intelligunt. Hoc pacto explicandi sunt auctores, quotiescunque passionem esse malas affirmant. Passiones enim, ut sunt meri appetitus actus, physice quidem bonæ sunt, ethice autem nec bonæ nec malæ.

6° Appetitus sensitivi subjectum est compositum ex anima et corpore; radix autem anima. Sane in anima tantummodo appetendi principium esse posse in comperto est. Sed non est manifestum minus, appetitus sensitivi actus cum aliqua organorum immutatione esse conjunctos. Organum porro, saltem princeps, in quo appetitus sensitivus exeritur, esse videtur cor; quod etiam communis loquendi ratio passim significat.

7° Varia corporis constitutio, organorumque status, et organicarum functionum modus, imo vero ætas, sexus, nutritio, aliaque hujusmodi, ad certos quosdam appetitus sensitivi

actus, diversos homines seu promptiores seu tardiores efficiunt; et vicissim hi actus, maxime si in habitum transeant, in totam organicam œconomiam summopere influunt.

8° In homine appetitus sensitivus intellectivo subditur, mediante ratione. Ratio enim imaginationem movere ac dirigere potest; et per eam appetitum instigare vel coercere. Sed animadvertendum est cum Aristotele (1), imperium hoc rationis in appetitum non esse *despoticum*, sed *politicum*. Dicitur autem imperium despoticum, quo quis principatur servis, qui in re nulla resistere hero possunt, prout instrumenta resistere nequeunt artificii. Imperium vero politicum est illud, quo rex civibus præest, qui licet obedire teneantur, aliquo tamen modo renuere possunt. Sic itaque ratio appetitui præest, ut appetitus renuere queat ejus imperio ac reniti. Appetitus enim, et ipsa imaginatio, a corporis qualitatibus ac dispositionibus non parum dependent; quæ rationis imperio non subjacent.

ARTICULUS III.

De appetitu intellectivo seu voluntate.

507. Nunc de nobiliori hominis appetitu, qui ratione regitur et proprio nomine voluntas dicitur. De qua tria quæremus: primo de ejus objecto, secundo de ejus actibus, tertio de arbitrii libertate, qua gaudet.

Omne bonum voluntati appetibile esse posse supra statuimus (503). At quæritur ulterius, an solummodo bonum sit voluntatis objectum, ita ut etiam malum, qua tale, ab ea nunquam appeti possit. Videtur enim quandoque quorundam voluntas in ipsum malum ferri. Quæritur deinde, an bonum, quod voluntas appetit, necessario ipsius appetentis bonum esse debeat.

508. PROPOSITIO I. *Voluntas solummodo bonum appetere potest; videlicet id solum, quod ut aliquo modo bonum apprehenditur.*

Sane 1° appetitus omnis est generalis quædam naturæ inclinatio, quæ applicari non potest, nisi illi proponatur ali-

(1) *Polit.* I, c. III.

quod objectum, quod sub generali ratione ad quam natura tendit, contineatur. Jamvero impossibile est, ad bonum et malum indifferenter naturam nostram inclinari. Secus enim inclinaremur ad omne bonum et ad omne malum, quod est intimo sensui et experientiae contrarium; ac praeterea nulum amplius objectum voluntatem movere posset motione illa indeliberata, quam voluntas, ut potentia passiva, requirit (504): etenim proposito quocunque bono, et ab hoc et ab ejus opposito aequè moveremur; binæ autem motiones æquales et oppositæ sese invicem eliderent.

Naturalis ergo voluntatis tendentia est in solum bonum. Ergo non potest applicari nisi iis objectis, in quibus aliqua boni ratio fuerit apprehensa.

2º Finis propter quem natura appetitivam vim quibusdam entibus attribuit, est eorum perfectio: natura enim non poterat intendere, ut entia per appetitum evaderent imperfectiora. Necesse est ergo, appetitum ferri in ea solum, quæ aliquo modo subjecto convenientia sunt. Quæ autem subjecto convenientia utcunque sunt, bona sunt. Ergo.

3º Idipsum denique inductione demonstratur. Quæcunque enim appetimus, ideo appetimus, quia ea aliquo modo bona esse putamus; esto ea bona vera non esse. Unde qui aliquid appetunt quod vel sibi vel alteri malum est, hoc ideo appetunt, quia aliquam boni rationem in eo positam esse putant; ut patet in iis qui illatas sibi injurias ulciscuntur, malum alteri inferendo, aut illicita patrant, ut sensibile aliquod bonum assequantur. Ique ipsi qui sibi violentas manus inferunt atque appetunt non esse, hoc ipsum appetunt sub boni ratione. Cum enim felicitas sita sit in carentia mali et in boni possessione, quando bonum adipisci desperant, existimantque malo se carere non posse quoad vivunt, hanc saltem beatitudinis partem arripiunt, ut vitam deserant et a malo se liberent.

509. PROPOSITIO II. *Bonum omne quod appetitur, est semper aliquo modo ipsius appetentis bonum.*

Propositionem hanc ita probat Suaresius; ac satis erit ejus verba recitare.

« Quod appetimus vel est bonum proprium vel alterius. Si
» proprium, habetur institutum. Alterius autem bonum non
» appetimus, nisi vel quia in actu appetendi rationem ali-
» quam boni proprii invenimus, vel certe quia cui tale bo-
» num appetimus, aliquo modo ad nos pertinet, sive unus
» nobiscum est aliquo modo. Nam aut creatura est aut creator.
» Si creator, eatenus illi bonum volumus, quatenus ipse
» Deus est universale bonum rerum omnium, atque adeo
» nostrum. Et hac de causa charitas magis Deum amat,
» quam amantem, quia in Deo includitur bonum ipsius
» amantis, tanquam in fonte atque origine. Si vero est crea-
» tura, volumus illi bonum, vel quia amicus est, vel quia
» propinquus, vel quia homo, in quo bonitatem nostræ na-
» turæ consideramus. Quod si non sit creatura rationalis,
» bonum ei optamus, quia vel ad nos attinet, vel quia ali-
» qualiter in natura est nobis similis..... Horum causa
» inde sumitur, quia licet ratio boni non respiciat hunc vel
» illum, tamen ratio appetibilis ab hoc vel illo includit,
» quod bonum ejus sit; nam appetitus est inclinatio quædam
» ad propriam perfectionem tendens. Neque hoc destruit
» communem divisionem amoris in amicitiam, seu benevo-
» lentiam, et concupiscentiam (1). »

510. Quod ad actus voluntatis attinet, certum est actus omnes, qui a sensitivo appetitu eliciuntur, ab ipsa elici posse; diversa tamen ratione. Ab appetitu enim sensitivo eliciuntur cum organica aliqua immutatione (506, 6º); a voluntate vero independenter ab organis. Præterea voluntas fertur in finem, ut in finem, et in media, ut in media; intellectus enim et eam bonitatis rationem agnoscit quæ propria est finis, et eam quæ propria mediorum est.

Atque hæc est actuum voluntatis prima divisio. Alii sunt circa finem, alii circa media. In quâ divisione duo notanda sunt:

511. 1º In omni suo actu voluntas in finem tendit. Nam finis propter se intenditur, media vero propter finem. Itaque

(1) *De anima*. Lib. V, c. II, § 7.

quum voluntas in finem, qua talem, fertur, non tendit in ipsum propter aliud, nec cum ipso aliquid aliud appetit. Quum autem fertur ad media, ad ea non fertur, nisi quatenus in finem fertur. Unde id quod in eis proprie vult, est finis.

2^o Fines subordinati sunt proprie media ad alios fines, ac demum ad finem simpliciter ultimum (O. 297, 298, 1^o). Quum ergo voluntas in fines subordinatos intenditur, vult in eis finem ultimum. Ultimus autem hominis finis est felicitas. Quidquid itaque homo velit, semper felicitatem suam implere vult.

512. Actus quos voluntas circa finem exercet, sunt *amor*, *desiderium*, eoque obtento, *delectatio*. Circa media autem, ut media sunt, *electio* et *usus*. Electio ex mediis ab intellectu propositis unum aliquod cæteris præfert; usus applicat varias animæ potentias ad operationes, quæ ad executionem necessariae sunt. Atque hinc est altera divisio actuum voluntatis in *elicitos* et *imperatos*.

Notandum quoque, si medium quodpiam, quod respectu aliorum mediorum rationem finis habeat, ut finis consideretur, posse voluntatem illud desiderare, et in eo delectari.

ARTICULUS IV.

De humanæ voluntatis libertate.

513. Nobilissimum humanæ voluntatis attributum est physica libertas, in qua potissimum entis intelligentis dignitas sita est, et perfectio maxime splendescit. De hac jam dicendum. Ac primo genuina ejus notio tradenda, qua in re non pauci erronee senserunt; deinde ejus realitas asserenda est.

Principio statuendum, duplicem esse voluntatis libertatem, aliam a *coactione*, aliam a *necessitate*.

Libertas a coactione est *immunitas ab omni vi extrinsecus illata contra voluntatis propensionem*.

Libertas a necessitate est *immunitas ab intrinseca determinatione ad unum*.

Manifestum per se est, nihilominus notandum sedulo, duo

hæc inter se differre, ut vis illata extrinsecus a naturali necessitate diversa est.

514. Libertas a necessitate dici quoque solet *libertas indifferentiæ*, *libertas electionis*, *liberum arbitrium*, et proprio nomine *libertas*. Causa vero quæ hac libertate gaudet, ut ex ejus notione colligitur, ea est *quæ positis omnibus quæ ad agendum requiruntur, potest agere et non agere*.

Hæc porro indifferentiæ libertas triplex est:

1^o dicitur libertas *noncontradictionis*, seu *quoad exercitium*; et in eo consistit, quod causa, positis omnibus quæ ad agendum requiruntur, sit indifferens ad duo contradictoria, quæ sunt *agere et non agere*. Hoc pacto voluntas potest volendi actum ponere, et non ponere.

2^o dicitur libertas *contrarietatis*, per quam causa indifferens est ad duos actus contrarios, uti sunt in voluntate velle aliquid, et idipsum nolle actu positivo repulsionis.

3^o dicitur libertas *specificationis*, quæ causa indifferens est ad actus specie diversos, uti sunt velle ambulare, velle studere, velle comedere.

515. Ex dictis inferes 1^o actionem, etsi non coactam, posse adhuc necessariam esse.

Inferes 2^o discrimen *spontanei* a *voluntario*, et a *libero*.

Spontaneum est id omne, cujus principium in agente est. Hujusmodi sunt omnes actus immanentes. Spontaneum coacto opponitur.

Voluntarium est id, cujus principium est inclinatio agentis, ex cognitione finis. Hujusmodi sunt omnes voluntatis actus, sive necessarii sint, ut est appetitus boni in genere vel felicitatis; sive non necessarii, ut est lectio vel deambulatio.

Liberum est voluntarium, quod non est ex natura voluntatis determinatum ad unum.

Hinc perspicis 3^o, spontaneum voluntario latius patere, et voluntarium libero.

516. Quoniam libertas a necessitate ea est de qua disputamus, ejus notio accuratius est illustranda.

Quin hominem aliquid libere agere dicimus, v. gr. ultionem de aliquo sumere, sane intelligimus, eum potuisse non

agere vel aliter agere si voluisset. Quomodo autem factum est, ut potius agere quam non agere, et hoc potius quam aliquid aliud agere voluerit? Sane in primis, quia bonum suum, tanquam ultimum finem, intendit (§11, 2°). Deinde, quia media quæsit, quæ in adjunctis in quibus versabatur, ad hunc finem assequendum essent idonea; et cum ipsi duo bona quæ media ad hunc finem essent, in mentem venirent, videlicet bonum honestum mansuetudinis et veniæ, et bonum delectationis ex vindicta sumendæ, bonum hoc alterum præ illo elegit; hinc quæsit iterum media ad hunc finem idonea, et ex pluribus mediis, quæ ratio excogitavit, unum aliquod elegit quod ad finem intentum judicavit opportunius, illudque executioni mandavit.

§17. Itaque liberi actus elementa sunt hæc:

1° *Intentio finis ultimi*, ex qua omnis deliberatio et electio procedit; quemadmodum ratiocinatio omnis omnisque conclusio ex principiis per se evidentibus deducitur. Quicunque alii fines a voluntate intenduntur, huic subordinantur, et propter ipsum intenduntur.

2° *Consilium seu deliberatio*. Quum voluntas aliquem finem appetit, intellectum applicat ad media investiganda, si hæc jam intellectus ultro non offerat. Intellectus autem, si tanti valet, in principiis vel factis sibi cognitis hæc media reperit, eaque ponderat, eorumque seu utilitatem, seu difficultatem demonstrat; ac denique judicat quendam ex iis, in adjunctis præsentibus, ex hoc vel illo motivo cæteris præferri mereatur. Consilium itaque est operatio intellectus et rationis.

3° *Electio*. Voluntas ex mediis quæ intellectus judicat eligi posse, unum aliquod cæteris præfert, vel certe, si undantaxat medium ut eligendum ipsi offeratur, hoc acceptat et intendit, vel secus.

4° *Executio*, videlicet applicatio facultatum ad agendum id quod voluntas agendum esse constituit. Fit autem applicatio hæc ex imperio rationis, ita tamen ut movendi virtus quæ in eo est, ex præcedente voluntatis actu dimanet. Ad executionem autem libertas a coactione requiritur.

§18. Statuamus nunc ubi sit libertas, ubi non sit.

PROPOSITIO III. *In ultimi finis intentione libertas non est.*

Nam 1° omne contingens ad aliquid quod necessarium sit, ultimato reducitur; et omne id, quod ex natura dimanat, in natura ipsa fundamentum habet. At liber actus contingens est, et ex natura agentis dimanat. Ergo in aliquo, quod necessarium sit, et ad naturam ipsam pertineat, fundetur oportet. Hoc autem nihil aliud esse potest, quam ultima finis appetitio. Ergo ultimi finis intentio necessaria est, et ad naturam pertinens.

2° Quemadmodum Aristoteles dixit, *sicut principia se habent ad speculabilia, ita finis ad operabilia* (1). Nempe, agenda per liberos actus ita ad finem ultimum comparantur, ut conclusiones ad prima principia; atque intellectus ad rationem est idipsum, quod finis appetitio ad libertatem. Quemadmodum enim omnes conclusiones vi principiorum intelliguntur, ita omnes liberæ operationes propter finem fiunt. Sed intellectus primis principiis necessario adhæret. Ergo voluntas quoque finem ultimum necessario appetit.

§19. Notandum vero 1° hoc quod de ultimo fine dicimus, de finibus subordinatis dici non posse; hi enim libere appetuntur, ac propter finem ultimum (§11, 2°); suntque veluti principia particularia alicujus scientiæ aut demonstrationis, quæ alterius seu scientiæ seu demonstrationis conclusiones sunt.

2° Voluntatem quoad finem ultimum, carere solum libertate contrarietatis seu specificationis; non enim potest ultimum finem odisse, aut aliquid aliud appetere, ipso neglecto; non autem carere libertate contradictionis: quemadmodum enim homo potest de ultimo fine actu non cogitare, ita potest quoque illum non velle actu.

§20. PROPOSITIO IV. *In actibus intellectus consiliantis et judicantis nulla est intrinseca libertas.*

Libertas intrinseca est, quæ inest ipsi potentiæ quæ dicitur libere agere; extrinseca vero, quæ uni potentiæ tribuitur, quia ab aliqua potentia intrinsece libera movetur ad opus. Ita v. gr. ambulare aut aspicere sunt liberi actus.

(1) *Phys.* II, text. 89.

Intellectum autem in nullo suo actu intrinsecus liberum esse, est prorsus manifestum. Non enim agit intellectus, nisi vel ab objecto ad agendum determinetur, vel ex voluntatis imperio. Itaque et cognitio boni, et mediorum inquisitio atque inventio, et motivorum apprehensio, et iudicium de eo quod agendum sit, intrinseca libertate carent, ac solummodo liberi esse possunt, si a voluntate libera imperentur.

521. PROPOSITIO V. *Executio quoque intrinsecus libera non est.*

Opinatus est Lockius, voluntatem esse solummodo facultatem qua una actio alteri præferri posset; libertatem autem esse facultatem a voluntate distinctam, videlicet facultatem agendi juxta mentis electionem; unde conclusit, quæstionem illam: utrum voluntas libera sit, ridiculam esse, æque ac hanc alteram: utrum virtus sit quadrata (1). Quæ quidem Lockius fortasse commentus est ex ignorantia eorum de quibus disputabat, et ex confusione idearum, qua passim laborare se ostendit. At si ejus sententia presse accipiatur, est penitus absurda.

Nam 1º confundit libertatem a necessitate cum libertate a coactione, et libertatem intrinsecam cum extrinseca et derivata.

2º Si tota hominis libertas revocatur ad facultatem agendi juxta voluntatem, concludendum erit, libertatem modo esse in nobis, modo non esse. Nam frequenter multa nobis occurrunt obstacula, quibus ab agendo prohibemur; frequenter quoque media ad agendum necessaria non suppetunt.

3º Actiones quæ coactæ sunt, liberæ nunquam dicendæ essent; atque in voluntatis electionibus nulla esset moralitas; moralitas enim in libertate fundatur: quæ duo falsa sunt, et absurda.

522. PROPOSITIO VI. *Libertas ibi solum est, ubi habetur voluntatis electio.*

Consequitur ex dictis, argumento exclusionis. Præterea probari sic potest. Omnis potentia, quum agit, aliquo modo

(1) De hum. intellectu. Lib. II, c. XXI.

ad actum determinatur. Determinatio autem ad actum vel ab ipsa naturæ inclinatione dimanat, vel in elicita inclinatione agentis sita est. Sed actus potentiae formaliter liberæ ex naturæ inclinatione determinari nequit: natura enim liberi agentis indifferens est ad agendum vel secus. Ergo ex elicita agentis inclinatione determinetur oportet. Non autem ex inclinatione elicita ab aliqua alia potentia quæ in eodem agente sit: potentia enim quæ sic determinatur, non est formaliter et intrinsece libera, sed imperative et extrinsece (520); nec movet illa se, sed movetur ab alio. Ergo actus potentiae formaliter liberæ, inclinatione ab hac ipsa elicita determinandus est. Potentia autem ad quam pertinet elicita inclinatio, est appetitus seu voluntas (504). Ergo solummodo voluntatis actus possunt esse formaliter liberi.

ARTICULUS V.

De libertatis natura.

523. Cum libertas in voluntatis electione consistat, ut libertatis analysim expleamus, tria inquirenda supersunt: 1º quænam objecta electioni voluntatis subjiciantur: 2º an electio feratur semper in id quod ut melius apprehenditur: 3º an ad electionem practicum intellectus iudicium necessarium prærequiratur.

PROPOSITIO VII. *Nec felicitas, nec bonum in genere electioni subjiciuntur.*

Nam felicitas est ultimus hominis finis (514, 2º), qui electioni non subjacet. Revera illud solummodo electioni subjacet, quod in deliberationem aliquando adducitur. Sed felicitas nunquam in deliberationem adducitur. Nemo enim dubitat, an ipsi conveniat felicem esse, nec ne.

Prima pars immediate consequitur ex propositione III (518).

Pars altera duobus modis intelligi potest: nempe 1º quod voluntas ea solummodo eligere possit, quæ aliquam boni rationem præ se ferant, malum autem, quæ tale, eligere non

possit; 2° quod bonum in genere consideratum rejicere nequeat.

Primum autem ex dictis (508) colligitur. Nam id solummodo quod bonum sit, appetibile est. Itaque si quod appetit voluntas, etsi non necessario, sed libere illud appetat, hoc semper aliquod bonum erit.

Alterum non est minus evidens. Bonum enim in genere spectatum nullam in se mali rationem continet. Ergo erit quidem voluntas libera ad illud actu appetendum vel non; at si actum aliquem circa illud exerceat, hic odii actus esse nequit, sed actus amoris sit oportet.

524. PROPOSITIO. VIII. *Bonum infinitum intuitive cognitum necessario diligitur: in presenti tamen vita, ejus dilectio electioni subjacet.*

Prima pars patet ex eo, quod bonum infinitum, quod est Deus, humanæ beatitudinis objectum est. Homo itaque in Deo intuitive cognito suam beatitudinem assequitur. Quemadmodum ergo voluntas beatitudinem non potest non appetere (518), ita quoque Deo intuitive cognito inhæreat necesse est.

Ratio alterius partis est, quod objectum ita movet, ut apprehenditur. Nos autem in hac vita Deum intuitive non cognoscimus, sed solum per argumentationem et conceptibus analogicis; nec in Deo ita cognito beatitudinem nostram reperimus. Hinc ejus bonitas, licet in se infinita, ex nostræ cognitionis imperfectione vim non habet, ut appetitum nostrum ad se necessario trahat; ac propterea cum bonis finitis, quorum experimentalem cognitionem habemus, in comparationem adduci potest, atque adeo illis posthaberi.

525. Ex his infertur 1° electionis objectum esse bona finita, et bonum infinitum, ut a nobis modo cognoscitur.

2° Non modo bona vera, quæque recto rationis judicio approbantur, sed etiam bona apparentia, quæ ex falso judicio bona putantur, eligi posse.

3° Hinc libertatem omnem vel objecti vel subjecti imperfectionem supponere, nempe vel finitam bonitatem in objecto, vel limitatam aut falsam cognitionem in subjecto.

526. PROPOSITIO IX. *Electio non fertur necessario in id quod ut melius apprehenditur.*

Sententia quam hic impugnamus, Leibnitzii ejusque scholæ doctrina est; quam alii quoque sequuntur. Juxta hos ratio sufficiens appetitionis aut fugæ est seu boni seu mali repræsentatio; ita ut, positis duabus repræsentationibus, altera boni majoris, altera boni minoris, voluntas in bonum majus suo pondere inclinetur; positis vero repræsentationibus bonorum æqualium, in neutrum inclinari possit, nisi aliqua alia ratio, licet exigua, aliunde accedat et æquilibrium tollat. Libertatem vero in eo sitam esse, quod in nostra potestate sit, consultationem instituere circa motiva quæ ad volendum impellunt; neque solum oblata motiva accuratius considerare possimus, sed etiam ab iis mentem avertere, ac nova conquirere.

527. Probatur propositio. 1° Si hæc sententia: *voluntas necessario determinatur ad id quod ut melius apprehenditur*, ita accipiatur ut sonat, libertas omnis evidenter destruitur. Si enim electio ferri nequit, nisi in id quod melius esse judicatur, electio amplius non est, sed naturalis determinatio ad unum.

2° Fere nihil est, quod sub diverso aspectu consideratum, apprehendi non possit ut melius simul et ut minus bonum; non quidem absolute, quod certe adversarii non requirunt, sed secundum quid. Bonum enim secundum sensum est melius sensui, quam bonum rationis; et vicissim bonum rationis huic est melius, quam sensui. Ex bonis quoque rationis, alterum melius est respectu unius finis, alterum melius respectu alterius. Itaque quod eligitur, fere semper apprehenditur et ut melius, et ut minus bonum, secundum diversos respectus.

3° Judicium quo aliquid ut melius apprehenditur, vel est necessarium vel liberum. Si necessarium est, nulla est libertas. Si liberum, vel hoc judicium habitum fuit ut melius antequam poneretur; vel secus. Si hoc alterum dicatur, actum liberum habemus, quem boni melioris apprehensio non determinavit. Si dicatur primum, redibit quæstio, donec

pervenias ad aliquem liberum actum, qui non fuerit a boni melioris apprehensione determinatus.

4^o Demum naturæ voluntatis repugnat, ut ad bonum finitum, licet hoc ut melius apprehendatur, necessario feratur. Nam ex duobus bonis finitis quæ voluntati proponantur, neutrum ex se est illi necessario appetibile: neutrum enim est finis ultimus. Ergo voluntas utrumque potest non velle. Ergo indifferenter alterutrum illorum appetere potest, altero neglecto.

528. Effugium vero illud ad præviam consultationem, quæ leibnitziani hujus doctrinæ crudelitatem mitigare conantur, nihil proficit.

Nam 1^o consultatio isthæc cum leibnitzianis principiis consistere non potest. Si enim boni melioris apprehensio sufficiens est volitionis ratio, comprehendere nequit quomodo illico ac necessario post hanc apprehensionem volitio non sequatur, eaque suspensa manente, tempus suppetat consultandi. Posita enim ratione sufficiente, rationatum necessario ponatur oportet.

2^o Consultatio illa, et attentio ad quædam motiva, et quorundam aliorum neglectus, omnia hæc, vel sunt actus liberi vel necessarii. Si sunt necessarii, etiam electio consequens necessaria erit; nulla proinde libertas. Si sunt actus liberi, profecto a voluntate determinantur, quia intellectus ex se liber non est (520). Hic autem actus liber voluntatis a prævia consultatione pendet, an non?

Si non pendet, ecce tibi liberum actum absque prævia consultatione. Non est ergo consultatio prævia, quæ liberum actum facit. Hinc absque illa actus sit liber necesse est.

Si pendet, redibit iterum quæstio. Ac si hæc nova consultatio necessaria est, libertas periit; si libera, ab alia volitione dependet. Hæc quoque volitio vel libera est sine consultatione, vel a tertia consultatione pendet; et hoc pacto nunquam finis erit consultationum et volitionum. Itaque vel habetur absurditas processus infiniti; vel admittendus est actus liber absque prævia consultatione.

529. Notanda. 1^o Ratio sufficiens volitionis dupliciter in-

telligi potest; vel id ex quo necessario sequatur volitio, vel id quod sufficiens sit ut volitio eliciatur. Si ratio sufficiens primo modo intelligatur, nulla est hujusmodi ratio quum de voluntate agitur, sive in objecto sive in subjecto. Ratio enim sufficiens est causa cum omnibus requisitis ad agendum. Atqui voluntas, positis omnibus requisitis ad agendum, indifferens est ad contradictoria, ad contraria, ad diversa. Ergo ratio sufficiens volitionis non est id ex quo necessario sequatur volitio; sed solum id ex quo sequi potest. Atque hæc ratio sufficiens est; hinc quidem voluntas, cum generali inclinatione ad bonum, inde vero objectum propositum, quod a voluntate appeti possit ut bonum. Præter hanc autem rationem sufficientem, necessarium est ut voluntas seipsam moveat. Unde patet, in causæ liberæ actibus rationem determinantem a ratione sufficiente differre.

2^o Aliquando voluntas determinatur ad melius, non quidem vi objecti, sed vi prioris intentionis, quæ ipsa finem sibi propositum, meliori quo posset modo, assequi decrevit.

530. PROPOSITIO X. *Ad hoc ut voluntas liberum actum eliciat, necesse non est, ut a prævio judicio practico determinetur.*

Quæstio hæc non exigui momenti est ad veram libertatis naturam intelligendam. Est autem hujusmodi. Cum voluntas sit appetitus rationalis, ratione dirigitur: proinde ejus electioni judicium aliquod rationis præluceat necesse est. Quodnam vero sit hoc rationis judicium quod ad electionem necessario requiritur, disceptatur. Quidam sentiunt, necessarium esse judicium practicum, quo voluntas ad alterutram partem præ opposita determinetur; quidam negant hoc judicium requiri. Est porro judicium practicum illud quo intellectus, pensatis omnibus, definit: *hoc esse eligendum.*

Non pauci ex iis qui primam sententiam amplectuntur, ut libertatem sartam tectam tueantur, aiunt, judicium ipsum practicum liberum esse; a voluntate enim pendet, inquit, ut ad unius partis motiva consideranda intellectum convertat, alterius autem motiva negligat; ac præterea postquam hoc pacto intellectus judicavit, potest adhuc voluntas ad

neglecta prius alterius partis motiva intellectum reducere, et oppositum iudicium practicum extundere; quod si facere prætermittat, et juxta primum iudicium operetur, hoc ipso operatio libera est.

Negari nequit, libertatem in tuto esse positam, si iudicii practici necessitas ita intelligatur; at libertatem per hæc explicari, hoc enimvero negari potest. Qui enim ita sentiunt, vel nihil explicant, vel in oppositam sententiam dilabuntur; ut constabit ex assertionis supra positæ demonstratione.

551. Probatur propositio.

1° Iudicium illud quo voluntas ad unum determinari dicitur, vel absolute necessarium est, vel liberum. Si absolute necessarium est, nihil est amplius, in quo exerceatur libertas. Nam et iudicium est necessarium, et voluntatis actus per hoc iudicium necessario determinatur. Si liberum est, an intrinsecus liberum est, an vero extrinsecus ex voluntatis imperio? Primum dici nequit; quia intellectus non est facultas formaliter libera (520, 522). Est ergo liberum ex voluntatis imperio. Si hoc, dic sodes, quomodo voluntas ad hoc iudicium imperandum determinetur. An ab alio fortasse iudicio practico? At si hoc dicas, nullus erit finis huiusmodi iudiciorum. Fateri ergo debes, voluntatem iudicium illud imperare, quin ab alio simili iudicio ipsa determinetur. Falsum itaque, ad liberos voluntatis actus necessarium esse iudicium practicum quo voluntas determinetur.

2° Præclare Suaresius, ex quo præcedens argumentum deprompsimus, ita arguere pergit:

« Iudicium intellectus non movet voluntatem, nisi medio » objecto quod proponit: sed objectum propositum non » semper infert necessitatem voluntati, aut determinat illam » ad unum; neque hoc est necessarium, ut voluntas possit » in objectum tendere. Ergo nec est necessaria a parte iudicii, imo nec possibilis talis determinatio.

» Major probatur, quia vel iudicium movet tantum ratione » objecti, vel ipsummet ratione sui habet peculiarem efficaciam ad determinandam voluntatem. Hoc posterius dici » non potest, tum quia talis efficacia repugnaret libertati

» voluntatis, ut dictum est; tum etiam, quia talis movendi » modus est alienus a munere intellectus, qui est illuminare » et dirigere, ac regulare voluntatis operationes: tum denique » que quia ille movendi modus est proprius voluntatis, quæ » in hunc finem peculiariter data est, ut alias potentias efficienter moveat quoad exercitium. Ergo non potest fieri, » ut intellectus, qui a voluntate efficienter movetur, vicissim » eodem modo illam moveat (1). »

552. Notando. 1° Quanquam hæc vera sint, nihilominus frequenter contingit, ut voluntas a iudicio practico determinetur. Hoc tamen non fit iudicii, aut objecti propositi, sed vi prioris actus voluntatis, quo ipsa finem aliquem consequi efficaciter intendit. Hac enim voluntate posita, quum intellectus ad finem assequendum aliquid omnino faciendum esse iudicat, voluntas ad actum determinatur. In quo, ut patet, determinatur non tam a iudicio, quam a seipsa: neque absoluta necessitate determinatur, sed hypothetica, videlicet si in priori proposito permaneat. Quare si voluntas ab illo recedit, iudicium practicum nullam amplius vim habet. Et ex hoc non raro accidit, ut iudicium practicum potius ad oppositum voluntatem inducat; quando nempe voluntas terribi medii necessario adhibendi difficultate aut turpitudine, finem prius intentum una cum medio rejicit.

2° Iudicium rationis quod electionem præcedit ac dirigit, non est iudicium practicum, ut probatum est, sed speculativum. Ad hoc scilicet, ut voluntas aliquid eligat, non est necesse ut intellectus dicat: *hoc est eligendum*; sed solum: *hoc est eligibile*; videlicet medium propositum est utile, omnibusque consideratis, aptum ut eligi possit. Hoc sufficit, ut voluntas idonea fiat ad seipsam determinandam, ut illud amplectatur vel etiam non amplectatur, quia medium illud, etsi utile ad certum aliquem finem particularem ostendatur, simul tamen ad felicitatem non necessarium iudicatur. Quod de uno medio dicimus, de pluribus dicatur, si plura simul proponantur.

(1) *Disp. Met. Disp. XIX, sect. VI, § VII.*

3^o Judicium hoc speculativum, quamvis ad agendum libere sufficiat, tamen sæpe non sufficit ad agendum prudenter. Idcirco si prudenter agere volumus, inquirimus non solum quid eligi possit, sed etiam quid sit eligendum. Sed hæc ipsa inquisitio est prorsus libera, et idcirco virtuti deputatur.

ARTICULUS VI.

Humanæ voluntatis libertas asseritur.

555. His quæ præmissa sunt, intellectis, difficile non erit humanæ voluntatis libertatem asserere ac vindicare. Primo de libertate a coactione, tum de libertate indifferentiæ.

PROPOSITIO XI. *Etsi actus quia voluntate imperari dicuntur, coacti esse possint, repugnat tamen, actus a voluntate elicitos esse coactos.*

Propositionem hanc ipsis s. Thomæ verbis probabimus.

« Duplex est, sic disputat Aquinas, voluntatis actus. Unus » quidem, qui est ejus immediate, velut ab ipsa elicitus, » scilicet velle. Alius, qui est actus a voluntate imperatus, et » mediante alia potentia exercitus, ut ambulare et loqui, qui » a voluntate imperantur, exercentur autem mediant po- » tentia motiva.

« Quantum igitur ad actus a voluntate imperatos, volun- » tas violentiam pati potest, in quantum per violentiam ex- » teriora membra impedire possunt, ut imperium volunta- » tis exsequantur.

» Sed quantum ad ipsum proprium actum voluntatis, non » potest ei violentia inferri. Et hujus est ratio, quia actus » voluntatis nihil est aliud, quam inclinatio quædam proce- » dens ab interiori principio cognoscente : sicut appetitus » naturalis est quædam inclinatio ab interiori principio, et » sine cognitione. Quod autem est coactum vel violentum, » est ab exteriori principio. Unde contra rationem ipsius » actus voluntatis est, quod sit coactus vel violentus... Potest » homo per violentiam trahi, sed quod hoc sit ex ejus vo- » luntate, repugnat rationi violentiæ (1). »

(1) Sum. th. I. II. p. q. VI, art. IV.

554. PROPOSITIO XII. *Humana voluntas libertate gaudet indifferentiæ.*

Probatur I. ex propria intellectus cognitione, qua voluntati eligenda proponuntur.

Etenim 1^o cum adæquatum intellectus nostri objectum sit ens in genere, intellectus noster bonum in genere, ac proinde plures ac diversas boni rationes cognoscit. Ita tamen varia hæc bona disparata sunt et opposita, ut quod ad unum eorum assequendum utile est, ad plura alia assequenda nihil conferat, imo vero ad quædam impedimento sit. V. gr. quædam conferunt ad bonum honestatis, quæ non sunt ad bonam valetudinem utilia, et sensui molesta accidunt; et vice-versa. Unum solummodo est bonum quod secundum omnem considerationem bonum est, in quo nullus boni defectus, nulla mali ratio apprehenditur, et hoc est felicitas perfecta. Atque idcirco hoc bonum voluntas necessario appetit, ut dictum est (525). At particularia omnia bona, secundum varias considerationes, apprehendimus simul ut bona, ut non bona, ut mala. Voluntas ergo non potest per hujusmodi cognitionem ad hæc bona prosequenda necessario inflecti; sed quemadmodum potest in illa tendere, secundum quod aliqua boni ratio in eis præfulget, ita potest ab iis prosequendis abstinere, secundum quod boni defectum præ se ferunt, atque adeo potest illa aversari, secundum quod accipiuntur ut mala.

2^o Alio modo. Nullum bonum potest ad se necessario voluntatem trahere, aut ejus capacitatem explere, nisi bonum undequaque perfectum. Nam sicut intellectus bonum undequaque perfectum apprehendit, i. e. felicitatem, ita voluntatis inclinatio naturalis est ad bonum hujusmodi; esto, hominem determinate non cognoscere, in quo objecto realiter illud reperitur. Quod si ipse in aliquo objecto perfectam suam felicitatem se reperire experiretur, hoc certe, quia naturalis inclinatio ad se converteret, totamque ejus capacitatem expleret, voluntatem ad se necessario traheret. Sed bona quævis particularia limitata sunt, et a perfecti boni ratione deficiunt: proinde nec naturalis incli-

nationis sunt proportionatum objectum, nec capacitatem voluntatis explere possunt. Repugnat ergo, hæc bona voluntatem ad se necessario trahere; quemadmodum repugnat, effectum excedere causæ virtutem, et capacitatem infinitam actu finito expleri.

3° Quæcunque homo appetit, ideo appetit ut sit felix; nam ut sæpe dictum est, felicitas est ultimus hominis finis. Jam omnia bona determinata quæ ab homine cognoscuntur, vel sunt in se media necessaria ad felicitatem, vel non sunt. Si non sunt, non potest voluntas ex necessario felicitatis amore ad illa necessario proseguenda determinari. Si sunt, homo necessariam eorum cum sua felicitate connexionem non cognoscit. Nam verum suæ felicitatis objectum, quod est Deus, intuitive et experimentaliter non cognoscit. Quemadmodum ergo hoc summum bonum non necessario appetit (524), ita nec media quæ ad illius possessionem necessaria sunt, necessaria potest appetere.

4° Hoc quod dicimus, egregie confirmatur paritate ab intellectu desumpta. Nam illæ solum conclusiones necessariæ intellectus assensum extorquent, quæ sunt evidentes; quæ scilicet cum primis principiis, quibus necessario intellectus adhæret, necessario connexa cognoscuntur. Quæ verò conclusiones evidentes non sunt, sed hinc inde probabiles, etsi ex alterutra parte probabiliores sint, assensum tamen intellectus ex se sibi vindicare non valent; quia earum connexio cum primis principiis non cognoscitur. A pari. Si quæ bona cum ultimo fine beatitudinis, ut media necessaria, connexa cognoscerentur, hæc voluntatis amorem necessario ad se raperent; quæ vero cum ultimo illo fine non cognoscuntur necessario connexa, voluntatis ad se amorem necessario trahere non possunt. Nulla autem bona cum ultimo fine necessario connexa esse homo cognoscit. Ergo. Ita fere s. Thomas (1).

535. Probatur II. ex intimo sensu, qui adeo evidenter libertatem nostram nobis testatur, ut frigus, calorem, dolorem, et affectiones alias quascunque.

(1) *Sum. th. I, p. q. LXXII, art. II.*

1° Etenim ipsam libertatis radicem sentimus in nobis; quæ est intellectus judicium de re quavis multiplex et varium, ac tale judicium, quod ad nullam rem appetendam necessitate absoluta nos determinet.

2° Sentimus in nobis et actus liberos et actus necesarios, ita ut hoc cum illis comparare possimus, et quantum inter se differant, deprehendere. Quis enim v. gr. non sentit, felicitatem se longe aliter velle ac deambulationem in horto et floris odorem?

3° Sentimus nos frequentissime de eligendis deliberare, ac motiva quærere, ut in unam partem potius quam in alteram inclinemur: et in rebus gravioribus, intelligimus adhibendam esse consultationem, ne imprudenter agamus.

4° Non raro, quum pro neutra parte rationes præponderant, alterutram eligimus, solum quia volumus; imo in pluribus quæ cum reflexione agimus, consultationem omnem et motivorum considerationem ut ridiculam dedignamur, ut quum v. gr. agitur de rebus minimis.

5° Actionum quarundam nos auctores existimamus, quarundam non ita, cujusmodi sunt omnes actus quos vocamus indeliberatos, aut affectus qui a nobis non sunt prævisi et aliquam operationem nostram per accidens consequuntur. Hinc de actionibus primi generis, si prospere res acta fuerit, non solum gaudemus, sed etiam nobis ipsi gratulamur, et alias eodem modo nos acturos proponimus; et vice versa, si res male cesserit, non solum tristamur, sed nosmetipsos reprehendimus, et contraria nos acturos statuimus. De cæteris vero ita gaudemus vel tristamur, ut eas aliis auctoribus laudi vel crimini reputemus, aut casui adscribamus, et nos non prudentes aut imprudentes, sed felices aut infelices arbitremur.

536. Probatur III. Ex communi hominum sensu; qui locus est sane infinitus. Præcipua facta indicabo, quæ hanc consensionem manifestant.

1° Libertatis notio apud omnes viget, etiam apud eos qui libertatem humanæ voluntatis negant.

2° Magnum discrimen agnoscunt omnes inter naturales

seu corporis seu animi dotes et virtutes morales, inter naturales defectus et vitia, inter actus indeliberatos et deliberatos, inter actus pueri ac dementis et nocentium delicta, inter operationes brutorum et hominis. Unde autem hoc discrimen, nisi ex libertate?

3^o Sunt apud omnes gentes notiones iusti et iniusti, virtutis et vitii, meriti et demeriti, juris et officii, obligationis moralis, ac legis naturalis. Hæc omnes notiones libertatis conceptum includunt, et persuasionem de libero hominis arbitrio.

4^o Eandem persuasionem ostendunt leges et præcepta, suasiones et consilia, hortationes et preces, laudes ac reprehensiones, promissiones et comminationes, præmia ac pœnæ. Hæc omnia eo spectant, atque eo unice spectare possunt, ut homines ad quædam agenda moveantur, et a quibusdam aliis deterreantur; essentque absurda prorsus et ridicula, si omnes humanas actiones non ex libertate arbitrii, sed ex ineluctabili necessitate procedere arbitraremur.

5^o Ii ipsi qui libertatem speculative negant, practice ita suas actiones moderantur, ita erga cæteros homines se gerunt, ut non minus quam cæteros mortales, se de humanæ voluntatis libertate firmissime persuasos esse luculenter ostendant.

ARTICULUS VII.

Difficultates.

537. Ut modo innuimus, non defuere philosophi, qui ex falsis principiis argumentando, libertatem humanam inficiati sint. Contra eam pugnarunt fatalistæ, astrologi, manichæi, pantheistæ, heterodoxi fere omnes postremæ ætatis, materialistæ omnes et increduli: quibus accedunt ii omnes, qui libertatem verbis fatentur, re negant, inter quos eminent Leibnitzii sectatores. Post ea quæ præmisimus, horum omnium argumenta facile refelli possunt. Referemus breviter, quæ memoratu digniora videbuntur.

538. Opp. I. Voluntas a principio externo, videlicet ab objecto moveri debet, ut actu velit. Ergo ab alio determinatur.

Prob. ant. 1^o Est axioma receptum: omne quod movetur, ab alio moveri.

2^o Voluntas ex se est indifferens ad diversa, ut intellectus. Ut ergo intellectus ab objecto determinatur, ita quoque voluntas.

3^o Secus, ut rationem redderemus volitionum nostrarum, dicendum nobis esset: *volo quia volo*, vel *volo quia possum velle*; videlicet: ratio meæ volitionis est vel ipsa volitio vel ejus possibilitas. Utrumque autem absurdum est.

539. Resp. *Dist. ant.*: Voluntas ut velit, moveri debet ab objecto, i. e. allici aliquo modo ab illo, *conc.*; necessario trahi, *subd.*: si sit undequaque bonum, *conc.*; secus, *nego*.

Ad 1^m De generali hujus effati veritate in ontologia dictum est (O. 383). Quod ad voluntatem attinet, *dist.*: voluntas movetur vel ab alio, vel a seipsa secundum quod vult aliud, *conc.*; semper ab alio, *subd.* ut supra. Voluntas, ut diximus (534), a fine movetur necessario; quia vero vult finem, se movet ad ea quæ sunt ad finem; non tamen necessario; quia nullum bonum particulare ab ipsa apprehenditur ut ad finem necessarium.

Ad 2^m *Dist.*: Voluntas est indifferens indifferentia passiva, *nego*; indifferentia activa, *subd.*: quæ determinetur ab objecto ad agendum, *nego*, quæ determinet seipsam, *conc.* Nempe voluntas in primis spontaneitate non caret, sed est sui actus principium (515): atque hæc est indifferentia non passiva, sed activa. Præterea ad agendum non ab alio determinatur, sed excepta ultimi finis appetitione, seipsam determinat, quum objectum fuerit propositum.

Intellectus vero ad percipiendum determinatur per speciem (568), et ad judicium ab evidentia percepta. Idcirco nulla est paritas adducta; imo si qua est paritas, ea libertati favet, ut supra diximus (534, 4^o).

Ad 3^m *Concedo* non unam tantum causalem, sed utramque; *nego* autem, sive primam, sive alteram, ita ut dicitur, intelli-

gendam esse. Prima enim ita explicanda est. *Volo media, et motivum quo adducor ad ea volenda, est quia volo finem. Volo autem fines subordinatos quia volo finem ultimum: præter hunc tamen, omnia ita volo, ut possem quoque ea non velle.* Altera vero: *volo hoc objectum, eo illectus motivo, quod hoc objectum bonum est, et idcirco eligibile.* In quibus, ut vides, nulla est absurditas. Hinc quoque perspicis, causam quæ in utraque propositione assignatur, non esse causam efficientem electionis, sed *motivum sufficiens* duntaxat. Causa enim electionis efficiens est voluntas sui actus dominium habens (529, 1^o).

540. Opp. II. Si duo bona apprehendantur æqualia, voluntas neutrum eligere potest: nam motiva quæ sive ad unum sive ad alterum appetendum impellunt, se mutuo elidunt. Voluntas itaque si eligeret, sine motivo ageret.

Si vero inæqualia apprehendantur, voluntas ad bonum majus eligendum necessario determinabitur.

Nam 1^o voluntas dicitur eligere quod magis placet. Quod autem placet magis, est illud objectum in quo major boni ratio apprehenditur.

2^o Bonum minus, quod boni majoris assecutionem impedit, verum est malum. Voluntas itaque illud eligendo, malum eligeret.

3^o Ageret proinde irrationaliter, nempe sine ullo motivo. Appetitus autem rationalis irrationaliter agere nequit.

4^o Ergo ut in libra lanx majori pondere deprimitur, ita voluntas a bono majori determinatur.

541. Resp. ad 1^m partem, *negando* quod asseritur, et rationem additam. Nam bona hæc æqualia, quæ supponuntur voluntati oblata, vel sunt ejusdem generis vel diversi.

Si sunt ejusdem generis, motiva quæ ad ipse alliciunt, binis viribus e diametro oppositis comparari non possunt. Sed comparari potius debent binis viribus ad angulum concurrentibus. Sicut enim binæ vires ad angulum concurrentes resolvi possunt in quatuor, quarum binæ sint oppositæ et se mutuo destruant, binæ vero in eundem effectum conspirent; ita motiva quibus, duo objecta ejusdem generis et æqualia

voluntatem alliciunt, alia ipsam alliciunt ad eam boni rationem quæ in utroque viget; et hæc non eliduntur: alia vero alliciunt et intellectum et voluntatem ad unum alteri præferendum; et hæc in conflictu eliduntur. Hinc intellectus, qui ex se non judicat nisi ab objecto determinetur, unum alteri præferre non poterit; voluntas autem quæ seipsam determinat, poterit alterutrum pro lubitu eligere. Neque in hoc sine motivo aget; quia quidquid eligat, semper bonum eliget amore finis.

Si vero bona objecta diversi sunt generis, unumquodque eorum est altero majus secundum diversas considerationes (554, 1^o). Itaque voluntas semper eligit id quod aliquo modo majus esse apprehenditur. Unum autem potius quam alterum considerare, est quidem intellectus proprium; sed ejus quoque applicatio ad hoc vel illud considerandum a voluntate dependet.

Nego autem 2^m partem: cujus negationis ratio ex dictis (527) liquet.

542. Ad 1^m prob. *Dist.*: Voluntas eligit quod magis ipsi placet deliberate, *conc.*; indeliberate, nempe quod ipsam magis allicit, *nego*. Quoniam autem voluntatis deliberatum placitum est ipsa ejus electio, propositio objecta vel huc redit: *voluntas elegit quod eligit*; vel dicit idipsum quod probandum est.

Ad 2^m *Dist.* Bonum minus, per comparisonem ad bonum majus, est verum malum; nempe malum respectu unius finis particularis, *conc.*; respectu finis alterius et finis ultimi, *nego*.

Dist. quoque *min.*: Voluntas illud eligendo, eligeret malum qua malum, *nego*; ut bonum est, vel saltem quatenus est apprehensum ut bonum, *conc.*

Ad 3^m *Dist.* Voluntas irrationaliter ageret, i. e. ageret absque ratione, *nego*; ageret non ex præscripto rationis, *subd.*: si bonum apparens præ vero eligit, *conc.*; secus, *nego*.

Voluntas semper agit juxta aliquod rationis judicium, quæ varias boni rationes, ut eligibiles pro finium diversitate ipsi ostendit. Non tamen semper juxta honestatis regulam,

seu ex præscripto rationis agit. Ratio enim, quamvis plures boni species voluntati commonstret, jubet tamen, ut bonum honestum cuicunque alteri præferatur. Unde si semper ex præscripto rationis ageremus, illud semper omnibus aliis præferremus. Nihilominus etiam quum præeligimus, libere agimus (534, 3°).

Ad 4° *Nego paritatem*: quæ si aliquid valet, valet solummodo quoad motus indeliberatos, qui cientur objectorum lenociniis; non vero quoad deliberatos, etiamsi voluntas se inclinet ad id quod magis eam allicit. Adde et illud: ex voluntate pendere, ut intellectum applicando ad hoc vel illud considerandum, pondus, ut ita dicam, objecti augeat vel minuat.

543. Opp. III. Saltem libertas ex intimo sensu non probatur. Nam:

1° Libertas est indifferentia ad actum. Atqui sensus intimus non hanc indifferentiam, sed ipsum actum renuntiat.

2° Sensus intimus tantummodo testatur, nos libertatis ideam habere, i. e. putare nos, quod libere agamus.

3° Somniantes sibi videntur libere agere; nihilominus non est ita.

4° Si acui magneticæ aut lapidi decidenti desiderium imprimeretur eo tendendi quo tendunt, ac simul sui motus cognitio, existimaret uterque se seipsum movere. A pari.

544. Resp. ad 1^m *Conc. maj.*; *nego min.* Vide superius dicta (535).

Ad 2^m *Nego*. Imo vero idea libertatis nulla esset in nobis, si libertatem nostram non experiremur (536, 1°).

Ad 3^m *Dist.*: Somniantes habent representationem actuum liberorum, *conc.*; eo modo agunt, quo vigilantes se agere, sentiunt, *nego*. Nec somniaremur nos libere agere, si vigilantes libere non ageremus.

Ad 4^m *Nego parit.* Neque acus enim nec lapis ea in se experirentur quæ nos experimur, quum libere agimus aut deliberationem instituimus. Sentiret ad summum lapis, se non vi sua, sed aliena propelli eo quo desiderat, nempe idipsum quod nos sentimus, quum curru vehimur in villam. At certe

si lapis intelligentia donari posset, hæc tam inepta nec cogitaret, nec scriberet; nisi forte et ipse esset incredulus ac materialista.

Quæ ex divina futurorum præscientia opponi solent, in theologia commodius dissolvemus.

ARTICULUS VIII.

* *De facultate motrice.*

545. Pauca quædam subjiciam de facultate motrice; quæ proprie facultas *exsequendi* dici meretur. Quanquam enim facultates quoque perspectivæ et reproductivæ voluntati aliquo modo subjiciantur, et exsequantur quod ab illa decernitur, vis tamen motrix hoc munus habet sibi proprium, ut sit appetitus instrumentum, et juxta varias ejusdem inclinationes, varios in corpore motus cieat ac moderetur.

Notandum tamen, vim hanc, prouti ab appetitu dependet, ad eos solummodo motus se porrigere quos *animales* dicunt et *autonomicos* (52). Motus enim plastici seu automatici non ab appetitu, sed ab extrinsecis agentibus, mediate saltem, dependent.

546. ASSERTIO I. *Facultas motrix a facultate appetendi distinguitur.*

Videlicet membrorum motus, non sunt actus ab appetendi facultate elicti, etsi ab ea imperari possint.

Sane 1° Facultas appetendi non solum motus membrorum imperare potest, sed etiam actus intellectus, sensuum, et phantasie; qui actus multa quæ appetimus, exsequuntur. At certe harum facultatum actus non eliciuntur a facultate appetendi, sed tantummodo imperantur. Nulla igitur est ratio, cur membrorum motus sint actus ab appetitu elicti, et non solummodo imperati.

2° Actus appetitus absolvuntur conjunctione ipsius cum objecto, prouti hoc in apprehensione fulget (504); id quod potissimum verum est in iis actibus, qui non sunt delectatio de objecto obtento, sed in objectum ut assequendum vel ut

exsequendum tendunt. In objecto autem quod est assequendum vel exsequendum, ut est in apprehensione, appetitus nihil agit, sed ipse potius ab illo agitur ac movetur. Igitur primo: quum volumus corpus movere, hic actus terminatur non in motus physici realitate, sed in motu ut est apprehensus, qui appetitum movet. Igitur secundo: motus physicus non producit per appetitum actum.

3° Rursus: quando me movere volo, non motus passivus, sed motus activus huiusmodi actus objectum est. Non enim volo duntaxat ut manus mea moveatur, sed hoc volo, ut ego ipse manum meam moveam. Si autem velle me movere, idem esset ac me movere, actus hic volendi ad motum passivum semper ac necessario tenderet; ad activum autem tendere non posset.

4° Ad hæc: velle est actus plene liber, quem nihil impedire valet. At quod reipsa me moveam, hoc sane potest a pluribus causis, tum externis tum internis impediri. Qui enim v. gr. paralyticus factus est, si quando de suo infortunio non cogitat, vult se movere, et efficaciter vult; cum tamen nec se moveat, nec se movere possit.

547. ASSERTIO II. *Subjectum in quo residet facultas motrix, sunt musculi animati.*

Certe vis animæ propria motricis facultatis radix est ac principium; at non minus verum est, materialem huius vis sedem et instrumentum esse musculos. Horum namque contractio ossa vel organa quibus ii adhærent, dimovet, atque hoc pacto membrum movetur. Non tamen musculi sunt immediatum vis animæ instrumentum, sed nervi quos *centrifugos* seu *motores*, qui in systemate cerebro-spinali originem habent, et musculis inseruntur eosque pervadunt. Ab his enim nervis tota est musculorum contractilitas. Actualis autem contractio est ab anima, mediante fluido nerveo; quo vibrante in nervis, musculi contrahuntur. Idcirco ad hoc ut musculi ex voluntatis imperio contrahantur necessaria est nervorum communicatio cum cerebro, ex quo fluidum nerveum in nervos decurrit. Interrupta nihilominus nervorum cum cerebro communicatione, contrahi adhuc musculi pos-

sunt irritamentis artificialibus, quæ aliquem fluidi imponderabilis cursum in nervis determinent.

548. Quod attinet ad dependentiam facultatis motricis ab appetitu seu sensitivo seu rationali, dicendum 1° non omnium musculorum facultatem motricem appetitui esse subjectam. Sunt enim musculi, quorum contractio appetitus motum naturaliter consequitur; huiusmodi sunt musculi membrorum; qui sunt rubentes omnes, exceptis musculis iridis. Sunt etiam musculi qui appetitui subduntur, sed contrahuntur etiam absque determinatione ab eo accepta: hi sunt musculi apparatus respiratorii. Sunt denique musculi omnino exempti ab appetitus determinatione; videlicet musculi vitæ vegetalis; quorum fibræ sunt omnes pallentes, cordis fibræ exceptis.

Dicendum 2° appetitum sensitivum ex se sufficere ad motricem vim determinandam ad actum. Hoc enim patet in brutis animantibus, et in pluribus motibus hominis indeliberatis, v. gr. in iis motibus qui determinantur ex aversione vel fuga appetitus ab aliquo molesto sensu, aut ex subita iracundia.

Appetitus autem sensitivus vim motricem non determinat imperio proprie dicto. Est enim imperandi incapax; eo quod imperium, cum sit ordinatio unius ad alterum, rationem supponit. Determinat itaque appetitus motricem vim, quatenus actum appetitus vis motricis determinatio naturaliter consequitur, propter consensionem et harmoniam, quæ inter unius ejusdemque animæ facultates viget.

Dicendum 3° facultatem motricem in homine determinari sæpe ad actum vi habitus, ut experientia compertissimum est.

Dicendum 4°, si voluntas renuat, nec appetitum sensitivum, nec habitum quemlibet sufficere ad facultatem motricem determinandam. Nam ii quoque motus qui ex appetitu vel habitu procedunt, si fiant advertente ratione, liberi sunt et imputabiles. Non essent autem ejusmodi, si a voluntate renuente impediri non possent. Idipsum deducens ex necessaria facultatum subordinatione. Voluntas enim cæteris fa-

cultatibus principatur. Etsi igitur ipsa non interveniente, facultas motrix ab appetitu aut vi habitus determinata, agere possit, si tamen voluntas renuat, tam unum principium quam alterum ab actuali determinatione imprimenda impediatur oportet.

Dicendum 5^o facultatem motricem a voluntate determinari, saltem ut plurimum, mediante motu appetitus sensitivi: posse tamen a sola voluntate absque hoc medio determinari.

Primum sic ostendi posse videtur: Bonum quod voluntas appetit, vel est ex se aliquo modo conveniens appetitui, vel nullo modo est illi conveniens, vel est illi contrarium. Si primum contingat, appetitus voluntati consociabitur, saltem ex voluntatis imperio. Si alterum, appetitus hoc saltem bonum ut sibi conveniens reperiet, quod voluntatis tendentia quiescat. Si tertium, præter hoc quod modo diximus, cum magnus debeat esse voluntatis conatus, ut aliquid quod appetitui contrarium sit, appetat, vix fieri potest ut ex hac inclinationis vehementia, aliquis motus etiam in appetitum non redundet (306, 2^o). Sic quum ad executionem ventum erit, facultas motrix ab appetitu immediate movebitur.

Pars altera assertionis ipsa experientia probari posse videtur. Neque ulla apparet ratio, cur voluntas, ut vim motricem ad actum inducat, sensitivo appetitu indigeat. Imo vero ad principatum illum voluntatis quo facultatibus sibi subjectis libere utitur, hoc pertinere censendum est, ut etiam sensitivo appetitu renuente, facultati motrici impedire possit.

Quum autem voluntas facultatis motricis aut alterius cujuscunque facultatis actum libere imperat, se habet ad modum causæ moralis, non vero ut causa physica (O. 264, 7^o). Videlicet, quum anima motum vult, suum actum volendi sentiens, juxta hunc vim exerit ad motum producendum. Idemque dicendum de cæteris quæ ex voluntatis imperio fiunt.

EXPLICIT PSYCHOLOGIA.

THEOLOGIA.

1. De summa causa omnium quæ sunt ac fiunt, exemplari, effectrice, finali; de omnis veritatis ac rectitudinis essentiali norma, ordinisque omnis ac pulchritudinis perfectissimo archetypo, de Deo nimirum optimo, maximo, in quo omnis sapientiæ centrum est, quantum infantia feret nostra, intraque naturalis cognitionis limites, ipso juvante, disserendum nobis in præsentia est. Argumenti hujus præstantia, gravitas, suavitas, ac maxima utilitas tyronis philosophi alacritatem, quam quod maxime, excitare debet.

Primo de Dei existentia: tum de ejus essentia, attributis, externis operationibus, ex ordine agemus.

LIBER PRIMUS.

CAPUT I.

DE DEMONSTRATIONE EXISTENTIÆ DEI.

ARTICULUS I.

Utrum Deum esse debeat ac possit demonstrari.

2. De existentia Dei disceptantibus hoc primo quærendum occurrit, an ea demonstrari indigeat. Quam quæstionem facile solvemus cum s. Thoma, statuentes, propositionem hanc: *Deus est*, esse notam per se *secundum se*, non vero *quoad nos*; ac propterea quoad nos demonstratione indigere (1).

Ut in logica dictum est, eæ propositiones dicuntur per se notæ, in quibus prædicatum ad ipsam subjecti essentiam pertinet. Hoc sufficit ut propositio sit nota per se secundum se, quantum nempe ex parte terminorum requiritur. Sed ut sit etiam nota per se quoad nos, necesse est insuper, ut cognoscamus subjecti essentiam, et quid sit quod per prædicatum significatur. Si enim hæc cognoscimus, propositis terminis, statim intelligemus, ejusmodi subjecto prædicatum illud non posse non convenire. Secus autem, si ea non cognoscimus. Hoc pacto prima principia sunt omnibus nota per se, quia omnes cognoscunt quid sit subjectum illorum, quid sit prædicatum: quædam vero aliæ propositiones, licet secundum se sint per se notæ, non tamen omnibus per se notæ sunt ex opposita ratione, ut v. gr. hæc: *animus est simplex*; quæ nulli mortalium per se nota est, sed demonstrari debet ex effectibus.

(1) *Sum. th.* p. I, q. II, art. I.

Jam propositio illa: *Deus est*, proculdubio est nota per se, quantum in ipsa est: nam Deus essentialiter est; proindeque qui cognosceret quid Deus sit, is statim intelligeret Deum non posse non esse. Cum vero nobis datum non sit, Dei essentiam intueri, non cognoscimus quid Deus sit: solum post cognitam ejus existentiam, componere argumentando possumus ideam, quæ per elementa quædam analogica Deum repræsentet. Igitur Deum esse, non est nobis notum per se: ac propterea Dei existentia demonstratione indigere dicenda est. In hac re profecto adversarii quibuscum concertandum nobis est, abunde consentiunt.

3. Cæterum nihil communius apud omnium ætatum sapientes, quam Dei existentiam demonstratione cognosci firmarique oportere: quod quidem et disertis sententiis docent, et facto ipso, quum quæsitis unde quaque argumentis suadere nituntur Deum esse. Eodem etiam humani generis sententia conspirat: interrogati enim homines, unde sciant Deum esse, non sane respondent, id esse notum per se, sed vel ratione aliqua vel saltem auctoritate in eam cognitionem se adductos esse fatentur. Neque aliam viam ad Deum cognoscendum Scripturæ memorant (1). Ita ut et apud theologos, et apud philosophos, et apud genus humanum universum sit vere propositio nota per se: *Dei existentiam non per se esse nobis notam, sed argumentatione.*

Non defuere qui in adversam sententiam concesserint, rati Dei existentiam aut idea innata, aut intuitionem quadam ipsius Dei cognosci (*Psych.* 408. 442). Nobis in præsentī monuisse sufficiat, rem tanti momenti opinionum varietatibus committendam non esse. Vel itaque hi nobis hoc saltem concedunt, etiam demonstratione Dei existentiam contra adversarios firmiter statui posse, et nos in præsentī adversarios non habent; vel si hoc quoque negant, argumentis præsto erimus, quibus demonstrationes afferri solitas impugnant.

4. Altera quæstio est, utrum Dei existentia demonstrari queat. Negant quicunque opinantur, humanam mentem non

(1) *Psalm.* XVIII. *Sap.* XIII. *Act.* XIV, 14-16. *XVII*, 24 seq. *Rom.* I, 19 seq. *I Cor.* 21 et alibi.

posse ad Deum cognoscendum assurgere, nisi per revelationem ac fidem; quique putant non per conceptus, sed per instinctum quemdam animi ac sensum Deum apprehendi; ac demum quicumque cum Kantio rationi theoreticæ vim omnem adimunt transcendendi experientiæ limites, rerumque insensibilium realitatem inferendi. Sed hos omnes jam satis in logica confutavimus (L. 671, 669, 516). Respondendum igitur, Dei existentiam non posse a priori demonstrari; nam neque Deus causam habet, neque ejus essentia nobis nota est (L. 296); posse tamen demonstrari a posteriori videlicet per ejus effectus, qui nobis sunt ipso notiores; ut ex dicendis patebit.

5. Hæc fere opponi solent.

1^o Prima veritas demonstrari non potest. Deus autem prima veritas est.

2^o Dei existentia idem est ac ejus essentia. Sed Dei essentia non potest ratione cognosci. Ergo nec Dei existentia.

3^o Dei existentia est nobis naturaliter nota. Ergo demonstratione non indiget.

6. Resp. ad 1^m *Dist. maj.*: prima veritas in ordine cognitionis, *conc.*; prima veritas in ordine rerum, *nego*. Et *contradist. min.*

Ad 2^m *Dist. maj.*: secundum se, *conc.*; conceptu nostro *nego*. *Dist. min.*: intuitive et adæquate, *conc.*; deductive et inadæquate, ac saltem quid hoc nomen, *Deus*, significet, *nego*.

Quum dicimus *Deum esse*, vox illa est abstractam et indeterminatam existentiae notionem exprimit (L. 153); non autem esse Dei, quo Deus ipse in se subsistit, quodque est ejus essentia. Licet igitur Dei essentiam ignoremus, possumus tamen ex effectibus hujus propositionis, *Deus est*, veritatem cognoscere, dummodo cognoscamus quid Dei nomine veniat (L. 566).

Ad 3^m *Dist. ant.*: quatenus mens humana et rerum naturam et semetipsam considerans, sponte instituit eas comparationes et ratiocinationes, quibus ad Dei cognitionem saltem imperfectam ascendit, *conc.*; alio sensu, *nego*. Et *nego cons.*

Etenim demonstratio existentiae Dei, quod ad rei substantiam attinet, iis ipsis continetur ratiociniis, quibus mens humana ad Deum cognoscendum sponte devenit.

ARTICULUS II.

De argumentis hanc in rem afferendis.

* 7. In eligendis argumentis quibus nobis utendum sit, non est cur ambigamus. Videlicet ea tantummodo afferemus, quæ cum validissima semper habita et communiter recepta sint, tum etiam facilius et enucleari et intelligi possunt. Ne igitur quis arbitretur, omnia argumenta quibus in præsentī abstinemus, a nobis rejici, aut minus valida existimari; imo quædam ex iis, ac maxime quæ ex possibilitatis realitate ac necessitate (O. 86, 1^o); ex legis moralis imperio ac synderesis phænomenis; ex humana historia universa erui possunt, et invicta prorsus et pulcherrima existimamus; sed neque temporis angustiae nos adeo spatiari permittunt, neque causæ quam agimus quidquam derogabitur, si non omnia quæ nobis præsto adsunt, præsidia in aciem deducamus, sed quædam intra vallum veluti contineamus, ut eminus hostibus minitentur.

* 8. Ut diximus (4), argumenta omnia quæ ad Dei existentiam demonstrandam afferri possunt, a posteriori sunt et ex effectibus. Unum tamen a nonnullis affertur, quod vocari solet *quasi a priori*, vel *partim a priori*, *partim a posteriori*, et ut quidam dicunt, *a simultaneo*, quodque a s. Anselmo primo propositum (qua mente aut quem in finem non disputo) (1), a s. Thoma et a schola rejectum, a Cartesio deinde ejusque sectatoribus, atque ab iis maxime qui Dei visionem menti humanæ largiti sunt, avidè arreptum ac tenaciter defensum, hodieum philosophorum sententias in varia distrahit. Quod argumentum nec præterire fas est, quandoquidem disputatione philosophorum adeo sit celebratum, nec tamen diutius in illo immorari placet; postremo quid de illius robore sentiamus aperiemus.

(1) In Prologio, c. II.

* 9. Argumentum est hujusmodi. Est in meo intellectu idea Entis perfectissimi, quo majus cogitari nequit. Ergo hoc Ens est etiam in re extra intellectum.

Prob. consequentia. Si ens quo majus cogitari nequit, esset solum in intellectu et non in re, jam non esset ens quo majus cogitari nequit. Etenim majus est esse in re, quam in intellectu et in solo statu ideali. Cogitando ergo ens illud quo majus cogitari nequit, esse in re, cogito aliquid majus eodem, in solo intellectu existente.

* 10. Hujusmodi est argumentum in sua forma primitiva, quanquam a diversis diversimode proponatur. Sed omnes in hoc conveniunt, quod ab idea Dei vel possibilitate Dei, realem ejusdem existentiam deducant. Jam, ut candide fatear quod sentio, non possum plane recedere ab iis, qui in hac argumentatione, si ea non intelligatur esse ad hominem, et ad confundendos atheos excogitata, ingeniosum sophisma vident, et nihil aliud. Tota enim hæc argumentatio continetur æquivocatione inter existentiam, quæ sit ideale constitutum, ideale complementum, idealis actus entis perfectissimi, et existentiam, quæ sit constitutum reale, complementum reale, actus realis ejusdem; ac propterea simul permiscet præstantiam intra ordinem idealem, qua una essentia alteri antecellit, cum præstantia quam ordo realis habet præ ideali, i. e. ens supra nihilum.

* 11. Dissolvi itaque posse argumentum videtur, si propositiones quibus probatur consequentia, ita distinguantur.

1^a Si ens quo majus cogitari non potest, esset solum in intellectu et non in re, jam non esset ens quo majus cogitari non potest, *dist. conditionem*: si hoc ens explicite cogitaretur ut merum possibile, quin inter ejus constitutiva idealia collocaretur existentia, *conc. conditionalem*; si hoc ens, licet in re non existens, cogitaretur tamen ac mente fingeretur ut existens, *subd. conditionatum*: non esset ens quo majus cogitari potest intra ordinem idealem cogitabilitatis, *nego*; comparato ordine ideali cum reali, iterum *subd.*: et hæc præstantia est præstantia essentiae super essentiam, *nego*: entis supra nihilum, *conc.*

2^a Majus est esse in intellectu et in re, quam in solo intellectu. *Contradist.*: Majus est, comparato ordine ideali cum ordine reali, et quidem præstantia quam habet ens supra nihilum, non vero essentia super essentiam, *conc.*; majus est in ordine ideali, *subd.*: si illud ens cogitetur explicite ut merum possibile, *conc.*; si idem, licet in re non existens, mente fingatur ut existens, *nego*.

* 12. Quæ omnia sic breviter complexus est s. Thomas: « Dato etiam quod quilibet intelligat, hoc nomine, Deus, » significari hoc quod dicitur, scilicet illud quo majus cogitari non potest; non tamen propter hoc sequitur quod » intelligat, id quod significatur per nomen, esse in rerum » natura, sed in apprehensione intellectus tantum. Nec po- » test argui quod sit in re, nisi daretur quod sit in realiquid, » quo majus cogitari non potest: quod non est datum a » ponentibus Deum non esse (1). »

* 13. Duo tamen, quæ in hoc argumento vel supponuntur vel includuntur, profecto sunt vera.

1^m est: ens infinitum non existens actu esse quiddam contradictorium: esset enim dependens ab alio, adeoque non infinitum. Idcirco diximus: si quis concipiat ens infinitum explicite ut possibile et non ut existens, ab eo infinitum non concipi. Sed ex hoc inferri solummodo potest: si ens infinitum actu non existit, neque existit semper, esse prorsus impossibile; non autem potest inferri, ipsum existere extra intellectum. Notæ enim subjecti essentielles ipsi tribuendæ sunt, secundum quod ponitur ipsum subjectum. Si ergo subjectum ponitur solum in ordine ideali, essenziale quoque existentiae prædicatum ipsi tribuendum est in ordine ideali. Hæc autem propositio: *Ens inter cujus idealia constitutiva est existentia, non existit extra mentem*; nullam continet contradictionem.

2^m Si quis essentiam divinam intueretur, is immediate intelligeret Deum non posse non esse; quemadmodum intuitibus nobis essentiam trianguli, immediate evidens est,

(1) *Sum. th. p. I, q. II, art. 1, ad 2. Cf. quoque Contra Gent. lib. I, c. XI.*

triangulum quatuor latera habere non posse. Sed noster intellectus Dei essentiam non intuetur, nec intueri potest, Deumque cognoscit solum ex effectibus. Ontologi quidem qui putant Deum a nobis videri (P. 408), jure quodam suo, argumento quod rejicimus, uti possunt; sed quicumque in opposita sententia est, aut extra Ontologorum hypothesim arguit, nobiscum sentiat oportet.

14. Sed jam, domesticis hisce dissidiis omissis, ad adversarios quibuscum nobis vere concertandum est, deveniamus. Hi *atheï* nuncupantur, i. e. sine Deo: horribile nomen, quod quicumque ferat, suam ipse condemnationem ac pœnam pronuntiat. Non tamen omnes qui *atheï* dicuntur, Dei existentiam inficiantur aut sophismatibus impugnant. Sunt enim *atheï* tam *negativi*, quam *positivi*: illi sunt, si qui sunt, qui Dei existentiam ignorant: hi qui præfracte negant. Contra hos triplici argumentorum genere utemur. Primum a rerum in genere existentia ducitur, alterum a mundi spectabilis ordine, tertium ab humani generis consensu. Primum vocant *metaphysicum*, alterum *physicum*, tertium *morale*.

15. Nota autem ac præ oculis semper habeto, Dei nomine in præsentī quæstione intelligi: *Ens quoddam supremum, a quo rerum universitas dependet*. Quæ definitio nominalis est, et confusa elementa continet; non enim explicat, an absolute sit, an vero relative supremum, nec quomodo res ab ipso dependeant. Convenit tamen cum idea quam omnes ubique gentes de Deo habuerunt, ipsisque *atheï*s non displicet. Neque mirum esse debet eam desumi ab effectibus, omnia enim Dei nomina ab effectibus derivare solemus, quia per hos tantum Deus cognoscitur.

CAPUT II.

ARGUMENTUM METAPHYSICUM.

ARTICULUS I.

Exponitur argumentum.

16. PROPOSITIO I. *Cum repugnet omne id quod est, esse productum et contingens, infertur ens improductum et necessarium existere.*

1º Si quid existit, datur ens improductum. Nam quidquid est, aut productum est aut improductum. Est evidens.

Atqui non possunt omnia quæ sunt, esse producta. Ergo.

Probatur minor. Omne ens productum, ab alio productum est: patet ex principio causalitatis. Hic igitur productor alterius, vel est et ipse productus, vel non. Si non est, datur ens improductum, quod contendimus. Si est productus, debet esse ab alio productus. Hunc vero alium, nisi sit improductus, factum ab alio fateare necesse est. Hunc alium rursum ab alio, atque hac porro ratione perpetuo urgere, donec ad improductam causam pervenias, in eaque consistas.

Si igitur aliquid existere fateris, fateri quoque debes, existere Ens improductum, nisi dicere malueris, vel aliquid fuisse a nihilo productum, vel duo entia se mutuo produxisse, vel in infinitum posse procedi, quin ad causam improductam perveniatur: quæ omnia manifeste repugnant.

Quoniam igitur aliquid existit, saltem mea cogitatio, existit quoque ens improductum, ens necessarium, quod a nullo dependet, et a quo omnia dependent. Hoc autem ens est Deus (15). Existit ergo Deus.

17. 2º Si quid potest existere, datur ens absolute necessarium.

Si impossibile non est aliquid existere, profecto aliquid

existit, aliquid semper existit. Nam a nihilo nihil: si ergo aliquando nihil fuisset, nihil unquam existere potuisset. Si igitur aliquid potest existere, aliquid existit. Hoc autem vel contingens est, vel absolute necessarium. Si contingens, necesse est ut ab alio ad existendum determinetur: quidquid enim contingens est, non est ex se determinatum ad existendum, secus esset necessarium. Illud autem aliud, si et ipsum contingens est, ab alio determinetur necesse est. Et sic tandem ad ens absolute necessarium deveniendum erit.

Sed certe non est impossibile aliquid existere. Ergo existit ens absolute necessarium, existit Deus.

48. Notandum 1° Deus cum sit ens improductum, dicitur et est *ens a se*, non *effective*, quatenus fuerit suiipsius causa, sed *formaliter* seu *negative*, quatenus non habet ab alio ut sit.

2° In Deo essentia et existentia unum prorsus idemque sunt. Non modo enim essentia actualis ejus idem est ac existentia, quemadmodum in omnibus entibus verum est (O. 58, 2°); sed etiam essentia ejus intelligibilis; id quod de nulla re contingente dici potest: nullius enim rei contingentis essentia est actu esse; et idcirco in rebus contingentibus essentia possibilis a reali distinguitur, ut ens in potentia ab ente in actu, nempe ut non-ens ab ente (O. 57).

ARTICULUS II.

De effugio atheorum ad seriem infinitam.

49. PROPOSITIO II. *Series infinita contingentium, independens ab Ente necessario, plane repugnat.*

Ut vim allati argumenti athei eludere videantur, quoniam affirmare verentur, aut nihilum fuisse rerum causam, aut duo entia se mutuo produxisse, ad seriem infinitam productum et productorum confugiunt: aientes per hujusmodi seriem explicari posse rerum existentiam, quin ad causam necessariam et improductam devenire necesse sit. Ut ex hoc

latibulo atheos exturbemus, demonstrabimus hanc quam seriem supponunt, esse dupliciter impossibile: 1° quam infinita; 2° quia tota ex contingentibus constare supponitur.

20. Prima pars ostenditur ex repugnantia numeri infiniti, etiam successivi, quam in ontologia demonstravimus (O. 350), et ex repugnantia mundi æterni, de qua cosmologia (286-293).

Sed series quam athei obtrudunt, has insuper absurditates in infinitate sua sibi proprias habet.

1° Non unam tantum seriem infinitam admittere coguntur athei, sed tot series infinitas, quot sunt rerum species, in productionis ordine a se invicem independentes; nam v. gr. planta plantam, et quidem *juxta genus suum*, non vero animal producit, et viceversa animal animal, non plantam gignit. Nisi velint insuper et immanen illam absurditatem recipere, quod ex vegetalibus imperfectioribus perfectiora, et ex his animalia ad hominem usque prodierint. Si igitur plures series independentes admittunt, vel unam faciunt altera majorem, ac tunc habebimus unum infinitum altero majus; vel omnes dicunt æquales, ac tunc certe si series cunctæ in unum colligantur, summa serierum omnium numerum præbebit unaquaque collectione majorem. Potest ergo inveniri numerus unaquaque collectione major. Nulla igitur collectio hujusmodi erat infinita.

2° In serie infinita v. gr. arborum, numerus foliorum perfecto ipsarum arborum numerum superat. Quomodo ergo series hæc infinita dicitur?

3° Denique vel athei sunt materialistæ, vel non. Si primum, novum atheismo addunt absurdum. Si alterum, quomodo per hanc seriem infinitam, animarum originem explicant? Anima enim, cum simplex sit, produci nequit nisi per creationem (P. 202). Creatio autem, uti videbimus, vim postulat infinitam.

21 Probatur secunda pars.

Etiamsi hæc series infinita permittatur, tamen quia tota ex contingentibus constat, sine causa improducta et in existendo necessaria existere nequit.

Nam 1^o ut quodlibet contingens est per se insufficientis ad existendum, ita et quævis contingentium collectio. Contingentia enim ad essentiam pertinet, et per collectionem non tollitur (L. 218; 2^o b). Igitur sicut ex duobus insufficientibus non potest fieri unum sibi sufficiens, ita ex infinitis insufficientibus sufficientia nulla potest exurgere. Imo potius quemadmodum crescente insufficientium numero, totalis insufficientia crescit, ita crescit collectionis insufficientia, et infinita evadit, si ex terminis constet infinitis.

Igitur sicut quodlibet contingens, quia per se insufficientis ad existendum, eget ad existendum aliqua causa a se distincta, ita et quævis contingentium collectio, etiamsi ponatur infinita.

Huc facit paritas illa: si duo vel tres pauperes sunt sibi insufficientes, nonne ridiculum foret asserere, infiniti si fiant, fore collectionem hanc sibi sufficientem?

22. 2^o Si nullus omnino terminus in serie hac est per se sufficiens ad sequentes producendos, profecto tota series est per se insufficientis ad existendum: adeoque eget causa quæ sit extra contingentium seriem.

Atqui nullus omnino in hac serie terminus est per se sufficiens ad cæteros producendos.

Etenim ad producendum alterum requiritur productoris existentia. Sed nullus terminus est per se sufficiens ad existendum, cum ab alio dependeat. Ergo nullus terminus est per se sufficiens ad producendum.

Supponatur catena ex alto pendens longitudinis incognitæ. Unusquisque videt, nullum catenæ annulum esse per se sufficientem ad cæteros sustinendos, eo quod nullus est per se sufficiens ad sustinendum se. Hinc deducimus, catenam illam non posse ita ex alto pendere, nisi ab aliqua vi ponderi proportionata sustentetur. Nonne se præberet egregie ridiculum, qui assereret hoc utique verum esse, si catena ponatur longitudinis finitæ, non vero si ponatur infinitæ? Atqui hæc est atheorum sapientia.

23. 3^o Omne id quod per productionem efficitur, est ens quoddam *conditionale*, quod nimirum non existit, nisi posita

præcedentis existentia. Series igitur contingentium est series conditionalium, quæ ita se habet:

Est A si est B,
Est B si est C,
Est C si est D,

.

Sane seriei huic A, B, C, D . . . nunquam, ex toto vel ex parte, tribui poterit existentia, nisi tandem aliquando de aliquo termino X, absolute ac sine ulteriori conditione, affirmetur existentia.

Producatur jam ista series quantumlibet, etiam in infinitum: ejus profecto natura non mutatur. Nunquam igitur existent vel infiniti conditionales termini, nisi existat conditio aliqua quæ conditionalis non sit; videlicet causa ejusmodi, quæ non contingens sit, sed necessaria.

ARTICULUS III.

Difficultates.

24. Opp. I. Dei existentia nequit demonstrari ex rebus contingentibus. Etenim

1^o Contingentis idea supponit ideam necessarii; quia ens contingens est ens non necessarium. Ergo quando cognoscimus contingens, jam ens necessarium cognoscimus.

2^o Per ea quæ necessaria non sunt, nequit demonstrari id quod est necessarium. Entia autem contingentia necessaria non sunt.

3^o Effectus omnis exigit solum causam sibi proportionatam. Sed causa proportionata contingentis potest est aliud contingens. Ergo per entia contingentia demonstrari nequit necessarium.

4^o Effectus finitus non potest nos adducere in cognitionem causæ infinitæ.

25. Resp. *Neg. ant.*

Ad 1^m Resp. *Tr. ant.* ejusque probatio. *Dist. cons.*: nempe

quando habemus ideam contingentis, habemus quoque ideam necessarij, *conc.*; quando cognoscimus existentiam contingentis cognoscimus quoque existentiam necessarij, *subd.*: hanc post illam, et quidem per deductionem, *conc.*; hanc ante illam utcumque, *nego*.

Resp. 2^o *Dist. ant.*: Supponit ideam necessitatis *tr.*; ideam Entis absolute necessarij, *nego*. Facile enim largiar, necessitatem ante contingentiam cognosci, spectato præsertim iudiciorum ac certitudinis ordine (L. 427, b; 437, 5^o). Sed necessitatis habere ideam, aut aliquid cognoscere necessarium, non est idem profecto ac Ens necessarium cognoscere. Idea enim necessitatis ex multis hauriri potest, quæ in ordine ideali necessaria cognoscimus, vi principii contradictionis.

Ad 2^m *Dist. maj.*: Per eas præmissas quæ nullam habent necessitatem, *conc.* (L. 404, 290): per ea entia quæ non sunt necessaria, *nego*. *Tr. min.*

Dist. cons.: Si propositio, in qua affirmatur eorum existentia, non sit necessaria saltem hypothetice, *conc.*; secus, *nego*. Jam licet entia contingentia necessaria non sint, nihilominus propositio in qua eorum existentia affirmatur, necessitatem habet, non quidem absolutam, sed hypotheticam; quæ necessitas sufficit ad conclusionis certitudinem.

Neque dicas, hoc pacto necessitatem existentiae Dei non esse absolutam, sed hypotheticam. Alia enim est necessitas existentiae Dei, alia necessitas conclusionis, in qua affirmamus existentiam Dei. Hæc quidem est hypothetice necessaria; non vero affirmat Deum esse hypothetice, sed absolute necessarium.

Ad 3^m *Dist. maj.*: Absolute et adæquate proportionatam, *conc.*; hypothetice solum et inadæquate, *nego*. Et *contradist. min.* Sane contingens causa est ad alterum producendam proportionata, *si existit*. Ergo hypothetice proportionata. Sed et inadæquate. Existit enim dependenter ab alio, vel a serie præcedentium. Hæc igitur series tota, una cum causa prima et in existendo necessaria, causam adæquatam constituunt cujuscunque contingentis (20, seq.).

Ad 4^m *Dist. I.* e. non potest manifestare nobis existentiam

causæ, quæ est infinita, *nego*; infinitam ejus potentiam, *subd.*: si effectus a causa processit per creationem, *nego*; secus *trans.*

26. Inst. Si existentia entis contingentis esset necessario connexa cum ente necessario, jam Ens contingens necessarium esset.

Resp. *Dist.*: Si esset connexa necessitate absoluta, et ex parte Entis necessarij, *conc.*; si necessitate hypothetica, et ex parte entis contingentis, *nego*.

Ens necessarium non necessario producit ens contingens, sed libere. Igitur ex eo quod existat ens necessarium, non sequitur existere ens contingens. At ens contingens, *si existit*, necessario dependet ab Ente necessario. Idcirco necessitas hujus connexionis est hypothetica; et ex una parte tantum.

27. Opp. II. Series illa infinita nullum implicat contradictionem. Nam:

1^o Series causarum sine causa ultima non repugnat. Ergo neque sine prima.

2^o Plures auctores docuerunt mundi æterni possibilitatem.

3^o Postremo in hac serie singuli termini sunt possibles. Ergo et tota series. Collectio enim hæc singulorum possibilitatem non tollit.

28. Resp. *Nego ant.*

Ad 1^m *Conc. ant.* et *nego cons.* et *paritatem*. Nam series sine causa ultima nec est, nec potest unquam fieri actu infinita: ac præterea habet causam adæquatam in Ente necessario. At series atheorum ponitur actu infinita, et ab Ente necessario independens.

Ad 2^m *Dist.*: Cum dependentia a causa improducta, *tr.*; sine hac dependentia, *nego*. Igitur ex illorum quoque sententia, atheorum series ex hoc altero capite absurda semper habita est et *intolerabilis error* (1). Nobis absurda est ex utroque capite.

Ad 3^m *Dist. ant.*: Sunt possibles *extrinsece*, *nego*; *intrin-*

(1) S. Thomas in *Sum.^a th.* p. I, q. XLVI, art. II, ad 2. De ejus sententia alibi locuti sumus. (C. 285.)

sece, subd.; seorsum sumpti, *tr.* (O. 86, 1°); collective sumpti in serie infinita, *nego.* *Nego* insuper *consequentiam*. Nam possibilitas intrinseca singulorum a possibilitate intrinseca seriei infinitæ existentis est aliquid omnino diversum. Possibilitas enim intrinseca singulorum sita est in notarum, quibus singula entia constituuntur, sociabilitate: possibilitas vero infinitæ collectionis contineretur sociabilitate ideæ multitudinis existentis, cum idea infiniti. Igitur quemadmodum a possibilitate unius entis non possum deducere possibilitatem alterius entis quod notis diversis constet; ita a possibilitate hujus et alterius entis colligere nequeo possibilitatem multitudinis hujusmodi entium, actu infinitæ.

Ad rat. add. *Dist.*: Ita ut per hoc possibilitatem ipsa non acquirat, *conc.*; ita ut acquirat, *nego.* Adde, quod data quoque intrinseca seriei possibilitate, ea esset adhuc extrinsece impossibilis; quia collectio non tribuit singulis entibus extrinsecam possibilitatem, quam sine Ente necessario non habent. Est autem iterum intrinsece impossibile, ut actu existat quod intrinsece impossibile est: repugnat enim effectus sine causa.

29. Inst. Singuli termini sunt extrinsece possibles. Nam unusquisque habet causam in præcedente.

Resp. *Nego ant. Dist. prob.*: causam hypothetice sufficientem, *conc.*; absolute, *nego.*

CAPUT III.

ARGUMENTUM PHYSICUM.

ARTICULUS I.

Expositio.

30. PROPOSITIO III. *Ex admirabili mundi ordine luculenter ostenditur, superiorem quamdam intelligentiam rebus omnibus præesse.*

Supponimus, ut supponi debet vi principii causalitatis,

mundum habere causam, saltem quoad statum in quo est. Hoc præstituto; en breviter argumentum:

Agens quod certa et apta media ad certos fines disposuisse cernitur, est intelligens.

Sed causa a qua mundus prodiit, certa et aptissima media ad certos fines disposuisse, evidenter cernitur.

Ergo causa a qua mundus prodiit, est intelligens.

Ad sentiendam evidentiam minoris, satis est ut circumferas oculos, et vel mundum obiter consideres, vel rem quamcunque quæ sub oculos incidat, momento respicias. Videbis enim manifeste, et in maximis et in minimis corporibus, et in singulis eorum partibus, et in eorum mutuis relationibus, sapientissimos fines a rerum Conditore constanter intentos, et mirabiliter obtentos.

Ut vero consideratio hæc te magis percellat, quædam capita indicabo, quibus expensis, splendidissima supremæ hujus intelligentiæ vestigia in finali mundi ordine admirata ubique deprehendes.

1° Res quæ in hoc aspectabili mundo ad suos quæque fines ordinatæ cernunter, sunt omnino plurimæ. Sunt enim omnes, sive totum aliquod constituent, sive partis rationem habeant. Veteres ex vegetalis tantum animalisque regni consideratione hoc argumentum confirmabant. Nunc ex minerali quoque id cumulatissime præstamus, post deprehensas mirabiles crystallizationis leges. Omnia, omnia plane, *in numero, pondere et mensura!*

2° Una eademque ordinis ratio in pluribus elucet uniformiter individuís, imo et in pluribus speciebus, quæ ad eundem genericum typum formatæ sunt, Consule historiæ naturalis scriptores.

3° Hæc tamen uniformitas in diversis speciebus opportunas recipit mutationes, pro varietate indolis cujusque speciei, medii in quo degunt, regionis quam inhabitant necessitatum et instinctuum quibus subjiciuntur, omnium denique conditionum existentiae. Considera v. gr. indumenta, arma, ora, ungues animalium diversorum.

4° Unus idemque finis, industriis et artificiis diversissi-

mis, ac sub variatis infinite formis, a diversis obtinetur. Sit in exemplum reproductio plantarum, quæ si per semen obtineatur, tam varia est, quanta antherarum, stigmatum et pollinis varietas. Hæc autem varietas tanta est, quantam in floribus demiraris. Quædam præterea plantæ per ramos quoque, per gemmas, per folia reproducuntur.

5° Inter fines a Conditor intentos habetur harmonica subordinatio; ita ut unaquæque pars finem sibi proprium assequatur, et in hoc cæteras partes juvet, omnesque simul ad totius conservationem et actionem concurrant. Considera organa plantarum et animalium.

6° Una eademque res pluribus finibus simul obtinendis mirum in modum aptata deprehenditur: aer v. gr. respirationi animalium, vocalibus sonis tam emittendis quam excipiendis, avium volatui, nutritioni animantium, quæ sugendo vitam alunt, nutritioni plantarum, continendæ evaporationi, beneficiis ventorum, rori et pluviis, combustionibus, crepusculis ita opportune inservit; ut quidquid horum consideres, ad id unum aer, cum talibus elementis, cum tali densitate, cum tali elasticitate, destinatus esse videatur. Et e converso organa respirationis, organa vocalia, organa auditus et cætera quæ propter fines suos aëre utuntur, ad usum hunc mirabiliter sunt disposita.

7° Non in rebus solum est sapientissimus ordo, sed etiam in earum motibus, et in viribus ex quibus motus procedunt, et in legibus quibus motus temperantur. Interroga mechanicos et astronomos.

8° In his omnibus mirabilis viget constantia: nam rerum formæ, motus, vicissitudines iisdem perpetuo legibus temperantur, et ad mundi conservationem diriguntur. Hinc scientiæ omnes physicæ.

9° Quæ constantia multo est hinc mirabilior, quod ex una parte res singulæ caducæ sunt, corruptibiles sunt, ac brevi deficiunt; ex altera vero, magna est virium contrarietas ac pugna, ex qua summa rerum omnium perniciēs facile oriri posset. Cogita parumper quid fieret, si v. gr. abrumperetur vis projectionis aut attractionis, respectu telluris.

10° Hæc omnia dum disponebat rerum Conditor, ex una quidem parte finium exigentiam, at ex altera ordinem quoque symmetricum et harmonicum, omnemque pulchritudinem continenter spectabat. Hanc enim semper in suis operibus studiose quæsivit, et cum utilitate artificiose conjunxit (O. 403, 1°).

11° Demum leges secundum quas hæc omnia fiunt, renovantur, moventur, connectuntur, a materiæ essentia nullatenus pendent: sunt ergo libere constitutæ.

Hæc admirentur athei et erubescant, vocemque rationis, immo rerum omnium clamorem, impietatem insipientiamque suam ipsis exprobrantem audiant. In his enim omnibus adeo evidentiæ sunt intelligentiæ non modo, sed altissimæ quoque sapientiæ vestigia, ut si quis ea tantisper consideret, is facilius in animum induxerit, ea quæ videt ac tangit non existere, quam tantum ordinem tantamque pulchritudinem a cæco casu, et ex brutarum virium conflictu prodiisse. Ipsi athei, si sunt homines, in hac conditione versentur necesse est.

32. Confirmatur conclusio triplici comparatione.

1° Si nec domum, nec horologium, nec librum sine causa intelligente et ex consilio operante fieri potuisse existimamus; mirandæ hujus habitationis nostræ architectum, hujus machinæ adeo complexæ inventorem, hujus libri, in quo tantæ sapientiæ consilia legimus, auctorem intelligentem non fuisse, quis putet?

2° Si florem, arborem, equum, hominem depictum in tabula, aut ex marmore vel ex cera sculptum videmus, statim de pictore aut sculptore cogitamus, ejusque laudamus peritiam: nonne igitur agnoscemus, artificis sapientissimi opus fuisse ipsos flores, ipsas arbores, ipsa animantia, quæ ante oculos nostros perpetuo vigent ac renovantur?

3° Si eximiæ intelligentiæ laudem sibi compararet qui, quod nemo adhuc fecit, totum mundi ordinem, rerumque relationes, ac leges naturæ universæ explicaret; quantæ demum sapientiæ fuerit, hunc ordinem, has relationes ac leges.

excogitasse, constituisse, atque ita temperasse, ut finem suum constanter assequerentur?

33. COROLLARIA.

1° Causa quæ mundum condidit, non intelligens modo, sed et mire *sapiens* est. Operantis enim sapientia in medio- rum ad finem directione innotescit.

2° Est summe *potens*. Considera mundi amplitudinem, molem, vires, legum constantiam.

3° Mens hæc est summe *pulchra*. Ab effectibus.

4° Summe *bona*. Tantam enim curam adhibuit, ut bonis omnibus, non necessariis modo, sed et convenientibus et delectabilibus, animalia omnia, atque homines in primis fruerentur.

5° Est *unica*. Nam tota rerum universitas iisdem legibus subjacet: omnia inter se connexa sunt, et ad eundem finem conspirant.

6° Est *a tota rerum universitate distincta*. Etenim est intelligens: ergo a mundo materiali discreta. Præterea qui omnia ordinavit quæ in mundo sunt, intra rerum ordinarum ambitum esse non potest.

7° Est *a congerie rerum mundanarum independens*. Nam erat hæc mens, antequam hic ordo constitueretur. Omnia ab ipsa dependent.

8° *Habet omnem tum in materiam, tum in hominum spiritus potestatem*. Patet ex eo, quod materiam quidem uti voluit formavit, suisque legibus subiecit: hominum vero spiritus organicis corporibus inseruit, intimeque conjunxit.

9° Ab hac præpotenti intelligentia *dependet hominis vita et mors*. Omnia enim quæ intra nos peraguntur, ab ipsa dependent; omnia quæ extra nos sunt, ipsius imperio temperantur.

10° Est ergo hoc Ens ab homine *reverendum*; nam super omnia excellit: *colendum*; nam potentissimum est: *timendum*; quia punire hominem potest: *amandum* denique; quia bonum est et innumera nobis ac maxima beneficia contulit.

11° Habemus ergo in hac Mente quæ mundum condidit, Ens illud, quod athei nolunt agnoscere: nimirum *superio-*

rem quamdam Intelligentiam, a qua tum homo, tum omnia quæ in mundo sunt, dependent (15).

ARTICULUS II.

De Epicuri systemata.

34. Quemadmodum argumento metaphysico seriem infinitam athei opponunt, ita argumentum hoc physicum Epicuri somniiis enervare conantur. Non negavit Epicurus, esse Deos, sed in beato quodam et tranquillo otio omnique cura vacuum divinam naturam aiebat esse oportere; ita ut et mundus et homines nullo modo a Diis dependerent. Mundi autem genesis hujusmodi fuit juxta Epicurum. In vacuo infinito et æterno infinita æternarum atomorum multitudo volitabat, quæ et figuræ et magnitudinis infinitas haberent varietates. Atomii vero motu naturali æternum impulsæ, per infinita spatia deorsum urgebantur; casu tamen factum est, ut transversum declinarent, et sic altera ad alteram accederent, ac temere simul coacervatæ mundum quemdam constituerent; qui deinde dissolutus, alteri et alteri ac nostro huic deinde locum dedit. Sic omnia explicit Epicurus cum suis; nec res materiales modo, sed et ipsam spirituum existentiam, omnesque spirituales actus. Atque huc redeunt tandem aliquando omnia atheorum systemata: omnes athei qui idealistæ non sunt, epicuream crambem recoquunt.

35. Ridiculæ hæc commenta expositione ipsa satis confutantur, ac jam in ontologia et cosmologia hujus erroris fundamenta eversa sunt. Nihilominus hoc loco præcipuas ex iis, quæ in hac hypotesi congestæ sunt, absurditatibus, breviter enumerare præstat.

PROPOSITIO IV. *Epicuri systema de mundi origine absurditatibus scatet,*

1° est *spatium vacuum reale et infinitum*. V. dicta in cosmologia (C. 331).

2° *Atomii improductæ*. Magna absurditas est materia improducta (C. 258). Eoque major est absurditas hæc in Epicuri systemate, quod atomii et improductæ ponuntur, et quoad existendi modum semper mutabiles. Si enim fuissent

improductæ, forent jam in existendo absolute necessariae, et proinde immutabiles quoad existendi modum (O. 387, 4°).

3° *Atomi multitudine infinitæ* (O. 350).

4° *Atomi infinitæ et vacuum*. Fac esse atomos infinitas: tot erunt quot esse possunt. Ergo omne vacuum implebunt; adeoque nullum erit vacuum.

5° *Atomi æternæ* (O. 331, 2°).

6° *Motus æternus* (Ibid.).

7° *Atomi infinitæ et motus*. Rursum, si atomi sunt infinitæ, nullum est vacuum (4): quomodo ergo atomi moveri possunt? (C. 375).

8° *Motus atomis essentialis*. Igitur atomi nunquam quiescere potuissent. Præterea motus iste essentialis fuisset necessario certa quadam velocitate ac directione determinatus. Ergo materia non potuisset unquam alia velocitate aut directione moveri. Nam quod est essentialis, immutabile est. Mitto alia multa.

9° *Gravitas* intrinseca et essentialis, qua atomi deorsum sponte moventur; quin præterea ullum sit gravitatis centrum.

10° *Figura* atomorum, *magnitudo*, *mutua distantia*; hæc omnia essentialia materiæ non sunt, et in ipsa supponuntur sine ulla ratione extrinseca determinante.

11° *Declinatio* quoque illa effectus est sine causa. Cur enim declinarunt? Cur omnes? Cur tali tempore? Cum minimo intervallo, majore non? Cur inæqualiter declinarunt?

12° *Ordo qui in mundo est, casu constitutus*; quæ res, etiamsi atheis omnia quæ inverecunde sibi dari postulant, permittantur, absurda est quam maxime.

36. Revera exstiterint sane a se, ab æterno, atomi materiales, diversæ figuræ ac magnitudinis, cum omnibus suis essentialibus proprietatibus; vigerit, vide quid largiar, attractio universalis; imo attractio quoque molecularis, et chimica, et electrica ipsas inter se conciliarit, vi scilicet sua, casu, ex essentia atomorum, quacunque tandem ratione libuerit. Quid inde? Vide adhuc quam multa supponi debeant, ut mundi formatio explicetur.

1° Supponi debet dispositio primordialis atomorum, ac

dispositio ejusmodi, ut eæ deinde viribus suis in se mutuo agentes mundanum systema, et planetarum globos, et in tellure atmosphæram, maria, flumina, terras, montes vallesque efficerent. Fac enim v. gr. omne oxygenium fuisse a regione telluris longissime remotum; hoc unum satis erat ad perturbanda omnia. Hæc porro primordialis atomorum dispositio, qua delineatio, ut ita dicam, mundi tota continebatur, ab essentia materiæ non est. Ergo ab alia causa effecta est. Et cum non intelligentiam modo, sed altissimam sapientiam postulare, non cuicunque causæ, sed causæ summe intelligenti tribuenda est.

2° Supponi debet motus primitivus atomis communicatus, sine quo materiales vires nullum effectum producere poterant (C. 297, 3°). Materiales enim atomi sunt ad motum quietemve indifferentes. Ergo ex sui natura motum non habent. Sunt præterea essentialiter inertes, nec semetipsas sive ad motum sive ad quietem determinare valent.

3° Supponi debet causa a materia elementari ejusque viribus distincta, quæ corpora organica formaverit, et œconomiae tam vegetalis quam animalis leges constituerit (C. 297, 5° seq.).

4° Ne dicam de sensitivæ vitæ phænomenis, et de instinctu motuque animalium, ad quæ explicanda nec materiæ vires nec ipsa sufficit organizatio, certè intelligendi principium ejusque cum corpore conjunctio a nullo agente materiali et non intelligente repeti potest. Quomodo enim, ut cætera omittam, quomodo poterat intelligentia a causa non intelligente prodire?

Concludamus. Etiamsi Epicuro et atheis ea omnia permittantur, quæ ipsi non probant, sed supponunt, a nobis autem falsa et absurda probantur, etiamsi, inquam, hæc omnia ipsis permittantur, adhuc tamen eo quo spectant, pervenire non possunt, ut nempe testimonium quod auctori suo rerum natura tribuit, aliquo modo infirmem.

ARTICULUS III.

Difficultates.

37. Obj. I. Nullæ dantur in rerum natura causæ finales.
Nam :

1° Cum physicas causas ignoremus, finales excogitavimus.

2° Quia nos propter aliquos fines agere solemus, gratis supponimus Ens quoque supremum ita agere.

3° Revera Ens supremum nulla re eget. Ergo agere propter finem non potest.

4° Fieri casu potest, ut quædam similitudinem accipiant operum, quæ ab intelligentia ad finem ordinantur.

38. Resp. *Nego ant.*

Ad 1^m *Nego* quod inepte asseritur. Et nota, alteram ex his cognitionibus, quemadmodum alteram supplere non potest, ita eam juvare et promoveri. Nam et quo magis rerum physicae causæ cognoscuntur, eo melius ac plures intenti fines apparent; et non raro finales causas perscrutando, physicas quoque cognovimus.

Ad 2^m pariter *nego*. Nihil enim supponimus aut supponere necesse est, cum opera ipsa loquantur et clament.

Ad 3^m *Conc. ant.; dist. cons.* : Nequit agere propter finis consecutionem tanquam propter bonum quo indigeat, *conc.*; nequit agere cum fine, seu opus dirigere ad assequendum finem ipsi præstitutum, *nego*.

Ad 4^m *Dist.* : Casu absolute dicto (O. 320), nempe sine ulla causa, *nego*; casu relative dicto, nempe ex concursu accidentali causarum quæ effectum aliquem non intendunt, *subd.*; et hæc possunt facile distingui a rebus vere ordinatis ad finem, *conc.*; non possunt, *nego*. V. dicta in ultimo ontologiæ libro (O. 393).

39. Obj. II. Fieri potuit, ut hic naturæ ordo casu prodierit ex fortuito atomorum concursu.

Nam fortuitæ atomorum concurrantium conjunctiones, tempore infinito, possibiles omnes combinationes efficere debent.

Atqui inter omnes possibiles combinationes est etiam hæc rerum universitas. Ergo.

Addunt paritatem: si notæ omnes typographicae quibus Virgilii poëma constat, jactibus combinentur infinitis, saltem semel, Virgilii poëma dabunt.

40. Resp. primo. *Nego maj.*: quæ ex multiplici capite falsa est et absurda

1° propter absurdas illas et gratuitas suppositiones, quas continet hoc atheorum somnium.

2° quia ut habeantur omnes possibiles combinationes, necesse est insuper supponere unamquamque atomum spatii infinitatem, quaquaversus et secundum omnes directiones, percurrere posse. Necesse est enim, ut quæque atomus reliquis omnibus et singulis conjungatur. Hæc autem nova suppositio novum est absurdum; quia obtrudit nobis effectus infinitos absque ulla causa: quæ enim vis hac illac atomum, et in omnes partes infiniti spatii propellere poterit?

3° quia falsum absolute est, tempore vel infinito, omnes combinationes possibiles in actum prodire debere: quinimo impossibile plane est, ut omnes in actum prodeant.

41. Nam ut habeantur omnes possibiles combinationes, debet unaquæque atomus in omnibus punctis infiniti spatii successive inveniri. Sint itaque duæ atomi A et R. Ponamus R esse fixam, et A moveri: motus hujus puncti A, secundum lineam infinitam, tempus postulat infinitum. Motus ejusdem in plano infinito postulat tempus infinitum secundi ordinis; si vero punctum A moveri debeat in spatio infinito secundum tres dimensiones, postulat tempus infinitum tertii ordinis. Verum, ne hæc persequamur, quæ minuta censerī possunt quando cum atheis res est, sit infinitum hoc ordinis primi.

Accedat nunc tertium elementum M. Ut inter tria elementa, A, R, M, omnes possibiles combinationes habeantur, necesse est, ut ad unamquamque novam positionem punctorum A et R, renoventur omnes mutationes possibiles puncti M. Sed istæ infinitum tempus occupant. Ergo unaquæque positio punctorum A et R deberet infinito tempore manere. Sed

etiam positiones istæ sunt infinitæ. Ergo ad habendas omnes combinationes possibles trium atomorum A, R, M, instauratio infinita infinitorum temporum exigitur. Estne possibile tempus hoc infinitum multiplicatum per infinitum?

Quid vero, si addas quartam atomum? Omnes possibles combinationes requirent tempus infinitum bis multiplicatum per infinitum. Si atomi quinque ponantur, tempus infinitum erit multiplicandum per infinitum *ter*, et ita porro. Si igitur ponas atomos infinitas, omnes possibles combinationes exigent infinitum tempus evectum ad infinitum unitate diminutum; quæ postrema restrictio profecto ridiculum complet. Memento autem, infinitum de quo loquimur, esse infinitum tertiæ potentiæ. Horrendam sane monstrositatem! Concludes ex his, etiam tempore infinito, paucissimas solum ex possibilibus atomorum combinationibus ad actum prodire posse; prodire autem omnes, metaphysice impossibile esse.

Resp. secundo. *Dist. min.*: Inter combinationes possibles est etiam hæc rerum universitas; nempe inter combinationes intrinsece possibles, *conc.*; inter combinationes extrinsece possibles, *subd.*: spectata virtute causæ intelligentis, *conc.*; secus, *nego* (36).

Et sine ulla distinctione *nego cons. et consequentiam.*

42. Ad allatum exemplum resp. *negando paritatem.*

Nam 1^o qui hæc obijciunt, supponunt notas typographicas jam rite formatas, et determinato illo numero contineri, et latinæ solum scripturæ elementa exhibere: quæ omnia intelligentiam formantem requirunt. Supponunt deinde, omnes in urnam projici, et in talem urnam, urnaque ab aliqua vi agitata, alteram post alteram ex angusto foramine demitti, et juxta latera quæ exsculptis litteris sunt notata, demitti; quæ iterum omnia causam requirunt, eamque intelligentem. Supponunt denique, eos characteres intra finitum spatium disponi et super stabili solo collocari; id quod de atomis in spatio quaquaversus infinito dispersis supponi non potest.

Verum hæc omnia quum supponunt, jam supponunt intelligentem causam studiose omnia præparantem, quæ requi-

runtur, ut possibilis sit Æneidos impressio. Nil mirum igitur, si in his omnibus adjunctis ea dici possit, imo et debeat etiam extrinsece possibilis. Sed in atheorum hypothese omne intelligentiæ consilium, omnis dispositio ac directio excluditur. imo multa supponuntur fieri sine ulla causa.

2^o Non stat paritas etiam ex eo, quod combinatio illa litterarum si semel fieret, non tamen renovari constanter pergeret. At vero naturæ ordo *in omnibus suis editionibus* constans est.

43. Obj. III. 1^o Ut explicetur mundi ordo, nihil aliud necesse est supponere, nisi vires, quas materia habet. Nam revera ab his viribus omnia fiunt.

3^o Præsertim, cum ignotum sit, quousque pervenire possint naturæ vires.

44. Resp. ad 1^m, 1^o ante omnia supponendam esse materiæ existentiam. Materia autem non potest a se existere.

Resp. 2^o *Dist.*: Vires constitutæ, definitas, dispositas, *directas* consilio supremæ intelligentiæ, *conc.*; vires tantummodo materiæ essentielles, et nullum aliud agens præter eas, *nego*. V. dicta superius (36).

Rationem additam eodem modo distingues.

45. Ad 2^m noto in primis, vocem hanc *natura*, qua athei mirifice delectantur, duo in quæstione hac significare legitime posse: 1^o collectionem corporum, ac virium constantium, quibus corpora, certo ordine certaue lege, sensibilia phenomena immediate produciunt; 2^o causam a qua corpora viresque ipsorum ac formæ, certo illo ordine ac lege constitutæ sunt primitus ac dispositæ, et continenter diriguntur.

Sed athei de natura loquuntur, quasi de abstracto quodam ac poetico ente, quod revera nihil est aliud, quam materia ejusque vires essentielles casu operantes.

Hinc resp. *dist.*: Ignoramus quousque pervenire possint vires naturæ, i. e. materiæ agentis sub legibus ac directione supremæ intelligentiæ, *tr.*; vires materiæ per se, *nego*. Etenim materia per se nihil potest, nec vires ullas habet, cum per se neque possit existere. Et quamvis existat, non potest per se

ea efficere, quæ sapientissimum consilium, et facta, et leges ab ejus essentia independentes supponunt (36; C. 298, 5°).

46. Obj. IV. 1° In rerum universitate multæ sunt imperfectiones :

2° multa sunt redundantia et inutilia ;

3° sæpe ordo mundi perturbatur.

Resp. ad 1^m, 2^m et 3^m *Tr. et nego consequentiam.*

An ex eo quod statua Apollinis v. gr. non sine aliquo defectu est, vel ex eo quod machina quædam aliquando deficit, aut aliquid in illa est inutile, arguere licebet hæc casu facta fuisse?

47. Resp. deinde ad 1^m *Dist.*: Quatenus omnia possent esse absolute perfectiora, *conc.*; quatenus quædam sint nullo modo in suo genere perfecta, *nego.*

Ad 2^m *Nego.* Ignoramus fines hujusmodi rerum; sed ex ignorantia nostra quis arguat fines non esse? Esse autem rebus plane omnibus finem suum præstitutum, id a priori solum probari potest, et alias probabitur.

Ad 3^m *Dist.*: Ordo universalis, *nego*; ordo aliquis partialis, *tr.* Has porro partiales perturbationes ad ordinem universalem conducere certum est, sin minus a posteriori, at certe a priori.

48. Obj. V. Saltem qui mundum ordinavit, non probatur esse ens infinitum. Hoc igitur argumentum Dei existentiam non probat.

Resp. 1° Cur, si is qui mundani ordinis auctor fuit, Deus non est, cur inquam athei tot congesserunt absurdas hypotheses, ut ejus existentiam negarent? Sufficiat nobis in præsentem id confirmasse, quod illi negant ac tantopere exhorrescunt.

Resp. 2° *Omitto ant.*; *dist. cons.* : Non probat Dei existentiam secundum notionem Dei rudimentalem, confusam, omnibusque communem (O. 362), *nego*; secundum notionem Dei plenioram et magis explicitam, *tr.*

Resp. 3° *Dist. ant.*: Non probatur immediate ex solo mundi ordine, *tr.*; mediate, et quibusdam aliis consideratis, *nego.* Revera si materia improducta esset, et non potuisset ab ulla

vi externa modificari; fuisset enim et necessaria in existendi modo, et independens. Si ergo modificari potuit, improducta non est. Ergo producta est, creata est; a quonam? Nihil, ut minimum dicam, verisimilius, quam ab Eo ipso, qui formas omnes quas voluit, materiæ indidit, eamque suis legibus constrinxit (C. 298). Hoc vel ipse Condillac animadvertit (4). Ergo is qui mundum ordinavit, materiæ creator dicendus est. Est ergo Ens infinitæ virtutis. Quod si non ipse, sed alter creator materiæ est, hic certe alter ens erit infinitum: mundi vero ordinator ipsius minister.

CAPUT IV.

ARGUMENTUM MORALE.

ARTICULUS I.

Expositio.

49. PROPOSITIO V. *Universalis et constans humani generis in agnoscenda divinitate, consensus atheos omnino profligat.*

Etenim si humanum genus in agnoscenda divinitate constanti judicio consensit, judicium hoc falsum dicere nefas est.

Atqui genus humanum in agnoscenda divinitate constanti judicio semper consensit. Ergo.

Probatur in primis minor, quæ factum continet; et probatur, quemadmodum facta probanda sunt

50. I. testibus. Sunt autem

1° historici omnes ac viatores. Quicunque enim tum de veteribus populis, tum de recentius cognitis notitias tradidere, eorum quoque numina ac religiones memorarunt, non solum obiter et per occasionem, sed quotiescunque eorumdem mores, instituta, leges descripsere. Penes omnes populos reperies ritus aliquos religiosos, auguria, sacrificia, dies

(4) *Traité des animaux*, p. II, ch. VI.

festos, saltem solemnem aliquam invocationem viguisse; bella ac foedera, agriculturam, urbes, convivia, ludos, judicia, nativitates, matrimonia, funera divino invocato numine consecrata, jurisjurandi religione firmata pacta, numinum contemptoribus poenas inflictas;

2^o ab antiquissimis usque philosophis, ii fere omnes, qui vel data opera vel obiter atheos refutarunt. Nam ab hoc praesertim consensu argumentum deprompsere. Praecipuos reperies apud Brenna (1). Sic igitur arguimus:

Illud factum, unde demonstrationis medium a sapientibus viris constanter desumitur, debet esse probatissimum, notum omnibus, et ab ipsis adversariis admissum. Sed multi, iique gravissimi, omnium aetatum, sectarum, religionum scriptores universalem populorum in agnoscenda divinitate consensum assumpsere tanquam medium, ad divinitatis existentiam demonstrandam. Ergo consensus iste fuit semper factum probatissimum, omnibus notum, et ab ipsis atheis admissum.

3^o Revera recentiores quoque athei hoc nobis concedunt.

§4. II. vestigiis facti. Hæc sunt

1^o scripta quæ supersunt, poemata praesertim omnium gentium antiquissima, traditiones, populares cantus; quorum fere omnium argumenta a Diis, a Deorum historia, a mundi originibus divinis, a Deorum cum homine relationibus desumuntur;

2^o aræ, loci sacri, templa, statuæ, picturæ, numismata, sepulchra, vasa omnis generis, domestica ipsa supellex, arma, muliebria ornamenta, etc. Hæc omnia demonstrant, praecipuum artium objectum penes omnes populos, omnisque domesticæ et socialis vitæ centrum religionem fuisse.

3^o His accedit vivum linguarum monumentum. In omnibus enim linguis voces sunt, quæ Enſ supremum significant, et ad Numinis cultum referuntur.

§2. Probatur major, seu vis facti ad demonstrandum:

Si hoc iudicium dicere velis falsum, profecto aliquam causam supponere debes, quæ omnes homines in hunc erro-

(1) De generis hum. consensu in agnoscenda Divinitate, p. I, lib. I, c. II et III.

rem pertraxerit, omnesque in erronea persuasionem deflexerit. Non enim errat homo, nisi causa aliqua intersit, quæ rationem in transversum agat. Cum autem error iste fuerit universalis et constans, causam quoque illius universalem atque constantem fuisse, existimandum profecto erit. Atqui causæ omnes quæ humanam rationem in errorem adducere solent, hac in re insufficientes apparent. Etenim causæ hujusmodi omnes continentur tandem aliquando influxu voluntatis, quæ inclinationibus, desideriis, cupiditatibus suis ad iudicium imperandum moveatur (L. 712, 718 seq.). Quæ omnia potius vel ad oppositam sententiam homines traxissent, vel certe in varias opiniones distraxissent. Quapropter si quis iudicium hoc falsum dicere velit, is supponat necesse est vitium aliquod ipsi rationi inhærens, quo factum sit ut omnes in hunc errorem naturaliter devenerint. Quod quidem cogitare nefas est (L. 620).

Quæ cum ita sint, statuendum est, hunc omnium intelligentiarum consensum non aliunde prodiisse, quam a veritatis evidentiâ, quæ omnibus naturaliter ultro affulserit.

§3. Confirmatur hæc eadem conclusio.

Etenim 1^o animadverti hæc debent:

a) Cum hominem maxime referat scire, utrum supremum aliquod Numen existat, nec ne, in hanc veritatem sollicitè ac studiose præ cæteris inquirendam homines necessario ferri.

b) Quo magis humanitas morumque cultera profecit, eo profundiores persuasionem istam radices defixisse, eo splendidiorem divinitatis cultum fuisse.

c) Non solum inter ignorantiae tenebras hanc persuasionem viguisse, sed cum scientiarum incrementis esse confirmatam; licet subtilissima ubique ingenia disputationibus suis illam exagitarint.

d) Atheos nunquam populo placuisse, et quamvis nullus pene fuerit error, qui innumeros sectatores non habuerit, ipsaque polytheismi absurditas magnam humani generis partem occupavit, athei nihilominus nullam nationem, nullam civitatem, imo pagum nullum in suam sententiam adducere

potuisse; imo odio semper habitos ab omnibus, et exilio, carcere, morte mulctatos esse.

Ex his omnibus sic arguimus:

Altissimas in humana ratione radices necesse est ut habeat illa persuasio, quæ ex perpetuo examine firmior semper evenit; quæ cum morum humanitate et ingeniorum cultura crevit; quæ scientiæ suffragiis confirmata est; cujus adversarii omnibus fuerunt semper exosi. Atqui talis est persuasio de divinitatis existentia. Ergo.

54. 2^o Magnum quoque accedit argumento robur, si consideres validissima quædam impedimenta, quæ hanc persuasionem in animis hominum labefactare, imo etiam eradicare ex iis potuissent. Sunt autem

a) molestia, quam hominum cupiditatibus hæc infert persuasio, quæ speculatorem actionum nostrarum ac vindicem nostris cervicibus imminentem exhibet;

b) barbaries multarum gentium, ac vita in belluarum morem agitata;

c) vitia magna et corrupti mores, qui mentem hebetant et rerum quæ supra sensus sunt, considerationi ineptam reddunt;

d) sophismata quædam obvia oppositum suadentia, quæ debiles mentes valde discruciant, ac facile illudere possunt, dum ex. gr. malos impunes ire ac florescere, justos opprimi vident.

e) Ipsa polytheismi turpissima commenta, quæ tam impuratos et absurdos exhibebant deos, videri causa poterant, cur sin minus omnes, at saltem sapientes diis omnibus valedicerent.

f) Quanquam pauci fuerint, non defuere tamen identidem athei, qui deos spernerent, cæterosque ad idipsum pertrahere satagerent.

g) Accedit, nullum fuisse per longissimas ætates inter quosdam populos commercium, quo posset hujus persuasionis firmitas, sicubi nutaret, constabiliri.

His consideratis, validissimum hoc habes argumentum.

Maxima sane esse debet evidentia illius iudicii, quod non

obstantibus gravissimis difficultatibus, tam internis quam externis, in omnium hominum mentibus constantissime inhæsit. Atqui tale est iudicium humani generis de divinitatis existentia. Ergo.

ARTICULUS II.

Atheorum hypotheses.

55. PROPOSITIO VI. *Consensio hæc non ab educationis præjudiciis, non a legislatorum fraude, nec ab inani metu, nec a naturalium causarum ignorance originem duxit.*

Hic quoque athei suas nobis opponunt hypotheses, sed æque ineptas ac præcedentes.

Dicunt in primis, persuasionem hanc esse *unum ex educationis præjudiciis*.

At 1^o educatio penes diversos populos diversa est, penes quosdam nulla; variantur item educationis principia et methodi.

2^o Præjudicia educationis facile deponuntur

a) ætate ipsa, experientia, aliorum consuetudine;

b) saltem a sapientibus viris, et penes cultas nationes;

c) præsertim si cupiditatibus humanis ipsa præjudicia molesta sint. Molestæ enim opiniones, etiamsi solidis firmitatis innixæ sint, severius ac sæpius expendantur, et nisi rationes pene ineluctabiles obstent, libenter ac cito rejiciuntur. Quam facile igitur præjudicium humanis cupiditatibus adeo molestum fuisset excussum!

56. Aiunt deinde *legislatorum ac principum fraude* hanc opinionem inductam fuisse, ut populi in officio continerentur. Nihil enim dicam de iis qui sacerdotum fraudes in medium adduxerunt. Neque illud scilicet viderunt, sacerdotum existentiam non solum ideam Dei supponere, sed Dei quoque cultum pervulgatum et publicum. His igitur omissis, qui legislatores et principes hujus fraudis accusant, non minus inepte disserunt. Nam

1^o Dei notio viget etiam apud sylvestres illos populos, qui nullum unquam legislatorem, nullam legem habuerunt.

2^o Quomodo vero omnibus omnium gentium legislatoribus

hoc in mentem venit, ut per eandem fraudem populis imponere vellent? Omnibus dico: nam omnibus populis, etiamsi nullo inter se vinculo essent colligati, idea isthæc inhæsit.

3^o Quomodo tam felici apud omnes successu hæc persuasio propagata est? Non sane cum pueris erat res agenda. Quot quantisque ludibriis a populo atheo excipiendum fuisse putemus, qui primus Numina nescio quæ memoraret, ut sibi auctoritatem conciliaret, legumque jugum cervicibus imponeret?

4^o Præsertim cum hæc persuasio sit hominum cupiditatibus onus valde molestum, ac multo gravius, quam omnes humanæ leges.

5^o Quomodo vero hæc fraus nunquam detecta fuit, nec a sapientibus viris, quinimo illos quoque illaqueavit? Quomodo perseveravit adeo inconcussa persuasio per fraudem inducta, præsertim cum non defuerint qui eam expugnare tentarent, ac populum dedocere? Fac legislatorem vel principem atheum persuadere velle populo, nullum esse Deum. An putas felicitate pari rem ei successuram?

6^o Qui primitus hanc persuasionem induxerunt, eanique tam firmiter mentibus impresserunt, vel ad eam confirmandam usi sunt rationibus falsis, vel certis et evidentibus. Si primum dicas, impossibile dicis. Quomodo enim fieri potuit, ut unus homo vel pauci homines, totum genus humanum, motivis ad suadendum minime idoneis, in tam obfirmatam constantemque sententiam pertraherent? Si alterum, sane Dei existentia certa et evidens sit oportet, quæ certis et evidentibus demonstratur argumentis.

7^o Denique huic atheorum hypothesi documenta omnia historica contradicunt. Ex iis enim constat, Dei alicujus cognitionem omnibus antiquiorem esse legislatoribus. Revera idipsum quod athei oggerunt, hoc quod dicimus demonstrat. Cur enim legumlatores, se aliquo Numine afflatos fixerunt, nisi quia apud eos agebant, qui divinitatem agnoscebant ac venerabantur?

57. *Ignorantia*, inquirunt, Deos induxit. Homines enim qui naturalium phænomenorum causas cognoscere, aut saltem

assignare utcunque aliquas, honori sibi ducunt, cum veras ignorarent, fictam, ut assolet, excogitarunt, ens nempe invisibile ac potentissimum.

Sed 1^o si ita est, scientiæ luce hominibus affulgente, opinio hæc evanescere debuisset. Atqui nihilominus eo firmior facta est, quo magis rerum naturalium cognitio profecit.

2^o Hinc physicorum peritissimi Deum esse agnoverunt, ac summopere venerati sunt. Non est opus ut singulos recenseam. Nomina unum e summis, imo unum quemcunque ex celebrioribus: unum profecto ex Dei adoratoribus nominabis. Magnum quiddam erit, si aliquem quem excipias, inveneris inter mediocres.

3^o Revera omni tempore nihil habitum fuit opportunius ad Dei existentiam demonstrandam, quam naturalium causarum, et ordinis mirandi quo illæ agunt, cognitio.

4^o Demum si athei totum naturæ ordinem ipsamque rerum existentiam per naturales causas explicare possunt, prima illa neglecta, proferant quod habent. At quid narrant illi? Seriem infinitam, materiam improductam, ordinem sine ordinante et fortuitum atomorum concursum. Præclaras sane res, et profecto novas? Nos, donec meliora ferant, in ignorantia nostra manebimus.

5^o Hinc jure meritoque ignorantia notam, quam toti humano genere inurere ipsi non verentur, in ipsorum caput rejicere possumus. Utique multa ignorant athei; si enim saperent, immediatarum cognitione causarum non contenti, mediatam et ultimam non negligenter, et ad rerum origines explicandas, epicureas nobis nænias non recinerent. Suo nobis exemplo profecto illustrem illam Baconis sententiam confirmant: « leves gustus in philosophia movere fortasse » posse ad atheismum, sed pleniores haustus ad religionem » reducere (1). »

58. Metus postremo, si ipsos audias, Deos confinxit.

*Primus in orbe Deos fecit timor, ardua cælo
Fulmina quum caderent.*

(1) *De Augment. Scient. Lib. I.*

Homines videlicet fulminum, procellarum, terræmotuum, morborum horridæque mortis terrore perculsi, Ens quoddam præpotens sibi confinxerunt, quod mortales iratum plecteret, quodque esset precibus et hostiis placandum.

Respondeo : 1° Ergo in solis meticulosus, in solis pueris atque mulierculis Dei notio inveniri deberet, non item in iis qui constantem impavidumque animum gerunt. At contrarium experientia docet. Nam ii maxime Deum timere solent, quos *si fractus illabatur orbis, impavidos ferient ruinæ*.

2° Cognitis horum phænomenorum causis, persuasio illa aboleri debuit, saltem in hominibus, qui præjudiciis non ducuntur, saltem in sapientibus.

3° Si Dei notio hoc pacto orta esset, non aliter Deum homines sibi repræsentarent, quam ut terribile monstrum, fulminibus semper stipatum atque procellis. Atqui non hanc de Deo ideam vulgo homines habent. Agnoscunt enim illum, ut rerum auctorem, ut patrem beneficum ac providum, non minus quam justum ac vindicem.

4° Sed esto: sit idea Dei ex timore orta. Ut aliquid proficerent, deberent athei ostendere, timorem hunc irrationabilem esse; quod profecto ostendere possent, si demonstrarent effectus illos terribiles non habere ultimam aliquam causam, a qua tandem aliquando dependeant. Id tamen adhuc non præstiterunt.

5° Hinc fit, ut timor iste nec ab ipsis atheorum animis, exulare unquam possit. Scimus utique, ipsos quoque timere. Præclare Tullius de Epicuro: « Nec quemquam vidi, qui » magis ea quæ timenda esse negaret, timeret; mortem dico » et Deos (1). » Id et de toto ejus grege dicere licet.

6° Hic timor ipse vera atheismi origo est. Quia enim vindicem timent, ut cupiditatibus suis licentius indulgeant, et conscientiae latranti offam porrigant, idcirco Deum non esse persuadere sibi conantur. Non igitur *Deos fecit timor*, sed *atheos*.

(1) *De nat. Deor.* Lib. I, c. LXXIX.

ARTICULUS III.

Difficultates.

59. Obj. I. Consensus humani generis in agnoscenda divinitate dici nequit universalis. Nam :

1° Testantur idonei scriptores, exstitisse antiquitus populos atheos.

2° Idem testantur viatores, de barbaris incolis regionum recentius exploratarum.

3° Demum philosophi non pauci, et veteres et recentiores, athei fuerunt. Horum autem judicium pluris valet, quam vulgi consensus.

Resp. *Dist. ant.* : Consensus iste dici nequit universalis metaphysice vel physice. (L. 163, 3°), *tr.* ; moraliter, *nego*. Quamquam probari aliunde posset, nullam plane hac in re dari exceptionem in hominibus ratione utentibus; id tamen experientia sola non constat. At consensus moraliter abunde sufficit ad argumentum.

60. Ad. 1^m *Dist.* : et hujusmodi testimonia universalis consensus vim non infirmant, *conc.* ; infirmant, *nego*.

Etenim 1° pauci illi scriptores qui hæc tradiderunt, fere semper dubitantium more loquuntur; quod ostendunt ii loquendi modi quos adhibent: *dicitur, fama est, etc.*

2° Alii sæpe scriptores, et ipsa quandoque monumenta, contrarium testantur.

3° Populi quidam, seu potius quædam tribus atheæ dictæ sunt, non vere ac proprie, sed improprie et immerito: vel quia homines impii essent et practice athei, vel quia ritibus publicis externoque cultu carerent, vel quia populares Græcorum deos non colerent; qua de causa Hebræi ipsi, atque adeo Christiani, tanquam athei traducti sunt.

4° Demum gentes illas quæ atheæ fuisse dicuntur, barbaras plane fuisse, et belluarum in morem vitam agitasse, in comperto est. Jam si qua hujusmodi gens vere fuisse aliquo

tempore athea probaretur, quid inde? An rationis fructus quæras apud eos, qui morum immanitate efferati atque hebetati, rationis usu pene carent? An poterit eorum dissensio universali mentium humanarum consensioni quidpiam detrudere? Vide auctores qui materiam hanc fuse pertractant; hi singulos populos qui atheismi accusantur, ab hac nota liberant (1).

61. Ad. 2^m: Viatores omnes id testantur, *nego*; quidam, *subd.*: ita ut postea falsa reperta sint, quæ ipsi non satis exploraverant, ac temere affirmaverant, *conc.*; secus, *nego*. Vide citatos auctores.

Ad 3^m *Tr.* Ad rat. additam, *dist.*: ubi constet erroris causas vulgi iudicium non pervertisse, *nego*; ubi non constet, *subd.*: si plerique philosophi et illustriores contraria sentiunt ac reliqui homines, *tr.*; si pauci et minoris auctoritatis, *nego*.

Philosophi qui athei dici merentur, paucissimi sunt, et philosophi nomine vix aut ne vix quidem digni. Cæterum errare posse quosdam philosophos certissimum est, nec mirum videri debet, ubi præsertim erroris causæ sunt manifestæ. At genus humanum universum hac in re errasse, magna foret absurditas (32).

62. Inst. Fortasse populi antiquitus ignoti athei fuerunt, fortasse populi adhuc incogniti athei sunt; fortasse persuasio hæc demum extabescet.

Resp. *Nego totum*. Scrupulos istos omnes adimit, si aliud non suppetat, inductionis et analogiæ argumentum. Quemadmodum natura hominum semper eadem fuit, semperque erit eadem, ita quoque fructus qui ex illa sponte erumpunt, erunt semper iidem.

63. Obj. II. Consensus iste, quamvis exstitisse concedatur, nullam tamen ad probandum vim habet.

Quia 1^o diversi a diversis populis dii colebantur. Ergo nullus Deus est, qui pro se universale suffragium habeat.

2^o Plures populi per plura sæcula polytheismum professi sunt. Atqui polytheismum profiteri, perinde est ac profiteri

(1) V. gr. Brenna. *De generis humani consensu in agnoscenda Divinitate*. vol. I. p. I, c. V, seq. et vol. II.—Storchenau. *Theol. nat.* Sect. I, c. IV.

atheismum. Nam *pluralitas Deorum*, Tertulliano teste, *nullitas Deorum est*.

3^o Demum multæ persuasiones universales repertæ sunt falsæ.

64. Resp. *Nego ant.*

Ad 1^m *Dist. ant.*: Et hæc discrepantia afficit iudicium de existentia alicujus divinitatis, *nego*; versatur circa ideam qua divinitas exhiberi potest, *subd.*; circa ideam determinatam et completam, *conc.*; circa ideam indeterminatam et inchoatam, *nego*.

Dist. cons.: secundum quod divinitas exhibetur conceptu determinato et completo, *conc.*; secundum quod exhibetur conceptu indeterminato et inchoato, *nego*.

Diversitas opinionum non hanc quæstionem respicit: *an sit aliqua divinitas*; sed illam alteram: *quid sit Deus, aut cujusmodi concipi debeat*. Jam in primæ quæstionis solutione omnes conveniunt, quia facilius est, et ex primis rationis principiis necessario in humanæ vitæ cursu ac naturaliter erumpit, et multimodis confirmatur. Quoad alteram vero conveniunt pariter omnes, si spectes ideam Dei inchoatam et confusam, quæ sita est in conceptu *Entis supremi cui omnia subsunt*; hæc enim idea iis ipsis gignitur argumentis, quibus hujus entis existentia cognoscitur. Si vero sermo sit de notione determinata et completa, quænam scilicet natura sit Entis illius supremi, quænam attributa, et quo pacto res cæteræ illi subsint; item an unum sit an plura; quoad istas utique quæstiones dissentiant: sunt enim longe difficiliore; nec ad eas solvendas prima rationis principia et obvia experientia sufficiunt. Cum tamen homines confusa illa Entis supremi notione non satis habeant, complere illam utcumque et perficere nituntur. In quo sane plurimi phantasia duci se sinunt, eamque sequentes non possunt non errare; quidam ratione utuntur, sed hoc opus paucorum est, neque sine multorum admixtione errorum moraliter perfici potest (L. 601); maxima vero pars auctoritatem sequitur, atque hoc pacto unius error multos inficit. Error autem varius est, quemadmodum aberratio omnis; hinc nil mirum, si diversæ hac in

re fuerint opiniones. Nihilominus, ut præclare Tullius, *quales sint (Dii) varium est : esse nemo negat* (1).

65. Ad 2^m *Tr. major. Nego min. et dist. rat. add.* : si res consideretur secundum se, *conc.* ; si ex opinione earum gentium, *nego*.

Ad 3^m *Dist.* : Persuasiones universales et constantes, *nego* ; universales, *subd.* ; ita ut erroris causa, imo et occasio assignari possit, *conc.* ; secus, *nego*. V. dicta in logica (L. 620), et in hoc argumento.

CAPUT V.

DE ATHEISMO.

ARTICULUS I.

An esse possint homines athei.

66. Adeo obvia sunt ac perspicua argumenta, quibus ad Deum cognoscendum assurgere possumus, ut dubitare merito liceat, an fuerint unquam aut esse possint homines, qui rationis adepti usum, vel ignorent Deum esse, vel, quod multo videtur incredibilius, negent.

Igitur potest 1^o fieri quæstio de atheis negativis (1) : an possint esse homines adulti sanaque mente præditi, quorum rationem ætas et aliqua experientia explicuerit nec morum barbaries penitus extinxerit, qui Dei existentiam plane ignorent. Certe si de ignorantia ad breve tempus ac facile vincibili loquamur, nullum dubium, huiusmodi ignorantiam dari ; aliter vero dicendum de ignorantia ad longum tempus producta, moraliterque invincibili : hanc enim dari posse non puto. Omitto enim præsidia quæ status socialis et domesticus confert ; omitto quoque Dei providentissimi auxilia interna et externa, qui *vult omnes homines salvos fieri et ad agnitionem veritatis venire* (2) ; sed certe ex mundi

(1) *De nat. Deor.* II.

(2) *I Tim.* II, 4.

aspectu, ex rerum pulchritudine atque ordine, ex suiipsius consideratione necessarium omnino est, ut homo sensibus præditus ac ratione utens tandem aliquando ad primam rerum causam atque invisibilem gubernatorem mente assurgat. Sufficiunt enim ad hoc primæ illæ ideæ quæ omnibus plane communes sunt (O. 5), et prima principia, quæ ex iis sponte emergunt. His autem homo si careat, rationis usum non habet, contra hypothesim.

67. Fateor, reflexionem aliquam insuper necessariam esse, ut mens hæc principia applicet, et sensibilia transgrediens causam quærat invisibilem. Sed reflectendi occasio deesse homini, longo tempore, non potest. Saltem enim quum insolitum aliquod phænomenon videt, quod admiratione aut terrore ipsum percellat, aut quum necessitate aliqua aut morbo aut dolore, aut periculo premitur, aut quum vim moralis dictaminis, illudque auctoritate plenissimum imperium persentiscit, fieri nequit ut a seipso non exquirat, unde illa sint, unde ipse, unde cætera ; et hoc satis est, ut confusam aliquam supremi principii a quo omnia pendent, notionem adipiscatur.

68. Scio hæc omnia negare traditionales. Sed cum iis nunc non disputo : eos enim alibi refutavi (P. 456, 457). At si supponamus, quod omnes certissimum habent, humanam mentem posse ex se primas saltem ideas acquirere, negari nequit, ab his ideis cum experientia ulteriore conjunctis, facilem ad Deum transitum imo necessarium esse. Sic patet quid de atheis negativis sentiendum sit.

69. Quæritur 2^o an possibile sit, esse atheos positivos.

Principio animadvertendum est, non esse hic sermonem de atheis practicis, qui nempe ita se gerunt acsi nullus esset Deus ; sed de speculativis, qui nempe in ea se obfirmaverint sententia : Deum non esse. Deinde, reperiri sane nonnullos, qui oretenus Deum negant ; qua tamen in re, id potius asserunt, quod vellent, quam id quod sentiunt ; quanquam enim ipsis expediat non esse Deum, non tamen ad eam usque cæcitatem devenire potuerunt, quæ ipsam non percipit evidentiam. Quod quidem satis manifestant, ubi periculum ali-

quod ac repentina calamitas urget : tunc enim *eripitur persona, manet res* (1) ; videasque ad vulgares usque superstitiones proceros hosce animos elatosque sese demittere.

70. Hoc itaque quæritur, an sint qui vere et ex animo sentiant, Deum non esse. Affirmandum videtur, secundum illud Psalmi : *Dixit insipiens in corde suo : non est Deus* (2). Nam, ut in tertio logicæ libro dictum est (L. 692 ; 1°, 3°), potest prava voluntas ab argumentis illis quæ hanc veritatem aperiunt, licet in promptu posita sint, intellectum avertere, ipsumque convertere ad inanes aliquas fallacias, quæ ejusdem veritatis evidentiam obruant aut aliqua ratione obumbrant. Non est propterea mirandum, si dum in his fallaciis totam mentis attentionem voluntas defigit, possit, saltem aliquo momento, aut dubium intellectus aut assensum extorquere.

71. Dixi saltem aliquo momento. Communiter enim putandum non est, in immani adeo ac manifesto errore posse diu manere quemquam, cum præsertim oppositæ veritatis evidentia vel invitus attingat ; nisi forte supponas hominem a primis usque annis adeo misere depravatum, ut in eo mentis animique perversitas in naturam pene transierint. Cæterum præclare ait Seneca. « Mentiuntur qui dicunt se non sentire esse Deum ; nam etsi tibi affirmant interdum, noctu » tamen et sibi dubitant (3). » Certe et veterum et recentiorum auctoritate (4) compertum est, atheos secum ipsis haudquaquam constare ; id quod facta quoque subinde comprobant.

72. Ex dictis liquet 1° judicium quo atheus Deum negat, nunquam cum animi persuasionem, nunquam cum bona fide sociari ; sed errorem formalem semper esse (L. 713) ; eumque non modo ex levissima temeritate, sed ex destinata malitia semper nequidem ducere (L. 721).

2° Idem dicendum de dubitatione.

(1) Lucret. L. III.

(2) Psalm. XIII.

(3) L. I. *De ira*.

(4) V. gr. Platonis Dial. X. *De leg.* et Baylii, *Dict. crit.* art. Bion.

3° Eum qui constanter Deum sermonibus aut scriptis neget, contra mentem loqui, audacterque mentiri.

4° Quidquid dicat atheus, non posse se a summæ imprudentiæ nota excusare. Etenim :

a) Nemo atheorum ausus est directe probare, Deum non esse ; oppositum autem demonstrare se, philosophia tuetur.

b) Athei in eo solummodo se continent, ut demonstrationes quæ afferuntur ad Dei probandam existentiam, confictis a se systematibus infirmant. Sed hæc systemata, ut minimum dicamus, sunt gratuita suppositiones, quæ vulgo refutantur ut absurdæ.

c) Quantumvis athei argumentorum Dei existentiam demonstrantium vim elevare conentur, negare tamen non poterunt, nisi velint plane rejici ut dementes, esse saltem probabile, Deum existere. Quum autem agitur de summa rerum, tutior pars est eligenda. Hi tamen, qui in cæteris levissimas quasque probabilitates ac veri umbras sectantur, in hoc gravissimo negotio, non probabilitatem modo, sed ipsam evidentiam spernunt.

ARTICULUS II.

De exitiis atheismi consecrariis.

73. Ut magis pateat atheismi absurditas atque perversitas, recensebimus breviter fructus, quos atheismus natura sua producit.

1° Sapientiam prorsus enecat, scientiisque tenebras teterimas offundit. Sublata enim causa absolute ultima, rationum ultimarum cognitio (Prol. III.) evadit impossibilis ; fundamentalia insuper problemata, quæ resolvere scientia debet, in omni ordine, sive physico, sive logico, sive ethico, sive historico, fiunt penitus insolubilia. Nam

a) in ordine physico explicari nequit rerum origo, quia tollitur prima causa efficiens ; legum quoque physicarum harmonia et constantia, quia tollitur prima causa exemplaris, et ultima finalis, rerumque provisor et gubernator.

b) In ordine logico inexplicabile est possibilitatis funda-

mentum ontologicum, æternitas ac necessitas essentiarum, immutabilitas veritatis.

c) In ordine ethico intelligi prorsus nequit, quid si lex illa honestatis, cujus imperium ineluctabilemque auctoritatem omnes experimur, nulla enim lex sine legislatore: hinc officia ac jura sine fundamento sunt; virtus sine præmio manet, vitiumque sine pœna; imo ipsum honestarum et inhonestarum actionum discrimen fit incertum.

d) In ordine historico facta multa inexplicabilia fiunt, sublato provisorio supremo; et factorum sive concursus sive successio, quæ ab hominis arbitrio sæpe non dependent, cæco solum casu explicari possunt. Tamen ex hoc ordine atque ex hac successione emergit mundus moralis, qui non minus quam physicus mirabilis est, nec fortasse minus illustria intelligentiæ disponentis vestigia continet.

74. 2º Atheismus humanæ naturæ osor et inimicus est. Intimis enim naturæ propensionibus contradicit, easque in ludibrium ipsius ac tormentum vertit. Deo enim sublato, nullus est amplius remunerator virtutis, nullus scelerum vindex, nullus perturbati ordinis reparator, nullum in adversis solamen, nullum amplius objectum, cujus assecutione felices esse possimus. Sine Deo animi immortalitas chimæra est, desiderium beatitudinis ludibrium, virtutis amor calamitas, ac propensionibus inter se pugnantibus homo misere discerpatur necesse est. Si Deum mihi tollis, quid superest? Brevis hæc incertaque vita, quam calamitates et ærumnæ potius, quam anni diesque metiuntur, in quam homo coniectus sine adiutore, sine provisorio, sine remedio, sine spe, conditionem obtinet brutorum conditione multo deteriorem.

75. 3º Humanam denique societatem atheismus impossibilem facit. Quæ enim sunt humani convictus fundamenta, nisi mutua fides, legum reverentia, in principe amor justitiæ, in subditis obsequium erga auctoritatem, in omnibus patriæ amor ac civium charitas? Hæc autem omnia in athea hominum multitudine frustra requiruntur. Invisibilis enim atque omnia videntis potestatis timore sublato, omnique futurorum bonorum adempta spe, unica superest agendi re-

gula, utilitas; unicus finis, voluptas; unicum efferentibus se cupiditatibus frænum, timor. In imperantibus timor populi, in populo timor imperantis, hoc totum societatis fundamentum erit; ac propterea jus unicum, fortioris voluntas; unica debilioribus relicta defensio, simulatio, fraus, proditio. Nonne præstat in sylvis atque inter feras degere, quam in ejusmodi societate versari?

Ex his omnibus 1º concludemus, merito atheos et vocari insipientes, et populorum odia semper et legum severitatem subiisse; qui et sapientiæ contemptores, et hominum inimici, et societatis eversores esse probantur.

2º Ex his quoque colligere poteris, si vacat, plura alia argumenta ad Dei existentiam demonstrandam, quæ nobis innuisse sufficit.

LIBER SECUNDUS.

CAPUT I.

DE ESSENTIA DIVINA.

ARTICULUS I.

Quid essentiae divinae nomine intelligatur.

76. Quemadmodum Deum esse immediate non cognoscimus, sed ex ejus effectibus; ita etiam quid Deus sit in seipso cognoscere non possumus; solummodo ex eo quod novimus, quomodo res aliae se habeant ad ipsum, colligere argumentando possumus quid ipse sit. Duplici porro via, postquam sub conceptu primae causae cognovimus Deum esse, a creatis rebus assurgimus ad cognoscendum, *quid Deus sit*: via nempe *remotionis*, et via *analogiae*. Deus enim a nobis primo cognoscitur secundum duplicem habitudinem ad res finitas, nempe ut earum principium, et ut ipsis longe supereminens (15). Quia ergo illarum principium est, perfectiones omnes, quae in iis sunt, aliquo modo continere debet (O. 263); et quia illis longe supereminet, carere debet imperfectionibus omnibus, quae in rebus inferioribus inveniuntur. Primo igitur via remotionis imperfectiones istas in Deo esse negamus, et hoc pacto dicimus Deum v. gr. infinitum vel immensum; deinde via analogiae rerum creatarum perfectiones, a nativis defectibus purgatas, ipsi tribuimus: sic dicimus Deum v. gr. intelligentem et liberum; non tamen ita ut sunt ea quae ipse produxit, sed multo magis ac melius. Ex quo vides, etiam dum viam persequimur analogiae, remotione nos uti: ac propterea de Deo nos cognoscere potius quid non sit, quam quid sit.

77. Pluribus itaque conceptibus ineffabilem Dei ac sim-

plicissimam naturam, quemadmodum si ex distinctis perfectionibus constaret, nobis ipsi repraesentamus; quia de illa aliter cogitare non possumus. In his autem perfectionibus, essentiam iterum ab attributis distinguimus. Essentiam vocamus perfectionem illam, quam ratio nostra concipit tanquam primum Dei constitutivum, quatenus a creaturis differt; et a qua mens progredi possit ad perfectiones cæteras ipsius demonstrandas. Cæteras hasce perfectiones attributa nuncupamus; non quia ad modum qualitatuum quarundam, ab essentia tanquam a radice, dimanent; sed quia ab illa rationando deducuntur.

78. Ex hoc intelliges, quum quæritur quænam sit Dei essentia, hoc tantummodo quæri: quinam sit ille peculiaris Dei conceptus, qui in nostram cognitionem cadit tanquam primo constitutivum ipsius, et ut cæterarum perfectionum radix; vides propterea, quæstionem hanc esse pure methodicam.

Cæterum ex dictis manifeste colligitur (18), id quod primo de Deo concipitur, hoc esse: quod sit *Ens a se, sibi que sufficiens ad existendum*. Ex hoc ipso cæteras Dei perfectiones deduci posse, infra patebit. Esse ergo a se (*aseitas*), essentia Dei merito appellatur.

ARTICULUS II.

Deum non esse in ullo genere.

79. PROPOSITIO I. *Divina essentia non est in ullo genere, quod sit ipsi et alicui alteri naturæ commune.*

Deducitur ex dictis.

Nam 1º ut s. Thomas arguit, « cum esse Dei sit ejus essentia, si Deus esset in aliquo genere, oporteret, quod » genus ejus esset ens; nam genus significat essentiam rei, » cum prædicetur in eo quod quid est. Ostendit autem Philosophus, in III. metaph., quod ens non potest esse genus » alicujus; omne enim genus habet differentias, quæ sunt » extra essentiam generis: nulla autem differentia posset

» inveniri, quæ esset extra ens, quia non-ens non potest esse differentia (1). » Vide dicta de entis conceptu (O. 13. seq.).

2^o Ratio per genus significata indifferens est ad plures differentias, quibus ad species diversas determinatur; nullam enim differentiam huiusmodi essentialiter habet. Ratio ergo generis in suo conceptu indifferentiâ ad existendum includit; non enim potest existere sine aliqua differentia. Propterea quidquid sub genere aliquo continetur, est in suo conceptu indifferens ad existendum.

Jam divina essentia non est indifferens ad existendum, imo essentialiter est, ipsaque est suum esse. Ergo.

80. Concludes 1^o Deum esse supra omne genus.

2^o Quid Deus sit, proprie definiri non posse.

3^o Propterea Deum esse incomprehensibilem.

4^o Quæcunque nomina Deo simul et creaturis tribuuntur, analogica esse.

* 81. Objici posset 1^o Deum in genere substantiæ comprehendendi, quatenus substantiæ nomine intelligimus *ens quod per se est* (O. 134).

Ad hoc respondendum cum eodem s. Thoma: « Substantiæ nomen non significat hoc solum, quod est per se esse, » quia hoc quod est esse, non potest per se esse genus; sed » significat *essentiam cui competit sic esse*, i. e. per se esse; » quod tamen non est ipsa ejus essentia. Et sic patet, quod » Deus non est in genere substantiæ (2). »

* 82. Objicies 2^o res creatas, etiam in essentialibus, Deo similes esse; propterea habere aliquid quod ipsis et Deo logice commune est. Quatenus ergo Deus et res creatæ similes sunt, communi genere comprehensas videri.

Resp. juxta pulcherrimam s. Thomæ theoriam (3), similitudinem variam esse pro varietate modi, secundum quem aliqua forma pluribus communis est. Quædam igitur eandem formam habent, et secundum eandem rationem, ut v. gr.

(1) *Summ. th.* p. I, q. III. art. V.

(2) *Ibid.* ad 1. Cf. quoque *Summam Contra Gent.* lib. I, c. XXV.

(3) *Sum. th.* p. I, q. IV, art. III.

duo homines vel duo rectangula: quædam vero eandem formam habent, sed non secundum eandem rationem, ut v. gr. homo verus et homo pictus.

Certum est autem, omnem effectus perfectionem aliquo modo in causa præcontineri (O. 265); ac propterea omnem effectum aliquo modo suæ causæ similem esse. Sed non omnes effectus suis causis ita sunt similes, ut et in eadem forma et secundum eandem rationem conveniant, ut patet in iis effectibus quorum perfectionem eminenter aut virtualiter (O. 265) causa præcontinet. Hi tamen possunt cum suis causis convenire in eadem forma, secundum eandem rationem generis. At cum Deus sub nullo rerum finitarum genere contineatur, res ab eo conditæ divinam perfectionem in se referre non possunt, neque secundum speciei neque secundum generis rationem eandem, sed tantummodo secundum analogiam unius ad alterum (L. 66). « Et hoc modo, ita con- » cludit S. Doctor, illa quæ sunt a Deo, assimilantur ei, in » quantum sunt entia, ut primo et universali principio totius esse (1). »

* 83. De qua Deum inter et creaturas similitudine animadvertente adhuc, quod idem Aquinas subtiliter notat in eadem quæstione: « quod licet aliquo modo concedatur, quod creatura sit similis Deo, nullo tamen modo concedendum est, » quod Deus sit similis creaturæ (2). » Id quod alio in loco uberius explanat his verbis: « Convenientius dicitur Deo » creatura similis, quam e converso. Simile enim alicui dicitur, quod ejus possidet qualitatem vel formam. Quia igitur id quod in Deo perfecte est, in rebus aliis per quamdam deficientem participationem invenitur, illud secundum quod similitudo attenditur, Dei quidem simpliciter est, » non autem creaturæ; et sic creatura habet quod Dei est; » unde et Deo recte similis dicitur. Non autem sic potest dici, Deum habere quod creaturæ est: unde nec convenienter, dicitur, Deum creaturæ similem esse, sicut nec

(1) *Sum. th.* p. I, q. art. III.

(2) *Ibid.* ad IV.

» hominem dicimus suæ imagini fore similem, cui tamen
» sua imago recte similis enuntiatur (1). »

ARTICULUS III.

De infinita Dei perfectione.

84. Consideranda nunc est penitius Dei essentia, ac videndum cujusmodi sit ens a se, ens cujus essentia est esse. Non enim potest hoc *esse* ita intelligi, ut existentiam solummodo comprehendat; existentia namque notio abstracta est ac maxime indeterminata; nihilque potest existere, quod solam existentiam habeat. Statuamus igitur oportet, quænam sit illa realitas et perfectio, quæ ita est actu, ut independentem ab omni causa sit, ac plane nequeat non esse.

85. PROPOSITIO II. *Deus est ens actu infinitum.*

Ens actu infinitum est ens absolute perfectum (O. 362); nimirum ens quod perfectiones omnes, sine ullo defectu, sine ulla imperfectionis admixtione, essentialiter continet (O. 329). Hoc intelligimus quum dicimus, Deum esse actu infinitum.

Probatur 1^o Deus est ens a se. Sed ens a se nullam potest habere limitationem seu imperfectionem. Non enim vi essentiae suæ limitibus circumscribitur, nec ab alio limitari potuit, nec a seipso.

Non est limitatum vi essentiae suæ. Etenim essentia entis a se est actu esse (18, 2^o). Nulla autem pura perfectio cum hac essentia pugnat; omnis enim pura perfectio est aliquid esse. Nullus quoque defectus ab hac essentia necessario dimanat; nam defectus inest rei secundum quod aliquo modo non est; in conceptu vero ipsius esse non continetur, ut aliquo modo non sit; non enim idcirco aliquid est limitatum quia est, sed quia est hoc aut illud, v. gr. lapis, planta, homo.

Non potuit insuper ab alio limitari, quia ab alio non pendet, nec esse participatum habet. Non a seipso, quia sui ipsius causa non est. Ergo.

(1) *Contra Gent.* Lib I, c. XXIX.

86. 2^o Ens a se non habet esse participatum, sed est ipsum esse per se subsistens. Ergo concludit s. Thomas, « oportet » quod totam perfectionem essendi in se contineat (1). »

Etenim defectus omnis secundum datam quamcunque realitatem, inveniri solummodo potest in iis, quæ realitatem illam participatam habent; ut v. gr. defectus sapientiæ inveniri potest in iis, qui sapientiam habent participatam et acquisitam, si nempe non secundum perfectam sapientiæ rationem illam participant. Si vero certa aliqua realitas inveniretur per se subsistens, nihil profecto de perfecta ejusdem realitatis ratione illi deesse posset; ut v. gr. si inveniretur ipsa sapientia per se subsistens, nihil posset ab ea abesse, quod ad perfectam sapientiæ rationem pertineat.

Si igitur Deus est ipsum esse per se subsistens, nulla re carere potest, quæ ad perfectionem essendi pertineat: secus aliquo modo esset non ens. « Omnes autem perfectiones, inquit s. Thomas, pertinent ad perfectionem essendi. Secundum hoc enim aliqua perfecta sunt; quod aliquo modo esse habent. Unde sequitur quod nullius rei perfectio Deo desit (2). »

87. 3^o Deus est primum ens in genere causæ (16). Ergo omnium possibilium perfectissimum est. Ergo omnium quæ esse possunt, perfectiones continet.

Probatur prima consequentia. Si enim possibile foret aliud ens Deo perfectius, hoc ens vel jam existit, vel est pure possibile. Jam ea quæ existunt, a primo ente dependent; non sunt ergo illo perfectiora; quæ pure possible sunt, contingunt; sunt ergo imperfectiora ente necessario.

Probatur secunda consequentia. Ens quod omnium possibilium perfectiones continet, perfectius est eo, quod aliquam hujusmodi perfectionem non contineat. Ergo ens quod omnium possibilium perfectissimum est, perfectiones omnes possibiles contineat oportet.

88. Atque hæc satis esse possunt firmandæ veritati. Ad

(1) *Summ. th.* p. I, q. IV, art. II.(2) *Ibid.*

errores autem cavendos, qui quidem hac in re gravissimi sunt, hæc sedulo animadverti debent.

1^o Deus omnes quidem perfectiones continet, sed modo diverso. Perfectiones enim *simplices* (O. 331) continet *formaliter* (265); mixtas autem *eminenter*, et *virtualiter* (Ibid.). Ratio est, quod perfectiones simplices nullam continent imperfectionem, nec ulteriorem realitatem excludunt: mixtæ vero sunt cum imperfectione conjunctæ, ut quæ majorem aliquam perfectionem natura sua excludunt. Illæ igitur in Ente perfectissimo possunt esse secundum propriam rationem; istæ vero solummodo, qui nullam contineat imperfectionem, nec ulteriorum realitatem excludat.

2^o Ipsæ perfectiones simplices, quæ formaliter in Deo sunt, non sunt tamen in illo secundum eam ipsam rationem, quam in rebus creatis habent, sed multo eminentius. Nam in rebus creatis multæ perfectiones hujusmodi sunt accidentia, ut est sapientia, justitia, sanctitas: omnes vero sunt limitatæ et participatæ. In Deo autem nihil esse potest, quod accidentale sit, aut imperfectum, aut participatum. Sunt ergo illæ perfectiones in Deo secundum sui rationem absolutam, et abstractam a modo quo sunt in creaturis.

3^o Patet hinc, cur nomina quæ perfectiones absque defectu absolute significant, Deo attribuantur, ut quod sit ens, bonus, intelligens; liber, sapiens, justus etc.; quæ vero significant perfectionem aliquam, ut propria est rerum creatarum, v. gr. corpus, animal, homo etc. de Deo dici non possint.

4^o Hinc quoque et illud colliges, quod paulo ante statutum est (82), ea nomina, quæ tam Deo quam creaturis tribuuntur, non univoca esse sed analogica (1).

5^o Intelliges, quo sensu Deus dicatur *ipsum esse, totum esse, plenitudo essendi*, videlicet non quia Deus sit omnia quæ sunt, aut esse formale omnium, id quod pessimus est pantheismi error, sed quia omnem puræ perfectionis realitatem, qua essendi actus nobilitari potest, natura sua ipse complectitur.

(1) Cf. S. Thomæ Sum. th. p. I. q. XIII. art. I-VI.

CAPUT II.

DE PANTHEISMO.

ARTICULUS I.

De pantheismi diversis formis.

89. Consideravimus jam quænam sit essentia divina, et cujusmodi sit; superest ut consideremus, quodnam sit subiectum, ut ita dicam, essentiæ hujus, seu quodnam sit objectum, quod dici possit Ens a se summeque perfectum. In quo duo errores omnium pessimi ac funestissimi erunt nobis confutandi; alter eorum qui Deum cum hac rerum universitate confundunt; alter eorum qui divinam naturam universalem aliquam esse naturam putant, ac pluribus diis communem. Contra primos ostendendum erit, personalem, ut aiunt, Deum, et a rerum universitate distinctum, esse admittendum; contra secundos, Deum unicum esse et immultiplicabilem.

90. Primus error dicitur *pantheismus* (πᾶν Θεός); qui non aliud revera est, quam larvatus atheismus; perinde enim est si nullum esse Deum affirmes, ac si statuas nihil aliud vocari debere Deum, nisi rerum omnium quæ sunt congeriem. Idcirco qui hoc erroris monstrum sectantur, inter atheos merito recensentur; nisi quod *athei indirecti* nuncupari solent. Cæterum antiquissima est hæc humanæ mentis aberratio, eaque varias in variis ætatibus induit formas; sed ætate præsertim nostrâ quidquid abnormis pravique habet, impudentius aperuit, ac veluti insanis culmen attigisse visa est.

91. Diversæ pantheismi formæ ad hasce tres revocantur; videlicet *ad emanationem transeuntem* mundi e divina substantia; *ad evolutionem immanentem realem* ejusdem divinæ substantiæ; *ad evolutionem idealem absoluti*.

Prima forma, sub qua pantheismus apparuit, est *emanatio transiens*. Obliterata enim notione creationis ex nihilo, primum erat in eum errorem labi mortales, ut rerum omnium

semina, ac materiam ex qua res factae sunt, in divina substantia praëxstitisse opinarentur. Invenimus errorem hunc apud Indos, in theologia brahmanica, quam vetustissimi ejus gentis libri continent; nec non in geogoniis Ægyptiorum et Persarum: primi item Græcorum mystagogae ac vates hanc ipsam doctrinam tradidisse videntur; quin sub aëre quoque christianae initium gnostici eam profitebantur. Apud hos omnes emanationis theoria mythorum plus minusve ridiculorum velamine contegebatur, quo factum est, ut brevi aditum polytheismo aperiret. Hanc scientificis formulis expresserunt Pythagoras ejusque schola, et media aetate Scotus Erigena ac Jordanus Bruno.

92. *Evolutionem immanentem realem* sed diversimode docuerunt neoplatonici, realistae heterodoxi (L. 521), ac praesertim Baruch Spinosus. Generatim hic error in eo situs est, ut esse unum ponat, illudque infinitum et aeternum, quo mundi visibilis, eorumque quae in ipso sunt, vera ac realis essentia contineatur: cætera quaecunque entia dicimus, non aliud esse, quam varias ejus sive formas, sive individuationes, sive manifestationes. Spinosus saeculo XVII hanc theoriam perfecit, seu potius crassiorem effecit ac materialisticam, atque atheismum in ea latentem, et ab iis qui praecesserant pantheistis, saltem ab omnibus forte non agnitus, palam eduxit, substituens notionibus unitatis supremæ, identitatis, esse absoluti, notionem magis definitam substantiæ; ac docens unicam esse substantiam, cujus duo sunt attributa, cogitatio et extensio; quidquid vero existit substantiæ hujus, secundum unum aut alterum modum, affectiones esse.

93. *Pantheismus idealis* absurditatis culmen attingit, eo quod pantheismus cum idealismo consocians, infinitæ et absolutæ unitatis evolutionem non aliam admittit, quam phaenomenalem et idealem. Doctrinam hanc tradiderunt in India primum philosophi scholæ vedanticæ, auctore Vyasa: horum sententia erat: Brahma solum existere, ens aeternum, purum, illimitatum; omne autem id quod Brahma non est, omne quod limitatum ac multiplex nobis apparet, non reale quidpiam, sed meram illusionem esse. Quocirca quum existima-

mus mundum, homines, nosque ipsos esse entia, et a Brahma distingui, vanis speciebus realitatem tribuimus, ac in somnii statu versamur; quum vero cognoscimus Brahma solum esse, nihilque aliud præter ipsum, tum enimvero expergiscimur, scientiaque potimur.

94. Eandem fere doctrinam sectata est inter Græcos schola eleatensis, quæ Xenophanem parentem habuit, ac Parmenidem et Zenonem propugnatores acerrimos. Hi tanquam principium indubium statuebant, fieri prorsus non posse, ut quidpiam novi, sive substantia sive modificatio sit, producat. Proinde quidquid est, aeternum esse et immutabile. Res finitas, ac propterea inter se dissimiles ac mutabiles, pura esse phaenomena; unicum tantum ens agnosci oportere, absolutum, infinitum ac semper idem. Hoc verum cogitationis objectum esse; cogitationem autem ejusque objectum esse unum idemque (1).

95. Hæc fere eadem invenies apud recentiores pantheistas germanos, qui revera hoc nobis tanquam magnum quemdam in rebus philosophicis progressum oggesserunt, ut nos ad vedanticorum et eleatensium somnia retro agerent.

* Novæ hujus aberrationis origo ex Kantii doctrinis repetenda est. Is enim, quanquam et objectum et subjectum reciperet, cum tamen omnes objecti formas a subjecto derivaret, objectum ipsum inexcogitabile fecerat (L. 516, 3^o), et arbitrarie solum ac precario phaenomenorum realitatem recipere videbatur. Erat itaque expectandum, fore aliquem ex ejus discipulis, qui magistri opus prosequeretur, atque objectum eliminaret, solo subjecto retento. Fuit hic Amadeus Fichte. Is statuit, subjectum et objectum, cognitionem et existentiam unum prorsus idemque esse. Unice esse *τὸ ego* absolutum et illimitatum, quod activitas infinita est. Hac activitate necessaria imagines creantur, et ideæ quibus exterior mundus continetur, quin tamen *τὸ ego* creans vel eas vel se agnoscat ac sentiat. Sed quum in has ideas impingit *τὸ ego*, in se reflexione redit, ac duplicem affirmationem ponit, pri-

(1) De his omnibus, quæ ad pantheismi historiam pertinent cf. Opus cl. Maret: *Essai sur le panthéisme dans les sociétés modernes*. Ch. I. Vet auctiores ab eo citatos.

mitivam utramque, quarum tamen altera ab altera dependet. Prima affirmatio ac prima cognitio hæc est: *ego sum ego*. Altera: *non-ego non est ego*. Prima affirmatione affirmando se, se creat, sed se limitatum ac distinctum, quatenus affirmatione altera se limitat, opponendo sibi *non-ego*. Se autem hoc pacto limitat, quia resistantiam *non-ego* a se conficti experitur. Sed brevi activitate sua, quæ est ejus esse, hos limites transgreditur, dein novos ponit limites, eosque iterum superat, et ita porro sine fine: atque hoc pacto *ego* sentit se infinitum esse.

* 96. Schelling loco *non-ego* absoluti sufficit *esse absolutum*, quod nec subjectum est nec objectum, sed quasi neutrum inter utrumque. In hoc esse absoluto, etiam juxta ipsum, esse et cognoscere sunt unum idemque: cognitio autem primo est intuitio sine conscientia, quæ prorsus cum objecto confunditur. Scinditur autem absolutum in duplicem ordinem, cognitionis et existentiae, quum fit separatio inter objectum et cogitationem; hæc separatio fit per conceptus, in quibus forma, quæ generale quiddam est, cogitationi, particularia autem existentiae respondent. Sed hæc separatio non est in ipso esse absoluto, quod est perfecte unum; est tantummodo ejus varia manifestatio. Esse absolutum est infinitum: fit vero finitum in statu ideali, prout esse a cognitione distinguitur.

* 97. Quæ Schelling affirmando posuerat, Hegel demonstrare aggressus est; ita tamen ut ad eandem conclusionem diversa methodo perveniret. Non modo enim in ipso esse absoluto unitatem constituit, sed etiam inter ejus manifestationes; contendens, in omnibus relationibus sive inter objecta, sive inter subjectum et objectum, totum id quod reale est ac positivum, relationem ipsam esse, quam ideam vocat, correlativos vero terminos realitatem non habere, nisi in ipsa relatione seu idea. Idea enim hegeliana est *ens*, et est *nihil*; sed non ens quod jam vere aliquid sit, at quod fieri omnia potest, quemadmodum secundum considerationem logicam nobis est ens in genere; itemque idea hegeliana est *nihil*, at non nihil, quod simpliciter nihil sit, sed ex

quo fieri omnia possunt. Itaque si Idea consideretur conceptibus abstractis entis et nihili, hæc duo sibi videntur opposita, sed in ipsa Idea et a parte rei sunt unum idemque, principium scilicet omnium. Hinc hegelianæ theoriæ fundamentale principium: *identitas contrapositionis*; et contrapositionem esse omnium essentiam. Quod enim fit, est et non est. Itaque in ipso fieri duo illa opposita habentur, ens scilicet et nihil. Hinc ultima Hegelii conclusio: rerum universitatem esse ipsum fieri, nempe processum *Ideæ* a statu esse puri et abstracti sese necessario evolventis, per totidem momenta ac progressus, in ideas generales, seu entia universalialia, per negationes et negationes negationum; donec se totam comprehendat ut negationem absolutam negationis Entis. Hoc Ideæ progressivo et indefinito motu logica, natura, spiritus constituitur, totaque humanitatis historia continetur. Idea vero, seu processus absolutus, est Deus: propterea (horridum dictu!) *Deus est in fieri*. Formula hæc est compendium hegeliani delirii.

98. Germanici pantheismi virus quosdam quoque aliarum nationum philosophos infecit, eclecticis præsertim Galliæ et sectam saint-simonianorum. Hi hegelianas maxime theorias sectantur, non tamen ex integro. Neglectis enim principiis, eorumque abstractis abstrusisque applicationibus, aut iis leviter et ambigue enuntiatis, historicas solum et religiosas ac politicas conclusiones receperunt; fatalem nempe in humanitatis evolutione necessitatem, ejusque indefinitum progressum, quo ad suam destinationem urgetur, nempe ad Ideæ absolutum complementum. Hinc illæ a priori conditæ historiæ, quæ pantheismum undique redolent, et sociales theoriæ, quibus divina omnia humanaque jura anathemate damnantur; ac vaga illa et proteiformis vox *progressus*, quam multi in ore habent, quin tamen intelligant quid illa significetur.

99. Ut brevitati consulamus primo quædam affieremus, quibus pantheismi generatim inspecti absurditas fit manifesta; deinde speciatim refellemus, primo pantheismum realem et materialem, ad quem et emanationis transeuntis

systema, et omnis theoria evolutionis realis reducitur; secundo vero pantheismum idealem.

ARTICULUS II.

Generalis pantheismi confutatio.

100. Essentia ipsa pantheismi, quæcunque sit ejus forma, doctrina est *identitatis universalis*, qua phænomena omnia et interna et externa unius solummodo entis manifestationes esse traduntur. Omnis itaque pantheismus sequenti propositione refellitur.

PROPOSITIO I. *Systema identitatis universalis est absurdum in se, et quam quod maxime perniciosum.*

101. Dixi primo, esse *absurdum in se*. Etenim:

1^o *Contradicit experientiae externae*. Hæc enim tantum abest, ut unitatem entis et identitatem offerat, ut imo multipliciter distinctionemque ubique nobis exhibeat.

a) Offert multipliciter ac distinctionem in ipso sensationis actu, qui ex se et absque ullo antecedente judicio, saltem in sensationibus representativis, objectum a subjecto discretum exhibet (L. 459; P. 515, seq.).

b) Offert immediate multipliciter inter ipsa objecta. Ita enim objecta exhibet, ut unumquodque certæ figuræ limitibus contineatur; insuper alterum ab altero, tam quoad essentiam, quam quoad existentiam, se probet independens; unum ab altero appareat plane divisum; nec raro unum alteri oppositum.

c) Ipsa corporum extensio ostendit in omni corpore innumeras partes esse, quæ licet conjunctæ simul, actu tamen distinctæ sunt et separationi obnoxie. Est propterea in unoquoque corpore entium multitudo.

d) Aliqua tamen unitas experientiae ope in rebus detegitur. Hæc est in quibusdam unitas generica vel specifica; in aliis unitas similitudinis et æqualitatis; in omnibus unitas symmetrica et harmonica; in rerum omnium congerie unitas finis. Sed unitates istæ omnes logicæ sunt, non reales, atque adeo realem multipliciter includunt (O. 217).

Quæ cum ita se habeant, aut pantheista realitatem mundi exterioris recipit, aut non. Si primum, contradicit experientiae, quia mundi realitatem fingit plane contrariam illi, quam experientia offert; si alterum, iterum experientiae contradicit, quia negat id quod experientia evidenter manifestat (L. 470, seq.), h. e. mundi realitatem. Ergo.

102. 2^o *Contradicit experientiae internae*.

a) Nihil interna experientia certius est, quam nostra personalitas; nempe quod subjectum cogitans sit inter multa unum in se, ab omni alio divisum, et in se totum (O. 166); non vero pars integrans aut accidens magni totius, quemadmodum pantheistæ fabulantur.

b) Eadem interna experientia me docet, in sensationibus me passivum esse et ab alio determinari (L. 471). Docet ergo iterum distinctionem subjecti ab objectis.

c) Testatur eadem, gaudere nos arbitrii libertate, nempe voluntatem nostram non necessario ad actum determinari, sed ita esse sui juris, et ad utrumlibet oppositorum indifferenter, ut ab ipsa solummodo pendeat ad unam potius partem quam ad alteram se inflectere. Libertatem autem hujusmodi diserte negant pantheistæ, ac vi suorum principiorum negant. Si enim unicum est ens, quod necessitate quadam ineluctabili se explicat seque modificat, si omnia quæ sunt nil aliud sunt, quam harum evolutionum atque modificationum momenta, partes, phænomena; quid erit quod necessitati atque inexorabili fato non sit subjectum?

d) Postremo affectus quos experimur, amoris, aversionis, iræ, timoris, reverentiæ, æmulationis, grati animi, alique horum similes, supponunt ex se ac natura sua aliquem terminum a subjecto earundem affectionum discretum, imo plures terminos inter se distinctos atque diversos. Hos ergo affectus pantheismus inexplicabiles facit, atque adeo absurdos, in eo quod omnem subjecti a subjecto distinctionem perimit, et in absolutæ identitatis barathro omnia commiscet atque confundit.

103. 3^o *Est contradictionum cumulus*.

Systema enim identitatis universalis mundum hunc

aspectabilem facit ac vocat Deum, nempe ens a se, necessarium, independens; neque alium, præter mundum, Deum agnoscit. Jamvero hæc duæ, mundus ac Deus, in omnibus maxime opponuntur. Ergo hæc idearum complexio: *Deus-mundus* contradictionum acervum contineat necesse est.

Revera a) mundus est evidenter *contingens*. Nulla enim absurditas si concipiatur vel nunquam fuisse, vel amplius non esse. Ac præterea alii mundi sine numero, quorum existentia hujus existentiam excluderet, sunt evidenter possibiles. Si ergo mundus contingens est, non est a se, est ab alio productus, ab eoque dependens: id quod alio in loco fusius probatum est (C. 258). Absurdisime igitur mundus cum ente necessario confunditur.

104. b) Deus, nempe ens a se, est *simplex*, *immutabilis*, *æternus*, ut in sequentibus ostendetur; et ut jam ostendimus (84), est *infinite perfectus*.

Atque mundus est *compositus* ex partibus realiter distinctis.

Est *mutabilis*, ut perpetua patet experientia. Omnes ejus partes et novas ineunt combinationes, prioribus dissolutis; et de potentia in actum transeunt; et motu tam intestino quam locali moventur; et in se invicem agunt; ac semper novas modificationes suscipiunt. Si ergo omnes partes mutantur, profectò in seipso mutatur totum.

Mundus *nec est nec potest esse æternus*, ut alia omittamus vel ex infinita mutationum serie, quam ipsius æternitas includeret. Vide alibi dicta (C. 286, seq.).

Est insuper necessario *finitus*: nam id quod pluribus partibus coalescit, limitibus necessario constringitur (C. 255).

Est igitur *imperfectus* et absolute et relative (O. 350). Absolute quidem, quia non est ens optimum, ut patet ex dictis: relative vero, quia mundus hoc melior concipi potest.

105. c) Deus, quia ens infinite perfectum, est *beatissimus*, *sapientissimus*, *sanctissimus*. Si autem Deus est mundus, Deus in homine patitur dolores, morbos, animi angustias, egestatem, mortem; Deus se non cognoscit, nisi per huma-

num intellectum, idemque in homine dubitat, ignorat, inquit, errat, somniatur et demens est; Deus in homine sperat ac timet, invidet, irascitur, furit, odiis contabescit, atque amoribus omni odio turpioribus ardet, ingratus est ac proditor, crudelis et avarus, mendax et parricida. Ergo nec beatus, nec sapiens, nec sanctus est.

Vere igitur identitatis universalis systema contradictionibus scatet manifestis.

106. Dixi secundo, hoc idem systema esse maxime *perniciosum*. Ad cujus assertionis evidentiam, sat est animum ad effectus advertere, qui natura sua a pantheismo dimanant; quidque fieret de humana societate, si pantheismi deliramenta ab omnibus reciperentur.

1^o Quæcunque ab atheismo, eadem et a pantheismo incommoda ac mala consequuntur. Pantheismus enim, ut initio diximus, non aliud est, quam larvatus atheismus. Revera quid differt, si Deum esse neges, ac si Deum appelles rerum omnium collectionem, aut abstractum quiddam, quod ex necessitate se evolvat, et cujus maxima manifestatio ac perfectio sit humanitas? Quam reverentiam Deus iste sibi vindicabit, quem amorem? Eritne possibilis religio?

2^o Imo multo magis lethale est pantheismi vires, quam atheismi. Atheismus enim nec humanam libertatem tollit, nec intrinsecum discrimen inter bonum et malum, saltem funditus, extirpat. Sed pantheismus cum omnia ferreæ necessitati et ineluctabili fato subjiciat, nullum libertati locum reliquum facit. Ex quo, et ex eo quoque, quod in absoluto omnia unum idemque sint, nulla amplius inter virtutem ac vitium distinctio esse potest, nullum amplius officium, nullum jus, ac propterea nulla moralis lex.

3^o Teterrimum hoc monstrum discrimen insuper omne inter verum ac falsum subruit, ens cum non ente identificat, regnum contradictionis constituit. Hæc enim, ut patet ex hegelianis theoriis, est ultima pantheismi expressio.

4^o Ex hoc sponte sua consequitur, in ordine quidem theo-

retico, idealismus et scepticismus universalis, et omnis erroneæ doctrinæ æque ac omnis veritatis approbatio;

5^o In ordine autem pratico, pessimus procreatur egoismus, ac suimet adoratio, qua homo se unice pro fine sibi constituens, humanam ipsam societatem, si opus fuerit, suæ vel utilitati vel voluptati immolare non vereatur.

Hinc intelliges, cur pantheistæ recentiores pantheismi notam, velut pudoris atque infamiæ plenam, a se omni studio avertere satagant. Nempe consecraria pantheismi horrent, eorumque auctores videri nolunt. Sed nonne satius foret, cum consecrariis ipsum etiam principium abjicere?

ARTICULUS III.

Difficultates.

107. Quemadmodum modo pantheismum generatim inspectum refutavimus, ita nunc præcipua pantheistarum objecta quibus universalem identitatem statuere conantur, dissolvemus.

Opp. I. Ens infinitum, quod est Deus, omnem continere debet realitatem. Ergo nulla realitas extra Deum. Ergo nullum ens præter Deum possibile est.

Revera 1^o Ens infinitum est ipsum esse. Esse autem complectitur omnia quæ sunt. Ergo Deus complectitur omnia quæ sunt.

2^o Idea entis in genere infinitatem quamdam præfert et necessitatem. Propterea ejus ideæ objectum est ens infinitum et necessarium. Hoc ergo ens est ens commune.

3^o Quod si Deus esset ens determinatum, esset quoque in eo aliqua negatio. Sed hæc in ente infinito esse nequit.

4^o Ens vero finitum est non-ens. Nam limes nihil est.

108. Resp. *Dist. maj.*: Deus continere debet omnem realitatem, i. e. omne id quod existit, *nego*; i. e. omnem perfectionem possibilem, *subd.*: ut est in rebus existentibus, aut ut esse potest in rebus possibilibus, *nego*; modo eminentiori, *conc.*

Et juxta hæc *distincto* primo consequente, *negatur* absolute secundum. Vide quæ dicta sunt in præcedenti capite (88).

109. Ad 1^m *Dist. maj.*: Ens infinitum est ipsum esse, quatenus 1^o non habet esse participatum, sed est suum esse; et 2^o in ejus essentia nulla est imperfectio, *conc.*; quatenus sit esse formale rerum omnium, *nego*.

Contradist. min.: Esse Dei proprium, *nego*; esse formale et commune complectitur omnia quæ sunt, *subd.*: unitate quadam logica, *conc.*; unitate reali, *nego*. Et *nego cons.*

Ad 2^m *Dist. 1^m partem*: Idea entis in genere præfert infinitatem, nempe indeterminationem maximam quoad essentia rationem, et indefinitam extensionem (O. 366), *conc.*; infinitatem actualem, quæ summa perfectio est, *nego*.

Dist. 2^m partem: Præfert necessitatem: i. e. necessario hæc idea oritur in mente, *conc.*; necessitatem habet objectivam, *subd.*: quatenus eadem sit ac idea entis necessarii, *nego*; quatenus cognoscimus aliquod ens necessario esse admittendum, *subd.*: esse admittendum necessitate consequente, *conc.*; antecedente, *nego*. Videlicet hoc ipso quod ens percipio, est consequenter admittendum et ens perceptum (L. 510), et ens percipiens (L. 425, 4^o). Ratiocinando vero deprehendimus, si aliquid nunc est, aliquid semper fuisse; ac deinde ad Ens necessarium ascendimus (17).

Ex his patet *negandum esse minorem* argumenti.

Ad 3^m *Dist. maj.*: Si Deus est ens determinatum, est in eo aliqua negatio; nempe ejus essentia est hæc et non alia, ac propterea Deus est hoc ens et non omnia entia (O. 25), *conc.*; est in eo aliqua negatio perfectionis, *nego*. Et *contradist. min.*

Ad 4^m *Nego*, quantum spectat ad præsentem quæstionem. Dici tamen solent entia finita non-entia, non quia non sint, sed quia non sunt suum esse, ex se nihil sunt, indigentque causa a qua esse participatum habeant.

Ad. rat. add. *Dist.*: Limes nihil est in obliquo, *conc.*; in recto, *nego* (O. 346). Non igitur inferre licet, ens limitatum esse ens, in quo non est nisi pura negatio; quod quidem

contradictorium esset, sed inferri solum debet, ens limitatum esse ens, quod aliquid habet et aliquid non habet.

110. Opp. II. Præter ens infinitum, nullum aliud ens ab eo distinctum intelligi potest.

1° Si enim existeret corpus infinitæ magnitudinis, nullum aliud corpus posset existere. A pari.

2° E contrario, hoc ipso quod unum corpus est extra alterius locum, extensione finitum esse intelligitur. Eodem modo hoc ipso quod unum ens est extra alterius esse, hoc est finitum secundum esse.

111. Resp. *Neg. ant.*

Ad 1^m *Tr. ant.*; *neg. cons. et paritatem.* Noto in primis. Si corpus infinitæ magnitudinis existeret, certe nullum aliud corpus existere posset in serie continua cum illo; quia illud, ex eo quod infinitum esset, omnia idealia spatia occuparet, ac proinde adæquaret impleretque possibilitatem corporum, quæ in serie continua coexistere possunt (C. 334). Non tamen per hoc expleret possibilitatem omnium absolute corporum. In eo enim loco, ubi unum est corpus, infinita alia possunt existere, saltem diverso tempore.

Sed hoc omisso, nulla est paritas cum Ente infinito. Etenim Ens infinitum non explet omnium entium possibilitatem; quia Ens infinitum non est omne ens, sed Ens perfectissimum, eminenter reliqua continens. Propterea alia entia non excludit. Imo alia entia possibilia non sunt, nisi ex eo quod existit Ens infinitum, quod et omnis intelligibilitatis fundamentum est, et potest efficere ut sint quæ ex se nihil sunt.

Ad 2^m quoque *nego parit.* Etenim de ratione infiniti corporis foret, ut omnia possibilia spatia occuparet; idcirco corpus quod spatium finitum occupat, finitum est. At vero non est de ratione Entis infiniti, ut sit omne ens possibile, seu formaliter, seu ad modum totius; sed solum ut omnium possibilibus perfectiones eminenter contineat.

Neque ens ex eo finitum dicitur, quod alia entia sint præter ipsum, sed quod ipsum aliqua perfectione careat.

112. Opp. III. Infinitum non foret amplius infinitum, si

aliquid ipso majus cogitari posset. Atqui si extra Ens infinitum essent entia finita, jam aliquid infinito majus cogitari posset.

Nam 1° ens infinitum, una cum entibus finitis esset aliquid majus solo infinito.

2° Neque obstat, quod ens infinitum finitorum omnium perfectiones eminenter continere dicatur. Nam nummus aureus, v. gr. nummi argentei pretium eminenter continet, et nihilominus pretium nummi aurei simul et argentei solo nummi aurei pretio profecto majus est.

113. Resp. *Dist.* : Si ens aut complexio entium superans perfectione infinitum cogitari posset, idem infinitum non foret amplius infinitum, *conc.*; si entium summa numerica unitate infiniti major cogitari potest, *nego*, et *contradist. min.*

Ad 1^m eadem adhibeatur distinctio.

Sane cum Ens infinitum unum sit, additis entibus finitis, ex his et Ente infinito fit numerus unitate major. Sed quod ens infinitum, una cum finitis, numerum constituat, nihil ejus perfectioni derogat, si complexio illa ex Infinito et finitis non constituat aliquid Infinito majus, nec quoad perfectionum partialium numerum, nec quoad perfectionis totalis intensitatem. Atqui neutrum contingit.

Nam quod ad primum pertinet, Infinitum omnes finitorum entium perfectiones perfectissime in se uno continet. Ergo complexio illa nullam exhibet perfectionem, quæ jam in solo Infinito cumulatissime non sit.

Quod vero spectat ad alterum, sufficit illud animadvertere: id solum in complexione intensius, quam in singulis partibus reperiri, in quo singula conveniunt; quemadmodum v. gr. si nummo aureo duos asses addideris, major est in hac summa quam in solo aureo valor: quum vero res additæ in aliquo essentialiter discrepant, id in quo discrepant, non est in collectione magis quam in partibus intensum; ut si homo sapiens nummum aureum inveniatur, non idcirco majorem complexio hæc exhibet sapientiam. Jam vero Deus et res finitæ, ut supra demonstravimus (82), in nulla prorsus per-

fectione univoce conveniunt. Ergo complexio ex Deo et rebus finitis perfectionem intensiorem non exhibet, sed duas perfectiones omnimodis diversas.

Per hæc patet quoque responsio ad 2^m.

114. Opp. IV. Si entia finita præter Infinitum existunt, existimandum erit, ea fuisse ab Infinito producta. Sed productio hæc admitti non potest.

Nam vel entia finita continebantur jam in Ente infinito, vel non. Si primum, non fuere producta, sed educta; ideoque ad Infiniti substantiam pertinent. Si alterum dicitur, jam productio omnis repugnat, quia ex nihilo nihil fit. Ergo.

Resp. Conc. maj. Nego min.

Ad prob. *Omitto ant.* et *cons.*, quod ex primo disjunctivæ membro infertur. *Nego* partem alteram, et *dist. rat. add.* Ex nihilo, tanquam ex materia, aut subjecto, nihil fit, *conc.*; ex nihilo tanquam termino a quo, *subd.*: per potentiam finitam, *conc.*; per potentiam infinitam, *nego*.

De productione ex nihilo alibi disseruimus (C. 259, seq.). Omiſi disjunctivam, quia dicendum est, entia finita fuisse aliquo modo in Infinito contenta antequam essent, et aliquo modo non fuisse contenta. Non enim in eo continebantur realiter aut formaliter, sed continebantur in illius essentia eminenter, in intellectu secundum ideas ipsorum archetypas, et in potentia virtualiter, ut alibi dictum est (O. 85).

ARTICULUS IV.

Refutatur pantheismus realis.

115. Hoc pantheismi genus in tota sua deformitate exposuit ut diximus (92), Baruch Spinoſa. Cujus opinionis compendium tribus hisce propositionibus constat.

1^a Unica existit in mundo substantia.

2^a Unius ejusdemque substantiæ attributa necessaria sunt cogitatio et extensio.

3^a Substantia unica, cogitans simul et extensa (mundus est infinita.

PROPOSITIO II. *Tres istæ assertiones sunt errores turpissimi et manifesti.*

116. 1^o Falsum est unicam existere in mundo substantiam; id quod ex ipsis Spinosæ definitionibus, quanquam dolose constructis, facile demonstratur.

Substantiæ definitio, juxta Spinosam, hæc est: *id quod in se est, et per se concipitur; h. e. id cujus conceptus non indiget conceptu alterius, a quo formari debeat.*

Modus autem seu accidens est: *substantiæ affectio; seu quod in alio est, per quod etiam concipitur.*

His definitionibus acceptis in præsens ut verba sonant, atque ita ut sensu communi et humanæ locutioni non repugnent, statim ostenditur, plures esse substantias.

Nam a) omne id quod in se est, et non in alio, omne id cujus conceptus non formatur per conceptum alterius, est etiam juxta Spinosam, vere substantia. Atqui lapis iste v. gr. est in se, et non in hoc equo, nec in aliquo alio, et vicissim hic equus non est in lapide, nec in alia re; itemque lapidis hujus aut hujus equi conceptus non formatur per alterius rei conceptum, sed per notas ab objecto ipso mihi exhibitas. Ergo hic lapis est substantia, hic equus est substantia. Ita omnes lapides, ita omnes equi, ita omnia quæ ad substantiæ categoriam revocantur.

117. b) Præterea supponamus duo ceræ frustula, A et B, alterum rotundum, alterum quadratum. Dico, A et B esse duas substantias numero distinctas.

Nam frustulum A nequit esse rotundum, sine subjecto quod rotunditatem sustentet: rotunditas enim est modus; modus autem in alio sit necesse est, juxta adversarii quoque definitionem.

Pariter frustulum B quadratum esse non potest, sine subjecto quod figuram quadratum sustentet.

Sed figura quadrata et rotunda non possunt in eodem simul coexistere, nec idem modificare subjectum: secus idem subjectum esset quadratum et non quadratum, rotundum et non rotundum; ac daretur circulis quadratus, quam rem Spinoſa repugnare concedit. Ergo subjectum cujus affectio est

rotunditas, numero distinctum est a subjecto, cujus affectio est figura quadrata. Ergo A et B sunt duo subjecta.

Subjectum vero modorum est substantia. Etenim ex definitione supra posita, modus est *affectio substantiæ*, et est *id quod est in alio*. Hoc autem *aliud* est subjectum modi, ut patet. Ergo subjectum modi est substantia quam modus afficit.

Ergo A et B sunt duæ substantiæ.

Ita fere Gerdilius, nimius sane nimiumque nobilis judæi sophistæ impugnator (1).

118. c) Quisque videt quantum dilari possit argumentum allatum. Ex. gr. subjectum quod movetur, est numero distinctum a subjecto quod quiescit; subjectum insensitivum a sensitivo, irrationale a rationali, etc.

Ulterius. Cera frustulum A dividi potest in duo, quæ figuras suscipiant oppositas; erunt igitur duæ substantiæ; ita una pars in alias partes dividi potest sine fine. Ex quo constabit, frustulum A substantiam esse compositam ex multis substantiis. Idemque dicendum de omnibus corporibus.

119. 2º Absurdum est cogitationem et extensionem unius ejusdemque substantiæ attributa esse.

Nam cogitandi actus est essentialiter indivisibilis, quod et intimo sensu constat, et ad evidentiam demonstratur in psychologia (P. 88, 91). Ergo et substantia quæ tale attributum habet, indivisibilis sit oportet. Secus, divisa substantia, indivisibile quoque attributum in partes scindi oporteret. Præterea attributum omne non est aliquid a subjecto in quo est, distinctum, sed modus tantum essendi ejusdem subjecti; nempe subjectum ipsum, quatenus sic est. Ergo si cogitatio est indivisibilis, nequit esse talis, nisi quia est in subjecto quod est indivisibile.

At si hoc subjectum ponatur simul natura sua extensum, est hoc ipso divisibile. Extensio enim certe divisibilis est. Divisa ergo extensione, ejus quoque subjectum dividatur necesse est.

(1) *Dissertazione dell' Esistenza di Dio, e dell' immortalità dell' anima*, §25.

Igitur quum Spinoza dicit, unam eandemque substantiam et cogitationis et extensionis esse subjectum, eam dicit indivisibilem simul et divisibilem esse.

120. 3º Absurdum quam maxime est, substantiam hanc mundi esse substantiam infinitam.

Primo quia *cogitans* est, nempe cogitans quemadmodum homo cogitat. Cogitat enim homo novas ideas continenter effingendo, componendo et dividendo, opinando, ratiocinando, laborando, sæpe errans, quamplurima ignorans. Hæc autem cogitandi ratio in Ente infinito prorsus repugnat.

Secundo quia *extensa* est. Extensum enim nequit esse infinitum (O. 351, 3º).

Tertio quia et secundum cogitationem et secundum extensionem perpetuo mutatur. Infinitum autem immutabile est. Vide superius dicta (103 — 105), eaque huc applica; nam huc faciunt omnia.

ARTICULUS V.

Spinosa argumentatio refellitur.

121. Spinosa argumentatio, plena quidem dolis, sed dolis minime acutis, indigna foret quæ serio refutaretur, nisi illud afferret comodi, quod paululum expensa docet, et quam crassa fuerit hominis ignorantia, et quam ignobili artificio utantur recentiores pantheistæ, qui eum adhuc laudibus extollere non verentur. Tota ipsius argumentatio huic substantiæ definitioni innititur. *Per substantiam intelligo*, ita ipse, *id quod in se est et per se concipitur, h. e. id cujus conceptus non indiget conceptu alterius rei, a quo formari debeat.*

122. Argumentatio vero ipsa huc redit:

1º Unica existit, eaque necessaria substantia. Nam ad naturam substantiæ pertinet existere.

2º Prob. Una substantia non potest produci ab alia. *Erit itaque causa sui; sive ad ejus naturam pertinet existere.*

3º Prob. ant. duobus modis.

a) Si una substantia posset produci ab alia, ejus cognitio

penderet a cognitione alterius: Nam effectus dependet a cognitione causæ, et eandem involvit.

Sed id cujus cognitio pendet a cognitione alterius, non est substantia: patet ex substantiæ definitione. Ergo.

b) Quæ res nihil commune inter se habent, earum una alterius causa esse non potest.

Sed duæ substantiæ, diversa attributa habentes, nihil inter se commune habent. Ergo.

4º Non possunt autem dari duæ aut plures substantiæ ejusdem attributi. Nam distinguerentur solum ex affectionibus: in se ergo consideratæ non distinguerentur, nec essent plures.

Hic est processus, hæc argumenta, quibus impius iste dirimere se putat quæstionem, omnium quæ agitari a mortalibus possint, gravissimam, quæstionem videlicet de divinitatis existentia ac natura!

123. Tota hæc indigesta machinatio corrueat, si in fallacissima illa substantiæ definitione miseræ æquivocationes, in ea studiose congestas, distinctione aliqua retexas.

Substantia est id quod in se est. Nempe quod *per se* est, et *non in alio, conc.*; quod *a se* est, et *non ab alio* (O. 152), *subd.*: substantia infinita, *conc.*; substantia in genere, *nego.* Tamen Spinosæ quum dicit *in se*, intelligit *a se*; sic arbitriam statuit definitionem, et jam ab ipso exordio disputationis, gratis asserit quod probare intendit.

Substantia est id, *cujus conceptus non indiget conceptu alterius rei, a quo formari debeat*; i. e. quatenus absolute consideratur, *trans.*; quatenus consideratur relative, *subd.*: non indiget conceptu alterius rei, tanquam subjecti cui inhæreat, *conc.*; non indiget conceptu alterius rei, nempe nunquam includit conceptum alterius rei, tanquam causæ a qua dependeat, *nego.*

124. Substantia omnis dupliciter considerari potest: 1º in se et secundum notas ejus absolutas; 2º relative ad aliud. Si consideretur in se, certe non est ens per comparisonem ad aliud, quemadmodum accidens est ens per habitudinem ad substantiam (O. 18). Utrum vero substantia concipiatur quo-

que absolute prorsus, et sine ulla comparatione ad accidens, non est hoc loco quærendum: patet autem ex alibi dictis (O. 154), hoc ipsum adversario negari posse. Sed esto: substantia absolute considerata absolute quoque concipiatur.

125. Sed potest insuper, ut dixi, substantia considerari relative; quod si ita consideretur, profecto, ut relativa omnia, correlativi alterius conceptum oblique includet. Relationes vero quas substantia habere potest, non sunt certe relationes inhæsionis in alio, tanquam in subjecto, et idcirco substantia nunquam potest ita relative concipi, ut subjecti cui ipsa inhæreat conceptum includat. Sed potest habere, et si finita sit, necessario habet relationem effectus ad causam; ac propterea nil vetat, quominus substantia, considerata ut effectus, causæ conceptum includat; quam certe non includit quum absolute consideratur.

Si Spinosæ putabat, substantiam produci non posse, et consequenter nunquam posse spectari ut effectum, hoc erat ipsi probandum. Ipse autem neque hoc probat, nec probare tentat; imo fallaciis utitur ac technis, ut probandi onus declinet; satis se quæstioni fecisse putans, si hoc primum occulte in definitione arbitraria assumeret, et deinde idipsum aperte ex eadem definitione deduceret.

126. Nunc ad argumenta.

Ad 1^m *Nego.* Ad prob. *Dist.*: Ad naturam substantiæ infinitæ pertinet existere, *conc.*; ad naturam substantiæ in genere, *nego.* Nulli enim substantiæ finitæ est essentialis existentia.

Ad 2^m *Nego.* Animadvertite absurdam synonymiam: *erit causa sui*; sive *ad ejus naturam pertinet existere* (18, 1º).

Ad 3^m quoad 1^m prob. Si una substantia posset produci ab alia, ejus cognitio penderet a cognitione alterius, *dist.*: cognitio ejus absoluta, nempe quatenus est aliqua substantia, penderet a cognitione alterius, *nego*; cognitio ejus relativa, nempe quatenus est effectus, penderet a cognitione alterius, *subd.*: alterius quod ipsi esset subjectum inhæsionis, *nego*; alterius quod sit ipsius causa, *conc.*

Ad rat. add. *Dist.*: effectus involvit cognitionem suæ causæ,

si consideretur secundum rationem effectus, *conc.*; secus, *nego.*

Contradist. min. Id cujus cognitio pendet a cognitione alterius, non est substantia, si nempe includat cognitionem alterius, quod sit ipsi subjectum inhæsionis, *conc.*; si includat cognitionem alterius, quod sit ejus causa, *nego.*

Quoad 2^m prob. *Dist. maj.* : Quæ res nihil commune inter se habent, earum una alterius causa esse non potest: i. e. quæ nullam habent inter se relationem, *conc.* (causalitas enim est aliqua relatio); quæ communem naturam non habent, *nego.*

Contradist. min. et nego consequentiam.

Ad 4^m quo fundamentum præcedentis argumenti continetur, *dist.*: Non possunt dari plures substantiæ ejusdem attributi, identitate numerica, *conc.*; identitate specifica vel generica, *nego.*

Ad rat. add. *Tr. ant. Dist. cons.*: Non essent plures secundum rationem universale in eis considerantem, *conc.*; realiter, *nego* (L. 543).

127. Tota igitur sapientia judæi veteratoris reducitur ad artem confundendi per vulgares æquivocationes, res disparatissimas, ut sunt: *esse per se, et esse a se; conceptus rei absolutus et relativus; habitudo accidentis ad subjectum, et relatio effectus ad causam; relatio identitatis et relatio causalitatis ac dependentiæ; identitas numerica, et identitas specifica; pluralitas realis et pluralitas conceptuum.* Longum esset cætera persequi, quæ ad rem non faciunt. Ex quibus tandem deduces, laudare Spinosam, atque illa errorum portenta commemorare sine indignatione neminem posse, nisi qui pantheismum scientiæ communique sensui præponat, ac de suorum lectorum oscitantia mire confidat. Hoc uno indicio recentiores pantheismi fautores satis se produnt, qui sint quidque sentiant.

ARTICULUS VI.

Confutatur pantheismus idealis.

128. Non est nobis animus varias idealis pantheismi formas singillatim refellere, quæ longa nimis res foret, nec ullo modo necessaria est. Primo quidem, quia communibus omnis pantheismi erroribus eæ nihil aliud addunt, quam nova absurda; nec vere ab iis aliter differunt, quam ægri somnia a cæteris somniis, et ebrii blasphemix a cæteris blasphemis; tum etiam quia hæ vere transcendentales absurditates vel gratis asseruntur, vel erroneis solum notionibus et apertis sophismatibus innituntur, ac propterea fundamenta earum omnia jam in logica ac generali metaphysica subruta sunt. Atque hæc profecto optima talium aberrationum refutatio est; non enim illæ oriri poterant aut sectatores invenire, nisi elementarium disciplinarum ignoratio et contemptus viam illis aditumque parassent. Quare si quis sensu communi sufficienter instructus, et in iis addiscendis disciplinis mediocriter sit versatus, turgidas illas transcendentalium nullitates risu ac miseratione excipiet, ac facile demonstrabit, tot fere in iis errores esse quot assertiones, totque paralogismos quot ratiocinia.

Nihilominus, ut palam sit, in quantam insaniam impietas ultimo devenerit, absurditates quæ idealis pantheismi, generalitatem tantum considerati, propriæ sunt, breviter exponere juverit.

Idealis pantheismus huc redit: esse aliquid absolutum, impersonale, indeterminatum, de quo nihil affirmari, nihil negari possit: absolutum hoc necessitate quadam inexplicabili determinare semetipsum ac limitare; quumque sui objectum efficitur, naturam esse; quum in se redit, spiritum. Hoc pacto subjectum et objectum, esse et cognoscere non distinguuntur; entia vero omnia, ipsaque cognitio, nihil reale sunt, sed apparentiæ meræ.

PROPOSITIO III. *Pantheismus idealis 1^o est eminenter absurdus; 2^o pugnat cum elementaribus intellectus humani notioni-*

bus; 3^o *arbitrarius est in suis principiis et assertionibus; et est 4^o in sua disserendi ratione turpiter sophisticus.*

129. Est primo *eminenter absurdus.*

Nam 1^o si omnis idealismus absurdus est, multo magis idealismus, qui hujus systematis basis est; per ipsum enim non modo mundi exterioris realitas perimitur, sed ipsum quoque subjectum cogitans inter phænomena fallacesque illusiones rejicitur; est enim *ego* tantummodo unum momentum, una positio evolutionis idealis absoluti; verè nihil ac somnium somniorum, ut ait Fichte.

2^o Præterea in idealismo pantheistico, quis est qui vanis hisce speciebus phænomenorum illudatur? Ipsum profecto absolutum et infinitum: ipsum est quod, cum in intellectu humano conscientiam sui habere dicatur, non intelligit se ut est, sed plane aliter, quodque ideales suiipsius positiones atque transformationes, quibus exterior mundus continetur, esse res a se discretas arbitratur. Qua re quid potest esse magis absonum aut incredibile?

3^o Nec idealismus modo, sed horribilis quoque nihilismus his in doctrinis continetur. Destructis namque exterioribus objectis, ipsoque destructo subjecto, quid nobis reliqui faciunt? Absolutum, inquiunt. Quid porro est tandem aliquando absolutum istud? Esse abstractissimum et omnino indeterminatum; cogitatio pura sine cogitante; et cogitatio quæ nihil cogitat. Qua in re, quæso, phantasma hoc differt a nihilo?

At absolutum hocce evoluit sese, et fit omnia. Sed quomodo? In ordine ideali, et quod supra modum absonum est, negationis ope (97). Et re sane vera, absoluto huic transcendentalium, per quascunquè evolutiones, nihil quod reale sit, accedere potest; hic enim vere valet illud: *ex nihilo nihil*. Ergo absolutum hujusmodi, post quascunque evolutiones, re idem est quod ab initio fuit, verum nihil.

130. Cæterum non gravantur pantheistæ recentiores hoc quod dicimus, diserte fateri; imo Hegel hoc inter fundamentalia sui systematis firmamenta audacter collocat. *Esse*

et nihilum idem sunt. Ex altero alterum fieri, hoc denique absolutum est. Quo principio in apertum protracto, fatetur tandem pantheistarum impudentissimus, contradictionem hujus systematis essentiam esse, nec posse illud consistere, nisi primum rationis humanæ principium, et cum ea humana ipsa ratio convellatur.

Quid jam amplius requiras ad ejusmodi systematis confutationem?

131. *Pugnat secundo cum elementaribus intellectus humani notionibus.*

Hegel, in quo apex est pantheismi transcendentalis, nullam ex his notionibus intactam reliquit; sed eas deformavit, detorsit, falsas reddidit omnes. Nec vero, intactis illis, potuisset unquam horrendum hoc atque informe monstrum in lucem protrahere. Sed ne ad indigestam illam et miserandum in modum sophisticam hegelianæ logicæ farraginem manum admoveamus, sufficiet enumerare breviter fundamentales ideas, quibus systema quod impugnamus, opponitur.

Opponitur 1^o ideis *individui et personæ* (O. 105, 166), ac maxime ideæ *ego*.

2^o Ideæ *distinctionis*, quæ si omnia idem sunt, nulla est in re, imo esse in re nullo pacto potest. Sic absurda evadunt omnia *judicia negativa*.

3^o Hinc idea *multitudinis*; ideæ quoque *universalitatis, relationis, et ordinis*, quæ multitudinem supponunt, sine fundamento sunt.

4^o Ideæ *essentialium* prorsus vanæ sunt, si nequeunt esse plura entia quæ sint inter se diversa.

5^o Nulla est *substantia* in hoc systemate: nam phænomena profecto substantiæ non sunt: Neque ipsum absolutum substantia est; absolutum enim nullam habet determinationem. Quod si nullum est subjectum, patet nullum quoque esse *accidens*.

6^o Nulla quoque est *possibilitas* proprie dicta, nullaque *contingentia*. Nam præter absolutum illud ac necessarium *ens-nihil*, nulla res potest existere. Ipsæ ejus phæ-

nomenales evolutiones secundum ferream necessitatis legem fiunt.

7° *Infiniti* notio chimerica est. Solum enim existit indeterminatum et indefinitum, nempe absolutum, quod sine fine se explicat. Hoc autem vocari nequit infinitum actu sine contradictione (O. 349, VIII).

8° In omni cognitione *subjectum* ab *objecto* distinguimus : nam etiam quum in nostros actus reflectimus, reflectendi actus ab actu in quem reflectimus, inadæquate distinctus est. Hæc porro distincto funditus tollitur ac fit inanis, per idealem pantheismum.

9° Denique notiones *veri* et *falsi*, *erroris* et *rectitudinis*, *boni* et *mali*, *virtutis* et *viti*, *meriti* ac *demeriti*, *juris* et *officii*, ac cæteræ cum his connexæ, absurda figmenta sunt, sine ullo fundamento, sine ulla significatione.

Quid jam dicendum de ejusmodi systematibus, quæ nativum humani intellectus patrimonium a deo misere populantur, et quasi mortiferum quoddam venenum totam rationis nostræ compagem dissolvunt? Ea sane ulterius refutari non egent.

152. Tertio : *Pantheismi idealis dogmata sunt in omnibus arbitraria*

1° Arbitraria principia, quibus ipsa innituntur. Hæc autem sunt : a) *Veram scientiam esse scientiam absoluti immediatam ; eam nempe, quæ phænomena transcendens atque contemnens, ipsum esse rerum, ut in se sunt, attingit.* Nemo porro est, qui hanc plane novam ac nullatenus demonstratam scientiæ definitionem admittat. Quod si hæc foret scientiæ definitio, profecto fateremur omnes, scientiam impossibilem esse. Nihil enim prorsus hoc pacto cognoscere possumus (O. 46, 154).

b) *Incipiendum sine ullis suppositionibus aut datis empiricis ; ideas omnes primitivas, et axiomata prorsus seponenda ; omnia a priori iterum construenda.* Quam hæc sint arbitraria nemo non videt ; quam falsa et absurda, in logica fuse docuimus (L. 424, 425, seq. ; 437, 509, seq. ; 516).

c) *Ut immediata sit absoluti cognitio, subjectum et objectum, principium cognoscendi et principium essendi, cognoscere et*

esse, unum idemque sint oportet. Ut hoc concedatur, in primis recipienda est superior scientiæ definitio, atque scientiæ ita definitæ possibilitas. Sed prætera falsum est, absolutam rerum omnium scientiam identitatem cum rebus supponere. Prima enim causa profecto absolutam rerum omnium scientiam possidet, non quia est cum illis identica, sed quia eas intelligit, sive in ideis ipsarum archetypis, quas in infinita sua sapientia continet, sive ut in causa, in infinitæ suæ potentiae amplitudine, quam adæquate comprehendit ; de quibus alio in loco.

153. 2° Arbitrariæ insuper sunt præcipuæ ac fundamentales eorum assertiones. Nullam enim earum explicant, nullam probant, cum eas maxime explicari ac probari oporteret. Quomodo v. gr. cognosci potest absolutum in se? Nemo enim est qui absolutum hujusmodi intueri se, aut aliquando esse intuitum existimet.

Præterea si subjectum et objectum (ego et non-ego) unum idemque sunt, cur nihilominus apparent ut distincta, ac distincta esse putantur?

Adhuc : quid est esse? quid negatio ac nihilum? quid motus seu *feri*? quid identitas et unitas? Hæc aliæque similes notiones, quæ semper a pantheistis supponuntur, nullatenus ab iis explicantur, neque explicari possunt. Tamen ut has maxime explicarent, expectandum erat ab eis, qui absoluti scientiam possident.

Demum, ne infinita alia consector, cur aut qua necessitate adactum, absolutum se evolvit, se limitat, se ponit, ac multiplicat, ac scindit in diversa entia finita ac phænomenalia? Cur hoc absolutum, quod in me cogitat, firmiter judicat his phænomenis realitatem respondere ; seque ab iis plane distingui? Habetne absolutum in meo tantum *ego* conscientiam phænomenicam, an vero etiam in aliis mihi similibus? Quomodo vero fit, ut quod unum in se est, diversas habeat sui conscientias, quæ nullo pacto inter se invicem communicant?

Hæc aliaque permulta, quibus totum systema continetur, ipsi præfidenter asserunt, ac nullatenus probant ; quasi vero

res essent per se manifestæ, ac nulli obnoxia dubitationi vel obscuritati.

134. Ultimo dixi, pantheismum idealem esse in sua dis-serendi ratione turpiter sophisticum.

1^o Revoca in mentem quæ in logica dicta sunt de Kantii systemate (L. 516), quæ multo potiori ratione huc faciunt. Kantii enim discipuli pantheistæ omnem experientiam atque omnes intellectus humani notiones inter illusiones rejiciunt, et tamen his notionibus perpetuo utuntur, ad absoluti scientiam acquirendam. Eodemque pacto logicam humano generi universo communem ipsi tanquam obsoletam despiciunt ac dedignantur, eamque nihilominus infelicitè utique, sed quantum eorum facultas fert, adhibere conantur.

2^o Nihil miseratione dignius, quam artificia quibus utuntur; Hegel præsertim, quem Aristotelem pantheismi (per antiphrasim videlicet) appellarunt. Pueriles æquivocationes in germanici idiomatis vocibus, arbitrariæ etymologiæ, grammaticæ quædam constructiones sunt frequentissima illi argumenta. Relativa eo quod se mutuo ponunt, identica esse decernuntur; contradictoriæ specierum differentia assumentur ut proprietates contradictoriæ simul existentes in genere; relationes abstractæ ponuntur ut subsistentes; termini oppositi mutationum unum esse dicuntur; quidquid de subjecto affirmatur, ut ipsius definitio assumitur. His armis perpetuo ludit miles gloriosus; et quod magis mirum est, nemo unquam fuit inter mortales, qui magis fidenter victoriam sibi arrogaret.

3^o Postremo ad ostendendum quo in pretio sit habenda transcendentalium istorum dialectica, cum multa ac pene infinita afferri possent exempla, duo seligam, alterum ex Fichte, alterum ex Hegel.

En quomodo Fichte demonstrat in sua *Scientiæ theoria*, *quod ego esse ens absolutum et necessarium. In actu isto*, inquit, *ego sum ego*, *quod ego ponit se ipsum. Existit igitur, quia posuit se ipsum. Propterea quod ego existit absolute ac necessario per se ipsum*. Huc redit, detractis verborum involucri, tota ejus demonstratio.

Audiamus Hegel probantem, demonstratione, ut ipse dicit, simplici quidem, sed invincibili, fundamentale illud principium de *identitate contrapositionum* (97). En ejus verba. Attende autem *Aliquid* et *Aliud* sumi ab ipso ut nomina propria.

« Primo: *Aliquid* et *Aliud* existunt utrumque. Ergo utrumque sunt *Aliquid*.

« Secundo: unumquodque duorum est simul *Aliud*: parum refert, utrum ex duobus appelletur primo *Aliquid*. » Latini quando in una propositione unum et alterum afferuntur, vocant utrumque aliud; ac dicunt *alius alium*, *alter alterum*. Si nos appellamus certum quoddam ens A, et aliud ens B, hoc B primo determinatur ut aliud. Sed A est et ipsum eodem tempore aliud respectu B. Ergo utrumque sunt eodem titulo *Aliud*.

« Ergo utrumque, sive quatenus sunt *Aliquid*, sive quatenus sunt *Aliud*, sunt semper *Idem* (1). »

Quid ad hæc respondebimus? Nihil profecto aliud quam quod initio diximus: nunquam hæc errorum monstra in publicum eruptura fuisse, nisi logicæ ac metaphysicæ ignoratio et contemptus et viam illis parassent et prodeundi securitatem.

CAPUT III.

DE UNITATE DEI.

ARTICULUS I.

Statuitur divinæ naturæ unitas.

135. Altera quæstio, quæ ad personalitatem seu individualitatem divinæ essentia pertinet (89), est de Dei unitate seu potius unicitate (O. 94). Non enim modo unam dicimus divinam naturam unitate formali, Deumque unum unitate individuali, sed etiam ita Deum dicimus unum, ut divina ejus natura non possit, ad modum generis vel speciei, pluribus Diis esse communis aut in plures multiplicari Deos. Polytheismus, qui error contrarius est, quam late, quam diu

(1) Log. T. I, 2. edit. p. 116.

mortalium mentes occuparit, quamque funestos produxerit effectus, nemo est qui ignoret.

136. PROPOSITIO. *Deus unicus est.*

Et 1^o quidem manifestum est, unicum esse auctorem rerum atque gubernatorem supremum; quod immediate ex ordinis physici unitate jam deduximus.

Idipsum et hoc argumento demonstratur. Si plures fuere mundi auctores, vel unusquisque eorum erat per se sufficiens ad mundum formandum et gubernandum, vel secus. Si hoc dicas, omnes dicis limitatos et imperfectos, ac proinde in nullo eorum Deum agnoscere possum. Si primum dicas,

a) jam gratuito supponis, plures esse Deos. Ad explicandam enim rerum originem unus tantum per se sufficit. Rationes autem omnes quibus Deum esse cognoscimus, tandem aliquando rerum origine deducuntur.

b) Sed ponamus fuisse plures. Quum mundum condere decreverunt, num convenerunt inter se de ordine constituendo, an non convenerunt? Si non convenerunt, nullus haberetur ordo, sed ingens confusio, et ipsa contradictoria, si contradictoria ipsi voluissent, revera prodire debuissent. Si vero convenerunt inter se et consilia contulerunt, sane dependent omnes ab invicem in agendo; et quod maxime notandum est, necessitate compulsi dependent, ut nempe aliquid sine confusione fieri possit. Ergo iterum nemo illorum Deus est. Deus enim absolute independens sit oportet.

137. Probatur deinde unitas Dei absolute et a priori.

2^o Deus est ens infinite perfectum. Ergo parem sibi consortemque divinitatis non habet. Nam

a) Ens infinite perfectum illud est, quo majus aut melius cogitari nequit. Atqui si haberet æquale sibi, posset cogitari aliud Ens majus illo ac melius, nempe Ens non habens æquale. Melius est enim esse super omnia quæ sunt, quam habere sibi parem; melius est omnia quæ sunt, habere a se dependentia, quam habere juxta se æquales a se independentes.

b) Est perfectio magna Deoque dignissima, esse primam

causam efficientem, finalem, exemplarem omnium rerum quæcunque sunt aut esse possunt. Sed nihil horum potest Deo convenire, nisi sit unicus. Nam secus, et cæteri Dii, et quæcunque ab ipsis fiunt fierive possunt, essent secundum omnia ab eo independentia « Unicuique tantum deerit, ut » Lactantius dicit, quantum cæteri possidebunt (1). »

c) Postremo si entia infinita essent v. gr. duo, utrumque profecto foret omnipotens. At posset ne alterum alterius actionem impedire? Quidquid dixeris, ab alterutro omnipotiam tollis.

138. 3^o Deus est ens necessario existens, cujus essentia est esse (18, 2^o). Ex hoc immediate probatur quod volumus.

Etenim si plura Entia necessaria existere possent, jam singularitas extra hujus necessariæ naturæ essentiam esset. Esset enim natura hæc multiplicabilis, adeoque universalis, ut naturæ cæteræ. Universale autem singulare non est.

Atqui omnino dici debet, ad naturæ necessariæ essentiam pertinere singularitatem. Cum enim hujus naturæ essentia sit esse actu, sane ad ejus essentiam pertinet id omne, quod existentiae per se implicitum est, existentiamque necessario comitatur. Sed existentiae implicita necessario est singularitas. Existentia enim non est nisi rei singularis, ut singularis est (O. 106). Ergo singularitas ad naturæ necessariæ essentiam pertinet. Ergo plura entia necessaria existere non possunt. Fac v. gr. existentiam esse essentialem humanæ naturæ aut alteri cuicunque. Illico sequeretur, non posse essentiam hujusmodi pluribus individuis esse communem, sed unicum tantum individuum unum hominem posse existere. Eadem enim est ratio: videlicet natura cujus essentia est esse, est essentialiter singularis. Ergo essentialiter naturæ illi repugnat esse universalem; ergo repugnat eam in pluribus inveniri individuum.

139. Corollaria.

Ex his patet 1^o non posse divinam naturam multiplicari,

(1) De Ira Dei. C. XI.

neque per productionem unius Dei ab altero, quemadmodum gentiles fabulabantur. Id quod absurdum quoque hinc est, quod Deus productus esset Deus ab alio, Deus dependens, initiumque habens, nempe Deus non Deus.

2° Deum esse suam essentiam; seu aliis verbis, Deum idem esse ac naturam divinam. Id quod de naturis finitis dici nequit. Non enim homo v. gr. est humanitas, sed habens humanitatem. Ratio est, quod omnis essentia finita est aliquid universale et abstractum, proindeque nullam individuationem determinatam in suo conceptu continet, quinimo omnem excludit, et sub hac solummodo abstractione unitatem sibi propriam habet, non realem videlicet, sed logicam (O. 112, 4°).

ARTICULUS II.

Difficultates.

140. Objici potest I. Unitas hæc et carentia consortis imperfectio potius, quam perfectio esse videtur. Importat enim solitudinem, quæ quidem malum est.

Resp. *Nego. ant.* Ad rat. additam. *Tr. maj.* In Deo enim naturæ singularitas cum perfectissima trium personarum beatissimæque societate, ineffabili ratione componitur. Sed hæc altior consideratio non est hic necessaria.

Dist. min.: Solitudo malum est entibus sibi insufficientibus ad beate vivendum, *conc.*; Enti sibi sufficientissimo, *nego.*

141. Obj. II. Possunt existere plura entia summe perfecta, si ponantur in omnibus esse æqualia et similia. Nam:

1° Non repugnat æqualis plurium perfectio in eodem genere.

2° Pluralitas nullam adimit aut impedit perfectionem.

3° Revera docet christiana fides, esse in Deo tres personas infinitas et æquales. A pari ergo.

Resp. *Nego ant.* V. allata argumenta.

Ad 1^m *Dist.*: perfectio limitata et relativa, *tr.*; perfectio infinita et absoluta, *nego* (137).

Ad 2^m *Dist.*: in naturis finitis, *conc.*; in natura infinita,

nego. Perfectio enim naturæ infinitæ propria est, ut sit pluribus incommunicabilis (137, 138).

Ad 3^m *Conc. ant. Nego consequentiam et paritatem.* Nam et natura et perfectio essentialis trium personarum unica est, ac plane singularis. Hoc autem repugnat, divinam naturam multiplicari et æqualem habere; non vero naturam hanc trium esse personarum. Quemadmodum si reale esset spatium infinitum, repugnaret utique esse alterum spatium infinitum; non tamen repugnaret idem spatium secundum tres suas dimensiones infinitum esse.

142. Obj. III. Si dicamus Deum non posse producere aliquid aliud ens infinite perfectum,

1° non haberetur terminus adæquatus infinitæ ejus potentiae;

2° nec effusio conveniens bonitatis ejus.

Resp. ad 1^m *Conc. ant. et nego* esse in hoc ullum inconveniens. Imo hoc ipso infinita est Dei potentia, quod nulla res ex possibilibus adæquatus ejus terminus esse potest. Infinitum autem productum ideo hujus potentiae terminus esse nequit, quia intrinsece repugnat.

Ad 2^m Eadem esto responsio.

143. Quid dicendum de communi populorum consensu in polytheismo profitendo, et de miraculis quæ apud gentiles patrata dicuntur?

Resp. De consensu dicendum 1° eum non fuisse perpetuum, neque constantem. Nam ex historia constat, monothesium ante polytheismum viguisse, ita ut ante diluvium nullum erroris hujus vestigium appareat; ac præterea per evangelii propagationem in toto civili mundo brevi polytheismus eversus est. 2° Non fuisse universalem. Nam Hebraei certe sunt excipiendi, et fortasse alii quoque populi, ne dicam de philosophis plurimis. Omnes præterea unum supremum Numen Divum patrem atque hominum regem agnoscebant, quem et in repentinis casibus invocabant, quemadmodum notavit Tertullianus in Apologetico. 3° Originem erroris hujus satis esse manifestam. Eadem nempe polytheismi, ac pantheismi origo fuit, videlicet cæcus quidam

atque intemperanter effusus erga naturam sensibilem timor atque amor, quibus irretiti mortalium animi ad Deum invisibilem, qui ex operibus erat agnoscendus, ascendere ultra non potuerunt (1).

144. De miraculis gentilium dicendum 1° ea magna ex parte esse meras fabellas, aut præstigiatorum artes fuisse, aut effectus naturales insolitos, vel etiam vulgo ignotos, aut dæmonum illusiones; 2° si quæ fidem merentur, ea non in polytheismi confirmationem patrata fuisse, sed vel ad innocentiae defensionem, vel ad virtutis commendationem; idcirco ab uno veroque Deo patrari potuisse, ab eoque fuisse patrata. Confer quæ dicta sunt alibi de miraculis (C. 465, seq.).

(1) Cf. Sap. XIII, 1 seq.

LIBER TERTIUS.

CAPUT I.

DE SIMPLICITATE ET IMMUTABILITATE DEI.

ARTICULUS I.

De physica Dei simplicitate.

145. Quid divinorum attributorum nomine veniat, supra dictum est (77). Liquet pariter ex dictis (76), divina attributa alia negative concipi, alia positive. Nunc primo de negativis agemus non tamen de omnibus, sed de iis solum quæ peculiarem aliquam difficultatem habent. Simpliciter porro atque immutabilitatem simul conjungimus, quia altera cum altera est intime conserta.

146. PROPOSITIO I. *Deus est physice simplicissimus.*

Nempe non est in Deo compositio essentialis, nec accidentalis, nec quantitativa, neque ulla alia vera compositio (O. 558).

Probatur 1° ex eo quod Deus est ens a se. Hanc rationem sic explicat, s. Thomas: « Omne compositum causam habet. « Quæ enim secundum se diversa sunt, non conveniunt in « aliquod unum, nisi per aliquam causam adunantem ipsa. « Deus autem non habet causam (1). »

2° Omne compositum, per se loquendo, contingens est (O. 557, IV), et dissolvi potest. Non enim intrinsece repugnat, ex partibus quæ realiter distinctæ sunt, vel unam et alteram existere ab invicem divisas, vel unam existere sine altera. Sed quod dissolvi potest, non est absolute necessarium. Ergo.

(1) Sum. th. p. I, q. III, art. VII.

3^o Perfectio ex compositione orta, *participata* est, et componentium perfectione *posterior*. Etenim compositum suam perfectionem a partibus accipit, partim ab una, partim ab altera; et supponit singulas aliquo modo in se perfectas. Sed Deus est *independens*, et est *primum ens*. Ergo ejus perfectio non potest esse participata, nec ulla re posterior.

4^o Si Deus constat ex partibus, partes quæ ipsum componunt, suntne omnes necessariae et infinite perfectæ, an vero non? Si primum, tria sequuntur absurda.

a) Tot essent Dii, quot partes illæ. Plures autem Deos esse repugnat.

b) Compositio hæc inutilis foret.

c) Unaquæque pars esset pars et totum; nempe aliquid incompletum et completum. Esset aliquid incompletum, quia est Dei pars ex hypothesi; completum, quia est ens infinitum.

Si dicitur alterum, jam ex contingentibus, finitis, imperfectis, exurgeret necessarium et infinite perfectum, quæ duo manifeste repugnant (L. 218; 2^o O. 349, IV).

Neque dicas, unam v. gr. partem necessariam et infinitam esse posse, cæteras contingentēs atque finitas. Nam in hac suppositione 1^o partes istæ inutiles essent enti infinito constituendo: ponis enim in Deo infinitum sine illis; 2^o Deus esset aliqua ex parte contingens.

147. Corollaria.

1^o Sequitur Deum non esse corpus.

2^o Non constare ex spiritu et corpore.

3^o Nullum in eo esse accidens a substantia distinctum.

4^o Proinde actus ejus omnes cum substantia identificari.

148. At enim, ita inficetissime Hobbesius, « qui puritatem » Deo tribuunt, recte faciunt; est enim honorificum. Sed » *tenuitatem* (sic ipse simplicitatem appellat) attribuere, quæ » gradus quidam est ad nihilitatem, periculosum est (1). » Quisque videt, quam stolide aberrat Hobbesius. Errat enim vero dupliciter: 1^o quia simplicitatis conceptum in sola ne-

(1) In Append. ad Levit.

gatione repositum putat (O. 337, III); errat 2^o quia negationem in hoc conceptu contentam, quæ negatio est partium seu compositionis, ita ipse assumit, ac si negatio esset realitatis.

149. Si quis et hoc loco opponeret divinarum Trinitatem personarum, respondebis: tres personas non esse tres divinitatis partes, ut vel ex ipsa personæ denominatione constat (O. 166), sed unam ac simplicissimam divinitatem. Sunt illæ ab invicem distinctæ realiter, sed quatenus distinctæ sunt, non sunt unum, nec unum aliquid componunt: sunt tres relationes originis subsistentes. Principium vero quo uniuntur, non est trium personarum compositio, sed naturæ unitas.

ARTICULUS II.

De immutabilitate Dei.

150. Sermo hic est, ut patet, de immutabilitate absoluta, seu metaphysica (O. 386. 385), qua fit ut Deus nulli omnino affectionum successioni obnoxius esse, nullam in seipso actuum varietatem recipere possit.

PROPOSITIO II. *Deus est absolute et in omnibus immutabilis.*

151. 1^o Hoc immediate deducitur ex notione *entis necessari*. Omnis enim realitas quæ ad ejusmodi Ens pertinet, ex absoluta necessitate in eo est, quemadmodum ejus existentia. Non enim ejus existentia in abstracto, sed talis naturæ existentia, cum tali realitate ac certa existendi ratione, necessaria est: quandoquidem nihil potest existere, nisi aliquo determinato modo. Jam vero si quid esset in tali natura quod mutari posset, hoc necessarium non esset, sed contingens (O. 307, 3^o); posset enim natura divina sive illo instructa sive destituta consistere. Ergo nihil in Dei natura mutari potest.

2^o Deus est infinite perfectus. Ergo non potest mutari in melius, non in deterius, non in æquivalens. Ergo nullo modo mutari potest.

Non in melius: quia secus ante mutationem non fuisset infinite perfectus.

Non in deterius : si enim hoc possibile esset, Deus principium aliquod ac veluti germen defectus in semetipso haberet. Hoc autem in Ente summe perfecto supponi nequit: nam ingens defectus est, vel ipsam defectus originem in se habere: sola imo deficiendi possibilitas magna imperfectio est.

Non in æquivalens : fieri enim nequit, ut aliqua inveniat perfectio, quam habere possit, et non semper habuerit, nec essentialiter habeat Ens summe perfectum. Jam vero si Deus, amissa perfectione aliqua quam possidet, æquivalentem illi recipere posset, semper aliqua perfectione careret, quam posset habere. Proinde ens ipso perfectius cogitare semper liceret, ens nempe utraque immobiliter perfectione gaudens; quemadmodum eo qui pecuniam mercibus commutat, ditiore foret qui et pecuniam simul et merces possideret.

152. Ex his colliges :

1^o Non esse in Deo potentiam ullam ab actu distinctam; multo minus plures potentias. Nam transitus a potentia ad actum est mutatio.

2^o Nullam quoque in ipso actuum successionem accidere. Successio enim mutatione continetur; actuum insuper successio supponit potentiam ab actu distinctam. Quum enim agens in quo hæc successio est, unum actum ponit et alterum non ponit quem ponere potest, profecto hujus respectu in potentia est.

3^o Nullius realis et intrinsecæ relationis fundamentum Deo in tempore et contingenter accedere posse (O. 212, 2^o).

4^o Posse tamen mutari relationes ejus extrinsecas. Hæc enim mutatio non Dei est, sed alterius (O. 205, 387).

ARTICULUS III.

De metaphysica Dei simplicitate.

153. PROPOSITIO III. *Deus est metaphysice simplex, et actus purissimus.*

Metaphysicæ simplicitatis notio desumatur ex dictis in ontologia (O. 338) de metaphysica compositione. Quum autem

simplicitatem hujusmodi Deo tribuimus, non hoc sane dicimus, quod plura in Deo, et cum aliquo fundamento, ut mox videbimus, distinguere ratione nequeamus; sed hoc tantummodo, quod non sit in divina natura, quemadmodum est in rebus cæteris, ratio intrinseca, qua distinguatur in ipsa aliquid ut determinabile, et aliquid ut determinans. Huc enim redit omnis metaphysica compositio, prouti in citato loco notatum est.

154. Quod autem non sit in Deo compositio talis, in præcedentibus jam demonstratum est. Compositio enim hæc vel est ex *genere et differentia*, vel ex *supposito et natura*, vel ex *essentia et esse*.

Jam prima excluditur ex eo quod Deus nec est, nec esse potest in ullo genere, ut in præcedenti libro docuimus (79).

Altera quoque excluditur ex iis quæ paulo ante dicta sunt de Dei unitate (158, 3^o). Deus enim non est subjectum habens naturam aliquam pluribus communicabilem, sed est sua propria natura.

Tertia demum excluditur ex ipsa notione entis a se, cujus

Tertia demum excluditur ex ipsa notione entis a se, cujus essentia in possibilitatis statu concipi nequit, sed cum ejus existentia plane identificatur (18, 2^o).

Ex his patet prima propositionis pars.

155. Pars altera nec multis explicari eget, nec longius probari, ut quæ ex demonstratis sponte fluit.

Actus purissimus est actus essendi nulli mixtus potentialitati. Deus autem, cum sit actu infinitus, immutabilis, et physice ac metaphysice simplex, habet profecto totum essendi actum quem habere potest natura perfectissima; habet ergo actum purissimum. Ipse vero est suum esse et suus actus. Deus ergo est actus purissimus.

156. Sed magnam hic humana mens offendit difficultatem: quomodo actus iste purissimus tam diversa agere possit, et intelligere, et velle, et amare, et odisse, tamque varios effectus in rerum natura distinctis temporibus operari, quin tamen actus operantis mutetur.

Quaestio hæc, quantum humanæ datur infirmitati, resolvi potest considerata perfectione infinita, quæ inest actui divino, ejusdemque actus intrinseca entitate, a respectu quem ipse ad terminum habet, distincta. Entitas hujus actus una est, simplicissima, absoluta, non relativa ad aliud; ejus vero terminatio potest nihilominus et multiplex in infinitum esse, et diversa. Quod, ut dixi, ab infinita divini actus perfectione consequitur. Necessitas enim plurium actuum ab essentia distinctorum ad plura agenda, ex eo procedit in essentiis finitis, quod essentia finita, cum non habeat actu totam eam perfectionem quam habere potest, indiget novis accidentalibus, determinationibus et actibus, quibus suppleatur quod actualitati essentiae deest: cumque unusquisque ex hisce actibus sit finitæ virtutis, non potest essentia finita unico actu omnia attingere objecta, sed necesse habet diversis actibus diversa attingere objecta, imo ad objecta singula pluribus quandoque actibus redire (P. 260). Divina autem essentia, quæ est actus infinitæ virtutis, novis hisce determinationibus non indiget, sed id quod est in se manens, ad infinita objecta, ac diversissimis modis, terminari potest.

Sic ex. gr. actus divinus, prouti terminatur ad res intelligibiles, est purissima intellectio, ideas complectens infinitas; prouti terminatur ad res creabiles est liberrima electio; prouti terminatur ad res creandas, est vis infinita tribuens iis quæ non sunt existentiam. Efficacia externa hujus actus in justo est amor benevolus, in impio est odium puniens, vel misericordia parcens. Unde quum homo ab impio fit justus, intrinseca divini actus entitas non mutatur, sed tantum externa illius efficacia. Et ita dic de reliquis.

157. Hoc ut melius intelligas, considera solem. Sol unicum actum exerit, si ita loqui fas est; radios videlicet quaquaversus emittit. Sed hic actus in sole unicus, pro terminorum quos attingit, multitudine, diversitate, successione, multiplex fit ac mirifice varius. Sic eodem actu sol et colores rebus inducit diversos, et calorem ciet, alia obdurat, alia emollit, alia exsiccat, vapores elevat ventosque commovet, et dum vitam omnem fovet atque conservat, in multis illam exstinguit. Ipse

non movetur, sed omnia circa ipsum moventur, et virtutis ejus termini successive fiunt.

Disparitatibus manifestis non consideratis, simili quodammodo purissimus actus divinus, absolutus in se et unicus, habet in terminis denominationem et efficaciam multiplicem; termini sunt diversi, termini mutantur, quia efficacia extrinseca illius actus mutatur, sed ipse agens nec multiplices exercet actus, nec mutationem ullam patitur; unus hic ejus actus est, esse quod est; hic unus actus ad omnia sufficit.

158. Hinc intelliges, relationes omnes Deum inter et res creatas esse intrinsecas quidem ex parte rerum creaturarum, quia illæ vere a Deo dependent, vere producuntur et mutantur: ex parte autem Dei esse relationes omnino extrinsecas; quia nihil novi aut accidentalis per illas ponitur in divina essentia (152, 3^o), quod relationis fundamentum esse possit; nec ipsa divina essentia potest ullo modo, in eo quod est, ad aliud ordinari, cum sit super omnia, et a nullo dependeat, et nullius egeat. Ergo nihil in Deo ad res creatas relativum est. Hinc est quod relationes Deum inter et creaturas mutari possunt, quin Deus mutetur (1).

ARTICULUS IV.

De distinctione rationis inter divinas perfectiones.

159. PROPOSITIO IV. *Quamvis hæc ita se habeant, potest tamen atque adeo debet humana ratio divinas perfectiones et operationes inter se distinguere, distinctione quam dicunt rationis ratiocinatae* (O. 232).

Potest inquam: quia licet ens et physice et metaphysice simplex ac purus actus nullum tali distinctioni fundamentum sibi intrinsecum exhibeat, tamen et ipsum in se pluribus actibus æquivalêt, ac præterea relationes multiplices et diversæ quas res creatæ ad ipsum habent, vires item et facultates per quas illi diversimode sunt similes, fundamentum

(1) Cf. S. Th. Summ. th. p. 1, q. XIII, art. VII, et Contra Gent. Lib. II, c. XII.

quoddam extrinsecum præbent diversis conceptibus quibus illud nobis, quantum possumus repræsentemus (O. 235, 5°).

160. Imo et *debet*. Etenim necessarium omnino nobis est, ut tali modo de Deo cogitemus. In primis enim intellectus nostri limitatio tunc quoque hoc postulat, quum res finitas comprehendere satagimus (O. 234). Multo magis ergo, quum agitur de Ente infinito. Præterea, cum de Dei essentia cognitionem intuitivam non habeamus, ad illam utcunque cognoscendam assurgere solum possumus a creatis perfectionibus, quæ sunt Dei effectus. Cum igitur perfectiones huiusmodi et effectus sint plures et diversi, necessario fit, ut Dei notio pluribus diversisque conceptibus conslari in mente nostra debeat.

Neque in hoc est ulla falsitas. Non enim affirmamus plures esse in Deo actus aut perfectiones; sed solummodo per plures conceptus incompletos quid sit ille intelligimus; probe tenentes, Deum, licet in se supereminenter contineat id omne quod his respondet conceptibus, non tamen eodem modo se habere ac concipitur, sed unam omnino ac simplicissimam essentiam esse. Quemadmodum igitur res finitæ similitudinem aliquam cum Deo habent, licet earum perfectiones distinctæ sint ac diversæ, ita intellectus noster ideam divinæ essentiæ efficit ab objecto non difformem, quanquam distinctis diversisque conceptibus quos a creatis perfectionibus desumit, illam sibi repræsentet.

161. Quam sit hæc distinctio necessaria, deprehendere ulterius poteris ex innumeris absurditatibus, quæ, illa neglecta, consequerentur. Sane actus quo Deus omnia intelligit possibilia, idem in se omnino est, atque actus quo pauca quædam ex possibilibus creat; actus quo amat virtutem, idem est ac ille quo iniquitatem odio habet. Quis tamen ferat dicentem, Deum creare omnia possibilia, et pauca quædam ex possibilibus intelligere; vel odio habere virtutem, amare iniquitatem? Plane igitur distinctio idearum et vocum tenenda est. Quia videlicet voces huiusmodi et conceptus iis respondentem, per se actus quosdam, ut in rebus creatis sunt, exprimunt. In rebus autem creatis hi actus distincti

sunt et diversi. Ergo voces, quibus illos exprimimus, non possunt altera pro altera promiscue usurpari, quanquam in re cui exprimendæ has voces aptamus, illi omnes actus nec diversitatem habeant nec multipliciter (1).

ARTICULUS V.

Difficultates.

162. Difficultates quæ sive contra Dei immutabilitatem sive contra ejus absolutam simplicitatem se offerre possunt, ex præactis principiis, quantum sat est, dissipantur.

Obj. I. 1° Deus cum omnia cognoscat ut sunt, modo cognoscit res esse futuras, modo præsentem, modo præteritas. Ergo mutatur in cognitionibus suis.

2° Mutat voluntatem, quum v. gr. placatur aut preces mortalium exaudit.

3° Mutat operationem; nam de non creante fit creans, etc.

Resp. ad 1^m *Dist.*: Unico actu eoque æterno cognoscit omnia, *conc.*; pluribus actibus successivis, *nego*. Nimirum Deus in tota sua æternitate cognoscit v. gr. Petri mortem futuram, pro eo tempore, quo futura est; ac præsentem, vel præteritam, pro tempore, quo præsens esse debet, vel præterita. Ratio futuri ac præteriti non in Dei scientia reperitur, sed in objectis ejus, respectu rerum aliarum quæ in temporum serie sibi succedunt. Deus autem totam hanc seriem cognoscit et eventuum ordinem perspectum habet, cognitione una atque æterna, qua complectitur omnia.

Ad 2^m *Nego*. Unica enim et immutabili voluntate diversa voluit, pro diversis objecti conditionibus. Aliud est voluntatem mutare, aliud rerum aliquarum velle mutationem. In homine quidem frequenter unum cum altero sociatur. At in Deo mutatio nulla voluntatis esse potest; hæc enim mutatio vel aliquam priorem ignorantiam, vel aliquam novam volentis dispositionem necessario supponit. Idcirco Deus opera mutat, consilia non mutat.

(1) Cf. S. Th. *Summ. th.* p. I, q. XIII.

Ad 3^m *Dist.* Mutat efficaciam extrinsecam sui actus, *conc.*; ipsum actum, *nego*. Quum divini actus virtus infinita, ad obiectum relata, de non creante fit creans, novam duntaxat acquirit denominationem extrinsecam; nihil novi in seipsam inducit (156, 158).

163. Inst. 1^o Impossibile videtur, unum eundemque actum esse actum simul amoris et odii, veniæ et vindictæ etc.

2^o Si relationes Dei ad res creatas sunt relationes extrinsecæ, sequeretur, Deum non esse realiter creatorem, dominum etc.

Resp. ad 1^m *Dist.*: Impossibile est hoc, si hi actus spectentur in sua terminatione, *conc.*; si in sua entitate, *subd.*: prouti hi actus a nobis concipiuntur, *conc.*; prouti reipsa sunt, iterum *subd.*: ut sunt in ente finito, *conc.*; in Ente infinito, *nego*. Recole superius dicta (156, 160).

Ad 2^m *Nego*. Licet enim relationes Dei ad res creatas sint extrinsecæ et rationis tantum, nihilominus Deus, non secundum rationem tantum, sed realiter est dominus ac creator. Nam, ut ait s. Thomas, « cum ea ratione referatur Deus ad » creaturam, qua creatura refertur ad ipsum, cum relatio » subjectionis realiter sit in creatura, sequitur quod Deus, » non secundum rationem tantum, sed realiter sit dominus. » Eo enim modo dicitur dominus, quo creatura ei subjecta » est (1). » Brevi Deus realiter est creator, quia habet reales creaturas; realiterque est dominus, quia reales servos habet; quanquam hæc omnia nihil in Deo ponant, quod realiter sit relativum. Eodem plane modo ac scibile realiter est obiectum scientiæ, quanquam relatio scibilis sit rationis tantum. (O. 213).

164. Obj. II. Necessario concipi debent in Deo actiones successivæ: non enim potest v. gr. velle aliquid, nisi illud prius intellexerit. Ergo.

Resp. *Dist. ant.*: quia nos actum purissimum concipere non possumus, nisi ad modum plurium actuum, *conc.*; ex natura rei, *nego*. Ad rat. add. *dist.*: quod spectat ad ipsam actus

(1) *Sum. th.* I, p. q. XIII, art. VII, ad. 5.

entitatem, *nego*; quod spectat ad ejusdem terminationes, *tr.*

Cum nulla in Deo sit actuum pluralitas, non datur in ipso prius et posterius. Sed cum nos plures in Deo actus distinguamus, juxta id quod in creatis rebus fieri videmus, necesse est, ut hosce actus cum ordine quodam, atque adeo cum quadam inter se naturæ prioritate ac dependentia, concipiamus. Hic igitur ordo et hæc naturæ prioritas ac dependentia non pertinent ad Dei activitatem, ut est in se; sed solum secundum quod a nobis concipitur ad creatæ activitatis similitudinem. Proinde dici nequit, v. gr. Deum cognoscere in signo naturæ priori, et velle in signo naturæ posteriori (O. 257); sed solum in signo priori rationis cognoscere, et in signo posteriori rationis velle; videlicet, quia nos actum divinum ad modum plurium actuum, et cum hoc ordine concipimus.

Cæterum hoc non impedit, quominus terminationes actus divini dicamus unam altera priorem natura, imo etiam tempore; quemadmodum dicendum est de effectibus, qui ab ipso procedunt.

165. Obj. III. In divina incarnatione Deus Verbum factus est homo, cum prius non esset homo. Ergo intrinsece mutatus est.

Resp. *Nego conseq.* Deus enim in incarnatione potest considerari dupliciter: 1^o ut est causa efficiens unionis utriusque naturæ; 2^o ut est persona humanam naturam assumens. Si 1^o modo consideretur Deus, incarnatio est actio externa totius Trinitatis, et explicatur ut supra (162 ad 3^m). Si consideretur 2^o modo, Deus Verbum nullo modo mutationem subiit intrinsecam, quum sui applicatione personalitatem suam assumptæ naturæ communicare cœpit: non enim ipse ad humanam naturam accessit, sed humana natura est ad ipsum attracta, et intra divinæ personalitatis ambitum, ut ita dicam, recepta.

Quæ ex libertate Dei contra ejus immutabilitatem opponuntur, suo loco expendemus.

CAPUT II.

DE IMMENSITATE ET ÆTERNITATE DEI.

ARTICULUS I.

De omnipræsentia divinæ substantiæ.

166. Quum Deum immensum dicimus, hæc duo intelligimus. 1^o Deum non contineri determinato loco circumscriptum, sed in omni loco esse; 2^o quantumvis locorum spatia producta intelligantur, in his omnibus Deum necessario fore: ejusque præsentialem omnino loco possibili majorem, et prorsus infinitam esse. Sed ut hæc rite intelligantur, quædam animadvertenda sunt.

167. 1^o Triplici modo ens certo in loco esse potest:

a) *per potentiam*, quatenus eo in loco aliquid ejus potentia subjectum est, ipsiusque nutu regitur. Ita rex est in toto regno.

b) *per præsentiam*, quatenus quæ in eo sunt loco, sunt illi cognoscibilia secundum esse quod habent in seipsis. Ita homo est in aula, quum omnia quæ in ea sunt, contuetur.

c) *per essentiam*, quatenus substantia ipsa sua locum obtinet. Ita corpus est in ea spatii parte, quam replet; ita animus est in corpore.

Nunc agimus de inexistencia Dei in loco per essentiam.

2^o Substantiæ existentia in loco duplici modo se habere potest:

a) *circumscriptive*, seu per contactum quantitatis dimensionis; quum nempe, ut alibi dictum est (O. 349), diversis loci partibus diversæ partes integrales substantiæ respondent. Hoc modo non potest esse in loco, nisi ens quod extensionem formalem habeat; quæ est propria corporum.

b) *per contactum virtutis*, i. e. aliquid immediate agendo in rebus quæ locum occupant. Substantiæ quæ hoc pacto sunt

in loco, quanquam formaliter extensæ non sint, *virtualiter* tamen extensæ esse dicuntur.

Ad hæc: substantia quæ sic est in loco, dicitur ibi esse *definitive*, si actio ejus certos illos limites excedere nequeat, uti anima humana est in corpore (C. 349).

Jam substantia divina non potest esse in loco circumscriptive, sed solum per contactum virtutis, i. e. quia immediate agit in rebus locatis, ut mox explicabimus. Non tamen definitive existere potest in loco, quia virtus ejus nullis limitibus definitur.

3^o Ex his vides, quomodo sit intelligendum, quod primo continetur in divinæ immensitatis notione (166. 1^o). Hinc etiam via sternitur ad idipsum demonstrandum.

168. PROPOSITIO I. *Divina substantia in omnibus rebus est, et in omni loco.*

Probatur invicte cum s. Thoma sic: « Oportet omne agens » conjungi ei, in quod immediate agit, et sua virtute illud » contingere (1) » (O. 268). Deus autem producit immediate in rebus omnibus ipsum esse, non solum quando primo esse incipiunt, sed etiam quandiu in esse conservantur, ut infra probabitur.

Concludit s. doctor: « Quandiu igitur res habet esse, » tandiu oportet quod Deus adsit ei, secundum modum quo » esse habet. Esse autem est illud, quod est magis intimum » cuilibet, et quod profundius inest, cum sit formale respectu » omnium, quæ in re sunt, ut ex dictis patet (q. 7 art. 1.), » Unde oportet, quod Deus sit in omnibus rebus, et in » time (2). »

Quæ in propositione sequenti afferuntur, hanc quoque ulterius evincunt.

169. COROLLARIA. 1^m Deus est in omni loco. Etenim, ut s. Thomas dicit: *dat esse omnibus locatis, quæ replent omnia loca* (3).

2^m Ex rationis paritate probatur, Deum non esse solum

(1) *Sum. th. p. I, q. VIII, art. I.*

(2) *In ead. quæst. art. II.*

(3) *Ibid.*

in corporibus, quæ locum circumscriptive occupant, sed in omnibus quæcunque sunt, quæ ab ipso accipiunt ut sint; adeoque etiam in spiritibus.

3^m Deus ita est in toto mundo tota sua substantia, ut sit totus et in singulis quibusque ejus partibus. Etenim divina substantia non est formaliter extensa, ut possit in extenso circumscriptive existere (167, 2^o), aut diffundi per omnia, ut aer aut lux aut vapor; sed est simplicissima, et prorsus indivisibilis; proindeque ubicunque est, tota est. Anima quoque humana licet finita sit, est tamen tota in toto corpore, et tota in singulis ejus partibus.

ARTICULUS II.

De immensitate.

170. Declarandum superest, quomodo sit intelligenda infinita Dei præsentia (166, 2^o), quæ proprie immensitatem constituit. Igitur :

1^o Quemadmodum virtus divina infinitis rebus producendis par existit, ita divina substantia talis est, ut infinitis terminis præsens inesse possit.

2^o Sed quemadmodum infinita Dei virtus intrinsece spectata tota est in actu, nullatenus in potentia (156), habetque, quantum est in se, eandem actualitatem, quam haberet, si omnia creasset quæ creare potest; ita et divinæ substantiæ infinita præsentia non aptitudine quadam indefinita se dilatandi, sed actuali ipsius infinitate continetur. Sic igitur plane se habet, ac si infinitis terminis præsens adesset, et infinita spatia obtineret.

3^o Propterea si novæ res crearentur, non se illuc extenderet divina substantia, sed in se eadem permanens, res illas novas reciperet in se et contineret: quemadmodum si novi planetæ conderentur intra lucis solaris sphaeram, non lux se extenderet, sed planetæ inciperent in luce esse. Quare potentialitas omnis se habet ex parte terminorum creabilium, non ex parte divinæ substantiæ.

4^o Immensitas modo descripta est attributum necessarium divinæ essentiae, et ab ubiuitate distinguitur, ut ea quæ intrinseca sunt a relationibus extrinsecis distinguuntur. Denominatur porro *immensitas* per negationem mensuræ localis, et *præsentia* infinita respectu possibilium. Sed quam negative ac relative concipiatur, perfectio est maxime positiva et absoluta.

171. PROPOSITIO II. *Deus est immensus.*

1^o Probatur ex dictis (168; 170, 1^o): Nam ideo Deus rebus existentibus præsens est, quia illas omnes creat; ergo aliis rebus præsens esse potest, si potest res alias creare: hinc si potest res infinitas creare, potest infinitis rebus adesse. Atqui potentia divina nullos plane limites habet. Ergo et præsentia.

2^o Ex infinita perfectione. Nam in primis posse esse alteri immediate præsentem est perfectio simplex, quæ nulli majori perfectioni repugnat. Ergo formaliter reperiri debet in Ente perfectissimo (88, 1^o). Porro perfectio hæc eo gradum obtinet altiozem, quo majus est spatium, quod substantia obtinere potest. Quantæ enimvero perfectionis esset ille spiritus, qui non intra corporis humani dimensiones constrictus teneretur, sed corpus terrestri orbitæ æquale occupare posset! Ille ergo erit quoad hanc perfectionem perfectissimus, cujus præsentia nullis limitibus definiatur, sed infinita spatia, si darentur, implere posset. At Deus perfectionem omnem perfectissimo modo possideat necesse est. Ergo.

3^o Repugnat Ens necessarium determinari ad limitatam præsentiam. Ergo ejus præsentia est sine limitibus.

Prob. ant. Nulla ratio sufficiens determinationis hujus haberi potest, neque ab extrinseco, neque ab intrinseco.

Non ab extrinseco; secus divina substantia dependens esset atque contingens.

Non ab intrinseco: substantia enim quæ necessario est, ut in perfectione, ita in præsentia sua, nullos ex se limites exigit; imo vero nullam a se præsentia amplitudinem excludit. Ergo.

ARTICULUS III.

Difficultates.

172. Difficultates quæ a Dei simplicitate vel immutabilitate consurgere possent, jam præoccupavimus.

Nam 1^o immensitas Dei non pugnat cum ejus simplicitate; quia per immensitatem divina substantia non formalem extensionem habet, sed virtualement duntaxat (167, 7^o). Imo nulla substantia, nisi simplex, potest per contactum virtutis existere tota in toto loco quocunque, et tota simul in singulis ejus partibus; substantia insuper duntaxat quæ simplex sit, immensa esse potest: quod enim extensum est, infinitum esse nequit.

2^o Non pugnat cum immutabilitate. Non enim Deus extenditur, quum novas res creat; sed solummodo novam extrinsecam relationem admittit (170).

173. Sed objici adhuc potest:

1^o Quemadmodum momentum indivisibile non potest esse in diversis temporibus, ita indivisibile permanens in pluribus esse locis non potest. Sed divina substantia est indivisibilis. Ergo.

2^o « Quod est totum alicubi, nihil ejus est extra locum illum. Sed Deus, si est in aliquo loco, totus est ibi; non enim habet partes: ergo nihil ejus est extra locum illum. Ergo Deus non est ubique. » Hæc sibi objicit s. Thomas (1).

174. Nihil potest melius reponi, quam quæ idem doctor his iisdem objectis reponit.

Ad 1^m itaque sic respondet: « Dicendum quod indivisibile est duplex: unum quod est *terminus continui*, ut punctum in permanentibus, et momentum in successivis. Et hujusmodi indivisibile in permanentibus, quia habet determinatum situm, non potest esse in pluribus partibus loci, vel in pluribus locis: et similiter indivisibile actionis vel

(1) *Sum. th.* p. I, q. VIII, art. II, 3.

» motus, quia habet determinatum ordinem in motu vel actione, non potest esse in pluribus partibus temporis. Aliud autem indivisibile est, quod est *extra totum genus continui*, et hoc modo substantiæ incorporeæ, ut Deus, angelus et anima dicuntur esse indivisibiles. Tale igitur indivisibile *non applicatur ad continuum, sicut aliquid ejus, sed in quantum contingit illud sua virtute*; unde secundum quod virtus sua se potest extendere ad unum vel multa, ad parvum vel magnum, secundum hoc est in uno vel pluribus locis, et in loco parvo vel magno (1). »

Ad 2^m « Totum dicitur respectu partium. Est autem duplex pars, scilicet *pars essentiæ*... et etiam *pars quantitatis*, in quam scilicet dividitur aliqua quantitas. Quod ergo est totum in aliquo loco *totalitate quantitatis*, non potest esse extra locum illum, quia quantitas locati commensuratur quantitati loci, unde non est totalitas quantitatis, si non sit totalitas loci. Sed totalitas essentiæ non commensuratur totalitati loci. Unde non oportet quod illud quod est totum *totalitate essentiæ* in aliquo, nullo modo sit extra illud (2). »

175. Opponi possunt et hæc:

1^o Si divina substantia in omnibus rebus existeret præsens, iis quoque rebus inesset, quæ ob suam fœditatem et indignitatem Deum maxime dedecent.

2^o Nullum sensum haberent locutiones illæ, quas communiter usurpamus, dicentes: Deum esse in cœlo, in templo, in justorum animis, etc.

3^o Si Deus est actu immensus, existeret quoque extra mundum in spatiis imaginariis. Sed hoc absurdum est, nam spatia imaginaria nihil sunt.

176. Resp. ad 1^m *Dist.*: Hoc Deum dedeceret, si Deus ejusmodi rerum contactu læderetur aut turparetur, *conc.*; si secus, *nego*. Luci nihil sordidum adhæret, quum lutum attingit; multo minus simplicissimo et impassibili spiritui.

Ad 2^m *Nego*. Quemadmodum enim Deus est ubique per

(1) *Ibid.* ad 2.

(2) *Ibid.* ad 3.

operationem, quam in omnibus rebus exercet, ita in quibusdam locis ac rebus speciali modo esse merito dicitur, propter operationes speciales quas in iis exercet.

Ad 3^m *Nego*. Deus enim est essentialiter in seipso, et secundum hoc est actu immensus : est autem actu præsens ibi solum, ubi aliquid reale est. Actualis enim divinæ substantiæ in rebus præsens est relatio illi extrinseca, exurgens nempe ex parte termini, in quo realis est ad Deum relatio. Nihilum autem relationis realis subjectum esse nequit.

Quoniam vero spatium imaginarium est ipsa corporum possibilitas (C. 334), aliquo sensu dici potest, Deum immensitate sua spatia imaginaria complere; quatenus actu talis est in se ejus infinita substantia, ac esset, si possibilibus omnibus ad existentiam traductis, iis præsens inesset.

ARTICULUS IV.

De æternitate.

177. *Æternitas est existentia sine initio, sine fine, sine successione.* Est igitur duratio, non vero tempus (C. 389). Quemadmodum enim tempus est *præsens* perpetuo mobile et mutabile, ita æternitas est *præsens* immobile et immutabile. « Non est ibi, ita s. Augustinus, *fuit et erit*; quia et quod » fuit jam non est, et quod erit nondum est : sed quidquid » ibi est, non est nisi est (1). »

Hinc 1^o æternitas absurde concipitur, si concipitur ut tempus actu infinitum.

2^o Tempus non potest ut æternitatis pars haberi.

3^o *Æternitas coexistit quidem* (C. 392, 6^o) *omni tempore*, et unicuique temporis momento, sed non coextenditur cum tempore; ita ut secundum varias sui partes variis temporis partibus respondeat. Tota igitur cuicunque temporis seriei, et tota unicuique momento coexistit. Quemadmodum in circulo « centrum, quod est extra circumferentiam, ad

(1) *Enarr. in Ps. Cl.*

» quodlibet punctum in circumferentia signatum directe oppositionem habet. » Ita s. Thomas (1).

4^o *Æquivalet tamen æternitas tempori indefinito* : cum enim momentis singulis coexistat, æquivalet momentorum seriei, etque indefinitæ; quia æternitas nec initium nec finem habet.

5^o *Formaliter itaque et intrinsece æternitas est in se simplicissima, indivisibilis, immutabilis*; *virtualiter vero, et relata ad durationem finitam sibi extrinsecam, est composita, divisibilis, successiva.*

178. Dei æternitas a Boetio definitur : *interminabilis vitæ tota simul et perfecta possessio.*

Vitæ possessio dicitur, quia Deus non solum existit, sed insuper vivit; ac vivit vita nobilissima, quæ est vita entis infinite intelligentis ac perfectissime volentis.

Interminabilis vitæ; i. e. quæ omni termino ac limite caret, initio videlicet et fine.

Tota simul ac perfecta possessio, i. e. sine actuum successionem. Ideo enim Deus tota simul vita fruitur et non per partes, vitamque perfecte possidet, quia actus vitales successive non exercet, sed est purissimus et infinitus actus.

Igitur definitio hæc a superiori re ipsa non differt.

179. PROPOSITIO III. *Deus est æternus.*

Videlicet Dei existentia ac vita nec initium habet, nec finem habere potest, nec successionem in se ullam admittit. Tria hæc facile demonstrantur.

180. *Deus initium non habet.*

Nam quod initium habet, contingens est, et ab alio est. Deus autem non est contingens nec ab alio : est enim Ens absolute necessarium et a se. Ergo.

Animadvertite hoc loco, necessario admittendum esse, aliquid semper fuisse. Si enim aliquando nihil fuisset, nunc quoque nihil esset : nihilum enim non potest quidpiam producere. Hoc autem quod semper fuit, non est contingentium series (19), nec entium necessariorum multitudo (158).

(1) *Contra Gent. Lib. I, c. LXVI, §6.*

Ergo id quod semper fuisse necessario admittendum est, est unicum illud Ens necessarium, quod Deum dicimus.

181. *Deus finem habere nequit.* Nam :

1° Quod necessitate absoluta et ex essentia ipsa sua ad existendum determinatur, non potest in ulla hypothese non existere. Secus hypothetica esset ejus existentia, ejusque mutaretur essentia.

2° Nulla potest inveniri ratio cur deficiat.

a) Non externa; nam independens est ab omni alio, omni-que alio major ac potior.

b) Non interna. Hæc enim ratio vel contineretur necessitate quadam naturali, vel libera ipsius Dei electione. Non potest autem in se habere deficiendi necessitatem natura illa, quæ sibi essentialiter et plenissime ad existendum sufficit. Contradictorium insuper est, naturam quæ necessario est, necessario tendere ad non-esse. Neque potest Deus libere sibi finem imponere: nam quemadmodum sibi esse non dedit, ita nec tollere potest: nequit enim Deus velle quæ intrinsece repugnant; intrinsece autem repugnat, ut modo dictum est, Ens necessarium aliquando non esse. Præterea quomodo posset Ens perfectissimum, infinito amore seipsum prosequens, sibi existentiam adimere? Ergo.

182. *In Dei existentia ac vita nulla est successio.*

1° Hoc manifeste colligitur ex ejus immutabilitate. Ubi enim nulla mutatio est, ibi nulla est successio. In Deo autem nulla mutatio est.

2° Ens cujus duratio ac vita cum successione explicatur, non potest vitam exercere vitæque frui, nisi successive et per partes. Et quoniam per vitales actus vivens semetipsum perficit, vivens illud quod vitales actus successive promittit, successive ad se perficiendum tendit. Vivens igitur hujusmodi non est ens absolute perfectum. Sed Deus est ens absolute perfectum. Ergo duratio ejus ac vita successiva esse non potest.

183. Quæ obijci possent, jam explanata sunt in præcedenti capite.

Dices adhuc: æternitas, ut quæ in plura momenta indivi-

sibilis est, unicuique temporis differentia tota coexistit. Ergo unaquæque creatura, imo unaquæque creaturæ actio, toti æternitati coexistit. Ergo omnia æterna sunt; quod est absurdum.

Resp. *Dist. ant.* : Æternitas tota coexistit unicuique temporis differentia, spectata formaliter, nempe secundum se, *conc.*; spectata virtualiter, nempe ut æquivalet tempori indefinito, *nego* (177, 5°).

Eodem modo *dist.* 1^m *cons.* et *nego* 2^m.

Certe, ut supra diximus, cum æternitas in se divisibilis non sit, unicuique temporis particulæ tota respondet. Sed comparata ad tempus, indefinito tempori æquivalet, et divisibilis est; adeoque creatura non coexistit toti æternitati consideratæ per comparisonem ad ipsius creaturæ durationem. Id quod similitudine ab immensitate desumpta illustrari potest. Etenim in unaquæque creatura, in unaquæque atomo, tota præsens est divinæ substantiæ immensitas; scilicet ut immensitas est in se formaliter, non ut est virtualis extensio (168, 2°), et extensioni æquivalens indefinita.

CAPUT III.

DE INTELLECTU DIVINO.

ARTICULUS I.

De scientia Dei.

184. Deum intelligentem esse, tanquam omnino certum supponimus (30; 88, 1°); hoc loco tantum de inenarrabili divini intellectus scientia aliquid utcunque investigare conabimur. Scientiæ divinæ nomine intelligimus omnes divini intellectus cognitiones.

De divina porro scientia hæc ex dictis immediate colliguntur.

1^o Dei scientia successivis actibus non continetur (152, 2^o).

2^o Non potest esse ratiocinio parta (188, 2^o).

3^o Non coalescit idearum compositione ac divisione. Nam is solum, qui rem unam eandemque pluribus ac successivis actibus cognoscit, opus habet ut quæ seorsum cognovit, in unum redigat.

4^o Non efficitur accidentalibus perceptionibus et abstractionibus.

5^o Non est habitus quidam, ut humana scientia; nam habitus est accidens substantiæ adjectum ad eam perficiendam; insuper qui habitualement scientiam habet, in potentia est ad actus, nec simul omnia cognoscit.

6^o Est proinde scientia divina simplicissima; nec pluribus constat ideis, quasi modis quibusdam intellectum afficientibus. Hoc tamen non impedit, quominus rerum omnium rationes proprias Deus intelligat. Ex hoc enim plures ideæ in Deo sunt tantum ut intellectæ, non ut affectiones quibus intelligit (O. 89, ad 2^m).

7^o Immunis est ab omni errore, obscuritate, dubio, incertitudine, ignorantia; infallibilis plane, immutabilis, infinita.

8^o Denique divina scientia est ipsa divina substantia et essentia (155). Propterea quemadmodum Deus est suum esse et sua essentia, ita est suum intelligere et suum vivere.

185. Ratione objectorum quæ Deus cognoscit, divina scientia multiplici ratione dividi solet.

Objectum porro divinæ scientiæ aliud *primarium* est, aliud *secundarium*. *Primarium* objectum est essentia ipsa divina; *secundarium*, quidquid est a Deo distinctum.

Præcipua divinæ scientiæ divisio omniumque clarissima, est in scientiam *necessariam* seu *naturalem*, *liberam*, et *mediam* seu *conditionatam*.

Necessaria dicitur scientia, cujus objectum est omnino necessarium, nec a Dei vel creaturæ libertate ullo modo dependens. Objecta hujusmodi sunt primo essentia divina, deinde possibilita universa, quæ in ipsa eminenter continentur.

Libera ea dicitur, ejus objectum a Dei liberis decretis dependet. Ad hanc scientiam pertinent quæcunque in aliqua

temporis differentia existentiam sortiuntur. Appellatur alio nomine: *præscientia absoluta*.

Media demum ea, cujus objectum intelligibilitatem et veritatem habet independentem quidem a liberis Dei decretis, sed dependentem a creaturæ libertate. Hujusmodi est cognitio actuum libere ponendorum a creata voluntate, si ipsa existeret, et in his vel illis conditionibus collocaretur, quæ sive immediate sive mediate mentem voluntatemque afficerent. Idcirco scientia hæc vocatur quoque *præscientia conditionata*.

Hæc propositio v. gr. *Petrus in his adjunctis invitatus ad ludendum potest ad ludum accedere, et potest non accedere*; hæc, inquam, ad scientiam necessariam pertinet.

Hæc altera: *Petrus in his adjunctis ad ludendum non invitabitur, et non ludet*; ad scientiam liberam.

Hæc denique: *Si Petrus in his adjunctis ad ludum invitaretur, luderet*; ad scientiam mediam.

186. Colliges facile, unam eandemque actionem liberam, quæ reipsa futura sit, si spectetur ante Dei decretum, quo agentis existentia et adjuncta præfiniuntur, ad scientiam mediam pertinere; si vero spectetur post Dei decretum, ad scientiam liberam revocari.

187. Vulgata illa altera divinæ scientiæ partitio in scientiam *simplicis intelligentiæ*, *visionis*, et *mediam* cum ea quam modo exposuimus, prorsus conspirat; nisi quod in hac altera secundarium tantummodo divinæ scientiæ objectum respicitur. Scientia simplicis intelligentiæ est possibilitium cognitio; et scientia visionis notitia eorum, quæ in tempore existentiam nanciscuntur. Ratio vero hujusmodi appellationum ex nostro cognoscendi modo desumpta est. Nam a nobis ea videri dicimus, quæ habent esse reale a vidente distinctum; cætera vero esse pure intelligibilia.

* 188. Dividitur quoque divina scientia in *speculativam* et *practicam*. Ad quam divisionem intelligendam adverte, cognitionem dici *speculativam* vel *practicam* 1^o *ex parte objecti*; est nempe speculativa cognitio, si objectum non sit a cognoscente operabile; practica si secus. 2^o *ex parte modi sciendi*

cognitio speculativa est, si consideret modum, quo se res habet; practica, si consideret modum, quo fieri potest. 3^o demum *ex parte finis* cognitio speculativa est, si ordinetur non ad operandum, sed solum ad cognoscendum quomodo res se habeat aut fieri possit; practica vero, si ordinetur ad operandum.

* 189. Ex his intelliges,

1^o Deum habere de seipso scientiam speculativam tantum.

2^o De aliis rebus quas ipse operari potest, habere scientiam practicam ex parte objecti, speculativam simul et practicam ex parte modi.

3^o Spectato vero fine, scientiam Dei esse dicendam speculativam respectu eorum possibilium, quæ ipse in temporum serie ad existentiam non traducit, practicam autem respectu eorum, quæ ad existentiam traducit.

4^o Demum scientiam hanc, quam secundum finem practicam dicimus, esse scientiam simplicis intelligentiæ, quæ decretum omne divinæ voluntatis rationis ordine antecedit, non vero scientiam visionis, quæ decretum subsequitur.

* 190. Ex his pariter solvi potest quæstio: quo sensu scientia divina *causa rerum* dicatur, et quænam scientia appellationem istam sibi vindicet.

Notandum in primis, non solam scientiam, sed scientiam voluntati conjunctam rerum esse adæquatam causam, illam quidem ut dirigentem, hanc vero ut imperantem. Quemadmodum ars, quanquam artificem aptum constituat ad opus recte efficiendum, non tamen ipsum facit agentem, nisi accedat voluntas, quæ eundem ad agendum determinet.

Hoc igitur sensu scientia Dei est rerum causa, quod voluntatem in operando dirigit. Dirigit autem et *per modum artis*, et *per modum prudentiæ*. Per modum quidem artis, exhibendo tam rei producendæ exemplar (O. 312), quam productionis modum. Per modum vero prudentiæ (non sane ethicæ, quæ ad rectum finem operantis actiones dirigit, sed œconomicæ vel politicæ, quæ alienas disponit actiones), quatenus voluntatem et ad volendum movet, et in mediorum electione dirigit.

Quoniam vero divinus intellectus idem re est ac divina voluntas, et tam intellectus quam voluntas unum sunt cum divina substantia, dici nequit, scientiam divinam esse rerum causam tantummodo moralem, ut est ars humana (O. 312); sed ita a nobis concipitur, secundum quod cogitatione nostra intellectus a voluntate distinguitur.

* 191. Patet autem scientiam quæ rerum causa dici hoc pacto meretur, non esse scientiam visionis, sed scientiam simplicis intelligentiæ. Scientia enim visionis non dirigit voluntatem, sed ejus decretum subsequitur, nec rei exemplar suggerit, sed rem jam factam contemplatur. Quum ergo dictum reperies: res non quia sunt, ideo cognosci a Deo, sed ideo esse, quia ab eo cognoscuntur, id de scientia simplicis intelligentiæ dictum existima; de visionis enim scientia oppositum dici debet, ut etiam in sequentibus explicabitur.

Nunc singillatim de scientia divina, secundum divisionem primo propositam (185).

ARTICULUS II.

De scientia necessaria.

192. PROPOSITIO I. *Deus seipsum intelligit, et adæquate comprehendit.*

Seipsum intelligit. Nam 1^o intellectus operatio eo est perfectior, quo perfectius est intelligibile quod apprehendit. Sed divini intellectus operationem perfectissimam esse oportet: intelligibile autem perfectissimum est ipse Deus. Ergo.

2^o Divina essentia est eminenter intelligibilis secundum se, quia actus purissimus; estque insuper non solum immediate atque intime præsens divino intellectui, sed est ipse divinus intellectus. Ergo.

193. Se adæquate comprehendit. Si enim divina essentia infinita est, divina quoque intelligentia infinita est; potest igitur infinitam essentiam intelligibilitatem totam comprehendere. Sed est insuper tota in actu; ergo infinitam essentiam intelligibilitatem totam actu comprehendit.

194. PROPOSITIO II. *Deus omnia possibilia cognoscit.*

Etenim 1° Dei scientia infinita est. Ergo complecti cognitione debet quicquid est cognoscibile. Possibilia autem cognoscibilia sunt.

2° Deus essentiam suam perfectissime cognoscit, ac sub omni respectu, videlicet non solum ut ipsa est in se, sed etiam ut est imitabilis extra se.

Atqui similitudines istæ divinæ essentiæ sunt rerum omnium possibilium intelligibiles essentiæ. Deus ergo rerum omnium possibilium essentias cognoscit. Sed essentias hasce omnes cognoscit perfectissime. Ergo cognoscit quæcunque accidere eis possunt: cognoscit videlicet omnia possibilia. Vide dicta in ontologia (O. 83).

3° Deus potentiam suam ac virtutem infinitam perfecte comprehendit. Ergo cognitione attingit ea omnia, ad quæ se extendere hæc virtus potest. Sed divina virtus ad omnia se possibilia extendit: nec modo ad essentias universales, sed etiam ad individua: non enim essentiæ universales, sed individua sunt potentiæ termini.

195. Hinc deduces, 1° Deum cognoscere *enuntiabilia* omnia, videlicet quæcunque sive de universalibus sive de individuis enuntiari possunt. Etenim tam essentias rerum, quam individua possibilia adæquate cognoscit. Scit insuper quæcunque sunt in intellectus humani potentia. Ergo et enuntiabilia quæ ab ipso formari possunt. Non tamen hæc novit per idearum compositionem aut divisionem (184, 3°), sed simplici intelligentia.

2° Cognoscere etiam *mala*. Nam et hæc sunt inter ea, quæ rebus accidere possunt. Cognoscit autem mala per hoc ipsum, quod bona mutabilia cognoscit. Malum enim est boni privatio.

ARTICULUS III.

*De scientia libera.*196. PROPOSITIO III. *Deus cognoscit omnia futura necessaria.*

Nam hæc omnia cognoscere debet, qui naturalium causarum, quæ ex necessitate agunt, virtutem adæquate comprehendit; earumque ad invicem relationes, concursus, occursum, commixtiones, positionesque futuras omnes distincte intelligit. Hujusmodi enim causarum effectus ex causarum natura et adjunctis sunt ad unum determinati.

Jamvero Deus naturalium causarum virtutem adæquate cognoscit; nam ipse est qui eas produxit, certisque viribus instruxit, legibusque subjecit. Series vero relationum omnium quas inter se naturales causæ habituræ sunt, a primo illo ordine, quo sunt a Deo in rerum initio dispositæ (C. 319.), necessario consequitur. Ergo.

Præterea futura hæc non modo ut sunt in causis Deus intelligit, sed videt etiam ut sibi præsentia, secundum esse quod habent in seipsis; prouti de futuris liberis modo dicetur.

197. Notanda. 1° Futura necessaria conditionata, eodem modo ac absoluta, in causis a Deo cognoscantur necesse est.

2° Non modo cognoscit Deus effectus, qui a causis necessariis *per se* dimanant, sed eos quoque qui dimanant *per accidens*. Hi enim effectus ex variarum causarum concursu prodeunt (O. 264, 1°; 321).

198. PROPOSITIO IV. *Deo perspecta sunt omnia futura libera.*

1° Divinare futura hæc aut conjectura probabili assequi, magna est in ente intelligente perfectio. Multo major perfectio haberi debet certa eorum cognitio. Ergo Deus hac cognitione carere non potest.

2° Si hæc Deus a tota sua æternitate non prænoscit, ea nosset solum decursu temporis, quum videlicet ex futuris præsentia fiunt. Hoc autem undequaque absurdum est. Nam

a) si ita esset, cognitio divina constaret pluribus actibus, in eaque haberetur distinctio potentiæ et actus;

b) Deus perpetuo mutaretur;

c) novum semper accederet scientiæ divinæ perfectionis incrementum;

d) demum, non posset Deus liberos hujusmodi actus ad

fines suos infallibiliter præordinare; adeoque vix superesset providentiæ locus. Tollit igitur divinam providentiam, qui hanc Deo præscientiam negat.

3^o Propositiones quibus futura hæc enuntiari possunt, suam habent veritatem, quemadmodum contradictoriæ illis falsitatem. V. gr. ex his duabus propositionibus: *Cæsar cras domo exibit*; *Cæsar cras domo non exhibet*, altera est determinate vera, altera determinate falsa (O. 375, seq.). Sed infinita intelligentia omnem debet veritatem habere perspectam. Ergo.

4^o Quid plura? Nisi quis affirmare velit, Deum ea quoque ignorare, quæ sibi præsentia sunt, negare non poterit, futura hæc illi explorata esse. Etenim proprie loquendo, nihil Deo futurum est, sed præsentia sunt omnia. Æternitas namque ipsius, in se indivisibilis et omne tempus excedens, totum tempus ambit, atque omnibus et singulis temporis partibus tota coexistit (177, 183). Omnia igitur tempora æterno intellectui præsentia sunt; proindeque quidquid in serie temporum contingit, respectu divini intellectus se habet ut præsens, ac tantummodo respectu alterius partis temporis rationem habet præteriti vel futuri. Sic in circulo singula peripheriæ puncta (177, 3^o) successive disposita sunt, sed non veniunt successive in centri conspectum. Sic etiam « ille » qui vadit per viam, non videt illos qui post eum veniunt; » sed ille qui ab aliqua altitudine totam viam intuetur, simul » videt omnes transeuntes per viam. » Ita s. Thomas (1). Ex quibus concludes, dicendum potius esse, Deum scire ac videre futura, quam præscire ac prævidere.

5^o Accedit his omnibus universarum gentium consensus. Omnes enim gentes liberarum actionum præscientiam, tamquam proprium divinitatis attributum, agnoverunt. Hinc prophetiæ Dei nomine propositæ, et oraculorum consultationes, imo et divinatio, sive per necromantiam sive per auguria sive per sortilegia, et sexcentæ illæ inanes observantiæ, e quibus de futuris seu prosperitatibus seu infortuniis, conjecturas capere vulgus assolet.

(1) Sum. th. p. I, q. XIV, art. XIII ad 3.

6^o Postremo ex historia constat, multos fuisse divinitus prænuntiatos eventus, qui ab actionibus liberis, iisque multiplicibus, omnino dependerent. Consule sacras litteras, et ecclesiasticam historiam. Ergo.

ARTICULUS IV.

De scientia conditionata.

199. PROPOSITIO V. *Porrigit se quoque divina scientia ad quoscunque liberos actus, qui quibusvis adjunctis positis, futuri essent.*

Nam 1^o necesse plane est ut existimemus, esse Deo infallibiliter notum omne id, quod nosse bonum est, et ex se desiderabile, ipsique homini magnam perfectionem affert. Sed et bonum est, ex se desiderabile, magna insuper perfectio, nosse id quod libera voluntas, quavis data conditione, esset actura, etiamsi id nunquam actura sit. Révera hæc maxime nosse desideramus, quum deliberandum de re aliqua est; hæc divinare facile posse prudentis laudem in primis conciliat; atque hac maxime sagacia distinguuntur superiores illæ mentes, quæ rerum humanarum cursibus dirigendis potenterque flectendis inter mortales subinde apparent.

2^o Divinæ scientiæ perfectio hac dignitas postulat, ut nulla possit Deo proponi quæstio, cujus ille certum et infallibile responsum ignoret. Sed si Deus hac scientia caret, innumeræ quæstiones ipsi proponi possent, quibus infinitæ sapientiæ vel nullo modo respondere, vel saltem non sine erroris periculo liceret; quod quis dici ferat? V. gr. ait David: « Domine Deus Israel, audivit famam servus tuus, quod disposuit Saul, venire in Ceilam, ut evertat urbem propter me. » Si tradent me viri Ceilæ in manus ejus? et si descendet Saul, sicut audivit servus tuus? Domine Deus Israel, indica servo tuo (1). » Quid ad hæc Deus o. m. respondere debuisset? *Nescio*. Vel: *Probabiliter ita erit*. Atqui respondit categorice: *Descendet. Tradent* (2). Erat tamen hoc futu-

(1) I Reg. XXIII. 10, 11.

(2) Ibid. 11, 12.

rum conditionatum; quia David inde fugit. Jam cui non occurrant animi sexcentæ quæstiones huic similes?

3° Si hac scientia Deus careret, liberas Adami v. gr. aut Cæsaris electiones, quæ reipsa futuræ erant, tunc primo cognovisset, postquam eos condere decrevisset; nempe in signo creationis decretum subsequente (164). Tunc enim et in hoc signo, quæcunque futura sunt, objectum fiunt scientiæ visionis. In signo autem decretum hoc antecedente, quid futurum esset, Deus non cognoscebat; in hoc enim signo nihil est absolute futurum, sed solummodo conditionate. Cognitio igitur omnis, quam Deus habet de futuris hominum actionibus, foret experimentali similis et a creatura dependens, non ut a termino cognitionis, qua in re nihil est Deo indignum, sed ut a principio cognitionem determinante; id quod in Deo maxime absurdum est.

4° Ad hæc: si Deo non est cum certitudine notum, quid liberum agens in datis adjunctis acturum sit, nisi postquam illud condere decrevit, divina decreta essent necessario temeraria, improvida, cæca, ludoque aleatorio similia; vel saltem fallibilibus et incertis conjecturis innixa; plane ut sunt hominum consilia. Hæc autem omnia Deo indignissima sunt, perfectæque providentiæ rationem subvertunt. De ratione enim perfectæ providentiæ est, ut nihil fiat aut permittatur, quod ad finem præstitutum præordinatum non sit, cum certitudine de fine assequendo.

5° Exinde et illud consequeretur incommodi, quod etiamsi Deus vellet ac maxime cuperet, ut liberum quoddam agens ad existentiam deveniret, quod hoc potius quam illud acturum foret; v. gr. ut esset dato tempore romanus imperator, qui, salva prorsus libertate, Christi fidem amplecteretur, eamque civitate donaret; etiamsi, inquam, hoc Deus maxime vellet, tamen id nunquam infallibiliter intendere posset.

6° Demum, et hoc demonstrat hominum consensus. Ethnici enim in his maxime oracula consulebant; de his Hebræi a vero Deo ejusque prophetis responsa petebant; de his hodie dum Christiani sanctos viros expostulant. Pii vero homines

hanc Deo inesse scientiam, in suis precibus constanter significant, dum Deum Ecclesiæ vocibus precantur, *ut noxia cuncta submoveat, et omnia nobis profutura concedat* (1); dumque ex eo potissimum se in suis vel suorum calamitatibus consolantur, quod sibi persuadeant, Deum ideo talia permisisse, quia secus in majora mala incidissent, quæ ipse noverat. *Raptus est ne malitia mutaret intellectum ejus* (2). Ex quibus plane concludi potest, omnibus qui Deum agnoscunt, ratam ac fixam persuasionem esse: Deum futura conditionata certissima scientia explorata habere.

ARTICULUS V.

Quomodo Deus hæc omnia cognoscat.

200. Quæstiones duas hoc titulo comprehendimus. Prima est, quædam sit formale divinæ cognitionis principium, id nempe quod divinum intellectum actu cognoscentem facit. Altera est de medio, ut aiunt, cognitionis ejusdem. Utramque breviter expediemus, profundiorum de his investigationem theologis reservantes.

201. Quoad primam quæstionem, animadvertite, agi hic non de principio efficiente intellectionis, quod intellectus, sed de principio formali, quod veteres appellabant *speciem intelligibilem* (P. 361, 3°). Hoc porro principium in humano intellectu est determinatio illa quam recipit intellectus, quum manifestato per sensus objecto, notas intelligibiles ab ipso haurit, quibus ejusdem objecti similitudo quædam continetur. Hac autem similitudine intellectus formatus, fit actu cognoscens objectum, ipsumque concipit et exprimit; conceptus vero sic expressus, qui est et ipse objecti similitudo, est id quod veteres intensionem rei intellectæ, conceptum, verbumque mentis appellabant, recentiores autem ideam vocare solent (P. 372; 374, seq.). Patet igitur, quid sit formale cognitionis principium, et quomodo ab idea differat.

(1) In collecta Dom. VII, post. Pent.

(2) Sap. IV, 11.

202. PROPOSITIO VI. *Formale divinæ cognitionis principium nullum est aliud, quam divina essentia.*

Probatur clare a s. Th. in *Summa contra gentiles*, Lib. I. C. XLVI. Ex cujus argumentis, duo hæc quæ facillima sunt, seligimus :

1° « Species intelligibilis in intellectu præter essentiam » ejus existens, esse accidentale habet, ratione cujus scientia » nostra inter accidentia computatur. In Deo autem non potest esse aliquod accidens, ut supra ostensum est. Igitur » non est in intellectu ejus aliqua species, præter ipsam divinam essentiam (1). »

2° « Intelligere Dei est ejus esse, ut supra ostensum est. » Si igitur intelligeret per aliquam speciem, quæ non sit sua » essentia, esset per aliquod aliud a sua essentia ; quod est » impossibile. Non igitur intelligit per aliquam speciem, quæ » non sit sua essentia (2). »

203. Hinc 1° sequitur, in divino intellectu esse non posse plures species intelligibiles ad res diversas intelligendas ; sed divinam essentiam esse principium sufficiens, quo Deus omnia actu intelligat quæcunque intelligit.

2° Quoniam Deus omnia intelligit, omnium quoque species intelligibilis divina essentia sit oportet.

3° Ita tamen, ut eadem divina essentia sit solius Dei species propria, aliorum vero non propria. Species enim intelligibilis illius objecti dicitur propria, cujus adæquatam similitudinem gerit, eorum vero quæ in hoc objecto continentur, et per ejus speciem intelliguntur, species non propria ; quemadmodum species totius est totius propria, ejusque partium non propria. Jam divina essentia sibi soli adæquatur : cætera vero quorum exemplaria intelligibilia in se continet, ab ipsa infinite deficient.

204. Per hæc aditus patet ad quæstionem alteram de cognitionis divinæ medio. Est porro cognitionis medium id omne, cujus cognitio ratio est, ut aliquid aliud cognoscatur. Manifestum est autem, quum de Deo loquimur, non ita hoc in-

(1) Arg. 3.

(2) Arg. 5.

telligi, ut unus cognitionis actus alteri viam sternat, quemadmodum nobis usuvenit, v. gr. in ratiocinio ; sed ita ut tota quæstio versetur circa res cognitæ, quo nempe ordine se excipiant objecta, quæ simplicissimo actu divinus intellectus cognoscit. Quomodo quæstio hæc resolvenda sit, sequentibus assertionibus exponemus.

205. ASSERTIO I. *Deus primo et per se seipsum intelligit, ac seipsum solum.*

« Illa enim res solum est primo et per se ab intellectu » cognita, cujus specie intelligit.... Sed id quo Deus intelligit, nihil est aliud, quam sua essentia. Igitur intellectum » ab ipso primo et per se, nihil est aliud, quam ipsemet. » Ita s. Thomas (1).

ASSERTIO II. *Deus se et res alias a se cognoscit in seipso.*

Duobus modis res aliqua cognosci potest : in ipsa re, et in alia re. Res in ipsa re cognoscitur, quando per propriam ejus speciem intelligitur (263. 3°) : in alia vero re, quum intelligitur per alterius rei speciem. Sed ex dictis, Deus omnia intelligit unica specie intelligibili, quæ est ejus essentia (203 ; 1° 2°). Ergo omnia intelligit in seipso.

206. Revera res a se distinctas Deus intelligere potest, vel secundum quod sunt in potentia sua, vel secundum quod præexistunt in suis immediatis causis, vel demum secundum esse quod habent in se ipsis. Jam per se patet, res secundum quod sunt in potentia Dei, non posse a Deo intelligi, nisi quatenus et suam essentiam, unde illæ esse intelligibile habent, et suam virtutem infinitam, a qua illæ produci possunt, cognoscit (194, 2°, 3°).

Pariter virtus cujuslibet causæ creatæ in eadem divina essentia habet exemplar : proindeque divina essentia a Deo cognita ratio est, cur Deus cognoscat res, secundum quod in suis immediatis causis præexistunt.

Denique esse quod res habent in se ipsis, et a divina essentia tanquam ab exemplari deducitur, et a divinæ voluntatis decreto aliquo dependet. Igitur Deus ipse, prouti sibi

(1) *Contra Gent.* Lib. I, c. XLVIII.

cognitus, est sibi ratio res cognoscendi, etiam secundum esse quod in seipsis habent.

207. Nota 1^o Non perinde esse res cognosci *secundum esse quod habent in se ipsis*, ac cognosci *in seipsis*. Deus enim res cognoscit etiam secundum esse quod in seipsis habent; non tamen hoc cognoscit in ipsis, ita ut ipsa sint Deo cognoscendi ratio, sed in seipso, ut ex modo dictis liquet.

Nota 2^o Quamvis objectum nullum extra Deum sit ratio qua Deus ad cognoscendum ipsum determinetur, potest tamen objectum hujusmodi esse conditio, requisita ad hoc, ut divina cognitio ad ipsum terminetur, prout infra dicitur.

Nota 3^o intelligi ex dictis quomodo divina essentia dicatur a Deo cognosci, ut objectum materiale simul et formale, cætera autem ut objectum pure materiale. Hac nempe loquendi ratione hoc unum significatur: divinam essentiam esse id, *per quod*, seu ratione cujus cogniti, cætera a Deo cognoscuntur.

208. Nunc de modo et ordine, quod res a Deo distinctæ cognitioni ejus exhibentur.

ASSERTIO III. Manifestum est ex dictis (190, 2^o; O. 83), Deum *primo in essentia sua*, quia essentiam suam perfectissime comprehendit, *essentias omnes possibiles intelligere*; et quoniam has quoque essentias comprehensive intelligit, omnia possibilia individua in iis distincte cognoscere; quia demum individua hæc omnia eadem perfectione cognoscit, in his ipsis individuis omnes eorum possibiles actus, modificationes, relationes habere perspectas.

ASSERTIO IV. *Futura necessaria, ante creationis decretum, nota Deo sunt secundum esse quod habent in suis possibilibus causis, et in ipsius Dei potentia. Post decretum vero, scientia visionis, et causas et effectus continetur Deus, secundum esse quod in seipsis habent.* Hæc quoque nullam præferunt, post dicta hucusque, difficultatem (196).

209. ASSERTIO V. *Futura libera non possunt a Deo prænosci, secundum quod in suis causis præexistunt.*

Etenim actus omnis liberæ voluntatis non habet in ipsa voluntate esse certum et determinatum, sed indifferentiam ad

existendum vel non existendum. Voluntatis enim virtus, quamvis omnia requisita ad volendum præsto illi sint, ipsaque sit ad operandum proxime disposita, non idcirco determinatur ad volendum, sed potest et velle et non velle, atque adeo contrarium velle. Igitur quamvis ab eo qui voluntatis adjuncta, propensiones, habitus intime novit, possit de futura ejus electione cum majori vel minori probabilitate conjectura fieri; nullo tamen modo electio hæc, certa atque infallibili scientia, ex sola causæ consideratione teneri potest. Dei autem scientia certa et infallibilis sit oportet. Non igitur hoc pacto futura libera Deus prænoscit.

210. ASSERTIO VI. *Hæc igitur ante creationis decretum per scientiam mediam, tanquam futura conditionata, cognoscit* (199, 3^o, 4^o; 198, 3^o); *post decretum autem intuetur scientia visionis, secundum esse quod habent in seipsis* (198, 4^o); videlicet ut actu eliciuntur a voluntate.

211. ASSERTIO VII. *Futura conditionata cognosci infallibiliter non possunt, sive in voluntate considerata ut potentia, sive ex nexu aliquo objectivo et necessario consecutionis conditionem inter et conditionatum.*

Prima pars ex modo dictis (209) immediate fluit. Voluntas enim, ut potentia est, sub quibusvis adjunctis indifferens manet ad opposita.

Pars altera non est minus manifesta. Si enim inter aliqua adjuncta, sive interna sive externa, et voluntatis actum necessarius aliquis nexus intercederet, nulla esset amplius ad eligendum libertas.

212. Hinc colliges, in propositionibus conditionalibus quibus conditionata futura enuntiantur, v. gr. *Si Petrus obvium habebit inimicum, ultionem sumet de illo*, inter conditionem et conditionatum non haberi nexum physicum causalitatis et dependentiæ, sed nexum historicum successionis aut coexistentiæ; esto quod adjuncta in conditione expressa, occasionis quoque aut causæ moralis rationem habeant. Sed quæres, quomodo hic nexus sufficiat ad propositionis conditionalis veritatem, cum hæc propositio ex eo veritatem habeat, quod conditione posita conditionatum poni necesse sit

(L. 171). Respondeo : positionem hanc et necessitatem esse *logicam*. Nempe conditionis positionem affirmationem esse, et hanc necessitatem esse necessitatem affirmandi. Ad hoc autem ut affirmato uno, alterum affirmari necesse sit, non requiritur, ut etiam ex parte objectorum, existentia unius cum existentia alterius necessario connectatur, sed satis est connexio externa quæcunque, sive absolute sive in aliqua suppositione futura, quæ vere inter unum et alterum habeatur.

213. ASSERTIO VIII. *Dicendum est igitur futura conditionata a Deo cognosci, secundum esse ipsorum proprium quod haberent, si certa illa adjuncta ponerentur.*

Etenim, ut ex dictis patet, quodcunque excogitetur medium, si hoc libertatem sartam tectam servat, idoneum non est ad actus istos determinate infallibiliterque representandos.

Quomodo autem hi possint in seipsis divino conspectui exhiberi, id aliquo modo intelligi potest, primo ex infinita vi divini intellectus; qui certe quidquid verum est penetrare potest, et infallibiliter judicare, quid in quolibet enuntiabili veri sit aut falsi. Insuper, quemadmodum divina essentia, quia entium liberorum essentiam omnem divino intellectui cognoscendam perfecte exhibet, exhibet quoque illi cognoscenda individua omnia, quæ essentias illas participare possunt; ita, quia individua hæc ipsa divino intellectui perfecte representantur, eorum quoque voluntas representetur illi necesse est, non modo ut potentia ad plura indifferens, sed etiam ut agens sub quibusvis adjunctis, ea prorsus ratione qua sub adjunctis iisdem revera ageret.

214. Postremo nihil repugnare, quod objectum nunquam actu futurum, sit nihilominus divino conspectui actu præsens, intelligere dabitur exinde, quod divina æternitas omnium temporum possibilium series suo ambitu comprehendit, et actu talis est, ac si iis omnibus coexisteret. Quemadmodum igitur divina potentia ita est actu, ac si omniaabilia produceret, et divina substantia ita est actu, ac si omnibus possibilibus ad existentiam traductis, iis præsens

inesset (170, 2°); ita quoque divinus intellectus ita est actu, ut quæcunque in variis possibilium successionum ordinibus futura essent, tanquam sibi præsentia complectatur.

215. Ex hucusque dictis de Dei scientia consequitur, *Deum ipsam esse veritatem, primamque ac summam veritatem.*

Est 1° veritas secundum quod veritas de intellectu dicitur. Nam in intellectu ejus omnia cognoscente ut sunt, est purissima veritas : ipsa autem ejus cognitio perfectionem suam proprie non habet, sed ipsa est omnis sua perfectio, (108, ad 1^m). Ergo cognitio divina, non tam vera, quam veritas est. Sed Deus est suus intellectus ac sua cognitio (139, 2°). Ergo est veritas.

Est 2° veritas secundum quod res veræ dicuntur. Res enim sunt absolute ac per se veræ, quatenus earum essentia propria sui rationem, quæ in mente divina est, imitatur (O. 118). Dei autem essentia, potius quam vera, veritas est; itémque Deus est sua essentia. Ergo Deus est veritas.

Est 3° summa ac prima veritas. Nam omnis veritas est conformitas intellectus et rei. Conformitas vero est similitudo : summa autem similitudo est unitas non modo logica (O. 216), sed realis : nulli enim rei aliquid est magis simile quam sibi ipsi. Sed divina essentia et divinus intellectus realiter unum sunt. Ergo Deus est summa veritas.

Prima quoque veritas : quia intellectus divinus mensura est omnis veritatis, sive rerum sive intellectus, cum et rerum et intellectuum sit causa (190).

ARTICULUS VI.

Difficultates.

216. Ad solvendas difficultates quæ contra liberarum actionum præscientiam opponuntur, duo hæc semper præ oculis habenda sunt : 1° æternitatem Dei nulla successione distingui, sed omnibus temporum differentiis indivisam simul

coexistere (177); 2^o scientiam omnem suum objectum supponere, non causare; atque hinc objectum quod cognoscitur, natura prius esse cognitione quæ illud attingit. Ex quibus sequitur, ut supra notatum est (198, 4^o), Dei præscientiam præsentī visioni recte comparari.

Hinc, quemadmodum cognitio liberi actus, quam homo quivis acquirit eo tempore quo alter operatur, liberam operantis electionem nec tollit nec impedit, sed supponit factam; ita quoque divina cognitio. *Num quæ præsentia cernis, aliquam eis necessitatem tuus addit intuitus?* Ita præclare Boetius (1). Et s. Augustinus: « Sicut tu memoria tua non cogis » facta esse, quæ præterierunt, sic Deus præscientia sua non » cogit facienda, quæ futura sunt (2). »

Non itaque humana voluntas hoc quod agit, in tempore agit, quia Deus in æternitate prævidit ita acturam, sed ideo Deus hoc prævidit, quia humana voluntas hoc agit.

217. Opp. I. Quod Deus prævidit, necessario futurum est. Sed quod necessario futurum est, liberum non est.

Resp. *Dist. maj.* necessitate consequente seu suppositionis, *conc.*; necessitate antecedente et absoluta, *nego.*

Et contradist. min.

Est porro necessitas *antecedens* illa, vi cuius res fit; eaque tunc locum habet, quum rei causa est ad unum determinata. Necessitas vero *consequens* illa est, quam facit res, nimirum quæ sequitur ex rei suppositione: posita enim re, non potest non esse posita (L. 405). Necessitas porro *antecedens* consistere cum libertate non potest: at *consequens* nullo modo eam tollit; nam si voluntas libere se ad aliquid determinans, non potest eodem tempore se ad oppositum determinare, non idcirco libertate caruit ad utrumlibet eligendum.

Jam Dei prævisio nullam aliam infert necessitatem, quam consequentem; eamdem videlicet quam infert actualis voluntatis electio; ideo enim Deus actionem liberam videt, quia ita se determinat voluntas, ut modo diximus.

218. Opp. II. Tamen stante Dei prævisione, homo non

(1) *De Cons. Lib. V. Pros. 6.*

(2) *De lib. arb. Lib. III, c. IV.*

potest se aliter determinare; secus Dei præscientia fallibilis esset.

Resp. *Dist. ant.*: potentia consequente, *conc.*; antecedente, *nego.*

Dist. rat. add. eodem modo: si homo posset aliter se determinare potentia consequente, *conc.*; secus, *nego.*

Supposita Dei prævisione, hoc ipso supponis, hominem ita se determinare et non aliter. Si autem homo aliter se determinasset, aliter Deus prævidisset.

219. Opp. III. Scientia Dei omnes actus liberos præcedit. Ergo hi actus ab ipsa dependent necessitate antecedente.

Resp. *Dist. ant.*: tempore, *conc.*; natura, *subd.*: secundum suam entitatem, *conc.*; secundum suam terminationem ad illos, *nego* (164).

Deus vidit quid tu factururus esses, quam tu relatus ad seriem temporum, eras adhuc futurus, æternitati vero præsens. Cur autem vidit? Quia tu revera te ad agendum determinabas. Scientia igitur Dei hanc determinationem supponit, non quidem tempore, sed natura præeuntem; præeuntem, dico, non ipsi actui divino, qui est unum cum Dei essentia, sed terminationi ejusdem actus, quæ contingens est et ab eventu contingente pendere potest. Finge novum planetam creari intra radiorum solarium sphaeram. Certe radiatio solis radiique illuminantes existentiam planetæ et tempore et natura antecederent; ipsa tamen illuminatio, seu terminatio radiorum illuminantium ad planetam, existentia planetæ foret natura posterior. Applica.

Hæc porro quæ de visionis scientia dicta sunt, scientiæ conditionatorum facile applicabis: nam et ipsa objecto suo natura posterior est, modo prædicto. Supponit enim hypotheticam voluntatis electionem (213).

220. Opp. IV. Ex dictis consequeretur,

1^o Dei scientiam dependere a creaturæ voluntate;

2^o eamque contingentem esse.

Resp. ad 1^m *Dist.*: tanquam a principio determinante ad cognoscendum, *nego*; tanquam a termino seu conditione necessaria terminationis, *conc.*

Lux determinata est ex se ad omnia objecta sibi præsencia illuminanda, neque hanc virtutem ullo modo ab objectis accipit; quod autem hoc potius objectum, quam aliud illuminetur, hoc sane ab ipsa illuminatione non pendet. Simili modo Essentia divina, ut supra explicavimus (201, seq.), est ex se determinata ad cognoscendum quidquid verum est; unde omnia in seipso Deus cognoscit (203, seq.): quod autem hoc potius, quam illud sit verum, hoc utique, quantum ad humanas actiones pertinet, non a Dei scientia, sed ab hominis voluntate dependet. Ex hoc autem sequitur, divinam scientiam ab hominis voluntate ejusque electione pendere, tanquam a conditione ponente terminum, quem ipsa attingat, dum attingit omnia. Sed hoc divini intellectus independentiæ nihil profecto detrahit.

Resp. ad 2^m *Dist.*: in se, *nego*; in termino, *conc.*

* 221. Opp. V. contra scientiam conditionatorum: conditionata hæc futura neque in seipsis infallibiter cognosci possunt.

Etenim quod conditionate futurum est, nunquam habebit esse determinatum: hoc enim habere nequit, nisi a voluntatis electione; sed hæc electio nunquam actu futura est, ut supponitur.

Ergo futura hæc habent solummodo esse indeterminatum in causa; proinde cognosci nequeunt.

Resp. *Dist. ant.*: Non possunt cognosci in seipsis; i. e. non possunt esse principium determinans cognitionem per propriam sui speciem, *conc.* (207; 203, 3^o); non possunt esse terminus cognitionis infallibilis aliunde determinatæ, *subd.*: cognitionis temporaneæ et finitæ, *conc.*; æternæ et infinitæ, *nego* (214).

Ad prob. *Dist. ant.*: Nunquam habebit esse absolutum, *conc.*; esse hypotheticum, *nego*.

Ad argumentum. *Dist. maj.*: ab electione sive absoluta sive hypothetica, *conc.*; ab electione solum, absoluta, *nego*. Et *contradist. min.*

Hinc *nego* utrumque consequens.

CAPUT IV.

DE DIVINA VOLUNTATE.

ARTICULUS I.

Cujusmodi sit Dei voluntas.

222. Voluntas entis intelligentis propria, est tendentia ejus in bonum, secundum quod intellectu apprehenditur (P. 303). Esse autem in Deo voluntatem, non est cur demonstremus, cum voluntas et pura perfectio sit, et intelligentiam natura sua consequatur. Est quoque indubium, Dei voluntatem non potentiam esse, sed actum; neque actum essentiae superadditum, sed ipsam ejus essentiam (153).

223. Divinæ voluntatis objectum princeps et necessarium est divina ipsa essentia, quæ summum bonum est; secundarium res finitæ. Se autem vult Deus ut finem, bonitate sua, ineffabili delectatione fruendo; cætera quæ vult, propter se vult, ut media ad finem, quatenus per illa divina bonitas manifestari potest. Uno tamen actu et se vult, et alia quæcunque vult. Quare dici nequit, Deum *unum velle propter aliud*, aut *quia vult aliud*; hoc enim significaretur, unum divinæ voluntatis actum esse causam alterius, aut unum eundemque actum suiipsius causam esse: dici proinde solum debet, velle Deum, *unum esse propter aliud*. Nimirum nulla causa divinæ voluntatis assignari potest ex parte actus; sed tantummodo ex parte rerum quas vult, unum est alteri causa, ut Deus illud velit.

224. Facile quisque intelligit, nullas affectuum passiones in Deo reperi posse. Passiones enim hujusmodi sunt actus appetitus sensitivi, quatenus corpoream aliquam immutationem sibi adnexam habent (Ps. 306); cum igitur nulla immutatio talis in Deo esse possit, sequitur, omnem affectivam passionem, ratione sui generis, Deo repugnare.

Quædam autem passiones, non solum quatenus passiones sunt, sed etiam in sua parte formali non possunt in Deo esse, sive ratione objecti a quo speciem sortiuntur, sive ratione modi quo in objectum tendunt.

Ratione igitur objecti abest a Deo *tristitia*, cujus objectum est malum inhærens; et *timor*, qui malum possibile respicit; pariterque *invidia*, quæ species tristitiæ est, et *ira*, quæ tristitiam supponit.

Ratione vero modi quo in objectum tendunt, nec *desiderium* nec *spes* in eo esse possunt; quia ad bonum tendunt, non obtentum, sed obtinendum adhuc.

225. Hæc eadem dicenda sunt de actibus voluntatis, seu appetitus rationalis, qui cum passionibus appetitus sensitivi commune nomen habent. Videlicet actus omnes qui imperfectionem aliquam implicitam sibi continent, non possunt divinæ voluntati formaliter convenire; et metaphorice solum ipsi tribuuntur, vel *propter similitudinem effectuum*, quemadmodum, quia irati hominis proprium est punire, impassibilem Dei voluntatem, qua sotes punire vult, iram Dei dicimus; vel *propter similitudinem affectionis præsuppositæ*, quæ proprie in Deo sit; quo pacto dicitur Deus tristari, quatenus aliqua fiunt, iis quæ amat contraria; amor enim ejus cujus oppositum contingit, tristitiam in nobis præcedit, ab eaque præsupponitur.

226. Actus autem voluntatis, qui secundum suam speciem nullam continent imperfectionem, *proprie* in Deo sunt, non metaphorice. Hujusmodi sunt 1° *amor*, quo Deus et bonum suum vult propensione infinita ac necessaria, et bonum omnium quæcunque sunt libera electione; 2° *gaudium et delectatio*, qua et in bono quod habet, et in bono quod facit, ineffabiliter conquiescit.

227. Notandum porro 1° Dei amorem non eodem modo se habere erga res, ac se habet amor noster. « Quia enim, ita » s. Thomas, voluntas nostra non est causa bonitatis rerum, » sed ab ea movetur sicut ab objecto; amor noster quo bonum alicui volumus, non est causa bonitatis ipsius, sed e » converso bonitas ejus, vel vera vel æstimata, provocat amo-

» rem, quo ei volumus et bonum conservari quod habet, et » addi quod non habet, et ad hoc operamur. Sed amor Dei » est infundens et creans bonitatem in rebus (1). »

2° Hunc Dei amorem ad res finitas a libera, ut innuimus, electione procedere, qua de re accuratius est agendum.

ARTICULUS II.

De voluntatis divinæ libertate.

228. Voluntatis intellectivæ attributum est, in actibus maxime elicitis, physica libertas. Quæ libertas duplex est; videlicet a *coactione*, et a *necessitate*. Libertas vero a necessitate, alia est, quam dicunt *contradictionis*, alia *specificationis*, alia *contrarietatis*. Vide quæ diximus in psychologia (P. 513, seq).

229. Dei voluntatem ab omni coactione liberam esse, demonstrari non debet, cum sit omnino manifestum: hoc loco sermo nobis est solum de libertate indifferentiæ. Qua in re est in primis attendendum, quomodo et quibus in rebus, hæc libertas Deo tribuatur. Igitur

1° Deus non libere, sed necessario seipsum amat tanquam finem. Libere vult ea solum, quæ propter seipsum vult, nempe res finitas (223).

2° Divina voluntas circa res finitas libertate gaudet *contradictionis*, et *specificationis*, non vero libertate *contrarietatis*, quatenus hæc indifferentiam dicit ad bonum ac malum morale eligendum. Nulla enim inordinatio in divina voluntate esse potest.

3° Nulla est in divina libertate implicita deliberatio, quatenus hæc judicii suspensionem, et voluntatis cunctationem importat. Hæc enim deliberatio ex defectu cognitionis consequitur.

4° Cum in Deo nulla sit ignorantia, nulla mutatio, ab ele-

(1) Cf. S. Thomæ Summ. th. p. 1, q. XX, art. II.

ctione semel facta recedere nunquam potest (162, ad 2^m). Quare semel tantum suam Deus libertatem exercuit, et hoc unico actu omnia constituit, quæ in serie temporum voluit, fecit, permisit.

5^o Libertatis essentia in eo est, quod voluntas ad objectum in quod tendit, sit indifferens. Porro in creaturis voluntas est potentia, quæ ad objecta diversa per actus tendit diversos. Ex quo sequitur, creaturæ libertatem indifferetiam quamdam esse potentiæ ad actum. Divina vero voluntas non est potentia, sed actus: ejus igitur libertas, non in indifferetia potentiæ ad actum sita est, sed in indifferetia actus ad objectum.

230. PROPOSITIO. *Divina voluntas circa bona finita indifferetia libertate gaudet.*

Enim 1^o libertatis conceptus per se defectum nullum includit; esto quod in ente finito quibusdam sit admixta defectibus, qui a subjecti limitatione oriuntur. Per se igitur est perfectio simplex. Ergo in Ente perfectissimo formaliter sit oportet (88, 1^o).

2^o Voluntas omnis finem solummodo ultimum necessario appetit, quemadmodum voluntas nostra beatitatem; de cæteris bonis ea solum necessario appetit, quæ videt ad finem esse necessaria; ea vero sine quibus finis obtineri potest, quamquam appetere possit, non tamen necessario appetit.

Janivero nullum finitum bonum ejusmodi est, ut sine illo esse nequeat divina bonitas, propter quam Deus vult quæcunque vult; nihil enim est ipsi necessarium, sive ut sit, sive ad ejus perfectionem, sive ad perfectam ejus felicitatem. Est enim divina bonitas per se infinita, et in omnibus sibi sufficiens.

Ergo divina voluntas nullum bonum finitum necessario appetit. Ergo si quod eorum vult, hoc libere vult.

3^o Ex hoc aliud argumentum. Si Deus circa hæc bona liber non esset, supponere deberemus vel errorem naturalem in ejus intellectu, ex quo judicaret aliquid bonum non sibi necessarium, ut necessarium, vel inordinationem naturalem in ejus voluntate, ex qua bonum non necessarium

amore necessario prosequeretur. Sed utrumque in ente perfectissimo plane absurdum est. Ergo.

4^o Demum, si divina voluntas libertate caret, ad unum determinata sit oportet. Igitur vel est determinata ad volenda omnia possible, vel ad volendum nihil, vel ad aliquid tantum.

Sed 1^a hypothesis repugnat; primo quia omnia possible existere non possunt (O. 69, 3^o); deinde vero quia, si quando existerent omnia possible, infinita potentia esset exhausta.

2^a est contra factum, et supremæ potentiæ conceptum destruit.

3^a pariter admitti nequit. Etenim quænam foret ratio, ejus voluntatem determinans ad hæc et non alia volenda? Non se ipsa libere determinat: non dimanat hæc necessaria determinatio a voluntatis natura, quæ ad omnia ferri potest, quæcunque boni rationem habent; non a potentia ejus, quæ infinita est. Ergo ratio ista determinans esse solum posset aliquid Deo extrinsecum, a quo Ens necessarium et absolutum dependeret; quod manifeste absurdum est.

ARTICULUS III.

Difficultates.

231. Gravissima hoc loco occurrit difficultas, quæ a Dei necessitate et immutabilitate desumitur.

Nam 1^o actus liber is est, qui potuit esse et non esse: est ergo contingens. Sed omnia quæ in Deo sunt, necessaria sunt; nihil in ipso contingens esse potest. Ergo actus liber in Deo esse non potest.

2^o Libertas in hoc est, quod voluntas indifferenter se habeat ad utrumlibet. Sed quod indifferenter se habet ad utrumlibet, in potentia est quoad utrumque. Ergo si Deus libertatem habet, in potentia est; adeoque mutabilis est; quia quum actu vult, de potentia in actum transit.

3^o Deus eodem actu vult se et alia; nam in ipso non sunt

plures actus. Sed actus quo se vult, necessarius est. Ergo et actus quo alia vult, necessarius dicendus est.

4^o Neque dici potest, actus liberos quibus Deus aliquid extra se esse vult, esse denominationes solum extrinsecas, uti sunt rerum productio et cæteræ ejus ad creaturas relationes. Nam, ut supra diximus, amor quo vult res esse, in eo est proprie (226); est ergo in eo amor actus vitalis; ac præterea rerum productio et cætera huic similia sunt aliquid Deo extrinsecum, quatenus sunt effectus ab ipso procedentes: causa autem effectuum istorum est ipsum *velle*. Hoc igitur velle intrinsecum Deo sit oportet.

232. Hic nodus solvitur, seu potius præciditur, in primis ignorantiam nostram fatendo. Non possumus hæc inter se facile componere, quia cujusmodi sit in se Dei libertas et immutabilitas, non possumus assequi, sed solummodo per analogias et ratiocinationes quasdam divini namus quid illas esse oporteat. Solvi tamen potest per distinctionem alibi traditam (156) inter divini actus entitatem, et multiplicem respectum quem ad diversos terminos habere potest.

233. Actus divinus, videlicet divinæ libertatis exercitium ac nutus eligentis voluntatis, in sua quidem entitate necessarius omnino est, ac sine ulla potentialitate, ut qui cum essentia divina est plane identicus; secundum respectum vero quem dicit ad res finitas, indifferens est ad respectum quemcunque; ita ut idem in se sit, sive uno modo sive altero ad ipsas tendat ac terminetur. Quare libertatis exercitium et directio, ut ita dicam, atque inflexio divinæ voluntatis ad alteram oppositarum terminationum, potius quam ad alteram, nullam divinæ essentiae intrinsecam diversitatem aut contingentem actualitatem affert; idemque est divinus actus si ad volendum ex. gr. mundum determinetur ac esset si ad non volendum determinaretur. Nimirum, ut Deus mundum velit, nihil aliud requiritur Deo intrinsecum, nisi ut Deus sit id quod est: ut mundum non velit, nihil aliud pariter requiritur, nisi ut Deus sit id quod est. Diversa in utroque casu terminatio diversam tantummodo rationis relationem gignit.

234. Ut simili aliquo utar, stella fixa, prouti astronomi docent, uno eodemque radio indifferenter attingere tellurem potest, in quocunque suæ orbitæ puncto tellus inveniatur; quia nempe immensa stellæ distantia a telluris orbita facit, ut radii directio ab una vel altera terminatione sit independens; atque in se eadem manens, tam unam, quam alteram habere possit. Simili modo divinæ voluntatis electio et internus nutus independens est a quacunque habitudine ac tendentia ad creaturas; sed propter suam eminentiam, cujuscunque habitudinis hujusmodi capax est, et sub quacunque hujusmodi habitudine est idem.

Ita etiam qui una eademque voce, pluribus quæstionibus, sive affirmando sive negando, respondere posset, quemadmodum in b. Francisco Xaverio factum fuisse memoriæ proditum est, hic profecto quum uni quæstioni responderet affirmando, eum poneret actum, quo alteri quoque quæstioni negando respondere posset, si ea proponeretur. Pari ratione, quum Deus creare vult, ita est in actu, ac esset si creare non vellet.

235. Ex his colliges, quid sit ad objecta (331) respondendum.

Ad 1^m *Dist.* 1^m *ant.*: Actus liber is est, qui potuit esse et non esse; in ea videlicet voluntate quæ potentia est, *conc.*; in ea voluntate, quæ est actus, *subd.*: is est qui potuit esse et non esse, quoad suam terminationem, *conc.*; quoad suam entitatem, *nego.*

Contradist. 1^m *cons.*: Hic ergo actus est contingens, quoad suam terminationem, *conc.*; quoad suam entitatem, *subd.*: si sit actus a potentia distinctus, *conc.*; secus, *nego.*

Dist. quoque *ant.* 2^m: Omnia, quæ sunt in Deo, necessaria sunt entitate, *conc.*; terminatione, *nego.* Et *nego ultimum cons.*

Ad 2^m *Dist.* *maj.*: Libertas in hoc est, quod voluntas indifferenter se habeat ad utrumlibet; nempe vel quoad positionem actus, vel quoad actus terminationem, *conc.*; solummodo circa actus positionem, *nego.*

Contradist. min.: Quod indifferenter se habet ad utrumli-

bet, in potentia est quoad utrumque, si indifferenter se habeat quoad positionem actus, *conc.*; si tantum circa actus terminationem, *nego*. Et *nego* cætera.

Ad 3^m *Dist. maj.*: Deus eodem actu vult se et alia, terminatione tamen multiplici et diversa, *conc.*; secus, *nego*; *conc. min.* et *dist. cons.*: entitate, *conc.*; terminatione, *nego*.

Ad 4^m *Conc. totum*. Libertas enim divina non in mera extrinseca relatione sita est, sed in indifferentia intrinseca et essentiali divini actus ad quascunque terminationes, quum de objectis finitis agitur.

CAPUT V.

DE ATTRIBUTIS MORALIBUS.

ARTICULUS I.

Quænam sint attributa moralia.

236. Virtutes morales quæ appetitivam partem in nobis perficiunt, remotis imperfectionibus omnibus, in Deo reperiantur necesse est. Hasce perfectiones attributa moralia vocamus.

De quibus advertendum 1^o eas non esse in Deo ad modum habitus, ut virtutes nostræ sunt. Habitus enim accidens quoddam est, quod potentiam aliquam perficit. In Deo autem nec accidens ullum esse potest, nec ulla potentia. Sunt igitur in Deo virtutes morales ipsa divina essentia.

2^o Hinc sequitur virtutes easdem, non contingenter aut morali solum necessitate a Deo possideri, sed necessitate prorsus absoluta, ita ut oppositum metaphysice repugnet.

237. Sedulo notandum, quænam virtutes morales Deo formaliter tribuendæ sint. Quæ enim sunt circa affectivas passionem, in sensitiva parte sedem habent, eamque perficiunt, ac subdunt rationis regulæ; uti sunt *fortitudo*, *mansuetudo*, aliæque his similes. Atque hæc quidem virtutes proprie ac

formaliter in Deo esse nequeunt, in quo nec passionem sunt, nec appetitus sensitivus. Imo quædam ex his neque metaphorice attribui divinæ naturæ possunt; quia nullum ad hoc reperire licet in ipsa aut in ejus affectibus, fundamentum (225). Hujusmodi sunt eæ virtutes, quæ corporeorum bonorum appetitus moderantur; videlicet *temperantia*, virtutesque quæ illi subduntur. Itaque illæ solum virtutes de Deo per metaphoram dicuntur, quæ versantur circa appetitiones spiritualium bonorum, ut sunt honor, vindicta, aliæque hujusmodi; et hoc pacto Deus dicitur v. gr. *fortis*, *magnanimus*, *mansuetus*; nempe propter effectuum similitudinem (225).

238. Quæ vero virtutes in voluntate sunt, sicut in subjecto, et non circa passionem, sed circa actionem versantur, hæc sunt in Deo formaliter, remotis tamen imperfectionibus, quas in homine habent ex conditione subjecti. Hujusmodi sunt, quæ attributa moralia vocantur.

Notanda tamen duo: 1^o excipiendas esse virtutes illas, quæ pertinent ad eos qui alicui subjiuntur, ut est v. gr. *obedientia*; 2^o earum quoque virtutum quæ divinæ perfectioni non repugnant, quosdam esse actus, qui ob suam imperfectionem Deo non cōveniunt. Tales sunt v. gr. actus *commutativæ justitiæ*.

239. Præcipua moralia attributa sunt *sanctitas*, *benignitas*, quæ et *bonitas* dicitur, et *justitia*.

Sanctitas est perfectissima ac necessaria divinæ voluntatis rectitudo, quæ sita est in consensione cum lege æternæ ordinis.

Benignitas est naturalis propensio ad communicandum se inferioribus, pro cujusque captu.

Ad hanc revocantur *patientia*, quæ vindictam injuriarum cohibet; *clementia*, quæ sententiis et culpæ et poenæ malum condonat; *miseriordia*, quæ alienam depellit miseriam.

Ex sanctitate ac benignitate propemodum fluit justitia, videlicet constans voluntas tribuendi unicuique quæ illi debentur pro meritis, juxta divinam ordinationem ac promissionem.

Nos de benignitate solummodo aliquid subiciemus.

ARTICULUS II.

De bonitate Dei.

240. Deus tripliciter dicitur bonus: 1° ratione perfectionis, quam ejus natura possidet: nam quod perfectum est, bonum est; 2° ratione sanctitatis, quo potissimum modo entia intelligentia vocare solemus bona; 3° ratione voluntatis ad suam bonitatem communicandam propensissimæ; quam voluntatem bonitatem relativam dicimus, seu etiam benignitatem, ut modo dictum est. De prima atque altera bonitatis ratione non est cur plura hoc loco dicamus: de tertia supersunt dicenda quædam.

241. PROPOSITIO I. *Summa est divinæ voluntatis propensio ad bonum quod habet, aliis communicandum.*

Etenim bonitas rationem finis habet (O. 124, 132). Finis autem est id, quod voluntatem ad agendum movet. Omnis porro actio esse aliquod producit, et agentis bonitatem communicat (O. 265). Ergo bonitas natura sua movet ad boni communicationem. Jam tanto magis ad agendum finis movere potest, quanto magis ipse finis amatur. Sed Deus bonitatem suam infinite amat. Ergo infinitam habet propensionem ad agendum hujus finis amore, i. e. ad suam bonitatem communicandam.

242. Internæ hujus propensionis indicium est et effectus externa ejus *beneficentia*, seu actualis divinæ bonitatis communicatio. Quis porro non miretur, quis non obstupescat, si paulum consideret, quantum se et quam miris modis bonitas hæc in rerum universitate manifestet, dum perfectionem, pulchritudinem, utilitates, voluptates, felicitatem et hominis et sensibilibus omnium creaturarum, tanto consilio intendit, tanta sedulitate procurat, tanta magnificentia ac liberalitate promovet!

245. Hæc tamen diligenter notanda sunt:

1° Propensio hæc divinæ voluntatis, de qua loquimur, non ita intelligi debet, ut Deus necessario feratur ad suam actu

communicandam bonitatem, sed quatenus in sua ipsa perfectione finem habet tantæ dignitatis et excellentiæ, quo adduci possit ad semper ac sine fine majorem beneficentiam exercendam, si velit. Etenim, ut supra demonstratum est (230, 2°), Dei voluntas, non necessario, sed libere benefica est. Quia licet necessario amet finem propter quem alia vult, ea tamen quæ propter hunc finem vult, non sunt illi necessaria; cum sine his omnibus divina bonitas sit in se perfectissima.

2° Quanquam bonitas relativa Dei infinita sit, et finis propter quem ad hanc bonitatem exercendam libere descendit, ab ipso infinite ametur, beneficentia tamen externa quam propter hunc finem exercet, infinita esse nunquam potest. Repugnat enim, totam Dei bonitatem extra Deum communicari, tum quia divina natura non est multiplicabilis, tum quia effectus infinitæ perfectionis contradictionem includit (139). Igitur divinæ bonitatis communicatio necessario finita sit oportet.

ARTICULUS III.

Quomodo divina voluntas se circa malum habeat.

244. Quæstio illa semper philosophorum æque ac vulgi pulsavit animos: quomodo divina bonitas cum malis quæ in mundo conspiciuntur et experimur, componi possit. Hanc quæstionem, quoniam hoc loco ejus propria sedes est, quantum dabitur, expedire aggredimur.

Principio animadvertendum est, Deum, respectu bonorum et malorum hujusmodi, dupliciter esse considerandum: 1° ut est *prima causa physica*, quæ omnia quæ sunt creat atque conservat, ad eorumque actiones concurrat; 2° ut *causa agens per intellectum*, et in his quæ facit, media intendens ad finem.

Quæstio præsens non primo modo Deum spectat, sed altero. Si primo modo spectetur, certum est ex dictis (O. 143, 144), mali physici causam esse Deum solummodo per accidens: mali vero morales nullo modo esse causam, prouti latius in

proximo libro explicabitur. Nunc igitur hoc nobis inquirendum proponitur, utrum et quomodo Dei summe boni voluntas, intellectus ductum sequens, mala velle possit. Cumque malum latissime acceptum in *metaphysicum, physicum, et morale* dividatur (O. 137), de singulis distincte agendum.

245. PROPOSITIO II. *Deus velle potest malum metaphysicum; imo debet illud velle, si quid vult extra se.*

Nam limitatio qua malum hujusmodi improprie dictum constituitur, necessario inest et essentialis est iis omnibus, quæ Deus velle extra se potest. Non potest enim extra se velle, nisi res finitas (243, 2^o). Ergo si quid Deus extra se vult, hoc ipso malum metaphysicum velit necesse est.

Igitur si divinæ bonitati repugnaret, malum velle metaphysicum, repugnaret jam Deum extra se aliquid velle; repugnaret nimirum bonitati summæ id quod illi maxime conveniens est, esse beneficam.

246. PROPOSITIO III. *Deus non potest physicum malum per se intendere.*

Si enim physicum malum ita intenderet, in malo creaturæ quiesceret ac delectaretur, ipsamque creaturam odio haberet; ea enim odio habemus, quibus malum volumus et in quorum malo delectamur. Sed fieri plane nequit, ut Deus rem ullam odio habeat. Omnis enim causa suos effectus naturaliter diligit, ut aliquid sui; multo magis prima causa. Ac præterea omnia quæ sunt, ideo sunt, quia Deus vult illorum esse; ac volendo illud creat in sui similitudinem. Esse autem et similitudinem divinæ bonitatis participare, uniuscujusque rei bonum est. Ergo omnibus quæ sunt, Deus vult bonum; omnia proinde amat (227), ac nihil odit.

247. Nihilominus dicere solemus, quædam a Deo odio haberi; quod quidem non proprie, sed per similitudinem quamdam intelligendum est. « Dicitur Deus, ita s. Thomas, aliqua » odire similitudinarie, et hoc dupliciter. Uno quidem modo » ex hoc, quod Deus amando res, volens eorum bonum esse, » vult contrarium bono (scilicet malum) non esse: unde malorum odium habere dicitur; nam quæ non esse volumus, » dicimur odio habere. Hæc autem non sunt effectus, ut res

» subsistentes, quorum proprium est odium vel amor. Alius » autem modus est ex hoc, quod Deus vult aliquod majus » bonum, quod esse non potest sine privatione minoris boni; et sic dicitur odire, cum magis hoc sit amare: sic enim » in quantum vult bonum justitiæ vel ordinis universi (quod » esse non potest sine punitione vel corruptione aliquorum), » dicetur illa odire, quorum punitionem vult vel corruptionem (1). »

248. PROPOSITIO IV. *Deus malum physicum intendere potest, tanquam medium, ratione alicujus boni.*

Nam quum malum aliquod hoc pacto vult, revera bonum vult, quod per malum obtinetur. Divinæ autem bonitati nullatenus repugnat, bona velle physicis malis mediantibus.

In primis enim si hoc divinæ repugnaret bonitati, maxima quædam bona Deus velle nunquam posset. Ut enim omittam bona illa plurima, quæ ex rerum inanimarum destructione proveniunt, interdictum prorsus Deo esset quædam velle bona, quæ rationali creaturæ præ primis conveniunt, eamque maxime exornant: ut sunt v. gr. nobilissimæ illæ fortitudinis partes, patientia maximorum malorum, et impavida aggressio, constantia insuper ac perseverantia in difficilibus exsequendis, virilis in periculis animi securitas, fiducia in Deum, abstinentia quatenus necessariis libenter caret, justitia vindicativa, et quæ non homines modo, sed et Deum adeo commendat, misericordia. Brevi heroica omnis virtus impossibilis evaderet, quæ in arduis tantummodo enascitur, ac physicis alitur et fovetur malis: imo industriæ pleræque atque artes gigni nunquam potuissent; hæc enim, ut sapienter poetæ dixerunt, non aliis oriuntur parentibus, quam paupertate ac necessitate. Quis autem dixerit, divinæ bonitati repugnare, ut hæc bona aliquando velit?

249. Sed certe multa alia bona, quæ per physica quædam mala obtinentur, v. g. mundi ordinem et humanæ societatis stabilitatem, Deus et velle et obtinere posset sine ullius mali admixtione. Sed ex hoc non licet inferre, Deum ratione suæ

(1) *Contra Gent.* Lib. 1, c. XCVI.

bonitatis ad hoc teneri. Nam vel melius est, bona illa obtineri per physica mala, vel melius est obtineri sine illis. Quæstionem hanc non dirimam; nec ea fortasse dirimi facile posset: at sufficit nunc illam proposuisse. Nam si primum melius est, quis dicat, Deum ratione suæ bonitatis, id quod est melius velle non posse? Si vero alterum est melius æstimandum, neque hoc dici potest, Deum ratione bonitatis, ad id quod est melius teneri.

Primo quidem, quia per hoc libertas ei nulla esset.

Secundo vero, quia consequeretur, Deum nihil velle posse. Qui enim tenetur ad melius, quia melius est, is semper ad melius tenetur; ac propterea consistere non potest, nisi in optimo; nihilque aliud velle potest, nisi quod prorsus sit optimum. At in rebus finitis optimum impossibile est; nulla enim est res finita, qua aliqua alia melior excogitari nequeat.

Patet ergo, Deum ratione suæ bonitatis non teneri ad hoc, ut bonum velit sine ullo physico malo. Potest igitur malum physicum, ut medium ad finem bonum, intendere.

250. PROPOSITIO V. *Nequit Deus malum morale intendere, nec ut finem nec ut medium; potest tamen illud permittere.*

Prænotandum est, voluntarium dici *intentivum*, quum voluntas aliquid appetit, vel ut finem vel ut medium ad finem. Dicitur vero *permisivum*, quum voluntas aliquid non impedit, quod impedire quidem posset, impedire tamen non teneatur. Ad hoc igitur ut aliquid vere permitti dicatur, ac tantummodo permitti, tria hæc requiruntur:

1^o ut permittenti displiceat, aut saltem ut sit illi indifferens, non vero intentum ullo modo;

2^o ut ex iis quæ quis intendit, non sequatur necessario; aut saltem ut non cognoscatur secuturum;

3^o si ex iis quæ quis intendit, hoc sequitur per accidens, et ita secuturum cognoscitur, ut non teneatur aliunde id ipsum impedire.

251. Probatur 1^a propositionis pars.

Si Deus vel ut finem vel ut medium, morale malum intenderet, approbaret illud atque esset saltem mediate vera ejus

causa. Hæc autem duo cum essentiali Dei rectitudine et sanctitate absolute pugnant. Ergo.

Probatur 2^a pars.

Qui morale malum tantummodo permittit, hoc quidem non impedit, sed nullo modo approbat aut intendit, imo reprobat ac damnat, nullatenus insuper ipsum impedire teneatur. Jam si Deus hoc pacto atque his conditionibus, morale malum non impediat, nihil est in hoc absonum, nihil Deo indignum. Potest igitur Deus malum morale permittere.

252. Imo decet. Decet enim supremum rerum gubernatorem, ut humanas quidem voluntates ad bonum faciendum malumque vitandum instruat, excitet, suisque juvet auxiliis; postea vero eas, quemadmodum res cæteras, suis agi motibus sinat, etiamsi ad malum quandoque deflectant. Et hoc 1^o ut sit omnibus manifestum, auxilia quidem collata sufficientia fuisse, bona vero opera non esse coacta; 2^o ut homo sit sui sollicitus, intentusque semper ne sibi desit, neve media a Deo collata negligat: quod si Deus nullum unquam permetteret peccatum, homo jam, omnibus illi commissis, sollicitudinem omnem deponeret, ac præmium virtuti promissum, quasi sibi debitum, tranquille expectaret.

ARTICULUS IV.

Quomodo mala, quæ in mundo sunt, cum divina bonitate componantur.

253. PROPOSITIO VI. *Mala quæ in mundo sunt, cum divina bonitate non pugnant.*

I. *Non pugnat malum metaphysicum.* Liqueat ex dictis (245).

II. *Non mala physica.* Nam, ut malorum hujusmodi existentiam explices, necesse profecto non est ut supponas, ab auctore rerum atque gubernatore mala hæc per se ut finem intendi; sufficit enim si dicas, ea intendi tanquam media ad fines bonos assequendos, et ad mundi ordinem conservandum; id quod divinæ bonitati non opponitur (248).

Quod autem ita plane sentiendum sit, in primis a priori manifestum est (246). Tum etiam ex eo, quod physica mala

a causis proveniunt bonis, bonosque producentibus effectus, et ad universi ordinem conspirantibus. Postremo mala omnia physica maxima bona revera afferunt, sive in physico ordine sive in morali; quod et inductione probari non difficulter potest, uti jam indicavimus (248), et ubi agemus de divina providentia demonstrabitur.

254. III. *Non malum morale.*

Nam, quanquam Deus non possit illud intendere, sive ut medium, sive ut finem, potest tamen permittere (250, 251). Atqui mala hæc Deus simpliciter permittit.

Etenim 1° ea nullo modo intendit, imo positive detestatur ac damnat; suamque hanc reprobationem manifestat multipliciter:

a) lege naturali, quam hominum cordibus inscripsit; quæ malum absolute vetat, virtutem imperat; quæ virtutem nobis amabilem et honorabilem facit, vitium exosum ac turpe;

b) conscientiae uniuscujusque stimulis ac morsibus amarisimis, qui peccatum consequuntur; pace et gaudio animi, quæ honestas actiones comitantur;

c) præmiis et pœnis, quibus tum in hac vita, tum in futura lege naturalem communivit;

d) singularibus justitiæ suæ ac manifestis indiciis, quum et scelestos homines et populos prævaricantes non raro horribiliter simul ac mirabiliter in exemplum plectit.

255. 2° Malum non sequitur necessario ex iis, quæ Dei voluntas intendit. Intendit enim hoc unum, ut ens intelligens ac liberum conderet, et ad perfectam felicitatem destinatum, quam tamen bene agendo et honestatis legem sancte servando, sibi promereri deberet, mediis utens a Deo sufficientissime acceptis. Ex his autem omnibus peccatum necessario non sequitur. Quod si necessario consequeretur, jam peccatum non esset.

256. 3° Deus non tenetur aliunde mala hæc impedire.

a) *Non ex justitia.* Nam creaturæ nihil debet, nisi quod ipse promiserit; et hoc sibi debet, non illi.

b) *Non ex sanctitate.* Nam peccatum quod permittit, prorsus ab ipso reprobatur.

c) *Non ex omnipotentia.* Etenim non tenetur Deus facere quæcunque potest.

d) *Non ex benignitate.* Secus ex benignitate sua ad hoc teneretur Deus, ut vel nullum ens intelligens ac liberum crearet, vel hoc ita conderet ac regeret, ut, quanquam posset nunquam tamen a rectitudine deflecteret. Sed primum divinæ bonitatis communicationem maximam impossibilem faceret; alterum supponit, Deum ex bonitate sua teneri ad melius, adeoque ad optimum; id quod absurdum est (249). Ergo.

e) *Non ex sapientia.* Sapientia enim postulat, ut nihil Deus velit, aut permittat, quod ad finem operibus suis præstitutum ordinari non possit. Atqui mala moralia ad finem quem Deus intendit, ordinari possunt, et reipsa ordinantur. Hic enim finis est extrinseca ejus gloria. Jam vero Deus malum morale permittens, patientiam suam et longanimitatem mirabiliter prodit; præclaros virtutum fructus ab hominibus elicit; et unum aut alterum infallibiliter assequitur, ut vel in parcendo patris misericordiam atque clementiam, vel in puniendo supremi judicis justitiam manifestet.

Patet ergo, mala moralia a Deo solummodo permitti, eaque permitti sapienter.

257. Ex his omnibus colliges, quid respondendum sit quærenti: cur Deus mala, præsertim moralia, permittat, cum illa impedire posset. Responsio hæc est: mala hæc omnia cum divina bonitate aut cum cæteris ejus attributis non pugnant. Est igitur liber Deus ad hoc, ut malis physicis tanquam mediis utatur; utque mala moralia permittat, aut secus. Propterea si illis utitur, aut hæc permittit, hoc sane facit in eum finem, qui infinita sapientia ac bonitate dignus sit, et cum creationis fine congruat.

258. Quoad mala tamen moralia notandum sedulo:

1° Aliud esse finem, propter quem Deus vult mala hujusmodi permittere, aliud bonum quod ex malo permissio elicitur (256, e). Bonum hoc nequit esse finis permissionis, quasi vero ex hujus boni desiderio Deus peccatum non impediatur: hoc enim pacto peccatum esset a Deo intentum ut medium: est igitur solum conditio *sine qua non* permissionis.

peccati, ut sapienter Lessius animadvertit (1), quæ permissionem ipsam possibilem facit.

2º Hæc proinde bona, quæ Deus mirabiliter facit de malis, non vult ipse *voluntate antecedente*, quæque unice a Deo dependeat, sed solum *voluntate consequente*, quæ ex nobis occasionem accipit.

3º Quænam vero sit causa finalis permissionis peccati, id enimvero non est a nobis temere investigandum, præsertim in particularibus. Huc enim vere facit illud: *Quis cognovit sensum Domini, aut quis consiliarius ejus fuit* (2)? Est certe aliquis permissionis finis, quia Deus sapiens est; et est finis iste bonus, quia Deus bonus est. Hoc sufficit. Cæterum et nos fines hujusmodi aliquos generatim assignare possumus, ut vidimus in præcedente articulo (252).

ARTICULUS V.

Difficultates.

259. Opp. I. 1º Nulla potest assignari ratio, cur Deus essentialiter bonus, tam multa mala esse sinat.

2º Sunt imo multa mala, quæ ad nullum bonum finem dirigi possunt; v. gr. dolores brutorum et infantium.

3º Sed etiamsi possent omnia ad bonum finem ordinari, certa tamen sententia est: non esse facienda mala, ut eveniant bona.

260. Resp. ad 1^m *Transeat*. Quid inde concludas? An rationem hujusmodi nullam esse posse? Nobis scire sat est, malorum omnium, sive physica illa sint sive moralia, existentiam cum divina bonitate non repugnare (257; 258, 3º).

Ad 2^m *Nego*. Nam certe diriguntur ad bonum finem univarsi: quod a priori certum est (253; 256, e). Nominatim vero animantium dolores ad bonum individuale physicum ordinantur: dolor enim monet animantem, et de organorum læsione, et de naturæ necessitatibus, vehementerque stimulat

(1) *De perfectionibus moribusque divinis*. Lib. XI, c. VI.

(2) Rom. XI, 34.

ad remedia adhibenda, ad cibum, potum, quietem quærendam, ad cavendos excessus, et ad opem aliozem implorandam; tum etiam vigilem facit et cautum ad prævertenda pericula, eaque præcavenda quæ nocumentum afferre possent.

Ad 3^m *Conc.* assertum, si intelligatur de malo morali; nempe malum morale intendi nequit antecedenti voluntate, ut medium ad finem quemcunque; qui enim sic ageret, illud approbaret; id quod nunquam licet. Ast ex hoc non consequitur, non esse unquam facienda bona, ex quibus mala moralia per accidens contingunt: nec mala moralia non esse permittenda, quando quis ea permittere potest, malis permissis utendo ad bonum, voluntate consequente.

Si vero sermo sit de malo physico, *dist.* assertum: non sunt facienda hæc mala ut eveniant bona, si mala hæc pariant bonum verum entis, vel bonum nobilius, *nego*; secus *tr.* Quis negaverit, v. gr. posse membrum unum amputari, ut vita servetur; aut esse faciendam vitæ jacturam, ut æterna felicitas non amittatur; aut poena plectendos fontes, ut justitiæ ordo restituatur?

261 Opp. II. 1º Deus poterat quencunque finem, quem sibi proposuisset, assequi quin ullis ad hoc malis physicis uteretur. Ergo si bonus est, non debuit per tot ac tanta mala ad fines suos pervenire.

2º Certe si omne malum impediret, esset multo magis bonus. Si ergo non impedit, non est infinite bonus.

3º Non intelligitur, cur ens summe bonum suas creaturas æqualiter non amet; sed alias aliis imperfectiores constituat, quasi personarum acceptor.

262. Resp. ad 1^m *Tr. ant. et nego cons. et consequ.* Recole superius exposita (248, seq. 253).

Ad 2^m *Dist. ant.*: i. e. quoad externam manifestationem bonitatis suæ, quæ potest esse major vel minor, et certe finita esse debet, *tr.*; quoad intrinsecam bonitatem, *nego* (245, 2º; 249). *Eodem modo dist. cons.*

Ad 3^m *Nego*. Personarum acceptor ille est, qui uni præ altero tribuit, quod utrique æque debet. Nihil autem Deus

creaturis debet, quæ per se nihil sunt. Ex mera igitur liberalitate donat illis quæcunque donat; huic plus, alteri minus, pro libera et sapienti sua electione.

263 Opp. III. 1^o Deus voluit peccati incitamenta; quæ sunt animi humani cupiditates:

2^o voluit peccati causam; quæ est arbitrii libertas. Ergo voluit peccatum.

264 Resp. ad 1^m Dist. : cupiditates sunt incitamenta peccati, quæ semper ac necessario ad peccatum pertrahant, et nullo modo virtuti famulentur, *nego*; incitamenta, quæ nec semper nec necessario ad peccatum pertrahunt, quæque virtuti maxime famulantur, *conc.*

Humanæ cupiditates *physice* quidem bonæ sunt, ut quæ tendunt ad bona quæ generatim animanti conveniunt; *moraliter* vero sunt indifferentes in se, fiuntque solummodo bonæ vel malæ, quatenus ad objectum honestum aut vetitum a libera voluntate convertuntur. Quod vero rationem præveniant, et ad propria objecta inclinent, sive honesta illa sint sive vetita, hoc per se malum non est, sed si purus naturæ ordo spectetur, est solummodo *naturæ defectus*; ex quo id solum deduci potest, naturam humanam perfectissimam non esse. Incitamenta demum quibus illæ ad peccatum urgent, non necessario ad peccatum pertrahunt, et semper superari possunt cum Dei auxilio; ex divina autem ordinatione eo spectant, ut virilis virtutis exercendæ, ac nobilissimorum certaminum occasionem nobis præbeant.

Ad 2^m Dist. : Causa peccati est libertas; nempe voluntas abutens libertate, *conc.*; voluntas, ut pollens libertate, *nego*.

Libertas est utique *conditio sine qua non* (O. 262), tum ad pravas, tum ad honestas actiones; sed non est ex se aut istarum aut illarum causa; quippe quæ nec cum istis nec cum illis necessario connectitur. Voluntas ipsa est, quæ se boni ac mali moralis causam facit: boni quidem, quum dominio quod in suos actus habet, *recte* utitur, legique æternæ quæ ejus regula est, se conformat; mali vero, quum hoc dominio *abutitur*, et a lege æterna deficit.

Per se igitur libertas est moraliter indifferens; nec possi-

bilitas abusus malam illam facit: secus enim res omnes malæ essent, quia omnibus abuti homo potest. Physice autem bona est; quia perfectio magna est. Ergo Deus libertatem volendo bonum voluit, et hoc amore boni; permittendo nihilominus malum, quod per accidens ex ea consequitur.

265 Opp. IV. Qui effectum prævidet, et causam ponit, effectum velle censetur. Sed Deus hominis peccatum prævidit, et tamen existentiam homini donat. Ergo.

Sic pater qui filio ensem porrigeret, quo ipsum se interfectorum prævidisset, complex ejus necis censeretur.

266. Resp. Ad 1^m Dist. *maj.* : Si effectus ex causa necessario sequatur, *conc.*; si sequatur per accidens, *subd.* : si is qui effectum hunc prævidet, teneatur ipsum impedire, *conc.*; si non teneatur, *nego* (250); et juxta hæc *contradist. min.*

Nego autem *paritatem* in simili quod subjicitur. Etenim

1^o Pater naturali officio, quod divina lex illi imponit, quæcunque filii mala impedire potest, impedire tenetur. Deus autem non tenetur impedire mala omnia quæ potest, uti demonstravimus.

2^o Pater est provisor particularis; cura enim illi demandata est de filio, non de bono universali. Debet igitur avertere a filio mala omnia quæ potest. Deus autem provisor est universalis; adeoque potest mala quædam permittere, quia potest illa ad universale bonum ordinare.

3^o Deus mala permittendo, adhuc finem suum assequitur (252; 256, e) : non ita homo, cujus in hac vita finis est, ut officia sua quantum potest expleat.

267. Inst. I. Deus, cum sanctissimus sit, peccatum omnino impedire deberet. Nam :

1^o Sanctitas infinita odio infinito peccatum prosequatur necesse est.

2^o Nullum est bonum, quod peccati malum compensare queat.

268. Resp. *Nego ant.*

Ad 1^m Dist. : Odio interne infinito, *conc.*; externe infinito, *nego*. Nam ut cætera attributa divina, ita quoque Dei sanctitas infinite manifestari nequit.

Ad 2^m Dist. : Respectu creaturæ, *conc.* ; in consiliis divinæ sapientiæ, *nego* (252; 258, 5°).

269. Inst. II. 1° Saltem ex amore et bonitate sua, teneatur pater omnia facere quæ potest, ut filium a malo retrahat. Multo magis Deus ex sua bonitate ad idipsum teneri dicendus est.

2° Præsertim cum crudelitatis quoddam genus videatur, permittere malum, in cuius pœnam peccantem atrociter punire intendit.

270. Resp. ad 1^m Tr. ant. Revera enim pater, quanquam omnia filii mala quæ impedire potest, impedire teneatur; non tamen omnia quæ ad hæc mala impedienda facere potest, facere debet; sed solum ea, quæ rei natura, et adjuncta, et prudentiæ leges postulant, secundum id quod communiter contingit.

Sed hoc omisso, *nego paritatem*. Nam etsi bonitas entis finiti et dependentis ab eo exigeret, ut faceret omnia quæ potest; Dei tamen bonitas non potest idipsum exigere, hoc ipso quod infinita est, et nihil cuiquam debet.

Ad 2^m Dist. : Crudele est in hunc finem permitti mala, ut puniantur peccantes, *conc.*; permitti ad alios fines mala, quamvis puniendi sint peccantes, *nego* (258, 2°).

CAPUT VI.

DE POTENTIA DEI.

ARTICULUS I.

Quid sit in Deo potentia.

271. Potentiæ nomine non potest hoc loco intelligi, ut manifestum est, possibilitas (O. 179), aut potentia quæcunque passiva (O. 180); sed solummodo immediatum principium agendi in aliud. Quod sane in Deo non est ab actu distinctum, neque accidens essentiæ adjectum, sed ipsa Dei essentia; ut ex dictis constat.

* 272. Ad intelligendam clarius divinæ potentiæ rationem, animadvertendum est 1° in agente intellectuali finito, hæc tria principia ad operationem concurrere: intellectum, voluntatem, potentiam. Intellectus enim causa est ut *dirigens*, voluntas ut *imperans* (Ps. 517), potentia ut *exsequens* opus. Illa sunt mediata principia, hæc principium immediatum. Idcirco nos in Deo hæc tria distinguimus, quæ tamen in eo secundum rem unum sunt. Divina nempe essentia, et intellectus est, et voluntas, et vis omnium effectrix.

2° Actio divinæ potentiæ non est proprie transiens, sed immanens (O. 259).

Etenim actio Dei omnis ipsa est divina substantia. Nam « omnis substantia, ita s. Thomas, est propter suam operationem. Si igitur operatio Dei sit aliquid aliud, quam divina substantia, erit finis ejus aliquid aliud ab ipso; et sic Deus non erit sua bonitas, cum bonum cujuslibet sit » finis ejus (1). »

Igitur actio divina in ipso agente est et perfectio ejus; videlicet actio immanens.

3° Hinc recte dicimus, Deum intelligendo et volendo res extra se producere, atque omnia operari quæ operatur (2). Actiones enim immanentes hæ ipsæ sunt, cognitio atque appetitus.

4° Quoniam tamen per actionem divinam aliquid a Deo distinctum producitur, eadem divina actio transeunti æquivalet actioni, et secundum quamdam similitudinem, transiens vocari potest.

5° Ex his omnibus colliges, divinam potentiam, quanquam vere ac proprie sit principium effectuum qui per ipsam producuntur; non esse tamen actionis divinæ qua res producuntur, principium; cum divina actio sit ipsa divina substantia.

6° Intelliges item cur licet divina potentia tota sit in actu, non tamen faciat omnia quæ facere potest. Quia nempe divina potentia, licet tota sit actu, indifferens tamen est ad

(1) *Contra gent.* Lib. 1, c. XLV.

(2) Ipse dixit et facta sunt, ipse mandavit et creata sunt. Ps. CXLVIII.

terminos diversos, eodem plane modo ac de voluntate dictum est (233).

ARTICULUS II.

De potentiae divinae amplitudine.

273. PROPOSITIO I. *Divina potentia est omnino infinita.*

Probatur ex infinita Dei perfectione. Nam :

1° Si potentia divina finita esset, imperfecta esset, aliaque potentia ipsa major cogitari posset. Nihil autem potest in Deo esse imperfectum, nihil quo majus cogitari possit. Ergo.

2° Talis potentia est, qualis essentia. Potentia enim vel est ipsa essentia, quæ sit ex se immediatum operandi principium, vel naturalis proprietas ab essentia necessario dimanans : in Deo autem est ipsa essentia. Sed essentia Dei plane infinita est. Ergo et potentia.

274. PROPOSITIO II. *Deus est omnipotens.*

Omnipotentiae nomine intelligimus divinæ potentiae amplitudinem infinitam, respectu habito objecti; ita ut se extendat ad omnia quæ entis rationem habent, videlicet ad omnia quæ sunt intrinsece possibilia (O. 62).

Probatur 1° ex præcedenti propositione. Nam si potentia divina ad aliquid quod possibile est, se extendere non posset, ipsa jam divina potentia limitibus contineretur, essetque vel ex hoc solo imperfecta.

2° Omnis activa potentia fundatur in aliqua actuali perfectione quam habet agens, quamque agendo effectui communicat (O. 263). Ex quo sequitur, objectum proprium activæ cujuslibet potentiae esse id omne, quod ex participatione illius perfectionis potest esse simile agenti : quemadmodum v. gr. objectum proprium potentiae illuminandi aut calefaciendi est id omne, quod potest sive lucem sive calorem recipere.

Jam essentia divina, in qua Dei potentia fundatur, non hujus aut illius generis rerum tantummodo, sed possibilem

prorsus omnium perfectionem in se præcontinet, cum sit infinitum ac perfectissimum esse.

Ergo omnia prorsus possibilia sunt intra divinæ potentiae objectum.

275. Vidimus jam in ontologia (O. 76, 2°; 80), non posse Dei potentia fieri quæ intrinsece impossibilia sunt; quia hæc rationem entis non habent, ac sunt merum nihil: propterea divinæ omnipotentiae non derogari quidpiam, eo quod v. gr. Deus mentiri non possit, aut fatigari, aut efficere ut aliquid non sit dum est, vel ut non fuerit quod fuit, et similia absurda.

Est porro animadvertendum 1° quædam Deum nec velle nec facere posse *absolute*, quia absolute repugnant; quædam autem solum *ex suppositione*, supposita nempe ejus præscientia ac voluntate de opposito; repugnat enim, Deum aliqua facere quæ non præsciverit, aut voluntatem ejus mutari.

2° Id quod dici solet, alia posse a Deo fieri *potentia absoluta*, alia *potentia ordinaria*, ita esse intelligendum : quidquid potentiae secundum se tribuitur, attenta solum non repugnantia intrinseca objecti, ac præcisione facta a quocunque Dei decreto, hoc potentia absoluta fieri posse dicitur; id vero omne quod potentiae tribuitur, secundum quod certum voluntatis decretum exsequitur, fieri dicitur potentia ordinaria.

LIBER QUARTUS.

CAPUT I.

DE CREATIONE.

ARTICULUS I.

Deum esse rerum creatorem.

276. Nunc de externis Dei operibus singillatim: ac primo de creatione seu de *effectione rerum ex nihilo*. Creationem porro necessario admittendam esse, alibi probavimus (C. 259). Nunc videndum utrum creandi vis soli Deo conveniat, an secus.

277. PROPOSITIO I. *Solus Deus creandi virtutem possidet.*

In primis manifestum est, virtutem creandi ab Ente infinitæ perfectionis infinitæque virtutis abesse non posse. Imo rerum existentia explicari nequit, nisi saltem aliquid a Deo creatum ponamus. Etenim si ipse solus est Ens a se, sane cetera omnia contingentia sunt, atque ab alio existentiam acceperunt. Cumque in hoc non possit in infinitum procedi, necesse est ut aliquid a Deo immediate effectum esse existimemus. Hoc autem non ex præjacente materia effecit, quia est primum quod factum est; non e seipso eduxit, quia hoc repugnat: hoc ergo ex nihilo effecit. Si igitur aliquid est præter Deum, Deus creator est.

278. Quod autem ipse solus creandi virtute potiat, ita conficitur juxta s. Thomæ doctrinam, quo melius hac in re nemo disseruit.

1^o Quo magis materia operis est ad opus improporcionata, eo major requiritur virtus in agente, ut materiæ inhabilitati suppleat. Si ergo materia operis est ad opus infinite impro-

portionata, virtus infinita requiritur, ut improporcion illa vincatur.

Tunc autem materia operis est infinite improporcionata ad opus, quum nulla ad opus exsequendum materia præexistit. Ergo ut a nihilo aliquid fiat, infinita virtus requiritur.

Solus autem Deus virtutem infinitam habet. Ergo.

2^o Alio modo. Inter purum possibile, quod reipsa nihil est, et existentiam, infinita interjacet distantia: est enim distantia maxima quæ excogitari possit inter duos terminos, ex quorum altero ad alterum transitus fiat.

Jam omnis activa virtus, cum in eo posita sit, ut potentiam aliquam essendi ad actum reducat, eo se prodit majorem, quo remotior est ab actu potentia quam in actum reducit. Quum igitur distantia a potentia essendi ad actum essendi infinita est, virtus infinita, seu virtus ipsa divina requiritur, ut ejusmodi potentiam in actum reducat. Sed distantia inter puram possibilitatem, quæ est pura essendi potentia, et existentiam, infinita est. Ergo divina ipsa virtus requiritur ad hoc, ut quod pure possibile est, ad existentiam transferatur (1).

3^o Effectus cum suis causis proportionem habeant necesse est. Hinc particulares effectus particularibus causis, et qui magis universales sunt ac priores, universalibus ac prioribus causis adscribendi sunt. Ac propterea effectus maxime universalis et omnium primus, causæ maxime universali omniumque primæ tribuendus est.

Sed effectus maxime universalis omniumque primus, est esse simpliciter seu existentiae status. Nam et omnibus convenit quæ sunt, et ab omnibus aliis rerum propriis rationibus ac perfectionibus supponitur.

Ergo ens simpliciter, videlicet ens qua tale, ens secundum ipsam rationem entis, est effectus proprius primæ causæ et universalissimæ, quæ Deus est. Aliarum vero causarum particularium effectus proprius non est ens simpliciter, sed ens aliquod particulare.

(1) Cf. *Contra Gen.* I, Lib. I, c. XLIII, § 9 et *Sum. th.* I, p. q. XLV, art. V ad 2 et 3.
20.

Atqui esse simpliciter hoc ipsum est, quod per creationem causatur; seu aliis verbis, ratio entis est propria ratio objecti creationis. Inter creationem enim ac ceteros effectus modos hoc interest discriminis, quod per creationem primo et per se producitur ens, in quantum est ens; quia res quæ in statu solum erat ideali, et existentiae, bono nullatenus fruebatur, per creandi actum incipit eo frui: per alios vero effectus modos ex ente præsupposito fit tantum hoc ens aut illud; ac propterea non fit ens simpliciter.

Ergo creatio effectum suum causat sub ea ratione, quæ est propria ratio effectuum primæ et maxime universalis causæ, nempe Dei; est ergo actio Dei propria. Ejus enim est actio, cujus est effectus. Potentia autem ad eum solum pertinet, ad quem, ut propria, pertinet actio. Potentia itaque creandi ad Deum solummodo pertinet (1).

ARTICULUS II.

Error manicheorum refellitur.

279. Vetustissimum dualismi errorem, quem apud Persas præsertim viguisse compertum est, in æræ christianæ initiis gnostici, ac sequiori ævo manichei, novis absurditatibus cumularunt. Persarum enim philosophorum opinione, unum erat supremum æternumque principium, a quo duo secundaria atque inferiora principia creata fuere. Ormusd atque Ahrimanes, illud bonorum, hoc malorum omnium principium. Gnostici vero et manichei duo fuisse contendebant suprema rerum principia, utrumque æternum et independens, quorum alterum esset summum bonum, idemque lucis, spirituum ac bonorum universorum origo; alterum summum malum, principiumque tenebrarum, materiæ, malorum omnium. Sic malorum originem explicare se posse putabant.

De primitiva dualismi forma nihil in præsentī dicendum superest: sufficiunt enim quæ modo diximus de creatione

(1) *Sum. th.* I, p. q. XLV, et *Contra Gent.* Lib. II, c. XXI, § 3.

(277, seq.) et quæ paulo superius disputata sunt de divina voluntate (244, seq.). Contra manicheorum commenta aliquid addemus.

280. PROPOSITIO II. *Manicheorum hypothesis intrinsece absurda est, et ad finem ad quem assumitur, prorsus inutilis.*

Primo dixi, esse absurdam in se.

Nam 1^o supponit, esse res quasdam per se malas. Hæc autem suppositio ex crassa quadam rerum physicarum ignorantia procedit, et omnino inepta est. V. dicta in ontologia (O. 129, 140).

2^o Multo magis repugnat, esse principium aliquod summe malum. Nam cum malum sit boni seu realitatis privatio, summum malum foret summa realitatis privatio, nempe merum nihil. Quomodo autem merum nihil esse ens queat, et rerum principium? (O. 140, 141).

Et hæc sufficiant in re manifesta.

281. Secundo dixi, esse inutilem ad finem.

Est enim hæc hypothesis invecta ad malorum bonorumque commixtionem, quæ in mundo viget, explicandam. Atqui 1^o malorum origo optime explicatur, quin ad hæc opinio-num monstra confugiamus: mala enim quæ in mundo sunt, cum infiniti Numinis bonitate nullatenus pugnant, ut in superiore libro demonstratum est (235, seq.).

2^o Præterea, duo hæc principia sibi invicem inimica sunt, et ad bonum vel malum essentialiter determinantur. Peto jam, utrum viribus polleant æqualibus, an vero inæqualibus. Si inæqualibus, jam vis major minorem vim superaret; et vel eam impediret ne quidpiam efficere, vel quidquid ab eafieret, prorsus destrueret, ipsaque solum in mundo dominaretur. Hoc igitur admissio, vel solummodo bonum vel solummodo malum in mundo esset.

Si vero æqualibus viribus pollent, altera vis alteram perpetuo elideret; ac proinde nec bonum nec malum superesset ullum.

Ergo hypothesis manicheorum boni ac mali permixtionem nullatenus explicat; imo vero illam facit inexplicabilem.

282. Neque dicas cum Baylio, pessimæ causæ sero nimis

patrocinatore, evitari omnia hæc incommoda, si fingas bina principia fœdere inter se inito, aliquid sibi mutuo concessisse, ut finis pugnandi fieret.

Etenim hoc 1^o absurde supponitur in iis, quæ necessitate naturæ agunt.

2^o Hæc suppositio tollis utrique principio independentiam.

3^o Si principium bonum, quin desinat esse bonum, permittere potest principio malo; ut mala bonis immisceat, jam malorum permissio cum summa bonitate non pugnat. Quid ergo necesse fuit, ad maiorem existentiam explicandam, principium illud malum excogitari?

283. Quæ a manicheis opponi solebant, ad hæc fere capita revocantur :

1^o Summum bonum omne malum excludat necesse est. Ergo si principium rerum unum esset, illudque summe bonum, omne malum foret exclusum.

2^o Effectus oppositi ad oppositas causas referendi sunt. Sed bonum et malum sunt effectus oppositi. Ergo.

3^o Bonum et malum contraria esse dicuntur, ut patet in virtutibus et vitiis. Sed contrarium utrumque aliquid positivum est.

4^o Ubiunque invenitur magis et minus, ibi invenitur summum. Sed bona dicimus alia aliis meliora, et mala ex æquo alia aliis pejora. Ergo et summum bonum habetur, et summum malum.

284. Resp. ad 1^m *Dist. ant.* : a seipso, *conc.*; ab aliis, *nego.*

Ad 2^m *Dist.* : Effectus oppositi ad oppositas causas referendi sunt, nempe ad causas proximas et particulares, *omitto*; ad causas mediatas et universales, *nego*; *conc. min.* et eodem pacto *dist. cons.*

Profecto non semper effectus oppositi ad oppositas causas immediatas referendi sunt. Ut enim nihil dicam de disparate oppositis (L. 51), effectus inter quos privativa oppositio est, quandoque a diversis causis ortum habent, ut v. gr. opus perfectum a bono artifice, opus imperfectum ab artifice imperito; quandoque autem ab una eademque causa, modo agente, modo non agente dimanant, ut v. gr. aeris

illuminatio et tenebræ. Effectus quoque positive et contrarie oppositi modo ad oppositas causas referendi sunt, ut sensationes caloris et frigoris (O. 195, 1^o); modo eidem causæ adscribendi; nam ex. gr. idem calor quædam obdurat et quædam emollit; et tam bonus actus quam pravus ab eadem voluntate procedit.

Sed quidquid dicendum sit de proximis et particularibus causis, certe effectus omnes positivi, sive oppositi sive non, sivo bonum afferentes sive bono privantes, ad unicam supremamque causam referendi sunt, nempe ad Deum, a quo omnis perfectio et activitas omnis dimanat. Quod vero in effectu positivo deficiens est et malum, id per accidens est a causa bona (O. 145, seq.), quæ totum id quod habet, a Deo habet.

Ad 5^m *Dist. maj.* : Bonum et malum contraria esse dicuntur, attentis actibus vel viribus, in quibus est bonum vel malum, *conc.*; attenta ipsa ratione boni et mali, *nego.* Malum enim privative opponitur bono. V. dicta in ontologia de mali subjecto (O. 139). *Conc. min.* et eodem pacto *dist. cons.*

Ad 4^m *Dist. maj.* : Ubiunque invenitur magis et minus per incrementum perfectionis, ibi invenitur summum, *tr.*; ubiunque invenitur per remotionem et privationem, ibi invenitur summum, *nego.* Et *contradist. min.* : Summum non potest inveniri, nisi in bono, et quidem non intra idem genus, in quo habetur magis et minus bonum, sed extra omne finitorum genus. In malo autem summum inveniri nequit, ut dictum est (280).

ARTICULUS III.

De fine et perfectione mundi.

285. Deum qui sapientissimus est, in mundi creatione finem aliquem, illumque se omnino dignum intendisse, tamquam certissimum assumimus. Quinam autem hic fuerit, sequentibus assertionibus statuimus.

1^o Dici nequit divinam voluntatem ad agendum moveri fine, qui dicitur *finis operantis* (O. 296). Etenim, ut supra dictum est, divinæ voluntatis actus ipsa est essentia divina:

cum autem divina essentia non sit propter finem, neque divinæ voluntatis actus propter finem esse potest.

2^o Dici tamen debet, divinam bonitatem esse Deo rationem volendi quæcunque extra se vult. Id enim quod propter se ipsum amatur, ratio est unica, qua fieri possunt appetibilia ea quæ non amantur propter seipsa. Deus vero suam bonitatem propter seipsam amat. Ergo. Vide superius dicta de divinæ voluntatis objecto (223), et de divina bonitate (241).

3^o Hinc sequitur, ea omnia quæ fiunt a Deo, ordinari ab ipso ac dirigi, tanquam ad finem ultimum, ad divinam bonitatem. Itaque est in operibus Dei *finis operis* (O. 296).

4^o Ordinantur autem omnia ad divinam bonitatem, non ut aliquam perfectionem aut voluptatem illi conferant, quod est absurdum; sed ut divinas perfectiones manifestent. Posito enim bono Dei intrinseco, quod res contingentes et finitæ promovere non possunt, non alio modo res hujusmodi ad Deum ordinari queunt quam hoc, ut bonum ejus extrinsecum promoveant. Hoc vero bonum est ejus gloria externa, seu divinarum perfectionum manifestatio. Ergo.

5^o Hæc autem manifestatio absolute a Deo intenditur et efficaciter; ita ut fieri prorsus nequeat, mundum divinæ gloriæ non inservire, in eo gradu quem Deus præfinivit. *Absolute*, dixi, intenditur; quia hic est finis rerum ultimus: et *efficaciter*, ita nempe ut Deus velit removere aut superare impedimenta omnia; quia secus inordinate et insipienter ageret.

6^o Res autem diversæ, pro suæ naturæ diversitate, finem hunc ultimum diversimode assequuntur. Quæ res ratione carent divinam perfectionem manifestant, primo quidem quia divinæ essentiæ similitudinem aliquam pro suo modulo participant (O. 83); deinde vero quia Dei creatoris sapientiam, bonitatem, potentiam, pulchritudinem mirandum in modum produnt (53), et in eo quod sunt et in eo quod agunt: agendo enim ad mundi ordinem et rerum aliarum bonum, hominis præsertim, conspirant. Et res quidem hujusmodi necessario ad finem suum, determinato hoc modo

obtinentum, per se diriguntur; atque hoc pacto fines proprii singularum rerum proprii determinantur.

Homo autem et ipse ad Dei gloriam est absolute ordinatus, eamque promovet non solum eo modo qui rebus omnibus communis est, nempe manifestando, in sua excellentia et pulchritudine excellentiam pulchritudinemque Creatoris, sed alio insuper modo ac nobilissimo. Quoniam enim ipse libertate pollet arbitrii, duplex ipsi ad Dei gloriam promovendam aperta est via. Prima Dei intentio est, ut homo Deum glorificet libero obsequio atque amore in mortalis vitæ brevissimo cursu, ac dein perfectam in Dei cognitione et amore assequendo felicitatem. In quo ipsam Dei perfectissimam vitam ac beatitatem, quantum res creata potest, in se referet. Deus enim ideo perfectissime vivit ac beatus est, quia se cognoscit atque amat. Voluit autem Deus, serio quidem et veraciter, ut omnes homines tali pacto finem rerum omnium ultimum assequerentur: non vero absolute id intendit et efficaciter, sed *conditionate* et dependenter a singulorum arbitrio. Si enim homo aliter agat, divinæ nihilominus gloriæ serviet altero modo; quatenus nempe æterno supplicio addictus, divinam justitiam in seipso invitatus manifestabit. Et sic ad absolutum rerum omnium finem et ipse necessario concurret.

7^o Ex his sequitur, hominem esse secundarium *finem*, cui (O. 294) visibilis hæc rerum universitas inservit.

8^o Sequitur et illud: quamvis Dei gloria sit ultimus rerum ipiusque hominis finis, nihilominus, quoniam rebus his visibilibus non sui commodum aut voluptatem Deus quæsit, sed commodum ac voluptatem hominis, hominem ipsum a Deo amari amore qui dicitur benevolentia.

286. Manifestatio divinæ perfectionis gradus habere potest; nec ille gradus quem Deus ut mundi finem præstituit, potuit esse omnium possibilium maximus. Perfectiones enim infinitæ ab opere finito semper magis ac magis manifestari possunt; nunquam vero ita, ut magis manifestari nequeant. Est igitur mundi finis manifestatio divinarum perfectionum, non simpliciter, sed solum in determinata quadam mensura,

quam inter omnes possibles creator libere præfinivit. Et hunc finem, in hac determinata mensura, mundus adamussim assequatur necesse est. Dei enim voluntas, in eo quod absolute et efficaciter intendit, frustrari nullatenus potest.

287. Hinc 1^o mundus habet omnia, quæ ad hunc finem in hac determinata mensura assequendum, illi debentur. Est ergo in suo genere perfectus (O. 329).

2^o Quod si finis mundi generatim consideretur, mundus hic æstimari nequit omnium possibilium optimus. Quia licet finis sit optimus, modus tamen illum assequendi non est omnium optimus. Sic ruit speciosa illa, quam Leibnitzius invexit, *optimismi* doctrina.

CAPUT II.

DE INFLUXU DEI IN RES A SE CREATAS.

ARTICULUS I.

De conservatione.

288. Finitæ res non solummodo quoad primam sui originem a Deo dependent, sed perpetuo, tam in eo quod esse pergunt, quam in eo quod operantur. Sic duplex est et perennis influxus creatoris in res a se conditas, quorum primus *conservatio*, alter *concursus* nominatur.

289. Conservatio alia est *indirecta*, alia *directa*.

Conservat rem indirecte omne id, quod vel removel rei contraria vel iis resistit; quo pacto arca v. gr. pecuniam conservat, vestes calorem. Manifestum porro est, ea solum egere conservatione indirecta, quæ per vires naturales destrui aut dissolvi possunt: quæ vero natura sua incorruptibilia sunt, ut est humanus spiritus, hoc conservationis modo profecto non indigent.

Directe rem conservat id omne, ex cujus influxu, tanquam ex causa, ipsum esse rei perpetuo dependet. Ita figura liquidi in vase contenti a vasis figura, et corporum compages a moleculari attractione conservantur.

Deus et indirecte et directe res conservat: sed de conservatione indirecta modo non loquimur; sermo est de conservatione directa, quæ proprie et per se conservatio est.

290. Directa substantiarum conservatio definiri passim solet: *continuata creatio*. Sed vehementer erraret, qui ejusmodi definitionem cum Baylio (1) ita intelligeret, ut res singulis momentis cedere putaret in nihilum, et a nihilo singulis momentis iterum educi. Hæc enim non esset continuata creatio, sed iterata; id quod ingentem continet absurditatem. Quum enim creatio in instanti fit (C. 263, 2^o), iterata creatio in diversis fieret instantibus. Hæc vero instantia vel se immediate excipere dicuntur, vel non. Si primum dicis, hoc repugnat, quemadmodum repugnat invenire in linea duo puncta se contingentia (C. 393). Si dicis alterum, hoc pariter absurdum est; quia hoc pacto res modo existeret, modo non existeret. Mitto cætera.

Quum itaque conservatio dicitur continuata creatio, hoc est ita intelligendum, quod quemadmodum existentia initium debetur divinæ virtutis efficaciam, quæ facit ut res sit, ita continuatio existentia ab ejusdem efficaciam continuatione dependet; ita ut quandiu res in esse perseverat, tandiu perseveret actio, quæ rei tribuit ut sit, et ideo rei existentia protrahatur, quia hæc protrahitur.

291. Ex his intelliges 1^o Conservationem ab actione creandi reipsa non distingui, sed unam eandemque cum illa actionem esse; quemadmodum idem est motus in principio ac subsequenti tempore quo durat; eademque est actio, qua linea incipit describi, et qua protrahitur. Creatio tamen et conservatio distinguuntur ratione, quatenus utraque quidem effectum rei dicit, sed illa connotando rem antea non fuisse, hæc connotando rem antea fuisse.

2^o Actionem qua Deus res conservat, parem fore rei ex nihilo efficiendæ, si ipsa nondum fuisset creata.

3^o Quoniam creatio proprie est divinæ voluntatis actio, ac propterea actio immanens, et transiens tantum æquivalenter

(1) Diction. Art. Pyrrhon.

(272, 2^o), idipsum de conservatione dici oportere. Quare huc redit creatio simul et conservatio, quod Deus voluntate sua, quæ rerum productiva est, velit rem quæ non erat, esse perenniter.

ARTICULUS II.

Utrum Deus omnia conservet.

292. Nunc demonstrandum est, res omnes creatas adeo indigere, ut in esse quod acceperunt, a Deo conserventur, ut si virtus divina ab iis conservandis aliquando deficeret, omnia illico in nihilum redigerentur. Hoc sensu statuitur.

PROPOSITIO I. *Omnia quæ sunt, conservantis Dei virtute indigent, ut esse pergant.*

293. Probatur 1^o Continuatio existentiae ab existentiae initio distinguitur : insuper continuatio existentiae, non minus quam ejus initium, effectus quidam est, qui causam suam habeat oportet.

Causa autem hujusmodi esse nequit existentiae initium aut existentia præcedens : quia nulla est inter hæc duo necessaria connexio, multoque minus connexio causalitatis ; quomodo enim existentia entis in hoc momento, existentiae ejusdem entis momento sequenti causa esse possit ?

Non entis essentia ; nam entis essentia, etiamsi actualis sit, semper contingens est : nunquam igitur existere postulat, nunquam est suum esse.

Non quodecunque aliud ens contingens : nam quanquam ens contingens quorundam motuum aut quarundam modificationum secundaria et inadæquata causa conservatrix esse queat, primaria tamen et adæquata esse nequit, præsertim substantiarum ; ut vel ex eo patet, quod nullum ens contingens seipsum conservare potest, ut modo dictum est.

Restat ergo, ut dicamus, causam continuationis existentiae esse illud ipsum Ens, quod initii existentiae per creationem causa fuit.

294. Probatur 2^o Perfectio quæ ab aliquo agente alteri communicatur, quandoque manet in ipso quum agentis actio

cessat, quandoque non manet. Manet enim, si perfectio communicetur subjecto habenti ex se virtutem eam sibi appropriandi, eamque ex se sustentandi ; vel si perfectio quæ effectui communicatur, sit illa ipsa perfectio quæ in agente est actionis principium ; si utrumque istorum desit, non manet, Rem explico exemplis. Figura quam liquidum habet intra vas, non manet in ipso liquido, si vas frangatur ; manet autem, si ante vasis confractionem liquidum frigore concreverit ac fuerit solidatum. Eodemque pacto compositio illa et ordo quæ domus forma est, manet cessante actione ædificatoris, idemque contingit in omnibus formis artificialibus ; quia videlicet in his omnibus materia seu subjectum cui forma communicatur, est ex se ad eam arripiendam servandamque idoneum. Pariter lux quam a corpore luminoso corpus opacum accipit, in hoc non manet cessante luminosi corporis actione ; sed e contrario calor ab uno corpore ad alterum transmissus manet calefaciente remoto ; quia calefaciens communicavit calefacto motum illum molecularem, qui caloris principium est.

295. Hisce præstitutis, en argumentum :

Ut perfectio quæ alteri communicatur, maneat in illo agentis actione cessante, necessario requiritur, vel ut hæc perfectio communicetur subjecto habenti jam ex se præviam virtutem eam sibi appropriandi, vel ut effectui communicetur illa ipsa perfectio, quæ est in agente actionis principium. Aliter perfectio communicata maneret in effectu sine ulla causa.

Atqui in creatione, per quam ipsum esse rebus communicatur, neutrum contingit. Creator enim non communicat esse subjecto, quod ex se virtutem habeat servandi ipsum esse ; tum quia creatio nullum præsupponit subjectum, tum etiam quia ipsum esse non potest ab alia quapiam perfectione recipi ac servari. Neque potest effectui creato communicari ea perfectio, quæ in creatore est creandi principium. Hujusmodi enim principium est ipsa essentia divina plane incommunicabilis ; fieri enim nequit, ut quod habet esse participatum, sit ens a se.

Ergo esse quod rebus creatis communicatur, non potest in ipsis manere, cessante creatoris actione. Ut ergo res creatæ esse perseverent, creatoris actio perennis necessario requiritur.

296. Ex hucusque dictis facile solves quæ objici solent; quorum præcipua hæc sunt :

1^o Multi effectus finitorum agentium esse perseverant, etiamsi causæ operatio cesset. Multo magis hoc erit existimandum de effectibus Dei, cujus potentia infinita est.

2^o Creaturæ indigentia in hoc solum contineri videtur, ut existentia potiri nequeat, nisi ab alio eam accipiat; non vero tanta esse, ut postquam semel existentiam accepit, nova ejus collatione perpetuo indigeat.

3^o Demum multa sunt, quæ non a Deo, sed a causis secundis conservantur.

297. Resp. ad 1^m *Conc. ant.*; *nego consequentiam et paritatem*. Nam agentia finita hoc tantum agunt, ut existentibus divina virtute substantiis varias modificationes inducant; quarum quædam agentis operatione cessante, in subjecto perseverant, quia naturali ejus virtute vel actione (294) vel etiam inertia (C. 218) conservantur. Et in hoc agentia finita sunt potius causa, ut ejusmodi modificationes fiant in certo aliquo subjecto, quam ut sint. At vero Deus non modificationes solum substantiarum, sed ipsas e nihilo substantias producit; in quibus, cum nihil sit aut esse possit quo ex se permaneant, necesse est ut actione creatoris perpetua sustententur; quemadmodum, ut vidimus (294), necesse est ut agentis finiti actione perpetua sustententur eæ modificationes, quæ in subjectis radicem non habent. Divina igitur potentia causa est, non modo ut res fiant, sed ut sint; atque idcirco efficere nequit, ut esse pergant ejus operatione cessante; in hoc enim haberetur effectus absque causa.

Ad 2^m *Nego*; et negationis ratio ex modo dictis liquet.

Ad 3^m *Dist.* : multa sunt quæ a causis secundis conservantur, nempe substantiæ ipsæ primitivæ, *nego*; harum combinationes variæque modificationes, *subd.* : conservantur a causis secundis conservatione quadam secundaria et inadæquata,

conc.; primaria et adæquata, *nego*. Recole hucusque dicta (ad 1^m, 293, 294).

298. Ex disputatis in hac quæstione colligere licet, quinam haberi debeat annihilationis conceptus. Non est putandum, ad annihilationem requiri actionem positivam; ad hoc enim ut res creata in nihilum redigatur, sufficit, si Deus actionem qua ipsam conservat, ab ipsa subtrahat; videlicet ut divina voluntas in eo quod entis existentiam ejusque durationem decernit, non perennem illam, sed ad certum usque tempus decernat (291, 3^o).

Ad Deum autem tantummodo annihilationem pertinere, dubium esse nequit. Si enim annihilatio cessatio conservationis est, conservatio autem continuata creatio, profecto ille solus annihilandi potestatem habet, qui creandi virtutem possidens, omnis existentiae fons est.

ARTICULUS III

De concursu Dei.

299. Concursus Dei naturalis, de quo nobis sermo, est cooperatio Dei cum causis secundis, seu divinæ virtutis in agentis finiti actiones influxus.

Concursus porro unius causæ cum altera *mediatus* est, et *immediatus*. Mediatum est ex eo, quod una causa alteri vires agendi communicat : sic gladii artifex cum gladio concurrat ad feriendum. Immediatum ex eo, quod una causa cum altera actu influit ad eundem producendum effectum. Sic duo equi currum trahentes, alter cum altero, ad currum motum cingendum concurrunt.

Concursus item est *physicus*, si concurrrens operantem physice juvet; *moralis*, si moraliter, i. e. suadendo, jubendo, minitendo etc. (O, 264, 6^o).

300. Deum cum omnibus quæ agunt, mediate concurrere, nulli dubium esse potest. Ab ipso enim rebus omnibus vires quibus agunt, sunt inditæ, jugiterque conservantur, ut modo demonstratum est. Et illud evidens est, eum non ad omnes

actiones moraliter concurrere, sed ad actiones solum entium intelligentium, neque ad has omnes, sed ad eas tantummodo quæ honestæ sunt. Idcirco concursus iste moralis, *specialis* dicitur. Restat modo probandum, Deum in omnibus prorsus finitorum agentium operationibus physice concurrere concursu immediato, qui propter hanc suam universalitatem *generalis* appellatur.

301. Antea tamen est accuratius exponendum, quænam sit divini hujus concursus ratio; qua in replurimum se theologorum exercuit industria. Nos omnibus omissis quæstionibus, quid juxta probatissimos auctores tenendum sit, paucis statuimus.

1º Igitur concursus hic Dei, quemadmodum omnes ejus externæ operationes, in se est actio immanens, et ipsa Dei voluntas subsistens; quæ ratione effectus qui extra Deum recipitur, transeunti æquivalet actioni (272; 3º, 4º). Concursus iste transiens et extra Deum in creatura receptus, quæritur quid sit.

2º Dicendum in primis, non esse aliquid prævium actioni ipsius creaturæ, eique conferens aliquid quo ad agendum moveatur aut in vi agendi perficiatur. Quidquid enim hujusmodi est, et tanquam principium vel conditio ad complendam agendi virtutem pertinet, hoc ante actionem supponitur jam positum per alias actiones, vel ipsius agentis vel aliorum, concurrente utique Deo. Sed positis his omnibus, nihil amplius requiritur, ut causa secunda sit in suo ordine expedita ad agendum; et nihilominus, ut agat, adhuc Dei concursus necessarius est.

3º Est itaque divinus iste concursus aliquid, quod causæ secundæ actionem comitatur, et ipsum se habens per modum actionis, qua divina virtus una cum creatura agit, ad eundemque terminum immediate tendit, ad quem tendit creaturæ actio. Ad eum fere modum, quo binæ causæ partiales et cooperantes (O. 264, 5º), v. gr. duo homines aliquid fune trahentes, non ita cooperantur alter alteri, ut alter in alterum agat, sed ita ut uterque in eundem effectum immediate influat. Ita quoque causa prima et secunda simul operan-

tur, ut in unum eundemque effectum immediate, tanquam ad terminum actionis, tendant.

4º Hinc sequitur, effectum non partim a Deo manare et partim a creatura, sed totum esse Deo adscribendum et totum creaturæ; diversimode tamen: a Deo enim est, ut a causa prima et independenti; a creatura, ut a causa secunda ac dependenti. Sic utraque causa totalis est, in suo videlicet modo causandi totum effectum. Quod si integra causalitas ad effectum necessaria consideretur, nihil vetat, quominus, ut quidam loqui amant, et Deus et creatura ad eundem effectum partialiter concurrere dicantur.

5º Ex his patet, utriusque causæ, et primæ et secundæ, unam eandemque actionem esse. Actio enim est ipse effectus, ut actu fit (O. 381). Si igitur effectus unus est utriusque causæ, actio quoque ab utraque una est.

6º Propterea actio causæ primæ in eodem subjecto recipitur, in quo recipitur actio causæ secundæ. Nempe concursus Dei cum actione causæ secundæ transeunte, recipitur in patiente; concursus idem cum actione immanente, in ipso agente, prouti in eo ipsa ejus actio recipitur.

7º Hinc demum erues, quo pacto sint intelligenda illa veterum dicta: *causa secunda non agit, nisi mota a prima*, et: *applicatur a prima ad agendum*, et: *agit in virtute primæ*. Duplex in his effatis veritas continetur. Prima est, causam primam, mediis aliis causis secundis, vel etiam, ut nonnunquam, se sola, conjungere motu locali activa passivis, aut potentiæ proponere objectum quo ad agendum moveatur. Altera: causas secundas non agere, nisi quia prima activam virtutem iis suppeditat; iisque præterea, propter fines a se intentos, concursum suum adhibet; sine quo virtus creata, quantumvis in se completa et applicata actionis subjecto, nihil plane agere potest. Lege, si plura cupis, Franciscum Suarez in *Disp. Met.* (1), et Didacum Ruiz: *De voluntate Dei* (2).

(1) *Disp. XXII, sect. II.*

(2) *Disp. XLV.*

ARTICULUS IV.

*Probatur divinus concursus.*302. PROPOSITIO II. *Deus omnibus agentibus cooperatur.*

Probatur 1^o ex dictis de conservatione. Nam conservatio, secundum rem, a productione prima non differt; sed ratione solum. Si ergo effectus agentium finitorum ab iis primo producantur sine ullo Dei influxu, ii profecto sine hoc influxu etiam conservantur; si autem conservari a Deo dicas, ut dicendum est, concludendum, eos etiam in productione prima, a Deo dependere. Non fiunt ergo a suis causis sine Dei cooperatione.

Alio modo. Si res immediato Dei influxu non egent quum fiunt, cur egeant postquam factæ sunt? Si quidem si quæ res, ut sit, alienum influxum requirit, multo magis ipsum requirere putanda est, ut esse incipiat, quam ut jam facta completaque permaneat.

2^o Omnis causa finita a Deo quoad ipsum esse dependet (295): id enim omne quod esse participatum habet, quantum ad ipsam essendi rationem, est proprius Dei effectus. Atqui etiam effectus quicunque finitarum causarum est ens per participationem. Ergo omnis effectus huiusmodi, quoad ipsum esse, a Deo dependet. Ergo etiam quum esse incipit, nempe quando fit a sua causa.

3^o Agentia creata sunt ex ipsa sua essentia Deo subordinata, non modo ut entia, sed etiam ut agentia sunt. Nam quemadmodum sunt entia per participationem, ita quoque per participationem agentia sunt. Sed si agere possent Deo ipsis non cooperante, non forent ex ipsa sua essentia Deo subordinata, quatenus agentia sunt. Didendum ergo, agentia finita sine Dei cooperatione agere non posse.

4^o Denique ipsa causarum finitarum consideratio propositum demonstrat. Nam illæ quoque causæ quæ cognoscendi facultate præstant, multa agunt quæ quomodo ab ipsis agantur aut agi debeant, prorsus ignorant. Non enim sciunt v. gr. homines, quos musculos aut quomodo contrahere debeant,

quando oculos movent aut vocem emittunt; nec quid ab ipsis agatur in cerebro quum sensationem jam habitam reproducere tentant, et alia huiusmodi sexcenta. Jam si hoc de animalibus, imo de hominibus ratione utentibus dicendum est, multo magis idem erit sentiendum de corporibus inanimis. Ex hoc autem deducere pronum est, causas huiusmodi omnes in suis operationibus superiori aliqua virtute immediate cooperante dirigi et gubernari.

303. Ex iis quæ in superiore articulo præmisimus, non difficulter colliges, quid sit respondendum ad ea quæ opponi solent.

Opp. 1^o Quum una eademque actio est a duobus agentibus, agens utrumque est causa partialis. Hoc autem de Deo dici nequit.

2^o Causæ secundæ profecto possident sufficientem et completam virtutem agendi ea quæ agere possunt. Ergo superioris causæ auxilio non indigent.

3^o Quod si effectus causarum secundarum proprios Deus operatur, profecto sufficienter operatur, et quantum ad producendum effectum requiritur. Non enim potest Deus insufficienter operari. Ergo ad eundem effectum producendum causæ secundæ frustra adhibentur.

304. Resp. ad 1^m *Dist. maj.*: quum utrumque agens constituit unam causam finitam, *conc.*; quum alterum agens finitum est, alterum infinitum, *subd.*: utrumque est causa partialis ex parte effectus, *nego*; ex parte causæ, iterum *subd.*: spectata integra causalitate necessaria ad opus agentis finiti *tr.*, spectata unaquaque causa in suo ordine, *nego* (301, 4^o). *Contradist. min.*

Ad 2^m *Dist. ant.*: in actu primo, *conc.*; in actu secundo, *subd.*: cum dependentia a prima causa, *conc.*; independenter ab ipsa, *nego* (301. 2^o, 302). Et *nego conseq.*

Ad 3^m *Dist. ant.*: Deus sufficienter operatur ad modum causæ primæ, *conc.*; ad modum causæ unicæ, *subd.*: quando causas secundas non adhibet, *conc.*; quando adhibet, *nego*.

Dist. eodem pacto rat. add. et nego conseq.

« Non est superfluum, ita s. Thomas, si Deus per seipsum

» potest omnes effectus producere, quod per quasdam alias
 » causas producantur; non enim hoc est ex insufficientia
 » divinæ virtutis, sed ex immensitate bonitatis ipsius, per
 » quam suam similitudinem rebus communicare voluit, non
 » solum quantum ad hoc, quod essent, sed etiam quantum
 » ad hoc, quod aliorum causæ essent (1). » Relege quæ hæc
 » de re dicta sunt in ontologia (O. 288, 289).

305. Sed potissima difficultas in eo est, ut concipiatur, quomodo Deus ad liberas actiones concurrat. Non enim facile apparet, quomodo Deus liberis agentibus cooperari possit, sarta tecta libertate. Illud præterea urget: si ad omnes liberos actus Deus concurrat, ad actus quoque pravos concurrat necesse est; id quod cum Dei sanctitate repugnare videtur.

306. Ut hæc, quantum hoc loco sat est, explicentur, animadvertendum in primis, quanquam divinus concursus, ut actio est et in actu secundo, non sit aliquid prærequisitum ad agendum, sed actionem creaturæ comitetur (304, 2º), nihilominus eundem concursum in actu primo, et in proxima sua applicatione, prouti nempe divino decreto præparatus offertur dato tempore, et causæ secundæ quasi conjungitur, se habere ad modum conditionis, necessariæ ad hoc, ut creatura agere possit.

307. Cum igitur certum sit, Deum unicuique agenti suum concursum non conferre, nisi modo ejusque naturæ accom-
 .modato, consequitur, eundem concursum diverso modo præparari et offerri causis ex necessitate agentibus, ac causis cum arbitrii indifferentia operantibus. Proinde illis offertur determinatus in omnibus ac definitus, talisque ut cum illo hæc et non alia individua actio, hoc tempore, hoc ordine, adjunctis prodire necessario debeat.

Causis autem liberis non ita. Non enim iis concursum suum Deus præparat et applicat efficaci voluntate physice determinante, et efficiente unum aliquem actum, et non alium; sed ad plures actus, ad quos causa libera indifferens est, indifferentem pariter, quantum est ex se, et ad singulos sufficien-

(1) *Contra gent.* Lib. III, c. LXX.

tem, concursum offert. Unde fit ut voluntas, etiam ex parte præparati sibi concursus, proxime disposita sit ad eligendum; et possit tam velle, quam non velle, atque adeo nolle, et tam hoc velle aut nolle, quam illud. Sic in ipsius voluntatis potestate est divino vel ad unum vel ad alterum concursu uti; neque concursus voluntatem, sed potius voluntas concursum flectit atque determinat. Sic patet quomodo divinus concursus libertatem non lædat, sed potius causet et protegat.

308. Ex his quoque colligitur, Deum quum ad actus pravos concurrat, nullo modo peccati causam esse. Etenim actus isti spectari possunt et *materialiter*, ut sunt aliquid physicum et physice bonum, et *formaliter*, ut privationem continent conformitatis ad morum regulam, in qua privatione malitia moralis sita est. Deus igitur, quum suum indifferentem concursum voluntati offert, ita illum offert, ut bonum actum, quantum in ipso est, intendat, pravum autem velit solummodo permittere. Quumque voluntas ad malum actum declinat, Deus concurrat, et quidem *permissive*, ad actum materiale, quatenus, cum posset illum impedire, cooperationem suam subtrahendo vel aliter, tamen non impedit; ad actum vero ut est formaliter malus, nullo modo concurrat, sed potius illum reprobat ac damnat. Malitia igitur tota est humanæ voluntatis, nullo pacto Deo tribui potest. Consule citatos auctores (301, 6º).

CAPUT III.

DE PROVIDENTIA DIVINA.

ARTICULUS 1.

Statuitur providentia divina.

309. *Providentia est ordinatio rerum in finem.* Ea pertinet tum ad intellectum, qui res ad fines ipsarum proprios, per opportuna media assequendos, disponit; tum ad voluntatem, quæ conceptum mente ordinem approbat, illumque adhibere decernit.

Exsecutio hujus ordinis, i. e. actualis rerum ad suos fines directio, dicitur proprie *gubernatio*.

Cura rerum utramque complectitur. Cæterum hæc tria : providentia, gubernatio, cura rerum, promiscue usurpantur in communi sermone; nos hoc postremo sensu, qui plenior est, nempe pro cura rerum, providentiæ vocabulum modo accipimus. Providentiam divinam impugnarunt epicurei, stoici, fatalistæ omnes, et in præsentī deistæ et increduli.

310. Supra (283, 3^o seq.) demonstratum est, Deum omnia quæ sunt, ad ultimum finem condidisse, qui est ejus gloria : ad hunc autem finem, pro suæ naturæ diversitate, singula conspirare (283, 6^o). Quare licet sit unus finis ultimus omnibusque communis, rerum tamen singularum fines partiales et illi subordinati, plures sunt et diversi. Dei igitur providentia in hoc est, ut unamquamque rem, mediis opportunis adhibitis, ad finem suum partialem assequendum dirigat, atque ita dirigat, ut finem ultimum constanter omnia obtineant.

311. PROPOSITIO I. *Deus de omnibus et singulis rebus providentiam sapientissimam habet.*

Probatur 1^o observatione ipsa et experientia. Etenim leges quibus materia regitur et movetur, organa legesque regni vegetalis, organa item et instinctus et indoles variæ animantium, adeo rerum singularum finibus congruunt, ut nihil opportunius aut sapientius excogitari posse videatur. Quis non miretur quum adspiciat, res intellectu carentes tanta ratione operari, et in fines suos, quos nunquam animo perceperunt, tam ordinate constanterque tendere, ut plane ratione summa pollere videantur? Huc applica quæ in argumento physico attigimus.

His adde relationes inter mundana entia ita dispositas, ut constanter contrariorum conflictus temperentur, et æquilibrium servetur, ut noxia arceantur, utilia in promptu cuique sint, vires amissæ perpetuo reparentur, utque omnia, quantum fini eorum congruit, conserventur, et quantum conservationi specierum necessarium est, multiplicentur. Hæc

omnia quid aliud sunt, nisi splendidissima providentiæ continenter prospicientis et operantis vestigia?

2^o Quidquid Deus condidit, quidquid conservat, hoc ad finem aliquem condidit atque conservat: vult nimirum, ut res a se conditæ finem aliquem semper assequantur. At si hoc vult, media quoque idonea illis suppeditare perpetuo debet. Nam qui vere vult finem, is media velit oportet, et tandiu ea velit quandiu finem vult.

3^o Si Deus creatis a se rebus non providet, quænam incuriæ hujus causa erit?

An quia *nescit*? At scientia præstat infinita; novit intimas rerum naturas; novit quæcunque ipsis accidere vel ab ipsis fieri possunt; habet in sua sapientia media infinita assequendi fines omnes quos vult aut velle potest; cognoscit denique omnia impedimenta quæ occurrere possunt, ac media quibus illa superentur aut prævertantur.

An quia *non potest*? Atqui ipse est ubique præsens, intusque præsens omnibus: omnia in ejus potestate sunt, ab ejusque nutu pendent: nihil potest ipsi resistere: omnipotens est, unoque voluntatis suæ nutu efficere omnia potest.

An quia *non vult*? Videlicet ex ignavia, aut lassitudine, aut quia opera sua post aliquod tempus fastidire cœpit. Si sapiens, si bonus Deus est, omnino sibi debet, ut suorum operum curam habeat. Libere fecit quæcunque fecit, at postquam fecit, ea despiciere ac deserere non potest.

312. PROPOSITIO II. *Dei providentia ad singularia se porrigit, etiam ad res minimas atque vilissimas.*

Nam 1^o cum Deus propter finem efficiat quæcunque efficit, tantum patet ejus providentia, quantum patet ejus efficientia; eoque modo res attingit providentia, quo efficientia.

Sed Dei efficientia se porrigit ad omnia et singula quæ esse participant, etiamsi vilissima sint: omnia enim quæ sunt Deus creavit, omnia conservat, omnibus cooperatur; neque genera aut species efficit, quæ sunt mentis abstractio, sed individua. Ergo

2^o Si Deum dedeceret ea quæ vilia sunt nobis ac minima,

gubernare, sane ipsum quoque dedecisset ea creare ac conservare. Hoc autem Deum non dedecuit. Insuper tota rerum universitas tanquam nihilum coram Deo est. Deus igitur, si minima dedignatur, totum mundum dedignetur necesse est.

5^o Præterea quæcunque observatio suppeditat ad arguendam Dei providentiam (314, 1^o), ea in magnis æque ac in minimis rebus,prehenduntur.

4^o Humana quoque gubernatio ad individua pertingat oportet, saltem mediate: secus esset inutilis. Multo magis ergo divina providentia.

315. Inter divinam porro humanamque providentiam hoc interest discriminis, quod homines, cum immediate omnibus sibi subjectis prospicere nequeant, administris utuntur qui particularium curam gerant, tam ordinando singula ad finem idoneaque media eligendo, quam intentum ordinem exsequendo. Deus autem, quem nihil impedire potest quominus de singulis per se cogitet, singulis per se prospicit, finem statuens mediaque præparans; sed in executione suæ providentiæ quasdam res per alias gubernare solet, ut filios per parentes ac civitates per earum rectores, nonsane ex defectu potentiæ, sed ex sapientiæ consilio, et ut paternæ quoque suæ bonitatis vestigium aliquod et imago in rerum universitate fulgeat.

314. PROPOSITIO III. *Speciali providentia intellectuales creaturæ a Deo gubernantur.*

Etenim 1^o hæ sunt, in quibus et per quas finis creationis ultimato obtinetur. Sola enim rationalis creatura actibus suis ad universi finem pertingit, et gloriam Deo vere tribuit; ipsum cognoscendo et amando. Unde est, quod cætera quæ in mundo sunt, propter ipsam facta sunt, ipsa autem immediate propter Deum. Si ergo Deus res omnes provide gubernat, multo magis rationalem creaturam.

2^o Eoque magis, quod rationalis solummodo natura in finis sui assecutione felix esse potest, ex ejusque amissione miserima sit oportet; cum cætera nec finem cognoscant, nec eo perfruantur obtento, nec doleant amisso. Quare, cum Deus, si rebus insensatis non provideret, insipienter agere dicendus

esset, non insipientem modo, sed crudelem se exhiberet, si homo ex mediorum defectu et ex sui conditoris incuria, finem suum aliquando non obtineret. Quis enim vero putaverit, id præstare nolle Deum, quod matres per tot dolores molestiasque præstant; imo quod ipsæ præstant feræ, quæ in suis fœtibus alendis ac tuendis adeo sollicitæ sunt? Est ergo divina bonitate prorsus indignum, ut rationalem naturam sibi ac fortunæ relinquat.

3^o Id confirmat observatio. Ut omittam media omnia, quæ et in se et extra se homo habet, ad physicum suum bonum opportunissima, considerare sufficit ea, quæ immediate ad finem suum assequendum, non quidem illum cogunt (libere enim ad finem suum pervenire debet), sed hinc inde validissime et exstimulant et adjuvant.

Unusquisque enim legem cognoscit naturalem; acriter impellitur ad bonum honestum, atque a morali malo retrahitur; frenatur formidine infamiæ, quæ pravæ actiones pone sequitur; allicitur honore, qui virtutis comes est; terretur suppliciorum timore; spe præmiorum erigitur; ac si quid mali admiserit, conscientia stimulis torquetur; habet denique in natura universa quasi speculum quoddam, in quo creatoris sui bonitatem contempletur, imo scalam prope modum, qua ad ipsum ascendat. Et hæc omnibus communia, aliaque multa. Adde nunc auxilia, quæ singillatim in unumquemque opportune conferuntur, ut quisque sibi conscius est: adde cœlestis gratiæ, quæ naturæ nullatenus debentur, gratuitas motiones; et plurima alia, quæ sunt mortalium oculis prorsus occulta. Ex quibus omnibus concludere necesse est, exquisitam esse rerum omnium parentis in humanum genus providentiam.

4^o Prætermisiss pluribus quæ ex humani generis historia huc afferri possent, considerare præstat luculentissima quædam divina providentiæ judicia, quæ in humana societate, ad quam homo factus est et qua tantopere indiget, conservanda, perpetuo emicant.

a) Vita socialis consistere non posset, si omnes homines essent mendaces, proditores, laboris et injuriæ impatientes,

nullisque legibus subjici vellent. Ex altera parte singuli homines possunt ita perverti; iique ipsi qui semper probi fuerunt, possunt intra breve momentum improbi fieri. Unde ergo factum est, ut nunquam generalis hæc morum perversio acciderit?

b) Varietas vultus ac vocis propemodum infinita, insigne est providentiæ in societatem argumentum. Fac enim omnes in omnibus perfecte similes esse: quanta exinde perturbatio consequeretur!

c) Ad societatem conservandam necessaria quoque est propensionum et ingeniorum varietas, ut omnibus ejus necessitatibus satisfiat. Hæc autem varietas semper servatur.

d) Diversitas denique graduum et inæqualis bonorum distributio requirebatur in primis, ut societas permanere, vel ad aliquod tempus, posset. Ita autem sunt omnia disposita, ita connexa sunt et interna adjuncta et externa, ut hæc graduum diversitas, bonorumque inæqualis distributio constanter maneat.

5° Accedat ultimo ad hæc omnia humani generis constans consensio.

a) Hæc se manifestat, quum aliqua calamitate, injuria, periculo homines premuntur, aut repentino terrore percelluntur. Tunc enim oculos, manus, vocem in cælum attollunt, et Numen sponte invocant.

b) Hanc testantur jurisjurandi religio, sacrificia ac vota, quæ omnibus populis usitata semper fuere, ad bona consequenda, ad avertenda mala, ad gratias agendas.

c) Imo cultus religiosus universus, et timor divinæ potestatis in hac maxime persuasionem fundamentum habent.

d) Ipsæ impiorum blasphemiae eandem persuasionem manifestant. Cur enim in Deum irascuntur scelesti, nisi quia certo tenent, ipsius nutu omnia regi?

315. COROLLARIA.

1° Unaquæque res et ad peculiarem aliquem finem ordinata est, et mediis instructa ad ipsum assequendum, etiamsi vel finis vel media non appareant.

2° Nullus est respectu Dei eventus fortuitus, non modo

quia omnia ipse prævidit, sed etiam quia omnia sub ordine providentiæ ejus continentur.

3° Homo quilibet in promptu habet media omnia, quæ ipsius conditio et adjuncta postulant, ut honeste sancteque vivere possit, et per hoc felicitatem in futuro assequi. Hic est enim hominis finis (285, 6°).

4° Mala physica quæ in mundo sunt, cum finis rationem non habeant (246), medii rationem habeant necesse est.

5° Idem dicendum de malorum moralium permissione. Supremus provisor etiam malorum permissione, tanquam medio, utitur.

6° Unde quidquid, sive boni sive mali, in unoquoque homine accidit vel circa illum, quantum est ex parte Dei, medii ad finem hominis idonei, semper rationem habet.

ARTICULUS II.

De bonorum et malorum distributione.

316. Antiquissima humanæ imbecillitatis et arrogantiae in divinam providentiam calumnia est: pessimos quosque homines bonis omnibus affluere, probos autem atque honestos cum adversa fortuna semper colluctari. Vel nulla ergo providentia est, vel injustitiæ arguendus supremus provisor.

317. Ad hasce querimonias respondendum in primis, falsum esse quod generatim asseritur, bonos nempe omnes miseros, impios autem felices esse; multos enim bonos felices videmus, multosque malos miseros. Sed bonorum felicitas et malorum miseria non attenditur, quia miranda non accidit; contrarium autem, si quando contingat, hoc notatur ab omnibus, quia apparens quædam in eo absurditas est. Itaque difficultas objecta male collocat quæstionis statum. Quæri enim hoc unum potest: cur tum boni tum mali hujus vitæ bonis ac malis indifferenter et promiscue, ut plurimum, subjiciantur, prouti rerum cursus tulerit. Hujus autem boni ac mali promiscuæ distributionis multæ rationes reddi ab humana ipsa imbecillitate possunt; quarum præcipuas ad tria capita reducemus.

318. I. Potissima ratio hæc est, quod vita hæc præsens

stadium est probationis ac meriti, cui vita altera succedere debet, in qua unicuique pro meritis justa retributio fiet. Si cum hac vita omnia finem haberent, profecto in hac retributio fieret. Sed cum post hanc altera vita supersit, et præmia et pœnæ in illam differri possunt. Igitur bona et mala præsentis vitæ rationem potius habent mediorum ad futuram acquirendam felicitatem, quam præmii vel pœnæ. Inter hæc autem media illa Deus unicuique assignat, quæ ipsi opportuna esse novit.

319. II. Aliæ rationes reddi possunt ex parte justitiæ Dei. Nam:

1° Nemo adeo bonus est, qui aliquid non peccaverit; nemo adeo malus, qui aliquid boni non gesserit. Ergo possunt boni aliqua pœna temporali juste plecti, et mali aliquod temporale præmium recipere.

2° Sæpe actiones quædam, quæ bonæ videntur ac magnis dignæ præmiis, malæ revera sunt ex fine operantis, pœnamque potius aliquam merentur. E contrario actiones nonnullæ, quæ ingentes videntur mereri pœnas, venia dignæ sunt, quia ex errore aut inconsideratione procedunt.

3° Non raro felicitas peccantium eorum supplicium gravius facit: *tolluntur in altum, ut lapsu graviore ruant*; bonorum autem ærumnæ sæpe a majoribus calamitatibus illos liberant; adeoque præmii loco habendæ sunt.

4° Quæcunque sit impiorum felicitas, pœna tamen omnium gravissima semper illos cruciat, conscientiæ videlicet amaritudo, et futuri supplicii præsensio. Bonos autem semper solatur conscientiæ tranquillitas et spes.

5° Denique adversarios sic urgere possumus. Frequenter contingit, ut bonos pater filium habeat pessimum, pia uxor scelestum maritum, etc. Quæro jam: debetne Deus malum filium aut scelestum maritum omnino in præsentis vita punire? At si punit, damnum affert ac dolorem bono patri, piæ uxori. Estne hoc justum? Respondeant ipsi, ac nodum solvant.

520. III. Ex parte sapientiæ Dei.

1° Nam eum qui in utroque ordine, et physico et morali,

provisor est, non decuit talem inire providentiæ rationem, quæ ad moralem ordinem servandum, physicum penitus subverteret. Atqui physicus ordo plane subverteretur, si Deus præmia ac pœnas pro meritis in hac vita cuique distribueret. Nulla enim lex constans, nullus certus esset eventus; et quod magno miraculo accidit olim in Ægypto, quod tenebris late toti regioni offusis, *ubi habitabat Israel lux erat* (1), id status esset mundi ordinarius. Vide quid postulent deistæ, qui nihilominus miraculorum negant possibilitatem.

521. 2° Sapientiæ Dei provisoris convenit, ut humanam naturam modo ipsi congruo et accommodato gubernet. Non esset autem humanæ naturæ accommodata ratio illa gubernandi, quam adversarii postulant. Nam:

a) Si boni nunquam aliquid paterentur mali, prærepta ipsis fuisset omnis occasio ad virtutes nobilissimas exercendas, ut alio in loco notatum est (248). Insuper bonis sensibilibus toti inhærerent, nec de futura felicitate amplius cogitarent. Cum e contrario adversi casus a fluxu et caducis rebus animos avellant, et per hoc ipsum virtutem custodiant.

Si autem omni suæ beneficentiæ effectum peccantes Deus privaret, subtraheret illis incitamentum maximum ad respiscendum, videlicet beneficia. Quod si illico morte eos plecteret, omnem pœnitendi viam illis præcluderet; ac de genere humano brevi actum esset.

b) Si in hac vita statim honestis actibus præmium, prævis autem pœna responderet, homines virtutem colerent tanquam mercenarii et mercatores, non Dei amore sed lucri; et ex servili solum timore a malo abstinere, tanquam mancipia: quæ res humanæ naturæ dignitatem, totamque ordinis moralis pulchritudinem everteret.

c) Societati præterea humanæ minime expediret, si occultissima quæque delicta per manifesta supplicia hoc tempore punirentur. Sic enim omnis mutua fides periret.

d) Insuper, cum omnia crimina omnibus patefierent, brevi omnis criminum horror ac pudor evanesceret.

e) Denique quum Deus caduca hæc bona bonis et [malis

(1) Exod. X, 23.

sinit esse communia, veritates nos edocet duas, quibus maxime indigemus, quæque in vita morali fundamentales sunt; videlicet bona hæc caduca, quæ a Deo adeo nihili æstimantur, ut vel inimicos suos frui illis sinat, magni pendenda non esse, sed despicienda potius præ virtute: tum etiam vitam superesse alteram, in qua felicitate, quæ finis noster est, potiri dabitur. Cum enim Deus unicuique pro meritis retribuere debeat, neque hoc in præsentī faciat, in posterum certe faciet.

322. Ex dictis colliges, quænam sit ad objectam principio difficultatem (316) responsio.

Mali bonis affluunt, boni calamitatibus opprimuntur, *dist.*: hoc semper accidit, *neg.*; quandoque, *subd.*: et hoc est secundum justæ ac sapientis providentiæ ordinem, *conc.*; non est ejusmodi, *nego*.

ARTICULUS III.

Difficultates.

323. Obj. I. Non est in Deo providentia. Etenim:

1^o Multa sunt in mundo plane inutilia;

2^o Imo plurima mala ac noxia.

3^o Boni provisoris est, ut mala avertat ab iis quos gubernat; Deus autem hoc non facit.

4^o Magna hominum pars felicitatem non assequitur, quæ tamen est hominis finis.

5^o Multi insuper laborant defectu mediorum quæ ad vitam conservandam necessaria sunt.

324. Resp. *Nego ant.*

Ad 1^m *Nego*. Licet enim quarundam rerum fines proximos non cognoscamus, certum tamen est a priori, rebus omnibus finem suum esse propositum (315, 1^o). Certum est item et ipsis oculis manifestum, nihil esse, quod potentiam, sapientiam bonitatemque Creatoris in se non manifestet; id quod ultimum rerum omnium est finis.

Ad 2^m *Dist.*: mala in se, *nego*; mala relative, seu noxia, *subd.*: respectu ordinis universalis, *nego*; respectu hominis,

subd. in ordine physico, *tr.*; in ordine ad ultimum finem, *nego* (315; 4^o 6^o).

Ad 3^m *Dist.*: Si habeant de se rationem medii, *nego*; si non habeant, *tr.*

Ad 4^m *Dist. maj.*: in hac vita, *tr.*; in altera, *subd.*: ex propria culpa, *conc.*; ex mediorum defectu, *nego*.

Dist. min.: Felicitas est hominis finis in hac vita, *nego*; in altera, *subd.*: est finis conditionate intentus, *conc.*; absolute, *nego* (289, 6^o).

Ad 5^m *Dist.*: et hic ipse defectus argumentum est providentiæ in humanam societatem (314, 4^o d), et est medium ipsis tributum ad finem ultimum (315, 1^o 4^o), *conc.*; secus, *nego*.

325. Obj. II. Deus est infinite magnus. Non ergo eum decet, ut ad res vilissimas gubernandas sese demittat: quemadmodum e regis majestate non est, ut de vermibus hortorum suorum anxie occupetur.

Resp. *conc. ant.*; *nego conseq.* (312, 2^o). *Nego* insuper *paritatem*. Rex enim, cum vires habeat ad humanum modulum limitatas, singulis rebus, etiam minimis, providere per se non potest, nec ad eum pertinet, ut omnibus provideat. Quod si vellet minimis providere, gravioribus negotiis intendere, uti debet, non posset. Deus autem hoc ipso quod infinite magnus est, si minimis providet, non idcirco majora deserit. Ad eum vero pertinet, ut de omnibus curam gerat, quia omnium creator est (312, 1^o).

326. Obj. III. Experientia ostendit, sua cuique negotia succedere, prouti magis vel minus, industria, viribus, imo et fraudibus utitur, non autem pro meritis et jure uniuscujusque. Ergo.

Resp. *Dist. ant.*: Hoc semper accidit ut dicitur, *nego*; plerumque, *subd.*: justo ac sapienti consilio, *conc.*; secus *nego*.

Hoc non semper accidit. Deus enim, a quo rerum pendent eventus, aliquando facit, ut per media prorsus insufficientia negotia difficillima felicem exitum sortiantur. Sæpe item impiorum magnas vires irritas reddit, eorumque astutias et fraudes eludit, atque adeo ad contrarium exitum perducit.

Quod si non semper ita disponit, ratio est quia non tenetur in hac vita rationes cuique subducere. Vide dicta superius (317, seq.).

Cæterum sapienter disposuit Supremus Provisor, ut humanæ industriæ communiter responderet eventus; scilicet ne otio ac desidia homines torpescerent, sed ratione ac viribus acceptis uterentur. Nec tamen semper eventus industriæ respondent; quia Deus aliter ordinat, in bonum certe nostrum, si sapimus.

327. Obj. IV. Si Deus omnibus in particulari providet, impium est industria propria uti, vel hominum auxilia quærere.

Resp. Nego. Deus enim in hoc ipso providentiam suam ostendit, quod mentem tibi dedit, et vires, et naturalia media, quæ ad tuam utilitatem uteris. Proinde qui omnia sibi expectare vellet a Deo, is a divina providentia constitutum ordinem perverteret.

328. Binæ istæ difficultates in extrema opposita deflectunt. Prima enim ab humana industria repetit omnia, et providentiam divinam obliviscendo, nimiam in nobis sollicitudinem excitat. Altera vero nihil industriæ tribuit, ac male intelligendo providentiam, omnem de rebus nostris sollicitudinem a nobis aufert. Sed datur medium, et in eo virtus. Nempe, ut temperatam sollicitudinem in rebus nostris adhibeamus, mediisque acceptis, prouti Deus vult, utamur; rerum vero exitum divinæ providentiæ fidenter committamus. Felix qui vel hunc ex habita hucusque divinæ naturæ divinorumque operum consideratione, fructum capiet!

EXPLICIT THEOLOGIA.

A. M. D. G.

INDEX

TERTII VOLUMINIS.

PSYCHOLOGIA.

Objectum Psychologiæ proprium. Tractationis difficultas partitio 1

LIBER PRIMUS.

CAPUT I. DE VITA IN GENERE.

ARTICULUS. I. De vitæ conceptu. PROP. I. Nulla vitæ definitio melior, quam quæ a veteribus tradebatur: activitas, qua ens seipsum movet. Vita non recte definitur a recentioribus physiologis. Rejiciuntur vitæ definitiones traditæ a Stahllo-Bichat-et Richerandio. Quid significet motus in definitione scholasticorum. Ad vitam requiritur, ut principium motus sit viventi internum. Actionum vitalium terminus est ipsum vivens. Actiones vitales sunt immanentes-et vice versa-subjectum perficiunt. Vita in actu primo et in actu secundo-ad quam pertineat tradita definitio. Hæc probatur 1º ex modo quo ab hominibus animalium vita cognoscitur-2º ex metaphoricis vitæ acceptionibus. Errant qui vel singulis rebus vel mundo universo vitam tribuunt 2

ART. II. De vitæ gradibus. PROP. II. Eo perfectior vita est, quo perfectior est modus se movendi, majorque unitas atque identitas moventis et moti. Tria ex quibus major minorve perfectio quoad modum se movendi dependet: finis, determinatio ad agendum, executio. Plantæ solummodo motus executionem habent: animalia habent insuper ex se determinationem ad agendum: ens intelligens etiam finem sibi præstituit. Hinc tres vitæ gradus: vita vegetativa, sensitiva, intellectiva. Iidem gradus deducuntur ex consideratione identitatis inter movens et motum. Vita Dei ex utroque capite est perfectissima. Repugnat ens creatum esse ipsum actum vitalem 4

ART. III. De vitæ principio. Quid sit vitæ principium-ejus existentia negari nequit. Aristotelis opinio de vitæ principio definitio animæ ab eodem tradita. Opiniones thomistarum et scotistarum. Iatromathematici et iatrochimici-animistæ-materialistæ-vitalistæ et antivitalistæ-multiplex vitalistarum sententia 7

CAPUT II. DE VITA VEGETALIUM.

ART. I. De differentia vegetalium a corporibus inorganicis. Vegetalia a mineralibus differunt organisatione-forma externa-constitutione chimica-ortu-incremento-duratione. Hinc deducitur, vegetalia regi quibusdam legibus sibi propriis-viribus insu-

per propriis instructa esse, quæ materiæ inorganicæ facultatem excedunt

ART. II. *De functionibus vegetaliū.* Functiones vegetationis, et functiones reproductionis. Munus functionum vegetationis. Munus functionum reproductionis. Functiones vegetativæ sunt in bonum individui, reproductivæ in bonum speciei-utrumque functionum genus necessarius fuit. Qui sit ordo inter utrumque. PROP. I. *Non immerito tres vegetalis vitæ potentie seu vires ab aristotelicis assignabantur, scilicet nutritiva, augmentativa, generativa; neque doctrina hæc recentiorum placitis realiter adversatur.* Recentiores in nutritione augmentationem includunt-sed prior sine altera concipi potest-licet hæc illam supponat. Explicatio vitæ vegetativæ definitio.

ART. III. *De principio vitæ in vegetabilibus.* De quo principio sit sermo. PROP. II. *Principium vitæ vegetaliū non est forma substantialis ejusmodi, quæ corpori organico tribuat, non modo ut sit vivens sed etiam ut sit actu, et ut sit corpus organicum.* Hæc sententia nititur principio generali peripateticorum, circa substantialem corporum constitutionem, quod jam ostensum est falsum. Tum experientia tum ratio suadent elementa inorganica actu manere in vegetabilibus. PROP. III. *Nihil est in vegetabilibus, quo suaderi possit, esse in iis, præter corpus organicum, principium aliquod activitatis simplex, seu substantiam a materialibus elementis distinctam.* Id non postulant leges vegetaliū propriæ-nec plantarum unitas-nec earum identitas in omnibus suis ætatibus-nec vires ad vitales functiones exercendas necessariæ. PROP. IV. *Vires quædam peculiare in vegetabilibus agnoscendæ sunt, quæ in materia inorganica non vigent. Hæ tamen vires non aliud esse videntur, quam varie resultantes virium mechanicarum et chemicarum, prouti hæc sub organismi conditionibus operantur.* Probatur ex legibus vegetaliū propriis-ex functionum organicarum analysi-factis. Vires vitales.-Vires quoque materiæ brutæ ad materiam organicam pertinent, licet non solæ. Vires vitales in vegetabilibus possunt concipi ut resultantes ex viribus materiæ brutæ, posita conditione organismi. Alias reipsa non esse vires hæc vitales, suadetur argumento exclusionis, et ea lege, qua superflua exigere prohibemur. Formale in plantis vitæ principium. In quo motu sit plantæ vita. Quo pacto organismus ad eum concurrat. OPP. 1° In hac theoria vires vitales non sunt vires vegetaliū propriæ-2° eadem supponit organismum, de cuius origine est quæstio-3° ex ea sequeretur, artem chimiam parem fortasse futuram organis ac plantis producendis-plantas a machinis non differre-ignem vivere. Singulis respondetur

CAPUT III. DE VITA ANIMALI.

ART. I. *De animalium a vegetabilibus essentiali discrimine.* Vita animalis vegetativam supponit estque ordinis excellentioris. Differentiæ inter utramque vitam; aliæ internæ et secundariæ, aliæ externæ et essentialis. Functiones relationis animalium

propriæ quæ sunt *facultas sentiendi et contractilitas. Motus mechanici, organici, animales.* Erronea quorundam opinio de vi sentiendi plantarum. Secernitur quæstio metaphysica a zoologica. Sensatio non est mera impressio organica: nec omnis motus sensitivam perceptionem supponit. PROP. I. *Plantæ sentiendi facultate non gaudent.* Nam 1° nullum indicium est in plantis hujus facultatis-2° eadem ipsis esset inutilis et noxia-3° supponit præterea animam simplicem et invisibilem, quam in plantis ponere necesse non est. Quid dicendum de zoophytis et spongiariis. PROP. II. *Bruta animalia sentiendi facultate propriè dicta esse prædita, ambigendum non est.* Auctores qui contra sentiunt. Prob. prop. 1° Bruta habent organa simillima iis, quibus homo instructus est ad sensationes excipiendas-2° Facultatem sentiendi in brutis demonstrant varie eorum voces, et motus in diversis adjunctis-3° Eadem necessaria erat brutis ut finem suum naturalem convenienter assequi possent-4° Suffragium sensus communis. Bruta non modo sensitivæ perceptionis, sed etiam sensitivi appetitus facultatem habent. Contractilitas est proprietas animalis ab essentia dimanans

ART. II. *De cæteris brutorum facultatibus.* Agnoscendæ sunt in brutis aliæ facultates præter facultatem sentiendi et contractilitatem. Veterum hæc de re opinio. PROP. III. *Animalis vita internum sensum in primis, tum, si perfecta sit, eas quoque facultates requirit, quas veteres phantasiam, æstimatoriam, memorativam appellabant.* Nam 1° bruta non modo percipiunt varias qualitates sensiles, sed etiam earum discrimen, et suos actus sentiunt-2° sensibilem absentium specie moventur-3° percipiunt quasdam intentiones, quas sensus externus non percipit. Naturales brutorum instinctus in harum intentionum perceptione initium habent. Instinctus experientiam præcedit-4° Intentiones quas æstimatoria percipit, bruta conservant. Hæ omnes facultates ab intelligendi vi maxime differunt

ART. III. *Utrum anima brutorum sit intelligens.* Erroneæ hæc in re philosophorum sententiæ. Duo genera operationum in brutis. PROP. IV. *Bruta animantia intellectu et ratione carent.* Nam 1° sunt incapacia efformandi ideas universales, ac proinde judicandi et ratiocinandi-2° nullam in se suosque actus reflexionem adhibent; nec suas operationes perficere norunt-3° nihil percipiunt, quod sensibile non sit; nec nisi sensibilibus bonis afficiuntur et moventur-4° libertate carent arbitrii-5° Nullæ brutorum operationes intelligentiam aut ratiocinium requirunt. Operationes brutorum, quæ vel ab expectatione casuum similium, vel ex habitu acquisito procedere videntur, explicantur per phantasmatum associationem

ART. IV. *De vitæ animalis principio.* Quid sit principium vitæ animalis. PROP. V. *Animal brutorum est simplex et indivisibilis.* Opiniones veterum. Probatur prop. ex natura sensitivarum

facultatum. Quid dicendum de animalibus, quorum aliqua pars a reliquo corpore dissecta pergit moveri. Quid de annulatis et polytis. Anima brutorum non educitur ex potentia materiæ, quomodocunque materia concipiatur—est substantia—non potest oriri, nisi per creationem—est dependens a corpore quoad omnes suas operationes—non autem ex se quoad ipsum esse—quo sensu dici queat subsistens—soluta a corpore et vivere et esse desinit 42

LIBER SECUNDUS.

CAPUT I. DE ANIMÆ HUMANÆ NATURA.

ART. I. *Prævia quædam.* Difficultas questionis de humanæ vitæ principio. Quenam de hoc inquirenda sint. Materialistarum opiniones variæ. Quid in hac quæstione animæ humanæ nomine intelligamus. Anima simplex quoad quantitatem et quoad essentiam. Anima simplex quoad quantitatem, sed non in genere quantitatis. Quid veniat nomine substantiæ spiritualis 46

ART. II. *De animæ simplicitate.* PROP. I. *Anima humana est simplex tum quoad quantitatem, tum quoad essentiam.* Nam 1º quod est extensum non potest corpora percipere—nec plures simul sensationes experiri, easque inter se comparare—nec se in se reflectere—2º quod est compositum non potest habere ideas—multo minus eas comparare, earumque relationes deprehendere—judicare et libero arbitrio frui. Igitur anima humana nec est corpus humanum nec corpus quodcunque—nec affectio corporis—est igitur substantia a corpore distincta 47

ART. III. *De animæ spiritualitate.* PROP. II. *Anima humana est ens spirituale.* Quia in operationibus intellectus et voluntatis est omnino independens ab organo materiali. Nam 1º organa corporea vividiori sui objecti impressione læduntur; intellectus non ita—2º intellectus operationes per organum materiale exerceri non possunt. Nam intellectus cognoscit ea, quibus organum materiale affici nequit—ipsas res sensibiles modo valde nobiliori cognoscit—cognoscit multa sensibilia quæ sensus nunquam affecerunt—de rebus sensibilibus quandoque discernit contra id quod sensus percipiunt—3º Voluntas non est ad bona sensibilia limitata—imo maxime delectatur iis bonis quæ omnem materiæ conditionem excedunt—demum liberum arbitrium quo ipsa gaudet, in facultate organis alligata residere nequit. Igitur anima humana est substantia. Ne divina quidein virtute fieri potest, ut materialis substantia intelligendi ornetur facultate 51

ART. IV. *Difficultates.* Affirmari nequit facultatem cogitandi non posse existere in materia. Nam ideas materiæ et cogitationis imperfectas habemus—materia organica mirabiles acquirit proprietates; cur non etiam cogitationem acquirat si exquisitori organisatione conformetur? Existunt in materia proprietates

simplices. Bruta sensationes experiuntur. Saltem ultima materiæ elementa vi cogitandi prædita esse existimari potest. Diversæ partes compositi incompleta vi cogitandi prædita ita conspirare inter se possunt, ut una exinde cogitatio nascatur. Omnis cogitatio potest explicari per motum partium subtilissimarum. Anima vel est ipsum corpus vel substantia corporea, nam recipitur in corpora et per totum corpus diffunditur—quod non est extensum, nequit affici a corporibus—nec corpora percipere. Anima subest iisdem vicissitudinibus ac corpus. Nam crescit et senescit crescente et senescente corpore—si organicae functiones perturbentur, perturbantur quoque operationes intelligentiæ—facultatum mentalium evolutio pendet a conditionibus corporis, et a causis externis quæ in corpus agunt. Solutiones subjiciuntur. 54

CAPUT II. DE ANIMÆ HUMANÆ UNITATE.

ART. I. *Utrum sit eadem anima sensitiva et rationalis.* Erronæ opiniones adversus animæ humanæ unitatem. PROP. I. *Eadem est in homine anima sensitiva ac rationalis.* Probatur 1º ex unitate intimi sensus—2º ex multiplici nexu inter facultates sensitivi ordinis et intellectivi—3º ex illa ipsa intestina pugna, quæ adest inter cupidinem et mentem. Enodantur difficultates ex hac pugna deductæ 60

ART. II. *Utrum anima humana sit vegetativæ vitæ principium.* PROP. II. *Anima rationalis et sensitiva vegetativæ quoque vitæ in homine principium est.* Vita vegetalis in homine originem habet ab anima in quibusdam certo; quia functiones e. g. nutritivæ a vitæ sensitivæ actibus exordium habent—probabiliter in omnibus; quia 1º functiones vitæ vegetativæ fiunt ope nervorum in quibus viget perpetuus animæ influxus—2º impossibile videtur animam, nihil suis viribus agere, quum corpus agit suis—explicatur quomodo id fieri possit—3º idem suadent relationes multiplices. Errant qui vel vegetativam quamdam animam a sensitiva diversam, vel principium vitale ab anima diversum et a viribus materiæ distinctum homini inesse docent. Idem dici debet de brutis. Homo est unum vivens, quamvis ejus vita multiplex sit. Hæc unitas homini non deesset, etsi anima non esset immediatum principium omnium organicarum functionum 63

ART. III. *Stahlian opinio refellitur.* PROP. III. *Falsum plane est, animam humanam vitæ vegetalis principium esse per intelligentiam et rationem.* Nam 1º non quidquid agit anima rationalis agit ut rationalis, aut per cognitionem rationalem—2º Si functiones vitæ organicæ fierent per actus rationales, possemus horum actuum conscientiam habere, et cognoscere quomodo illæ fiunt; quod est contra experientiam—3º certe in brutis vitæ principium non est intelligentia. Anima humana influit in vitam organicam per modum nature 67

ART. IV. *Difficultates.* An anima humana sentiat operationes organicas a se fieri. Innuitur, quomodo animus sentiat nervos,

et suum influxum in functiones organicas. Distinctio inter sensum, quo anima sentit proprium corpus, et internum sensum tactilem. Ex eo quod vita organica in homine ab ejus anima pendeat, non sequitur, etiam in plantis admittendam esse animam. Embryon vegetat ante animationem-organicae vitae functiones perseverant etiam nolente voluntate-in hominis cadavere quandoque succrescunt capilli et ungues. Ex his tamen non sequitur, vitam vegetativam animalium ab anima non pendere 69

CAPUT III. DE UNITIONE ANIMAE ET CORPORIS.

- ART. I. *De animae sede.* Philosophorum opiniones circa animae sedem. PROP. I. *Anima est in toto corpore ipsi conjuncto.* Prob. 1° ex facultate sentiendi Confirmatur argumentum ex communi sensu. Praecluditur effugium. Confirmatur iterum ex pluribus difficultatibus, quas contraria sententia offert. Prob. 2° ex hominis conceptu et unitate-3° argumento ad hominem. Anima non est in corpore contactu quantitatis, sed contactu suae vis-est tota in toto corpore, et tota in singulis ejus partibus. Sola anima potest vere in corpore esse. Est tota in partibus corporis totalitate essentiae, non totalitate virtutis. Non omnes omnino substantias animales anima informat 72
- ART. II. *Difficultates.* Si nervi qui in sensuum organis expanduntur, cum cerebro non communicent, cessat statim omnis sensatio. Ii quibus membrum aliquod est amputatum saepe conqueruntur, se in deperdito membro dolorem experiri. Si anima est in toto corpore, vel extenderetur cum corpore vel replicaretur in corpore-crescente corpore cresceret, imminuto imminueretur-quum diversae corporis partes motibus oppositis moverentur, tota quoque anima moveretur motibus oppositis. Si tota anima esset in una corporis parte, nihil ejus esse posset extra illam partem-esset praeterea in singulis partibus cum omnibus suis potentiis. Solutiones 77
- ART. III. *De unitiois modo.* Modus unitiois animae cum corpore minus recte commercium nuncupatur. PROP. II. *Animae humanae cum corpore conjunctio physica est et substantialis, ejus modi nempe, ut e duabus distinctis substantiis una composita substantia, una natura exsurgat.* In quo sita sit unitio physica et substantialis-quomodo cognoscatur. Substantialis unitio multo melius inter spiritum et corpus, quam inter bina corpora concipi potest. Probatur thesis ex sensu proprii subjecti-ex facultate sensus interni-ex motu spontaneo-ex passionibus appetitus sensitivi-ex somno et dementia. PROP. III. *Substantialis animae cum corpore conjunctio constitui videtur per hoc, quod anima corpus pervadens vim suam vi corporis propriae associet admisceatque.* Nam hisce positis 1° compositum acquirit proprietates et operationes, quas neutrum componentium habebat-2° utraque substantia componens suppositi rationem amittit-3° unum novum principium agendi ac pa-

tiendi, seu nova quaedam natura constituitur. Anima vires suas viribus praesertim nervi systematis admiscet. Animae cum corpore conjunctio est naturalis. Non omnis animi actus medio corpore exercetur. Persona humana nec est anima nec corpus, sed compositum ex utroque. Unio inter animam et corpus non est hypostatica. 80

- ART. IV. *Refelluntur falsa systemata.* PROP. IV. *Anima rationalis non unitur corpori ut motor mobili.* Nam 1° homo est una natura ex anima et corpore-2° anima, utpote id quo corpus sentit, nequit esse diversa secundum esse a subjecto sentiente. Dicitur nequit animam quidem sensitivam corpori conjungi, non vero animam intellectivam. PROP. V. *Systemata causarum occasionalium et harmoniae praestabilitae ad animi corporisque unitioem explicandam inventa, ad finem inepta sunt, et in se falsa probantur.* Prioris systematis expositio. Idem rejicitur, quia 1° physicam ac substantialem corporis animaeque unitioem penitus aufert-2° supponit nullam esse causarum secundarum activitatem, ipsisque spiritibus vim corpora movendi competere non posse-3° conscientiae repugnat. Alterum systema exponitur. Rejiciendum esse ostenditur, quia 1° tollit physicam unionem et naturae humanae unitatem-2° repugnat conscientiae 3° destruit omnem libertatem-4° arbitrium est, et idealismo aperit viam-5° vires, quas tribuit corpori, absurdae sunt. PROP. VI. *Systema quoque physici influxus, seu causalitatis, nec animae corporisque unitioem explicat, nec a gravibus difficultatibus est immune.* Nam 1° tollit humanae naturae unitatem-2° non bene cohaeret cum sensu intimo-3° gratuito et falso statuit, corpus in animam agere, et ita agere, ut vim ejus perceptivam et appetitivam ad actum moveat 85
- ART. V. *Sitne anima humana forma corporis, et quomodo.* PROP. VII. *Anima rationalis humani corporis est forma.* Nam 1° materiae ac formae notiones ab aristotelicis traditae corpori et animae omni ex parte quadrant-2° proprietates compositi ex materia et forma homini conveniunt. Anima hominis est forma corporis vera-per se immediate-et essentialiter. Non tamen ideo ipso esse corporis, qua tale, ab anima dependet. Non est admittenda in corpore forma corporeitatis, nec formae partiales singularum partium. Materia quam anima informat, est corpus organicum. Nulla alia forma est in homine praeter animam rationalem. Anima dici potest forma substantialis. Peripatetici errabant, solum analogiae nimis extensae vitio. Animam rationalem formam esse humani corporis pluries Ecclesia definivit. Proprium harum definitiois objectum. Quae sententia in his subsit iis vocibus: *forma corporis.* Quamtae reliquerint opinandi libertatem 89
- ART. VI. *De humanae personae identitate.* Lockii hac in re deliramenta. PROP. VIII. *Humanae personae identitas non est sita in conscientia, seu in conscientiae extensione.* Conscientia est me-

dium quo identitas propriæ personæ cognoscitur. Proposita opinio plurimas continet absurditates-et conceptui personæ repugnat. PROP. IX. *Humanæ personæ identitas ex his tribus conjunctim, consurgit: 1° ex identitate absoluta, quoad animæ substantiam; 2° ex identitate physica, vegetaliū propria, quoad corpus; 3° ex identitate modi quo binæ substantiæ simul unitæ sunt.* Nam substantia composita eadem manet, manentibus iisdem partibus, et eadem conjunctionis ratione. Quæ identitas animæ, quæ corpori conveniat. Hypothesis quædam Bonneti rejicitur. 95

CAPUT IV. DE ANIMÆ HUMANÆ ORIGINE.

ART. I. *De originis modo.* Errores Pythagoræ et traducianorum.

PROP. I. *Error est absurditate plenus, animam humanam e divina substantia decerpi; aut ab ea utcumque dimanare.* Nam si esset de substantia Dei, nec vitari, nec mutari utcumque posset. PROP. II. *Anima humana non est ens a se, sed ab alio.* Est enim finita, mutabilis, et proinde contingens. PROP. III. *Animæ humanæ non propagantur per traducem.* Nam non possunt educi a corpore, quia hoc est materiale et compositum, nec ab anima, quia partibus caret. Non possunt produci actione corporis, quia hoc nonnisi in præexistente materia agere potest, nec actione animæ, quia ad hoc requireretur vis infinita. OPP. 1° Si corporum elementa essent simplicia, non videtur absurdum, aliquid ex iis in prolem transmitti, et intelligentia ac voluntate a Deo donari. 2° Si parentes animam proli non communicant, hominem non generant, sed solum corpus. 3° Filii solent habere eandem indolem et propensionem ac genitores. Respondetur. PROP. IV. *Anima humana produci nequit aliter, quam per creationem ex nihilo.* Nam est substantia simplex. Hinc anima humana a Deo immediate procedere debet. 98

ART. II. *De originis tempore.* Variæ philosophorum opiniones. PROP. I. *Animæ humanæ nec ante mundum corporeum, nec in mundi exordiis, nec ante corpora quæ ab iis informanda erant, productæ sunt.* Nam 1° Deus res constituit in perfecto statu suæ naturæ. 2° ea doctrina importat unionem animæ cum corpore non naturalem esse, sed accidentalem. 3° Sive animæ ante corporis informationem vixisse dicantur, sive non, in graves difficultates inciditur. 4° Doctrina de animarum præexistentia nulli nititur fundamento. Refelluntur, quæ ad hunc errorem utcumque fulciendum afferri solebant. PROP. II. *Irrationabiliter prorsus asseruere Platonici et Origeniani, animas hominum corporibus inclusas fuisse in anteactorem scelerum pœnam.* Nam 1° animæ conjunctio cum corpore non esset naturalis, sed violenta. 2° Consideratio humani corporis et totius mundi non iram conditoris, sed benevolentiam ostendit. 3° Si corpus esset animæ carcer, homo naturaliter vitam hanc non amaret. 4° Hujusmodi pœna esset injusta et inepta. Dolores et ærumnæ, quibus anima corpori conjuncta subijcitur, difficultatem non faciunt. PROP. III. *Improbanda quoque est Leibnit-*

zii opinio de animarum præexistentia in corpusculis seminalibus. Nam 1° In hac opinione nulla proprie est generatio hominis, nulla mors. 2° reddi nequit ratio cur seminalia corpuscula crescant. 3° absurde supponitur, rationem esse animæ humanæ accidentalem. PROP. IV. *Pythagorica metempsychoseos doctrina inter humanæ mentis aberrationes merito adnumeratur.* Nam 1° ea supponit animæ cum corpore unionem violentam esse ac pœnalem. 2° nec probatur, nec probari potest. 3° pœnam omnino irrationalem et injustam animæ inflictam ponit. 4° Absurde asserit animam nostram belluino corpori æque ac humano conjungi posse. PROP. V. *Anima humana creatur quum corpori conjungenda est.* Deducitur ex dictis. Quo tempore animam corpori conjungi dicendum sit. 102

CAPUT V. DE ANIMÆ HUMANÆ IMMORTALITATE.

ART. I. *Utrum anima possit a corpore separata esse et vivere.* PROP. I. *Anima humana potest a corpore separata existere ac vivere.* Potest existere, quia est substantia a corpore distincta-potest vivere, quia potest intelligere et velle. Nam nec potentia nec objectum illi deest. Dependens cogitationis a sensatione et phantasmatum non sequitur ex natura intelligentiæ, sed ex præsentis animi statu. 110

ART. II. *Utrum anima ab aliqua vi creata destrui possit.* PROP. II. *Anima humana a nulla vi creata potest existens vilique privari.* Nam 1° anima perire nequit nisi per annihilationem. 2° dum existit, vi cogitandi et volendi privari non potest. Deus absolute vult animam post separationem a corpore existere ac vivere. OPP. 1° Omne quod oritur perire potest, et quod est contingens tendit in nihilum. 2° Anima habet suos morbos, morbi autem sunt corruptionis initium. 3° Potest anima per successivam remissionem in gradu suæ realitatis evanescere et in nihilum abire. 4° Revera anima interdum suas facultates amittit. Solutiones. 112

ART. III. *Utrum anima a corpore separata reipsa vivat.* PROP. III. *Anima humana post separationem a corpore superstes vivet.* Probatur 1° inductione. 2° sibi suisque attributis debet Deus ut eam conservet. 3° ex desiderio felicitatis. 4° ex comparatione cum brutis. 5° ex naturali hominis inclinatione ad virtutem et societatem. 6° ex Dei sanctitate. 115

ART. IV. *Utrum anima sit futura immortalis.* PROP. IV. *Anima humana post separationem a corpore perpetuo existet ac vivet.* Probatur 1° quia nulla est ratio cur Deus eam aliquando annihilaret; imo plura contrarium suadent. 2° ex naturali desiderio durationis perpetuæ. 3° ex desiderio perfectæ felicitatis. 4° ex communi consensu. 119

ART. V. *Difficultates.* Anima non potest funeri superesse; Nam 1° forma non potest existere extra subjectum. 2° per mortem cessat animæ finis, qui est corporis informatio. 3° animæ belluarum in morte annihilantur. 4° anima sine corpore esset

ens incompletum. Animi immortalitas non potest philosophice demonstrari; quia 1° dependet a libera creatoris voluntate-2° Deus non tenetur mercedem ullam virtuti rependere-3° virtus sibi ipsi præmium est-4° nulla est proportio inter brevem hujus vitæ militiam et felicitatem æternam. Si futura superasset vita, homines mortem non timerent. Argumentum ex desiderio felicitatis nihil probat; nam 1° multa sunt naturalia desideria quæ non implentur-2° si illud admittatur, sequitur quod vel animæ quoque impiorum felices sint futuræ, vel non sint futuræ immortales. Singulis respondetur.

122

ART. VI. De pœnæ futuræ æternitate. Quæstio de pœnarum duratione ex divina potissimum revelatione solvenda est. Ipsa tamen ratio sibi relicta pœnarum æternitatem validissime suadet. Nam 1° peccato debetur pœna aliquatenus infinita-2° qui graviter peccat, se constituit in inordinatione ex se irreparabili-3° vita futura est terminus hujus vitæ, quæ via ad eam est-4° ut in hac vita Deus maxime misericordiam ostendit, ita in altera justitiam-5° idque hominis conditio in primis postulat. Opp. 1° Æternitas pœnarum pugnat cum bonitate, et justitia Dei infinita-2° Si qui sunt perpetuo infelices futuri, in his felicitatis desiderium inutile esset, ac mendacio simile. Solutiones

124

LIBER TERTIUS.

CAPUT I. DE ANIMÆ POTENTIS IN GENERE.

ART. I. Quæstiones variæ. Quomodo cognoscatur potentiarum distinctio actuum diversitas et pluralitas ab agentis limitatione promanat. Hinc plures in anima sunt facultates. Quid sint apud veteres *totum potentiale* seu *potestativum*, et *partes potentiales* seu *virtutis*. Quodnam sit subjectum humanarum facultatum. Potentiæ sive animi sive conjuncti sunt aliquo modo activæ, aliquo modo passivæ-quædam tamen magis activæ quam passivæ; aliæ contra. Potentiæ conjuncti inadæquate ab animæ substantia distinguuntur-potentiæ quæ sunt in anima, a tota animæ virtute, et hinc ab ejus substantia distinguuntur et ipsæ inadæquate. Animæ virtus non est divisibilis secundum se, sed solum secundum ejus terminationes. Potentiæ animæ dimanant ab ejus essentia per meram resultantiam

130

ART. II. Animæ potentiarum partitio. In vita tum animali tum intellectuali distinguendæ sunt facultates *cognoscendi*, *appetendi* et *exsequendi*. Facultas cognoscendi et appetendi est vel *sensitiva* vel *intellectiva*. Utraque cognoscendi facultas complectitur facultates *apprehensivas* et *conservativas*

134

CAPUT II. DE SENSU INTIMO.

ART. I. De sensu intimi objecto. Falsæ quorundam opiniones. Prop. I. *Sensus intimus non solas subjecti affectiones, sed ipsum quoque subjectum attingit*. Nam 1° attingit affectiones subjecti

ut sunt in re ante mentis operationem 2° eas nobis refert ut nostras-3° secus judicare non possemus eas ad nos pertinere.

136

ART. II. De sensu sui primitivo et essentiali. Prop. II. *Sensus actualis suiipsius est animæ essentialis, et a quacunque affectione seu actu independens*. Explicatur status quæstionis. Probatur prop. 1° quia vis sentiendi seipsam est in anima semper expedita ad actum-2° si anima semetipsam semper non sentiret, nullam affectionem posset experiri ut suam. Sensus sui est in anima actus perpetuus-estque basis ac radix humanarum omnium facultatum. Absurda Fichtei assertio. Absurdum est *absolutum* pantheistarum transcendentalium. Sensus sui de medio tollit quæstionem de transitu a subjecto ad objectum-non est facultas organica

138

ART. III. De sensu proprii corporis. Prop. III. *Anima sentit perenniter suam in corpore, quod ipsi informat, præsentiam*. Nam 1° anima sentit statum in quo est-2° idipsam unicuique experientia confirmat-3° anima sensationes ad varias corporis partes refert. Sensus hic corporis merito dicitur *fundamentalis*-differt a sensu fundamentalis Condillachii-congruit cum sensu communi Aristotelis-non est animæ essentialis, sed unionis statum consequitur-neque est potentia, sed actus perpetuus. Anima immediate sentit se in iis partibus corporis quas informat se et corpus sentit per modum unius-proinde hic sensus corporis est facultas organica-sensus fundamentalis est, saltem natura, prior omnibus peculiaribus sensationibus quasdam conjuncti affectiones anima confuse sentit Prima extensionis notio

140

ART. IV. Quomodo anima seipsam cognoscat per intellectum. Duplex quæstio. Prop. IV. *Anima non intelligit se immediate ac per seipsam, sed per actus suos*. Probatur 1° ex notione animæ omnibus communi-2° si anima se per seipsam immediate cognosceret, omnis homo intelligeret animæ naturam-3° idque actu semper. Quomodo, juxta s. Thomam, sit in anima habitualis sui cognitio. Prop. V. *Anima capax est seipsam intelligendi, quia sui suorumque actuum sensum perennem habet*. Nam 1° intellectus nequit intueri actus animæ in ipsa ejus essentia-2° reflexio præviam aliquam objecti cognitionem supponit-3° intellectiva affectionum cognitio est confusa vel distincta, prouti eas confuse vel distincte sentimus. Qui actus, et quo ordine intellectuales sui cognitionem præcedant. Objectum conscientie non sunt solæ modificationes, sed subjectum modificatum. In actu conscientie subjectum ab objecto distinguitur. Quo sensu dici possit objectum conscientie esse *me percipientem non-me*. Error Cousinii

143

CAPUT III. DE SENSU EXTERNO.

ART. I. De hujus facultatis subjecto et divisione. Opiniones Platonis et Aristotelis quoad subjectum sensus. Prop. I. *Non anima sola, sed compositum ex anima et corpore facultatis sentiendi subjectum est*. Nam 1° si sola anima sensationum subjectum INSTITUTIONES, ETC. III.

23

esset, nec sui corporis mutationes, nec objecta sensationum percipere posset-2° solum compositum ex anima et corpore idoneum est sensitivæ perceptionis subjectum. Quomodo anima et corpus ad facultatem sentiendi constituendam concurrant. Externa sentiendi facultas in quinque sensus dividitur-horum diversa irritabilitas ab organis et a nervis dependet. An tactus sit unus sensus. An aliquis alius sensus ab his diversus dare possit 147

ART. II. *De sensationis natura opiniones.* Duo in sensatione spectanda. Duplex sensationum respectus. Aristotelis et scholasticorum opinio-sensatio est actus conjuncti. Species sensibiles. Qualitates sensibiles diversimode sunt in objecto, in medio, et in organo animato. Quæ sit forma cognitionis sensibilis. Sensatio est sentientis operatio. Non objecti species, sed objectum ipsum sensus percipit. Triplex cognitionis medium, *sub quo, in quo, et quo.* Qua ratione sensus dicatur potentia passiva. Cartesii circa sensationem doctrina. Quæstio inde exorta de explicanda externa sensationum realitate. Malebranchius. Leibnitzius-Kant-Ideologi-Reidius-Galuppius. Distinctio sedulo animadvertenda in hac quæstione. 150

ART. III. *Sensationis natura et objectum definitur.* PROP. I. *Objecta materialia in sensus agunt, et in hoc quod agunt, qualitatibus sensibilibus speciem in iisdem imprimunt.* Objecta materialia in sensus agere ambigendum non est Eorum impressio in organa est ipsa eorumdem species. Quo sensu veterum doctrina de speciebus impressis recipi possit. PROP. II. *Ad actum sentiendi necessario requiritur species sensibilis ab objecto in sensu organo producta.* Nam 1° objectum est principium determinans ac movens sensum-2° res cognosci nequit, nisi sit in facultate cognoscente per aliquam sui similitudinem-3° idem docet experientia quoad omnes sensus. PROP. III. *Sensatio non receptione speciei sensibilis, sed operatione aliqua eam consequente absolvitur.* Nam 1° si secus esset sensatio non esset actio immanens et vitalis-2° omni actioni materiali respondet æqualis et contraria reactio. PROP. IV. *Sensibilis cognitionis objectum non sunt species sensibus impressæ, sed sensibiles corporum qualitates, a quibus illæ imprimuntur. Has tamen qualitates sensus cognoscunt per species.* Probatur 1° quia nec principium actionis, quod sunt species, nec propria passio potest esse terminus actionis-2° quia objectum in sensatione percipimus secundum quod agit in subjecto sentiente-objecti perceptio diversa est pro diverso organorum statu, et objecti adjunctis-sensus nequit extra subjectum et objectum progredi. Sensationis definitio. Arguitur Reidius-et Leibnitzius. Confusio in quam Reidius incidit. Quæstio pontis 156

ART. IV. *Objecta quædam diluuntur.* Binæ objectionum classes. Alii dicunt, sensationem non fieri media rei imagine-nam 1° nullæ sunt imagines odorum, saporum, sonorum, qualitatuum tactilium-2° hæ imagines effici nequeunt per motus organo-

rum-3° si imago colorum in retina pingitur, plerique ignorant se eam recipere-4° deberet cognosci imago ut objecti imago, quod fieri nequit nisi prius cognoscatur objectum. Alii opponunt, in sensationibus nostræ solum affectiones directe a nobis percipi-nam 1° radii qui oculos immediate percellunt, deferunt ad oculum objecti imaginem-2° plures experiri possumus sensationes, etsi sensus nullo externo objecto percellantur-3° unusquisque sibi conscius est se proprias affectiones in sensatione percipere. Singula diluuntur 162

ART. V. *Qui sensus sint discretivi objecti a subjecto.* PROP. V. *Tactus certe est discretivus objecti a subjecto, non tamen solus, sed etiam visus.* Reliqui vero sensus, quamquam ipsi quoque suum objectum cognoscant, non tamen ipsum a subjecto per se clare discernunt. Nam 1° extensum resistens tangenti se offert, ut ab eo distinctum. Arguitur Tracys Difficultas incidens-2° Visus extensionem percipit a subjecto distinctam. Cæcus Chelzedenii expenditur factum, et rejicitur Condillachii deductio-3° Reliqui sensus per conjunctionem cum visu et tactu discretivi fiunt. Sensatio est proprie dicta cognitio. Intuitu sensibilis a Kantio absurde explicatur 165

ART. VI. *Quomodo intellectus corpora cognoscat.* PROP. VI. *Intellectus corporum ideas immediate format sensationum ope; externorum vero corporum existentiam cognoscit ratiocinio.* Idea rudimentalis corporum quomodo perficiatur. Idea generica-idea specificæ. Elementa ratiociniorum, quibus corporum existentia ab intellectu cognoscitur. Pueri non sunt horum ratiociniorum incapaces 169

CAPUT IV. DE IMAGINATIONE AC MEMORIA SENSITIVA.

ART. I. *Notiones experimentales.* Hujus tractationis obscuritas. Quid sit phantasia, imaginatio et memoria sensitiva. Non solum externas, sed etiam internas sensationes reproducere possumus. Reproductio requirit attentionem sensationi adhibitam. De recognitione sensationum. Ejus causa et associatio. Quandoque etiam causa organica. Reproductio vel naturalis est vel quæsita. Reminiscencia. Compositio phantasmatum spontanea, et artificiosa. Reproducendi facultas capax est habituum. Vis phantasmatum in simulanda evidentia. Delirii ac dementiae origo 171

ART. II. *Hypotheses ad facta explicanda.* ASSERTIO I. *Ex affectionibus ordinis sensitivi quas experimur, manet in sentiente determinatio ad sentiendum, non quidem actu, sed secundum quamdam dispositionem cujus ope reproduci possit actus, ubi debite conditiones ponantur.* Dici nequit, manere in cerebro species impressas a sensationibus, earumve objectis. ASSERTIO II. *Sensationis reproductæ sedes verisimiliter est organum, in quo primo habita est.* Probatur ex harum sensationum indole-ex sensu intimo-ex earum effectibus. ASSERTIO III. *Dispositio, quæ est in organo animato, ad actum reproducendum, hunc non reproducit, nisi per motum fluidi nervi in cerebro inchoatum.* Probatur ex mecha-

nismo sensationis-experientia-sensu intimo. ASSERTIO IV. *Id quod hanc cerebri actionem determinat, præter dispositionem in eo quoque a sensatione relictam, est præcedens aliqua sensatio, aut etiam phantasma; in hmine vero etiam voluntas.* Ex binis enim speciebus associatis fit una species. ASSERTIO V. *Memoria sensitiva nihil aliud esse videtur, quam sensus inter-nus simultaneous sensationis præsentis et phantasmatibus ejus vi reproducti, una cum adjunctis sensationis præteritæ.* Nam facultates mere sensitivæ ultra procedere nequeunt et illud sufficit ad explicanda phænomena hujus ordinis . . . 175

CAPUT V. DE HUMANO INTELLECTU.

ART. I. *De distinctione intellectus a sensu.* Sensitivæ et materialistæ. Sensismus Lockii et Condillachii. PROP. I. *Præter sentiendi facultatem, est in anima humana superior quædam cognoscendi facultas, quam intellectum dicimus.* Nam 1º secus homo a brutis essentialiter non differret. 2º Est in homine facultas cognoscendi, quæ per organum corporeum exerceri nequit. 3º Ingens et essentielle discrimen est sensationum et idearum. 4º Sine facultate quæ sensum excedat, nec veritates necessariæ cognosci, nec certitudo haberi posset. 5º Juris et officii notiones non essent possibiles. Ultima sensismi conclusio. PROP. II. *Nisi cognoscendi facultas sensu superior animæ tribuatur, per operationes omnes quas illi Lockius attribuit, e sensibilibus qualitatibus ambitu eadem emergere non posset.* Operationibus quas Lockius animæ tribuit, nequeunt apprehendi res quæ sensibiles non sunt relationes et universalia. PROP. III. *Turpiter hallucinatur Condillachius, quum asserit, omnes animæ facultates ad sensationem transformatam reduci.* Nam 1º etiam in hac sententia admittenda est in anima vis activa a sensu diversa. 2º attentio, judicium et ratiocinium ad sensationem utcumque transformatam reduci non possunt. . . 178

ART. II. *De objecto intellectus.* Objectum quo et objectum quod hoc tripliciter spectari potest. PROP. I. *Formalis ratio quam intellectus apprehendit, est rerum essentia.* Qua ratione essentia dicatur intellectus objectum. Probatur prop. 1º ex eo quod intellectus ea quæ cognoscit, non relative, sed absolute cognoscit. 2º ex intellectu præ sensu præstantia 3º ex conceptu entis, quem omnes mentis conceptus continent. Intellectus etiam accidentium et qualitatuum sensibilibus essentiam cognoscit. PROP. II. *Objectum adequatum intellectus, si ejus extensio spectetur, est omne ens.* Nam omne ens aliquam habet essentiam. PROP. III. *Nihilominus objectum intellectui humano, in eo, in quo nunc est, statu, primo ac per se proportionatum, est rerum materialium essentia.* Nam hæc primo ac per se ei cognoscendæ offerentur. PROP. IV. *Objectum intellectus, prouti hoc nomine intelligitur terminus, in quem intellectus tendit, est ipsius intellectus veritas.* Probatur ex natura actus intelligendi. Intellectus, dum rerum essentias apprehendit, nunquam est ex se a rebus difformis. Quum vero reflexe percipit, aliquam

ideam esse rei conformem, assentiri cogitur-veritas aliter dicitur objectum intellectus apprehendentis, aliter intellectus judicantis. . . 185

CAPUT VI. DE IDEARUM NATURA ET ORIGINE.

ART. I. *Exponitur primo systema aristotelicum* monitum necessarium. Præcipua systemata de origine idearum Systematis aristotelici expositio Intellectus agens, et intellectus possibilis. Species intelligibiles Abstractio a phantasmatibus. *Id quod intellectus intelligit, et id quo ad intelligendum movetur.* Intellectio, et verbum mentis. Quomodo intellectus seipsum cognoscat-et singularia. Memoria intellectiva. Quomodo res incorporeas cognoscamus. Dependuntia intellectus a phantasia. Quomodo intellectualis cognitio ortum habeat a sensu. De illo effato: *nihil est in intellectu, quod prius non fuerit in sensu* . . . 189

ART. II. *Idearum origo juxta exposita principia explicatur.* PROP. I. *Perceptiva virtus intellectus nostri determinatione aliqua indiget ad hoc, ut actum suum exerat.* Ad eam autem determinandam res materiales ex se ineptæ sunt; sensiles quoque representationes atque imaginationis phantasmatum sunt insufficientia. 1º Virtus perceptiva intellectus nostri est indifferens ad quidlibet intelligendum. Determinatio qua ad agendum indiget, vocari potest cum veteribus species intellectualis. 2º Objectum materiale nec agere in intellectum, nec intime illi uniri potest. 3º Representatio sensilis et phantasma non sunt omnino immaterialia-eorum autem objectum non est intellectui conjunctum, nec est proprium ejus objectum. PROP. II. *Dicendum nihilominus phantasma requiri ad hoc, ut perceptiva virtus intellectus ad sensibilia percipienda determinetur.* Probatur 1º quia anima per phantasmatum cum externis objectis primo conjungitur-2º ex indifferentia intellectus-3º ex experientia. PROP. III. *Supponi potest perceptivam intellectus virtutem ad sensibilibus essentiam percipiendam, ipsius animæ virtute, per abstractionem a sensibilibus representationibus determinari.* Duplex abstractio. Explicantur aristotelicæ quædam loquendi formulæ. Hypothesis proposita est possibilis. PROP. IV. *Si hæc hypothesis recipiatur, explicatur optime quomodo intellectus noster objecta materialia percipiat.* Probatur. Quomodo cognitio intellectualis ortum habeat a sensu. Duplex intellectus potentia, abstractiva et perceptiva. Lumen intellectuale quid sit. . . 195

ART. III. *De verbo mentis.* PROP. V. *Intellectiva perceptio non est mera passio mentis, sed operatio.* Per hanc enim operationem mens in seipsa verbum seu ideam producit, qua rei quam concipit, essentiam exprimit. 1º Intellectio postulat aliquid præter speciei receptionem-secus non esset actus vitalis. 2º Terminus actus intelligendi non est aliud nisi verbum mentis, objectum exprimens-secus intellectus non posset percipere res absentes, aut separatas a conditionibus, quæ existentiam necessario comitantur. In productione verbi mens est simul activa et

passiva. Discrimen inter *verbum*, *ideam*, et *speciem expressam*. An verbum a cognitione distinguatur. Terminus cognitionis. Verbum est id quo aliquid intelligitur. Carpitur Reius. Ideæ possunt esse objectum cognitionis reflexæ . . . 199

ART. IV. *De cognitione singularium et universalium*. Scholasticorum opiniones circa cognitionem singularium materialium. Quomodo nos singularia ab invicem discernimus. Ratio inefficax. Universale directum et reflexum. PROP. VI. *Primæ conceptiones humani intellectus sunt non modo universales, sed maxime indeterminatæ*. Probatur experientia, et ex naturali intellectus nostri conditione. PROP. VII. *Negari nequit, intellectum nostrum saltem post aliquantam experientiam, ita singularia cognoscere, ut proprios distinctosque eorum conceptus efformet* id probant iudicia singularia-et præstantia intellectus præ sensu ac phantasia. PROP. VIII. *Intellectus noster singularia materialia per proprias ipsorum species cognoscere potest*. Probatur 1^o ex cognitione entium materialium universalium-2^o ex conceptuum singularium elementis 3^o ex cognitione animæ separatae. PROP. IX. *Dicendum nihilominus, conceptus quoslibet intellectus, in se spectatos, rationem aliquam universalem naturæ suæ semper exprimere. Hinc ut intellectus singulare, quæ tale, cognoscat, necesse est, ut ad sensationis seu præsentis seu revocatae factum se converteret* Primi conceptus communissimi sunt. Conceptuum vero singularium elementa ad statum intelligibilem evecta pluribus conveniunt. Intellectus a facto præscindit. Singulare, quæ tale, cognoscitur quum intellecta individui entitas ad factum reducitur-per conversionem ad sensationem. Nam factum, ut factum sensu attingitur. Terminus singularis ex demonstratione hoc ipsum probat. Sensus intimus actualis est essentialiter factum. Proprium intellectus nostri objectum est universale directum. Cur rationes ab intellectu perceptæ sint necessariæ, immutabiles, æternæ et aliquatenus infinitæ. In quo consistat abstractio elementis idealis a phantasmate. Quo ordine intellectus universalis cognoscat, tam in ordine directo, quam in reflexo . . . 202

ART. V. *De cognitione immaterialium*. Immaterialia duplex: secundum rem, et secundum mentis considerationem. PROP. X. *Actus sive conjuncti proprios, sive spirituales, intellectus percipit determinatione accepta ab intimo sensu*. Nam sensus intimus, et intellectus ad eandem animam pertinent. Duplex in intellectu internarum affectionum cognitio. Cognitio facti, et cognitio universalis. Anima seipsam cognoscit dependenter a sensibus. PROP. XI. *Idea Dei est idea deducta ex rebus finitis; ejus elementa sunt ideæ perfectionum finitarum, adjecta notionem excessus, et negationem imperfectionum omnium*. Duplex Dei conceptus, confusus et explicitus. De utroque probatur assertio. Quomodo infinitum per finitas perceptiones concipi possit. PROP. XII. *Rationes rerum immateriales mens nostra vel cognoscit per species abstractas a sensationibus, sive internis*

sive externis, vel ex aliis immaterialibus rationibus per comparisonem et iudicium componit. Nam aliunde eas cognoscere non posset. Præcipuarum idearum origo explicatur . . . 208

ART. VI. *De dependentia intellectus ab imaginatione*. Status quæstionis definitur. PROP. XIII. *Intellectus humerus operari in hoc suo statu non potest, nisi phantasia cooperante juvetur*. Probatur experientia-ex humano sermone-ex nexu intimo inter phantasiam et intellectus operationes. Non intellectus, sed phantasia ad phantasmata convertitur. Quæ phantasmata rerum immaterialium cogitationem comitentur. An vocabulorum phantasmatis semper utamur . . . 211

ART. VII. *De memoria intellectiva*. ASSERTIO I. *Certum est in humana mente memoriam aliquam intellectivam esse*. Patet experientia. ASSERTIO II. *Memoria intellectiva a perceptiva intellectus facultate non distinguitur*. Nam ideas conservare proprium videtur illius facultatis quæ illas efformat. ASSERTIO III. *Hinc determinatio ab intellectu recepta, postquam hic ad actum transit, in eo manet, saltem aliquo tempore. Manet autem ad modum habitus; vel etiam ad modum actualis determinationis ad cognitionem confusam*. Primum ex dictis probatur; alterum illustratur similitudine. ASSERTIO IV. *Ideæ olim habite reproducentur reproductione phantasmatum iis respondentium* Probatur ex dependentia intellectus a phantasia, et ex experientia. ASSERTIO V. *Recognitio fertur per se in præteritis subjecti actus; ac iis mediantibus in eorum objecta*. Nam recognitio est præteritorum: prætereunt autem per se actus, non eorum objecta . . . 213

CAPUT VII. DE ONTOLOGISMO.

ART. I. *Exp. nitur ontologorum doctrina*. Ontologismi auctores. Generale hujus systematis principium. Systema Malebranchii. Cognitio per lumen, et cognitio per sensum. Perceptio simplex, iudicium et ratiocinium. Sensationes et phantasmata. Deus lumen mentis. Dei cognitio non est per ideam, sed immediata ac directa. Quomodo per lumen cognoscamus tum res corporeas, tum veritates ac leges æternas. Gioberti systema. *Intuitus idealis*. Ideæ perceptio directa et reflexa. Objectum intuitus. *Ens crea s existentias*. Formula idealis. Cognitio reflexa per vocabula. Ideæ absolute et relative. Synthesis objectiva. Aliorum ontologistarum opiniones. Communia horum omnium placita indicantur. Mitior quædam ontologismi forma . . . 215

ART. II. *Ontologismus refellitur*. PROP. *Ontologismi theoria falsa est et periculosa*. Ontologismus ad has duas assertiones reducitur. 1^o Deum immediate a nobis cognosci. 2^o Dei visionem intellectuum omnium cognitionum medium esse, ipsumque intelligentiæ lumen constituere. Prior falsa est; quia ei adversatur eonscientia-et ex ea sequeretur nos Dei essentiam immediate cognoscere, quod ipsi ontologi negant. Altera vero 1^o humani intellectus notionem destruit-2^o idearum originem inexplicabilem facit-3^o supponit Dei essentiam a nobis cognosci. Ontologismus est periculosus; quia 1^o non facile con-

ciliatur cum catholica sententia docente, Deum in se cognitum esse beatitudinis objectum-2° peccati possibilitatem tollere videtur-3° ad rationalismi conclusiones ducit-4° viam ad pantheismum aperit. Peculiares Malebranchii et Giobertii errores notantur 220

ART. III. *Expenduntur ontologismi fundamenta.* Dicunt ontologi. I. Ens infinitum percipi nequit per ideam ab ipso distinctam: nam 1° quaelibet idea ab ipso diversa est aliquid particulare et finitum-2° infinitum cognosci nequit ex finitorum entium consideratione-3° idea entis in genere, boni, pulchri nullum aliud objectum habere possunt, nisi infinitum. II. Entia finita cognosci nequeunt, nisi prius Deus cognoscatur: nam 1° ens finitum non potest cognosci ut ens sic determinatum, nisi prius cognoscatur ens ut ens-2° varios entitatis gradus cognoscere non possumus, nisi per comparisonem cum summa perfectione-3° ens contingens cogitari nequit, nisi ens quoque absolutum cogitetur-4° nequit cognosci creatura, nec esse ejus proprium, nisi cum Deo conferatur. III. Universalis non possunt cognosci, nisi Dei ideæ videantur-nam 1° quæ sunt extra Deum singularia sunt et caduca-2° qui videt ideam universalem, videt id quod plura participant-3° universale increatum est. IV. Deus, qui nobis est intime conjunctus, suas nobis ideas immediate manifestat: nam 1° secus faceret per plura quod facere posset per pauciora-2° solum in hac hypothesi palam fit omnimoda creati spiritus a Deo dependentia-3° solus Deus in animam immediate agere potest-4° Deus talem debuit intelligentiam efficere, quæ nihil intelligat, nisi quatenus Deum intelligit. V. Animo non potest inesse virtus, quæ ideas producat: nam 1° ideæ sunt perfectiores corporibus, quæ Deus produxit-2° ideæ ex impressionibus materialibus formari nequeunt-3° animus ideas producere non posset nisi prius rem producendam cognosceret. VI. Ratio cujus omnes participes sumus, est ipsa ratio Dei-nam 1° secus nunquam certi esse possemus, omnes homines easdem veritates videre, quas unusquisque videt-2° sentimus omnes, veritatem a nobis non creari sed recipi-3° veritates sunt æternæ, necessariae et immutabiles-4° nos intelligimus veritates quas Deus intelligit: quod autem Deus intelligit, in Deo est. Refelluntur singillatim omnia 226

CAPUT VIII. DE SYSTEMATE IDEARUM INNATARUM.

ART. I. *Varia hujus systematis formæ exponuntur.* Plato-Cartesius-Cartesiani-Leibnitzius, Wolfius et Kantius-Rosminii systema exponitur. Omnes ideæ ens aliquo modo determinatum exhibent. Ideæ concrete et abstractæ. Idea entis possibilis nobis insita. Ejus determinationes per sensum. Quæ sit intellectualis rei perceptio juxta Rosminium-universalizatio-abstractione-elementum cognitionum formale et materiale 254

ART. II. *Expenduntur theoriæ Platonis et Cartesii.* PROP. I. *Intellectus humanus res non cognoscit per species ingenas.* Hæc opi-

nio 1° falsis innititur hypothesibus. 2° adversatur naturali animæ cum corpore conjunctioni. 3° explicare nequit quomodo corpus animæ cogitationem impediatur. Quomodo qui de aliqua re, quam nunquam noverit, interrogetur, de ea respondere illico possit. PROP. II. *Nullæ sunt ideæ innatæ.* Non prouti a Cartesio intelliguntur; quia id est contra experientiam-et nulla est idea quæ ad adventitias aut facultatis revocari nequeat. Non ut intelliguntur a cartesianis; quia horum opinio supponit, ideas a perceptione realiter distingui-est contra sensum intuum-non sufficit ad idearum originem explicandam-nec hujusmodi ideæ innatæ necessariae sunt. Opponunt cartesiani: 1° Humanæ menti essentialis est aliqua actualis cogitatio.-2° anima humana est Dei imago.-3° homo Deum naturaliter cognoscit.-4° ideæ, quæ in omnibus omnium ætatum hominibus reperiuntur, a natura sunt inditæ. Singula diluuntur 259

ART. III. *Expenditur systema Rosminii.* PROP. III. *Rosminii de idearum origine sententia multiplici ex capite rejicienda est.* Nam 1° Ex eo quod ens in omni idea contineatur, et ex proprietatibus quas illi auctor adscribit, non sequitur, ideam entis esse innatam. 2° Hoc systema idearum originem non explicat. 3° Ad absurdas conclusiones nos adducit. 4° Difficile est definire, quid sit ens ideale. Præcipuum Rosminii objectum, ex ideæ universalis genesi, diluitur distinctione facta inter universale directum ac reflexum, interque abstractionem simplicem et comparativam 245

CAPUT IX. DE TRADITIONALISMO.

ART. I. *Traditionalium systema exponitur.* Hujus systematis auctor, finis ac summa. Primitivi traditionalismi dogmata-mitiores quedam traditionalismi formæ. Traditionalistæ aliorum quoque circa idearum originem systematum principia admittere aliquatenus possunt 247

ART. II. *Traditionalismus refellitur.* PROP. I. *Absurde assertitur, primas ideas universales recipi per verbum, aut signum quodcumque arbitrarium.* Nam 1° hæc doctrina est systema sensationis transformata. 2° Quodlibet signum nullum intelligentiæ subsidium afferre potest, nisi mens rei significatæ ideam possideat. 3° Signa artificialia a signis naturalibus vim suam primo accipiunt, et vim efformandi ideas in mente supponunt. 4° Quum id quod vocabulo significatur, est res prorsus insensibilis, requiruntur in mente ideæ identitatis et diversitatis, ad vocabulum intelligendum. PROP. II. *Absurdum est pariter, nullam veritatem ab humana mente cognosci posse, nisi per divinam revelationem traditione transmissam.* Nam 1° fides sine aliqua prævia scientia est impossibilis. 2° in eo systemate error esset homini aliquando physice necessariis-et 3° tollitur discrimen inter veritates rationales et revelatas.-4° homo ab homine instrui nequit, nisi ratio discantis vi sibi propria veritatem cognoscere possit, atque adeo nisi aliquid sciat ante-

quam instruat. PROP. III. *Falso asseritur, revelationem traditione communicatam physice necessariam esse, saltem ad ideas ac veritates, quæ ad ordinem seu religiosum, seu moralem pertinent assequendas.* Nam 1° secus plurimi hominis in errore necessario detinerentur. 2° Instructio nil valet, nisi audiens vi sibi propria veritatem intelligere possit. 3° Si ratio ideas universales primitivas acquirit, et principia quæ ex iis emergunt, vi sua deprehendit, eadem supremi Numinis existentiam, et ordinis moralis principia potest cognoscere. PROP. IV. *Dici nequit, verbum externum, aut signum quodcunque arbitrium esse conditionem necessariam ad hoc, ut homo ad expeditum suæ rationis usum, seu ad claras distinctasque cognitiones perveniat.* Nam 1° necesse non est, ut mens ad objecta contemplanda alterius monitu dirigatur. 2° Signum externum nequit esse conditio necessaria ad hoc, ut mens reflexionem exerceat. 3° Ad ideas acquirendas naturaliter homo incitatur a sensationibus et phantasmatibus; ad veritatis apprehensionem ac judicium ab evidentia. PROP. V. *Vocabula, quanquam ad intellectus perfectionem promovendam sint summopere utilia, non sunt tamen illi ad cogitandum absolute necessaria.* Vocabula præ cæteris phantasmatibus intellectus operationibus juvands opportuna accidunt-memoriæ maxime juvant-inter signa principatum obtinent-scientiarum et traditionum thesauros communicant et transmittunt. Non tamen ad cogitandum sunt necessaria; nam 1° id ex dictis liquet 2° plura cogitamus, quin vocabula quibus ea significantur, didicerimus-aut 3° memoria teneamus-4° celeres quasdam apprehensiones vocabulorum reproductione exsequi est impossibile-5° plures affectiones internas, vocabulis exprimere non possumus. Quæstio, utrum homines ex se loquelam aliquam invenire queant, ad controversiam cum traditionalibus non pertinet. Nec est quæstio de facto sed de hypothese quadam possibili. Quid de ea asseri cum certitudine possit; quid in utramque partem disceptari . 250

ART. III. *Satisfit objectis.* Arguunt 1° ex factis. Naturæ lex est, ut ad ratione usum homo perveniat rationis alterius auxilio. Pueri qui extra hominum societatem adoleverunt, et surdumuti. Arguunt 2° ex analogia. Vires omnes quæ in rerum natura vigent, externo aliquo incitamento egent, ut in actum exeant. Arguunt 3° ex analysi intellectus. Homo sine signo, cogitare nequit: nam 1° constat hominem sua verba cogitare antequam suas cogitationes verbis eloquatur.-2° nobiscum ipsi, et cum Deo taciti colloquimur.-3° *verbum* mentis essential est cogitationi -4° ideæ intellectuales, vagæ et indefinitæ, solum per verbum et in verbo percipi possunt.-5° hominis cogitatio spiritali elemento et sensibili coalescat oportet . 260

CAPUT X. DE JUDICIO.

ART. I. *Sitne judicium apprehensio.* Philosophorum hac in re sententiæ. PROP. I. *Mentis judicium situm non est in apprehensione*

convenientiæ vel discrepantiæ inter ideas. Nam 1° hæc apprehensio est causa seu motivum judicii, ideoque ab ea distincta-2° apprehensio consequentiæ, est apprehensio convenientiæ, sed non est judicium-3° si judicium esset hujusmodi apprehensio, nullum esse posset judicium temerarium, et monita quæ ab omnibus philosophis traduntur ad prudenter judicandum, omni sensu carerent-4° nulla insuper essent judicia imperata-5° nullum judicium falsum esse posset-6° idem probatur ex notionibus communiter receptis de variis mentis statibus respectu veritatis-7° ex judicii nomine et expressione . 264

ART. II. *Utrum judicium sit actus intellectus, an vero voluntatis.* PROP. II. *Judicium non est actus a voluntate elicitus, sed ab intellectu.* Nam 1° judicium in suum objectum tendit sub ratione veri.-2° terminus judicii est actus essendi objectivus expressus per affirmationem, non prosequendus per voluntatem-3° sæpe judicamus contra voluntatis propensionem.-4° idem ex judicii nomine et expressione colligitur. OPP. 1° Judicium est assensus vel dissensus: assensus autem et dissensus idem est ac velle et nolle. 2° Judicium est quies quædam desiderii sciendi aliquid: desiderium autem et quies voluntatis sunt. Subditur responsio . 270

ART. III. *De judicii natura.* PROP. III. *Judicium est actus, quo mens binos conceptus in unum componit.* Probatur 1° ex humanæ mentis limitatione ac perfectibilitate. 2° Judicii terminus uno conceptu contineatur oportet. 3° In re prædicatum et subiectum sunt unum et idem objectum. 4° Constat plurimos esse conceptus, in se unos, qui pluribus judiciis compositi sunt. Etiam judicium negans dici potest compositio. Quæ sit compositionis forma, duplex verbum mentis. An et quo sensu compositio quæ fit per judicium, dici possit cognitio. Judicium est actus reflexus. Quomodo intellectus ex se ad judicandum determinetur. Rerum determinatarum conceptus formantur primo per judicium. Omnes ideæ distinctæ judicium supponunt . 272

ART. IV. *An omne judicium sit ex idearum comparatione.* Reidianorum opinio. PROP. IV. *Nulla sunt aut esse possunt legitima mentis judicia, quæ sine ulla convenientiæ vel discrepantiæ prævia perceptione, ex cæco quodam instinctu ponantur.* Nam 1° cæca hæc judicia humanæ mentis naturæ repugnant-præsertim-2° quod versantur circa veritates fundamentales.-3° hæc opinio cognitionis certitudinem subruit-4° ejusdem opinionis nullum est fundamentum. Eæ enim veritates, ob quas hic instinctus asseritur, non affirmantur, nisi quia intelliguntur. Cur rudes vulgaresque homines hæc principia distincte exponere, eorumque rationem reddere nesciant. Cousinii objecto dissolvitur . 276

CAPUT XI. DE FACULTATE APPETENDI.

ART. I. *De appetitu in genere.* Appetitus naturalis et elicitus. Duplex est in homine appetitus, sensitivus et intellectivus.

- Utriusque objectum est aliquod bonum cognitum. Appetitus est potentia partim activa, partim passiva. Discrimen inter facultatem appetendi et cognoscendi 281
- ART. II. *De appetitu sensitivo.* Quo stimulo appetitus sensitivus ad actum determinetur. Appetitus sensitivus in homine ad plura se porrigit, quam in brutis. Appetitus concupiscibilis et irascibilis. Quid sit passio. Præcipui facultatis sensitivæ actus. Passiones an sint malæ Appetitus sensitivi subjectum est compositum ex anima et corpore, radix autem anima. Nexus inter corporis statum et actus appetitus sensitivi. In homine appetitus sensitivus intellectivo subditur, non tamen quoad omnia 284
- ART. III. *De appetitu intellectivo seu voluntate.* PROP. I. *Voluntas solummodo bonum appetere potest: videlicet id solum quod ut aliquo modo bonum apprehenditur.* Probatur 1º ex ipsa appetitus natura 2º ex ejus fine 3º ex inductione. PROP. II. *Bonum omne quod appetitur, est semper aliquo modo ipsius appetentis bonum.* Probatur ex experientia, et ex natura appetitus. Actus voluntatis alii sunt circa finem, alii circa media. Voluntas in omni suo actu in finem tendit. Quidquid homo velit semper felicitatem suam implicite vult. Qui sunt voluntatis actus circa finem, qui circa media. Actus elicit et imperati 287
- ART. IV. *De humanæ voluntatis libertate.* Libertas a coactione et a necessitate. Quæ sit causa libera. Libertas indifferentiæ triplex, contradictionis, contrarietatis, specificationis. Discrimen coacti a necessario et spontanei a voluntario et libero. Actus liberi elementa sunt intentio finis ultimi, consilium seu deliberatio, electio et executio. PROP. III. *In ultimi finis intentione libertas non est.* Probatur 1º ex natura actus contingentis et ex natura manantis 2º ex analogia cum intellectu 3º ex natura finis ultimi. Fines subordinati libere appetuntur, et propter finem ultimum. Voluntas circa actuale finis appetitum est aliquo modo libera. PROP. IV. *In actibus intellectus consiliantis et judicantis nulla est intrinseca libertas.* Quia intellectus vel ab objecto vel a voluntate determinatur. PROP. V. *Executio quoque intrinsecus libera non est.* Absurdum est, libertatem non in voluntate, sed in executione positam esse. PROP. VI. *Libertas ibi solum est, ubi habetur voluntatis electio.* Libera enim determinatio solum esse potest in potentia appetente 290
- ART. V. *De libertatis natura.* PROP. VII. *Nec felicitas, nec bonum in genere electioni subjiciuntur.* Deducitur ex dictis. PROP. VIII. *Bonum infinitum intuitive cognitum necessario diligitur; in præsentia tamen vita ejus dilectio electioni subjacet.* 1º Bonum infinitum est objectum humanæ beatitudinis 2º in hac vita illud non nisi imperfectissime cognoscimus. Electionis objectum. Bona tum vera tum falsa eligi possunt. Libertas omnis vel objecti vel subjecti imperfectionem supponit. PROP. IX. *Electio non fertur necessario in id, quod ut melius apprehenditur.* Nam 1º sic

- omnis libertas destrueretur. 2º Nihil fere est, quod, sub diverso aspectu consideratum, apprehendi non possit ut melius simul et ut minus bonum. 3º Argumentum ad hominem, 4º Naturæ voluntatis repugnat, ut ad bonum finitum, licet ut melius proponatur, necessario feratur. Effugium leibnitzianorum ad præviam consultationem præcluditur. Duplex in actibus causæ liberæ distinguenda ratio, *sufficiens et determinans.* Quibus in adjunctis voluntas ad melius determinetur. PROP. X. *Ad hoc ut voluntas liberum actum eliciat, necesse non est ut a prævio judicio practico determinetur.* Nam 1º ad explicandam libertatem necessario admitti debet actus aliquis voluntatis, qui a judicio practico non determinetur 2º judicium voluntatem movere nequit, nisi ratione objecti. Quandoque voluntas a judicio practico determinatur. Judicium rationis quod electionem præcedit ac dirigit, non est judicium practicum, sed speculativum. Ad prudentem agendum requiritur judicium practicum 295
- ART. VI. *Humanæ voluntatis libertas asseritur.* PROP. XI. *Etsi actus qui a voluntate imperari dicuntur, coacti esse possint, repugnat. tamen, actus a voluntate elicitos, esse coactos.* Nam exteriora membra aliorum violentiæ subsunt actus vero elicitos ab intrinseco principio procedat necesse est. PROP. XII. *Humana voluntas libertate gaudet indifferentiæ.* Probatur 1º ex cognitione eorum quæ voluntati eligenda proponuntur 2º ex intimo sensu 3º ex communi hominum sensu 302
- ART. VII. *Difficultates.* Voluntas ab alio determinatur: nam 1º omne quod movetur, ab alio movetur 2º voluntas est indifferens ad diversa, ut intellectus 3º secus dicere deberemus: *volo quia volo*, vel *volo quia possum velle*. Si duo bona æqualia apprehendantur, et voluntas unum eligeret, sine motivo ageret, quia utriusque motiva se mutuo elidunt. Si inæqualia apprehendantur, voluntas ad bonum majus eligendum necessario determinatur; nam 1º voluntas dicitur eligere quod magis placet 2º minus bonum verum est malum 3º si illud eligeret, ageret sine ullo motivo. Libertas ex intimo sensu non probatur: nam 1º hic non actus indifferentiam, sed ipsum actum renuntiat et 2º libertatis ideam in nobis esse 3º somniantes quoque sibi videntur libere agere. 4º Actus magnetica aut lapsis existimare possent, se libere moveri 306
- ART. VIII. *De facultate motrice.* Qui motus ab hac facultate dependant. ASSERTIO I. *Facultas motrix a facultate appetendi distinguitur.* Probatur 1º ex analogia 2º ex diverso modo quo utriusque facultatis actus absolvuntur 3º quia secus actus appetitus semper ac necessario tenderet ad motum passivum 4º plura appetimus, quæ exsequi non possumus. ASSERTIO II. *Subjectum in quo residet facultas motrix, sunt muscoli animati.* Probatur experientia et observatione. De dependentia vis motricis ab appetitu, dicendum 1º non omnium muscutorum vim motricem appetitui subjectam esse 2º appetitum sensiti-

vum ex se sufficere ad motricem vim determinandam ad actum: non tamen imperio proprie dicto-facultatem motricem in homine sæpe determinari ad actum vi habitus-si voluntas renuat, nec appetitum sensitivum, nec habitum quemlibet sufficere ad facultatem motricem determinandam-facultatem motricem a voluntate determinari, saltem ut plurimum, mediante motu appetitus sensitivi: posse tamen a voluntate absque hoc medio determinari. Voluntas in imperandis actibus facultatum sibi subjectarum se habet ad modum causæ moralis, non ut causa physica 311

THEOLOGIA.

Tractationis objectum-præstantia et partitio 315

LIBER PRIMUS.

CAPUT I. DE DEMONSTRATIONE EXISTENTIE DEI.

ART. I. *Utrum Dei existentia debeat ac possit demonstrari.* Dei existentia licet sit per se nota secundum se, non tamen est quoad nos. Debet ergo demonstratione cognosci. Potest autem demonstrari a posteriori, at non a priori. Quibusdam difficultatibus satis fit. 316

ART. II. *De argumentis hanc in rem afferendis.* Quænam præ cæteris argumenta seligantur. Argumentum quod vocant quasi a priori, vel a simultaneo, utpote æquivocationi innixum, rejicitur. Quomodo ens infinitum non existens repugnet, et quid exinde inferri legitime possit. Dei essentiam nullus hominum in hac vita intuetur. Athei negativi et positivi. Quid in hac quæstione Dei nomine intelligamus 319

CAPUT II ARGUMENTUM METAPHYSICUM.

ART. I. *Exponitur argumentum.* PROP. I. *Cum repugnet omne id quod est, esse productum et contingens, infertur ens improductum et necessarium existere.* Nam 1º si omnia quæ sunt essent producta, vel dicendum esset aliquid a nihilo fuisse productum, vel duo se mutuo produxisse, vel in indefinitum procedi posse. 2º Si ens necessarium non existeret, nihil unquam possibile esset. Deus est ens a se. In Deo essentia et existentia sunt unum idemque 325

ART. II. *De effugio atheorum ad seriem infinitam.* PROP. II. *Series infinita contingentium, independens ab ente necessario, plane repugnat.* 1º quia infinita est et successiva-ex una parte limitem habet, imo semper habuit-semper augetur-plura contineret infinita, quorum alterum altero majus esset-animarum originem explicare nequit-2º cum omnes termini sint contingentes, tota series est insufficiens ad existendum-singuli enim termini sunt conditionales, ac proinde per se insufficientes ad sequentes producendos 324

ART. III. *Difficultates.* Dei existentia nequit demonstrari ex rebus contingentibus. Nam 1º idea contingentis supponit ideam necessariam-2º per ea quæ necessaria non sunt, nequit demonstrari id quod est necessarium-3º contingens non requirit

aliam causam quam ens aliud contingens-4º effectus finitus non potest nos adducere in cognitionem causæ infinitæ-5º si existentia entis contingentis esset necessario connexa cum ente necessario, ens contingens esset necessarium. Series infinita ab atheis proposita non repugnat. Nam 1º non repugnat series causarum sine ultima; ergo nec sine prima-2º plures auctores docuere mundi æterni possibilitatem-3º in ea serie singuli termini sunt possibles tum intrinsece tum extrinsece. Respondetur 327

CAPUT III. ARGUMENTUM PHYSICUM.

ART. I. *Expositio.* PROP. III. *Ex admirabili mundi ordine luculenter ostenditur superiorem quamdam Intelligentiam rebus omnibus præesse.* Causa a qua mundus prodiit, certa et aptissima media ad certos fines disposuisse evidenter cernitur. Id demonstrat rerum ordinarum pluralitas, varietas, vires, finis subordinatio ac pulchritudo-eadem ordinis ratio in pluribus existens-opportunæ pro rerum adjunctis mutationes-fines idem pluribus diversissimisque modis obtentus-harmonica finium subordinatio-mira ejusdem rei aptitudo ad plures fines simul obtinendos-motuum, virium, legum ordo et constantia-mirum oppositarum virium æquilibrium-omnium harmonia et pulchritudo-legum omnium contingentia. Confirmatur conclusio ex humanarum artium et scientiarum comparatione. Causa quæ mundum condidit est summe sapiens, potens, pulchra, bona, unica, a tota rerum universitate distincta, et a congerie rerum mundanarum independens. Eadem habet omnem tum in materiam, tum in hominum spiritus potestatem-ab ea dependet hominis vita et mors. Hoc ergo ens est ab homine reverendum, colendum, timeendum et amandum. Hujusmodi autem ens est Deus 330

ART. II. *De Epicuri systemate.* Doctrina Epicuri circa Deos et mundi productionem. PROP. IV. *Epicuri systema de mundi origine absurditatibus scatet.* Præcipuæ sunt: spatium vacuum reale et infinitum-atomi improductæ, æternæ, et multitudine infinitæ-atomi infinitæ et vacuum-motus æternus-atomi infinitæ et motus-motus atomis essentialis-gravitas sine centro gravitatis-atomorum figura, magnitudo, distantia, declinatio, ordo mundi casu constitutus. Permissa Epicuri hypothesi, ea non explicatur constitutio præsentis status mundi-corporum vegetaliū et animalium efformatio et leges-vitæ sensitivæ ac multo magis intellectivæ principium 335

ART. III. *Difficultates.* Nullæ dantur in rerum natura causæ finales. Nam 1º eas excogitavimus quia causas physicas ignoramus-et 2º quia nos propter aliquos fines agere solemus. 3º Ens supremum nulla re eget propter quam agat. 4º Fieri casu potest, ut quædam similitudinem recipiant rerum, quæ ab intelligentia ad finem ordinantur. Fortuitæ atomorum concurrentium conjunctiones, tempore infinito, possibles omnes combinationes efficere debent: inter has vero est etiam hæc

rerum universitas. Ut explicetur mundi ordo, sufficit supponere vires quas habet materia: his enim omnia sunt, et nescimus quousque possint pervenire. In rerum universitate multæ sunt imperfectiones, multa redundantia et inutilia, et ipse mundi ordo sæpe perturbatur. Saltem qui mundum ordinavit non probatur esse ens infinitum. Solutiones subjiciuntur . 358

CAPUT IV. ARGUMENTUM MORALE.

ART. I. *Expositio.* PROP. V. *Universalis et constans humani generis in agnoscenda divinitate consensio atheos omnino profligat.* Adest universalis et constans generis humani consensus in agnoscenda divinitate. Id probatur 1º historicorum ac viatorum relationibus, antiquissimorum philosophorum auctoritate, ipsaque recentiorum atheorum confessione. 2º Vetustissimorum populorum scriptis et traditionibus, monumentis, præsertim sacris et linguis. Hujusmodi persuasio falsa esse nequit; secus dicendum esset hominem ad hunc errorem naturaliter devenisse. Idem confirmatur 1º quia hujus veritatis notitia maxime hominem refert-ejus persuasio humanitatis morumque cultura crescente firmiter evasit, scientiisque proficientibus confirmata est-ejus vero impugnatores athei semper odio et despectui habiti sunt. 2º Hæc persuasio facile infirmari aut etiam penitus tolli potuisset ex molestia quam hominum cupiditatibus infert-multarum gentium barbarie-vitiis corruptisque hominum moribus-obiis et captiosis sophismatibus-polytheismi turpitudine-atheorum cavillationibus-nationum disjunctione . 345

ART. II. *Atheorum hypotheses.* PROP. VI. *Consensio hæc non ab educationis præjudiciis, non a legislatorum fraude, nec ab inani metu, nec a naturalium causarum ignoratione originem duxit.* Non provenit ab educatione, quia hæc diversa est apud diversos populos-præjudicia autem educationis processu temporis deponuntur, saltem a sapientioribus, præsertim si cupiditatibus molesta sint. Non a legislatorum fraude, quia Dei notio viget etiam apud silvestres populos-inverosimile est quod omnibus simul legislatoribus hæc fraus in mentem venerit-moraliter autem impossibile quod ita firmiter, ab omnibus reciperetur, nec unquam detecta fuerit. Dei notio est quovis legislatore antiquior. Non provenit ab ignorantia, quia etiam apud sapientes, et rerum physicarum peritos semper viguit-ab ignorantia potius oritur atheorum hypothesis. Demum Dei notio non provenit a metu, quia in impavidis quoque reperitur hominibus etiam post cognitam immediatam phænomenorum causas homines Deum sibi representant non ut terribilem tyrannum, sed ut beneficium patrem. Etsi Dei notio ab hoc timore orta esset, non ostenderetur esse irrationalis-proinde in ipsis atheis, vel nolentibus, invenitur, qui vere ob timorem eam abjicere conantur. . 347

ART. III. *Difficultates.* Hic consensus humani generis non est universalis: nam constat antiquos quosdam populos, aliosque

nuper repertos fuisse atheos. Philosophi quoque non pauci, tum veteres, tum recentiores athei fuerunt. Fortasse populi antiquitus ignoti, aut alii adhuc incogniti athei sunt: fortasse hæc persuasio evanescet. Etsi hic consensus fuisset universalis, nullam habet vim ad probandam Dei existentiam: nam diversa a diversis populis colebantur Dii-plures per plura sæcula professi sunt polytheismum, qui re idem est ac atheismus. Multæ demum persuasiones universales repertæ sunt falsæ. Singulis respondetur . 351

CAPUT V. DE ATHEISMO.

ART. I. *An esse possint homines athei.* Possunt dari athei negativi ad breve tempus, non tamen ad longum tempus. Animadversio in traditionales. Dari etiam possunt athei positivi, saltem ad breve tempus. Judicium quo atheus Deum esse negat aut dubitat, est semper error formalis. Qui constanter Deum sermonibus aut scriptis negat, contra mentem loquitur. Nequit atheus quilibet se a summæ imprudentiæ nota excusare . 354

ART. II. *De exitialibus atheismi consecrariis.* Atheismus 1º sapientiam perimit, atque in omni cognitionum ordine tenebras offundit-2º humanæ naturæ osor est et inimicus 3º humanam societatem impossibilem reddit. . 357

LIBER SECUNDUS.

CAPUT I. DE ESSENTIA DIVINA.

ART. I. *Quid essentiæ divinæ nomine intelligatur.* Quid Deus sit non immediate cognoscimus, sed argumentando deducimus. Duplici in hoc utimur via, remotionis et analogiæ. Quid a nobis vocetur essentia Dei, et quomodo ab ejus attributis distinguatur. *Esse a se* est id quod primo de Deo concipitur, et ex quo cætera ejus attributa deducuntur . 360

ART. II. *Deum non esse in ullo genere.* PROP. I. *Divina essentia non est in ullo genere, quod sit ipsi et alicui alteri naturæ commune.* Probatur 1º quia hoc genus non aliud esse posset quam ens, quod nequit esse genus. 2º Genus per se est indifferens ad existendum, quod dici nequit de essentia divina. Deus est supra omne genus. Quid Deus sit, proprie definiri nequit, ideoque Deus est incomprehensibilis. Nomina quæ tribuntur Deo simul et creaturis, sunt analogæ. Opp. 1º Deus est in genere substantiæ, quia est ens per se. 2º Res creatæ etiam in essentialibus Deo similes sunt, ideoque habent aliquid logice commune cum Deo. Respondetur. Etsi dici possit creaturam esse similem Deo, non potest recte dici Deum esse creaturæ similem . 361

ART. III. *De infinita Dei perfectione.* PROP. II. *Deus est ens actu infinitum.* Nam 1º ens a se limites habere omnino, quæ pertinent ad rationem essendi-3º causa prima debet continere perfectiones omnium possibilem. Deus continet perfectiones simplices formaliter, mixtas eminenter et virtualiter. Perfectiones simpli-

ces non sunt in Deo secundum eam rationem quam habent in rebus creatis. Quæ nomina Deo absolute tribui possint. Nomina Deo et creaturis communia analogia sunt. Quo sensu Deus dicatur *ipsum esse, totum esse, plenitudo essendi*. . . 364

CAPUT II. DE PANTHEISMO.

ART. I. *De Pantheismi diversis formis.* Quid sit pantheismus cur pantheistæ dicantur athei indirecti Triplex pantheismi forma. *Emonatio transiens.* Erroris hujus antiquitas: præcipui ejus auctores *Evolutio immanens realis.* Spinoza. *Pantheismus idealis.* Schola vedantica-eleatenses. Fichte-Schelling-Hegel-eclectici et saint-simoniani . . . 367

ART. II. *Generalis Pantheismi confutatio.* Essentia pantheismi, quæcunque sit ejus forma, est doctrina *identitatis universalis* PROP. I. *Systema identitatis universalis est absurdum in se, et quam quod maxime perniciosum.* Est absurdum quia 1º contradicit experientiæ externæ-et 2º experientiæ internæ-3º tot in se contradictiones continet. quot continentur hac complexione idearum *Deus-mundus.* Est perniciosum quia 1º eadem, quæ atheismus, parit incommoda-2º insuper tollit humanam libertatem, ac proinde omnem moralitatem-3º discrimen subruit inter verum et falsum, atque ens cum non ente identificat 4º idealismum, scepticismum et turpissimum egoismum infert . . . 372

ART. III. *Difficultates.* Ens infinitum, quod est Deus, omnem continere debet realitatem; ergo nulla realitas extra Deum. Nam 1º Deus est ipsum esse; esse autem complectitur omnia quæ sunt-2º idea entis in genere infinitatem quamdam præfert et necessitatem; ideoque objectum ejus idea est ens infinitum et necessarium-3º si Deus esset ens determinatum, esset in eo aliqua negatio-4º ens finitum est non-ens; nam limites nihil est. Præter ens infinitum nullum aliud ens ab eo distinctum intelligi potest: nam 1º si existeret corpus infinitæ magnitudinis, nullum aliud corpus posset existere-2º ex eo quod unum corpus est extra alterius locum, extensione finitum esse intelligitur. Si extra ens infinitum essent entia finita posset excogitari aliquid majus infinito; nempe infinitum una cum entibus finitis. Finitum ab infinito produci non potuit. Responsiones . . . 376

ART. IV. *Refutatur pantheismus realis.* Hic pantheismus ad has tres propositiones reducitur: 1º unica existit in mundo substantia-2º ejus attributa necessaria sunt cogitatio et extensio-3º hujusmodi substantia est infinita. PROP. II. *Tres istæ assertiones sunt errores turpissimi et manifesti.* Nam 1º ex ipsa definitione substantiæ a Spinoza allata consequitur plures existere in mundo substantias-2º cogitatio est essentialiter indivisibilis, extensum vero est essentialiter divisibile-3º cogitatio quæ huic substantiæ tribuitur, est limitata et imperfecta; extensio est essentialiter finita-et utraque perpetuo mutatur . . . 380

ART. V. *Spinozæ argumentatio refellitur.* Duplex substantiæ definitio a Spinoza allata perpenditur. Ejus argumentatio huc reducitur: 1º Unica existit, eaque necessaria substantia: nam ad naturam substantiæ pertinet existere-2º una substantia non potest prodici ab alia-3º secus unius substantiæ cognitio a cognitione alterius penderet, quod dici nequit-et præterea, cum duæ substantiæ nil habeant commune inter se non potest ulla alteram producere-4º non possunt dari plures substantiæ ejusdem attributi, quia non distinguerentur. Singulis respondetur. Quibus æquivocationibus tota Spinozæ argumentatio innitatur. Redarguuntur Spinozæ laudatores . . . 383

ART. VI. *Confutatur pantheismus idealis.* Pantheismi idealis expositio ac generalis formula. PROP. III. *Pantheismus idealis 1º est eminenter absurdus; 2º pugnat cum elementaribus intellectus humani notionibus; 3º arbitrarius est in suis principiis et assertionibus; et est 4º in sua disserendi ratione turpiter sophisticus.* Sane 1º hic pantheismus turpissimo nititur idealismo-ipsam absolutum et infinitum assidue illud ponit-nihilismum inducit-asserit esse et nihilum idem esse.-2º Hoc idem systema opponitur ideis individui et personæ, distinctionis, multitudinis, universalitatis, realitatis et ordinis-ideas essentialium prorsus vanas facit-nulla, eo admissa, est substantia, nullum accidens; nulla possibilitas aut contingentia-infiniti notio chimærica est-nulla est distinctio inter subjectum et objectum-notiones veri et falsi, boni et mali, juris et officii absurdæ sunt-3º principia quibus innititur, assertionesque quas continet arbitrarie sunt, omnino novæ, non tamen probantur nec probari possunt-4º pantheistæ ideales experientis et intellectus notionibus, quas inter illusiones rejiciunt, suam theoriam probant æquivocationibus et puerilibus cavillationibus ludunt. Afferuntur bina ratiocinia, specimen dialecticæ transcendentalium: alterum ex Fichte, alterum ex Hegel . . . 387

CAPUT III. DE UNITATE DEI.

ART. I. *Statuitur divinæ naturæ unitas.* PROP. I. *Deus unicus est.* Nam 1º unicus est, imo esse debuit mundi auctor. 2º Si Deus unicus non esset, haberet sibi æqualem; non esset rerum omnium causa efficiens finalis et exemplaris; nec esset omnino independens; quæ dici nequeunt de ente infinite perfecto-3º Singularitas est de essentia naturæ necessaria. Hinc 1º natura divina nequit per productionem multiplicari-2º Deus, et solus Deus, est sua essentia . . . 393

ART. II. *Difficultates.* Unitas importat solitudinem. Non repugnat æqualis plurium perfectio in eodem genere. Pluralitas nullam adimit perfectionem. Sunt in Deo tres Personæ infinitæ et æquales. Si Deus non posset producere ens infinite perfectum, non haberetur terminus adæquatus infinitæ ejus potentæ, nec effusio conveniens bonitatis ejus. Responsiones. Aliquid

de populorum consensu in polytheismo profitendo et de miraculis quæ apud gentiles patrata dicuntur 396

LIBER TERTIUS.

CAPUT I. DE SIMPLICITATE ET IMMUTABILITATE DEI.

- ART. I. *De physica Dei simplicitate.* PROP. I. *Deus est physice simplicissimus: nempe non est in Deo compositio essentialis, nec accidentalis, nec quantitativa, neque ulla alia vera compositio.* Nam 1° Deus est ens a se-2° est ens necessarium-3° est independens et est primum ens 4° ens unicum infinitum neque ex infinite perfectis partibus, neque ex imperfectis coalescere potest. Hinc Deus nec est corpus, nec constat ex spiritu et corpore-nullum in Deo est accidens a substantia distinctum-omnes actus Dei cum ejus substantia identificantur. Hobbesii cavillatio retunditur. Trinitas personarum Deum compositum non facit 399
- ART. II. *De immutabilitate Dei.* PROP. II. *Deus est absolute et in omnibus immutabilis.* Probat 1° ex absoluta Dei necessitate-2° ex infinita ejus perfectione. Hinc non est in Deo ulla potentia ab actu distincta; multo minus plures potentie-nulla in eo habetur actuum successio-realis relationis fundamentum contingens in Deo nullum esse potest-mutari tamen possunt relationes ejus extrinsecæ 401
- ART. III. *De metaphysica Dei simplicitate.* PROP. III. *Deus est metaphysice simplex et actus purissimus.* Nam 1° in Deo nequit esse compositio ex genere et differentia; quia non est sub ullo genere-non ex supposito et natura; quia Deus est sua propria natura non ex essentia et esse; quia essentia entis a se in statu possibilitatis concipi nequit-2° Deus habet totum essendi actum, quem habere potest natura perfectissima, seu actum purissimum; Deus autem est suum esse et suus actus. Quomodo actus iste purissimus tam diversa, imo et opposita distinctisque temporibus agere possit, quin mutetur. Distinctio inter actus divini entitatem ejusque terminationem-hæc mutari potest, non vero illa. Res similitudine solis illustratur. Relationes omnes inter Deum et creaturas sunt intrinsecæ ex parte rerum creaturarum, et extrinsecæ ex parte Dei 402
- ART. IV. *De distinctione rationis inter divinas perfectiones.* PROP. IV. *Quamvis hæc ita se habeant, potest tamen atque adeo debet humana ratio divinas perfectiones et operationes inter se distinguere, distinctione, quam dicunt rationis ratiocinata.* Nam 1° hujus distinctionis fundamentum extrinsecum præbent multiplices et diversæ relationes quas res creatæ habent ad actum illum purissimum-2° ea distinctio fieri debet ab humana mente, quia limitata est; nulla est in ea falsitas-3° ex hujusmodi distinctionis neglectu multa et gravissima sequerentur absurda 403
- ART. V. *Difficultates.* Deus cognoscit res modo futuras, modo præsentis, modo præteritas-mutat voluntatem, quum v. g. pla-

catur aut preces exaudit-mutat operationem, quum de non creante sit creans. Impossibile videtur, unum eundemque actum esse simul actum amoris et odii, veniæ et vindictæ etc. Si relationes Dei ad res creatas sunt extrinsecæ, Deus non est realiter creator et dominus. Necessario concipi debent in Deo actiones successivæ; non enim potest e. g. velle aliquid, nisi illud prius intellexerit. In divina incarnatione Deus Verbum factus est homo, cum prius non esset homo. Subduntur responsiones 407

CAPUT II. DE IMMENSITATE ET ÆTERNITATE DEI.

- ART. I. *De omnipræsencia divinæ substantiæ.* Quid significet Deum esse immensum. Triplici modo ens certo in loco esse potest, nempe *per potentiam, per præsentiam et per essentiam.* Substantia existere potest in loco vel *circumscriptive*, vel *per contactum virtutis*, idque vel *definitive* vel non. PROP. I. *Divina substantia in omnibus rebus est et in omni loco.* Nam Deus in omnibus rebus immediate et intime agit. Hinc debet esse in omni loco-est etiam in spiritibus Deus est totus in singulis quibusque mundi partibus 410
- ART. II. *De immensitate.* Divina substantia talis est, ut infinitis terminis præsens inesse possit; nulla tamen in ea est potentialitas-quæ tota se habet ex parte terminorum. Immensitas est attributum Dei necessarium, et ab ubiquitate distinguitur, estque perfectio positiva et absoluta. PROP. II. *Deus est immensus.* Probat 1° ex Dei omnipotentia, ex infinita ejus perfectione, et absoluta necessitate 412
- ART. III. *Difficultates.* Quæ ex Dei simplicitate et immutabilitate opponuntur, generatim ex expositis theoriis evertuntur. Enodantur hæc alia objecta: Ut monumentum indivisibile non potest esse in diversis temporibus, ita nec indivisibile permanens in pluribus locis. Quod est totum alicubi, nihil ejus est extra illum locum. Indignum est Deo rebus fœdis et vilioribus inesse Deus dicitur esse in cœlo, in templo, in justorum animis, etc.: non est ergo in omnibus locis. Si Deus est actu immensus, existeret quoque in spatiis imaginariis, quæ nihil sunt. 414
- ART. IV. *De æternitate Dei.* Æternitatis definitio. Æternitas non debet concipi ut tempus actu infinitum. Tempus nequit haberi ut pars æternitatis. Æternitas coexistit omni tempori, sed non coextenditur cum tempore-æquivalens tamen tempori indefinito: Definitio æternitatis a Boëtio tradita expenditur, et ad priorem reduci demonstratur. PROP. III. *Deus est æternus.* Nam 1° Deus non habet initium; quia est ens a se, absolute necessarium, et prima omnium causa-2° non habet finem; quia est absolute necessarium, et deficiendi ratio in eo nec externa nec interna inveniri potest-3° in ejus existentia nulla est successio, quia est ens immutabile et infinite perfectum. Opp. æternitas, utpote indivisibilis, unicuique temporis dif-

ferentiae tota coexistit: ergo unaquæque creatura toti æternitati coexistit. Responsio 416

CAPUT III. DE INTELLECTU DIVINO.

ART. I. *De scientia Dei.* Scientia Dei non continetur actibus successivis-non est ratiocinio parta-non coalescit idearum compositione et divisione-non efficitur accidentalibus perceptionibus et abstractionibus-non est habitus. Est autem simplicissima, infallibilis, immutabilis, infinita-et est idem ac divina substantia et essentia. Objectum divinæ scientiæ primum et secundarium. Divisio scientiæ Dei in necessariam, liberam et mediam-in scientiam simplicis intelligentiæ, visionis et mediam-in speculativam et practicam. Quæ scientia Dei, et quo sensu rerum causa dicatur 419

ART. II. *De scientia necessaria.* PROP. I. *Deus seipsum intelligit et adequate comprehendit.* Nam 1^o divina essentia est intelligibile perfectissimum, et divino intellectui intime præsens-2^o divina intelligentia est, ut divina essentia, infinita, et tota semper in actu. PROP. II. *Deus omnia possibilea cognoscit.* Nam 1^o scientia Dei est infinita-2^o omnia possibilea sunt divinæ essentiæ similitudines-3^o Deus debet cognoscere quicquid facere potest. Deus enuntiabilia omnia, et omnia quoque mala cognoscit. 423

ART. III. *De scientia libera.* PROP. III. *Deus cognoscit omnia futura necessaria.* Nam naturalium causarum virtutem adequate cognoscit. Hinc etiam futura necessaria conditionata in causis cognoscit-ea quoque quæ per accidens a causis suis dimanabunt. PROP. IV. *Deo perspecta sunt omnia futura libera.* Nam 1^o ea cognoscere magna est perfectio-2^o si non essent Deo ab æterno perspecta, ab eo cognoscerentur, quum præsentia fiunt, quod repugnat-3^o Deus ab æterno cognoscit omnem veritatem-4^o Deus in sua æternitate omnia æque sibi præsentia habet-5^o Idem communis omnium gentium consensus et historia confirmat 424

ART. IV. *De scientia conditionata.* PROP. V. *Porrigit se quoque divina scientia ad quoscunque liberos actus, qui, quibusvis adjunctis positis, futuri essent.* Nam 1^o eos cognoscere bonum est, per se desirabile, et magna perfectio-2^o si eos Deus non cognosceret, certam innumerarum questionum solutionem ignoraret-3^o actionum liberarum cognitio in Deo a creatura ut a principio determinante dependeret-4^o aliqua Dei decreta essent improvida et consilia incerta-5^o aliqua infallibiliter intendere non posset-6^o Id confirmat hominum consensus 427

ART. V. *Quomodo hæc omnia cognoscat.* Quid sit principium formale cognitionis. PROP. VI. *Formale divinæ cognitionis principium nullum est aliud quam divina essentia.* Quia 1^o secus in Deo esset aliquid accidens-2^o intelligentia Dei est ejus esse. Hinc 1^o in Deo non sunt plures species intelligibiles ad res diversas intelligendas-2^o Divina essentia est omnium rerum species intelligibilis-non tamen species propria. Quid sit co-

gnitionis medium. ASSERTIO I. *Deus primo et per se seipsum intelligit, ac seipsum solum.* Nam omnia intelligit specie suæ essentiæ. ASSERTIO II. *Deus se et res alias a se cognoscit in seipso.* Nam omnia intelligit unica specie, quæ est ejus essentia. Hoc ipsum fusius declaratur. Quid differant cognoscere res secundum esse quod habent in seipsis, et eas cognoscere in seipsis. Aliquod objectum extra Deum potest esse conditio requisita ut divina cognitio ad ipsum terminetur. Divina essentia cognoscitur a Deo ut objectum materiale simul et formale, cætera autem ut objectum pure materiale. ASSERTIO III. *Deus primo, in essentia sua essentias omnes possibileas intelligit; tum in iis omnia possibilea individua distincte cognoscit; demum in his ipsis individuis omnes eorum possibileas actus, modificationes, relationes perspectas habet.* ASSERTIO IV. *Futura necessaria, ante creationis decretum; nota Deo sunt, secundum esse quod habent in suis possibileis causis, et in ipsius Dei potentia: post decretum vero, scientia visionis et causas et effectus contuetur Deus, secundum esse quod in seipsis habent.* ASSERTIO V. *Futura libera non possunt a Deo prænosci secundum quod in suis causis præexistunt.* ASSERTIO VI. *Hæc igitur ante creationis decretum per scientiam mediam, tanquam futura conditionata, cognoscit; post decretum autem intuetur scientia visionis secundum esse quod habent in seipsis.* ASSERTIO VII. *Futura conditionata cognosci infallibiliter non possunt, sive in voluntate considerata ut potentia, sive ex nexu aliquo objectivo et necessario consecutionis conditionem inter et conditionatum.* Nexus inter hæc duo non est physicus, sed historicus; et consequentiæ unius ab altero necessitas est solum logica. ASSERTIO VIII. *Dicendum est igitur, futura conditionata a Deo cognosci, secundum esse ipsorum proprium, quod haberent, si certa illa adjuncta ponerentur.* Id ostenditur ex infinitate tum divini intellectus, tum divinæ essentiæ. Quomodo id quod nunquam actu futurum est, possit esse actu præsens divino conspectui. Deus est ipsa veritas et prima ac summa veritas 429

ART. VI. *Difficultates.* Duo præstituuntur, quibus omnis hæc in re difficultas præciditur. Solvuntur objecta sequentia. Quod Deus prævidit necessario futurum est: ergo quicquid prævidit non est liberum. Stante Dei prævisione, homo non potest se aliter determinare; secus præscientia Dei esset fallibilis. Scientia Dei omnes actus liberos præcedit: ergo hi actus ab ipsa dependent necessitate antecedente. Secus dicendum esset, scientiam Dei dependere a voluntate creaturæ, et esse contingentem. Futura conditionata, neque in seipsis, infallibiliter cognosci possunt, quia nunquam habebunt esse determinatum 435

CAPUT IV. DE DIVINA VOLUNTATE.

ART. I. *Cujusmodi sit Dei voluntas.* Voluntas Dei non est potentia, sed actus, estque ipsa Dei essentia. Ejus objectum princeps

et necessarium est divina ipsa essentia, secundarium res finitæ. Deus non vult unum propter aliud, aut quia vult aliud, sed vult unum esse propter aliud. Nullæ affectuum passionum in Deo reperiri possunt. Quæcunque affectiones imperfectionem aliquam continent, solum metaphorice Deo tribuuntur-qua de causa. Affectiones voluntatis quæ nullam in se continent imperfectionem, proprie in Deo sunt. Discrimen inter Dei amorem et nostrum erga res.

- ART. II. *De voluntatis divinæ libertate.* Dei voluntas ab omni coactione libera est. Deus necessario seipsum amat ut finem; libere autem vult res finitas-non est in eo libertas ad bonum ac malum morale. In divina libertate nulla continetur iudicii suspensio, aut cunctatio voluntatis. Deus unico actu omnia constituit, quæ in serie temporum voluit, fecit, permisit. Dei libertas sita est in indifferentia, non potentie ad actum, sed actus ad objectum. PROP. *Divina voluntas circa bona finita indifferentie libertate gaudet.* Nam 1º libertas per se est perfectio simplex-2º nullum bonum necessarium est divinæ bonitati.-3º Si Deus circa ea bona liber non esset, supponi in eo deberet error vel inordinatio naturalis et 4º ab extrinseco determinari deberet ad ea appetenda. 439

- ART. III. *Difficultates.* 1º Actus liber is est qui potuit esse et non esse: sed omnia quæ in Deo sunt, necessaria sunt. 2º Libertas est in hoc quod voluntas indifferenter se habeat ad utrumlibet: sed quod ita se habet, est in potentia: in Deo autem nihil esse potest in potentia. 3º Deus eodem actu vult se et alia: actus autem quo se vult est necessarius. 4º Actus liberi in Deo non sunt denominationes extrinsecæ. Singulis respondetur, distinctione adhibita inter divini actus entitatem, et multiplicem respectum, quem hæc ad diversos terminos habere potest-quæ distinctio similibus quibusdam illustratur. 441

CAPUT V. DE ATTRIBUTIS MORALIBUS.

- ART. I. *Quenam sint attributa moralia.* Quid rei hoc nomine veniat. Virtutes morales non sunt in Deo ad modum habitus sed sunt ipsa divina essentia-ideoque in eo sunt necessitate absoluta. Virtutes morales quæ sunt circa passiones, solum per metaphoram, Deo tribuuntur-quædam autem ex his, ne metaphorice quidem. Quæ virtutes sint in Deo formaliter. Præcipua moralia attributa sunt sanctitas, benignitas et justitia. Ad alteram revocantur patientia, clementia, misericordia. 446
- ART. II. *De bonitate Dei.* Deus tripliciter dicitur bonus. PROP. I. *Summa est divinæ voluntatis propensio ad bonum quod habet, aliis communicandum.* Nam bonitas natura sua movet ad boni communicationem. Summæ illius propensionis indicia et effectus. Actualis divinæ bonitatis communicatio necessaria non est-et est semper finita. 448
- ART. III. *Quomodo divina voluntas se circa malum habeat.* Status quæstionis definitur. PROP. II. *Deus velle potest malum metaphysicum, imo debet illud velle, si quid vult extra se.* Nam

huiusmodi malum necessario inest iis omnibus, quæ Deus extra se velle potest. PROP. III. *Deus non potest physicum malum per se intendere*-quia non potest in malo creaturæ delectari. Quo sensu quædam a Deo odio haberi dicantur. PROP. IV. *Deus malum physicum intendere potest, tanquam medium, ratione alicujus boni.* Nam 1º quædam maxima bona, quæ Deus certe velle potest, non nisi per physica aliqua mala obtineri queunt. 2º Deus non tenetur adhibere medium melius altero ad finem aliquem obtinendum. PROP. V. *Nequit Deus malum morale intendere, nec ut finem, nec ut medium; potest tamen illud permittere.* Discrimen inter voluntarium intentivum et permissivum. Si Deus vellet malum morale ut finem vel ut medium, illud approbaret, et esset vera ejus causa. Huiusmodi mali permissio, cum nullam ipsius mali approbationem aut intentionem includat, Dei bonitati non opponitur-imo ab ejus providentia postulatur. 449

- ART. IV. *Quomodo mala quæ in mundo sunt cum divina bonitate componantur.* PROP. VI. *Mala quæ in mundo sunt, cum divina bonitate non pugnant.* Non malum metaphysicum, quia necessario inest rebus omnibus creatis-non mala physica, quia a Deo ad fines bonos obtinendos diriguntur-non malum morale quia 1º hoc a Deo non intenditur, imo positive reprobat-2º non necessario sequitur ex iis, quæ Dei voluntas intendit-nec 3º aliunde tenetur Deus illud impedire. Cur Deus mala, præsertim moralia, permittat. Finis propter quem Deus mala moralia permittit, non est illud bonum, quod ex malo permissio elicitur. Hoc bonum Deus non vult voluntate antecedente, sed solum voluntate consequente. Quæ sit causa finalis permissionis peccati. 453

- ART. V. *Difficultates.* Nulla potest assignari ratio, cur Deus essentialiter bonus tam multa mala esse sinat-sunt imo multa mala, quæ ad nullum bonum finem dirigi possunt. Nunquam sunt facienda mala, ut eveniant bona Deus suos fines absque ullo malo physico obtinere poterat. Si omne malum impediret, esse multo magis bonus. Cur suas creaturas æqualiter non amat? Deus voluit peccati incitamenta, quæ sunt animi humani cupiditates; et peccati causam, quæ est arbitrii libertas. Qui effectum prævidet et causam ponit, effectum velle censetur: sic pater qui filio ensem porrigit quo se interfectorum prævidisset, complex ejus necis censeretur. Deus debet omnino peccatum impedire: nam sanctitas infinita odio infinito peccatum prosequitur-nullum autem est bonum quod peccati malum compensare queat-saltem ex amore et bonitate sua tenetur omnia facere quæ potest, ut homines a malo retrahat-secus crudelitatis argui posset. Solutiones subduntur. 456

CAPUT VI. DE POTENTIA DEI.

- ART. I. *Quid sit in Deo potentia.* Potentia in Deo neque est facultas ab actu distincta, neque accidens, sed est ipsa Dei essentia. Intellectus, voluntas, et potentia in Deo solum ratione nostra INSTITUTIONES, ETC. III. 95

distinguuntur. Actio divinæ potentia non est proprie transiens, sed immanens-aliquo tamen sensu transiens dici potest. Recte dicimus, Deum intelligendo et volendo res extra se producere, et omnia operari quæ operatur Divina potentia est quidem principium suorum effectuum, non tamen actionis divinæ, qua illi producuntur. Licet divina potentia tota sit in actu, non tamen facit omnia quæ facere potest . . . 460

ART. II. *De potentia divinæ amplitudine.* PROP. I. *Divina potentia est omnino infinita.* Nam 1º secus posset cogitari aliquid Deo perfectius 2º Dei essentia est infinita. PROP. II. *Deus est omnipotens.* Quid sit omnipotentia. Prob. prop. 1º ex præcedenti-2º ex infinita divinæ essentia perfectione. Deus quædam nec velle nec facere potest *absolute*, quædam solum *ex suppositione*-quin tamen per hoc ejus omnipotentia derogetur. Quomodo sit intelligenda in Deo potentia *absoluta* et potentia ordinaria . . . 462

LIBER QUARTUS.

CAPUT I. DE CREATIONE.

ART. I. *Deum esse rerum creatorem.* PROP. I. *Solus Deus creandi virtutem possidet.* Rerum existentia explicari nequit, nisi saltem aliquid a Deo immediate e nihilo productum seu creatum ponamus. Solus Deus creare potest: 1º quia, quum nulla ad opus exsequendum materia præexistit, infinita requiritur virtus ad illud producendum-2º infinita est distantia a pura potentia essendi ad existentiam-3º esse simpliciter, utpote effectus maxime universalis omniumque primus, causari debet a causa prima et maxime universali, quæ est Deus. . . 464

ART. II. *Error manicheorum refellitur.* Variæ dualismi formæ. PROP. II. *Manicheorum hypothesis intrinsece absurda est, et ad finem, ad quem assumitur, prorsus inutilis.* Nam 1º repugnat res aliqua per se mala, multoque magis principium summe malum-2º bonorum et malorum permixtio potest optime explicari extra hypothesim manicheorum-imo hæc illam inexplicabilem facit. Absurda est Baylii suppositio, bina principia aliquid sibi mutuo concessisse, ut finis pugnandi fieret. Opp. 1º Summum bonum necessario excludit omne malum. 2º Effectus oppositi ad oppositas causas referendi sunt. 3º Bonum et malum sunt contraria: sed contrariorum utrumque aliquid positivum est. 4º Ubi invenitur magis et minus, ibi invenitur summum. Respondetur singulis. . . 466

ART. III. *De fine et perfectione mundi.* Divina voluntas non movetur ad agendum *fine operantis*. Divina tamen bonitas est Deo ratio volendi quæcunque extra se vult. Est in Dei operibus *finis operis* qui est divinarum perfectionum manifestatio. Hæc manifestatio absolute et efficaciter a Deo intenditur. Res diversæ, pro suæ naturæ diversitate, finem hunc ultimum diversimode assequuntur. Homo est secundarius *finis*, cui visibilis hæc rerum universitas inservit. Homo amator a Deo amore bene-

volentia. Manifestatio divinæ perfectionis gradus habere potest-ille autem gradus, quem Deus ut mundi finem præstituit, non potuit esse omnium possibilem maximus. Mundus est in suo genere perfectus. Doctrina *optimismi* absurda est . . . 469

CAPUT II. DE INFLUXU DEI IN RES CREATAS.

ART. I. *De conservatione.* Conservatio indirecta et directa. Utraque Deus res creatas conservat. Quo sensu conservatio directa dici possit continuata creatio. Conservatio a creatione solum ratione distinguitur-proprie est actio immanens . . . 472

ART. II. *Utrum Deus omnia conservet.* PROP. I. *Omnia quæ sunt, conservantis Dei virtute indigent, ut esse pergant.* Nam 1º continuatio existentia est aliquid ab initio existentia distinctum, cujus causa esse nequit ipsum existendi initium, nec entis essentia, nec aliud ens contingens-2º Ens quod creatur, nec virtutem ex se habet servandi ipsum esse, nec principium a quo existentia procedit, per creationem recipit. Opp. 1º Effectus finitorum agentium esse perseverant, etiamsi cause operatio cesset: multo magis hoc existimandum erit de effectibus Dei-2º Creaturæ conditio non postulat ut postquam existentiam accepit, nova ejus collatione perpetuo indigeat. 3º Multa a causis secundis conservantur. Respondetur. Ad annihilationem non requiritur actio positiva. Annihilatio ad solum Deum pertinet. . . 474

ART. III. *De concursu Dei.* Quid sit naturalis Dei concursus. Concursus medius et immediatus, physicus et moralis. Concursus Dei generalis et specialis. Concursus Dei in se est actio immanens, quæ tamen ratione effectus, qui extra Deum recipitur, transeunti æquivaleret actioni-prouti recipitur in creatura, non est aliquid prævium ipsius actioni, sed actionem ipsam causæ secundæ comitatur. Tum causa prima, tum causa secunda in eundem effectum immediate influunt. Utraque est causa totalis effectus, sed diversimode. Imo utriusque causæ una eademque est actio-quæ in eodem subjecto recipitur. Explicantur effata illa: *causa secunda non agit, nisi mota a prima; et applicatur a prima ad agendum; et agit in virtute primæ* . . . 477

ART. IV. *Probatur divinus concursus.* PROP. II. *Deus omnibus agentibus cooperatur.* Nam 1º conservatio secundum rem a productione non differt: omnes autem effectus a Deo conservantur-2º Effectus omnis, utpote ens, debet quoad ipsum esse a Deo dependere. 3º Agentia creata, cum ex ipsa sua essentia Deo subordinata sint, etiam quatenus agentia sunt, ei subordinata sint oportet. 4º Observatio ostendit, causas omnes creatas in suis operationibus superiori aliqua virtute immediate cooperante dirigi et gubernari. Opp. 1º Quum una eademque actio est a duobus agentibus, utrumque est causa partialis: hoc autem de Deo dici nequit. 2º Causæ secundæ possident suffi-

cientem et completam virtutem agendi ea quæ agere possunt: ergo superioris causæ auxilio non indigent. 3^o Si effectus causarum proprios Deus operatur, ad eundem effectum producendum causæ secundæ frustra adhibentur. Respondetur. Conciliatur libertas hominis cum concursu Dei, itemque Dei sanctitas cum ejus concursu ad actus pravos . . . 480

CAPUT III. DE PROVIDENTIA DIVINA.

ART. I. *Statuitur providentia divina.* Quid sit providentia, gubernatio, cura. In quo sita sit Dei providentia. PROP. I. *Deus de omnibus et singulis rebus providentiam sapientissimam habet.* Nam 1^o id palam facit mundi consideratio-2^o Deus singula ad finem ordinat et dirigit-3^o nulla ejus incuriæ reddi posset ratio. PROP. II. *Dei providentia ad singularia se porrigit, etiam ad res minimas atque vilissimas.* Nam 1^o Deus singularia omnia propter finem efficit. 2^o Non dedecet Deum ea gubernare, quæ non dedecuit eum creare et conservare. 3^o Dei providentia in minimis æque ac in maximis se manifestat. 4^o Gubernatio etiam humana ad individua se extendat oportet-discrimen inter humanam et divinam providentiam. PROP. III. *Speciali providentia intellectuales creaturæ a Deo gubernantur.* Probatur 1^o quia in iis et per eas finis creationis ultimato obtinetur. 2^o ex eo quod eæ solum in finis sui assecutione felices esse possunt, ex ejusque amissione miserrimæ evadunt-3^o ex consideratione mediorum, quæ homini collata sunt-4^o ex Dei cura in societate conservanda-5^o ex constanti humani generis consensu. Unaquæque res ad peculiarem finem ordinata est, et mediis ad ipsum assequendum instructa. Nullus est respectu Dei eventus fortuitus. Homo quilibet in promptu habet media, quibus honeste sancteque vivere, et exinde felicitatem in futuro assequi possit. Mala omnia, sive physica sive moralia, quæ in mundo sunt, medii rationem habent. Quidquid homini accidit, idoneum illi est medium ad suum finem obtinendum . . . 485

ART. II. *De bonorum et malorum distributione.* Difficultas contra divinam providentiam ex bonorum ac malorum distributione. Quomodo ea proponi debeat. exaggerationibus sublatis. Multæ reddi possunt rationes promiscuæ boni ac mali distributionis in hoc mundo, 1^o ex eo quod vita hæc præsens stadium est probationis ac meriti-2^o ex parte justitiæ Dei-3^o ex parte sapientiæ Dei, quæ per hunc providentiæ ordinem physicum ordinem servat-et naturam humanam modo huic congruo gubernat . . . 489

ART. III. *Difficultates.* Multa sunt in mundo plane inutilia, mala ac noxia. Si Deus esset provisor, deberet mala avertere ab iis quos gubernat. Maxima hominum pars non assequitur felicitatem, quæ est hominis finis. Multi laborant defectu mediorum, quæ ad vitam conservandam necessaria sunt. Deum non decet, ut ad res vilissimas gubernandas se de-

mittat. Experientia ostendit, sua cuique negotia succedere, prouti magis vel minus sibi consulit, non autem juxta meritum et jus. Si Deus omnibus in particulari providet, impium est industria propria uti, vel hominum auxilia quærere. Singulis respondetur. Quomodo hominis industria cum Dei providentia sociari debeat . . . 492



COLUMBIA UNIVERSITY



0032198060